


Ri utzilaj tzij re
ri kanimajawal
Jesucristo



New Testament in Achi Rabinal; acr (GT:acrT:Achi)

**Ri utzilaj tzij re ri kanimajawal Jesucristo
New Testament in Achi Rabinal; acr (GT:acrT:Achi)**

copyright © 2009 Wycliffe Bible Translators, Inc.

Language: Achi

Dialect: Rabinal

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Achi

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 9 Oct 2020
a2970064-f021-521c-ab99-6401141f84e7

Contents

FRT	1
Introducción	3
Mateo	5
Marcos	61
Lucas	96
Juan	156
Hechos	198
Romanos	255
1 Corintios	280
2 Corintios	305
Gálatas	320
Efesios	329
Filipenses	337
Colosenses	343
1 Tesalonicenses	348
2 Tesalonicenses	353
1 Timoteo	356
2 Timoteo	363
Tito	368
Filemón	371
Hebreos	373
Santiago	392
1 Pedro	398
2 Pedro	405
1 Juan	409
2 Juan	415
3 Juan	416
Judas	417
Apocalipsis	420
Vocabulario Bíblico	446

Ri Utzilaj Tzij re ri Kanimajawal Jesucristo

El Nuevo Testamento en Achí
Rabinal

(ortografía tradicional)

[acr]

Traducción: © 2009, Wycliffe Bible
Translators, Inc.

Primera Edición

© 2009, Wycliffe Bible Translators,
Inc.

Abreviaturas

Génesis	Gn.
Éxodo	Éx.
Levítico	Lv.
Números	Nm.
Deuteronomio	Dt.
Josué	Jos.
Jueces	Jue.
Rut	Rut
1 Samuel	1S.
2 Samuel	2S.
1 Reyes	1R.
2 Reyes	2R.
1 Crónicas	1Cr.
2 Crónicas	2Cr.
Esdras	Esd.
Nehemías	Neh.
Ester	Est.
Job	Job
Salmos	Sal.
Proverbios	Pr.
Eclesiastés	Ec.
Cantares	Cnt.
Isaías	Is.
Jeremías	Jer.
Lamentaciones	Lm.
Ezequiel	Ez.
Daniel	Dn.
Oseas	Os.
Joel	Jl.
Amós	Am.
Abdías	Abd.
Jonás	Jon.
Miqueas	Mi.
Nahum	Nah.
Habacuc	Hab.
Sofonías	Sof.
Hageo	Hag.
Zacarías	Zac.
Malaquías	Mal.

Mateo	Mt.
Marcos	Mr.
Lucas	Lc.
Juan	Jn.
Hechos	Hch.
Romanos	Ro.
1 Corintios	1Co.
2 Corintios	2Co.
Gálatas	Gl.
Efesios	Ef.
Filipenses	Fil.
Colosenses	Col.
1 Tesalonicenses	1Ts.
2 Tesalonicenses	2Ts.
1 Timoteo	1Ti.
2 Timoteo	2Ti.
Tito	Tit.
Filemón	Flm.
Hebreos	Heb.
Santiago	Stg.
1 Pedro	1P.
2 Pedro	2P.
1 Juan	1Jn.
2 Juan	2Jn.
3 Juan	3Jn.
Judas	Jud.
Apocalipsis	Ap.

Introducción para el Nuevo Testamento en Rabinal Achí

El Nuevo Testamento, al igual que el Antiguo Testamento, es reconocido dentro de la literatura universal como una fuente de inspiración espiritual. Incluye poesía, narrativas, epístolas y tratados expositivos que enseñan a preservar los más altos valores morales. Sin embargo, el mensaje de la Biblia, más que un mensaje literario, es un mensaje directo de Dios a todo hombre y mujer. Para lograr transmitir este mensaje, Dios usó la mente y el talento de muchos hombres a través de más de mil quinientos años.

El Nuevo Testamento fue escrito originalmente en el idioma griego, la lengua que era más común entre la gente. A través de los años ha sido traducido a más de dos mil idiomas en todo el mundo, incluyendo el idioma español y el inglés. También han sido traducidas muchas porciones del Nuevo Testamento al idioma Rabinal Achí en los últimos cuarenta años, pero ésta es la primera vez que se presenta publicado en un sólo volumen en su totalidad. ¡Así que, con enorme gratitud a Dios, gozo y esperanza, el Nuevo Testamento es entregado en sus manos en el idioma que usted habla!

La intención de esta traducción ha sido la de expresar de manera fiel el significado de los manuscritos originales del idioma griego, de tal manera que al ser leídos o escuchados en el idioma Rabinal Achí, el mensaje comunique, de forma natural, lo que los escritores quisieron comunicar.

En las páginas del Nuevo Testamento es posible encontrar promesas claras dirigidas a aquellos que lo leen o lo escuchan, como la encontrada en el libro de Apocalipsis 1:3: “Bienaventurado el que lee y los que oyen las palabras de esta profecía, y guardan las cosas en ella escritas,

porque el tiempo está cerca, o como la que se encuentra en el Evangelio de San Juan 20:31: “Pero estas se han escrito para que creáis que Jesús es el Cristo, el Hijo de Dios, y para que, creyendo, tengáis vida en su nombre.”

Cada idioma es valioso y útil para quienes lo hablan.

“Katzij wi uq'uiyal ch'a'tem c'o che ruwachulew y chujunal lic c'o tak ube chiquiwach ri quech'a'tiben re.”
1 Corintios 14:10

Características de esta edición

El idioma de esta traducción

Esta traducción del Nuevo Testamento fue realizada por y para hablantes del idioma Rabinal Achí, el cual es hablado principalmente en el departamento de Baja Verapaz, Guatemala, en los municipios de Rabinal, San Miguel Chicaj, Salamá, y San Jerónimo. También se habla en algunas aldeas de Santa Cruz el Chol y Purulhá, así como en la aldea de Los Pajales del municipio de Chicamán, El Quiché, en la aldea de Chiacalté del municipio de Tactic y en el municipio de Raxujá, en el departamento de Alta Verapaz, para mencionar algunos lugares.

El Alfabeto

El Nuevo Testamento en Rabinal Achí se publica en el alfabeto tradicional y en el alfabeto reformado. El alfabeto tradicional fue utilizado comúnmente por las comunidades indígenas de Guatemala hasta que fue reemplazado por el alfabeto reformado en el año 1987.

Esta edición del Nuevo Testamento, en el alfabeto tradicional, se ha elaborado pensando en los lectores que por décadas se habituaron a leer en el alfabeto tradicional.

Simultáneamente, también se publica en un volumen separado la edición que utiliza el alfabeto reformado. Esto se hace en consideración a las nuevas generaciones que han sido enseñados a usar el alfabeto reformado.

Notas al pie de página

Las notas al pie de página que acompañan a determinados pasajes bíblicos están señaladas en el mismo texto por medio de una letra súper indicada. Por ejemplo, en el Evangelio de San Marcos 1:17 se puede notar una pequeña letra súper indicada (a), luego, al pie de página puede encontrarse la misma letra seguida de la cita del pasaje bíblico sobre el que se hace un comentario o se provee una referencia a otro pasaje bíblico relacionado.

El uso del asterisco

Cuando una palabra es marcada con un asterisco (*), se indica que el lector puede encontrar una breve explicación de la misma palabra en la sección del Vocabulario Bíblico.

Vocabulario Bíblico

El lector encontrará al final de este volumen una lista con algunas de las palabras utilizadas en la Biblia. Primero se muestra la palabra en español y a continuación la respectiva traducción al idioma Rabinal Achí. En algunos casos se agrega una pequeña explicación sobre la palabra y algunas citas bíblicas en donde la palabra se encuentra.

Las Buenas Nuevas acerca de Jesucristo son para todas las personas. Por eso, el Dios Eterno ha encomendado que la verdad sobre Cristo sea anunciada a todas las étnias del mundo para que crean en Él.

“Ri Dios, ri na junta utakexic ruc'aslemal, e xtakan che catzijox ri K'ijesak puwi ri Cristo chique conoje ruq'uiyal quiwach tak ri ticawex e c'o che ruwachulew. Xu'an c'u wa' cha' rique caqueta'maj wa K'ijesak, caquicoj utzij Rire y cacubi' quic'u'x ruc'.” Romanos 16:26

Ri Utzilaj Tzij re Jesucristo tz'ibital can ruma ri Mateo

*Ri e rati'-umam ri Jesús ojertan
(Lc. 3:23-38)*

¹ Ri Kanimajawal Jesucristo e ralc'o'al can ri David y ralc'o'al can ri Abraham. E ri quipetebem lo che ri Abraham e tak wa':

² Ri ralc'o'al ri Abraham, Isaac rubi'; ri ralc'o'al ri Isaac, Jacob rubi'; tak ri ralc'o'al ri Jacob, e ri Judá cuc' ri ratz-uchak'.

³ Tak ri ralc'o'al ri Judá, e ri Fares y ri Zara yey rubi' ri quichu e Tamar;

ri ralc'o'al ri Fares, Esrom rubi'; ri ralc'o'al ri Esrom, Aram rubi'.

⁴ Ri ralc'o'al ri Aram, Aminadab rubi'; ri ralc'o'al ri Aminadab, Naasón rubi';

ri ralc'o'al ri Naasón, Salmón rubi'.

⁵ Ri ralc'o'al ri Salmón, Booz rubi' yey rachu ri Booz e Rahab.

Ri ralc'o'al ri Booz, Obed rubi' yey rubi' rachu ri Obed e Rut.

Ri ralc'o'al ri Obed, Isaí rubi'.

⁶ Ri ralc'o'al ri Isaí, e ri rey David y ri ralc'o'al ri David, Salomón rubi' yey rachu ri Salomón e ri rixokil ri Urías.

⁷ Ri ralc'o'al ri Salomón, Roboam rubi';

ri ralc'o'al ri Roboam, Abías rubi'; ri ralc'o'al ri Abías, Asa rubi'.

⁸ Ri ralc'o'al ri Asa, Josafat rubi'; ri ralc'o'al ri Josafat, Joram rubi'; ri ralc'o'al ri Joram, Uzías rubi'.

⁹ Ri ralc'o'al ri Uzías, Jotam rubi'; ri ralc'o'al ri Jotam, Acáz rubi'; ri ralc'o'al ri Acáz, Ezequías rubi'.

¹⁰ Ri ralc'o'al ri Ezequías, Manasés rubi';

ri ralc'o'al ri Manasés, Amón rubi'; ri ralc'o'al ri Amón, Josías rubi'.

¹¹ Tak ri ralc'o'al ri Josías, e ri Jeconías cuc' ri ratz-uchak'; rique xebalax chupa tak ri k'ij echiri' raj Israel xec'am bi Babilonia.

¹² Echiri' ec'amom chubi Babilonia, xalax jun ralc'o'al ri Jeconías, Salatiel rubi';

ri ralc'o'al ri Salatiel, Zorobabel rubi'.

¹³ Ri ralc'o'al ri Zorobabel, Abiud rubi';

ri ralc'o'al ri Abiud, Eliaquim rubi';

ri ralc'o'al ri Eliaquim, Azor rubi'.

¹⁴ Ri ralc'o'al ri Azor, Sadoc rubi';

ri ralc'o'al ri Sadoc, Aquim rubi';

ri ralc'o'al ri Aquim, Eliud rubi'.

¹⁵ Ri ralc'o'al ri Eliud, Eleazar rubi';

ri ralc'o'al ri Eleazar, Matán rubi';

ri ralc'o'al ri Matán, Jacob rubi'.

¹⁶ Y ri ralc'o'al ri Jacob e ri José, ri rachijil ri María, rachu ri Jesús. Yey ri Jesús e ri cabi'x "Cristo" che.

¹⁷ Jec'ula' chi conoje ri ticawex ujekebem lo chwi ri Abraham c'a chwach ri David, xebic'ow cajlajuj lema'j; chwi lo ri David c'a chwach echiri' xec'am bi raj Israel pa ri tinamit Babilonia, xebic'ow cajlajuj lema'j; yey chwi lo echiri' xec'am bi raj Israel pa ri tinamit Babilonia c'a chwach ri ralaxibal ri Cristo, xebic'ow cajlajuj lema'j.

*Ri ralaxibal ri Jesús
(Lc. 2:1-7)*

¹⁸ Jewa' xu'an ri ralaxibal ri Kanimajawal Jesucristo: Ri María, rachu ri Jesús, unimam chic cac'uli' ruc' ri José. Ec'uchiri' c'amaja' caquijunimaj quib, ri María xcanaj yewa' ixok ruma ruchuk'ab ri Santowilaj Ruxlabixel ri Dios. ¹⁹ Ri José, ri rachijil ri María, ruma lic jusuc' rubinic y ruma na caraj taj cuya uq'uix ri María chiquiwach ri winak, xraj c'ut cuya canok e la' na jinta c'o quena'ben re. ²⁰ Ec'uchiri' cuch'ob rakan puwi wa', xakic'ate't jun ángel re ri Dios xuc'ut rib pa uwachic' y

* **1:20** Ri caqui'an rojertan raj Israel, e nabe caquiyijba' ruwujil ri c'ulaniquil jun junab chwach pan echiri' quec'oji' junam pa cocho. Ec'uchiri' xcanaj can ri María yewa' ixok, c'o chi ruwujil ruc'ulaniquil ruc' ri José, tob rire c'a c'o pa cocho rachu-ukaw. Ec'u ri' ri José ruma ri tzij qui'anom chic, xuch'ob rakan cuya can ruwujil re jachbal ib che ri María. Dt. 24:1

xubi'ij che: «José, at ralco'al can ri David, maxi'ij awib che cac'am ri María re cu'an awixokil,* ma rumatzem rire, uc'ulum ruma ri Santowilaj Ruxlabixel ri Dios. ²¹ Calax c'u jun ralab y Jesús rubi' cacojo, ma Rire quebucolobej† rutinamit che ri quimac» xcha'.

²² Ronoje wa' xu'ano cha' e cu'ana janipa ri cubi'ij Ruch'a'tem ri Dios echiri' ri k'alajisanel re ri Dios xubi'ij:

²³ Chitanape': Jun chomilaj k'apoj ali cacana yewa' ixok y calax jun ralab. Ec'u rubi' cabi'xic: Emanuel *Is. 7:14*

xcha'. Wa' que'elawi "Dios xo'ljekel kuc'". ²⁴ Ec'uchiri' xc'un sak chwach ri José, e xu'an ri xtak che ruma ri ángel re ri Dios; xuc'am c'u ri María re rixokil. ²⁵ Pero xuchajij na ruchomal ri María ma na xc'o'ji' ta ruc' c'a echiri' xalax na ri ralco ralab. Y Jesús rubi' xucojo.

2

Achijab c'o quina'oj quebe'bina ruc' ri Jesús

¹ Ri Jesús xalax chila' Belén re Judea echiri' e rey ri Herodes. Xebopon c'u Jerusalem jujun achijab e petinak pa relebal lo ri k'ij. Rique lic c'o quina'oj puwi tak ri ch'umil.

² Jec'uwa' caquibi'ij:

—¿Pa c'o wi ri rey que raj judi'ab alaxinak? Ma ri'oj xkil ruch'umil c'a pa relebal lo ri k'ij; yey e wa' oj petinak cha' co'lkalok'nimaj uk'ij — quecha'.

³ Echiri' xuta wa' ri rey Herodes, lic xsach una'oj che y jela' xquic'ulumaj conoje ri winak e aj Jerusalem.

⁴ Xumol c'u quichi' conoje ri nimak e aj chacunel pa Rocho Dios cuc' raj c'utunel re ri tziypixab y xutz'onoj c'u chique pa calax wi ri Cristo, Rucha'o'n lo ri Dios. ⁵ Rique xquibi'ij che:

—Ri Cristo calax pa raldea Belén re Judea, ma jewa' utz'ibam can

ri k'alajisanel chupa Ruch'a'tem ri Dios:

⁶ Ri'at Belén at c'o pa ri luwar re Judea,

tob lic at ch'uti'n, ri'at lic c'o awach chiquiwach raj wach e c'o Judea, ma awuc' ri'at cape wi ri Jun Takanel; ec'u Rire cu'ana chajinel que ri nutinamit Israel *Mi. 5:2*

—xecha'.

⁷ Ri Herodes ruma ri xuto, xa xe'lak'ay xebusiq'uij rachijab e aj na'oj puwi tak ri ch'umil y xutz'onoj c'u chique jampa xwinakir wa' wa ch'umil. ⁸ Tec'uchiri', xebutak bi Belén, jewa' xubi'ij chique:

—Oj alak y lic tzucuj alak chi utz ri ralco ac'a. We xrik c'u alak, co'lbi'ij alak chwe pa c'o wi cha' jela' quin'ec ri'in y qui'nlok'nimaj uk'ij —xcha'.

⁹ Tec'uchiri' rachijab e aj na'oj xquita ri xubi'ij ri rey, xquimaj chubi ri quibe. Ec'u ri ch'umil quilom lo c'a pa relebal lo ri k'ij, nabe bi chiquiwach y xtaq'ui' c'u chwi ri luwar pa c'o wi ri ralco ac'a. ¹⁰ Rique echiri' xquil ri ch'umil, lic xequi'cot che. ¹¹ Ec'uchiri' xeboc pa ri ja, xquil ri ralco ac'a ruc' ruchu María. Xexuqui'ic y xquiloc'nimaj uk'ij. Xquijak c'u uchi' ri quicaxa y xquiya tak sipanic che, wa' re oro, re incienso y re mirra lic qui' ruxlab. ¹² Chak'ab c'u ri', xk'alajisax chique pa wachic' na quetzelej ta chi pa c'o wi ri Herodes. Ruma c'u ri', xetzelej pa quitinamit pa jun chic be.

Cac'am bi ri Jesús Egipto cuma ruchu-ukaw

¹³ Echiri' rachijab e aj na'oj ebelinak chubi ruc' ri Jesús, xuc'ut rib jun ángel re ri Dios pa uwachic' ri José y xubi'ij che: «Chatyactajok, chebac'ama bi rac'a y ruchu. Chixanimaj bi c'a Egipto y chixcanaja chila' c'ate cambi'ij chiwe jampa quixpetic, ma ri Herodes cutak utzucuxic rac'a cha' cacamisaxic» xcha'.

¹⁴ Xyactaj c'u bi ri José chak'ab, xebuc'am bi rac'a y ruchu, y xebec

† 1:21 "Jesús" pa ri ch'a'tem hebreo que'elawi "Colobenel".

Egipto. ¹⁵ Chila' c'ut xec'o'ji' wi c'a che rucamic ri Herodes. Xu'an c'u wa' cha' e cu'ana rubi'im lo ri Dios ruma ri k'alajisanel echiri' jewa' xubi'ij: «C'a chila' Egipto xinsiq'uij wi lo ri Nuc'ajol»^{*} xcha'.

¹⁶ Ri Herodes, echiri' xreta'maj xsocosox can cuma rachijab e aj na'oj, lic xpe royowal. Ruma c'u ri', xutak quicamisaxic conoje ri raltak co ch'uti'k alabo c'amaja' caqui'uis queb junab, chique ri e c'o Belén y pa tak ri luwar e c'o lo chunakaj. Ec'u xuc'am re ri' ri xquibi'ij ri e aj na'oj puwi ruk'ijol echiri' xwinakir ri ch'umil. ¹⁷ Jec'ula' e xu'ana ri tz'ibital can ruma ri k'alajisanel Jeremías echiri' xubi'ij:

¹⁸ Xtataj jun kulaj pa Ramá,
ok'ej y sic' ruc' bis.

E ri Raquel querok'ej ri ralc'o'al
y na caraj tane cabochi'ix uc'u'x
ruma ri quicamic ri ralc'o'al *Jer.*
31:15
xcha'.

Ri Jesús cuc' ruchu-ukaw quetzelej tanchi Nazaret

¹⁹ Tec'uchiri' caminak chi ri Herodes, jun ángel re ri Dios xuc'ut rib pa uwachic' ri José chila' Egipto y xubi'ij che: ²⁰ «Chatyactajok, chebac'ama bi rac'a junam ruc' ruchu y chixtzelej tanchi Israel, ma ya xecam conoje ri cacaj caquicamisaj rac'a» xcha'.

²¹ Xyactaj c'u ri José, xebuc'am bi rac'a y ruchu, y xtzelej lo Israel. ²² Pero xuxi'ij rib que'ec Judea, ma xreta'maj e ri Arquelao ruc'ajol ri Herodes ri xcanaj can rey re Judea puc'axel rukaw. Ruma c'u ri xk'alajisax che pa jun chic uwachic', xumaj bi ube Galilea. ²³ Echiri' xe-bopon chila', xe'jekela pa ri tinamit Nazaret, cha' e xu'ana ri xquibi'ij ri k'alajisanelab chwi ri Jesús: “Rire cabi'x che aj Nazaret.”

^{*} 2:15 Os. 11:1

3

Catzijon ri Juan Aj Ya'l Bautismo (*Mr. 1:1-8; Lc. 3:1-9, 15-17; Jn. 1:19-28*)

¹ Xopon ruk'ijol echiri' ri Juan Aj Ya'l Bautismo catzijon pa tak ri luwar catz'intz'otic re Judea. ² Jec'uwa' cubi'ij: «Tzelej tzij alak chwach ri Dios, ma rutakanic ri Dios petinak chila' chicaj lic xa nakaj chi c'o wulok» cacha'.

³ Ri k'alajisanel Isaías xutz'ibaj can puwi wa' wa Juan echiri' xubi'ij: Catataj ukul jun tzijonel casiq'uin chupa ri luwar catz'intz'otic, jewa' cubi'ij:

“Yijba' pana alak ri be re ri Kanimajawal;
suc'upij alak rube Rire” *Is. 40:3*

xcha'.

⁴ Ruk'u' ri Juan ucojom 'anom ruc' rismal camello y rupas ximil che rupa e jun tz'u'um; ri cutijo e tak ri sac' y uwa'al cab re upa tak juyub.

⁵ Ri ejekel pa ri tinamit Jerusalem cuc' conoje ri e c'o pa ri luwar re Judea y ri ejekel chuchi' ri nimaya' Jordán, xebel lo che utayic ri Juan. ⁶ Caquitz'onoj c'u cuybal quimac chwach ri Dios, y ri Juan cuya ri bautismo chique pa ri nimaya' Jordán.

⁷ Ec'u ri Juan echiri' xrilo lic e q'ui chique ri fariseos y ri saduceos xec'un ruma ri bautismo cuya'o, xubi'ij chique:

«¡Ralak pacha' alak jupuk chi cumatz! ¿China xbi'n re we utz quesaj ib alak chwach ri unimal c'axc'obic cutak lo ri Dios pawil alak? ⁸ Bina alak jusuc' cha' jela' cak'alajinic jalc'atim chi ri binic silabic alak, jela' pacha' ri takal chique ri quitzelem chi quitzij.

⁹ »Y mach'ob ne alak chi ibil ib alak wa': “Ri'oj utz ka'anom, ma oj ralc'o'al can ri Abraham.” Ma ri'in cambi'ij che alak: We xraj ri Dios, utz cu'an ralc'o'al ri Abraham tob ne che tak wa'baj. ¹⁰ Yey jiquil chi ne uwach ruk'atbal tzij ri Dios pawil

alak, e pacha' juna achi uyacom chi ri ica'j chwi ri ratz'ayak ri che'; ec'u tak ri che' na cuya ta chomilaj jik'obal, capok'ix bi y cac'ak pa ak'.

¹¹ »Ri'in pakatzij wi canya ri bautismo che alak ruc' ya', c'utubal re tzelem chi tzij alak chwach ri Dios. No'j c'u ri Jun catajin lo chwij ri'in, c'o puk'ab cuya ri bautismo che alak ruc' ri Santowilaj Ruxlabixel ri Dios y ruc' ak'. Rire más c'o uchuk'ab chinuwach ri'in; na takal tane chwe tob xa canmolej ruxajab. ¹² Ec'u Rire colu'k'ata tzij paquiwi ri ticawex cha' jela' cuya ri tojbal takal chique chiquijujunal. E pacha' juna achi ruc'a'am chi ri pu'bal uwach ri trigo puk'ab cha' na'l' cujosk'ij wa' y care-saj rupuc' chupa. Tec'uchiri', cujoc ri trigo y cuc'ol chupa ruc'olibal. Ec'u rupuc' cuporoj pa ri jun ak' na jinta utakexic catenowic» xcha ri Juan.

Ri bautismo re ri Jesús
(Mr. 1:9-11; Lc. 3:21-22)

¹³ Ec'uchiri' ri Jesús petinak Galilea, xopon chuchi' ri nimaya' Jordán cha' ri Juan cuya ri bautismo che. ¹⁴ Pero ri Juan na xraj taj cuya ri bautismo che ri Jesús, jec'uwa' xubi'ij che:

—Ri lic usuc' e rilal ri caya'w la ri bautismo chwe ri'in. ¿Yey e camí ca'aj la ri' canya ri'in ri bautismo che'la? —xcha'.

¹⁵ Ec'u ri Jesús xuc'ul uwach:

—E cha'ana wo'ora sa' ri cambi'ij ri'in chawe, ma lic chirajawaxic e caka'an janipa ri lic usuc' chwach ri Dios —xcha'. Jec'ula' ri Juan xuya ri bautismo che.

¹⁶ Tec'uchiri' ri Jesús xuc'ul ri bautismo, xel lo pa ri ya'. Y na jampatana c'u ri' xjakataj ruwa caj y xrilo echiri' ri Ruxlabixel ri Dios xkaj lo puwi' pacha' juna palomax.

¹⁷ Ec'uchiri', xch'aw lo Jun chila' chicao, jewa' xubi'ij:
«E Nuc'ajol wa' ri lic c'ax canna'o y lic quinqui'cot che»
xcha ri Dios.

* **4:7** Na utz taj camin uwach ri Dios cha' cuc'ut ruchuk'ab.

4

Ri c'ambal upa ri Jesús
(Mr. 1:12-13; Lc. 4:1-13)

¹ Tec'uchiri', ri Jesús xc'am bi ruma ri Ruxlabixel ri Dios pa jun luwar catz'intz'otic cha' cac'am upa ruma ritzel winak. ² Ri Jesús xc'o'oji' chila' yey cuarenta k'ij y cuarenta ak'ab c'u ri' na jinta c'o xutijo. Q'uisbal re wa' xpe numic che.

³ Xkib c'u ritzel winak ruc' ri Jesús re cuc'am upa cha' catzak pa mac, jewa' xubi'ij che:

—We katzij at Uc'ajol ri Dios, chat-takan che cha' tak wa' baj cu'an wa —xcha'.

⁴ Ri Jesús xuc'ul uwach:

—Jewa' tz'ibital can chupa Rutzij Upixab ri Dios:

Na xew ta ruma ri wa e c'as ri ticawex,
ma e c'aslic ruma ronoje tak ch'a'tem
quel lo puchi' ri Dios *Dt. 8:3*
—xcha'.

⁵ Ec'uchiri', ritzel winak xuc'am bi pa ri santowilaj tinamit Jerusalem c'a chicao che ruwi ri Rocho Dios. ⁶ Xubi'ij c'u che:

—We katzij at Uc'ajol ri Dios, chac'aka bi awib c'a chu'lew y na jinta c'o cac'ulumaj, ma jewa' tz'ibital can chupa Rutzij Upixab ri Dios:
Ri Dios quebutak lo ru ángeles awuc'
cha' catquichajij.

Catquichap c'u ruc' ri quik'ab
cha' na ca'chika ta rawakan che
juna abaj *Sal. 91:11-12*
—xcha'.

⁷ Ri Jesús xuc'ul uwach:

—Jewa' tz'ibital can chupa Rutzij Upixab ri Dios:

Mac'am upa ri Dios Kajawxel* *Dt. 6:16*
—xcha'.

⁸ Ec'uchiri', ritzel winak xuc'am tanchi ubi ri Jesús chutza'm jun nimalaj juyub y xuc'ut c'u chwach, ronoje ri takanic ca'an puwi tak ri tinamit che ruwachulew ruc' ronoje ruchomalil tak wa'. ⁹ Xubi'ij c'u che:

—Ronoje tak wa' canya pak'ab we caxucuba' awib chinuwach y calok'nimaj nuk'ij —xcha'.

¹⁰ Ec'u ri Jesús xubi'ij che:

—Chatela chinuwach Satanás, ma jewa' tz'ibital can chupa Rutzij Upixab ri Dios:

Lic chalok'nimaj uk'ij ri Dios Kajawxel

y xew Rire chanimaj uk'ij *Dt. 6:13* —xcha'.

¹¹ Ec'u ritzel winak xuya can ri Jesús y xel bi chirí'. Xec'un c'u lo jujun ángeles y xquijeko caquinimaj ri Jesús.

Ri Jesús cujek cac'utun chwi rutakanic ri Dios

(*Mr. 1:14-15; Lc. 4:14-15*)

¹² Ri Jesús, echiri' xuto c'o ri Juan pa cárcel, xe'ec tanchi Galilea. ¹³ Xel bi pa ri tinamit Nazaret y xe'jekela pa ri tinamit Capernaúm. Wa' jun tinamit c'o chuchi' ri mar pa ri luwar re Zabulón y re Neftalí. ¹⁴ Xu'an c'u wa' cha' e cu'ana janipa rutz'ibam can ri k'alajisanel Isaías echiri' xubi'ij:

¹⁵ Pa ri luwar re Zabulón y re Neftalí, ri c'o pa rubeyal ri mar,

ch'aka ya' che ri nimaya' Jordán, pa tak ri luwar re Galilea pa ejekel wi uq'uiyal winak na e ta aj judi'ab;

¹⁶ ri ticawex ejekel pa k'eku'm xquil ri K'ijsak

yey ri ejekel pa ri k'eku'm re camic, xwon ri K'ijsak paquiwi' *Is. 9:1-2*

xcha'.

¹⁷ Chwi c'u lo ri' xujek ri Jesús catz'ijonic, jewa' cubi'ij: «Tzelej tzij alak chwach ri Dios, ma rutakanic ri Dios petinak chila' chicaj lic xa nakaj chi c'o wulok» cacha'.

Ri Jesús quebusiq'uij cajib e aj chapal car

(*Mr. 1:16-20; Lc. 5:10-11*)

¹⁸ Echiri' cabin ri Jesús chuchi' ri mar re Galilea, xril pan quiwach queb achijab quichak' quib, jun Simón rubi' (Pedro quecha che) y ri jun chic Andrés rubi'. Rique e

aj chapal car, yey e ri' quetajin che uc'akic ri qui atarraya pa ri mar.

¹⁹ Ec'u ri Jesús xubi'ij chique:

—Chixpetok, chixterej lo chwij, y ri'in can'an chiwe ix aj molol ticawex,† jela' pacha' i'anom lo chique ri car —xcha chique. ²⁰ Y na jampatana xquiya can ri qui atarraya y xeterej bi chirij ri Jesús.

²¹ Xbin c'u pan jubik' chic y xeril chi pan queb achijab quichak' quib, jun Jacobo rubi' y ri jun chic Juan rubi'. Wa ca'ib e uc'ajol ri Zebedeo. Rique e c'o chupa jun barco junam ruc' ri quikaw y quetajin che uc'ojoxic ri qui atarraya. Ec'u ri Jesús xebusiq'uij bi.

²² Y na jampatana rique xquiya can ri quibarco y ri quikaw, y xeterej c'u bi chirij ri Jesús.

Ri Jesús cac'utun chiquiwach uq'uiyal winak y lic e q'ui ri quebucunaj

²³ Ri Jesús xic'ow che ronoje tinamit re Galilea. Cac'utun pa tak sinagogas chujujunal tinamit, cutzijoj ri Utzilaj Tzij re rutakanic ri Dios y cucunaj ronoje uwach yabil c'o chique ri winak.

²⁴ Conoje ri e c'o pa tak ri tinamit re Siria xqueta'maj tak ri cu'an ri Jesús. Xequic'am c'u lo chwach Rire conoje ri ticawex ruc' tak uq'uiyal c'axc'olil. Wa' e ri e c'o pa yabil, ri c'ax quic'ulumam, ri e c'o paquik'ab itzel uxlabixel, ri quebumaj tew y ri e sic. Ec'u ri Jesús xebucunaj conoje.

²⁵ Lic e q'ui c'u ri xeterej bi chirij. Wa' e petinak Jerusalem y che jujun chic luwar re Judea, cuc' ri e petinak pa tak ri tinamit re Galilea, re Decápolis y che jujun chic tinamit e c'o ch'aka ya' che ri nimaya' Jordán.

5

Ri Jesús cac'utun lo chwa jun juyub (Lc. 6:20-26)

¹ Ri Jesús, echiri' xeril ruq'uiyal winak, xak'an chwa ri juyub y xtz'uyi'ic. Ec'u rutijo'n xquimol

† 4:19 “Ix aj molol ticawex”: Ri chac xya' chique e quequitzucuj ticawex re quebu'an utijo'n ri Jesús.

quib ruc'. ² Jec'uwa' ri xujek uc'utic chiquiwach:

³ «Nim quik'ij calaxic ri caqueta'maj lic chirajawaxic ri Ruxlabixel ri Dios chique, ma rutakanic ri Dios petinak chila' chicaj cu'ana que.

⁴ Nim quik'ij calaxic ri quebok'ic, ma ri Dios e cabochi'in quic'u'x.

⁵ Nim quik'ij calaxic ri qui'anom ch'uti'n che quib chwach ri Dios, ma caya' na chique, ri luwar ubi'tisim chi ri Dios.

⁶ Nim quik'ij calaxic ri lic cacha quic'u'x che utzukuxic ri jusuc' binic silabic chwach ri Dios, ma ri Dios e caya'w wa' chique.

⁷ Nim quik'ij calaxic ri caquic'ut ri c'axna'bal quic'u'x chique jujun chic, ma ri Dios cuc'ut ri c'axna'bal uc'u'x chique rique.

⁸ Nim quik'ij calaxic ri u'anom chom ri canima' chwach ri Dios,* ma rique caquil na uwach ri Dios.

⁹ Nim quik'ij calaxic ri caquitzucuj utzil chomal chiquiwach, ma cabi'x chique rique e ralc'o'al ri Dios.

¹⁰ Nim quik'ij calaxic ri queternabex ruc' c'axc'obic ruma ri caqui'an ri jusuc' chwach ri Dios, ma rutakanic ri Dios petinak chila' chicaj cu'ana que.

¹¹ »Nim ik'ij iwalaxic ri'ix echiri' wuma ri'in quixternabex ruc' c'ax, cac'ak bi ik'ij y cabi'x ronoje ri na utz taj chiwij yey wa' xa rak'ubal.

¹² Chixqui'cotok y chixbixonok, ma lic nim ri rajil uc'axel quic'ul chila' chicaj. Macam c'u iwanima' che echiri' quixya' pa c'ax, ma jela' x'an chique ri k'alajisanelab ojertan, ri xenabej lo chiwach ri'ix.

Ri c'ambal na'oj puwi ratz'am y ri k'ijsak

¹³ »Wara che ruwachulew ri'ix lic quixajawax chique ri ticawex jela' pacha' ratz'am lic cajawaxic. Yey we xsach rutzayul ratz'am, ¿su'anic tanchi ca'an tza che? Ri' na jinta chi c'ana uchac; que'c'ak c'u bi y caxajaxo'x can uwi' cuma ri ticawex.*

¹⁴ »Ri'ix ix k'ijsak che ruwachulew. E juna tinamit c'o lo chwi juna juyub na utz taj quewaxic. ¹⁵ Yey na utz tane catzij juna ak' y cach'uk uwi' ruc' juna mulul re pajbal, ma ri ca'an che e caya'i' lo chupa ruc'olibal chicaj cha' jela' cutzij quiwi' conoje ri e c'o pa ri ja. ¹⁶ Jec'ula' ri'ix, ix k'ijsak chiquiwach ri ticawex cha' caquil ri chomilaj chac qui'ano y jela' e caquiyac uk'ij ri Kakaw Dios c'o chila' chicaj.

Ri Jesús y Rutzij Upixab ri Dios

¹⁷ »Mich'ob c'u ri'ix we ri'in in c'uninak re co'lnusacha uwach Rutzij Upixab ri Dios tz'ibital can cuma ri Moisés y ri k'alajisanelab. Ma na in c'uninak ta che usachic uwach wa'; e in c'uninak re co'lnuk'alajisaj rusuc'. ¹⁸ Pakatzij wi cambi'ij chiwe: Xalok' c'a tiquil ruk'ijol ruwa caj y ruwachulew, na quesax ta c'ana juna letra yey na quesax tane tob xa juna ralco juch' che Rutzij Upixab ri Dios, ma e cu'ana na ronoje ri tz'ibitalic.

¹⁹ »Ruma c'u wa', china ri cupalajij juna takanic tob ne lic ch'uti'n chwach rire yey e tanchi uc'utic cu'an chiquiwach ri ticawex, ri' na jinta uwach chupa rutakanic ri Dios petinak chila' chicaj. China c'u ri cucoj Rutzij Upixab ri Dios yey jela' cuc'ut chiquiwach jujun chic cha' e caqui'ano, ri' lic c'o uwach chupa rutakanic ri Dios.

²⁰ »Pakatzij wi cambi'ij chiwe: Xew quixoc ri'ix chupa wa takanic petinak chila' chicaj, we ribinic isilabic e más jusuc' chwa ri quibinic raj c'utunel re ri tzijpixab y ri fariseos. No'j we na je ta la', ri' na takal ta chiwe.

* **5:8** Wa' e ri lic xa jumul quiya'om quib puk'ab ri Dios ruc' ronoje quic'u'x. ✧ **5:13** Mr. 9:50; Lc. 14:34-35

*Ri Jesús cac'utun chwi ri oyowal
(Lc. 12:57-59)*

21 »Ri'ix itom ri xbi'x lo chique ri ticawex ojertan chupa Rutzij Upixab ri Dios: “Matcamisanic”;[☆] yey china c'u ri cacamisanic, ri' cak'at tzij puwi'.

22 »No'j ri'in cambi'ij chiwe: China ri cape royowal chirij juna ratz-uchak', ri' cak'at tzij puwi'. China c'u ri cuc'ak bi uk'ij ri ratz-uchak', ri' cac'am bi chwach ri k'atbal tzij re ri tinamit. Yey china ri cubi'ij che juna ratz-uchak': “iNa jinta c'ana achac!”, ri' catewun puwi' que'ec pa ak' chi xibalba' re tijbal c'ax.

23 »Ruma c'u la', echiri' cac'am bi rakasa'n chwa raltar yey chiri' cac'un chac'u'x c'o juna awatz-achak' c'o royowal chawij, 24 chaya'a na can rakasa'n chwa raltar y jat nabe ruc' rawatz-achak', ja'ana utzil chomal ruc'. Ec'uchiri', utz catpe tanchi chwa raltar y caya c'u ri' rakasa'n chwach ri Dios.

25 »We c'o junok cucoj amac y catuc'am bi pa k'atbal tzij, nabe cha'ana pan utzil chomal ruc' pa be cha' jela' na catu'ya'a ta chi puk'ab raj k'atal tzij. Ma we na xa'an ta ri', raj k'atal tzij catuya bi puk'ab ri ausiliar[†] cha' catu'ya'a pa cárcel. 26 Pakatzij wi cambi'ij chawe: Na catel tana lo pa ri cárcel we na xatoj ta can ronoje ramac.

*Ri Jesús cac'utun chwi ri macunic
chirij ri c'ulaniquil*

27 »Ri'ix itom ri xbi'x lo ojertan chupa Rutzij Upixab ri Dios: “Matmacun chirij ri c'ulaniquil.”[☆]

28 »No'j ri'in cambi'ij chiwe: We c'o junok caril juna ixok y curayij uwach re camacun ruc', ri' ya xmacun ruc' pa ranima'.

29 »E uwari'che, we e rawach uwiquik'ab ri catzakisan awe pa ri mac, chawesaj y chac'aka bi; ma xa ne cuya ri' e cajam jun che rawach, chwa ri catc'ak bi ruc' ronoje racuerpo chi xibalba' re tijbal

c'ax. 30 We e rak'ab uwiquik'ab ri catzakisan awe pa ri mac, chac'ata' y chac'aka bi; ma xa ne cuya ri' e cajam jun che rak'ab, chwa ri catc'ak bi ruc' ronoje racuerpo chi xibalba' re tijbal c'ax.

*Ri Jesús cac'utun chwi ri jachbal ib
(Mt. 19:3-12; Mr. 10:2-12; Lc. 16:18)*

31 »Jenewa' xbi'x lo ojertan: “We juna achi caraj cuyach bi ri rixokil, xew chuya'a bi ruwujil re jachbal ib che.”[☆]

32 »No'j ri'in cambi'ij: We rachi cuya bi ruwujil re jachbal ib che ri rixokil tob rixok na macuninak ta chirij ri c'ulaniquil, ri' e cumin ri rixokil pa ri mac. Ma we rixok jachom bi cuc'am jun chic achi, camacun c'u ri' chirij ri c'ulaniquil. Yey e rachi cac'uli' ruc' rixok jachom bi, ri' jenela' camacun chirij ri c'ulaniquil.[☆]

*Ri Jesús cac'utun chwi ri ch'a'tem
cu'an junok echiri' c'o cujiquiba'
uwach*

33 »Ri'ix itom ri xbi'x lo chique ri ticawex ojertan: “Matsocun ruc' ri caji quiba' uwach; e lic cha'ana janipa raji quibam uwach chwach ri Dios”[☆] cacha'.

34 »No'j ri'in cambi'ij chiwe: Lic mac'o miji quiba' uwach publi' junok. Mac'o ne miji quiba' uwach pa rubi' ri caj, ma ri chila' chicaj e tz'ulibal pa catakan wi ri Dios. 35 Mac'o miji quiba' uwach publi' ruwa ulew, ma ruwa ulew e utac'alibal ri rakan ri Dios. Mac'o ne miji quiba' uwach publi' ri tinamit Jerusalem, ma wa' e utinamit ri Nimalaj Takanel Dios. 36 Mac'o miji quiba' uwach publi' ruwi' ijolom, ma ri'ix na quirik tane u'anic sak o k'ek che riwi', tob tane xa jun chi wi'aj. 37 E chibi'ij ri jusuc'. We lic katzij, xew chibi'ij: “Katzij.” We na katzij taj, xew chibi'ij: “Na katzij taj.” Ma ri cacoji' uwi' ri cabi'xic, wa' ruc' ritzel winak petinak wi.

[☆] 5:21 Éx. 20:13 [†] 5:25 “Ausiliar”: E pacha' juna policia wak'ij ora. [☆] 5:27 Éx. 20:14 [☆] 5:31 Dt. 24:1 [☆] 5:32 1 Co. 7:10-11 [☆] 5:33 Lv. 19:12

Ri Jesús cac'utun chwi ri rutzil c'u'xaj

(Lc. 6:27-36)

³⁸ »Ri'ix itom ri xbi'x lo ojertan:

We c'o junok cupuch' rawach,
ri' takal che capuch' ri ri're.

We c'o junok cutor bi juna awe',
ri' takal che cator bi ri ri're. *Éx.*
21:24

³⁹ »No'j ri'in cambi'ij chiwe: Mi'an uc'axel che ri cu'an ri na utz taj chiwe. We c'o c'u junok cupach' k'ab xe' awe' pawiquik'ab, chaya'a luwar che cupach' ri pa mox. ⁴⁰ We c'o junok catuchap pa ch'a'oj pa k'atbal tzij re cumaj racoton, asu chaya'a ne can rak'u' re pisbal awij che. ⁴¹ We c'o junok catumin bi chuxe' eka'n cha' cawekaj bi jun kilómetro che, asu queb kilómetro chawekaj bi che. ⁴² Chatsipan che ri niba' we cutz'onoj to'bal chawe. We c'o junok cachik'iman chawe, ma'an xu'yal che.

⁴³ »Itom c'u ri xbi'x lo ojertan:

C'ax chana'a rawatz-achak' *Lv. 19:18*
yey tzel chawila ri tzel quilow awe.

⁴⁴ »No'j ri'in cambi'ij chiwe: C'ax chebina'a ri e aj retzelal c'u'x chiwij. Chitz'onoj ri rutzil uc'u'x ri Dios paquiwi ri caquitz'onoj ri na utz taj piwi ri'ix. Chi'ana ri utz chique ri tzel quebilow iwe. Chi'ana c'u orar paquiwi janipa ri caquic'ak bi ik'ij y ri quixquinternabej ruc' c'axc'obic ⁴⁵ cha' jela' cak'alajinic ix ralc'o'al ri Kakaw Dios c'o chila' chicaj. Ma Rire cu'an che ri k'ij quel lo paquiwi ri ticawex caqui'an ri utz y paquiwi ri caqui'an ri na utz taj, yey cutak lo ri jab paquiwi ri jusuc' quibinic quisilabic y paquiwi ri na jusuc' ta quibinic quisilabic.

⁴⁶ »Ma we xew c'ax quebina' ri c'ax quena'w iwe, ¿sa' c'u ri' ri rajil uc'axel quic'ulu? Ma jenela' caqui'an raj tz'onol puak re tojonc. ⁴⁷ We xew quiya rutzil quiwach ri iwatz-ichak' ri'ix, ¿sa' c'u ri' ri utz quixtajin che u'anic? Ma jenela' caqui'an ri na queta'am ta uwach ri Dios. ⁴⁸ Chi'ana

c'u jusuc' che ri ibinic isilabic jela' pacha' ri usuc'liquil ri Kakaw Dios c'o chila' chicaj.

6

Ri Jesús cac'utun chwi ri limoxna

¹ »Mi'an ri quic'ut ri jusuc' ibinic isilabic chiwachil xa re quixilitaj cuma ri ticawex;✱ ma we jela' qui'ano, na jinta rajil uc'axel quic'ul che Rikaw Dios c'o chila' chicaj. ² E uwari'che, echiri' quiya limoxna che juna niba', mitzijoj chique ri ticawex, pacha' ri caqui'an ri xa queb quipalaj pa tak sinagogas y pa tak be. Ma rique jela' caqui'ano xew cha' cayac quik'ij. No'j ri'in pakatzij wi cambi'ij chiwe: Ruc' c'u wa yacbal quik'ij, ya e la' xquic'ul ri rajil uc'axel ri xqui'ano. ³ E uwari'che, echiri' quiya limoxna chique ri niba'ib, mi'an chiwachil. ⁴ Jec'ula' na jinta c'o cana'ben re, xew Rikaw Dios queta'man wa'. Ec'u Rire cuya na ri rajil uc'axel chiwe.

Ri Jesús cac'utun chwi ri oración
(Lc. 11:1-13)

⁵ »Echiri' quixch'a't ruc' ri Dios, mi'an iwe'ix pacha' ri caqui'an ri xa queb quipalaj. Ma rique lic cuc'ul quic'u'x ri caquibololej oración e la' e tac'al pa tak sinagogas y pa tak jachbal be cha' jela' quebilitaj cuma ri ticawex. No'j ri'in pakatzij wi cambi'ij chiwe: Ruc' c'u wa yacbal quik'ij, ya e la' xquic'ul ri rajil uc'axel ri xqui'ano. ⁶ No'j ri'ix echiri' quixch'a't ruc' ri Dios, chixoc pa ja, chitz'apij lo ri puerta y chixch'a't ruc' Rikaw Dios xa ituquel; jec'ula' Rikaw Dios caril ri qui'an xa ituquel y cuya na c'u ri rajil uc'axel chiwe chiwachil.

⁷ »Ec'uchiri' quixch'a't ruc' ri Dios, miwererej ch'a'tem uq'uiyal laj pacha' caqui'an ri na queta'am ta uwach ri Dios; ma e caquich'ob rique ruma ri caquiwererej ch'a'tem, quetataj ruma ri Dios. ⁸ Mi'an c'u iwe'ix pacha' ri caqui'an rique, ma Rikaw Dios lic reta'am chic sa' ri

✱ 6:1 Mt. 23:5

cajawax chiwe echiri' c'amaja' ne quitz'onoj che.

⁹ »Ec'u ri'ix echiri' quixch'a't ruc' ri Dios utz jewa' tak ri quibi'ij:

Kakaw Dios, Lal c'o la chila' chicaj, jlic cheta'maxok nim uk'ij ri bi' la!

¹⁰ Peta la, takana la pakawi'; chu'ana c'u ri rajawal c'u'x la wara che ruwachulew, jela' pacha' ri ca'an chila' chicaj.

¹¹ Ya'a co la wak'ij ri kawa, ri cajawax chike ronoje k'ij.

¹² Cuyu co la kamac, jela' pacha' ri'oj cakacuy quimac ri emacuninak chikij.

¹³ Y maya co la luwar chike cojtzak pa mac; e lic chojcolobej la chwach ritzel winak.

Ma pak'ab Rilal c'o wi ronoje takanic y chuk'ab;

y xew che Rilal takal wi ri yacbal k'ij na jinta utakexic. Amén.

¹⁴ »Ma we ri'ix quicuy quimac tak ri ticawex, jec'ula' ri' cu'an ri Kakaw Dios c'o chila' chicaj, cucuy imac ri'ix.

¹⁵ No'j we ri'ix na quicuy ta quimac tak ri ticawex, jec'ula' ri' cu'an ri Kakaw Dios, na cucuy ta imac ri'ix.*

Ri Jesús cac'utun chwi ri ayuno

¹⁶ »Echiri' ri'ix qui'an ayuno, mic'ut bis che ripalaj pacha' ri caqui'an ri xa queb quipalaj. Ma rique caqui'an wa' xa pacha' quebilitaj cuma ri winak. Pakatzij wi cambi'ij chiwe: Ruc' c'u wa yacbal quik'ij, ya e la' xquic'ul ri rajil uc'axel ri xqui'ano. ¹⁷ No'j ri'ix echiri' qui'an ayuno, chich'aja ripalaj y chixiya riwi' chi utz. ¹⁸ Jec'ula' ri ticawex na caquil taj we ri'ix ix c'o pa ayuno. Xew c'u Rikaw Dios, ri na quilitalaj ta uwach, caril ri na caquil ta ri ticawex. Ec'u ri' Rire caya'w na ri rajil uc'axel chiwe.

Ri beyomalil re chila' chicaj (Lc. 12:32-34)

¹⁹ »Mixchacun xa re quimol uc'u'xibal beyomalil re ruwachulew,

ma ri wara e tak ri ic'olom xa capoq'uiric y cu'an mojos, yey que-boc ne elek'omab che relek'axic bi. ²⁰ We quiwaj quirik ri sakil beyomalil, e chi'ana wara che ruwachulew janipa ri lic c'o uchac chwach ri Dios cha' jela' c'o cutikoj chiwe ri'ix chila' chicaj. Ma ri ic'olom chila' na capoq'uir taj y na cu'an ta mojos, yey na jinta ne elek'omab quebec che relek'axic bi. ²¹ Ma pa c'o wi ribeyomalil ri'ix, puwi wa' que'ec wi ic'u'x.

Ri c'ambal na'oj puwi ri kawach (Lc. 11:33-36)

²² »Ri kawach e pacha' candil re ri kacuerpo, ma ruma wa' cojtzu'nic cha' utz cojbinic. Jec'ula', we ri kawach utz u'anom, ronoje ri kacuerpo nojinak che k'ijsak y cakil c'u ronoje chi utz. ²³ No'j we ri kawach na utz taj, ronoje ri kacuerpo c'o pa k'eku'm. Jec'ula', we ri k'ijsak c'o kuc' u'anom junam ruc' ri k'eku'm, jco'l chi lo k'eku'malil ri'oj c'o wi!*

Ri Jesús cac'utun chwi ri puak (Lc. 16:13)

²⁴ »Lic c'ayew we juna aj chac e ca'ib ri rajaw. Ma laj tzel caril ri jun yey c'ax cuna' ri jun chic; o laj cuyac uk'ij ri jun yey cuc'ak bi uk'ij ri jun chic. Ruma c'u la', na utz taj we junok cuya rib che unimaxic ri Dios yey cuya rib che utzucuxic ri beyomalil re ruwachulew.

Ri Dios quebuchajij ri ralc'o'al (Lc. 12:22-31)

²⁵ »E uwari'che cambi'ij chiwe ri'ix: Mubisoj ic'u'x ric'aslem; mubisoj ne ic'u'x sa' riwa y rimik'ina' quitijo o sa' rik'u' quicojo. ¿Na e ta neba más c'o uwach ric'aslem ri'ix chwach ri quitijo? ¿Yey na e ta neba más c'o uwach ri cuerpo chwach rik'u' quicojo?

²⁶ »Chebiwilape ri tz'iquin quexiq'ui' che ruwa caj. Rique na quetico'naj taj, na caqui'an tane quimolonic y na

* **6:15** Mr. 11:25-26 * **6:23** Pa ri ch'a'tem hebreo, we cabi'x che junok "utz ruwach", wa' que'elawi lic utz uc'u'x, na caxu'yan taj. Yey we cabi'x che junok "na utz ta ruwach", wa' que'elawi lic co ruc'u'x y lic xu'y.

jinta ne pa caquic'ol wi ri quimolonic. Na ruc' ta c'u ri', Rikaw Dios c'o chila' chicaj quebutzuku. ¡Mac'uwari' ri'ix, ri Dios quixuchajij, ma e más c'o iwach ri'ix chiquiwa ri tz'iquin!

27 »¿C'o neba junok chiwe ri'ix curik cunajtirisaj jun chic k'ij che ruc'aslem wara che ruwachulew? Na jinta junok, tob ne lic cutij uk'ij che. 28 ¿Su'be c'u ri' lic cubisoy ic'u'x rik'u' quicojo? Chiwilape' su'anic queq'uiy ri cotz'i'ij pa tak juyub; wa' na quechacun taj y na quequeman ta nenare' cha' caqui'an ri quik'u'. 29 Yey ri'in cambi'ij chiwe: Ri rey Salomón, tob lic c'o uchomal ruk'u' xucojo, wa' na xumaj ta c'ana ruchomalil tak ri cotz'i'ij. 30 Jec'ula' we ri Dios u'anom chom che ri ak'es c'o wak'ij pa juyub yey chwe'k xa caporox pa ak', ¿na cuya ta cami ri' ri Dios rik'u' cajawax chiwe? ¡Ri'ix lic xa jubik' ri cubulibal ic'u'x ruc' ri Dios!

31 »Cambi'ij c'u chiwe: Mubisoy ic'u'x y mibi'ij: “¿Sa' ri kawa, sa' ri kamik'ina' cakatijo? ¿Sa' ri kak'u' cakacojo?” 32 Ma jenela' caqui'an ri winak na queta'am ta uwach ri Dios, e cubisoy quic'u'x tak wa'. No'j ri'ix c'o jun Ikaw chila' chicaj lic reta'am cajawax ronoje tak wa' chiwe.

33 »Ri lic chirajawaxic chiwe nabe e lic chixoc il che rutakanic ri Dios y che ri jusuc' binic silabic caraj Rire chiwe. Yey ronoje tak c'u ri cajawaxic, xa uwi' chic caya'taj chiwe. 34 Mubisoy pan ic'u'x ri quiwil chwe'k, ma chujujunal k'ij uc'amom chi lo ruc'ayewal.

7

Mik'at tzij paquiwi jujun chic (Lc. 6:37-38, 41-42)

1 »Mi'an ri xa piwe ri'ix quixu'an aj k'atal tzij paquiwi jujun chic, cha' jela' na cak'at ta tzij piwi ri'ix. 2 Ma e ru'anic quik'at tzij ri'ix paquiwi jujun chic, jela' cu'an ri Dios piwi ri'ix; ma

ruc' ri pajbal quixpajan wi, ruc' la' quixpaj wi ri'ix.*

3 »¿Su'chac e lic catzutza' ruc'aj che' c'o chupa ruwach rawatz-achak' yey e na catoc ta c'u il che resaxic ri che' k'ebel chupa rawach ri'at? 4 Y we k'ebel la jun che' chupa rawach ri'at, ¿utz nawi cabi'ij che rawatz-achak': “Chaya'a luwar chwe canwesaj la jun uc'aj che' c'o chupa rawach”? ¡Na utz taj! 5 ¡Xa queb apalaj! Nabe na chawesaj lo la che' k'ebel chupa rawach ri'at, y jela' cat-tzu'n chi utz cha' cato' rawatz-achak' che resaxic lo ruc'aj che' c'o chupa ruwach rire.

6 »Miya chiquiwa ri tz'i' janipa ri lic chom chwach ri Dios, ma c'axtaj quepe chiwij y caquirakach'ij ipa; jec'ula' mic'ak chiquiwach ri ak ri perlas c'o iwuc', ma c'axtaj xa caquixik'ixa' uwi'.*

Chitz'onoj che ri Dios janipa ri cajawax chiwe

(Lc. 11:9-13; 6:31)

7 »Janipa ri cajawax chiwe, chitz'onoj che ri Dios y caya'i' chiwe; chitzucuj ruc' Rire janipa ri cajawax chiwe y quiriko; chich'a'bej Rire y lic quixucajmaj lok. 8 Ma china ri cutz'onoj ri cajawax che, cuc'ul na; china ri c'o cutzucuj, curik na; y china ri cach'aw pan che ruchi' ja, cajaki' na lo che.

9 »¿C'o neba juna achi chixo'l, we ruc'ajol cutz'onoj pam, cuya juna abaj che; 10 o we cutz'onoj car, cumatz ri cuya che? ¡Na jintaj junok! 11 Ec'u ri' ri'ix tob xa ix ticawex na lic ta utz ic'u'x, na ruc' ta c'u ri', quirik uya'ic chomilaj tak sipanic chique riwalc'o'al. ¡Mac'uwari' ri Kakaw Dios c'o chila' chicaj cuya chomilaj tak sipanic chique ri quetz'onow re che!

12 »Ec'u ri'ix chi'ana chique ri ticawex jela' pacha' ri quiwaj caqui'an rique chiwe. Ma e utakanic wa' Rutzij Úpixab ri Dios tz'ibital can cuma ri Moisés y ri k'alajisanelab.

* 7:2 Mr. 4:24; Lc. 6:38 * 7:6 Wa versículo na e ta cach'a't paquiwi rawaj. Ri que'elawi e na utz taj cakaya ri chomilaj c'utunic re ri Dios chiquiwach winak itzel quic'u'x we na cacaj taj caquic'ulu.

Ri oquibal ch'uti'n uwach
(Lc. 13:24)

¹³ »Chixoc bi che ri oquibal ch'uti'n uwach. Ma ri oquibal y ri be que'ec chi xibalba' lic nim uwach, yey lic e q'ui ri queboc bi chiri'. ¹⁴ No'j ri oquibal y ri be que'ec chi c'aslemal na jinta utakexic, lic ch'uti'n uwach, yey na e ta q'ui ri queboc bi chiri'.

Ruch'a'tem ri ticawex cuc'utu sa' ri c'o pa ranima'
(Lc. 6:43-45)

¹⁵ »Lic chichajij iwib chiquiwach ri caquibi'ij e k'alajisanelab re ri Dios yey xa e socoso'nel. Ma wa' quec'un iwuc' ri'ix lic chacojo' utz quic'u'x, no'j chupa ri canima' xa pacha' e utiw lic e bik'onel. ¹⁶ Ec'u ri'ix quiweta'maj sa' ri c'o pa canima' ri ticawex ruma ri caqui'ano, we utz o na utz taj.

»E pacha' tak ri che': ri q'uix, na uva ta rujik'obalil cuya'o; yey ri xuluquej, na higos ta rujik'obalil cuya'o. ¹⁷ Jec'ula' juna chomilaj che', lic chom rujik'obalil cuya'o; no'j ri che' na chom taj, na jinta uchac rujik'obalil cuya'o. ¹⁸ Ri chomilaj che' na ube taj we na chom ta rujik'obalil cuya'o; jec'ula' ri che' na chom taj na cuya ta ujik'obalil chom. ¹⁹ Yey ronoje che' we na chom taj rujik'obalil cuya'o, cachet bi y caporox pa ak'. ²⁰ Ri'ix quiweta'maj c'u uwach juna che' ruma rujik'obalil cuya'o; jec'ula' cak'alajinic sa' tak ri c'o pa canima' ri ticawex ruma ri quibinic quisilabic.

Na conoje taj queboc chila' chicaj
(Lc. 13:25-27)

²¹ »Na conoje ta ri caquibi'ij chwe «Kajawal, Kajawal» queboc chila' chicaj pa rutakanic ri Dios, ma xew queboc ri caqui'an ri rajawal uc'u'x ri Nukaw c'o chila' chicaj. ²² Copon c'u ruk'ijol echiri' ri Dios cuk'at tzij paquiwi ri ticawex, yey chupa la' la k'ij lic e q'ui ri caquibi'ij chwe: «Wajawal, Wajawal, ri'oj xka'an k'alajisanic chupa ri bi' la chique ri ticawex. Yey chupa ri bi' la xekesaj

bi ri itzel uxlabixel y pa ri bi' la xka'an uq'uiyal milagros» quecha'. ²³ Ec'uchiri', ri'in jewa' cambi'ij chique: «Na xinweta'maj ta c'ana iwach, chixela wuc'; ma ri'ix xew ix 'anal re ri lic itzel uwach.»

Ri ja tz'akom lo pa'baj y ri ja x'ani' pa sanyeb
(Lc. 6:46-49)

²⁴ »China c'u ri cataw re ri nutzij yey cu'an janipa ri cambi'ij, canjunimaj ruc' jun achi lic c'o una'oj ma xutz'ak lo ri rocho pa'baj. ²⁵ Xpe c'u lo ri jab, lic xnimar tak ri nimaya' y xpe lo unimal cakjik' y xumach' rib che ri ja; na ruc' ta c'u ri', ri ja na xtzak ta ubi, ma pa'baj tz'akom lo wi. ²⁶ No'j c'u ri cuta ri nutzij yey na cu'an ta janipa ri cambi'ij, canjunimaj ruc' jun achi na jinta una'oj, ma xu'an ri rocho pa sanyeb. ²⁷ Xpe c'u lo ri jab, xenimar tak ri nimaya', xpe lo unimal cakjik' y xumach' rib che ri ja. Ec'u ri' ri ja xwuluwub bi y xsach uwach» xcha'.

²⁸ Echiri' xuq'uis ubi'xic wa' ri Jesús, ri winak lic caminak canima' che ruc'utunic, ²⁹ ma ruma ruc'utunic cak'alajinic lic c'o uwach, na xa ta pacha' ri caqui'an raj c'utunel re ri tzijpixab.

8

Ri Jesús cucunaj jun achi c'o yabil lepra che
(Mr. 1:40-45; Lc. 5:12-16)

¹ Ec'uchiri' xkaj lo ri Jesús chwa ri juyub, lic uq'uiyal winak xeterej lo chirij. ² Tec'uchiri', xopon jun achi c'o ri yabil lepra che, xuxuc rib chwach ri Jesús y xubi'ij che:

—Wajawal, we ca'aj co la, josk'ij la ri nucuerpo che wa yabil —xcha'.

³ Ec'u ri Jesús xuchap pana ruc' ruk'ab y jec'uwa' xubi'ij che:

—Cuaj, chu'ana ba chom ri' racuerpo —xcha'. Xew c'u xuq'uis ubi'xiquil wa', na jampatana xsach ri yabil c'o che rachi. ⁴ Ec'u ri Jesús xubi'ij che:

—Chatape', lic matzijo che junok ri'in xatincunaj. Jat chwach raj chanel pa Rocho Dios cha' rire carilo na jinta chi lepra chawe, y chaya'a chwach ri Dios ri kasa'n xtakan can ri Moisés che* cha' cak'alajin chiquiwach ri ticawex at cunutajinak chic —xcha'.

Ri Jesús cucunaj ri raj chac jun capitán aj Roma
(Lc. 7:1-10)

⁵ Echiri' xopon ri Jesús pa ri tinamit Capernaúm, xopon jun capitán* que ri soldados aj Roma ruc' y xujek lic quelaj che, ⁶ jewa' cubi'ij:

—Wajawal, ri waj chac lic yewa' c'o chwa uwarabal chiwocho. Rire xu'an sic y lic c'o pa c'ax —cacha'.

⁷ Ri Jesús xubi'ij che:

—Ri'in quin'ec y cancunaj —xcha'.

⁸ Ec'u ri capitán xubi'ij che:

—Wajawal, ri'in lic na takal ta chwe coc la chiwocho. Xew bi'ij la: “Chatcunutajok”, y ruc' ri ch'a'tem la, cacunutaj ri waj chac. ⁹ Ma e pacha' ri'in, in c'o puk'ab jun takanel y rire ebuya'om uq'uiyal soldados panuk'ab. We cambi'ij c'u che junok “Jat”, que'ec; o cambi'ij che junok chic “Chatpetok”, capetic. Yey we cambi'ij che juna waj chac “Cha'ana wa'”, cu'ano —xcha'.

¹⁰ Ri Jesús echiri' xuta wa', lic xcam ranima' che y jewa' xubi'ij chique ri eteran chirij:

—Pakatzij wi cambi'ij chiwe: Na nurikom tane chiquixo'l raj Israel junok lic c'o unimal cubulibal uc'u'x pacha' wa jun achi. ¹¹ Cambi'ij c'u chiwe: Lic e q'ui ri quepe pa relebal lo ri k'ij y e q'ui ri quepe putzakibal ri k'ij y queboc chwa ri mexa pa wa'im ruc' ri Abraham, ruc' ri Isaac y ruc' ri Jacob chupa rutakanic ri Dios c'o chila' chicaj. ¹² No'j tak c'u ri caquich'obo takal chique caquic'ul rutakanic ri Dios ruma e ratz-uchak' can ri Abraham, ri' quebesax bi y quec'ak bi pa ri k'eku'm; chiri' c'u ri'

quebok' wi y cakich'ich' ruwi que' —xcha'.

¹³ Ec'uchiri', xubi'ij ri Jesús che ri capitán:

—Oj chi ocho la, ma jela' cu'ana' pacha' ri xcubi' c'u'x la che —xcha'. Chupa c'u la' la jok'otaj xcunutaj ri raj chac.

Ri Jesús cucunaj ruchu-uji' ri Pedro
(Mr. 1:29-34; Lc. 4:38-41)

¹⁴ Ri Jesús xopon chirocho ri Pedro. Chiri' c'u ri' xril ruchu-uji' ri Pedro c'o chwa uwarabal y lic c'o ak' chirij. ¹⁵ Ec'u ri Jesús xuchap ruk'ab y jec'ula' xic'ow ri ak' chirij. Ec'uchiri', rixok xyactajic y xujek quebunimaj.

Ri Jesús quebucunaj uq'uiyal yewa'ib

¹⁶ Echiri' xoc rak'ab, xequic'am lo chwach ri Jesús uq'uiyal ticawex e c'o paquik'ab itzel uxlabixel. Ec'u ri Jesús ruc' ruch'a'tem xeberesaj bi tak ri itzel uxlabixel chique y xebucunaj conoje ri yewa'ib. ¹⁷ Xu'an wa' cha' e cu'ana ri utzijom can ri k'alajisanel Isaías echiri' xubi'ij: Rire xuc'am bi ri kayabil, y xuc'am bi ri kac'axc'olil *Is. 53:4* xcha'.

Ri cacaj queterej chirij ri Jesús
(Lc. 9:57-62)

¹⁸ Ri Jesús echiri' xrilo uq'uiyal winak quisutum rij, xebutak rutijo'n cha' quek'ax ch'aka ya'.

¹⁹ Ec'u la' la jok'otaj xopon ruc' ri Jesús jun achi aj c'utunel re ri tzi-jpixab y xubi'ij che:

—Lal tijonel, ri'in quinterej bi chi'ij la tob pachawi que'ec wi la —xcha'.

²⁰ Ri Jesús xuc'ul uwach:

—Ri yac c'o quijul y ri tz'iquin quexiq'uc' che ruwa caj c'o quisoc; no'j Ralaxel Chiquixo'l Ticawex na jinta ne uluwar tob xa pa cuxlan wi —xcha'.

²¹ C'o chi jun chique rutijo'n xubi'ij che ri Jesús:

—Wajawal, ya'a la luwar chwe canwoy'ej cacam na ri nukaw y canmuk

* 8:4 Lv. 14:1-32 * 8:5 “Capitán”: Wa' e aj wach que cien soldados.

canok; tec'uchiri', quinterej chi'ij la —xcha'.

²² Ec'u ri Jesús xuc'ul uwach:

—Ri'at chat-terej lo chwij; chaya'a can chique ri ecaminak chwach ri Dios cha' e rique quemukuw ri catz-quichak' quecamic —xcha'.

Ri Jesús cuk'atej ri cakjik' chwi ri mar

(Mr. 4:35-41; Lc. 8:22-25)

²³ Ec'uchiri', xoc ri Jesús pa jun barco y rutijo'n xebec ruc'.

²⁴ Tec'uchiri', xpe jun nimalaj cakjik' chwi ri mar y xujeko canoj ri barco che ya'. Yey ri Jesús cawaric.

²⁵ Ec'u rutijo'n xe'quic'osoj y xquibi'ij che:

—¡Kajawal! ¡Chocolobej la, ma coj-camic! —xecha'.

²⁶ Ri Jesús xuc'ul uwach:

—¿Su'chac lic quixi'ij iwib? Ri'ix lic xa jubik' ri cubulibal ic'u'x wuc' —xcha'.

Ec'uchiri' xyactajic, xuk'atej ri cakjik' y ri ya'. Xtani' c'u ri' ri cakjik' y ri ya' xyeni'ic.

²⁷ Rutijo'n lic xcam canima' che y xquibi'ij: «¿Sa' ruwach wa' wa'chi? ¡Ma tob ne e ri cakjik' y ri ya' caquicoj utzij!» xecha'.

Ri queb achijab aj Gadara e c'o paquik'ab itzel uxlaxixel

(Mr. 5:1-20; Lc. 8:26-39)

²⁸ Echiri' xopon ri Jesús ch'aka mar pa ri luwar re Gadara, xo'lc'ul cuma queb achijab ebelinak lo chuxo'l tak mukubal que anima'. Quicabichal e c'o paquik'ab itzel uxlaxixel y lic itzel quiwachlibal, ma cuma rique na jinta junok quic'ow chiri'.

²⁹ E tak c'u ri' wa' xquijeko lic co quesiq'uinic, jewa' xquibi'ij:

—¿Su'chac co'lmina ib la kuc', Jesús, Lal Uc'ajol ri Dios? ¿Petinak cami la re cojya la pa c'ax echiri' c'amaja' ne copon ri kak'ij? —xecha'.

³⁰ E c'o c'u uq'uiyal ak quewa' lo chinimanaj. ³¹ Ec'u ri itzel uxlaxixel lic xebelaj che ri Jesús:

—We cojesaj bi la, ya'a la luwar chike cojoc bi cuc' ri ak —xecha'.

³² Ec'uchiri', xubi'ij ri Jesús chique:

—Jix ri' —xcha'. Tak ri itzel uxlaxixel xebel bi chique rachijab y xeboc cuc' ri ak. Tec'uchiri', conoje ri ak xe'quic'aka bi quib chwi jun siwan, xebe'tzaka c'a chupa ri mar y chiri' xejik' wi.

³³ Ec'u ri e chajinel que ri ak xebanimajic. Y echiri' xebopon pa ri tinamit, xquijek utzijoxic ronoje ri xquic'ulumaj ri ak y ri xu'an ri Jesús chique ri queb achijab echiri' xeberesaj paquik'ab ri itzel uxlaxixel.

³⁴ Conoje c'u ri winak re ri tinamit xepe pa c'o wi ri Jesús. Echiri' xquil uwach, lic xquitz'onoj che cha' quel bi chiri' pa tak ri quiluwar.

9

Ri Jesús cucunaj jun sic

(Mr. 2:1-12; Lc. 5:17-26)

¹ Ec'uchiri', xoc ri Jesús pa jun barco, xk'ax ch'aka ya' y xopon pa ri tinamit pa jekel wi. ² E c'o c'u jujun achijab xquic'am lo jun achi sic chwach ri Jesús, quitelem lo chwa jun ch'at. Echiri' ri Jesús xril ri cubulibal quic'u'x ruc', xubi'ij che rachi sic:

—Wal, chanimarisaj ac'u'x, ma ronoje ramac cuytajinak chic —xcha'.

³ E c'o c'u jujun chique raj c'utunel re ri tzijpaxab jewa' xquich'obo: «Wa jun achi lic camacun chirij ri Dios, ma na ya'tal ta puk'ab junok cubi'ij wa'.»

⁴ No'j ri Jesús xuna'bej sa' ri caquich'obo; ruma c'u ri', xubi'ij chique:

—¿Su'chac cach'ob alak ri na utz taj? ⁵ ¿Sa' c'u ri na c'ayew taj cambi'ij: “Ronoje ramac cuytajinak chic” o “Chatyactajok y chatbinok”? ⁶ E cuaj c'ut queta'maj alak wa': Ralaxel Chiquixo'l Ticawex ya'tal puk'ab cucuy tak ri mac que ri winak che ruwachulew —xcha'.

Xubi'ij c'u ri' che ri sic:

—Chatyactajok, chac'ama bi rach'at y jat cha'wocho —xcha'.

⁷ Xyactaj c'u ri sic y xe'ec chirocho. ⁸ Echiri' xquil wa' ri winak, lic xcam canima' che y xquiyac uk'ij ri

Dios ruma uya'om chique ri ticawex caqui'an tak wa'.

*Ri Jesús cusiq'uij ri Mateo
(Mr. 2:13-17; Lc. 5:27-32)*

⁹ Xel c'u bi ri Jesús chiri' y xril jun achi aj tz'onol puak re tojoníc, Mateo rubi', tz'ul pa ri luwar pa ca'an wi ri tojoníc che ri gobiérno, y xubi'ij che:

—Chat-terej lo chwij —xcha'. Y ri Mateo xyactajic y xterej bi chirij.

¹⁰ Ec'u ri Jesús xumaj bi chirocho wa'chi y xeboc chwa ri mexa cuc' rutijo'n. Xebopon c'u uq'uiyal aj tz'onol puak re tojoníc y uq'uiyal aj maquib y xetz'uyi' junam cuc'.

¹¹ Echiri' xquil wa' ri fariseos, xquibi'ij chique rutijo'n ri Jesús:

—¿Su'chac ri tijonel iwe ri'ix cawa' junam cuc' raj tz'onol puak re tojoníc* y cuc' raj maquib? —xecha'.

¹² Echiri' xuta wa' ri Jesús, xubi'ij chique:

—E janipa ri utz quiwach, na cawax ta aj cunanel chique; ma wa' xew chique ri e yewa'ib cajawax wi. ¹³ Oj c'u alak y maja na alak sa' que'elawi ri cubi'ij ri Dios chupa Ruch'a'tem:

Ri lic cuaj ri'in chiwe e ri c'utubal re
ri c'axna'bal c'u'xaj,
na e ta ri cacamisax awaj re kasa'n
chinuwach *Os. 6:6*
cacha'.

»Ri'in na in petinak ta che quisiq'uixic ri jusuc' quibinic quisilabic, ma in petinak che quisiq'uixic raj maquib cha' caqui'alc'atij ri quibinic quisilabic —xcha'.

*Ri tz'onobal puwi ri ayuno
(Mr. 2:18-22; Lc. 5:33-39)*

¹⁴ Ec'uchiri', rutijo'n ri Juan Aj Ya'l Bautismo xekib ruc' ri Jesús y xquitz'onoj che:

—¿Su'chac ri'oj y ri fariseos lic caka'an ayuno yey ri tijo'n rilal na caqui'an taj? —xecha'.

¹⁵ Ri Jesús xuc'ul uwach:

—¿Utz neba quec'o'ji' pa bis ri esiq'uim pa c'ulaniquil we c'a c'o

rala cac'uli'ic chiquixo'l? Na utz taj. No'j copon na ri k'ij echiri' quesax bi rala chiquixo'l; c'a ec'uchiri' caqui'an ayuno. ¹⁶ Na jinta junok cuc'ojoj ruk'u' k'e'l ruc' c'jobal c'asak, ma ri c'jobal c'asak, we xc'olotaj upa, e cujec' ri c'ul k'e'l y más ne curich'ij bi.

¹⁷ »Jec'ula' ri vino c'ac' 'anom na cak'ej ta chupa juna surun† k'e'l. Ma we ca'ani' wa', ri vino c'ac' echiri' canajtir uk'ij, curakij ri surun, catix c'u ri' ri vino y ri surun na jinta chi uchac. Ruma c'u la', ri vino c'ac' 'anom chirajawaxic wi cak'ej chupa ri surun c'asak cha' ucabichal wa' cacowinic —xcha'.

*Rumi'al ri Jairo y rixok xuchap
ruk'u' ri Jesús
(Mr. 5:21-43; Lc. 8:40-56)*

¹⁸ Echiri' catajin ri Jesús che ubi'xiquil tak wa', xc'un lo jun achi aj wach re ri tinamit, xuxuc rib chwach y xubi'ij che:

—Ri numi'al lic c'a e la' xcamic. We ta rilal que'ec la wuc' y que'ya'a ri k'ab la puwi', rire cac'astaj tanchic —xcha'.

¹⁹ Ri Jesús xyactajic y xe'ec ruc' rachi, junam cuc' rutijo'n. ²⁰ Ec'u la', c'o jun ixok lic yewa', e cablajuj lo junab ri' na catani' ta ri yabil re upa ic' che. Xkib c'u pana chirij ri Jesús y xuchap ruchi' ruk'u'. ²¹ Ma xuch'ob pa ranima': «Tob tane xew lu'k'u' canchapo, ruc' ri' quincunutajic.»

²² Pero ri Jesús xtzu'n lo chirij, xutzu' uwach rixok y jewa' xubi'ij che:

—Ixok, nimarisaj c'u'x la, ma xcunutaj la ruma xcubi' c'u'x la wuc' —xcha'. Chupa c'u ri' la jok'otaj rixok asu xcunutajic.

²³ Ec'uchiri' xoc bi ri Jesús chirocho rachi aj wach, quebutzutza' ri caquich'awisaj su' y ri winak quewokokic. ²⁴ Xubi'ij c'u ri Jesús chique:

—Chixelubi, ma wa ralco ali na caminak taj, xa cawaric —xcha'. Yey xa xquitze'ej c'u ri xubi'ij.

* **9:11** “Raj tz'onol puak re tojoníc”: Quil “cobrador de impuestos” pa vocabulario. † **9:17** “Surun”: Quil “odre” pa vocabulario.

²⁵ Ec'uchiri' xebesax lo ri winak, ri Jesús xoc bi pa c'o wi ri ralco ali; xuchap c'u ruk'ab y wa'li xyactajic. ²⁶ Xe'ec c'u utzijoxic ri' wa' che ronoje tak la luwar.

Ri Jesús quebucunaj ca'ib potz'

²⁷ Echiri' xel bi ri Jesús chiri', xeterej bi ca'ib potz' chirij, lic co quesiq'uin che, jewa' caquibi'ij:

—¡Choj-juch' ca'n co che'la, lal Ralc'o'al can ri rey David! —xecha'.

²⁸ Echiri' xoc ri Jesús chuchi' jun ja, xekib ri ca'ib potz' ruc' y Rire xubi'ij chique:

—¿Quicoj ri'ix we ri'in c'o panuk'ab canya ri itzu'nibal? —xcha'.

Rique xquibi'ij:

—Cakacojo, Kajawal —xecha'.

²⁹ Ec'u ri Jesús xuya ruk'ab puwi ri quiwach y xubi'ij chique:

—Chu'ana wa' iwuc' e chirij ri cubulibal ic'u'x —xcha'.

³⁰ Jec'ula' xcunutaj ri quiwach. Ewi ri Jesús lic xebupixabaj, jewa' xubi'ij chique:

—Lic mitzijoj wa' che junok —xcha'.

³¹ No'j rique xew xebel bi, xquijek caquitzijoj pa ronoje tak la' la luwar ri xu'an ri Jesús.

Ri Jesús cucunaj jun me't

³² Echiri' catajin bi quelic ri queb achijab xcunutaj ri quiwach, ri winak xquic'am lo chwach ri Jesús jun achi me't c'o puk'ab jun itzel uxlaxixel. ³³ Ec'uchiri' ri Jesús xresaj bi ri itzel uxlaxixel che, ri me't xcunutajic y xujek cach'a'tic. E tak c'u ri winak lic xcam canima' che wa' y xquibi'ij chiquiwach: «Na kilom ta c'ana wa' wara Israel pacha' wa xkil wo'ora» xecha'.

³⁴ No'j ri fariseos xquibi'ij: «La' la Jesús queberesaj bi itzel uxlaxixel ruma ruchuk'ab ri cajawal ri itzel uxlaxixel» xecha'.

Ri Jesús cubi'ij lic quebajawax aj chac pa ruchac ri Dios

³⁵ Echiri' ri Jesús xic'ow pa tak ronoje tinamit y aldeas, cac'utun chupa tak ri sinagogas chujunal luwar, cutzijoj ri Utzilaj Tzij re rutakanic ri Dios y cucunaj ronoje yabil y c'axc'obic. ³⁶ Ec'uchiri' xeril ruq'uiyal winak, lic xejuch' ca'n pa ranima', ma rique pacha' e bexex e sachinak, quiquichom quib y na jinta chi chajinel que. ³⁷ Xubi'ij c'u chique rutijo'n: «Pakatzij wi cambi'ij chiwe: Ri molonic cajawax u'anic, lic nim; no'j raj chac na e q'ui taj. ³⁸ E uwari'che, chitz'onoj che ri Dios, ri Rajaw ri molonic, cha' quebutak lo aj chac chupa ruchac»^{*} xcha'.

10

Ri Jesús quebucha' cablajuj utako'n
(Mr. 3:13-19; Lc. 6:12-16)

¹ Ec'u ri Jesús xebusiq'uij ri cablajuj utijo'n y xuya paquik'ab quebequesaj bi itzelilaj uxlaxixel y caquicunaj ronoje yabil y ronoje c'axc'obic. ² E quibi' tak wa' wa cablajuj e tako'n:^{*} Nabe e Simón ri cabi'x Pedro che y ruchak' Andrés, Jacobo y ruchak' Juan (wa ca'ib e uc'ajol ri Zebedeo),

³ Felipe, Bartolomé, Tomás, Mateo ri aj tz'onol puak re tojonc, Jacobo ruc'ajol ri Alfeo, Lebeo ri cabi'x Tadeo che,[†]

⁴ Simón ri cabi'x che “ri Cananista”,[‡] q'uisbal re, e Judas aj Iscariot,[§] ri xc'ayin re ri Jesús.

Ri Jesús cuya bi quichac ri cablajuj utako'n
(Mr. 6:7-13; Lc. 9:1-6)

⁵ Ri Jesús xebutak bi ri cablajuj y e pixabanic wa' xuya bi chique:

«Mix'ec pa tak ri luwar que ri na e ta aj judi'ab, mixoc ne pa tak ri tinamit re Samaria. ⁶ Jix c'u nabe cuc' ri bexex e sachinak, wa' e ri e

^{*} 9:38 Lc. 10:2 ^{*} 10:2 “Tako'n”: Quil “apóstol” pa vocabulario. [†] 10:3 También cabi'x “Judas” che. Lc. 6:16 [‡] 10:4 “Cananista”: Quil “Zelote” pa vocabulario. [§] 10:4 “Iscariot”: Wa' e utinamit ri Judas.

aj judi'ab re ri tinamit Israel. ⁷ Jix y jewa' chitzijoj: "Rutakanic ri Dios petinak chila' chicaj xa nakaj chi c'o wulok."

⁸ »Chebicunaj conoje ri yewa'ib cuc' tak ri c'o ri yabil lepra chique, chebic'astajisaj ri ecaminak y chebiwesaj bi itzel uxlaxixel. Wa chuk'ab quic'ul ri'ix e rutzil nuc'u'x chiwe; jec'ula' mitz'onoj rajil ri chac qui'an ruc'.

⁹ »Mic'am bi imeyo re oro, re plata o re cobre. ¹⁰ Mic'am ne bi teb re ubitak iwe, mic'am bi jun chic icoton, jun chic mola'j ixajab o jun chic ich'ami'y. Ma e junok cachacunic, lic takalic caya'i' janipa ri cajawax che.

¹¹ »Echiri' quixopon pa juna tinamit o pa juna aldea, chitzucuj junok jusuc' ubinic usilabic y chixcanaj c'u can chirocho c'ate quixel bi chiri' echiri' quix'ec pa jun chic tinamit.

¹² »Echiri' quixoc chuchi' juna ja, chiya'a rutzil quiwach ri e c'o chiri', quitz'onoj c'u ri utzil chomal re ri Dios paquiwi'. ¹³ We quixquic'ul c'u ri e c'o pa ri ja, cacana'j ri utzil chomal itz'onom can paquiwi'. No'j we rique na quixquic'ul taj, ri utzil chomal catzelej tanchi lo iwuc'.

¹⁴ »We na quixquic'ul taj y na caj tane caquita ri quitzijoj, chixelubi chupa ri ja o pa ri tinamit yey chipupa' can rulew c'o che ri iwakan. ¹⁵ Ma pakatzij wi cambi'ij chiwe: Chupa ruk'ijol ri k'atbal tzij, más lic c'ax ri cape paquiwi ri tinamit na xquic'ul ta ri Utzilaj Tzij, chwa ri cape paquiwi ri e aj Sodoma y ri e aj Gomorra.*

Tak ri c'axc'obic capetic

¹⁶ »Chitape': Ri'in quixintak bi pacha' ix bexex chiquixo'l utiw. Lic chichajij c'u iwib chi utz jela' pacha' ru'anic cuchajij rib ri cumatz, yey chi'ana pacha' ri palomax na jinta c'o cu'an che junok.

¹⁷ »Lic chichajij c'u iwib chiquiwach ri winak, ma quixquic'am bi pa tak k'atbal tzij y caquijich' ipa pa tak sinagogas. ¹⁸ Wuma

ri'in, quixquic'am ne bi chiquiwach tak raj k'atal tzij y ri takanelab. Ruc' c'u ri' wa', utz quik'alajisaj nuwach ri'in chiquiwach rique y chiquiwach conoje tak ri tinamit che ruwachulew. ¹⁹ Ec'uchiri' quixquiya chiquiwach, mubisoj ic'u'x sa' ri quibi'ij; ma echiri' copon ru'orayil re quixch'a'tic, e ri Dios caya'w lo ich'a'tem. ²⁰ Ma na ix ta ri quixch'a'tic, e ri Ruxlabixel Rikaw; e Rire cuya ich'a'tem.

²¹ »E tak c'u ri ticawex quequiya ri catz-quichak' pa camic; ri c'o calc'o'al quequiya tak ri calc'o'al pa camic; ri calc'o'al queyactaj chiquij quichuquikaw y quequiya pa camic. ²² Tak ri winak lic tzel quixquil ri'ix xa ruma icojom ri nubi'; no'j china c'u ri cuchuk'ubej rib c'a chupa ri q'uisbal re, e ri' ri cacolobetajic. ²³ Echiri' lic quixternabex ruc' c'axc'obic pa juna tinamit, jix che jun chic. Ma pakatzij wi cambi'ij chiwe, c'amaja' ne quiq'uiso quixic'ow chupa ronoje tak ri tinamit re Israel, echiri' cac'un tanchi Ralaxel Chiquixo'l Ticawex.

²⁴ »Na jinta juna tijo'n más c'o uwach chwa rutijonel y na jinta ne juna aj chac más c'o uwach chwa ri rajaw. ²⁵ Juna tijo'n cubulok we xu'ana jela' pacha' rutijonel y juna aj chac cubulok we xu'ana pacha' ri rajaw. We cabi'x "Beelzebú" che ri quikaw rac'alab, ¿mac'uware' ri cabi'x chique ri ralc'o'al?

Mixi'ij iwib chiquiwach ri winak (Lc. 12:4-9)

²⁶ »Mixi'ij iwib chiquiwach ri winak. Ma copon ri k'ij echiri' janipa ri na k'alajisam taj, cak'alajisax na; yey janipa ri ewatalic, queta'maxic. ²⁷ E janipa ri cambi'ij ri'in xew chiwe ri'ix, chibi'ij ri'ix chiwachil; yey ri canweswa' ri'in chiwe, chixsiq'uin che ubi'xiq'uil pa tak be.

²⁸ »Mixi'ij iwib chiquiwach ri c'o paquik'ab quixquicamisaj, ma wa' xew che ri cuerpo caqui'an wi, no'j na jinta paquik'ab caquisach uwach

* 10:15 Gn. 19:24-25

ruc'aslem junok chwach ri Dios. E chixi'ij iwib chwach ri Jun c'o puk'ab quebuc'ak bi ri ticawex junam ruc' ri quicuerpos y ri canima', chi xibalba' re tijbal c'ax.

²⁹ »Iweta'am, ca'ib raltak co tz'iquin quec'ayix xa chwa jun ralco meyo. Na ruc' ta c'u ri', na catzak tane junok chique pulew we ri Kakaw na cuya ta luwar. ³⁰ Mac'uwari' ri'ix lic puk'ab ix c'o wi, ma xa ne chujujunal riwi' ajilam ruma Rire. ³¹ E uwari'che, mixi'ij iwib; ma ri'ix más c'o iwach chiquiwach ri raltak co tz'iquin.

³² »E junok cuk'alajisaj chiquiwach ri winak, cubi'ij: “In tijo'n re ri Jesús”; jec'uri'la' can'an ri'in che rire, cambi'ij chwach ri Nukaw c'o chila' chicaj: “Katzij, wa jun e nutijo'n” quincha'.

³³ »No'j c'u ri cubi'ij chiquiwach ri winak: “Ri'in na in ta tijo'n re ri Jesús.” Jec'uri'la' can'an ri'in che rire, cambi'ij chwach ri Nukaw c'o chila' chicaj: “Katzij, wa jun na nutijo'n taj” quincha'.

Ri jachbal quipa ri ticawex ruma ri Jesús

(Lc. 12:49-53; 14:26-27)

³⁴ »Mich'obo we ri nuc'unic che ruwachulew cuc'am lo utzil chomal. Na e ta ri', ma e cuc'am lo ch'a'oj chiquixo'l tak ri ticawex.** ³⁵ Ruma c'u ri nuc'unic, ri ticawex caquijek quech'o'jin chiquiwach rala ruc' rukaw, rali ruc' ruchu y ralibatz ruc' ruchu-ralib.

³⁶ Ec'u ri' ri tzel quebilow re juna ticawex, e mismo ri e c'o pa rocho. *Mi. 7:6*

³⁷ »China ri más lic e c'ax quebuna' ruchu-ukaw chinuwach ri'in, na takal ta che caterej chwij; jec'ula' china ri más lic e c'ax quebuna' ri ralc'o'al chinuwach ri'in, ri' na takal ta che caterej chwij.

** **10:34** Tak ri ticawex quech'o'jin chiquiwach, ma ri na quec'uluw ta re ri Cristo queyactaj chiquij ri caquicoj rubi', caqui'an c'ax chique y laj ne quequicamisaj. †† **10:38** Pa ri ch'a'tem griego cubi'ij “ri na ruc'a'am ta rucruz”.

³⁸ »China ri na caraj taj cutij c'ax ruma e nutijo'n,†† ri' na takal ta che caterej chwij. ³⁹ China ri cutij uk'ij lic quel chi utz ruc'aslem wara che ruwachulew, ri' e cujam ri c'aslemal chila' chicaj; no'j ri cuya ranima' ruc'aslem wuma ri'in, ri' e curik ri chomilaj uc'aslemal chwach ri Dios.

Ri rajil uc'axel tak ri chac

(Mr. 9:41)

⁴⁰ »China ri cac'uluw iwe ri'ix, in ri quinuc'ulu; yey china ri cac'uluw we ri'in, e cuc'ul ri Jun takayom lo we. ⁴¹ China ri cac'uluw re juna k'alajisanel ruma e k'alajisay re rutzij ri Dios, ri rajil uc'axel cuc'ulu e jela' pacha' ri cuc'ul juna k'alajisanel. China ri cac'uluw re juna ticawex ruma jusuc' rubinic chwach ri Dios, ri rajil uc'axel cuc'ulu e jela' pacha' ri cuc'ul ri jusuc' ubinic usilabic chwach ri Dios. ⁴² China c'u ri cusipaj tob xa juna tzima ya' joron che junok chique wa' wa ch'uti'k ruma e nutijo'n, pakatzij wi cambi'ij chiwe, ri' na cujam ta c'ana ri rajil uc'axel» xcha ri Jesús.

11

Ri Juan Aj Ya'l Bautismo quebutak lo rutijo'n ruc' ri Jesús

(Lc. 7:18-23)

¹ Echiri' ri Jesús xuq'uis quipix-abaxic ri cablajuj utijo'n, xel bi chirir' re cac'utunic y re cutzizoj Ruch'a'tem ri Dios chupa tak ri quitinamit rutijo'n.

² Ri Juan c'o pa cárcel echiri' xuta ri cu'an ri Cristo. Xebutak c'u lo ca'ib chique rutijo'n ruc' Rire, ³ cha' que'quit'onoj che:

—¿E rilal Rucha'o'n lo ri Dios, ri Jun bi'tal chic cac'unic, o cakoy'ej chi junok chic? —xecha'.

⁴ Ri Jesús xuc'ul uwach:

—Jix y chitzizoj che ri Juan ronoje wa quixtajin che utayic y che rilic.

⁵ Ma ri e potz' quetzu'nic, ri e sic quebinic, ri c'o yabil lepra chique quecunutajic, ri e t'o'c quetanic, ri ecaminak quec'astajic y chique ri niba'ib catzijox ri Utzilaj Tzij.* ⁶ Nim uk'ij ralaxic c'u ri' ri na casach ta ri cubulibal uc'u'x wuc' —xcha'.

Ri Jesús cach'a't puwi ri Juan Aj Ya'l Bautismo

(Mr. 7:24-35)

⁷ Ec'uchiri' xebec rique, ri Jesús xujek cach'a't puwi ri Juan chique ri winak, jewa' xubi'ij:

«¿Sa' ri xe'ila alak pa ri luwar catz'intz'otic? ¿Xe'ila neba alak jun achi na jinta ucowil xa pacha' tani cajabajo'x ruma ri tew? ⁸ ¿Sa' ri xe'ila alak? ¿Xe'ila neba alak jun achi uwikom rib ruc' chomilaj c'ul? Na e ta ri', ma eta'am alak ri lic quewikic, ri' pa cocho e aj wach ejekel wi.

⁹ Cantz'onoj c'u ri': ¿Sa' ri xe'ila alak? ¿Xe'ila alak jun k'alajisanel? Are', yey pakatzij wi cambi'ij che alak: Rire e más c'o uwach chiquiwa ri jujun chic k'alajisanelab. ¹⁰ Ma jewa' cubi'ij Ruch'a'tem ri Dios puwi ri Juan:

Ri'in cannabesaj bi ri waj chac chawach Ri'at cha' cuyijba' ri be chwach pan rawoponibal

Mal.

3:1

cache'.

¹¹ »Pakatzij wi cambi'ij che alak: Na jinta junok chique ri ticawex ebalaxinak wara che ruwachulew más c'o uwach chwa ri Juan Aj Ya'l Bautismo. Pero chwi c'u ri' wa' wa que'ec, china ri coc chupa rutakanic ri Dios petinak chila' chicaj, tob na jinta uwach, más nim uk'ij ralaxic chwa ri Juan.†

¹² »Ruc' ri Juan Aj Ya'l Bautismo xjek lo utzijoxic ri Utzilaj Tzij puwi rutakanic ri Dios petinak chila' chicaj, y wa' c'a catajin utzijoxic wak'ij ora, tob e c'o ri caquitij uk'ij caquik'atej wa'. Na ruc' ta c'u ri', e ri lic caquitij

uk'ij caquitzucuj wa takanic, caya'taj chique queboc chupa. ¹³ Ma lic chwach pana echiri' xujek catzijon ri Juan, ri k'alajisanelab y ri Moisés quitz'ibam chi lo chupa ri Tzij Pixab chwi ruc'unibal rutakanic ri Dios. ¹⁴ We quiwaj c'u ri'ix quicojo, ri Juan e ri Elías, ri jun bi'tal chic cac'unic. ¹⁵ China c'u ri c'o utanibal che utayic, jchuta c'u ri'!

¹⁶ »¿China c'u ruc' canjunimaj wi quiwach wa winak re wak'ij ora? E canjunimaj cuc' ri c'o'mab quebe'tz'ula pa c'ayibal y lic quesiq'uin chiquiwach, ¹⁷ caquibi'ij: Echiri' ri'oj xkach'awisaj su' chiwe, ri'ix na xiwaj taj quix-xajawic; yey echiri' xkatunaj bix bisobal uwach chiwe, na xiwaj taj quixjuyuyic quecha'.

¹⁸ »Jec'ula' caqui'an tak ri winak, ma echiri' xc'un ri Juan Aj Ya'l Bautismo, rire lic cu'an ayuno y na cutij tane vino. Yey ri winak caquibi'ij: “Wa' wa'chi c'o puk'ab jun itzel uxlabixel” quecha'.

¹⁹ »Xc'un c'u lo Ralaxel Chiquixo'l Ticawex. Rire cutij ronoje ri caya' chwach, yey tak ri winak caquibi'ij: “Wa' wa jun achi lic japjatel y k'aba'rel, cachbi'il raj tz'onol puak re tojonict y raj maquib” quecha'. No'j cak'alajin na c'ut china tak ri lic c'o runa'oj ri Dios cuc' ruma ri qui'anom» xcha ri Jesús.

Ri c'axc'obic cape paquiwi ri tinamit na caquitzelej ta quitzij

(Lc. 10:13-15)

²⁰ Ec'uchiri', ri Jesús lic xebuyaj ri winak re tak ri tinamit pa u'anom wi uq'uiyal milagros, ma rique na xquitzelej ta quitzij chwach ri Dios. Jec'uwa' xubi'ij:

²¹ «¡Lic tok'o' iwach ri ix aj Corazín! ¡Lic tok'o' iwach ri ix aj Betsaida!

* **11:5** Pa Is. 61:1 cubi'ij: Rucha'o'n lo ri Dios e cutzijoj ri Utzilaj Tzij chique ri niba'ib. † **11:11** Ri Juan Aj Ya'l Bautismo na xril ta chubi rucamic y ruc'astajibal ri Jesús, yey na xril tane rukajibal lo ri Ruxlabixel ri Dios, ma xcamic echiri' c'amaja' quic'ow tak wa'. E uwari'che ri xquicoj rubi' ri Cristo chwi lo rucamic ri Juan más c'o xk'alajisax chiquiwach rique chwa ri Juan. Lc. 10:23-24; Heb. 11:39-40 ‡ **11:19** “Raj tz'onol puak re tojonict”: Quil “cobrador de impuestos” pa vocabulario.

Ma we ta chupa ri tinamit Tiro y ri tinamit Sidón. § xilitaj wi wa c'utubal re ruchuk'ab ri Dios xin'an chiwach ri'ix, c'o tan k'ij ta lo ri' xquitzelej quitzij chwach ri Dios, quicojom chi c'u quik'u' c'ax rij y quitz'uyubam quib pa chaaj ruma ri quibis. ²² E uwari'che cambi'ij chiwe: Echiri' copon ri k'ij re ri k'atbal tzij, más nim ri c'axc'obic cape piwi ri'ix chwa ri c'axc'obic cape paquiwi ri winak re ri tinamit Tiro y ri tinamit Sidón. **

²³ »Yey ri ix aj Capernaúm, e chiwach ri'ix lic yacom chi ik'ij c'a chijaj; yey na e ta ri', ma lic cac'ak ne bi ik'ij y quixc'ak ne bi c'a chi xibalba' re tijbal c'ax. Ma we ta pa ri tinamit Sodoma xilitaj wi wa milagros xin'an chiwach ri'ix ix aj Capernaúm, ri' la' la tinamit c'a c'o tane wo'ora. ✧ ²⁴ Ec'u cambi'ij wa' chiwe: Pa ri k'ij re ri k'atbal tzij, lic nim ri c'axc'obic cape piwi ri'ix chwa ri xpe paquiwi ri winak re ri tinamit Sodoma» xcha'.

*Ri Jesús cuyac uk'ij Rukaw
(Lc. 10:21-22)*

²⁵ Ec'u la' la jok'otaj ri Jesús xu'an orar chwach Rukaw, jewa' xubi'ij:

«Nukaw, canyac k'ij la, Lal Rajaw ruwa caj y ruwachulew, ma ri k'alajisam la chique ri lic caqui'an ch'uti'n che quib, wa' ewam la chiquiwach ri lic c'o quina'oj y lic c'o quimajom. ²⁶ Jela' x'an la, Nukaw, ma e x'aj la ri'» xcha'.

²⁷ Tec'uchiri', xubi'ij chique ri ticawex:

«Ronoje tak ri c'olic ya'tal lo panuk'ab ruma ri Nukaw. Na jinta c'u junok lic umajom usuc' chi utz sa' ruwach Ruc'ajol ri Dios, xew ri Kakaw Dios eta'mayom re. Y na jinta ne junok umajom usuc' chi utz sa' ruwach ri Kakaw Dios, xew Ruc'ajol ri Dios eta'mayom re; yey puk'ab c'u ri' Ruc'ajol c'o wi china chique caraj cuk'alajisaj wi wa'.

Ri uxlanem cuya ri Jesús

²⁸ »Chixpeta wuc', iwonoje ri ix cosinak y c'o iweka'n, ma ri'in canya uxlanem chiwe. ²⁹ Chiya'a iwib chuxe' ri nuyucu cancoj ri'in chiwe. Chimaja c'u iwe'ix chwij, ma ri'in utz nuc'u'x y na can'an ta nim che wib chiwach. We qui'an c'u ri' wa', quirik na ri utzil chomal piwanima'. ³⁰ Ma ri nuyucu ri'in, na c'ayew ta ruc'axic bi y ri eka'n canya bi chiwe na al taj» xcha'.

12

*Ri Jesús e rajaw ri k'ij re uxlanibal
(Mr. 2:23-28; Lc. 6:1-5)*

¹ Chupa tak c'u ri' la' la k'ij pa jun k'ij re uxlanibal, ri Jesús cuc' rutijo'n e ri' quebic'ow pa tak tico'n re trigo. Ec'u rutijo'n, ruma lic quenumic, xquijek caquich'upila' bi ri trigo; tec'uchiri', caquikil ruc' ri quik'ab y caquitijo.

² Echiri' ri fariseos xquil wa', xquibi'ij che ri Jesús:

—Chilape la, ri e tijo'n la caqui'an ri na takal taj ca'ani' chupa ri k'ij re uxlanibal —xecha'.

³ Ec'u ri Jesús xuc'ul uwach:

—¿Na ajilam ta neba alak ri xu'an ri David julaj echiri' rire cuc' ri rachbi'il xenumic? ⁴ Xoc c'u chupa ri Rocho Dios y junam cuc' ri rachbi'il xquitij ri pam ya'tal chi puk'ab ri Dios; ✧ tob na takal ta chique rique caquitijo, ma wa' xew takal chique raj chacunel pa Rocho Dios.

⁵ »¿Na iwajilam ta neba ri tz'ibital can ruma ri Moisés chupa ri Tzij Pixab? Ma cubi'ij e raj chacunel pa Rocho Dios na quebuxlan ta chupa ri k'ij re uxlanibal; na ruc' ta c'u ri', wa' na mac ta chique. ✧

⁶ »Cambi'ij c'u ri'in chiwe: C'o jun wara más nim uk'ij chwa ri Rocho Dios. ⁷ We ta ri'ix imajom usuc' sa' que'elawi ri cubi'ij ri Dios chupa Ruch'a'tem:

§ 11:21 Lic eta'matalic ri ejekel pa wa queb tinamit Tiro y Sidón, lic e aj tioxab y lic e aj maquib. Is. 23:1-18 ** 11:22 Ri ticawex quitom ri Utzilaj Tzij y na caquicoj taj, más c'ax ri cape paquiwi' chiquiwa ri ticawex na jinta c'o quitom puwi'. ✧ 11:23 Gn. 19:24-28 ✧ 12:4 1 S. 21:1-6 ✧ 12:5 Nm. 28:9-10

Ri lic cuaj Ri'in chiwe e ri c'utubal re
ri c'axna'bal c'u'xaj,
na e ta ri cacamisax awaj re kasa'n
chinuwach *Os. 6:6*
cacha'; we ta c'u lic quimaj usuc' wa',
ri' na quik'at ta tzij paquiwi ri na
jinta mac qui'anom. ⁸ Ma Ralaxel
Chiquixo'l Ticawex e rajaw ri k'ij re
uxlanibal —xcha'.

*Ri Jesús cucunaj jun achi chakiji-
nak uk'ab*

(Mr. 3:1-6; Lc. 6:6-11)

⁹ Echiri' xel ri Jesús chiri', xoc
chupa ri sinagoga re ri tinamit. ¹⁰ C'o
c'u jun achi chiri' chakijinak jun
uk'ab. Yey e tak ri lic caquitzu-
cuj su'anic caquitz'ak uchi' ri Jesús,
xquitz'onoj che:

—¿Ube nawi cacunax juna yewa'
chupa ri k'ij re uxlanibal? —xecha'.

¹¹ Ri Jesús xuc'ul uwach:

—¿C'o nawi junok che alak we pa
ri k'ij re uxlanibal tzakinak juna
ubexex pa siwan, na que'resaj tulok?

¹² ¿China c'u ri más c'o uwach, e rachi
o e ri bexex? Ruma c'u ri', takalic
ca'an ri utz chupa ri k'ij re uxlanibal
—xcha'.

¹³ Ec'uchiri', xubi'ij ri Jesús che
rachi chakijinak uk'ab:

—Chasuc'upij rak'ab —xcha'.

Ec'u rachi xuyuk ruk'ab y wa'
xutziric, ruk'ab xu'an tanchi jela'
pacha' ri jun chic.

¹⁴ Xebel c'u bi ri fariseos y
xquich'a'tibej chiquiwach su'anic
caquisach uwach ri Jesús.

Ri Jesús e Ucha'o'n lo ri Dios

¹⁵ Ri Jesús reta'am sa' ri cacaj
caqui'an che; ruma c'u la', xel bi
chiri' y lic e q'ui ri winak xeterej bi
chirij. Ec'u Rire xebucunaj conoje
ri yewa'ib ¹⁶ yey lic xebupixabaj
cha' na caquik'alajisaj taj china Rire.
¹⁷ Xu'an tak wa' cha' e xu'ana rubi'im
ri Dios ruma ri k'alajisanel Isaías:

¹⁸ E waj chac wa', ri Jun nucha'om
lok.

Ri'in lic c'ax canna'o y lic quinquic'ot
ruc'.

Canya c'u ri Wuxlabixel puwi Rire

cha' cutzijoj ri lic usuc' can'an Ri'in*
chiquiwach conoje tak ri tinamit che
ruwachulew.

¹⁹ Na ruc' ta yaj, na ruc' ta sic' cu'an
wa';

Na jinta c'u junok ri' cataw re caya-
janic o casiq'uin pa tak be.

²⁰ Yey Rire na cusach tane uwach ri xa
ch'itil chic.

E pacha' junok na que'ec ta che
uk'epic juna su' cotoquic y na
cuyubij tane juna mecha xa
cabutzutz chic;

ma cuc'ut ri rutzil uc'u'x
chique tak ri paxinak quic'u'x
y ri na jinta chi quichuk'ab.

Jec'uri'la' cu'ano copon na ri k'ij
echiri' na jinta chi junok
cach'ijow uchuk'ab ri lic usuc'
can'an Ri'in.

²¹ Conoje tak c'u ri' ri tinamit che
ruwachulew
lic caquicuba' pan quic'u'x ruc'
Rire *Is. 42:1-4*
xcha'.

*Cabi'x che ri Jesús e uchuk'ab ritzel
ri c'o ruc'*

(Mr. 3:20-30; Lc. 11:14-23)

²² Ec'uchiri', xquic'am bi chwach
ri Jesús jun achi potz' y me't yey
c'o puk'ab jun itzel uxlabixel. Ec'u
ri Jesús xucunaj y jec'ula' wa'chi
xtzu'nic y xujek cach'a'tic. ²³ Conoje
c'u ri winak lic xcam canima' che y
xquibi'ij: «¿C'axtaj e rire ri Ralc'o'al
can ri rey David?» xecha'.

²⁴ Ec'u ri fariseos echiri' xquita
wa', xquibi'ij: «Wa' wa jun achi que-
beresaj bi ri itzel uxlabixel ruma
ruchuk'ab ri Beelzebú, ri cajawal ri
itzel uxlabixel» xecha'.

²⁵ Ri Jesús reta'am sa' ri caquich'obo;
ruma c'u ri', xubi'ij chique:

«We ri takanelab re juna tinamit
quijachom quipa ruma quech'o'jin
chiquiwach, ri' na canajtir ta ri
quitakanic. Yey we ri ejekel pa juna
tinamit o pa juna ja quijachom quipa
ruma quech'o'jin chiquiwach, ri' na
quetiqui' ta chi utz. ²⁶ Jec'ula', we ta ri
Satanás caresaj bi ri Satanás chique ri

* **12:18** Ri usuc' cu'an ri Dios e ri quebu'an jusuc' chique tak ri ticawex.

winak, ri' e pacha' cach'o'jin chiribil rib y utuquel kujach upa rutakanic. ¿Sa' c'u u'anic ri' canajtir rutakanic?

²⁷ »Ralak cabi'ij alak ri'in quebe-nuwesaj bi tak ri itzel uxlabixel ruc' ruchuk'ab ri Beelzebú. We ta e ri', ¿china c'u caya'w quichuk'ab ri' ri e tijo'n alak cha' quequesaj bi tak ri itzel uxlabixel? ¿Ruc' nawi ruchuk'ab ritzel winak caqui'ano? Tz'onoj c'u alak ri' chique ri e tijo'n alak we e u'anom ri'. ²⁸ Pero we ri'in quebe-nuwesaj bi tak ri itzel uxlabixel ruc' ruchuk'ab ri Ruxlabixel ri Dios, wa' e c'utubal re c'uninak chi rutakanic ri Dios chixo'libal alak.

²⁹ »Tape alak: ¿Su'anic coc juna elek'om pa rocho junok lic c'o uchuk'ab yey carelek'aj c'u lo rubitak re pa ja, we na cuyut ta nabe ri rajaw ja? Ma we relek'om uyutum chi ri rajaw ja, c'a ec'uchiri' utz carelek'aj bi ronoje la c'o pa ri ja.

³⁰ »China c'u ri na u'anom ta re wuc' ri'in, ri' aj ch'a'oj chwij. Yey china ri na cato'b ta wuc' ri'in che quic'amic lo jujun chic, ri' e cuwulij wa chac can'ano.

³¹ »E uwari'che cambi'ij che alak: C'o puk'ab ri Dios cucuy ronoje tak ri mac que ri ticawex ruc' ronoje tak ri na utz taj caquibi'ij, no'j na cucuy ta umac ri cach'a't chirij ri Ruxlabixel ri Dios. ³² China ri tzel cach'a't chirij Ralaxel Chiquixo'l Ticawex, ri' cacuytaj umac we cutzelej utzij. No'j ri tzel cach'a't chirij ri Santowilaj Ruxlabixel ri Dios, ri' na cacuytaj ta c'ana umac che wa' wa k'ij oj c'o wi y na cacuytaj tane c'ana umac tob ne che ruk'ijol ri c'aslemal catajin lok.

Ri che' eta'matal uwach ruma ri jik'obal cuya'o

³³ »E juna chomilaj che', lic chom rujik'obalil cuya'o; yey ri che' na chom taj, na chom ta rujik'obalil cuya'o. Ma ri che' queta'max uwach ruma rujik'obalil. ³⁴ ¡Ralak pacha' alak jupuk chi cumatz! ¿Su'anic c'u ri' cach'a'tibej alak ri utz we itzel c'u'x

alak? Ma ruc' ruch'a'tem ri ticawex cak'alajin ronoje ri uc'olom chupa ri ranima'. ³⁵ Jec'ula' e junok utz uc'u'x, echiri' cach'a'tic, e caresaj lo ri chom uc'olom chupa ri ranima'. Yey e junok itzel uc'u'x, echiri' cach'a'tic, e caresaj lo ri na chom taj uc'olom chupa ri ranima'.

³⁶ »Ri'in cambi'ij c'u che alak: Chupa ri k'ij re ri k'atbal tzij, chiqui-jujunal ri ticawex cata' quichi' ruma ronoje ri ch'ulilaj ch'a'tem quel lo chwa que'. ³⁷ Ma chijujunal alak, we utz ri ch'a'tem alak, ri' cak'alajinic alak jusuc'; no'j we na chom ta ri ch'a'tem alak, ri' cak'at tzij pawil' alak» xcha'.

Ri winak caquitz'onoj che ri Jesús c'utubal re ruchuk'ab (Lc. 11:29-32)

³⁸ Ec'uchiri', jujun chique ri fariseos y raj c'utunel re ri tzijpixab, xquibi'ij che ri Jesús:

—Lal tijonel, ri'oj cakaj cakilo ca'an la juna c'utubal re ri chuk'ab la chikawach —xecha'.

³⁹ Ri Jesús xuc'ul uwach:

—Ri caquitz'onoj c'utubal re ruchuk'ab ri Dios e ri winak re wak'ij ora, ri itzel quic'u'x y na jusuc' ta ri canima' chwach ri Dios. No'j na caya'taj ta c'u wa' chique, ma xew caya'taj ri c'utubal x'ani' ojertan ruc' ri k'alajisanel Jonás. ⁴⁰ Ma jela' pacha' ri Jonás xc'o'ji' oxib k'ij y oxib ak'ab chupa ri nimalaj car,* jec'ula' Ralaxel Chiquixo'l Ticawex oxib k'ij y oxib ak'ab camuki' pulew.

⁴¹ »Ri winak aj Nínive re ojertan queyactaj chupa ri k'ij re k'atbal tzij y caquicoj quimac ri ticawex re wak'ij ora. Ma rique xquitzelej quitzij chwach ri Dios ruma ri tzijonic xu'an ri Jonás chiquiwach.* No'j ri ticawex re wak'ij ora, c'o jun chiquixo'l más c'o uwach chwa ri Jonás, yey na que-boc tane il che.

⁴² »Jec'ula' echiri' copon ri k'ij re ri k'atbal tzij,* cayactaj lo ri reina re pa sur† y cucoj quimac ri ticawex re

* 12:40 Jon. 1:17 * 12:41 Jon. 3:1-10 * 12:42 Ap. 20:11-15 † 12:42 Wa jun ixok e reina re ri nación Sabá, ri c'o pa sur che Israel. 1 R. 10:1-3

wak'ij ora. Ma rojertan lic naj petinak wi rire cha' colu'xiquinaj runa'oj ri rey Salomón. No'j ri ticawex re wak'ij ora, c'o jun chiquixo'l más c'o uwach chwa ri Salomón, yey na que-boc tane il che.

Ri cuc'ulumaj junok echiri' juna itzelilaj uxlabixel catzelej tanchi ruc' (Lc. 11:24-26)

⁴³ »Echiri' juna itzelilaj uxlabixel quel bi che juna ticawex, ri cu'ano e casutin pa tak luwar catz'intz'otic, cutzucuj pa cajeki' wi. Yey we na curik taj, ⁴⁴ cubi'ij c'u chiribil rib: "Quintzelej pe chupa ri wocho pa xinél lo wi" cacha'. Ec'uchiri' coponic, cu'rika rachi pacha' juna ja c'a jinta rajaw, mesom upa y yijbital chi utz. ⁴⁵ Que'ec c'ut, quebu'c'ama chi lo wukub rach itzelilaj uxlabixel más itzel quiwachlibal chwa rire; y conoje c'u ri' queboquic y quejeki' chiri'. Jec'uri'la', rubinic rachi más cayojtaj chwa ri petinak lok. Ec'u caquic'ulumaj wa' ri winak itzel quic'u'x wak'ij ora —xcha ri Jesús.

Ruchu y tak ruchak' ri Jesús (Mr. 3:31-35; Lc. 8:19-21)

⁴⁶ Ec'u ruchu y tak ruchak' ri Jesús xec'un lok echiri' Rire c'a cach'a't ne cuc' ri winak. Xec'oji' c'u lo pa be yey lic cacaj quech'a't ruc'.

⁴⁷ C'o c'u jun xubi'ij pan che ri Jesús: —Ri chu la y tak ri chak' la e c'o pa be yey lic cacaj quech'a't uc' la —xcha'.

⁴⁸ Ec'u ri Jesús xubi'ij che ri xbi'n pan che:

—Chawach ri'at, ¿china c'u ri nuchu y china tak ri nuchak'? —xcha'.

⁴⁹ Ec'uchiri', ruc' ruk'ab xebuc'ut rutijo'n y xubi'ij:

—Wa e c'o wara e nuchu y e tak nuchak' ri'. ⁵⁰ Ma china ri cu'an janipa ri caraj ri Nukaw c'o chila' chicaj, wa' e nuchak', e wanab y e nuchu ri' —xcha'.

13

Ri c'ambal na'oj puwi ri awanel (Mr. 4:1-9; Lc. 8:4-8)

¹ Chupa la' la k'ij, ri Jesús xel bi pa ri ja y xe'tz'ula chuchi' ri mar. ² Y uq'uiyal winak c'ut xemolotaj chiri' pa c'o wi Rire. Ruma la', ri Jesús xoc chupa jun barco, xtz'uyi' chupa y conoje ri winak xecanaj can chuchi' ri mar. ³ Yey Rire xujek uya'ic uq'uiyal c'utunic chiquiwach ruc' tak c'ambal na'oj, jewa' xubi'ij chique:

«Jun awanel xel bi cha' que'awanok.

⁴ Ec'uchiri' catajin che ujopopexic rija',* c'o xtzak can chuchi' ri be. Xec'un c'u lo tz'iquin y xo'lquitija bi.

⁵ »C'o ija' xtzak can pa tak abaj; yey ruma na jinta uq'uiyal ulew chuxe', xel tan lo rija'. ⁶ Ec'uchiri' xel lo ri k'ij, xc'atic; yey ruma na jinta ratz'ayak, xchakijic.

⁷ »C'o ija' xtzak can pa tak q'uix. Ec'u ri q'uix xq'uiyic yey rija' xjik' can chuxe'.

⁸ »No'j c'o ija' xtzak can pa chomilaj ulew. Ec'u ri' wa' lic xu'an reka'n. C'o ne jujun rakan xuya jun ciento, c'o jujun chic xuya sesenta y c'o xuya treinta. ⁹ China c'u ri c'o utanibal che utayic, ¡chuta c'u ri'!» xcha'.

Sa' ruchac tak ri c'ambal na'oj (Mr. 4:10-12; Lc. 8:9-10)

¹⁰ Ec'u rutijo'n xekib ruc' ri Jesús y xquitz'onoj che:

—¿Su'be cac'utun la chiquiwach ri winak ruc' tak c'ambal na'oj? —xecha'.

¹¹ Ri Jesús xuc'ul uwach:

—Chiwe ri'ix ya'talic cak'alajisax runa'oj ri Dios chwi rutakanic petinak chila' chicaj; no'j chique tak ri winak, na ya'tal taj. ¹² Ma china ri c'o umajom chic, ri' caya'taj ne che cha' más c'o cumajo. No'j china ri na jinta c'o umajom, camaj ne che ri cuch'obo umajom chic. ¹³ Ruma la' quinch'a't cuc' rique xa ruc' tak c'ambal na'oj. Ma tob rique quetzu'nic, e junam ruc' na quetzu'n

* **13:4** E rojertan chila' Israel echiri' caqui'an rawanic re ri trigo xa caquijopopej rija' pulew, tec'uchiri' caquich'uk uwi' ruc' ulew.

taj; tob quetanic, e junam ruc' na quetan taj y e ri' na jinta c'o caquimaj usuc'. ¹⁴ Ma ri quic'ulumam rique e cu'ana pacha' rubi'im can ri Dios ruma ri k'alajisanel Isaías:

Ri'ix tob quixtanic, na jinta c'o quimaj usuc' che ri quito;
y tob ne quixtzu'nic, na jinta c'o quimaj usuc' che ri quiwilo.

¹⁵ Ma wa tinamit lic u'anom co ri canima';

e pacha' lic c'ayew chique quetanic, y ri quiwach e pacha' yupulic.

Jec'ula' na jinta c'o caquilo, na jinta c'o caquito

y na jinta c'o caquimaj usuc';

yey na caquitzelej tane quitzij chinuwach
cha' jela' quebenucunaj *Is. 6:9-10*
xcha'.

¹⁶ »No'j ri'ix lic nim ik'ij iwalaxic, ma ri Dios cuya chiwe quiwilo y quita janipa ri cu'an Rire wuma ri'in.

¹⁷ Pakatzij wi cambi'ij chiwe: Ojertan uq'uiyal k'alajisanelab y ticawex jusuc' quibinic quisilabic lic xcax caquil bi janipa ri quiwil ri'ix wo'ora; pero na xquimaj ta chi rilic bi. Lic xcax caquita bi janipa ri quita ri'ix wo'ora, pero na xquimaj ta chi utayic bi.

Ri Jesús cuk'alajisaj ri c'ambal na'oj puwi ri awanel

(Mr. 4:13-20; Lc. 8:11-15)

¹⁸ »Chita c'ut sa' que'elawi ri c'ambal na'oj puwi ri awanel. ¹⁹ Rija' xtzak can chuchi' ri be, e pacha' ri ticawex quetaw re ri ch'a'tem chwi rutakanic ri Dios yey na caquimaj ta usuc'. Cac'un c'u lo ritzel winak y caresaj bi ri ch'a'tem xtiqiu' pa canima'.

²⁰ »Rija' xtzak can pa tak abaj, e pacha' ri ticawex caquita Ruch'a'tem ri Dios y caquicoj ruc' qui'cotemal.

²¹ Pero ruma na e tiquil ta chi utz, na quecowin taj. Ma echiri' cac'un lo c'ambal quipa o queternabex ruc' c'ax ruma quic'ulum Ruch'a'tem ri Dios, quepajtaj c'u ri'.

²² »Rija' xtzak can pa tak q'uix e pacha' ri ticawex caquita Ruch'a'tem ri Dios. Pero rubis quic'u'x chwi tak ri cajawax chique, ruc' ri socoso'nic re tak ri beyomalil, cusachisaj uwach Ruch'a'tem ri Dios c'o pa canima'. Ruma c'u ri', na jinta c'ana quijik'obalil quilitaj che ri quibinic.

²³ »No'j rija' xtzak can pa chomilaj ulew e pacha' ri ticawex caquita Ruch'a'tem ri Dios, lic caquimaj usuc' y lic c'o c'u quijik'obalil quilitaj che ri quibinic. E jela' pacha' rija' lic xu'an reka'n; c'o ne jujun rakan xuya jun ciento, c'o jujun chic xuya sesenta y c'o xuya treinta —xcha ri Jesús.

Ri c'ambal na'oj puwi rak'es cizaña xel lo chuxo'l ri trigo

²⁴ Ri Jesús xutzijoj tanchi jun c'ambal na'oj chique:

«Ri cu'ana pa rutakanic ri Dios petinak chila' chicaj e jela' pacha' ri xu'ano echiri' jun achi xutic chomilaj ija' trigo chwa ri rulew. ²⁵ Ec'uchiri' quewar conoje ri ticawex, xopon jun achi tzel caril ri rajaw rulew; xe'lak'ay c'u ri' xutic can rak'es cizaña chuxo'l ri trigo† y xe'ec c'ut. ²⁶ Xel c'u lo ri trigo y echiri' xpok'ic, xk'alajin rak'es c'o chupa.

²⁷ Ec'u ri aj chaquib xe'quibi'ij che ri rajaw ri tico'n: “Kajawal, we chomilaj ija' xe'tica la chwa rulew la, ¿pachawi c'u ri' xpe wi rak'es xel lo chupa?”

²⁸ »Yey ri rajaw ri tico'n xubi'ij chique: “C'o junok la' tzel quinrilo xolu'tica chupa.”

Xquibi'ij c'u ri raj chaquib che: “We ca'aj la, que'kamich'a ronoje rak'es chupa.”

²⁹ »Ec'u ri rajaw ri tico'n xubi'ij chique: “Na qui'mich'a taj; ma we ximich' rak'es, c'axtaj quimich' ri trigo ruc'. ³⁰ Chiya'a luwar cheq'uiy na junam, copon na ruk'ijol ri molonic. Ma c'a e chiri' quebenutak ri waj chac cha' caquimol na rak'es nabe, caqui'an chiyata'j y caquixim

† **13:25** Rak'es cizaña jela' catzu'nic pacha' ri trigo yey lic na utz taj echiri' quel lo xo'libal ri trigo, ma e cuya rib wa'.

upa re caporoxic. Tec'uchiri', caquimol ri trigo y que'quiya'a pa cac'oli' wi ri trigo we'in"» xcha'.

Ri c'ambal na'oj puwi rija' re moxtasa

(Mr. 4:30-32; Lc. 13:18-19)

³¹ Ri Jesús xutzijoj tanchi jun c'ambal na'oj chique:

«Rutakanic ri Dios petinak chila' chicaj e pacha' juna ija' re moxtasa xutic jun achi chwa ri rulew. ³² Pakatzij wi, la' li'ja' e más ch'uti'n chwa tak rija'; no'j we xq'uiyic, más canimar chwa tak rak'es y cu'ana pacha' jun che'. Quec'un ne ri tz'iquin quexiq'ui' che ruwa caj y caqui'an quisoc puwi tak ruk'ab» xcha'.

Ri c'ambal na'oj puwi ri levadura
(Lc. 13:20-21)

³³ Ri Jesús xutzijoj wa jun chic c'ambal na'oj chique:

«Rutakanic ri Dios petinak chila' chicaj e pacha' ri levadura. Ma echiri' juna ixok cu'an pam, cuc'am jubik' levadura y cutuc chuxo'libal oxib pajbal harina; yey ri levadura cusipowirisaj upa ronoje ri k'or» † xcha'.

Su'be ri Jesús cac'utun ruc' tak c'ambal na'oj

(Mr. 4:33-34)

³⁴ Ri Jesús xuc'ut ronoje wa' chique ri winak ruc' tak c'ambal na'oj y na jinta c'o xuc'utu we na ruc' ta c'ambal na'oj xu'ano. ³⁵ E xu'an wa' cha' e cu'ana rubi'im can ri jun k'alajisanel echiri' xutz'ibaj:

Ruc' tak c'ambal na'oj quinc'utunic; e cank'alajisaj ri na eta'matal ta

chwi lo ri jekebal re ruwachulew

Sal. 78:2

xcha'.

Ri Jesús cuk'alajisaj ri c'ambal na'oj puwi rak'es cizaña xel lo chuxo'l ri trigo

³⁶ Ec'uchiri', ri Jesús xebuch'a'bej can ri winak y xoc bi pa ja. Xekib c'u rutijo'n ruc' y xquitz'onoj che:

—Kajawal, k'alajisaj la chike sa' que'elawi ri c'ambal na'oj puwi rak'es cizaña —xecha'.

³⁷ Ec'u ri Jesús xuc'ul uwach:

—Rachi caticow re ri chomilaj ija' e Ralaxel Chiquixo'l Ticawex. ³⁸ Rulew pa catic wi ri tico'n e ruwachulew. Ri chomilaj ija' e tak ri ticawex e c'o chupa rutakanic ri Dios. Rija' re rak'es cizaña e tak ri ticawex eteran chirij ritzel winak. ³⁹ Ri jun itzel uc'u'x xutic rak'es e ritzel winak. Ri molonic e ri q'uisbal re ruwachulew, yey ri que'anaw re ri molonic e ri ángeles.

⁴⁰ »Jec'ula' pacha' ri ca'an che rak'es cizaña, camolic y caporox pa ak', jela' ri cu'ana che ri q'uisbal re ruwachulew. ⁴¹ Ralaxel Chiquixo'l Ticawex quebutak bi ru ángeles cha' quequimolo y quequesaj chupa rutakanic conoje ri equiminom jujun chic pa mac y ri caqui'an ri na utz taj. ⁴² Quebequic'ak bi pa ri orna cajomow ak' chupa; chiri' c'u ri' quebok' wi y cakich'ich' ruwi que'. ⁴³ No'j ri jusuc' quibinic quisilabic e jela' pacha' ri k'ij quewon chila' pa catakan wi ri quikaw Dios. China c'u ri c'o utanibal che utayic, ¡chuta c'u ri! —xcha'.

Ri c'ambal na'oj puwi ri beyomalil mukutalic

⁴⁴ «Rutakanic ri Dios petinak chila' chicaj e pacha' jun beyomalil ewatal can chupa juna ulew. C'o c'u jun achi que'tzak lo puwi' y carewaj tanchi canok. Que'ec c'u chirocho y cu'c'ayij ronoje rubitak re; tec'uchiri', culok' ri ulew pa c'o wi ri beyomalil.

Ri c'ambal na'oj puwi ri chomilaj perla lic q'ui rajil

⁴⁵ »Rutakanic ri Dios petinak chila' chicaj e pacha' ri cu'an juna aj c'ay cutzucuj tak chomilaj abaj perla. ⁴⁶ Ec'uchiri' curik juna chomilaj perla lic q'ui rajil, que'ec y cu'c'ayij ronoje rubitak re; tec'uchiri', culok' ri chomilaj abaj perla.

† 13:33 Wa c'ambal na'oj puwi ri levadura que'elawi tob rutakanic ri Dios xujek xa ruc' queb oxib pero wa' cumaj ronoje ruwachulew.

Ri c'ambal na'oj puwi ri atarraya

⁴⁷ »Ri cu'an chupa rutakanic ri Dios petinak chila' chicaj e pacha' ri cu'ano echiri' cac'ak bi juna atarraya pa ri mar cha' quebu'chapa lo uq'uiyal quiwach tak car. ⁴⁸ »Echiri' nojinak chi ri atarraya che car, raj chapal car caquesaj lo chuchi' ri mar, quetz'uyi' c'ut y quequicha' quipa ri car. E tak c'u ri utzilaj car, quequiya pa chacach; no'j tak c'u ri na e ta utz, quequic'ak bi.

⁴⁹ »Jec'ula' cu'ana che ri q'uisbal re ruwachulew. Quebel bi ri ángeles y quequesaj c'u ri ticawex itzel quic'u'x chiquixo'l ri e jusuc' chwach ri Dios. ⁵⁰ Quebequic'ak c'u bi pa ri orna cajomow ak' chupa; chiri' c'u ri' quebok' wi y cakich'ich' ruwi que'» xcha'.

Ri beyomalil c'ac' y ri beyomalil xex chi c'o wi

⁵¹ Ec'uchiri', ri Jesús xutz'onoj chique:

—¿Quimaj usuc' ri'ix ronoje tak wa'?

—xcha'.

Rique xquic'ul uwach che ri Jesús:

—Cakamaj usuc', Kajawal —

xecha'. ⁵² Ec'u ri Jesús xubi'ij chique:

—E juna aj c'utunel re ri tziipixab, we lic c'o cumaj chwi rutakanic ri Dios petinak chila' chicaj, e pacha' juna achi rajaw ja caresaj lo che rube-yomalil uc'olom, tak ri c'ac' y ri xex chi c'o wi; yey ucabichal wa' cucha-pabej. Ma ri aj c'utunel cac'utun chwi tak ri c'ac' umajom, junam ruc' tak ri xex chi umajom lok —xcha'.

Ri Jesús copon pa ri tinamit Nazaret

(Mr. 6:1-6; Lc. 4:16-30)

⁵³ Ri Jesús echiri' xuq'uis ubi'xic tak wa c'ambal na'oj chique, xel bi chiri'. ⁵⁴ Echiri' xopon pa rutinamit, xujek cac'utun chiri' pa ri sinagoga. Ec'u ri winak lic xcam canima' che y xquibi'ij:

—¿Pa xu'maja wi wa'chi lu'na'oj? ¿Su'anic cu'an tak wa milagros? ⁵⁵ ¿Na e ta neba uc'ajol wa' ri jun carpintero yey ralab ri María? ¿Na e ta neba catzixel ri Jacobo, ri José, ri Simón y ri

Judas? ⁵⁶ ¿Na ejekel ta neba ri ranab wara chikaxo'l? ¿Pa c'u xu'maja wi ronoje tak ri' wa cu'ano? —xecha'. ⁵⁷ Ewi lic e q'ui tzel xquita ri xubi'ij.

No'j ri Jesús xubi'ij chique:

—Chupa ronoje luwar cayac uk'ij juna k'alajisanel; no'j chupa rutinamit o chiquiwach ri ratz-uchak', na cayac ta uk'ij —xcha'.

⁵⁸ Y ri Jesús na xu'an ta uq'uiyal milagros chiri' ruma na xquicoj taj china Rire.

14*Rucamic ri Juan Aj Ya'l Bautismo (Mr. 6:14-29; Lc. 9:7-9)*

¹ Chupa c'u la' la k'ij, ri Herodes ri rey re Galilea xuta puwi ri chom uch'a'tibexic ri Jesús. ² Ri Herodes xubi'ij c'u chique ri raj chaquib: «La' e Juan Aj Ya'l Bautismo xc'astaj lo chiquixo'l ri eaminak; e uwari'che c'o uchuk'ab che u'anic wa milagros» xcha'.

³ Xubi'ij wa' ma e rire ri xutak uchapic ri Juan cha' caya'i' pa carena y queyo'k pa cárcel. Xu'an wa' ri Herodes ma ri Juan xuch'a'bej upa ruma u'anom rixokil che ri Herodías, yey wa' wi'xok e rixokil ri Felipe ruchak' ri Herodes. ⁴ Jewa' ri xubi'ij ri Juan che: «Lic na ube taj 'anom ixokil la che ri rixokil ri chak' la» xcha'. ⁵ Ruma c'u wa' ri Herodes lic xraj cucamisaj ri Juan, no'j lic cuxi'ij rib chique ri tinamit ma chiquiwach rique ri Juan e jun k'alajisanel re ri Dios.

⁶ Ec'uchiri' xuq'uis ujunab ri Herodes, x'ani' jun nimak'ij. Ec'u ri ralit rixok Herodías xajaw chiquiwach ri esiq'uim pa ri nimak'ij, y wa' lic xuc'ul uc'u'x ri Herodes. ⁷ Ruma c'u ri', xubi'tisij cuya che rali tob sa' ri caraj cutz'onoj, y lic xujiquiba' uwach cu'an wa'. ⁸ Ec'u rali nabe na xu'tz'onoj che ruchu y wa' xuya lo itzel na'oj che. Xubi'ij c'u rali che ri Herodes: «Ya'a la rujolom ri Juan Aj Ya'l Bautismo chwe pa juna plato» xcha'.

⁹ Ri rey lic xbisonic ruma ri xtz'onox che. No'j ruma c'u ri xujiquiba' uwach che rali chiquiwach conoje ri e c'o ruc' pa ri wa'im, xtakan c'u che cha' caya'i' na che rali ri cutz'onoj. ¹⁰ Xtakan c'u che cac'atzix rujolom ri Juan pa ri cárcel. ¹¹ Jela' xc'am lo rujolom ri Juan pa jun plato, xya' c'u che rali y rali xu'ya'a che ruchu.

¹² Tec'uchiri', rutijo'n ri Juan xo'lquic'ama rucuerpo y xe'quimuku'. Xebec c'ut, xe'quibi'ij che ri Jesús sa' ri xuc'ulumaj ri Juan.

Ri Jesús quebutzuk wo'ob mil achijab

(Mr. 6:30-44; Lc. 9:10-17; Jn. 6:1-14)

¹³ Echiri' ri Jesús xreta'maj puwi rucamic ri Juan, xoc bi pa jun barco re que'ec pa jun luwar catz'intz'otic pa na e jinta wi winak. Yey ri winak echiri' xqueta'maj, xebel lo pa tak ri tinamit y chakan xebec cha' co'lquirika ri Jesús. ¹⁴ Echiri' ri Jesús xel lo pa ri barco, xrilo e c'o chi uq'uiyal winak chiri'. Lic c'ut xejuch' ca'n pa ranima' y xebucunaj conoje ri e yewa'ib chique.

¹⁵ Ec'uchiri' ya coc rak'ab, rutijo'n ri Jesús xekib ruc' y xquibi'ij che:

—Kajawal, wa luwar oj c'o wi lic catz'intz'otic y benak k'ij chic. Utz we quetak bi la ri winak cha' quebec pa tak raldeas re que'quilok'o quiwa — xecha'.

¹⁶ No'j ri Jesús xubi'ij chique:

—Na cajawax taj quebec; chebitzuku ri'ix —xcha'.

¹⁷ Rique xquibi'ij che ri Jesús:

—Na q'ui ta ri wa'im kuc'a'am, xew wo'ob pam y ca'ib car c'o kuc' — xecha'.

¹⁸ Xubi'ij c'u ri Jesús chique:

—Chic'ama lo la' chwe —xcha'.

¹⁹ Ec'uchiri', xtakan che quetz'uyi' ri winak pa tak ri q'uim. Xuc'am c'u ri wo'ob pam ruc' ri ca'ib car, xtzu'n chicaj y xtioxin chwach ri Dios. Tec'uchiri', xuwech' upa ri pam, xuya chique rutijo'n y rique xquijach chique ri winak. ²⁰ Conoje

c'u ri winak xewa'ic y xenoj chi utz. Tec'uchiri', xquimol ri ch'aka'ta'k quikax y ruc' wa' xnoj lo cablajuj chacach. ²¹ Ri xewa'ic laj e lo wo'ob mil chi achijab yey na xebajilax tane rixokib y rac'alab.

Ri Jesús cabin chwi ri ya'
(Mr. 6:45-52; Jn. 6:16-21)

²² Tec'uchiri', ri Jesús xebutak rutijo'n cha' quebec bi chupa ri barco, quenabej bi chwach y quek'ax c'a ch'aka ya' xalok' Rire quebuch'a'bej tak can ruq'uiyal winak. ²³ Echiri' ebuch'a'bem chi canok, xpaki' chwa ri juyub cha' cu'ana orar. Xoc c'u rak'ab, y ri Jesús utuquel c'o chiri'.

²⁴ Ec'u ri barco pa ebenak wi rutijo'n c'o chi pan chunic'ajal ri mar, yey c'o c'u jun cakjik' lic curoj rib che ri barco, ma wa' pube ri cakjik' benak wi.

²⁵ Lic anim tan c'ut, ri Jesús xe'ec cuc' rutijo'n, e ri' cabin chwi ri mar.

²⁶ Rutijo'n echiri' xquilo cabin ri Jesús chwi ri mar, lic xsach quina'oj che, xesiq'uin c'u ruc' xi'in ib:

—¡Le' jun espíritu! —xecha'.

²⁷ Ec'u ri Jesús xch'aw chique, jewa' xubi'ij:

—Chinimarisaj ic'u'x, ma ri'in in Jesús; mixi'ij c'u iwib —xcha'.

²⁸ Ec'uchiri', xch'aw pan ri Pedro che, jewa' xubi'ij:

—Wajawal, we katzij e rilal, bi'ij la chwe quin'ec uc' la, e la' quimbin chwi ri mar c'a pa c'o wi la —xcha'.

²⁹ Ri Jesús xubi'ij che:

—Chatpeta ri' —xcha'.

Ec'uchiri' ri Pedro xel bi pa ri barco, xujeko cabin chwi ri mar cha' que'ec pa c'o wi ri Jesús. ³⁰ Pero echiri' xril ruchuk'ab ri cakjik', xoc xi'in ib ruc' y xujek e ri' camukutajic. Xsiq'uin c'u pan ri' che ri Jesús, jewa' xubi'ij:

—¡Chincolobej la, Wajawal! —xcha'.

³¹ Na jampatana ri Jesús xuchapala' pan che ruk'ab y xubi'ij che:

—Pedro, jna nim ta c'ana ri cubulibal ac'u'x wuc'! ¿Su'be xuxi'ij rib ac'u'x? —xcha'.

³² Echiri' ri Jesús y ri Pedro xeboc chupa ri barco, xtani' ri cakjik' chwi ri mar. ³³ Ec'uchiri', ri e c'o pa ri barco xekib ruc' ri Jesús y xquilok'nimaj uk'ij, jewa' xquibi'ij:

—Pakatzij wi lal Uc'ajol ri Dios — xecha'.

Ri Jesús quebucunaj ri yewa'ib e c'o Genesaret

(Mr. 6:53-56)

³⁴ Echiri' xek'ax ch'aka ya', xebopon pa ri luwar re Genesaret. ³⁵ Ri winak, echiri' xquito c'o ri Jesús chiri', xquitak ubi'xiqul pa tak ronoje la' la luwar. Xequic'am c'u lo conoje ri yewa'ib pa c'o wi ri Jesús. ³⁶ Lic xebelaj c'u che ri Jesús cha' cuya luwar chique tob xew caquichap ruchi' ruk'u'. Conoje c'u ri xebanaw wa', xecunutajic.

15

Ri cach'ulan re ri ticawex
(Mr. 7:1-23)

¹ Ec'uchiri', jujun chique ri fariseos y raj c'utunel re ri tzijpixab e petinak Jerusalem, xekib ruc' ri Jesús y xquitz'onoj che:

² —¿Su'chac ri tijo'n la caquipalajij ri quic'utu'n can ri kati'-kamam? Ma rique na caquich'aj ta ri quik'ab nabe na echiri' quewa'ic — xecha'.

³ Ec'u ri Jesús xutz'onoj chique:
—¿Su'chac ralak capalajij alak Rutzij Upixab ri Dios ruma e ca'an alak tak ri quic'utu'n can ri mam alak? ⁴ Ma ri Dios jewa' xtakan che: Chalok'oj quik'ij rachu-akaw *Éx. 20:12*

yey
We c'o junok quebuyaj rachu-ukaw ruc' itzel ch'a'tem,
ri' lic takal che cacamisaxic *Éx. 21:17* xcha ri Dios.

⁵ »No'j ralak cabi'ij alak: “Utz we junok cubi'ij chique rachu-ukaw: Na utz taj canto' alak, ma ri to'bal cajawax che alak, nubi'tisim chic re nukasa'n chwach ri Dios.” ⁶ Yey chiwach ralak, china ri cabi'n re wa', na chirajawaxic ta chi che quebuto' rachu-ukaw. Jec'ula' 'anom alak che

Rutzij Upixab ri Dios pacha' na jinta uchac, ma e takem alak ri xa no'jibal alak.

⁷ »iXa queb palaj alak! Lic c'u katzij ri ubi'im lo ri Dios paw'i alak ruma ri k'alajisanel Isaías, echiri' xubi'ij:

⁸ Wa' wa tinamit xa ruc' ruwaque' caquiyac nuk'ij,
no'j ri canima' lic naj c'o wi chwe.

⁹ Na jinta c'ana cutikoj caquilok'oj nuk'ij,

ma ri c'utunic caqui'ano xa takanic que achijab *Is. 29:13*

—xcha'.

¹⁰ Ec'uchiri', xebusiq'uij ruq'uiyal winak y xubi'ij chique:

—Lic tape alak y lic maja alak usuc' wa': ¹¹ Ri coc bi puchi' ri ticawex na e ta ri cach'ulan re; no'j ri ch'a'tem quel lo puchi', e wa' ri cach'ulan re — xcha'.

¹² E tak c'u rutijo'n xekib ruc' y xquibi'ij che:

—Kajawal, ¿xeta'maj la lic xpe coy-owal ri fariseos echiri' xquita ri xbi'ij la? — xecha'.

¹³ Ri Jesús xuc'ul uwach:

—Wa' wa'chijab na jinta runa'oj ri Dios cuc', pacha' e tico'n na e ta ticom ruma ri Nukaw c'o chila' chicaj; ruma c'u ri', camich' bi c'a pa ratz'ayak. ¹⁴ Mixoc il chique, ma rique pacha' e potz' e c'amal quiwach cach e potz'. Yey we juna potz' cuc'am uwach juna chic potz', quicabichal c'u ri' quebe'tzak bi pa siwan — xcha'.

¹⁵ Ec'uchiri', ri Pedro xubi'ij che ri Jesús:

—K'alajisaj la chike sa' que'elawi wa jun c'ambal na'oj — xcha'.

¹⁶ Xubi'ij c'u ri Jesús chique:

—¿Ix neba cuq'uil ri na jinta quina'oj puwi wa'? ¹⁷ ¿Na quimaj ta neba usuc'? Ma e janipa ri coc bi puchi' ri ticawex que'ec pa rupa y tec'uchiri', cu'pamaj bi. ¹⁸ No'j ri ch'a'tem quel lo puchi', pa ranima' cawinakar wulok y ec'u wa' ri cach'ulan re ri ticawex. ¹⁹ Ma pa ranima' ri ticawex quel wi lo tak wa': ritzel na'oj, ri camisanic, ri macunic chirij ri c'ulaniquil, ri caretz'abej

uwa uk'ij ruc' jun chic na uc'ulel taj, ri elek', ri rak'ubal y ri itzel ch'a'tem chirij junok. ²⁰ E tak wa' ri cach'ulan que ri ticawex. No'j ri cawa' junok yey na cuch'aj ta ruk'ab nabe, wa' na cuch'ulaj ta rubinic junok —xcha'.

Ri cubulibal uc'u'x jun ixok na cuq'uul ta ri ajjudi'ab

(Mr. 7:24-30)

²¹ Ri Jesús xel bi chiri' y xopon pa tak ri luwar re Tiro y re Sidón. ²² C'o c'u jun ixok aj Canaán jekel chiri', rire casiq'uinic xc'un chwach ri Jesús, jewa' cubi'ij:

—¡Wajawal, lal ri Ralc'o'al can ri rey David, chinjuch' ca'n co che'la! Ma c'o jun walit lic c'ax uc'ulumam ruma c'o puk'ab jun itzel uxlabixel —xcha'.

²³ No'j ri Jesús na xuc'ul ta c'ana uwach. Ec'u rutijo'n xekib ruc' y lic xebelaj che ri Jesús:

—Ch'a'bej can la li'xok ma lic casiq'uinic teran lo chikij —xecha'.

²⁴ Ec'uchiri', xubi'ij ri Jesús:

—Ri'in intakom lo xew cuma ruti-namit ri Dios e aj Israel, ri pacha' e bexex e sachinak —xcha'.

²⁵ No'j rixok xkib ruc' ri Jesús, xuxuc rib chwach y xubi'ij che:

—¡Wajawal, chinto'o co la! —xcha'.

²⁶ Ri Jesús xubi'ij che:

—Na usuc'taj we c'o junok cumaj ri quiwa ri ralc'o'al y cuc'ak chiquiwa ri tz'i' —xcha'.

²⁷ Xubi'ij c'u rixok:

—Katzij, Wajawal, pero ri tz'i' caquitij ne ruc'aj ri wa catzak chuxe' rumexa ri cajaw —xcha'.

²⁸ Ec'uchiri', xubi'ij ri Jesús che:

—¡Ixok, lic nim ri cubulibal c'u'x la! E chu'ana uc' la sa' ri ca'aj la —xcha'. Chupa c'u ri' la jok'otaj ri ralit xcunutajic.

Ri Jesús quebucunaj uq'uiyal yewa'ib

²⁹ Ri Jesús xel bi chiri' y xic'ow chuchi' ri mar re Galilea; tec'uchiri', xak'an chwa ri juyub y xtz'uyi'ic.

³⁰ Uq'uiyal c'u winak xebopon chila' pa c'o wi Rire. Yey xequic'am lo ri e sic, ri e potz', ri e me't, ri e t'um cakan

quik'ab y uq'uiyal yewa'ib chic. Xequiya c'u chwach ri Jesús, y Rire xebucunaj conoje. ³¹ Ec'u ri winak lic xcam canima' che echiri' xquilo xech'aw ri e me't, ri e t'um cakan quik'ab quecunutajic, ri e sic quebinic, ri e potz' quetzu'nic. Y xquijek c'u caquiyac uk'ij ri Dios re Israel.

Ri Jesús quebutzuk cajib mil achijab

(Mr. 8:1-10)

³² Ec'uchiri', ri Jesús xebusiq'uij rutijo'n y xubi'ij chique:

—Lic cajuch' ca'n nuc'u'x chique wa ticawex, ma e urox k'ij wa' e c'o wuc' yey na jinta chi quiwa. Na cuaj taj quebenutak bi chicocho e la' na jinta c'o quitijom, ma c'axtaj quebe'k'ochk'ob pa be —xcha'.

³³ Xquibi'ij c'u rutijo'n che:

—¿Pa que'karika wi wa re quebekatzuk wa uq'uiyal ticawex? Ma chupa wa luwar na jinta ne c'o e jekelic —xecha'.

³⁴ Ri Jesús xutz'onoj chique:

—¿Janipa chi pam c'o iwuc'? —xcha'.

Rique xquibi'ij:

—Wukub pam c'o kuc' y jujun raltak co car —xecha'.

³⁵ Ec'uchiri', ri Jesús xtakan che quetz'uyi' ri ticawex chu'lew.

³⁶ Xuc'am c'u ri wukub pam puk'ab ruc' tak ri car, y xtioxin chwach ri Dios puwi wa'. Tec'uchiri' xuwech' upa y xuya bi chique rutijo'n yey rique xquijach chique ri winak.

³⁷ Conoje xewa'ic y lic xenoj chi utz. Tec'uchiri', ruc' tak rukax ri wa'im xquimolo, xquinojisaj wukub chacach. ³⁸ Ri xewa'ic e cajib mil chi achijab yey na xebajilax tane rixokib y rac'alab.

³⁹ Ec'uchiri', ri Jesús xebuch'a'bej can ri winak; xoc bi pa jun barco y xe'ec pa tak ri luwar re Magdala.

16

Ri fariseos y ri saduceos caquitz'onoj milagros

(Mr. 8:11-13; Lc. 12:54-56)

1 Ri fariseos y ri saduceos xebopon ruc' ri Jesús re caquic'am upa. Xquitz'onoj c'u che cu'an juna c'utubal re chila' chicaj chiquiwach cha' jela' cak'alajinic we Rire takom lo ruma ri Dios.

2 Ec'u ri Jesús xuc'ul uwach:

«Echiri' que'ec la k'ij, ralak cabi'ij alak: “Lic utz ri katiempo ma cak ruwa caj.” 3 Echiri' anim tan, cabi'ij alak: “Wak'ij lic na utz ta ri katiempo. ma cak ruwa caj y k'ekmuj.” ¡Ralak xa queb palaj alak! Ma carik alak uch'obic chi utz sa' ru'anom ruwa caj, yey na camaj tane alak usuc' sa' tak ri catajin ri Dios che uc'utic chiwach alak wak'ij ora. 4 Ri caquitz'onoj c'utubal re ruchuk'ab ri Dios e ri winak re wak'ij ora, ri itzel quic'u'x y na jusuc' ta ri canima' chwach ri Dios. Pero na caya'taj ta c'u wa' chique, ma xew caya'i' chiquiwach ri c'utubal x'ani' ojertan ruc' ri k'alajisanel Jonás»[☆] xcha'. Ec'uchiri', xebuya canok y xe'ec.

Ri quic'utunic ri fariseos
(Mr. 8:14-21)

5 Echiri' xebopon rutijo'n ch'aka mar, xc'un chiquic'u'x na xquic'am tubi pam. 6 Xubi'ij c'u ri Jesús chique: —Chitape': Lic chichajij iwib chwa ri levadura que ri fariseos y ri saduceos* —xcha'.

7 Rutijo'n xa chiquiwach xquibi'ij: «Rire cubi'ij wa', ma na xkac'am ta lo pam» xecha'.

8 Ri Jesús xreta'maj sa' ri caquich'a'tibej chiquiwach, xubi'ij c'u chique:

—¡E ri'ix na nim ta c'ana ri cubulibal ic'u'x wuc'! ¿Su'chac e cubisoy ic'u'x ri na jinta pam iwuc'a'am lok?

9 ¿C'amaja' neba quimaj usuc'? ¿Na cac'un ta neba chic'u'x echiri' xebentuzuk ri wo'ob mil chi achijab ruc' wo'ob pam y janipa lo chacach xinojisaj ruc' ri quikax? 10 ¿Yey na cac'un ta neba chic'u'x echiri' xebentuzuk

cajib mil chi achijab ruc' wukub pam y janipa lo chacach xinojisaj ruc' ri quikax? 11 ¿Cha'taj na ximaj ta usuc' na e ta chwi ri pam xinch'a't wi echiri' ximbi'ij: “Chichajij iwib che ri levadura que ri fariseos y ri saduceos”? —xcha'. 12 C'a ec'uchiri' xquimaj usuc' na chwi ta ri levadura re ri pam xch'a't wi ri Jesús, ma e chwi ri quic'utunic ri fariseos y ri saduceos.

Ri Pedro cuk'alajisaj ri Jesús e ri Cristo

(Mr. 8:27-30; Lc. 9:18-20)

13 C'o jun k'ij xebopon ri Jesús che tak ri luwar re ri tinamit Cesarea re Filipino,[†] y xutz'onoj c'u chique rutijo'n:

—Chiquiwa ri winak, ¿china nawi Ralaxel Chiquixo'l Ticawex? —xcha'.

14 Rutijo'n xquibi'ij che:

—C'o quebi'n re e Juan Aj Ya'l Bautismo; jujun chic caquibi'ij e Elías; y jujun chic, e Jeremías o junok chic chique ri k'alajisanelab re ojertan —xecha'.

15 Ec'uchiri', xubi'ij chique rutijo'n: —Yey chiwach ri'ix, ¿in china ri'in? —xcha'.

16 Ec'u ri Simón Pedro xubi'ij che:

—Rilal lal ri Cristo, lal Ruc'ajol ri Dios c'aslic —xcha'.

17 Ri Jesús xuc'ul uwach:

—Lic nim ak'ij awalaxic ri'at Simón at uc'ajol ri Jonás; ma na e ta juna ticawex xk'alajisan wa' chawe, e ri Nukaw c'o chila' chicaj. 18 Ri'in cambi'ij c'u chawe: Ri'at at Pedro.[‡] Y chwi c'u wa' wa'baj cantic wubi ri nu iglesia, yey ruchuk'ab ri camic na cuch'ij tane c'ana usachic uwach ri nu iglesia. 19 Y ri'in canya pak'ab ri'at ri lawe re rutakanic ri Dios petinak chila' chicaj. Ec'u janipa ri caxim wara che ruwachulew, caximitaj chila' chicaj; yey janipa ri caquir wara che ruwachulew, caquiritaj chila' chicaj[☆] —xcha'.

[☆] 16:4 Mt. 12:39-40 * 16:6 Jela' pacha' ri levadura cusipowirisaj upa ri pam, jec'ula' ri quic'utunic ri fariseos y ri saduceos na jampatana cuyoj ri quina'oj ri winak. † 16:13 C'o queb tinamit Cesarea quibi'. Wa' wa jun e ri c'o chwa ri juyub Hermón, pa xtakan wi ri Felipe ruc'ajol ri Herodes. ‡ 16:18 “Pedro”: Wa bi'aj que'elawi “abaj”. [☆] 16:19 Mt. 18:18; Jn. 20:23

²⁰ Ec'u ri Jesús xebutak rutijo'n che cha' na caquitzijoj ta c'ana che junok we Rire e ri Cristo, Rucha'o'n lo ri Dios.

Ri Jesús cach'a't puwi rucamic y ruc'astajibal

(*Mr. 8:31-9:1; Lc. 9:22-27*)

²¹ Chwi c'u ri', ri Jesús xujek uk'alajisaxic chique rutijo'n janipa ri cuc'ulumaj: E lic chirajawaxic che que'ec Jerusalem, caya'i' na c'u pa c'ax cuma tak ri nimak winak re Israel, ri nimak e aj chacunel pa Rocho Dios y raj c'utunel re ri tziipixab, yey cacamisaxic; no'j churox k'ij cac'astaj lok.

²² Ec'u ri Pedro xresaj bi ri Jesús chiquixo'l y xuch'a'bej upa, jewa' xubi'ij che:

—¡Wajawal, lic ne muya luwar ri' ri Dios e cac'ulumaj la wa'! —xcha'.

²³ Ec'u ri Jesús xutz'u' lo uwach ri Pedro y xubi'ij che:

—¡Chatel chinuwach, Satanás! Ri'at at latz'anel chwe, ma na e ta cach'ob puwi ri uch'obom lo ri Dios, xew e cach'ob jela' pacha' ri caquich'ob ri winak —xcha'.

Ri chirajawaxic chique ri cacaj queterej chirij ri Jesús

(*Mr. 8:34-35; Lc. 9:23-27*)

²⁴ Ec'uchiri', xubi'ij ri Jesús chique rutijo'n:

—We c'o junok caraj caterej lo chwij, lic chirajawaxic che mu'an xew ri caraj rire, e chucuyu ri c'ax cape puwi' ruma ucojom ri nubi', y tereja lo chwij. ²⁵ Ma china ri na cuya ta ranima' ruc'aslem, ri' e cujam ri chomilaj c'aslemal chwach ri Dios; no'j ri cuya ranima' ruc'aslem wuma ri'in, ri' e curik ri chomilaj uc'aslemal chwach ri Dios. ²⁶ Ma ¿sa' c'u cutikoj ri' che ri ticawex we cu'an rajaw ronoje ruwachulew yey cusach c'u uwach ruc'aslemal? ¿O c'o nawi rajil cutoj rachi chwa ruc'aslemal cha' jela' na cujam taj? ¡Na jintaj!

²⁷ »Ma Ralaxel Chiquixo'l Ticawex cac'un ruc' runimal yacbal uk'ij

Rukaw y cuc' tak ru ángeles. Ec'uchiri' cuya chique chiquijujunal ri ticawex, ri rajil uc'axel e chirij tak ri qui'anom.

²⁸ Pakatzij wi cambi'ij chiwe: E c'o jujun chique wa e c'o wara na quecam tana we na xquil tubi Ralaxel Chiquixo'l Ticawex cac'un che rutakanic —xcha'.

17

Ri jalc'atajibal uwach ri Jesús

(*Mr. 9:2-13; Lc. 9:28-36*)

¹ Wakib k'ij c'u ubi'ixiquil ri' wa' echiri' ri Jesús xebucha' ri Pedro, ri Jacobo y ri Juan ruchak' ri Jacobo; y xebuc'am bi chwa jun nimalaj juyub. ² Chila' c'ut xjalc'atitaj uwach ri Jesús chiquiwach. Rupalaj lic xwonic jela' pacha' ruwonibal ri k'ij; yey ruk'u' xujek cawolk'inic jela' pacha' ri k'ijsak. ³ Xakic'ate't c'ut chiquiwach xewinakir ri Moisés y ri Elías, k'alajisanelab re ojertan; e ri quech'a't ruc' ri Jesús.

⁴ Ec'u ri Pedro xubi'ij che ri Jesús:

—Kajawal, lic utz xya'taj chike ri'oj oj c'o wara. We ca'aj la, caka'an oxib rancho:* jun e la, jun re ri Moisés y jun re ri Elías —xcha'.

⁵ C'a cach'a't ne ri Pedro echiri' jun sutz' lic cawonic xuch'uk quiwi'. Y chupa c'u ri sutz' xquita rukul ri Dios, jewa' xubi'ij:

«E Nuc'ajol wa' ri lic c'ax canna'o y lic quinqui'cot che.

E chita utzij Rire» xcha'.

⁶ Echiri' rutijo'n xquita wa', xexuqui'ic, xquikasaj quimejelem c'a chu'lew y xoc jun nimalaj xi'in ib cuc'.

⁷ Ec'uchiri', xkib ri Jesús cuc', xebuchapo y xubi'ij chique:

—Chixyactajok, mixi'ij iwib — xcha'. ⁸ Echiri' xetzu'n apanok, na jinta junok chic xquilo, xew ri Jesús.

⁹ Ec'uchiri' xekaj lo chwa ri juyub, ri Jesús xebutak che:

—Mitzijoj c'ana che junok janipa ri xc'ut chiwach, c'ate quitzijoj

* **17:4** Ruchac wa' wa rancho xraj cu'an ri Pedro e re caquilok'nimaj quik'ij ri queb k'alajisanelab y ri Jesús.

echiri' Ralaxel Chiquixo'l Ticawex c'astajinak chi lo chiquixo'l ri ecaminak —xcha'.

¹⁰ Ec'uchiri', rutijo'n xquitz'onoj che:

—¿Su'be c'ut caquibi'ij raj c'utunel re ri tzijpixab: “Lic chirajawaxic wi cac'un na ri Elías nabe”? —xecha'.

¹¹ Ri Jesús xuc'ul uwach:

—Katzij, ri Elías nabe cac'unic y cuyijba' pan ronoje chwach ruc'unibal Ralaxel Chiquixo'l Ticawex. ¹² No'j cank'alajisaj c'u wa' chiwe: Ri Elías ya xc'unic, yey ri winak na xqueta'maj ta uwach. Xqui'an c'u ri' che janipa ri xcaj rique; jec'ula' Ralaxel Chiquixo'l Ticawex cutij na ri c'ax paquik'ab rique —xcha'.

¹³ Ec'u rutijo'n xqueta'maj e cach'a't puwi ri Juan Aj Ya'l Bautismo.

Ri Jesús cucunaj jun ala c'o puk'ab jun itzel uxlabixel

(Mr. 9:14-29; Lc. 9:37-43)

¹⁴ Echiri' xebopon pa e c'o wi tak ri winak, c'o jun achi xkib ruc' ri Jesús, xuxuc rib chwach y xubi'ij che:

¹⁵ —Wajawal, c'utu co ri c'axna'bal c'u'x la che ri nuc'ajol, ma rire xa cumaj tew y lic cutij c'ax ruma wa'; uq'uiyal laj tzakinak pa ak' y pa ya'. ¹⁶ Xinc'am lo cuc' wa tijo'n la, pero rique na quich'ijom ta ucunaxic —xcha'.

¹⁷ Ec'u ri Jesús xuc'ul uwach:

—¡E ri ix ticawex re wak'ij ora na cubul ta ic'u'x wuc' yey ix sachinak! ¿Janipa chi lo k'ij cajawaxic quinc'o'ji' iwuc' cha' cacubi' ic'u'x wuc'? ¿Janipa chi lo k'ij quixincuyu e la' jela' i'anom? Chic'ama lo rala wara —xcha'.

¹⁸ Ec'uchiri', ri Jesús xutak ri itzel uxlabixel cha' quel bi che rala. Y chwi c'u ri' asu xcunutaj rala.

¹⁹ Tec'uchiri', rutijo'n ri Jesús xekib ruc' re quech'a't ruc' quituquel y xquitz'onoj c'u che:

—¿Su'be ri'oj na xkach'ij ta resaxic bi wa' wa itzel uxlabixel? —xecha'.

²⁰ Ri Jesús xubi'ij chique:

—E ruma na nim ta ri cubulibal ic'u'x ruc' ri Dios. We ta ri cubulibal ic'u'x caq'uiyic jela' pacha' ri caq'uiy rija' re moxtasa, utz ne ri' quibi'ij che wa juyub: “Chatela bi wara y chatk'ax pan jela'”, y e cu'ana'. Ri' na junta c'ayew chiwach ri'ix we ta lic c'o cubulibal ic'u'x. ²¹ No'j wa' wa juch'ob itzel uxlabixel xew utz quebesax bi ruc' oración y ayuno —xcha'.

Ri Jesús cach'a't tanchi puwi rucamic

(Mr. 9:30-32; Lc. 9:43-45)

²² Ec'uchiri' e c'o pa tak ri luwar re Galilea, ri Jesús xubi'ij chique rutijo'n: «Ralaxel Chiquixo'l Ticawex caya'i' paquik'ab rachijab ²³ y camisax cuma; no'j churox k'ij cac'astaj lok» xcha'. Echiri' xquita wa' rutijo'n, lic xquibisoj.

Ri tojonnic ca'anic re ri Rocho Dios

²⁴ Echiri' ri Jesús cuc' rutijo'n xebopon pa ri tinamit Capernaúm, raj tz'onol puak re ri tojonnic xe'quila ri Pedro y xquitz'onoj che:

—¿Ri tijonel iwe'ix na cutoj ta cami ri' ri tojonnic ca'anic re ri Rocho Dios? —xecha'.

²⁵ Ec'u ri Pedro xubi'ij:

—Rire cutojo —xcha'.

Ec'uchiri' xoc ri Pedro pa ri ja, ri Jesús nabe na xch'aw che, jewa' xubi'ij:

—Chawach ri'at, ¿e juna rey che ruwachulew, china chique cutz'onoj wi tak ri tojonnic ca'anic? ¿Chique ri e ralc'o'al o chique ri na e ta ralc'o'al? —xcha'.

²⁶ Xubi'ij c'u ri Pedro:

—Chique ri na e ta ralc'o'al —xcha'. Tec'uchiri', xubi'ij ri Jesús che:

—Ec'u ri e ralc'o'al na junta c'o catz'onox chique.† ²⁷ No'j cha' na cakapetisaj ta c'u royowal junok, jat chuchi' ri mar y chac'aka ri anzueto chupa. Ec'u ri nabe car cachapo,

☆ 17:24 Éx. 30:13-16 † 17:26 Ruma ri Jesús e Uc'ajol ri Dios, na chirajawaxic taj cu'an ri tojonnic re ri Rocho Rukaw. Na ruc' ta c'u ri', xutojo.

chajaka rupuchi' y carik jun meyo chupa. Ruc' c'u ri', chaya'a ri tojonic can'an ri'in y ri tojonic ca'an ri'at — xcha'.

18

China ri lic c'o uwach
(Mr. 9:33-37; Lc. 9:46-48)

¹ Chupa c'u la' la k'ij, rutijo'n ri Jesús xekib ruc' y xquitz'onoj che:

—¿China ri más c'o uwach chupa rutakanic ri Dios petinak chila' chicaj? —xecha'. ² Ec'uchiri', ri Jesús xusiq'uij jun ralco c'o'm y xuya chiquinic'ajal rique.

³ Xubi'ij c'u chique:

—Pakatzij wi cambi'ij chiwe: We na quijalc'atij ta ribinic isilabic cha' quixu'an pacha' raltak co ac'alab, na quixoc ta ri' chupa rutakanic ri Dios petinak chila' chicaj. ⁴ Jec'ula', china ri cu'an ch'uti'n che rib pacha' wa ralco c'o'm, e lic c'o uwach ri' pa rutakanic ri Dios. ⁵ Yey china ri cuc'ul chupa ri nubi' junok na jinta uwach pacha' wa ralco c'o'm, e junam ruc' e in ri quinuc'ulu.

Ri k'atbal tzij re ri Dios c'o paquiwi ri caquimin jun chic pa mac
(Mr. 9:42-48; Lc. 17:1-2)

⁶ »China ri caminow pa mac junok chique wa ch'uti'k* cubul quic'u'x wuc', e ne más utz catzayabax bi pukul juna nimalaj ca' re que'em y cac'ak c'u bi pa ri mar cha' camukutaj c'a chuxe'. ⁷ ¡Tok'o' quiwach ri ticawex ma lic c'o ri catzakisan que chupa ri na utz taj! Ma che ruwachulew lic c'o tak wa'. Pero ¡lic tok'o' c'u uwach ri jun cumin junok chic pa mac, ma e cape ri k'atbal tzij re ri Dios puwi'!

⁸ »E uwari'che, we rak'ab o rawakan e catzakisan awe pa mac, chak'ata bi y chawesaj bi chawe. Ma xa ne cuya tob at t'um o at jetz' catopon pa ri c'aslemal chila' chicaj, chwa ri c'o ucabichal rak'ab y ucabichal rawakan yey catc'ak bi

chi xibalba' pa c'o wi ri ak' na jinta chi uchupic. ⁹ Yey we rawach e catzakisan awe pa mac, chawesaj bi y chac'aka bi. Ma xa ne cuya tob xa jun rawach catopon pa ri c'aslemal chila' chicaj, chwa ri c'o ucabichal rawach yey catc'ak bi pa ak' chi xibalba' re tijbal c'ax.

Ri c'ambal na'oj puwi ri bexex sachinak
(Lc. 15:3-7)

¹⁰ »Mic'ak bi uk'ij junok chique wa e ch'uti'k cubul quic'u'x wuc'. Ma cambi'ij c'u chiwe, ri ángeles e chajal que rique xaki e c'o chwach ri Nukaw Dios chila' chicaj. ¹¹ Ma Ralaxel Chiquixo'l Ticawex xc'unic re quebucolobej ri e sachinak. ¹² ¿Sa' quich'ob ri'ix cu'an juna achi we c'o jun ciento ubexex yey casach c'u junok chique? ¿Na quebuc'ol ta neba can ri' ri noventa y nueve y que'ec chwa ri juyub che utzucuxic ri jun xsach canok? ¹³ We xurik c'ut, pakatzij wi cambi'ij chiwe: E más caqui'cot ruma ri jun bexex chiquiwa ri noventa y nueve na e ta sachinak. ¹⁴ Jec'uri'la', ri Nukaw c'o chila' chicaj na caraj taj casach junok chique ri ch'uti'k cubul quic'u'x wuc'.

Su'anic cacuy umac jun chic

¹⁵ »E uwari'che, we rawatz-achak' cu'an ri na utz taj chawe, chatch'a't ruc' e la' ituquel; chabi'ij che sa' ri na utz taj u'anom chawe. We xatuta c'ut, ri' xacoj chi utzil chomal rawatz-achak'. ¹⁶ No'j we na xatuta taj, jat tanchi ruc'; chac'ama c'u bi jun o ca'ib awachbi'il awuc' cha' jela' e queb oxib che utayic sa' ri cabi'xic.* ¹⁷ We na xebuta ta c'u wa queb oxib, ec'uchiri' chatzijojej chiquiwach rutinamit ri Dios. Yey we na xoc ta c'u il chique wa', chi'ana c'u ri' che pacha' e cuq'u'il ri na queta'am ta uwach ri Dios y e cuq'u'il raj tz'onol puak re tojonic.† ¹⁸ Pakatzij wi cambi'ij chiwe: Janipa ri quixim

* **18:6** “Ch'uti'k”: Cuq'u'il tak wa' ec'o ri na jinta quichuk'ab, ri na jinta quiwach o ri c'ac' xquicuba' quic'u'x ruc' ri Jesús. ✱ **18:16** Dt. 19:15 † **18:17** “Raj tz'onol puak re tojonic”: Quil “cobrador de impuestos” pa vocabulario.

ri'ix wara che ruwachulew, caximitaj chila' chicaj. Janipa ri quiquir ri'ix wara che ruwachulew, caquiritaj chila' chicaj. ¹⁹ Cambi'ij c'u chiwe: We e c'o ca'ibok chiwe wara che ruwachulew cu'an junam quic'u'x chwi ri caquiz'onoj pa oración, ri Nukaw c'o chila' chicaj cuya na chique. ²⁰ Ma pa quimolom wi quib queb oxib pa ri nubi', chiri' in c'o wi ri'in chiquinic'ajal rique —xcha'.

²¹ Ec'uchiri', ri Pedro xkib ruc' ri Jesús y xutz'onoj che:

—Wajawal, ¿janipa laj cancuy umac juna watz-nuchak' we xu'an ri na utz taj chwe? ¿C'a pa wukub laj nawi? —xcha'.

²² Ri Jesús xuc'ul uwach:

—Na cambi'ij ta chawe xa pa wukub laj, ma c'a wukub laj chi setenta.

Ri c'ambal na'oj puwi rachi na cucuy ta umac jun chic

²³ »Ma ri cu'an chupa rutakanic ri Dios petinak chila' chicaj e jela' pacha' ri xu'ano echiri' juna takanel xraj carilo we na jinta quic'as ri raj chaquib ruc'. ²⁴ Ec'u ri' xujek rajilaxic, xrikitaj lo jun aj chac lic uq'uiyal ruc'as† ruc' y xc'am lo chwach. ²⁵ Ec'u wa aj chac ruma na cuch'ij ta chi utojic ruc'as, xtakan rupatrón che cha' cac'ayix bi rire, junam ruc' ri rixokil, ri ralc'o'al y ruc' ronoje rubitak re cha' jela' catojtaj ruc'as. ²⁶ Pero wa aj chac xuxucuba' rib chwach rupatrón y lic c'u xutz'onoj che: “Lal wajaw, lic chinoy'ej co c'ana la ma cantoj ronoje ri nuc'as che'la” xcha'. ²⁷ Ec'u rupatrón lic xjuch' ca'n uc'u'x che ri raj chac. Xucuy c'u umac che ronoje ruc'as y xuya bi luwar che xe'ec.

²⁸ »No'j c'u wa aj chac xew xel bi, xu'c'ulu lo jun rach aj chac yey wa' c'o jubik' uc'as§ ruc'. Xuchapij c'u pukul

e ri' pacha' cujitz'aj, jewa' xubi'ij che: “¡Chatojola' rac'as wuc'!” xcha che.

²⁹ »Ec'u ri rach aj chac xuxucuba' rib chwach y lic xutz'onoj che: “Chacuyu co numac, chinawoy'ej na q'uenok ma cantoj ronoje ri nuc'as chawe” xcha'.

³⁰ »No'j rire na xraj taj xroye'ej wa'. Ri xu'ano e xu'ya'a ri jun chic rach aj chac pa cárcel; yey c'a ec'u quesax lok we xutoj na ruc'as.

³¹ »Echiri' xquil tak wa' ri cach aj chaquib, lic xoc chiquic'u'x. Xebec c'ut, xe'quibi'ij che ri quipatrón ronoje ri xu'an ri jun aj chac.

³² Ec'uchiri', rupatrón xutak uc'amic y xubi'ij che: “¡At jun aj chac itzel ac'u'x! Ri'in xincuy amac ri'at che ronoje rac'as, ma lic e xatz'onoj ri' chwe. ³³ Ta ne e xa'an ri'at jela' pacha' ri xin'an ri'in chawe, ta e xac'ut ri c'axna'bal ac'u'x che rawach aj chac; no'j na e ta c'u ri xa'ano” xcha'.

³⁴ »Ec'u rupatrón lic xpe royowal y xtakan che caya'i' pa c'ax y c'a e quesax lo chupa wa' we xutoj na ronoje ruc'as.

³⁵ »Jec'ula' cu'an ri Nukaw c'o chila' chicaj iwuc' ri'ix we c'o junok chiwe na cucuy ta umac ri ratz-uchak' ruc' ronoje ranima' —xcha'.

19

Ri Jesús cac'utun chwi ri jachbal ib (Mt. 5:31; Mr. 10:1-12; Lc. 16:18)

¹ Echiri' xuq'uis ubi'xic wa' ri Jesús, xel bi Galilea y xe'ec pa tak ri luwar re Judea y xopon pa tak ri luwar c'o ch'aka ya' che ri nimaya' Jordán. ² Lic c'ut e q'ui ri winak xeterej bi chirij y xebucunaj ri yewa'ib chiri'.

³ E c'o c'u jujun chique ri fariseos xekib ruc' ri Jesús xa re caquic'am upa y xquitz'onoj che:

—¿Ube nawi che juna achi, xa tob sa' ri cujal wi uchi' ri rixokil, cuya bi ruwujil re jachbal ib che? —xecha'.

☆ **18:18** Mt. 16:19; Jn. 20:23 † **18:24** “Lic uq'uiyal ruc'as”: Pa ri ch'a'tem griego cubi'ij ruc'as wa aj chac e lajaj mil “talentos”, yey jun talento e rajil wo'lajaj junab re chac. E uwari'che wa aj chac na cuch'ij ta chi c'ana cutoj ruc'as. § **18:28** “Jubik' ruc'as”: Pa ri ch'a'tem griego cubi'ij ruc'as e jun ciento denarios, yey jun denario e rajil jun k'ij chac.

⁴ Ri Jesús xuc'ul uwach:

—¿Na ajilam ta neba alak sa' ri tz'ibital can pa Ruch'a'tem ri Dios? Ma jewa' cubi'ij:

Che ri jekebal lo ruwachulew echiri' ri Dios xebu'an ri ticawex, chi achi chi ixok xebu'ano. *Gn. 1:27*
⁵ Y cubi'ij:

Ruma c'u ri', rachi echiri' cac'uli'ic, caresaj rib chiquij ruchu-ukaw cha' cajeki' ruc' ri rixokil y quicabichal c'u ri' quebu'ana xa e jun chwach ri Dios. *Gn. 2:24*

⁶ Jec'uri'la' na e ta chi ca'ib, ma xebu'ana xa e jun. E uwari'che, ri xebujunimaj ri Dios, na ya'tal ta che ri ticawex cujach upa —xcha'.

⁷ Ec'uchiri', xquitz'onoj che:

—¿Su'chac c'u ri' ri Moisés xubi'ij we juna achi caraj cujach bi ri rixokil, xew chuya'a bi ruwujil re jachbal ib che y jec'ula' na rixokil ta chic? — xecha'.

⁸ Ri Jesús xubi'ij chique:

—Wa' e ruma lic co ri anima' alak. Ruma la' ri Moisés xuya luwar caya'i' ruwujil re jachbal ib; no'j che lo ri jekebal ruwachulew na je ta la' ri xraj ri Dios. ⁹ Cambi'ij c'u ri'in che alak: China junok cuya ruwujil re jachbal ib che ri rixokil tob ri rixokil na macuninak ta chirij ri c'ulaniquil, yey cac'uli' tanchi ruc' juna chic ixok, ri' camacun chirij ri c'ulaniquil. Y china ri cac'uli' ruc' rixok jachom canok, ri' jenela' camacun chirij ri c'ulaniquil —xcha'.

¹⁰ Ec'u rutijo'n xquibi'ij che:

—We jela' cuc'ulumaj rachi ruc' ri c'ulaniquil, más ne utz ri' we junok na cac'uli' taj —xecha'.

¹¹ Ri Jesús xubi'ij chique:

—Na conoje ta c'u ri ticawex caquich'ij wa'; ma xew ri ya'tal lo chique ruma ri Dios, caquich'ij u'anic. ¹² E c'o achijab na quec'uli' taj ma calaxibem pacha' e eunucos. E c'o jujun chic na quec'uli' taj ma 'anom eunucos chique. Yey e c'o ri na quec'uli' taj ma quiya'om quib che ri chac re rutakanic ri Dios petinak

chila' chicaj. China ri cach'ijow u'anic wa', chuch'ija c'u ri' —xcha'.

Ri Jesús cuyac quik'ij rac'alab
(*Mr. 10:13-16; Lc. 18:15-17*)

¹³ E c'o jujun raltak co ac'alab xec'am lo chwach ri Jesús cha' cuya ruk'ab paquiwi' y jela' cutz'onoj che ri Dios quebuchajij. Yey rutijo'n xequiyaj ri ec'amayom lo que.

¹⁴ No'j ri Jesús xubi'ij chique: «Chiya'a luwar chique ri raltak co ac'alab chepeta na wuc'. Mebik'atej; ma ri caqui'an e jela' pacha' rique, ri' cu'an que rutakanic ri Dios petinak chila' chicaj» xcha'. ¹⁵ Xuya c'u ruk'ab paquiwi' ri raltak co ac'alab. Tec'uchiri', xel bi pa ri luwar.

Jun beyom cach'a't ruc' ri Jesús
(*Mr. 10:17-31; Lc. 18:18-30*)

¹⁶ C'o c'u jun c'ac'al achi xc'un ruc' ri Jesús y xutz'onoj che:

—Lal utzilaj tijonel, ¿sa' ri utz can'ano cha' c'o nuc'aslemal na jinta utakexic? —xcha'.

¹⁷ Ri Jesús xuc'ul uwach:

—¿Su'be cabi'ij la “utz” chwe? Ma xa jun ri lic utz c'olic, wa' e ri Dios. Yey we ca'aj la coc la pa ri c'aslemal na jinta utakexic ruc' Rire, e takej la Rutzij Upixab —xcha'.

¹⁸ Rachi xubi'ij che ri Jesús:

—¿Pachique c'u ri' ri tziypixab? — xcha'.

Ri Jesús xubi'ij che:

—“Matcamisanic. Matmacun chirij ri c'ulaniquil. Matelek'ic. Ma'an rak'ubal chirij junok. ¹⁹ Chalok'oj quik'ij rachu-akaw” y “C'ax chana'a rawatz-achak' jela' pacha' c'ax cana' awib ri'at” —xcha'.

²⁰ Rachi xubi'ij che ri Jesús:

—Ronoje wa' nu'anom lo chwi nuch'uti'nal. ¿Sa' c'u ri' ri c'a chira-jawaxic chwe can'ano? —xcha'.

²¹ Ri Jesús xubi'ij che:

—We ca'aj la e ca'an la janipa ri caraj ri Dios che ri binic silabic la, c'ayij la ronoje tak ri beyomalil la y jacha c'u la chique ri niba'ib;

jec'uri'la' c'o beyomalil la chila' chij. Tec'uchiri', peta la, terej lo la chwij y cuyu la ri c'ax cape pawil la ruma lal nutijo'n —xcha che.

²² Rachi echiri' xuta wa', lic cabisonic xe'ec ma rire lic rajawal beyom.

²³ Ec'uchiri', xubi'ij ri Jesús chique rutijo'n:

—Pakatzij wi cambi'ij chiwe: Juna beyom lic c'ayew che coc chupa rutakanic ri Dios petinak chila' chicaj.

²⁴ Cambi'ij tanchi c'u chiwe: E ne más c'ayew ri coc juna beyom chupa rutakanic ri Dios chwa ri quic'ow juna camello chupa rutel juna acuxa' —xcha'.

²⁵ Echiri' xquita wa' rutijo'n, lic xcam canima' che y xquitz'onoj chiquiwach:

—We e ri', ¿china c'u ri' ri cacolobetajic?* —xecha'.

²⁶ Ri Jesús xutzul' quiwach y xubi'ij chique:

—Ri ticawex na caquicolobej ta quib quituquel ma wa' lic c'ayew chiquiwach; no'j ri Dios ronoje cu'ano ma na jinta c'ayew chwach Rire —xcha'.

²⁷ Ec'uchiri', xubi'ij ri Pedro che:

—Kajawal, ri'oj kaya'om can ronoje y oj teran chi'ij la. ¿Sa' c'u ri' ri caca'ul ri'oj? —xcha'.

²⁸ Ri Jesús xuc'ul uwach:

—Pakatzij wi cambi'ij chiwe: Copon c'u ri' ri k'ij echiri' ronoje cu'an c'ac', wa' echiri' Ralaxel Chiquixo'l Ticawex que'tz'ula chupa ri chomilaj tz'ulibal re rutakanic. Jec'ula' ri'ix quixe'tz'ula chupa cablajuj tz'ulibal re quixtakan paquiwi ri cablajuj tinamit re Israel.† ²⁹ Yey china c'u ri uya'om can rocho, ebuya'om can ri ratz-uchak', ruchu-ukaw, ri rixokil, ri ralc'o'al o ri rulew ruma ucojom ri nubi', ri' cuc'ul na jun ciento chic

chwa ronoje la' yey cuc'ul c'u ri c'aslemal na jinta utakexic.

³⁰ »Lic c'u e q'ui chique ri lic c'o quiwach wo'ora, chwach apanok na jinta chi quiwach; yey lic e q'ui chique ri na jinta quiwach wo'ora, e lic cac'oji' quiwach chwach apanok.

20

Jun c'ambal na'oj puwi rutakanic ri Dios

¹ »Ri cu'an chupa rutakanic ri Dios petinak chila' chicaj e jela' pacha' ri xu'ano echiri' juna rajaw chac anim tan xel bi che quitzucuxic aj chaquib quebajawax chupa rutico'n re uva.

² Xch'a't cuc' raj chaquib puwi ri cajil y xcanajic cuya jun denario re jun k'ij chac chique. Tec'uchiri', xebutak bi chupa rutico'n. ³ Laj che ri ubelej ora* anim, xel tanchi ubi y xeburik jujun chic quimolom quib pa c'ayibal na jinta caqui'ano.

⁴ »Xubi'ij c'u chique: “Jix ri'ix, jixe'chacuna wuc' chupa ri nutico'n re uva y tz'akat quixintojo” xcha'. Ec'u rique xebec.

⁵ »Pa tiq'uul k'ij† c'u ri', ri rajaw ri chac xel tanchi ubi che quitzucuxic más aj chac. Yey je tanchi la' xu'an che ri urox ora benak k'ij.

⁶ »Laj che c'u ri uro' ora benak k'ij, xel tanchi ubi y xebu'rika lo jujun chic na jinta caqui'ano. Xubi'ij c'u chique: “¿Su'chac ri'ix ix c'o wara y na jinta c'o xi'an wa jun k'ij?”

⁷ »Xquic'ul c'u uwach rique: “E ruma na jinta junok xojchocowic.”

»Ec'uchiri', xubi'ij ri rajaw ri chac chique: “Jix, jixe'chacuna chupa ri nutico'n re uva y tz'akat quixintojo.”

⁸ »Echiri' xoc rak'ab, ri rajaw ri chac xubi'ij che ri caporal: “Chebasiq'uij conoje raj chaquib y chebatojo bi. E quebatoj nabe ri xeboc c'unaj, y

* **19:25** Chiquiwach raj judi'ab, we junok c'o ubeyomal e ruma utz u'anom chwach ri Dios. Caquich'ob c'u ri', we c'ayew chique ri beyomab quebec chupa rutakanic ri Dios, más ne c'ayew ri' chique ri niba'ib. † **19:28** “Ri cablajuj tinamit re Israel”: Wa' e calc'o'al can ri cablajuj uc'ajol ri Jacob, ri cabi'x Israel che. Gn. 35:22-26 * **20:3** “Ri ubelej ora”: Quil “hora” pa vocabulario. † **20:5** “Tiq'uul k'ij”: Quil “hora” pa vocabulario.

q'uisbal c'u re, quebatoj ri xeboc nabe pa chac.”

⁹ »Ec'uchiri', xec'un raj chac ri xeboc benak k'ij che ri uro' ora. Y chiquijunal c'u ri' xquic'ul jun denario. ¹⁰ Tec'uchiri', xec'un lo ri eboquinak nabe pa chac. E chiquiwa rique más q'ui ri cajil caquic'ulu. No'j na je ta la' xu'ano, ma xquic'ul chiquijunal jun denario, pacha' ri xquic'ul ri jujun chic.

¹¹ »Echiri' xquic'ul ri cajil re jun k'ij, xquijeko quech'a't chirij ri rajaw ri tico'n, ¹² jewa' xquibi'ij che: “Wa' wa xeboc benak k'ij chic, xa jun ora xechacunic yey xetoj la junam kuc' ri'oj, tob c'u ri' ri'oj xkacuy lo ruc'atanil ri k'ij” xecha'.

¹³ »No'j ri rajaw chac xuc'ul uwach, jewa' xubi'ij che jun chique: “Wamigo, mabi'ij we na usuc' ta ri xin'an chawe. ¿Na xojcanaj ta neba la' catintoj jun denario? ¹⁴ Chac'ama c'u rawajil ri'at y jat. Yey we ri'in cuaj canya che ri xoc c'unaj pa chac, junam ruc' ri xinya chawe ri'at, ¹⁵ ¿na jinta neba panuk'ab ri'in can'an sa' ri cuaj ruc' ri nupuak? ¿O c'ax ac'u'x chwij xa ruma xinc'ut ri rutzil nuc'u'x chique jujun chic?” xcha ri rajaw ri chac.

¹⁶ »Jela' c'u ri', lic e q'ui chique ri na jinta quiwach wo'ora, e lic cac'oji' quiwach chwach apanok; yey lic c'u e q'ui chique ri lic c'o quiwach wo'ora, chwach apanok na jinta chi quiwach. Ma lic e q'ui ri esiq'uim, tob c'u xa e jujun ri echa'talic —xcha ri Jesús.

Ri Jesús cach'a't tanchi puwi rucamic

(Mr. 10:32-34; Lc. 18:31-34)

¹⁷ Echiri' c'o chi ri Jesús chi be re que'ec Jerusalem, xebuc'am bi ri cablajuj utijo'n quituquel pa jun luwar y xubi'ij chique:

¹⁸ «Chitape': E wa' cojpaki' Jerusalem, yey ec'u Ralaxel Chiquixo'l Ticawex caya' paquik'ab ri nimak e aj chacunel pa Rocho Dios y raj c'utunel re ri tziypixab cha' caquik'at

tzij puwi' re camic. ¹⁹ Tec'uchiri', caquiya paquik'ab ri na e ta ajjudi'ab cha' rique caquich'amij, caquijich'upa y caquicamisaj chwa cruz. No'j churox k'ij c'ut cac'astaj bi chiquixo'l ri ecaminak» xcha'.

Ri xutz'onoj ri quichu ri Jacobo y ri Juan che ri Jesús

(Mr. 10:35-45)

²⁰ Ec'uchiri', xkib ruc' ri Jesús ri quichu ri queb uc'ajol ri Zebedeo, † y ec'u la' e rachbi'il ri ralab; xuxucuba' rib chwach ri Jesús ma c'o caraj cutz'onoj che.

²¹ Ri Jesús xutz'onoj che:

—¿Sa' ri ca'aj la? —xcha'.

Rixok xuc'ul uwach:

—Wajawal, ya'a la chique wa queb walab quetz'uyi' uc' la pa ri takanic la, jun pawiquik'ab la y ri jun chic, pa mox la —xcha'.

²² Ec'u ri Jesús xuc'ul uwach, y jewa' xubi'ij chique ri queb utijo'n:

—Ri'ix na iweta'am taj sa' ri quitz'onoj. ¿Quich'ij neba ri'ix ri quinic'ow wi ri'in y ri c'ax cape panuwi'? —xcha'.

Rique xquibi'ij:

—Cakach'ijo —xecha'.

²³ Ri Jesús xubi'ij chique:

—Katzij, ri'ix quich'ij na ri c'ax quinic'ow wi ri'in y ri c'axc'obic cape panuwi'. Pero ri quixtz'uyi' pa nuwiquik'ab y pa numox, ri' na in ta quinya'w re. Ma xew caya'taj chique ri echa'tal chi ruma ri Nukaw cha' cu'ana na que —xcha'.

²⁴ Echiri' xquita wa' ri lajaj chic utijo'n, lic xpe coyowal chiquij ri queb quichak' quib. ²⁵ Ec'u ri Jesús xebusiq'uij y xubi'ij chique:

—Iweta'am ri'ix, ri quetakan paquiwi ri nimak tinamit quebu'ana pacha' e rajaw ronoje; yey ri lic c'o quiwach quic'ow uwi' ri takanic caqui'an paquiwi ri eya'tal paquik'ab. ²⁶ No'j chixo'l ri'ix na ube taj jela' cu'ano. Ma we c'o junok chiwe ri'ix caraj cu'ana aj wach, e chuya'a rib cu'an nimanel

† 20:20 “Ri queb uc'ajol ri Zebedeo”: Wa' e ri Jacobo y ri Juan.

iwe'ix. ²⁷ Yey e junok chiwe caraj cu'ana nabe chixo'libal, e chuya'a rib cu'an nimanel que conoje ²⁸ jela' pacha' ri cu'an Ralaxel Chiquixo'l Ticawex. Ma Rire na xc'un taj re canimaxic; xc'unic re co'lnimanok y re colu'ya'a rib pa camic che quicolobexic uq'uiyal ticawex — xcha'.

Ri Jesús quebucunaj ca'ib potz'
(Mr. 10:46-52; Lc. 18:35-43)

²⁹ Echiri' ri Jesús cuc' rutijo'n catajin bi quelic pa ri tinamit Jericó, lic uq'uiyal winak xeterej bi chirij Rire. ³⁰ E c'o c'u ca'ib potz' etz'ul chuchi' ri be. Echiri' xquito catajin ric'owic ri Jesús, lic xesiq'uin pan che:

—¡Kajawal, lal ri Ralc'o'al can ri rey David, choj-juch' ca'n co che'la! — xecha'.

³¹ Ec'u ri winak xequich'a'bej quipa cha' na quesiq'uin ta chic, no'j ri ca'ib potz' más ne co xesiq'uinic, xquibi'ij:

—¡Kajawal, lal ri Ralc'o'al can ri rey David, choj-juch' ca'n co che'la! — xecha'.

³² Ec'uchiri', xtaq'ui' ri Jesús, xebusiq'uij y xutz'onoj chique:

—¿Sa' ri quiwaj can'an chiwe? — xcha'.

³³ Ri ca'ib potz' xquic'ul uwach:

—Kajawal, chojcunaj co la cha' cojtzu'nic — xecha'.

³⁴ Ec'u ri Jesús xejuch' ca'n pa ranima' y xuya ruk'ab puwi ri quiwach. Na jampatana c'u ri' xetzu'nic y xeterej bi chirij ri Jesús.

21

Ri winak caquiyac uk'ij ri Jesús echiri' coc Jerusalem

(Mr. 11:1-11; Lc. 19:28-40; Jn. 12:12-19)

¹ Ri Jesús cuc' rutijo'n xa nakaj chic e c'o che ri tinamit Jerusalem, ya e ri' queboc pa raldea Betfagé, ri c'o chwach ri juyub Olivos. Ec'uchiri', ri Jesús xebutak bi ca'ib chique rutijo'n

cha' quenabej apanok, ² jewa' xubi'ij chique:

«Jix pa raldea c'o pan chikawach. Chiri' qui'rika jun axna yukulic yey c'o ri ral ruc'. Chiquira lok y chebic'ama lo chwe. ³ We c'o c'u junok cutz'onoj chiwe sa' ri qui'ano, jewa' chibi'ij che: “Rawaj quebajawax che ri Kajawal, yey c'ate cutak tanchi ulok” quixcha'.»

⁴ E xu'an wa' cha' e cu'ana rubi'im can ri k'alajisanel echiri' xubi'ij:

⁵ Chibi'ij chique ri e aj Sion:

“Chiwilape', ri Rey iwe'ix cac'un iwuc',

u'anom lo ch'uti'n che rib;

ucojom lo jun buru,

wa' jun k'apoj buru, ral jun awaj aj eka'n”

Zac. 9:9

xcha'.

⁶ Ec'uchiri', xebec rutijo'n y xqui'ano janipa ri xubi'ij bi ri Jesús chique. ⁷ Xquic'am c'u lo ri axna junam ruc' ri ral y xquirip ri quimanta* chiquij. Tec'uchiri', ri Jesús xucoj bi. ⁸ Uq'uiyal winak xquiwik ri be pa quic'ow wi ri Jesús, xquilic' tak ri quimanta pa ri be; yey e c'o jujun chic xquik'at raltak co uk'ab che' y xquilem pa la be re yacbal uk'ij.

⁹ Ec'u ri winak e nabe chwach cuc' ri eteran lo chirij xquijeko lic quesiq'uinic, caquibi'ij:

«¡Kayaca uk'ij ri Ralc'o'al can ri rey David!

¡Nim uk'ij ralaxic ri jun petinak

chupa rubi' ri Dios Kajawxel!*

¡Kayaca uk'ij ri Dios c'o chila' chicaj!» quecha'.

¹⁰ Echiri' xoc ri Jesús Jerusalem, xetucuc conoje ri winak re ri tinamit y lic e q'ui ri caquitz'onobej chiquiwach:

—¿China nawi wa jun achi? — quecha'.

¹¹ Ec'u ri winak caquibi'ij:

—E ri k'alajisanel Jesús, ri aj Nazaret re Galilea — quecha'.

* **21:7** Ri “manta” e jun c'ul caquicoj ri aj Israel re ojertan, tob achijab o ixokib, pacha' po't woca'j re carabexic. ☆ **21:9** Sal. 118:26

Ri Jesús queberesaj bi raj c'ay chupa ri Rocho Dios

(Mr. 11:15-19; Lc. 19:45-48; Jn. 2:13-22)

¹² Ec'uchiri', xoc ri Jesús pa ri Rocho Dios y xeberesaj bi conoje ri quec'ayinic y ri quelok'ow chupa. Xuc'akala' tak bi ri quimexa raj jachal uwach puak y tak ri quixila raj c'ay palomax. ¹³ Xubi'ij c'u chique:

«Ri Dios jewa' cubi'ij chupa Ruch'a'tem:

Che ri Wocho cabi'xic:

“E luwar re oración”

Is. 56:7

cacha'.

No'j ralak 'anom alak che ri Wocho e jun luwar que elek'omab»^{*} xcha'.

¹⁴ Chiri' c'u ri' chupa ri Rocho Dios, xekib ruc' ri Jesús jujun potz' cuc' jujun sic, y ri Jesús xebucunaj. ¹⁵ Ri nimak e aj chacunel pa Rocho Dios cuc' raj c'utunel re ri tzijpixab lic xpe coyowal echiri' xquil wa milagros y xquito lic quesiq'uin rac'alab pa ri Rocho Dios, caquibi'ij: «¡Kayaca uk'ij ri Ralc'o'al can ri rey David!» quecha'.

¹⁶ Xquibi'ij c'u ri' che ri Jesús:

—¿Cata la sa' ri caquibi'ij rac'alab che'la? —xecha'.

Ec'u ri Jesús xuc'ul uwach:

—Katzij wi canto. ¿Na ajilam ta neba alak ri cubi'ij Ruch'a'tem ri Dios paquiwi rac'alab? Ma jewa' cubi'ij: Chiquichi' rac'alab y ri quetz'umanic yijbam la ri chomilaj bix re yacbal k'ij la

Sal. 8:2

—xcha ri Jesús.

¹⁷ Ec'uchiri', xebuya canok y xel bi pa ri tinamit; xe'ec c'u Betania y chiri' xcanaj can wi la jun ak'ab.

Ri Jesús cuchakisaj jun che' re higo

(Mr. 11:12-14, 20-26)

¹⁸ Anim tan, echiri' ri Jesús catzelej tanchi pa ri tinamit, xpe numic che.

¹⁹ Xril c'u jun che' re higo c'o chuchi' ri be. Xe'rila' c'ut yey na xurik ta tob xa juna uwach ri che', xew ruxak c'olic.

Ec'uchiri', xubi'ij ri Jesús che ri che':

—¡Na jinta chi c'ana ajik'obalil caya'o! —xcha'. Y na jampatana xchakij ri che'.

²⁰ Echiri' xquil wa' rutijo'n, lic xcam canima' che y xquitz'onoj c'u che:

—¿Cha'taj xchakij tan wa che'? —xecha'.

²¹ Ri Jesús xuc'ul uwach:

—Pakatzij wi cambi'ij chiwe: We ta lic c'o cubulibal ic'u'x ruc' ri Dios y na queb ta c'ana ipa ruc', ri' na xew ta jewa' qui'an ri'ix pacha' wa xin'an ri'in che ri higo. Ma utz ne ri' quibi'ij che wa juyub: “Chatela wara y jate'c'ola chupa ri mar” quixcha' y e cu'ano. ²² Jec'ula' ri', e janipa ri quitz'onoj che ri Dios ruc' cubulibal ic'u'x, quic'ul na —xcha'.

China xya'w puk'ab ri Jesús catakanic

(Mr. 11:27-33; Lc. 20:1-8)

²³ Echiri' xopon ri Jesús pa ri Rocho Dios, xujek cac'utunic. Ec'u ri nimak e aj chacunel re ri Rocho Dios cuc' ri nimak winak re ri tinamit xekib ruc' y xquitz'onoj che:

—¿China xya'w pak'ab la ca'an tak la wa'? ¿China xtakaw la che ca'an tak la wa'? —xecha'.

²⁴ Ri Jesús xuc'ul uwach:

—Ri'in can'an jun tz'onobal che alak. We xc'ul alak uwach chwe, cambi'ij c'u ri' che alak china ya'yom panuk'ab can'an wa'. ²⁵ ¿China c'u xtakaw re ri Juan cuya ri bautismo? ¿E ri Dios o e rachijab? —xcha'.

Ec'u rique xquijek quech'a't chiquiwach puwi wa': «We xkac'ul uwach che: “E ri Dios xtakaw re”, ri' cubi'ij rire chike: “¿Su'chac c'u ri' na xcoj ta alak ri xubi'ij?” cacha chike. ²⁶ Yey cakaxi'ij kib cakabi'ij: “Xa achijab xetakaw re” ma conoje ri tinamit caquich'obo ri Juan e jun k'alajisanel re ri Dios» xecha chiquiwach.

²⁷ Xquibi'ij c'u che ri Jesús:

—Na keta'am taj —xecha'.

Ec'u ri Jesús xubi'ij chique:

^{*} 21:13 Jer. 7:11

«Jec'uri'la', ri'in na cambi'ij ta che alak china ya'yom panuk'ab can'an tak wa'.

Ri c'ambal na'oj paquiwi queb alabo quichak' quib

²⁸ »Yey chiwach ralak ¿sa' que'elawi wa'? C'o jun achi e c'o ca'ib uc'ajol y xubi'ij che jun chique: “Nuc'ajol, jat wak'ij pa chac, ma can'an numolonic re uva.”

²⁹ »Ruc'ajol xuc'ul uwach: “Na cuaj taj” xcha'. Pero c'ate na xujalc'atij runa'oj y xe'ec pa ruchac rukaw. ³⁰ Tec'uchiri', rachi xkib ruc' ri jun chic uc'ajol y xubi'ij che pacha' ri xubi'ij che ri ratzixel.

»Ec'u rala xuc'ul uwach: “Utz ri', tat, quin'ec pa ri chac” xcha'. Yey na xe'ec ta c'u ri'.»

³¹ Xutz'onoj c'u ri Jesús chique ri e aj wach:

—Chiwach ralak, ¿china nawi chique wa ca'ib alabo e xu'an ri caraj ri quikaw? —xcha'.

Xquibi'ij c'u rique:

—E ri nabe —xecha'.

Ec'u ri Jesús xubi'ij chique:

«Pakatzij wi cambi'ij chiwe: E raj tz'onol puak re tojonict† y rixokib na chom ta ri quibinic quisilabic, e rique ri nabe nenare' quebec chupa rutakanic ri Dios chiwach ralak. ³² Ma ri Juan Aj Ya'l Bautismo xc'un chiwach ralak, xolu'c'utu' su'anic cajeki' alak chi jusuc' che ruwachulew, yey ralak na xcoj ta alak. No'j c'u raj tz'onol puak re tojonict y rixokib na chom ta ri quibinic quisilabic, rique xquicojo. Ec'u ralak, tob xil alak wa', na xjalc'atij ta ri na'oj alak cha' cacoj alak rutzij.

Ri c'ambal na'oj paquiwi raj chac itzel quiwachlibal

(Mr. 12:1-12; Lc. 20:9-19)

³³ »Tape alak wa jun chic c'ambal na'oj: C'o jun achi rajaw jun ulew. Ec'u rire xu'an tico'n re uva chwach. Xusut rij ruc' coral, xuc'ot jun luwar pa cayitz' wi ruwa'al ri uva y xuyac jun ja naj uwi' re chajibal re. Xuya

c'u can pa tunulic chique jujun aj chaquib. Tec'uchiri', xe'ec naj.

³⁴ »Echiri' xopon ruk'ijol ri molonic, xebutak lo jujun raj chaquib cha' caquitz'onoj chique raj tunulel ri takalic cuc'ul rire che ri molonic. ³⁵ No'j raj tunulel xequichap raj chaquib ebutakom lok. Lic xqui'an c'ax che jun chique, xquicamisaj jun chic y c'o jun chic xqui'an pa'abaj.

³⁶ »Ec'u ri rajaw xebutak tanchi lo más aj chaquib, yey wa' más e q'ui chwa ri xebutak lo nabe. Ewi raj tunulel je tanchi la' xqui'ano pacha' ri xqui'an chique ri e nabe.

³⁷ »Q'uisbal c'u re, ri rajaw ri tico'n e xutak lo ruc'ajol cuc' raj tunulel, ma xuch'obo: Caquic'ul na chi utz wa nuc'ajol.

³⁸ »No'j raj tunulel echiri' xquil uwach ruc'ajol, jewa' xquibi'ij chiquiwach: “Wa' e uc'ajol ri rajaw rulew, ri cu'ana na rajaw we xcam rukaw. Jo' je'kacamisaj cha' rulew cu'an can ke'oj” xe'cha'.

³⁹ »Ewi xquichapo, xquesaj bi chupa wa' wu'lew y xquicamisaj» xcha ri Jesús.

⁴⁰ Tec'uchiri', xutz'onoj chique ri e aj wach:

—Chiwach ralak, echiri' cac'un ri rajaw rulew, ¿sa' nawi cu'an chique raj tunulel? —xcha'.

⁴¹ Rique xquic'ul uwach:

—Na cucuy ta c'ana quimac. Cusach na c'u quiwach ri itzel quiwachlibal y cuya tanchi ri rulew pa tunulic chique jujun chic aj chaquib, yey rique caquiya na ri molonic che chupa ruk'ijol —xcha'.

⁴² Tec'uchiri', xubi'ij ri Jesús chique:

—¿Na ajilam ta neba ralak ri tz'ibital can chupa Ruch'a'tem ri Dios? Ma jewa' cubi'ij:

E rabaj c'akital can cuma raj yacal ja, e abaj wa' lic xajawaxic cha' catiqui' lo ri ja.☆

Wa' e ri Dios Kajawxel x'anaw re

† 21:31 “Raj tz'onol puak re tojonict”: Quil “cobrador de impuestos” pa vocabulario. ☆ 21:42 Is. 28:16

y ri'oj lic cacam kanima' che *Sal.*
118:22-23

cache'.

⁴³ Ec'u uwari'che cambi'ij che alak: Camajataj na c'u che alak rutakanic ri Dios y caya'taj chique jujun chic tinamit cha' cuya ri jik'obalil caraj ri Dios che rutakanic. ⁴⁴ China c'u ri catzak puwi la' la'baj, lic c'ax ri cuc'ulumaj; yey we rabaj catzak puwi junok, ri' xa jumul cusach uwach —xcha'.

⁴⁵ Echiri' ri nimak e aj chacunel pa Rocho Dios cuc' ri fariseos xquita tak ri c'ambal na'oj xutzijoj ri Jesús, xquimaj usuc' chiquij rique xbi'x wi wa'. ⁴⁶ Ruma c'u ri' wa', lic xcaj caquichap ri Jesús; no'j e xquixi'ij quib chique ri tinamit ma rique caquich'obo ri Jesús e jun k'alajisanel re ri Dios.

22

Ri c'ambal na'oj puwi jun nimak'ij re c'ulaniquil

¹ Ri Jesús xujek tanchic cac'utun ruc' tak c'ambal na'oj chiquiwach, jewa' xubi'ij:

² «Ri cu'ana chupa rutakanic ri Dios petinak chila' chicaj e pacha' ri xuc'ulumaj jun rey echiri' xu'an jun nimalaj nimak'ij re ruc'ulaniquil ruc'ajol.

³ »Echiri' xopon ri k'ij re ri c'ulaniquil, ri rey xebutak bi ri raj chaquib cuc' ri esiq'uim pa ri c'ulaniquil cha' que'quibi'ij chique quepetic, pero rique na xcaj taj xepetic.

⁴ »Ewi xebutak tanchi ubi jujun chic raj chaquib, xubi'ij bi chique: “Chibi'ij chique ri esiq'uim chic: Ri kajaw uyijbam chi ronoje ri wa'im; tak ri nawilo'ib y tak ri mek' eti'o'jirisam chic, ya xecamisaxic. Ronoje c'u ri' yijbital chic. Peta c'u alak ri' pa ri nimak'ij re c'ulaniquil” quixcha'.

⁵ »No'j ri esiq'uim chic, na xeboc ta il che. Jun chique xe'rila ri rulew, jun chic xe'ec pa c'ayij. ⁶ Yey jujun chic xequichap ri raj chaquib ri

rey, lic xqui'an c'ax chique y jela' xequicamisaj.

⁷ »Ec'uchiri' xuta wa' ri rey, lic xpe royowal che. Xebutak c'u bi rusoldados re que'quisacha quiwach ri e camisanel y que'quiporoj ri quitinamit.

⁸ »Tec'uchiri', xubi'ij chique ri raj chaquib: “Ronoje yijbital chi che ri c'ulaniquil; no'j c'u ri esiq'uim nabe, na takal ta chi chique quebec pa ri nimak'ij. ⁹ Jix c'u ri' wo'ora pa tak nimabe y chebisiquij lo pa ri c'ulaniquil janipa tak ri winak quebiriko” xcha'.

¹⁰ »Xebel c'u bi ri raj chaquib pa tak be y xequimol lo quichi' conoje tak ri winak xequiriko xa tob e chinok; jec'uri'la' ri luwar pa ca'an wi ri c'ulaniquil xnoj che winak c'ac' esiq'uim. ¹¹ Ec'uchiri', xoc bi ri rey y xeril ri esiq'uim chic. Xril c'u jun achi c'o chiri' y na ucojom ta ruk'u' re c'ulaniquil.

¹² »Xubi'ij c'u che: “Wamigo, ¿cha'taj xatoc lo wara we na acojom ta rak'u' re c'ulaniquil?” xcha'. No'j rachi na xch'aw ta q'uenok.

¹³ »Ec'uchiri', xubi'ij ri rey chique ri queniman chwa ri mexa: “Wa jun achi na uwikom ta rib, chiyutu tak ri rakan y ruk'ab y chic'aka bi pa ri k'eku'm. Chiri' c'u ri' cok' wi y cakich'ich' wi ruwi re'” xcha'.

¹⁴ »Ma tob lic e q'ui ri esiq'uim, xa e jujun ri echa'tal chique» xcha ri Jesús.

Ri tz'onobal puwi ri tojonc ca'anic (Mr. 12:13-17; Lc. 20:20-26)

¹⁵ Xebel c'u bi ri fariseos chiri' y xquich'a'tibej chiquiwach su'anic caquic'am upa ri Jesús ruc' tak ri cubi'ij cha' caquicoj umac.

¹⁶ Xequitak c'u bi ri quitijo'n rique junam cuc' jujun chique ri quitakem ri rey Herodes. Ec'u rique xquibi'ij che ri Jesús:

—Lal tijonel, ri'oj keta'am lic katzij ri cabi'ij la y lic jusuc' cac'utun la chwi ri be re ri Dios. Yey na caxi'ij tane ib la che tak ri caquibi'ij ri ticawex; ma rilal junam quiwach quebil la conoje, tob c'o quiwach o

na jinta quiwach. ¹⁷ Bi'ij c'u la chike: ¿Usuc' nawi caka'an tojonic che ri nimalaj takanel re Roma* o na usuc' taj? —xecha'.

¹⁸ Ri Jesús, ruma reta'am ri retzelal quic'u'x, jewa' xubi'ij chique:

—¡Xa queb palaj alak! ¿Su'chac cac'am alak nupa? ¹⁹ C'utu pe alak chwe juna meyo re ca'an tojonic ruc' —xcha'.

Ec'uchiri', xquic'ut jun denario che.

²⁰ Ec'u ri Jesús xutz'onoj chique:

—¿China re wa c'axwach y china re wa bi'aj c'o chwach wa meyo? —xcha'.

²¹ Rique xquic'ul uwach:

—Re ri nimalaj takanel re Roma —xecha'.

Xubi'ij c'u ri Jesús chique:

—Ya'a alak che ri nimalaj takanel re Roma janipa ri takal che rire, yey ya'a c'u alak che ri Dios janipa ri takal che ri Dios —xcha'.

²² Echiri' xquita wa', lic xcam canima' che. Xquiya c'u can ri Jesús y xebec.

Ri tz'onobal puwi ri c'astajibal

(Mr. 12:18-27; Lc. 20:27-40)

²³ Chupa c'u la' la jun k'ij, xec'un ruc' ri Jesús jujun chique ri saduceos, ri caquibi'ij na jinta c'astajibal chique ri ecaminak. Xquitz'onoj c'u che ri Jesús, ²⁴ jewa' xquibi'ij:

—Lal tijonel, ri Moisés xubi'ij canok: “We c'o juna achi xcamic yey na e jinta can ralc'o'al, ec'u ri' ruchak' cac'uli' ruc' rixok malca'n canok y jec'ula' quec'o'ji' ralc'o'al ruc' publi' ri ratz xcamic”✧ xcha'.

²⁵ »Julaj e c'o wukub achijab quichak' quib xejeki' chikaxo'l. Ri nabe chique xc'uli'ic yey ec'u ri' wa' xcamic y na e jinta can ralc'o'al ruc' ri rixokil. Ewi ruca'm xc'uli' ruc' rixok malca'n canok. ²⁶ Jela' c'u ri' ruca'm xcamic y na e jinta can ralc'o'al ruc' rixok. Yey je tanchi la' xuc'ulumaj rurox, rucaj y chiquijujunal ri wukub

achijab. ²⁷ Q'uisbal c'u re, e xcam rixok.

²⁸ »Chupa c'u ruk'ijol ri c'astajibal, ¿chinok chique ri wukub achijab cu'ana rachijil rixok? Ma conoje xec'uli' ruc' —xecha'.

²⁹ Ri Jesús xuc'ul uwach:

—Ralak lic sachinak alak, ma na majom ta alak usuc' Ruch'a'tem ri Dios y ruchuk'ab ri Dios. ³⁰ Ma echiri' quec'astaj lo ri ecaminak, na quec'uli' ta chic yey na quequiya ta chi ne ri calc'o'al pa c'ulaniquil; quebu'ana c'u pacha' ri ángeles re ri Dios chila' chicaj, ma ri ángeles na quec'uli' taj.

³¹ Yey puwi ri c'astajibal que ri ecaminak, ¿na ajilam ta neba alak rubi'im ri Dios echiri' xubi'ij: ³² “In ri Dios re ri Abraham, re ri Isaac y re ri Jacob”?✧ Yey ri Dios na e ta Dios que ri ecaminak, ma e Dios que ri e c'aslic† —xcha'.

³³ Echiri' xquita wa', ri winak lic xcam canima' che tak ruc'utunic.

Ri tz'onobal puwi ri tzijpaxab más chirajawaxic

(Mr. 12:28-34)

³⁴ Ri fariseos xquimol quib echiri' xqueta'maj ri saduceos na xquirik ta chi uc'ulic uwach ri Jesús.

³⁵ C'o c'u jun chique raj c'utunel re ri tzijpaxab xraj xuc'am upa ri Jesús, jewa' xutz'onoj che:

³⁶ —Lal tijonel, chupa Rutzij Upixab ri Dios, ¿pachique ri takanic más chirajawaxic? —xcha'.

³⁷ Ri Jesús xubi'ij che:

—“C'ax chana'a ra Dios Kajawxel ruc' ronoje awanima', ruc' ronoje ac'u'x y ruc' ronoje ana'oj.”✧ ³⁸ Wa' e nabe tzijpaxab lic chirajawaxic y e uc'u'xibal Rutzij Upixab ri Dios. ³⁹ Yey ruca'm jewa' cubi'ij: “C'ax chana'a rawatz-achak' jela' pacha' ri c'ax cana' awib ri'at.”✧ ⁴⁰ Ucabichal wa' e uc'u'xibal Rutzij Upixab ri Dios tz'ibital can ruma ri Moisés y cuma ri k'alajisanelab —xcha'.

* **22:17** “Ri nimalaj takanel re Roma”: Quil “César, emperador” pa vocabulario. ✧ **22:24** Dt. 25:5-6

✧ **22:32** Éx. 3:6, 15 † **22:32** Echiri' ri Dios xubi'ij wa', wa' wa'chijab ecaminak chic; pero echiri' xcamic, xebec ruc' ri Dios y wo'ora e c'o ruc' Rire. ✧ **22:37** Dt. 6:5 ✧ **22:39** Lv. 19:18

*Sa' ruwach Rucha'o'n lo ri Dios
(Mr. 12:35-37; Lc. 20:41-44)*

⁴¹ Ec'uchiri' c'a quimolom quib ri fariseos, ri Jesús xutz'onoj chique:

⁴² —¿Sa' ri cach'ob alak chwi ri Cristo, Rucha'o'n lo ri Dios? ¿China che upetebem wi lo rire? —xcha'.

Xquic'ul c'u uwach:

—E ralc'o'al can ri rey David — xecha'.

⁴³ Ec'uchiri', ri Jesús xutz'onoj chique:

—¿Cha'taj cabi'x che ri Cristo e ralc'o'al can ri David? Ma ruma ri Ruxlabixel ri Dios, ri David xubi'ij “Wajawal” che ri Cristo echiri' rire xubi'ij:

⁴⁴ Ri Dios Kajawxel xubi'ij che ri Wajawal:

“Chat-tz'ula pa nuwiq'ab,
y chawoye'ej na ri k'ij
echiri' quebenuya ri tzel que-
bilow awe
chuxe' rawakan” *Sal. 110:1*

xcha'.

⁴⁵ Ec'u ri David cubi'ij “Wajawal” che Rucha'o'n lo ri Dios. ¿Su'be c'u ri' cabi'xic e Ralc'o'al can ri rey David?† —xcha'.

⁴⁶ Y na jinta junok xrikow uc'ulic uwach. Chwi c'u ri' la' la jun k'ij, conoje caquixi'ij quib caqui'an tz'onobal che.

23

*Ri Jesús cuk'alajisaj tak ri quimacri
fariseos y raj c'utunel re ri tzi'ijpaxab*

(Mr. 12:38-40; Lc. 11:37-54; 20:45-47)

¹ Ec'uchiri', ri Jesús xubi'ij chique ri winak y chique rutijo'n:

² «Raj c'utunel re ri tzi'ijpaxab y ri fariseos ya'tal paquik'ab caquik'alajisaj tak rutzijpaxab can ri Moisés. ³ Ruma c'u ri', ri'ix chi'ana janipa ri caquibi'ij puwi wa tzi'ijpaxab; no'j mi'an c'u iwe'ix ri na utz taj caqui'an rique, ma junwi ri caqui'an rique chwa ri caquic'utu.

⁴ »Ri quitakanic rique e pacha' ni-mak tak eka'n lic al y lic c'ayew ruc'axic; quequitak c'u ri winak cha' caquekaj bi yey rique na cacaj tane c'ana queto'b ruc' wa'.

⁵ »Ronoje tak ri caqui'ano xew e cha' quebilitaj cuma ri winak. Caqui'an che quib pacha' lic e jusuc' chwach ri Dios; ruma c'u la', e ri quifilacterias* ximital chucurusil ri quipalaj y che ri quik'ab, lic caqui'an nim che; yey tak ri cordón carabab che ri quik'u', caqui'an lic naj rakan che. ⁶ Pa tak ri sinagogas y pa tak wa'im, lic e cuc'ul quic'u'x quetz'uyi' chupa ri tz'ulibal que ri lic c'o quiwach. ⁷ Yey lic cuc'ul quic'u'x caya' rutzil quiwach pa quebilitaj wi y cabi'x chique: “¡Lal tijonel!”

⁸ »Ec'u ri'ix miwoy'ej cabi'x “¡Lal tijonel!” chiwe, ma xa jun ri tijonel iwe, wa' e ri Cristo. Yey ruma Rire xixu'an iwatz-ichak' iwib. ⁹ Mibi'ij “Nukaw” che junok wara che ruwachulew, ma xa jun Rikaw c'olic, y wa' e Rikaw c'o chila' chicaj. ¹⁰ Miya luwar cabi'x “¡Lal Aj C'amal Kawach!” chiwe, ma xa jun ri Aj C'amal Iwach, wa' e ri Cristo.

¹¹ »Ec'u ri c'o uwach chixo'libal ri'ix e chuya'a rib cu'an nimanel iwe'ix. ¹² Ma china ri lic cu'an nim che rib, ri Dios cukasaj uwa uk'ij; no'j china ri cu'an ch'uti'n che rib, ri Dios cuyac uk'ij.

¹³ »¡Lic c'u tok'o' wach ralak alak aj c'utunel re ri tzi'ijpaxab y alak fariseos! ¡Xa queb palaj alak! E tz'apim alak ri oquibal re rutakanic ri Dios petinak chila' chicaj cha' na jinta c'o queboc bi; ma na coc tane ubi ralak y na caya tane alak luwar chique jujun chic queboc bi.

¹⁴ »¡Lic tok'o' wach ralak alak aj c'utunel re ri tzi'ijpaxab y alak fariseos! ¡Xa queb palaj alak! Ma camajalak ri cocho rixokib e malca'nib. Yey cha' na cak'alajin ta ri na utz taj ca'an alak, e cawererej alak unimal

† **22:45** Wara cak'alajin wi, Rucha'o'n lo ri Dios na xew ta e jun achi ralc'o'al can ri rey David ma e Uc'ajol ri Dios. E uwari'che lic takalic cabi'x “Wajawal” che, pacha' ri xubi'ij ri rey David. * **23:5** Quil “filacteria” pa vocabulario.

ch'abal echiri' ca'an alak orar. Ruma c'u wa ca'an alak, lic unimal c'axc'olil cac'ul na alak echiri' cak'at tzij pawl' alak ruma ri Dios.

¹⁵ »iLic tok'o' wach ralak alak aj c'utunel re ri tzijpixab y alak fariseos! ¡Xa queb palaj alak! Ralak cak'axuj alak uwi tak mar y cabinibej alak tak ri luwar che ruwachulew cha' juna ticawex cu'an tijo'n alak. Yey echiri' u'anom chi tijo'n alak, ca'an alak che ri ticawex calaj más itzel uwachlibal chiwach ralak.

¹⁶ »iLic tok'o' wach ralak alak pacha' potz' c'amal quiwach jujun chic, ma cabi'ij alak: “We c'o junok cujiquiba' uwach juna tzij pa rubi' ri Rocho Dios, ri' na chirajawaxic ta che cu'an ri ubi'im; no'j we cujiquiba' uwach juna tzij pa rubi' ri oro re ri Rocho Dios, ri' chirajawaxic che cu'an janipa ri ubi'im” cacha alak.

¹⁷ »iNa jinta na'oj alak y alak potz'! ¿Pachique ri más c'o uwach? ¿E ri oro o e ri Rocho Dios, ri cu'an santo che ri oro? ¹⁸ Jenewa' ri cabi'ij ralak: “We c'o junok cujiquiba' uwach juna tzij pa rubi' raltar, na chirajawaxic ta che cu'an ri ubi'im; no'j we cujiquiba' uwach juna tzij pa rubi' ri kasa'n c'o chwi raltar, ri' chirajawaxic che cu'an janipa ri ubi'im” cacha alak.

¹⁹ »iSachinak ri na'oj alak y alak potz'! ¿Pachique ri más c'o uwach? ¿E ri kasa'n o e raltar ri cu'an santo che ri kasa'n? ²⁰ Ma china ri cujiquiba' uwach juna tzij pa rubi' raltar, ri' na xew ta cu'an pa rubi' raltar, ma cu'an pa rubi' ronoje ri c'o chwi raltar.

²¹ Jec'ula', china ri cujiquiba' uwach juna tzij pa rubi' ri Rocho Dios, na xew ta cu'an pa rubi' ri Rocho Dios, ma ri' e cu'an tzij pa rubi' ri Dios, ri Jun jekel chiri'. ²² Jec'ula', china ri cujiquiba' uwach juna tzij pa rubi' ri caj, ri' cu'an pa rubi' ri tz'ulibal pa catakan wi ri Dios y cu'an pa rubi' ri Jun tz'ul chupa.

²³ »iLic tok'o' wach ralak alak aj c'utunel re ri tzijpixab y alak fariseos! ¡Xa queb palaj alak! Ma caya alak che ri Dios ri diezmo alak re ri arweno, re ri anix y re ri cominox.

No'j na coc ta alak il che ruc'u'xibal ri Tzij Pixab re ri Dios: Wa' e ri ca'an alak ri usuc', ri cac'ut alak ri c'axna'bal c'u'x alak chique jujun chic y ri cacubi' c'u'x alak ruc' ri Dios. Lic chirajawaxic c'u ri' ca'an alak tak wa', junam ruc' ri caya ri diezmo alak.

²⁴ »iAlak pacha' potz' c'amal quiwach jujun chic! Ma ri ca'an alak e pacha' junok lic cuchajij rib cha' na cubik' tubi tob xa juna ralco us, pero cubik' bi ri nimak tak awaj pacha' ri camello.

²⁵ »iLic tok'o' wach ralak alak aj c'utunel re ri tzijpixab y alak fariseos! ¡Xa queb palaj alak! Ma xew cach'aj alak chi utz ri rij ri vaso y ri lak, pero na coc ta alak il che uch'ajic rupa. Jec'uri'la' ralak lic coc alak il che ri josk'inic re ri cuerpo, pero lic c'o ch'ulil pa anima' alak ruma relek' y ri na usuc' taj 'anom alak. ²⁶ ¡Rilal fariseo, lal potz'! Nabe na ch'aja la rupa ri vaso y ri lak; jec'uri'la' cu'an chom rupa y ri rij.

²⁷ »iLic tok'o' wach ralak alak aj c'utunel re ri tzijpixab y alak fariseos! ¡Xa queb palaj alak! Ma ralak alak pacha' mukubal que anima' xew 'anom sak che ri rij; chom catzu'nic, no'j c'u rupa nojinak che quibakil anima' y che uq'uiyal ch'ul. ²⁸ Jec'ula' ri 'anom ralak, ma ri binic silabic alak e quilitajic pacha' lic jusuc' chiquiwach ri winak; no'j xa queb palaj alak, ma ri c'u'x alak nojinak che uq'uiyal ch'ulil.

²⁹ »iLic tok'o' wach alak aj c'utunel re ri tzijpixab y alak fariseos! ¡Xa queb palaj alak! Ma cayac alak chomilaj mukubal chique ri k'alajisanelab re ojertan y cawik alak ri mukubal que ri ticawex lic jusuc' xebinic. ³⁰ Yey cabi'ij c'u alak: “We ta oj c'o chi ri'oj echiri' xec'asi' ri kati'l-kamam ojertan, na caka'an ta ke'oj ri' cuc' ri xecamisan ri k'alajisanelab” cacha alak. Pero ¡na e ta c'ana u'anom! ³¹ Ruc' c'u ri catajin alak che u'anic, cak'alajinic alak calc'o'al can ri xecamisan que ri k'alajisanelab.

32 ¡Q'uisa c'u alak u'anic ri' ri na utz taj xquijek lo u'anic ri chu'kaw alak ojertan!†

33 »¡Ralak pacha' alak jupuk chi cumatz! ¿Su'anic quesaj ib alak chuxe' ri k'atbal tzij re ri Dios echiri' cutak bi alak chi xibalba'? 34 E uwari'che ri'in quebenutak lo uc' alak k'alajisanelab, waj chac lic c'o quina'oj y aj c'utunel re Rutzij Upixab ri Dios. Pero ralak quecamisaj alak jujun chique rique. E c'o ne ri quecamisaj alak chwa cruz, jujun chic cajich' alak quipa pa tak sinagogas y jujun chic queternabej alak ruc' c'axc'obic pa tak tinamit. 35 Ruma c'u ri' cape pawil' alak ronoje ri c'axc'obic takal chique ri xecamisan que rachijab jusuc' xebinic, ujekebem lo chwi rucamic ri Abel* ri jun ala lic jusuc', c'a chwa rucamic ri Zacarías,* ruc'ajol ri Berequías, ri xcamisaj alak chuxo'l raltar y ri Rocho Dios. 36 Pakatzij wi cambi'ij che alak: Ronoje wa' cape paquiwi ri winak e c'o wak'ij ora» xcha'.

Ri Jesús cok' puwi ri tinamit Jerusalem

(Lc. 13:34-35)

37 Tec'uchiri', xubi'ij:

«¡Jerusalem, Jerusalem, ri'ix quebi-camisaj ri k'alajisanelab y quebi'an pa'baj janipa ri ebutakom lo ri Dios iwuc'! E ri'in, uq'uiyal laj lic xuaj xinmol quichi' riwalc'o'al ri'ix, jela' pacha' cu'an juna ati' ac' chique tak ruwi'ch echiri' cumol quichi' chuxe' tak ruxic'; pero ri'ix na xiwaj ta q'uenok.

38 »Chitape c'ut: C'o jun k'ij ri iwocho ri'ix cawulix canok. 39 Cambi'ij c'u chiwe ri'ix: Chwi c'u wo'ora na quiwil ta chi c'ana nuwach ri'in c'a echiri' copon na ruk'ijol quibi'ij ri'ix: Lic nim uk'ij ri jun petinak chupa rubi' ri Dios Kajawxel *Sal.*

118:26
quixcha'.»

† 23:32 Ri quichu-quikaw ojertan xequicamisaj tak ri k'alajisanelab re ri Dios; jec'ula' ri fariseos xquitzucuj rucamic ri Jesús. * 23:35 Gn. 4:8 * 23:35 2 Cr. 24:20-21 * 24:1 "Ri nimak tak ja re ri Rocho Dios": Quil "templo" pa vocabulario.

24

Ri Jesús cach'a't chwi ruwulixic ri Rocho Dios
(Mr. 13:1-2; Lc. 21:5-6)

1 Echiri' xel bi ri Jesús pa ri Rocho Dios yey e ri' que'ec, xekib rutijo'n ruc' re caquic'ut che, ruchomalil ri nimak tak ja re ri Rocho Dios.*

2 Ec'u ri Jesús xuc'ul uwach:

—¿Quiwil ri'ix ronoje wa'? Pakatzij wi cambi'ij chiwe, wara na cacana'j ta chi can juna abaj puwi juna chic, ma ronoje cawulixic —xcha'.

Tak ri c'utubal re ri q'uisbal re ruwachulew

(Mr. 13:3-23; Lc. 21:7-24)

3 Tec'uchiri', xebopon chwa ri juyub Olivos. Yey echiri' xtz'uyi' ri Jesús, xekib rutijo'n ruc', y ec'u la' xa quituquel xquijek caquitz'onoj che:

—Bi'ij co la chike, ¿jampa nawi cu'ana tak ri' wa'? ¿Yey sa' ri c'utubal re ri c'unibal la y re ri q'uisbal re ruwachulew? —xecha'.

4 Ec'u ri Jesús xuc'ul uwach:

«Lic chichajij iwib cha' na jinta junok casocow iwe'ix. 5 Ma lic e q'ui ri ticawex quec'unic y xa caquichik'imaj uwach ri nubi', jewa' caquibi'ij: "In ri Cristo, Rucha'o'n lo ri Dios" quecha'. Y lic e q'ui ri quesocotaj cuma rique.

6 »Quita c'u ri' c'o ch'a'oj jewa' y c'o ch'a'oj jela'. Mixi'ij c'u iwib che, ma lic chirajawaxic wi cu'ana tak wa'; no'j na e ta wa' ri q'uisbal re ruwachulew. 7 Ma e c'o tinamit queyactaj chiquij jujun chic tinamit y e c'o takanelab queyactaj chiquij jujun chic takanelab. Cape c'u numic y yabil yey cu'an tak cabrakan che uq'uiyal luwar. 8 Ronoje wa' e jekebal re tak ri c'axc'obic cac'unic.

9 »Ec'uchiri', quixya' ri'ix pa tak c'axc'obic y quixcamisaxic; yey conoje tak ri tinamit che ruwachulew lic tzel quixquilo ruma icojom ri nubi'. 10 Chupa tak la' la' k'ij, lic e q'ui

ri caquesaj quib chirij ri Dios, caquijek lic tzel caquil quib chiquiwach y caquic'ayij quib chiquiwach.

¹¹ »Lic e q'ui ri k'alajisanelab xa e socoso'nel queyactajic y lic e q'ui ri winak quesocotaj cuma rique.

¹² Ruma c'u ruq'uiyaric tak uwach ri mac, lic e q'ui ri cak'ob ri rutzil c'u'xaj pa canima'. ¹³ China c'u ri lic cuchuk'ubej rib chwach tak wa' wa c'axc'obic c'a chupa ri q'uisbal re, e ri' ri cacolobetajic.

¹⁴ »Yey wa Utzilaj Tzij re rutakanic ri Dios catzijox na chique ruq'uiyal quiwach tak ri ticawex e c'o che ruwachulew cha' conoje caqueta'maj c'u ri' wa'; tec'uchiri', cac'un lo ri q'uisbal re ruwachulew.

¹⁵ »E uwari'che echiri' quiwil ri'ix ri lic ch'ul y lic q'uixbal uwach caya' chupa ri Luwar Santo, jela' pacha' ri xutz'ibaj can ri k'alajisanel Daniel;✠ (china c'u ri cajilan re wa', chumaja usuc'), ¹⁶ ec'u ri e c'o pa tak ri luwar re Judea chebanimaj ubi chwa tak ri juyub. ¹⁷ China c'u ri c'o lo chwi ri rocho,† makaj ne lo che uc'amic bi ubitak re pa ja. ¹⁸ Yey china ri c'o lo pa juyub, matzelej ne lo che uc'amic bi ruk'u' re pisbal rij.

¹⁹ »Chupa tak c'u la' la k'ij, lic tok'o' quiwach ri e yewa' ixokib y ri quetz'umtisanic. ²⁰ Lic c'u chitz'onoj che ri Dios cha' echiri' quixanimaj bi, na e ta uk'ijol echiri' c'ax tew y c'o jab‡ yey na chupa tane juna k'ij re uxlanibal. ²¹ Ma cac'un c'u jun unimal c'axc'obic, wa' na u'anom ta c'ana julajok chwi lo ri jekebal ruwachulew y na cu'ana ta chi ne c'ana julajok. ²² We ta ri Kakaw Dios na cuk'atij ta tak la' la k'ij re runimal c'axc'obic, ri' na jinta junok cac'asi' canok; pero ruma c'u c'ax quebuna' ri ebucha'om, cuk'atij ruk'ijol wa'.

²³ »We c'o c'u junok ri' cabi'n chiwe: “¡Chiwilape', wara c'o wi ri Cristo!” o

“¡Chiwilape', le' c'olic!”, mixoc il che. ²⁴ Ma quec'un ri caqui'an “Cristo” che quib y ri caqui'an “e k'alajisanelab re ri Dios” che quib, pero xa e socoso'nel. Ec'u rique caqui'an nimak tak c'utubal y milagros re quesocoso'n ruc', yey c'o ne pa sak quesocotaj jujun chique ri ebucha'om ri Dios.

²⁵ »Chita c'u ri' ma ximbi'ij wa' chiwe ri'ix echiri' c'amaja' ne cu'ana'.

²⁶ E uwari'che tob cabi'x chiwe: “Chiwilape', le' ri Cristo c'o pa ri luwar catz'intz'otic”, mix'ec che rilic. Tob ne cabi'x chiwe: “Chiwilape', le' ri Cristo c'o lo pa ja”, mixoc il che. ²⁷ Ma jela' pacha' echiri' cayoc' ca'n ruxe' caj pa relebal lo ri k'ij y quilataj c'a putzakibal ri k'ij, jela' cu'an ruc'unibal Ralaxel Chiquixo'l Ticawex. ²⁸ Ma lic cak'alajin ruc'unibal chiquiwach conoje ri winak; e jela' pacha' lic cak'alajin pa c'o wi juna caminak, ma puwi wa' caquimol wi quib tak ri c'uch.

Ruc'unibal Ralaxel Chiquixo'l Ticawex

(Mr. 13:24-37; Lc. 21:25-36; 17:25-36; 12:41-48)

²⁹ »Xew c'u quic'ow ri c'axc'obic chupa tak la' la k'ij, cu'an k'eku'm uwach ri k'ij, ri ic' na cuya ta chi ruwonibal, ri ch'umil quetzak lo che ruwa caj yey conoje ri c'o quichuk'ab che ruwa caj queyiquiyo'xic. ³⁰ Ec'uchiri', quilataj che ruwa caj ri c'utubal re ruc'unibal Ralaxel Chiquixo'l Ticawex. Conoje c'u ruq'uiyal quiwach tak ri ticawex e c'o che ruwachulew quebok'ic y caquil c'u Ralaxel Chiquixo'l Ticawex cac'un lo pa sutz' chwa ri caj ruc' ruchuk'ab y ruc' runimal uchomalil.✠

³¹ Quebutak c'u ru ángeles ruc' unimal uch'awibal trompeta re caquimol quichi' conoje ri ebucha'om ri Dios

✠ **24:15** Dn. 9:27; 11:31; 12:11 † **24:17** Ruwi ri cocho raj Israel ojertan tak'aj uwi', yey wa' curik uchac re anabal oración, re quiwa'bal y re quiwarabal chak'ab echiri' lic cabucbutic. ‡ **24:20** “Uk'ijol echiri' c'ax tew y c'o jab”: Quil “invierno” pa vocabulario. ✠ **24:30** Dn. 7:13; Ap. 1:7 § **24:31** “Ruc'ajchal rajlibal ruwachulew”: Wa' que'elawi pa norte, pa sur, pa relebal k'ij y putzakibal k'ij.

pa tak ronoje luwar che rucajchal rajlibal ruwachulew.Š

³² »E chimaja ri jun c'ambal na'oj puwi ri che' re higo: Echiri' cujek catux lo c'ac' uk'ab y cujek c'ut catux ruxak, ruma c'u la' quiweta'maj xa nakaj chi c'o wi lo ruk'ijol echiri' cabucbutic y na jinta jab.** ³³ Jec'uri'la' ri'ix, echiri' quiwilo cu'ana ronoje tak wa', chiweta'maj c'u ri' xa nakaj chi c'o wi lo ruk'ijol ruc'unibal Ralaxel Chiquixo'l Ticawex. ³⁴ Pakatzij wi cambi'ij chiwe: E c'o ticawex che tak la' la k'ij na quecam tana we na caquil tubi ronoje wa'. ³⁵ Ruwa caj y ruwachulew xa casach uwach, no'j tak ri nuch'a'tem na casach ta uwach.

³⁶ »Ec'u chwi ruk'ijol y ru'orayil wa', na jinta junok eta'mayom re; na queta'am tane ri ángeles e c'o chila' chicaj, ma xew ri Nukaw eta'mayom re. ³⁷ Ma jela' pacha' ri xu'an chupa tak ri k'ij re ri Noé, jela' cu'ana pa ruc'unibal Ralaxel Chiquixo'l Ticawex. ³⁸ Ma chupa tak la' la k'ij echiri' c'amaja' cape ri unimal jab, tak ri winak xew caquitij quiwa, caquitij quiya', quec'uli'ic y quequiya ri calc'o'al pa c'ulaniquil. Ec'u quetajin ri' che u'aniquil echiri' xopon ruk'ijol xoc bi ri Noé chupa ri nimalaj barco. ³⁹ Na xquina'bej tane ri xpe paquiwi', c'ate c'u xquina'o xc'un lo ri unimal jab; ri ya' xebuc'am bi ri winak y xecam c'u conoje. Jec'ula' cu'ano echiri' cac'un tanchi Ralaxel Chiquixo'l Ticawex, ma xakic'ate't cac'unic.

⁴⁰ »Chupa c'u la' la k'ij, c'o cu'ana wi e c'o queb achijab chwa juyub; jun cac'am bi y ri jun chic caya'i' canok. ⁴¹ O e c'o queb ixokib junam queque'nic, jun c'u cac'am bi y ri jun chic caya'i' canok. ⁴² Lic c'ut mawar iwach ri'ix, ma na iweta'am ta ru'orayil ruc'unibal ri Iwajawal.

⁴³ »Ec'u chiweta'maj wa': Juna achi rajaw ja we ta careta'maj ri

ora echiri' copon relek'om, ri' na cawar ta q'uenok y na cuya ta luwar coc relek'om pa ri rocho. ⁴⁴ E uwari'che ri'ix chiyijba' iwib che ruc'unibal Ralaxel Chiquixo'l Ticawex, ma c'axtaj cac'unic echiri' na jinta ina'bem.

Ri aj chac cachacun chi utz y ri aj chac na cachacun ta chi utz

⁴⁵ »¿Chinok chiwe e pacha' juna aj chac lic jusuc' y c'o una'oj, ri ya'om puk'ab quebutzuk chupa ru'orayil conoje ri e c'o pa rocho rupatrón? ⁴⁶ Lic c'u nim uk'ij ralaxic ri' ri aj chac we xc'un lo rupatrón, colu'rika' catajin che u'anic ruchac. ⁴⁷ Ma pakatzij wi cambi'ij chiwe: Rupatrón cu'ana takanel che rire puwi ronoje rubitak re.

⁴⁸ »No'j we wa' wa jun aj chac cu'an ri na utz taj y cubi'ij c'u pa ranima': "Ri nupatrón c'amaja' catzelej lok" ⁴⁹ y cujek c'u quebuch'ay ri rach aj chaquib; yey ec'u rire xew cawa'ic y cak'abar cuc' k'aba'relab, ¿sa' c'u ri' ri cuc'ulumaj? ⁵⁰ Cac'un lo ri' rupatrón chupa ri k'ij y ri ora echiri' wa' wa aj chac na roye'em taj. ⁵¹ Cuk'at c'u tzij ri' puwi ri raj chac y lic cuya pa c'ax junam cuc' ri xa queb quipalaj, chiri' c'u ri' cok' wi y cakich'ich' wi ruwi re'.

25

Ri c'ambal na'oj paquiwi lajuj k'apoj alito

¹ »Ri cu'ana pa rutakanic ri Dios petinak chila' chicaj, e jela' pacha' ri xquic'ulumaj lajuj k'apoj alito echiri' xquic'am bi ri quicandil y xebec pa jun c'ulaniquil re que'quic'ulu rala cac'uli'ic. ² E c'o c'u wo'ob chique lic c'o quina'oj y ri wo'ob chic na jinta quina'oj.

³ »Ri wo'ob na jinta quina'oj xquic'am bi ri quicandil, pero na xquic'am tubi aceite re caquinojisaj tanchic.* ⁴ Ec'u ri c'o quina'oj quinojisam bi ri quicandil che aceite,

** **24:32** "Ruk'ijol echiri' cabucbutic y na jinta jab": Quil "verano" pa vocabulario. * **25:3** E rojertan e aceite 'anom ruc' ruwach ri che' re olivo ri cacoj chupa ri candil cha' cawon ri mecha.

yey pa rewi cuc'a'am aceite pa jun chic c'olibal.

⁵ Ec'u rala cac'uli'ic xmayin che ri roponic. Ruma c'u ri', ralito xquijeko queyuxc'a'tic y xoc lo quiwaram.

⁶ »Pa tiq'uul ak'ab c'ut, xtataj jun casiq'uunic, jewa' cubi'ij: «¡Rala xc'unic! ¡Chixela lo che uc'ulic!»

⁷ Conoje c'u ri k'apoj alito xeyactajic y xquijek uyijbaxic ri quicandil.

⁸ »Ec'u ri wo'ob alito na junta quina'oj jewa' xquibi'ij chique ri lic c'o quina'oj: «Chiya'a jubik' kaceite che ri c'o iwuc' ri'ix, ma ri kacandil ri'oj catajin uchupic.»

⁹ »No'j ri wo'ob chic jewa' xquic'ul uwach: «We cakaya iwe ri'ix, na cu'an ta ri' ke konoje. Ji'tzucuj c'u iwe'ix pa cac'ayix wi y chilok'o'.»

¹⁰ »Ec'uchiri' ebelinak bi ri wo'ob che ulok'ic aceite, xc'un lo rala. Ralito c'o quina'oj, ri quiyijbam chi pan ri quicandil, xeboc junam ruc' rala pa c'ulaniquil y xtz'apix c'u lo ri puerta.

¹¹ »Tec'uchiri', xetzelej lo ri wo'ob alito y xech'aw apanok: «Kajawal, kajawal, jaka lo la ri puerta chike.»

¹² »Ec'u rala cac'uli'ic xuc'ul lo uwach: «Pakatzij wi cambi'ij chiwe: Na weta'am ta c'ana iwach.»

¹³ »Mawar c'u iwach ri' ri'ix, ma na iweta'am tane ruk'ijol y ru'orayil echiri' cac'un lo Ralaxel Chiquixo'l Ticawex.

Ri c'ambal na'oj puwi tak ri uya'om ri Dios pakak'ab

¹⁴ »Ri cu'ana pa rutakanic ri Dios petinak chila' chicaj, e pacha' ri xu'an jun achi echiri' xe'ec pa jun luwar lic naj; xebusiq'uij c'u ri raj chaquib y xuya can rupuak paquik'ab. ¹⁵ Che jun xuya can wo'ob mil, che jun chic xuya can ca'ib mil y che jun chic xuya can mil. Wa xya' can chique e chirij ri caquich'ij uchacuxic. Ec'uchiri', xe'ec naj.

¹⁶ »Ec'u raj chac xc'amaw can ri wo'ob mil, xu'an uc'ay ruc' y jela' xuch'ac chi wo'ob mil puwi'.

¹⁷ Jec'ula' xu'an ri xc'amaw can queb mil, xuch'ac chi queb mil puwi'.

¹⁸ No'j ri xc'amaw can jun mil, xuc'ot

jun jul y chupa wa' xrewaj ri puak ya'tal puk'ab ruma ri rajaw.

¹⁹ »Ic'owinak chi c'u uq'uiyal k'ij, xtzelej tanchi lo ri cajaw raj chaquib y xutz'onoj c'u chique sa' ri xqui'an ruc' rupuak. ²⁰ Nabe xopon ri raj chac ri uc'amom can wo'ob mil. Xuya c'u che ri rajaw ri wo'ob mil chic xuch'ac puwi ri ya'om can che y jewa' xubi'ij: «Wajaw, ri' ri wo'ob mil xya can la chwe y ri' chi wo'ob mil, wa' e xinch'ac puwi ri xya can la chwe» xcha'.

²¹ »Ri rajaw xubi'ij c'u che: «Utz ri', ri'at at utzilaj waj chac y lic at jusuc'; ma jusuc' xachacuj ri xa jubik' ya'tal can pak'ab. E uwari'che wo'ora lic q'ui ri canya pak'ab. Chatocok y chatqui'cota wuc'» xcha'.

²² »Tec'uchiri', xopon raj chac ri uc'amom can ca'ib mil y xubi'ij che: «Wajawal, ri' ri ca'ib mil xya can la chwe y ri' chi ca'ib mil canya che'la, wa' e xinch'ac puwi ri xya can la chwe» xcha'.

²³ »Ri rajaw xubi'ij c'u che: «Utz ri', at utzilaj waj chac y lic at jusuc'; ma jusuc' xachacuj ri xa jubik' ya'tal can pak'ab. E uwari'che wo'ora lic q'ui ri canya pak'ab. Chatocok y lic chatqui'cota wuc'» xcha'.

²⁴ »Ec'uchiri', xopon ri jun chic aj chac ri ya'om can xa jun mil che, y jewa' xubi'ij che ri rajaw: «Wajaw, ri'in weta'am lal jun achi lic titz'itic, ma ca'an la molonic pa na awaninak ta wi la yey camolon ne la pa na junta jopopem wi la. ²⁵ E uwari'che ri'in lic xinxi'ij wib. Xin'ec c'ut y xinmuk ri puak la pulew. Ri' ri mil ya'om can la chwe, ma e la» xcha'.

²⁶ »Ri rajaw xubi'ij che: «At jun waj chac lic na utz taj y at xepu. We xach'obo can'an molonic pa na in awaninak ta wi yey canmol pa na junta nujopopem wi, ²⁷ xa'ya'a ta c'u ri' ri nupuak pa juna banco cha' echiri' quintzelej lok, canc'ul ri nupuak junam ruc' ruch'acom chic» xcha'.

²⁸ »Tec'uchiri', xubi'ij chique jujun chic raj chac e c'o chiri': «Chimaja che

wa jun aj chac ri mil c'o ruc' y chiya'a che ri c'o lajuj mil ruc'. ²⁹ Ma china ri lic q'ui c'o ruc', caya'i' más che y jela' cac'o'ji' ne uwi' ri c'o ruc'. No'j ri na jinta c'o ruc', camaj ne che ri xa jubik' c'o ruc'. ³⁰ Ec'u wa' wa jun aj chac na jinta uchac, ji'c'aka bi pa ri k'eku'm; chiri' c'u ri' cok' wi y cakich'ich' wi ruwi' re" xcha'.

Ri k'atbal tzij paquiwi tak ri tinamit

³¹ »Echiri' Ralaxel Chiquixo'l Ticawex cac'un ruc' runimal uchuk'ab cuc' conoje ri santowilaj ángeles, catz'uyi' na c'u ri' chupa ri chomilaj tz'ulibal re rutakanic. ³² Conoje tak c'u ri tinamit che ruwachulew caquimol quib chwach y Rire cujach quipa chiquijujunal, jela' pacha' cu'an juna chajinel queberesaj ri bexex chiquixo'l ri caprux. ³³ Quebuya c'u ri bexex puwiquik'ab Rire yey ri caprux quebuya pumox.

³⁴ »Ec'uchiri', ri rey cubi'ij chique ri e c'o puwiquik'ab Rire: «¡Chixpetok! ¡Lic nim ik'ij iwalaxic ri'ix! Chixoc c'u chupa rutakanic ri Dios y chic'ulu janipa ri uyijbam chi pan chiwe chwi lo ri jekebal re ruwachulew. ³⁵ Ma xinc'o'ji' pa numic y ri'ix xiya nuwa; xinc'o'ji' pa tzajin chi' y ri'ix xiya numik'ina'; xintzucuj pa quincanaj can wi y ri'ix xinic'ul pa iwocho. ³⁶ Na jinta co nuk'u' y ri'ix xiya nuk'u'; xinc'o'ji' pa yabil y xixe'bina wuc'; xinc'o'ji' pa cárcel y xini'wila" xcha'.

³⁷ »Ec'u ri e jusuc' echiri' caquita wa', jewa' caquibi'ij: «Kajawal, ¿jampala' xkil la lal c'o la pa numic y xkaya wa la? ¿Jampala' xkil la lal c'o la pa tzajin chi' y xkaya mik'ina' la? ³⁸ ¿Jampala' xkil la catzucuj la pa cacana' can wi la y xkac'ul la pa kocho? ¿Jampala' xkil la na jinta k'u' la y xkaya k'u' la? ³⁹ ¿Jampala' xkil la lal yewa' o c'o la pa cárcel yey xe'kila la?» quecha'.

⁴⁰ »Y ri rey cuc'ul uwach chique: «Pakatzij wi cambi'ij chiwe: Ronoje c'u ri xi'an chique wa watz-nuchak'

na jinta co quiwach, chwe ri'in xi'an wi" xcha'.

⁴¹ »Ec'uchiri', cubi'ij ri rey chique ri e c'o pumox: «Ri'ix itzel iwachlibal, chixela wuc'; quix'ec c'u chupa ri ak' na cachup ta chic, ri yijbital chi pan che ritzel winak cuc' conoje ru ángeles eteran chirij. ⁴² Ma ri'in xinc'o'ji' pa numic yey ri'ix na xiya ta nuwa; xinc'o'ji' pa tzajin chi', yey ri'ix na xiya ta numik'ina'. ⁴³ Xintzucuj pa quincanaj can wi, yey ri'ix na xinic'ul ta pa iwocho. Na jinta co nuk'u', yey ri'ix na xiya ta nuk'u'. Xinc'o'ji' pa yabil y xinc'o'ji' pa cárcel, yey ri'ix na xini'wila taj" xcha'.

⁴⁴ »Ec'uchiri', caquibi'ij rique che: «Kajawal, ¿jampala' xkil la canum la yey catzajin chi' la? ¿Jampala' xkil la catzucuj la pa cacana' can wi la? ¿Jampala' xkil la na jinta k'u' la? ¿Jampala' xkil la lal yewa' o c'o la pa cárcel, yey ri'oj na xkanimaj ta la?» quecha'.

⁴⁵ »Ri rey cuc'ul c'u uwach chique: «Pakatzij wi cambi'ij chiwe: Ronoje ri na xi'an ta chique wa watz-nuchak' na jinta co quiwach, chwe ri'in na xi'an ta wi" xcha'.

⁴⁶ »Conoje c'u ri' wa' quebec pa ri c'axc'obic na jinta utakexic, no'j ri e jusuc' quebec pa ri c'aslemal na jinta utakexic» xcha ri Jesús.

26

Ri e aj wach re ri tinamit caquich'a'tibej su'anic caquichap ri Jesús

(Mr. 14:1-2; Lc. 22:1-2; Jn. 11:45-53)

¹ Echiri' ri Jesús xuq'uis ubi'ixiquil ronoje wa', jewa' xubi'ij chique ruti'jo'n: ² «Ri'ix iweta'am pa queb k'ij cac'un lo ri nimak'ij Pascua; chupa c'u ri' wa nimak'ij, Ralaxel Chiquixo'l Ticawex caya' pa camic chwa cruz» xcha'.

³ Ec'u ri nimak e aj chacunel pa Rocho Dios cuc' raj c'utunel re ri tzijpaxab y ri nimak winak e aj wach re ri tinamit, xquimol quib che ruwa ja re ri palacio re ri Caifás, ri cajawal raj chacunel pa Rocho Dios. ⁴ Chiri'

xquich'a'tibej chiquiwach su'anic caquichap ri Jesús ruc' socoso'nic re caquicamisaj. ⁵ Xquibi'ij c'u chiquiwach: «Na caka'an ta pa ri nimak'ij cha' ri tinamit na quetucuc ta ruma wa'» xecha'.

Jun ixok cuk'ej cunabal qui' ruxlab chu'jolom ri Jesús

(Mr. 14:3-9; Jn. 12:1-8)

⁶ Ri Jesús c'o pa ri tinamit Betania chirocho ri Simón, ri jun xc'oji' ri yabil lepra che. ⁷ Xc'un c'u jun ixok ruc'a'am jun c'olibal nojinak che cunabal lic qui' ruxlab y lic q'ui rajil. Xkib c'u ruc' ri Jesús y xuk'ej ri cunabal chu'jolom echiri' Rire tz'ul chwa ri mexa.

⁸ Echiri' xquil wa' rutijo'n, lic xpe coyowal che y jewa' xquibi'ij chiquiwach:

—¿Su'chac wa cunabal xtz'ilo'xic?

⁹ Ma ri lic usuc' e ta xc'ayix wa' chi uq'uoyal puak, y ruc' c'u ri' queto' ri niba'ib —xecha'.

¹⁰ Ec'u ri Jesús reta'am sa' ri caquibi'ij chiquiwach; ruma c'u ri', jewa' xubi'ij chique:

—¿Su'chac quixch'a't chirij ri xu'an wi'xok? Ma ri xu'an chwe e jun utzilaj chac. ¹¹ Ri niba'ib e la' xaki e c'o iwuc'; no'j ri'in na xaki ta in c'o iwuc'. ¹² Yey wa xu'an wi'xok echiri' xuk'ej wa cunabal panuwi', wa' re uyijbaxic pan ri nucuero re ri mukubal we.* ¹³ Pakatzij wi cambi'ij chiwe: Pa tak catzijox wi wa Utzilaj Tzij che ronoje ruwachulew, cacux-tax c'u wi'xok ruma ri xu'ano —xcha'.

Ri Judas cuc'ayij ri Jesús

(Mr. 14:10-11; Lc. 22:3-6)

¹⁴ Jun c'u chique ri cablajuj utijo'n ri Jesús, Judas aj Iscariot rubi', xe'ec cuc' ri nimak e aj chacunel pa Rocho Dios ¹⁵ y jewa' xubi'ij chique:

—¿Sa' ri caya alak chwe we canya ri Jesús pak'ab alak? —xcha'. Ec'u rique xquibi'ij caquitoj treinta sakil puak re plata che.

¹⁶ Chwi c'u ri', ri Judas xujek utzucucic su'anic cuya ri Jesús paquik'ab.

Ri Jesús cutij ri cena re Pascua cuc' ri cablajuj utijo'n

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Chupa c'u ri nabe k'ij re ri nimak'ij echiri' catij ri pam na junta levadura che, rutijo'n ri Jesús xekib ruc' y xquitz'onoj che:

—¿Pa ca'aj wi la que'kayijba' wi ri cena re ri nimak'ij Pascua? —xecha'.

¹⁸ Ri Jesús xubi'ij c'u chique:

—Jix pa ri tinamit y chila' qui'rika jun achi; chibi'ij c'u che: “Ri tijonel ke'oj jewa' cubi'ij: Ri nuk'ijol ri'in xa nakaj chi c'o wulok, y chupa ri ocho la can'an wi ri nimak'ij Pascua junam cuc' ri nutijo'n” —xcha'.

¹⁹ Rutijo'n ri Jesús e xqui'ano jela' pacha' ri xebutak Rire che, xe'quiyijba' c'u ri cena re ri nimak'ij Pascua.

²⁰ Echiri' xoc rak'ab, ri Jesús xoc chwa ri mexa junam cuc' ri cablajuj utijo'n. ²¹ Ec'uchiri' quewa'ic, ri Jesús xubi'ij chique:

—Pakatzij wi cambi'ij chiwe: C'o jun chiwe ri'ix cac'ayin we —xcha'.

²² Ec'uchiri', rutijo'n lic xebuchap bis y xquijek chiquijunal caquitz'onoj che:

—Kajawal, ¿c'axtaj in ri'? —quecha'.

²³ Ri Jesús xuc'ul uwach:

—E ri cumu' lo rupam junam wuc' chupa ri lak, e ri' ri cac'ayin we ri'in. ²⁴ Pakatzij wi Ralaxel Chiquixo'l Ticawex e catajin che ric'owibexic janipa ri tz'ibital can puwi Rire chupa Ruch'a'tem ri Dios. Pero ¡lic tok'o' uwach rachi cac'ayin re! E ne más utz che wa'chi tamaji xalaxic —xcha'.

²⁵ Ec'uchiri', xch'aw ri Judas, ri jun cuc'ayij ri Jesús, jewa' xubi'ij:

—Wajawal, ¿c'axtaj in ri'? —xcha'.

Ri Jesús xuc'ul uwach:

—Are'; at xatbi'n re —xcha'.

²⁶ Xalok' c'u ri' quewa'ic, ri Jesús xuc'am ri pam y xutioxij che ri Dios. Tec'uchiri' xuwech'o, xujach chique rutijo'n y jec'uwa' xubi'ij:

* 26:12 Echiri' cacam junok, raj judi'ab cacatinisaj ri cuerpo y caquicoj cunabal qui' ruxlab che.

—Chic'ama' y chitija', ma e nu-cuerpo wa' —xcha'.

²⁷ Tec'uchiri' xuc'am ri c'olibal c'o vino chupa, xutioxij che ri Dios, xuya chique y jec'uwa' xubi'ij:

—Chitija iwonoje chuchi' wa' wa c'olibal c'o vino chupa, ²⁸ ma e nuquiq'uel wa', ri caturuw na cuma uq'uiyal ticawex re cuybal quimac, yey e cujiquiba' uwach ri c'ac' tzij.✱
²⁹ Y cambi'ij c'u chiwe: Chwi wo'ora na cantij ta chi ruwa'al uva c'ate qui'ntija tanchi junam iwuc' chupa ruk'ijol rutakanic ri Nukaw —xcha'.

Ri Jesús cuk'alajisaj ri cu'an ri Pedro echiri' carewaj we reta'am uwach (Mr. 14:26-31; Lc. 22:31-34; Jn. 13:36-38)

³⁰ Echiri' xquiq'uis ubixoxic ri bix,† xebec chwa ri juyub Olivos.

³¹ Ec'uchiri', ri Jesús xubi'ij chique:

—Wak'ab iwonoje ri'ix quiwesaj na iwib chwij, ma e pacha' cubi'ij Ruch'a'tem ri Dios:

Cancamisaj raj chajinel

y tak rubexex caquiquich bi quib *Zac.*

13:7

cache'.

³² No'j echiri' quinc'astaj lo chiquixo'l ri ecaminak, quinnabej bi chiwach c'a Galilea —xcha'.

³³ Ec'u ri Pedro xuc'ul uwach:

—Tob ne conoje caquesaj quib chi'ij la, ri'in na can'an ta c'ana wa' —xcha'.

³⁴ Yey ri Jesús xuc'ul uwach:

—Pakatzij wi cambi'ij chawe: Wa jun ak'ab echiri' c'amaja' ne cabixon ri teren, ri'at oxlaj chic abi'im na aweta'am ta nuwach —xcha'.

³⁵ Xubi'ij c'u ri Pedro che:

—Tob ne chirajawaxic quincam junam uc' la, ri'in na canwewaj taj weta'am wach la —xcha'. Jec'ula' ri xquibi'ij conoje rutijo'n.

Ri Jesús cu'an orar pa ri werta Getsemani'

(Mr. 14:32-42; Lc. 22:39-46)

³⁶ Tec'uchiri', ri Jesús xebuc'am bi rutijo'n pa jun luwar Getsemaní rubi', y xubi'ij c'u chique:

—Chixtz'ula can wara, no'j ri'in qui'n'ana orar chile' apanok —xcha'.

³⁷ Yey xebuc'am c'u bi ri Pedro y ri queb uc'ajol ri Zebedeo ruc'. Y xujek c'u ri' lic cabisonic y lic cac'axc'ob ri ranima'. ³⁸ Ec'uchiri', xubi'ij chique:

—C'o jun unimal bis re camic chinuc'u'x. Chixc'ola can wara; mixwaric, e lic chi'ana orar wuc' —xcha'.

³⁹ Tec'uchiri', Rire xkib chi pan jubik' chwach, xuxucuba' rib y xukasaj umejelem c'a chu'lew, y xu'an c'u orar, jewa' xubi'ij:

«Lal Nukaw, 'ana co la ri' chincolobej co la cha' na quinic'ow ta chupa wa' wa c'axc'obic. No'j na e ta c'u chu'ana ri cuaj ri'in, ma e chu'ana janipa ri ca'aj Rilal» xcha'.

⁴⁰ Tec'uchiri', xtzelej lo pa e c'o wi can rutijo'n y xebo'lu'rika' quewaric. Xubi'ij c'u che ri Pedro:

—¿Lic cami na xich'ij ta c'ana ri waram cha' qui'an orar wuc', tob tane xa juna ora? ⁴¹ Mixwar c'ut y lic chi'ana orar cha' quich'ij uchuk'ab ri c'ambal ipa capetic. Pakatzij wi, lic cache' ic'u'x che u'anic ri utz, pero wa' lic c'ayew chiwe ma e ri iti'jil na jinta ucowil —xcha'.

⁴² Xe'ec tanchi chucalaj, xu'ana orar, jewa' xubi'ij:

«Lal Nukaw, we lic chirajawaxic quinic'ow na che wa c'axc'obic, e chu'ana c'u ri' janipa ri ca'aj Rilal» xcha'.

⁴³ Tec'uchiri', xtzelej tanchi lo cuc' rutijo'n y xebo'lu'rika' quewaric, ma ri quiwach lic na cucuy ta chi ri waram.

⁴⁴ Xebuya tanchi canok y xu'ana orar churox laj, yey e mismo ri xutz'onoj che ri Dios.

⁴⁵ Ec'uchiri', xe'ec tanchi pa e c'o wi can rutijo'n y xubi'ij chique:

—¿C'a quixwar cami ri' ri'ix? ¿C'a quixuxlanic? Ma e wa' xopon ru'orayil cha' Ralaxel Chiquixo'l

✱ **26:28** Jer. 31:31-34 † **26:30** Q'uisbal re ri cena re Pascua, ri e aj judi'ab caquibioxj ri Salmos 115-118.

Ticawex caya' paquik'ab raj maquib.
⁴⁶ ¿Chixwa'lijok! ¿Jo! Ma ri cac'ayin we
 ri'in e la' xc'unic —xcha'.

Cachap bi ri Jesús

(Mr. 14:43-50; Lc. 22:47-53; Jn.
 18:1-11)

⁴⁷ C'a cach'a't ne ri Jesús echiri'
 xc'un lo ri Judas, jun chique ri ca-
 blajuj utijo'n. Ec'u rire erachbilam
 lo uq'uiyal winak cuc'a'am lo es-
 pada y che'. Tak wa' etakom lo
 cuma ri nimak e aj chacunel pa Ro-
 cho Dios y cuma ri nimak winak
 re ri tinamit. ⁴⁸ Ec'u ri Judas, ri
 caya'w bi re paquik'ab, ubi'im chi lo
 chique su'anic caqueta'maj china ri
 caquichapo, jewa' ubi'im: «E ri jun
 cantz'ub uchi', e ri' rire. Chapa c'u bi
 alak.»

⁴⁹ Xkib c'u ri Judas ruc' ri Jesús y
 xuya rutzil uwach, xubi'ij che:

—Wajawal —xcha'. Y xutz'ub
 uchi'.

⁵⁰ Ec'u ri Jesús xubi'ij che:

—Wamigo, ¿sa' ri cola'ana'? —
 xcha'.

Tec'uchiri', xekib ri winak ruc'
 y xquichapo cha' caquic'am bi pa
 k'atbal tzij.

⁵¹ C'o c'u jun chique ri e c'o ruc' ri
 Jesús, xresaj lo ru espada y xujochij bi
 jun uxiquin ri raj chac ri cajawal raj
 chacunel pa Rocho Dios.

⁵² Ec'u ri Jesús xubi'ij che:

—Chac'olo ra espada chupa
 ruc'olibal; ma conoje ri quech'o'jin
 ruc' espada, ruc' espada quecamic.

⁵³ ¿Na aweta'am ta cami, we ta cuaj
 ri'in cantz'onoj che ri Nukaw wo'ora,
 Rire quebutak lo juna cablajuj le-
 giones† re ángeles wuc'? ⁵⁴ No'j we
 ta e xin'an ri', ¿su'anic c'u ri' cu'ana
 janipa ri cubi'ij Ruch'a'tem ri Dios
 panuwi ri'in? —xcha'. ⁵⁵ Ec'uchiri',
 xubi'ij chique ri soldados:

—¿Su'chac petinak alak ruc' espada
 y che'? ¿Petinak cami alak che uc'amic
 bi juna elek'om? Wa petinak lok
 ronoje k'ij wa' c'ut in tz'uyi'nak chi-
 wach alak, e la' quinc'utun pa ri Ro-
 cho Dios. ¿Su'chac c'u ri' c'a e la'

quino'lchapa alak? ⁵⁶ No'j jec'uwa'
 cu'ano cha' e cu'ana ri quik'alajisam
 can ri k'alajisanelab pa Ruch'a'tem ri
 Dios —xcha'.

Tec'uchiri', conoje rutijo'n xebani-
 majic y jela' xquiya can ri Jesús.

*Ri Jesús c'o chiquiwach raj k'atal
 tzije ajjudi'ab*

(Mr. 14:53-65; Lc. 22:54, 66-71; Jn.
 18:12-14, 19-24)

⁵⁷ Ri xechapaw bi ri Jesús xquic'am
 bi chwach ri Caifás, ri cajawal raj cha-
 cunel pa Rocho Dios, pa quimolom wi
 quib raj c'utunel re ri tziipixab y ri
 nimak winak re ri tinamit.

⁵⁸ Ec'u ri Pedro xa naj teran pan
 chirij ri Jesús, jela' xe'ela che ruwa
 ja re ri rocho ri cajawal raj chacunel
 pa Rocho Dios. Xoc c'u bi y xe'tz'ula
 cuc' ri e chajinel cha' carilo sa' ri
 cuq'uisbej ronoje wa'.

⁵⁹ Ri nimak e aj chacunel pa Ro-
 cho Dios cuc' tak ri nimak winak y
 conoje ri uchapom wi rib ri k'atbal
 tzij, caquitzucuj su'anic caquitz'ak
 uchi' ri Jesús cha' jela' utz cak'at
 tzij re camic puwi'. ⁶⁰ No'j na jinta
 c'o xquirik chirij, tob uq'uiyal winak
 xquinuc' rak'ubal chirij. Tec'uchiri',
 xebopon na ca'ib xe'quitz'aka uchi'
 ruc' rak'ubal, ⁶¹ jewa' xquibi'ij:

—Wa' wa'chi jewa' xubi'ij: “Ri'in
 c'o panuk'ab canwulij ri Rocho Dios
 y xa pa oxib k'ij canyac tanchic” —
 xecha'.

⁶² Ewi ri cajawal raj chacunel pa
 Rocho Dios xyactajic y xubi'ij che ri
 Jesús:

—¿E cami la' na jinta c'ana cabi'ij
 ri'at? ¿Sa' c'u ri cac'ulubej uwach
 puwi wa quetajin che ucojic chawij?
 —xcha'.

⁶³ No'j ri Jesús na jinta c'o xubi'ij.
 Ec'uchiri', jewa' xubi'ij ri cajawal raj
 chacunel pa Rocho Dios:

—Chabi'ij chupa rubi' ri Dios
 c'aslic, we ri'at at ri Cristo, Ruc'ajol
 ri Dios —xcha'.

⁶⁴ Ri Jesús xubi'ij che:

—Are', e ri xbi'ij la. Y cambi'ij
 c'u che onoje alak: Quil na c'u alak

† 26:53 Jun legión e c'o wakib mil soldados che.

Ralaxel Chiquixo'l Ticawex tz'ul puwiquik'ab ri Dios, ri lic c'o unimal uchuk'ab yey quil c'u alak ri' echiri' cac'un lo pa sutz' chwa ri caj* — xcha'.

⁶⁵ Ec'u ri cajawal raj chacunel pa Rocho Dios xurich'ij ruk'u' y xubi'ij:

—Wa' wa'chi lic xmacun chirij ri Dios ruc' wa xubi'ij. ¡Na jinta chi uchac más e aj cojol umac! Ma lic e la' xta alak xubi'ij ri na takal ta che.

⁶⁶ ¿Sa' c'u ri' cabi'ij ralak che? —xcha'.

Rique xquibi'ij:

—Lic chirij umac y takal c'u che cacamisaxic —xecha'.

⁶⁷ Ewi e c'o jujun xquijek caquichubaj rupalaj y lic caqui'an pa t'o'y. E c'o jujun chic xquipach' k'ab chupalaj ⁶⁸ y caquibi'ij che:

—At ri Cristo, Rucha'o'n lo ri Dios, ¡chana'ij pe c'u ri' china xch'ayaw awe! —quecha che.

Ri Pedro cubi'ij na reta'am ta uwach ri Jesús

(Mr. 14:66-72; Lc. 22:55-62; Jn. 18:15-18, 25-27)

⁶⁹ Ec'u ri Pedro tz'ul che ruwa ja echiri' jun ali aj chac xkib ruc' y xubi'ij che:

—Rilal lal jun chique ri eteran chirij ri Jesús, ri jun aj Galilea —xcha'.

⁷⁰ No'j ri Pedro xrewaj chiquiwach conoje, jewa' xubi'ij:

—Ri'in na weta'am tane sa' puwi' catch'a't wi —xcha'.

⁷¹ Ec'u ri' quel bi ri Pedro chuchi' ri puerta yey xilitaj ruma jun chic ali aj chac, y wa'li jewa' xubi'ij chique ri e c'o chiri':

—Wa' wa jun achi e jun chique ri eteran chirij ri Jesús ri aj Nazaret —xcha'.

⁷² Ri Pedro xrewaj tanchic y lic xujiquiba' uwach ubi'ixiquil:

—Ri'in na weta'am ta c'ana uwach la' la'chi —xcha'.

⁷³ Jok'otaj c'u ri', ri e c'o chiri' xekib ruc' ri Pedro y xquibi'ij che:

—Pakatzij wi rilal lal jun chique rutijo'n; ma lic k'alaj, ri cach'a't la

e junam ruc' ri quech'a't rique — xecha'.

⁷⁴ Ec'u ri Pedro xujek ubi'ixiquil itzel tak tzij y lic xujiquiba' uwach, xubi'ij:

—Ri'in na weta'am ta c'ana uwach la' la'chi —xcha'.

Xew xuq'uis ubi'ixiquil wa', xbixon lo ri teren. ⁷⁵ Ec'uchiri', xc'un lo chuc'u'x ri Pedro ri xbi'x lo che ruma ri Jesús: «C'amaja' ne cabixon ri teren, ri'at oxlaj chic abi'im na aweta'am ta nuwach.» Ewi xel bi ri Pedro chiri' y lic xok'ic ruma ruc'axc'olil uc'u'x.

27

Ri Jesús caya'i' chwach ri takanel Pilato

(Mr. 15:1; Lc. 23:1-5; Jn. 18:28-40)

¹ Echiri' xsakiric, conoje ri nimak e aj chacunel pa Rocho Dios cuc' ri nimak winak re ri tinamit, xqui'an tzij chiquiwach puwi ri caqui'ano cha' cak'at tzij re camic puwi ri Jesús.

² Yutum c'u ri Jesús, xquic'am bi y xe'quiya'a chwach ri takanel Poncio Pilato.

Ri Judas cucamisaj rib

³ Ri Judas ri xc'ayin re ri Jesús, echiri' xrilo xk'at tzij re camic puwi ri Jesús, lic xoc chuc'u'x ri xu'ano. Xe'ec c'ut y xutzelej ri treinta sakil puak chique ri nimak e aj chacunel pa Rocho Dios y chique ri nimak winak.

⁴ Xubi'ij c'u chique:

—Ri'in lic in macuninac, ma xinc'ayij pa camic jun achi na jinta umac —xcha'.

Pero rique xquibi'ij che:

—Na jinta ke ri'oj che la'; la' amac ri'at —xecha'.

⁵ Ec'uchiri', ri Judas xu'c'aka can ri puak pa ri Rocho Dios y xe'ec c'ut xu'jitz'aj rib.

⁶ Ri nimak e aj chacunel pa ri Rocho Dios xe'quimolo ri puak y xquibi'ij: «Wa' wa puak na ube ta q'uenok cakaya pa ri caxa re kasa'n, ma wa rajil uquiq'uel jun achi» xecha'.

⁷ Tec'uchiri', xqui'an tzij chiquiwach cha' ruc' wa' wa puak caquilok'

* 26:64 Dn. 7:13; Ap. 1:7

juch'akap ulew rubi' "Luwar re ri aj tz'akal xok'o'l", cha' cu'ana jun luwar re mukubal que ri na e ta aj Israel. ⁸ Ruma c'u la', la jun ulew c'a e ubi' wak'ij ora "Luwar re quic'". ⁹ Ec'u xu'an pacha' ri tz'ibital can ruma ri k'alajisanel Jeremías pa Ruch'a'tem ri Dios, pa cubi'ij wi:

Xquic'am c'u ri treinta sakil puak, ma e rajil ri' cojotal cuma raj Israel.

¹⁰ Y ruc' c'u wa puak, xquiloc' ri jun luwar rubi' "Luwar re ri aj tz'akal xok'o'l", jela' pacha' ri ubi'im lo ri Dios chwe. *Zac. 11:12-13; Jer. 19:1-2; 32:6-9*

Catz'ak uchi' ri Jesús chwach ri takanel Pilato

(Mr. 15:2-5; Jn. 18:33-40)

¹¹ Ec'uchiri' xc'am bi ri Jesús chwach ri takanel Pilato, rire xutz'onoj che ri Jesús:

—¿Lal cami ri' ri rey que raj judi'ab? —xcha'.

Ri Jesús xubi'ij che:

—Lal cabi'n la re —xcha'.

¹² Yey echiri' ri nimak e aj chacunel pa Rocho Dios cuc' ri nimak winak re Israel xquitz'ak uchi' ri Jesús, Rire na xuc'ul ta c'ana uwach ri caquibi'ij rique.

¹³ Ruma c'u ri', ri Pilato xutz'onoj che ri Jesús:

—¿Na cata ta cami la janipa ri caquibi'ij chi'ij la? —xcha'.

¹⁴ Pero ri Jesús na xuc'ul ta c'ana uwach; ruma c'u ri', ri takanel lic xcam ranima' che.

Cak'at tzij re camic puwi ri Jesús

(Mr. 15:6-20; Lc. 23:13-25; Jn. 19:1-16)

¹⁵ Chupa c'u ri nimak'ij Pascua, ri takanel romano xex cu'an wi cuyolopij bi jun chique ri e c'o pa cárcel, yey e ri winak quecha'wic china ri caj cayolopix bi. ¹⁶ C'o c'u jun achi pa cárcel lic eta'matal uwach, Barrabás rubi'.

¹⁷ Ec'uchiri' ri winak quimolom chi quib, ri Pilato xutz'onoj chique:

—¿China ri quiwaj ri'ix canyolopij bi, e ri Barrabás o e ri Jesús, ri cabi'x che "e ri Cristo", Rucha'o'n lo ri Dios? —xcha'. ¹⁸ Xutz'onoj c'u wa' ma reta'am e c'o jujun c'ax quic'u'x chirij ri Jesús, y xa ruma c'u ri' quiya'om ri Jesús chwach.

¹⁹ Ec'uchiri' tz'ul ri Pilato pa ri k'atbal tzij, ri rixokil xutak ubi'xiquil che: «Mac'o ma'an la che wa jun achi jusuc' ubinic usilabic, ma wak'ij lic cabison nuc'u'x ruma xin'an jun wachic' puwi rire yey lic xibibal uwach ri xinwachic'aj» xcha'.

²⁰ No'j ri nimak e aj chacunel pa Rocho Dios cuc' tak ri nimak winak re Israel xquicoj pa quijolom ri uq'uiyal winak cha' e caquitz'onoj cayolopix bi ri Barrabás yey e cacamisax ri Jesús.

²¹ Ri takanel xch'a't tanchi cuc' ri winak, jewa' xutz'onoj chique:

—¿China chique wa ca'ib quiwaj canyolopij bi? —xcha'.

Rique xquibi'ij:

—E yolopij bi la ri Barrabás —xecha'.

²² Tec'uchiri', xutz'onoj ri Pilato chique:

—¿Yey sa' c'u ri' can'an che ri Jesús, ri cabi'x che "e ri Cristo", Rucha'o'n lo ri Dios? —xcha'.

Conoje xquic'ul uwach:

—¿Camisax chwa cruz! —xecha'.

²³ Ec'u ri' ri Pilato xubi'ij chique:

—¿Sa' c'u rumac u'anom? —xcha'.

Pero ri winak más co xesiq'uinic:

—¿Camisax chwa cruz! —xecha'.

²⁴ Ri Pilato xrilo na junta cutikoj cu'an más tz'onobal chique ma más ne quetucuc ri winak; ruma c'u ri', xutak uc'amic ya' y ec'u la' chiquiwach ri winak xuch'aj ruk'ab, y jewa' xubi'ij:

—Na junta c'u numac ri'in che rucamic wa'chi jusuc' rubinic, ma wa' imac ri'ix —xcha'.

²⁵ Conoje c'u ri winak xquic'ul uwach, jewa' xquibi'ij:

—Ri'oj cuc' ri kalc'o'al cakaya kib chuxe' rucamic rire —xecha'.

²⁶ Ewi ri Pilato xuyolopij bi ri Barrabás. Tec'uchiri', xtakan che caji' upa ri Jesús y xuya paquik'ab ri soldados cha' caquicamisaj chwa cruz.

²⁷ Ec'uchiri', ri soldados re ri takanel xquic'am bi ri Jesús pa ri palacio y xquimol c'u quichi' conoje ri soldados cha' caquisut rij. ²⁸ Xquesaj c'u bi ruk'u' y xquirip jun manta chirij yey wa' cakcoj catzu'nic. ²⁹ Che rujolom xquicoj jun corona pach'um ruc' q'uix y xquiya jucutaj tani pa ruk'ab uwiquik'ab. Tec'uchiri', xexuqui' chwach y xquijek uch'amixic, jewa' caquibi'ij che:

—¡Nim uk'ij ri rey que raj judi'ab! —quecha'.

³⁰ Yey xquichubaj rupalaj, xquimaj c'u ri jucutaj tani puk'ab y ruc' la' xquich'ay rujolom. ³¹ Echiri' xquitanaba' uch'amixic, xquesaj ri manta quiripom chirij y xquicoj tanchi ruk'u'. Tec'uchiri', xquic'am bi re que'quicamisaj chwa cruz.

Rucamic ri Jesús chwa ri cruz

(Mr. 15:21-41; Lc. 23:26-49; Jn. 19:17-30)

³² Echiri' catajin quelic bi, xquic'ul jun achi aj Cirene, Simón rubi', y xquitak che cutelej bi ri cruz re ri Jesús. ³³ Ec'uchiri', xebopon pa ri luwar Gólgota rubi', wa' que'elawi “luwar re ubakil ujolom anima”. ³⁴ Xquiya c'u che ri Jesús vinagre yijbam ruc' ak'es lic c'a; pero Rire echiri' xuna' wa', na xraj taj xutijo.

³⁵ Echiri' quiya'om chi ri Jesús chwa ri cruz, ri soldados ruc' jun sorteo xquijach quib puwi ruk'u'. Jec'ula' e xu'ana pacha' rubi'im lo ri k'alajisanel chupa Ruch'a'tem ri Dios:

Xquijach quib puwi ri nuk'u',

ma xqui'an sorteo ruc'. *Sal. 22:18*

³⁶ Tec'uchiri', xetz'uyi' chirij cha' caquichajij ri Jesús.

³⁷ Chwi c'u lo rucruz ri Jesús tz'ibitalic su'be xk'at tzij puwi', jewa'

cubi'ij: «E JESÚS WA', RI REY QUE RAJ JUDI'AB.»

³⁸ Xequiya c'u ca'ib elek'omab chwa cruz, jun puwiquik'ab y jun pumox ri Jesús.

³⁹ Ec'u ri winak quebic'ow chirij caquiyok' canok, caquiyiriya' ri quijolom che, ⁴⁰ y jewa' caquibi'ij:

—At pe' ri abi'im cawulij ri Rocho Dios y xa pa oxib k'ij cayac tanchic; chacolobej c'u awib ri'. We pakatzij wi at Uc'ajol ri Dios, chatkaj lo chwa ri cruz —quecha'.

⁴¹ Jenela' ri' xqui'an ri nimak e aj chacunel pa Rocho Dios junam cuc' raj c'utunel re ri tzijpixab, ri fariseos y ri nimak winak re ri tinamit; lic xquich'amij, jewa' xquibi'ij:

⁴² —Lic wa' c'ut e q'ui ri xebucolobej che tak yabil y che camic, yey na curik ta wa' c'u ucolobexic rib rire. We ta pakatzij wi e Rey re ri katinamit Israel, kaja lo ri' utuquel chwa ri cruz cha' jela' cakacojo e rire ri Ucha'o'n lo ri Dios. ⁴³ Ma lic wa' c'ut xcubi' uc'u'x ruc' ri Dios. Yey we ta ri Dios lic c'ax cuna'o, chucolobej ri' wo'ora, ma rire ubi'im e Uc'ajol ri Dios —xecha'.

⁴⁴ Jenela' ri' xquibi'ij relek'omab eya'om chwa cruz pa tak utzal, lic xquich'amij.

⁴⁵ Echiri' xtic'oj ri k'ij, xoc k'eku'm che ruwachulew y wa' xu'q'uisa c'a che ri urox ora* benak k'ij.

⁴⁶ Chupa c'u la' la' ora, ri Jesús lic co xsiq'uinic, jewa' xubi'ij pa ri ch'a'tem cach'a't wi Rire:

—Elí, Elí, ¿lana sabactani? —xcha'. Wa' que'elawi: “Lal nu Dios, Lal nu Dios, ¿su'be xinok'otaj can la?”[☆]

⁴⁷ Jujun c'u chique ri e c'o chirij, echiri' xquita wa', xquibi'ij:

—Wa' wa'chi e cusiq'uij ri k'alajisanel Elías —xecha'.

⁴⁸ Y na jampatana, c'o jun chique rique lic canic xe'ec, xu'c'ama lo jun esponja y xumu' pa vinagre. Xuxim c'u chutza'm jun tani y xuya pan che ri Jesús re cutz'ubu.

* 27:45 “Ri urox ora”: Quil “hora” pa vocabulario. ☆ 27:46 Sal. 22:1

⁴⁹ Ec'u ri jujun chic xquibi'ij che:
—Maya che, kila pe' we cac'un ri
Elías re colu'colobej —xecha'.

⁵⁰ Tec'uchiri', ri Jesús lic co xsiq'uin
tanchic y xuk'atisaj c'u ri ranima'
puk'ab ri Dios, asu xcamic. ⁵¹ Ec'u la'
la jok'otaj ri telón† c'o chupa ri Rocho
Dios xrich'rob chunic'ajal; xujek lo
puwi' y xo'lq'uis c'a chuxe'. Rulew lic
xbarbatic y ri nimak tak abaj xejaka-
job upa. ⁵² Y xejakataj tak ri mukubal
yey uq'uiyal ticawex re rutinamit
ri Dios ecaminak chic, xec'astaj lok
⁵³ y xebel lo chupa tak ri mukubal.
Ec'uchiri' c'astajinak chubi ri Jesús,
rique xeboc pa ri santowilaj tina-
mit yey chila' xebilitaj cuma uq'uiyal
winak.

⁵⁴ Ec'u ri capitán y ri soldados
echajiyom re ri Jesús, echiri' xquil ri
cabrakan y ronoje tak ri xu'ano, lic
xquixi'ij quib y jewa' xquibi'ij:

—¡Pakatzij wi, wa' wa'chi e Uc'ajol ri
Dios! —xecha'.

⁵⁵ E c'o c'u uq'uiyal ixokib chiri'
caquitzutza' pana chinimanaj; wa' e
tak ri e petinak ruc' ri Jesús chwi
xel lo Galilea y lic quinimam lok.
⁵⁶ Chiquixo'l wa' wi'xokib c'o ri María
ri aj Magdala, c'o ri María ri quichu
ri Jacobo y ri José, yey c'o ri quichu ri
queb uc'ajol ri Zebedeo.

Ri Jesús camukic

(Mr. 15:42-47; Lc. 23:50-56; Jn. 19:38-42)

⁵⁷ C'o jun achi aj Arimatea, José
rubi'; rire beyom y e jun chique ru-
tijo'n ri Jesús. Benak k'ij rire ⁵⁸ xe'ec
c'u ruc' ri Pilato re cu'tz'onoj ru-
cuerpo ri Jesús. Ec'u ri Pilato xtakan
che caya'i' lo rucuerpo ri Jesús che
rire. ⁵⁹ Ri José xuc'am c'u bi rucuerpo
ri Jesús, xupis bi pa jun manta lic
sak ⁶⁰ y xu'ya'a pa jun mukubal re
rire, wa' c'ac' c'otom pa'baj. Xutak
c'u uquetebaxic can jun nimalaj abaj
chuchi' re tz'apibal re; tec'uchiri',
xe'ec. ⁶¹ E c'o c'u chiri' ri María ri

aj Magdala y ri jun chic María, etz'ul
chwach ri mukubal.

Quecoj e chajinel chwa ri mukubal

⁶² Ic'owinak chi c'u ri k'ij echiri'
raj judi'ab caquiyijba' pan janipa ri
cajawax chique pa ri k'ij re uxlanibal.
Ec'uchiri', ri nimak e aj chacunel pa
Rocho Dios cuc' ri fariseos xquimol
quib ruc' ri Pilato ⁶³ y xquibi'ij che:

—Kajawal, xc'un chikac'u'x, la'
la jun achi socoso'nel echiri' c'a
c'aslic jewa' xubi'ij: “Purox k'ij
quinc'astaj lo chiquixo'l ri ecami-
nak.” ⁶⁴ E uwari'che, taka la uchajixic
chi utz ri mukubal c'a che rurox
k'ij, cha' na quec'un ta rutijo'n
chak'ab, co'lquelak'aj bi rucuerpo y
tec'uchiri', caquibi'ij chique ri winak:
“Xc'astaj lo chiquixo'l ri ecaminak.”
We ec'u xu'an ri', cu'ana ne más
unimal rak'ubal ri' chwa ri nabe
u'anom lok echiri' xubi'ij e Rucha'o'n
lo ri Dios —xecha'.

⁶⁵ Ri Pilato xubi'ij chique:

—Chec'ama bi alak wa' wa' e
chajinel y je'tz'apij alak chi utz ri
mukubal —xcha'.

⁶⁶ Xebec c'ut, xe'quitz'apij uchi' ri
mukubal chi utz, xquicoj jun sello
puwi ri nimalaj abaj tz'apibal uchi' y
xequiya c'u can ri e chajinel chiri'.

28

Ruc'astajibal ri Jesús

(Mr. 16:1-8; Lc. 24:1-12; Jn. 20:1-10)

¹ Ic'owinak chi ri k'ij re uxlani-
bal, e ri' catajin usakiric ri nabe k'ij
che ri semana, ri María ri aj Mag-
dala y ri jun chic María xe'quila ri
mukubal. ² Xakic'ate't xpe jun ni-
malaj cabrakan, yey wa' e x'anaw jun
ángel re ri Dios xkaj lo chicaj. Echiri'
xopon chwach ri mukubal, xresaj
rabaj utz'apim uchi' ri mukubal y
xtz'uyi' c'u puwi'. ³ Ri ángel lic ca-
wolk'inic, catzu'n jela' pacha' ruxe'
caj echiri' cayoc' ca'nic; yey ruk'u' lic
sak pacha' ri nieve.* ⁴ Ri soldados
echiri' xquil ri ángel, lic xquixi'ij quib

† 27:51 “Telón”: E jun c'ul cuyach upa ri Luwar Santo ruc' ri Luwar lic Santo. Éx. 26:31-33; Heb. 6:19; 9:3-12 * 28:3 Ri nieve jela' rusakil pacha' catzu'n ri sakbach.

che; xquijek quebirbotic y xecanaj canok pacha' chi ecaminak.

⁵ Ec'uchiri', xubi'ij ri ángel chique rixokib:

—Mixi'ij iwib. Ma ri'in weta'am e quitzucuj ri Jesús, ri xcamisax chwa cruz. ⁶ Rire na jinta chi wara, ma c'astajinak chubi jela' pacha' rubi'im chi ulok. Cho'liwilape wa luwar pa xya'i' wi ri Kanimajawal. ⁷ Jix c'u ri'ix, lic chiwilij bi y ji'bi'ij chique rutijo'n: “Ri Jesús xc'astaj bi chiquixo'l ri ecaminak. Chiwilape', Rire que'ec Galilea, canabej bi chiwach; chila' c'u ri' qui'wila wi uwach.” Ec'u xo'lnubi'ij wa' chiwe —xcha'.

⁸ Echiri' rixokib xebel bi chuchi' ri mukubal, lic quixi'im quib pero c'o unimal qui'cotemal cuc'. Queban c'u ri' xebec cha' que'quibi'ij chique rutijo'n janipa ri xquilo y ri xbi'x bi chique. E c'o c'u chi be ⁹ echiri' ri Jesús xebuc'ulu y xuya rutzil quiwach. Ec'u rique xekib ruc' y xquixuc quib chwach; xquilak'apuj ri rakan y xquilok'nimaj uk'ij.

¹⁰ Ri Jesús xubi'ij c'u chique:

—Mixi'ij iwib. Jix, ji'bi'ij chique ri nu hermanos cha' quebec chila' Galilea y chiri' caquil wi nuwach —xcha'.

Rirak'ubal xqui'an ri e chajinel re ri mukubal

¹¹ Ec'uchiri' e c'o pan rixokib pa be, jujun chique ri e chajinel xebec pa ri tinamit y xe'quitzijoj chique ri nimak e aj chacunel pa Rocho Dios ronoje ri xquic'ulumaj. ¹² Ec'u ri nimak e aj chacunel pa Rocho Dios cuc' ri nimak winak re ri tinamit, xquich'a'bej quib cha' caqui'an tzij chiquiwach. Xquiya c'u uq'uiyal puak chique ri soldados ¹³ y xequitak che jewa' caquibi'ij: «Echiri' oquinak lo kawaram chak'ab, xec'un rutijo'n ri Jesús y xquelak'aj bi rucuerpo. ¹⁴ Yey we xreta'maj wa' ri takanel, ri'oj cakacoj pujolom cha' na jinta c'o cu'an chiwe» quecha'.

¹⁵ Ri soldados xquic'am c'u ri puak y e xqui'ano janipa ri xbi'x chique.

Ec'u raj judi'ab c'a e ubi'xiquil wa' caqui'an wak'ij ora.

Ri takanic xya' can ruma ri Jesús (Mr. 16:14-18; Lc. 24:36-49; Jn. 20:19-23)

¹⁶ E tak c'u ri junlajuj utijo'n xebec Galilea chwa ri jun juyub pa ubi'im wi ri Jesús chique. ¹⁷ Echiri' xquil uwach ri Jesús, lic xquilok'nimaj uk'ij, tob c'u e c'o jujun chique c'amaja' caquicojo we pakatzij wi ri Jesús xc'astaj lo chiquixo'l ri ecaminak.

¹⁸ Ec'uchiri', xkib ri Jesús cuc' y xubi'ij chique:

—Ri'in ya'tal lo panuk'ab ronoje ri takanic chila' chicaj y che ruwachulew. ¹⁹ Ruma c'u wa', jix cuc' conoje ruq'uiyal quiwach tak ri tinamit che ruwachulew, chi'ana c'u e nutijo'n chique y chiya'a ri bautismo chique pa rubi' ri Kakaw Dios, Ruc'ajol y ri Santowilaj Ruxlabixel. ²⁰ Chic'utu chiquiwach rique cha' e caqui'an ronoje janipa ri ixnutakom ri'in che. Lic chiweta'maj c'ut: Ri'in quinc'o'ji' iwuc' ronoje k'ij c'a che ri q'uisbal re ruwachulew —xcha'. Amén.

Ri Utzilaj Tzij re Jesucristo tz'ibital can ruma ri Marcos

Catzijon ri Juan Aj Ya'l Bautismo
(Mt. 3:1-12; Lc. 3:1-9, 15-17; Jn. 1:19-28)

¹ Wa' e jekebal re ri Utzilaj Tzij re ri Kanimajawal Jesucristo, Ruc'ajol ri Dios. ² E xu'ana pacha' ri tz'ibital can ruma ri k'alajisanel Isaías puwi ri ubi'im lo ri Dios: Ri'in cannabesaj bi chawach ri'at, ri waj chac aj tzijol we'in, cha' cuyijba' ri be chwach pan rawo-ponibal. *Mal. 3:1*

³ Catataj ukul jun tzijonel casiq'uin chupa ri luwar catz'intz'otic, jewa' cubi'ij: “Yijba' pana alak ri be re ri Kanimajawal; suc'upij alak rube Rire” *Is. 40:3* xcha'.

⁴ Ri Juan catajin che uya'ic ri bautismo pa jun luwar catz'intz'otic. E cubi'ij chique ri winak caquitzelej quitzij chwach ri Dios, caquic'ul ri bautismo, y jec'ula' cacuytaj ri quimac. ⁵ Ewi conoje ri ticawex e c'o pa tak ri luwar re Judea y conoje ri e c'o Jerusalem, xebel lo che utayic ri Juan. Caquitz'onoj c'u cuybal quimac chwach ri Dios, yey ri Juan cuya ri bautismo chique chupa ri nimaya' Jordán.

⁶ Ec'u ruk'u' ri Juan 'anom ruc' ris-mal camello, y rupas ximil che rupa e jun tz'u'um. Yey ri cutijo e ri sac' y uwa'al cab re upa tak juyub.

⁷ Jec'uwa' ri tzijonic cu'ano:

«C'o Jun catajin lo chwij más nim ruchuk'ab chinuwa ri'in, ma na takal tane chwe quinyuxi'ic re canquir ruwach ruxajab. ⁸ Pakatzij wi, ri'in xinya ri bautismo che alak ruc' ya'; no'j ri bautismo cuya Rire che alak, e

ruc' ri Santowilaj Ruxlabixel ri Dios» cacha'.

Ri bautismo re ri Jesús
(Mt. 3:13-17; Lc. 3:21-22)

⁹ Chupa tak c'u la' la k'ij, ri Jesús xel lo Nazaret, (wa' e jun tinamit re Galilea), y x'an c'u bautizar ruma ri Juan chupa ri nimaya' Jordán. ¹⁰ Na jampatana xel lo ri Jesús pa ri ya', xrilo echiri' xjakataj ruwa caj y ri Ruxlabixel ri Dios pacha' juna palomax xkaj lo puwi'. ¹¹ Y xch'aw lo Jun chila' chicaj, jewa' cubi'ij: «At ri'at Nuc'ajol y lic c'ax catinna'o. Lic quinquic'ot chawe» xcha che.

Ri c'ambal upa ri Jesús
(Mt. 4:1-11; Lc. 4:1-13)

¹² Tec'uchiri', ri Jesús xc'am bi ruma ri Ruxlabixel ri Dios pa jun luwar catz'intz'otic. ¹³ Ri Jesús xc'o'ji' chila' cuarenta k'ij chiquixo'l itzel tak awaj. Yey chupa tak la' la k'ij, lic xc'am upa ruma ri Satanás. Ic'owinak chi c'u wa', ri ángeles xquijek caquinimaj ri Jesús.

Ri Jesús cujek cac'utun chwi rutakanic ri Dios
(Mt. 4:12-17; Lc. 4:14-15)

¹⁴ Echiri' ya'om chi ri Juan pa cárcel, ri Jesús xe'ec Galilea che utzijoxic ri Utzilaj Tzij re rutakanic ri Dios, ¹⁵ jewa' cubi'ij:

«Xopon c'u ruk'ijol echiri' rutakanic ri Dios xa nakaj chi c'o lo wi; tzelej c'u tzij alak chwach ri Dios y cojo alak ri Utzilaj Tzij» cacha'.

Ri Jesús quebusiq'uij cajib e aj chapal car
(Mt. 4:18-22)

¹⁶ Echiri' cabin ri Jesús chuchi' ri mar re Galilea, xeril pan ri Simón ruc' ruchak' Andrés, e ri' caquic'ak ri qui atarraya chupa ri ya', ma rique e aj chapal car.

¹⁷ Ec'u ri Jesús xubi'ij chique: —Chixpetok, chixterej lo chwij y ri'in can'an chiwe ix aj molol

* **1:17** “Ix aj molol ticawex”: Ri chac xya' chique e quequitzucuj ticawex re quebu'an utijo'n ri Jesús. Lc. 5:10

ticawex* jela' pacha' i'anom lo chique ri car —xcha'.

¹⁸ Rique xquiya can ri qui atarraya y xeterej bi chirij.

¹⁹ Xbin c'u pan jubik' chic y xeril ri Jacobo ruc' ruchak' Juan, ri queb uc'ajol ri Zebedeo. Rique e c'o chupa jun barco y quetajin che uc'ojoxic ri qui atarraya. ²⁰ Ec'u ri Jesús xebusiq'uij; ruma c'u ri', rique xquiya can ri quikaw Zebedeo cuc' ri quimocom chupa ri barco y xeterej bi chirij.

Ri Jesús cucunaj jun achi c'o puk'ab jun itzelilaj uxlabixel

(Lc. 4:31-37)

²¹ Xeboc c'u pa ri tinamit Capernaúm. Y chupa ri k'ij re uxlanibal ri Jesús xoc pa ri sinagoga y xujek cac'utunic. ²² Y ri xetaw re lic xcam canima' che, ma ruma ruc'utunic cak'alajinic lic c'o uwach, na pacha' ta ri caqui'an raj c'utunel re ri tzi-jpixab.

²³ Chupa c'u ri sinagoga c'o jun achi c'o puk'ab jun itzelilaj uxlabixel. Wa' xujek casiq'uinic, jewa' xubi'ij:

²⁴ —Lal Jesús, aj Nazaret, ¿su'chac co'lmina ib la kuc'? ¿E la' lal petinak re co'lsacha la kawach? Ri'in weta'am lal chinok, lal ri Santo C'ajolaxel re ri Dios —xcha'.

²⁵ Ec'u ri Jesús xuk'atej ri itzel uxlabixel, jewa' xubi'ij che:

—¡Match'a't chic! Chatelubi che la'chi —xcha'.

²⁶ Ri itzelilaj uxlabixel xuc'ak la'chi pulew y lic co xujabaja'; yey casiq'uinic xel bi che la'chi.

²⁷ Conoje c'u ri ticawex lic xcam canima' che y caquitz'onobej tak chiquiwach:

«¿Sa' wa'? ¿Sa' chi c'ac' c'utunic wa'? Ma c'o ne puk'ab catakan paquiwi itzelilaj uxlabixel y wa' caquicoj utzij» quecha'. ²⁸ Y na jampatana, pa tak ronoje ri luwar re Galilea xe'ec utzijoxic janipa tak ri cu'an ri Jesús.

Ri Jesús cucunaj ruchu-ujj' ri Pedro
(Mt. 8:14-15; Lc. 4:38-39)

²⁹ Echiri' ri Jesús cuc' ri Jacobo y ri Juan xebel bi chupa ri sinagoga,

xebec chirocho ri Simón y ri Andrés.

³⁰ Ec'u ruchu-ujj' ri Simón c'o chwa uwarabal, c'o ak' chirij. Xquitzijoj c'u ri' wa' che ri Jesús. ³¹ Ewi ri Jesús xkib ruc' la yewa', xuchap ruk'ab y xuto'o cha' cayactajic. Na jampatana c'u ri' xic'ow ri ak' chirij rixok y xujeko quebunimaj.

Ri Jesús quebucunaj uq'uiyal yewa'ib

(Mt. 8:16-17; Lc. 4:40-41)

³² Echiri' benak chi ri k'ij e ri' cayubub chic, xec'am lo chwach ri Jesús conoje ri yewa'ib y ri e c'o paquik'ab itzel uxlabixel. ³³ Y conoje ri ticawex re ri tinamit xet'iki' chuchi' ri puerta re ri ja. ³⁴ Ec'u ri Jesús xebucunaj uq'uiyal yewa'ib che uq'uiyal uwach tak yabil y xeberesaj bi uq'uiyal itzel uxlabixel; pero na xuya ta luwar chique quech'awic ma rique queta'am china Rire.

Ri Jesús cac'utun pa tak ri luwar re Galilea

(Lc. 4:42-44)

³⁵ Lic anim tan echiri' lic c'a k'eku'm, xwa'lij bi ri Jesús, xel c'u bi chupa ri tinamit y xe'ec pa jun luwar catz'intz'otic cha' cu'ana orar. ³⁶ Ec'u ri Simón cuc' ri rachbi'il xebec che utzucuxic.

³⁷ Echiri' xquiriko, xquibi'ij che:

—Conoje ri winak caquitzucuj la — xecha'.

³⁸ Ec'u Rire xubi'ij chique:

—Jo' che utzijoxic ri Utzilaj Tzij pa tak ri luwar e c'o lo xa nakaj, ma e nuwach ri' in petinak Ri'in —xcha chique.

³⁹ Xebec c'u ri', y ri Jesús catzijon chupa tak ri sinagogas che tak ronoje ri luwar re Galilea yey queberesaj c'u bi itzel uxlabixel.

Ri Jesús cucunaj jun achi c'o ri yabil lepra che

(Mt. 8:1-4; Lc. 5:12-16)

⁴⁰ Xopon c'u ruc' ri Jesús jun achi c'o ri yabil lepra che y xuxucuba' rib chwach. Lic xelaj c'u che, jewa' xubi'ij:

—We ca'aj co la, josk'ij la ri nu-cuerpo che wa yabil —xcha'.

⁴¹ Ec'u ri Jesús xjuch' ca'n uc'u'x che rachi yewa'. Xuchap pana ruc' ruk'ab y jec'uwa' xubi'ij che:

—Cuaj, chu'ana ba chom ri racuerpo —xcha'. ⁴² Xew c'u xuq'uis ubi'xiquil wa', xa pa jok'otaj ri yabil xsachic y rachi xcunutajic.

⁴³ Ec'uchiri', ri Jesús xuq'uisbej ruch'a'tem ruc' y lic xupixabaj, ⁴⁴ jewa' xubi'ij che:

—Chatape', mac'o matzijoj che junok. Jat chwach raj chacunel pa Rocho Dios cha' rire carilo na jinta chi lepra chawe. Y ruma rajosk'iquil, chaya'a c'u chwach ri Dios ri kasa'n xtakan can ri Moisés che,* cha' cak'alajin chiquiwach ri ticawex at cunutajinac chic —xcha'.

⁴⁵ No'j la'chi echiri' xe'ec, lic xujek utzijoxic ri xu'an ri Jesús che y jec'ula' lic xtataj wa' cuma ri winak. Ruma c'u ri', na utz ta chic coc ri Jesús chiwachil pa ri tinamit; xujek c'u cananaj can chinimanaj che ri tinamit pa tak luwar catz'intz'otic. Na ruc' ta c'u ri', uq'uiyal ticawex re ronoje luwar xebopon ruc'.

2

Ri Jesús cucunaj jun sic

(Mt. 9:1-8; Lc. 5:17-26)

¹ Echiri' ic'owinac chi queb oxib k'ij, xoc tanchi ubi ri Jesús pa ri tinamit Capernaúm. Tak ri winak xquito Rire c'o chuchi' jun ja. ² Y na jampatana xemolotaj uq'uiyal winak y ruma ri quiq'uiyal na queboc ta chi ne chuchi' ri puerta. Ec'u ri Jesús cutzizoj Ruch'a'tem ri Dios chique.

³ Ec'uchiri', xec'un cajib achijab quitelem lo jun achi sic. ⁴ Yey na xquirik taj su'anic caquiya pan chwach ri Jesús cuma ruq'uiyal winak. Ewi xquitek'eba' ruwi ri ja pa c'o wi ri Jesús, xquesaj julepaj che. Chiri' c'u ri' xquikasaj wubi la ch'at pa cotz'ol wi ri sic.

⁵ Ec'u ri Jesús echiri' xril ri cubulibal quic'u'x ruc', jewa' xubi'ij che ri sic:

—Wal, ronoje ramac cuytajinac chic —xcha'.

⁶ Chiri' c'ut etz'ul jujun aj c'utunel re ri tzijpixab y jewa' catajin chiquic'u'x: ⁷ «¿Su'chac jewa' cach'a't wa'chi? Ruc' wa cubi'ij camacun chirij ri Dios. Ma ¿na xew ta neba ri Dios aj cuyul mac?»

⁸ Chupa c'u la' la jok'otaj, ri Jesús xuna'bej sa' la caquich'obo; ruma c'u ri', xubi'ij chique:

—¿Su'chac jela' catajin chic'u'x alak? ⁹ ¿Sa' c'u ri na c'ayew taj cambi'ij che rachi sic: “Ronoje ramac cuytajinac chic” o “Chatyactajok, chac'ama bi rach'at y chatbinok”? ¹⁰ E cuaj c'ut queta'maj alak wa': Ralaxel Chiquixo'l Ticawex ya'tal puk'ab cucuy tak ri mac que ri winak che ruwachulew —xcha'.

¹¹ Xubi'ij c'u ri' che ri sic:

—Chatyactajok, chac'ama bi rach'at y jat cha'wocho —xcha'.

¹² Na jampatana xyactaj rachi, xutelej bi ruch'at y chiquiwach conoje xel bi. Conoje c'u ri' xcam canima' che la xquilo y xquijek caquiyac uk'ij ri Dios, jewa' caquibi'ij: «¡Na jinta c'ana kilom wi wa'!» quecha'.

Ri Jesús cusiq'uij ri Leví

(Mt. 9:9-13; Lc. 5:27-32)

¹³ Tec'uchiri', xe'ec tanchi ri Jesús chuchi' ri mar. Conoje ri winak xekib ruc', y Rire xujek cac'utun chiquiwach. ¹⁴ Ec'u ri' catajin ric'owic pa ri luwar pa ca'an wi ri tojonc che ri gobierno, xril pana jun aj tz'onol puak re tojonc tz'ul chiri'. Wa' Leví rubi'* yey uc'ajol ri Alfeo. Xubi'ij c'u ri Jesús che:

—Chat-terej lo chwij —xcha'.

Xyactajic c'u ri Leví y xterej bi chirij.

¹⁵ Ec'u ri Jesús xumaj bi chirocho ri Leví. Xeboc c'u chwa ri mexa cuc' rutijo'n, junam cuc' uq'uiyal aj tz'onol puak re tojonc y uq'uiyal aj maquib; ma lic e q'ui ri quaternabem bi.

¹⁶ Ec'u raj c'utunel re ri tzijpixab cuc' ri fariseos, echiri' xquilo cawa'

* **1:44** Lv. 14:1-32 * **2:14** Wa jun achi c'o queb ubi': Leví y Mateo. Mt. 9:9; Lc. 5:27

ri Jesús cuc' raj maquib y raj tz'onol puak re tojoníc,† xquibi'ij chique rutijo'n ri Jesús:

—¿Su'chac ri tijonel iwe ri'ix cawa' junam cuc' raj tz'onol puak re tojoníc yey cuc' raj maquib? —xecha'.

17 Echiri' xuta wa' ri Jesús, xubi'ij chique:

—E janipa ri utz quiwach, na cajawax ta aj cunanel chique; ma wa' xew chique ri e yewa'ib cajawax wi. Jela' c'u ri', ri'in na in petinak ta che quisiq'uixic ri jusuc' quibinic quisilabic, ma e in petinak che quisiq'uixic raj maquib —xcha'.

Ri tz'onobal puwi ri ayuno
(Mt. 9:14-17; Lc. 5:33-39)

18 Rutijo'n ri Juan Aj Ya'l Bautismo y ri quitijo'n ri fariseos echiri' e c'o pa ayuno, xebopon ruc' ri Jesús y xquitz'onoj che:

—¿Su'be rutijo'n ri Juan y ri quitijo'n ri fariseos lic caqui'an ayuno, yey ri tijo'n rilal na caqui'an ta wa'? —xecha'.

19 Ri Jesús xuc'ul uwach:

—¿Ube nawi caqui'an ayuno ri esiq'uim pa juna c'ulaniquil we rala cac'uli'ic c'a c'o cuc'? Na ube taj, ma c'a c'o rala chiquixo'l. 20 No'j copon na ri k'ij echiri' quesax bi rala chiquixo'l; c'a ec'uchiri', caqui'an ayuno.

21 »Na jinta junok cuc'ojoj ruk'u' k'e'l ruc' c'ojobal c'asak; ma ri c'ojobal c'asak, we xc'olotaj upa, e cujec' ri c'ul k'e'l y más ne curich'ij bi. 22 Jec'ula' ri vino c'ac' na cak'e'j ta chupa juna surun‡ k'e'l. Ma we ca'ani' wa', ri vino c'ac' echiri' canajtir uk'ij, curakij ri surun, catix c'u ri' ri vino y ri surun na jinta chi uchac. Ruma c'u la', ri vino c'ac' 'anom chirajawaxic wi cak'e'j chupa juna surun c'asak —xcha'.

Ri Jesús e rajaw ri k'ij re uxlanibal
(Mt. 12:1-8; Lc. 6:1-5)

23 Chupa c'u jun k'ij re uxlanibal, ri Jesús cuc' rutijo'n e ri' quebic'ow pa tak tico'n re trigo. Ec'u rutijo'n xquijek caquich'upila' bi ri trigo.

24 Ruma wa' ri fariseos xquitz'onoj che ri Jesús:

—Chilape la, ¿su'be ri tijo'n la caqui'an ri na takal taj ca'ani' chupa ri k'ij re uxlanibal? —xecha'.

25 Ec'u ri Jesús xuc'ul uwach:

—¿Na ajilam ta neba alak ri xu'an ri David cuc' ri rachbi'il echiri' c'o xajawax chique y xenumic? 26 Echiri' ri Abiatar e cajawal raj chacunel pa Rocho Dios, ri David xoc pa ri Rocho Dios y xutij ri pam ya'tal chi puk'ab ri Dios,★ yey wa' na takal ta chique rique caquitijo. Na ruc' ta c'u ri', xuya ne que ri e rachbi'il. Yey wa' wa pam, xew takal chique raj chacunel pa Rocho Dios —xcha'.

27 Y jewa' xubi'ij tanchi chique:

—Ri k'ij re uxlanibal xuya can ri Dios re to'bal que ri ticawex; na e ta xe'ani' ri ticawex ruma ri k'ij re uxlanibal.§ 28 Yey Ralaxel Chiquixo'l Ticawex e ne rajaw ri k'ij re uxlanibal —xcha'.

3

Ri Jesús cucunaj jun achi chakijinak uk'ab

(Mt. 12:9-14; Lc. 6:6-11)

1 Jumul chic ri Jesús xoc chupa ri sinagoga y chiri' c'o jun achi chakijinak jun uk'ab. 2 E c'o c'u jujun lic quic'ac'alem we ri Jesús cucunaj wa'chi chupa wa k'ij re uxlanibal, cha' jela' utz caquitz'ak uchi'.

3 Xubi'ij c'u ri Jesús che rachi chakijinak ruk'ab:

—Chatyactajok y chatc'ola chikawach konoje —xcha'.

4 Ec'uchiri', xutz'onoj chique ri caquitzutza':

—¿Sa' ri lic usuc' ca'ani' pa ri k'ij re uxlanibal: E ca'ani' ri utz o e ri na utz taj? ¿Utz cacolobex ruc'aslem junok

† 2:16 “Raj tz'onol puak re tojoníc”: Quil “cobrador de impuestos” pa vocabulario. ‡ 2:22 “Surun”: Quil “odre” pa vocabulario. ★ 2:26 1 S. 21:1-6 § 2:27 Ri Jesús xubi'ij wa' ma ri fariseos e xqui'an más il uwach che ri quitakanic puwi ri k'ij re uxlanibal, chwa ri cato' ri ticawex chupa wa' wa k'ij.

o caya' luwar che cacamic? —xcha'. Yey na jinta c'u junok chique xc'uluw uwach.

⁵ Ec'uchiri', ri Jesús xebutzu' ruc' oyowal tak ri quisutum rij y lic xoc bis chuc'u'x ruma lic u'anom co ri canima'. Xubi'ij c'u che rachi:

—Chasuc'upij rak'ab —xcha che.

Rachi xuyuk ruk'ab y wa' xutziric.

⁶ Xebel c'u bi ri fariseos, xquimol quib cuc' jujun chique ri quitakem ri rey Herodes, y junam xquich'a'tibej su'anic caquisach uwach ri Jesús.

Uq'uiyal ticawex caquitzucuj ri Jesús

⁷ Ri Jesús xel bi y xe'ec chuchi' ri mar junam cuc' rutijo'n. Y uq'uiyal ticawex xeterej bi chirij. Wa' e petinak pa tak ri tinamit re Galilea y re Judea ⁸ y pa ri tinamit Jerusalem; e petinak pa tak ri tinamit re Idumea, pa tak ri tinamit e c'o ch'aka ya' che ri nimaya' Jordán, yey pa tak ri tinamit e c'o chunakaj ri tinamit Tiro y ri tinamit Sidón. Conoje wa' e petinak ruma xquito janipa ri catajin ri Jesús che u'anic.

⁹ Ec'u ri Jesús xubi'ij chique rutijo'n, xaki quiyijba' na ri barco re cak'ax chupa we xajawax che, cha' jela' na capitz'ipo'x ta cuma ruq'uiyal winak; ¹⁰ ma lic e q'ui ri xebucunaj. Jec'ula' conoje ri yewa'ib caquiminima' quib ruc', ruma cacaj caquichapo cha' quecunutajic.

¹¹ Ec'u ri winak e c'o paquik'ab itzelilaj uxlabixel, echiri' caquil uwach ri Jesús, quexuqui' chwach y quesiq'unic caquibi'ij: «¡Rilal lal Ruc'ajol ri Dios!» quecha'. ¹² No'j ri Jesús lic quebuk'atej cha' na caquik'alajisaj taj china Rire.

Ri Jesús quebucha' cablajuj utako'n (Mt. 10:1-4; Lc. 6:12-16)

¹³ Tec'uchiri', xak'an ri Jesús chwa jun juyub y xebusiq'uij china tak ri xraj quebucha'o, y rique xquimol

quib ruc'. ¹⁴ Xebucha' c'u cablajuj chique wa' cha' quec'oji' ruc' y quebutak bi che utzijoxic ri Utzilaj Tzij. ¹⁵ Y xuya bi quichuk'ab re quequicunaj yewa'ib y re quebequesaj bi itzel uxlabixel.

¹⁶ Ec'u quibi' wa' wa cablajuj* xebucha'o:

Simón ri xcoj Pedro che,

¹⁷ Jacobo

y ruchak' Juan (rique e uc'ajol ri Zebedeo y xcoj ne quibi' "Boanerges", wa' que'elawi "E ralc'o'al ruch'awibal jab"),

¹⁸ Andrés,

Felipe,

Bartolomé,

Mateo,

Tomás,

Jacobo ruc'ajol ri Alfeo,

Tadeo,†

Simón, ri cabi'x che "ri Cananista",‡

¹⁹ y Judas aj Iscariot,§ ri xc'ayin re ri Jesús.

Cabi'x che ri Jesús e uchuk'ab ritzel ri c'o ruc'

(Mt. 12:22-32; Lc. 11:14-23)

²⁰ Tec'uchiri', xoc ri Jesús chuchi' jun ja y xemolotaj tanchi uq'uiyal winak. Y ruma c'u ri', ri Jesús cuc' rutijo'n na utz ta chi ne quewa'ic.

²¹ Echiri' xquita ri ratz-uchak' ri Jesús, xec'unic y xcaj caquic'am bi cuc', ma rique caquibi'ij xsach runa'oj ri Jesús. ²² No'j raj c'utunel re ri tziipixab, ri e petinak Jerusalem, xquibi'ij: «Ri Jesús c'o puk'ab ri Beelzebú» y «Ruma c'u ruchuk'ab wa' wa cajawal ri itzel uxlabixel, queberesaj bi itzel uxlabixel» xecha'.

²³ Ec'u ri Jesús xebusiq'uij y ruc' c'ambal na'oj xubi'ij chique:

«¿Sa' nawi we ta ri Satanás caresaj bi ri Satanás chique ri winak? ²⁴ We ri takanelab re juna tinamit quijachom quipa ruma quech'o'jin chiquiwach, ri' na quetiqui' ta chi utz. ²⁵ Yey we ri ejekelel pa juna ja quijachom

* **3:16** Cabi'x "tako'n" chique wa cablajuj utijo'n ri Jesús, ri xecha' ruma Rire cha' caquitzijoj ri Utzilaj Tzij. Pa ri ch'a'tem griego y pa caxtila wa' e "apóstol". † **3:18** "Tadeo": Ri Tadeo también cabi'x "Lebeo" y "Judas" che. Mt. 10:3; Lc. 6:16 ‡ **3:18** "Cananista": Quil "Zelote" pa vocabulario. § **3:19** "Iscariot": Wa' e utinamit ri Judas.

quib ruma quech'o'jin chiquiwach, ri' na quetiqui' ta chi utz. ²⁶ Jec'ula', we ta ri Satanás cayactaj chiribil rib y utuquel cujach upa rutakanic, ri' na canajtir ta rutakanic, xa casach uwach.

²⁷ »Na jinta c'u juna elek'om coc pa rocho junok lic c'o uchuk'ab yey carelek'aj c'u lo rubitak re pa ja, we na cuyut ta nabe ri rajaw ja. Ma we relek'om uyutum chi ri rajaw ja, c'a ec'uchiri' utz carelek'aj bi ronoje la c'o pa ri ja.

²⁸ Pakatzij wi cambi'ij chiwe: C'o puk'ab ri Dios cucuy ronoje tak ri mac que ri ticawex, ruc' ronoje tak ri na utz taj caquibi'ij, tob china chirij; ²⁹ no'j china ri tzel cach'a't chirij ri Santowilaj Ruxlabixel ri Dios, ri' na cacuytaj ta c'ana umac. Ma ri ca'anaw wa', c'o chi ri k'atbal tzij puwi' na jinta utakexic» xcha'.

³⁰ Xubi'ij wa' ma rique quibi'im: «Rire c'o puk'ab jun itzelilaj uxlabixel.»**

Ruchu y tak ruchak' ri Jesús
(Mt. 12:46-50; Lc. 8:19-21)

³¹ Tec'uchiri', ruchu y tak ruchak' ri Jesús xec'unic y xec'oji' lo pa be, yey xquitak usiq'uixic ri Jesús.

³² Ec'u ri ticawex etz'ulic, ri quisutum rij ri Jesús, jewa' xquibi'ij che:

—Ri chu la y tak ri chak' la e c'o pa be, e la' caquitzucuj la —xecha che.

³³ Ec'u ri Jesús xuc'ul uwach:

—¿China ri nuchu y china tak ri nuchak'? —xcha'.

³⁴ Tec'uchiri', xebutzu' ri etz'ulic quisutum rij y jewa' xubi'ij chique:

—Wa e c'o wara e nuchu y e tak nuchak' ri'. ³⁵ Ma china ri cu'an janipa ri caraj ri Dios, wa' e nuchak', e wanab y e nuchu ri' —xcha'.

4

Ri c'ambal na'oj puwi ri awanel
(Mt. 13:1-9; Lc. 8:4-8)

¹ Ri Jesús xujek tanchi cac'utun chuchi' ri mar y lic e q'ui ri ticawex xemolotaj chiri' pa c'o wi Rire. Ruma c'u ri' xoc chupa jun barco c'o chwi ri mar, xtz'uyi' chupa y conoje ri ticawex e c'o pana chuchi' la mar.

² Xujek c'u cac'utun chiquiwach ruc' uq'uiyal tak c'ambal na'oj, yey jun che tak ruc'utunic e wa':

³ «¡Chitape! C'o jun awanel xel bi cha' que'awanok. ⁴ Ec'uchiri' catajin che ujopopexic rija',* c'o xtzak can chuchi' ri be. Xec'un c'u lo tz'iquin, y xo'lquitija bi.

⁵ »C'o ija' xtzak can pa tak abaj; yey ruma na jinta uq'uiyal ulew chuxe', xel tan lo rija'. ⁶ Ec'uchiri' xel lo ri k'ij, xc'atic; yey ruma na jinta ratz'ayak, xchakijic.

⁷ »C'o ija' xtzak can pa tak q'uix. Echiri' ri q'uix xq'uiyic, rija' xjik' can chuxe'; ruma c'u ri', na jinta reka'n xuya'o.

⁸ »No'j c'o ija' xtzak can pa chomilaj ulew. Ec'u ri' wa' xel lok, xq'uiyic y lic xu'an reka'n. C'o jujun rakan xuya treinta, jujun chic xuya sesenta y c'o ne xuya jun ciento» xcha'.

⁹ Ec'uchiri', ri Jesús xubi'ij tanchi chique: «China c'u ri c'o utanibal che utayic, ¡chuta c'u ri'!» xcha'.

Sa' ruchac tak ri c'ambal na'oj
(Mt. 13:10-17; Lc. 8:9-10)

¹⁰ Echiri' ri Jesús xcanaj can utuquel, ri e c'o chunakaj y ri cablajuj utijo'n xekib ruc', xquitz'onoj c'u che sa' que'elawi wa c'ambal na'oj xuya chique. ¹¹ Ec'u ri Jesús xubi'ij chique:

«Chiwe ri'ix ya'talic cak'alajisax runa'oj ri Dios chwi rutakanic. No'j chique tak ri winak na e jinta chupa rutakanic, xa ruc' tak c'ambal na'oj cabi'x ronoje chique. ¹² Ma tob rique quetzu'nic, e junam ruc' na quetzu'n taj; tob quetan, e junam ruc' na quetan taj y e ri' na jinta c'o caquimaj usuc'. Na cacaj ta c'u ri' caquitzelej

** **3:30** Ri mac chirij ri Santowilaj Ruxlabixel ri Dios e ruma xquibi'ij: «Ruchuk'ab ri Jesús petinak ruc' ritzel winak», pero na e ta u'anom ma e uchuk'ab ri Ruxlabixel ri Dios ri c'o ruc'. * **4:4** E rojertan chila' Israel echiri' caqui'an rawanic re ri trigo xa caquijopopej rija' pulew, tec'uchiri' caquich'uk uwi' ruc' ulew. ✧ **4:12** Is. 6:9-10

quitzij cha' jela' cacuytaj quimac»^{*} xcha'.

Ri Jesús cuk'alajisajri c'ambal na'oj puwi ri awanel

(Mt. 13:18-23; Lc. 8:11-15)

¹³ Ec'uchiri', xutz'onoj chique:

«¿Na quimaj ta cami usuc' ri' wa c'ambal na'oj? ¿Sa' c'u u'anic ri' quimaj usuc' ronoje tak ri c'ambal na'oj canc'ut chiwach?

¹⁴ »Ri awanel e pacha' ri caticow Ruch'a'tem ri Dios.

¹⁵ »E c'o c'u jujun ticawex e pacha' rija' xtzak can chuchi' ri be; wa' xtic Ruch'a'tem ri Dios pa canima' y caquita ne ri'. Pero cac'un c'u lo ri Satanás y cumaj bi ri Ch'a'tem xtiqul' pa canima'.

¹⁶ »E c'o jujun chic e pacha' rija' xtzak can pa tak abaj. Wa' e ri caquita Ruch'a'tem ri Dios y na jampatana caquic'ul ruc' qui'cotemal. ¹⁷ Pero ruma na e tiquil ta chi utz, na quecowin taj. Ma echiri' cac'un lo ri c'ambal quipa o queternabex ruc' c'ax ruma quic'ulum Ruch'a'tem ri Dios, quepajtaj c'u ri'.

¹⁸ »E c'o jujun chic e pacha' rija' xtzak can pa tak q'uix. Wa' e ri quetaw Ruch'a'tem ri Dios. ¹⁹ Pero rubis quic'u'x chwi tak ri cajawax chique, ruc' ri socoso'nic re ri beyomalil y ri quirayibal che tak ronoje ri c'olic; ronoje c'u wa' e cusach uwach Ruch'a'tem ri Dios c'o pa canima'. Ruma tak c'u ri' wa' na jinta c'ana quijik'obalil quilital che ri quibinic.

²⁰ »E c'o c'u jujun e jela' pacha' rija' xtzak pa chomilaj ulew. Wa' e ri caquita Ruch'a'tem ri Dios, caquic'ul chi utz y lic c'o quijik'obalil quilital che ri quibinic. E jela' pacha' rija' lic xu'an reka'n; c'o jujun rakan xuya treinta, jujun chic xuya sesenta y c'o ne xuya jun ciento» xcha'.

Ri c'ambal na'oj puwi ri candil

(Lc. 8:16-18)

²¹ Ri Jesús xubi'ij tanchi chique:

«¿C'o neba junok cutzij juna ak' y cuch'uk uwi' ruc' juna mulul re pajbal o cuju' chuxe' ruwarabal? ¿Na re ta neba cuya lo chupa ruc'olibal chicaj? ²² Ma copon ri k'ij echiri' janipa ri na k'alajisam taj, cak'alajisax na; yey janipa ri ewatalic, queta'maxic. ²³ China c'u ri c'o utanibal che utayic, jchuta c'u ri'!» xcha'.

²⁴ Jewa' xubi'ij tanchi chique:

«Lic chita chi utz janipa ri cambi'ij chiwe, ma “ruc' ri pajbal quixpajan wi ri'ix, ruc' tanchi wa pajbal ca'an pajanic chiwe.” Ec'u ri Dios cuya na chiwe lic quimaj usuc' ri cambi'ij, we lic e quita ri nutzij. ²⁵ Ma china ri cuc'ul chi utz janipa ri cac'ut chwach, ri' cac'ut ne más chwach y jec'ula' cumaj más. Yey china ri na cuc'ul ta ri cac'ut chwach, ri' camaj ne che janipa ri cuch'obo umajom chi usuc'» xcha ri Jesús.

Ri c'ambal na'oj puwi ruq'uiyibal rija'

²⁶ Xubi'ij tanchi ri Jesús chique:

«Rutakanic ri Dios e jela' pacha' juna achi cutic rija' pulew. ²⁷ Rachi chak'ab que'warok y pak'ij cawa'lij tanchic; yey na cumaj ta usuc' su'anic quel lo rija' y caq'uiyic. ²⁸ Ma rulew utuquel cu'an rib che uq'uiyisaxic ri tico'n. Nabe na e quel lo ri rakan ri tico'n, teran c'u lo rutzic'; tec'uchiri', cawachinic. ²⁹ Ec'uchiri' ya xri'jobic, catzak bi ri jos che ma e ri' xopon ruk'ijol molonic» xcha'.

Ri c'ambal na'oj puwi rija' re moxtasa

(Mt. 13:31-32; Lc. 13:18-19)

³⁰ Xubi'ij tanchi ri Jesús:

«¿Sa' ruc' cakajunimaj wi rutakanic ri Dios, o sa' juna c'ambal na'oj cuk'alajisaj wa'? ³¹ E pacha' rija' re moxtasa echiri' catic pulew. Ma e ija' wa' más ch'uti'n chwa tak rija' c'o che ruwachulew, ³² pero echiri' tiquital chic, we xq'uiyic más canimar chwa tak ri tico'n c'o pa ri werta. Quel c'u lo nimak tak uk'ab y quec'un lo ri tz'iquin quexiq'uc' che ruwa caj y quejeki' chuxe' rumu'j» xcha'.

Su'be ri Jesús cac'utun ruc' tak c'ambal na'oj

(Mt. 13:34-35)

³³ Ruc' uq'uiyal tak c'ambal na'oj pacha' tak wa', xc'utun ri Jesús puwi Ruch'a'tem ri Dios, e chirij ri caquimaj usuc' ri winak. ³⁴ Y na jinta c'o xuc'utu we na ruc' ta c'ambal na'oj xu'ano; no'j chique rutijo'n xuk'alajisaj ronoje echiri' e c'o quituquel.

Ri Jesús cuk'atej ri cakjik' chwi ri mar

(Mt. 8:23-27; Lc. 8:22-25)

³⁵ Chupa c'u la' la jun k'ij echiri' xoc rak'ab, ri Jesús xubi'ij chique rutijo'n: —Jo', chojk'ax ch'aka ya' —xcha chique.

³⁶ Echiri' ebuch'a'bem chi can ruq'uiyal winak, rutijo'n xquic'am bi ri Jesús e la' chupa ri barco pa tz'ul wi Rire, yey e c'o chi jujun barcos eachbilam bi.

³⁷ Xpe c'u jun nimalaj cakjik' chwi ri mar. Ec'u ri ya' curoj rib che ri barco; y wa' xujek canoj che ya', ya laj camukutajic. ³⁸ Ec'u ri Jesús c'o pa ri barco puq'uisbal re chirij, cawar chwi jun ch'acat.

Rutijo'n xe'quic'osoj y jewa' xquibi'ij che:

—¡Kajawal! ¿Na coc ta cami la il chike? ¡Ma ya cojcamic! —xecha'.

³⁹ Ec'u ri Jesús xyactajic, xuk'atej ri cakjik' y jewa' xubi'ij che ri ya':

—¡Chat-tanalok! ¡Chatcubulok! —xcha che. Ri cakjik' xtani'ic y ri ya' xyeni'ic.

⁴⁰ Tec'uchiri', xubi'ij chique rutijo'n:

—¿Su'chac lic quixi'ij iwib? ¿Su'be na cubul ta ic'u'x wuc'? —xcha chique.

⁴¹ Ewi xoc lo jun xi'in ib cuc' y xquibi'ij chiquiwach:

—¿Sa' ruwach wa' wa'chi? ¡Ma tob ne e ri cakjik' y ri ya' caquicoj utzij! —xecha'.

5

Jun achi aj Gadara c'o puk'ab jun itzel uxlabixel

(Mt. 8:28-34; Lc. 8:26-39)

¹ Xebopon c'u ch'aka ya' pa ri luwar re Gadara. ² Echiri' xel lo ri Jesús chupa ri barco, na jampatana xo'lc'ul ruma jun achi elinak lo chuxo'l tak mukubal que anima', yey wa' c'o puk'ab jun itzelilaj uxlabixel.

³ Wa' wa'chi jekel pa quemuk wi ri anima' y na jinta chi c'ana junok cach'ijow uximic, tob ne ruc' carena.

⁴ Ma lic uq'uiyal laj xyut ri rakan y ruk'ab ruc' tak ch'ich' y carena; pero rire curakara' upa, cu'an uc'aj che y na jinta c'o cach'ijow uchuk'ab.

⁵ Chipak'ij chichak'ab xaki casutin chwi tak ri juyub y chuxo'l tak mukubal que anima', casiq'uinic y cu'an c'ax che rib ruc' abaj.

⁶ Ec'uchiri' chinimanaj xril pana ri Jesús, cac'alalic xkib ruc' y xuxucuba' rib chwach. ⁷ Y lic co xch'awic, jewa' xubi'ij:

—¿Su'chac co'lmina ib la wuc', Jesús lal Uc'ajol ri Dios c'o chila' chicaj? Cantz'onoj c'u che'la pa rubi' ri Dios, minya la pa c'ax —xcha'.

⁸ Xubi'ij wa' ma ri Jesús xubi'ij che: «At itzelilaj uxlabixel, chatelubi che wa'chi» xcha'.

⁹ Ec'u ri Jesús xutz'onoj che:

—¿Sa' rabi'? —xcha che.

Rire xuc'ul uwach:

—Legión* ri nubi', ma lic oj q'ui —xcha'. ¹⁰ Yey ritzelilaj uxlabixel lic xuc'oj rib chwach ri Jesús cha' na quetak tubi c'a naj che tak la' la luwar.

¹¹ Xa chiri' c'u ri' e c'o lo uq'uiyal ak quewa' chwa ri juyub. ¹² E tak c'u ri itzelilaj uxlabixel xquicoj quib chwach ri Jesús y jewa' xquibi'ij che:

—Chojtaka bi la cuc' la ak cha' cojoc bi cuc' —xecha'.

¹³ Y ri Jesús xuya luwar chique. Xebel c'u bi che rachi y xeboc bi cuc' ri ak. Wa' wa' ak laj e juna queb mil. Ec'u la' conoje xe'quic'aka bi quib

* 5:9 “Legión”: Wa ch'a'tem que'elok “uq'uiyal soldados”. Jun legión e c'o wakib mil soldados che. Wara que'elawi uq'uiyal itzel uxlabixel.

chwi jun siwan, xebel'tzak c'a chupa ri mar y chiri' xejik' wi.

¹⁴ Ec'u ri e chajinel que ri ak, xebanimajic. Y janipa ri xquilo xebec che utzijoxic chupa ri tinamit y pa tak juyub.

Xepe c'u ri winak che rilic sa' ri x'ani' chiri'. ¹⁵ Echiri' xec'un pa c'o wi ri Jesús, xquil rachi ri lic x'an c'ax che cuma ritzelilaj uxlabixel; e ri' tz'ulic, ucojom chi uk'u' y jusuc' chi runa'oj. Ruma wa', lic xquixi'ij quib.

¹⁶ Y ri xebelow wa' xquitzijoj chique ri c'ac' xec'unic; xquitzijoj su'anic xebel bi ritzelilaj uxlabixel che rachi y sa' ri xquic'ulumaj tak ri ak. ¹⁷ Ewi ri winak xquijeko quebelaj che ri Jesús cha' quel bi chiri' pa tak ri quiluwar.

¹⁸ Ec'uchiri', ri Jesús xoc bi chupa ri barco. Ec'u rachi ebelinak bi ritzelilaj uxlabixel che, xelaj che ri Jesús cha' cuya luwar che caterej bi chirij. ¹⁹ No'j ri Jesús na xuya ta luwar che, jenewa' xubi'ij che:

—Jat cha'wocho cuc' rawatzachak' y chatzijoj chique ronoje ri utz u'anom ri Dios awuc', ma e xuc'ut ri c'axna'bal uc'u'x chawe —xcha che.

²⁰ Rachi xe'ec y xujek utzijoxic pa ri tinamit re Decápolis† ronoje ri utz x'an che ruma ri Jesús, y conoje ri ticawex lic cacam canima' che wa'.

Rumi'al ri Jairo yey rixok xuchap ruk'u' ri Jesús

(Mt. 9:18-26; Lc. 8:40-56)

²¹ Echiri' xtzelej tanchi ri Jesús ch'aka ya' chupa ri barco, uq'uiyal ticawex xquimoc rij y Rire xc'oji' chuchi' ri mar.

²² Xc'un c'u lo jun achi Jairo rubi', rire e jun chique ri e aj wach re ri sinagoga. Xew c'u xril uwach ri Jesús, xuc'ak rib xe'rakan uk'ab. ²³ Y lic xucoj rib chwach, jewa' xubi'ij che:

—Ri numi'al cajec'owic. Jo' co la wuc', que'ya'a ri k'ab la puwi' cha' cacanutajic y jela' na cacam taj —xcha'.

²⁴ Xe'ec c'u ri Jesús ruc' rachi, yey uq'uiyal winak xeterej bi chirij y lic caquipitz'ipa'.

²⁵ Chiquixo'libal c'u ri' c'o jun ixok lic yewa', e cablajuj lo junab ri' na catani' ta ruyabil re upa ic' che. ²⁶ Y lic utijom c'ax paquik'ab uq'uiyal e aj cun, y uq'uisom chi ne ronoje ri c'o ruc'; yey na jinta c'ana xutikoj che, ma catajin ne unimitajic ri jujun k'ij.

²⁷ Echiri' xuta ri caquibi'ij puwi ri Jesús, xumin bi rib chiquixo'libal tak ri winak. Xkib c'u pana chirij ri Jesús y xuchap ruk'u', ²⁸ ma xuch'ob pa ranima': «Tob tane xew lu'k'u' canchapo, ruc' ri' quincunutajic.» ²⁹ Y na jampatana xtani' ruyabil y lic xuna' chiribil rib xcunutaj che ri c'axlaj yabil c'o wi.

³⁰ Ec'u ri Jesús echiri' xuna' chiribil rib c'o uchuk'ab xelic, xebutzu' conoje ri winak y xutz'onoj:

—¿China xchapaw ri nuk'u'? —xcha'.

³¹ Rutijo'n xquibi'ij che:

—Rilal quil la ri winak caquipitz'ipa' la. ¿Su'chac c'u ri' catz'onoj la: “China xchapaw we'in”? —xecha che.

³² Pero ri Jesús xtzu'n pa tak utzal che rilic china xchapaw re. ³³ Ec'u rixok cabirbot ruma xi'in ib, ma rire e eta'mayom sa' ri xuc'ulu. Xe'ec c'ut y xuxucuba' rib xe'rakan uk'ab ri Jesús. Yey xutzijoj che Rire ronoje ruc'ulumam y sa' ri xu'an la jok'otaj.

³⁴ Ec'u ri Jesús xubi'ij che:

—Ixok, ruma ri cubulibal c'u'x la wuc', xcunutaj la. Oj c'u la ri' chi utzil chomal, ma lal chi cunutajinak che ri c'axc'olil la —xcha'.

³⁵ C'a cach'a't ne ri Jesús echiri' xec'un lo jujun achijab e petinak chirocho ri aj wach re ri sinagoga y xo'lquibi'ij che:

—Ri mi'al la ya xcamic; na jinta chi cutikoj cabayaba' la ri tijonel —xecha che.

³⁶ Ec'u ri Jesús, echiri' xuta wa xo'lbi'xok, xubi'ij che raj wach re ri sinagoga:

† 5:20 “Decápolis” e que'elawi “lajuj tinamit”.

—Muxi'ij rib c'u'x la, xew lic cubula c'u'x la wuc' —xcha che.

³⁷ Ri Jesús na xuya ta chi luwar che junok caterej bi chirij; xew xebuc'am bi ri Pedro, ri Jacobo y ri Juan ruchak' ri Jacobo ruc'. ³⁸ Ec'uchiri' xopon chirocho raj wach re ri sinagoga, xeril ri winak quetucuquic, quebok'ic y ruc'sic' quetunanic. ³⁹ Ec'u ri Jesús xoc bi y xubi'ij chique:

—¿Su'be lic quixtucuquic y quixok'ic? Ri ralco ali na caminak taj, xa cawaric —xcha chique.

⁴⁰ Yey xa xquitze'ej c'u ri xubi'ij. Pero Rire xeberesaj lo conoje ri e c'o pa ja, xew xebucox bi ruchu-ukaw ri ralco ali cuc' rutijo'n eteran bi chirij. Xoc c'u bi pa telan wi ri ralco ali. ⁴¹ Xuchap c'u ruk'ab y jewa' xubi'ij pa ri ch'a'tem arameo:

—*¡Talita cumi!* —xcha che. (Wa' e que'elawi: “Ali chuuy, ¡Chatwa'lijok!”)

⁴² Y na jampatana ri ralco ali xwa'lijic y xbinic. (Rali cablajuj rujunab.) Y ri winak lic xquixi'ij quib che wa xquilo. ⁴³ Ec'u ri Jesús lic xpixaban che cha' na jinta c'o caquitziyoj wi y xtakan c'u che cha' caya' uwa ri ralco ali.

6

Ri Jesús copon pa ri tinamit Nazaret

(Mt. 13:53-58; Lc. 4:16-30)

¹ Ri Jesús xel bi chiri' y xopon pa rutinamit. Ec'u rutijo'n xeterej bi chirij. ² Echiri' xopon ri k'ij re uxlanibal, xujek cac'utun chupa ri sinagoga. Yey uq'uiyal winak xquito y lic xcam canima' che, jec'uwa' caquibi'ij:

—¿Pa xu'maja wi wa'chi ronoje tak wa'? ¿Sa' chi na'oj wa ya'tal che, yey su'anic cu'an tak wa milagros? ³ ¿Na e ta neba jun achi carpintero; ralab ri María y catzixel ri Jacobo, ri José, ri Judas y ri Simón? ¿Na ejekel ta neba ri ranab wara chikaxo'l? —quecha'. Ewi lic e q'ui tzel xquita ri xubi'ij y xquijek caquic'ak bi uk'ij.

⁴ Ec'u ri Jesús xubi'ij chique:

—Chupa ronoje luwar cayac uk'ij juna k'alajisanel. No'j chupa rutinamit, chiquixo'l ri ratz-uchak' y pa rocho, na cayac ta uk'ij —xcha chique.

⁵ Chupa c'u ri' rutinamit xa e queb oxib ri xuya ruk'ab paquiwi' y xebucunaj, no'j na utz taj xu'an juna chic milagro ⁶ ma ri ticawex na caquicoj taj china Rire. Ec'u ri Jesús lic xcam ranima' che wa'. Xic'ow c'u pa tak ri aldeas c'o chunakaj ri tinamit e ri cac'utunic.

Ri Jesús cuya bi quichac ri cablajuj utako'n

(Mt. 10:5-15; Lc. 9:1-6)

⁷ Tec'uchiri', xebusiq'uij ri cablajuj utijo'n, xebutak bi pa cacab y xuya paquik'ab quebequesaj bi itzelilaj uxlabixel. ⁸ Yey xebutak che na jinta c'o caquic'am bi re pa be; xew caquic'am bi ri quich'ami'y. Na caquic'am tane bi quiteb, quiwa o quimeyo chwi ri quipas. ⁹ Yey utz caquicoj bi quixajab; no'j na utz taj caquic'am bi jumolaj chic quik'u', xew ri quicojom. ¹⁰ Y xubi'ij bi chique:

«We quixc'ul pa juna ja, chixc'ola chiri'; c'ate quixel bi echiri' quix'ec pa jun chic tinamit. ¹¹ No'j we chupa juna tinamit na quixc'ul taj y na cac'ul tane ri Utzilaj Tzij quitzijoj, chixelubi chiri' yey chipupa' can rulew c'o che ri iwakan; wa' e c'utubal re na utz ta qui'anom ri ejekel chiri'. Pakatzij wi cambi'ij chiwe: Chupa ruk'ijol ri k'atbal tzij, más c'ax ri cape paquiwi rique chwa ri cape paquiwi ri e aj Sodoma y Gomorra»^{*} xcha'.

¹² Xebel c'u bi rutijo'n che utzijoxic chique ri ticawex puwi ri lic chirajawaxic caquitzelej quitzij chwach ri Dios. ¹³ Xebequesaj bi uq'uiyal itzel uxlabixel yey xquicoj aceite paquiwi uq'uiyal yewa'ib y xequicunaj.

Rucamic ri Juan Aj Ya'l Bautismo
(Mt. 14:1-12; Lc. 9:7-9)

¹⁴ Ri rey Herodes xuta puwi ri chom uch'a'tibexic ri Jesús, ma lic

^{*} 6:11 Gn. 19:24-29

xeta'max rubi' pa tak ronoje luwar. Ec'u ri Herodes xubi'ij: «La' e ri Juan Aj Ya'l Bautismo xc'astaj lo chiquixo'l ri ecaminak; e uwari'che c'o uchuk'ab che u'anic wa milagros» xcha'.

¹⁵ Yey e c'o jujun chic quebi'n re: «Rire e Elías» y jujun chic quebi'n re: «E juna k'alajisanel o laj junok chique ri k'alajisanelab re ojertan.»

¹⁶ Echiri' xuta wa' ri Herodes, xubi'ij: «La' e ri Juan ri jun xintak uk'atic rujolom, xc'astaj lo chiquixo'l ri ecaminak» xcha'.

¹⁷ Xubi'ij wa' ma e rire ri xutak uchapic ri Juan cha' caya'i' pa carena y que'yo'k pa cárcel. Xu'an wa' ri Herodes ma ri Juan xuch'a'bej upa ruma u'anom rixokil che ri Herodías, yey wa' wi'xok e rixokil ri Felipe ruchak' ri Herodes. ¹⁸ Jewa' ri xubi'ij ri Juan che: «Lic na ube taj 'anom ixokil la che ri rixokil ri chak' la» xcha'.

¹⁹ Ruma c'u la', rixok Herodías lic xutzucuj sa' cu'an che ri Juan. Lic xraj cucamisaj; pero na curik taj sa' u'anic cu'ano, ²⁰ ma ri Herodes cuxi'ij ne rib chwach ri Juan. Yey utakom ne uchajixic cha' na junta cuc'ulumaj, ma reta'am ri Juan e jun achi lic jusuc' y lic uya'om rib puk'ab ri Dios. Echiri' ri Herodes cuta ruc'utunic ri Juan, tob na cumaj ta usuc', lic cacha uc'u'x che utayic.

²¹ Ewi xopon jun k'ij echiri' ri Herodes xuq'uis ujunab y xuya jun nimalaj wa'im chique tak raj wach e c'o ruc', cuc' ri e takanelab que rusoldados y ri e aj Galilea lic c'o quiwach. ²² Xoc c'u bi ri ralit rixok Herodías pa c'o wi ri Herodes cuc' conoje tak ri e c'o chwa ri mexa, y xujek caxajaw chiquiwach. Wa' lic xuc'ul quic'u'x conoje ri e c'o chiri'. Ewi ri Herodes jewa' xubi'ij che la'li:

«Chatz'onoj sa' ri cawaj, ma ri'in canya chawe» xcha'. ²³ Y xujiquiba' c'u uwach che:

«Ronoje ri catz'onoj, canya chawe, tob ne pa nic'aj che tak ri c'o panuk'ab» xcha'.

²⁴ Ewi rali xel bi cha' cu'tz'onoj che lu'chu:

«¿Sa' nawi ri cantz'onoj?» xcha'.

«E chatz'onoj rujolom ri Juan Aj Ya'l Bautismo» xcha ruchu che.

²⁵ Na jampatana c'u ri', rali lic canic xoc bi chwa ri rey Herodes y jewa' xubi'ij che:

«Cuaj caya la chwe wo'ora pa juna plato rujolom ri Juan Aj Ya'l Bautismo» xcha che.

²⁶ Ri rey lic xbisonic ruma ri xtz'onox che. Pero ruma c'u ri xujiquiba' uwach che rali chiquiwach conoje ri e c'o ruc' pa wa'im, na xraj ta chic xujec' ruch'a'tem. ²⁷ Ewi xutakala' bi jun soldado cha' que'ec y cuc'am lo rujolom ri Juan. ²⁸ Ri soldado xe'ec pa ri cárcel y xuc'atzij rujolom ri Juan. Xuc'am lo pa jun plato y xuya c'u che rali, y rali xu'ya'a che ruchu.

²⁹ Echiri' xquita wa' rutijo'n ri Juan, xo'lquic'ama rucuerpo y xe'quimuku'.

Ri Jesús quebutzuk wo'ob mil achi-jab

(Mt. 14:13-21; Lc. 9:10-17; Jn. 6:1-14)

³⁰ Echiri' rutako'n ri Jesús xet-zelej lo che utzijoxic ri Utzilaj Tzij, xquimol quib ruc' Rire y xquitzijoj che janipa ri xqui'ano y xquic'utu.

³¹ Ec'u ri Jesús xubi'ij chique:

—Chixpeta wuc' ituquel, jo' cha' coje'uxlan q'uenok pa juna luwar pa na e junta wi winak —xcha'. Jela' xubi'ij chique ma lic e q'ui ri winak, e c'o ri quebec y e c'o ri quec'unic yey rique na utz ta chi ne quewa'ic.

³² Xeboc c'u bi ri Jesús cuc' rutijo'n quituquel chupa jun barco y xebec pa jun luwar catz'intz'otic. ³³ Pero lic e q'ui ri xebilowic echiri' xebec y xqueta'maj uwach ri Jesús. Ewi uq'uiyal winak xebec chakan, wa' ebelinak lo pa tak ri tinamit. Nabe c'u ri' xebopon chwa ri Jesús yey echiri' Rire xoponic, xquimol quib ruc'.

³⁴ Echiri' xel lo ri Jesús pa ri barco, xrilo e c'o chi uq'uiyal winak chiri'. Lic c'ut xejuch' ca'n pa ranima', ma

pacha' e bexex na jinta chajinel que. Ec'u ri Jesús xujek cuya uq'uiyal c'utunic chiquiwach. ³⁵ Echiri' lic benak k'ij chic, xekib lo rutijo'n ruc' y jewa' xquibi'ij che:

—Kajawal, wa luwar oj c'o wi lic catz'intz'otic y benak k'ij chic. ³⁶ Utz we quetak bi la ri winak cha' quebec pa tak raldeas y pa tak ri luwar c'o lo xa nakaj re que'quilok'o quiwa, ma ri wara na jinta c'o catijic —xecha'.

³⁷ No'j ri Jesús xuc'ul uwach:

—Chebitzuku ri'ix —xcha chique.

Rique xquibi'ij che:

—¿E camí ca'aj la ri' que'kalok'o quiwa conoje wa ticawex cha' quekatzuku? ¡Ri rajil wa' e junam ruc' queb ciento k'ij re chac! —xecha'.

³⁸ Ri Jesús xubi'ij chique:

—¿Janipa chi pam c'o iwuc'? Jix ji'wilape' —xcha chique.

Echiri' xqueta'maj, xquibi'ij che:

—Xa wo'ob chi pam y ca'ib chi car —xecha'.

³⁹ Ec'u ri Jesús xtakan che quetz'uyi' conoje ri ticawex chimutza'j pa tak ri rax q'uim. ⁴⁰ Xetz'uyi' c'u chimutza'j re jujun ciento y re nic'aj ciento.

⁴¹ Ec'u ri Jesús xuc'am ri wo'ob pam ruc' ri ca'ib car, xtzu'n chicaj y xtioxin chwach ri Dios. Tec'uchiri', xuwech' upa ri pam y xuya chique rutijo'n cha' caquijach chique ri winak. Y jela' xu'an ruc' ri queb car, xjachi' c'u ri' wa' chique conoje.

⁴² Conoje c'u ri winak xewa'ic y xenoj chi utz. ⁴³ Tec'uchiri', xquimol ri ch'aka'ta'k pam y car, y ruc' wa' xnoj lo cablajuj chacach. ⁴⁴ Yey ri xewa'ic e lo wo'ob mil chi achijab.

Ri Jesús cabin chwi ri ya'

(Mt. 14:22-27; Jn. 6:15-21)

⁴⁵ Tec'uchiri', ri Jesús xebutak rutijo'n cha' quebec bi chupa ri barco, quenabej bi chwach y quek'ax c'a ch'aka ya' che ri tinamit Bet-saida, xalok' Rire quebuch'a'bej tak can ruq'uiyal winak. ⁴⁶ Echiri' ebuch'a'bem chi canok, xel bi chwa ri juyub cha' cu'ana orar.

⁴⁷ Echiri' xoc rak'ab, ri barco c'o chi punic'ajal ri mar, yey ri Jesús utuquel canajinak can chu'lew. ⁴⁸ Anim tan c'u ri', ri Jesús xeril pan rutijo'n lic ruc' c'ax quetajin che ubinisaxic ri barco ruma runimal tew petinak chiquiwach. Ec'u ri Jesús xe'ec cuc'; e ri' cabin chwi ri mar, ya e ri' quic'ow chiquiwach.

⁴⁹ Pero rutijo'n echiri' xquilo cabin chwi ri ya', xquich'obo e juna espíritu. Xquijek c'u ri' quesiq'uinic, ⁵⁰ ma conoje xquilo y lic xquixi'ij quib che. Tec'uchiri', ri Jesús xebuch'a'bej, jewa' xubi'ij chique:

—Chinimarisaj ic'u'x, ma ri'in in Jesús; mixi'ij c'u iwib —xcha chique.

⁵¹ Xoc c'u bi ri Jesús cuc' chupa ri barco; ec'u runimal tew xtani'ic. Rutijo'n lic xcam canima' che, ⁵² ma c'amaja' ne caquimaj usuc' ri xu'an ri Jesús echiri' xu'an q'ui che ri pam, ma e pacha' ch'ukutal ri quina'oj.

Ri Jesús quebucunaj ri yewa'ib e c'o Genesaret

(Mt. 14:34-36)

⁵³ Ec'uchiri' xquik'axuj ri ya', xebopon che ri luwar re Genesaret y xquixim ri barco chuchi' ri ya'.

⁵⁴ Echiri' xebel lo chupa ri barco, na jampatana ri winak xqueta'maj uwach ri Jesús.

⁵⁵ Xebec c'u ri' re caquitzijoj puwi ri Jesús pa tak ronoje ri luwar re Genesaret. Yey ri winak re ronoje tak luwar xquijek quequic'am tak lo yewa'ib e telem lo chwa ch'at c'a pa ri luwar pa quitom c'o wi ri Jesús. ⁵⁶ Y tob pa tak chawi xoc wi ri Jesús, pa tak tinamit, pa tak aldeas o pa tak juyub, e c'o ri quequiya ri yewa'ib chuchi' tak ri be y caquicoj c'u quib chwach ri Jesús cha' cuya luwar chique tob ne xew ruchi' ruk'u' caquichapo. Conoje c'u ri quebanaw wa', quecunutajic.

7

Ri cach'ulan re ri ticawex

(Mt. 15:1-20)

¹ Ec'u ri fariseos cuc' jujun chique raj c'utunel re ri tzijpaxab e petinak Jerusalem, xquimol quib ruc' ri

Jesús. ² Wa' wa'chijab xquijek quequich'a'tibej jujun chique rutijo'n ri Jesús ma xequilo quewa'ic yey na quich'ajom ta ri quik'ab. Y wa' na e ta quic'utu'n can ri cati'-quimam. ³ Ma ri fariseos y ri nic'aj chic aj judi'ab e lic quitakem ri quic'utu'n can ri cati'-quimam. Rique na quewa' taj we na caquich'aj ta nabe ri quik'ab chi utz. ⁴ Y echiri' quetzelej lo pa c'aybal, na jinta c'o caquitijo we na caquich'aj ta nabe ri quik'ab, jela' pacha' ri c'utum can chique. Yey quitakem uq'uiyal c'utunic xa quimajom can chiquij cati'-quimam, jela' pacha' ru'anic cach'aj tak upa ri tijbal ya', ri xaro, rubitak sa'ch re ch'ich' y rujosk'ixic ri ch'at re warabal. ⁵ Ruma c'u la' ri fariseos y raj c'utunel re ri tzijpixab xquitz'onoj che ri Jesús:

—¿Su'be ri tijo'n la na quitakem ta ri quic'utu'n can ri kati'-kamam? Ma rique quewa'ic tob e la' na quich'ajom ta ri quik'ab —xecha'.

⁶ Ec'u ri Jesús xuc'ul uwach:

—¡Xa queb palaj alak! Lic katzij ri tz'ibital can ruma ri k'alajisanel Isaías pawil alak. Ma jewa' xutz'ibaj canok:

Wa' wa tinamit xa ruc' ruwaque' caquiyac nuk'ij,
no'j ri canima' lic naj c'o wi chwe.

⁷ Na jinta c'ana cutikoj caquilok'oj nuk'ij,

ma ri c'utunic caqui'ano xa takanic que achijab. *Is. 29:13*

⁸ Ec'u ralak e ya'om can alak Rutzij Upixab ri Dios y e lic coc alak il che u'anic ri quic'utu'n can ri ticawex, pacha' ca'an alak ruc' rujosk'ixic ri tijbal ya' y ruch'ajic upa ri xaro; yey c'o ne jujun chic pacha' tak wa' ca'an alak xa majom can alak —xcha'. ⁹ Je tanchi c'u wa' xubi'ij chique:

—Ralak 'anom alak che Rutzij Upixab ri Dios pacha' na jinta uchac, ruma e lic catajin alak che u'anic ri quic'utu'n can ri ticawex. ¹⁰ Ma ri Moisés jewa' utz'ibam can ojertan:

Chalok'oj quik'ij rachu-akaw *Éx. 20:12*

yey

We c'o junok quebuyaj ruchu-ukaw ruc' itzel ch'a'tem, ri' lic takal che cacamisaxic *Éx. 21:17*
xcha ri Moisés.

¹¹ »No'j ralak cabi'ij alak: “Utz we juna achi xew cubi'ij chique ruchu-ukaw: Na utz taj canto' alak, ma ri to'bal cajawax che alak, nubi'tisim chic re nukasa'n chwach ri Dios.”

¹² Yey chiwach ralak, china ri cabi'n re wa', na chirajawaxic ta chi che quebuto' ruchu-ukaw. ¹³ Jec'uri'la' 'anom alak che Rutzij Upixab ri Dios pacha' na jinta uchac, ruma tak ri no'jibal petinak lo chique ri chu'kaw alak. Yey takem alak uq'uiyal c'utunic pacha' tak wa' —xcha'.

¹⁴ Tec'uchiri', ri Jesús xebusiq'uij conoje ruq'uiyal ticawex y jewa' xubi'ij chique:

—Lic tanape onoje alak y lic maja alak usuc' wa': ¹⁵ Ri cach'ulan ri ranima' ri ticawex na e ta ri cutij bi, ma e ri quel lo pa ranima', e wa' ri cach'ulan re. ¹⁶ China c'u ri c'o utanibal che utayic, ¡chuta c'u ri! —xcha chique.

¹⁷ Ec'u ri Jesús xebuya can ruq'uiyal ticawex y xoc bi che jun ja. Tec'uchiri' rutijo'n xqui'an tz'onobal che puwi wa c'ambal na'oj. ¹⁸ Ewi rire xubi'ij chique:

—¿Ix neba jun ri'ix chique ri na jinta quina'oj puwi wa'? ¿Na quimaj ta neba usuc' e ri cach'ulan ri ranima' ri ticawex na e ta ri cutij bi? ¹⁹ Ma e janipa ri cutij bi, ri' na coc ta chupa ri ranima'; xa chupa rupa que'ec wi. Tec'uchiri', cu'pamaj bi —xcha'. Ruc' wa' ri Jesús xraj xubi'ij e ronoje tak ri re catijic, lic utz. ²⁰ Je tanchi wa' xubi'ij chique:

—E ri quel lo pa ranima' ri ticawex, e wa' ri cach'ulan re. ²¹ Ma pa ranima' ri ticawex quel wi lo tak ritzel na'oj, ri macunic chirij ri c'ulaniquil, ri caretz'abej uwa uk'ij ruc' jun chic na uc'ulel taj, ri camisanic, ²² ri elek', ri rayinic re puak, ri retzelal c'u'xaj, ri socoso'nic; ri rayibal re ri ti'jil, ri c'ax c'u'xaj chirij jun chic, ri itzel

ch'a'tem chirij junok, ri cu'an nim chiribil rib, ri na cuch'ob tana sa' ri cu'ano. ²³ Ronoje tak wa' wa itzel uwach, chupa ri ranima' ri ticawex quel wulok y e cach'ulan re rubinic — xcha'.

Ri cubulibal uc'u'x jun ixok na cuq'u'il ta ri ajjudi'ab

(Mt. 15:21-28)

²⁴ Xel bi ri Jesús chiri' y xopon pa tak ri luwar re Tiro y re Sidón. Xoc c'u chuchi' jun ja. Na xraj taj c'o queta'man re we Rire c'o chiri'; na ruc' ta c'u ri', xqueta'maj ri winak. ²⁵ C'o c'u jun ixok, e ri ralit c'o puk'ab jun itzel uxlaxel. Xew xuto c'o ri Jesús chiri', xc'unic y xuc'ak rib xe'rakan uk'ab ri Jesús. ²⁶ Ec'u rixok na cuq'u'il ta ri ajjudi'ab yey alaxel pa ri luwar re Sirofenicia. Xelaj c'u che cha' caresaj bi ri itzel uxlaxel che ri ralit.

²⁷ Ec'u ri Jesús xubi'ij che:

—Chirajawaxic na nabe quewa'ic y quenoj ri e ralc'o'al ri rajaw ja, ma na usuc' taj we junok cumaj ri quiwa ri ralc'o'al y cuc'ak bi chiquiwa ri tz'i' — xcha che.

²⁸ Rixok xuc'ul uwach:

—Katzij, Kajawal, pero ¿na quewa' ta neba ri tz'i' ruc' ruc'aj quiwa raç'alab catzak chuxe' ri mexa? — xcha'.

²⁹ Ri Jesús xubi'ij che:

—Ruma wa xabi'ij, canya chawe ri xatz'onoj. Jat c'u wo'ora ma ri itzel uxlaxel elinak chubi che rawalit — xcha'.

³⁰ Ec'uchiri' xopon rixok chirocho, xu'rika ri ralit cotz'ol chwa uwara-bal yey elinak chubi ri itzel uxlaxel che.

Ri Jesús cucunaj jun achi t'o'c y cach'ikch'otic

³¹ Ec'uchiri', xel tanchi ubi ri Jesús che tak ri luwar re Tiro y xic'ow pa ri tinamit Sidón. Xopon c'u chuchi' ri mar re Galilea y xe'ela pa tak ri luwar re Decápolis. ³² Chiri' xquic'am lo chwach ri Jesús jun achi t'o'c y cach'ikch'otic, yey ri ec'amayom lok xebelaj che cha' cuya ruk'ab puwi'.

³³ Ec'u ri Jesús xresaj bi rachi chiquixo'l ri winak. Tec'uchiri' xuju' ruwi tak uk'ab puxiquin rachi y xucoj jubik' uc'axaj tza'm ri rak'.

³⁴ Xtzu'n chicaj, xuq'uis uc'u'x y jec'uwa' xubi'ij che rachi: «¡Efata!» (Wa' pa ri ch'a'tem arameo que'elawi “chatjakatajok”.) ³⁵ Na jampatana c'u ri', rachi xjakataj ruxiquin, xquiritaj ri rak' y xujeko cach'a't chi utz.

³⁶ Ec'u ri Jesús lic xebupixabaj ri winak cha' na jinta c'ana c'o caquitz-ijoj wi, no'j ri winak tob ne quepix-abaxic, más ne xebec che utzijoxic.

³⁷ Lic c'u cacam canima' ri winak che y jewa' caquibi'ij: «Ronoje ri cu'ano lic utz, ma ri e t'o'c cu'an chique quetanic yey ri e me't cu'an chique quech'awic.»

8

Ri Jesús quebutzuk cajib mil ticawex

(Mt. 15:32-39)

¹ Chupa tak la' la k'ij xquimol quib uq'uiyal ticawex. Y ruma na jinta quiwa re caquitijo, ri Jesús xebusiq'uij rutijo'n y xubi'ij chique:

² —Lic cajuch' ca'n nuc'u'x chique wa ticawex ma e urox k'ij wa' e c'o wuc' y na jinta chi quiwa. ³ Yey we e la' quebenutak bi chicocho y na jinta c'o quitijom, ri' quebe'k'ochk'ob pa be, ma e c'o jujun chique lic naj e petinak wi — xcha'.

⁴ Rutijo'n xquibi'ij che:

—Pero, ¿pa carikitaj wi wa re quet-zuk wa uq'uiyal ticawex? Ma chupa wa luwar na jinta ne c'o e jekelic — xecha'.

⁵ Ri Jesús xutz'onoj c'u chique:

—¿Janipa chi pam c'o iwuc'? — xcha chique.

—Wukub — xecha rique.

⁶ Ewi ri Jesús xtakan che quetz'uyi' ri ticawex chu'lew. Xuc'am c'u ri wukub pam y xtioxin chwach ri Dios. Tec'uchiri', xuwech' upa y xuya chique rutijo'n cha' caquijach chique ruq'uiyal ticawex; y rique e xqui'ano.

⁷ Yey cuc'a'am ne jujun raltak co car. Ec'u ri Jesús xtioxin chwach ri Dios

puwi wa' y xtakan c'u che cajachi chique ri winak.

⁸ Xewa' c'ut y lic xenoj chi utz. Tec'uchiri', xmol ri ch'aka'ta'k quikax y ruc' wa' xnoj wukub chacach. ⁹ Ri xewa'ic, laj e juna cajib mil ticawex.

Ec'u ri Jesús xebuch'a'bej canok, ¹⁰ xoc c'u bi chupa ri barco cuc' rutijo'n y xebec pa tak ri luwar re Dalmanuta.

Ri fariseos caquitz'onoj juna c'utubal re ruchuk'ab ri Jesús (Mt. 16:1-4; Lc. 12:54-56)

¹¹ C'o jun k'ij ri fariseos xebopon ruc' ri Jesús y xquijeko e la' xa pa ch'a'tem caquichap pa ch'a'oj. Xquitz'onoj c'u che cu'an juna c'utubal re chila' chicaj chiquiwach cha' cak'alajinic we Rire takom lo ruma ri Dios; wa' xqui'ano xa re c'ambal upa.

¹² Ec'u ri Jesús lic xuq'uis uc'u'x y xubi'ij chique:

«¿Su'be ri ticawex re wak'ij ora e caquitz'onoj can'an juna c'utubal cha' cak'alajinic we intakom lo ruma ri Dios? Pakatzij wi cambi'ij chiwe: Na jinta juna c'utubal caya'taj chique» xcha'. ¹³ Ewi xebuya canok, xoc tanchi ubi chupa ri barco y xk'ax ch'aka ya'.

Ri quic'utunic ri fariseos (Mt. 16:5-12)

¹⁴ Ec'u rutijo'n ri Jesús xic'ow chiquic'u'x caquic'am bi pam y xa jun chi pam c'o cuc' chupa la barco.

¹⁵ Ewi ri Jesús xebupixabaj, jewa' xubi'ij chique: «Lic chichajij iwib chwa ri “levadura”^{*} que ri fariseos y chwa ri “levadura” re ri Herodes» xcha'.

¹⁶ Rutijo'n xquibi'ij c'u chiquiwach: «Cubi'ij wa' ma reta'am na jinta pam xkac'am lok» xecha'.

¹⁷ Ri Jesús xreta'maj sa' la caquich'a'tibej chiquiwach y xubi'ij c'u chique:

—¿Su'be quich'a'tibej chiwach puwi ri na xic'am ta lo pam? ¿C'amaja' neba quimaj usuc'? ¿Lic cami c'a ch'ukutal rina'oj? ¹⁸ C'o wa' c'u iwach yey e pacha' na quixtzu'n taj. C'o wa' c'u ixiquin yey e pacha' na quixtan taj. ¿Lic neba na cac'un ta chic'u'x ¹⁹ echiri' xinjach ri wo'ob pam chique ri wo'ob mil ticawex? ¿Janipa c'u chacach xinojisaj ruc' ri quikax? —xcha'.

Rutijo'n xquic'ul uwach:

—Cablajuj chacach —xecha'.

²⁰ Xutz'onoj tanchi chique:

—Yey echiri' xinjach ri wukub pam chique ri cajib mil ticawex, ¿janipa lo chacach xinojisaj ruc' ri quikax? —xcha'.

Rique xquic'ul uwach:

—Wukub chacach —xecha'.

²¹ Jec'uwa' xuq'uisbej cuc':

—¿Su'be c'u ri' c'amaja' c'ana quimaj usuc'? —xcha chique.

Ri Jesús cucunaj jun potz' pa ri tina-mit Betsaida

²² Tec'uchiri', xebopon pa ri tina-mit Betsaida. Tak ri winak xquic'am lo jun potz' chwa ri Jesús y xebelaj c'u che cha' cucunaj. ²³ Ec'u ri Jesús xuchap ruk'ab ri potz', xresaj bi chupa ri tinamit y xchuban che tak ruwach. Tec'uchiri', xuya ruk'ab puwi' y xutz'onoj che we caril q'uenok.

²⁴ Ri potz' xtzu'n pana chwach y xubi'ij:

—Quebenuwil rachijab pacha' chi e che' quebinic —xcha'.

²⁵ Ri Jesús xuya tanchi ruk'ab puwi ruwach ri potz'. Jec'ula' ri potz' xcunutajic y utz xtzu'nic. Xtzu'n c'u pana naj y xril ronoje chi utz.

²⁶ Tec'uchiri' ri Jesús xutak bi chirocho y jewa' xubi'ij che:

—Matoc bi pa ri tinamit y matzijoje ne c'ana che junok e ri'in xatincunaj —xcha che.

* **8:15** “Levadura”: Jela' pacha' ri levadura cusipowirisaj upa ri pam; jec'ula' ri quina'oj ri fariseos y ri Herodes, na jampatana cuyoj ri quina'oj ri winak.

Ri Pedro cuk'alajisaj ri Jesús e ri Cristo

(Mt. 16:13-20; Lc. 9:18-21)

²⁷ Ri Jesús cuc' rutijo'n xebec pa tak ri aldeas re ri tinamit Cesarea re Filipo.† Yey chupa c'u ri be, ri Jesús xutz'onoj chique rutijo'n:

—Chiquiwa ri winak, ¿in china nawi ri'in? —xcha'.

²⁸ Rique xquic'ul uwach che:

—C'o quebi'n re, lal ri Juan Aj Ya'l Bautismo; jujun chic caquibi'ij lal ri Elías; y jujun chic, lal junok chique tak ri k'alajisanelab re ojertan —xecha'.

²⁹ Tec'uchiri', xutz'onoj chique:

—Yey chiwach ri'ix, ¿in china ri'in? —xcha'.

Ri Pedro xuc'ul uwach:

—Rilal lal ri Cristo, Rucha'o'n lo ri Dios —xcha'.

³⁰ Ewi ri Jesús xebutak che na caquitzijoj ta che junok china Rire.

Ri Jesús cach'a't puwi rucamic y ruc'astajibal

(Mt. 16:21-28; Lc. 9:22-27)

³¹ Xujek c'u ubi'xiquil chique:

«Lic chirajawaxic che Ralaxel Chiquixo'l Ticawex cutij na ri c'ax y cac'ak bi uk'ij cuma ri nimak winak re ri tinamit, ri nimak e aj chacunel pa Rocho Dios y raj c'utunel re ri tzijpixab. Tec'uchiri', cacamisaxic; no'j churox k'ij cac'astaj lok» xcha'.

³² Wa' xuk'alajisaj chi utz chique.

Ec'u ri Pedro xresaj bi ri Jesús chiquixo'l y xuch'a'bej upa ruma ri xubi'ij. ³³ No'j ri Jesús xutz'u' lo quiwach rutijo'n y xuch'a'bej c'u upa ri Pedro, jewa' xubi'ij che:

—¡Chatel chinuwach, Satanás! Ma ri'at na e ta cach'ob puwi ri uch'obom lo ri Dios, xew e cach'ob jela' pacha' ri caquich'ob ri winak —xcha che.

Ri chirajawaxic chique ri cacaj queterej chirij ri Jesús

(Mt. 16:24-28; Lc. 9:23-27)

³⁴ Ec'uchiri', xebusiq'uij ri winak y rutijo'n, y jec'uwa' xubi'ij chique:

«We c'o junok caraj caterej lo chwij, lic chirajawaxic che mu'an xew ri caraj rire, e chucuyu ri c'ax cape puwi' ruma ucojom ri nubi' yey tereja lo chwij. ³⁵ Ma china ri na cuya ta ranima' ruc'aslem, ri' e cujam ri chomilaj c'aslemal chwach ri Dios; no'j ri cuya ranima' ruc'aslem wuma ri'in y ruma ri Utzilaj Tzij, ri' e curik ri chomilaj uc'aslemal chwach ri Dios. ³⁶ Ma ¿sa' c'u cutikoj ri' che ri ticawex we cu'an rajaw ronoje ruwachulew yey cusach c'u uwach ruc'aslemal? ³⁷ ¿O c'o nawi rajil cutoj rachi chwa ruc'aslemal cha' na cujam taj? ¡Na jintaj!

³⁸ »Mixq'uix c'u chwe ri'in y che ri nuch'a'tem chiquiwach raj maquib re wak'ij ora, ri na jusuc' ta ri canima' chwach ri Dios. Ma ri ca'anaw wa', ri in Alaxel Chiquixo'l Ticawex quinq'uix che rire echiri' quinc'un lo ruc' runimal uchomalil ri Nukaw y cuc' tak ri santowilaj ángeles» xcha'.

9

¹ Tec'uchiri', xubi'ij chique:

—Pakatzij wi cambi'ij chiwe: E c'o jujun chique wa e c'o wara, na quecam tana we na xquil tubi ruc'unibal rutakanic ri Dios ruc' unimal chuk'ab —xcha'.

Ri jalc'atajibal uwach ri Jesús

(Mt. 17:1-13; Lc. 9:28-36)

² Wakib k'ij c'u ubi'xiquil ri' wa', echiri' ri Jesús xebucha' ri Pedro, ri Jacobo y ri Juan y xebuc'am bi quituquel chwa jun nimalaj juyub. Chila' c'ut xjalc'atitaj uwach ri Jesús chiquiwach. ³ Ruk'u' lic cawolk'inic, xu'an lic sak pacha' ri nieve;* rusakil xilitajic na junta c'o ca'anaw re che ruwachulew. ⁴ Xakic'ate't c'ut chiquiwach xewinakir ri Elías y ri Moisés, k'alajisanelab re ojertan; e ri quech'a't ruc' ri Jesús.

⁵ Ec'u ri Pedro xubi'ij che ri Jesús:

† 8:27 C'o queb tinamit Cesarea quibi'. Wa jun e ri c'o chwa ri juyub Hermón pa xtakan wi ri Felipe, ruc'ajol ri Herodes. * 9:3 Ri nieve jela' rusakil pacha' catzu'n ri sakbach. † 9:5 Ruchac wa' wa rancho xraj cu'an ri Pedro e re caquiloc'nimaj quik'ij ri queb k'alajisanelab y ri Jesús.

—Kajawal, lic utz xya'taj chike ri'oj oj c'o wara. Ka'ana oxib rancho:† jun e la, jun re ri Moisés y jun re ri Elías — xcha'. ⁶ Ri Pedro xubi'ij wa' ruma na cuna' taj sa' ri cubi'ij, ma rire cuc' ri queb chic rachbi'il lic quixi'im quib.

⁷ Ec'uchiri', xkaj lo jun sutz' y xu'an mu'j paquiwi'. Chupa c'u ri' ri sutz' xquita rukul ri Dios, jewa' xubi'ij: «E Nuc'ajol wa' ri lic c'ax canna'o; e chita utzij Rire» xcha'.

⁸ C'ate c'u xquilo, xew chi ri Jesús c'o cuc'.

⁹ Echiri' xekaj lo chwa ri juyub, ri Jesús xebutak che na caquitzijoj ta c'ana che junok janipa ri xquilo; c'ate caquitzijoj echiri' Ralaxel Chiquixo'l Ticawex c'astajinak chi lo chiquixo'l ri ecaminak. ¹⁰ Ec'u rique lic xquic'ol pa canima' ri xbi'x chique y xquijek caquitz'onobej chiquiwach puwi sa' que'elawi ri c'astajibal lo re Ralaxel Chiquixo'l Ticawex.

¹¹ Ec'uchiri', xquitz'onoj che ri Jesús:

—¿Su'be raj c'utunel re ri tzijpaxab caquibi'ij lic chirajawaxic nabe na cac'un ri Elías chwach pan ruc'unibal Ralaxel Chiquixo'l Ticawex? — xecha'.

¹² Ec'u ri Jesús xuc'ul uwach:

—Katzij, lic chirajawaxic nabe na cac'un ri Elías y cuyijba' pan ronoje chwach ruc'unibal Ralaxel Chiquixo'l Ticawex. Pero ¿sa' quich'ob ri'ix puwi ri tz'ibital can chupa Rutzij Upixab ri Dios? Ma cubi'ij lic chirajawaxic na, Ralaxel Chiquixo'l Ticawex cutij c'ax y na jinta uk'ij ca'anic. ¹³ No'j c'u ri'in cank'alajisaj wa' chiwe: Ri Elías ya xc'unic yey ri winak xqui'an che janipa ri xcaj rique, jela' pacha' ri tz'ibital can puwi rire —xcha'.

Ri Jesús cucunaj jun ala c'o puk'ab jun itzel uxlabixel

(Mt. 17:14-21; Lc. 9:37-43)

¹⁴ Echiri' xebopon pa e c'o wi can ri jujun chic utijo'n, xquilo e c'o uq'uiyal winak quisutum quij yey raj

c'utunel re ri tzijpaxab quequicha-pala' che ch'a'oj. ¹⁵ Conoje c'u ri winak lic xequi'cotic echiri' xquil ri Jesús. Quebanic xe'quic'ulu' apanok y xquiya rutzil uwach. ¹⁶ Xutz'onoj c'u Rire chique:

—¿Sa' puwi cachapala' wi ib alak cuc'rique? —xcha'.

¹⁷ C'o c'u jun chiquixo'l ruq'uiyal winak jewa' xuc'ul uwach:

—Lal tijonel, nuc'amom lo ri nuc'ajol chiwach la, ma rire c'o puk'ab jun itzel uxlabixel u'anom me't che. ¹⁸ Xa tob pa cuchap wi, cuc'ak pulew. Ec'uchiri', rala cujek capuluwan ruc'axaj, cakich'ich' ruwi tak re' y cacana' can junchi chuc'uchic. Xintz'onoj c'u chique ri tijo'n lacha' caquesaj bi ri itzel uxlabixel, pero rique na xquich'ij ta resaxic bi —xcha'.

¹⁹ Ec'u ri Jesús xuc'ul uwach, jewa' xubi'ij chique:

—¡E ri ix ticawex re wak'ij ora, na cubul ta c'ana ic'u'x wuc'! ¿Janipa chi lo k'ij cajawaxic quinc'oji' iwuc' cha' cacubi' ic'u'x wuc'? ¿Janipa chi lo k'ij quixincuyu e la' jela' i'anom? Chic'ama lo rala wara —xcha'.

²⁰ Xquic'am c'u lo rala chwach. Ec'u ri itzel uxlabixel echiri' xril uwach ri Jesús, lic co xujabaja' rala. Ec'u rala xtzak pulew y xujeko cubalcatila' rib, capuluwan ruc'axaj.

²¹ Ri Jesús xutz'onoj c'u che rukaw rala:

—¿Jampa ujekom lo wa' che? — xcha'.

Rachi xuc'ul uwach:

—Chuch'uti'nal upetebem lok. ²² Uq'uiyal laj uc'akom pa ak' y pa ya' re camisaxic uwach. We c'o co pak'ab la cato' la, c'utu co ri c'axna'bal c'u'x la chike y chojto'o la —xcha'.

²³ Ri Jesús xuc'ul uwach:

—¿Su'be cabi'ij la chwe we c'o panuk'ab can'an wa'? Ma we c'o junok lic cubul uc'u'x wuc', ronoje quel pana ruc' —xcha'.

²⁴ Ec'u rukaw rala na jampatana co xch'awic, jewa' xubi'ij:

—Cubul nuc'u'x uc' la, xew chinto'o co la cha' canimar ri cubulibal nuc'u'x —xcha'.

²⁵ Ec'u ri Jesús echiri' xrilo catajin quimolotajic ruq'uiyal winak, xtakan puwi ri itzelilaj uxlabixel, jewa' xubi'ij che:

—Itzelilaj uxlabixel, ri a'anom me't y t'o'c che wa'la, ri'in catintako: Jat, chatelubi y mat-tzelej chi lo c'ana ruc' —xcha che.

²⁶ Ewi ri itzel uxlabixel xsiq'uinic y lic co xujabaja' rala; tec'uchiri', xel bi. Ec'u rala xcanaj canok pacha' caminak chic. Ruma ri', lic e q'ui ri xebi'n re: «Ya xcamic» xecha'.

²⁷ Pero ri Jesús xuchap ruk'ab, xuyaco; y rala xtaq'ui'ic.

²⁸ Ec'uchiri', xoc bi ri Jesús chuchi' jun ja. Ec'u rutijo'n xech'a't ruc' xa quituquel chic, jewa' xquitz'onoj che:

—¿Su'be ri'oj na xkach'ij tubi resaxic wa' wa itzel uxlabixel? —xecha'.

²⁹ Ri Jesús xuc'ul uwach:

—E tak wa' wa juch'ob itzel uxlabixel, xew utz quebesax bi ruc' oración y ayuno —xcha'.

Ri Jesús cach'a't tanchi puwi rucamic

(Mt. 17:22-23; Lc. 9:43-45)

³⁰ Echiri' xebel bi chiri', xebic'ow pa tak ri luwar re Galilea. Pero ri Jesús na xraj taj c'o queta'man re, ³¹ ma cac'utun chiquiwach rutijo'n. Jec'uwa' cubi'ij chique:

«Ralaxel Chiquixo'l Ticawex caya'i' paquik'ab rachijab y cacamisax cuma, no'j echiri' caminak chic, cac'astaj lo churox k'ij» xcha'.

³² Ec'u rutijo'n na xquimaj ta usuc' la cubi'ij chique, yey caquixi'ij quib caquitz'onoj che ri Jesús sa' que'elawi wa'.

China ri lic c'o uwach

(Mt. 18:1-5; Lc. 9:46-48)

³³ Xebopon c'u chupa ri tinamit Capernaúm y echiri' e c'o chi chuchi' jun ja, xutz'onoj chique rutijo'n:

—¿Sa' puwi quichapala' wi iwib chiwach echiri' quixtajin lo chi be? —xcha chique.

³⁴ Yey na jinta c'u junok chique xch'awic; ma echiri' c'a quetajin lo chi be, e caquichapala' quib chiquiwach puwi' chinok chique caya'i' más uwach.

³⁵ Ewi ri Jesús xtz'uyi'ic, xebusiq'uij ri cablajuj utijo'n y xubi'ij chique:

—We c'o junok caraj e rire ri cac'o'ji' nabe chiquiwach conoje, ri' chirajawaxic che e cacana'j can pa q'uisbal chique conoje y cuya rib quebunimaj —xcha chique.

³⁶ Xuc'am c'u jun ralco c'o'm y xuya chiquinic'ajal rique. Xuk'aluj c'ut y jewa' xubi'ij chique:

³⁷ —China ri cuc'ul chupa ri nubi' junok na jinta uwach pacha' wa ralco c'o'm, e junam ruc' in ri quinuc'ulu; yey china ri cac'uluw we ri'in, na xew ta quinuc'ul ri'in, ma e cuc'ul ri Jun takayom lo we ri'in —xcha'.

China ri na cach'o'jin ta chikij, ri' e kuq'uul

(Lc. 9:49-50)

³⁸ Ec'u ri Juan xubi'ij che ri Jesús:

—Kajawal, xkil jun achi queberegaj bi itzel uxlabixel chupa ri bi' la yey rire na kuq'uul taj. Ec'u ri'oj xkabi'ij che mu'an chi wa' —xecha'.

³⁹ Ri Jesús xuc'ul uwach:

—We c'o ca'anaw wa', mik'atej, ma na jinta junok cu'an juna milagro chupa ri nubi' yey pa jok'otaj c'u ri' cach'a't lo chwij. ⁴⁰ Ma china ri na cach'o'jin ta chikij, ri' e kuq'uul. ⁴¹ China ri cusipaj juna tzima iya' chupa ri nubi' ruma ix re ri Cristo, pakatzij wi cambi'ij chiwe, ri' na cujam ta c'ana ri rajil uc'axel.

Ri k'atbal tzij re ri Dios c'o paquiwi ri caquimin jun chic pa mac

(Mt. 18:6-9; Lc. 17:1-2)

⁴² »No'j china ri cumin pa mac junok chique wa ch'uti'k[‡] cubul

[‡] 9:42 «Ch'uti'k»: Wa' e tak ri na jinta quichuk'ab, ri na jinta quiwach o ri c'ac' xquicuba' quic'u'x ruc' ri Jesús.

quic'u'x wuc', e ne más utz catzayabax bi pukul juna nimalaj ca' re que'em y cac'ak c'u bi chupa ri mar.

⁴³ »We rak'ab e catzakisan awe pa mac, chak'ata bi. Ma xa ne cuya tob at t'um catopon pa ri c'aslemal chila' chicaj, chwa ri c'o ucabichal rak'ab yey catc'ak bi chi xibalba' re tijbal c'ax, chupa ri ak' na jinta chi uchupic ⁴⁴ pa na quecam ta wi ramoloy quetijow que wa' wa winak ecaminak, yey ri ak' na jinta chi uchupic. *Is.*

66:24

⁴⁵ »Yey we rawakan e catzakisan awe pa mac, chak'ata bi. Ma xa ne cuya tob at jetz' catopon pa ri c'aslemal chila' chicaj, chwa ri c'o ucabichal rawakan yey catc'ak bi chi xibalba' re tijbal c'ax, chupa ri ak' na jinta chi uchupic

⁴⁶ pa na quecam ta wi ramoloy quetijow que wa' wa winak ecaminak, yey ri ak' na jinta chi uchupic. *Is.*

66:24

⁴⁷ »Yey we rawach e catzakisan awe pa mac, chawesaj bi. Ma xa ne cuya ri xa jun rawach catoc pa rutakanic ri Dios, chwa ri c'o ucabichal rawach yey catc'ak bi chi xibalba' re tijbal c'ax

⁴⁸ pa na quecam ta wi ramoloy quetijow que wa' wa winak ecaminak, yey ri ak' na jinta chi uchupic. *Is.*

66:24

⁴⁹ »Chirajawaxic c'ut conoje cac'am na quipa, pacha' quebic'owisax pa ak'. E pacha' ri ca'an ruc' ronoje kasa'n caya'i' chwach ri Dios: cacowisax ruma ratz'am. ⁵⁰ E ratz'am lic cajawaxic, no'j we xsach rutzayul, ¿su'anic tanchi ca'an tza che? Chirajawaxic c'ut lic c'o cutikoj ribinic isilabic ri'ix jela' pacha' ratz'am lic curik uchac. ^{*} C'ola c'u rutzil chomal chiwach chijujunal —xcha chique.

^{*} 9:49 Lv. 2:13 ^{*} 9:50 Mt. 5:13; Lc. 14:34-35 ^{*} 10:4 Dt. 24:1 ^{*} 10:12 Chupa ri takanic re ri Moisés, na ya'tal ta che juna ixok cuya bi ruwujil re jachbal ib che ri rachijil, pero chupa ri takanic que ri na e ta aj Israel, caya' luwar chique rixokib caqui'an wa'.

10

Ri Jesús cac'utun chwi ri jachbal ib (Mt. 5:31; 19:1-12; Lc. 16:18)

¹ Ri Jesús xel bi che ri tinamit Capernaúm y xe'ec pa tak ri luwar re Judea y che tak ri luwar c'o ch'aka ya' che ri nimaya' Jordán. E tak c'u ri winak xquimol quib ruc', y Rire xujek cac'utun chiquiwach pacha' ri xex cu'an wi. ² Xekib c'u ri fariseos ruc' y xqui'an jun tz'onobal che xa re c'ambal upa:

—¿Ya'tal nawi puk'ab juna achi cuya bi ruwujil re jachbal ib che ri rixokil? —xecha'.

³ Ec'u ri Jesús xuc'ul uwach:

—¿Sa' cubi'ij ri takanic xu'an can ri Moisés che alak? —xcha'.

⁴ Rique xquibi'ij:

—Ri Moisés xuya luwar che rachi cuya bi ruwujil re jachbal ib che ri rixokil y jec'ula' na rixokil ta chic^{*} —xecha'.

⁵ Ri Jesús xubi'ij chique:

—Xutz'ibaj ne can ri' wa' wa jun takanic ma e ruma lic co ri anima' alak. ⁶ No'j Ruch'a'tem ri Dios cubi'ij: Che ri jekebal lo ruwachulew echiri' ri Dios xebu'an ri ticawex, chi achi chi ixok xebu'ano. *Gn. 1:27*

⁷ Y cubi'ij: Ruma c'u ri', rachi echiri' cac'uli'ic, caresaj rib chiquij ruchu-ukaw cha' cajeki' ruc' ri rixokil;

⁸ y quicabichal c'u ri' quebu'ana xa e jun chwach ri Dios *Gn. 2:24* cacha'. Jec'uri'la', na e ta chi ca'ib ma xebu'ana xa e jun. ⁹ E uwari'che, ri xebujunimaj ri Dios, na ya'tal ta che ri ticawex cujach quipa —xcha'.

¹⁰ Ec'uchiri' e c'o chi chi'ja, rutijo'n xquitz'onoj tanchi che puwi wa xutzijoj. ¹¹ Ri Jesús xubi'ij chique:

—E junok cuya ruwujil re jachbal ib che ri rixokil yey cac'uli' tanchi ruc' juna chic ixok, ri' camacun chwach ri Dios chirij ri nabe rixokil. ¹² Jec'ula' rixok, we cuya ruwujil re jachbal ib che ri rachijil* yey cac'uli'

tanchi ruc' juna chic achi, ri' jenela' camacun chirij ri c'ulaniquil —xcha'.

Ri Jesús cuyac quik'ij rac'alab
(Mt. 19:13-15; Lc. 18:15-17)

¹³ E c'o jujun raltak co ac'alab xec'am lo chwach ri Jesús cha' cuya ruk'ab paquiwi'. No'j rutijo'n xequiyaj ri ec'amayom lo que.

¹⁴ Ri Jesús, echiri' xril wa', xpe roy-owal y jewa' xubi'ij chique: «Chiya'a luwar chique ri raltak co ac'alab chepeta na wuc'. Mebik'atej; ma ri caqui'an e jela' pacha' rique, ri' cu'an que rutakanic ri Dios. ¹⁵ Pakatzij wi cambi'ij chiwe: China ri na cuc'ul ta rutakanic ri Dios jela' pacha' cu'an juna ralco c'o'm, ri' na coc ta chupa» xcha'. ¹⁶ Tec'uchiri', xebuk'aluj ri raltak co ac'alab, xuya ruk'ab paquiwi' y xebu'an bendecir.

Jun beyom cach'a't ruc' ri Jesús
(Mt. 19:16-30; Lc. 18:18-30)

¹⁷ Echiri' catajin bi relic ri Jesús re cumaj tanchi ubi rube, cac'alalic xopon jun ruc', xuxucuba' rib chwach y xutz'ononj c'u che:

—Lal utzilaj tijonel, ¿sa' ri can'ano cha' c'o nuc'aslemal na jinta utakexic? —xcha'.

¹⁸ Ri Jesús xuc'ul uwach:

—¿Su'be cabi'ij la “utz” chwe? Ma xa jun ri lic utz c'olic, wa' e ri Dios. ¹⁹ Rilal eta'am chi la sa' tak Rutzij Upixab ri Dios: “Matmacun chirij ri c'ulaniquil. Matcamisanic. Matelek'ic. Ma'an rak'ubal chirij junok. Mac'o ma'an xa ruc' so-coso'nic. Chalok'oj quik'ij rachukaw”^{*} —xcha che.

²⁰ Rachi xuc'ul uwach:

—Lal tijonel, ronoje wa' nu'anom lo chwi nuch'uti'nal —xcha'.

²¹ Ewi ri Jesús xutz'ul uwach y lic xjuch' can uc'u'x che. Xubi'ij c'u che:

—Xa jun chi ri lic chirajawaxic wi ca'an la: Oj la, c'ayij la ronoje tak ri beyomalil la y jacha c'u la chique ri niba'ib; jec'uri'la' c'o beyomalil la chila' chicaj. Tec'uchiri', peta la, terej

lo la chwij y cuyu la ri c'ax cape pawil la ruma lal nutijo'n —xcha che.

²² Ec'u rachi lic xuchap ranima' che ri xubi'ij ri Jesús; lic cabisonic xe'ec, ma rire lic rajawal beyom.

²³ Tec'uchiri', ri Jesús xebutzu' conoje y xubi'ij chique rutijo'n:

—Ri e beyomab lic c'ayew chique queboc chupa rutakanic ri Dios —xcha'.

²⁴ Rutijo'n ri Jesús lic xcam canima' che wa xubi'ij. Rire xubi'ij c'u chique:

—Ix walc'o'al, e janipa ri lic quicubam quic'u'x ruc' ri quibeyomalil, lic c'ayew chique queboc chupa rutakanic ri Dios. ²⁵ E ne más c'ayew coc juna beyom chupa rutakanic ri Dios chwa ri quic'ow juna camello chupa rutel juna acuxa' —xcha'.

²⁶ Rique lic xcam canima' che wa y xquibi'ij c'u chiquiwach: «We e ri', ¿china c'u ri' ri cacolobetajic?»[†] xecha'.

²⁷ Ec'u ri Jesús xutz'ul quiwach, xubi'ij chique:

—Ri ticawex na caquicolobej ta quib quituquel ma wa' lic c'ayew chiquiwach, no'j ri Dios ronoje cu'ano ma na jinta c'ayew chwach Rire —xcha'.

²⁸ Ec'u ri Pedro xujek ubi'ixiquil che ri Jesús:

—Kajawal, e ri'oj kaya'om can ronoje y oj teran chi'ij la —xcha'.

²⁹ Ri Jesús xubi'ij:

—Pakatzij wi cambi'ij chiwe: China ri uya'om can rocho, ebuya'om can ri ratz-uchak', ruchu-ukaw, ri rixokil, ri ralc'o'al o rulew, ruma ucojom ri nubi' ri'in y ruma rutzi-joxic ri Utzilaj Tzij, ³⁰ ri' cuc'ul wara che ruwachulew chupa tak wa k'ij oj c'o wi, jun ciento ri rajil uc'axel ruma tak ri uya'om canok, tob lic cutij c'ax ruma wa'. Yey chwach c'u apanok cuc'ul na ri c'aslemal na jinta utakexic. ³¹ Lic c'u e q'ui chique ri lic c'o quiwach wo'ora, chwach apanok

^{*} 10:19 Éx. 20:12-16 † 10:26 Chiquiwach raj judi'ab, we junok c'o ubeyomal e ruma utz u'anom chwach ri Dios. Caquich'ob c'u rique, we c'ayew chique ri beyomab queboc chupa rutakanic ri Dios, más ne c'ayew ri' chique ri niba'ib.

na jinta chi quiwach; yey lic e q'ui chique ri na jinta quiwach wo'ora, e lic cac'oji' quiwach chwach apanok —xcha'.

Ri Jesús cach'a't tanchi puwi rucamic

(Mt. 20:17-19; Lc. 18:31-34)

³² Ec'u ri' quimajom bi ri be re quepaki' Jerusalem, yey ri Jesús nabe bi chiquiwach. Ec'u rutijo'n lic sachinak quina'oj y ruc' xi'in ib eteran chirij. Ec'uchiri', ri Jesús xebuc'am tanchi ubi quituquel ri cablajuj utijo'n y xujek ubi'xiqul chique sa' tak ri caric'owibej. ³³ Jawa' xubi'ij:

—Chitape': E wa' cojpaki' Jerusalem, yey Ralaxel Chiquixo'l Ticawex caya' na paquik'ab ri nimak e aj chacunel pa Rocho Dios y raj c'utunel re ri tziypixab, cha' caquik'at tzij puwi' re camic y caquiya paquik'ab ri winak na e ta aj judi'ab. ³⁴ Cach'amix c'u ri', cajich' upa, cachubaxic y cacamisaxic. No'j churox k'ij cac'astaj bi chiquixo'l ri ecaminak —xcha'.

Ri xquitz'onoj ri Jacobo y ri Juan che ri Jesús

(Mt. 20:20-28)

³⁵ Ec'u ri Jacobo y ri Juan, ri queb uc'ajol ri Zebedeo, xekib ruc' ri Jesús y xquibi'ij che:

—Kajawal, cakaj ca'an co la chike janipa wa cakatz'onoj che'la —xecha'.

³⁶ —¿Sa' ri quiwaj can'an chiwe? —xcha ri Jesús chique.

³⁷ Rique xquibi'ij che:

—E cakaj ri'oj caya la chike chupa ri chomilaj takanic la, jun chike catz'uyi' pawiquik'ab la yey ri jun chic pa mox la —xecha'.

³⁸ Ri Jesús xubi'ij c'u chique:

—Ri'ix na iweta'am taj sa' la quitz'onoj. ¿Quich'ij neba ri'ix ri quinic'ow wi ri'in y ri c'ax cape panuwi'? —xcha'.

³⁹ Rique xquibi'ij:

—Cakach'ijo —xecha'.

Ri Jesús xubi'ij chique:

—Katzij, ri'ix quich'ij na ri c'ax quinic'ow wi ri'in y ri c'axc'obic cape panuwi'. ⁴⁰ No'j c'u ri quixtz'uyi' pa nuwiquik'ab y pa numox, na in ta quinya'w re, ma xew caya'taj chique ri echa'tal chic cha' cu'ana na que —xcha'.

⁴¹ Ri lajaj chic tijo'n, echiri' xquita wa', lic xpe coyowal chiquij ri Jacobo y ri Juan. ⁴² Ec'u ri Jesús xebusiq'uij y xubi'ij chique:

—Iweta'am ri'ix, ri ecojtalic e takanelab paquiwi ri nimak tinamit quebu'ana pacha' e rajaw ronoje, yey ri lic c'o quiwach quic'ow uwi' ri takanic caqui'an paquiwi ri eya'tal paquik'ab. ⁴³ No'j chixo'l ri'ix na ube taj jela' cu'ano. Ma we c'o junok chiwe ri'ix caraj cu'ana aj wach, e chuya'a rib cu'an nimanel iwe'ix. ⁴⁴ Yey e junok chiwe caraj cu'ana nabe chixo'libal, e chuya'a rib cu'an nimanel que conoje. ⁴⁵ Ma Ralaxel Chiquixo'l Ticawex na xc'un taj re canimaxic. Rire xc'unic re co'lnimanok y re colu'ya'a rib pa camic che quicolobexic uq'uiyal ticawex —xcha'.

Ri Jesús cucunaj jun potz' Bartimeo rubi'

(Mt. 20:29-34; Lc. 18:35-43)

⁴⁶ Ec'uchiri', ri Jesús cuc' rutijo'n xebic'ow chupa ri tinamit Jericó, y uq'uiyal winak xeterej bi chirij. Echiri' catajin bi quelic chupa ri tinamit, xebic'ow pa tz'ul wi ri Bartimeo, wa' e jun potz' uc'ajol ri Timeo. Rire e ri' cutz'onoj limoxna.

⁴⁷ Ec'uchiri' xuto e Jesús ri aj Nazaret ri catajin ric'owic, xujeko casiq'uinic:

—¡Jesús, lal ri Ralc'o'al can ri rey David, chinjuch' ca'n co che'la! —xcha'. ⁴⁸ Uq'uiyal winak xquich'a'bej upa cha' na casiq'uin ta chic, no'j rire más ne co casiq'uinic:

—¡Lal ri Ralc'o'al can ri rey David, chinjuch' ca'n co che'la! —cacha'.

⁴⁹ Ec'u ri Jesús xtaq'ui'ic y xutak usiq'uixic ri potz'. Ri xebe'siq'uin re xquibi'ij che:

—¡Chanimarisa ac'u'x! ¡Chatyactajok! Ri Jesús catusiq'uij —xecha'.

⁵⁰ Ri potz' xuc'ak can ruk'u' uripom chirij, xyactajic y xopon pa c'o wi ri Jesús.

⁵¹ Ri Jesús xubi'ij c'u che:

—¿Sa' ri cawaj can'an chawe? — xcha'.

Ri potz' xuc'ul uwach:

—Lal tijonel, cuaj quintzu'n tanchic —xcha'.

⁵² Ec'u ri Jesús xubi'ij che:

—Jat chi utzil chomal, ma ruma ri cubulibal ac'u'x wuc', at cunutajinak chic —xcha'. Chupa c'u ri' la jok'otaj, ri potz' xtzu'nic y xterej bi chirij ri Jesús.

11

Ri winak caquiyac uk'ij ri Jesús echiri' coc Jerusalem

(Mt. 21:1-11; Lc. 19:28-40; Jn. 12:12-19)

¹ Ri Jesús cuc' rutijo'n xa nakaj chi e c'o lo che ri tinamit Jerusalem, ya e ri' quebopon chwach ri juyub Olivos pa tak raldeas Betfagé y Betania. Ec'uchiri', ri Jesús xebutak bi ca'ib chique rutijo'n cha' quenabej apanok, ² jewa' xubi'ij chique:

—Jix pa raldea c'o pan chikawach. Xew c'u quixoponic, qui'rika jun k'apoj buru yukulic. Wa' na jinta junok cojoyom re. Chiquira' y chic'ama lok. ³ We c'o c'u junok cutz'onoj chiwe: “¿Su'chac qui'an wa'?” chibi'ij che: “Rawaj cajawax che ri Kajawal, yey c'ate cutak tanchi ulok” —quixcha'.

⁴ Xebec c'ut y xquirik ri k'apoj buru yukubam pa be chunakaj jun puerta. Ewi xquiquir lok. ⁵ Jujun c'u chique ri e c'o chiri' xquitz'onoj:

—¿Sa' ri qui'ano? ¿Su'be quiquir ri k'apoj buru? —xecha'.

⁶ Rique e xquibi'ij janipa ri bi'im bi chique ruma ri Jesús; ewi xya' lo chique xquiquir lok. ⁷ Xquic'am c'u lo ri k'apoj buru y xquirip ri quimanta* chirij. Ec'u ri Jesús xucoj bi.

⁸ Uq'uiyal winak xquiwik ri be pa quic'ow wi ri Jesús, xquilic' tak ri

quimanta pa ri be; yey e c'o jujun chic xquik'at raltak co uk'ab che' y xquilem pa la be re yachal uk'ij.

⁹ Ri winak e nabejinak chwach cuc' ri eteran lo chirij xquijeko lic que-siq'uinic, caquibi'ij:

«¡Kayaca uk'ij!

¡Nim uk'ij ralaxic ri jun petinak chupa rubi' ri Dios Kajawxel!✧

¹⁰ ¡Nim uwach uk'ij ri takanic re ri kamam David cac'un lok!

¡Kayaca uk'ij ri Dios c'o chila' chicaj!» quecha'.

¹¹ Xopon c'u ri Jesús Jerusalem y xoc chupa ri Rocho Dios. Xa xril c'u ronoje sa' tak ri c'o chupa; pero ruma ya e ri' coc rak'ab, xe'ec Betania cuc' ri cablajuj utijo'n.

Ri Jesús cuchakisaj jun che' re higo (Mt. 21:18-19)

¹² Chuca'm k'ij c'ut echiri' xebel bi Betania, ri Jesús xpe numic che. ¹³ Y chinimanaj xril pana jun che' re higo lic c'o uxak. Ewi xe'ec xe'rila' we c'o ujik'obalil curiko. Yey echiri' xopon ruc', na jinta c'o xurik che, xew ruxak c'olic, ma na uk'ijol taj c'o uwach ri higos. ¹⁴ Ewi ri Jesús xubi'ij che ri che' re higo:

—Na jinta chi c'ana junok cutij jik'obal chawe —xcha'. Yey wa xubi'ij, xquita rutijo'n.

Ri Jesús queberesaj bi raj c'ay chupa ri Rocho Dios

(Mt. 21:12-17; Lc. 19:45-48; Jn. 2:13-22)

¹⁵ Xebopon c'u Jerusalem y echiri' xoc bi ri Jesús chupa ri Rocho Dios, xujek lo quesaxic conoje ri quec'ayinic y ri quelok'ow chupa. Yey xuxulc'atila' tak bi ri mexa que ri e aj jachal uwach puak y tak ri xila que ri e aj c'ay palomax. ¹⁶ Y na xuya ta luwar che junok c'o ruc'a'am quic'ow pa ri Rocho Dios xa re cuk'at ube. ¹⁷ Xujek c'u cac'utun chiquiwach, jewa' cubi'ij:

* **11:7** “Manta” e jun c'ul caquicoj ri aj Israel re ojertan, tob achijab o ixokib, pacha' po't woca'j re carabexic. ✧ **11:9** Sal. 118:26

«¿Na eta'am ta neba alak ri tz'ibital can chupa Ruch'a'tem ri Dios? Ma ri Dios cubi'ij:

Che ri Wocho cabi'xic:

“E luwar re oración

que conoje tak ri tinamit che ruwachulew” *Is. 56:7* cacha'. No'j ralak, 'anom alak che ri Wocho e jun luwar que elek'omab»[✧] xcha'.

¹⁸ Wa' xquita raj c'utunel re ri tz'ijpaxab y ri nimak e aj chacunel pa Rocho Dios. Ruma c'u ri', caquitzucuj sa' u'anic caquicamisaj ma caquixi'ij quib che ruma conoje ri winak lic cacam canima' che tak ruc'utunic.

¹⁹ Ec'uchiri' xoc rak'ab, ri Jesús xel bi chupa ri tinamit.

Ri che' re higo chakijinak chic
(*Mt. 21:19-22*)

²⁰ Chuca'm k'ij anim echiri' xebic'ow ri Jesús cuc' rutijo'n pa c'o wi ri che' re higo, xquilo chakijinak lo c'a pa ratz'ayak. ²¹ Ewi ri Pedro xc'un lo chuc'u'x tak ri ch'a'tem xubi'ij can ri Jesús che ri che'. Xubi'ij c'u ri' che ri Jesús:

—Wajawal, chilape la, ri che' re higo ri xbi'ij la che na cuya ta chi ujik'obalil,[✧] wa' chakijinak chic — xcha'.

²² Ri Jesús xuc'ul uwach:

—Lic cubula ic'u'x ruc' ri Dios; ²³ ma pakatzij wi cambi'ij chiwe: China junok cabi'n che wa jun juyub: “Chatela wara y jate'c'ola chupa ri mar” yey lic cujiquiba' c'u uc'u'x che la xubi'ij, ri' lic e cu'ana'. ²⁴ Uwari'che cambi'ij chiwe: E janipa ri quitz'onoj che ri Dios yey cubul c'u ic'u'x che caya'taj na chiwe, quic'ul na c'u ri'.

²⁵ Jec'ula', echiri' qui'an orar, we c'o chic'u'x ri macunic re junok chiwij, chicuy umac cha' jela' ri Kakaw c'o chila' chicaj cucuy imac ri'ix. ²⁶ Ma we ri'ix na quicuy ta umac junok, jec'ula' cu'an ri Kakaw Dios c'o chila' chicaj, na cucuy ta imac ri'ix — xcha'.

China xya'w puk'ab ri Jesús catakanic

(*Mt. 21:23-27; Lc. 20:1-8*)

²⁷ Xebopon tanchi Jerusalem ri Jesús cuc' rutijo'n. Y echiri' cabin chupa ri Rocho Dios, ri nimak e aj chacunel cuc' raj c'utunel re ri tz'ijpaxab y ri nimak winak re ri tinamit, xekib ruc'. ²⁸ Xquitz'onoj c'u che:

—¿China xya'w pak'ab la ca'an tak la wa'?[✧] ¿China xtakaw la che ca'an tak la wa'? —xecha'.

²⁹ Ri Jesús xuc'ul uwach:

—Ri'in can'an jun tz'onobal che alak. We xc'ul alak uwach, cambi'ij c'u ri' che alak china ya'yom panuk'ab can'an wa'. ³⁰ ¿China c'u xtakaw re ri Juan cuya ri bautismo? ¿E ri Dios o e rachijab? C'ulu alak uwach —xcha'.

³¹ Ec'u rique xquijek quech'a't chiquiwach puwi wa': «We xkac'ul uwach che: “E ri Dios xtakaw re,” ri' cubi'ij rire chike: “¿Su'chac c'u ri' na xcoj ta alak ri xubi'ij?” cacha chike. ³² ¿Yey we xkabi'ij xa achijab xetakaw re...?» xecha chiquiwach. Yey lic caquixi'ij quib chique ri winak, ma conoje caquich'obo ri Juan e jun sakil k'alajisanel re ri Dios. ³³ Xquibi'ij c'u che ri Jesús:

—Na keta'am taj —xecha'.

Ec'u ri Jesús xubi'ij chique:

—Jec'uri'la', ri'in na cambi'ij ta che alak china ya'yom panuk'ab can'an tak wa' —xcha'.

12

Ri c'ambal na'oj paquiwi raj chac itzel quiwachlibal

(*Mt. 21:33-46; Lc. 20:9-19*)

¹ Ec'uchiri', ri Jesús xujek cac'utun chiquiwach ri e aj wach ruc' tak c'ambal na'oj, xubi'ij chique:

«C'o jun achi xu'an tico'n re uva chwach ri rulew. Xusut c'u rij ruc' coral, xuc'ot jun luwar pa cayitz' wi ruwa'al ri uva y xuyac jun ja naj uwi' re chajibal re. Xuya c'u can pa tunulic

chique jujun aj chaquib. Tec'uchiri', xe'ec naj.

² »Echiri' xopon ruk'ijol ri molonic, xutak lo jun raj chac cha' cu'tz'onoj chique tak raj tunulel ri takalic cuc'ul rire che ri molonic. ³ No'j raj tunulel xquichap raj chac takom lo cuc', xquich'ayo y xquitak bi; e ri' na jinta xquiya bi che.

⁴ »Ri rajaw ri tico'n xutak chi lo jun raj chac cuc', yey raj tunulel xquirakij rujolom ruc' abaj y lic xquiq'uixbesaj bi. ⁵ Ri rajaw ri tico'n xutak chi lo jun chic raj chac cuc'; ec'u ri' wa' asu xquicamisaj. Y xebutak chi lo jujun chic; yey chique conoje wa', e c'o ri xequich'ayo y e c'o ri xequicamisaj.

⁶ »Ec'u ri rajaw ri tico'n xa jun chi ri c'o ruc' re cutak bi, e ruc'ajol lic c'ax cuna'o. Q'uisbal c'u re, e xutak lo ruc'ajol cuc' raj tunulel ma xuch'obo: “Ruma e nuc'ajol, caquic'ul na chi utz.”

⁷ »No'j raj tununel xquibi'ij chiquiwach: “Wa' e uc'ajol ri rajaw rulew, ri cu'ana na rajaw we xcam rukaw. Jo', je'kacamisaj cha' rulew cu'an can ke'oj” xecha'. ⁸ Ewi xquichapo y xquicamisaj. Tec'uchiri', xquesaj bi rucuerpo chupa wa' wu'lew y xe'quic'aka bi» xcha ri Jesús.

⁹ Tec'uchiri', xutz'onoj chique ri e aj wach:

—Chiwach ralak, ¿sa' nawi cu'an ri rajaw ri tico'n chique raj tunulel? Ri'in cambi'ij: Cac'unic, cusach quiwach raj tunulel y cuya rutico'n paquik'ab jujun chic.

¹⁰ »¿Na ajilam ta neba ralak ri tz'ibital can chupa Ruch'a'tem ri Dios? Ma jewa' cubi'ij:

E rabaj c'akital can cuma raj yacal ja, e abaj wa' lic xajawaxic cha' catiqui' lo ri ja.*

¹¹ E ri Dios Kajawxel x'anaw re wa', yey chikawach ri'oj, wa' lic na jinta c'ana ilitajinak wi *Sal.*

118:22-23

—xcha'.

¹² Ec'u ri e aj wach lic xquitzu-cuj su'anic caquichap ri Jesús ma xquimaj usuc' chiquij rique xubi'ij wi wa jun c'ambal na'oj. Pero ruma c'u caquixi'ij quib chiquiwach ruq'uuiyal winak, xquiya canok y xebec.

Ri tz'onobal puwi ri tojonnic ca'anic (Mt. 22:15-22; Lc. 20:20-26)

¹³ Xetak c'u lo ruc' ri Jesús jujun chique ri fariseos y jujun chique ri quitakem ri rey Herodes, re caquic'am upa ruc' tak ri cubi'ij cha' caquicoj umac. ¹⁴ Ec'uchiri', xebopon ruc' ri Jesús y xquibi'ij che:

—Lal tijonel, ri'oj keta'am lic katzij ri cabi'ij la. Na caxi'ij ta ib la che tak ri caquibi'ij ri ticawex, ma rilal junam quiwach quebil la conoje, tob c'o quiwach o na jinta quiwach; yey lic jusuc' cac'utun la chwi ri be re ri Dios. Cakatz'onoj c'u che'la: ¿Usuc' nawi caka'an tojonnic che ri nimalaj takanel re Roma* o na usuc' taj? ¿Cakaya nawi o na cakaya taj? —xecha'.

¹⁵ Ec'u ri Jesús, ruma reta'am rique xa queb quipalaj, jewa' xubi'ij chique:

—¿Su'chac cac'am alak nupa? C'ama pe lo alak juna meyo re ca'an tojonnic ruc' cha' canwilo —xcha'.

¹⁶ Rique xquic'am lo jun meyo che.

Ewi ri Jesús xubi'ij chique:

—¿China re wa c'axwach y china re wa bi'aj c'o chwach wa meyo? —xcha'.

Rique xquic'ul uwach:

—Re ri nimalaj takanel re Roma —xecha'.

¹⁷ Ec'u ri Jesús xuc'ul uwach, xubi'ij chique:

—Ya'a alak che ri nimalaj takanel re Roma janipa ri takal che rire, yey ya'a c'u alak che ri Dios janipa ri takal che ri Dios —xcha'.

Lic c'u xcam canima' che ri Jesús ma Rire lic xurik uc'ulic uwach ri tz'onobal xqui'an che.

Ri tz'onobal puwi ri c'astajibal (Mt. 22:23-33; Lc. 20:27-40)

* **12:10** Is. 28:16; Hch. 4:11; Ro. 9:31-33; 1 P. 2:6-8 “César, emperador” pa vocabulario.

* **12:14** “Ri nimalaj takanel re Roma”: Quil

18 Ec'uchiri', jujun chique ri saduceos, ri caquibi'ij na junta c'astajibal chique ri ecaminak, xec'un ruc' ri Jesús y xquitz'onoj c'u che:

19 —Lal tijonel, ri Moisés xutz'ibaj can chike: “We ri ratz junok camic y na e junta can ralc'o'al ruc' ri rixokil, ec'u ri' ruchak' utz cac'uli' ruc' rixok malca'n canok y jec'ula' quec'oji' ralc'o'al ruc' publi' ri ratz xcamic”[✧] xcha'.

20 »Julaj e c'o wukub achijab quichak' quib. Ri nabe chique xc'uli'ic, yey ec'u ri' wa' xcamic y na e junta can ralc'o'al ruc' ri rixokil.

21 Jela' c'u ri' ruca'm xc'uli' ruc' rixok malca'n canok. Ec'u ri' wa' xcamic y na e junta can ralc'o'al ruc' rixok. Yey je tanchi la' xuc'ulumaj rurox. 22 Jec'ula' xquic'ulumaj ri wukub achijab; xecamic, e ri' na junta calc'o'al xquiya canok. Q'uisbal c'u re, e xcam rixok.

23 »Chupa c'u ruk'ijol ri c'astajibal, echiri' quec'astaj lo ri wukub achijab, ¿chinok chique cu'ana rachijil rixok? Ma conoje xec'uli' ruc' —xecha'.

24 Ri Jesús xuc'ul uwach:

—Ralak lic sachinak alak, ma na majom ta alak usuc' Ruch'a'tem ri Dios y ruchuk'ab ri Dios. 25 Ma echiri' quec'astaj lo ri ecaminak, na quec'uli' ta chic yey na quequiya ta chi ne ri calc'o'al pa c'ulaniquil; quebu'ana c'u pacha' ri ángeles e c'o chila' chicaj, ma ri ángeles na quec'uli' taj.

26 »No'j puwi c'u ri c'astajibal que ri ecaminak, ¿na ajilam ta neba alak ri xutz'ibaj can ri Moisés puwi ri xubi'ij ri Dios che echiri' xch'a't ruc' chupa ri jumocaj xuluquej? Ma jewa' xubi'ij che: “In ri Dios re ri Abraham, re ri Isaac y re ri Jacob”[✧] xcha'. 27 Yey ri Dios na e ta Dios que ri ecaminak, ma e Dios que ri e c'aslic.† E uwari'che ralak lic na usuc' ta ri na'oj alak puwi ri c'astajibal —xcha'.

Ri tz'onobal puwi ri tziypixab más chirajawaxic

(Mt. 22:34-40)

28 Ec'uchiri', xkib ruc' ri Jesús jun chique raj c'utunel re ri tziypixab. Wa' wa'chi xuto echiri' ri Jesús lic xurik uc'ulic uwach ri tz'onobal que ri saduceos. Xutz'onoj c'u che:

—Chupa Rutzij Upixab ri Dios, ¿pachique ri takanic más chirajawaxic? —xcha'.

29 Ri Jesús xuc'ul uwach:

—Ruc'u'xibal ronoje ri Tzij Pixab re ri Dios e wa':

Chita', ix aj Israel;

ri Dios Kajawxel, xa jun Rire.

30 C'ax c'u chana'a ra Dios Kajawxel ruc' ronoje awanima', ruc' ronoje ac'u'x, ruc' ronoje ana'oj y ruc' ronoje achuk'ab. *Dt. 6:4-5*

E uc'u'xibal wa' Rutzij Upixab ri Dios.

31 Yey ruca'm jewa' cubi'ij:

C'ax chana'a rawatz-achak'

jela' pacha' ri c'ax cana' awib ri'at.

Lv. 19:18

Na junta chi c'u juna tzij más c'o uwach chwa tak wa' —xcha'.

32 Jec'uwa' xubi'ij raj c'utunel re ri tziypixab che ri Jesús:

—Lic utz, lal tijonel; lic katzij ri cabi'ij la: “Xa jun ri Dios c'olic y na junta junok chic.”[✧] 33 Yey ri lic chirajawaxic wi e c'ax cakana' ri Dios ruc' ronoje kanima', ruc' ronoje kana'oj, ruc' ronoje kac'u'x y ruc' ronoje ri kachuk'ab;[✧] yey ri c'ax quekana' ri katz-kachak' jela' pacha' ri c'ax cakana' kib ri'oj.[✧] Wa' e más chirajawaxic chiquiwa rawaj eporom chwi raltar ruc' tak ri caya'i' chwach ri Dios[✧] —xcha'.

34 Echiri' ri Jesús xrilo lic c'o una'oj raj c'utunel re ri tziypixab, xubi'ij che:

—Lic xa nakaj lal c'o wi che rutakanic ri Dios —xcha'.

Y na junta chi c'u junok xraj xu'an juna tz'onobal che.

Sa' ruwach Rucha'o'n lo ri Dios

(Mt. 22:41-46; Lc. 20:41-44)

✧ 12:19 Dt. 25:5-6 ✧ 12:26 Éx. 3:6, 15 † 12:27 Wa' wa'chijab ecaminak chic echiri' ri Dios xubi'ij wa'. Na ruc' ta c'u ri', e c'as chwach ri Dios. Yey we ta rique sachinak chi quiwach, ri Dios na cubi'ij ta ri': “In ri Dios qui'que.” ✧ 12:32 Dt. 6:4; Is. 45:21 ✧ 12:33 Dt. 6:5 ✧ 12:33 Lv. 19:18 ✧ 12:33 Os. 6:6

³⁵ Echiri' cac'utun ri Jesús chupa ri Rocho Dios, jewa' xubi'ij:

—¿Su'be raj c'utunel re ri tziipixab caquibi'ij: “Ri Cristo, Rucha'o'n lo ri Dios, e Ralc'o'al can ri rey David?”

³⁶ Ma ri David, ruma ri Santowilaj Ruxlabixel ri Dios, jewa' xubi'ij:

Ri Dios Kajawxel xubi'ij che ri Wajawal:

“Chat-tz'ula pa nuwiq'ab,
y chawoye'ej na ri k'ij
echiri' quebenuya ri tzel que-
bilow awe
chuxe' rawakan” *Sal. 110:1*

xcha'.

³⁷ Ec'u ri David cubi'ij “Wajawal” che Rucha'o'n lo ri Dios. ¿Su'be c'u ri cabi'xic e Ralc'o'al can ri rey David? —xcha'.

Y uq'uial winak re ri tinamit lic ruc' ronoje quic'u'x caquita ri cubi'ij.

Ri Jesús cuk'alajisaj ri quimac raj c'utunel re ri tziipixab

(*Mt. 23:1-36; Lc. 11:37-54; 20:45-47*)

³⁸ Ec'u ri Jesús jewa' cubi'ij chupa ruc'utunic:

«Lic chichajij iwib; mi'an c'u iwe'ix pacha' ri caqui'an raj c'utunel re ri tziipixab. Ma rique e lic cuc'ul quic'u'x ri quejurur chupa ri quik'u' cha' quilitajic lic c'o quiwach y ri caya' rutzil quiwach pa quebilitaj wi. ³⁹ Yey pa tak sinagogas y pa tak wa'im lic cuc'ul quic'u'x ri quetz'uyi' chupa ri tz'ulibal que ri lic c'o quiwach. ⁴⁰ Rique caquimaj rubitak que rixokib e malca'nib. Y cha' cayac quik'ij, caqui'an nimak ch'abal echiri' caqui'an orar. Ruma c'u ri caqui'ano, rique lic unimal c'axc'olil ri caquic'ulu echiri' cak'at tziij paquiwi!» cacha'.

Ri kasa'n xuya jun ixok malca'n
(*Lc. 21:1-4*)

⁴¹ Ri Jesús tz'ul pana chwach ri caxa pa caya' wi ri kasa'n yey lic cutzutza' echiri' ri winak caquiya can

ri quikasa'n chupa ri caxa. Y lic e q'ui ri beyomab caquiya uq'uial kasa'n.

⁴² Xopon c'u jun ixok niba' yey malca'n y xuya chupa ri caxa ca'ib raltak co meyo lic na q'ui ta rajil.

⁴³ Ec'u ri Jesús xebusiq'uij rutijo'n y xubi'ij chique:

—Pakatzij wi cambi'ij chiwe: Chwach ri Dios, wa' wi'xok niba' y malca'n, e ne xuya más pa ri caxa chwa ri xquiya conoje. ⁴⁴ Ma conoje xa e xquiya ruwi' ri quipuak; no'j wi'xok tob lic niba' e xuya ronoje ri puak c'o ruc', wa' e re culok' ri lic cajawax che —xcha'.

13

Ri Jesús cach'a't chwi ruwulixic ri Rocho Dios

(*Mt. 24:1-2; Lc. 21:5-6*)

¹ Echiri' xel bi ri Jesús pa ri Rocho Dios, jun chique rutijo'n jewa' xubi'ij che:

—Kajawal, ¡chilape la wa chomilaj tak abaj y wa nimak tak ja re ri Rocho Dios!* —xcha'.

² Ri Jesús xuc'ul uwach:

—¿Cawil wa' wa nimak tak ja? Wara na cacana'j ta can juna abaj chwi juna chic, ma ronoje cawulixic —xcha'.

Tak ri c'utubal re ri q'uisbal re ruwachulew

(*Mt. 24:3-28; Lc. 17:22-24; 21:7-24*)

³ Ri Jesús xtz'uyi' chwa ri juyub Olivos, ri c'o chwach pana ri Rocho Dios. Ec'u ri Pedro, ri Jacobo, ri Juan y ri Andrés, xa quituquel xquitz'onoj che:

⁴ —Bi'ij co la chike, ¿jampa nawi cu'ana tak ri' wa'? ¿Yey sa' ri c'utubal quilitajic echiri' cu'ana'? —xecha'.

⁵ Ec'u ri Jesús xujek ubi'ixiquil chique:

«Lic chichajij iwib cha' na jinta junok casocow iwe'ix. ⁶ Ma lic e q'ui ri ticawex quec'unic y xa caquichik'imaj uwach ri nubi', jewa' caquibi'ij: “In ri Cristo, Rucha'o'n

* **13:1** “Ri nimak tak ja re ri Rocho Dios”: Ri sitio pa c'o wi ri Rocho Dios sutum rij ruc' tapia re nima'k tak abaj yey c'o corredor che ruk'ab ri tapia y chunic'ajal ri sitio c'o jun chomilaj ja queb upa. ✠ **13:6** Mt. 24:2-3

lo ri Dios”[☆] quecha'. Y lic e q'ui ri quesocotaj cuma rique.

⁷ »Ec'uchiri' quito c'o ch'a'oj jewa' y c'o ch'a'oj jela', mixi'ij iwib che; ma lic chirajawaxic wi cu'ana tak wa'. No'j na e ta wa' ri q'uisbal re ruwachulew. ⁸ Ma e c'o tinamit queyactaj chiquij jujun chic tinamit y e c'o takanelab queyactaj chiquij jujun chic takanelab. Cu'an tak cabrakan che uq'uiyal luwar, cape tak numeric y ri winak caquijeko lic quetuquic. Ronoje wa' xa e jekebal re ri c'axc'obic cac'unic.

⁹ »Lic chichajij c'u iwib, ma quixc'am bi pa tak k'atbal tzij y cajich' ne ipa chupa tak ri sinagogas. Y ruma c'u icojom ri nubi', quixc'am bi chiquiwach ri takanelab y chiquiwach ri reyes, cha' jela' quik'alajisaj ri Utzilaj Tzij chiquiwach. ¹⁰ Lic c'ut chirajawaxic nabe na catzijox ri Utzilaj Tzij chique conoje ruq'uiyal quiwach tak ri ticawex e c'o che ruwachulew. ¹¹ Yey echiri' quixc'am bi re quixe'yo'k pa tak k'atbal tzij, mubisoy ic'u'x y mich'ob nenare' sa' ri quibi'ij. Ri'ix xew chibi'ij janipa ri cuya ri Dios chiwe chupa ri ora, ma na ix ta ri quixch'awic, e ri Santowilaj Ruxlabixel ri Dios.

¹² »E tak c'u ri ticawex quequiya ri catz-quichak' pa camic; ri c'o calc'o'al quequiya tak ri calc'o'al pa camic; ri e alc'o'al queyactaj chiquij quichuquikaw y quequicamisaj. ¹³ Lic c'ut tzel quixil cuma tak ri winak ruma icojom ri nubi'. Pero china c'u ri cuchuk'ubej rib chwach tak wa' wa c'axc'obic c'a chupa ri q'uisbal re, e ri' ri cacolobetajic.

¹⁴ »Echiri' ri'ix quiwil ri lic ch'ul y lic q'uibal uwach caya' pa ri luwar pa lic na takal ta wi, jela' pacha' ri xutz'ibaj can ri k'alajisanel Daniel[☆] (china c'u ri cajilan re wa', chumaja usuc'); ec'uchiri', ri e c'o pa tak ri luwar re Judea, chebanimaj ubi chwa

tak ri juyub. ¹⁵ China c'u ri c'o lo chwi ri rocho,† makaj ne lo che uc'amic bi ubitak re pa ja. ¹⁶ Yey china ri c'o lo pa juyub, matzelej lo che uc'amic bi ruk'u' re pisbal rij.

¹⁷ »Chupa tak c'u la' la k'ij, lic tok'o' quiwach ri e yewa' ixokib y ri quetz'umtisanic. ¹⁸ Lic c'u chitz'onoj che ri Dios cha' echiri' quixanimaj bi na e ta uk'ijol echiri' c'ax tew y c'o jab. ¹⁹ Ma tak la' la k'ij re unimal c'axc'olil, na u'anom ta c'ana julajok chwi lo echiri' ri Dios xu'an ruwachulew y na cu'ana ta chi ne c'ana julajok. ²⁰ We ta ri Kakaw Dios na cuk'atij ta tak la' la k'ij re runimal c'axc'obic, ri' na jinta junok cac'asi' canok; no'j ruma c'u c'ax quebuna' ri ebucha'om, cuk'atij ruk'ijol wa'.

²¹ »We c'o c'u junok cabi'n chiwe: “¡Chiwilape', wara c'o wi ri Cristo!” o “¡Chiwilape', le' c'olic!”, mixoc il che. ²² Ma quec'un ri caqui'an “Cristo” che quib y ri caqui'an e k'alajisanelab re ri Dios che quib, pero xa e socoso'nel. Ec'u rique caqui'an nimak tak c'utubal y milagros re quesocoso'n ruc', yey c'o ne pa sak quesocotaj jujun chique ri ebucha'om ri Dios. ²³ Lic c'u chichajij iwib, ma ximbi'ij ronoje wa' chiwe ri'ix echiri' c'amaja' ne cu'ana'.

Ruc'unibal Ralaxel Chiquixo'l Ticawex

(Mt. 24:29-35, 42-44; Lc. 21:25-36)

²⁴ »Ec'uchiri' ic'owinak chi ri c'axc'obic che tak la' la' k'ij, cu'an k'eku'm uwach ri' ri k'ij, y ri ic' na cuya ta chi ruwonibal. ²⁵ Ri ch'umil quetzak lo che ruwa caj, y conoje ri c'o quichuk'ab che ruwa caj queyiquiyo'xic. ²⁶ Ec'uchiri', quilitalj Ralaxel Chiquixo'l Ticawex cac'un lo pa sutz' ruc' runimal uchuk'ab y ruc' runimal uchomalil.[☆] ²⁷ Quebutak c'u ru ángeles che umolic quichi' conoje ri ebucha'om ri Dios pa tak ronoje luwar che rucajchal rajlibal

[☆] 13:14 Dn. 9:27; 11:31; 12:11 † 13:15 Ruwi ri cocho raj Israel ojertan tak'aj uwi' yey wa' curik uchac re anabal oración, re quiwa'bal y re quiwarabal chak'ab echiri' lic cabucbutic. [☆] 13:26 Dn. 7:13; Ap. 1:7 ‡ 13:27 “Rucajchal rajlibal ruwachulew”: Wa' que'elawi pa norte, pa sur, pa relebal k'ij y putzakibal k'ij.

ruwachulew.† Cujek c'u ri' che jun luwar, yey cuq'uisbej che jun chic.

28 »E chimaja ri jun c'ambal na'oj puwi ri che' re higo: Echiri' cujek catux lo c'ac' uk'ab y cujek c'ut catux ruxak, ruma c'u la' quiweta'maj xa nakaj chi c'o wi lo ruk'ijol echiri' cabuchutic y na jinta jab.‡ 29 Jec'uri'la' ri'ix, echiri' quiwilo cu'ana ronoje tak wa', chiweta'maj c'u ri' xa nakaj chi c'o wi lo ruk'ijol ruc'unibal Ralaxel Chiquixo'l Ticawex. 30 Pakatzij wi cambi'ij chiwe: E c'o ticawex re wa' wa k'ij na quecam tana we na xquil tubi ronoje wa'. 31 Ruwa caj y ruwachulew xa casach uwach, no'j tak ri nuch'a'tem na casach ta uwach.

32 »Ec'u chwi ruk'ijol y ru'orayil wa', na jinta junok eta'mayom re; na queta'am tane ri ángeles e c'o chila' chicaj, na reta'am tane ri C'ajolaxel, ma xew ri Kakaw Dios eta'mayom re.

33 »Chiwila c'u ri', mawar iwach y lic chi'ana orar, ma na iweta'am taj jampala' copon ruk'ijol wa'. 34 Ri cu'ana' e pacha' echiri' juna achi que'ec naj. Ec'uchiri' que'ec, cuya can ri rocho paquik'ab ri raj chaquib y chiquijujunal wa' cuya can quichac. Cubi'ij c'u can che ri chajinel re ri puerta: “Lic matcos che uchajixic ri ja” cacha'. 35 Jec'uri'la' ri'ix, lic mawar iwach, ma na iweta'am taj jampala' cac'un lo ri rajaw ja; laj echiri' coc rak'ab, laj pa tiq'uul ak'ab, laj pa nabe uch'awibal ri teren o echiri' quel lo ri k'ij. 36 Mawar c'u iwach ri', cha' we xakic'ate't xc'un lo ri Iwajaw, na quixurik taj quixwaric. 37 Ec'u wa cambi'ij ri'in chiwe ri'ix, cambi'ij chique conoje: Lic mawar iwach» xcha ri Jesús.

14

Ri e aj c'amal wach re ri tinamit caquich'a'tibej su'anic caquichap

‡ 13:28 “Ruk'ijol echiri' cabuchutic y na jinta jab”: Quil “verano” pa vocabulario. * 14:1 Xew caq'uis ri nimak'ij Pascua, cajeker ri wukub k'ij re ri nimak'ij echiri' raj Israel na caquitij ta pam c'o levadura che. Éx. 12; Dt. 16:1-17; Lv. 23:5-6 † 14:8 Echiri' cacam junok, raj judi'ab cacatinisaj ri cuerpo y caquicoj cunabal qui' ruxlab che.

ri Jesús

(Mt. 26:1-5; Lc. 22:1-2; Jn. 11:45-53)

1 Echiri' queb k'ij chi copon wi ri nimak'ij Pascua y ri nimak'ij re ti-joj pam na jinta levadura che,* tak ri nimak e aj chacunel pa Rocho Dios cuc' raj c'utunel re ri tzijpaxab, lic caquitzucuj su'anic caquichap ri Jesús ruc' socoso'nic re caquicamisaj. 2 Xquibi'ij c'ut: «Na caka'an ta pa wa nimak'ij cha' ri tinamit na quetucuc ta ruma wa'» xecha'.

Jun ixok cuk'ej cunabal qui' ruxlab chu'jolom ri Jesús

(Mt. 26:6-13; Jn. 12:1-8)

3 C'o c'u ri Jesús pa ri tinamit Betania chirocho ri Simón, ri jun xc'o'iji' ri yabil lepra che. Ec'uchiri' tz'ul ri Jesús chwa ri mexa, xopon jun ixok ruc'a'am jun c'olibal nojinak che cunabal lic qui' ruxlab y lic q'ui rajil, wa' 'anatal ruc' sakil nardo. Rixok xutek'ij uchi' ri c'olibal; tec'uchiri', xuk'ej ri cunabal chu'jolom ri Jesús.

4 E c'o c'u jujun chique ri e c'o chiril' xpe coyowal echiri' xquil wa', y jewa' xquibi'ij chiquiwach:

—¿Su'chac wa cunabal xtz'ilo'xic?

5 Ma ri lic usuc' e ta xc'ayix wa' chi oxib ciento denarios, y ruc' wa' queto' ri niba'ib —xecha'. Y lic c'u ri' quech'a't chirij rixok.

6 Ec'u ri Jesús xubi'ij chique:

—Mic'ak bi uk'ij wi'xok. ¿Su'be quixch'a't chirij ri xu'ano? Ma ri xu'an chwe e jun utzilaj chac. 7 Ri niba'ib e la' xaki e c'o iwuc' yey utz quebito'o jampala' quiwaj ri'ix, no'j ri'in na xaki ta in c'o iwuc'. 8 Wi'xok e xu'ano janipa ri xuch'ij u'aniquil; ruc' c'u wa' e xnabej pan che uyi-jbaxic ri nucuervo che ri mukubal we.† 9 Pakatzij wi cambi'ij chiwe: Pa tak catzijox wi wa Utzilaj Tzij che ronoje ruwachulew, cacuxtax c'u wi'xok ruma ri xu'ano —xcha'.

*Ri Judas cuc'ayij ri Jesús
(Mt. 26:14-16; Lc. 22:3-6)*

¹⁰ Ewi ri Judas aj Iscariot, jun chique ri cablajuj utijo'n ri Jesús, xe'ec cuc' ri nimak e aj chacunel pa Rocho Dios re cuya ri Jesús paquik'ab. ¹¹ Rique, echiri' xquita wa', lic xequi'cot che y xquibi'tisij nenare' caquiya puak che. Ec'u ri' ri Judas xujek utzucuxic su'anic cuya ri Jesús paquik'ab.

*Ri Jesús cutij ri cena re Pascua cuc' ri cablajuj utijo'n
(Mt. 26:17-29; Lc. 22:7-23; Jn. 13:21-30; 1 Co. 11:23-26)*

¹² Chupa c'u ri nabe k'ij re ri nimak'ij echiri' catij ri pam na junta levadura che y quecamisax chwi raltar tak ri k'apoj bexex re ri Pascua, ✱ rutijo'n ri Jesús xquitz'onoj che:

—¿Pa ca'aj wi la que'kayijba' wi ri cena re Pascua? —xecha'.

¹³ Ewi xebutak bi ca'ib chique rutijo'n y xubi'ij bi chique:

—Jix pa ri tinamit y echiri' quic'ul jun achí ruc'a'am jun cura' ya', chix-terej bi chirij. ¹⁴ Pa c'u coc wubi wa' wa'chi, chibi'ij che ri rajaw ja: “Jewa' cubi'ij ri tijonel ke'oj: ¿Pachawi c'o wi ri luwar pa cantij wi ri cena re Pascua cuc' ri nutijo'n?” quixcha che. ¹⁵ Ec'u ri cu'an ri rajaw ja e cuc'ut chiwe jun nimalaj luwar chicaj pa ri cale' ja, wa' yijbital chic. Chiri' c'u ri' chiyijba' wi ri cena re Pascua —xcha'.

¹⁶ Xebec c'u rutijo'n, xeboc pa ri tinamit y xe'quirika' jela' pacha' ri xubi'ij bi ri Jesús chique. Y xquiyijba' c'u ri cena re Pascua.

¹⁷ Ec'uchiri' xoc rak'ab, xopon ri Jesús junam cuc' ri cablajuj utijo'n. ¹⁸ Ec'uchiri' e c'o chwa ri mexa, e ri' quewa'ic, ri Jesús xubi'ij:

—Pakatzij wi cambi'ij chiwe: Jun chiwe wa ix c'o wara wuc' pa wa'im, e cac'ayin we —xcha'.

¹⁹ Ewi rique xquijek lic quebisonic y chiquijujunal caquitz'onoj che:

—¿C'axtaj in ri'? —cacha jun.

—¿C'axtaj in ri'? —cacha jun chic.

²⁰ Ri Jesús xuc'ul uwach; jewa' xubi'ij:

—Wa' e jun chiwe wa ix cablajuj, e ri cumu' lo ruwa junam wuc' chupa ri lak. ²¹ Pakatzij wi Ralaxel Chiquixo'l Ticawex e catajin che ric'owibexic janipa ri tz'ibital can chupa Ruch'a'tem ri Dios puwi Rire. Pero jlic c'u tok'o' uwach rachi cac'ayin re! E ne más utz che wa'chi tamaji xalaxic —xcha'.

²² Xalok' c'u ri' quewa'ic, ri Jesús xuc'am ri pam y xutioxij che ri Dios. Ewi xuwech'o, xujach chique y jec'uwa' xubi'ij:

—Chitija', ma e nucuero pa wa' —xcha'.

²³ Xuc'am c'u ri c'olibal c'o vino chupa, yey echiri' utioxim chi che ri Dios, xuya chique y conoje xquitij chuchi' wa' wa' c'olibal. ²⁴ Xubi'ij c'u chique:

—E nuquiq'uel wa', ri caturuw na cuma uq'uiyal ticawex re cuybal quimac, yey wa' e cujiquiba' uwach ri c'ac' tzij. ✱ ²⁵ Pakatzij wi cambi'ij chiwe: Na cantij ta chi ruwa'al uva, c'ate qui'ntija tanchi chupa ruk'ijol rutakanic ri Dios —xcha'.

*Ri Jesús cuk'alajisaj ri cu'an ri Pedro echiri' carewaj we reta'am uwach
(Mt. 26:30-35; Lc. 22:31-34; Jn. 13:36-38)*

²⁶ Echiri' xquiq'uis ubixoxic ri bix, † xebec chwa ri juyub Olivos. ²⁷ Ec'uchiri' ri Jesús xubi'ij chique:

—Wak'ab iwonoje ri'ix quiwesaj na iwib chwij, ma e pacha' cubi'ij Ruch'a'tem ri Dios:

Cancamisaj raj chajinel

yey tak c'u ri' rubexex caquiquich bi quib *Zac. 13:7*
cacha'.

²⁸ No'j ec'uchiri' quinc'astaj lo chiquixo'l ri ecaminak, quinnabej bi chiwach c'a Galilea —xcha'.

²⁹ Ec'u ri Pedro xubi'ij:

—Tob ne conoje caquesaj quib chi'ij la, ri'in na can'an ta wa' —xcha'.

³⁰ Yey ri Jesús xuc'ul uwach:

✱ 14:12 Éx. 12:1-13; Lv. 23:5-6 ✱ 14:24 Jer. 31:31-34 † 14:26 Q'uisbal re ri cena re Pascua, ri caqui'an raj judi'ab e caquibixoj ri Salmos 115-118.

—Pakatzij wi cambi'ij chawe: Wa jun ak'ab, echiri' c'amaja' ne cabixon calaj ri teren, ri'at oxlaj chic abi'im na aweta'am ta nuwach —xcha'.

³¹ No'j ri Pedro lic xujiquba' ubi'xiqul:

—Tob ne chirajawaxic quincam junam uc' la, ri'in na canwewaj taj we weta'am wach la —xcha'. Jec'ula' ri xquibi'ij conoje.

Ri Jesús cu'an orar pa ri werta Getsemani

(Mt. 26:36-46; Lc. 22:39-46)

³² Xebopon c'u pa jun luwar Getsemani rubi'. Ec'u ri Jesús xubi'ij chique rutijo'n:

—Chixtz'ula can wara, no'j ri'in qui'n'ana orar —xcha'.

³³ Yey xebuc'am c'u bi ri Pedro, ri Jacobo y ri Juan ruc'. Xujek c'u ri lic cabisonic y cac'axc'ob ri ranima'.

³⁴ Xubi'ij c'u chique:

—C'o jun unimal bis re camic chinuc'u'x. Chixc'ola can wara; mixwaric y lic chi'ana orar —xcha'.

³⁵ Tec'uchiri', ri Jesús xkib chi pana jubik' chwach, xukasaj umejelem c'a chu'lew, y xutz'onoj che ri Dios we ta cuya na che na quic'ow ta chupa ru'orayil ri c'axc'obic, ³⁶ jewa' xubi'ij:

«Tat, Lal Nukaw, chiwach Rilal na jinta c'ana c'ayew; chincolobej co la cha' na quinic'ow ta chupa wa' wa c'axc'obic. No'j na e ta c'u chu'ana ri cuaj ri'in, ma e chu'ana janipa ri ca'aj Rilal» xcha'.

³⁷ Tec'uchiri', xtzelej lo pa e c'o wi can rutijo'n y xebo'lu'rika' quewaric. Xubi'ij c'u che ri Pedro:

—¿Catwar cami ri'? ¿Na xacuy ta c'ana ri waram cha' ca'an orar wuc', tob tane xa juna ora? ³⁸ Mixwar c'ut, y lic chi'ana orar cha' quich'ij uchuk'ab ri c'ambal ipa capetic. Pakatzij wi, lic cacha ic'u'x che u'anic ri utz, no'j wa' lic c'ayew chiwe ma e ri iti'jil na jinta ucowil —xcha'.

³⁹ Ec'u ri Jesús xe'ec tanchic, xu'ana orar, yey e xutz'onoj che ri Dios ri ujekom chi lo utz'onoxic nabe.

⁴⁰ Tec'uchiri', xtzelej tanchi lo cuc' rutijo'n y xebo'lu'rika' quewaric; ma ri

quiwach lic na cucuy ta chi ri waram y na caquirik ta chic sa' ri caquibi'ij che. ⁴¹ Xtzelej c'u lo churox laj y xubi'ij chique:

—¿C'a quixwar cami ri' ri'ix? ¿C'a quixuxlanic? ¡Cu'an na c'u la! Ma e wa' xopon ru'orayil cha' Ralaxel Chiquixo'l Ticawex caya' paquik'ab raj maquib. ⁴² ¡Chixwa'lijok! ¡Jo! Chiwila', ma ri cac'ayin we ri'in e la' xc'unic —xcha'.

Cachap bi ri Jesús

(Mt. 26:47-56; Lc. 22:47-53; Jn. 18:2-11)

⁴³ C'a cach'a't ne ri Jesús echiri' xc'un lo ri Judas, jun chique ri cablajuj utijo'n. Ec'u rire erachbilam lo uq'uiyal winak cuc'a'am lo espada y che'. Tak wa' etakom lo cuma ri nimak e aj chacunel pa Rocho Dios, tak raj c'utunel re ri tzijpixab y ri nimak winak re ri tinamit.

⁴⁴ Ec'u ri Judas, ri caya'w bi re paquik'ab, ubi'im chi lo chique su'anic caqueta'maj china ri caquichapo, jewa' ubi'im: «E ri jun cantz'ub uchi', e ri rire. Chapa c'u alak y c'ama bi alak, yey checojo bi alak e chajinel re cha' na canimaj tubi» xcha'. ⁴⁵ Ec'uchiri' xc'unic, maji chic xkib ruc' ri Jesús y xubi'ij che:

—¡Wajawal, Wajawal! —xcha che. Y xutz'ub uchi'.

⁴⁶ Ec'uchiri', ri winak xquichap ri Jesús cha' caquic'am bi pa k'atbal tzij.

⁴⁷ C'o c'u jun chique rutijo'n e c'o chiri', xresaj lo ru espada y xujochij bi jun uxiquin ri raj chac ri cajawal raj chacunel pa Rocho Dios.

⁴⁸ Xubi'ij c'u ri Jesús chique:

—¿Su'chac petinak alak ruc' espada y che'? ¿Petinak cami alak che uc'amic bi juna elek'om? ⁴⁹ Wa petinak lok ronoje k'ij wa' c'ut quinc'utun chiwach alak pa ri Rocho Dios. ¿Su'chac c'u ri' c'a e la' quino'lchapa alak? No'j jec'uwa' cu'ano cha' e cu'ana janipa ri k'alajisam can chupa Ruch'a'tem ri Dios —xcha chique.

⁵⁰ Tec'uchiri', conoje rutijo'n xebanimajic y jela' xquiya can ri Jesús.

Jun ala canimajic

⁵¹ C'o c'u jun ala teran bi chirij ri Jesús, upisom rib xa chupa jun sávana; rire xchap cuma ri soldados. ⁵² Pero rala xusolij can rusábana y e la' ch'analic xanimajic.

Ri Jesús c'o chiquiwach raj k'atal tzij e aj judi'ab

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Xquic'am c'u bi ri Jesús chwach ri cajawal raj chacunel pa Rocho Dios. Tec'uchiri', xquimol quib ri nimak e aj chacunel cuc' ri nimak winak re ri tinamit y raj c'utunel re ri tziypixab.

⁵⁴ Ec'u ri Pedro xa naj teran pan chirij ri Jesús y xoc bi c'a che ruwa ja re ri rocho ri cajawal raj chacunel pa Rocho Dios. Xe'tz'ula c'u cuc' ri e chajinel, e ri' cumik'isaj rib chuchi' ri ak'.

⁵⁵ Ri nimak e aj chacunel pa Rocho Dios cuc' conoje ri uchapom wi rib ri k'atbal tzij, caquitzucuj su'anic caquicoj umac ri Jesús cha' jela' utz cak'at tzij re camic puwi', no'j na jinta c'o xquirik chirij. ⁵⁶ Ma lic e q'ui ri winak xquitz'ak uchi', pero lic junwi tak ri xquibi'ij. ⁵⁷ Ewi xeyactaj jujun y xquitz'ak uchi', jewa' xquibi'ij chirij:

⁵⁸ —Ri'oj xkato echiri' xubi'ij: “Canwulij wa Rocho Dios 'anatal xa cuma rachijab, yey xa pa oxib k'ij canyac jun chic na 'anatal ta cuma rachijab” —xecha'. ⁵⁹ Na ruc' ta c'u ri', lic junwi tak ri xquibi'ij.

⁶⁰ Ewi ri cajawal raj chacunel pa Rocho Dios xyactaj chiquixo'l y tutz'onoj che ri Jesús:

—¿E camí la' na jinta c'ana cabi'ij ri'at? ¿Sa' c'u ri cac'ulubej uwach puwi wa quetajin che ucojic chawij? —xcha'.

⁶¹ Pero ri Jesús xa xuto y na jinta c'o xubi'ij. Tec'uchiri', xu'an jun chic tz'onobal che ri Jesús:

—¿At ba ri' ri Cristo, Ruc'ajol ri Dios, ri Jun lic nim uk'ij? —xcha che.

⁶² Ri Jesús xuc'ul uwach:

—Katzij, “In Ri'in.” Quil na c'u alak Ralaxel Chiquixo'l Ticawex tz'ul puwiquik'ab ri Dios, ri lic c'o unimal uchuk'ab yey quil c'u alak ri' echiri' cac'un lo pa sutz' chwa ri caj* —xcha'.

⁶³ Ec'u ri cajawal raj chacunel pa Rocho Dios xurich'ij ruk'u' y xubi'ij:

—¡Na jinta chi uchac más e aj cojol umac! ⁶⁴ Ma lic e la' xta alak xmacun chirij ri Dios echiri' xubi'ij ri lic na takal ta che. ¿Sa' c'u ri' cabi'ij ralak che? —xcha'.

Ewi conoje xquik'at tzij puwi ri Jesús y xquibi'ij lic takal che camisaxic.

⁶⁵ Y e c'o jujun xquijek caquichubaj; caquich'uk rupalaj, caqui'an pa t'o'y yey caquibi'ij c'u che:

—Chana'ij pe' china xch'ayaw awe —quecha che. Yey ri e chajinel caquipach' k'ab chupalaj.

Ri Pedro cubi'ij na reta'am ta uwach ri Jesús

(Mt. 26:69-75; Lc. 22:55-62; Jn. 18:15-18, 25-27)

⁶⁶ Ec'u ri Pedro c'o iquem che ruwa ja echiri' xc'un lo jun ali raj chac ri cajawal raj chacunel pa Rocho Dios. ⁶⁷ Ec'uchiri' rali xril ri Pedro cumik'isaj rib chuchi' ri ak', lic xutzutza' uwach y xubi'ij che:

—Rilal lal jun chique ri eteran chirij ri Jesús ri aj Nazaret —xcha che.

⁶⁸ Ewi ri Pedro xrewaj, jewa' xuc'ul uwach:

—Ri'in na weta'am ta uwach y na weta'am tane sa' puwi' catch'a't wi —xcha'. Xel c'u bi chuchi' ri puerta. Tec'uchiri', xch'aw ri teren.

⁶⁹ Ec'u rali aj chac echiri' xril tanchi ri Pedro, xujek ubi'ixiquil chique tak ri e c'o chiri':

—Wa' wa'chi e jun chique rutijo'n ri Jesús —xcha'.

⁷⁰ No'j ri Pedro xrewaj tanchic. Jok'otaj c'u ri', e tak ri e c'o chiri' xquibi'ij tanchi che ri Pedro:

—Pakatzij wi rilal lal jun chique rutijo'n; lic k'alaj lal aj Galilea, ma ri

* 14:62 Dn. 7:13; Ap. 1:7

cach'a't la e junam ruc' ri quech'a't rique —xecha'.

⁷¹ Ewi ri Pedro xujek ubi'xiqul itzel tak tzij y lic xujiquba' uwach, xubi'ij:

—Ri'in na weta'am ta c'ana uwach wa' wa'chi cabi'ij alak —xcha'.

⁷² Ec'u ri teren xch'aw chucalaj. Ewi xc'un lo chuc'u'x ri Pedro ri xbi'x lo che ruma ri Jesús: «C'amaja' ne cabixon ri teren chucalaj, ri'at oxlaj chic abi'im na aweta'am ta nuwach.» Ec'u catajin wa' pujolom, xumaj rok'ej.

15

Catz'ak uchi' ri Jesús chwach ri takanel Pilato

(Mt. 27:11-14; Jn. 18:33-40)

¹ Echiri' xsakiric, ri nimak e aj chacunel pa Rocho Dios cuc' tak ri nimak winak re ri tinamit, raj c'utunel re ri tzijpixab y conoje ri uchapom wi rib ri k'atbal tzij, qui'anom chi tzij chiquiwach puwi sa' ri caqui'an ruc' ri Jesús. Xquic'am c'u bi ri Jesús yututalic y xe'quiya'a chwach ri takanel Pilato. ² Ri Pilato xutz'onoj c'u che ri Jesús:

—¿Lal cami ri' ri rey que raj judi'ab? —xcha che.

Ri Jesús xuc'ul uwach:

—Lal cabi'n la re —xcha che.

³ Yey ri nimak e aj chacunel pa Rocho Dios lic caquitz'ak uchi'.

⁴ Xutz'onoj tanchi c'u ri takanel Pilato che:

—¿E cami la' na cac'ul ta la uwach? ¿Na cata ta cami la janipa chi mac caquicoj chi'ij la? —xcha che.

⁵ Na ruc' ta c'u ri', ri Jesús na xuc'ul ta uwach. Ruma c'u wa', ri Pilato lic xcam ranima' che.

Cak'at tzij re camic puwi ri Jesús

(Mt. 27:15-31; Lc. 23:13-25; Jn. 19:1-16)

⁶ Chupa c'u ri nimak'ij Pascua, ri takanel romano xex cu'an wi cuyolopij bi jun chique ri e c'o pa cárcel, yey e ri winak quecha'wic china ri cacaj cayolopix bi. ⁷ C'o c'u jun achi

Barrabás rubi', rire c'o pa cárcel cuc' jujun rachbi'il ruma xqui'an camic echiri' xeyactaj chirij ri takanel aj Roma. ⁸ Xebopon c'u uq'uiyal winak chwach ri takanel Pilato y xquijek utz'onoxic che e cu'an pacha' tak ri u'anom lo ronoje junab.

⁹ Ewi ri takanel Pilato xutz'onoj chique:

—¿Ca'aj alak canyolopij bi ri rey que raj judi'ab? —xcha'. ¹⁰ Xubi'ij wa' ma reta'am ri nimak e aj chacunel pa Rocho Dios xe'quiya'a ri Jesús chwach, xa ruma c'ax quic'u'x chirij.

¹¹ Ec'u ri nimak e aj chacunel pa Rocho Dios xquicoj pa quijolom ri uq'uiyal winak e caquitz'onoj cayolopix bi ri Barrabás. Yey rique jela' xqui'ano.

¹² Ri Pilato xutz'onoj tanchi chique:

—¿Sa' c'u ri' ca'aj alak can'an ruc' ri cabi'ij alak e rey que raj judi'ab? —xcha'.

¹³ Yey ri winak lic xesiq'uin tanchi che uc'ulic uwach:

—¡Camisax chwa cruz! —xecha'.

¹⁴ Ec'u ri takanel Pilato xutz'onoj chique:

—¿Sa' c'u rumac u'anom? —xcha'.

No'j ri winak más co xesiq'uinic:

—¡Camisax chwa cruz! —xecha'.

¹⁵ Ewi ri Pilato xa ruma xraj cacana' can chi utz cuc' ruq'uiyal winak, e xuyolopij bi ri Barrabás. Yey xebutak ri soldados che ujich'ic upa ri Jesús. Tec'uchiri', xuya bi paquik'ab re caquicamisaj chwa cruz.

¹⁶ Ri soldados xquic'am c'u bi ri Jesús che ruwa ja re rupalacio ri takanel. Chiri' xmoli' quichi' conoje tak ri soldados. ¹⁷ Ec'u ri soldados xquicoj jun c'ul morato* che ri Jesús. Che c'u rujolom xquicoj jun corona pach'um ruc' q'uix. ¹⁸ Xquijek c'u quesiq'uin che, jewa' caquibi'ij:

—¡Nim uk'ij ri rey que raj judi'ab! —quecha'.

¹⁹ Caquich'ay rujolom ruc' jututaj tani y caquichubaj rupalaj.

* 15:17 “Morato”: Quil “púrpura” pa vocabulario.

Caquixucuba' c'u quib chwach, lic xa u'aniquil caquiyac uk'ij. ²⁰ Echiri' ya lic xquich'amij, xquesaj ri c'ul morato quicojom che y xquicoj tanchi ruk'u'. Xquesaj c'u bi cha' que'quicamisaj chwa cruz.

Rucamic ri Jesús chwa ri cruz

(Mt. 27:32-56; Lc. 23:26-49; Jn. 19:17-30)

²¹ C'o c'u jun achi aj Cirene petinak pa juyub e ri' quic'ow chiri'. Ec'u ri soldados xquitak che cutelej bi ri cruz re ri Jesús. Rachi, Simón rubi', rire e quikaw ri Alejandro y Rufo.

²² Y xquic'am bi ri Jesús pa jun luwar Gólgota cabi'x che, wa' que'elawi "luwar re ubakil ujolom anima". ²³ Yey xquiya' che ri Jesús vino cojotal mirra ruc'; no'j Rire na xutij taj.

²⁴ Echiri' quiya'om chi ri Jesús chwa ri cruz, ri soldados ruc' jun sorteo xquijach quib puwi ruk'u' cha' caquilo sa' tak ri caquic'am bi chiqui-jujunal.

²⁵ Anim che ri ubelej ora,† xquiya ri Jesús chwa ri cruz. ²⁶ Chwi c'u lo rucruz ri Jesús tz'ibitalic su'be xk'at tzij puwi', jewa' cubi'ij: «RI REY QUE RAJ JUDI'AB.»

²⁷ Xequiya c'u ca'ib elek'omab chwa cruz, jun puwiquik'ab y jun pumox ri Jesús.

²⁸ Ec'u xu'ana ri' ri tz'ibital can chupa Rutzij Upixab ri Dios:

E jun Rire xajilax bi cuc' ri winak itzel quic'u'x. *Is. 53:12*

²⁹ Ri winak quebic'ow chiri' caquiyok' canok, caquiyiriya' ri quijolom che y jec'uwa' caquibi'ij che:

—¡Ah! At pe' ri abi'im cawulij ri Rocho Dios y xa pa oxib k'ij cayac tanchic. ³⁰ Chacolobej c'u awib ri' y chatkaj lo chwa ri cruz —quecha'.

³¹ Jenela' ri' xqui'an ri nimak e aj chacunel pa Rocho Dios junam cuc' raj c'utunel re ri tzijpixab; rique lic

caquich'amij, jewa' caquibi'ij chiqui-wach:

—Lic wa' c'ut e q'ui ri xebucolobej che tak yabil y che camic, yey na curik ta wa' ucolobexic rib rire. ³² La' la'chi cabi'x "Cristo, Rey que Raj Israel" che, kaja lo ri' utuquel chwa ri cruz cha' cakilo y jela' cakacojo e rire ri Ucha'o'n lo ri Dios —quecha'.

Y jenela' ri ca'ib eya'om chwa cruz junam ruc', lic xquich'amij Rire.

³³ Ec'uchiri' xtic'oj ri k'ij, xoc k'eku'm che ruwachulew y wa' xu'q'uisa c'a che ri urox ora benak k'ij. ³⁴ Chupa c'u la' la' ora, ri Jesús lic co xsiq'uinic, jewa' xubi'ij pa ri ch'a'tem cach'a't wi Rire:

—*Eloi, Eloi, ¿lama sabactani?* — xcha'. Wa' que'elawi: "Lal nu Dios, Lal nu Dios, ¿su'be xinok'otaj can la?"[☆]

³⁵ Jujun c'u chique ri e c'o chiri', echiri' xquita wa', xquibi'ij:

—Chitape', wa'chi e cusi'uij ri k'alajisanel Elías —xecha'.

³⁶ C'o c'u jun xe'ec lic canic, xumu' jun esponja pa vinagre, xuxim c'u chutza'm jun tani y xuya pan che ri Jesús re cutz'ubu, y jec'uwa' xubi'ij:

—Kila pe' we cac'un ri Elías re colu'kasaj lo chwa ri cruz —xcha'.

³⁷ No'j ri Jesús lic co xsiq'uinic y jela' xcamic. ³⁸ Ec'uchiri', ri telón c'o chupa ri Rocho Dios‡ xrich'rob chunic'ajal; xujek lo puwi' y xo'lq'uis c'a chuxe'.

³⁹ Ec'u ri capitán§ tac'al chwach ri Jesús, echiri' xuto xsiq'uinic yey xrilo sa' rucamic, jewa' xubi'ij:

—¡Pakatzij wi, wa' wa'chi e Uc'ajol ri Dios! —xcha'.

⁴⁰ E c'o c'u jujun ixokib caquitzutza' pana chinimanaj. Chiquixo'l wa' e c'o ri María ri aj Magdala, ri Salomé y ri María quichu ri Jacobo (ri más c'ac'al) y ri José. ⁴¹ Wa' wa' ixokib lic xeterej chirij ri Jesús y lic quinimam lok echiri' Rire c'o Galilea. Rique cuc'

† 15:25 "Ri ubelej ora": Quil "hora" pa vocabulario. ☆ 15:34 Sal. 22:1 ‡ 15:38 "Telón": E jun c'ul cujach upa ri Luwar Santo ruc' ri Luwar lic Santo. Éx. 26:31-33; Heb. 6:19; 9:3-12 § 15:39 "Capitán": Wa' e aj wach que cien soldados.

jujun chic uq'uiyal ixokib, xepaki' lo ruc' pa ri tinamit Jerusalem.

Ri Jesús camukic

(Mt. 27:57-61; Lc. 23:50-56; Jn. 19:38-42)

⁴² Benak k'ij, echiri' raj judi'ab caquiyijba' pan janipa ri cajawax chique pa ri k'ij re uxlanibal, ⁴³ ri José aj Arimatea xoc chwach ri takanel Pilato y na xuxi'ij ta c'ana rib xutz'onoj rucuerpo ri Jesús** cha' cuc'am bi. (Ri José lic c'o uwach chique ri uchapom wi rib ri k'atbal tzij yey lic roye'em ruc'unibal rutakanic ri Dios.)

⁴⁴ Ri Pilato lic xcam ranima' che echiri' xuto caminak chi ri Jesús. Ewi xusiq'uij ri capitán cha' cutz'onoj che we katzij. ⁴⁵ Echiri' xuta chi uchi' ri capitán caminak chi ri Jesús, xuya luwar che ri José cuc'am bi rucuerpo.

⁴⁶ Ec'u ri José xulok' jun manta, xukasaj lo rucuerpo ri Jesús chwa ri cruz y xupis bi chupa ri manta. Xu'ya'a c'u ri' chupa jun mukubal c'otom pa'baj y xutak uquetebaxic can jun nimalaj abaj chuchi' re tz'apibal re. ⁴⁷ Yey ri María ri aj Magdala y ri María ruchu ri José, xquilo pa xmuk can wi.

16

Ruc'astajibal ri Jesús

(Mt. 28:1-10; Lc. 24:1-12; Jn. 20:1-10)

¹ Echiri' xic'ow ri k'ij re uxlanibal, ri María ri aj Magdala, ri Salomé y ri María ruchu ri Jacobo, xquilok' cunabal lic qui' ruxlab re caquibal rucuerpo ri Jesús chupa. ² Ec'u ri nabe k'ij re ri semana lic anim c'a e ri' quel lo ri k'ij, xebec pa mukutal wi ri Jesús. ³ Caquibi'ij c'u chiquiwach: «¿China quesán rabaj chike c'o chuchi' ri mukubal?» quecha'.

⁴ Pero c'ate xquilo, rabaj esam chic, yey wa' lic nim. ⁵ Ec'uchiri' xeboc bi chupa ri mukubal, xquil jun ala

tz'ul pa uwiquik'ab chique, ucojom jun c'ul sak lic naj rakan. Yey rique lic xquixi'ij quib che. ⁶ Ec'u rire xubi'ij chique:

—Mixi'ij iwib. Ri'ix e quitzucuj ri Jesús ri aj Nazaret, ri xcamisax chwa cruz; Rire na jinta chi wara, ma c'astajinak chubi. Chiwila wa luwar pa xya'i' wi rucuerpo. ⁷ Ec'u ri'ix jix, ji'bi'ij chique rutijo'n y che ri Pedro: “Rire que'ec Galilea, canabey bi chwach; chila' c'u ri' qui'wila wi uwach, jela' pacha' ri ubi'im chi lo chiwe” — xcha'.

⁸ Ec'u rixokib xebel bi chuchi' ri mukubal lic quebirbotic ruma benak quina'oj puwi ri xquilo; yey na jinta ne c'ana c'o xquitzijoj wi ruma quixi'im quib.

Ri Jesús cuc'ut uwach chwach ri María ri aj Magdala

(Jn. 20:11-18)

⁹ Ec'uchiri' c'astajinak chi lo ri Jesús, anim tan che ri nabe k'ij re ri semana, nabe xuc'ut uwach chwach ri María ri aj Magdala, ri e resam bi wukub itzel uxlabixel che. ¹⁰ Rire xe'ec c'ut cha' cu'tzijoj ruc'astajibal ri Jesús chique ri xeterej chirij yey xebu'rika c'u ri' lic quebisonic y quebok'ic. ¹¹ Yey rique echiri' xquito c'astajinak chi lo ri Jesús y xilitaj uwach ruma ri María, na xquicoj taj.

Ri Jesús cuc'ut uwach chiquiwach ca'ib utijo'n

(Lc. 24:13-35)

¹² Tec'uchiri', ri Jesús xuc'ut uwach chiquiwach ca'ib chique rutijo'n, no'j junwi u'aniquil xu'an wa' echiri' rique e ri' quebinic quebec pa juyub. ¹³ Ec'u wa ca'ib xetzelejic, xe'quitzijoj chique ri jujun chic tijo'n; yey wa' na xcoj tane chwiquik'ab.

Ri takanic xuya can ri Jesús

(Mt. 28:16-20; Lc. 24:36-49; Jn. 20:19-23)

¹⁴ Q'uisbal chi c'u re, ri Jesús xuc'ut uwach chiquiwach ri junlajuj utijo'n

** **15:43** Chupa tak rutakanic ri Dios cubi'ij we c'o junok cacamisax chwa che', chirajawaxic camukic echiri' c'amaja' coc rak'ab. Ruma c'u wa', ri José xraj cumuk can rucuerpo ri Jesús echiri' c'amaja' cajeker ri k'ij re uxlanibal yey wa' cajeker pa roquibal ak'ab. Dt. 21:22-23

echiri' rique etz'ul chwa mexa, yey xuch'a'bej quipa ruma na cubul ta quic'u'x ruc' y ruma u'anom lic co ri canima', ma na xquicoj ta que ri xebilow re ri Jesús c'astajinak chic.

¹⁵ Xubi'ij c'u chique:

—Jix che ronoje ruwachulew y chitzijoj ri Utzilaj Tzij chique conoje ri ticawex. ¹⁶ Ec'u ri quecojow re y caquic'ul ri bautismo, quecolobetajic. No'j c'u ri na quecojow ta re, cak'at na tzij paquiwi'. ¹⁷ Yey chique ri quecojow re, quilitalaj c'utubal re ruchuk'ab ri Dios. Pa ri nubi' quebequesaj bi itzel uxlabixel, quech'a't pa jujun chic c'ac' ch'a'tem, ¹⁸ caquichap tak ne cumatz paquik'ab. Yey we c'o ri xquitijo y na quina'bem taj camisabal que, na jinta c'o cu'an chique. Caquiya ri quik'ab paquiwi tak ri yewa'ib, y wa' quecunutajic —xcha'.

Ri Jesús catzelej chila' chicaj

(Lc. 24:50-53)

¹⁹ Ec'u ri Kanimajawal echiri' ch'a'tinak chi cuc', xc'ul pana chila' chicaj y xtz'uyi' puwiquik'ab ri Dios. ²⁰ E tak c'u rutijo'n xebel bi che utzijoxic ri Utzilaj Tzij pa tak ronoje luwar. Yey ri Kanimajawal xebuto'o, xuya chique caquic'ut ruchuk'ab ri Dios cha' ruc' wa' cujiquiba' uwach ri Utzilaj Tzij. Amén.

Ri Utzilaj Tzij re Jesucristo tz'ibital can ruma ri Lucas

Ri Lucas catz'iban pan che ri Teófilo, jun achi lic c'o uwach

¹ Uq'uiyal ticawex quitz'ibam chi puwi sa' tak ri u'anom ri Dios chikaxo'l ri'oj, ri nabe kacojom rubi' ri Jesucristo. ² Quitz'ibam c'u ri c'utum lo chike cuma ri raj chac ri Dios, ri xebilow chi utz ri xu'an ri Kanimajawal Jesucristo chwi xujek lo ruchac. Yey e rique ri xquitziyoj ri Utzilaj Tzij puwi Rire.

³ Ri'in mismo lic xinweta'maj na chi utz y nuch'obom lo rakan puwi ronoje sa' tak ri xu'ano chwi lo ruc'unic ri Kanimajawal che ruwachulew. Yey chinuwach ri'in, lic utz quintz'iban pan che'la Teófilo y cantziyoj rusuc' wa' che'la chuchola'j ⁴ cha' queta'maj la chi utz puwi ri K'ijesak c'utum chiwach la.

Jun ángel cuk'alajisaj ri ralaxibal ri Juan Aj Ya'l Bautismo

⁵ Echiri' ri Herodes catakan puwi ri luwar re Judea, c'o jun aj chacunel pa Rocho Dios, Zacarías rubi'. Rire e cuq'uul raj Abías.* Ri rixokil Elizabet e cuq'uul ri ralc'o'al can ri Aarón. ⁶ Ri Zacarías y ri Elizabet junam lic e jusuc' chwach ri Dios, yey lic queboc il che ronoje Rutzij Upixab ri Dios Kajawxel y na jinta junok catz'akaw mac chiquij. ⁷ Pero rique na jinta juna calc'o'al, ma ri Elizabet na utz taj calanic yey quicabichal e nimak winak chic.

⁸ Xopon c'u ruk'ijol echiri' ri Zacarías cuc' ri rachbi'il e aj Abías que'quiloc'oj uk'ij ri Dios. ⁹ Ec'u raj chacunel pa Rocho Dios caqui'an jun sorteo cha' caquicha'o china chique coc chupa ri Luwar Santo pa ri Rocho Dios re cu'poroj incienso. Jec'ula'

xqui'an wa sorteo, y wa' xtzak puwi ri Zacarías.

¹⁰ Echiri' xopon ru'orayil re caporox ri incienso, conoje ri ec'o chwach ri Luwar Santo quetajin che u'anic orar.

¹¹ Ec'uchiri', jun ángel re ri Dios Kajawxel xwinakir chwach ri Zacarías puwi quik'ab ri altar pa caporox wi ri incienso. ¹² Echiri' ri Zacarías xril ri ángel, xcam ranima' che y lic xuxi'ij rib.

¹³ No'j ri ángel xubi'ij che:

—Zacarías, maxi'ij awib, ma ri Dios utom chi ri atz'onom che. Ruc' c'u rawixokil cac'o'ji' jun ac'ajol yey Juan rubi' cacojo. ¹⁴ Cac'o'ji' c'u qui'cotemal awuc' y lic e q'ui ri que-

qui'cot che ri ralaxibal rac'ajol, ¹⁵ ma rire cu'ana lic nim uk'ij chwach ri Dios. Na cuchina'aj ta vino y na cuchina'aj ta ya' re k'abarc; y e ne chiri' c'a matzem, ruc'a'am chi lo ruchuk'ab ri Santowilaj Ruxlabixel ri Dios. ¹⁶ Y ruma c'u Rire, lic e q'ui chique ri e aj Israel quetzelej jumul chic ruc' ri Dios Kajawxel y caquiya tanchi quib puk'ab. ¹⁷ Ec'u wa Juan canabej lo chwach ri Kanimajawal ruc' ruchuk'ab ri Ruxlabixel ri Dios jela' pacha' ri k'alajisanel Elías re ojertan. Yey ri chac colu'ana' e cucoj utzil chomal chiquixo'l ri ticawex cuc' ri calc'o'al y cujalc'atij ri quina'oj ri na e ta cojol tzij cha' cu'ana pacha' ri quina'oj ri quebin jusuc'. Jec'uri'la' rire quebuyijba' ri tinamit cha' caquic'ul chi utz ri Kanimajawal —xcha ri ángel.

¹⁸ Ri Zacarías xutz'onoj c'u che:

—¿Su'anic cacubi' nuc'u'x che wa'? Ma ri'in lic in nimalaj winak chic yey jenela' ri wixokil —xcha'.

¹⁹ Ri ángel xuc'ul uwach, jewa' xubi'ij che:

—Ri'in in Gabriel, intakom lo ruma ri Dios Kajawxel cha' quino'lch'a't awuc' y co'lnuya'a wa utzilaj tzij chawe. ²⁰ No'j wo'ora catcanaj canok at me't, y na utz ta c'u ri' catch'awic,

* **1:5** “Raj Abías”: Rojertan e c'o 24 grupos aj chacunel pa Rocho Dios. Chujujunal grupo c'o quibi', y “Abías” e jun chique wa grupos.

ma na xacoj ta ri ximbi'ij chawe. Copon na c'u ri k'ij echiri' calax rac'ajol; c'a ec'uchiri', utz catch'aw tanchic — xcha che.

²¹ Ec'u ri e c'o pan chwach ri Luwar Santo coye'em jampala' quel lo ri Zacarías, yey lic xubisoj quic'u'x ma lic xmayin chupa ri Luwar Santo pa ri Rocho Dios. ²² Echiri' xel lo ri Zacarías, na utz ta cach'aw chique; xa cu'an chi c'utubal ruc' ruk'ab chique ma xcanaj can me't. Y jela' xquimaj usuc' c'o xc'ut chwach ri Zacarías chupa ri Luwar Santo.

²³ Echiri' ri Zacarías xuq'uis tak ruk'ijol cachacun chupa ri Rocho Dios, xe'ec chirocho. ²⁴ C'a tec'uchiri', ri rixokil Elizabet xcanajic yewa' ixok. Wo'ob ic' c'u ri' xuchajij rib chirocho, e ri' na xel tubi. Yey xaki jewa' ri cuch'obo: ²⁵ «E ri Nukaw Dios 'anayom wa' chwe ma xinjuch' ca'n che y xresaj ri ch'amibal we.»

Jun ángel cuk'alajisaj ri ralaxibal ri Jesús

²⁶ Ic'owinak chi c'u wakib ic' ri' echiri' ri ángel Gabriel xtak lo ruma ri Dios chupa jun tinamit Nazaret rubi', pa ri luwar re Galilea. ²⁷ Xtak lo ruc' jun k'apoj ali María rubi', yey rire lic jusuc' rubinic chwach ri Dios. Ri María unimam chic cac'uli' ruc' jun ala José rubi', yey rire e jun chique ri ral'c'o'al can ri rey David.

²⁸ Ec'uchiri', xoc bi ri ángel pa c'o wi ri María, y jewa' ri rutzil uwach xuya'o:

—¡Chatqui'cotok! E ri'at lic nim ak'ij awalaxic chiquixo'l conoje rixokib. Ma ri Dios Kajawxel c'o awuc' yey ac'ulum ri unimal rutzil uc'u'x Rire —xcha che.

²⁹ Ri María echiri' xuta wa' wa ch'a'tem, xsach una'oj puwi' y jewa' xutz'onoj chiribil rib: “¿Sa' que'elawi wa cabi'x chwe?”

³⁰ Ec'uchiri', ri ángel jewa' xubi'ij che:

—María, maxi'ij awib, ma arikom ri unimal rutzil uc'u'x ri Dios. ³¹ Ec'u wo'ora catcanajic at yewa' ixok, calax jun awalab y Jesús rubi' cacojo.

³² Rire lic nim uk'ij y cabi'x che e Uc'ajol ri Jun catakan chwi ronoje.

Ec'u ri Dios Kajawxel cuya puk'ab cu'an rey jela' pacha' ri rey David, rumam re ojertan. ³³ Y caya'taj che catakan puwi ri tinamit Israel yey rutakanic na junta utakexic —xcha che.

³⁴ Ec'u ri María xutz'onoj che ri ángel:

—¿Su'anic cu'ana ri' wa', we ri'in c'a junta ne wachijil? —xcha'.

³⁵ Ri ángel xuc'ul uwach:

—E ri Santowilaj Ruxlabixel ri Dios cakaj lo paw'i y ruchuk'ab ri Jun catakan chwi ronoje, cuch'uk awi' pacha' sutz'. E uwari'che rac'a calaxic cabi'x che e Santowilaj Uc'ajol ri Dios. ³⁶ Y chatape wa', jenela' rawatz-achak' Elizabet umatzem chi jun ac'a tob lic nimalaj winak chic. E ri cabi'x che na utz taj calanic, wo'ora yewa' ixok y e uwakib ic' wa'. ³⁷ Ma chwach ri Dios na junta c'ana c'ayew —xcha che.

³⁸ Ec'uchiri', xubi'ij ri María:

—Ri'in puk'ab ri Nukaw Dios in c'o wi. Ec'u Rire chu'ana wuc' janipa ri xbi'ij la chwe —xcha'. Ec'uchiri', ri ángel xel bi chwach.

Ri María que'bina ruc' ri Elizabet

³⁹ C'o c'u jun k'ij ri María xuyac bi rib y lic canic xumaj bi ube chujuyub chupa jun tinamit re Judea.

⁴⁰ Echiri' xoponic, xoc chirocho ri Zacarías y xuya rutzil uwach ri Elizabet. ⁴¹ Xew c'u xuta ri Elizabet ri rutzil uwach xya' ruma ri María, rac'a umatzem lic xuyiquij rib y ri Santowilaj Ruxlabixel ri Dios xkaj puwi ri Elizabet. ⁴² Ruma c'u ri', lic co xch'awic, jewa' xubi'ij:

—Nim ak'ij awalaxic ri'at chiquixo'libal conoje rixokib y nim uk'ij rawalab amatzem. ⁴³ ¿Cha'taj ya'tajinak can wa' chwe ri'in co'lbina ruchu ri Kanimajawal wuc'? ⁴⁴ Ma xew xinta ri rutzil nuwach xaya'o, na jampatana rac'a numatzem lic xuyiquij rib ruma ruqui'cotemal. ⁴⁵ Nim ak'ij awalaxic ri'at ma xacoj ronoje janipa ri xbi'x chawe ruma ri Dios Kajawxel yey wa' lic e cu'ana' —xcha'.

⁴⁶ Ec'uchiri', ri María xubi'ij:

«Ri'in lic canyac uk'ij ri Dios Kajawxel,

47 y ri wanima' lic caqui'cot ruc' ri Dios Nucolobenel;

48 ma xinjuch' ca'n che, tob in jun raj chac na junta co nuwach.

Chwi c'u ri' wo'ora conoje ri ticawex caquibi'ij na chwe:

“Lic nim ak'ij awalaxic ri'at”

49 ma e ruchuk'ab ri Dios Kajawxel lic sa'ch tak ri utz u'anom wuc'.

Ec'u rubi' Rire lic nim uk'ij Santo.

50 Y cuc'ut na ri rutzil uc'u'x chique janipa ri c'o xi'in ib pa canima' chwach Rire.

51 Rire e 'anayom uq'uiyal chac ruc' ruchuk'ab.

Usachisam ri quina'oj ri caqui'an nim che quib,

52 y resam ri takanic paquik'ab ri e nimak takanelab;

yey uyacom quik'ij ri lic na junta co quiwach.

53 Chique ri quenumic, uya'om quibeyomalil;

no'j ri beyomab xebutak bi y na junta c'o xuya bi chique.

54 Ebuto'om c'u rutinamit Israel, tak ri raj chac Rire;

yey na umesc'utam ta uc'utic ri rutzil uc'u'x

55 na junta utakexic che ri Abraham y chique conoje ri ralc'o'al canok,

jela' pacha' rubi'tisim chique ri kati'-kamam† ojertan» xcha'.

56 Y ri María laj oxib ic' xcanaj can chirocho ri Elizabet. C'a tec'uchiri', xtzelej lo chirocho.

Ri ralaxibal ri Juan Aj Ya'l Bautismo

57 Ec'uchiri' xopon ruk'ij ri Elizabet re cutzir uwach, xalax ri ralab. 58 Y echiri' ri ejekel lo chunakaj rire y tak ri c'o chux che xquito xutzir uwach ruma runimal rutzil uc'u'x ri Dios c'utum lo che, lic xequi'cot junam ruc'.

59 Echiri' rac'a xuq'uis wajxakib k'ij ralaxic, xec'un lo ri quecojow ri retalil re circuncisión cha' caqui'an

wa' che. Yey rubi' xcaj caquicojo e Zacarías, jela' pacha' rubi' rukaw.

60 No'j ruchu xubi'ij chique:

—Na cacoj ta Zacarías che, ma Juan rubi' cacojic —xcha'.

61 Xquibi'ij c'u che:

—¿Su'be ri'? Ma na junta junok chiquixo'l ri atz-chak' la jela' rubi' —xecha'.

62 Ec'uchiri', ruc' ri quik'ab xquitz'onoj pan che rukaw rac'a sa' ri bi'aj caraj rire cacoj che. 63 Ec'u rukaw rac'a xutz'onoj juperaj tz'alam re tz'ibanic y jewa' xutz'ibaj chwach: «Juan rubi' cacojic.» Y conoje lic xcam canima' che.

64 C'a ec'uchiri', ri Zacarías xjakataj ruch'awibal y jela' utz xch'aw tanchic. Y xujek c'u ri' cuyac uk'ij ri Dios.

65 Y conoje ri ticawex catajin wa' pa quijolom ruc' xi'in ib, y xe'ec c'u utzijoxic wa' chique conoje ri e c'o pa tak ri juyub re Judea. 66 Yey janipa c'u ri xetaw re rutzijoxic, xquic'ol wa' pa canima' y caquich'ob c'u rakan: «¿Sa' nawi ruwach wa ralco ala echiri' canimaric?» quecha'. Jewa' xquibi'ij ma lic k'alaj ri Dios uk'alajisam ruchuk'ab puwi'.

67 Ec'uchiri', ri Zacarías rukaw ri ralco ala xujek cak'alajisanic ma ri Santowilaj Ruxlabixel ri Dios xkaj lo puwi'; jec'uwa' xubi'ij:

68 «Lic nim uk'ij ri Dios Kajawxel re Israel

ma xc'un kuc' re cojo'lucolobej ri oj utinamit.

69 Xutak lo jun Kacolobenel lic c'o uchuk'ab

yey Rire elinak lo chiquixo'l ri ralc'o'al can ri David, ri raj chac ri Dios.

70 Ma ojertan e ubi'im lo wa' cuma ri k'alajisanelab e jusuc' chwach.

71 Ubi'im cojo'lucolobej paquik'ab ri tzel quebilow ke

y paquik'ab ri quech'amin ke'oj

72 cha' cuc'ut ri rutzil uc'u'x chique ri kati'-kamam

† 1:55 “Rubi'tisim chique ri kati'-kamam”: Ri bi'tisinic xu'an ri Dios chique e cutak lo jun Colobenel.

y na cumesc'utaj ta ri santowilaj utzij
u'anom lo ojertan
73 puwi ri bi'tisinic xu'an che ri
kakaw Abraham.
74 Ubi'tisim cojo'lresaj paquik'ab ri
tzetl quebilow ke
cha' jela' na ruc' ta xi'in ib
cakalok'nimaj
75 ronoje k'ij che ri kac'aslem
ruc' jun santowilaj kabinic kasilabic
y jusuc' kac'o'ji'ic chwach Rire.
76 Ec'u ri'at nuc'ajol, cabi'x chawe
at k'alajisanel re ri Jun catakan chwi
ronoje;
ma catnabej bi chwach ri Kanima-
jawal
re cabi'ij chique ri winak caquiyijba'
ri quibinic quisilabic chwa ruc'unibal
Rire.
77 Y catnabej bi chwach cha' ri katina-
mit
caqueta'maj ri Dios quebucolobej ma
cucuy ri quimac.
78 Ec'u ri ka Dios, ruma ri unimal
rutzil uc'u'x,
cutak lo ri Jun kuc' re chila' chi-
caj, wa' e pacha' ri K'ijsak re
rusakribal
79 cha' quebuya pa k'ijsak ri e c'o pa
k'eku'm y e c'o chuxe' ri camic,
yey cuc'am kawach chupa ri be re ri
utzil chomal» xcha'.
80 Y ruc'ajol ri Zacarías catajin uni-
maric y catajin uc'o'ji'ic uchuk'ab
chwach ri Dios. Xjeki' c'u pa tak
luwar catz'intz'otic, xopon na ruk'ijol
echiri' xuc'ut uwach chiquiwach ri
tinamit Israel.

2

Ri ralaxibal ri Jesús (Mt. 1:18-25)

1 Chupa tak la' la k'ij, ri Augusto
ri nimalaj takanel re Roma, xtakan
che ca'an jun ajilanic chique conoje ri
ticawex re tak ri tinamit pa catakan
wi rire. 2 E nabe ajilanic xtakan che
u'anic, yey x'ani' wa' echiri' ri Cirenio
e aj wach re ri nación Siria. 3 Ruma
wa ajilanic, conoje ri ticawex quebec
chiquijujunal pa ri quitinamit cha'
quebajilaxic.

4 E uwari'che ri José xel bi chiri'
Galilea chupa raldea Nazaret pa jekel
wi, y xe'ec Judea chupa raldea Belén
pa xalax wi ri rey David, ma ri José
ralc'o'al can ri David. 5 Ruma c'u wa
ajilanic, xe'ec junam ruc' ri María, ri
ya'tal chi che re rixokil. Yey ri María
yewa' ixok chic.

6 Ec'uchiri' e c'o chi Belén, xo-
pon ruk'ijol cutzir uwach ri María.
7 Ruma c'u na xquirik ta luwar pa
mesón, xec'o'ji' pa jun luwar re qui-
warabal chicop. Xalax c'u ri' ri nabe
ralab ri María. Rire xupis rac'a chi utz
pa c'ul y xucotz'oba' pa jun canawa re
quiwa'bal chicop.

Raj chajal que bexex que'quila ri Jesús

8 Chunakaj Belén e c'o aj chajal
bexex caquic'owibej rak'ab pa juyub
re quequichajij ri quibexex.

9 Yey xakic'ate't xwinakir jun ángel
re ri Dios Kajawxel chiquiwach. Ewi
runimal uchomalil ri Dios xutzij
quiwi' y rique lic xquixi'ij quib che.
10 Pero ri ángel xubi'ij chique:

«Mixi'ij iwib, ma nuc'amom lo utzi-
laj tzij chiwe re unimal qui'cotemal
chique conoje rutinamit ri Dios.
11 Ma wak'ij pa ri tinamit re ri rey
David, xalax jun Colobenel iwe; e ri
Kanimajawal, Rucha'o'n lo ri Dios.
12 Ri c'utubal re wa' e quirik ri ralco
ac'a pistal pa c'ul, cotz'ol chupa jun
canawa re quiwa'bal chicop» xcha
chique.

13 Ec'u la' la jok'otaj uq'uiyal ángeles
re chila' chicaj xakic'ate't xewinakir
ruc' ri jun ángel, e ri' caquibixoj rubi'
ri Dios, jewa' caquibi'ij:

14 «¡Nim uk'ij ri Dios c'o chila' chicaj!

Yey che ruwachulew, c'ola ri utzil
chomal re ri Dios cuc' ri caquic'ul ri
rutzil uc'u'x Rire» xecha'.

15 Ec'uchiri' xetzelej ri ángeles chila'
chicaj, raj chajal bexex jewa' xquibi'ij
chiquiwach: «Jo' ri' c'a chila' Belén.
Je'kila wa xolu'bi'ij ri Dios Kajawxel
chike» xecha'.

16 Lic c'u quebanic xebec y
xe'quirika ri María, ri José yey ri
ralco ac'a cotz'ol chupa ri canawa

re quiwa'bal chicop. ¹⁷ Yey echiri' xquil uwach ri ralco ac'a, xquitzijoj ri xubi'ij ri ángel chique chwi Rire. ¹⁸ Y conoje ri xetaw re wa', lic xcam canima' che ri caquitzijoj raj chajal bexex. ¹⁹ No'j ri María lic uc'olom ronoje wa' pa ranima' y lic cuch'ob rakan puwi'.

²⁰ Tec'uchiri', raj chajal bexex xet-zelejic, quebixoníc y caquiya uk'ij ri Dios ruma ronoje ri xquilo y xquito, ma e xu'ano pacha' ri bi'im bi chique ruma ri ángel.

Ri Jesús caya' puk'ab ri Kakaw

²¹ Echiri' xuq'uis wajxakib k'ij ralaxíc ri ralco ac'a, xcoj ri retalil re circuncisión che. Y Jesús rubi' xcojic, ma echiri' c'amaja' ne camatzexic, ri ángel xubi'ij e bi'aj wa' cacoj che.

²² Xopon c'u ri k'ij echiri' chirajawaxíc ri José y ri María quebec Jerusalem ruma ri quijosk'iquil chwach ri Dios, jela' pacha' ri c'o chupa ri takanic re ri Moisés. Xquic'am c'u bi ri ralco ac'a Jerusalem cha' caquiya puk'ab ri Dios Kajawxel. ²³ Xqui'an wa' ma jewa' tz'ibital chupa Rutzij Upixab ri Dios Kajawxel: «Conoje ri raltak co alabo quebalax nabe, queya' puk'ab ri Dios Kajawxel»[☆] cacha'. ²⁴ Xebec c'u ri' cha' que'quiya'a ri quikasa'n pacha' ri cubi'ij chupa Rutzij Upixab ri Dios Kajawxel: «Juc'ulaj xmucur o juc'ulaj raltak co palomax»[☆] cacha'.

²⁵ Chiri' Jerusalem c'o jun achi Simeón rubi'. Rire lic jusuc' rubiníc usilabic, lic cucuxtaj ri Dios y roye'em ri colobetajíc re ri tinamit Israel. Ri Santowilaj Ruxlabixel ri Dios c'o ruc' ²⁶ y uk'alajisam chi che, na cacam tana we na caril tubi uwach Rucha'o'n lo ri Dios. ²⁷ Ec'u wa'chi xuna' pa ranima' ruma ri Ruxlabixel ri Dios que'ec pa ri Rocho Dios, y xe'ec c'ut. Ec'uchiri', ruchu-ukaw ri ralco ac'a Jesús xquic'am lo pa ri Rocho Dios cha' caqui'an ruc' pacha' ri cubi'ij ri takanic re ri Tzij Pixab.

²⁸ Ewi ri Simeón xuk'aluj ri ralco ac'a y xuyac uk'ij ri Dios, jewa' xubi'ij:

²⁹ «Lal Dios Kajawxel, ri'in xa in jun aj chac la.

Ec'u wo'ora utz quincam chi utzil chomal,

ma x'an la janipa ri bi'tisim la chwe;

³⁰ ya xinwil uwach ri Colobenel,

³¹ ri ya'om la chiquiwach conoje tak ri tinamit che ruwachulew.

³² Y Rire e K'ijsak cuk'alajisaj ri be re ri Dios chique conoje tak ruq'uiyal quiwach ri ticawex che ruwachulew,[☆]

yey ruma Rire cayac uk'ij ri tinamit la Israel» xcha'.

³³ Ruchu-ukaw ri Jesús lic cacam canima' che tak ri cabi'x chwi ri ralco ac'a. ³⁴ Ec'uchiri', ri Simeón xebu'an bendecir. Yey jewa' xubi'ij che ri María ruchu ri Jesús:

—¡Chatape! Ruma wa ralco ac'a lic e q'ui chique ri tinamit Israel quey-actajic yey lic e q'ui ri quetzakic.[☆] Ma Rire ya'tal lo ruma ri Dios re jun c'utubal; no'j uq'uiyal ticawex na caquic'ul taj y lic tzel caquilo. ³⁵ Y jec'ula' cak'alajiníc sa' ri c'o pa canima' uq'uiyal ticawex, we utz o na utz taj. Yey cambi'ij c'u chawe ri'at: Copon na jun k'ij echiri' lic c'ax cuna' ac'u'x, ma e cu'ana pacha' quic'owisax juna cuchilo pa rawanima' —xcha'.

³⁶ Chiri' c'u ri' c'o jun ixok k'alajisanel Ana rubi', umi'al ri Fanuel, ri ralc'o'al can ri Aser.* Rire lic nimalaj winak chic. Wukub junab c'uli'nak echiri' xcam ri rachijil, ³⁷ yey ya e ochenta y cuatro junab ri' malca'n canok. Rire xaki c'o pa ri Rocho Dios y culok'nimaj ri Dios ruc' ayuno y ruc' oración chipak'ij chichak'ab. ³⁸ Xopon c'u pan ri' ri Ana pa c'o wi ri Jesús y xtioxin chwach ri Dios. Ec'uchiri', xujeko cach'a't puwi ri ralco ac'a chique conoje ri coye'em ri colobetajíc re Jerusalem.

[☆] 2:22 Lv. 12 [☆] 2:23 Éx. 13:2 [☆] 2:24 Lv. 12:8 [☆] 2:32 Is. 42:6 [☆] 2:34 Lc. 20:17-18 * 2:36 Ri Aser e jun chique ri cablajuj uc'ajol ri Jacob.

39 Echiri' ruchi-ukaw ri Jesús xquiq'uis u'anic ronoje ri tz'ibital chupa Rutzij Upixab ri Dios, xetzelej tanchi Galilea chupa ri tinamit Nazaret. 40 Y ri ralco ac'a catajin uq'uiyic, catajin uc'oji'ic uchuk'ab y catajin uc'oji'ic una'oj. Yey ri unimal rutzil uc'u'x ri Dios c'o ruc'.

Ri Jesús y ruchi-ukaw que'qui'ana ri nimak'ij Pascua

41 Ronoje junab ruchi-ukaw ri Jesús quebec Jerusalem re que'qui'ana ri nimak'ij Pascua.

42 Echiri' ri Jesús xuq'uis cablajuj junab, ruchi-ukaw xebec Jerusalem jela' pacha' xex caqui'an wi, yey xquic'am bi ri Jesús cuc'.

43 Ec'uchiri' xq'uis ri nimak'ij, ruchi-ukaw xquimaj lo quibe. No'j ri Jesús xcanaj can Jerusalem, yey wa' na xquina'bej ta ruchi-ukaw.

44 E pa quina'oj rique petinak ri Jesús chiquixo'l ri e cachbi'il. Xebin c'u jun k'ij; c'a tec'uchiri', xquijek caquitzucuj ri Jesús chiquixo'l ri catz-quichak' y tak ri queta'am quiwach, 45 pero na xquirik taj. Ruma c'u ri', xetzelej pa ri tinamit Jerusalem cha' quequitzucuj chila'.

46 Ec'uchiri' ic'owinak chi oxib k'ij caquitzucuj, xe'quirika ri Jesús chupa ri Rocho Dios tz'ul chiquixo'l doctorab re ri tzijpaxab. Rire quebutata' y cu'an tz'onobal chique. 47 Y conoje ri quetaw re lic cacam canima' che runa'oj y che ri c'ulubal uwach cu'an chique. 48 Echiri' xquil wa' ruchi-ukaw, lic xcam canima' che y jewa' xubi'ij ruchi che:

—Walab, ¿su'chac jewa' ca'an chike? Rakaw y ri'in lic paxinak chi kac'u'x che atzucuxic —xcha che.

49 Ec'u ri Jesús xubi'ij chique:

—¿Su'chac quintzucuj alak? ¿Na eta'am ta neba alak pa quinrikita'j wi? Ma lic chirajawaxic quinc'oji' che ri chac re ri Nukaw —xcha chique. 50 No'j rique na xquimaj tane usuc' ri xubi'ij chique.

51 Tec'uchiri', ri Jesús xtzelej Nazaret junam cuc' ruchi-ukaw y e ri' lic uya'om rib chitakic cuma rique. Ec'u ruchi catajin chuc'u'x tak wa' y lic uc'olom ronoje pa ranima'.

52 Y ri Jesús catajin unimaric y catajin uc'oji'ic más runa'oj ri Dios ruc'. Ronoje ri cu'ano lic utz chwach ri Dios y chiquiwach conoje ri ticawex.

3

Catzijon ri Juan Aj Ya'l Bautismo (Mt. 3:1-12; Mr. 1:1-8; Jn. 1:19-28)

1 Chupa ri wo'lajuj junab re rutakanic ri nimalaj takanel Tiberio, ri aj wach re Judea e ri Poncio Pilato, ri aj wach re Galilea e ri Herodes, ri aj wach re Iturea y re Traconite e ri Felipe ruchak' ri Herodes, y ri aj wach re Abilinia e ri Lisantias. 2 Ec'u ri Anás y ri Caifás e cajawal raj chacunel pa Rocho Dios. Chupa tak c'u ri' la' la k'ij, ri Dios xuya rutzij che ri Juan ruc'ajol ri Zacarías, chupa ri luwar catz'intz'otic. 3 Rire xel bi y xe'ec che ronoje tak ri luwar e c'o chuchi' ri nimaya' Jordán re cubi'ij chique ri winak caquitzelej quitzij chwach ri Dios, caquic'ul ri bautismo, y jec'ula' cacuytaj ri quimac. 4 Wa xu'an ri Juan e ri tz'ibital can chupa ruch'a'tem ri k'alajisanel Isaías, pa cubi'ij wi:

Catataj ukul jun tzijonel casiq'uin chupa ri luwar catz'intz'otic, jewa' cubi'ij:

“Yijba' pana alak ri be re ri Kanimajawal;

suc'upij alak rube Rire.

5 Chirajawaxic c'ut capak' ronoje juyub

y cabalix upa ronoje siwan; casuc'upix ri nimabe na jusuc' taj y casuc'upix c'u uwi' chi utz.*

6 Y conoje c'u ri winak caquil na ri colobetajic cuya ri Dios” Is.

40:3-5
cacha'.

7 Uq'uiyal c'u winak xec'un ruc' ri Juan cha' caquic'ul ri bautismo cuya rire. Ec'u rire jewa' xubi'ij chique:

* 3:5 Wa c'ambal na'oj que'elawi lic chirajawaxic chique tak ri ticawex caquiyijba' ri quibinic quisilabic che ruc'unic ri Kanimajawal.

—¡Ralak pacha' alak jupuk chi cumatz! ¿China xbi'n re we utz quesaj ib alak chwach ri unimal c'axc'obic cutak lo ri Dios pawil alak? ⁸ Bina alak jusuc' cha' jela' cak'alajinic jalc'atim chi ri binic silabic alak, jela' pacha' ri takal chique ri quitzelem chi quitzij. Y mach'ob ne alak chi ibil ib alak wa': "Ri'oj utz ka'anom ma oj ralc'o'al can ri Abraham." Ma ri'in cambi'ij che alak, we xraj ri Dios, utz cu'an ralc'o'al ri Abraham tob ne che tak wa'baj. ⁹ Yey jiquil chi ne uwach ruk'atbal tzij ri Dios pawil alak, e pacha' juna achi uyacom chi ri icaj chwi ri ratz'ayak ri che'; ec'u tak ri che' na cuya ta chomilaj jik'obal, capok'ix bi y cac'ak pa ak' —xcha chique.

¹⁰ Ec'u ri winak jewa' xquitz'onoj che:

—¿Sa' c'u ri' ri caka'ano cha' cu'an chom ri kabinic kasilabic? —xecha'.

¹¹ Y rire xuc'ul uwach chique:

—China ri c'o ca'ib uk'u', chusipaj jun che ri na jinta uk'u'; y china ri lic c'o catij ruc', chuya'a que ri na jinta c'o caquitijo —xcha chique.

¹² Ec'u raj tz'onol puak re tojonic xebopon ruc' ri Juan cha' caquic'ul ri bautismo y jewa' xquitz'onoj che:

—Lal tijonel, ¿sa' ri chirajawaxic caka'ano ri'oj? —xecha'.

¹³ Y rire jewa' xubi'ij chique:

—Xew chitz'onoj ri puak re tojonic bi'tal ruma ri takanel romano; mitz'onoj uwi' —xcha'.

¹⁴ Ec'u ri soldados xquitz'onoj che, jewa' xquibi'ij:

—Yey ri'oj, ¿sa' ri chirajawaxic caka'ano? —xecha'.

Ewi jewa' xubi'ij chique:

—Mimaj ubitak re junok y mi'an ri quixibij upa junok ruc' camic. Micoj umac ri na jinta umac y chixqui'cota ruc' riwajil —xcha'.

¹⁵ Tak ri winak lic coye'em ruc'unibal ri Cristo y conoje caquitz'onobej chiquibil quib we ri Juan e ri Cristo, Rucha'o'n lo ri Dios.

¹⁶ Ruma c'u wa', ri Juan jewa' xubi'ij chique:

—Ri'in pakatzij wi canya ri bautismo che alak ruc' ya'; no'j c'o Jun catajin lok más c'o uwach y más c'o uchuk'ab chinuwa ri'in. Na takal tane chwe ri'in canquir ruwach ruxajab. Ri bautismo cuya Rire che alak, e ruc' ri Santowilaj Ruxlabixel ri Dios y ruc' ak'. ¹⁷ Ri cu'ano e pacha' juna achi ruc'a'am chi ri pu'bal uwach ri trigo puk'ab cha' na'l kujosk'ij wa' y caresaj rupuc' chupa. Tec'uchiri', jucoc ri trigo y cuc'ol chupa ruc'olibal. Ec'u rupuc' cuporoj pa ri jun ak' na jinta utakexic catenowic† —xcha'.

¹⁸ Jec'ula', ruc' uq'uiyal pixabanic ri Juan cutzijo ri Utzilaj Tzij chique ri winak. ¹⁹ Y xuch'a'bej ne upa ri rey Herodes ruma u'anom rixokil che ri Herodías yey wa' wi'xok e rixokil ri Felipe ruchak' ri Herodes. Xuch'a'bej c'u upa ruma tak ronoje ri na utz taj u'anom. ²⁰ Yey ri Herodes xuya ne más uwi' ri na utz taj u'anom, ma xtakan che caya' ri Juan pa cárcel.

Ri bautismo re ri Jesús

(Mt. 3:13-17; Mr. 1:9-11)

²¹ C'o c'u jun k'ij echiri' lic uq'uiyal ticawex caquic'ul ri bautismo, xopon ri Jesús y xuc'ul ri bautismo. Echiri' catajin che u'anic orar, xjakataj ruwa caj ²² y ri Santowilaj Ruxlabixel ri Dios xkaj lo puwi' pacha' juna palomax. Y xch'aw lo Jun chila' chicaj, jewa' cubi'ij:

«At ri'at Nuc'ajol, y lic c'ax catinna'o. Lic quinqui'cot chawe» xcha che.

Ri e rati'-umam ri Jesús ojertan

(Mt. 1:1-17)

²³ Ri Jesús laj treinta rujunab echiri' xujek ri chac takom lo che u'anic ruma ri Dios. Cabi'x che ri Jesús, e uc'ajol ri José.‡

Yey ri José, e ralc'o'al ri Elí.

²⁴ Ri Elí e ralc'o'al ri Matat; ri Matat e ralc'o'al ri Leví;

† **3:17** Wa' e jun c'ambal na'oj puwi ri k'atbal tzij cu'an ri Jesús chikawach apanok paquiwi ri ticawex.

‡ **3:23** Ri José xu'an uc'ajol che ri Jesús.

ri Leví e ralc'o'al ri Melqui;
 ri Melqui e ralc'o'al ri Jana;
 ri Jana e ralc'o'al ri José;
²⁵ ri José e ralc'o'al ri Matatías;
 ri Matatías e ralc'o'al ri Amós;
 ri Amós e ralc'o'al ri Nahum;
 ri Nahum e ralc'o'al ri Esli;
 ri Esli e ralc'o'al ri Nagai;
²⁶ ri Nagai e ralc'o'al ri Maat;
 ri Maat e ralc'o'al ri Matatías;
 ri Matatías e ralc'o'al ri Semei;
 ri Semei e ralc'o'al ri José;
 ri José e ralc'o'al ri Judá;
²⁷ ri Judá e ralc'o'al ri Joana;
 ri Joana e ralc'o'al ri Resa;
 ri Resa e ralc'o'al ri Zorobabel;
 ri Zorobabel e ralc'o'al ri Salatiel;
 ri Salatiel e ralc'o'al ri Neri;
²⁸ ri Neri e ralc'o'al ri Melqui;
 ri Melqui e ralc'o'al ri Adi;
 ri Adi e ralc'o'al ri Cosam;
 ri Cosam e ralc'o'al ri Elmodam;
 ri Elmodam e ralc'o'al ri Er;
²⁹ ri Er e ralc'o'al ri Josué;
 ri Josué e ralc'o'al ri Eliezer;
 ri Eliezer e ralc'o'al ri Jorim;
 ri Jorim e ralc'o'al ri Matat;
³⁰ ri Matat e ralc'o'al ri Leví;
 ri Leví e ralc'o'al ri Simeón;
 ri Simeón e ralc'o'al ri Judá;
 ri Judá e ralc'o'al ri José;
 ri José e ralc'o'al ri Jonán;
 ri Jonán e ralc'o'al ri Eliaquim;
³¹ ri Eliaquim e ralc'o'al ri Melea;
 ri Melea e ralc'o'al ri Mainán;
 ri Mainán e ralc'o'al ri Matata;
 ri Matata e ralc'o'al ri Natán;
³² ri Natán e ralc'o'al ri David;
 ri David e ralc'o'al ri Isaí;
 ri Isaí e ralc'o'al ri Obed;
 ri Obed e ralc'o'al ri Booz;
 ri Booz e ralc'o'al ri Salmón;
 ri Salmón e ralc'o'al ri Naasón;
³³ ri Naasón e ralc'o'al ri Aminadab;
 ri Aminadab e ralc'o'al ri Aram;
 ri Aram e ralc'o'al ri Esrom;
 ri Esrom e ralc'o'al ri Fares;
 ri Fares e ralc'o'al ri Judá;
³⁴ ri Judá e ralc'o'al ri Jacob;
 ri Jacob e ralc'o'al ri Isaac;
 ri Isaac e ralc'o'al ri Abraham;
 ri Abraham e ralc'o'al ri Taré;
 ri Taré e ralc'o'al ri Nacor;
³⁵ ri Nacor e ralc'o'al ri Serug;

ri Serug e ralc'o'al ri Ragau;
 ri Ragau e ralc'o'al ri Peleg;
 ri Peleg e ralc'o'al ri Heber;
 ri Heber e ralc'o'al ri Sala;
³⁶ ri Sala e ralc'o'al ri Cainán;
 ri Cainán e ralc'o'al ri Arfaxad;
 ri Arfaxad e ralc'o'al ri Sem;
 ri Sem e ralc'o'al ri Noé;
 ri Noé e ralc'o'al ri Lamec;
³⁷ ri Lamec e ralc'o'al ri Matusalén;
 ri Matusalén e ralc'o'al ri Enoc;
 ri Enoc e ralc'o'al ri Jared;
 ri Jared e ralc'o'al ri Mahalaleel;
 ri Mahalaleel e ralc'o'al ri Cainán;
³⁸ ri Cainán e ralc'o'al ri Enós;
 ri Enós e ralc'o'al ri Set;
 ri Set e ralc'o'al ri Adán;
 yey ri Adán e ralc'o'al ri Dios.

4

Ri c'ambal upa ri Jesús
(Mt. 4:1-11; Mr. 1:12-13)

¹ Ec'u ri Jesús xel bi che ri luwar re ri nimaya' Jordán yey lic c'o ri Ruxlabixel ri Dios ruc'. Xc'am c'u bi ruma ri Ruxlabixel ri Dios pa jun luwar catz'intz'otic. ² Xc'o'ji' chila' cuarenta k'ij y xc'am upa ruma ritzel winak. Yey chupa tak wa' wa k'ij na jinta c'o xutijo. Chuq'uisbal c'u re ri cuarenta k'ij, lic xnumic.

³ Ec'uchiri', ritzel winak jewa' xubi'ij che:

—We katzij at Uc'ajol ri Dios, chat-takan che cha' wa'baj cu'an wa — xcha che.

⁴ Ri Jesús xuc'ul uwach:

—Jewa' tz'ibital can chupa Rutzij Upixab ri Dios:

Na xew ta ruma ri wa e c'as ri ticawex;

ma e c'aslic ruma tak ronoje rubi'im ri Dios *Dt. 8:3*

—xcha'.

⁵ Ec'uchiri', ritzel winak xuc'am bi ri Jesús chutza'm jun nimalaj juyub y xa pa jok'otaj xuc'ut c'u chwach, ronoje ri takanic ca'an puwi tak ri tinamit che ruwachulew ⁶ y jewa' xubi'ij che:

—Ronoje wa cawilo ruc' ronoje ruchomalil tak wa', canya pak'ab, ma ya'tal can panuk'ab ri'in yey

panuk'ab c'o wi china che cuaj canya wi. ⁷ Canya c'u ronoje wa' pak'ab ri'at we caxucuba' awib chinuwach y calok'nimaj nuk'ij —xcha che.

⁸ Ri Jesús xuc'ul uwach:

—Chatela chinuwach Satanás, ma jewa' tz'ibital can chupa Rutzij Upixab ri Dios:

Lic chalok'nimaj uk'ij ri Dios Kajawxel

y xew Rire chanimaj uk'ij *Dt. 6:13*

—xcha'.

⁹ Tec'uchiri', ritzel xuc'am bi ri Jesús chupa ri tinamit Jerusalem c'a chicaj che ruwi ri Rocho Dios y jewa' xubi'ij che:

—We katzij at Uc'ajol ri Dios, chac'aka bi awib c'a chu'lew ¹⁰yey na jinta c'o cac'ulumaj, ma jewa' tz'ibital can chupa Rutzij Upixab ri Dios:

Ri Dios quebutak lo ru ángeles awuc' cha' catquichajij.

¹¹ Catquichap c'u ruc' ri quik'ab

cha' na ca'chika ta rawakan che juna abaj *Sal. 91:11, 12*

—xcha'.

¹² Ri Jesús xuc'ul uwach:

—Jewa' tz'ibital can chupa Rutzij Upixab ri Dios:

Mac'am upa ri Dios Kajawxel *Dt.*

6:16

—xcha'.

¹³ Echiri' ritzel winak na xurik ta chic su'anic cuc'am upa ri Jesús, xel chiri' y xroye'ej na c'u ri' jampala' cuc'am tanchi upa.

Ri Jesús cujek cac'utun chwi rutakanic ri Dios

(Mt. 4:12-17; Mr. 1:14-15)

¹⁴ Ec'uchiri', ri Jesús xe'ec tanchi Galilea y lic c'o ruchuk'ab ri Ruxlabixel ri Dios ruc'. Y xe'ec utzijoxic puwi Rire pa tak tinamit y pa tak raldeas re Galilea. ¹⁵ Cac'utun c'u pa tak sinagogas y conoje ri quetaw re lic caquiyac uk'ij.

Ri Jesús copon pa ri tinamit Nazaret

(Mt. 13:53-58; Mr. 6:1-6)

¹⁶ Xopon c'u ri Jesús chupa ri tinamit Nazaret pa xq'uiy wi. Y chupa

ri k'ij re uxlanibal xoc chupa ri sinagoga jela' pacha' xex cu'an wi. Xtaq'ui' c'u ri' cha' carajilaj Rutzij Upixab ri Dios. ¹⁷ Y xya' che Rire ri jubotaj wuj* re ri k'alajisanel Isaías. Y echiri' xujak upa, xurik pa cubi'ij wi:

¹⁸ Ri Ruxlabixel ri Dios Kajawxel c'o panuwi',

ma inucha'om lok cha' co'lnuya'a ri Utzilaj Tzij chique ri niba'ib.

Inutakom lok cha' cambochi'ij quic'u'x ri lic e c'o pa bis,

co'lnutzijoj quelebal lo que ri e c'o chi presoyil,

quebenutzun'isaj ri e potz',

quebenuwesaj lo pa c'ax ri lic quitijom c'axc'olil,

¹⁹ y co'lnutzijoj ruk'ijol ri c'utubal re ri rutzil uc'u'x ri Dios Kajawxel. *Is.*

61:1-2

²⁰ Ec'uchiri' xuq'uis rajilaxic Rutzij Upixab ri Dios, xuboto y xuya tanchi che ri aj chac re ri sinagoga, y xtz'uyil chiquiwach ri e c'o chiri'. Y conoje lic caquitzutza' pan uwach. ²¹ Ec'uchiri', xubi'ij chique:

«Wa' wa xinwajilaj che Ruch'a'tem ri Dios, wak'ij xujek bi rilic chiwach alak» xcha'.

²² Conoje ri xetaw re, caquiyac uk'ij y lic caminak canima' che ri chomilaj uch'a'tem, jewa' caquibi'ij: «¿Na e ta neba uc'ajol ri José wa'?» quecha'.

²³ Y ri Jesús xubi'ij chique:

«Laj ne cabi'ij alak chwe: “Cunanel, chacunaj awib chawibil awib. Cha'ana c'u ri' chupa wa tinamit tak ri c'utubal re ruchuk'ab ri Dios jela' pacha' ri katom xa'an chila' Capernaúm” cacha alak chwe.»

²⁴ Y xubi'ij tanchi wa':

«Pakatzij wi cambi'ij che alak: Na jinta juna k'alajisanel cac'ul chi utz chupa rutinamit. ²⁵ Pakatzij wi cambi'ij che alak: Rojertan lic e q'ui rixokib e malca'nib e c'o chupa ri tinamit Israel chwach ri k'alajisanel Elías echiri' na xu'an ta jab oxib junab ruc' nic'aj y xpe c'u ri jun unimal numic chupa ronoje wa tinamit.*

* **4:17** “Jubotaj wuj”: Quil “rollo” pa vocabulario.

✧ **4:25** 1 R. 17:1

26 Na ruc' ta c'u ri', ri Dios na xutak tubi ri Elías ruc' junok chique wa malca'nib aj Israel; ma e xutak bi ruc' jun ixok malca'n aj Sarepta,† jun tinamit c'o chunakaj ri tinamit Sidón. 27 Yey ojertan lic e q'ui ri c'o ri yabil lepra chique echiri' ri k'alajisanel Eliseo c'o chupa ri tinamit Israel. Na ruc' ta c'u ri', na junta junok chique xcunutajic, ma xew xcunutaj ri Naamán, ri jun aj Siria»[☆] xcha'.

28 Echiri' xquita wa', conoje ri e c'o chupa ri sinagoga lic xpe coyowal. 29 Xeyactaj c'ut y xquesaj lo ri Jesús pa ri tinamit y xquic'am bi c'a chutza'm jun nimalaj juyub cha' caquic'ak bi pa siwan. 30 No'j ri Jesús xa xic'ow chiquixo'l y xe'ec.

Ri Jesús cucunaj jun achi c'o puk'ab jun itzelilaj uxlabixel
(Mr. 1:21-28)

31 Ri Jesús xopon chupa ri tinamit Capernaúm re Galilea y xujek cac'utun chiquiwach ri winak chupa tak ri k'ij re uxlanibal. 32 Y conoje lic cacam canima' che, ma ruma ruc'utunic cak'alajinic lic c'o uwach.

33 C'o c'u chiri' chupa ri sinagoga jun achi c'o puk'ab jun itzelilaj uxlabixel, yey wa' lic co xch'awic, jewa' xubi'ij:

34 —Jesús, lal aj Nazaret, ¿su'chac co'lmina ib la kuc'? ¿Lal cami petinak ri' re co'lsacha la kawach? Ri'in weta'am lal chinok, rilal lal ri Santo C'ajolaxel re ri Dios —xcha'.

35 Ec'u ri Jesús xuk'atej, jewa' xubi'ij che:

—¡Match'a't chic! Chatelubi che la'chi —xcha'.

Ewi ri itzel uxlabixel xuc'ak rachi pulew chiquixo'l ri winak y xel bi ruc'. Yey na junta c'ax xu'an can che.

36 Y conoje ri winak lic cacam canima' che y jewa' caquibi'ij chiquiwach: «¿Sa' chi ch'a'temal wa'? Ma lic c'o puk'ab quebutak bi ri itzelilaj uxlabixel. Quebutak bi ruc' ruchuk'ab y quebel bi» quecha'.

37 Che ronoje tak ri luwar c'o lo xa nakaj, xe'ec utzijoxic janipa tak ri cu'an ri Jesús.

Ri Jesús cucunaj ruchu-uji' ri Pedro
(Mt. 8:14-15; Mr. 1:29-31)

38 Ec'uchiri' xel bi ri Jesús chupa ri sinagoga, xopon chirocho ri Simón.‡ Y ruchu-uji' ri Simón lic cakopow pa ak'. Xquitz'onoj c'u che ri Jesús cha' cucunaj canok. 39 Ec'u ri Jesús xyuxi' puwi', xuk'atej ri ak' chirij y jela' xic'ow ri ak' chirij. Na jampatana xyactaj rixok y xujeko quebunimaj.

Ri Jesús quebucunaj uq'uiyal yewa'ib
(Mt. 8:16-17; Mr. 1:32-34)

40 Chutzakibal k'ij conoje ri c'o quiyewa' ruma uq'uiyal uwach yabil xequic'am lo ruc' ri Jesús. Rire xuya ruk'ab paquiwi' chiquijujunal y xebucunaj. 41 Jenela' xebel bi itzelilaj uxlabixel chique uq'uiyal winak. Echiri' quebel bi, quesiq'uinic, jewa' caquibi'ij: «¡Rilal lal Ruc'ajol ri Dios!» quecha'. No'j ri Jesús xebuk'atej y na xuya ta luwar chique quech'awic, ma rique queta'am chic Rire e Ucha'o'n lo ri Dios.

Ri Jesús catzijon pa tak ri luwar re Galilea
(Mr. 1:35-39)

42 Echiri' xsakiric, ri Jesús xel bi chupa ri tinamit y xe'ec chupa jun luwar catz'intz'otic. Y ri winak xe'quitzucuj. Ec'uchiri' xebopon c'a pa la c'o wi, xcaj caquik'atej cha' na quebuya ta canok.

43 No'j Rire jewa' xubi'ij chique: «Lic chirajawaxic quin'ec pa tak tinamit re cantzijojej ri Utzilaj Tzij re rutakanic ri Dios chique ri ticawex c'amaja' caquita wa', ma ruma wa' intakom lok» xcha'.

44 Xe'ec c'u che utzijoxic ri Utzilaj Tzij pa tak ri sinagogas re Galilea.

5

Ri Jesús cuya jun c'ac' chac che ri Pedro

† 4:26 Ri tinamit Sarepta na re ta Israel. ☆ 4:27 2 R. 5:1-14 ‡ 4:38 Wa jun achi Simón, e Pedro rutijo'n ri Jesús. Mr. 3:16; Mt. 10:2

1 C'o jun k'ij ri Jesús c'o chuchi' ri mar re Genesaret,* yey uq'uiyal winak xeboponic lic caquiminima' quib ruc' che utayic Rutzij Upixab ri Dios. 2 Ri Jesús xril pan ca'ib barco c'o chuchi' ri ya'; ec'u raj chapal car ebelinak lo chupa che uch'ajic tak ri qui atarraya. 3 Ec'uchiri', ri Jesús xoc chupa jun chique ri ca'ib barco. Y ri rajaw wa' e ri Simón. Xubi'ij c'u ri Jesús che ri Simón cumin bi c'ana ri barco chupa ri ya'. Ec'u ri Jesús xtz'uui' chupa y xujek cac'utun chique ruq'uiyal ticawex. 4 Echiri' xuq'uis ruc'utunic, jewa' xubi'ij che ri Simón:

—Wo'ora chac'ama bi ri barco chupa ri mar pa lic cho wi y chiliq'uij tak c'u ri atarraya chiri' cha' jela' quebichap car —xcha che.

5 Ri Simón xuc'ul uwach:

—Lal tijonel, ronoje rak'ab xojchacuníc y na jinta car xkachapo. No'j we rilal quintak la, can'an ri' —xcha che.

6 Echiri' xquiliq'uij bi ri atarraya, xequichap uq'uiyal car y ri atarraya xujeko carakarobic. 7 Ec'uchiri', xqui'an pan quik'ab chique ri cachbi'il e c'o chupa ri jun chic barco cha' quepetic y quebo'lquito'o'. Echiri' xeboponic ri cachbi'il, junam xquibalij lo ri queb barco che car y ruma la' ya laj quemukutajic. 8 Ri Simón Pedro echiri' xril wa', xuxuc rib chwach ri Jesús y jewa' xubi'ij che:

—Chel co la wuc', Wajawal. Na takal ta chwe c'o la wuc' ma in jun achi aj mac —xcha che. 9 Xubi'ij wa' ri Pedro ma ruma ruq'uiyal car xequichapo, lic xoc xi'in ib ruc' junam cuc' conoje ri e c'o ruc' pa ri barco; 10 jec'ula' xoc xi'in ib cuc' ri Jacobo y ri Juan; rique e uc'ajol ri Zebedeo y e rachbi'il ri Simón.

Pero ri Jesús xubi'ij che ri Simón:

—Maxi'ij awib; chwi wo'ora catu'an at aj molol ticawex† pacha' a'anom lo chique ri car —xcha'.

11 Ec'uchiri' xquesaj lo ri barcos chupa ri mar, xquiya can ronoje wa' y xeterej bi chirij ri Jesús.

Ri Jesús cucunaj jun achi c'o yabil lepra che

(Mt. 8:1-4; Mr. 1:40-45)

12 Ri Jesús c'o chupa jun tinamit re Galilea echiri' xopon jun achi ruc', yey wa'chi lic catajin uk'ayic rucuerpo ruma ri yabil lepra. Rire echiri' xril uwach ri Jesús, xuxuc rib chwach, xukasaj rupalaj chu'lew y xutz'onoj che:

—Wajawal, we ca'aj co la, josk'ij la ri nucuerpo che wa yabil —xcha'.

13 Ec'uchiri', ri Jesús xuchap pana ruc' ruk'ab y jec'uwa' xubi'ij che:

—Cuaj, chu'ana ba chom ri' racuerpo —xcha'.

Xew c'u xuq'uis ubi'xiquil wa', na jampatana xsach ri yabil c'o che rachi. 14 Ec'u ri Jesús xutak che na cutzizoj ta wa' che junok. Xubi'ij c'u che:

—Jat chwach raj chacunel pa Rocho Dios cha' rire carilo na jinta chi lepra chawe. Y ruma rajosk'iquil, chaya'a c'u chwach ri Dios ri kasa'n xtakan can ri Moisés che,✶ cha' cak'alajin chiquiwach ri ticawex at cunutajinak chic —xcha'.

15 Na ruc' ta c'u ri', e ruma tak ri cu'an ri Jesús, rutzijoxic Rire catajin más reta'maxic cuma ri winak y lic c'u e q'ui caquimol quib cha' caquita ri cubi'ij y quecunutaj bi che ri quiyabil. 16 No'j ri Jesús quel bi, que'ec pa tak luwar catz'intz'otíc re cu'ana orar.

Ri Jesús cucunaj jun sic

(Mt. 9:1-8; Mr. 2:1-12)

17 E xu'an wa' jun k'ij echiri' ri Jesús cac'utun chiquiwach ri winak. Etz'ul c'u chiri' ri fariseos y raj c'utunel re ri tziipixab; rique e petinak Jerusalem y pa tak ri tinamit y raldeas re Galilea y re Judea. Yey ruchuk'ab ri Dios Kajawxel c'o ruc' ri Jesús cha' cacunanic.

* 5:1 Wa jun mar c'o oxib ubi': mar re Genesaret, mar re Galilea y mar re Tiberias. † 5:10 "Aj molol ticawex": Ri chac xya' che ri Simón Pedro e quebutzucuj ticawex re quebu'an utijo'n ri Jesús. Mt. 4:19; Mr. 1:17 ✶ 5:14 Lv. 14:1-32

18 Y xec'un c'u lo jujun achijab quitelem lo jun achi sic chwa ch'at. Xcaj c'u caquicoj bi pa ja cha' caquiya chwach ri Jesús,¹⁹ pero na xquirik taj sa' rucojic bi cuma ruq'uiyal winak. E uwari'che xebak'an chwi ri ja, xquesaj julepaj che ruwi', xquikasaj c'u lo ri sic e la' cotz'ol chwa ruch'at y xquiya chwach ri Jesús chiquinic'ajal ri winak.

20 Echiri' ri Jesús xril ri cubulibal quic'u'x ruc', jewa' xubi'ij che ri sic:

—Achi, ronoje ramac cuytajinak chic —xcha'.

21 Ec'uchiri', raj c'utunel re ri tzijpixab y ri fariseos xquijek caquich'ob rakan: «¿Sa' ruwach wa'chi? Rire camacun chirij ri Dios echiri' cubi'ij cucuy mac. Ma ¿na xew ta neba ri Dios aj cuyul mac?»

22 Ec'u ri Jesús xuna'bej sa' ri caquich'obo; ruma c'u ri', xubi'ij chique:

—¿Su'chac jela' catajin chic'u'x alak? 23 ¿Sa' c'u ri na c'ayew taj cambi'ij: “Ronoje ramac cuytajinak chic” o “Chatyactajok y chatbinok”?

24 E cuaj c'ut queta'maj alak wa': Ralaxel Chiquixo'l Ticawex ya'tal puk'ab cucuy tak ri mac que ri winak che ruwachulew —xcha'.

Xubi'ij c'u ri' che ri sic:

—Chatyactajok, chac'ama bi rach'at y jat cha'wocho —xcha'.

25 Chupa c'u la' la jok'otaj xyactaj ri sic chiquiwach. Xuc'am c'u bi ruch'at pa ri cotz'ol wi y xe'ec chirocho, e ri' lic cuyac uk'ij ri Dios. 26 Conoje c'u ri' lic xcam canima' che y xquijek caquiyac uk'ij ri Dios. Y ruma ri xi'in ib c'o pa canima' chwach ri Dios, xquibi'ij: «Wak'ij kilom ruchuk'ab ri Dios» xecha'.

Ri Jesús cusiq'uij ri Leví

(Mt. 9:9-13; Mr. 2:13-17)

27 Chuq'uisbal re wa', xe'ec ri Jesús y xril jun achi aj tz'onol puak re tojoníc, Leví rubi',[†] tz'ul pa ri luwar pa

ca'an wi ri tojoníc che ri gobierno. Y ri Jesús xubi'ij che:

—Chat-terej lo chwij —xcha'.

28 Ri Leví xyactajic, xuya can ronoje y xterej bi chirij.

29 Ewi chirocho xu'an jun nimak'ij che ri Jesús. Y lic e q'ui ri rach e aj tz'onol puak re tojoníc y uq'uiyal winak etz'ul chwa ri mexa cuc' ri Jesús y rutijo'n.

30 Ec'uchiri', raj c'utunel re ri tzi-jpixab cuc' ri fariseos xequich'a'tibej rutijo'n ri Jesús, y jewa' xquibi'ij chique:

—¿Su'chac quixwa' cuc' raj tz'onol puak re tojoníc y cuc' raj maquib? —xecha'.

31 Ec'u ri Jesús xuc'ul uwach:

—E janipa ri utz quiwach, na cajawax ta aj cunanel chique; ma wa' xew chique ri e yewa'ib cajawax wi.

32 Jela' c'u ri', ri'in na in petinak ta che quisiq'uixic ri jusuc' quibinic quisilabic, ma e in petinak che quisiq'uixic raj maquib cha' caquijalc'atij ri quibinic quisilabic —xcha'.

Ri tz'onobal puwi ri ayuno

(Mt. 9:14-17; Mr. 2:18-22)

33 Ec'uchiri', xquitz'onoj che ri Jesús:

—¿Su'be rutijo'n ri Juan Aj Ya'l Bautismo caqui'an ayuno uq'uiyal laj y lic caqui'an orar jela' pacha' caka'an ri oj fariseos, no'j ri tijo'n rilal xew quewa'ic y na caqui'an tane ayuno? —xecha'.

34 Y Rire xuc'ul uwach:

—¿Utz neba caqui'an ayuno ri esiq'uim pa c'ulaniquil we c'a c'o rala cac'uli'ic chiquixo'l?*** Na utz taj.

35 No'j copon na ri k'ij echiri' quesax bi rala chiquixo'l;†† c'a ec'uchiri', caqui'an ayuno —xcha'.

36 Tec'uchiri', xutzijoj jun c'ambal na'oj chique, jewa' xubi'ij:

«Na jinta junok cuk'at ch'akap che ruk'u' c'asak cha' cuc'ojoj ruk'u' k'e'l

[†] 5:27 Wa jun achi c'o queb ubi': Leví y Mateo. Mt. 9:9; Mr. 2:13 § 5:30 “Raj tz'onol puak re tojoníc”: Quil “cobrador de impuestos” pa vocabulario. *** 5:34 Chupa wa c'ambal na'oj ri Jesús e

pacha' rala cac'uli'ic yey tak rutijo'n e pacha' ri quequi'cot ruc' pa nimak'ij. †† 5:35 “Echiri' quesax bi rala chiquixo'l”: Wa' e cach'a't puwi rucamic ri Jesús.

ruc'. Ma we ta jela' cu'ano, ri' na utz ta chi ruk'u' c'asak yey ne ri c'asak na cuc'ulaj ta rib ruc' ruk'u' k'e'l.

³⁷ »Jec'ula' ri vino c'ac' 'anom na cak'ej ta chupa juna surun†† k'e'l. Ma we ca'ani' wa', ri vino c'ac' echiri' canajtir uk'ij, curakij ri surun, catix c'u ri' ri vino y ri surun na jinta chi uchac. ³⁸ Ruma c'u la', ri vino c'ac' 'anom chirajawaxic wi cak'ej chupa juna surun c'asak cha' ucabichal wa' cacowinic. ³⁹ Yey junok uc'amom rib che cutij ri vino naj chi uk'ij, na caraj taj cutij ri c'ac' vino, ma cubi'ij: «Ri vino naj chi uk'ij e más utz chwa ri c'ac' vino»»§§ xcha'.

6

Ri Jesús e rajaw ri k'ij re uxlanibal (Mt. 12:1-8; Mr. 2:23-28)

¹ E xu'an wa' chupa jun k'ij re uxlanibal: Ri Jesús cuc' rutijo'n catajin quic'owic pa tak tico'n re trigo, yey rutijo'n caquich'upila' bi ri trigo, caquikil ruc' ri quik'ab y caquitijo.

² Ec'uchiri', jujun chique ri fariseos xquitz'onoj chique:

—¿Su'be qui'an ri'ix ri na takal taj ca'ani' chupa ri k'ij re uxlanibal? — xecha'.

³ Ec'u ri Jesús xuc'ul uwach:

—¿Na ajilam ta neba alak ri xu'an ri David echiri' rire cuc' ri rachbi'il xen-umic? ⁴ Xoc c'u chupa ri Rocho Dios y xuc'am ri pam ya'tal chi puk'ab ri Dios. Xutijo y xujach chique ri rachbi'il;✧ yey wa' na takal ta chique caquitijo, ma xew takal chique raj chacunel pa ri Rocho Dios caquitijo —xcha'. ⁵ Y xuq'uisbej cuc', jewa' xubi'ij: —Ralaxel Chiquixo'l Ticawex e ne rajaw ri k'ij re uxlanibal —xcha'.

Ri Jesús cucunaj jun achi chakijinak uk'ab (Mt. 12:9-14; Mr. 3:1-6)

†† **5:37** “Surun”: Quil “odre” pa vocabulario.

e que'elawi lic chirajawaxic cac'ul ronoje ri Utzilaj Tzij y na utz taj cuc'ulaj rib ri c'ac' tzij ruc' ri quic'utu'n can ri kati'-kamam. ✧ **6:4** 1 S. 21:1-6 wa' e “apóstol”. Cabi'x “tako'n” chique ri cablajuj utijo'n ri Jesús, ri xecha' ruma Rire cha' caquitzijoj ri Utzilaj Tzij y caquitic iglesias. † **6:16** Pa ri ch'a'tem griego cubi'ij “Judas re Jacobo”. Ri Judas cabi'x también “Tadeo” y “Lebeo” che. Mt. 10:3; Mr. 3:18

⁶ E xu'an wa' chupa jun chic k'ij re uxlanibal: Ri Jesús xoc chupa jun sinagoga y xujeko cac'utunic. Chiri' c'u ri' c'o jun achi chakijinak ruk'ab uwiquik'ab. ⁷ Yey raj c'utunel re ri tziipixab y ri fariseos lic quic'ac'alem we ri Jesús cucunaj wa'chi chupa wa k'ij re uxlanibal, cha' jela' caquicoj umac.

⁸ No'j ri Jesús reta'am sa' ri caquich'obo y xubi'ij c'u che rachi chakijinak ruk'ab:

—Chatyactajok y chatc'ola chikawach konoje —xcha'. Ewi rachi xyactajic y xtaq'ui' chiquiwach.

⁹ Ec'uchiri', ri Jesús xubi'ij chique:

—Can'an jun tz'onobal che alak. ¿Sa' ri lic usuc' ca'ani' chupa ri k'ij re uxlanibal: E ca'ani' ri utz, o e ri na utz taj? ¿Utz cacolobex ruc'aslem junok o caya' luwar che cacamic? —xcha'.

¹⁰ Ec'uchiri', ri Jesús xutz'u' quiwach conoje ri e c'o chiri', y xubi'ij che rachi:

—Chasuc'upij rak'ab —xcha'.

Rachi e xu'ano, y ruk'ab xutziric.

¹¹ Ec'u ri fariseos y ri aj c'utunel re ri tziipixab lic xpe coyowal y xquijek caquich'a'tibej chiquiwach sa' ri caqui'an che ri Jesús.

Ri Jesús quebucha' cablajuj utako'n (Mt. 10:1-4; Mr. 3:13-19)

¹² C'o jun k'ij ri Jesús xe'ec chwa juyub cha' cu'ana orar. Xic'ow c'u jun ak'ab cach'a't ruc' ri Dios. ¹³ Echiri' xsakiric, xebusiq'uij rutijo'n y chique wa' xebucha' cablajuj, y xubi'ij rique e “tako'n”.* ¹⁴ E quibi' wa':

Simón ri xcoj Pedro che

y ruchak' Andrés,

Jacobo

y Juan,

Felipe,

Bartolomé,

¹⁵ Mateo,

Tomás,

§§ **5:39** Ri c'ambal na'oj pa ri versículos 36-39

* **6:13** “Tako'n”: Pa ri ch'a'tem griego y pa caxtila

wa' e “apóstol”. Cabi'x “tako'n” chique ri cablajuj utijo'n ri Jesús, ri xecha' ruma Rire cha' caquitzijoj ri

Jacobo ruc'ajol ri Alfeo,
Simón ri cabi'x che “ri Zelote”,

¹⁶ Judas ruc'ajol ri Jacobo,†
y Judas aj Iscariot,‡ ri xc'ayin re ri
Jesús.

*Ri Jesús quebucajmaj uq'uiyal
winak*

(Mt. 4:23-25)

¹⁷ Tec'uchiri', ri Jesús cuc' rutijo'n
xekaj lo chwa ri juyub y xec'o'ji'
pa jun tak'aj cuc' uq'uiyal winak
re ronoje tak ri luwar re Judea, re
Jerusalem yey re Tiro y re Sidón, queb
tinamit e c'o chuchi' ri mar. Rique
e petinak cha' caquita ri c'utunic re
ri Jesús y cha' quecunutaj bi che ri
quiyabil. ¹⁸ Yey janipa ri quitijom
c'ax cuma ri itzelilaj uxlabixel, que-
cunutajic. ¹⁹ Ruma c'u ri quiyabil,
conoje ri winak cacaj caquichap ri
Jesús, ma Rire ruc' ruchuk'ab quebu-
cunaj conoje.

*Ri Jesús cac'utun chiquiwach ru-
tijo'n*

(Mt. 5:1-12)

²⁰ Ec'uchiri', ri Jesús xutz'u' qui-
wach rutijo'n y xubi'ij chique:

«Nim ik'ij iwalaxic tob ix niba', ma ix
cuq'u'il ri e c'o puk'ab ri Dios.

²¹ Nim ik'ij iwalaxic tob wo'ora quitij
numic, ma copon na ri k'ij
echiri' quixcubi' chi utz ma ri
Dios cuya ronoje ri cajawax
chiwe.

Nim ik'ij iwalaxic tob wo'ora
quixok'ic, ma copon na ri k'ij
echiri' canoj ri iwanima' che
qui'cotemal.

²² Nim ik'ij iwalaxic echiri' lic tzel
quixil cuma ri winak, quixque-
saj bi chiquixo'l, caquic'ak bi
uk'ij ribi', caquibi'ij chiwe lic
itzel iwachlibal ruma ix utijo'n
Ralaxel Chiquixo'l Ticawex.

²³ »Echiri' ca'an wa' chiwe, lic
chixqui'cotok y chixbixonok, ma
lic nim ri rajil uc'axel quic'ul chila'
chicaj. Macam c'u iwanima' che

echiri' quixya' pa c'ax; ma e tak ri
que'anaw wa' chiwe, e caqui'ano
pacha' ri qui'anom lo ri cati'-quimam
ojertan chique ri e k'alajisanelab re ri
Dios.

²⁴ Tok'o' c'u wach ralak alak bey-
omab,§ ma c'ulum chi alak
ri cuya qui'cotemal che alak,
no'j moye'ej chi c'u alak we
c'a cac'ul alak wa' chikawach
apanok.

²⁵ Tok'o' wach alak ri lic c'o catij alak
wo'ora, ma chikawach apanok
catij alak numic.

Tok'o' wach alak ri lic caqui'cot alak
wo'ora, ma chikawach apanok
cac'o'ji' alak pa bis.

²⁶ Tok'o' wach alak echiri' lic
cayac k'ij alak, ma ojer-
tan jela' xqui'an ri chu'kaw
alak, e xquiyac quik'ij ri
k'alajisanelab xa e socoso'nel.

*Ri Jesús cac'utun chwi ri rutzil
c'u'xaj*

(Mt. 5:38-48; 7:12)

²⁷ »Wo'ora cambi'ij chiwe ri'ix ri
quixtaw we: C'ax chebina'a ri e
aj retzelal c'u'x chiwij. Chi'ana ri
utz chique ri tzel quebilow iwe.

²⁸ Chitz'onoj ri rutzil uc'u'x ri Dios
paquiwi ri caquitz'onoj ri na utz taj
piwi ri'ix. Chi'ana c'u orar paquiwi
ri tzel quech'a't chiwij.** ²⁹ Y we c'o
junok cupach' k'ab xe' awe', chaya'a
luwar che cupach' ri jun chic xe
awe'.

Y we c'o junok cumaj rak'u'
re pisbal awij, chaya'a ne luwar che
cuc'am bi racoton. ³⁰ Chatsipan che
ri niba' we cutz'onoj to'bal chawe.
Y we c'o junok cumaj rubitak awe,
matz'onoj tanchi che. ³¹ Ec'u ri'ix
chi'ana chique ri ticawex jela' pacha'
ri quiwaj caqui'an rique chiwe.

³² »Ma we xew c'ax quebina' ri
c'ax quena'w iwe, mich'ob rakan
takal chiwe cayac ik'ij ruma wa';
ma jenela' caqui'an tak ri winak aj
maquib; rique xew c'ax quequina' ri

† 6:16 “Iscariot”: Wa' e utinamit ri Judas. § 6:24 “Beyomab”: Wa' e ri xew cubul quic'u'x ruc' ri
quibeyomalil yey na cubul ta quic'u'x ruc' ri Dios.

** 6:28 We c'o caqui'an ri na utz taj chike, na
ube taj caka'an ke'oj cuc'; e katz'onoj che ri Dios cha' coc ri utz pa canima' rique.

c'ax quena'w que. ³³ Y we xew qui'an ri utz chique ri caqui'an ri utz chiwe, mich'ob rakan we takal chiwe cayac ik'ij ruma wa'; ma jenela' caqui'an tak ri winak aj maquib. ³⁴ Yey we xew quiya chak'i'm chique ri iweta'am chic quic'ul na ri chik'imb'al re chique, mich'ob rakan we takal chiwe cayac ik'ij ruma wa'; ma jenela' caqui'an tak ri winak aj maquib; xew quechik'iman chique ri caquiya chik'imb'al re chique.

³⁵ »No'j ri'ix, c'ax chebina'a ri tzel quebilow iwe y chi'ana ri utz chique. Chiya'a chak'i'm na jinta c'o quiwoy'ej chwach. We qui'an wa', lic nim ri sipanic quic'ul chila' chicaj; yey ec'uchiri', pakatzij wi quixu'an ix ralc'o'al ri Jun catakan chwi ronoje, ma jela' cu'an Rire, cuc'ut ri rutzil uc'u'x chique ri itzel quic'u'x, ri na quetioxin ta chwach ri Dios. ³⁶ C'ola c'u ri' ri c'axna'bal c'u'xaj iwuc' jela' pacha' ri Kakaw Dios lic c'o c'axna'bal uc'u'x.

Mik'at tzij paquiwi jujun chic
(Mt. 7:1-5)

³⁷ »Mi'an ri xa piwe ri'ix quixu'an aj k'atal tzij paquiwi jujun chic, y jela' na cak'at ta c'u tzij piwi ri'ix. Mi'an ri c'ax quixch'aw chiquij jujun chic, y jela' na ca'an ta wa' chiwe ri'ix. We c'o junok camacun chiwij, chicuyu umac y jela' cacuytaj imac ri'ix.

³⁸ Chixsipanok y jela' ri Dios casipan chiwe ruc' jun pajbal lic nim, lic tzanal upa y capulputic; ma ruc' ri pajbal quixpajan wi ri'ix, ruc' tanchi wa pajbal ca'an pajanich'iwé» xcha ri Jesús.

³⁹ Y xubi'ij jun c'ambal na'oj chique:

«¿Utz neba juna potz' cuc'am uwach jun chic potz'? ¿Na quebe'tzak ta nawi quicabichal pa siwan? ⁴⁰ Juna tijo'n na reta'am ta más chwa ri reta'am rutijonel. Yey we lic q'ui ri cumajo, ri' e cu'ana pacha' rutijonel.

⁴¹ »¿Su'chac e lic catzutta' ruc'aj che' c'o chupa ruwach rawatz-achak' yey e na catoc ta il che resaxic ri che' k'ebel chupa rawach ri'at? ⁴² Y we

na catoc ta c'u il che ri che' k'ebel chupa rawach ri'at, ¿utz nawi cabi'ij che rawatz-achak': "Watz-nuchak', chaya'a luwar chwe canwesaj la jun uc'aj che' c'o chupa rawach"? ¿Na utz taj! ¿Xa queb apalaj! Nabe na chawesaj lo la che' k'ebel chupa rawach ri'at, y jela' cat-tzu'n chi utz cha' cato' rawatz-achak' che resaxic lo ruc'aj che' c'o chupa ruwach rire.

Ruch'a'tem ri ticawex cuc'utu sa' ri c'o pa ranima'

(Mt. 7:15-20)

⁴³ »Jinta juna chomilaj che' cuya ujik'obalil na chom taj, yey juna che' na chom taj, na cuya ta ujik'obalil chom. ⁴⁴ Ma ronoje che' eta'matal uwach ruma rujik'obalil. Na camol ta higos che tak ri xuluquej y na camol ta uvas che tak ri xucuye'.

⁴⁵ »Jec'ula' e junok utz uc'u'x, echiri' cach'a'tic, e quel lo ri utz uc'olom chupa ri ranima'. Yey e junok itzel uc'u'x, echiri' cach'a'tic, e quel lo ri na utz taj uc'olom chupa ri ranima'. Ma ruc' ruch'a'tem ri ticawex, cak'alajinic sa' ri c'o chupa ri ranima'.

Ri ja tz'akom lo pa'abaj y ri ja x'ani' pa sanyeb

(Mt. 7:24-27)

⁴⁶ »¿Su'chac quibi'ij chwe "Kajawal, Kajawal", yey na qui'an ta ri cambi'ij chiwe? ⁴⁷ Cambi'ij c'u chiwe china ruc' cajunimax wi ri jun cape wuc', cuta ri nutzij y cu'an janipa ri cambi'ij:

⁴⁸ »Wa' e canjunimaj ruc' jun achi xuyac jun rocho. Xuc'ot ri jul y lic naj xukasaj y xutz'ak c'u lo ruparakan ri ja chwi abaj. Y echiri' xpe lo jab, lic xnimar ri nimaya' y rutza'm ri ya' lic xuroj rib che ri ja; yey ri ja xuch'ij uchuk'ab, ma chwi abaj tz'akom lo wi. ⁴⁹ No'j ri jun xuta ri nutzij y na xu'an ta janipa ri cambi'ij, e canjunimaj ruc' jun achi xu'an ri rocho pa sanyeb y na xucoj ta lo ucowil ruparakan ri ja. Y echiri' lic xnimar ri nimaya', rutza'm ya' lic xuroj rib che ri ja. Ec'u ri' ri ja xwuluwub bi y xsach uwach» xcha ri Jesús.

7

Ri Jesús cucunaj ri raj chac jun capitán aj Roma
(Mt. 8:5-13)

¹ Ri Jesús echiri' xuq'uis cac'utun chiquiwach ri ticawex, xe'ec Capernaúm. ² Chiri' jekel jun capitán* aj Roma y c'o jun raj chac lic yewa' yey cajec'owic. Ec'u ri capitán lic c'ax cuna'o. ³ Ec'uchiri' xuto sa' tak ri cabi'x puwi ri Jesús, xebutak bi jujun nimak winak e aj wach que raj judi'ab cha' quebe'elaj che capetic y colu'cunaj ri raj chac. ⁴ Ec'uchiri' ri nimak winak xebopon ruc' ri Jesús, lic xebelaj che, jewa' xquibi'ij:

—Kajawal, wa jun capitán lic takal che cato' la, ⁵ ma lic c'ax cuna' ri katinamit y xojuto' ne che uyaquic ri kasinagoga —xecha'.

⁶ Ec'u ri Jesús xe'ec cuc'. Ec'uchiri' xebopon chunakaj ri ja, ri capitán xebutak lo jujun ramigos ruc' ri Jesús cha' jewa' caquibi'ij che: «Wajawal, macosisaj ib la che cape la, ma na takal ta chwe coc la chiwocho; ⁷ ruma la' xinch'obo na takal tane chwe quinopon chiwach la. Xew bi'ij la: “Chatcunutajok”, y ruc' ri ch'a'tem la, cacunutaj ri waj chac. ⁸ Ma e pacha' ri'in, in c'o puk'ab jun takanel y rire ebuya'om uq'uiyal soldados panuk'ab. We cambi'ij c'u che junok: “Jat”, que'ec; o cambi'ij che junok chic: “Chatpetok”, capetic. Yey we cambi'ij che juna waj chac: “E cha'ana wa'”, cu'ano.»

⁹ Echiri' ri Jesús xuta ri xubi'ij lo ri capitán, lic xcam ranima' che. Xutzu' c'u pan quiwach ri winak eteran chirij y jewa' xubi'ij chique:

—Cambi'ij chiwe, na nurikom tane chiquixo'l raj Israel junok lic c'o unimal cubulibal uc'u'x pacha' wa jun achi —xcha'.

¹⁰ Ec'uchiri' ri etakom bi xetzelej chirocho ri capitán, xe'quirika ri raj chac cunutajinak chic.

Ri Jesús cuc'astajisaj ri ralab jun ixok malca'n

¹¹ Ic'owinak chi wa', ri Jesús xe'ec pa jun tinamit Naín rubi'. E q'ui chique rutijo'n y uq'uiyal winak e rachbi'il bi. ¹² Echiri' xebopon chunakaj ri tinamit, xril jun anima' telem, e ri' que'mukok. Yey wa' e jun ala ralc'o'al jun ixok malca'n y xew ne co ralab ri'. Uq'uiyal c'u winak re ri tinamit cachbiam rixok. ¹³ Echiri' ri Kanimajawal xril rixok, lic xjuch' ca'n pa ranima' y xubi'ij che:

—Mok' chi la —xcha'.

¹⁴ Ec'uchiri', ri Jesús xkib cuc' y xuchap ri ch'at pa telem wi ri anima'. Ec'u ri e teleyom re xetaq'ui'ic. Y ri Jesús xubi'ij che ri caminak:

—Ala, cambi'ij chawe: ¡Chatyactajok! —xcha'.

¹⁵ Ec'uchiri', rala caminak chic xyactajic y xujeko cach'a'tic. Y ri Jesús xuya bi puk'ab ruchu. ¹⁶ Echiri' xquil wa' ri winak, conoje xcam canima' che y xquijeko caquiyac uk'ij ri Dios, caquibi'ij:

—Jun nimalajk'alajisanel xwinakir chikaxo'l. Ri Dios c'uninak cha' cojuto' ri oj utinamit —xecha'.

¹⁷ Conoje c'u ri e c'o Judea y ri e c'o lo chunakaj xqueta'maj ri xu'an ri Jesús.

Ri Juan Aj Ya'l Bautismo quebutak lo rutijo'n ruc' ri Jesús
(Mt. 11:2-6)

¹⁸ Ec'u ri Juan xreta'maj ronoje wa', ma rutijo'n xquitzijoj che. Ec'uchiri', xebusiq'uij ca'ib chique ¹⁹ y jewa' xubi'ij:

—Jix ruc' ri Jesús y chitz'onoj che we Rire e Rucha'o'n lo ri Dios, ri Jun bi'talic cac'unic, o cakoy'ej chi junok chic —xcha'.

²⁰ Ec'uchiri', rutijo'n ri Juan xebec ruc' ri Jesús y jewa' xquibi'ij che:

—Ri Juan Aj Ya'l Bautismo ojutakom lok cha' cakatz'onoj che'la we lal Rucha'o'n lo ri Dios, ri Jun bi'talic cac'unic o cakoy'ej chi junok chic —xecha che.

²¹ Chupa c'u la' la ora ri Jesús xujek quebucunaj uq'uiyal winak che

* 7:2 “Capitán”: Wa' e aj wach que cien soldados.

tak yabil y che tak c'axc'olil, que-bucolobej ri e c'o paquik'ab itzel uxlabixel y quebutzu'nisaj uq'uiyal potz'. ²² Tec'uchiri', ri Jesús xuc'ul uwach ri tz'onobal que rutijo'n ri Juan:

—Jix y chitzijoj che ri Juan ronoje ri xiwilo y ri xito. Ma ri e potz' quetzu'nic, ri e sic quebinic, ri c'o yabil lepra chique quecunutajic, ri e t'o'c quetanic, ri ecaminak quec'astajic y chique ri niba'ib catzijox ri Utzilaj Tzij.† ²³ Nim uk'ij ralaxic c'u ri' ri na casach ta uc'u'x wuc' —xcha'.

Ri Jesús cach'a't puwi ri Juan Aj Ya'l Bautismo
(Mt. 11:7-19)

²⁴ Echiri' xebec ri etakom lo ruma ri Juan, ri Jesús xujek cach'a't puwi ri Juan chique ri winak, jewa' xubi'ij:

«¿Sa' ri xe'ila alak pa ri luwar catz'intz'otic? ¿Xe'ila neba alak jun achi na jinta ucowil xa pacha' tani cajabajo'x ruma ri tew? ²⁵ ¿Sa' ri xe'ila alak? ¿Xe'ila neba alak jun achi uwikom rib ruc' chomilaj c'ul? Na e ta ri', ma eta'am alak ri lic quewiki-kic y c'o cuc' janipa ri caquirayij, ri' pa cocho e aj wach ejekel wi. ²⁶ Cantz'onoj c'u ri': ¿Sa' ri xe'ila alak? ¿Xe'ila alak jun k'alajisanel? Are', yey pakatzij wi cambi'ij che alak: E jun más c'o uwach chiquiwa ri jujun chic k'alajisanelab. ²⁷ Ma jewa' cubi'ij Ruch'a'tem ri Dios puwi ri Juan:

Ri'in cannabesaj bi ri waj chac chawach Ri'at
cha' cuyijba' ri be chwach pan rawo-
ponibal *Mal.*
3:1
cacha'.

²⁸ Cambi'ij c'u che alak: Chique ri ticawex ebalaxinak wara che ruwachulew, na jinta juna k'alajisanel más c'o uwach chwa ri Juan Aj Ya'l Bautismo. Pero chwi c'u ri' wa' wa que'ec, china ri coc chupa rutakanic ri Dios, tob na jinta uwach, más nim

uk'ij ralaxic chwa ri Juan»‡ xcha ri Jesús.

²⁹ Echiri' ri winak y ri aj tz'onol puak re tojonice* xquita wa', xqueta'maj pakatzij wi ri Dios lic jusuc'. E uwari'che xquitzelej quitzij y xquic'ul ri bautismo cuya ri Juan.

³⁰ No'j ri fariseos y raj c'utunel re ri tziipixab xquic'ak bi uk'ij ri rajawal uc'u'x ri Dios xc'ut chique, ma na xquitzelej ta quitzij y na xquic'ul ta ri bautismo cuya ri Juan.

³¹ Je tanchi wa' xubi'ij ri Jesús:

«¿China c'u ruc' canjunimaj wi qui-wach ri winak re wak'ij ora? ¿Sa' ruc' e junam wi? ³² E canjunimaj quiwach cuc' ri c'o'mab etz'ul pa c'ayibal que-siq'uin chiquiwach, caquibi'ij: “Echiri' ri'oj xkach'awisaj su' chiwe, ri'ix na xiwaj taj quix-xajawic; yey echiri' xkatunaj bix bisobal uwach chiwe, na xiwaj taj quixjuyuyic” —quecha'.

³³ Jec'ula' ralak, ma echiri' xc'un ri Juan Aj Ya'l Bautismo, rire lic cu'an ayuno y na cutij tane vino. Yey ralak cabi'ij alak: “Wa' wa'chi c'o puk'ab jun itzel uxlabixel” cacha alak.

³⁴ Xc'un c'u lo Ralaxel Chiquixo'l Ticawex. Rire cutij ronoje ri caya' chwach, yey ralak cabi'ij alak: “Wa' wa jun achi lic japjatel§ y k'aba'rel, cachbi'il raj tz'onol puak re tojonice** y raj maquib” cacha alak. ³⁵ Pero cak'alajin na c'ut china tak ri lic c'o runa'oj ri Dios cuc' ruma ri qui'anom» xcha ri Jesús.

Ri Jesús cucuy umac jun ixok aj mac

³⁶ Tec'uchiri', xsiq'uiux ri Jesús ruma jun fariseo Simón rubi' cha' que'wo'k ruc'. Ec'u ri Jesús xe'ec chirocho ri fariseo y xtz'uyi' chwa ri mexa.

³⁷ C'o c'u jun ixok aj pa la tinamit na utz ta rubinic usilabic. Echiri' rire xreta'maj cawa' ri Jesús chirocho ri fariseo, xuc'am bi jun c'olibal 'anatal ruc' alabastro†† nojinak che cunabal

† **7:22** Janipa ri xu'an ri Jesús e bi'tal chi can ruma ri k'alajisanel Isaías. Is. 35:5-6; 61:1-2 ‡ **7:28** Quil nota Mateo 11:11. * **7:29** Lc. 3:12 § **7:34** “Japjatel” e cabi'x che juna ticawex lic jik'. ** **7:34** “Raj tz'onol puak re tojonice”: Quil “cobrador de impuestos” pa vocabulario. †† **7:37** “Alabastro”:
Jun chomilaj abaj lic q'ui rajil.

lic qui' ruxlab. ³⁸ Cok' c'u ri' xopon xe'rakan ri Jesús. Yey ruc' ruwa'al uwach xujek cuch'akaba' ri rakan ri Jesús, y ruc' c'u ruwi' cuchakisaj; cutz'ub ri rakan y cusok' ri cunabal lic qui' ruxlab che.

³⁹ Echiri' xril wa' ri fariseo, ri siq'uiyom re ri Jesús, xuch'obo: «We ta wa'chi pakatzij wi k'alajisanel, cuna'bej ri' sa' rubinic usilabic wi'xok cachapaw re, ma wa' wi'xok lic aj mac.»

⁴⁰ Ec'uchiri', ri Jesús jewa' xubi'ij che:

—Simón, c'o cuaj cambi'ij che'la — xcha'.

Ri fariseo xubi'ij che:

—Bi'ij la, Wajawal —xcha'.

⁴¹ Xubi'ij c'u ri Jesús:

—Ec'o ca'ib achijab c'o quic'as ruc' jun achi cuya puak pa chak'i'm. Jun chique, uc'as wo'ob ciento denarios y ri jun chic, uc'as cincuenta denarios. ⁴² Quicabichal na caquirik ta chic sa' rutojic. Ec'u rachi aj ya'l chak'i'm xucuy quimac quicabichal che ri quic'as. Wo'ora, Simón, bi'ij la chwe ¿china chique wa ca'ib achijab más catioxin^{††} chwach rachi aj ya'l chak'i'm? —xcha'.

⁴³ Ri Simón xuc'ul uwach:

—Chinuwach ri'in, e ri jun achi ri xcuytaj umac che ri c'as más q'ui — xcha'.

Y ri Jesús xubi'ij che:

—Ri xbi'ij la, lic are' —xcha'.

⁴⁴ Ec'uchiri', ri Jesús xutz'u' uwach rixok y xubi'ij che ri Simón:

—¿Quil la wa jun ixok? Echiri' xinoc lo ri'in chi ocho la, rilal na xya ta la nuya' re ch'ajbal ri wakan. No'j wa jun ixok xuch'akaba' ri wakan ruc' ruwa'al uwach y xuchakisaj ruc' ruwi'. ⁴⁵ Yey rilal na xtz'ub tane la nuchi'; no'j rire chwi echiri' xinoc lok, na rok'otam ta cutz'ub ri wakan. ⁴⁶ Rilal na xsok' tane la aceite chwi nujolom; no'j rire

xusok' cunabal lic qui' ruxlab che ri wakan. ⁴⁷ Cambi'ij c'u che'la: Rire xu'an wa' ma nucuyum chi ruq'uiyal umac; e uwari'che lic cuc'ut ri rutzil uc'u'x chwe. No'j e junok na lic ta q'ui rumac cuytajinak, ri' xa jubik' ri rutzil uc'u'x cuc'utu —xcha che ri Simón.

⁴⁸ Ec'uchiri', xubi'ij che rixok:

—Ixok, ronoje ramac cuytajinak chic —xcha'.

⁴⁹ Ec'u ri etz'ul ruc' ri Jesús chwa ri mexa xquijeko caquich'a'tibej chiquiwach, jewa' caquibi'ij: «¿Sa' nawi ruwach wa jun achi cucuy mac?» quecha'.

⁵⁰ Pero ri Jesús xubi'ij che rixok:

—Ruma ri cubulibal ac'u'x, xat-colobetajic; jat c'u chi utzil chomal — xcha che.

8

Rixokib e to'bel re ri Jesús

¹ Ic'owinak chi c'u wa', ri Jesús cabin pa tak ronoje tinamit y aldeas cutzizoj ri Utzilaj Tzij re rutakanic ri Dios. E rachbi'il c'u ri cablajuj utijo'n, ² cuc' jujun ixokib ri ebere-sam paquik'ab itzel uxlabixel y ebu-cunam che uq'uiyal yabil. Chiquixo'l e c'o ri María ri ebelinak wukub itzel uxlabixel che, ³ ri Juana rixokil rachi Chuza ri aj wach re rubitak re ri Rey Herodes, ri Susana cuc' jujun chic ixokib caquinimaj ri Jesús ruc' tak rubitak que.

Ri c'ambal na'oj puwi ri awanel

(Mt. 13:1-9; Mr. 4:1-9)

⁴ C'o jun k'ij lic e q'ui ri winak xebel lo pa tak tinamit y xquimol quib ruc' ri Jesús. Ec'uchiri', ri Jesús xujek cac'utun chiquiwach ruc' tak c'ambal na'oj, jewa' xubi'ij:

⁵ «Julaj jun awanel xel bi che rawaxic ri rija'. Ec'uchiri' catajin che ujopopexic rija',* c'o xtzak can chuchi' ri be. Y wa' xyik' uwi' cuma

^{††} 7:42 Pa ri ch'a'tem griego cubi'ij "c'ax cuna'o". ^{§§} 7:46 Ri caqui'an raj Israel ojertan cha' caquiyac uk'ij juna binel chicocho, e caquiya uya' re ch'ajbal ri rakan, caquitz'ub uchi' y caquisok' aceite qui' ruxlab chwi rujolom. * 8:5 E rojertan chila' Israel echiri' caqui'an rawanic re ri trigo xa caquijopopej rija' pulew, tec'uchiri' caquich'uk uwi' ruc' ulew.

ri quebic'owic y xtij bi cuma tak ri tz'iquin.

⁶ »C'o ija' xtzak can pa tak abaj; yey echiri' xel lok, xchakijic ma na camu'mut ta ruxe'.

⁷ »C'o ija' xtzak can pa tak q'uix. Ec'u ri' wa' xq'uiy junam ruc' ri q'uix, pero xjik' can chuxe' ri q'uix.

⁸ »No'j c'o xtzak can pa chomilaj ulew. Ec'u ri' wa', echiri' xq'uiyic, lic xu'an reka'n; chujujunal rakan xel jun ciento che» xcha'.

Tec'uchiri', lic co xch'aw ri Jesús, jewa' xubi'ij: «China c'u ri c'o utanibal che utayic, ¡chuta c'u ri'!» xcha'.

Sa' ruchac tak ri c'ambal na'oj
(Mt. 13:10-17; Mr. 4:10-12)

⁹ Tec'uchiri', rutijo'n xquitz'onoj che:

—¿Sa' que'elawi wa c'ambal na'oj? —xecha'.

¹⁰ Ri Jesús xubi'ij chique:

«Chiwe ri'ix ya'talic cak'alajisax runa'oj ri Dios chwi rutakanic. No'j chique ri winak, canc'ut xew ruc' c'ambal na'oj. Ma tob rique quetzu'nic, e junam ruc' na quetzu'n taj; tob quetanic, e junam ruc' na quetan taj y e ri' na jinta c'o caquimaj usuc'.[☆]

Ri Jesús cuk'alajisaj ri c'ambal na'oj puwi ri awanel

(Mt. 13:18-23; Mr. 4:13-20)

¹¹ »Wo'ora cank'alajisaj chiwe sa' que'elawi wa c'ambal na'oj. Rija' e Ruch'a'tem ri Dios.

¹² »Ri xtzak can chuchi' ri be, e pacha' ri ticawex caquita Ruch'a'tem ri Dios, pero cac'un lo ritzel winak y caresaj wa' pa canima' cha' na caquicoj taj y na quecolobetaj ta c'u ri'.

¹³ »Ri xtzak can pa tak abaj, e pacha' ri ticawex caquita Ruch'a'tem ri Dios y caquic'ul ruc' qui'cotemal; no'j na e tiquil ta chi utz. Caquicoj c'u Ruch'a'tem xa queb oxib k'ij; yey echiri' cac'un lo c'ambal quipa, caquesaj bi quib chirij ri Dios.

¹⁴ »Ri xtzak can pa tak q'uix, e pacha' ri ticawex caquita Ruch'a'tem

ri Dios, yey na caqui'an taj sa' ri cubi'ij. Coq'uul c'u ri' casach uwach Ruch'a'tem ri Dios c'o pa canima' ruma rubis quic'u'x, ri quibeyomalil y rukusil ruwachulew; y na chom ta c'u ri' ri quilital che ri quibinic.

¹⁵ »No'j ri xtzak can pa chomilaj ulew, e pacha' ri ticawex caquic'ul pa sakil wi Ruch'a'tem ri Dios y ruc' ronoje quic'u'x caquic'ol pa canima'. Lic chom c'u ri' ri quilital che ri quibinic.

Ri c'ambal na'oj puwi jun ak' tzij talic

(Mr. 4:21-25)

¹⁶ »Na jinta junok cutzij juna ak' y cuch'uk uwi' ruc' juna mulul re pajbal o cuju' chuxe' ruwarabal. Ma ri cu'an che, e cuya lo chupa ruc'olibal chicaj cha' jela' cutzij quiwi' ri quebec bi. ¹⁷ Ma copon ri k'ij echiri' janipa ri na k'alajisam taj, cak'alajisax na; yey janipa ri ewatalic, queta'maxic.

¹⁸ E uwari'che chita chi utz janipa ri cambi'ij chiwe; ma china ri cuc'ul chi utz janipa ri cac'ut chwach, ri' cac'ut ne más chwach y jec'ula' cumaj más. Yey china ri na cuc'ul ta ri cac'ut chwach, ri' camaj ne che janipa ri cuch'obo umajom chi usuc'» xcha ri Jesús.

Ruchu y tak ruchak' ri Jesús

(Mt. 12:46-50; Mr. 3:31-35)

¹⁹ Julaj echiri' lic e c'o uq'uiyal winak ruc' ri Jesús, ruchu y tak ruchak' xo'lquila', yey na utz ta c'u xekib ruc' cuma ruq'uiyal winak.

²⁰ Ec'uchiri', xbi'x che ri Jesús:

—Ri chu la y tak ri chak' la e c'o pa be y cacaj caquil wach la.

²¹ Rire xuc'ul uwach:

—E ri quetaw re Rutzij Upixab ri Dios y caqui'an ronoje ri cubi'ij, wa' e nuchu y e tak nuchak' ri' —xcha'.

Ri Jesús cuk'atej ri cakjik' chwi ri mar

(Mt. 8:23-27; Mr. 4:35-41)

[☆] 8:10 Is. 6:9

22 C'o jun k'ij ri Jesús xoc chupa jun barco junam cuc' rutijo'n y xubi'ij chique:

—Jo', chojk'ax ch'aka ya' —xcha chique. Y xebec c'u ri'.

23 Echiri' quebin chwi ri mar, ri Jesús xwaric. Ewi xpe jun nimalaj cakjik' chwi ri mar y xujek canoj ri barco che ya' y e ri' ya laj camukutajic. 24 Na jampatana c'ut xe'quic'osoj ri Jesús, jewa' xquibi'ij che:

—¡Kajawal, Kajawal! ¡Cojcamic! — xecha che.

Echiri' xyactaj ri Jesús, xuk'atej ri cakjik'. Ec'u ri ya' quel chicaj, xyeni'ic y ri tew xtani'ic.

25 Tec'uchiri', xubi'ij chique rutijo'n:

—¿Sa' xu'an ri cubulibal ic'u'x wuc'? —xcha chique.

Pero rutijo'n lic quixi'im quib y caminak canima' che. Xquibi'ij c'u chiquiwach: «¿Sa' ruwach wa' wa'chi? ¡Ma tob ne ri cakjik' y ri ya' caquicoj utzij!» xecha'.

Jun achi aj Gadara c'o puk'ab jun itzel uxlabilixel

(Mt. 8:28-34; Mr. 5:1-20)

26 Ec'uchiri', xebopon pa ri luwar re Gadara c'o ch'aka ya' che Galilea.

27 Echiri' xkaj ri Jesús chu'lew, xo'lc'ul ruma jun achi aj pa la tinamit. C'o tan k'ij wa'chi c'o puk'ab jun itzel uxlabilixel. Na cucoj ta uk'u' y na jekel ta chirocho, ma jekel pa tak mukubal que anima'. 28 Wa'chi, echiri' xril uwach ri Jesús, lic xsiq'uinic y xuxuc rib chwach. Y lic co xch'awic, jewa' xubi'ij:

—¿Su'chac co'lmina ib la wuc', Jesús, lal Uc'ajol ri Dios c'o chila' chicaj? Cantz'onoj co che'la na quinya ta la pa c'ax —xcha'. 29 (Xubi'ij wa' ma ri Jesús cutak ri itzelilaj uxlabilixel cha' quel bi che rachi. Yey lic c'o tan k'ij rachi c'o puk'ab wa'. Y tob cayut pa carena y pa griyetas, ronoje curakij y cac'am bi ruma ri itzel uxlabilixel pa tak luwar catz'intz'otic.)

30 Ec'u ri Jesús xutz'onoj che rachi:

—¿Sa' rabi'? —xcha'.

Rire xubi'ij:

—Legión† —xcha'. Xubi'ij wa' ma lic e q'ui ri itzel uxlabilixel eboquinak ruc'. 31 Ec'u tak ri itzel uxlabilixel lic xquicoj quib chwach ri Jesús cha' na quebutak tubi pa ri siwan na jinta utakexic uchoyil upa.*

32 E c'o c'u uq'uiyal ak quewa' chwa ri juyub y tak ri itzel uxlabilixel xquitz'onoj cha' quebec bi cuc' ri ak. Ec'u ri Jesús xuya luwar chique.

33 Ec'uchiri', xebel bi che rachi y xeboc bi cuc' ri ak. Y conoje wa' xe'quic'aka bi quib chwi jun siwan, xebe'tzak chupa ri mar y xejik'ic.

34 Ec'u ri quechajin que ri ak, echiri' xquil tak wa', xebanimajic y janipa ri xquilo xebec che utzijoxic chupa ri tinamit y pa tak juyub.

35 Xepe c'u ri winak che rilic sa' ri x'ani' chiri'. Echiri' xec'un pa c'o wi ri Jesús, xquirik rachi ri ebelinak chubi ri itzel uxlabilixel che, tz'ul xe'rakan uk'ab ri Jesús, ucojom chi uk'u' y jusuc' chi runa'oj. Ruma wa', lic xquixi'ij quib. 36 Y ri xebilow wa' xquitzijoj chique ri c'ac' xec'unic, su'anic xcolobetaj rachi ri xebel bi ri itzel uxlabilixel che. 37 Ec'uchiri', conoje ri winak pa tak ri luwar re Gadara xebelaj che ri Jesús quel bi chiri' ma lic quixi'im quib che. Y ri Jesús xoc chupa ri barco cha' catzelejic.

38 Ec'uchiri', rachi ri ebelinak bi ri itzel uxlabilixel che, xelaj che ri Jesús cha' cuya luwar che caterej bi chirij; pero ri Jesús xutak che cacana' canok, jewa' xubi'ij che:

39 —Chat-tzelej cha'wocho y chatzijoj chique ri ticawex ronoje ri utz u'anom ri Dios awuc' —xcha'.

Y rachi e xu'ano; xe'ec che utzijoxic chupa ronoje ri tinamit ri utz x'an che ruma ri Jesús.

† 8:30 “Legión”: Wa ch'a'tem que'elok “uq'uiyal soldados”. Jun legión e c'o wakib mil soldados che. Wara que'elawi uq'uiyal itzel uxlabilixel. * 8:31 Ap. 20:1-3

Rumi'al ri Jairo yey rixok xuchap ruk'u' ri Jesús

(Mt. 9:18-26; Mr. 5:21-43)

⁴⁰ Echiri' xtzelej ri Jesús ch'aka ya', ri winak xquic'ul ruc' qui'cotemal ma conoje lic coye'em. ⁴¹ Ec'uchiri', xopon jun achi Jairo rubi', rire aj wach re ri sinagoga. Wa' wa'chi xuxuc rib xe'rakan uk'ab ri Jesús y lic xelaj che que'ec chirocho, ⁴² ma xa jun co rumi'al y laj cablajuj rujunab, yey cajec'owic. Ec'uchiri' xe'ec ri Jesús ruc', uq'uiyal winak xeterej bi chirij y lic caquipitz'ipa'.

⁴³ Chiquixo'libal c'u ri winak c'o jun ixok lic yewa', e cablajuj lo junab ri' na catani' ta ri yabil re upa ic' che. Ronoje ri c'o ruc' uq'uisom chi ne cuc' ri aj cun, yey na jinta junok xrikow ucunaxic ri yabil c'o che. ⁴⁴ Rire xkib c'u pana chirij ri Jesús y xuchap ruchi' ruk'u'. Y chupa c'u la' la jok'otaj xtani' ruyabil.

⁴⁵ Ec'uchiri', ri Jesús xutz'onoj:
—¿China ri xchapaw we'in? —
xcha'.

Yey na jinta junok cuya rib chupa. Ec'uchiri' ri Pedro y ri rachbi'il xquibi'ij:

—Kajawal, ri winak caquipitz'ipa' la y caquiminima' la. ¿Su'chac c'u ri' catz'onoj la: “¿China ri xchapaw we'in?” —xecha'.

⁴⁶ No'j ri Jesús xubi'ij:

—C'o jun xinchapawic ma xinna'o c'o jun xcunutaj ruc' ri nuchuk'ab —
xcha'.

⁴⁷ Echiri' rixok xrilo xna'betaj ruma ri Jesús, xpetic cabirbotic. Xuxucuba' c'u rib xe'rakan uk'ab ri Jesús y xutzizoj chiquiwach conoje ri winak su'be xuchap ruk'u' ri Jesús y cha'taj xa pa jok'otaj xcunutajic.

⁴⁸ Ec'u ri Jesús xubi'ij che:

—Ixok, ruma ri cubulibal c'u'x la wuc', xcunutaj la. Oj c'u la ri' chi utzil chomal —xcha'.

⁴⁹ C'a cach'a't ne ri Jesús, echiri' xc'un lo jun petinak chirocho ri aj wach re ri sinagoga y xolu'bi'ij che ri Jairo:

—Ri mi'al la ya xcamic; na jinta chi cutikoj cabayaba' la ri tijonel —xcha'.

⁵⁰ Echiri' xuta wa' ri Jesús, xubi'ij che ri Jairo:

—Muxi'ij rib c'u'x la, xew lic cubula c'u'x la wuc' y jela' cacolobetaj ri mi'al la che ri camic —xcha'.

⁵¹ Ec'uchiri' xopon chirocho ri Jairo, ri Jesús xew xebucox bi ri Pedro, ri Jacobo, ri Juan y ruchu-ukaw ri ralco ali; y na xuya ta luwar che junok chic coc bi. ⁵² Conoje ri winak quebok'ic y lic quetunanic. No'j ri Jesús xubi'ij chique:

—Mixok'ic, ma ri ralco ali na caminak taj, xa cawaric —xcha'. ⁵³ Ec'u rique xa xquitze'ej ri xubi'ij, ma queta'am caminak chic.

⁵⁴ No'j ri Jesús xuchap ruk'ab ri ralco ali y lic co xubi'ij:

—Ali chuuy, ¡chatyactajok! —xcha'.

⁵⁵ Ec'uchiri' xtzelej lo ri ranima' y chupa c'u la' la jok'otaj xyactajic. Y ri Jesús xebutak che uya'ic uwa. ⁵⁶ Ec'u ruchu-ukaw lic xcam canima' che, pero ri Jesús xebutak che na caquibi'ij ta che junok wa xu'ano.

9

Ri Jesús cuya bi quichac ri cablajuj utako'n

(Mt. 10:5-15; Mr. 6:7-13)

¹ Ri Jesús xumol quichi' ri cablajuj utijo'n y xuya paquik'ab quebequesaj bi itzelilaj uxlabixel y quequicunaj ri yewa'ib. ² Xebutak c'u bi ri' che utzijoxic rutakanic ri Dios y che quicunaxic ri yewa'ib. ³ Jewa' xubi'ij chique:

«Mac'o mic'am bi re pa be; mic'am bi ich'ami'y, iteb, iwa, imeyo o jun chic icoton. ⁴ We xixc'ul pa juna ja, chixc'ola chiri' c'ate quixel bi echiri' quix'ec pa jun chic tinamit. ⁵ We chupa juna tinamit na quixc'ul taj, chixelubi chiri' y chipupa' can rulew c'o che ri iwakan, wa' e c'utubal re na utz ta qui'anom ri ejekel chiri'» xcha chique.

⁶ Xebel c'u bi rutijo'n y xebec pa tak aldeas re caquitzizoj ri Utzilaj Tzij y re quequicunaj yewa'ib che ronoje luwar.

Ri Herodes cuta puwi ri cu'an ri Jesús

(Mt. 14:1-12; Mr. 6:14-29)

⁷ Ri Herodes, ri rey re Galilea, xuta puwi ronoje ri cu'an ri Jesús. Ruma c'u wa', lic sachinak runa'oj, ma e c'o jujun quebi'n re: «La' e ri Juan xc'astaj lo chiquixo'l ri ecaminak» quecha'.
⁸ Yey e c'o jujun caquibi'ij: «Rire e Elías xwinakir lok.» Y e c'o jujun chic caquibi'ij: «E junok chique ri k'alajisanelab re ojertan xc'astaj lok» quecha'.
⁹ No'j ri rey Herodes xubi'ij: «Ri'in xintak uc'atzixic rujolom ri Juan. ¿China c'u ri' wa' wa'chi lic sa'chi ri quintajin che utayic puwi'?» xcha'. Y cutzucuj c'ut su'anic caril uwach ri Jesús.

Ri Jesús quebutzuk wo'ob mil achijab

(Mt. 14:13-21; Mr. 6:30-44; Jn. 6:1-14)

¹⁰ Echiri' xetzelej lo ri cablajuj utako'n ri Jesús, xquitzijoj che Rire janipa tak ri xqui'ano. Ec'uchiri', xec'am bi ruma ri Jesús y xebec quituquel pa jun luwar catz'intz'otic chunakaj jun tinamit Betsaida rubi'.

¹¹ No'j ri winak echiri' xqueta'maj, xebel lo pa tak ri tinamit y xebec cha' que'quirika ri Jesús. Yey Rire xebuc'ul chí utz, xujek catzijon chiquiwach puwi rutakanic ri Dios y xebucunaj ri e yewa'ib chique.

¹² Echiri' catajin ubenam ri k'ij, xekib lo ri cablajuj utijo'n y xquibi'ij che:

—Kajawal, utz we quetak bi la ri winak pa tak raldeas y pa tak ri luwar c'o lo xa nakaj cha' que'quitzucuj pa quewar wi y sa' ri caquitijo, ma ri wara pa oj c'o wi lic catz'intz'otic — xecha che.

¹³ No'j ri Jesús xubi'ij chique:

—Chebitzuku ri'ix —xcha'.

Ec'u rutijo'n xquibi'ij che:

—Xa wo'ob pam y ca'ib car c'o kuc'. Xew we e la' coj'ec y que'kalok'o wa'im que conoje wa uq'uiyal winak, quekatzuk c'u ri' —xecha'.

¹⁴ Laj e lo wo'ob mil chi achijab e c'o chiri'. Ec'u ri Jesús xubi'ij chique rutijo'n:

—Chibi'ij chique ri winak quetz'uyi' chimutza'j re nic'aj ciento chujujunal —xcha'.

¹⁵ Jela' xqui'ano, xequitz'uyuba' conoje. ¹⁶ Ec'uchiri' ri Jesús xuc'am ri wo'ob pam y ri ca'ib car, xtzu'n chicaj y xtioxin chwach ri Dios. Xuya c'u bi chique rutijo'n cha' caquijach chique ri winak. ¹⁷ Conoje c'u ri winak xewa'ic y xenoj chi utz. Tec'uchiri', xquimol ri ch'aka'ta'k quikax y ruc' wa' xnoj lo cablajuj chacach.

Ri Pedro cuk'alajisaj ri Jesús e ri Cristo

(Mt. 16:13-20; Mr. 8:27-30)

¹⁸ C'o jun k'ij ri Jesús utuquel cach'a't ruc' ri Dios, yey xew rutijo'n e c'o ruc'. Ewi xutz'onoj chique:

—Chiquiwach ri winak, ¿in china nawi ri'in? —xcha'.

¹⁹ Rutijo'n xquic'ul uwach che:

—C'o quebi'n re lal ri Juan Aj Ya'l Bautismo; jujun chic caquibi'ij lal ri Elías; y jujun chic, lal junok chic chique ri k'alajisanelab re ojertan c'astajinak lok —xecha'.

²⁰ Ec'uchiri', xutz'onoj tanchi chique:

—Yey chiwach ri'ix, ¿in china ri'in? —xcha'.

Ec'u ri Pedro xuc'ul uwach:

—Rilal lal ri Cristo, Rucha'o'n lo ri Dios —xcha'. ²¹ Pero ri Jesús lic xebutak che na caquitzijoj ta c'ana che junok china Rire.

Ri Jesús cach'a't puwi rucamic y ruc'astajibal

(Mt. 16:21-23; Mr. 8:31-9:1)

²² Ec'uchiri', xubi'ij chique:

—Lic chirajawaxic che Ralaxel Chiquixo'l Ticawex cutij na ri c'ax y cac'ak bi uk'ij cuma ri nimak winak re ri tinamit, ri nimak e aj chacunel pa Rocho Dios y raj c'utunel re ri tzijpixab. Tec'uchiri', cacamisaxic; no'j churox k'ij cac'astaj lok —xcha'.

Ri chirajawaxic chique ri cacaj queterej chirij ri Jesús

(Mt. 16:24-28; Mr. 8:34-38)

²³ Xubi'ij tanchi c'u chique conoje:

—We c'o junok caraj caterej lo chwij, lic chirajawaxic che mu'an xew ri caraj rire, e ronoje k'ij chucuyu ri c'ax cape puwi' ruma ucojom ri nubi'; yey utz c'u ri' caterej lo chwij. ²⁴ Ma china ri na cuya ta ranima' ruc'aslem, ri' e cujam ri chomilaj c'aslemal chwach ri Dios; no'j ri cuya ranima' ruc'aslem wuma ri'in, ri' e curik ri chomilaj uc'aslemal chwach ri Dios.

²⁵ »¿Sa' c'u cutikoj ri' che juna ticawex we cu'an rajaw ronoje ruwachulew, yey e cujam ruc'aslemal y jela' cusach uwach chiribil rib? ²⁶ Ma china ri caq'uix chwe ri'in y che ri nuch'a'tem, jela' c'u ri' ri in Alaxel Chiquixo'l Ticawex quinq'uix che rire echiri' quinc'un tanchi ruc' runimal nucomalil, junam ruc' runimal uchomalil ri Nukaw y cuc' tak ri santowilaj ángeles. ²⁷ Ri'in pakatzij wi cambi'ij chiwe: E c'o jujun chique wa e c'o wara na quecam tana we na xquil tubi rutakanic ri Dios —xcha'.

Ri jalc'atajibal uwach ri Jesús

(Mt. 17:1-8; Mr. 9:2-8)

²⁸ Laj wajxakib k'ij ri' ubi'im wa' ri Jesús echiri' xebucha' ri Pedro, ri Juan y ri Jacobo y xel bi cuc' chwa jun juyub cha' que'ch'a't ruc' ri Dios.

²⁹ Yey echiri' cach'a't ruc' ri Dios, xjalc'atitaj rupalaj y ruk'u' xu'an lic sak y cawolk'inic.

³⁰ Y xewinakir c'u queb achijab e ri' quech'a't ruc'. Wa' e ri Moisés y ri Elías, k'alajisanelab re ojertan.

³¹ Ec'u rique sututal quij ruc' jun chomilaj k'ijsak. Y quech'a't puwi' rucamic ri Jesús, ri cuc'ulumaj na chila' Jerusalem.

³² Ri Pedro cuc' ri rachbi'il lic c'o waram chique, pero xtzor ca'n quiwach y xquil c'u runimal uwonibal ri Jesús y ri ca'ib achijab e c'o ruc'.

³³ Ec'uchiri' catajin bi quelic ri ca'ib achijab ruc' ri Jesús, ri Pedro xubi'ij che ri Jesús:

—Kajawal, lic utz xya'taj chike oj c'o wara. Ka'ana c'u oxib rancho:* jun e la, jun re ri Moisés y jun re ri Elías —xcha'. Ri Pedro xubi'ij wa' ruma na cuna' taj sa' ri cubi'ij.

³⁴ C'a cach'a't ne ri Pedro, echiri' xpe jun sutz' y xuch'uk quiwi'. Lic c'u xquixi'ij quib ri' echiri' xech'ukutaj ruma ri sutz'.

³⁵ Ec'uchiri', xquita rukul ri Dios chupa ri sutz', jewa' cubi'ij:

«E Nuc'ajol wa' ri lic c'ax canna'o; e chita utzij Rire»
cacha'.

³⁶ Ec'uchiri' xq'uis ubi'ixiquil wa', na e jinta chi ri ca'ib achijab ruc' ri Jesús. Chupa tak c'u ri' la' la k'ij, ri Pedro, ri Juan y ri Jacobo na xquitzijoj ta c'ana che junok wa' wa xquilo.

Ri Jesús cucunaj jun ala c'o puk'ab jun itzel uxlabixel

(Mt. 17:14-21; Mr. 9:14-29)

³⁷ Chuca'm k'ij echiri' xekaj lo chwa ri juyub, uq'uial winak xebel lo che uc'ulic ri Jesús. ³⁸ C'o c'u jun achi chiquixo'l ri winak lic co xch'awic, jewa' xubi'ij:

—Lal tijonel, 'ana co la ri', cucunaj la wa nuc'ajol, ma xew ne co walc'o'al wa'. ³⁹ Rire cachaptaj ruma jun itzel uxlabixel. Yey echiri' ritzel uxlabixel cuchapo, rala xakic'ate't cujek casiq'uinic, catzak pulew, lic co cujabaja' rib y capuluwan ruc'axaj. Ec'u ri itzel uxlabixel lic cu'an can c'ax che y lic na caraj taj quel bi ruc'. ⁴⁰ Ya xinelay co chique ri tijo'n la cha' caquesaj bi ri itzel uxlabixel, pero rique na xquich'ij ta resaxic bi —xcha'.

⁴¹ Ec'u ri Jesús xuc'ul uwach:

—¡E ri ix ticawex re wak'ij ora, na cubul ta ic'u'x wuc' yey ix sachinak! ¿Janipa chi lo k'ij cajawaxic quinc'o'ji' iwuc' cha' cacubi' ic'u'x wuc'? ¿Janipa chi lo k'ij quixincuyu e la' jela' i'anom? —xcha'. Ec'uchiri', xubi'ij

* **9:33** Ruchac wa' wa rancho xraj cu'an ri Pedro, e re caquilok'nimaj quik'ij ri queb k'alajisanelab y ri Jesús.

che rachi: —C'ama lo ri c'ajol la wara —xcha'.

⁴² Echiri' rala xkib ruc' ri Jesús, xc'ak pulew y lic co xjabajo'x ruma ri itzelilaj uxlabixel. Pero ri Jesús xutak ri itzelilaj uxlabixel cha' quel bi che rala y jec'ula' xucunaj can rala. Tec'uchiri', xuya bi puk'ab rukaw. ⁴³ Y conoje xcam canima' che runimal uchuk'ab ri Dios.

Ri Jesús cach'a't tanchi puwi rucamic

(Mt. 17:22-23; Mr. 9:30-32)

Ruma c'u conoje caminak canima' che ri cu'an ri Jesús, Rire jewa' xubi'ij chique rutijo'n:

⁴⁴ —Lic chita chi utz wa' y mic'ow chic'u'x: Ralaxel Chiquixo'l Ticawex caya'i' paquik'ab rachijab cha' rique caquik'at tzij puwi' —xcha'.

⁴⁵ No'j rutijo'n na xquimaj ta usuc' la cubi'ij, ma c'amaja' caya'taj chique caquimaj usuc' wa'. Yey caquixi'ij quib caquitz'onoj che ri Jesús sa' que'elawi wa'.

China ri lic c'o uwach

(Mt. 18:1-5; Mr. 9:33-37)

⁴⁶ Ec'uchiri', rutijo'n ri Jesús xquijeko caquichapala' quib chiquiwach puwi' chinok chique caya'i' más uwach. ⁴⁷ Ewi ri Jesús xuna'bej ri c'o pa canima'. Xuc'am c'u jun ralco c'o'm y xuya putzal. ⁴⁸ Xubi'ij c'u chique:

—China ri cuc'ul chupa ri nubi' junok na jinta uwach pacha' wa ralco c'o'm, e junam ruc' e in ri quinuc'ulu. Yey china ri cac'uluw we ri'in, e cuc'ul c'u ri Jun takayom lo we. Ma e ri cu'an ch'uti'n che rib, e lic c'o uwach ri' chwach ri Dios —xcha'.

China ri na cach'o'jin ta chikij, ri' e kuq'uul

(Mr. 9:38-40)

⁴⁹ Ec'uchiri', ri Juan xubi'ij che ri Jesús:

—Kajawal, xkil jun achi quebere-saj bi itzel uxlabixel chupa ri bi' la; yey ri'oj xkabi'ij che mu'an chi wa', ma rire na kuq'uul taj —xcha'.

⁵⁰ Ec'u ri Jesús xubi'ij che ri Juan:

—We c'o ca'anaw wa', mik'atej; ma china ri na cach'o'jin ta chikij, ri' e kuq'uul —xcha'.

Ri Jacobo y ri Juan queyaj ruma ri Jesús

⁵¹ E xu'an wa' echiri' ya copon ruk'ijol cac'am pan ri Jesús chila' chicaj: Rire xa jumul xujiquba' uwach que'ec chupa ri tinamit Jerusalem.

⁵² Xebunabesaj bi rutijo'n chwach Rire. Rique xebec y xeboc chupa jun aldea que ri aj Samaria cha' caquitzucuj pa cacana'j wi ri Jesús chiri'. ⁵³ Pero ri aj Samaria na xc'aj taj caquic'ulu ma xquina'bej Jerusalem que'ec wi.

⁵⁴ Echiri' ri Jacobo y ri Juan, ri queb utijo'n ri Jesús xquil wa', xquibi'ij che:

—Kajawal, ¿ca'aj la cojtakan che cha' cakaj lo ak' chila' chicaj y jec'ula' casach quiwach conoje, jela' pacha' xu'an ri k'alajisanel Elías ojertan? —xecha'.

⁵⁵ Pero ri Jesús xutzu' quiwach y xebuyajo, jewa' xubi'ij chique:

—Ri'ix na iweta'am taj sa' chi uxlabixel xcojow wa' pijolom. ⁵⁶ Ma ri in Alaxel Chiquixo'l Ticawex na in ta c'uninak che usachic quiwach ri ticawex; ma in petinak che quicolobexic —xcha'. Ec'uchiri', xebec tanchi chupa jun chic aldea.

Ri cacaj queterej chirij ri Jesús

(Mt. 8:18-22)

⁵⁷ Xalok' c'u ri' e c'o chi be, c'o jun xubi'ij che ri Jesús:

—Wajawal, ri'in quinterej bi chi'ij la tob pachawi que'ec wi la —xcha'.

⁵⁸ Ec'u ri Jesús xubi'ij che:

—Ri yac c'o quijul y ri tz'iquin quexiq'uic' che ruwa caj c'o quisoc; no'j Ralaxel Chiquixo'l Ticawex na jinta ne uluwar tob xa pa cuxlan wi —xcha'.

⁵⁹ Tec'uchiri', xubi'ij che jun chic achi:

—Chat-terej lo chwij —xcha'.

Ec'u rachi xubi'ij che ri Jesús:

—Wajawal, ya'a la luwar chwe canwoy'ej cacam na ri nukaw y canmuk

canok; tec'uchiri', quinterej chi'ij la —xcha'.

⁶⁰ Ri Jesús xubi'ij che:

—Chaya'a can chique ri ecaminak chwach ri Dios cha' e rique quemukuw ri catz-quichak' quecamic; no'j ri'at jat y chat-tzijon puwi rutakanic ri Dios —xcha'.

⁶¹ Tec'uchiri', c'o tanchi jun jewa' xubi'ij che ri Jesús:

—Wajawal, ri'in cuaj quinterej bi chi'ij la. Pero nabe na ya'a la luwar chwe quebenuch'a'bej can ri watz-nuchak' e c'o pa wocho —xcha'.

⁶² Ri Jesús xubi'ij che:

—Na junta junok echiri' uchapom rabixobal catzu'n can chirij, ma ri' na jusuc' ta ri chac cu'ano. Jec'uri'la', we junok na uya'om ta can ronoje, na takal ta che c'o chupa rutakanic ri Dios —xcha'.

10

Ri Jesús quebunabesaj bi setenta utijo'n chwach

¹ Tec'uchiri', ri Kanimajawal xebucha' chi setenta utijo'n y xebutak bi pa cacab cha' quenabej bi chwach Rire pa ronoje tak tinamit y luwar pa que'ec wi. ² Echiri' c'amaja' quebel bi, ri Jesús xubi'ij chique:

«Pakatzij wi cambi'ij chiwe: Ri molonic cajawaxic ca'anic, lic nim; no'j raj chac na e q'ui taj. E uwari'che chitz'onoj che ri Dios, ri Rajaw ri molonic, cha' quebutak lo aj chac re caqui'an ri molonic. ³ ¡Jix! Pero chitape': Ri'in quixintak bi pacha' ix bexex chiquixo'l utiw.*

⁴ »Echiri' quix'ec, mic'am bi uc'olibal imeyo, mic'am bi iteb, mic'am bi jun chic mola'j ixajab. Yey mixtaq'ui' pa be re quiya can rutzil uwach junok.

⁵ »We xixoc chuchi' juna ja, ri nabe ich'a'tem quibi'ij e wa': «C'ola ri utzil

chomal re ri Dios pawil alak.» ⁶ We c'o junok chiri' lic caraj cuc'ul ri utzil chomal re ri Dios, cuc'ul c'u ri'. No'j we na junta cac'uluw re ri utzil chomal re ri Dios, wa' catzelej tanchi lo iwuc'. ⁷ Pa quixc'ul wi, chixcanaj chiri' chupa ri ja; mixk'ax che jujun chic ja. Utz quitij ri caya' chiwe; ma e junok cachacunic, lic takal che catojic. ⁸ We xixoc chupa juna tinamit y xixc'ul pa juna ja, chitija' sa' ri caya' lo chiwach y mitz'onoj ri quiwaj ri'ix.

⁹ »Chebicunaj c'u ri e yewa'ib e c'o chupa ri tinamit y chibi'ij chique conoje: «Rutakanic ri Dios xa nakaj chi c'o wi lo che alak.»†

¹⁰ »We xixoc c'u chupa juna tinamit yey na quixc'ul taj, chixelubi pa tak be y chibi'ij: ¹¹ «Tob ne rulew re wa tinamit alak c'o che ri kakan, cakapu' canok cha' queta'maj alak na utz ta ri x'an alak. Pero cheta'maj alak chi utz wa': Rutakanic ri Dios xa nakaj chi c'o wi lo che alak» quixcha'. ¹² Cambi'ij c'u chiwe: Más lic c'ax ri cape na paquiwi ri tinamit na caquic'ul ta ri Utzilaj Tzij, chwa ri cape paquiwi ri e aj Sodoma y ri e aj Gomorra.*

Ri c'axc'obic cape paquiwi ri tinamit na caquitzelej ta quitzij (Mt. 11:20-24)

¹³ »¡Lic tok'o' iwach ri ix aj Corazín! ¡Lic tok'o' iwach ri ix aj Betsaida! Ma we ta chupa ri tinamit Tiro y ri tinamit Sidón‡ xilitaj wi wa c'utubal re ruchuk'ab ri Dios xin'an chiwach ri'ix, c'o tan k'ij ta lo ri' xquitzelej quitzij chwach ri Dios, quicojom c'u quik'u' c'ax rij y quitz'uyubam quib pa chaaj ruma ri quibis. ¹⁴ E uwari'che echiri' copon ri k'ij re ri k'atbal tzij, más nim ri c'axc'obic cape piwi' chwa ri c'axc'obic cape paquiwi ri winak re ri tinamit Tiro y ri tinamit Sidón.§ ¹⁵ Ec'u ri ix aj Capernaúm, e

* **10:3** Ri Jesús xubi'ij wa' ma e c'o winaktzel quequil ri caquitzijoj ri Utzilaj Tzij y caqui'an c'ax chique.

† **10:9** Xubi'ij «Rutakanic ri Dios xa nakaj chi c'o wi» ma ya xc'un ri Kanimajawal yey rutakanic ya e ri' cujek cuc' conoje ri caquicoj rubi'. * **10:12** Gn. 19:24-28 ‡ **10:13** Lic eta'matalic ri ejekel pa wa queb tinamit Tiro y Sidón e aj tioxab y lic e aj maquib. Is. 23:1-18 § **10:14** Ri ticawex quitom ri Utzilaj Tzij y na caquicoj taj, más c'ax ri cape paquiwi' chiquiwa ri ticawex na junta quitom.

chiwach ri'ix lic yacom chi ik'ij c'a chicaj; yey na e ta ri', ma lic cac'ak ne bi ik'ij y quixc'ak ne bi c'a chi xibalba' re tijbal c'ax.

¹⁶ »China ri cataw iwe'ix, in ri quinuto; china ri tzel quilow iwe, in ri tzel quinrilo; china ri tzel quilow we ri'in, e tzel caril ri Jun takayom lo we ri'in» xcha ri Jesús.

¹⁷ Xebec c'u ri' ri setenta. Y ec'uchiri' xetzelej lok, lic quequic'otic. Xquitzijoj c'u che ri Jesús:

—Kajawal, ¡tak ri itzel uxlabixel xquicoj katzij echiri' chupa ri bi' la xojtakan che quebel bi chique ri winak! —xecha'.

¹⁸ Ri Jesús xubi'ij chique:

—Ri'in xinwil ri Satanás xc'ak lo chicaj pacha' jun rayo. ¹⁹ ¡Chiwilape! Ri'in nuya'om ichuk'ab cha' quich'ij uchuk'ab ritzel winak y na jinta c'o quic'ulumaj tob ne quiyik'iya' quiwi' cumatz y sina'j.

²⁰ Pero ri'ix mixqui'cot ruma caquicoj itzij ri itzel uxlabixel; e chixqui'cota ruma tz'ibital ribi' ²¹ chila' chicaj —xcha'.

*Ruqui'cotemal ri Jesús
(Mt. 11:25-27; 13:16-17)*

²¹ Ec'u la' la jok'otaj, ri Jesús lic xqui'cot ruma ri Santowilaj Ruxlabixel ri Dios y xubi'ij:

«Nukaw, canyac k'ij la, Lal Rajaw ruwa caj y ruwachulew, ma tak ri k'alajisam la chique ri lic caqui'an ch'uti'n che quib, wa' ewam la chiquiwach ri lic c'o quina'oj y lic c'o quimajom. Jela' x'an la, Nukaw, ma e x'aj la ri'» xcha'.

²² Tec'uchiri', xubi'ij chique ri ticawex:

«Ronoje tak ri c'olic ya'tal lo panuk'ab ruma ri Nukaw. Na jinta c'u junok umajom usuc' chi utz sa' ruwach Ruc'ajol ri Dios; xew ri Kakaw Dios eta'mayom re. Y na jinta ne junok umajom usuc' chi utz sa' ruwach ri Kakaw Dios, xew Ruc'ajol ri Dios eta'mayom re; yey puk'ab c'u

ri' Ruc'ajol c'o wi china chique caraj cuk'alajisaj wi wa'» xcha'.

²³ Tec'uchiri' xkib cuc' rutijo'n y e la' xa quituquel xubi'ij chique:

«Nim quik'ij calaxic ri caquilo janipa ri iwilom ri'ix. ²⁴ Ma cambi'ij c'u chiwe lic e q'ui ri k'alajisanelab y ri takanelab re ojertan lic xcaj caquil bi janipa ri quiwil ri'ix wo'ora, pero na xquimaj ta chi rilic bi. Lic xcaj caquita bi janipa ri quita ri'ix wo'ora, pero na xquimaj ta chi utayic bi» ²⁵ xcha'.

*Ri c'ambal na'oj puwi rachi aj
Samaría lic utz uc'u'x*

²⁵ C'o jun aj c'utunel re ri tzijpixab xyactajic y jewa' xubi'ij cha' cuc'am upa ri Jesús:

—Wajawal, ¿sa' ri can'ano cha' c'o nuc'aslemal na jinta utakexic? —xcha'.

²⁶ Ri Jesús xubi'ij che:

—¿Sa' ri tz'ibital chupa Rutzij Upixab ri Dios? ¿Sa' ri camaj la usuc' che? —xcha'.

²⁷ Y raj wach xuc'ul uwach:

—Jewa' tz'ibitalic:

C'ax chana'a ra Dios Kajawxel ruc' ronoje awanima',
ruc' ronoje ac'u'x, ruc' ronoje achuk'ab y ruc' ronoje ana'oj;
Dt. 6:5

yey

C'ax chana'a rawatz-achak' jela' pacha' ri c'ax cana' awib ri'at *Lv. 19:18*

—xcha'.

²⁸ Y ri Jesús xubi'ij che:

—Lic utz ri xc'ulubej wi la uwach. 'Ana c'u la wa' y cac'oji' c'aslemal la na jinta utakexic ²⁹ —xcha'.

²⁹ Pero raj wach na caraj taj cutzak rib y xubi'ij c'u che ri Jesús:

—¿Yey china ri watz-nuchak'? —xcha'.

³⁰ Ri Jesús jewa' xubi'ij che:

«C'o jun achi xel chupa ri tinamit Jerusalem y xe'ec pa ri tinamit Jericó. Pa be c'ut xtzak paquik'ab jujun elek'omab. Relek'omab xquimaj bi ronoje rubitak re y lic xqui'an can

✧ 10:18 Ap. 12:7-9

✧ 10:20 Flp. 4:3; Ap. 13:8

✧ 10:24 Heb. 11:13, 39-40

✧ 10:28 Lv. 18:5

c'ax che. Cajec'owic xquiya canok y xebec.

³¹ »Ec'uchiri', chupa ri be xc'un lo jun aj chacunel pa Rocho Dios. Y echiri' xril rachi 'anom can c'ax che, xa xutzu' canok y xic'owic.

³² »Tec'uchiri' xc'un lo jun chic achi aj levita, to'bel que raj chacunel pa Rocho Dios. Echiri' xopon chunakaj rachi 'anom can c'ax che, xa xutzu' canok y xic'owic.

³³ »Xc'un c'u lo jun achi aj Samaria. Echiri' xc'un chunakaj rachi 'anom can c'ax che y xrilo sa' ru'anom, lic xjuch' ca'n pa ranima'.** ³⁴ Xkib c'u ruc', xucunaj uwach ruc'ax ruc' aceite y ruc' vino, y xuch'uk uwach ruc'ax ruc' c'ul. Xuyac bi chwi ruc-awayu', xuc'am bi chupa jun mesón y xuchajij chi utz. ³⁵ Echiri' xel chiri' chuca'm k'ij, xresaj lo ca'ib denarios pubolxa y xuya can che ri rajaw ri mesón, y jewa' xubi'ij che: “Chajij co la wa'chi chwe. We na xu'an ta c'u wa puak canya can che'la, echiri' quintzelej lok, canyijba' che'la” xcha'.»

³⁶ Tec'uchiri' ri Jesús xubi'ij che raj c'utunel:

—Chiwach rilal, ¿china chique wa oxib achijab xu'an ratz-uchak' rachi xchapataj cuma relek'omab pa be? —xcha'.

³⁷ Raj c'utunel xubi'ij:

—Chinuwach ri'in, e ri jun xuc'ut ri c'axna'bal uc'u'x che —xcha'.

Ec'uchiri' xubi'ij ri Jesús che:

—Lic are!. Jela' c'u ri' 'ana la rilal —xcha'.

Ri Jesús que'bina cuc' ri Marta y ri María

³⁸ Echiri' ri Jesús c'o chi be, xoc chupa jun aldea. Chiri' c'o jun ixok Marta rubi' y rire xuc'ul ri Jesús chirocho. ³⁹ Wi'xok Marta c'o jun uchak' María rubi'. Ec'u ri María xtz'uyi' chwach ri Jesús cha' cuta ri cubi'ij. ⁴⁰ No'j ri Marta lic e ubis uc'u'x tak

ri ca'an pa ja. Ec'uchiri', xkib ruc' ri Jesús y jewa' xubi'ij che:

—Wajawal, ¿lic cami e la' na coc ta la il che ri cu'an ri nuchak'? Ma inuya'om can nutuquel chwach ri nimanic. Bi'ij co la che quinuto'o —xcha'.

⁴¹ No'j ri Jesús xubi'ij che:

—Marta, Marta, ri'at lic e ubis ac'u'x y e sachinak ana'oj puwi ri ca'ano. ⁴² Xa jun c'u ri lic chirajawaxic wi ca'anic, wa' e ri más utz, y ri María e ucha'om wa';†† yey na jinta junok camajaw wa' che —xcha'.

11

Ri Jesús cac'utun chwi ri oración (Mt. 6:5-15; 7:7-11)

¹ C'o jun k'ij ri Jesús cach'a't ruc' ri Dios. Y echiri' xuq'uis u'anic orar, jun chique rutijo'n xubi'ij che:

—Kajawal, c'utu la chike su'anic caka'an orar, jela' pacha' xu'an ri Juan cuc' rutijo'n —xcha'.

² Y ri Jesús xubi'ij chique:

—Echiri' quixch'a't ruc' ri Dios, utz jewa' quibi'ij:

Kakaw Dios, Lal c'o la chila' chicaj, ¿lic cheta'maxok nim uk'ij ri bi' la! Peta la, takana la pakawi'; chu'ana c'u ri rajawal c'u'x la wara che ruwachulew, jela' pacha' ri ca'an chila' chicaj.

³ Ya'a co la wak'ij ri kawa, ri cajawax chike ronoje k'ij.

⁴ Cuyu co la kamac,

jela' pacha' ri'oj cakacuy quimac conoje ri emacuninac chikij.

Y maya co la luwar chike cojtzak pa mac;

e lic chojcolobej la chwach ritzel winak

—xcha'.

⁵ Ec'u ri Jesús xubi'ij tanchi chique:

«We ta e la' c'o junok chiwe, pa tiq'u'il ak'ab que'ec chirocho juna ramigo y jewa' cubi'ij che: “Wamigo, ma'an co ri' canjal oxib nuwa chawe,

⁶ ma xc'un jun wamigo petinak naj y

** **10:33** Wa'chi aj Samaria xuto' rachi e cuq'u'il raj judi'ab, tob ri e aj Samaria y ri e aj judi'ab lic tzel caquil quib. †† **10:42** Ri xu'an ri María e xuya rib che utayic ri cubi'ij ri Jesús; ec'u ri nimanic xu'an ri Marta che ri Jesús, utz pero wa' xa re jok'otaj ma xa re ruwachulew y na jinta ucowil.

na jinta chi nuwa re cantzuku” cacha che.

⁷ »Ec'u rire cuc'ul lo uwach c'a pa ja, jewa' cubi'ij lo che: “Minach'ich'a', ma ri puerta tz'apil chic y oj cotz'ol chi cuc' ri walc'o'al. Na utz ta c'u ri' quinyactajic cha' qui'nya'a bi chawe” cacha'.

⁸ »Cambi'ij c'u ri'in chiwe: Rachi tob na cayactaj ta lo che uto'ic ri ramigo ruma camigos quib, pero cuto'o xa ruma ri ramigo lic na xrok'otaj ta utz'onoxic.

⁹ E uwari'che cambi'ij ri'in chiwe: Janipa ri cajawax chiwe, chitz'onoj che ri Dios y caya'i' chiwe; chitzucuj ruc' Rire janipa ri cajawax chiwe y quiriko; chich'a'bej Rire y quixuca-jmaj lok. ¹⁰ Ma china ri quel uchi' che utz'onoxic, cuc'ul na; china ri c'o cutzucuj, curik na; y china ri cach'aw pan che ruchi' ja, cajaki' na lo che.

¹¹ »¿C'o neba juna achi chixo'l, we ruc'ajol cutz'onoj pam, cuya juna abaj che; o we cutz'onoj car, cuya juna cumatz che? ¹² ¿O c'o neba juna achi we ruc'ajol cutz'onoj sakmolob che, cuya juna sina'j che? ¡Na jinta junok! ¹³ Ec'u ri'ix tob xa ix ticawex na lic ta utz ic'u'x, na ruc' ta c'u ri', quirik uya'ic chomilaj tak sipanic chique riwalc'o'al. ¡Mac'uwari' ri Kakaw Dios c'o chila' chicaj cuya ne lo ri Santowilaj Ruxlabixel chique ri quetz'onow re!» xcha ri Jesús.

Cabi'x che ri Jesús e uchuk'ab ritzel ri c'o ruc'
(Mt. 12:22-30; Mr. 3:20-27)

¹⁴ E xu'an wa' echiri' ri Jesús caresaj bi jun itzel uxlabixel che jun achi me'turizam ruma ri itzel uxlabixel. Ec'uchiri' elinak chubi ri itzel uxlabixel, rachi xujek cach'a'tic. Yey tak ri winak lic xcam canima' che wa'. ¹⁵ Pero e c'o jujun chique xquibi'ij: «Rire queberesaj bi ri itzel uxlabixel ruma ruchuk'ab ri Beelzebú, ri cajawal ri itzel uxlabixel» xecha'.

¹⁶ Y e c'o chi jujun xa re caquic'am upa ri Jesús, caquitz'onoj che cu'an juna c'utubal re chila' chicaj cha' cak'alajinic we Rire takom lo ruma ri Dios. ¹⁷ Pero ri Jesús reta'am sa' ri caquich'obo; ruma c'u ri', xubi'ij chique:

«We ri takanelab re juna tinamit quijachom quipa ruma quech'o'jin chiquiwach, ri' na canajtir ta ri quitakanic. Yey we ri ejekel pa juna ja quijachom quipa ruma quech'o'jin chiquiwach, ri' na quetiqui' ta chi utz.

¹⁸ Jec'uri'la', we ta ri Satanás cuc' ri itzel uxlabixel caquijek quech'o'jin chiquiwach, ¿su'anic c'u ri' catiqui' rutakanic? Cambi'ij wa' ma ralak cabi'ij alak ri'in quebenuwesaj bi ri itzel uxlabixel ruma ruchuk'ab ri Beelzebú.

¹⁹ »We ta e ri', ¿china caya'w quichuk'ab ri' ri e tijo'n ralak cha' quequesaj bi itzelilaj uxlabixel? ¿Ruc' nawí ruchuk'ab ritzel caqui'ano? Tz'onoj c'u alak ri' chique ri e tijo'n alak we e u'anom ri'. ²⁰ Pero we ri'in quebenuwesaj bi ri itzel uxlabixel ruc' ruchuk'ab ri Dios, wa' e c'utubal re c'uninak chi rutakanic ri Dios chixo'libal alak.

²¹ »We c'o juna achi lic c'o uchuk'ab y lic c'o uchapabal puk'ab re cucha-jij ri rocho, na jinta c'u cuc'ulumaj ri' rubitak re. ²² No'j we xc'un lo junok chic más c'o uchuk'ab chwa ri rajaw ja, ri' cuch'ij uchuk'ab, cumaj c'u che ri rajaw ja ri chapabal ri lic ucubam uc'u'x ruc', cuc'am bi ronoje rubitak re y cujach chique jujun chic.* ²³ Cambi'ij c'u che alak: China ri na u'anom ta re wuc' ri'in, ri' aj ch'a'oj chwij. Yey china ri na cato'b ta wuc' ri'in che quic'amic lo jujun chic, ri' e cuwulij wa chac can'ano.

Ri cuc'ulumaj junok echiri' juna itzelilaj uxlabixel catzelej tanchi ruc'
(Mt. 12:43-45)

²⁴ »Echiri' juna itzelilaj uxlabixel quel bi ruc' juna ticawex, ri cu'ano

* **11:22** Wa jun c'ambal na'oj e que'elawi ritzel lic c'o uchuk'ab, pero ri Jesús más c'o uchuk'ab chwa ritzel. E uwari'che c'o puk'ab Rire queberesaj lo ri winak puk'ab ritzel.

e casutin pa tak luwar catz'intz'otic re cutzucuj pa cajeki' wi. Yey we na curik taj, cubi'ij c'u chiribil rib: "Quintzelej pe chupa ri wocho, pa xinela lo wi" cacha'.²⁵ Ec'uchiri' coponic, cu'rika rachi pacha' juna ja mesom upa y yijbital chi utz.²⁶ Que'ec c'ut, quebu'c'ama chi lo wukub rach itzel uxlabixel más itzel quiwachlibal chwa rire; y conoje c'u ri' queboquic y quejeki' chiri'. Jec'uri'la', rubinic rachi más cayojtaj chwa ri petinak lok»† xcha ri Jesús.

Nim quik'ij calaxic ri quecojow re Rutzij Upixab ri Dios

²⁷ Echiri' c'a catajin ri Jesús che ubi'xiquil wa', c'o jun ixok chiquixo'l ruq'uiyal winak lic co xch'awic, jewa' xubi'ij che:

—Nim uk'ij ralaxic rixok xya'w e la chwachulew y xtz'umtisan e la — xcha'.

²⁸ No'j ri Jesús xubi'ij che:

—Más nim quik'ij calaxic ri quetaw re y quecojow re Rutzij Upixab ri Dios — xcha'.

Ri winak caquitz'onoj che ri Jesús c'utubal re ruchuk'ab (Mt. 12:38-42)

²⁹ Echiri' uq'uiyal winak catajin quimolotajic ruc' ri Jesús, rire xujek ubi'xiquil chique:

«Ri ticawex re wak'ij ora lic itzel quic'u'x, ma e caquitz'onoj can'an juna c'utubal re ruchuk'ab ri Dios chiquiwach. No'j na caya'taj ta c'u wa' chique, ma xew caya'taj ri c'utubal x'ani' ojertan ruc' ri Jonás.³⁰ Ma jela' pacha' ri Jonás xolu'ana jun c'utubal chiquiwach ri aj Nínive, jec'uri'la' Ralaxel Chiquixo'l Ticawex colu'ana jun c'utubal chiquiwach ri ticawex re wak'ij ora.

³¹ »Echiri' copon ri k'ij re k'atbal tzij,† cayactaj lo ri reina re pa sur‡ y cucoj quimac ri ticawex re wak'ij

ora. Ma rojertan lic naj petinak wi rire cha' colu'xiquinaj runa'oj ri rey Salomón. No'j ri ticawex re wak'ij ora, c'o jun chiquixo'l más c'o uwach chwa ri Salomón, yey na queboc tane il che.

³² »Jec'ula' ri winak aj Nínive re ojertan queyactaj chupa ri k'ij re k'atbal tzij y caquicoj quimac ri ticawex re wak'ij ora. Ma rique xquitzelej quitzij chwach ri Dios ruma ri tzijonic xu'an ri Jonás chiquiwach.☆ No'j ri ticawex re wak'ij ora, c'o jun chiquixo'l más c'o uwach chwa ri Jonás, yey na queboc tane il che.

Ri c'ambal na'oj puwi ri candil (Mt. 6:22-23)

³³ »Na jinta junok echiri' cutzij juna ak', que'rewaj lo chupa juna luwar pa na k'alaj ta wi. Na cuch'uk tane uwi' ruc' juna mulul re pajbal; ri cu'an che, e cuya lo chupa ruc'olibal chicaj cha' jela' cutzij quiwi' ri queboc bi.

³⁴ »Ri kawach e pacha' candil re ri kacuerpo, ma ruma wa' cojtzu'nic cha' utz cojbinic. Jec'ula', we ri kawach lic utz u'anom, ronoje ri kacuerpo nojinak che k'ijsak y cakil c'u ronoje chi utz. No'j we ri kawach na utz taj, ronoje ri kacuerpo c'o pa k'eku'm.§

³⁵ »Lic c'u chajij ib alak; e mabi'ij alak: "Oj c'o pa k'ijsak", yey na cana'bej ta alak pa k'eku'm c'o wi alak. ³⁶ No'j we pakatzij wi c'o chi alak pa k'ijsak y na jinta chi re ri k'eku'm che alak, ri' ronoje cak'alajin chiwach alak jela' pacha' juna candil cutzij ri be alak ruc' ruwonibal» xcha'.

Ri Jesús cuk'alajisaj ri quimac ri fariseos y raj c'utunel re ri tzijpixab (Mt. 23:1-36; Mr. 12:38-40; Lc. 20:45-47)

³⁷ Ec'uchiri' ri Jesús xuq'uis cac'utunic, xsiq'uis ruma jun fariseo

† **11:26** Wa jun c'ambal na'oj e que'elawi we juna ticawex na cuya ta rib puk'ab ri Dios, e ritzel cu'an ri're che. Ma konoje ri oj ticawex c'o kajaw, tob e ritzel o e ri Dios. ☆ **11:29** Mt. 12:39-40 ☆ **11:31** Ap. 20:11-15 ‡ **11:31** Wa jun ixok e reina re ri nación Sabá ri c'o pa sur che Israel. 1 R. 10:1-4 ☆ **11:32** Jon. 3:1-10 § **11:34** Pa ri ch'a'tem hebreo we junok "utz ruwach", wa' que'elawi lic utz uc'u'x y na caxu'yan taj. Yey we "na utz ta ruwach", wa' que'elawi lic co ruc'u'x y lic xu'y.

cha' que'wo'ka chirocho. Ri Jesús xe'ec, xoc c'u chupa ri ja y xtz'uyi' chwa ri mexa. ³⁸ Echiri' xril wa' ri fariseo, lic xcam ranima' che ma na xuch'aj ta nabe ruk'ab jela' pacha' caqui'an che ri quijosk'iquil ri fariseos.

³⁹ Ec'u ri Kanimajawal jewa' xubi'ij che:

—Ralak alak fariseos lic coc alak il che ri cach'aj alak chi utz ri rij ri vaso y ri lak pero na coc ta alak il che uch'ajic rupa. Jec'uri'la' ralak lic coc alak il che ri josk'inic re ri cuerpo, pero lic nojinak ri anima' alak che rayinic y che ri na utz taj.

⁴⁰ »jLic na junta c'ana na'oj alak! Ri Jun x'anaw re ri quilitaj che ri cuerpo alak, ¿na e ta neba ri x'anaw re ri anima' alak? ⁴¹ We pakatzij wi ca'aj alak cu'an chom ri binic silabic alak chwach ri Kakaw, sipan alak chique ri niba'ib ruc' ri c'o uc' alak.

⁴² »jLic tok'o' wach ralak alak fariseos! Lic coc alak il che jujun tzijpaxab, ma caya alak che ri Dios ri diezmo re ri arweno, re ri ruda y re ronoje ichaj; no'j na ca'an ta alak ri lic usuc' y na c'ax ta cana' alak ri Dios. Yey ri lic chirajawaxic wi e ca'an alak ri usuc' y c'ax cana' alak ri Dios, junam ruc' ri caya alak ri diezmo alak.

⁴³ »jLic tok'o' wach ralak alak fariseos, ri lic ca'an nim che ib alak! Ma lic cuc'ul c'u'x alak ri catz'uyi' alak pa tak sinagogas chupa ri tz'ulibal que ri lic c'o quiwach y lic cuc'ul c'u'x alak ri caya' rutzil wach alak pa quilitaj wi alak.

⁴⁴ »jLic tok'o' wach ralak alak aj c'utunel re ri tzijpaxab y alak fariseos! Xa queb palaj alak, ma e quech'ulaj alak ri winak ruc' ri cac'ut alak. Pacha' alak mukubal que anima' na quilitaj taj; ec'u ri winak quebic'ow puwi' y na caquina'bej taj ruc' wa' caquich'ulaj quib»** xcha'.

⁴⁵ Ec'uchiri', jun chique ri e aj c'utunel re ri tzijpaxab jewa' xubi'ij che ri Jesús:

—Lal tijonel, echiri' cabi'ij la wa', oj jun ri'oj cojyaj la —xcha'.

⁴⁶ Ri Jesús xubi'ij:

«jLic tok'o' wach ralak alak aj c'utunel re ri tzijpaxab! Lic ca'an alak c'ax chique ri winak ruc' ri takanic alak. Ma wa takanic alak e pacha' nimak tak eka'n lic al y lic c'ayew ruc'axic; quetak c'u alak ri winak cha' caquekaj bi yey ralak na ca'aj tane alak cato'b c'ana alak ruc' wa'.

⁴⁷ »jLic tok'o' wach alak! Ma cayac alak chomilaj mukubal chique ri k'alajisanelab xecamisax cuma ri mam alak ojertan. ⁴⁸ Ruc' ri ca'an alak cak'alajisaj alak junam tzij alak cuc' ri mam alak. Ma rique na xquic'ul ta ri e k'alajisanelab y xequicamisaj; jenela' ralak na cata ta alak ri quitzij tz'ibital canok, tob cayijba' alak ri' ri quimukubal.

⁴⁹ »E uwari'che ri Dios, ri lic c'o sakil na'oj ruc', jewa' cubi'ij: “Quebenutak bi e k'alajisanelab y e tako'n chiquiwach wa ticawex. Y chique c'u wa' wa aj chac we'in, c'o ri quequicamisaj y c'o ri quequinternabej ruc' c'ax” cacha ri Dios. ⁵⁰ Ec'u uwari'che, ri alak ticawex re wak'ij ora, paw' alak c'o wi ri quiquiq'uel ri k'alajisanelab ecamisam chwi lo ri jekebal re ruwachulew, ⁵¹ chwi lo rucamic ri Abel* c'a chwa rucamic ri Zacarías, ri xcamisax chuxo'l raltar y ri Rocho Dios.* Pakatzij wi cambi'ij che alak, ri Dios cuk'at tzij paw' alak ruma ri quicamic rique.

⁵² »jTok'o' wach ralak alak aj c'utunel re ri tzijpaxab! Ma alak latz'anel chique ri cacaj caqueta'maj ri K'ijsak. Ewam alak rusuc' Rutzij Upixab ri Dios, jec'ula' na coc ta alak pa ri K'ijsak yey na caya tane alak luwar chique ri winak queboquic» xcha'.

⁵³ Echiri' ri Jesús catajin che ubi'ixiquil wa' chique, raj c'utunel re ri tzijpaxab y ri fariseos lic xpe coy-owal chirij y xquijeko caquichapala' ruc' uq'uiyal tz'onobal. ⁵⁴ Lic xquitij

** **11:44** Pa ri tzijpaxab re ojertan cubi'ij juna ticawex cuch'ulaj rib we cuchap juna anima' o cataqu'ui' puwi juna mukubal. Nm. 19:16 * **11:51** Gn. 4:8 * **11:51** 2 Cr. 24:19-21

ri' che cha' rire cubi'ij ri na usuc' taj y ruc' wa' caquicoj umac.

12

Ri macunic caqui'an ri xa queb quipalaj

¹ Catajin quimolotajic uq'uiyal winak na junta chi quitakexic, y ruma wa' lic caquiminima' quib chiquiwach. Ec'uchiri', ri Jesús xujeko cac'utunic; nabe xujek cach'a't cuc' rutijo'n, jewa' xubi'ij chique:

«Lic mi'an iwe pacha' ri caqui'an ri fariseos, ma rique xa queb quipalaj. Jela' pacha' ri levadura cojotal chupa ri k'or re pam yey wa' na quilitaj taj, jec'ula' ri fariseos quewam ri na utz taj pa canima'. ² No'j copon ri k'ij echiri' ronoje ri ch'ukutal uwi' wo'ora, quel lo chi sak; yey ronoje ri ca'an xa xe'lak'ay, queta'maxic. ³ E uwari'che copon ri k'ij echiri' janipa ri ibi'im ri'ix pa k'eku'm, quel lo chi k'ij sak; yey e ri xa iwesewo'm pa juna ja, quesax utzijolal pa tak be.

Mixi'ij iwib chiquiwach ri winak (Mt. 10:26-33)

⁴ »Cambi'ij c'u chiwe ri'ix ix wami-gos: Mixi'ij iwib chiquiwach ri c'o paquik'ab quixquicamisaj, ma wa' xew che ri cuerpo caqui'an wi; yey echiri' ix caminak chic, na junta chi caqui'an chiwe. ⁵ Cambi'ij c'u chiwe china chwach chirajawaxic wi quixi'ij iwib: E chixi'ij iwib chwach ri Jun c'o puk'ab caresaj ric'aslemal ri'ix y tec'uchiri' quixuc'ak bi chi xibalba' re tijbal c'ax. Pakatzij wi e chixi'ij iwib ri' chwach Rire.

⁶ »Iweta'am wo'ob raltak co tz'iquin quec'ayix xa chwa queb oxib raltak co meyo. Na ruc' ta c'u ri', ri Dios na cumesc'utaj ta c'ana junok chique. ⁷ Mac'uwari' ri'ix na quixumesc'utaj ta q'uenok, ma chujujunal ne riwi' ajilam ruma Rire. E uwari'che, mixi'ij iwib; ma ri'ix más c'o iwach chiquiwa ri raltak co tz'iquin.

⁸ »Pakatzij wi cambi'ij chiwe: E junok cuk'alajisaj chiquiwach ri winak, cubi'ij: «In tijo'n re ri Jesús»,

jec'uri'la' can'an ri'in che rire; ri in Alaxel Chiquixo'l Ticawex cambi'ij chiquiwach ri ángeles re ri Dios: «Katzij, wa jun e nutijo'n» quincha'. ⁹ No'j c'u ri cubi'ij chiquiwach ri winak: «Ri'in na in ta tijo'n re ri Jesús», jec'uri'la' can'an ri'in che rire; cambi'ij chiquiwach ri ángeles re ri Dios: «Katzij, wa jun na nutijo'n taj» quincha'.

¹⁰ »We c'o junok cach'a't chwij ri'in, ri in Alaxel Chiquixo'l Ticawex, ri Dios cucuy umac we cutzelej utzij. No'j china ri tzel cach'a't chirij ri Santowilaj Ruxlabixel ri Dios, ri' na cacuytaj ta umac.

¹¹ »Mixi'ij iwib echiri' wuma ri'in quixc'am bi chiquiwach raj wach re ri sinagogas o chiquiwach raj k'atal tzij y raj wach re ri tinamit; mubisoj ne ic'u'x sa' ri c'ulubal uwach qui'an chique, ¹² ma ri Santowilaj Ruxlabixel ri Dios cuk'alajisaj chiwe sa' ri chirajawaxic quibi'ij» xcha ri Jesús.

Ri rayinic re ri beyomalil

¹³ Ec'uchiri', jun chique ruq'uiyal winak xubi'ij che ri Jesús:

—Lal tijonel, bi'ij la che ri watz cuya ri takal chwe ri'in che tak ri cuxtabal quiya'om can ri kachukakaw —xcha'.

¹⁴ Ec'u ri Jesús xuc'ul uwach:

—Achi, ¿china incojoyom re in aj k'atal tzij paw'i alak cha' can'an wa jachanic? —xcha'.

¹⁵ Tec'uchiri', xubi'ij chique ri winak:

—Tape alak, lic chajij ib alak chi utz chwach ronoje rayinic, ma na e ta rubeyomalil rachi ri cuya chomilaj c'aslemal che —xcha'.

¹⁶ Ec'uchiri' xutzijoj wa jun c'ambal na'oj chique:

«C'o jun achi lic beyom yey ri rulew lic uq'uiyal molonic xuya'o. ¹⁷ Ec'u ri beyom xuch'ob rakan chiribil rib: «¿Sa' can'ano? Ma na junta chi pa canc'ol wi wu'q'uiyal molonic xin'ano.»

¹⁸ »Tec'uchiri' xubi'ij chiribil rib: «E can'an wa': Canwulij tak wa c'olibal

nu'anom re molonic y canyac jujun chic más nima'k, cha' chupa canc'ol wi ri numolonic y tak ri nubeyomalil. ¹⁹ Y cambi'ij c'u ri' chiwibil wib: Ri'in lic q'ui chi ri nubeyomalil c'oltalic, wa' cucuy re uq'uiyal junab. Ec'u wo'ora utz quinuxlanic, quinwa'ic, cantij nuya' y can'an ronoje ri cuaj ri'in."

²⁰ »No'j ri Dios xubi'ij che: "Achi, lic na jinta c'ana ana'oj. ¡Tok'o' awach! Ma e wak'ab catcamic; yey ronoje c'u rabeyomalil ac'olom, ¿china re canok?" xuchixic.

²¹ »Jec'uri'la' cuc'ulumaj juna achi we cuc'ol uq'uiyal beyomalil xa ri're, pero chwach ri Dios lic niba'» xcha ri Jesús chique ri winak.

Ri Dios quebuchajij ri ralc'o'al
(Mt. 6:25-34)

²² Tec'uchiri' xubi'ij ri Jesús chique rutijo'n:

«E uwari'che cambi'ij wa' chiwe: Mubisoj ic'u'x ric'aslem; mubisoj ne ic'u'x sa' ri quitijo y sa' rik'u' quicojo. ²³ Ma ri kac'aslemal e más c'o uwach chwa ri kawa, yey ri kacuerpo e más c'o uwach chwa ri kak'u'»*

²⁴ »Chebiwilape ri joj. Rique na quetico'naj taj, na caqui'an tane quimolonic, na jinta ne pa caquic'ol wi ri quimolonic; na ruc' ta c'u ri' ri Dios quebutzuku. ¡Mac'uwari' ri'ix, ri Dios quixuchajij! ¡Ma e más c'o iwach ri'ix chiquiwa ri tz'iquin!

²⁵ »¿C'o neba junok chiwe ri'ix curik cunajtirisaj jun chic k'ij che ruc'aslem wara che ruwachulew? Na jinta junok tob ne lic cutij uk'ij che. ²⁶ Ruma c'u ri', na jinta cutikoj we lic cubisoj ic'u'x ri cajawax chiwe.

²⁷ »Chiwilape' su'anic caq'uiy ri cotz'i'ij pa tak juyub. Wa' na cachacun taj y na caqueman ta nenare' cha' cu'an ruk'u'. Yey ri'in cambi'ij chiwe: Ri rey Salomón, tob lic c'o uchomal ruk'u' xucojo, wa' na xumaj ta c'ana ruchomalil tak ri cotz'i'ij. ²⁸ Jec'ula' we ri Dios u'anom chom che ri ak'es c'o wak'ij pa juyub yey chwe'k xa

caporox pa ak', ¿na cuya ta cami ri' ri Dios rik'u' cajawax chiwe? ¡Ri'ix lic xa jubik' ri cubulibal ic'u'x ruc' ri Dios!

²⁹ »Cambi'ij c'u chiwe ri'ix: Mubisoj ic'u'x sa' riwa y sa' rimik'ina' quitijo. Mapax ne ic'u'x che, ³⁰ ma jenela' caqui'an ri winak na queta'am ta uwach ri Dios, e cubisoj quic'u'x tak wa'. No'j ri'ix c'o jun Ikaw lic reta'am cajawax tak wa' chiwe. ³¹ Ri lic chirajawaxic chiwe e lic chixoc il che rutakanic ri Dios; yey ronoje tak c'u ri cajawaxic, xa uwi' chic caya'taj chiwe.

Ri beyomalil re chila' chicaj
(Mt. 6:19-21)

³² »Ri'ix ix nutijo'n, muxi'ij rib ic'u'x che ric'aslem, ma ri'ix tob na ix ta q'ui, ri Kakaw lic caqui'cot che cuya chiwe ri'ix quixoc chupa rutakanic y quixtakan ruc' Rire. ³³ Chic'ayij ri beyomalil c'o iwuc' cha' utz quebito' ri niba'ib. Ma we qui'an wa', e pacha' quic'ol ribeyomalil pa na jinta c'o cuc'ulumaj wi y jela' c'o cutikoj chiwe chila' chicaj. Ma e tak ri c'o chila' chicaj na cajar taj, na capoq'uir taj, yey na jinta ne elek'omab quebec che. ³⁴ Ma pa c'o wi ribeyomalil ri'ix, puwi wa' que'ec wi ic'u'x.

Chiyijba' iwib che ruc'unibal ri Kanimajawal

³⁵ »Lic chiyijba' iwib, pacha' raj chaquib quiyijbam quib chi utz y tziytal ri quicandil, ³⁶ ma coye'em ri cajaw catzelej lo pa ri nimak'ij re c'ulaniquil. Y jela' echiri' rire cac'unic y cach'aw pan chwa ri puerta, caquijakala' tan lo che. ³⁷ Nim quik'ij calaxic raj chaquib we xc'un lo ri cajaw, quebolu'rika' na quewar taj. Pakatzij wi cambi'ij chiwe, ri cajaw quebucoj chwa mexa y quebunimaj chiquijujunal. ³⁸ Lic nim quik'ij calaxic raj chaquib, tob ri cajaw xmayinic, we xc'un lo pa tiq'uil ak'ab o pa sakribal, quebolu'rika' na quewar taj.

* **12:23** Ri Dios e caya'w ri kac'aslem y ri kacuerpo; mac'uwari' cuya ri kawa y ri kak'u'.

39 Ec'u chiweta'maj wa': Juna achi rajaw ja, we ta careta'maj ri ora echiri' copon relek'om, ri na cawar ta q'uenok y na cuya ta luwar carakix ri rocho re ca'an elek' chupa. 40 Jec'ula' ri'ix chiyijba' iwib che ruc'unibal Ralaxel Chiquixo'l Ticawex, ma c'axtaj cac'unic echiri' na jinta ina'bem» xcha'.

Ri aj chac cachacun chi utz y ri aj chac na cachacun ta chi utz
(Mt. 24:45-51)

41 Ec'uchiri', ri Pedro xutz'onoj che ri Jesús:

—Kajawal, ¿xew chike ri'oj cabi'ij la wa c'ambal na'oj o chique conoje ri winak? —xcha'.

42 Ec'u ri Kanimajawal xuc'ul uwach:

«¿Chinok chiwe ri'ix e pacha' juna aj chac lic jusuc' y c'o una'oj, ya'tal puk'ab quebutzuk chupa ru'orayil conoje ri e c'o pa rocho rupatrón?

43 Lic c'u nim uk'ij ralaxic ri' ri aj chac, we xc'un lo rupatrón, colu'rika' catajin che u'anic ruchac. 44 Pakatzij wi cambi'ij chiwe: Rupatrón cu'ana takanel che rire puwi ronoje rubitak re.

45 »No'j we wa' wa jun aj chac jewa' cubi'ij pa ranima': “Ri rupatrón c'amaja' catzelej lok” y cujek c'u lic quebuch'ay raj chaquib chi achijab chi ixokib; yey ec'u rire xew cawa'ic y cak'abarc, ¿sa' nawiri' ri ca'an che?

46 Cac'un lo ri' rupatrón chupa ri k'ij y ri ora echiri' wa' wa aj chac na roye'em taj. Cuk'at c'u tzij puwi ri raj chac y lic cuya pa c'ax junam cuc' conoje ri na e ta jusuc'.

47 »Ec'u juna aj chac, we reta'am sa' ri caraj rupatrón pero na cucoj ta utzij y na cu'an ta ri bi'im che, ri' lic ca'an c'ax che. 48 No'j juna aj chac cu'an ri na utz taj yey na reta'am ta c'ut we na utz ta ri cu'ano, ri' na lic ta c'ax ca'an che. Ma china ri lic c'o ya'tal chukul, chikawach apanok lic c'o roye'em ri Dios che; yey china ri lic q'ui ya'tal puk'ab, más ne roye'em

ri Dios che chwa ri roye'em che ri jun na lic ta q'ui ri ya'tal puk'ab.

Ri jachbal quipa ri ticawex ruma ri Jesús

(Mt. 10:34-36)

49 »Pacha' ak' ri co'lnuquik'a che ruwachulew. ¡Ec'u ri canrayij ri'in ta asu cumaj ak'! 50 Lic c'u chirajawaxic quinic'ow na chupa jun unimal c'axc'obic. ¡Na quic'ow ta ri bis chinuc'u'x, c'a echiri' quinic'ow chupa wa'! 51 E chiwach ri'ix, ¿ri nuc'unic che ruwachulew cuc'am lo utzil chomal? Na e ta ri'. Ma pakatzij wi cambi'ij e cuc'am lo jachbal quipa tak ri ticawex.† 52 Chwi wo'ora y chikawach apanok we e c'o wo'obok pa juna ja, wuma ri'in c'o pa sak caquijach quipa; ma oxib quech'o'jin cuc' ca'ib y ca'ib quech'o'jin cuc' oxib. 53 Quech'o'jin chiquiwach rachi ruc' ruc'ajol, rixok ruc' ri ralit y ruchur alib ruc' ralibatz» xcha ri Jesús.

Ri winak na xquina'bej taj echiri' xc'un Rucha'o'n lo ri Dios

(Mt. 16:1-4; Mr. 8:11-13)

54 Yey xubi'ij ri Jesús chique ruq'uiyal winak:

«Echiri' quil alak ri sutz' quel lo pukajibal ri k'ij, xew quil alak y cabi'ij alak: “Cape jab” y e cu'ano. 55 Y echiri' cajum ca'n ri tew cape lo pa sur, cabi'ij alak: “Lic cu'an buc” y e cu'ano. 56 ¡Xa queb palaj alak! Carik alak uch'obic chi utz sa' ru'anom ruwa caj y ruwachulew; ¿su'chac c'u ri' na camaj tane alak usuc' ri catajin ri Dios che uc'utic chiwach alak wak'ij ora?

Kayijba' kib chwach ri Dios

(Mt. 5:25-26)

57 »¿Su'chac na cach'ob ta alak chi utz sa' ri lic usuc' chirajawaxic ca'an alak? 58 We cac'am bi la pa k'atbal tzij ruma junok ucojom mac chi'ij la, e lic utz ri ca'an la utzil chomal ruc' pa be xalok' c'amaja' copon la chwa ri aj k'atal tzij. Ma we na x'an ta la wa', copon na la chwach ri aj k'atal tzij. Y

† 12:51 Tak ri ticawex quech'o'jin chiquiwach, ma ri na quec'uluw ta re ri Cristo c'o retzelal quic'u'x chiquij ri quicojom rubi'. ‡ 12:58 “Ausiliar”: E pacha' juna policia wak'ij ora.

we xopon c'u la chwach rire, caya' bi la puk'ab ri ausiliar[‡] y rire cu'ya'a la pa cárcel. ⁵⁹ Cambi'ij c'ut, na quel ta lo la chiri' we na xtoj ta can la ronoje ri tz'ononm chi'ij la»[§] xcha ri Jesús.

13

Lic chirajawaxic wi cakatzelej katzij chwach ri Dios

¹ Chupa wa' wa k'ij e c'o jujun chiri' xquitzijoj che ri Jesús sa' ri xquic'ulumaj jujun aj Galilea, ri xecamisax ruma utzij ri takanel Pilato echiri' quetajin che uya'ic ri quikasa'n re chicop chwa ri altar pa ri Rocho Dios. Yey ri quiquiq'uel wa' wa aj Galilea xquich ca'n puwi ri quiquiq'uel ri chicop.

² Ec'u ri Jesús xuc'ul uwach:

—¿E cach'ob nawi alak, wa' wa aj Galilea xecamisaxic ma e más e aj maquib chiquiwa ri cach aj Galilea?

³ Pakatzij wi cambi'ij che alak, na e ta ri'. Yey ralak, we na catzelej ta tzij alak chwach ri Dios, e ne jun ralak casach wach alak.

⁴ »¿O sa' nawi cach'ob alak puwi ri xquic'ulumaj ri e dieciocho, ri xemic echiri' xtzak lo ri Torre re Siloé paquiwi'? ¿E cach'ob nawi alak, wa winak xemic ma c'o más quimac chiquiwa ri cach aj Jerusalem? ⁵ Pakatzij wi cambi'ij che alak, na e ta ri'. Yey ne ralak, we na catzelej ta tzij alak chwach ri Dios, e ne jun ralak casach wach alak —xcha'.

Ri c'ambal na'oj puwi ri che' re higo na jinta ujik'obalil

⁶ Xutzijoj c'u wa jun c'ambal na'oj chique:

«C'o jun achi uticom jun che' re higo chupa rutico'n. Xc'un c'u lok re colu'tzucuj ujik'obalil ri higo yey na jinta xurik che. ⁷ Xubi'ij c'u che ri chajinel re rutico'n: “Chawilape', e urox junab wa' quinc'unic co'lnutzucuj ujik'obalil wa che' re

higo, yey na jinta c'ana ujik'obalil canriko. Wo'ora chacheta bi ma ¿sa' cutikoj c'o chupa wa' wu'lew?” xcha'.

⁸ Ec'u ri chajinel xubi'ij che: “Wajaw, ya'a chi la wa junab che, ma cantij chi na uk'ij canc'ot rij y cancoj abono chuxe'. ⁹ C'axtaj cuya ujik'obalil; no'j we na xuya taj, c'a ec'uchiri' utz cachet bi” xcha'.»

Ri Jesús cucunaj jun ixok pa jun k'ij re uxlanibal

¹⁰ Pa jun k'ij re uxlanibal ri Jesús cac'utun chupa jun sinagoga. ¹¹ C'o c'u jun ixok chiri' e dieciocho lo junab ri' lic c'uyuq'uic u'anom ri rij ruma jun itzel uxlabixel, yey na utz ta ne cusuc'upij rib. ¹² Y ri Jesús echiri' xril rixok, xusiq'uij apanok y jewa' xubi'ij che:

—Ixok, lal cunutajinak chi che ri yabil c'o wi la —xcha'. ¹³ Y xuya ruk'ab puwi rixok; y chupa c'u la' la jok'otaj rixok xsuc'upitajic y xujeko cuyac uk'ij ri Dios.

¹⁴ Ec'u ri takanel re ri sinagoga lic xpe royowal chirij ri Jesús ma xcunan chupa ri k'ij re uxlanibal, y xubi'ij c'u chique ri winak:

—C'o wakib k'ij re chac; chupa wa' utz cape alak re cacunax bi alak, pero lic na ube taj cacunax alak chupa ri k'ij re uxlanibal —xcha'.

¹⁵ Ec'u ri Jesús xubi'ij:

—¡Xa queb palaj alak! Onoje ralak ¿na caquir ta neba alak ri boyex y ri buru chupa ri k'ij re uxlanibal cha' cac'am bi alak chi tijo ya'? Ca'an ne alak wa' chique yey xa e awaj. ¹⁶ Mac'uwari' takal che wi'xok cato'ic, ma rire ral'c'o'al can ri Abraham,* yey e dieciocho lo junab wa' “yututal” ruma ri Satanás. ¿Na utz ta cami ri' quesax chupa ri yabil pa ri k'ij re uxlanibal? —xcha'.

¹⁷ Echiri' xubi'ij wa' ri Jesús, lic xeq'uix conoje ri tzel quebilow re; no'j conoje ri winak lic quequic'ot

§ 12:59 Wa jun c'ambal na'oj e que'elawi lic chirajawaxic kayijba' ri kabinic kasilabic y ka'ana utzil chomal ruc' ri Dios xalok' c'a oj c'aslic y xalok' c'amaja' copon ri k'ij re ri k'atbal tzij. * 13:16 Ri aj Israel lic caquiyac uk'ij ri Abraham y caquibi'ij quikaw che, ma e nabe cati'-quimam.

ruma ri c'utubal re runimal uchuk'ab ri Dios cu'an ri Jesús.

Ri c'ambal na'oj puwi rija' re moxtasa

(Mt. 13:31-32; Mr. 4:30-32)

¹⁸ Ec'uchiri', xubi'ij tanchi ri Jesús:

«¿Sa' ruc' cajunimax wi rutakanic ri Dios? ¹⁹ Ri'in canjunimaj ruc' juna ija' re moxtasa, ri xc'am bi ruma jun achi y xtiq'ui' chupa ri werta. Ec'u ri' wa' xq'uiyic y lic xu'an bojobic; yey ri tz'iquin quexiq'ui' che ruwa caj xqui'an quisoc puwi tak ruk'ab» xcha'.

Ri c'ambal na'oj puwi ri levadura

(Mt. 13:33)

²⁰ Y xubi'ij tanchi ri Jesús:

«¿Sa' ruc' canjunimaj wi rutakanic ri Dios? ²¹ E jela' pacha' ri levadura, ma echiri' juna ixok cu'an pam, cutuc jubik' levadura xo'libal oxib pajbal harina y ri levadura cusipowirisaj upa ronoje ri k'or»† xcha'.

China tak ri quecolobetajic

(Mt. 7:13-14, 21-23)

²² Echiri' ri Jesús c'o chi be re que'ec Jerusalem, xic'ow pa tak tinamit y pa tak aldeas, e ri' cac'utunic. ²³ Y c'o c'u jun xbi'n che:

—Wajawal, ¿xa nawi jujun ri quecolobetajic? —xcha che.

Y ri Jesús xuc'ul uwach:

²⁴ «Lic chich'iquiquej iwib cha' quixoc chupa ri nutakanic che ri oquibal xa ch'uti'n uwach, ma cambi'ij chiwe: Copon na ri k'ij echiri' lic e q'ui ri cacaj queboc bi, no'j na caya'taj ta chique queboc bi.

²⁵ »Ma e cu'ana pacha' ri rajaw juna ja echiri' cu'an juna nimak'ij. Echiri' eboquinak chi conoje ri ebusiq'uim, cutz'apij lo ri puerta, y na junta chi c'u junok coquic. Jec'ula' ri' ri quic'ulumaj ri'ix, na quixoc ta chubi. Quijek c'u ri' quixch'aw apanok: «Kajaw, Kajaw, ya'a co la chike cojoc bi» quixcha'.

»Yey Rire jec'uwa' cuc'ul lo uwach chiwe: «Ri'in na weta'am taj pa ix petinak wi ri'ix» cacha chiwe.

²⁶ »Ec'uchiri', quijek ubi'xic: «Oj wa' c'u wo'kinak uc' la yey xc'utun ne la pa tak ri be re ri katinamit» quixcha che.

²⁷ »No'j Rire cubi'ij lo chiwe: «Pakatzij wi, ri'in na weta'am taj pa ix petinak wi ri'ix. Chixela chinuwach, iwonoje ri ix 'anal re ri lic itzel uwach» cacha chiwe.

²⁸ »Ec'uchiri', lic quixok'ic y cackich'ich' ruwi iwe' echiri' quebiwil ri Abraham, ri Isaac y ri Jacob cuc' conoje ri k'alajisanelab e c'o ruc' ri Kakaw pa rutakanic chila' chicaj; yey ec'u ri' ri'ix na junta pik'ab quixoc bi cuc'. ²⁹ No'j e c'o ri na e ta aj judi'ab e petinak pa relebal lo ri k'ij, putzakibal ri k'ij y pa ronoje luwar che ruwachulew, ri' queboc chwa ri mexa pa rutakanic ri Dios.

³⁰ »Chiwilape c'u ri', ma e c'o jujun chique ri na junta quiwach wara che ruwachulew, e lic cac'o'ji' quiwach chwach ri Dios chila' chicaj; yey e c'o ri lic c'o quiwach wara che ruwachulew, e cu'ana na junta quiwach chwach ri Dios chila' chicaj» xcha'.

Ri Jesús cok' puwi ri tinamit Jerusalem

(Mt. 23:37-39)

³¹ Chupa c'u wa' wa k'ij xekib jujun fariseos ruc' ri Jesús y jewa' xquibi'ij che:

—Chelubi la y oj la ma ri rey Herodes caraj cucamisaj la —xecha'.

³² Y ri Jesús xubi'ij chique:

—Oj alak y je'bi'ij alak che la' la'chi, ri e pacha' juna yac: «Wak'ij y chwe'k c'a quebenuwesaj bi ri itzel uxlabixel y can'an cunanic yey cabij c'ut canq'uis ri nuchac» cacha alak che. ³³ Pero che c'u wo'xib k'ij chirajawaxic wi cambinibej pan nube quin'ec, ma na takal ta che juna k'alajisanel cacam c'a naj che Jerusalem —xcha'.

† 13:21 Wa c'ambal na'oj puwi ri levadura e que'elawi tob rutakanic ri Dios xujek xa ruc' queb oxib pero wa' cumaj ronoje ruwachulew.

³⁴ Tec'uchiri' xubi'ij:

«¡Jerusalem, Jerusalem, ri'ix quebi-camisaj ri k'alajisanelab y quebi'an pa'bij janipa ri ebutakom lo ri Dios iwuc'! E ri'in uq'uiyal laj lic xuaj xinmol quichi' riwalc'o'al ri'ix jela' pacha' cu'an juna ati' ac' chique tak ruwi'ch echiri' cumol quichi' chuxe' tak ruxic', no'j ri'ix na xiwaj ta q'uenok.

³⁵ »Chitape c'ut, c'o jun k'ij echiri' ri iwocho ri'ix cawulix canok. Cambi'ij c'u chiwe na quiwil ta chi nuwach c'a echiri' copon na ruk'ijol quibi'ij:

Lic nim uk'ij ri jun petinak
chupa rubi' ri Dios Kajawxel *Sal.*
118:26
quixcha'.»

14

Ri Jesús cucunaj jun achi chupa jun k'ij re uxlanibal

¹ E xu'an wa' chupa jun k'ij re uxlanibal: Ri Jesús xsiq'uij ruma jun fariseo lic c'o uwach cha' que'wo'k chirocho. Y chila' e c'o jujun chique ri fariseos lic quic'ac'alem we ri Jesús cacunan pa ri k'ij re uxlanibal. ² Ma chiri' chwach Rire c'o jun achi lic yewa', wa'lijinak rucuerpo.

³ Ec'uchiri', ri Jesús xutz'onoj chique ri fariseos y raj c'utunel re ri tzijpixab, jewa' xubi'ij:

—¿Ube nawi ri ca'an cunanichupa ri k'ij re uxlanibal o na ube taj? — xcha'.

⁴ Pero rique na junta xquic'ulubej uwach.

Ec'u ri Jesús xuya ruk'ab puwi ri yewa', xucunaj y xubi'ij che utz que'ec. ⁵ Tec'uchiri' xubi'ij chique:

—¿C'o neba junok che alak, we rucawayu' o ruboyex catzak pa siwan, na que'resala' tulok tob chupa jun k'ij re uxlanibal? ¿China na ca'anaw ta wa'? —xcha'.

⁶ Ec'u rique na xquirik ta uc'ulic uwach che.

Pixabanichique ri quesiq'uij pa juna nimak'ij

⁷ Ec'u ri Jesús xrilo sa' ri caqui'an ri esiq'uim pa ri wa'im, conoje

caquimajala' quib puwi tak ri tz'ulibal que ri lic c'o quiwach. E uwari'che, xubi'ij wa c'ambal na'oj chique ri echocom:

⁸ «Echiri' casiq'uij la ruma junok pa juna nimak'ij re c'ulaniquil, na ube taj we que'tz'ula la chupa ri tz'ulibal que ri lic c'o quiwach; ma c'axtaj cac'un lo junok chocom más c'o uwach chiwach rilal. ⁹ Yey cakib c'u ri' ri rajaw ri nimak'ij uc' la y cubi'ij che'la: “Ya'a can la wa tz'ulibal che wa jun chic” cacha'. Ruma c'u la', cape ri q'uij la y que'tz'ula lo la c'a chirij.

¹⁰ »E uwari'che, ri chirajawaxic ca'an la echiri' casiq'uij la pa juna wa'im e wa': We xopon la, me'tz'ula la chupa ri tz'ulibal que ri lic c'o quiwach. Jela' echiri' cac'un lo ri siq'uijom e la, jewa' cubi'ij che'la: “Wamigo, je'tz'ula la más chwach” cacha'. Jec'ula' catac'abax k'ij la chiquiwach ri e c'o chwach ri mexa uc' la. ¹¹ Ma china ri cu'an lic nim che rib, ri Dios cukasaj uwa uk'ij; no'j china ri cu'an ch'uti'n che rib, ri Dios cuyac uk'ij» xcha ri Jesús.

Ri na quebelaj ta che ri siq'uibal cu'an ri Kakaw

¹² Tec'uchiri', xubi'ij che ri fariseo, ri siq'uijom re pa ri wa'im:

—Echiri' ca'an la juna wa'im, na xew ta quesiq'uij la ri amigos la, ri e atz-chak' la, ri e c'o chux che'la y ri beyomab e c'o lo chi nakaj la. Ma we ca'an la wa', rique caqui'an uc'axel che'la, caquisiq'uij la pa juna wa'im y jec'uri'la' asu cac'ul la ri tzelebal uwach che ri x'an la.

¹³ »E uwari'che, ri chirajawaxic ca'an la echiri' ca'an la juna nimak'ij, e chebesiq'uij la ri niba'ib, ri t'um cakan quik'ab, ri e sic y ri e potz'. ¹⁴ Jec'uri'la' nim k'ij alaxic la, ma rique na caquich'ij ta uya'ic uc'axel che'la; pero e cac'ul la ri rajil uc'axel echiri' quec'astaj lo ri lic e jusuc' chwach ri Dios —xcha ri Jesús.

¹⁵ Echiri' xuta wa' jun chique ri etz'ul chwa ri mexa, jewa' xubi'ij che: «¡Nim uk'ij ralaxic china ri cawa' pa

ri nimalaj nimabal cuya ri Dios pa rutakanic!» xcha'.

¹⁶ Ec'u ri Jesús xubi'ij che:

«Julaj c'o jun achi xuch'obo cuya jun nimalaj nimabal y lic e q'ui ri xebusiq'uij. ¹⁷ Ec'uchiri' xopon ru orayil ri nimabal, xutak bi jun raj chac cha' cubi'ij chique ri echocom chic: “Peta c'u alak ma yijbital chi ronoje” cacha'.

¹⁸ »No'j chiquijujunal xquijek caquitz'onoj cuybal quimac ruma na quebec taj. Ri nabe xubi'ij: “Xinlok' co juch'akap wulew y lic chirajawaxic qui'nwila'. Chabi'ij co che rapatrón chucuyu numac ma na quin'ec taj” xcha'.

¹⁹ »Ri jun chic xubi'ij: “Xinlok' co wo'ob yunta boyexab y ec'u wa' qui'ntija quik'ij pa chac. Chabi'ij co che rapatrón chucuyu numac ma na quin'ec taj” xcha'.

²⁰ »Yey jun chic xubi'ij: “Ri'in lic c'ac' xinc'uli'ic; y ruma la' na quin'ec taj” xcha'.

²¹ »Echiri' xtzelej lo raj chac, xubi'ij ronoje wa' che rupatrón. Ec'u rupatrón lic xpe royowal y xubi'ij che ri raj chac: “Chok'otan ri', jat pa tak c'aybal y pa tak be re ri tinamit y chebac'ama lo ri e niba'ib, ri t'um cakan quik'ab, ri e potz' y ri e sic” xcha'.

²² »Xe'ec c'u raj chac. Y echiri' xtzelej lok, xubi'ij che rupatrón: “Wajaw, ya xin'an ronoje ri xintak la che; na ruc' ta c'u ri', lic c'a c'o luwar chwa tak ri mexa” xcha'.

²³ »Xubi'ij tanchi c'u rachi che ri raj chac: “Chatelubi tza'm tinamit y jat pa tak nimabe y pa tak cuxcul be. Chamina uwach chique ri winak cha' quepetic y jela' canoj uwa tak ri mexa nuyijbam chic re wa nimabal. ²⁴ Yey pakatzij wi cambi'ij chawe: Na jinta junok chique ri xenusiq'uij nabe, cutij re ri nimabal nuyijbam” xcha'.»

Ri c'ax caric'owibej ri caterej chirij ri Jesús

²⁵ Echiri' ri Jesús c'o chi be, uq'uiyal winak eteran chirij. Ec'u Rire xtzu'n chirij y jewa' xubi'ij chique:

²⁶ «We c'o junok caraj caterej lo chwij, lic chirajawaxic che más c'ax quinuna' ri'in chiquiwa conoje, ma we e más c'ax quebuna' ruchu-ukaw, ri rixokil, ri ralc'o'al, ri ratz-uchak' y más ne c'ax cuna' rib rire chinuwa ri'in, ri' na takal ta che cu'an nutijo'n.

²⁷ E uwari'che, china ri na cuya ta ranima' cutij c'ax ruma ri caterej lo chwij,* ri' na takal ta che cu'an nutijo'n.

²⁸ »Ma we c'o junok caraj cu'an nutijo'n, lic chuch'obo na rakan we cucuy ri c'axc'obic cape puwi' ruma ri caterej lo chwij.

»E jela' pacha' ri ca'anic echiri' cayac juna nimalaj ja. Ma ¿c'o neba junok che alak na cuch'ob ta rakan chi utz nabe na puwi ri cajawax che cha' cuyac ri ja y carajilaj na c'u ri' janipa ri cumaj bi cha' careta'maj we xakare' cuch'ij uyaquic ri ja? ²⁹ Ma we na cu'an ta wa', echiri' uticom chi c'u ruparakan ri ja, cuchakaba' u'aniquil ruma na jinta chi puak re cuq'uiso; yey conoje c'u ri' ri quebilow re, caquijek caquich'amij, ³⁰ caquibi'ij: “Wa'chi xujek uyaquic wa ja, yey na xuq'uis ta chic” quecha'.

³¹ »Jec'ula' ¿sa' nawi cu'an juna rey xa e lajuj mil rusoldados chwa juna chic rey petinak pa ch'a'oj chirij ruc' veinte mil soldados? Ri cu'ano e nabe na cuch'ob na rakan chi utz we xakare' cuch'ij uchuk'ab ri jun chic rey e c'o más usoldados. ³² Y we cuch'obo na cuch'ij taj, ri cu'ano e xalok' c'a naj c'o wi lo ri jun chic rey, quebutak c'u bi achijab cha' que'qui'ana ri utzil chomal ruc'.† ³³ Jec'uri'la', we c'o junok che alak caraj caterej lo chwij, lic chirajawaxic che cuya can ronoje ri c'o ruc';‡ ma we na cu'an ta wa', na takal ta che cu'an nutijo'n.

* **14:27** Pa ri ch'a'tem griego cubi'ij “ri na ruc'a'am ta rucruz”. † **14:32** Ri'oj na cakach'ij ta c'ana ruchuk'ab ri Dios, e uwari'che ka'ana utzil chomal ruc' Rire wo'ora, xalok' c'amaja' coje'ela chwach.

‡ **14:33** Wa' e que'elawi ronoje ri c'o kuc' cakaya puk'ab ri Kanimajawal.

Ri c'ambal na'oj puwi ratz'am
(Mt. 5:13; Mr. 9:50)

³⁴ »E ratz'am lic cajawaxic; no'j we xsach rutzayul, ¿su'anic tanchi ca'an tza che? ³⁵ Ma na curik ta uchac che rulew y na utz ta ne ca'an abono ruc'. Ec'u ri ca'an che, e catix bi. § China c'u ri c'o utanibal che utayic, ¡chuta c'u ri'!» xcha ri Jesús.

15

Ri c'ambal na'oj puwi rachi cutzucuj rubexex sachinak
(Mt. 18:10-14)

¹ Conoje raj tz'onol puak re tojoníc* y tak raj maquib quekib ruc' ri Jesús cha' caquita ruch'a'tem. ² Pero ri fariseos y raj c'utunel re ri tzijpixab lic caquich'a'tibej, jewa' caquibi'ij: «Wa'chi quebuc'ul raj maquib y cawa' cuc'» quecha'.

³ E uwari'che ri Jesús xutzijoj wa jun c'ambal na'oj chique, jewa' xubi'ij:

⁴ «¿Sa' nawí cu'an junok che alak we e c'o jun ciento ubexex yey casach c'u junok chique? ¿Na quebuc'ol ta neba can ri' ri noventa y nueve pa ri quiluwar y que'ec c'u che utzucuxic ri jun xsach canok? Yey na cuxlan ta che utzucuxic c'a echiri' cu'rika lok. ⁵ Ec'uchiri' curiko, lic caqui'cotíc cuya lo chirij ukul. ⁶ Y echiri' copon chirocho, cumol quichi' ri ramigos y ri ratz-uchak', y jewa' cubi'ij chique: “Chixqui'cota wuc' ma xinrik ri nubexex sachinak” cacha'.

⁷ »Cambí'ij c'u ri'in che alak: Más ne c'o qui'cotemal chila' chicaj ruma juna aj mac cutzelej utzij chwach ri Dios, chiquiwa noventa y nueve jusuc' e c'olic y na cajawax taj cacuy-taj quimac.

Ri c'ambal na'oj puwi rixok cutzucuj rusakil puak

⁸ »We e la' juna ixok c'o lajúj sakil puak ruc' yey cutzak c'u junok, ¿sa' ri cu'ano? Cutzij ak' y na'l cumes rupa

ja, cutzucuj c'u coq'uíl yey na cuxlan ta che utzucuxic c'a echiri' cu'rika lok. ⁹ Y ec'uchiri' urikom chic, cumol quichi' ri ramigos y ri ratz-uchak' y cubi'ij c'u chique: “Chixqui'cota wuc' ma xinrik wa sakil puak nutzakom” cacha'. ¹⁰ Cambí'ij c'u ri'in che alak: Jela' ri qui'cotemal que ri ángeles chwach ri Dios echiri' juna aj mac cutzelej utzij» xcha ri Jesús.

Ri c'ambal na'oj puwi jun ala sachinak

¹¹ Xutzijoj c'u wa jun c'ambal na'oj chique, jewa' xubi'ij:

«C'o jun achi e c'o ca'ib uc'ajol. ¹² Jun k'ij ri chak'ixel xubi'ij che rukaw: “Tat, jacha la upa ri beyomalil la y asu ya'a la janipa ri takal chwe ri'in” xcha che rukaw. Y rukaw e xu'ano. Xujach c'u rubeyomalil, xuya ri takal che ruc'ajol atzixel y ri takal che ri chak'ixel.

¹³ »C'amaja' c'u naj ujachic upa, rala chak'ixel xuc'ayij ronoje ri xya' che, xumol bi uchi' ri puak y xe'ec naj chupa jun chic tinamit. Chila' c'u ri' xutz'ila' ronoje rubeyomalil, ma xu'an ruc' ri puak ronoje ri xraj rire. ¹⁴ Ec'uchiri' xuq'uis ronoje rura-jil, xpe jun nimalaj numic chupa la' la tinamit pa c'o wi. Y xujek lic cutij c'ax.

¹⁵ »Xe'ec c'ut che utzucuxic uchac ruc' jun achi aj chila'. Yey rachi xutak bi pa juyub che quichajixic uq'uiyal ak. ¹⁶ Ec'u rala xujek lic canumic, curayij uwach tob ne e ri quecha' ri ak, pero na jinta junok caya'w re che.

¹⁷ »Tec'uchiri', xc'un runa'oj y chiribil rib xuch'ob rakan: “Chila' chirocho ri nukaw lic c'o caquitij ruq'uiyal mocom; yey ri'in wara quincam che numic. ¹⁸ Ec'u wo'ora quintzelej chirocho ri nukaw y jewa' cambi'ij che: Tat, in macuninac chwach ri Dios y chiwach rilal. ¹⁹ Na takal ta chic cabi'x chwe in c'ajol la. 'Ana la chwe pacha' xa in chi jun mocom la” xcha chiribil rib. ²⁰ Y ec'u xu'ano. Xumaj bi ube chirocho rukaw.

§ 14:35 We ratz'am xsach rutzayul, na jinta chi uchac. Jec'ula', na jinta cutikoj we junok cubi'ij e utijo'n ri Jesús yey na cuya ta ranima' caric'owibej c'ax ruma Rire. * 15:1 “Raj tz'onol puak re tojoníc”: Quil “cobrador de impuestos” pa vocabulario.

»Ec'u rukaw, echiri' xril pana ruc'ajol chinimanaj, lic xjuch' ca'n pa ranima'. Lic c'u ri' canic xe'ec y xu'c'ulu apanok. Xulak'apuj y xutz'ub uchi'.

²¹ »Y rala xubi'ij che rukaw: “Nukaw, in macuninak chwach ri Dios y chiwach rilal. Na takal ta chic cabi'x chwe in c'ajol la” xcha'.

²² »Pero rukaw xubi'ij chique ri raj chaquib: “Ji'wesala' lo ri c'ul más chom y chiwika'. Chicojo juna mapak'ab che ruwi uk'ab y uxajab che ri rakan. ²³ Yey ji'c'ama lo ri mek' lic ti'o'jirisam y chicamisaj. Katija c'u ri', chojq'ic'otok y ka'ana nimak'ij, ²⁴ ma wa nuc'ajol e junam ruc' caminak chic yey wo'ora xc'astaj lok. Rire sachinak chic pero xrikitajic” xcha chique. Y xquijeko lic quequi'cotic.

²⁵ »Ec'u ruc'ajol atzixel benak pa juyub; yey echiri' xc'un lo chunakaj ri ja, xuta ri música lic cat'ikowic y ri quexajaw pa ri nimak'ij. ²⁶ Xusiq'uij c'u pan jun chique raj chaquib y xutz'onoj che sa' ri catajinic.

²⁷ »Raj chac xubi'ij che: “Xc'un ri chak' la. Ruma c'u la', ri kaw la lic xqui'cot che ma utz uwach xc'unic, na jinta c'o xuc'ulumaj. E uwari'che, xutak ucamisaxic ri mek' ti'o'jirisam cha' caka'an nimak'ij” xcha che.

²⁸ »Ec'u ri atzixel lic xpe royowal y na xraj taj coc bi. Xel na c'u lo rukaw y lic xelaj che cha' coc bi. ²⁹ No'j rire xuc'ul uwach, jewa' xubi'ij che rukaw: “Rilal eta'am la janipa lo junab wa' in chacuninak uc' la y na nupalajim ta tzij la julajok. Na ruc' ta c'u ri', na ya'om tane la chwe tob xa juna ralco nucaprox cha' can'an nimak'ij y quinqu'ic'ot cuc' ri wamigos. ³⁰ Yey ec'u wo'ora xc'un wa jun c'ajol la, ri xa xu'tz'ila' lo ri puak la cuc' ixokib na chom ta quibinic; na ruc' ta c'u ri', ruma rire, xtak la ucamisaxic ri mek' ti'o'jirisam” xcha che.

³¹ »Ec'u rukaw xubi'ij che: “Nuc'ajol, ri'at ronoje k'ij at c'o wuc', yey rubitak we, ronoje awe'at chic.

³² No'j wo'ora lic chirajawaxic wi caka'an nimak'ij y cojq'ic'otic, ma

wa'chak' e junam ruc' caminak chic yey wo'ora xc'astaj lok. Rire sachinak chic pero xrikitajic” xcha'.»

16

Ruchapabexic ri kabeyomalil

¹ Ec'u ri Jesús xutzizoj wa' chique rutijo'n:

«C'o jun achi beyom y rire c'o jun raj chac chajinel re ronoje rubitak re. Xopon c'u ubi'xiquil che ri beyom, ri raj chac catajin bi che uq'uisic rube-yomalil. ² Ec'u ri beyom xusiq'uij ri raj chac y jewa' xubi'ij che: “¿Sa' wa' wa canta chawe? Ma xbi'x chwe, ri'at e catz'ila' rubitak we. Ruma c'u ri', wo'ora na at ta chi chajinel chwi rubitak we, pero chaya'a can chwe chuchola'j tz'ibital chwa wuj sa' ri xa'an ruc' tak ri nuya'om pak'ab” xcha'.

³ »Ewi ri raj chac xuch'ob rakan: “¿Sa' ri can'an wo'ora? Ma ri wajaw caresaj ri nuchac chwe. Yey ri'in na cancuy taj quinchacun pa juyub y quinq'uij che cantz'onoj limoxna. ⁴ ¡Ah! Weta'am chic sa' ri can'ano cha' e c'o wamigos quec'uluw we'in chicocho echiri' na jinta chi nuchac” xcha pa ranima'.

⁵ »Xebusiq'uij c'u chiquijujunal ri c'o quic'as ruc' ri rajaw. Xutz'onoj che ri nabe: “¿Janipa rac'as ruc' ri wajaw?” xcha che.

⁶ »Y raj c'as xuc'ul uwach: “Nuc'as jun ciento tena'x aceite” xcha che.

»Y raj chac xubi'ij che: “Ri' ruwujil rac'as. Chok'otan chat-tz'ulok, chayoyo ri jun ciento y chacojo xa nic'aj ciento chic” xcha'.

⁷ »Tec'uchiri', xutz'onoj che jun chic: “Y ri'at, ¿janipa rac'as?” xcha'.

»Y raj c'as xubi'ij: “Nuc'as jun ciento quintal trigo” xcha'.

»Y raj chac xubi'ij che: “Ri' ruwujil rac'as. Chayoyo ri jun ciento y chacojo xa ochenta quintal chic” xcha'.

⁸ »Ec'u ri rajaw, echiri' xreta'maj sa' ri xu'an ri raj chac, jewa' xubi'ij: “¡Ja! ¡Lic c'o una'oj wa jun achi, tob na jusuc' ta ri u'anom!” xcha'.»

Xubi'ij c'u ri Jesús chique rutijo'n:

«Pakatzij wi ri winak na e ta jusuc', más c'o quina'oj che uchapabexic rubitak que, chiquiwa ri e c'o pa ri K'ijsak. ⁹ E uwari'che cambi'ij chiwe: Chichapabej chi utz ri puak y rubitak iwe y ruc' wa' chebito'o ri niba'ib y jec'ula' rique quebu'ana iwamigos. Ma echiri' copon ri k'ij na jinta chi puak iwuc', quixc'ul na chila' chicaj pa caya'i' wi chiwe ri c'aslemal na jinta utakexic.

¹⁰ »E junok jusuc' uchapabexic cu'an ri xa jubik' ya'tal puk'ab, jec'uri'la' cu'ano we xya'i' q'ui puk'ab. No'j we na jusuc' ta uchapabexic cu'an ri xa jubik' ya'tal puk'ab, jec'uri'la' we xya'i' q'ui puk'ab, na jusuc' ta ri cu'an ruc'.

¹¹ Ec'u ri' ri'ix, we na jusuc' ta uchapabexic i'anom ri beyomalil xa re ruwachulew, ¿china c'u caya'w ri' pik'ab ri sakil beyomalil re chila' chicaj? Na jinta junok. ¹² Yey we e la' na jusuc' ta uchapabexic i'anom ri ya'om pik'ab xa pa chak'i'm, ¿china c'u ri' caraj cuya beyomalil chiwe? Na jinta junok.

¹³ »Lic c'ayew we juna aj chac e ca'ib ri rajaw. Ma laj tzel caril ri jun yey c'ax cuna' ri jun chic; o laj cuyac uk'ij ri jun yey cuc'ak bi uk'ij ri jun chic. Ruma c'u la', na utz taj we junok cuya rib che cunimaj ri Dios yey cuya rib che utzucuxic ri beyomalil re ruwachulew» xcha ri Jesús.

¹⁴ Echiri' xquita wa' ri fariseos, ri lic que'ec quic'u'x ruc' ri puak, xa xquitze'ej ri cubi'ij ri Jesús.

¹⁵ Ec'u Rire xubi'ij chique:

«Ralak fariseos, lic ca'an chi ibil ib alak pacha' lic alak jusuc' chiquiwach ri winak, pero ri Dios reta'am sa' ri c'o pa anima' alak. Ma ronoje tak ri lic yacom uk'ij cuma ri winak, wa' lic tzel quilitaj ruma ri Dios.

Ri Tzij Pixab y rutakanic ri Dios

¹⁶ »Ri k'alajisanelab y ri Moisés quitz'ibam chi lo chupa ri Tzij Pixab chwi rutakanic ri Dios cac'un na; yey

ruc' c'u ri Juan xjeki' wi utzijoxic ruc'unibal rutakanic ri Dios, y conoje c'u ri winak lic caquitij uk'ij quebec chupa wa'. ¹⁷ Na ruc' ta c'u ri', lic c'o uwach wa Tzij Pixab tz'ibital canok, ma e ne más c'ayew cajalc'atix jubik'ok che wa' chwa ri casach uwach ruwa caj y ruwachulew.

Ri Jesús cac'utun chwi ri jachbal ib (Mt. 5:31-32; 19:1-12; Mr. 10:1-12)

¹⁸ »China junok cuya ruwujil re jachbal ib che ri rixokil yey cac'uli' tanchi ruc' juna chic ixok, ri' camacun chirij ri c'ulaniquil. Yey china ri cac'uli' ruc' rixok jachom canok, ri' jenela' camacun chirij ri c'ulaniquil.

Ri beyom y ri Lázaro

¹⁹ »C'o jun achi lic beyom, e tak ruk'u' cucojo 'anatal ruc' c'ul morato* y ruc' c'ul lino rubi', yey wa' lic q'ui rajil. Rire ronoje k'ij cu'an nimak nimanic pa rocho. ²⁰ Y chunakaj c'u ri puerta catz'uyi' jun niba' Lázaro rubi' yey wa' lic cak'olol rij che ch'a'c. ²¹ Ec'u wa niba' lic curayij pan uwach ri kax catzak chuxe' rumexa ri beyom; yey quec'un tak ne lo ri tz'i' y caquirik'ira' uwach ruc'ax cak'ololic.

²² »Xopon c'u jun k'ij xcam ri niba' y xc'am bi cuma ri ángeles y xya' c'u putzal ri Abraham. Tec'uchiri', xcam ri beyom y xmukic.

²³ »Ec'uchiri' c'o chi pa c'ax ri beyom chupa ri luwar que ri ecaminak, chinimanaj xril pan ri Abraham ruc' ri Lázaro putzal. ²⁴ Ec'u ri beyom xsiq'uin apanok, jewa' xubi'ij: «Nukaw Abraham,† chinjuch' ca'n co che'la, taka lo la ri Lázaro cha' cumu' ruwi uk'ab pa ya' re colu'jorij ri wak', ma lic c'ax in c'o chupa wa ak'» xcha che.

²⁵ »No'j ri Abraham xubi'ij pan che: «At wal, c'una chac'u'x echiri' at c'as che ruwachulew, lic xac'ul janipa ri xarayij; no'j ri Lázaro lic c'ax ri xuc'ul rire che ruc'aslem che ruwachulew. Ec'u wo'ora rire lic utz u'anom wara,

* **16:19** «Morato»: Quil «púrpura» pa vocabulario. y caquibi'ij quikaw che, ma e nabe quimam.

† **16:24** Ri aj Israel lic caquiyac uk'ij ri Abraham

no'j ri'at at c'o pa ri c'ax.† 26 Yey chikaxo'l ri'oj y ri'at c'o jun nimalaj siwan. Ruma c'u wa', ri e c'o wara na utz taj quek'ax pan iwuc'; y ri e c'o iwuc', na utz taj quek'ax lo wara" xcha ri Abraham.

27 »Xubi'ij c'u ri beyom che: "Cantz'onoj co che'la, nukaw Abraham, taka bi la ri Lázaro chirocho ri nukaw chwachulew, 28 ma chila' e c'o can wo'ob nuchak'. Taka c'u bi la ri Lázaro cha' quebu'pixabaj y jela' na quepe ta rique chupa wa luwar re c'ax pa wa in c'o wi ri'in" xcha'.

29 »Y ri Abraham xubi'ij che: "C'o chi paquik'ab rique ri Tzij Pixab tz'ibital can cuma ri Moisés y ri k'alajisanelab. ¡Ec'u quita que ri'!" xcha'.

30 »Ec'u ri beyom xubi'ij che: "Nukaw Abraham, rique na quebec ta il che wa'. Pero we ta e la' c'o junok c'astajinak bi chiquixo'l ri ecaminak yey cawinakir chiquiwach, ri' caquitzelej na quitzij chwach ri Dios" xcha'.

31 »Ec'uchiri' xubi'ij ri Abraham che: "We rique na quebec ta il che ri quitz'ibam can ri Moisés y ri k'alajisanelab, na caquijalc'atij ta ri quibinic quisilabic tob ne cawinakir chiquiwach junok c'astajinak bi chiquixo'l ri ecaminak" xcha ri Abraham.»

17

Ri k'atbal tzij re ri Dios c'o paquiwí ri caquimin jun chic pa mac

(Mt. 18:6-7, 21-22; Mr. 9:42)

1 Ri Jesús xubi'ij chique rutijo'n: «Che ruwachulew lic c'o tzakibal pa mac, pero ¡lic tok'o' c'u uwach ri cumin junok chic chupa ri na utz taj, ma e cape ri k'atbal tzij re ri Dios puwi'! 2 Ma e ne más utz cuya ri catzayabax bi pukul juna nimalaj ca' re que'em y cac'ak c'u bi chupa ri mar, chwa ri cumin junok pacha' wa ch'uti'k* chupa ri na utz taj.

† 16:25 Wa jun versículo na e ta que'elawi conoje ri beyomab quebec pa c'ax y conoje ri niba'ib quecolobetajic. Ma ri Abraham mismo e jun achi lic beyom y rire xcolobetajic. * 17:2 "Ch'uti'k": Wa' e cach'a't paquiwí ri na junta quichuk'ab, na junta quiwach o ri c'ac' xcubi' quic'u'x ruc' ri Jesús.

Pixabanic puwi ri cuybal mac

3 »Lic chiwila c'u iwib ri'ix. Ma we juna awatz-achak' cu'an ri na utz taj chawe, chach'a'bej upa. Y we xutzelej utzij chawach, chacuyu umac. 4 Tob ne cu'an ri na utz taj chawe wukub laj chupa ri jun k'ij y wukub laj colu'tzelej utzij chawach, chacuyu umac» xcha ri Jesús.

5 Ec'uchiri' xquibi'ij ri cablajuj e utako'n che:

—Nimarisaj la ri cubulibal kac'u'x —xecha'.

6 Y ri Kanimajawal Jesucristo jewa' xubi'ij chique:

—We ta ri cubulibal ic'u'x caq'uiyic jela' pacha' caq'uiy rija' re moxtasa, utz ne ri' quibi'ij che wa jun che': "Chumich'a bi rib wara y chutica rib chupa ri mar," y e cu'ana' —xcha'.

Mi'an nim che iwib ruma quixchacun pa ruchac ri Dios

7 Ec'u ri Jesús xubi'ij:

«We e la' junok chiwe c'o juna raj chac cachacun pa abixbal o quebuchajij chicop, yey echiri' catzelej lo pa juyub, ¿quibi'ij nawi che: "Chato-cok, chat-tz'ula chwa ri mexa"? 8 ¡Na e ta qui'ano! Ri quibi'ij che e wa': "Chajeka uyijbaxic ri wa'im y chayijba' awib cha' caya lo ri nuwa chwa ri mexa. Ec'uchiri' in wo'kinak chi ri'in, c'a tec'uchiri' catwa' ri'at" quixcha'. 9 ¿Cutioxij nawi ri patrón che ri raj chac ruma xu'an ri xutak che? Na cutioxij taj.

10 Jec'ula' ri'ix, echiri' i'anom chi ronoje ri ixtakom che u'anic ruma ri Dios, jewa' chibi'ij: "Ri'oj xa oj momcom, na takal ta co chike cayac kak'ij ma xew ka'anom ri ubi'im ri Dios chike" quixcha'.»

Na e ta q'ui ri quetioxin che ri Kakaw

11 Echiri' ri Jesús c'o chi be re que'ec Jerusalem, catajin ric'owic pa ri be, ri cujach upa ri luwar re Samaria ruc' ri luwar re Galilea. 12 Echiri' catajin

roquic chupa jun aldea, lajuj achijab c'o ri yabil lepra chique xebel lo che uc'ulic yey chinimanaj xetaq'ui' wi lo che ri Jesús.[†] ¹³ Xquijek c'u que-siq'uin che, jewa' caquibi'ij:

—¡Jesús, lal tijonel, choj-juch' ca'n co che'la! —quecha'.

¹⁴ Ec'uchiri' xeril pan ri Jesús, jewa' xubi'ij chique:

—Oj alak, je'c'utu ib alak chiqui-wach raj chacunel pa Rocho Dios[‡] —xcha chique.

Xebec c'ut, y echiri' quetajin chi be, xecunutaj che ri quiyabil.

¹⁵ C'o c'u jun chique, echiri' xrilo cunutajinak chic, xtzelej lok y xujeko casiq'uinic, lic cuyac uk'ij ri Dios.

¹⁶ Xuxucuba' c'u rib xe'rakan uk'ab ri Jesús, xukasaj rupalaj c'a chu'lew y lic catioxin chwach, yey wa' wa'chi aj Samaria.

¹⁷ Ec'u ri Jesús jewa' xubi'ij:

—¿Na e ta neba lajuj ri xecunuta-jic? Yey ri belejeb chic, ¿pa e c'o wi?

¹⁸ ¿Su'chac na xetzelej ta lo rique cha' caquiyac uk'ij ri Dios? Ma xew xtzelej lo wa jun achi yey rire na aj tane Israel —xcha'.

¹⁹ Xubi'ij c'u che rachi:

—Chatyactajok y chamaja bi abe. Ma ruma ri cubulibal ac'u'x wuc', xatcolobetaj che ri yabil —xcha'.

Ruc'unibal Ralaxel Chiquixo'l Ticawex

(Mt. 24:23-28, 36-41)

²⁰ Ri fariseos xquitz'onoj che ri Jesús:

—¿Jampala' cac'un rutakanic ri Dios che ruwachulew? —xecha'.

Y ri Jesús xuc'ul uwach:

—Ri jekebal rutakanic ri Dios na jinta c'utubal re quilitajic. ²¹ Na jinta ne junok cubi'ij: “¡Ri' c'o wara!” o “¡Le' c'olic!” Ma tape alak: Rutakanic ri Dios c'o chi chixo'l alak —xcha chique.

²² Ec'uchiri' ri Jesús xubi'ij tanchi chique rutijo'n:

«Copon c'u ri k'ij echiri' lic quiwaj quiwil tob ne xa juna k'ij che ruk'ijol Ralaxel Chiquixo'l Ticawex echiri' catakan che ruwachulew; pero na quiwil taj. ²³ Cu'ana c'u ri' e c'o caquibi'ij chiwe: “¡Ri' c'o wara!” o “¡Le' c'olic!” Pero ri'ix mix'ec, na quebiternabej ta nenare'. ²⁴ Ma echiri' cac'un Ralaxel Chiquixo'l Ticawex, conoje caquil ruc'unibal jela' pacha' cu'ano echiri' cayoc' ca'n ruxe' caj y ruwonibal wa' cuwonisaj ronoje.

²⁵ Pero lic c'u chirajawaxic nabe na cutij ri c'ax y lic cac'ak bi uk'ij cuma ri winak re wak'ij ora.

²⁶ »Ma jela' pacha' ri xu'an chupa tak ri k'ij re ri Noé, jela' cu'ana pa ruc'unibal Ralaxel Chiquixo'l Ticawex. ²⁷ Ma conoje ri winak caquitij quiwa, caquitij quiya', quec'uli'ic y quequiya ri calc'o'al pa c'ulaniquil. Ec'u quetajin ri' che u'aniquil, echiri' xopon ruk'ijol xoc bi ri Noé chupa ri nimalaj barco; c'a tec'uchiri' xpe ri unimal jab y jela' xusach quiwach conoje.

²⁸ Jec'uri'la' xu'an ojertan chupa tak ri k'ij re ri Lot: tak ri winak caquitij quiwa, caquitij quiya', quelok'owic, quec'ayinic, quetico'najic y caquiyac cocho. ²⁹ Yey chupa c'u ri k'ij echiri' xel bi ri Lot chupa ri tinamit Sodoma, xpe lo ak' chicaj cajinow ruc' azufre[☆] y xecam conoje ri e c'o chupa ri tinamit. ³⁰ Jec'uri'la' cu'ana pa ruk'ijol echiri' cak'alajin uwach Ralaxel Chiquixo'l Ticawex, ma tak ri winak na cacoy'ej ta ruc'unibal.

³¹ »Chupa c'u ri' la k'ij, china ri c'o lo chwi ri rocho, makaj lo che uc'amic ubitak re pa ja; y china ri c'o pa juyub, matzelej lo pa ri tinamit. ³² C'una chic'u'x ri'ix sa' ri xuc'ulumaj ri rixokil ri Lot.[☆] ³³ China ri lic cutij ri' che na cuya ta ranima' ruc'aslem, ri' e

[†] 17:12 Jewa' xqui'ano ma chupa ri Tzij Pixab cubi'ij na utz taj cakib junok c'o lepra che ruc' junok na jinta wa yabil che. [‡] 17:14 Ri Tzij Pixab re ri Moisés cubi'ij we junok na jinta chi lepra che, chirajawaxic cuc'utu rib chwach jun aj chacunel pa Rocho Dios cha' rire cubi'ij we utz chic que'c'ola chiquixo'l ri ratz-uchak'. Lv. 14:1-32 [☆] 17:29 Gn. 19:24-25; Ap. 14:10 [☆] 17:32 Gn. 19:26

cujam ri chomilaj uc'aslemal chwach ri Dios; no'j china ri cuya ranima' ruc'aslem wuma ri'in, ri' e curik ri chomilaj uc'aslemal chwach ri Dios.

³⁴ »Pakatzij wi cambi'ij chiwe: Chupa la' la'k'ab c'o cu'ana wi e c'o ca'ibok quewar junam; jun cac'am bi y ri jun chic caya'i' canok. ³⁵ Olaje c'o ca'ib ixokib junam queque'nic; jun cac'am bi y ri jun chic caya'i' canok. ³⁶ Pa e c'o wi ca'ibok chwa juyub; jun cac'am bi y ri jun chic caya'i' canok» xcha ri Jesús.

³⁷ Ec'uchiri' rutijo'n xquic'ul uwach, jewa' xquibi'ij che:

—Kajawal, ¿pachawi cu'ana wi wa'? —xecha'.

Y ri Jesús xubi'ij chique:

—Lic cak'alajinic pa cu'ana wi, jela' pacha' cak'alajinic pa c'o wi juna caminak, ma puwi wa' caquimol wi quib tak ri c'uch§ —xcha'.

18

Ri c'ambal na'oj puwi jun ixok malca'n y jun aj k'atal tzij

¹ Ec'u ri Jesús xutzijoj wa jun c'ambal na'oj cha' cuc'ut chique rutijo'n ri lic chirajawaxic wi na cacok'otaj taj caqui'an orar chwach ri Dios y na capax tane quic'u'x che roy'exic ri c'ulubal uwach. ² Jewa' xubi'ij chique:

«Chupa jun tinamit c'o jun aj k'atal tzij na cuxi'ij ta rib chwach ri Dios y na cuxi'ij ta rib chwach juna achi. ³ C'o c'u jun ixok malca'n chupa wa tinamit, ronoje k'ij cac'un chwach raj k'atal tzij y cubi'ij che: “K'ata la tzij puwi jun ticawex cach'o'jin chwij” cacha che.

⁴ »Ec'u raj k'atal tzij lic naj e ri na xraj taj cu'an ri cutz'onoj wi'xok. Tec'uchiri', xubi'ij pa ranima': “Tob na canxi'ij ta wib chwach ri Dios y na canxi'ij ta wib chwach juna achi, ⁵ can'an na c'u wa k'atbal tzij cutz'onoj wi'xok malca'n. Ma we na canto' taj, xaki quino'luch'ich'a' yey

wa' na cancuy ta chic” xcha raj k'atal tzij.»

⁶ Ec'uchiri', ri Kanimajawal xubi'ij chique rutijo'n:

«Xita c'u ri' sa' ri xubi'ij wa aj k'atal tzij na utz ta uc'u'x. Xu'an c'u ri xutz'onoj rixok che ma rire na xrok'otaj ta utz'onoxic.

⁷ »We juna achi na utz ta uc'u'x cu'an wa', jmac'uwari' ri Dios cu'an ri usuc' y quebuto' c'u ri ebucha'om Rire we rique caquich'a'bej chipak'ij chichak'ab! ¿Camayin neba Rire che uc'ulic uwach? ⁸ Cambi'ij chiwe: Na jampatana ri Dios cuc'ulubej lo uwach y cu'an c'u ri usuc' chique. Pero echiri' cac'un tanchi Ralaxel Chiquixo'l Ticawex, ¿c'a queburik nawi ticawex che ruwachulew c'a c'o cubulibal quic'u'x ruc' ri Dios?» xcha ri Jesús.

Ri c'ambal na'oj puwi jun fariseo y jun aj tz'onol puak re tojonc

⁹ E c'o jujun caquich'obo lic e jusuc'; ruma c'u ri', lic c'u caquic'ak bi quik'ij ri jujun chic. Ec'u ri Jesús xutzijoj wa jun c'ambal na'oj chique:

¹⁰ «E c'o ca'ib achijab xebec pa ri Rocho Dios cha' que'qui'ana orar; jun e cuq'u'il ri fariseos y ri jun chic, aj tz'onol puak re tojonc. ¹¹ Ec'u ri fariseo e ri' tac'alic xujek cu'an orar; lic cuyac uk'ij chiribil rib, jewa' cubi'ij: “Lal Dios, cantioxij che'la ma ri'in na in ta jela' pacha' ri juch'ob achijab: ri elek'omab, ri na e ta jusuc', ri quemacun chirij ri c'ulaniquil. Ri'in na in tane jela' pacha' la jun aj tz'onol puak re tojonc.* ¹² Ri'in calaj can'an ayuno ronoje semana, y canya ri nudiezmo che ronoje ri canch'aco” cacha ri fariseo.

¹³ »No'j raj tz'onol puak re tojonc xa naj xc'o'ji' wi apanok. Na caraj tane catzu'n chicaj; cut'ikit'a' ruwa uc'u'x, jewa' cubi'ij: “Lal Dios Kajawxel, jcu'yu co la numac, ma ri'in lic in aj mac!” cacha'.

§ 17:37 Wa c'ambal na'oj e que'elawi ruc'unibal ri Kanimajawal lic cak'alajinic, ma conoje ri winak caquil wa'. Lc. 17:24 * 18:11 “Raj tz'onol puak re tojonc”: Quil “cobrador de impuestos” pa vocabulario.

¹⁴ »Cambij c'u chiwe: Wa aj tz'onol puak re tojonc xtzelej chirocho 'anom chi jusuc' che ruma ri Dios; no'j ri fariseo, na xcuy ta rumac. Ma china ri cu'an nim che rib, ri Dios cukasaj uwa uk'ij; no'j china ri cu'an ch'uti'n che rib, ri Dios cuyac uk'ij» xcha'.

Ri Jesús cuyac quik'ij rac'alab
(Mt. 19:13-15; Mr. 10:13-16)

¹⁵ E c'o jujun raltak co ac'alab xec'am lo chwach ri Jesús cha' Rire cuya ruk'ab paquiwi'. Yey rutijo'n echiri' xquil wa', xequiyaj ri ec'amayom lo que.

¹⁶ No'j ri Jesús xebusiq'uij pan rac'alab y jewa' xubi'ij chique rutijo'n: «Chiya'a luwar chique ri raltak co ac'alab chepeta na wuc'. Mebik'atej; ma ri caqui'an e jela' pacha' rique, ri' cu'an que rutakanic ri Dios. ¹⁷ Pakatzij wi cambij chiwe: China ri na cuc'ul ta rutakanic ri Dios jela' pacha' cu'an juna ralco c'o'm, ri' na coc ta chupa rutakanic ri Dios» xcha'.

Jun beyom cach'a't ruc' ri Jesús
(Mt. 19:16-30; Mr. 10:17-31)

¹⁸ C'o jun aj wach xc'un ruc' ri Jesús y xutz'onoj che:

—Lal utzilaj tijonel, ¿sa' ri can'ano cha' c'o nuc'aslemal na jinta utakexic? —xcha'.

¹⁹ Ri Jesús xuc'ul uwach:

—¿Su'be cabi'ij la “utz” chwe? Ma xa Jun ri lic utz c'olic, wa' e ri Dios. ²⁰ Rilal eta'am chi la sa' tak Rutzij Upixab ri Dios: “Matmacun chirij ri c'ulaniquil. Matcamisanic. Matelek'ic. Ma'an rak'ubal chirij junok. Chalok'oj quik'ij rachukaw”^{*} —xcha che.

²¹ Rachi xubi'ij:

—Ronoje wa' nu'anom lo chwi nuch'uti'nal —xcha'.

²² Echiri' ri Jesús xuta wa', jewa' xubi'ij che:

—C'a c'o ri lic chirajawaxic ca'an la: E c'ayij la ronoje tak ri beyomalil

la y jacha c'u la chique ri niba'ib; jec'uri'la' c'o beyomalil la chila' chij. Tec'uchiri' peta la y tereja lo la chwij —xcha'.

²³ Ec'uchiri' xuta wa' rachi, lic xuchap bis, ma rire lic beyom.

²⁴ Echiri' ri Jesús xrilo lic xuchap bis rachi, jewa' xubi'ij:

—Ri e beyomab, lic c'ayew chique queboc chupa rutakanic ri Dios.

²⁵ Ma e ne más c'ayew ri coc juna beyom chupa rutakanic ri Dios chwa ri quic'ow juna camello chupa rutel juna acuxa' —xcha'.

²⁶ Ewi ri xetaw re wa', xquibi'ij:

—We e ri', ¿china c'u ri' ri cacolobetajic?† —xecha'.

²⁷ Xubi'ij c'u ri Jesús chique:

—Ri ticawex na caquicolobej ta quib quituquel, ma wa' lic c'ayew chiquiwach; no'j ri Dios cu'ano ma na jinta c'ayew chwach Rire —xcha'.

²⁸ Ec'uchiri', xubi'ij ri Pedro:

—Kajawal, e ri'oj kaya'om can ronoje y oj teran chi'ij la —xcha'.

²⁹ Ec'u ri Jesús xubi'ij chique:

—Pakatzij wi cambij chiwe: China ri uya'om can rocho, ebuya'om can ruchu-ukaw, ri ratz-uchak', ri rixokil o ri ralco'al ruma rutakanic ri Dios; ³⁰ ruma tak c'u wa' wa uya'om canok, lic q'ui ri rajil uc'axel cuc'ul wara che ruwachulew. Yey chikawach apanok cuc'ul na ri c'aslemal na jinta utakexic —xcha'.

Ri Jesús cach'a't tanchi puwi rucamic

(Mt. 20:17-19; Mr. 10:32-34)

³¹ Ri Jesús xumol quichi' ri cablajuj utijo'n y jewa' xubi'ij chique: «Chitape'. E wa' cojpaki' Jerusalem y chila' cu'ana ronoje ri tz'ibital can cuma ri k'alajisanelab chwi Ralaxel Chiquixo'l Ticawex: ³² caya' c'u paquik'ab ri na e ta aj judi'ab, cach'amixic, cayok'ic y cachubaxic. ³³ Echiri' lic jich'om chi upa, cacamisaxic. No'j churox k'ij cac'astaj

* 18:20 Éx. 20:12-16 † 18:26 Chiquiwach raj judi'ab, we junok c'o ubeyomal e ruma utz u'anom chwach ri Dios. Caquich'ob c'u rique, we c'ayew chique ri beyomab queboc chupa rutakanic ri Dios, más ne c'ayew ri' chique ri niba'ib.

lo chiquixo'l ri ecaminak» xcha ri Jesús.

³⁴ Pero rutijo'n na junta xquimaj usuc' che wa', ma c'amaja' caya'taj chique caquimaj usuc'.

Ri Jesús cucunaj jun potz' chunakaj ri tinamit Jericó

(Mt. 20:29-34; Mr. 10:46-52)

³⁵ E xu'an wa' echiri' ri Jesús xa nakaj chi c'o wi che ri tinamit Jericó. C'o jun potz' tz'ul chuchi' ri be, cutz'onoy limoxna. ³⁶ Ec'uchiri' xuto catajin quic'owic uq'uiyal winak, xutz'onobej:

—¿Sa' la' la catajin ric'owic? — xcha'.

³⁷ Y c'o xebi'n che:

—E Jesús ri aj Nazaret catajin ric'owic —xecha'.

³⁸ Ec'uchiri', rire lic co xsiq'uinic, jewa' xubi'ij:

—¡Jesús, lal ri Ralc'o'al can ri rey David, chinjuch' ca'n co che'la! — xcha'.

³⁹ Yey ri winak e nabejinak xquich'a'bej upa cha' na casiq'uin ta chic. No'j ri potz' más ne co casiq'uinic, jewa' cubi'ij:

—¡Lal ri Ralc'o'al can ri rey David, chinjuch' ca'n co che'la! —xcha'.

⁴⁰ Ec'uchiri' ri Jesús xtaq'ui'ic y xutak uc'amic ri potz'. Y echiri' xc'am lo chwach, ri Jesús xutz'onoy che:

⁴¹ —¿Sa' ri cawaj can'an chawe? — xcha'.

Y ri potz' xubi'ij che:

—Wajawal, 'ana la chwe quintzu'nic —xcha'.

⁴² Ec'u ri Jesús xubi'ij che:

—¡Chat-tzu'n ba ri'! Ma ruma ri cubulibal ac'u'x wuc', at cunutajinak chic —xcha'.

⁴³ Xakic'ate't c'u ri' xtzu'nic y xterej bi chirij ri Jesús, e ri' cuyac uk'ij ri Dios. Y conoje ri winak xebilow re xquijeko caquibixoj rubi' ri Dios.

19

Ri Zaqueo cuc'ul ri Jesús chirocho

¹ Ri Jesús xopon Jericó, e ri' catajin ric'owic chupa ri tinamit. ² C'o c'u jun achi chiri' Zaqueo rubi', aj wach que raj tz'onol puak re tojonc yey rire lic beyom. ³ Rire lic cutij ri' che su'anic caril uwach ri Jesús, pero na utz taj carilo cuma ruq'uiyal winak, ma xa ch'uti'n rakan. ⁴ Lic c'ut canic xe'ec xnabej bi chiquiwach ri winak y xak'an chwi jun che' cha' caril uwach ri Jesús, ma chiri' quic'ow wi Rire.

⁵ Echiri' xopon ri Jesús chuxe' ri che', xtzu'n chicaj y xril pan ri Zaqueo; y jec'uwa' xubi'ij pan che:

—Zaqueo, chok'otan kaja lo la, ma wak'ij lic chirajawaxic quine'canaj can chi ocho la —xcha'.

⁶ Y ri Zaqueo maji chic xkaj lok y xuc'ul ri Jesús chirocho ruc' qui'cotemal.

⁷ Ec'uchiri' xquil wa' ri winak, conoje xquijek quech'a't chirij ri Jesús ma xcanaj can chirocho jun achi lic aj mac.*

⁸ Ec'uchiri', ri Zaqueo xtaq'ui'ic y jewa' xubi'ij che ri Kanimajawal:

—Tape la, wajawal: Pa nic'aj che ri nubeyomalil cansipaj chique ri niba'ib; yey we nu'anom elek' che junok ruc' socoso'nic, cajlaj ruc'axel cantzelej che —xcha'.

⁹ Ewi ri Jesús xubi'ij:

—Wak'ij xc'un ri colobetajic chupa wa rocho ri Zaqueo, ma rire e cuq'uil ri ralc'o'al can ri Abraham.† ¹⁰ Yey ri in Alaxel Chiquixo'l Ticawex, in c'uninak che quitzucuxic y che quicolobexic ri e sachinak pa mac —xcha'.

Ri c'ambal na'oj puwi ri xqui'an la-juj aj chaquib ruc' ri puak xya' can paquik'ab

¹¹ Echiri' caquitata' wa' ri winak, ri Jesús xujek utzijoxic jun c'ambal na'oj chique. Ma xa nakaj chi c'o wi che ri tinamit Jerusalem yey e chiquiwach ri winak, echiri' ri Jesús

* **19:7** Ri winak lic tzel caquil ri Zaqueo ma rire e jun aj tz'onol puak re tojonc. Quil “cobrador de impuestos” pa vocabulario. † **19:9** Tob ri Zaqueo macuninak, takal che xcolobetajic ma xujalc'atij rubinic usilabic y xubi' uc'u'x ruc' ri Dios jela' pacha' xu'an ri Abraham ojertan.

coc chiri', cuk'alajisaj uwach y jela' cajeker rutakanic ri Dios. ¹² Xubi'ij c'u ri Jesús:

«C'o jun achi lic c'o uwach e ri que'ec chupa jun tinamit lic naj cha' chila' ca'an rey che; y jela' echiri' catzelej lok, cujek rutakanic puwi rutinamit. ¹³ Yey echiri' c'amaja' que'ec, xebusiq'uij lajuj raj chaquib y xuya can chique chiquijujunal jun sakil puak “mina”[‡] quecha che y xubi'ij can chique: “Chixch'acan chirij wa puak xalok' ri'in na in jintaj, y quiya tanchi chwe echiri' quintzelej lok” xcha'.

¹⁴ »Pero ri winak re ri tinamit lic tzel caquilo y xequitak c'u bi jujun achijab cha' que'quibi'ij che ri jun caya'w re ri takanic che: “Na cakaj ta cu'an rey wa'chi pakawi” quecha'.

¹⁵ »Na ruc' ta c'u ri', xya'taj che rachi cu'an rey. Ec'uchiri' xtzelej lok, xutak quisiq'uixic ri raj chaquib uya'om can puak paquik'ab, ma caraj careta'maj janipa ri xquich'ac chiquijujunal.

¹⁶ »Xc'un ri nabe y jewa' xubi'ij che: “Wajaw, ruc' ri jun mina ya'om can la panuk'ab, xinch'ac chi lajuj chirij” xcha'.

¹⁷ »Ri rey xubi'ij che: “Utz ri'. At jun utzilaj aj chac. Ruma c'u xarik uchapabexic chi utz ri na q'ui taj, wo'ora canya pak'ab at takanel paquiwi lajuj tinamit” xcha'.

¹⁸ »Xc'un c'u lo jun chic raj chac y jewa' xubi'ij che: “Wajaw, ruc' ri jun mina ya'om can la panuk'ab, xinch'ac chi wo'ob chirij” xcha'.

¹⁹ »Y ri rey jewa' xubi'ij che: “Ri'at canya pak'ab at takanel paquiwi wo'ob tinamit” xcha'.

²⁰ »Xc'un c'u jun chic y jewa' xubi'ij che: “Wajaw, ri' ri jun mina la ya'om can la panuk'ab. Wa' lic nuc'olom chi utz chupa jun su't ²¹ ma lic xinxi'ij wib che'la ruma lic lal tiz'itic. Rilal ca'an e la che ri na lal ta c'oloyom re, yey camol ne la ri na xtic ta la” xcha'.

²² »Ec'uchiri', ri rey xubi'ij che: “Ri'at at jun aj chac na jinta c'ana achac. Ruc' ne la ch'a'tem xabi'ij, cank'at tzij pawil. We xach'ob rakan lic in tiz'itic ma can'an we'in che ri na in ta inc'oloyom re, yey canmol ne ri na xintic taj, ²³ ¿su'be c'u ri na xaya ta ri nupuak pa banco cha' we xintzelej lok co'lnuc'ama' ruc' ri uch'acom chic?” xcha'.

²⁴ »Xubi'ij c'u chique ri e c'o chiri': “Chimaja ri mina che wa jun aj chac y chiya'a che ri c'o lajuj mina ruc'” xcha'.

²⁵ »Ec'u rique xquibi'ij che: “Kajaw, ipero rire c'o chi lajuj mina ruc'!” xecha che.

²⁶ »Y ri takanel xuc'ul uwach: “Pakatzij wi cambi'ij chiwe: China ri lic q'ui c'o ruc', caya'i' ne más che; § no'j ri na jinta c'o ruc', camaji' ne che ri xa jubik' c'o ruc'. ²⁷ Ec'u wo'ora, chebic'ama lo wara ri winak lic tzel quinquilo, ri na xcaj taj quinu'an rey paquiwi', y chebicamisaj chinuwach” xcha'.»

Ri winak caquiyac uk'ij ri Jesús echiri' coc Jerusalem

(Mt. 21:1-11; Mr. 11:1-11; Jn. 12:12-19)

²⁸ Echiri' xubi'ij wa', ri Jesús xumaj tanchi ubi ube y xpaki' Jerusalem junam cuc' rutijo'n. ²⁹ Ec'uchiri' xebopon chwach ri juyub Olivos, chunakaj raldeas Betfagé y Betania, ri Jesús xebutak bi ca'ib chique rutijo'n cha' quenabej apanok, ³⁰ jewa' xubi'ij chique:

«Jix pa raldea c'o pan chikawach. Y echiri' quixoc chupa, qui'rika jun k'apoj buru yukulic. Wa' na jinta junok cojoyom re. Chiquira' y chic'ama' lok. ³¹ We c'o c'u junok catz'onow chiwe: “¿Su'chac quiquiro?”, jewa' quic'ul uwach: “Ma cajawax che ri Kajawal” quixcha'.»

³² Xebec c'u ri ca'ib etakom bi y xquirik ri buru jela' pacha' ri bi'tal bi chique. ³³ Ec'uchiri' quetajin che

[‡] 19:13 “Mina”: Jun puak lic q'ui rajil. E ri cuch'ac jun mocom pa cien k'ij re chac. § 19:26 Jun na'oj puwi wa jun versículo: China ri cu'an chi utz ri chac re ri Dios ya'om puk'ab, caya' uwach pa rutakanic ri Dios.

uquiric ri k'apoj buru, tak ri rajaw xquibi'ij chique:

—¿Su'chac quiquir la buru? — xecha'.

³⁴ Y rique xquibi'ij:

—Ma cajawax che ri Kajawal — xecha'.

³⁵ Ewi xquic'am lo ri buru ruc' ri Jesús. Ec'uchiri' quiripom chi ri quimanta** chwi ri k'apoj buru, xcak'anisaj ri Jesús puwi'.

³⁶ Echiri' catajin ric'owic ri Jesús, ri winak caquili' tak ri quimanta pa la be re yacbal uk'ij. ³⁷ Y echiri' catajin roponic chunakaj ri xulanic re ri juyub Olivos, conoje ruq'uiyal utijo'n xquijeko lic caquiyac uk'ij ri Dios ruc' qui'cotemal ma quilom tak ri c'utubal re ruchuk'ab u'anom ri Jesús, ³⁸ jewa' caquibi'ij:

«¡Lic nim uk'ij ri Rey petinak chupa rubi' ri Dios Kajawxel! ✧
¡Utzil chomalil c'o chila' chicaj y lic nim uwach uk'ij ri Dios chila' chicaj!» quecha'.

³⁹ E c'o c'u jujun fariseos chiquixo'l ruq'uiyal winak xquibi'ij che ri Jesús:

—Lal tijonel, chebek'atej la ri tijo'n la cha' na caquibi'ij ta chi wa' — xecha'.

⁴⁰ No'j ri Jesús xuc'ul uwach:

—Pakatzij wi cambi'ij che alak, we ta rique caquitanaba' ubi'xiquil wa', e tak rabaj caquijek caquiyac nuk'ij — xcha'.

⁴¹ Y echiri' ri Jesús xopon chunakaj Jerusalem y xril pan ri tinamit, xujek lic cok' puwi', ⁴² jewa' xubi'ij:

«¡Tok'o' iwach ri'ix aj Jerusalem! ¡We ta c'u quiweta'maj wak'ij ora sa' ri cac'amaw lo utzil chomal chiwe! No'j wa' pacha' ewatal chiwach wo'ora. ⁴³ Cac'un c'u ri k'ij echiri' ri tzel quebilow iwe caquisut rij ri tinamit Jerusalem y caquiwoc iwij cha' na quixanimaj tubi. Tec'uchiri', quepe chiwij.

⁴⁴ Quixquicamisaj iwonoje y caqui-wulij ri tinamit cha' na jinta juna ja cataq'ui' canok. Quic'ulumaj c'u wa'

ma na xiweta'maj taj jampa xc'un ri Colobenel iwuc'» xcha'.

Ri Jesús queberesaj bi raj c'ay chupa ri Rocho Dios

(Mt. 21:12-17; Mr. 11:15-19; Jn. 2:13-22)

⁴⁵ Echiri' xoc ri Jesús pa ri Rocho Dios, xujek lo quesaxic conoje ri quec'ayinic y ri quelok'ow chupa. ⁴⁶ Y jewa' xubi'ij chique:

«Ri Dios jewa' cubi'ij chupa Ruch'a'tem:
Ri Wocho e luwar re oración Is. 56:7
cacha'.

No'j ralak 'anom alak che ri Wocho e jun luwar que elek'omab» ✧ xcha'.

⁴⁷ Y ronoje k'ij cac'utun ri Jesús pa ri Rocho Dios; no'j ri nimak e aj chacunel, raj c'utunel re ri tziipixab y raj wach re ri tinamit lic caquitzucuj su'anic caquicamisaj ri Jesús. ⁴⁸ Pero na caquirik taj su'anic, ma conoje ri winak lic cacaj caquita ri cubi'ij Rire.

20

China xya'w puk'ab ri Jesús catakanic

(Mt. 21:23-27; Mr. 11:27-33)

¹ C'o jun k'ij ri Jesús cac'utun pa ri Rocho Dios, cutzizoj ri Utzilaj Tzij chique ri winak. Xebopon c'u ri nimak e aj chacunel re ri Rocho Dios junam cuc' raj c'utunel re ri tziipixab y ri nimak winak re ri tinamit, ² y xquitz'onoj che:

—Bi'ij la chike: ¿China xya'w pak'ab la ca'an tak la wa'? ✧ ¿China xtakaw la che ca'an tak la wa'? — xecha'.

³ Y ri Jesús xuc'ul uwach:

—Ri'in can'an jun tz'onobal che alak; c'ulu c'u alak uwach. ⁴ ¿China xtakaw re ri Juan cuya ri bautismo? ¿E ri Dios o e rachijab? — xcha'.

⁵ Ec'u rique xquijek quech'a't chiquiwach puwi wa': «We xkac'ul uwach che: “E ri Dios”, ri' cubi'ij rire chike: “¿Su'chac c'u ri' na xcoj ta alak ri xubi'ij?” cacha chike. ⁶ Yey we xkabi'ij “e rachijab”, conoje ri' ri tinamit cojqquicamisaj pa' baj; ma

** **19:35** “Manta” e jun c'ul caquicoj ri aj Israel re ojertan, tob achijab o ixokib, pacha' po't woca'j re carabexic. ✧ **19:38** Sal. 118:26 ✧ **19:46** Jer. 7:11 ✧ **20:2** Lc. 19:45

rique lic quiiquibam uwach ri Juan e jun k'alajisanel re ri Dios» xecha chiquiwach.

⁷ Xquibi'ij c'u che ri Jesús:

—Na keta'am taj —xecha'.

⁸ Ec'u ri Jesús xubi'ij chique:

—Jec'uri'la', ri'in na cambi'ij ta che alak china ya'yom panuk'ab can'an tak wa' —xcha'.

Ri c'ambal na'oj paquiwi raj chac itzel quiwachlibal

(Mt. 21:33-44; Mr. 12:1-11)

⁹ Ec'uchiri', ri Jesús xujek utzijoxic wa c'ambal na'oj chique ri winak:

«C'o jun achi xu'an tico'n re uva chwach ri rulew. Tec'uchiri', xuya can pa tunulic chique jujun aj chaquib. Xe'ec c'u ri' y uq'uiyal k'ij xsachi'ic.

¹⁰ »Echiri' xopon ruk'ijol ri molonic, xutak lo jun raj chac cha' cu'tz'onoj chique raj tunulel ri takalic cuc'ul rire che ri molonic. No'j raj tunulel xquich'ayo y xquitak bi; e ri' na jinta xquiya bi che.

¹¹ »Ec'u ri rajaw xutak lo jun chic raj chac. No'j raj tunulel xqui'an c'ax che jela' pacha' xqui'an che ri nabe; xquich'ayo, lic xquiq'uixbesaj y xquitak bi. Yey na jinta xquiya bi che.

¹² »Y ri rajaw xutak lo rurox aj chac. Pero raj tunulel lic xqui'an c'ax che y xquesaj bi chupa wa' wu'lew.

¹³ »Ec'uchiri', ri rajaw xubi'ij chiribil rib: “¿Sa' ri can'an wo'ora? Cantak bi ri nuc'ajol lic c'ax canna'o;* ma c'axtaj we xquil uwach rire, caquic'ul na chi utz.”

¹⁴ »No'j raj tunulel echiri' xquil uwach ruc'ajol rachi, xech'a't chiquiwach, jewa' xquibi'ij: “Wa' e uc'ajol ri rajaw rulew, ri cu'ana na rajaw we xcam rukaw. Jo' je'kacamisaj cha' rulew cu'an can ke'oj” xecha'.

* **20:13** Ruc' wa c'ambal na'oj ri Jesús cuk'alajisaj china ri xtakaw lok, e Rukaw Dios. Quil ri tz'onobal pa versículo 2. † **20:16** Ruc' wa jun c'ambal na'oj ri Jesús xuk'alajisaj sa' ri caquic'ulumaj raj wach re ri tinamit Israel we na caquic'ul ta Rire, Rucha'o'n lo ri Dios. ✧ **20:17** Is. 28:16 ‡ **20:18** Echiri' cubi'ij “rabaj”, wa' que'elawi e ri Jesús. China ri na cacubi' ta uc'u'x ruc' Rire, cape ri k'atbal tzij re ri Dios puwi'. Dn. 2:34-35 § **20:20** Ri tzel quebilow ri Jesús xcaj xquicoj umac chwach ri takanel romano, ma xew c'o puk'ab ri gobierno romano cuk'at tzij re camic puwi junok.

¹⁵ »Xquesaj c'u bi ruc'ajol rachi chupa wa' wu'lew y xquicamisaj» xcha ri Jesús.

Tec'uchiri' xutz'onoj chique ri winak:

—Chiwach ralak, ¿sa' nawi cu'an ri rajaw ri tico'n chique raj tunulel?

¹⁶ Ri'in cambi'ij: Cac'unic, cusach quiwach wa aj tunulel y cuya ri rulew pa tunulic chique jujun chic† —xcha'.

Ec'uchiri' xquita wa' ri winak, xquibi'ij:

—¡Mu'an ne co ri' wa' ri Dios chike! —xecha'.

¹⁷ Pero ri Jesús lic xutzutza' quiwach y jewa' xubi'ij chique:

—¿Sa' c'u ri cabi'ij alak che wa tz'ibital can chupa Rutzij Upixab ri Dios? Ma jewa' cubi'ij:

E rabaj c'akital can cuma raj yacal ja, e abaj wa' lic xajawaxic cha' catiqui' lo ri ja✧ *Sal. 118:22*

cacha'. ¹⁸ China c'u ri catzak puwi la' la'ba, lic c'ax ri cuc'ulumaj; yey we rabaj catzak puwi junok, ri' xa jumul cusach uwach‡ —xcha'.

¹⁹ Ec'uchiri', ri nimak e aj chacunel pa Rocho Dios cuc' raj c'utunel re ri tziypixab lic xquitzucuj su'anic asu caquichap bi ri Jesús, ma xquimaj usuc' chiquij rique xubi'ij wi wa c'ambal na'oj; no'j na xqui'an taj ruma ri quixi'in ib chiquiwach ri winak.

Ri tz'onobal puwi ri tojonc ca'anic (Mt. 22:15-22; Mr. 12:12-17)

²⁰ Ec'u raj wach lic quic'ac'alem ri Jesús y xequitak bi achijab qui'anom che quib pacha' lic e jusuc', cha' caquic'am upa ri Jesús ruc' tak ri cubi'ij y jela' caquicoj umac y caquiya c'u puk'ab ri takanel re ri gobierno romano. § ²¹ Xquitz'onoj c'u che ri Jesús:

—Lal tijonel, ri'oj keta'am lic usuc' ronoje ri cabi'ij la y ri cac'ut la, yey rilal lic lal jusuc' cuc' conoje ri ticawex. Pakatzij wi e cac'ut la ri be re ri Dios. ²² ¿Usuc' nawi ri caka'an tojonic che ri nimalaj takanel re Roma ^{**} o na usuc' taj? —xecha'.

²³ No'j ri Jesús, ruma reta'am ri retzelal quic'u'x, jewa' xubi'ij chique:

—¿Su'chac cac'am alak nupa? ²⁴ C'utu pe alak chwe juna meyo re ca'an tojonic ruc'. ¿China re wa c'axwach y china re wa bi'aj c'o chwach wa meyo? —xcha'.

Rique xquic'ul uwach:

—Re ri nimalaj takanel re Roma —xecha'.

²⁵ Xubi'ij c'u ri Jesús chique:

—Ya'a alak che ri nimalaj takanel re Roma janipa ri takal che rire; yey ya'a c'u alak che ri Dios janipa ri takal che ri Dios —xcha'.

²⁶ Ec'u ri quic'ac'alem ri Jesús na xquirik ta juna ch'a'tem xubi'ij chique ri winak chirij ri gobierno. E ne lic xcam canima' che ri c'ulubal uwach xuya'o y na jinta chi c'u xquibi'ij che.

Ri tz'onobal puwi ri c'astajibal
(Mt. 22:23-33; Mr. 12:18-27)

²⁷ Xec'un c'u ruc' ri Jesús jujun chique ri saduceos, ri caquibi'ij na jinta c'astajibal chique ri ecaminak. Xquitz'onoj c'u che:

²⁸ —Lal tijonel, ri Moisés xutz'ibaj can chike: “We ri ratz junok camic y na e jinta can ralc'o'al ruc' ri rixokil, ec'u ri' ruchak' cac'uli' ruc' rixok malca'n canok y jec'ula' quec'o'ji' ralc'o'al ruc', publi' ri ratz xcamic”.[☆]

²⁹ »Julaj e c'o wukub achijab quichak' quib. Ri nabe chique xc'uli'ic, yey ec'u ri' wa' xcamic y na e jinta can ralc'o'al ruc' ri rixokil. ³⁰ Jela' c'u ri' ruca'm xc'uli' ruc' rixok malca'n canok. Ec'u ri' wa' xcamic y na e jinta can ralc'o'al ruc' rixok.

³¹ Yey je tanchi la' xuc'ulumaj rurox. Jec'ula' xquic'ulumaj ri wukub achijab; xecamic, e ri' na jinta calc'o'al xquiya canok. ³² Q'uisbal c'u re, e xcam rixok. ³³ Chupa c'u ruk'ijol ri c'astajibal, ¿chinok chique ri wukub achijab cu'ana rachijil rixok? Ma conoje xec'uli' ruc' —xecha'.

³⁴ Y ri Jesús xuc'ul uwach:

—Wara che ruwachulew ri ticawex c'o quixokilal y c'o cachijilal yey caquiya ri calc'o'al pa c'ulaniquil.

³⁵ No'j ri caya'taj chique quec'astajic y c'o quic'aslemal na jinta utakexic chila' chicaj, rique na jinta chi quixokilal, na jinta chi cachijilal y na jinta chi ne c'o cuya ralc'o'al pa c'ulaniquil. ³⁶ Ma chila' chicaj na jinta chi camic chique, quebu'ana c'u pacha' ri ángeles. Yey e ralc'o'al ri Dios; e uwari'che ya'tal chique quec'astaj chiquixo'l ri ecaminak.

³⁷ Yey puwi c'u ri c'astajibal que ri ecaminak, c'una pe chic'u'x alak ri xutz'ibaj can ri Moisés puwi ri xubi'ij ri Dios che echiri' xch'a't ruc' chupa ri jumocaj xuluquej, jewa' xubi'ij ri Dios che: “In ri Dios re ri Abraham, re ri Isaac y re ri Jacob”[☆] xcha'. Chiri' c'u ri' xuk'alajisaj ri Moisés c'o c'astajibal, ³⁸ ma ri Dios na e ta Dios que ri ecaminak ma e Dios que ri e c'aslic.†† Ma conoje ri e ralc'o'al ri Dios, tob ecaminak chic, e c'as chwach ri Dios —xcha'.

³⁹ Ec'uchiri' jujun chique raj c'utunel re ri tziipixab, jewa' xquibi'ij che ri Jesús:

—Lal tijonel, lic utz ri xbi'ij la —xecha'. ⁴⁰ Y ri Saduceos na jinta chi c'o xquitz'onoj che ruma xquina' quib chwach.

Sa' ruwach Rucha'o'n lo ri Dios
(Mt. 22:41-46; Mr. 12:35-37)

⁴¹ Ec'uchiri' ri Jesús xubi'ij:

«¿Su'be cabi'x che ri Cristo e “Ralc'o'al can ri rey David”? ⁴² Ma

^{**} **20:22** “Ri nimalaj takanel re Roma”: Quil “César, emperador” pa vocabulario. [☆] **20:28** Dt. 25:5-6

[☆] **20:37** Éx. 3:6 ^{††} **20:38** Wa' wa'chijab ecaminak chic echiri' ri Dios xubi'ij wa'. Na ruc' ta c'u ri', e c'as chwach ri Dios. Yey we ta rique sachinak chi quiwach, ri Dios na cubi'ij ta ri': “In ri Dios qui'que.”

ri David jewa' xutz'ibaj can chupa ri libro re Salmos:

⁴³ Ri Dios Kajawxel xubi'ij che ri Wajawal:

“Chat-tz'ula pa nuwiqwik'ab,
y chawoye'ej na ri k'ij
echiri' quebenuya ri tzel que-
bilow awe
chuxe' rawakan” *Sal. 110:1*

xcha'.

⁴⁴ Ec'u ri David cubi'ij “Wajawal” che Rucha'o'n lo ri Dios. ¿Su'be c'u ri cabi'xic e Ralc'o'al can ri rey David?» xcha'.

Ri Jesús cuk'alajisaj ri quimac raj c'utunel re ri tzijpixab

(*Mt. 23:1-36; Mr. 12:38-40; Lc. 11:37-54*)

⁴⁵ Chiquiwach c'u ri winak quetaw re, ri Jesús xubi'ij chique rutijo'n:

⁴⁶ «Lic chichajij iwib; mi'an c'u iwe'ix pacha' ri caqui'an raj c'utunel re ri tzijpixab. Ma rique lic cuc'ul quic'u'x ri quejurur chupa ri quik'u' cha' quilítajic lic c'o quiwach. Lic cuc'ul quic'u'x ri caya' rutzil quiwach pa quebilitaj wi. Yey pa tak sinagogas y pa tak wa'im e lic cuc'ul quic'u'x ri quetz'uyi' chupa ri tz'ulibal que ri lic c'o quiwach. ⁴⁷ Rique caquimaj ri cocho quic'olibal rixokib e malca'nib; yey cha' na cak'alajin ta ri na utz taj caqui'ano, caquiwererej unimal ch'abal echiri' caqui'an orar. Ruma c'u wa caqui'ano, lic unimal c'axc'olil caquic'ul na echiri' cak'at tzij paquiwi'» xcha'.

21

Ri kasa'n xuya jun ixok malca'n

(*Mr. 12:41-44*)

¹ Ri Jesús xebutzu' pan ri beyomab echiri' caquiya ri quikasa'n chupa ri caxa re kasa'n pa ri Rocho Dios. ² Y xril c'u jun ixok malca'n lic niba' echiri' xuya chupa ri caxa ca'ib raltak co meyo lic na q'ui ta rajil. ³ Ec'u ri Jesús xubi'ij:

—Pakatzij wi cambi'ij chiwe, chwach ri Dios wa jun ixok niba' y malca'n e ne xuya más chwa ri xquiya conoje. ⁴ Ma conoje xa e

xquiya ruwi' ri quipuak; no'j wi'xok tob lic niba' e xuya ronoje ri puak c'o ruc', wa' e re culok' ri lic cajawax che —xcha ri Jesús.

Tak ri c'utubal re ri quibal re ruwachulew

(*Mt. 24:1-28; Mr. 13:1-23*)

⁵ Chiri' c'u ri' e c'o jujun quech'a't chwi ri Rocho Dios, caquibi'ij lic chom u'anom ruc' tak ri chomilaj abaj y ruc' tak ri chomilaj wikibal ya'tal cuma ri ticawex.

Ec'u ri Jesús xubi'ij chique:

⁶ —Cac'un c'u ri k'ij echiri' ronoje wa quitzutza', cawulixic; jec'ula', na cacana'j ta chi juna abaj puwi' jun chic —xcha'.

⁷ Tec'uchiri' xquitz'onoj che ri Jesús, jewa' xquibi'ij:

—Kajawal, ¿jampa nawi cu'ana tak ri' wa'? ¿Yey sa' ri c'utubal quilítajic echiri' cu'ana'? —xecha'.

⁸ Ri Jesús xubi'ij c'u chique:

—Lic chichajij iwib cha' na quixsotaj taj; ma e q'ui ri quec'unic y xa caquichik'imaj uwach ri nubi', jewa' caquibi'ij: “In ri Cristo, Rucha'o'n lo ri Dios, yey lic xa nakaj chi c'o wi lo ruk'ijol ri nutakanic,” quecha'. No'j ri'ix mixterej bi chiquij. ⁹ Y echiri' quito c'o ch'a'oj y quetucuc ri winak che ruwachulew, mixi'ij iwib che. Ma lic chirajawaxic nabe na cu'ana na ronoje wa', no'j c'amaja' ne ri' ri q'uisbal re ruwachulew —xcha'.

¹⁰ Xubi'ij c'u chique:

«Ec'o tinamit queyactaj chiquij jujun chic tinamit y e c'o takanelab queyactaj chiquij jujun chic takanelab. ¹¹ Cu'an nimak tak cabrakan. Che uq'uiyal luwar che ruwachulew cape numic y yabil paquiwi ri ticawex. Yey che ruwa caj quilítaj nimak tak c'utubal xibibal uwach.

¹² »Pero chwach tak c'u ri' wa', ri'ix quitij na c'ax ruma icojom ri nubi', quixchapic y quixternabex ruc' c'ax, quixya' paquik'ab raj wach re ri sinagogas cha' rique caquik'at tzij piwi' y quixc'am bi pa cárcel, quixc'am bi chiquiwach

ri reyes y chiquiwach ri takanelab. ¹³ Jec'uri'la', utz quik'alajisaj ri Utzilaj Tzij chiquiwach. ¹⁴ Mixoc il che sa' ruc'ulic uwach qui'ano echiri' quito' iwib chiquiwach rique; ¹⁵ ma e ri'in quinya'w ich'a'tem yey ina'oj cha' conoje ri tzel quebilow iwe na caquirik ta chi uc'ulic uwach chiwe.

¹⁶ »Yey quixya' ne pa k'atbal tzij cuma richu-ikaw, cuma tak riwatz-ichak', cuma tak ri c'o chux chiwe y cuma ri iwamigos. Y jujun chiwe queya' pa camic. ¹⁷ Lic c'u tzel quixil cuma tak ri winak ruma icojom ri nubi'. ¹⁸ Na ruc' ta c'u ri', mubisoj ic'u'x ma ix c'o puk'ab ri Dios y na jinta ne tob xa juna iwi' casachic.* ¹⁹ Ma we quich'ij uchuk'ab ronoje, quic'ul na ri colobetajic y ri c'aslemal na jinta utakexic.

Ri tinamit Jerusalem cawulixic

²⁰ »Echiri' quiwil ri soldados caquijek caquisut rij ri tinamit Jerusalem, chiweta'maj c'ut e ri' copon ri k'ij cawulix ri tinamit. ²¹ Ec'u ri winak e c'o pa ri luwar re Judea, chebanimaj ubi chwa tak juyub; y ri e c'o chupa ri tinamit Jerusalem chebelubi; yey ri e c'o pa juyub, mehoc chi lo Jerusalem, ²² ma wa' e uk'ijol k'atbal tzij, echiri' cu'ana' janipa ri tz'ibital chupa Rutzij Upixab ri Dios puwi wa'. ²³ Chupa tak c'u la' la k'ij, lic tok'o' quiwach ri e yewa' ixokib y ri quetz'umtisanic, ma lic sa'ch ri nimak c'axc'obic cape che ruwachulew ruma ri royowal ri Dios chiquij wa' wa tinamit.

²⁴ »Lic e q'ui ri quecamisax ruc' espada y e q'ui quec'am bi chi presoyil pa jujun chic tinamit che ronoje ruwachulew.† Yey ri tinamit Jerusalem cac'o'ji' c'u paquik'ab ri na e ta aj Israel cha' quetakan puwi',

* **21:18** Tob ri kacuerpo wara che ruwachulew ca'an c'ax che, wa' xa re jok'otaj; ma ri Dios ubi'tisim jun c'ac' cuerpo chike y wa' na jinta junok ca'anaw c'ax che. 1 Co. 15:42-44,52-54; 2 Co. 4:14-18; 5:1-30 † **21:24** Wa' xu'ana chupa ri junab 70 D.C. cuarenta junab chwi rucamic ri Jesús, echiri' ri soldados romanos xe'quiwulij ri tinamit Jerusalem. Conoje ri e aj judi'ab e c'o Jerusalem, pa nic'aj chique xecamisaxic y pa nic'aj xec'am bi chi presoyil. Xew xecolobetaj ri xquicoj sa' ri xubi'ij can ri Jesús, ma xebel bi chupa ri tinamit echiri' c'amaja' sutum rij wa' cuma ri soldados. ✧ **21:27** Dn. 7:13; Ap. 1:7 ‡ **21:30** «Ruk'ijol echiri' cabucbutic y na jinta jab»: Quil «verano» pa vocabulario.

c'a pa copon wi ruk'ijol ubi'im chi ri Dios.

Ruc'unibal Ralaxel Chiquixo'l Ticawex

(Mt. 24:29-35, 42-44; Mr. 13:24-37)

²⁵ »Chwa c'u ri' ri caj quilitalj c'utubal che ri k'ij, che ri ic' y che tak ri ch'umil; yey tak ri winak che ruwachulew casach quina'oj y caquijek caquixi'ij quib che ri nimalaj uch'awibal ri mar y che ri ya' lic quel chicaj chwi ri mar. ²⁶ Quek'ocholaj tak ri winak, que'ec ri quina'oj y quetzak pulew ruma xi'in ib che ri c'axc'obic cape che ruwachulew; ma e tak ri c'o quichuk'ab che ruwa caj queyiquiyo'xic. ²⁷ C'a tec'uchiri' quilitalj Ralaxel Chiquixo'l Ticawex cac'un lo pa sutz' ruc' ruchuk'ab y ruc' runimal uchomallil.✧ ²⁸ Ec'uchiri' cujek quilitalj wa c'utubal, lic chichuk'ubej iwib che roy'exic ri icolobetajic chwa ri c'axc'obic» xcha ri Jesús.

²⁹ Ri Jesús xutzizoj c'u wa jun c'ambal na'oj chique:

«Chiwilape ri che' re higo y conoje tak ri che'. ³⁰ Echiri' quiwilo quetuxic, iweta'am xa nakaj chi c'o wi lo ruk'ijol echiri' cabucbutic y na jinta jab.‡ ³¹ Jec'ula' echiri' quiwilo cu'ana ronoje tak wa', chiweta'maj xa nakaj chi c'o wi lo ruk'ijol echiri' ri Dios catakan puwi ronoje. ³² Pakatzij wi cambi'ij chiwe: E c'o ticawex re wa' wa k'ij na quecam tana we na xquil tubi ronoje wa'. ³³ Ruwa caj y ruwachulew xa casach uwach, no'j ri nuch'a'tem na casach ta uwach.

Chixc'ola jusuc', e chiwoy'ej ruc'unibal ri Cristo

³⁴ »Lic chichajij iwib cha' na quiya ta iwib che tak ri rayinic re ri mac, che ri k'abaric y che rubis

ic'u'x re ruwachulew, ma c'axtaj cac'un lo ruk'ijol Ralaxel Chiquixo'l Ticawex echiri' na iwoye'em taj. ³⁵ Ma ruc'unibal Rire chiquiwach ri e c'o che ruwachulew, xakic'ate't cu'ana', jela' pacha' echiri' juna awaj xakic'ate't catzak pa laso re cachapic.

³⁶ »Mawar c'u iwach, xaki e chixch'a't ruc' ri Dios cha' c'o ichuk'ab chwa wa catajin lok y jela' takal chiwe quixcolobetaj chwach ronoje wa', y na quixq'uij ta c'u ri' quixtaq'ui' chwach Ralaxel Chiquixo'l Ticawex echiri' cac'un lok» xcha'.

³⁷ Ec'u ri' ri Jesús e tak ri pak'ij cac'utun pa ri Rocho Dios yey e tak ri chak'ab quel bi que'c'ola chwa ri juyub Olivos. ³⁸ Y conoje ri winak anim tan quebopon chupa ri Rocho Dios cha' que'quita ruch'a'tem ri Jesús.

22

Ri Judas cuc'ayij ri Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Xa nakaj chi c'o wi lo ri nimak'ij echiri' catij ri pam na jinta levadura che. ² Y ri nimak e aj chacunel pa Rocho Dios cuc' tak raj c'utunel re ri tzijpixab lic quetajin che utzucuxic su'anic caquiya ri Jesús pa camic, pero caquixi'ij quib caqui'an chiwachil cuma ruq'uiyal winak eteran chirij.

³ Ec'u ri Judas aj Iscariot,* jun chique ri cablajuj utijo'n ri Jesús, xuya luwar che ri Satanás xoc pa ranima'. ⁴ Xe'ec c'u cuc' ri nimak e aj chacunel pa Rocho Dios y cuc' ri e aj wach que ri e chajinel re ri Rocho Dios cha' cach'a't cuc' puwi' su'anic cuya ri Jesús paquik'ab. ⁵ Rique lic xequi'cot che y xquibi'tisij meyo che ri Judas we cu'an wa'. ⁶ Ec'u rire xuya uchi' che y xujek c'u utzucuxic su'anic cuya ri Jesús paquik'ab xa xe'lak'ay cha' na caquina'bej ta ri winak.

Ri Jesús cutij ri cena re Pascua cuc' ri cablajuj utijo'n

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Xopon c'u ri nimak'ij echiri' catij ri pam na jinta levadura che. Chupa c'u wa' wa k'ij chirajawaxic quecamisax tak ri k'apoj bexex re Pascua.* ⁸ Ec'u ri Jesús xebutak bi ri Pedro y ri Juan, jewa' xubi'ij bi chique:

—Jix, ji'yijba' ri cena re Pascua cha' jela' cakatijo —xcha'.

⁹ Y rique xquitz'onoj che:

—¿Pa ca'aj wi la que'kayijba' wi? — xecha'.

¹⁰ Y ri Jesús xubi'ij chique:

—Chitape': Echiri' quixoc chupa ri tinamit, quic'ul jun achi ruc'a'am jun cura' ya'. Chixterej bi chirij c'a chuchi' ri ja pa coc wubi ¹¹ y chibi'ij c'u che rachi rajaw ja: “Jewa' cubi'ij ri tijonel ke'oj: ¿Pachawi c'o wi ri luwar pa cantij wi ri cena re Pascua cuc' ri nutijo'n?” quixcha che. ¹² Ec'u ri cu'an ri rajaw ja e cuc'ut chiwe jun nimalaj luwar chicaj pa ri cale' ja, wa' yijbital chic. Chiri' c'u ri' chiyijba' ri cena re Pascua —xcha ri Jesús chique.

¹³ Xebec c'u rutijo'n y xe'quirika' jela' pacha' ri xubi'ij bi ri Jesús chique. Y xquiyijba' c'u ri cena re Pascua.

¹⁴ Ec'uchiri' xopon ru'orayil ri cena, ri Jesús junam cuc' rutako'n xeboc chwa ri mexa. ¹⁵ Y ri Jesús xubi'ij chique:

—¿Lic nurayim lo utijic junam iwuc' wa cena re Pascua chwach pan ri c'axc'obic canwic'owibej!

¹⁶ Ma cambi'ij c'u chiwe na cantij ta chi c'u juna chic cena re Pascua iwuc', c'ate na echiri' copon ri k'ij cu'ana na janipa ri bi'tisim lok puwi rutakanic ri Dios —xcha'.

¹⁷ Tec'uchiri', xuc'am ri c'olibal c'o vino chupa y xutioxij che ri Dios. Xubi'ij c'u chique rutijo'n:

—Chic'ama wa' y chitija iwe chuchi' wa' wa c'olibal. ¹⁸ Ma cambi'ij chiwe: Na cantij ta chi

* **22:3** “Iscariot”: Wa' e utinamit ri Judas. ✧ **22:7** Éx. 12:1-13; Lv. 23:5-6

ruwa'al uva c'ate na echiri' catiqui' rutakanic ri Dios —xcha'.

¹⁹ Tec'uchiri', xuc'am ri pam y xutioxij che ri Dios. Xuwech'o y xujach chique, jec'uwa' xubi'ij:

—E nucuervo wa', ri caya'i' pa camic iwuma ri'ix. Ec'uchiri' qui'an tak wa' chikawach apanok, chi'ana' cuxtabal we ri'in —xcha'.

²⁰ Q'uisbal c'u re ri cena, xuc'am tanchi ri c'olibal c'o vino chupa y jewa' xubi'ij:

—Wa' ri ri' e ri c'ac' tzij[☆] cajiquibax uwach ruc' ri nuquiq'uel caturuw iwuma ri'ix re cuybal imac. ²¹ Yey ec'u ri cac'ayin we'in, c'o wuc' junam chwa wa mexa. ²² Ec'u Ralaxel Chiquixo'l Ticawex e caric'owibej janipa ri ubi'im lo ri Dios puwi Rire. Pero jlic c'u tok'o' uwach rachi cac'ayin re! —xcha'.

²³ Ec'uchiri' xquijek rutijo'n caquitz'onobej chiquiwach china nawi chique ca'anaw wa'.

China ri más c'o uwach chwach ri Dios

²⁴ Rutijo'n ri Jesús caquichapala' quib chiquiwach puwi' chinok chique más c'o uwach. ²⁵ No'j ri Jesús xubi'ij chique:

«Ri reyes que ri nimak tinamit lic quic'ow uwi' ri quitakanic caqui'an paquiwi ri winak. Na ruc' ta c'u ri', caquibi'ij che quib: “E to'bel que ri tinamit.”

²⁶ »No'j ri'ix mi'an iwe pacha' ri caqui'an rique. China ri lic c'o uwach chixo'l, e chu'ana pacha' na jinta uwach; yey ri c'o puk'ab catakanic, e chuya'a rib cu'an nimanel.

²⁷ »Chiquiwach ri winak, ¿china c'u ri más c'o uwach, e ri catz'uyi' chwa ri mexa o e raj chac caniman chwa ri mexa? ¿Na e ta neba ri catz'uyi' chwa ri mexa? No'j ri'in in c'o chiwach ri'ix pacha' raj chac canimanic.

²⁸ Yey ri'ix ix c'oji'nak wuc' che ri c'axc'obic in ic'owinak wi. ²⁹ »Cambi'ij c'u chiwe: Pacha' ri Nukaw uya'om panuk'ab ri'in quintakanic, jec'ula'

can'an ri'in chiwe ri'ix, canya pik'ab quixtakanic ³⁰ cha' jela' quixwa' chwa ri numexa chupa ri nutakanic y quixtz'uyi' c'ut re quixtakan paquiwi ri cablajuj tinamit re Israel»† xcha'.

Ri Jesús cuk'alajisaj ri cu'an ri Pedro echiri' carewaj we reta'am uwach (Mt. 26:31-35; Mr. 14:27-31; Lc. 9:1-6; 10:1-4; Jn. 13:36-38)

³¹ Ec'u ri Kanimajawal xubi'ij:

—¡Simón, Simón, chatape'! E ri Satanás utz'onom che ri Dios cha' caya'taj che cuc'am ipa ri'ix. Quixuyiquiya' c'u ri' jela' pacha' ca'an che ri trigo echiri' capu' uwach. ³² No'j ri'in lic nutz'onom che ri Dios paw'i' ri'at, cha' na casach ta ri cubulibal ac'u'x wuc'. Ec'u ri' ri'at, echiri' cacubi' tanchi ac'u'x wuc', e chanimarisaj quic'u'x tak rawachbi'il —xcha'.

³³ Y ri Simón xubi'ij che:

—Wajawal, ri'in nuya'om wanima' quinterej chi'ij la, tob que'ec la pa cárcel; yey we xya' ne la pa camic, ri'in quincam junam uc' la —xcha'.

³⁴ Ec'u ri Jesús xuc'ul uwach:

—Pedro, pakatzij wi cambi'ij chawe: Wak'ab echiri' c'amaja' ne cabixon ri teren, ri'at oxlaj chic abi'im na aweta'am ta nuwach —xcha'.

Ri Jesús quebupixabaj rutijo'n

³⁵ Y chique rutijo'n xubi'ij:

—Echiri' xixintak bi che utzijoxic ri Utzilaj Tzij, ximbi'ij chiwe na quic'am tubi uc'olibal imeyo, na quic'am tubi iteb, na quic'am tubi jun chic mola'j ixajab,[☆] ¿c'o neba xajawax chiwe? —xcha chique.

Y rique xquic'ul uwach:

—Na jintaj —xecha'.

³⁶ Ec'uchiri', xubi'ij chique:

—No'j wo'ora, china ri c'o uc'olibal umeyo, chuc'ama bi; china ri c'o uteb, chuc'ama bi; y china ri na jinta espada ruc', chuc'ayij ruk'u' re pisbal rij y chulok'o juna espada. ³⁷ Ma cambi'ij c'u chiwe lic chirajawaxic wi

☆ 22:20 Jer. 31:31-34 † 22:30 “Ri cablajuj tinamit re Israel” e ri calc'o'al can ri cablajuj uc'ajol ri Jacob, ri cabi'x “Israel” che. Gn. 35:22-26 ☆ 22:35 Lc. 10:1-4

e cu'ana na wa tz'ibital can panuwi ri'in chupa Ruch'a'tem ri Dios:

X'an che pacha' juna aj palajiy tzij *Is.*

53:12

cacha'. Ec'u janipa ri tz'ibital can panuwi ri'in, e lic cu'ana na —xcha'.

³⁸ Ec'uchiri', xquibi'ij rique che ri Jesús:

—Kajawal, ri' queb espada c'o kuc' —xecha'.

No'j rire xubi'ij chique:

—¡Cu'an na la! Mixch'a't chi puwi wa' —xcha'.

Ri Jesús cu'an orar pa ri werta Getsemani

(Mt. 26:36-46; Mr. 14:32-42)

³⁹ Tec'uchiri', xel bi ri Jesús. Xe'ec chwa ri juyub Olivos, y rutijo'n xeterej bi chirij. ⁴⁰ Echiri' xebopon chila', jewa' xubi'ij chique:

—Lic chitz'onoj che ri Dios cha' quich'ij uchuk'ab ri c'ambal ipa capetic —xcha'.

⁴¹ Ec'uchiri', rire xbin chi pan jubik' más chiquiwach, xuxucuba' rib y xujek cach'a't ruc' ri Dios, ⁴² jewa' cubi'ij:

«Lal Nukaw, we utz chiwach la, chincolobej co la cha' na quinic'ow ta chupa wa' wa c'axc'obic. No'j na e ta c'u chu'ana ri cuaj ri'in, ma e chu'ana janipa ri rajawal c'u'x Rilal» xcha'.

⁴³ Ec'uchiri', xwinakir jun ángel re chicaj chwach re colu'ya'a unimal uchuk'ab. ⁴⁴ Y chupa c'u ri' runimal uc'axc'olil, ri Jesús xujek cu'an orar ruc' unimal uchuk'ab. Ruma c'u la' xujeko nimak t'oba'j quic' ruc'atan catzak chwa rulew.

⁴⁵ Echiri' xuq'uis cu'an orar, xyactajic, xtzelej lo pa e c'o wi can rutijo'n y xebo'lu'rika' quewaric ruma ri bis oquinak chiquic'u'x. ⁴⁶ Xubi'ij c'u chique:

—¿Su'be quixwaric? Chixyactajok y chitz'onoj che ri Dios cha' jela' quich'ij uchuk'ab ri c'ambal ipa capetic —xcha'.

Cachap bi ri Jesús

(Mt. 26:47-56; Mr. 14:43-50; Jn. 18:2-11)

⁴⁷ C'a cach'a't ne ri Jesús, echiri' xebopon uq'uiyal winak lic quewokokic. Yey ri Judas, jun chique ri cablajuj utijo'n ri Jesús, nabe bi chiquiwach ruq'uiyal winak. Rire xkib ruc' ri Jesús cha' cutz'ub uchi'. ⁴⁸ Ec'u ri Jesús xubi'ij che:

—Judas, ¿e la' ruc' jun tz'ubuj chi'aj cac'ayij Ralaxel Chiquixo'l Ticawex? —xcha'.

⁴⁹ Ri e c'o ruc' ri Jesús, echiri' xquilo sa' ri catajinic, xquitz'onoj che:

—Kajawal, ¿utz nawi cojch'o'jin ruc' espada? —xecha'.

⁵⁰ Ec'uchiri', jun chique rutijo'n xujochij bi ruxiquin uwiquik'ab ri raj chac ri cajawal raj chacunel pa Rocho Dios.

⁵¹ Pero ri Jesús xubi'ij chique:

—¡Mi'an chi wa! —xcha'. Xuchap c'u ruxiquin raj chac y xucunaj. ⁵² Tec'uchiri', xubi'ij chique ri e petinak che uchapic bi, wa' e ri nimak e aj chacunel pa Rocho Dios, ri e aj wach que ri e chajinel re ri Rocho Dios y ri nimak winak re ri tinamit:

—¿Su'chac petinak alak ruc' espada y che'? ¿Petinak cami alak che uc'amic bi juna elek'om? ⁵³ Ronoje k'ij wa' c'ut in c'o uc' alak pa ri Rocho Dios. ¿Su'chac c'u ri' c'a e la' quino'lchapa alak? No'j ec'u wa' xopon ri ora ya'tal che alak echiri' ri rajaw ri k'eku'm cuc'ut ruchuk'ab —xcha'.

Ri Pedro cubi'ij na reta'am ta uwach ri Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Xquichap c'u bi ri Jesús y xquic'am bi chirocho ri cajawal raj chacunel pa Rocho Dios. Y ri Pedro chinimanaj teran pan chirij. ⁵⁵ E c'o c'u jujun xquinuc' ak' che ruwa ja, y xetz'uyi' chuchi' ri ak'. Yey ri Pedro xtz'uyi' chiquixo'l. ⁵⁶ C'o c'u jun ali aj chac xril ri Pedro tz'ul chuchi' ri ak'. Rali lic xutzutza' uwach y jewa' xubi'ij:

—Wa' wa'chi e jun chique ri eteran chirij ri Jesús —xcha'.

⁵⁷ No'j ri Pedro jewa' xubi'ij che:

—Ali, ri'in na weta'am ta uwach —xcha'.

⁵⁸ Jok'otaj c'u ri' c'o jun achi xrilo y jewa' xubi'ij che:

—Rilal lal jun chique rutijo'n ri Jesús —xcha'.

No'j ri Pedro xubi'ij che rachi:

—Ri'in na in ta jun chique rutijo'n —xcha'.

⁵⁹ Laj pa jun ora c'u ri' c'o tanchi jun jewa' xubi'ij:

—Pakatzij wi wa' wa'chi e jun chique rutijo'n ri Jesús, ma aj Galilea —xcha'.

⁶⁰ No'j ri Pedro xubi'ij che:

—Achi, ri'in na weta'am tane sa' puwi' cach'a't la —xcha'. C'a cach'a't ne ri Pedro echiri' xbixon lo ri teren.

⁶¹ Ec'uchiri', ri Kanimajawal xtzu'n lo chirij y e xutzu' lo uwach ri Pedro. Ec'u ri Pedro xc'un chuc'u'x sa' rubi'im can ri Kanimajawal che: «C'amaja' ne cabixon ri teren, ri'at oxlaj chic abi'im na aweta'am ta nuwach.»

⁶² Ewi ri Pedro xel bi chiri' y lic xok'ic ruma ruc'axc'olil uc'u'x.

Ri Jesús cach'amixic

(Mt. 26:67-68; Mr. 14:65)

⁶³ Rachijab echajiyom re ri Jesús lic caquich'amij y lic caquich'ayo.

⁶⁴ Caquich'uk ruwach y caquitz'onoj che:

—¡Chana'ij pe' china xch'ayaw awe! —quecha'. ⁶⁵ Lic kabichi ri caquibi'ij che ruc' c'axlaj ch'a'tem.

Ri Jesús c'o chiquiwach raj k'atal tzij e aj judi'ab

(Mt. 26:59-66; Mr. 14:55-64; Jn. 18:19-24)

⁶⁶ Echiri' xsakiric, xquimol quib ri nimak winak re ri tinamit, ri nimak e aj chacunel pa Rocho Dios cuc' raj c'utunel re ri tzijpaxab; wa' e tak ri uchapom wi rib ri k'atbal tzij. Rique xquitak uc'amic ri Jesús chiquiwach y jewa' xquibi'ij che:

⁶⁷ —Chabi'ij chike we at ri Cristo, Rucha'o'n lo ri Dios —xecha'.

Y ri Jesús xubi'ij chique:

—Tob cambi'ij che alak “In”, na ca-coj ta alak. ⁶⁸ Yey we can'an tz'onobal che alak, na cac'ul ta alak uwach y na quintzokopij tane ubi alak. ⁶⁹ Pero Ralaxel Chiquixo'l Ticawex catz'uyi' na c'u puwiquik'ab ri Dios, ri lic c'o unimal uchuk'ab —xcha'.

⁷⁰ Tec'uchiri', conoje xquitz'onoj che ri Jesús:

—¿At pe' ri' Ruc'ajol ri Dios? —xecha che.

Y ri Jesús xuc'ul uwach:

—E ralak xbi'n alak re, e ri'in —xcha'.

⁷¹ Ec'uchiri', xquibi'ij rique:

—Na junta chi uchac más e aj cojol umac, ma lic oj xojtaw re ri xubi'ij ruc' ruwa re' —xecha'.

23

Catz'ak uchi' ri Jesús chwach ri takanel Pilato

(Mt. 27:11-14; Mr. 15:1-5; Jn. 18:33-40)

¹ Ec'uchiri', xeyactaj conoje ri quimolom quib y xquic'am bi ri Jesús chwach ri Pilato. ² Y xquijek c'u caquitz'ak uchi', jewa' caquibi'ij:

—Karikom wa jun achi cusachisaj quina'oj ri katinamit, quebuk'atej ri winak cha' na caqui'an ta ri tojonico ca'an che ri nimalaj takanel re Roma* y cubi'ij e rire ri Cristo, ri cha'tal lo ruma ri Dios re catakan paquiwi raj judi'ab —quecha'.

³ Xutz'onoj c'u ri Pilato che ri Jesús:

—¿Lal cami ri' ri rey que raj judi'ab? —xcha'.

Y ri Jesús xubi'ij che:

—Lal cabi'n la re —xcha'.

⁴ Ri Pilato xubi'ij c'u chique ri nimak e aj chacunel pa Rocho Dios y chique conoje ri winak:

—Chinuwach ri'in, wa jun achi na junta umac —xcha'.

⁵ Pero ri winak más co quesiq'uinic, jewa' caquibi'ij:

—Ruc' ri cuc'utu lic catajin us-achic quina'oj ri ticawex chupa tak ri luwar re Judea; xujek lo wa' Galilea y

* 23:2 Wa xquibi'ij ri winak chirij ri Jesús, na e ta c'ana u'anom. Lc. 20:22-25

wo'ora jela' cu'an wara Jerusalem — quecha'.

Ri Jesús cac'am bi chwach ri rey Herodes

⁶ Echiri' ri Pilato xuto petinak ri Jesús Galilea, xutz'onobej we rire aj chila'. ⁷ Y echiri' xreta'maj aj Galilea ri Jesús, xutak bi chwach ri Herodes, ma rire e rey re chila', yey la' la' k'ij wi c'o ri Herodes chiri' Jerusalem.

⁸ Ec'uchiri' ri Herodes xril uwach ri Jesús, lic xqui'cotic, ma lic c'o tan k'ij ri' urayim caril uwach. Ma sa'ch tak ri utom che yey roye'em caril uwach cha' ri Jesús cu'an juna c'utubal re ruchuk'ab chwach. ⁹ Y xujek c'u u'anic uq'uiyal tz'onobal che, pero ri Jesús na cuc'ul ta uwach.

¹⁰ Ec'u ri nimak e aj chacunel pa Rocho Dios cuc' raj c'utunel re ri tzijpixab, lic quesiq'uin che ucojic umac ri Jesús. ¹¹ Ewi ri Herodes cuc' rusoldados lic xquic'ak bi uk'ij ri Jesús; xqui'an che pacha' juna rey, xquicoj bi jun chomilaj c'ul che re ch'amibal re. Tec'uchiri', xtakan che cac'am tanchi ubi chwach ri Pilato. ¹² Chupa la' la' jun k'ij ri Pilato y ri Herodes xquijek quech'aw tanchi chiquiwach, ma e ri petinak lok lic tzel caquil quib.

Cak'at tzij re camic puwi ri Jesús (Mt. 27:15-31; Mr. 15:6-20; Jn. 19:1-16)

¹³ Ec'u ri Pilato xumol quichi' ri nimak e aj chacunel pa Rocho Dios cuc' raj wach re ri tinamit yey tak ri winak, ¹⁴ y jec'uwa' xubi'ij chique:

—C'amom lo alak wa jun achi chinuwach y cabi'ij alak rire catajin che usachic quina'oj ri winak re ri tinamit. No'j ri'in xin'an tz'onobal che y xinta uchi' chiwach alak, yey na jinta juna mac nurikom chirij pacha' ri mac cacoj alak che. ¹⁵ Y jenela' ri rey Herodes, na jinta juna mac xurik che; ma xintak bi chwach, yey rire xutak tanchi lo wuc'. K'alaj c'u ri na jinta mac u'anom re takal che cacamisaxic. ¹⁶ E uwari'che xew canya

pa c'ax; tec'uchiri' canyolopij bi — xcha'. ¹⁷ (Xubi'ij wa' ma ronoje junab chupa ri nimak'ij Pascua, ri Pilato xex cu'an wi cuyolopij bi jun preso chiquiwach ri winak.)

¹⁸ No'j conoje ruq'uiyal winak junam lic co xesiq'uin che ubi'xiqul:

—¡E taka bi la ri Jesús pa camic yey yolopij bi la ri Barrabás! —xecha'.

¹⁹ (Wa'chi Barrabás ya'om pa cárcel ruma utitz'itiquil u'anom Jerusalem chirij ri gobierno romano y ruma jun camic xu'ano.)

²⁰ Ri Pilato xch'a't tanchi cuc' ri winak, ma rire e caraj cuyolopij bi ri Jesús.

²¹ No'j ri winak xesiq'uin tanchi che ubi'xiqul:

—¡Camisax chwa cruz! ¡Camisax chwa cruz! —quecha'.

²² Churox laj c'u ri' ri Pilato jewa' xubi'ij:

—¿Sa' c'u rumac wa'chi u'anom? Ma ri'in na jinta juna mac nurikom chirij re takal che cacamisaxic. Canya na pa c'ax, tec'uchiri' canyolopij bi —xcha'.

²³ No'j ri winak na caquitanaba' taj lic co quesiq'uin che utz'onoxic cacamisax ri Jesús chwa cruz.

Q'uisbal c'u re, xya'taj na chique ri cacaj. ²⁴ Ewi ri Pilato xutak u'anic ri caquitz'onoj: ²⁵ xuyolopij c'u bi ri jun ya'om pa cárcel ruma utitz'itiquil u'anom chirij ri gobierno romano y ruma jun camic xu'ano, ma e xquitz'onoj ri' ri winak. Y xuya luwar cacamisax ri Jesús, jela' pacha' ri cacaj rique.

Rucamic ri Jesús chwa ri cruz (Mt. 27:32-56; Mr. 15:21-41; Jn. 19:17-30)

²⁶ Ec'uchiri', ri soldados xquic'am bi ri Jesús re que'quicamisaj chwa ri cruz. Echiri' c'o chi be, xquichap bi jun achi aj Cirene, Simón rubi', petinak pa juyub e ri' quic'ow chiril. Y xquiya bi ri cruz chwi uteleb cha' cutelej bi chirij ri Jesús.

²⁷ Y lic uq'uiyal winak eteran bi. Y e c'o ixokib chiquixo'l lic quetunanic

y cacok'ej ri Jesús, ma lic c'ax una'om quic'u'x ruma ri ca'an che. ²⁸ No'j ri Jesús xebutzu' pan rixokib quebok'ic y jewa' xubi'ij chique:

—Ixokib ix aj Jerusalem, miniwok'ej ri'in; e chiwok'ej ri catajin lo piwi ri'ix y paquiwi' ri iwalc'o'al. ²⁹ ¡Chitape! Copon na ri k'ij echiri' cabi'xic: “Nim quik'ij calaxic rixokib na quebalan taj cuc' ri na junta calc'o'al y ri na quetz'umtisan taj” jela' cabi'xic. ³⁰ Ruma c'u ri' ri unimal c'axc'obic e c'o wi, ri winak cacaj quecamic y jec'uwa' caquibi'ij che tak ri juyub nima'k y ch'uti'k:

Chix-tzaka lo pakawi'

re quich'uk kawi' *Os. 10:8* quecha'. ³¹ Ma we caya' pa camic junok na junta umac, ¿sa' c'u ri' ri caquic'ulumaj ri lic c'o quimac?† —xcha'.

³² Yey ec'amom bi junam ruc' ri Jesús ca'ib elek'omab cha' quecamisax chwa cruz. ³³ Echiri' xebopon pa ri luwar cabi'x che “Luwar re Ubakil Ujolom Anima”, chiri' xya' wi ri Jesús chwa ri cruz; y ri ca'ib elek'omab, jun xya' puwiquik'ab y jun pumox Rire.

³⁴ Ewi ri Jesús xubi'ij:

—Nukaw, cuyu la quimac, ma na quimajom ta usuc' sa' wa quetajin che u'anic —xcha'.

Ec'u ri soldados ruc' jun sorteo xquijach quib puwi ruk'u'.[☆] ³⁵ Y ruq'uiyal winak xa caquitzutza' ri catajin u'anic. Yey ne raj wach re ri tinamit caquich'amij ri Jesús, jewa' caquibi'ij:

—Lic wa' c'ut e q'ui ri xebucolobej che tak yabil y che camic. We ta rire e ri Cristo, Rucha'o'n lo ri Dios, chucolobej rib ri' wo'ora, —quecha'.

³⁶ Jec'ula' ri' xqui'an ri soldados, lic caquich'amij ri Jesús. Quekib ruc' y

caquibi'tisij vinagre che re cutijo, ³⁷ y jewa' caquibi'ij che:

—We ta pakatzij wi at ri rey que raj judi'ab, chacolobej c'u awib ri' —quecha'.

³⁸ Chwi c'u lo ri cruz re ri Jesús, pa ri ch'a'tem griego, pa ri ch'a'tem latín y pa ri ch'a'tem hebreo tz'ibital wa': «WA' E REY QUE RAJ JUDI'AB.»

³⁹ Y jun chique ri ca'ib elek'omab eya'om chwa cruz, lic cuch'amij ri Jesús, jewa' cubi'ij:

—¿Na at ta neba ri Cristo, Rucha'o'n lo ri Dios? Chacolobej c'u awib ri' junam kuc' ri'oj —cacha'.

⁴⁰ No'j ri jun chic elek'om xuyajo, jewa' xubi'ij che ri rachbi'il:

—Ri'at na caxi'ij ta c'ana awib chwach ri Dios, yey junam oj c'o pa wa c'axc'obic k'atom pakawi'.

⁴¹ Ri'at y ri'in pakatzij wi, takal chike cakac'ulumaj wa', ma e tojbal re ri na utz taj ka'anom. No'j wa'chi na junta umac —xcha'.

⁴² Ec'uchiri', xubi'ij che ri Jesús:

—Wajawal, chinc'una co chic'u'x la echiri' co'ltakana la —xcha'.

⁴³ Y ri Jesús xubi'ij che:

—Pakatzij wi cambi'ij chawe: Wak'ij ne ri' catopon wuc' chila' chupa ri chomilaj luwar‡ pa e c'o wi ri e colobetajinak —xcha'.

⁴⁴ Echiri' xtic'oj ri k'ij, xoc k'eku'm che ruwachulew y wa' xu'q'uisa c'a che ri urox ora§ benak k'ij; ⁴⁵ oxib ora na xwon ta ri k'ij. Yey chupa c'u ri Rocho Dios, ri telón** xrich'rob lo chunic'ajal.

⁴⁶ Ec'uchiri', ri Jesús lic co xch'awic, jewa' xubi'ij:

—Nukaw, pak'ab la cank'atisaj wi ri wanima![☆] —xcha'. Xew xubi'ij wa', asu xcamic.

⁴⁷ Ri capitán que ri soldados echiri' xrilo sa' ri xu'ano, xuyac uk'ij ri Dios, jewa' xubi'ij:

† **23:31** Pa ri ch'a'tem griego cubi'ij: “Ma we caqui'an wa' che juna che' rax uwach, ¿sa' c'u ri' cuc'ulumaj ri che' chaki'j?” Wa c'ambal na'oj que'elawi: Xya' ri Jesús pa camic, tob na junta umac; mac'uwarí' más c'ax ri takal chique raj Jerusalem, ma rique lic c'o quimac. ☆ **23:34** Sal. 22:18

‡ **23:43** Wa chomilaj luwar e ri cabi'x “Paraíso” che. § **23:44** “Ri urox ora”: Quil “hora” pa vocabulario. ** **23:45** “Telón”: E jun c'ul cujach upa ri Luwar Santo ruc' ri Luwar lic Santo. Éx.

26:31-33; Heb. 6:19; 9:3-12 ☆ **23:46** Sal. 31:5

—Pakatzij wi wa'chi lic jusuc' y na jinta umac —xcha'.

⁴⁸ Ec'u ruq'uuiyal winak echiri' xquilo sa' ri xu'ano, xebel chiri', caquit'ikit'a' ruwa quic'u'x ruma quixi'in ib. ⁴⁹ Yey c'u ri lic xqueta'maj uwach ri Jesús cuc' tak rixokib e petinak ruc' chwi xel lo Galilea, rique xec'oji' pana chinimanaj y xquil ronoje ri xu'ano.

Ri Jesús camukic

(Mt. 27:57-61; Mr. 15:42-47; Jn. 19:38-42)

⁵⁰ C'o c'u jun achi José rubi', aj Arimatea, jun tinamit re Judea. Rire e jun chique ri uchapom wi rib ri k'atbal tzij, jun achi lic utz uc'u'x y lic jusuc' rubinic usilabic. ⁵¹ Yey lic roye'em ruc'unibal rutakanic ri Dios. Ec'u rire lic na xuc'ul ta uc'u'x ri xqui'an ri rachbi'il. ⁵² Xopon c'u chwach ri Pilato y xu'tz'onoj che caya' luwar che cumuk rucuerpo ri Jesús. Y xya' luwar che. ⁵³ Xe'ec c'ut y xu'kasaj lo rucuerpo chwa ri cruz. Xupis c'u chupa jun manta. Tec'uchiri', xu'ya'a pa jun mukubal c'otom pa'abaj, yey wa' na jinta junok mukum chupa.

⁵⁴ Ec'u benak k'ij ri' echiri' raj judi'ab caquiyijba' pan janipa ri cajawax chique pa ri k'ij re uxlanibal, y wa' ya copon ru orayil.†† ⁵⁵ Yey rixokib e petinak lo Galilea ruc' ri Jesús, xeterej bi chirij ri José y xquil ri mukubal pa xquiya wi can rucuerpo ri Jesús. ⁵⁶ Echiri' xetzelej lok, xquijekela' uyijbaxic cunabal lic qui' ruxlab cha' que'quicojo che rucuerpo ri Jesús. Ec'uchiri' xoc ri k'ij re uxlanibal, xebuxlan c'ut pacha' ri cubi'ij Rutzij Upixab ri Dios.

24

Ruc'astajibal ri Jesús

(Mt. 28:1-10; Mr. 16:1-8; Jn. 20:1-10)

¹ Ri nabe k'ij re ri semana lic anim tan rixokib e petinak lo Galilea y

jujun chic ixokib, xebec pa mukutal wi ri Jesús, yey cuc'a'am bi cunabal lic qui' ruxlab, ri quiyijbam lok. ² Yey xe'quirika rabaj esam chi chuchi' ri mukubal. ³ Xeboc c'u bi chupa ri mukubal, pero na xquirik ta chi rucuerpo ri Kanimajawal Jesucristo. ⁴ Lic c'ut benak ri quina'oj puwi wa', echiri' xakic'ate't xewinakir ca'ib achijab chiquiwach, lic cawolk'in ri quik'u'. ⁵ Rixokib lic xquixi'ij quib y xquikasaj ri quipalaj pulew.

Ec'u ri ca'ib achijab xquibi'ij chique:

—¿Su'chac quitzucuj chiquixo'l ri ecaminak ri Jun c'aslic? ⁶ Rire na jinta chi wara, ma c'astajinak chi lo chiquixo'l ri ecaminak. C'una chic'u'x sa' rubi'im lo chiwe echiri' c'a c'o Galilea, ⁷ echiri' xubi'ij: “Lic chirajawaxic wi Ralaxel Chiquixo'l Ticawex caya' paquik'ab achijab aj maquib cha' cacamisax chwa cruz, no'j Rire cac'astaj lo churox k'ij”☆ —xecha'. ⁸ C'a ec'uchiri' xc'un chiquic'u'x rixokib ruch'a'tem ri Jesús.

⁹ Echiri' xetzelej lo chila' pa ri mukubal, xquitzijoj ronoje wa' chique ri junlajuj tako'n y chique conoje ri e c'o cuc'. ¹⁰ Ec'u ri xetzijon wa' e ri María ri aj Magdala, ri Juana, ri María uchu ri Santiago y jujun cachbi'il. ¹¹ Yey ri tako'n na xquicoj ta ri xquitzijoj rixokib, ma e chiquiwach rique, wa ixokib ech'u'jerinak.

¹² Ec'u ri Pedro xyactaj bi y lic canic xe'ec pa c'o wi ri mukubal re ri Jesús. Y echiri' xoch'in pan chupa, xrilo xew chi c'o can ri jutak raba'j c'ul pa xbolk'otix wi ri Jesús. Xe'ec c'ut lic caminak ranima' che ri xrilo y cutz'onoj chiribil rib sa' nawi wa'.

Ri Jesús cuc'ut uwach chiquiwach ri queb utijo'n chupa ri be re Emaús
(Mr. 16:12-13)

†† 23:54 Chiquiwach raj judi'ab, ri k'ij re uxlanibal cajeker echiri' coc rak'ab viernes y caq'uis echiri' coc rak'ab sábado. ☆ 24:7 Lc. 9:22; 18:31-33

13 Chupa la' la' k'ij, ca'ib chique rutijo'n quebin chupa ri be re que'ec pa raldea Emaús, wa' c'o lo pa once kilómetro che ri tinamit Jerusalem. 14 Xalok' c'u quebin chupa ri be, rique quech'a't chiquiwach puwi ri c'ac' ic'owinak. 15 Yey echiri' quech'a't chiquiwach, ri Jesús xkib cuc' y xerachbilaj bi. 16 Pero rique pacha' ch'ukutal ri quiwach, ma tob xquilo na xqueta'maj ta uwach.

17 Ec'u ri Jesús xubi'ij chique:

—¿Sa' puwi' cach'a't wi alak chupa wa be? ¿Y su'chac cabison alak? —xcha'.

18 Jun c'u chique, Cleofas rubi', xuc'ul uwach, jewa' xubi'ij:

—Laj xew rilal chique conoje ri ebinel e c'o Jerusalem na eta'am ta la sa' ri c'ac' ic'owinak chupa tak wa' wa k'ij —xcha'.

19 Xubi'ij c'u ri Jesús chique:

—¿Sa' ri xu'ano? —xcha'.

Ewi xquibi'ij che:

—E cojch'a't puwi ri xuc'ulumaj ri Jesús ri aj Nazaret, ri nimalaj k'alajisanel lic c'o uchuk'ab che tak ri cu'ano y ri cubi'ij; rire lic yacom uk'ij ruma ri Dios y cuma tak ri ticawex re ri tinamit. 20 Yey ri nimak e aj chacunel pa Rocho Dios cuc' raj wach re ri katinamit xquiya puk'ab ri takanel romano cha' cak'at tzij puwi' y camisax chwa cruz. 21 Chwi c'u rucamic e urox k'ij wa'. Yey ri'oj xcubi' kac'u'x e rire ri cucolobej ri katinamit Israel.

22 »Yey quisachisam ne kana'oj jujun ixokib ebare jun chikaxo'l ri'oj oj utijo'n can ri Jesús. Ma rique lic anim tan xebopon chupa rumukubal, 23 pero na xquirik ta chi rucuerpo ri Jesús. Xetzelej c'u lo kuc', caquitziyoj chike xewinakir jujun ángeles chiquiwach, yey wa' xquibi'ij chique: “Rire c'astajinak chi lo chiquixo'l ri ecaminak.” 24 Xebec c'u jujun chike ri'oj chupa rumukubal y e xquilo jela' pacha' ri quibi'im rixokib chike. No'j na xquil ta uwach ri Jesús —xecha'.

25 Ec'u ri Jesús xubi'ij chique:

—¡Tok'o' wach alak ma lic na camaj ta alak usuc' y camayin alak che ucojic janipa ri quibi'im can ri k'alajisanelab! 26 ¿Na chirajawaxic ta neba ri Cristo, Rucha'o'n lo ri Dios, cutij na ronoje wa c'axc'obic y tec'uchiri' que'ec chila' chicaj pa cayac wi uk'ij? —xcha'.

27 Xuk'alajisaj c'u chique ronoje ri cubi'ij chupa Ruch'a'tem ri Dios chwi Rire, xujek lo ruc' ri tz'ibital can ruma ri Moisés yey tec'uchiri' xuk'alajisaj janipa ri tz'ibital chwi Rire cuma conoje ri k'alajisanelab.

28 Ec'uchiri' xebopon chupa raldea pa quebec wi ri queb achijab, ri Jesús xu'an pacha' e ri' xumaj chubi rube.

29 Pero rique lic xebelaj che cacanañ can cuc', jewa' xquibi'ij che:

—Canaj can la kuc', ma benak chi ri k'ij yey ya coc rak'ab —xecha'.

Ri Jesús xoc c'u bi y xcanaj can chiri' cuc'. 30 Echiri' e c'o chi chwa ri mexa, xuc'am ri pam y xtioxin chwach ri Dios, xuwech' c'u upa y xuya chique. 31 C'a ec'uchiri' xjakataj ri quiwach y xqueta'maj uwach. Pero ri Jesús e la' chiquiwach xmalca'nic.

32 Xquibi'ij c'u ri' chiquiwach:

—¿Na camik'mot ta neba kac'u'x che qui'cotemal echiri' rire cach'a't kuc' pa ri be y cuk'alajisaj chike Rutzij Upixab ri Dios? —xecha'.

33 Na jampatana xeyactajic y xetzelej Jerusalem. Chiri' xebo'lquirika ri junlajuj tako'n quimolom quib cuc' ri cachbi'il. 34 Y rique xquibi'ij chique wa ca'ib: «¡Pakatzij wi c'astajinak lo ri Kanimajawal Jesucristo ma xilitaj uwach ruma ri Simón!» quecha'.

35 Yey la ca'ib xquijek utzijoxic sa' ri xquic'ulumaj chupa ri be echiri' xebec Emaús y su'anic xqueta'maj uwach ri Jesús echiri' xuwech' upa ri pam.

Ri Jesús cuc'ut uwach chiquiwach rutijo'n

(Mt. 28:16-20; Mr. 16:14-18; Jn. 20:19-23)

36 C'a quetajin ne che uch'a'tibexic ri quilom y ri quitom, echiri' ri Jesús xwinakir chiquiwach, xakic'ate't

xtaq'ui' chiquixo'l y jewa' xubi'ij chique:

—C'ola utzil chomal iwuc' —xcha'.

³⁷ Yey rique lic xquixi'ij quib che, ma e chiquiwach rique laj juna espíritu ri caquitzutza' uwach. ³⁸ No'j ri Jesús xubi'ij chique:

—¿Su'chac cuxi'ij rib ic'u'x y na quicoj taj we in c'aslic? ³⁹ Chiwilape ri nuk'ab y ri wakan; chichapape ruc' rik'ab y jela' quiwil chi utz lic in ri in c'o iwuc' y na xa ta in juna espíritu, ma juna espíritu na jinta uti'jil y na jinta ubakil pacha' ri quiwil chwe ri'in —xcha'.

⁴⁰ Y ec'uchiri' cubi'ij wa', xuc'ut ruk'ab y ri rakan chiquiwach. ⁴¹ Ec'u rique lic quequi'cotic y caminak canima' che yey na caquirik taj su'anic caquicoj ri caquilo.

Ec'uchiri', ri Jesús xubi'ij chique:

—¿Sa' ri c'o iwuc' re catijic? — xcha'.

⁴² Xquiya c'u che, juch'akap car bolom y uwa'al cab c'a c'o pa cera.

⁴³ Ewi Rire xuc'amo y xutij chiquiwach.

⁴⁴ Ec'uchiri', xubi'ij chique:

—E nubi'im lo wa' chiwe echiri' c'a in c'o iwuc':[☆] Lic chirajawaxic wi cu'ana na janipa ri tz'ibital can panuwi ri'in chupa ri Tzij Pixab re ri Moisés, chupa ri quitz'ibam can ri k'alajisanelab y chupa tak ri Salmos —xcha'.

⁴⁵ C'a tec'uchiri' xujak ri quina'oj cha' caquimaj usuc' chi utz Rutzij Upixab ri Dios. ⁴⁶ Xubi'ij c'u chique:

—Jewa' ri tz'ibital can pa Ruch'a'tem ri Dios: Lic chirajawaxic wi ri Cristo, Rucha'o'n lo ri Dios, cutij c'ax, cacamic y cac'astaj lo churox k'ij;[☆] ⁴⁷ y chupa c'u rubi', catzijox ri Utzilaj Tzij re tzelebal tzij y re cuybal mac chique conoje ruq'uiyal quiwach tak ri ticawex e c'o che ruwachulew, yey cajeker utzijoxic wa' Jerusalem. ⁴⁸ Ri'ix quibi'ij c'u ri' chique ri winak janipa tak wa xiwilo y xito. ⁴⁹ Chitape': Ri'in cantak

lo piwi ri'ix ri Jun* ubi'tisim lo ri Nukaw; pero chixc'ola wara chupa wa tinamit Jerusalem cha' quiwoy'ej na quic'ul wa chuk'ab cape chila' chicaj —xcha'.

Ri Jesús catzelej chila' chicaj

(Mr. 16:19-20)

⁵⁰ Ec'uchiri', ri Jesús xebuc'am bi rutijo'n y xebec chunakaj Betania. Xuyac c'u ruk'ab paquiwi' y xebu'an bendecir. ⁵¹ Echiri' catajin che u'anic wa', xujeko xel bi chiquixo'l y xc'am c'u bi chila' chicaj.

⁵² Ewi rutijo'n lic xquilok'nimaj uk'ij ri Jesús. Tec'uchiri' xetzelej chupa ri tinamit Jerusalem ruc' unimal qui'cotemal chupa ri canima'. ⁵³ Y xaki e c'o chupa ri Rocho Dios, quebixonic y caquiyac uk'ij ri Dios. Amén.

☆ 24:44 Lc. 9:22; 18:31-33 ☆ 24:46 Is. 53:1-12; Os. 6:2

* 24:49 Wa' e ri Santowilaj Ruxlabixel ri

Dios. Jl. 2:28-29; Jn. 14:16-17

Ri Utzilaj Tzij re Jesucristo tz'ibital can ruma ri Juan

Ri Tzij re ri Dios

- ¹ Che ri jekebal lo re ruwachulew, xex chi c'o lo wi ri Tzij;*
ri Tzij xex chi c'o lo wi ruc' ri Dios yey ri Tzij e ri Dios.
- ² Ec'u ri Jun cabi'x "Ri Tzij" che, xex chi c'o lo wi ruc' ri Dios chwi echiri' c'amaja' ne cajeker lo ruwachulew.
- ³ Ruma ne Rire, ri Dios xu'an ronoje ri c'o che ruwachulew.
We tamaji Rire, na cu'an ta ri' ri Dios janipa ri c'olic.
- ⁴ Ruc' c'u Rire c'o wi ri c'aslemal, yey wa c'aslemal e K'ijsak chique ri ticawex.
- ⁵ Ri K'ijsak cawon chupa ri k'eku'm, y ri k'eku'm na cuch'ij ta c'ana uchupic.
- ⁶ C'o jun achi Juan rubi' yey rire takom lo ruma ri Dios. ⁷ Ri Juan xc'unic cha' cuk'alajisaj ri K'ijsak. Xolu'tzijoj c'u ri K'ijsak cha' jela' ri ticawex caquicoj ri K'ijsak. ⁸ Ri Juan na e ta ri K'ijsak, pero rire xc'unic re co'ltzijon puwi ri K'ijsak.
- ⁹ Ri sakil K'ijsak c'uninak che ruwachulew,
e cak'alajisan runa'oj ri Dios chiquiwach tak ri ticawex.
- ¹⁰ Tob Rire e 'anayom re ronoje ri c'o che ruwachulew;
echiri' xc'un che ruwachulew,
tak ri winak na xqueta'maj ta uwach.
- ¹¹ Rire xc'un cuc' rutinamit,
pero rutinamit na xquic'ul taj.
- ¹² Conoje c'u ri' ri xquic'ulu y xquicoj rubi',
xya'taj chique quebu'an e ralc'o'al ri Dios.
- ¹³ Ec'u rique xebu'an ralc'o'al ri Dios,†

na cuma ta ri quichu-quikaw
na ruma ta rayibal que ticawex,
yey na ruma tane ri xraj juna achi;
ma e ruma ri xraj ri Dios.
¹⁴ Ec'u wa Tzij* xu'an achi,
xjeki' c'u chikaxo'l ri'oj,
y xkil runimal uchomalil.
Y wa unimal uchomalil
e ri xuya ri Dios che Rire ruma xew
Uc'ajol ri',
yey Rire lic c'o unimal rutzil c'u'xaj y
sakil K'ijsak ruc'.

¹⁵ Ri Juan xtzijon chwi Rire, jewa' xubi'ij: «Puwi Rire nubi'im chi lo wa': E ri Jun catajin lo chwij, más c'o uwach chinuwa ri'in ma Rire xex chi c'o lo wi echiri' c'amaja' quinalax ri'in» xcha'.

¹⁶ Che ronoje tak ri c'o puk'ab,
kac'amom co ke'oj,
ma ri unimal rutzil uc'u'x kuc' xaki
ule'om rib.

¹⁷ Ri Tzij Pixab xya' ruma ri Moisés;
no'j ri unimal rutzil uc'u'x ri Dios y ri
K'ijsak
e xk'alajin ruma ri Kanimajawal Je-
sucristo.

¹⁸ Na jinta junok iliyom uwach ri
Dios;
pero ri'oj xketa'maj uwach ruma ri
Jun lic xa jun uc'u'x ruc' ri Dios,
wa' e Ruc'ajol ri Dios, ri lic xew
Uc'ajol ri'.

Raj judi'ab caquitz'onoj che ri Juan Aj Ya'l Bautismo china rire

(Mt. 3:11-12; Mr. 1:7-8; Lc. 3:15-17)

¹⁹ E c'o jujun e aj judi'ab re ri tina-
mit Jerusalem xequitak lo raj cha-
cunel re ri Rocho Dios y raj levitas
ruc', cha' caquitz'onoj che ri Juan
china rire. Yey ri c'ulubal uwach
xuya'o, lic k'alaj; ²⁰ na jinta c'o xrewaj
chique. Jec'uwa' xuk'alajisaj chique:
—Ri'in na in ta Rucha'o'n lo ri Dios
—xcha'.

²¹ Ec'uchiri', xquitz'onoj tanchi
che:

* **1:1** "Ri Tzij" e ri Kanimajawal Jesucristo ma e Rire ri cuk'alajisaj ri Dios chike. † **1:13** Raj judi'ab xquich'ob rakan rique e ralc'o'al ri Dios xa cuma e ralc'o'al can ri Abraham, ri Isaac y ri Jacob. Pero ri kalaxibal chwach ri Dios na e ta pacha' ri quixu'manic ri ticawex che ruwachulew. * **1:14** Jn. 1:1

—¿Lal china c'u ri'? ¿Lal ri k'alajisanel Elías? —xecha'.

Y rire xubi'ij:

—Na in taj —xcha'.

Xquitz'onoj c'u che:

—¿Laj lal ri' ri jun k'alajisanel re ri Dios koye'em cac'unic? —xecha'.

Rire xuc'ul c'u uwach:

—Na in taj —xcha'.

²² Ec'uchiri', xquibi'ij tanchi che:

—¿Lal china c'u ri'? Ma ri'oj oj petinak re cakac'am bi juna c'ulubal uwach chique ri xetakaw lo ke'oj. Bi'ij la chike sa' ri wach la —xecha'.

²³ Y rire xuc'ul uwach:

—Ri'in in ri jun tzijonel casiq'uin che ubi'xiquil chupa ri luwar catz'intz'otic: “Suc'upij alak rube ri Kanimajawal” jela' pacha' ri tz'ibital can ruma ri k'alajisanel Isaías[☆] —xcha'.

²⁴ Ri etakom lok re quebo'lch'a't ruc' ri Juan, e cuq'uul ri fariseos.

²⁵ Xquitz'onoj c'u ri' che ri Juan:

—¿Sa' c'u uchac ri' caya la ri bautismo we na lal ta Rucha'o'n lo ri Dios, na lal tane ri Elías yey na lal tane ri jun k'alajisanel re ri Dios koye'em cac'unic? —xecha'.

²⁶ Ri Juan xuc'ul uwach:

—Ri'in canya ri bautismo ruc' ya', no'j chixo'l ralak c'o Jun na eta'am ta alak uwach. ²⁷ Ec'u wa' wa Jun catajin lo chwij ri'in, e ri Jun xex chi c'o lo wi echiri' c'amaja' quinalax ri'in y na takal tane chwe ri'in canquir ruwach ruxajab —xcha'.

²⁸ Ronoje wa' xu'an pa ri luwar Betábara, ch'aka ya' che ri nimaya' Jordán, pa cuya wi bautismo ri Juan.

Ri bautismo re ri Jesús

²⁹ Chuca'm k'ij c'ut ri Juan xril pan ri Jesús e ri' catajin roponic ruc' y jewa' xubi'ij:

«Chiwilape', wa' e ri K'apoj Bexex re ri Dios, ri quesán re ri quimac ri ticawex che ronoje ruwachulew.

³⁰ Puwi rire xintzijon wi echiri' ximbi'ij: “Chwij ri'in catajin lo jun

achi; rire más c'o uwach chinuwach ri'in. Wa' xex chi c'o lo wi echiri' c'amaja' quinalax ri'in.” ³¹ Ri petinak lok na xinweta'maj taj china ri jun catajin lok; na ruc' ta c'u ri', ri'in xinc'unic re canya ri bautismo ruc' ya', cha' jela' ri tinamit Israel caqueta'maj uwach rire» xcha'.

³² Xubi'ij c'u ri Juan:

«Ri'in xinwil ri Ruxlabixel ri Dios xkaj lo chicaj pacha' juna palomax y xc'o'ji' puwi rire. ³³ Ec'u ri petinak lok na xinweta'maj taj china ri jun catajin lok; pero ri xtakaw lo we ri'in cha' canya ri bautismo ruc' ya', jewa' xubi'ij chwe: “Echiri' cawil ri Santowilaj Ruxlabixel ri Dios cakaj lok y cac'o'ji' puwi jun achi, e rire ri cuya ri bautismo ruc' ri Ruxlabixel ri Dios.”

³⁴ Ec'u ri'in xinwilo y cank'alajisaj c'u wa': Pakatzij wi, rire e Uc'ajol ri Dios» xcha'.

Ri e nabe utijo'n ri Jesús

³⁵ Chuca'm k'ij c'ut, ri Juan c'o tanchi chiri' junam cuc' ca'ib chique rutijo'n rire. ³⁶ Echiri' xrilo xic'ow ri Jesús, jewa' xubi'ij:

—Chiwilape', wa' e ri K'apoj Bexex re ri Dios[‡] —xcha'.

³⁷ Echiri' ri ca'ib utijo'n ri Juan xquito xubi'ij wa', xeterej bi chirij ri Jesús. ³⁸ Ec'uchiri' ri Jesús xtzu'n chirij y xrilo eteran chirij, xubi'ij chique:

—¿Sa' ri quitzucuj? —xcha'.

Rique xquibi'ij che:

—Rabí (wa' que'elawi “lal tijonel”), ¿pachawi jekel wi la? —xecha'.

³⁹ Ri Jesús xuc'ul uwach:

—Chixpetok, cho'liwila' —xcha'.

Xebec c'ut, xquilo pa jekel wi Rire y xecanaj c'u can la jun benebal k'ij chiri' ruc', ma laj ucaj ora[§] chic. ⁴⁰ Ri Andrés ruchak' ri Simón Pedro, e jun chique ri ca'ib xquita ri xubi'ij ri Juan y xeterej bi chirij ri Jesús. ⁴¹ Ec'u ri Andrés nabe na xu'tzucuj ri ratz Simón; y echiri' xuriko, jewa' xubi'ij che:

[☆] 1:23 Is. 40:3 [‡] 1:36 “Bexex re ri Dios”: Jewa' xubi'ij ri Juan puwi ri Jesús ma Rire xo'lcam ruma ri kamac; x'an che pacha' ca'an rojertan echiri' cacamisax juna awaj puc'axel ri ticawex aj mac. Lv. 5:6; 16:3 [§] 1:39 “Ucaj ora”: Quil “hora” pa vocabulario.

—Ya xkarik ri Mesías —xcha'. (“Mesías” e que'elawi ri Cristo, Rucha'o'n lo ri Dios.) ⁴² Xuc'am c'u bi ri Simón pa c'o wi ri Jesús. Ec'u ri Jesús echiri' xril uwach, jewa' xubi'ij che:

—Ri'at at Simón, ruc'ajol ri Jonás; pero wo'ora rabi' cancojo e Cefas (wa' que'elok Pedro)** —xcha'.

Ri Jesús quebusiq'uij ri Felipe y ri Natanael

⁴³ Chuca'm k'ij c'ut, ri Jesús xraj xe'ec pa ri luwar re Galilea. Xe'ec c'ut y xuc'ul jun achi Felipe rubi' y xubi'ij che:

—Chat-tereja lo chwij —xcha'.

⁴⁴ Ri Felipe aj pa ri tinamit Betsaida, wa' e tinamit pa ejekel wi ri Andrés y ri Pedro. ⁴⁵ Ec'u ri Felipe xutzucuj ri Natanael y echiri' xuriko, jewa' xubi'ij che:

—Xkarik ri jun ri xtz'iban ri Moisés puwi' chupa ri Tzij Pixab, yey ri k'alajisanelab jenela' xetz'iban puwi': Wa' e ri Jesús, ruc'ajol ri José ri aj Nazaret —xcha che.

⁴⁶ Xubi'ij c'u ri Natanael:

—¿C'o neba utz quel lo chupa ri tinamit Nazaret? —xcha'.

Ri Felipe xuc'ul uwach:

—Sa'a, chawilape' —xcha'.

⁴⁷ Ri Jesús, echiri' xrilo catajin roponic ri Natanael ruc', jewa' xubi'ij:

—Wa jun achi catajin lo uc'unic, e jun sakil aj Israel y na jinta socoso'nic ruc' —xcha'.

⁴⁸ Ec'u ri Natanael xutz'onoj che:

—¿Cha'taj eta'am la nuwach? —xcha'.

Ri Jesús xubi'ij che:

—Ri'in xinwil pan awach echiri' c'amaja' ne catusiq'uij ri Felipe, echiri' at c'o chuxe' ri jun che' re higo —xcha'.

⁴⁹ Xubi'ij c'u ri Natanael che:

—Lal tijonel, rilal lal Uc'ajol ri Dios y ri Rey que raj Israel —xcha'.

⁵⁰ Ri Jesús xuc'ul uwach:

—¿Cacoj cami ri' wa' xa ruma ximbi'ij chawe xatinwil pan chuxe' ri

jun che' re higo? Chikawach apanok, cawil ne c'utubal más nima'k chwa tak wa' —xcha'.

⁵¹ Y xubi'ij ri Jesús:

—Pakatzij wi cambi'ij chiwe: Wa chikawach apanok quiwil ne ruwa caj jakalic y quebiwil ri ángeles re ri Dios quebak'anic y quekaj lo* chwi Ralaxel Chiquixo'l Ticawex —xcha'.

2

Jun c'ulaniquil pa ri tinamit Caná re Galilea

¹ Oxib k'ij ric'owic wa', x'an jun c'ulaniquil pa ri tinamit Caná re Galilea. Ruchu ri Jesús e jun chique ri e c'o chiri'. ² Ec'u ri Jesús, junam cuc' rutijo'n, xesiq'uix pa ri c'ulaniquil.

³ Yey c'amaja' ne caq'uis ri nimak'ij echiri' xq'uis ri vino. Ec'u ruchu ri Jesús xubi'ij che:

—Xq'uis ri vino quetajin che ujachic —xcha'.

⁴ Ri Jesús xuc'ul uwach:

—Tape la, ¿su'chac cabi'ij la wa' chwe ri'in? Ma c'amaja' copon ri ora cank'alajisaj nuwach —xcha'.

⁵ Ec'u ruchu ri Jesús xubi'ij chique ri queniman chiri':

—E 'ana alak ronoje ri cubi'ij rire che alak —xcha'.

⁶ Chiri' c'u ri' c'o wakib tena'x 'anatal ruc' abaj, wa' cac'oli' ya' chupa re quijosk'iquil raj judi'ab chwach ri Dios. Chujujunal tena'x, laj coc juna ochenta o juna cien litros ya' chupa.

⁷ Ri Jesús xubi'ij chique ri queniman chiri':

—Nojisaj alak che ya' tak wa tena'x —xcha'.

Ec'u rique xquinojisaj chi utz.

⁸ Ec'uchiri', ri Jesús xubi'ij chique:

—Wo'ora chesaj lo alak jubik' y c'ama bi alak che ri aj wach re wa nimak'ij —xcha'. Y rique jela' xqui'ano.

⁹ Ec'u ri aj wach re ri nimak'ij xuna' ri ya' 'anom vino che, tob na reta'am ta nenare' pa xpe wi. Xew ri queniman chiri' queta'am, ma e rique xebesan lo ri ya'. Ec'u ri aj

** **1:42** “Cefas” e jun ch'a'tem griego yey “Pedro” e jun ch'a'tem arameo. Ucabichal que'elawi “abaj”.

* **1:51** Gn. 28:12-13

wach xusiq'uij rala xc'uli'ic ¹⁰ y jewa' xubi'ij che:

—Conoje ri ticawex nabe na e caquijach ri chomilaj vino, yey echiri' ri echocom lic q'ui chi ri quitijom, c'a ec'uchiri' cajachi' ri xaki tob vino. No'j ri'at c'a e la' xawesaj lo ri sakil vino che wa q'uisbal re wa nimak'ij —xcha'.

¹¹ E nabe c'utubal wa' re ruchuk'ab ri Dios xu'an ri Jesús chila' Caná re Galilea. Ruc' wa' xuk'alajisaj ri unimal uwach uk'ij y ruma la' rutijo'n lic xcubi' quic'u'x ruc'.

¹² Echiri' ic'owinak chi wa', ri Jesús ruc' ruchu, cuc' tak ruchak' y rutijo'n xebec pa ri tinamit Capernaúm. Yey na xec'o'ji' ta chiri' uq'uiyal k'ij.

Ri Jesús queberesaj bi raj c'ay chupa ri Rocho Dios

(Mt. 21:12-13; Mr. 11:15-18; Lc. 19:45-46)

¹³ Xa nakaj chi c'o wi lo ri Pascua, wa' e quinimak'ij raj judi'ab. Ec'u ri Jesús xe'ec pa ri tinamit Jerusalem.

¹⁴ Chiri' pa ri Rocho Dios, xebu'rika ri e aj c'ay boyexab, bexex y palomax, cuc' ri e aj jachal uwach puak* etz'ul chiri'.

¹⁵ Ec'uchiri', ri Jesús xu'an jun asial y ruc' wa' xeberesaj lo pa ri Rocho Dios conoje rique junam cuc' tak ri bexex y ri boyexab e c'o pa c'ayij. Xuxulc'atila' tak bi ri quimexa ri e aj jachal uwach puak, y jela' xquichico'b bi ri puak. ¹⁶ Xubi'ij c'u chique raj c'ay que palomax:

—¡Chesaj bi alak tak wa'! ¡Ma'an alak c'aybal che ri Rocho ri Nukaw! —xcha'.

¹⁷ Ec'uchiri', xc'un chiquic'u'x rutijo'n ri tz'ibital pa Ruch'a'tem ri Dios pa cubi'ij wi:

Ruchajixic ri Ocho la

lic e ubis nuc'u'x ri'

Sal. 69:9

cache'.

¹⁸ Ec'u raj judi'ab xquitz'onoj che:

—¿Sa' ri c'utubal ca'an la chikawach cha' cakacojo ya'tal pak'ab la ca'an la wa'? —xecha'.

¹⁹ Ri Jesús xuc'ul uwach:

—We xwulij alak wa rocho ri Dios, xa pa oxib k'ij ri'in canyac tanchic —xcha'.

²⁰ Xquibi'ij c'u raj judi'ab che:

—Wa' wa Rocho Dios pa cuarenta y seis junab xutzin wi. ¿Cayac cami la ri rilal pa oxib k'ij? —xecha'.

²¹ Pero ri “Rocho Dios” xch'a't ri Jesús puwi', e rucuerpo Rire.

²² E uwari'che, echiri' xc'astaj lo chiquixo'l ri ecaminak, rutijo'n xc'un chiquic'u'x ri ubi'im chi lo chique. C'a ec'uchiri' xquimaj usuc' y xquicoj ri tz'ibital can chupa Ruch'a'tem ri Dios puwi ri Jesús y ri bi'tal can ruma Rire.

Ri Jesús reta'am sa' ri c'o pa canima' ri ticawex

²³ Echiri' c'o ri Jesús Jerusalem pa ri nimak'ij Pascua, lic e q'ui ri ticawex xquicoj rubi' Rire ruma xquil tak ri c'utubal re ruchuk'ab ri Dios xu'ano.

²⁴ No'j ri Jesús na xcubi' ta uc'u'x cuc' ma lic reta'am quiwach conoje.

²⁵ Na xajawax tane cabi'x che sa' ri caquich'ob rakan ri winak, ma Rire reta'am sa' ri c'o chupa ri canima'.

3

Ri Jesús cach'a't ruc' ri Nicodemo

¹ C'o jun achi Nicodemo rubi'; rire e cuq'u'il ri fariseos yey e jun aj wach que raj judi'ab. ² Rire xe'bina ruc' ri Jesús chak'ab y xubi'ij che:

—Lal tijonel, lic k'alaj lal takom lo la ruma ri Dios re co'lc'utun la chikawach, ma na junta junok ca'anaw janipa wa c'utubal ca'an la, we na junta ri Dios ruc' —xcha'.

³ Ec'u ri Jesús xubi'ij che:

—Pakatzij wi cambi'ij che'la: E junok we na calax ta tanchic, ri' na caya'taj ta che coc chupa rutakanic ri Dios —xcha'.

⁴ Ri Nicodemo xutz'onoj che:

—¿Su'anic c'u ri' calax junok e la' nim chic? ¿Utz neba la' camatzex tanchi ruma ruchu cha' calax tanchic? —xcha'.

⁵ Ri Jesús xuc'ul uwach:

* **2:14** Q'ui uwach ri puak caquic'am tak lo ri ticawex yey pa ri Rocho Dios xa jun uwach ri puak cac'ulic. E uwari'che caquijal uwach ri puak echiri' caquiya wa' re kasa'n.

—Pakatzij wi cambi'ij che'la: China ri na calax ta ruc' ya' y ruc' ri Ruxlabixel ri Dios, ri' na takal ta che coc chupa rutakanic ri Dios. ⁶ E junok calax cuma ruchu-ukaw, ri' lic rewi e jun ticawex; no'j ri calax ruma ri Ruxlabixel ri Dios, ri' c'o uc'aslemal chwach ri Dios. ⁷ Macam c'u anima' la che wa ximbi'ij che'la: “Lic chirajawaxic chique conoje ri ticawex quebalax na tanchic.” ⁸ E pacha' ri tew xa tob pa cawel el wi, xew cata la cajuxuxic, pero na eta'am ta la pa cape wi y pa cumaj wubi. Jec'ula' ri quebalax ruma ri Ruxlabixel ri Dios na quilitaj taj su'anic ri Dios cuya ri c'ac' quic'aslemal —xcha'.

⁹ Ec'u ri Nicodemo xutz'onoj tanchic:

—¿Su'anic cu'ana wa'? —xcha'.

¹⁰ Ri Jesús xuc'ul uwach:

—Lal tijonel chiquiwach raj Israel, ¿yey na eta'am tane la wa'? ¹¹ Pakatzij wi cambi'ij wa' che'la: Ri'oj e cakatzijoj janipa ri keta'am y ri kilom; na ruc' ta c'u ri', ralak na cacoj ta alak sa' ri cantzijoj che alak. ¹² We na cacoj ta alak echiri' quintzijon puwi tak ri xa re ruwachulew, ¿sa' c'u u'anic ri' cacoj alak echiri' quintzijon chiwach alak puwi tak ri re ri Dios c'o chila' chicaj? ¹³ Na jinta junok benak chila' chicaj, xew ri jun petinak chila', wa' e Ralaxel Chiquixo'l Ticawex. ¹⁴ Ma jela' pacha' xu'an ri Moisés echiri' xuyac jun cumatz chutza'm jun che' pa ri luwar catz'intz'otic;* jec'ula' lic chirajawaxic wi Ralaxel Chiquixo'l Ticawex cayaqui' chwa jun che'† ¹⁵ cha' china ri cacubi' uc'u'x ruc' Rire, na casach ta uwach, ma c'o uc'aslemal na jinta utakexic.

Ri rutzil uc'u'x ri Dios chique ri ticawex

¹⁶ »Ri Dios lic c'ax xebuna' ri e c'o che ruwachulew; y ruma c'u wa', xutak lo Ruc'ajol, ri lic xew Uc'ajol ri', cha' china ri cacubi' uc'u'x

ruc' Rire na casach ta uwach, ma c'o uc'aslemal na jinta utakexic. ¹⁷ Ma ri Dios na xutak ta lo Ruc'ajol che ruwachulew re colu'k'ata tzij paquiwi ri ticawex; ri xutak wulok e cha' quebolu'colobej. ¹⁸ China c'u ri cacubi' uc'u'x ruc' Ruc'ajol ri Dios, ri' na jinta ri k'atbal tzij re ri Dios puwi'; no'j china ri na cacubi' ta uc'u'x ruc', ri' c'o chi ri k'atbal tzij re ri Dios puwi' ruma na xucoj ta rubi' Ruc'ajol ri Dios, ri lic xew Uc'ajol ri'. ¹⁹ Yey ri k'atbal tzij cu'an ri Dios e ruma wa': Ri K'ijsak re ri Dios xc'un che ruwachulew, pero tak ri ticawex e más xuc'ul quic'u'x ri k'eku'malil re ri mac chwa ri K'ijsak; ma ri quetajin che u'anic, lic na chom taj. ²⁰ Conoje ri caqui'an ri na utz taj, tzel caquil ri K'ijsak y na quekib ta ruc' cha' na cak'alajin ta ri na utz taj quetajin che u'anic. ²¹ No'j conoje ri caquitijoj quib che jun sakil binic silabic, ri' quekib chwach ri K'ijsak cha' cak'alajinic, ri quetajin che u'anic e ri caraj ri Dios chique — xcha'.

Ri Juan Aj Ya'l Bautismo cuyac uk'ij ri Jesús

²² Tec'uchiri', ri Jesús junam cuc' rutijo'n xebec Judea; uq'uiyal k'ij xc'o'ji' chiri' cuc' y cuya ri bautismo chique ri ticawex. ²³ Ec'u ri Juan catajin che uya'ic ri bautismo pa ri tinamit Enón chunakaj Salim, ma chila' lic c'o ya'. Quebopon c'u ri ticawex ruc' cha' caquic'ul ri bautismo. ²⁴ Ri Juan xu'an wa' echiri' c'amaja' caya'i' pa cárcel.

²⁵ Ec'uchiri', jujun chique rutijo'n ri Juan cuc' jujun e aj judi'ab xquijek quech'a't chwi tak ri takanic chwi ri quijosk'iquil chwach ri Dios. ²⁶ Xebec c'ut xe'quibi'ij che ri Juan:

—Lal tijonel, tape la, e ri jun xopon uc' la ch'aka ya' che ri nimaya' Jordán, ri xk'alajisan la puwi', wo'ora

* **3:14** Ri Moisés xtak ruma ri Dios cu'an jun uc'axwach cumatz, yey wa' xu'an ruc' ch'ich' bronce. Y xtak che cuya wa' chicaj chutza'm jun che' chiquiwach ri tinamit, cha' e janipa ri quecojow utzij ri Dios y caquitzu' pan ruc'axwach ri cumatz, na quecam taj. Nm. 21:4-9 † **3:14** Ri Jesús xyaqui' chwa ri cruz cha' e janipa ri cacubi' quic'u'x ruc', quecolobetajic. Jn. 8:28; 12:32-33

catajin che uya'ic ri bautismo y conoje ri ticawex eteran chirij — xecha'.

²⁷ Ec'u ri Juan xubi'ij chique:

«Na jinta c'o cuc'ul junok we na e ta ri Dios chila' chicaj caya'w re che. ²⁸ Ri'ix xinito echiri' ximbi'ij chiwe: Ri'in na in ta Rucha'o'n lo ri Dios, xa in jun k'alajisanel intakom lo nabe chwach Rire.

²⁹ »E pacha' pa juna c'ulaniquil. Ri lic c'o uwach na e ta ri ramigo rala, e rala cac'uli'ic ma e uc'a'yom re rali. Yey ri ramigo c'o putzal rala, e lic caqui'cot che utayic ri cubi'ij rala. Jec'ula' ri'in wo'ora lic quinquic'otic ma ya xc'un ri Cristo. ³⁰ Lic c'u chirajawaxic más canimarisax uk'ij rire, chwa ri canimarisax nuk'ij ri'in.

Ri Jun cape chila' chicaj

³¹ »Ri jun cape chila' chicaj, e más nim uwach uk'ij chiquiwa conoje. Ec'u junok na re ta chila' chicaj, e re ruwachulew y e cach'a't puwi tak ri re ruwachulew. No'j ri jun cape chila' chicaj, e más lic nim uwach uk'ij chiquiwa conoje. ³² Yey rire e cuk'alajisaj sa' ri rilom y sa' rutom che ri Dios; na ruc' ta c'u ri', tak ri winak na caquicoj taj. ³³ Yey we c'o junok cacojow ri cuk'alajisaj rire, ri' cujiquba' uwach lic katzij ri cubi'ij ri Dios. ³⁴ Ma ri jun takom lo ruma ri Dios, e cutzijojej ri cubi'ij ri Dios. Ma ri Dios na xuxu'yaj ta ri Ruxlabixel uya'om che; e uwari'che, xaki c'o ri Ruxlabixel ruc'. ³⁵ Ri Dios lic c'ax cuna' Ruc'ajol yey uya'om puk'ab rire ronoje ri c'olic. ³⁶ China c'u ri cacubi' uc'u'x ruc' Ruc'ajol ri Dios, c'o uc'aslemal na jinta utakexic; no'j china ri na caraj taj cacubi' uc'u'x ruc' Ruc'ajol ri Dios, ri' na jinta uc'aslemal ruc' ri Dios yey k'atom chi tzij puwi' ruma ri Dios» xcha'.

* **4:4** Ojertan raj judi'ab caquik'at quibe cha' na quebic'ow ta Samaria, ma ri e aj Samaria cuc' ri e aj judi'ab lic tzel caquil quib. Yey ri Jesús reta'am cajawaxic ri e aj Samaria caquita ri Utzilaj Tzij puwi Rire. † **4:6** “Tiq'uil k'ij”: Quil “hora” pa vocabulario. ‡ **4:10** “Ya' cuya c'aslemal”: Wa' que'elawi “jun ac'al”, pero ri Jesús cach'a't chwi ri c'aslemal cubi'tisij ri Dios chike. Jn. 7:38

4

Ri Jesús y rixok aj Samaria

¹ Ri Jesús xreta'maj, ri fariseos xquito más e q'ui rutijo'n Rire chiquiwa rutijo'n ri Juan, yey más e q'ui ri caquic'ul ri bautismo ruma Rire chiquiwa ri caquic'ul ri bautismo ruma ri Juan. ² (Tob na e ta c'u ri Jesús ri cuya ri bautismo, ma e tak rutijo'n ri queya'w re.) ³ Ruma c'u ri Jesús reta'am ri xquita rique, xel bi pa ri luwar re Judea y xtzelej tanchi pa ri luwar re Galilea.

⁴ Yey chirajawaxic che ri Jesús quic'ow pa ri luwar re Samaria.* ⁵ Jec'ula' xe'ela pa jun tinamit Sicar rubi', c'o che ri luwar re Samaria, chunakaj rulew xuya can ri Jacob che ruc'ajol José. ⁶ Chiri' c'o wi ri jun pozo uc'otom can ri Jacob. Ruma c'u cosinak ri Jesús che ri be u'anom lok, xtz'uyi' chunakaj ri pozo echiri' ya cu'ana pa tiq'uil k'ij.†

⁷ Xc'un c'u lo jun ixok aj Samaria, e ri' co'lresaj bi uya' pa ri pozo, yey ri Jesús xubi'ij che:

—Sipaj la jubik' nuya' —xcha'.

⁸ Yey rutijo'n ri Jesús ebenak pa ri tinamit xe'quiloc'o quiwa.

⁹ Rixok aj Samaria xubi'ij c'u che:

—¿Sa' ri' la' catz'onoj ya' la chwe? Ma rilal lal cuq'uil raj judi'ab yey ri'in in aj Samaria —xcha'. Xubi'ij wa' ma raj judi'ab na quech'aw ta chiquiwach cuc' raj Samaria.

¹⁰ Ewi ri Jesús xuc'ul uwach:

—We ta c'u queta'maj la sa' ri cusipaj ri Dios che'la yey we ta queta'maj la in china ri'in, ri cantz'onoj nuya' che'la, ri' e ne rilal catz'onoj la ya' chwe yey ri'in canya c'u che'la ri ya' cuya c'aslemal‡ —xcha'.

¹¹ Rixok xubi'ij che ri Jesús:

—Wajawal, na jinta ne sa' ruc' quesaj lo la ri ya' yey ri pozo lic naj upa. ¿Pachawi c'u ri' quesaj wi lo la ri ya'

cuya c'aslemal? ¹² E ri kamam Jacob xuya can wa jun pozo chike ojertan, ma wara xutij wi uya' rire cuc' tak ri ralc'o'al y tak ri rawaj. ¿Más neba c'o wach rilal chwach rire? —xcha'.

¹³ Ri Jesús xuc'ul uwach:

—Conoje ri quetijow re wa' wa ya', catzajin tanchi quichi'. ¹⁴ No'j china ri catijow re ri ya' canya ri'in, ri' na cachakij ta chi c'ana uchi'. Ma ri ya' canya ri'in, cu'an pacha' jun ac'al calax lo pa ranima' re cuya uc'aslemal na jinta utakexic* —xcha'.

¹⁵ Xubi'ij c'u rixok che:

—Wajawal, ya'a co la we'in ri' la' la ya', cha' na cachakij ta chi nuchi' y na quinc'un ta chi ne ri' c'a wara re co'lnuwesaj bi nuya' —xcha'.

¹⁶ Pero ri Jesús xubi'ij che:

—Oj la, je'siq'uij la ri achijil la y c'ama' c'u lo la wara —xcha'.

¹⁷ Ewi rixok xubi'ij:

—Ri'in na jinta wachijil —xcha'.

Xubi'ij c'u ri Jesús che:

—Katzij ri xbi'ij la, na jinta achijil la. ¹⁸ Ma e wo'ob lo rachijab e c'o'ji'nak uc' la yey rachi c'o uc' la wo'ora na achijil ta la. Ruma c'u ri', lic katzij ri xbi'ij la —xcha'.

¹⁹ Echiri' xuta wa' rixok, xubi'ij che ri Jesús:

—Wajawal, e cuna' nuc'u'x ri'in, rilal lal k'alajisanel re ri Dios. ²⁰ Ri kati'-kamam ri oj aj Samaria lic xquilok'nimaj uk'ij ri Dios chwach wa juyub,§ no'j ri alak aj judi'ab cabi'ij alak e Jerusalem ri luwar pa chirajawaxic wi calok'nimax wi uk'ij ri Dios —xcha'.

²¹ Ri Jesús xubi'ij che:

—Ixok, lic cojo la wa cambi'ij che'la, ma copon na ri k'ij na xew ta chi calok'nimax uk'ij ri Dios wara chwa wa juyub o c'a chila' Jerusalem, ma utz ca'ani' wa' pa ronoje luwar.

²² Ralak alak aj Samaria, na eta'am ta alak china ri calok'nimaj alak uk'ij; no'j ri'oj lic keta'am chi utz china ri cakalok'nimaj uk'ij, ma ri colobetajic cape cuc' raj judi'ab.

²³ No'j copon na c'u ri k'ij yey ec'u uk'ijol wa' xoponic echiri' e janipa ri caquilok'nimaj uk'ij ri Kakaw Dios pa sakil wi, caqui'ano ruma ri Ruxlabixel c'o pa canima'. Ma e caraj wa' ri Kakaw Dios chique conoje ri quelok'niman re. ²⁴ Ma ri Dios e Uxlabixel; Rire na quilital ta uwach. E uwari'che conoje ri quelok'niman uk'ij, lic chirajawaxic wi qui'ana wa' pa sakil wi ruma ri Ruxlabixel c'o pa canima' —xcha'.

²⁵ Xubi'ij c'u rixok che ri Jesús:

—Ri'in weta'am cac'un Rucha'o'n lo ri Dios, ri cabi'x “Cristo” che; y echiri' cac'un Rire, cuk'alajisaj ronoje chike —xcha'.

²⁶ Ri Jesús xubi'ij che:

—Wa' wa cabi'ij la e ri'in, ri quinch'a't uc' la —xcha'.

²⁷ Ec'uchiri', xetzelej lo rutijo'n y lic xcam canima' che ma ri Jesús cach'a't ruc' jun ixok. Na ruc' ta c'u ri', na jinta junok chique xutz'onoj sa' puwi' cach'a't wi ruc' rixok.

²⁸ Ec'uchiri', rixok xuya can ruc'amba', xe'ec pa ri tinamit y jewa' cubi'ij chique ri winak:

²⁹ —Peta alak, je'ila' alak jun achi ubi'im chwe janipa ri nu'anom. ¿Na e ta nawi rire ri Cristo? —cacha'.

³⁰ Ec'uchiri', xebel bi ri winak pa ri tinamit y xebec chila' pa c'o wi ri Jesús.

³¹ Echiri' c'amaja' quebopon ri winak, rutijo'n xquitij ri' che, jewa' xquibi'ij:

—Lal tijonel, tija wa la —xecha che.

³² Ri Jesús xubi'ij chique:

—Ri'in c'o ri nuwa cantijo, tob ri'ix na iweta'am taj sa' wa' —xcha'.

³³ Ec'u rutijo'n xquijek caquibi'ij chiquiwach: «¿C'o nawi junok xc'amaw lo uwa?» xecha'.

³⁴ Ec'u ri Jesús xubi'ij chique:

«Ri nuwa ri'in e ri can'an ri rajawal uc'u'x ri takayom lo we'in y canq'uis na c'u ruchac. ³⁵ Ri'ix quibi'ij: “Cajib ic' chic copon wi cha' ca'an ri molonic.” No'j ri'in cambi'ij chiwe: Chixtzu'n apanok y

* 4:14 Jn. 7:37-38 § 4:20 Wa' e ri juyub Gerizim rubi'.

chiwila chi utz ri tico'n, ma ya ri'j chic, utz chic camolic. ³⁶ Ri cachacun che ri molonic, cuc'ul na ri tojbal re yey janipa ri cumolo, c'o cutikoj che ruc'aslemal na junta utakexic. Jec'ula', ri caticow re junam quequic'ot ruc' ri camolonic. ³⁷ Ma e cu'ana pacha' ri cabi'xic: “Jun ri caticow re yey jun chic ri ca'anaw re ri molonic.” ³⁸ Ri'in xixintak bi re quimol ri na xitic ta ri'ix; ma e jujun chic ri xeticow re. Ec'u wo'ora c'o quic'ul ri'ix che ri chac que rique» xcha'.

³⁹ E q'ui chique ri e aj Samaria xcubi' quic'u'x ruc' ri Jesús ruma ri xutzijoj rixok echiri' xubi'ij chique: «Rire xubi'ij chwe janipa ri nu'anom.» ⁴⁰ Ruma c'u la', rique xec'un ruc' ri Jesús y lic xebelaj che cha' cacana j cuc'. Ewi Rire queb k'ij xcanaj can cuc'. ⁴¹ Yey más e q'ui ri xcubi' quic'u'x ruc' ruma ri xutzijoj Rire chiquiwach. ⁴² Xquibi'ij c'u che rixok:

—Wo'ora lic cubul kac'u'x ruc' rire na xew ta ruma ri xatzijoj ri'at chike, ma e ruma ri xkata ruch'a'tem rire. Keta'am c'u ri' rire pakatzij wi e ri Cristo, ri Colobenel re ruwachulew — xecha'.

Ri Jesús cucunaj ruc'ajol jun achi lic c'o uwach

⁴³ Echiri' ic'owinak chi ca'ib k'ij, ri Jesús xel bi chiri' Samaria, xumaj bi ube y xe'ec c'a Galilea. ⁴⁴ Ubi'im chi c'u ri Jesús: “Juna k'alajisanel na cayac ta uk'ij pa rutinamit.” ⁴⁵ Na ruc' ta c'u ri', echiri' xopon chila' Galilea, ri aj chiri' lic xquic'ul chi utz, ma rique xebopon pa ri nimak'ij Pascua chila' Jerusalem y xquilo janipa tak ri xu'an ri Jesús pa ri nimak'ij.

⁴⁶ Ec'uchiri', ri Jesús xtzelej pa ri tinamit Caná re Galilea pa xu'an wi vino che ri ya'. C'o c'u jun aj wach raj chac ri rey chila' Capernaúm, y rire c'o jun uc'ajol lic yewa'. ⁴⁷ Wa wa'chi echiri' xuto ri Jesús petinak Judea y c'o chi chiri' Galilea, xe'ec c'u che

rilic y lic xe'elaj che cha' que'ec chirocho re cu'cunaj ruc'ajol cajec'owic.

⁴⁸ Xubi'ij c'u ri Jesús che:

—Ralak na cacubi' ta c'u'x alak wuc' we na quil ta tak c'utubal re ri nuchuk'ab o tak milagros can'ano — xcha'.

⁴⁹ Ri raj chac ri rey xubi'ij tanchi che ri Jesús:

—Wajawal, peta co la wuc' chiucho, ma ri nuc'ajol cajec'owic — xcha'.

⁵⁰ Xubi'ij c'u ri Jesús che:

—Oj la chi ocho la, ma ri c'ajol la na cacam taj — xcha'.

Rachi xucoj ri xbi'x che ruma ri Jesús y xe'ec. ⁵¹ Echiri' catajin rononic chirocho, ri raj chaquib xebel lo che uc'ulic y xquibi'ij che:

—¡Ri c'ajol la na xcam taj ma xcunutajic! — xecha'.

⁵² Ec'u rire xutz'onoj chique jam-pala' xujeko utz uwach ruc'ajol. Y rique xquibi'ij che:

—Iwir che ri nabe ora** benak k'ij xic'ow ri ak' chirij — xecha'.

⁵³ Jec'ula' rukaw rala xreta'maj e ora ri' xubi'ij ri Jesús che: «Ri c'ajol la na cacam taj.» Ruma c'u ri' la', rire cuc' conoje ri e c'o pa rocho xcubi' quic'u'x ruc' ri Jesús.

⁵⁴ Wa jun cunanic e uca'm c'utubal re ruchuk'ab ri Dios xu'an ri Jesús chila' Galilea echiri' tzelejinak lo Judea.

5

Ri Jesús cucunaj jun sic chuchi' ri atinibal Betesda

¹ C'ate tanchi c'u ri', ri Jesús xtzelej Jerusalem echiri' raj judi'ab c'o jun quinimak'ij.

² Chupa c'u la' la tinamit, chunakaj ri Oquibal que Bexex, c'o jun nimalaj atinibal, “Betesda” rubi' pa ri ch'a'tem hebreo. Wa' wo'ob uchi' ja c'o che. ³ Chiri' e c'o uq'uiyal yewa'ib e cotz'erinak; e c'o potz', jetz' y sic. Conoje rique coye'em echiri' casilab ri ya', ⁴ ma xa chirij ora cakaj lo jun ángel y curujura' upa ri ya'. Ec'u ri'

** 4:52 “Ri nabe ora”: Quil “hora” pa vocabulario.

ri nabe cuc'ak bi rib chupa, ri' quel lok cunutajinak chic tob sa' ri yabil c'o che.

⁵ C'o c'u jun achi e treinta y ocho junab ri' yewa'. ⁶ Echiri' ri Jesús xrilo cotz'ol chiri' y xreta'maj uq'uiyal junab jela' u'anom, xutz'onoj c'u ri' che:

—¿Cawaj catcunutajic? —xcha'.

⁷ Rachi jewa' xuc'ul uwach:

—Wajawal, na jinta junok cac'amaw bi we chupa ri atinibal echiri' carujurut upa ri ya'. Lic nutijom chi nuk'ij che canc'ak bi wib chupa; pero echiri' cuaj can'ano, c'ate canwilo jun chic canabej chinuwach —xcha'.

⁸ Ri Jesús xubi'ij che:

—Chatyactajok, chac'ama bi rach'at y chatbinok —xcha'.

⁹ Chupa c'u la' la jok'otaj rachi xcunutajic, xuc'am bi ruch'at y xujeko cabinic. Yey wa' xu'an pa jun k'ij re uxlanibal.

¹⁰ Ruma c'u ri', ri e aj judi'ab xquibi'ij che rachi xcunutajic:

—Wak'ij e k'ij re uxlanibal, y na ube ta chawe cawuc'a'aj rach'at —xecha'.

¹¹ Rachi xuc'ul c'u uwach chique:

—Ri jun xinucunaj e xbi'n re chwe: “Chac'ama bi rach'at y chatbinok” —xcha'.

¹² Xquitz'onoj c'u che:

—¿China ri xbi'n chawe: “Chac'ama bi rach'at y chatbinok”? —xecha'.

¹³ Ec'u rachi na reta'am taj china ri xcunaw re, ma ri Jesús xel bi chiquixo'l ri ticawex e c'o chiri'.

¹⁴ Tec'uchiri', ri Jesús xu'rika rachi pa ri Rocho Dios y xubi'ij che:

—Chawilape': Wo'ora at cunutajinak chic; matmacun chi c'u ri', ma c'axtaj cape juna c'axc'obic más nim pawí —xcha'.

¹⁵ Xe'ec rachi y xu'tzijojej chique raj judi'ab e ri Jesús xcunaw re.

¹⁶ Ruma wa', raj judi'ab xquijek uternabexic ri Jesús y caquitzucuj su'anic caquicamisaj, ma rire cu'an cunanic pa ri k'ij re uxlanibal.

¹⁷ Ec'u ri Jesús xubi'ij chique:

—Ri Nukaw na rok'otam taj cachacunic y jec'ula' ri' can'an ri'in —xcha'.

¹⁸ Ruma wa' raj judi'ab más xquiya quib che ucamisaxic ri Jesús, ma e chiquiwach rique cupalajij ri takanic puwi ri k'ij re uxlanibal. Y na xew ta wa', ma cujunimaj ne rib ruc' ri Dios echiri' cubi'ij ri Dios e Ukaw.

Ruc'ajol ri Dios ya'tal puk'ab catakanic

¹⁹ Ec'u ri Jesús xubi'ij chique:

«Pakatzij wi cambi'ij che alak: Ruc'ajol ri Dios na jinta c'o cu'an xa pa re Rire; ma xew cu'an pacha' ri carilo cu'an Rukaw. Janipa tak ri cu'an Rukaw, jec'ula' cu'an Ruc'ajol.

²⁰ »Ma ri Dios lic c'ax cuna' Ruc'ajol y cuc'ut c'u che ronoje ri cu'ano. Yey c'o ne ri más nimak tak chac cuc'ut chwach. Y we xu'an c'u wa', lic cacam ne anima' ralak che. ²¹ Ma jela' pacha' ri Dios quebuc'astajisaj ri ecaminak y cuya quic'aslemal, jec'ula' Ruc'ajol cuya c'aslemal china che ri caraj cuya wi. ²² Yey ri Dios na cuk'at tane tzij puwi junok, ma puk'ab Ruc'ajol uya'om wi cuk'at tzij paquiwi ri ticawex, ²³ cha' jela' conoje ri ticawex caquiyac uk'ij Ruc'ajol, jela' pacha' caqui'an che uyaquic uk'ij ri Dios. Yey china ri na cuyac ta uk'ij Ruc'ajol ri Dios, na cuyac ta c'u uk'ij ri' ri Jun xtakaw lo re, wa' e ri Dios.

²⁴ »Pakatzij wi cambi'ij che alak: China ri lic cuta chi utz ri cambi'ij ri'in y cacubi' uc'u'x ruc' ri xtakaw lo we, ri' c'o uc'aslemal na jinta utakexic y na cuc'ul ta ri c'axc'olil re ri k'atbal tzij. Jec'ula', na jinta chi puk'ab ri camic, ma asu xk'ax chupa ri c'aslemal. ²⁵ Pakatzij wi cambi'ij che alak: Copon c'u ri ora y e chi uk'ijol wa' echiri' ri na jinta quic'aslem chwach ri Dios, caquita rukul Ruc'ajol ri Dios. Yey china tak c'u ri' ri caquicoj utzij, c'o quic'aslemal na jinta utakexic. ²⁶ Ma puk'ab ri Kakaw Dios c'o wi cuya c'aslemal; jec'ula' uya'om puk'ab Ruc'ajol cuya c'aslemal. ²⁷ Yey ri Dios uya'om ne puk'ab Ruc'ajol cuk'at tzij

paquiwi ri ticawex, ma Ruc'ajol e Alaxel Chiquixo'l Ticawex.

²⁸ »Macam anima' alak che wa', ma copon ri ora echiri' conoje ri ecaminak caquita rukul Rire. ²⁹ Janipa ri xqui'an ri utz, ri' queyactaj lo che jun c'astajibal re c'aslemal. No'j janipa c'u ri xqui'an ri na utz taj, ri' queyactaj lo che ri k'atbal tzij ca'an paquiwi'.

Ri quek'alajisan re sa' ruwach ri Jesús

³⁰ »Na jinta c'o can'an xa pa we ri'in. Ri k'atbal tzij can'ano e ri quinutak ri Nukaw che u'anic. Yey lic jusuc' ri k'atbal tzij can'ano. Na e ta can'an ri' ri cuaj ri'in; ma e can'an janipa ri caraj ri Nukaw, ri xtakaw lo we. ³¹ We ta e la' xa chiwibil wib ri'in cank'alajisaj sa' ri nuwach, ri' na jinta uchac ri cambi'ij. ³² C'o c'u Jun cak'alajisan nuwach, wa' e ri Nukaw, y weta'am c'ut ronoje ri cuk'alajisaj Rire panuwi ri'in, lic katzij.

³³ »Ralak xtak ne bi alak utz'onoxic che ri Juan panuwi ri'in; y ri c'ulubal uwach xu'an lo rire, lic katzij. ³⁴ Pero ri'in na cajawax ta chwe c'o junok cuk'alajisaj sa' ri nuwach. Xew c'u cancuxtaj che alak ri xubi'ij ri Juan panuwi ri'in cha' cacoj alak y jela' cacolobetaj alak. ³⁵ Ma ri Juan e pacha' juna ak' carepowic y cawon chi utz. Pero ralak xa jok'otaj xqui'cot alak che ri K'ijsak xutzijoj.

³⁶ »C'o c'u jun c'utubal más c'o uwach chwa ri xuk'alajisaj ri Juan panuwi ri'in. Ma ronoje rubi'im lo ri Nukaw chwe re co'lnu'ana', e ri quintajin che u'anic. Yey ruma tak ri can'ano, cak'alajinic, e ri Nukaw ri xtakaw lo we'in. ³⁷ Yey ri cak'alajisan re sa' ri nuwach ri'in e ri Nukaw, ri takayom lo we'in. Pero lic k'alaj na tom ta c'ana alak rukul ri Dios y na ilom ta alak uwach, yey ³⁸ Ruch'a'tem Rire na oquinak ta pa anima' alak; ma na cubul ta c'u'x alak ruc' ri jun utakom lo ri Dios.

³⁹ »Lic c'u catijoj ib alak che Ruch'a'tem ri Dios tz'ibital canok; ma ralak cach'ob alak e chupa wa' carikitaj wi ri c'aslemal na jinta

utakexic. ¡Yey ec'u ri' Ruch'a'tem ri Dios ri cak'alajisan nuwach ri'in! ⁴⁰ Na ruc' ta c'u ri', na ca'aj ta alak cape alak wuc' cha' jela' cac'ul alak wa' wa c'aslemal.

⁴¹ »Ri'in na e ta cantzucuj ri yacbal nuk'ij caqui'an ri winak. ⁴² Yey lic ne weta'am ri c'u'x alak, ma ralak na c'ax ta cana' alak ri Dios pa sakil wi. ⁴³ Ri'in in petinak pa rubi' ri Nukaw yey ralak na cacoj ta alak nutzij. No'j we ta e la' cac'un chi lo jun chic y xa pa re catzijonic, ri' e cacoj alak re.

⁴⁴ »¿Su'anic cacubi' c'u'x alak wuc' ri'in, we xew catzucuj yacbal k'ij alak chiwach ralak yey na catzucuj ta alak ri sakil yacbal k'ij, ri xew cape ruc' ri Dios? ⁴⁵ E chiwach ralak cancoj mac alak chwach ri Nukaw; na e ta ri'. Ma ri cacojow mac chi'ij alak, e ri jun lic cubam c'u'x alak ruc'; wa' e ri Moisés. ⁴⁶ Ma we ta e la' lic cacoj alak ri ubi'im lo ri Moisés, ri' cacoj alak ri cantzijoj ri'in. Ma rire panuwi ri'in xtz'iban wi. ⁴⁷ No'j we na cacoj ta alak rutz'ibam can ri Moisés, ¿sa' c'u u'anic ri' cacoj alak ri cambi'ij ri'in che alak?» xcha ri Jesús.

6

Ri Jesús quebutzuk wo'ob mil achijab

(Mt. 14:13-21; Mr. 6:30-44; Lc. 9:10-17)

¹ C'ate tanchi c'u ri', ri Jesús xuk'axuj ri mar re Galilea, ri cabi'x mar re Tiberias che. ² Yey uq'uiyal winak eteran chirij ma quilom tak ri c'utubal re ruchuk'ab cu'an cuc' ri yewa'ib.

³ Ec'uchiri', ri Jesús xel bi chwa jun juyub y xtz'uyi' chila' junam cuc' rutijo'n. ⁴ Xa nakaj chi c'o wi lo ruk'ijol ri Pascua, ri quinimak'ij raj judi'ab.

⁵ Echiri' ri Jesús xeril ruq'uiyal winak e petinak ruc', xubi'ij c'u che ri Felipe:

—¿Pa que'kalok'o wi quiwa conoje wu'q'uiyal winak cha' quewa'ic? — xcha'.

⁶ Xubi'ij wa' che ri Felipe xa re c'ambal upa, ma Rire reta'am chic sa' ri cu'ano.

⁷ Ri Felipe xuc'ul uwach:

—E la' calok'i' pam ruc' rajil queb ciento k'ij re chac, na cu'an taj tob ne xa jutak bik' caya'i' chiquijujunal — xcha'.

⁸ Ewi jun chique rutijo'n (wa' e ri Andrés, ri quichak' quib ruc' ri Pedro) xubi'ij che ri Jesús:

⁹ —C'o jun ralco ala wara ruc'a'am wo'ob pam re cebada y ca'ib car; pero ¿sa' co uchac wa' che wa uq'uiyal winak? —xcha'.

¹⁰ Xubi'ij c'u ri Jesús:

—Chibi'ij chique conoje ri winak quetz'uyi'ic —xcha'.

Lic c'ut c'o rax q'uim pa ri e c'o wi y xetz'uyi' laje lo wo'ob mil chi achijab.

¹¹ Ec'uchiri', ri Jesús xuc'am ri pam, xutioxij che ri Dios y xujach chique rutijo'n. Y rique xquijach chique ri winak etz'ulic. Jec'ula' xu'an che ri car. Xuya chiquijujunal janipa ri cacaj. ¹² Echiri' ri winak lic xenoj chi utz, ri Jesús xubi'ij chique rutijo'n:

—Chimolo ri ch'aka'ta'k quikax cha' na jinta c'o cac'ak bi —xcha'.

¹³ Xquimol c'u ri ch'aka'ta'k quikax na xquitij ta che ri wo'ob pam re cebada y ruc' wa' xquinojisaj cablajuj chacach. ¹⁴ Ec'u ri winak, echiri' xquil wa c'utubal re ruchuk'ab ri Dios xu'an ri Jesús, jewa' xquibi'ij: «Pakatzij wi, wa' e ri jun K'alajisanel koye'em cac'un che ruwachulew» xecha'.

¹⁵ Pero ri Jesús ruma reta'am chic cacaj caquic'am bi re caqui'an rey che, xresaj bi rib chiquixo'l y xel bi chwa ri juyub cha' cac'o'iji' utuquel.

Ri Jesús cabin chwi ri ya'

(Mt. 14:22-27; Mr. 6:45-52)

¹⁶ Echiri' xoc rak'ab, rutijo'n ri Jesús xekaj chuchi' ri mar. ¹⁷ Xeboc bi chupa jun barco y ec'u ri' quek'ax ch'aka ya' cha' queboyon Capernaúm; ma lic k'eku'm chic y ri Jesús na c'uninak taj.

¹⁸ Xpe c'u jun cakjik' chwi ri mar y ri tew xujek cuxulc'atila' ri ya'.

¹⁹ Echiri' ebininak chi laj wo'ob o wakib kilómetro chwi ri mar, c'ate xquilo cabin ri Jesús chwi ri ya', e ri catajin roponic chunakaj ri barco; y rique lic xquixi'ij quib che.

²⁰ No'j ri Jesús xubi'ij chique:

—¿Mixi'ij iwib, ma ri'in in Jesús! — xcha'.

²¹ Ewi rique lic quequi'cotic xquic'ul ri Jesús chupa ri barco. Tec'uchiri', xebopon pa ri luwar pa quebec wi.

Ri winak caquitzucuj ri Jesús

²² Chuca'm k'ij c'ut, ri winak ecanajinak can ch'aka mar xquina'bej rutijo'n ri Jesús ebenak chi chupa ri barco ri xew ri' c'o chiri' iwir lo ri', yey ri Jesús na xe'ec ta cuc' rutijo'n.

²³ Xec'un c'u lo jujun barcos e petinak Tiberias, chunakaj ri luwar pa xtiji' wi ri pam, echiri' ri Kanimajawal utioxim chi wa' che ri Dios. ²⁴ Echiri' ri winak xquilo na jinta ri Jesús chiri' y na e jinta ne rutijo'n, xeboc bi chupa wa barcos y xeboc Capernaúm cha' caquitzucuj ri Jesús.

Ri Jesús e ri pam cuya c'aslemal

²⁵ Echiri' xebopon ri winak ch'aka mar, xe'quirika ri Jesús y xquitz'onoj che:

—Lal tijonel, ¿jampa xc'un la wara? —xecha'.

²⁶ Ec'u ri Jesús xubi'ij chique:

—Pakatzij wi cambi'ij che alak: Quintzucuj alak xa ruma lic xwa' alak chi utz y xnoj alak chi utz, na e ta ruma xmaj alak usuc' tak ri c'utubal re ruchuk'ab ri Dios nu'anom lok.

²⁷ Maya c'u ib alak che utzucuxic ri wa xa caq'uisic; e lic ya'a ib alak che utzucuxic ri wa na quic'ow ta c'ana uk'ij, ri cuya c'aslemal na jinta utakexic. Yey ri caya'w wa' che alak, e Ralaxel Chiquixo'l Ticawex, ri cha'tal lo ruma ri Kakaw Dios re cu'an wa' — xcha'.

²⁸ Xquitz'onoj c'u che:

—¿Sa' tak ri caka'ano cha' e caka'an janipa ri caraj ri Dios chike? — xecha'.

²⁹ Ri Jesús xuc'ul uwach:

—Ri caraj ri Dios ca'an alak, e ri cacubi' c'u'x alak ruc' ri jun utakom lo Rire —xcha'.

³⁰ Ec'uchiri' xquitz'onoj che:

—¿Sa' ri c'utubal re ruchuk'ab ri Dios ca'an la chikawach cha' cakilo y jela' cacubi' kac'u'x uc' la? ¿Sa' ri carik la u'anic? ³¹ Ma ri kati'-kamam ojertan xquitij ri maná pa ri luwar catz'intz'otic,* jela' pacha' ri cubi'ij Ruch'a'tem ri Dios:

Xuya pam chique,

y wa' petinak chila' chicaj *Sal. 78:24* —xecha'.

³² Ri Jesús xuc'ul uwach:

—Pakatzij wi cambi'ij che alak: Na e ta ri Moisés xya'w re ri pam petinak chila' chicaj; e ri Nukaw ri caya'w ri sakil pam cape chila' chicaj. ³³ Ma ri Pam cuya ri Dios e ri jun petinak chila' chicaj, ri caya'w c'aslemal chique ri ticawex —xcha'.

³⁴ Xquitz'onoj c'u che:

—Kajawal, ya'a co la ke'oj ri' la' la pam ronoje k'ij —xecha'.

³⁵ Ri Jesús xubi'ij chique:

—In ri in pam cuya c'aslemal. China ri cape wuc' ri'in, na cutij ta chi numic; y china ri cacubi' uc'u'x wuc', ri' na cachakij ta chi c'ana uchi'.

³⁶ »Pero e pacha' ri nubi'im chi lo che alak: Ralak na cacubi' ta c'u'x alak wuc', tob ne ilom alak nuwach.

³⁷ Ma conoje ri queya'i' chwe ruma ri Nukaw, quec'un wuc' ri'in; yey china c'u ri' ri cape wuc' ri'in, na canmach'aj tubi.

³⁸ »Ri'in na ximpe ta chila' chicaj xa re co'lnu'ana ri cuaj ri'in, ma e in petinak re co'lnu'ana ri caraj ri Jun xtakaw lo we. ³⁹ Yey ri caraj ri Nukaw, ri xintakaw lok, e na canjam ta can junok chique ri ebuya'om Rire chwe; ma e quenuc'astajisaj lo conoje wa' chupa ri q'uisbal k'ij. ⁴⁰ Ec'u ri lic caraj ri Nukaw, ri xtakaw lo we'in, e wa': Conoje ri ticawex, ri caquiya ri quiwach wuc' ri in Uc'ajol ri Dios y cacubi' c'u quic'u'x wuc', cac'oji' quic'aslemal na junta utakexic. Ec'u ri'in quenuc'astajisaj lo chiquixo'l ri

ecaminak chupa ri q'uisbal k'ij —xcha'.

⁴¹ Ruc' c'u ri' wa', raj judi'ab xquijek quech'a't chirij ri Jesús ruma ri xubi'ij: «In ri in pam petinak chila' chicaj.» ⁴² Xquibi'ij c'u ri': «¿Na e ta neba Jesús wa', ruc'ajol ri José? Ri'oj keta'am uwach rukaw y keta'am uwach ruchu. ¿Su'chac c'u ri' cubi'ij petinak chila' chicaj?» xecha'.

⁴³ Xubi'ij c'u ri Jesús chique:

—Mixch'a'tiben chiwach chirij wa ximbi'ij. ⁴⁴ Ma na junta junok cape wuc' ri'in, we na e ta c'amayom lo ri Nukaw, ri takayom lo we'in. Yey ri cape wuc', canc'astajisaj lo chupa ri q'uisbal k'ij.

⁴⁵ »Jewa' cubi'ij Ruch'a'tem ri Dios chupa ri tz'ibital can cuma ri k'alajisanelab:

Copon na ri k'ij echiri' e ri Dios ri cac'utun chiquiwach conoje *Is. 54:13*

cachea'. Y conoje ri caquita ri cubi'ij ri Nukaw y caquimaj c'u que janipa ri cubi'ij, ri' quec'un wuc' ri'in. ⁴⁶ Ma na junta jun chic iliyom uwach ri Kakaw Dios; xew ri jun petinak ruc' ri Dios, e iliyom uwach.

⁴⁷ »Pakatzij wi cambi'ij che alak: China ri cacubi' uc'u'x wuc' ri'in, c'o uc'aslemal na junta utakexic. ⁴⁸ Ma in ri in pam cuya c'aslemal.

⁴⁹ »Ojertan ri chu'kaw alak xquitij ri maná pa ri luwar catz'intz'otic; na ruc' ta c'u ri', rique xecamic. ⁵⁰ No'j ri'in e quinch'a't chwi ri pam cape chila' chicaj; yey we c'o junok catijow re wa', ri' na cacam taj.

⁵¹ »Ri pam re c'aslemal petinak chila' chicaj e ri'in. China c'u catijow re wa pam, c'o uc'aslemal na junta utakexic. Yey ri pam canya ri'in, e ri nuti'jil canya pa c'ax cha' tak ri ticawex c'o quic'aslemal chwach ri Dios —xcha'.

⁵² Ec'uchiri', raj judi'ab xquijek caquichapala' quib chiquiwach, jewa' caquibi'ij: «¿Su'anic wa'chi caraj cuya chitijic ruti'jil chike?» quecha'.

* 6:31 Éx. 16:4

⁵³ Ri Jesús xubi'ij chique:

—Pakatzij wi cambi'ij che alak: We e la' na catij ta alak ri nuti'jil ri in Alaxel Chiquixo'l Ticawex y we na catij ta alak ri nuquiq'uel, ri' na jinta c'aslemal alak. ⁵⁴ China c'u ri cutij ri nuti'jil y ri nuquiq'uel, ri' c'o uc'aslemal na jinta utakexic, yey ri'in canc'astajisaj lo chupa ri q'uisbal k'ij. ⁵⁵ Ma ri nuti'jil e sakil wa'im y ri nuquiq'uel e sakil ya'. ⁵⁶ China c'u ri cutij ri nuti'jil y cutij ri nuquiq'uel, ri' cac'oji' wuc' y ri'in quinc'oji' ruc' rire.

⁵⁷ »Ri Kakaw Dios, ri aj ya'l c'aslemal, e ri xtakaw lo we'in; yey c'o nuc'aslemal ruma Rire. Jec'ula' china ri cutij ri nuti'jil ri'in, ri' c'o uc'aslemal wuma ri'in. ⁵⁸ Quinch'a't chwi ri pam petinak chila' chicaj. Wa' na e ta pacha' ri maná xquitij ri chu'kaw alak ojertan. Ma tob xquitij ri maná, rique xecamic. No'j china ri cutij re wa pam cambi'ij ri'in, ri' c'o uc'aslemal na jinta utakexic —xcha'.

⁵⁹ E c'utunic wa' xu'an ri Jesús pa quimolom wi quib chupa ri sinagoga re Capernaúm.

Ruch'a'tem ri Jesús cuya c'aslemal na jinta utakexic

⁶⁰ Echiri' xquita ri c'utunic xu'an ri Jesús, lic e q'ui chique rutijo'n xquibi'ij: «Wa' wa cubi'ij, lic c'ax utayic. ¿C'o neba junok cach'ijow uc'ulic?» xecha'.

⁶¹ Ec'u ri Jesús xuna'bej ri ch'a'tibenic caqui'an chwi ruc'utunic. Xutz'onoj c'u chique:

—¿Cu'an c'ax wa' che alak? ⁶² ¿Sa' c'u ri' ri ca'an alak we ta e la' quil alak Ralaxel Chiquixo'l Ticawex cak'an chila' chicaj pa petinak wi? ⁶³ Ri sakil c'aslemal na jinta utakexic petinak ruc' ri Ruxlabixel ri Dios; na e ta ri petinak xa ruc' ri ticawex, ma ri' na jinta uchac re cuya ri sakil c'aslemal. Ec'u ri ch'a'tem nubi'im ri'in che alak, wa' petinak ruc' ri Ruxlabixel ri Dios, ri aj ya'l c'aslemal.

* **6:71** “Iscariot”: Wa' e utinamit ri Judas. * **7:2** Ronoje junab raj judi'ab caqui'an wa nimak'ij pa q'uisbal ruk'ijol ri molonic. Che wa nimak'ij, raj Israel caquiyijba' quirancho 'anom ruc' uk'ab che' y quejeki' wukub k'ij chupa. Wa' e cuxtabal re ri cuarenta junab xebin chupa ri luwar catz'intz'otich echiri' na jinta cocho. Lv. 23:34; Dt. 16:13

⁶⁴ Pero e c'o c'u jujun chixo'l alak na cubul ta quic'u'x wuc' —xcha'. Ri Jesús xubi'ij wa' ma xex chi reta'am wi china tak ri na cubul ta quic'u'x ruc' y china ri cac'ayin re.

⁶⁵ Xubi'ij tanchi ri Jesús:

—Ec'u uwari'che nubi'im che alak: Na jinta junok cape wuc', we na e ta ri Nukaw c'amayom lo re —xcha'.

⁶⁶ Chwi c'u ri', e q'ui chique rutijo'n ri Jesús xquiya canok y na xeterej ta chi chirij.

⁶⁷ Ec'uchiri', xutz'onoj ri Jesús chique ri cablajuj utijo'n:

—¿Quiwaj neba ri'ix qui'an iwe quiniya canok, pacha' ri xqui'an rique? —xcha'.

⁶⁸ Ri Simón Pedro xuc'ul uwach:

—Kajawal, ¿china chi chirij coj'ec wi? Ma xew uc' rilal c'o ri ch'a'tem cuya c'aslemal na jinta utakexic.

⁶⁹ Ri'oj lic cubul chi kac'u'x uc' la y lic keta'am wa': Lal Rucha'o'n lo ri Dios, Ruc'ajol ri Dios c'aslic —xcha'.

⁷⁰ Ri Jesús xuc'ul uwach:

—¿Na in ta neba incha'yom iwe ri'ix ix cablajuj? Na ruc' ta c'u ri', jun chiwe c'o ritzel winak pa ranima' —xcha'.

⁷¹ Echiri' xubi'ij wa', ri Jesús e xch'a't puwi ri Judas aj Iscariot* ruc'ajol ri Simón; ma e ri Judas cac'ayin re, tob e jun chique ri cablajuj utijo'n.

7

Ruchak' ri Jesús na caquicoj taj we Rire e Rucha'o'n lo ri Dios

¹ C'ate tanchi c'u ri', ri Jesús xbin pa tak ri luwar re Galilea; na xraj taj cac'oji' Judea ma chila' raj judi'ab cacaj caquicamisaj. ² Xa c'u nakaj chi c'o wi lo ruk'ijol ri quinimak'ij raj judi'ab echiri' caqui'an quirancho.*

³ E tak c'u ruchak' xquibi'ij che:

—Matcanaj can wara; jat Judea cha' ri jujun chic atijo'n e c'o chila' caquilo sa' tak ri ca'ano. ⁴ Ma

we junok caraj queta'max uwach, ronoje ri cu'ano cu'an chiwachil. E uwari'che, cha'ana wa' chiquiwach conoje ri ticawex —xecha che. ⁵Xquibi'ij wa' che ma na caquicoj taj we Rire e Rucha'o'n lo ri Dios, tob ne rique e uchak' ri Jesús.

⁶Xubi'ij c'u Rire chique:

—Ri nuk'ijol ri'in c'amaja' coponic; no'j ri'ix, xa tob pachique k'ij utz chiwach. ⁷Ri ticawex re ruwachulew na tzel ta quixquil ri'ix; no'j ri'in lic tzel quinquilo, ma cank'alajisaj chi utz ri quimac. ⁸Jix ri'ix che ri nimak'ij; no'j ri'in na quin'ec ta wo'ora, ma c'amaja' copon ri nuk'ijol —xcha'.

⁹Xubi'ij c'u wa' y xcanaj can Galilea.

Ri Jesús copon pa ri nimak'ij re tak ri rancho

¹⁰Ec'uchiri' ebenak chi ruchak', ri Jesús xe'ec pa ri nimak'ij, pero na xe'ec ta chiwachil cha' tak ri winak na caquina'bej taj.

¹¹Pa ri nimak'ij raj judi'ab lic caquitzucuj ri Jesús, y jewa' caquibi'ij: «¿Pa nawi c'o wi la' la jun achi?» quecha'.

¹²Chiquixo'l ri winak lic e q'ui ri caquich'a'tibej ri Jesús. Jujun caquibi'ij: «La' la Jesús lic utz uc'u'x» quecha'. Yey e c'o jujun chic caquibi'ij: «La' la Jesús lic na utz ta ri cu'ano ma xa quebusoc ri winak» quecha'. ¹³Pero na junta c'u junok cach'a't puwi ri Jesús chiwachil; xa xe'lak'ay quech'a't puwi', ma caquixi'ij quib chiquiwach raj judi'ab e aj wach.

¹⁴Ec'u ri' nic'ajarinak chi ri nimak'ij xopon ri Jesús pa ri Rocho Dios y xujeko cac'utun chiquiwach.

¹⁵Raj judi'ab lic xcam canima' che y jewa' xquibi'ij: «¿Cha'taj lic c'o reta'am yey na junta c'o c'utuyum chwach?» xecha'.

¹⁶Ri Jesús xuc'ul uwach:

—Ri quintajin che uc'utic na xa ta pa we ri'in can'ano; ma wa' petinak ruc' ri takayom lo we'in. ¹⁷We c'o c'u

junok lic cuya rib che u'anic ri caraj ri Dios, ri' careta'maj we ri canc'utu ruc' ri Dios cape wi, o we xa pa we ri'in quinch'a'tic. ¹⁸Ma china ri xa pa re cach'a'tic, ri' xew caraj cayac uk'ij cuma ri winak. No'j china ri caraj e cayac uk'ij ri takayom lo re, ri' lic katzij ri cutzijoj y na junta c'ana rak'ubal cu'ano.

¹⁹»¿Na katzij ta neba la' e ri Moisés xya'w che alak ri Tzij Pixab? Na ruc' ta c'u ri', na junta junok che alak ca'anaw re ronoje ri c'o chupa wa Tzij Pixab. ¿Su'chac ca'aj alak quin-camisaj alak? —xcha'.

²⁰Ec'u tak ri winak xquic'ul uwach:

—Lal c'o puk'ab jun itzel uxlabixel. ¿China ri caraj cacamisan e la? —xecha'.

²¹Ri Jesús xubi'ij chique:

—Ri'in c'o jun c'utubal re ruchuk'ab ri Dios xin'ano, yey onoje ralak lic cacam anima' alak che ma xin'an wa' chupa ri k'ij re uxlanibal.*

²²»Pakatzij wi, ri Moisés xuya che alak ri jun takanic re ri retalil re circuncisión tob na e ta rire xjekow lok, ma e xejekow lo re ri kati'-kamam ojertan.† Yey ralak cacoj alak ri retalil re circuncisión che junok tob pa ri k'ij re uxlanibal. ²³Ca'an alak wa' ma ri takanic re ri Moisés cutak che ca'ani' ri circuncisión pa ri uwajxak k'ij ralaxibem juna ralco ala. Ca'an c'u alak ri', tob wa' catzak pa ri k'ij re uxlanibal, cha' na capalajij ta alak wa takanic re ri Moisés. ¿Su'be c'u ri' c'o oyowal alak chwij ri'in ruma xincunaj jun achi pa ri k'ij re uxlanibal?

²⁴»Macoj alak umac junok xa ruma cach'ob alak eta'am alak ri u'anom; ri 'ana alak e ch'obo alak ruc' sakil na'oj puwi ri pakatzij wi u'anom, we c'o umac o na jintaj —xcha'.

Ri Jesús cuk'alajisaj pa petinak wi Rire

²⁵E c'o jujun chique ri e aj Jerusalem caquitz'onobej: «¿Na e ta achi wa' quetajin che utzucuxic

* 7:21 Jn. 5:1-16 † 7:22 C'amaja' ne calax ri Moisés echiri' ri Dios xubi'ij chique ri tinamit Israel caquicoj ri retalil re circuncisión chique conoje ri raltak co alabo pa ri uwajxak k'ij calaxibem. Gn. 17:10-12; Lv. 12:3

re caquicamisaj? ²⁶ ¿Su'chac c'u ri caya' luwar che cach'a't chiwachil yey na junta ne junok cak'aten re? ¿Quicojom chi nawi raj wach re ri tinamit rire e ri Cristo, Rucha'o'n lo ri Dios? ²⁷ Ma ri'oj keta'am chi utz pa cape wi wa'chi; no'j we xc'un ri Cristo, ri' na junta junok eta'mayom re pa cape wi» quecha'.

²⁸ Ri Jesús cac'utun pa ri Rocho Dios echiri' xuta wa'. Lic co c'u xsiq'uin che ubi'xiq'uil:

—Cabi'ij ralak lic eta'am alak nuwach y lic eta'am alak pa quimpe wi. Pero lic cheta'maj c'u alak wa': Ri'in na in petinak ta xa pa we ri'in, ma intakom lo ruma ri Jun lic ube ronoje tak ri cu'ano. Yey ralak na eta'am ta alak uwach Rire. ²⁹ No'j ri'in weta'am uwach, ma ruc' Rire in petinak wi y e Rire takayom lo we'in —xcha'.

³⁰ Ec'uchiri', raj wach xcaj e ri caquichap bi ri Jesús; pero na junta junok x'anaw re, ma c'amaja' copon ruk'ijol. ³¹ Na ruc' ta c'u ri', chiquixo'l ruq'uiyal winak, lic e q'ui xcubi' quic'u'x ruc' ri Jesús y caquibi'ij: «Chiwach ralak, echiri' cac'un Rucha'o'n lo ri Dios, ¿cu'an cami más c'utubal ri' re ruchuk'ab ri Dios chwa wa cu'an wa'chi?» quecha'.

Ri fariseos cacaj caquiya ri Jesús pa cárcel

³² Ri fariseos xquita ri caquibi'ij ri winak puwi ri Jesús. E uwari'che, rique cuc' ri nimak e aj chacunel pa Rocho Dios xequitak bi ri e chajinel re ri Rocho Dios cha' caquichap lo ri Jesús.

³³ Xubi'ij c'u ri Jesús:

—Ri'in na naj ta chi quinc'o'ji' uc' alak, ma quintzelej ruc' ri takayom lo we'in. ³⁴ Copon na c'u ri' ri k'ij echiri' quintzucuj alak; pero na quinrik ta alak, ma na copon ta alak pa quine'c'ola wi ri'in —xcha'.

³⁵ Ec'u ri e aj judi'ab xquijek caquitz'onobej chiquiwach: «¿Pa nawi que'ec wi wa'chi yey na que'karika ta ri'oj? ¿Que'ec nawi cuc'

ri e aj judi'ab ejekel chiquixo'l ri e aj griegos y que'c'utuna chiquiwach? ³⁶ ¿Sa' que'elawi wa xubi'ij chike: «Quintzucuj alak; pero na quinrik ta alak, ma na copon ta alak pa quine'c'ola wi ri'in?» quecha'.

Tak ri ac'al re ya' c'aslic

³⁷ Che ri q'uisbal re ri nimalaj nimak'ij, ri Jesús xtaq'ui' chiquiwach ri winak y co xsiq'uin che ubi'xiq'uil:

«We c'o junok catzajin uchi', petok y chutija re ri ya' c'o wuc', ³⁸ ma e pacha' cubi'ij Ruch'a'tem ri Dios: Ri cacubi' uc'u'x wuc' ri'in, cu'ana pacha' cajuljut tak lo ac'al re ya' c'aslic pa ranima'»^{*} xcha'.

³⁹ Ruc' wa' ri Jesús e cach'a't puwi ri Ruxlabixel ri Dios ri caquic'ul na janipa ri cacubi' quic'u'x ruc'. Yey c'amaja' c'u cac'un ri' ri Ruxlabixel ri Dios ma c'amaja' ne que'ec ri Jesús chila' chicaj pa cak'alajisax wi runimal uchomalil.

Ri winak quech'a't puwi china ri Jesús

⁴⁰ E c'o c'u jujun chique ri winak, echiri' xquita wa', jewa' caquibi'ij: «Pakatzij wi wa'chi e ri jun k'alajisanel re ri Dios koye'em cac'unic» quecha'.

⁴¹ Jujun chic jewa' caquibi'ij: «Wa' wa'chi e ri Cristo, Rucha'o'n lo ri Dios» quecha'. Yey jujun chic jewa' caquibi'ij: «¿Galilea neba cape wi lo ri Cristo? ⁴² Na Galilea taj, ma tz'ibital can chupa Ruch'a'tem ri Dios, ri Cristo calax lo chiquixo'l ri ratzuchak' can ri rey David pa ri tinamit Belén, rutinamit ri David» quecha'. ⁴³ Jec'ula' ri' ri winak jachatal quipa ruma junwi tak ri caquich'ob rakan puwi ri Jesús. ⁴⁴ E c'o ne jujun chique ri winak xcaj caquichap bi ri Jesús, pero na junta junok x'anaw re.

Raj wach re ri tinamit caquic'ak bi uk'ij ri Jesús

⁴⁵ Ri e chajinel re ri Rocho Dios xetzelej pa e c'o wi ri xetakaw lo que, wa' e ri fariseos y ri nimak e aj chacunel pa Rocho Dios, yey rique xquitz'onoj chique raj chajinel:

^{*} 7:38 Zac. 14:8

—¿Su'chac na xic'am ta lo ri Jesús? —xecha'.

⁴⁶ Ri e chajinel jec'uwa' xquic'ul uwach:

—¡Na jinta junok jela' ch'a'tinak pacha' cach'a't wa' wa'chi! —xecha'.

⁴⁷ Ec'u ri fariseos xquibi'ij chique:

—¿Xixsocotaj cami ri' ri'ix ruma rire? ⁴⁸ ¿C'o neba junok chique raj wach re ri tinamit o chique ri fariseos xcubi' uc'u'x ruc' wa' wa'chi? ⁴⁹ No'j wa winak eteran chirij ri Jesús, lic itzel quiwachlibal ma na caquimaj ta c'ana usuc' ri Tzij Pixab —xecha'.

⁵⁰ Ec'u ri Nicodemo, ri jun fariseo xopon julaj chak'ab ruc' ri Jesús, jewa' xubi'ij chique:

⁵¹ —Cubi'ij ri Tzij ke'oj, na utz taj cak'at tzij puwi junok, we na cata' ta uchi' nabe y we na queta'max ta nabe we c'o juna mac u'anom —xcha'.

⁵² Xquic'ul c'u uwach ri Nicodemo:

—¿Lal cami aj Galilea rilal? Chajilaj la chi utz Ruch'a'tem ri Dios y jela' queta'maj la we c'o juna k'alajisanel elinak lo chiquixo'l raj Galilea —xecha'.

⁵³ Ec'uchiri', chiquijujunal xebec chicocho.

8

Catz'onox che ri Jesús cuk'at tzij puwi jun ixok na jusuc' ta ubinic

¹ Ri Jesús xe'ec chwa ri juyub Olivos. ² Echiri' xsakiric, xtzelej tanchi pa ri Rocho Dios. Conoje ri winak xekib ruc' y Rire xtz'uyi' chiquiwach y xujeko cu'an c'utunic.

³ Ec'uchiri', raj c'utunel re ri tzi-jpixab y ri fariseos xquic'am lo jun ixok chwach. Wa' wi'xok xquimajo e ri' camacun chirij ri c'ulaniquil ruc' jun achi na rachijil taj. Xquiya c'u chiquinic'ajal conoje ri e c'o chiri' ⁴ y jewa' xquibi'ij che ri Jesús:

—Lal tijonel, wa jun ixok xkamajo lic e ri' camacun chirij ri c'ulaniquil ruc' jun achi na rachijil taj. ⁵ Yey ri Moisés, chupa ri Tzij Pixab catakan che ca'an pa'baj juna ixok we cu'an

wa'! [☆] ¿Sa' c'u ri cabi'ij rilal che? —xecha'. ⁶ Xquibi'ij wa' che ri Jesús xa re c'ambal upa cha' caquicoj umac.

Ec'u ri Jesús xch'uqui'ic y ruc' ruwi uk'ab xujek catz'iban chwa rulew. ⁷ Yey rique lic caquic'ot upa cha' cuc'ul uwach ri tz'onobal. Ec'u ri Jesús xtaq'ui'ic y xubi'ij chique:

—We c'o junok che alak cuna' o na jinta c'ana umac, e nabe ri' chuc'aka rabaj che wi'xok —xcha'.

⁸ Tec'uchiri', xch'uqui' tanchic y ruc' ruwi uk'ab xtz'iban tanchi chwa rulew.

⁹ Conoje rique echiri' xquita wa' wa xubi'ij, xquina' quib c'o quimac. E uwari'che, pa jujun xebel bi. Nabe xebel bi ri e nimak winak; tec'uchiri', ri e c'ac'al. Echiri' conoje ebelinak chubi, xew ri Jesús y rixok xecanaj can chiri'.

¹⁰ Ec'uchiri' xtaq'ui' ri Jesús y xrilo na jinta chi junok chiri', xew chi rixok, xubi'ij c'u che:

—Ixok ¿pa e c'o wi ri caquicoj amac? ¿Na jinta junok xuk'at tzij re camic pawí? —xcha'.

¹¹ Rixok xubi'ij che:

—Na jinta junok, Wajawal —xcha'.

Ec'uchiri', ri Jesús xubi'ij che:

—Jenela' ri'in na cank'at ta tzij re camic pawí. Jat c'u ri' y matmacun chic —xcha'.

Ri Jesús e ri K'ijsak

¹² Ri Jesús xch'a't tanchi cuc' ri winak, jewa' xubi'ij chique:

—In ri K'ijsak che ruwachulew. China c'u ri caterej lo chwij, na cabin ta chi q'uenok pa k'eku'm ma c'o ri K'ijsak ruc' yey wa' e ri cuya c'aslemal —xcha'.

¹³ Ec'uchiri', ri fariseos xquibi'ij che ri Jesús:

—Na jinta uchac ri cabi'ij la, ma xa chi'ibil ib la cabi'ij la sa' ri wach la —xecha'.

¹⁴ Ri Jesús xuc'ul uwach:

—Tob in ri quink'alajisan re sa' ri nuwach, ri cambi'ij lic katzij; ma weta'am pa in petinak wi y weta'am pa quin'ec wi. No'j ralak na eta'am ta

☆ 8:5 Lv. 20:10; Dt. 22:22-24

alak pa in petinak wi y na eta'am tane alak pa quin'ec wi.

15 »Ralak, echiri' cabi'ij alak sa' ri cach'ob alak puwi junok, ca'an alak wa' xa ruc' ri na'oj re ruwachulew. No'j ri'in na je ta la' can'ano. 16 Echiri' c'o cank'alajisaj chirij junok, katzij ri cambi'ij. Ma na xa ta pa we ri'in ri cambi'ij; ma ri nuna'oj ri'in lic junam ruc' runa'oj ri Nukaw, ri xtakaw lo we'in.

17 »Yey chupa ri Tzij Pixab e alak, tz'ibital canok: «We e c'o ca'ib ticawex junam caquijiquiba' uwach ri caquibi'ij, e cacoj que ri'»[☆]

18 Ri cank'alajisaj ri'in chiwibil wib, cajiquibax uwach ruma ri Nukaw, ri takayom lo we'in —xcha'.

19 Xquitz'onoj c'u che:

—¿Pa c'u c'o wi ri kaw la? —xecha'.

Ri Jesús xuc'ul uwach:

—Ralak na eta'am ta alak nuwach ri'in y na eta'am ta alak uwach ri Nukaw; ma we ta eta'am alak nuwach ri'in, jec'ula' ri' eta'am alak uwach ri Nukaw —xcha'.

20 Ri Jesús xubi'ij wa' echiri' cac'utun pa ri Rocho Dios, chiri' pa c'o wi ri caxa re kasa'n. No'j na jinta junok xchapaw bi re, ma c'amaja' copon ruk'ijol.

Ri Jesús petinak chila' chicaj

21 Xubi'ij tanchi ri Jesús chique:

—Ri'in quin'ec y ralak quintzucuj c'u alak, pero cacam na c'u alak ri' pa ri mac alak. Ma pa quin'ec wi ri'in, na copon ta ralak chila' —xcha'.

22 Xquibi'ij c'u raj judi'ab chiquiwach: «Laj cucamisaj rib; e uwari'che cubi'ij na utz taj cojopon ri'oj chila' pa que'ec wi rire» xecha'.

23 Ec'u ri Jesús xubi'ij chique:

—Ralak na alak ta re chila' chicaj, no'j ri'in in petinak chila' chicaj. Ralak alak re ruwachulew, no'j ri'in na in ta re ruwachulew. 24 E uwari'che ximbi'ij cacam na c'u alak ri' pa ri mac alak. Ma we na cacoj ta alak «In Ri'in»,* ri' cacam alak pa ri mac alak —xcha'.

25 Ec'uchiri' xquitz'onoj che:

—¿Lal china c'u ri' rilal? —xecha'.

Ri Jesús xuc'ul uwach:

—E ri nubi'im chi lo che alak.

26 Ri'in lic c'o weta'am chi'ij alak re cojobal mac alak y re k'atbal tzij pawil alak; pero xew cambi'ij chiquiwach conoje ri ticawex sa' ri nutom che ri takayom lo we'in, yey Rire lic katzij janipa ri cubi'ij —xcha'.

27 Ri Jesús e cach'a't puwi Rukaw, pero rique na xquimaj ta usuc' wa'.

28 E uwari'che ri Jesús xubi'ij chique:

—Echiri' cayac alak Ralaxel Chiquixo'l Ticawex y caya alak chwa ri cruz,[☆] c'a ec'uchiri' queta'maj alak ri': «In Ri'in». Yey na jinta c'o can'an xa pa we ri'in, ma xew cambi'ij janipa ruc'utum ri Nukaw chwe. 29 Ma ri takayom lo we'in c'o wuc'; ri Nukaw na inuya'om ta can nutuquel, ma ri'in xew can'ano janipa ri caraj Rire —xcha'.

30 Echiri' xubi'ij tak wa' ri Jesús, lic e q'ui ri xquicojo Rire e ri jun k'alajisanel coye'em cac'unic.

Ri e c'o puk'ab ri Dios y ri e c'o puk'ab ri mac

31 Ec'uchiri', ri Jesús xubi'ij chique ri e aj judi'ab xquicojo Rire e ri jun k'alajisanel coye'em cac'unic.

—We catakej c'u alak janipa wa cambi'ij che alak, ri' pakatzij wi cu'an alak nutijo'n; 32 y jec'ula' queta'maj alak ri K'ijsak, y ri K'ijsak caresaj lo alak puk'ab ri ajaw alak —xcha'.

33 Rique xquic'ul uwach:

—Ri'oj oj ralc'o'al can ri Abraham y na oj c'oji'nak ta puk'ab junok. ¿Su'be c'u ri' cabi'ij la chike cojesax lo puk'ab ri kajaw? —xecha'.

34 Ri Jesús xubi'ij chique:

—Pakatzij wi cambi'ij che alak: Conoje ri quemacunic, puk'ab ri mac e c'o wi. 35 Juna aj chac pa ja na junam ta uwach ruc' ruc'ajol ri rajaw ja, ma ri aj chac xa ajilam k'ij c'o pa ja; no'j ruc'ajol na jinta utakexic e ralc'o'al

[☆] 8:17 Dt. 19:15 * 8:24 Wa' que'elawi ri Jesús xex chi c'o wi y na jinta utakexic ruc'aslemal. Éx. 3:14; Is. 43:10; Ap. 1:4 [☆] 8:28 Jn. 3:14; 12:32

rukaw. ³⁶ E uwari'che, we Ruc'ajol ri Dios caresaj lo alak che ri mac c'o wi alak, pakatzij wi c'u ri' caquiritaj lo alak che ri mac.

³⁷ »Ri'in weta'am alak ralc'o'al can ri Abraham; na ruc' ta c'u ri', ca'aj alak quincamisaj alak ma na cac'ul ta alak ri canc'ut che alak. ³⁸ Ri'in e cambi'ij ri uc'utum ri Nukaw chwe, yey ralak e ca'an alak janipa rubi'im ri kaw alak —xcha'.

³⁹ Rique xquic'ul uwach:

—Ri kakaw ri'oj e ri Abraham — xecha'.

Ec'u ri Jesús xubi'ij chique:

—We ta pakatzij wi alak ralc'o'al ri Abraham, e ca'an alak ri' ri xu'an rire. ⁴⁰ No'j ralak na je ta la' cata-jin alak che u'anic. Ma tob nubi'im che alak ri K'ijsak uc'utum ri Dios chwe, na ruc' ta c'u ri', ca'aj alak quincamisaj alak. ¡Ri Abraham na je ta la' xu'ano! ⁴¹ Ralak e ca'an alak pacha' ri cu'an ri kaw alak —xcha'.

Ec'uchiri', xquibi'ij rique che:

—Ri'oj na oj ta pacha' ri winak na queta'am taj china ri quikaw; ma xa jun ri Kakaw, e ri Dios —xecha'.

⁴² Xubi'ij c'u ri Jesús chique:

—We ta pakatzij wi e kaw alak ri Dios, ralak lic c'ax quinna' alak ri', ma ri'in ruc' ri Dios in petinak wi yey ri' in c'o chiwach alak. Na in petinak ta c'u xa pa we ri'in, ma e ri Dios takayom lo we'in.

⁴³ »¿Su'be na camaj ta alak usuc' janipa ri cambi'ij che alak? E ruma ri na ca'aj ta alak cata alak ri cambi'ij ri'in. ⁴⁴ Ri kaw alak e ritzel winak, ma e ca'an alak sa' ri caraj rire. Ritzel winak aj camisanel chwi lo ri jekebal ruwachulew. Yey rire na xtiqui' ta can pa ri K'ijsak, y na jinta ne c'ana K'ijsak ruc'. Echiri' cu'an rak'ubal, e cuk'alajisaj sa' ri c'o pa ranima'; ma xex wi aj rak'ul yey ronoje rak'ubal ruc' rire cape wi. ⁴⁵ No'j ri'in e cank'alajisaj ri lic katzij, yey ralak na cacoj ta alak.

⁴⁶ »¿C'o nawi junok che alak curik juna mac chwij? Yey we katzij ri cambi'ij, ¿su'be c'u ri' na cacoj ta alak? ⁴⁷ E junok ralc'o'al ri Dios, e

cuta Ruch'a'tem ri Dios; no'j ralak na alak ta ralc'o'al ri Dios, ma na cata ta alak Ruch'a'tem —xcha'.

Ri Cristo xex chi c'o lo wi chwa ri Abraham

⁴⁸ Ec'uchiri', raj judi'ab xquibi'ij che ri Jesús:

—Lic katzij ri xkabi'ij pawil la: Rilal lal cuq'uil ri aj Samaria y lal c'o puk'ab jun itzel uxlabixel —xecha'.

⁴⁹ Ec'u ri Jesús xuc'ul uwach chique:

—Ri'in na in jinta puk'ab juna itzel uxlabixel; ri can'ano e canyac uk'ij ri Nukaw y ralak cac'ak bi alak nuk'ij. ⁵⁰ Ri'in na cantzucuj ta yacbal nuk'ij, tob c'o Jun caraj cayaqui' nuk'ij yey puk'ab Rire c'o wi cuk'alajisaj china ri c'o K'ijsak ruc'. ⁵¹ Pakatzij wi cambi'ij che alak: China ri cacojow re ri cank'alajisaj ri'in, na cacam taj ma c'o uc'aslemal na jinta utakexic — xcha'.

⁵² Ec'uchiri', raj judi'ab xquic'ul uwach:

—Wo'ora cakajiquiba' uwach, lal c'o puk'ab jun itzel uxlabixel. Ma ri Abraham y ri k'alajisanelab xecamic, yey rilal cabi'ij la: “China cacojow re ri cank'alajisaj, na cacam taj ma c'o uc'aslemal na jinta utakexic.”

⁵³ ¿Lic neba más c'o wach rilal chwa ri kakaw Abraham? Rire xecamic yey tak ri k'alajisanelab xecamic. Chiwach rilal, ¿sa' ri wach la? —xecha'.

⁵⁴ Ri Jesús xuc'ul uwach:

—We canyac nuk'ij ri'in chiwibil wib, ri' na jinta uchac ri yacbal nuk'ij can'ano; no'j c'u ri cayacaw nuk'ij e ri Nukaw, ri cabi'ij alak e Dios alak. ⁵⁵ Ec'u ralak na eta'am ta alak uwach Rire; no'j ri'in lic weta'am uwach. We ta e la' cambi'ij na weta'am ta uwach, ri' quinelic in aj rak'ul jela' pacha' ralak. No'j ri'in pakatzij wi weta'am uwach Rire yey lic can'an ronoje ri cubi'ij. ⁵⁶ Ri Abraham, ri mam alak ojertan, lic xqui'cotic echiri' xreta'maj quinc'un che ruwachulew; xril pan ri nuk'ijol y lic xqui'cot che —xcha'.

⁵⁷ Ec'uchiri', raj judi'ab xquibi'ij che ri Jesús:

—C'amaja' ne cincuenta ri junab la, ¿yey cabi'ij la xil la uwach ri Abraham? —xecha'.

⁵⁸ Ri Jesús xuc'ul uwach:

—Pakatzij wi cambi'ij che alak: Ri'in xex chi in c'o lo wi echiri' c'amaja' ne calax ri Abraham —xcha'.

⁵⁹ Ec'uchiri', ri winak xquijek caquisic' abaj re caqui'an ri Jesús pa'baj; no'j Rire xewax chiquiwach, e la' xic'ow chiquixo'l y xel bi che ri Rocho Dios.

9

Ri Jesús cucunaj jun achi ralaxibem potz'

¹ Ri Jesús echiri' catajin chi be, xril jun achi ralaxibem potz'. ² Ec'u rutijo'n xquitz'onoj che:

—Lal tijonel, ¿wa jun achi xalaxic potz' ruma nawi quimac ruchu-ukaw o ruma umac rire? —xecha'.

³ Ri Jesús xuc'ul uwach chique:

—Na ruma ta umac rire y na ruma tane quimac ruchu-ukaw; wa' e u'anom cha' ruchuk'ab ri Dios cak'alajin ruc' rire.

⁴ Lic chirajawaxic chwe can'an ruchac ri takayom lo we'in xalok' c'a pak'ij, ma cac'un lo rak'ab echiri' na jinta chi junok utz cachacunic. ⁵ Xalok' c'u in c'o ri'in wara che wu'wachulew, in ri in K'ijsak che ruwachulew —xcha'.

⁶ Echiri' ubi'im chi wa', ri Jesús xchuban chwa rulew, xu'an jubik' xok'o'l ruc' ruc'axaj. Tec'uchiri', xusok' che ruwach ri potz'. ⁷ Ec'uchiri', xubi'ij che:

—Jat, ja'ch'aja rawach pa ri ya' re Siloé —xcha'. (Siloé que'elawi “ri Takom lok”.)

Ri potz' e xu'ano; xe'ec y xu'ch'aja ruwach. Ec'uchiri' xtzelej lok, catzu'n chic.

⁸ Ec'u ri ejekel lo chunakaj ri potz' y ri quilom xaki cu'an ulimoxna, jewa' caquibi'ij: «¿Na e ta neba achi wa' catz'uyi' chi' be y cu'an ulimoxna?» quecha'.

⁹ Jujun chic caquibi'ij: «Katzij, are!» quecha'.

Jujun chic caquibi'ij: «Na e ta rire, tob lic e catzu'nic» quecha'.

No'j rachi cunutajinak chic, lic cujiquiba' uwach, jewa' cubi'ij: «Katzij, in wa' c'ut» cacha'.

¹⁰ Xquitz'onoj c'u che:

—¿Cha'ta la' xat-tzu'nic? —xecha che.

¹¹ Rire xuc'ul uwach:

—E ri jun achi Jesús ubi', xu'an jubik' xok'o'l, xusok' che ri nuwach y xubi'ij chwe: “Jat pa c'o wi ri ya' re Siloé y ja'ch'aja rawach chupa.” Xin'ec c'u ri', y echiri' xinch'aj ri nuwach, xinjek quintzu'nic —xcha'.

¹² Xquitz'onoj c'u che:

—¿Pa c'o wi ri' la' la'chi? —xecha che.

Rire xuc'ul uwach:

—Na weta'am taj pa c'o wi —xcha'.

Ri fariseos caquita uchi' ri potz' cunutajinak chic

¹³ Ec'uchiri' xquic'am bi ri potz' cunutajinak chic chiquiwach ri fariseos; ¹⁴ ma e pa jun k'ij re uxlanibal echiri' ri Jesús xu'an xok'o'l y xucunaj ri potz'.

¹⁵ Jenela' ri fariseos xquitz'onoj che cha'taj xtzu'nic.

Rire xuc'ul uwach chique:

—Rachi xusok' xok'o'l che ri nuwach, xinch'aj c'u ri nuwach y wo'ora quintzu'nic —xcha'.

¹⁶ Ec'uchiri', jujun chique ri fariseos caquibi'ij chiquiwach: «La' la'chi x'anaw re wa', na ruc' ta ri Dios petinak wi; ma e cu'an ri na ube taj ca'ani' chupa ri k'ij re uxlanibal» quecha'.

Jujun chic caquibi'ij: «We rire aj mac, ¿su'anic c'u ri' cu'an wa c'utubal re ruchuk'ab ri Dios?» quecha'.

Ruma c'u la', xquijach quipa ri fariseos chiquiwach.

¹⁷ Ec'uchiri', xquitz'onoj che rachi cunutajinak chic:

—¿Sa' ri cabi'ij ri'at chwi rachi xutzu'nisaj rawach? —xecha'.

Rire xuc'ul uwach:

—Ri'in cambi'ij e jun k'alajisanel —xcha'.

18 Pero raj judi'ab na xcaj taj caquicojo we rachi xex potz' wi y wo'ora catzu'nic. Ruma wa' xequisiq'uij ruchu-ukaw, 19 y xquitz'onoj c'u chique:

—¿E alc'o'al alak wa', ri cabi'ij alak ralaxibem potz'? ¿Cha'taj catzu'n wo'ora? —xecha'.

20 Ruchu-ukaw rachi xquic'ul uwach:

—Ri'oj lic keta'am e kalc'o'al wa' y xalaxic potz'. 21 No'j na keta'am taj cha'taj catzu'n wo'ora, y na keta'am ta nenare' china xcunan re. Tz'onoj alak che, ma rire nim chic —xecha'.

22 Ruchu-ukaw rachi xquibi'ij wa' ruma caquixi'ij quib, ma wa aj wach que raj judi'ab qui'anom chi tzij chiquiwach cha' na quec'ul ta chi pa ri sinagoga janipa ri caquijiquiba' uwach ri Jesús e ri Cristo, Rucha'o'n lo ri Dios. 23 E uwari'che ruchu-ukaw rachi xquibi'ij: «Tz'onoj alak che, ma rire nim chic.»

24 Ec'uchiri', raj judi'ab xquitak tanchi usiq'uixic rachi cunutajinak chic y xquibi'ij che:

—Wo'ora chajiquiba' uwach chwach ri Dios ri cabi'ij. Ma ri'oj keta'am wa' wa'chi lic aj mac —xecha'.

25 Ec'u rire xubi'ij:

—We rire aj mac na weta'am ta c'u ri' ri'in, xew weta'am e ri petinak lok in potz' yey wo'ora quintzu'nic —xcha'.

26 Xquitz'onoj tanchi che:

—¿Sa' ri xu'an chawe? ¿Su'anic xutzun'isaj rawach? —xecha'.

27 Rachi xuc'ul uwach:

—Ri'in ya ximbi'ij che alak y na x'aj ta cata alak. ¿Su'chac c'u ri' ca'aj alak cambi'ij tanchic? ¿Ca'aj cami ralak cu'an alak utijo'n? —xcha'.

28 Ec'u rique xquiyajo, jewa' xquibi'ij che:

—Ri'at e catakej la' la jun achi, no'j ri'oj e cakatakej rutz'ibam can ri Moisés. 29 Ma ri'oj keta'am ri Dios xch'a't ruc' ri Moisés; no'j la' la jun achi, na keta'am taj pa petinak wi —xecha che.

30 Ec'u rire xubi'ij chique:

—¿E la' la lic cacam wanima' ri'in che! Ma ralak na eta'am ta alak pa petinak wi wa'chi, yey rire xutzun'isaj ri nuwach ri'in.

31 Keta'am c'u chi utz, ri Dios na quebuta ta raj maquib, xew quebuta ri caquilok'oj uk'ij y caqui'an ri rajawal uc'u'x Rire. 32 Chwi lo ri jekebal ruwachulew, na junta tatajinak wi we c'o junok utzun'isam juna ticawex potz' chwi ralaxic. 33 We tamaji wa jun achi petinak ruc' ri Dios, ri' na junta puk'ab cu'an wa' —xcha'.

34 Xquibi'ij c'u che:

—Ri'at lic pa mac xatalax wi. ¿Cawaj cami ri' catc'utun chikawach? —xecha che.

Chwi c'u ri' la', na xquic'ul ta chi pa ri sinagoga.

Ri potz' cunutajinak chic cucoj rubi' ri Jesús

35 Ec'u ri Jesús xreta'maj na caquic'ul ta chi pa ri sinagoga rachi cunutajinak. Uwari'che echiri' xuc'ulu, jewa' xubi'ij che:

—¿Cubul ac'u'x ri'at ruc' Ralaxel Chiquixo'l Ticawex? —xcha'.

36 Rachi xuc'ul uwach:

—Wajawal, bi'ij la chwe china rire cha' cacubi' nuc'u'x ruc' —xcha'.

37 Ri Jesús xubi'ij che:

—Awilom chi uwach; ma in ri' ri quinch'a't awuc' —xcha'.

38 Ec'uchiri', rachi xuxucuba' rib chwach y xulok'nimaj uk'ij, jewa' xubi'ij che:

—Wajawal, ri'in cacubi' nuc'u'x uc' la —xcha'.

39 Ec'u ri Jesús xubi'ij:

—Ri'in in c'uninak che ruwachulew cha' wuma ri'in cak'alajinic china ri caquic'ul ri K'ijsak y china ri na caquic'ul taj. In c'uninak c'u ri' cha' e ri na quetzu'n taj, cajakataj ri quiwach y jela' caquil ri K'ijsak; yey ec'u ri “quetzu'nic”, cach'ukutaj ri quiwach y na caquil ta ri K'ijsak —xcha'.

40 Jujun c'u chique ri fariseos, ri e c'o pan chunakaj ri Jesús, echiri' xquita wa', xquitz'onoj che:

—¿E cami que'elawi ri' oj potz' ri'oj? —xecha'.

⁴¹ Ri Jesús xuc'ul uwach:

—We ta caya ib alak chupa na quil ta alak ri K'ijsak, na jinta mac alak ri'. No'j ruma ri cabi'ij alak quil alak chi utz ri K'ijsak, e cacana'j c'u alak ri' chupa ri mac alak* —xcha'.

10

Tak ri bexex queta'am uwach ri chajinel que

¹ Ri Jesús xubi'ij:

«Pakatzij wi cambi'ij che alak: China ri na coc tubi che ruchi' ri coral que ri bexex yey xa tob c'u pa coc wubi, ri' elek'om y e querelek'aj bi ri bexex. ² No'j c'u ri coc bi che ruchi' ri coral, ri' e chajinel que ri bexex. ³ Ec'u rire echiri' copon chwach ruchi' ri coral, ri chajinel c'o che ruchi' coral, cujakala' lo che. Yey tak ri bexex queta'am ruch'awibal ri chajinel que, ma rire quebusiq'uij ruc' ri quibi' chiquijujunal y queberesaj bi pa ri coral. ⁴ Echiri' eresam chubi conoje rubexex pa ri coral, canabej bi chiquiwach y conoje rubexex queterej bi chirij ma queta'am ruch'awibal. ⁵ No'j tak ri bexex na queterej tubi chirij junok we na queta'am ta uwach; ri caqui'ano e quebanimaj chwach ma na queta'am ta ruch'awibal» xcha'.

⁶ Ri Jesús xubi'ij wa jun c'ambal na'oj chique, pero rique na xquimaj ta usuc' sa' ri caraj cubi'ij chique.

Ri Jesús e utzilaj chajinel que bexex

⁷ Ec'uchiri', xubi'ij ri Jesús:

«Pakatzij wi cambi'ij che alak: In ri in uchi' ri coral pa quebec wi ri bexex. ⁸ Conoje ri xec'un nabe chinuwach* ri'in e elek'omab y xa e quequelek'aj bi ri bexex; pero ri bexex na xequicajmaj ta rique.

⁹ »In ri in uchi' ri coral que ri bexex. China ri coc bi wuma ri'in, ri' cacolobetajic y cachajix chi utz

pacha' ri bexex queboquisax chak'ab pa ri coral y quebesax bi pak'ij re quebe'wo'k pa chomilaj q'uim. ¹⁰ Juna elek'om xew cac'unic re cu'an elek', cu'an camic y cusach uwach ronoje. No'j ri'in in c'uninak re canya c'aslemaal che alak yey wa' e jun chomilaj c'aslemaal na jinta chi uq'uisic.

¹¹ »In ri in utzilaj chajinel que bexex. Juna utzilaj chajinel que bexex cuya ranima' cacam cuma rubexex. ¹² No'j juna mocom cachacun xa ruma catojic. Echiri' carilo cac'un lo rutiw, canimajic y quebuya can ri bexex; ma na e ta chajinel que y na e tane cajaw. E uwari'che cuya luwar che rutiw quebuchap ri bexex y quebuquicherisaj bi. ¹³ Wa mocom canimajic ma na coc ta il chique ri bexex, xew e coc il che ri cuch'aco.

¹⁴ »In ri in utzilaj chajinel que bexex, ma ri'in weta'am quiwach ri nubexex y rique queta'am nuwach ri'in. ¹⁵ Jela' pacha' ri Nukaw reta'am nuwach ri'in, jec'ula' ri'in weta'am uwach Rire; yey canya wanima' quincam cuma ri nubexex.

¹⁶ »E c'o jujun chic nubexex na e ta cuq'uul wa e c'o pa wa coral. Lic chirajawaxic wi quebe'nuc'ama' lok. We xebenusiq'uij, caquicoj nutzij y jela' quebu'ana xa jun pa ri coral y xa jun ri chajinel que.

¹⁷ »Ruma c'u la', ri Nukaw c'ax quinc'astaj lo chiquixo'l ri ecaminak. ¹⁸ Na ya'tal ta puk'ab junok caresaj ri nuc'aslem we na in ta quinya'w re che. Panuk'ab ri'in c'o wi canya wib pa camic y panuk'ab c'o wi quinc'astaj lo chiquixo'l ri ecaminak. Yey wa' e ri Nukaw ya'yom panuk'ab» xcha'.

¹⁹ Echiri' raj judi'ab xquita wa ch'a'tem, xquijach tanchi quipa

* **9:41** Juna aj mac we cuya rib chupa rumac y cutzucuj ri K'ijsak, cuc'ul c'u ri' ri cuybal mac. No'j ri fariseos xquil ri K'ijsak re ri Cristo yey na xcaj taj caquic'ulu. Chiquiwach rique na jinta quimac y lic queta'am chi ronoje puwi ri Dios; e uwari'che na utz taj caquic'ul ri cuybal mac re ri Dios. * **10:8** «Conoje ri xec'un nabe chinuwach»: Wa' e ri caquibi'ij e k'alajisanel re ri Dios tob na e taj. Pa wa c'ambal na'oj ri bexex e rutinamit ri Dios.

chiquiwach, ma e c'o ri xecojow re y e c'o ri na xecojow taj. ²⁰ E q'ui chique jewa' caquibi'ij: «La' c'o puk'ab juna itzel uxlaxixel y ch'u'jerinak. ¿Su'chac cata alak re?» quecha'.

²¹ No'j c'o jujun chic jewa' caquibi'ij: «Na jinta junok jela' cach'a'tic we c'o puk'ab juna itzel uxlaxixel. ¿C'o neba juna itzel uxlaxixel quebutzu'nisaj ri e potz'!» quecha'.

Raj wach que raj judi'ab na caquicoj taj we ri Jesús e Ucha'o'n lo ri Dios

²² Chupa c'u ruk'ijol echiri' c'ax tew y c'o jab,† e ri' catajin ri nimak'ij re ri Rocho Dios chila' Jerusalem. ²³ Y ri Jesús cabin che ri Rocho Dios pa ri luwar cabi'x che “Ruchi' Ja re Salomón”‡

²⁴ Ec'u raj judi'ab xquisut rij ri Jesús y jewa' xquibi'ij che:

—¿Jampa xaki e wa' na cak'alajisaj ta la chikawach sa' ri wach la? We lal c'u Rucha'o'n lo ri Dios, asu bi'ij la chike —xecha'.

²⁵ Ri Jesús xuc'ul uwach:

—Nubi'im chi che alak, yey na cacoj ta alak. Ronoje tak ri chac can'ano, e ri Nukaw intakayom che can'ano. Ruc' tak c'u wa can'ano, cak'alajinic in china ri'in. ²⁶ No'j ralak na cacoj ta alak, ma na alak ta cuq'u'il ri nubexex, jela' pacha' ri nubi'im chi lo che alak.

²⁷ Tak ri nubexex queta'am chi ri nuch'awibal; yey ri'in weta'am quiwach y rique eteran chwij. ²⁸ Ri'in canya quic'aslemal na jinta utakexic cha' jela' na casach ta c'ana quiwach y na jinta ne junok queberesaj panuk'ab. ²⁹ Yey e ri Nukaw ri xeya'w que panuk'ab, y Rire más c'o uwach chiquiwa conoje. Ruma c'u ri', na jinta junok queberesaj puk'ab Rire.

³⁰ Ma ri Nukaw y ri'in xa oj jun —xcha'.

Raj wach que raj judi'ab cacaj caqui'an ri Jesús pa'baj

³¹ Julaj chic raj judi'ab xquic'am abaj paquik'ab re caqui'an ri Jesús pa'baj.

³² Pero Rire xubi'ij chique:

—Lic q'ui ri utzilaj chac nu'anom chiwach alak ruc' ruchuk'ab ri Nukaw. ¿Ruma pachique che tak wa nu'anom quin'an alak pa'baj? —xcha'.

³³ Raj judi'ab xquic'ul uwach:

—Na caka'an ta la pa'baj ruma ri utz 'anom la; e ruma macuninak la chirij ri Dios ruc' ri ch'a'tem la. Ma rilal xa lal jun achi y ca'an Dios che ib la —xecha'.

³⁴ Ec'uchiri', ri Jesús xubi'ij chique:

—Jewa' tz'ibital can chupa ri Tzij Pixab c'o uc' alak: “Ximbi'ij: Ri'ix ix dios.”§ ³⁵ Ri Dios xubi'ij c'u “dios” chique ri xquic'ul Ruch'a'tem, yey Ruch'a'tem na cajalc'atitaj taj. ³⁶ ¿Su'anic c'u ri' cabi'ij alak chwe in macuninak xa ruma ri ximbi'ij in Uc'ajol ri Dios? ma ri Dios xinucha' lo ri'in yey xinutak lo che ruwachulew.

³⁷ »We na e ta can'an ruchac ri Nukaw, utz c'u ri' we na cacoj ta alak ri cambi'ij. ³⁸ No'j we e can'an ruchac ri Nukaw, cojo c'u alak ri' in china ri'in ruma tak ri can'ano, na xa ta ruma ri cambi'ij. Y jela' queta'maj alak y cacoj alak ri': Ri Nukaw wuc' ri'in y ri'in ruc' Rire, xa oj jun —xcha'.

³⁹ Ec'u raj judi'ab xcaj tanchic caquichapo, pero na xquichap taj ma ri Jesús xel bi chiquixo'l.

⁴⁰ Y xuk'axuj c'u ri nimaya' Jordán pa xuya wi bautismo ri Juan y xcanaj can chila'. ⁴¹ Uq'uiyal winak xebo-pon ruc'; xe'quila' y jewa' caquibi'ij: «Ri Juan na xu'an ta juna c'utubal re ruchuk'ab ri Dios chikawach; na ruc' ta c'u ri', ronoje ri xubi'ij can chwi wa' wa'chi, lic katzij» quecha'.

⁴² Y lic e q'ui ri xcubi' quic'u'x ruc' ri Jesús chila'.

† 10:22 “Ruk'ijol echiri' c'ax tew y c'o jab”: Quil “invierno” pa vocabulario. ‡ 10:23 “Ruchi' Ja re Salomón”: Jun corredor uk'ab ri tapia re ri Rocho Dios. § 10:34 Ojertan cabi'x “dios” chique ri e aj wach re ri tinamit. Salmos 82:6 e jun pixabanic xuya ri Dios chique ri e aj wach y cubi'ij rique e “dios” y e ral'c'o'al ri Dios.

11

Rucamic ri Lázaro

¹ C'o c'u jun achi yewa', Lázaro rubi'. Rire aj Betania, y chila' ejekel wi ri ranab María y Marta. ² Wa' wa María e ri xuk'ej cunabal lic qui' ruxlab che ri rakan ri Jesús y xuchakisaj ruc' ruwi'.^{*} ³ Ec'u ri queb ixokib quichak' quib jewa' xquitak ubi'xiquil che ri Jesús: «Kajawal, ri jun lic c'ax cana' la, lic yewa'.»

⁴ Echiri' ri Jesús xuta wa', jewa' xubi'ij: «Wa' wa yabil na re ta camic, ma re yacbal uk'ij ri Dios y re yacbal uk'ij Ruc'ajol ri Dios» xcha'.

⁵ Ec'u ri Jesús lic c'ax quebuna' ri oxib quichak' quib: Ri Marta, ri María y ri Lázaro. ⁶ Na ruc' ta c'u ri', echiri' xuto yewa' ri Lázaro, c'a xcanaj chi can queb k'ij pa ri luwar pa c'o wi. ⁷ Tec'uchiri', xubi'ij chique rutijo'n:

—Jo' tanchi Judea —xcha'.

⁸ Ec'u rutijo'n xquibi'ij che:

—Lal tijonel, ¿na c'ac' ta neba la' raj judi'ab ya laj xquicamisaj la pa' baj? Na ruc' ta c'u ri', ¿wo'ora que'ec tanchi la chila'? —xecha'.

⁹ Ri Jesús xubi'ij chique:

—¿Na katzij ta neba la' cablajuj ora c'o che ri jun k'ij? Yey e junok cabin pak'ij na cuchik ta ri rakan, ma caril rube ruma ri k'ij sak re ruwachulew.

¹⁰ No'j we junok cabin chak'ab, ri' cuchik ri rakan ma pa k'eku'm c'o wi —xcha'.

¹¹ Tec'uchiri', xubi'ij chique:

—E ri kamigo Lázaro, cawaric. Quin'ec c'u che uc'osoxic —xcha'.

¹² Xquibi'ij c'u rutijo'n che:

—Kajawal, utz we cawaric, ma ri' e c'utubal re cutzir uwach —xecha'.

¹³ Ri xquich'ob rique e xa cuxlan ri Lázaro; no'j ri Jesús e cach'a't puwi rucamic ri Lázaro.

¹⁴ E uwari'che ri Jesús xuk'alajisaj chique:

—Ri Lázaro caminak chic. ¹⁵ Yey iwuma c'u ri'ix, lic quinquicotic ri na in junta chila' ruc' echiri' xcamic, ma jela' canimar ri cubulibal ic'u'x wuc'. Wo'ora jo', je'kila' —xcha'.

¹⁶ Ec'uchiri', ri Tomás ri cabi'x “Yo'x” che, xubi'ij chique ri jujun chic rachbi'il:

—Coj'ec ri' cha' jela' cojcam junam ruc' ri Jesús —xcha'.

Ri Jesús e ri cac'astajisan lo que ri ecaminak

¹⁷ Cajib k'ij chi lo ri' mukutal ri Lázaro echiri' ri Jesús xopon Betania.

¹⁸ Wa' xa chunakaj Jerusalem c'o wi, laj oxib kilómetro c'o wi lo che. ¹⁹ E q'ui chique raj judi'ab e petinak cuc' ri María y ri Marta re co'lquibochi'ij quic'u'x ruma rucamic ri quixibal. ²⁰ Ec'uchiri' ri Marta xuto catajin roponic ri Jesús, xel bi che uc'ulic; no'j ri María xcanaj can chwa ja.

²¹ Ec'u ri Marta xubi'ij che ri Jesús:

—Wajawal, we ta e la' c'o la wara, na cacam ta ri' ri nuxibal. ²² Na ruc' ta c'u ri', lic weta'am, tob ne c'a e wa', ri Dios cuya che'la ronoje ri catz'onoj la che —xcha'.

²³ Ri Jesús xubi'ij che:

—Raxibal cac'astaj lo chiquixo'l ri ecaminak —xcha'.

²⁴ Ri Marta xubi'ij che:

—Katzij, ri'in weta'am cac'astaj lo che ri q'uisbal k'ij re ruwachulew echiri' quec'astaj lo conoje ri ecaminak —xcha'.

²⁵ Ri Jesús xubi'ij che:

—E ri'in ri quinc'astajisan lo que ri ecaminak yey e ri'in ri quinya'w c'aslemal. China c'u ri cacubi' uc'u'x wuc', tob cacamic, cac'astajic.

²⁶ Yey conoje ri e c'aslic y cacubi' quic'u'x wuc', na quecam taj ma c'o quic'aslemal na junta utakexic ruc' ri Dios. ¿Cacoj ri'at wa'? —xcha'.

²⁷ Ri Marta xuc'ul uwach:

—Cancojo, Wajawal, ma ri'in nucojom rilal lal ri Cristo, Ruc'ajol ri Dios, ri bi'tisim lok cac'un che ruwachulew —xcha'.

Ri Jesús cok' chwa rumukubal ri Lázaro

²⁸ Echiri' ri Marta xuq'uis ubi'xic wa', xe'ec che usiq'uixic ruchak' María y xew che rire xubi'ij:

—Ri Kajawal c'o wara y catusiq'uij —xcha'.

^{*} 11:2 Jn. 12:1-8

²⁹ Xew xuta wa' ri María, na jampatana xyactaj bi y xe'rila ri Jesús.

³⁰ Ri Jesús c'amaja' ne coc pa ri tinamit, ma c'a c'o pa ri luwar pa xc'ul wi ruma ri Marta.

³¹ Ec'u raj judi'ab e c'o ruc' ri María re caquibochi'ij uc'u'x, xquilo echiri' na jampatana xyactajic y canic xel bi. Rique xeterej c'u bi chirij, ma e chiquiwach rique e ri' que'ec chwa ri mukubal cha' que'rok'ej ruxibal.

³² Echiri' ri María xopon pa c'o wi ri Jesús, xew xril uwach, xuxuc rib chwach, y jewa' xubi'ij che:

—Wajawal, we ta e la' lal c'o la wara, na cacam ta ri' ri nuxibal — xcha'.

³³ Ri Jesús echiri' xrilo lic quebok' ri María y raj judi'ab eteran lo chirij, lic xoc chuc'u'x y xuchap bis. ³⁴ Xubi'ij c'u chique:

—¿Pa ximuk wi? —xcha'.

Rique xquibi'ij:

—Kajawal, peta la y chilape la — xecha'.

³⁵ Ec'u ri Jesús xok'ic.

³⁶ Xquibi'ij c'u raj judi'ab:

—¿Chilape alak, lic c'ax cuna'o! — xecha'.

³⁷ E c'o jujun chique raj judi'ab xquibi'ij:

—Wa wa'chi e xtzu'nisan re ri jun potz'. ¿Su'be c'u ri' na jinta xu'ano cha' na cacam ta ri Lázaro? —xecha'.

Ri Jesús cuc'astajisaj lo ri Lázaro chiquixo'l ri eaminak

³⁸ Ri Jesús lic xoc tanchi bis chuc'u'x, xkib chwa ri mukubal. Wa' jun jul worotal pa' baj y tz'apal uchi' ruc' jun abaj. ³⁹ Ec'u ri Jesús xubi'ij:

—Chiwesaj la' baj — xcha'.

Yey ri Marta, ri ranab can ri caminak, xubi'ij che:

—Wajawal, la' lic chu chic, ma e ucay k'ij wa' mukutalic — xcha'.

⁴⁰ Ri Jesús xubi'ij che:

—¿Na nubi'im ta neba chawe, we cacubi' ac'u'x wuc', cawil runimal uwach uk'ij ri Dios? — xcha'.

⁴¹ Ewi xquesaj rabaj c'o chuchi' ri mukubal.

Ec'uchiri', ri Jesús xtzu'n chicaj y xubi'ij:

—Lal Nukaw, maltiox co che'la ma intom chi la. ⁴² Ri'in weta'am lic xaki quinta la, pero cambi'ij c'u wa' cuma wu'q'uiyal ticawex e c'o wara, cha' rique caquicojo lal takayom lo we — xcha'.

⁴³ Echiri' xuq'uis ubi'ixiquil wa', lic co xsiq'uin che ubi'ixiquil:

—¿Lázaro, chatelulok! — xcha'.

⁴⁴ Ewi ri Lázaro xel lok, bolk'otim ri rakan y ruk'ab pa c'ul yey rupalaj ch'ukutal ruc' jun c'ul. Ruma c'u la', ri Jesús xubi'ij chique:

—Chiquira ri c'ul c'o che cha' utz que'ec — xcha'.

Ri e aj wach re ri tinamit caqui'an tzij chiquiwach cha' caquicamisaj ri Jesús

(Mt. 26:1-5; Mr. 14:1-2; Lc. 22:1-2)

⁴⁵ E q'ui c'u chique raj judi'ab, ri e petinak che ubochi'ixic uc'u'x ri María, echiri' xquil ri xu'an ri Jesús, xquicuba' quic'u'x ruc'. ⁴⁶ No'j e c'o jujun chique xebec cuc' ri fariseos, y xe'quitziyoj chique ri xu'an ri Jesús.

⁴⁷ Ec'u ri nimak e aj chacunel pa Rocho Dios y ri fariseos xquimol quib cuc' jujun chic chique ri e aj k'atal tzij y jewa' xquibi'ij:

—¿Sa' ri caka'ano? Ma wa'chi lic uq'uiyal c'utubal re ruchuk'ab cu'ano. ⁴⁸ We na cakak'atej taj,

conoje cacubi' quic'u'x ruc' y quec'un c'u lo ri' raj wach re Roma cha' co'lquiwulij wa Luwar pa cakalok'nimaj wi ri Dios y wa katinamit — xecha'.

⁴⁹ Ec'uchiri' ri Caifás, ri cajawal raj chacunel pa Rocho Dios che la' la junab, jewa' xubi'ij chique:

—Ralak na jinta eta'am alak. ⁵⁰ Na cach'ob ta alak rakan chi utz, ma e más utz we xa jun chi achi cacam puc'axel ri tinamit chwa ri casach quiwach conoje ri katinamit — xcha'.

⁵¹ Ri Caifás na xa ta pa re rire xubi'ij wa'. Ma ruma e cajawal raj chacunel pa Rocho Dios che la' la junab, ri Dios xuya che cuk'alajisaj e cacam ri Jesús paquic'axel conoje ri tinamit e

aj judi'ab. ⁵² Y na xew ta cuma ri tinamit Israel xcam ri Jesús, ma xcamic cha' cu'an xa jun chique conoje ri e ralc'o'al ri Dios equicherinak bi che ruwachulew.

⁵³ Ec'u raj judi'ab chwi la' la k'ij wi xqui'an tzij chiquiwach cha' caquicamisaj ri Jesús. ⁵⁴ Ruma c'u wa', ri Jesús na xbin ta chi chiquixo'l chiwachil. Ewi xel bi pa ri luwar re Judea y xe'ec chunakaj ri luwar catz'intz'otic, pa jun tinamit Efraín rubi'. Chiri' xcanaj can wi junam cuc' rutijo'n.

⁵⁵ Xa nakaj chi c'o wi lo ri Pascua, wa' e quinimak'ij raj judi'ab. Uq'uiyal winak re tak ri tinamit xepaki' Jerusalem re caqui'an ri quijosk'iquil chwach ri Dios,* cha' jela' takal chique caqui'an ri nimak'ij Pascua. ⁵⁶ E tak c'u ri winak quetajin che utzucuxic ri Jesús, yey echiri' e c'o pa ri Rocho Dios, caquitz'onobej chiquiwach: «¿Sa' nawi quich'ob ri'ix? ¿Cac'un nawi pa wa nimak'ij?» quecha'.

⁵⁷ Yey ri fariseos cuc' ri nimak e aj chacunel pa Rocho Dios etakaninak che we c'o junok careta'maj pa c'o wi ri Jesús, chubi'ij cha' que'quichapa ulok.

12

Jun ixok cuk'ej cunabal qui' ruxlab che ri rakan ri Jesús

(Mt. 26:6-13; Mr. 14:3-9)

¹ Wakib k'ij chi c'u ri' che ri nimak'ij Pascua, ri Jesús xe'ec Betania pa jekel wi ri Lázaro, ri jun xuc'astajisaj lo che ri camic. ² Chiri' xqui'an wi jun wa'im re yacbal uk'ij ri Jesús. Ec'u ri Marta e caniman ri wa'im y ri Lázaro e jun chique ri etz'ul chwa ri mexa ruc' ri Jesús.

³ Ec'u ri María xuc'am lo jun libra re sakil nardo, wa' e jun cunabal lic qui' ruxlab y lic q'ui rajil. Xuk'ej c'u ri' che

ri rakan ri Jesús; tec'uchiri', xuchakisaj ruc' ruwi'. Ronoje c'u rupa ja lic xmuyuy che ri ruxlab wa cunabal.

⁴ C'o c'u chiri' ri Judas aj Iscariot, jun chique rutijo'n ri Jesús. (E ri cac'ayin re ri Jesús). Rire xubi'ij:

⁵ —¿Su'be na xc'ayix ta wa' wa cunabal chi oxib ciento denarios cha' ruc' ri rajil queto' ri niba'ib? —xcha'.

⁶ Ri Judas xubi'ij wa' na e ta ruma caraj quebuto' ri niba'ib, ma e ruma rire elek'om. Yey puk'ab c'o wi ri bolxa pa c'olotal wi ri puak que rutako'n ri Jesús y c'o ne caresaj che.

⁷ Ec'u ri Jesús xubi'ij che ri Judas:

—Match'a't chirij wi'xok, ma wa cunabal xex chi uc'olom re pan ruk'ijol ri mukubal we.* ⁸ Ma tak ri niba'ib ronoje k'ij e c'o iwuc', no'j ri'in na xaki ta in c'o iwuc' —xcha'.

Raj judi'ab caquitzucuj su'anic caquicamisaj ri Lázaro

⁹ E q'ui chique raj judi'ab xqueta'maj c'o ri Jesús chila' Betania. Xebec c'u che rilic, na xew ta ruma cacaj que'quila ri Jesús, ma cacaj que'quila ri Lázaro, ri jun xuc'astajisaj lo chiquixo'l ri ecaminak. ¹⁰ Ruma c'u ri', ri nimak e aj chacunel pa Rocho Dios xqui'an tzij chiquiwach cha' caquicamisaj ri Lázaro; ¹¹ ma ruma rire, e q'ui chique raj judi'ab xquesaj bi quib cuc' y e xcubi' quic'u'x ruc' ri Jesús.

Ri winak caquiyac uk'ij ri Jesús echiri' coc Jerusalem

(Mt. 21:1-11; Mr. 11:1-11; Lc. 19:28-40)

¹² E q'ui ri winak eboptoninak Jerusalem ruma ri nimak'ij Pascua. Chuca'm k'ij c'u ri' xqueta'maj copon ri Jesús pa ri tinamit. ¹³ Xquik'at c'u uxak palma y xebel bi che uc'ulic. Ec'uchiri', xquijeko lic quesiq'uinic, jewa' caquibi'ij:

«¡Kayaca uk'ij!

* **11:55** Chupa ri Tzij Pixab tz'ibital can ruma ri Moisés cubi'ij sa' tak ri cajawaxic caqui'an ri ticawex we xquich'ulaj quib o we c'o xquichapo lic ch'ul y ruc' wa' na utz taj caqui'an juna nimak'ij chwach ri Dios. Chirajawaxic c'u ri' nabe na caqui'an ri quijosk'iquil chwach ri Dios. Lv. 7:21; Nm. 9:1-13 y 2 Cr. 30:17-18

* **12:7** Echiri' cacam junok, raj judi'ab cacatinisaj ri cuerpo y caquicoj aceite o perfume che. Wa' e pacha' ri xu'an rixok che ri rakan ri Jesús.

¡Nim uk'ij ri jun petinak chupa rubi' ri Dios Kajawxel!✠

¡Rire e ri Rey re Israel!» quecha'.

¹⁴ Ri Jesús urikom lo jun k'apoj buru y ucojom lok, pacha' tz'ibital can chupa Ruch'a'tem ri Dios:

¹⁵ Mixi'ij iwib ri ix aj Sion.

Chiwilape', ri Rey iwe'ix cac'unic, ucojom lo jun k'apoj buru *Zac. 9:9* cache'.

¹⁶ Echiri' xu'an tak wa', rutijo'n na xquimaj ta usuc'; c'a e xquimaj usuc' echiri' lic xyac uk'ij ri Jesús chiquiwach ruma ruc'astajibal. C'a ec'uchiri' xc'un chiquic'u'x, e janipa ri x'ani' che, ronoje wa' tz'ibital can pa Ruch'a'tem ri Dios.

¹⁷ E tak ri e c'o ruc' ri Jesús echiri' Rire xusiq'uij pan ri Lázaro chupa ri mukubal y xuc'astajisaj lo chiquixo'l ri ecaminak, quetajin che utzijoxic ri xquilo. ¹⁸ Ruma wa', uq'uiyal winak xebel lo che uc'ulic ri Jesús, ma xquita ri catzijox puwi wa' c'utubal re ruchuk'ab.

¹⁹ Ec'uchiri', ri fariseos xquibi'ij chiquiwach: «Quiwil c'u'la', lic na junta cutikoj sa' ri ka'anom chirij ri Jesús, ma ¡chiwilape'! conoje ri winak eteran chirij» xecha'.

Jujun na e ta aj Israel caquitzucuj ri Jesús

²⁰ E c'o jujun na e ta aj Israel chiquixo'l ri winak eboponinak Jerusalem re que'quiloc'nimaj uk'ij ri Dios pa ri nimak'ij Pascua. ²¹ Wa' xekib ruc' ri Felipe, ri aj Betsaida, jun luwar re Galilea. Lic c'ut xebelaj che, jewa' xquibi'ij:

—Ma'an co la ri', chojto'o la, ma ri'oj cakaj cakil uwach ri Jesús — xecha'.

²² Ri Felipe xe'ec y xutzijoj wa' che ri Andrés. Tec'uchiri' xebec junam, xe'quitzijoj che ri Jesús.

²³ Ec'u ri Jesús xubi'ij chique:

—Xopon c'u ruk'ijol ri yacbal uk'ij Ralaxel Chiquixo'l Ticawex.

²⁴ Pakatzij wi cambi'ij chiwe: E juna ija' re trigo echiri' catzak pulew, camukic y cacamic. Yey we na jela' ta cu'ano, cacana' can utuquel xew ija'. No'j we rija' catzak pulew, ri' lic cawachinic y jec'uri'la' caq'uiyar uwach. ²⁵ Jec'uri'la', china ri lic coc il che ruc'aslem† che ruwachulew, ri' e cujam ri c'aslemal chila' chicaj; no'j china ri na coc ta il che ruc'aslem‡ wara che ruwachulew, ri' na cujam ta c'u ri chomilaj uc'aslemal na junta utakexic chila' chicaj.

²⁶ »China ri caraj cachacun pa ri nuchac, chirajawaxic ri' caterej lo chwij. Jec'ula' tob pa quinc'oji' wi ri'in, chiri' cac'oji' wi ri waj chac. China c'u ri ca'anaw ri nuchac, ri' cayac uk'ij ruma ri Nukaw.

Ri Jesús cuk'alajisaj sa' rucamic

²⁷ »Wo'ora lic paxinak nuc'u'x. ¿Sa' nawi ri cambi'ij? ¿Utz nawi jewa' cambi'ij: “Nukaw, chincolobej la che wa' can'ulumaj wo'ora”? ¡Na utz taj! Ma ruma ne wa' in petinak. ²⁸ Xew cambi'ij: “Nukaw, nimarisa' uk'ij ri bi' la” —xcha'.

Ec'uchiri', xch'aw lo Jun chila' chicaj, jewa' xubi'ij:

—Nunimarisam chic, y e wa' canimarisaj tanchic —xcha'.

²⁹ Ri winak e c'o chirij xquita wa' y xquibi'ij: «La' uch'awibal jab.» Yey jujun chic xquibi'ij: «Jun ángel xch'aw lo che» xecha'.

³⁰ Ec'u ri Jesús xubi'ij chique:

—Na wuma ta ri'in xtataj wa jun kulaj, ma e uma ralak. ³¹ Yey wo'ora cak'at tzij paquiwi ri winak re ruwachulew y quesax na c'u bi ritzel winak, ri jun catakan che ruwachulew. ³² Echiri' quinyaqui' na lo chicaj,§ can'an chique ri ticawex che ronoje ruwachulew cha' lic cache'

✠ **12:13** Sal. 118:26 † **12:25** “Ri lic coc il che ruc'aslem”: Pa griego cubi'ij “ri c'ax cuna' ruc'aslem”.

Wa' e que'elawi xew coc il chiribil rib y na coc ta il che ri caraj ri Dios. ‡ **12:25** “Ri na coc ta il che ruc'aslem”: Pa griego cubi'ij “ri tzel caril ruc'aslem”. Wa' e que'elawi cuya rib che u'anic janipa ri caraj ri Dios, tob cujam ronoje ri c'o ruc', tob ne cacamisaxic. § **12:32** Ri Jesús xyaqui' lo chicaj echiri' xya' chwa ri cruz. Quil Juan 3:14-15; 8:28. Tec'uchiri', xc'astaj lo chiquixo'l ri ecaminak y lic xyac uk'ij echiri' xe'ec chila' chicaj.

quic'u'x che quepe wuc' —xcha'.
³³ Ruc' wa' e xuk'alajisaj sa' rucamic.

³⁴ Ri winak xquic'ul uwach:

—Ruma Rutzij Upixab ri Dios ri'oj keta'am: Rucha'o'n lo ri Dios na jinta utakexic ruc'aslemal. ¿Cha'ta c'u ri cabi'ij la Ralaxel Chiquixo'l Ticawex cayaqui' che ruwachulew? ¿China c'u ri' "Ralaxel Chiquixo'l Ticawex" cabi'ij la? —xecha'.

³⁵ Xubi'ij c'u ri Jesús chique:

—Na naj ta chi c'o ri K'ijsak chixo'l alak. Bina c'u alak pa ri K'ijsak xalok' c'a c'o uc' alak, cha' ri k'eku'm na cumaj ta alak xakic'ate't. Ma china ri cabin pa k'eku'm, na reta'am taj pa que'ec wi. ³⁶ Cojo alak ri K'ijsak xalok' c'a c'o uc' alak, cha' jela' cu'an alak re ri K'ijsak —xcha'.

Echiri' xuq'uis ubi'xic wa' ri Jesús, xel bi chiquixo'l y xe'ec pa jun luwar pa na carikitaj ta wi cuma rique.

Na conoje ta ri ticawex cacubi' quic'u'x ruc' ri Jesús

³⁷ E c'o ri na xcubi' ta quic'u'x ruc' ri Jesús, tob Rire xu'an uq'uiyal c'utubal re ruchuk'ab ri Dios chiquiwach. ³⁸ Jec'ula' e xu'ana pacha' rutz'ibam can ri k'alajisanel Isaías echiri' xubi'ij:

Kajawal, ¿china ecojoyom re ri katzi-jom chic? yey

¿China tak chiquiwach c'utum wi ri chuk'ab la, Lal Dios Kajawxel?***

Is. 53:1

xcha'. ³⁹ E uwari'che na xcubi' ta quic'u'x ruc' ri Jesús ma e xu'ana pacha' rutz'ibam can ri Isaías puwi ri xuk'alajisaj ri Dios che, echiri' xubi'ij:

⁴⁰ Wa tinamit u'anom pacha' potz' ri quiwach

y u'anom co ri canima';

jec'ula' na jinta c'o caquilo,

na jinta c'o caquimaj usuc'

y na caquitzelej tane quitzij chinuwach

cha' jela' quebenucunaj *Is. 6:10*

⁴¹ Ri k'alajisanel Isaías xutz'ibaj wa' ma xril pan runimal uchomal ri Jesús y lic c'o xuk'alajisaj chwi Rire.

⁴² Na ruc' ta c'u ri', e q'ui xecojow re ri Jesús, jujun ne chique e aj wach re ri tinamit. Pero na xquik'alajisaj ta wa' chiquiwach ri cachbi'il ruma caquixi'ij quib chiquiwach ri fariseos. Ma we xeta'maxic, na quec'ul ta chi pa ri sinagoga. ⁴³ E xqui'an wa' ma e más cuc'ul quic'u'x ri yacbal quik'ij caqui'an ri winak, chwa ri yacbal quik'ij cu'an ri Dios.

Ri caquicoj rubi' ri Jesús quebecolobetajic

⁴⁴ Ri Jesús co xsiq'uin che ubi'xiq'uil:

«China ri cacubi' uc'u'x wuc', na xew ta cacubi' uc'u'x wuc' ri'in, ma e cacubi' uc'u'x ruc' ri Jun takayom lo we. ⁴⁵ China ri quillow we ri'in, e junam ruc' caril ri Jun takayom lo we.

⁴⁶ »In ri in K'ijsak in c'uninak che ruwachulew cha' china ri cacubi' uc'u'x wuc' ri'in, na cac'oji' ta pa k'eku'm. ⁴⁷ No'j we c'o junok xuta ri nuch'a'tem yey na cu'an ta ri cambi'ij, na in ta ri quink'ataw tzij puwi'. Ma in c'uninak che ruwachulew na re ta cank'at tzij paquiwi ri ticawex; e in c'uninak re quebenucolobej conoje ri ticawex.

⁴⁸ »Yey china ri cuc'ak bi nuk'ij y na cucoj ta ri nuch'a'tem, c'o ri cak'ataw tzij puwi'. Wa' e ri ch'a'tem nub'im, ri cak'ataw tzij puwi' che ruq'uisbal k'ij. ⁴⁹ Ma na xa ta pa we ri'in quinch'a'tic; ri Nukaw ri takayom lo we, e intakayom lo che ronoje sa' ri cambi'ij y ri canc'utu. ⁵⁰ Ri'in weta'am e rutakanic ri Nukaw cuc'am lo c'aslemal na jinta utakexic. Jec'ula', ronoje ri cambi'ij ri'in, e inutakom lo ri' ri Nukaw che ubi'xiq'uil» xcha'.

13

Ri Jesús cuch'aj ri cakan rutijo'n

¹ Xa nakaj chi c'o wi lo ruk'ijol ri nimak'ij Pascua yey ri Jesús reta'am

*** **12:38** Ri Dios lic uc'utum ruchuk'ab chiquiwach uq'uiyal ticawex; na ruc' ta c'u ri', na e ta q'ui ri e ecojoyom re rutzij

ya copon ruk'ijol echiri' cuya can ruwachulew y que'ec ruc' Rukaw chila' chicaj. Ec'u Rire lic c'ax ebuna'om rutijo'n e c'o ruc' wara che ruwachulew; yey janipa k'ij xc'oji' cuc', e la' lic c'ax xebuna'o.

² Xopon c'u rubenebal k'ij echiri' ri Jesús cuc' rutijo'n e ri' quewa'ic. Jun c'u chique e ri Judas aj Iscariot ruc'ajol ri Simón. Yey cojom chi pa ranima' ruma ritzel winak cuc'ayij ri Jesús.

³ Ec'u ri Jesús reta'am ya'tal ronoje puk'ab ruma Rukaw, yey Rire petinak ruc' ri Dios y ruc' ri Dios catzelej wi. ⁴ Na ruc' ta c'u ri', ri Jesús xy-actajic, xresaj ruk'u' uripom chirij, xuc'am jun twayo puk'ab y xuxim chupa. ⁵ Tec'uchiri' xuk'ej ya' pa jun c'olibal, xujek uch'ajic ri cakan rutijo'n y cuchakisaj ruc' ri twayo uximom chupa.

⁶ Echiri' cujek uch'ajic ri rakan ri Pedro, rire jewa' xubi'ij che ri Jesús:

—Wajawal, ¿cach'aj camí la ri' ri wakan? —xcha'.

⁷ Ri Jesús xuc'ul uwach:

—Wo'ora na camaj ta usuc' sa' wa quintajin che u'anic; c'ate na c'u ri camaj usuc' —xcha'.

⁸ Ec'u ri Pedro xubi'ij che:

—Ri'in na canya ta c'ana luwar che'la cach'aj la ri wakan —xcha'.

Ri Jesús xubi'ij che:

—We na canch'aj ta la' wakan, ri' na jinta chi awe wuc' ri'in —xcha'.

⁹ Xubi'ij c'u ri Pedro che:

—We e ri', Wajawal, na xew tane ri wakan cach'aj la; ch'aja ne la ri' ri nuk'ab y ri nujolom —xcha'.

¹⁰ Ri Jesús jewa' xubi'ij che:

—E junok c'ac' atininal, xew cajawaxic cach'aji' ri rakan, ma ronoje rucuerpo ch'ajtal chic. Jec'ula' ri'ix chwach ri Dios ix chi ch'ajtallic, tob na iwonoje taj —xcha'.

¹¹ Ri Jesús reta'am chic china ri cac'ayin re; e uwari'che xubi'ij: “Na iwonoje taj ix ch'ajtallic.”

¹² Echiri' xuq'uis uch'ajic ri cakan rutijo'n, xurip tanchi ruk'u' chirij,

xtz'uyi' tanchi chwa ri mexa y xutz'onoj chique:

—¿Quimaj usuc' sa' que'elawi wa xin'an chiwe? ¹³ Ri'ix quibi'ij chwe: “Tijonel” y “Kajawal” y katzij ri quibi'ij, ma lic e u'anom ri'. ¹⁴ We in c'u Itijonel ri' yey in Iwajawal y xinch'aj c'u li'wakan, jec'ula' ri' chi'ana ri'ix; chich'aja c'u li'wakan chiwach ri'ix chiwibil iwib. ¹⁵ Ri'in xin'an wa' re c'utubal chiwach, cha' ri'ix jela' qui'ano pacha' ri xin'an ri'in. ¹⁶ Pakatzij wi cambi'ij chiwe: Na jinta juna aj chac más c'o uwach chwa ri rajaw, yey na jinta ne juna tako'n más c'o uwach chwa ri takayom lo re. ¹⁷ We quimaj usuc' tak wa' y quitijoj iwib che u'anic, nim ik'ij iwalaxic ri'.

¹⁸ »Pero na quinch'a't ta piwi' iwonoje, ma ri'in weta'am china ri ebenucha'om. Yey e cu'ana na ri tz'ibital can pa Ruch'a'tem ri Dios, pa cubi'ij wi:

E ri jun cawa' junam wuc',

e ri' ri yactajinak chwij. *Sal. 41:9*

¹⁹ Quintajin c'u pan che ubi'xiquil chiwe wo'ora cha' echiri' cu'ana wa', ri'ix quicojo: “In Ri'in.” ²⁰ Pakatzij wi cambi'ij chiwe: China ri cac'uluw re ri cantak bi ri'in, e junam ruc' in ri quinuc'ulu; yey china c'u ri cac'uluw we ri'in, e cuc'ul ri Jun takayom lo we —xcha'.

Ri Jesús cuk'alajisaj china ri cac'ayin re

(Mt. 26:20-25; Mr. 14:17-21; Lc. 22:21-23)

²¹ Echiri' xuq'uis ubi'xiquil wa', ri Jesús xoc bis chuc'u'x y jewa' xubi'ij:

—Pakatzij wi cambi'ij chiwe: Jun chiwe ri'ix quinuc'ayij —xcha'.

²² Ec'uchiri', rutijo'n xquijek caquitzula' quiwach chiquibil quib ma na queta'am taj china ri xubi'ij.

²³ C'o c'u jun chique rutijo'n, wa' e ri lic c'ax cana' ruma ri Jesús, cawa'ic ja'l putzal Rire chwa ri mexa. ²⁴ Ec'u ri Simón Pedro xu'an pan uk'ab che cha' cutz'onoj che ri Jesús china ri cubi'ij. ²⁵ Y ri jun tijo'n ja'l putzal ri Jesús xutz'onoj c'u che:

—Wajawal, ¿china la' la cabi'ij la? —xcha'.

²⁶ Ri Jesús xuc'ul uwach:

—Canmu' juch'akap pam y china c'u che canya wi, e rire —xcha'.

Xumu' c'u juch'akap pam y xuya che ri Judas aj Iscariot, ruc'ajol ri Simón. ²⁷ Echiri' ri Judas xuc'am ri pam, xoc ri Satanás pa ranima'. Ec'u ri Jesús xubi'ij che:

—Ri cawaj ca'ano, cha'ana la' ri' —xcha'.

²⁸ Yey na jinta junok chique ri quewa' chwa ri mexa xumaj usuc' su'be xubi'ij la' che. ²⁹ Ruma c'u puk'ab ri Judas c'o wi ri bolxa pa c'olotal wi ri quipuak, jujun chique xquich'obo laj ri Jesús xubi'ij che cu'lok'o tan ri cajawax chique re ri nimak'ij, o laj c'o cujach chique ri niba'ib. ³⁰ Ec'uchiri' ri Judas uc'amom chi ri pam, na jampatana xel bi yey lic chak'ab chic.

Ri takanic puwi ri rutzil c'u'xaj

³¹ Echiri' elinak chubi ri Judas, ri Jesús xubi'ij:

—Ec'u wo'ora cak'alajin runimal uchomalil Ralaxel Chiquixo'l Ticawex y ruc' Rire cak'alajin wi runimal uchomalil ri Dios. ³² Yey we Ralaxel Chiquixo'l Ticawex cuk'alajisaj runimal uchomalil ri Dios, jec'uri'la' e ri Dios ri cak'alajisan runimal uchomalil Ralaxel Chiquixo'l Ticawex, yey wa' na camayin ta che u'anic.

³³ »Ix walc'o'al, xa jok'otaj chi in c'o iwuc'. Ri'ix quinzucuj na c'u ri'; pero e pacha' ri ximbi'ij chique raj judi'ab, na jinta pik'ab quix'ec chila' pa quin'ec wi ri'in.

³⁴ »Canya wa jun c'ac' takanic chiwe: E lic c'ax china'a iwib chiwach. Jela' pacha' ri'in lic c'ax quixinna'o, jec'ula' lic c'ax china'a iwib ri'ix chiwach. ³⁵ We lic c'u c'ax quina' iwib chiwach, ruma wa' conoje ri winak caqueta'maj ix nutijo'n —xcha'.

Ri Jesús cuk'alajisaj ri cu'an ri Pedro echiri' carewaj we reta'am uwach (Mt. 26:31-35; Mr. 14:27-31; Lc. 22:31-34)

³⁶ Ri Simón Pedro xutz'onoj che ri Jesús:

—Wajawal, ¿pa c'u que'ec wi la? —xcha'.

Ri Jesús xuc'ul uwach:

—E pa wa quin'ec wi ri'in, na ya'tal ta chawe cat-terej bi chwij wo'ora; no'j copon na c'u ruk'ijol echiri' cato-pon chila' pa quin'ec wi ri'in —xcha'.

³⁷ Ec'u ri Pedro xubi'ij che:

—Wajawal, ¿su'chac na ya'tal ta chwe quinterej bi chi'ij la wo'ora? Ma ri'in xa jumul canya ne ri nuc'aslem pa camic uma rilal —xcha'.

³⁸ Y ri Jesús xuc'ul uwach:

—¿Lic katzij cawaj caya awib pa camic wuma ri'in? Pakatzij wi cambi'ij chawe: Echiri' c'amaja' ne cabixon ri teren, ri'at oxlaj chic abi'im na aweta'am ta nuwach.

14

Ruma ri Jesús cojopon ruc' ri Dios

¹ »Lic mapax ic'u'x. E chicuba' ic'u'x ruc' ri Dios y chicuba' ic'u'x wuc' ri'in. ² Chila' pa c'o wi ri Nukaw lic uq'uiyal jeklebal c'olic. We ta na e ta u'anom, ri'in nubi'im chi ri' chiwe. Ec'u wa' quin'ec cha' qui'nyijba' jun luwar iwe ri'ix. ³ Yey we xin'ec c'ut y xyijbitaj ri luwar iwe'ix, quinc'un tanchic y quixo'lnuc'ama' cha' jela' pa quine'c'ola wi ri'in, ri'ix quixe'c'ola chila' wuc'. ⁴ Ri'ix iweta'am pa quin'ec wi yey iweta'am ri be —xcha'.

⁵ Xubi'ij c'u ri Tomás che:

—Kajawal, ri'oj na keta'am taj pa que'ec wi la. ¿Sa' c'u u'anic ri caketa'maj ri be? —xcha'.

⁶ Ri Jesús xuc'ul uwach:

—In ri in Be, in ri in K'ijsak yey in ri in C'aslemal. Na jinta junok copon ruc' ri Nukaw we na wuma ta ri'in. ⁷ We iweta'am nuwach ri'in, iweta'am uwach ri' ri Nukaw. Chwi c'u ri' wo'ora quiweta'maj uwach, ma iwilom chi uwach —xcha'.

⁸ Ec'u ri Felipe xubi'ij che:

—Kajawal, c'utu la chikawach ri Kaw la y cojcubi' c'u ri' che —xcha'.

⁹ Ri Jesús xuc'ul uwach:

—Felipe, uq'uiyal k'ij chi wa' c'ut e la' in c'o iwuc', ¿yey c'amaja' caweta'maj nuwach? Ma china ri eta'mayom nuwach ri'in, ri' e rilom uwach ri Nukaw. ¿Su'chac c'u ri' catz'onoj chwe canc'ut ri Nukaw chiwach? ¹⁰ Ri'in ruc' ri Nukaw y Rire wuc' ri'in, xa oj jun. ¿Na cacoj ta cami ri' wa'? E janipa wa cambi'ij chiwe, na xa ta pa we ri'in cambi'ij ma ri nuch'a'tem e re ri Nukaw ri jekel wuc', yey Rire cu'an ruchac wuma ri'in. ¹¹ Chicojo c'u wa cambi'ij chiwe: Ri'in ruc' ri Nukaw y Rire wuc' ri'in, xa oj jun. We na quicoj ta c'u wa' ruma ri nuch'a'tem, e chicojo ruma ri chac nu'anom.

¹² »Pakatzij wi cambi'ij chiwe: China ri cacubi' uc'u'x wuc' ri'in, ri' cu'an ne ri chac jela' pacha' ri can'an ri'in; y más ne nimak tak chac ri cu'ano, ma e ri'in quin'ec pa c'o wi ri Nukaw. ¹³ Ronoje c'u ri quitz'onoj ri'ix che ri Nukaw pa ri nubi', ri'in can'ano cha' jela' runimal uchomalil ri Dios cak'alajin ruma Ruc'ajol. ¹⁴ Ronoje c'u ri' ri quitz'onoj ri'ix pa ri nubi', ri'in can'ano.

Ri Jesús cach'a't chwi ruc'unibal ri Ruxlabixel ri Dios

¹⁵ »We ri'ix c'ax quinina'o, e lic chi'ana janipa ri quixintak che u'anic. ¹⁶ Yey ri'in e cantz'onoj che ri Nukaw cha' cutak chi lo jun chic To'bel iwe re cunimarisaj ic'u'x; y asu cac'oji' iwuc' na jinta utakexic. ¹⁷ Wa' e ri Uxlabixel re ri K'ijsak. Tak ri winak na utz taj caquic'ulu, ma na caquil ta uwach y na queta'am tane uwach. No'j ri'ix iweta'am uwach, ma Rire c'o chixo'libal y co'lc'ola piwanima'.

¹⁸ »Ri'in na quixinwok'otaj ta canok, ma quintzelej lo iwuc'. ¹⁹ Na naj ta chi c'u ri', ri winak na caquil ta chi nuwach; no'j ri'ix quiwil tanchi nuwach. Ruma c'u ri'in quinc'astaj lo chiquixo'l ri ecaminak, jenela' ri'ix quixc'astajic. ²⁰ Chupa c'u ri' la' la k'ij

ri'ix quiweta'maj: Ri'in ruc' ri Nukaw xa oj jun, yey ri'ix xa jun i'anom wuc' ri'in y ri'in xa jun nu'anom iwuc' ri'ix.

²¹ China c'u ri uc'ulum ri nutakanic y cu'an c'u janipa ri cambi'ij che, ri' lic c'ax quinuna'o. Y china ri c'ax cana'w we ri'in, c'ax cana' ruma ri Nukaw. Yey ri'in lic c'ax canna'o y cank'alajisaj che, in china ri'in —xcha'.

²² Ri Judas (na e ta ri aj Iscariot) xubi'ij:

—Kajawal, ¿su'be cak'alajisaj la chikawach ri'oj china rilal yey chiquiwach ri winak na ca'an ta la wa'? —xcha'.

²³ Ri Jesús xuc'ul uwach:

—China ri c'ax quinuna' ri'in, e cu'an janipa ri cambi'ij che. Ec'u ri Nukaw c'ax cuna' rire, yey ri Nukaw y ri'in cojo'ljekela ruc'. ²⁴ China c'u ri na c'ax ta quinuna'o, ri' na cutakej ta janipa ri cambi'ij che. Wa tzij quixtajin che utayic, na xa ta we'in, e re ri Nukaw, ri xtakaw lo we'in.

²⁵ »Ronoje wa' quintajin che ubi'xic chiwe xalok' c'a in c'o iwuc'. ²⁶ Yey echiri' quin'ec, ri Nukaw cutak lo ri jun To'bel pa ri nubi' re cubochi'ij ic'u'x, wa' e ri Santowilaj Ruxlabixel ri Dios. Echiri' cac'un Rire, cuc'ut ronoje chiwach y cucuxtaj c'u chiwe janipa ri nubi'im ri'in chiwe.

²⁷ »Ri utzil chomal c'o wuc' ri'in, canya can chiwe. Yey wa' wa utzil chomal canya ri'in chiwe na xa ta jela' pacha' ri caquiya tak ri winak. Mapax c'u ic'u'x y mixi'ij iwib.

²⁸ »Itom chi c'u ri nubi'im chiwe: “Quin'ec yey quintzelej tanchi lo iwuc'.” We e la' katzij lic c'ax quinina'o, xixqui'cot tane c'u ri' che echiri' xito quin'ec ruc' ri Nukaw, ma Rire más c'o uwach chinuwa ri'in.

²⁹ »Cannabesaj pan ubi'xic wa' chiwe cha' echiri' cu'ana', quicoj c'u ri'. ³⁰ Na naj ta chi c'ut quinch'a't iwuc'; ma ya cac'un lo ritzel winak, ri jun catakan che ruwachulew, tob na jinta ne puk'ab rire catakan panuwi ri'in. ³¹ Na ruc' ta c'u ri', can'ano janipa ri quinutak ri Nukaw che u'anic, cha' jela' ri winak che ruwachulew

caqueta'maj ri'in lic c'ax canna' ri Nukaw.

»Chixyactajok; jo!, chojel bi wara.

15

Ri Jesús e ri sakil rakan uva yey ri'oj oj ruk'ab

¹ »In ri in sakil rakan uva y ri Nukaw e ri aj chacunel chupa tak ri uva. ² We c'lo c'u juna uk'ab ri uva na cuya ta uwach, Rire cuk'at bi. No'j c'u ri cuya uwach, xa e cujal uwi' re cu'an chom che cha' jela' cuya más uwach. ³ Jec'ula' ri'ix 'anom chi chom chiwe ruma ri c'utunic nu'anom chiwach.

⁴ »Miwesaj iwib chwij, jec'ula' xa jun ka'anom, ri'ix wuc' ri'in y ri'in iwuc' ri'ix. Ma e pacha' juna uk'ab che' na cawachin ta xa utuquel we quesax che ri rakan; jec'ula' ri' ri'ix, na utz taj quixwachinic we quiwesaj iwib chwij.

⁵ »In ri in rakan ri tico'n yey ri'ix ix ruk'ab. China c'u ri u'anom xa jun wuc' ri'in yey ri'in in xa jun ruc' rire, ri' lic cawachinic. Ma we iwesam iwib chwij, na jinta quich'ij u'anic. ⁶ China c'u ri caresaj rib chwij, jela' ca'an che pacha' ruk'ab che' na jinta uchac, cachetic y cac'ak bi. Cachakij c'ut, tec'uchiri' camolic y caporox pa ak'.

⁷ »Yey we e la' xa jun i'anom ri'ix wuc' y na quic'ow ta chic'u'x tak ri nuc'utum chiwach, chitz'onoj c'u ri' sa' tak ri quiwaj y caya'taj na chiwe. ⁸ Ri Nukaw lic cayaqui' uk'ij echiri' ri'ix quiya uq'uiyal ijik'obalil y ruc' wa' cak'alajinic pa sakil wi ix nu-tijo'n.

⁹ »Jec'ula' pacha' ri Nukaw lic c'ax quinuna' ri'in, jec'uri'la' ri'in c'ax quixinna' ri'ix. Lic c'ut miwesaj iwib chupa ri rutzil nuc'u'x chiwe. ¹⁰ We e qui'an janipa ri quixintak che, quixc'oji' c'u ri' chupa wa rutzil nuc'u'x, jela' pacha' ri'in nu'anom janipa ri inutakom ri Nukaw che u'anic yey in c'lo chupa ri rutzil uc'u'x Rire.

¹¹ »Ximbi'ij wa' chiwe cha' ri nuqui'cotemal cac'oji' iwuc' y canoj c'u ri' ri iwanima' che qui'cotemal.

¹² »Ec'u nutakanic wa' canya chiwe: Lic c'ax china'a iwib chiwach jela' pacha' ri'in lic c'ax quixinna'o. ¹³ Na jinta juna c'utubal re ri rutzil c'u'xaj más nim chwa wa': E junok cuya ruc'aslem che uto'ic jun chic tob ne cacam ruma.

¹⁴ »Ri'ix ix wamigos we e la' e qui'an janipa ri quixintak che u'anic. ¹⁵ Na cambi'ij ta chi ne “waj chac” chiwe, ma e juna aj chac na reta'am taj sa' ri cu'an ri rajaw. Cambi'ij c'u chiwe “ix wamigos”, ma nuya'om chi reta'maxic chiwe ronoje ri ubi'im lo ri Nukaw chwe. ¹⁶ Na ix ta xixcha'w we ri'in, in ri xinch'a'w iwe. Yey nuya'om pik'ab qui'ana ri nuchac y jela' quiya uq'uiyal ijik'obalil y wa' na jinta uq'uisic. Yey janipa c'u ri quitz'onoj che ri Nukaw pa ri nubi', Rire cuya na chiwe. ¹⁷ Ec'u quixintak che u'anic wa': C'ax china'a iwib chiwach.

Ri tzel quebilow re ri Jesús

¹⁸ »We tzel quixquil ri winak che ruwachulew, chiweta'maj e ri'in ri nabe tzel quinquilo. ¹⁹ We ta e la' junam ribinic ri'ix cuc' ri ticawex re ruwachulew, ri' lic c'ax quixna'ic. No'j in xinch'a'w iwe ri'ix chiquixo'l ri winak; e uwari'che tzel quixilic. ²⁰ C'una chic'u'x ri nubi'im chiwe: Na jinta juna aj chac más c'lo uwach chwa ri rajaw. We ri'in internabem ruc' c'axc'obic, jela' ri' ca'an chiwe ri'ix, quixternabex ruc' c'axc'obic. Yey we e c'lo ri quitakem ri nutzij ri'in, jec'ula' ri', e c'lo ri caquitakej ri quic'ut ri'ix. ²¹ Pero ri quixquinternabej ruc' c'ax ruma icojom ri nubi', e caqui'an wa' ruma na queta'am ta uwach ri xintakaw lok.

²² »We tamaji xinc'un ri'in y tamaji xinc'ut rutzij ri Nukaw chiquiwach, na jinta c'u quimac ri' ruma na xquic'ul ta wa tzij. No'j ri'in xinc'unic y xinc'ut rutzij ri Nukaw chiquiwach; ruma c'u wa', na jinta junok chique utz cubi'ij na jinta umac. ²³ Ma e ri tzel quebilow we ri'in, ri' e tzel caquil ri Nukaw. ²⁴ Na jinta c'u quimac we tamaji nu'anom uq'uiyal

milagros chiquiwach yey wa' na jinta chi ne junok 'anayom re. No'j rique quilom ronoje tak wa'; y na ruc' ta c'u ri', tzel quinquil ri'in y tzel caquil ri Nukaw.

²⁵ »Ec'u xu'an tak wa' cha' lic e cu'ana janipa ri tz'ibital can pa ri Tzij Pixab c'o paquik'ab rique:

Tzel xinguilo tob na jinta numac *Sal.*

35:19

cache'.

²⁶ »Yey echiri' quinopon ruc' ri Nukaw, cantak lo Jun To'bel iwe re cunimarisaj ic'u'x. Rire cape ruc' ri Nukaw y e K'alajisanel re ri K'ijsak. Ec'uchiri' cac'unic, cak'alajisan chiwach ri'ix panuwi ri'in. ²⁷ Yey ri'ix quixk'alajisan na panuwi ri'in, ma ix c'o'ji'nak wuc' chwi ri jekebal lo ri nuchac.

16

¹ »Ximbi'ij c'u ronoje wa' chiwe cha' na casach ta ri cubulibal ic'u'x wuc'. ² Ma copon ruk'ijol echiri' quixesax ne bi ri'ix chupa tak ri sinagogas. Y china ri cacamisan iwe'ix, e chwa rire uchac ri Dios ri cu'ano. ³ E caqui'an wa' ma na queta'am ta c'ana uwach ri Nukaw y na queta'am tane nuwach ri'in. ⁴ Cambi'ij wa' chiwe, ma we xopon ruk'ijol wa', c'una chic'u'x nubi'im chi lo wa' chiwe.

Ri chac cu'an ri Ruxlabixel ri Dios

»Na ximbi'ij ta lo wa' chiwe chwi ri jekebal lok, ma c'a in c'o iwuc'. ⁵ No'j wo'ora quin'ec cha' quine'c'ola ruc' ri takayom lo we ri'in, yey na jinta chi ne junok chiwe cutz'onoj chwe pa quin'ec wi. ⁶ Yey ruma ne nubi'im wa' chiwe, lic xoc bis chic'u'x. ⁷ Pero katzij wa cambi'ij chiwe: Lic utz chiwe ri'ix we quin'ec. Ma we na quin'ec taj, na cac'un ta iwuc' ri To'bel re cubochi'ij ic'u'x.* No'j we xin'ec, cantak lo chiwe.

⁸ »Echiri' cac'un ri Ruxlabixel ri Dios, cuya na chi reta'maxic chique ri winak re ruwachulew china ri c'o umac, china ri lic jusuc' chwach ri

Dios y china puwi' c'o wi ri k'atbal tzij re ri Dios. ⁹ Cuk'alajisaj c'ut china ri c'o umac: Wa' e ri na cacubi' ta uc'u'x wuc' ri'in. ¹⁰ Cuk'alajisaj china ri lic jusuc', ma ri'in quin'ec ruc' ri Nukaw yey ri'ix na quiwil ta chi nuwach.† ¹¹ Yey cuk'alajisaj, ri Dios uk'atom chi tzij puwi ritzel winak catakan che ruwachulew.

¹² »Lic c'o cuaj cambi'ij chiwe, pero na cambi'ij tana, ma wo'ora na quimaj ta usuc'. ¹³ No'j echiri' cac'un ri Uxlabixel re ri K'ijsak, ri' cuc'ut chiwach ri'ix ronoje ri lic katzij. Rire na xa ta pa re cach'a'tic, ma janipa ri cubi'ij e ubi'im ri Dios che y jela' cuya chi reta'maxic chiwe tak ri catajin lok. ¹⁴ Ma e cuk'alajisaj janipa ri cuaj cambi'ij ri'in chiwe, y jela' cunimarisaj nuk'ij. ¹⁵ Ronoje ri c'o ruc' ri Nukaw, c'o wuc' ri'in; e uwari'che ximbi'ij ri Ruxlabixel e cuk'alajisaj janipa ri cuaj cambi'ij ri'in chiwe.

Copon ri k'ij echiri' ri bis cu'ana qui'cotemal

¹⁶ »Na naj ta chi c'u ri' quiwil nuwach, ma ri'in quin'ec chila' pa c'o wi ri Nukaw; pero chikawach apanok qui'wila tanchi nuwach —xcha'.

¹⁷ Ec'uchiri', jujun chique rutijo'n jewa' xquitz'onoj chiquiwach: «¿Sa' que'elawi wa'? Ma cubi'ij: “Na naj ta chi c'u ri' quiwil nuwach, ma ri'in quin'ec chila' pa c'o wi ri Nukaw; pero chikawach apanok qui'wila tanchi nuwach.” ¹⁸ ¿Sa' que'elawi: “Na naj ta chi c'u ri'”? Na cakamaj ta usuc' sa' puwi cach'a't wi» xecha'.

¹⁹ Ri Jesús xuna'bej cacaj caqui'an tz'onobal che. Ruma c'u ri' xubi'ij chique:

—Ri'in ximbi'ij chiwe: “Na naj ta chi c'u ri' quiwil nuwach, pero chikawach apanok qui'wila tanchi nuwach.” ¿E quitz'onoj sa' que'elawi wa'? ²⁰ Pakatzij wi cambi'ij chiwe: Ri'ix quixok' na y quixbison na, tob ri

* **16:7** Wa To'bel e ri Ruxlabixel ri Dios. Jn. 14:1; 20:22; Hch. 1:8 † **16:10** Xew ri Kanimajawal Jesucristo lic jusuc', yey echiri' xe'ec chila' chicaj, e xutak lo ri Santowilaj Ruxlabixel re cojuto'o cha' cojbin jusuc' chwach ri Dios. ☆ **16:17** Jn. 16:10

winak re ruwachulew quequi'cotic. Tob ri'ix quixbison wo'ora, wa bis cu'ana qui'cotemal.

²¹ »Echiri' cutzir uwach juna ixok, lic cac'o'ji' pa c'axc'olil ma xopon ruk'ij. No'j echiri' alaxinak chi rac'a, na cac'un ta chi ne chuc'u'x ri c'axc'olil ruma ruqui'cotemal, ma xalax jun ac'a che ruwachulew. ²² Jec'uri'la' ri'ix capax ic'u'x wo'ora; no'j echiri' quiwil tanchi nuwach, canoj c'u ri iwanima' che qui'cotemal yey wa' wa qui'cotemal na junta junok qesan re chiwe. ²³ Chupa c'u ri' la' la k'ij na cajawax ta chic qui'an tz'onobal chwi ri nubi'im.

»Pakatzij wi cambi'ij chiwe: Ronoje ri quitz'onoj che ri Nukaw pa ri nubi', Rire cuya chiwe. ²⁴ C'a chwi wo'ora ri'ix na junta c'o itz'onom pa ri nubi' ri'in. Chitz'onoj y quic'ulu, cha' jela' canoj ri iwanima' che qui'cotemal.

Ri Jesús uch'ijom uchuk'ab tak ri na utz taj re ruwachulew

²⁵ »Nubi'im wa' chiwe ruc' c'ambal na'oj; no'j copon c'u ri k'ij echiri' na cajawax ta chic quinch'a't iwuc' ruc' c'ambal na'oj, ma ri' lic k'alaj chiwach ri'ix janipa ri cambi'ij chiwe chwi ri Nukaw. ²⁶ Chupa c'u la' la k'ij, utz quitz'onoj che ri Nukaw chupa ri nubi' janipa ri cajawax chiwe. Yey na cajawax ta c'u ri' quinelaj chwach ri Nukaw piwi', ²⁷ ma ri Nukaw lic c'ax quixuna'o ruma c'ax inina'om ri'in yey lic icojom, ri'in ruc' ri Dios in petinak wi. ²⁸ Ri'in in petinak ruc' ri Nukaw y xinc'un che ruwachulew; yey wo'ora e wa' canya can ruwachulew y quintzelej ruc' ri Nukaw —xcha'.

²⁹ Ec'u rutijo'n xquibi'ij che:

—Wo'ora lic k'alaj ri cabi'ij la chike, ma na cach'a't ta chi la ruc' c'ambal na'oj. ³⁰ Yey wo'ora cakamaj usuc' rilal lic eta'am la ronoje. Uwari'che na cajawax taj c'o junok cu'an tz'onobal che'la, ma eta'am chi la sa' ri cakaj cakat'z'onoj echiri' c'amaja' ne caka'an ri tz'onobal. Ruma c'u la',

kacojom rilal ruc' ri Dios petinak wi la —xecha'.

³¹ Ri Jesús xuc'ul uwach:

—¿C'a e wo'ora quicoj wa'?

³² Cac'un c'u ruk'ijol y wa' ya xujeko echiri' ri'ix quixquicher bi. Chijujunal c'ut quimaj bi ibe y quiniya can nutuquel. Pero ri'in na quincanaj ta can nutuquel, ma ri Nukaw c'o wuc'.

³³ »Ximbi'ij ronoje wa' chiwe cha' wuma ri'in quirik utzil chomal. Che ruwachulew ri'ix lic quitij c'ax. Pero chinimarisaj c'u ic'u'x, ma ri'in nuch'ijom uchuk'ab tak ri na utz taj re ruwachulew † —xcha'.

17

Ri Jesús cu'an orar paquiwi rutijo'n

¹ Echiri' ubi'im chi wa', ri Jesús tz'u'n chicaj y xubi'ij:

«Nukaw, xopon ru orayil; yaca c'u la uk'ij ri C'ajol la cha' jela' ri C'ajol la cuyac k'ij Rilal. ² Ma Rilal ya'om la che ri C'ajol la catakan paquiwi conoje ri ticawex, cha' puk'ab Rire c'o wi cuya c'aslemal na junta utakexic chique conoje ri eya'om la che. ³ Ec'u wa c'aslemal na junta utakexic e ruma ri queta'max wach la, xew Rilal Lal Dios y na junta jun chic, yey queta'max c'u uwach ri Jesucristo, ri xtak lo la.

⁴ »Ri'in nuyacom k'ij la wara che ruwachulew y xinq'uis u'anic ri xintak lo la che u'anic. ⁵ Ec'u wo'ora Nukaw, yaca la nuk'ij chila' uc' la, jela' pacha' ri 'anom la chwe echiri' c'amaja' ne cajeker ruwachulew.

⁶ »Chique tak ri ticawex xeya la chwe che ruwachulew, nuk'alajisam china Rilal. Rique e e la, y xeya la panuk'ab yey quitakem ri tzij la.

⁷ Y wo'ora queta'am wa': Ronoje ri ya'om la chwe, uc' la petinak wi. ⁸ Ma janipa ri xbi'ij la chwe, nutzijom chique ri xeya la chwe, y rique xquicojo. Yey xqueta'maj c'ut pakatzij wi ri'in uc' la in petinak wi y Lal takayom lo la we'in.

† 16:33 Ri Jesús xuch'ij uchuk'ab ri mac y ritzel winak.

⁹ »Ri'in quinelaj co chiwach la paquiwi rique; na e ta paquiwi conoje ri ticawex, xew paquiwi ri eya'om la panuk'ab, ma rique e e la. ¹⁰ Conoje ri e c'o panuk'ab, e e la. Jec'ula' ri', conoje ri e c'o pak'ab Rilal, e we'in. Y ri yacbal nuk'ij cak'alajin cuma rique.

¹¹ »Yey ri'in quintzelej uc' la, na quincanaj ta can che ruwachulew; no'j rique quecanajic. Lal Santowilaj Nukaw, chechajij co la chupa ri bi' la, ri eya'om la chwe, cha' chu'ana xa jun quic'u'x jela' pacha' nu'anom ri'in uc' la. ¹² Echiri' ri'in in c'o cuc' wara che wu'wachulew, xebenuchajij chupa ri bi' la ri eya'om la chwe. Na junta junok chique xsachic, xew c'u ri jun xex wi sachinak chic cha' e cu'ana janipa ri tz'ibital can chupa ri Ch'a'tem la.

¹³ »Ec'u wo'ora quintzelej tanchi uc' la. Pero xalok' c'a in c'o che ruwachulew, cambi'ij tak wa' chique cha' lic canoj ri canima' che qui'cotemal, jela' pacha' ri qui'cotemal c'o wuc' ri'in.

¹⁴ »Ri'in nuya'om ri Ch'a'tem la chique. Yey tak ri winak re ruwachulew tzel quequilo ma na junam ta quic'u'x cuc', jela' pacha' ri'in na junam ta nuc'u'x cuc' ri e re ruwachulew. ¹⁵ Na e ta c'u quinelaj chiwach la cha' quebesaj la che ruwachulew, xew lic chechajij la chwach ritzel winak. ¹⁶ Rique na junam ta quic'u'x cuc' ri e re ruwachulew, jela' pacha' ri'in na junam ta nuc'u'x cuc' ri e re ruwachulew.

¹⁷ »Ya'a c'u la chique quebin jusuc' chupa ri K'ijsak e la, wa' e ri Ch'a'tem la. ¹⁸ Jela' pacha' Rilal xintak lo la chiquixo'l ri ticawex che ruwachulew, jec'uri'la' ri'in quebenutak bi rique chiquixo'l ri ticawex che ruwachulew. ¹⁹ Y cuma c'u rique, lic nuya'om wib ri'in che u'anic ri rajawal c'u'x la, cha' jela' rique quebin jusuc' chupa ri K'ijsak.

²⁰ »Yey na xew tane quinelaj

chiwach la paquiwi rique, ma e cantz'onoj che'la paquiwi ri c'amaja' caquicoj ri nubi' ruma caquita ri tzijonic caqui'an rique.

²¹ Lal Nukaw, cantz'onoj co che'la chu'ana xa jun quic'u'x chiquiwach junam kuc' ri'oj, jela' pacha' ri'in uc' la y Rilal wuc' ri'in, cha' ri e c'o che ruwachulew caquicojo e rilal takayom lo la we ri'in.

²² »Ri yacbal nuk'ij ya'om la chwe ri'in, xinya chique rique cha' chu'ana xa jun quic'u'x jela' pacha' Rilal y ri'in xa jun kac'u'x.

²³ Ri'in in c'o cuc' rique y Rilal c'o la wuc' ri'in cha' rique cu'an xa jun quic'u'x pa sakil wi. Jec'ula' ri' conoje ri ticawex che ruwachulew caqueta'maj e Rilal takayom lo la we ri'in y lic c'ax quena' la ri nutijo'n, jela' pacha' lic c'ax quinna' la ri'in.

²⁴ »Lal Nukaw, e janipa ri eya'om la panuk'ab, e cuaj ri'in quebe'c'ola wuc' pa quine'c'ola wi, cha' caquil ri yacbal nuk'ij ya'om la. Ma xex wi c'ax inna'om lo la, chwi echiri' c'amaja' ne cajeker ruwachulew.

²⁵ Nukaw, Rilal lic Lal jusuc', yey ri ticawex che ruwachulew na queta'am ta wach la. No'j ri'in weta'am wach la yey ri nutijo'n queta'am e Rilal takayom lo la we ri'in. ²⁶ Lic c'ut nuk'alajisam chiquiwach china Rilal y c'a quintajin ne che uk'alajisaxic wa', cha' ri rutzil c'u'x la chwe ri'in, cac'o'ji' cuc' rique y jela' quinc'o'ji' ri'in pa canima'» xcha'.

18

Cachap bi ri Jesús

(Mt. 26:47-56; Mr. 14:43-50; Lc. 22:47-53)

¹ Echiri' ri Jesús xuq'uis ubi'xiquil tak wa', xel bi junam cuc' rutijo'n, xquik'axuj c'u ri rakana' Cedrón y xeboc chupa jun werta c'o chiri'. ² Ri Judas, ri cac'ayin re ri Jesús, reta'am chi ri luwar, ma uq'uiyal laj ri Jesús cuc' rutijo'n quimolom quib chiri'.

³ Ec'u ri Judas xoponic, ebuc'amom bi uq'uiyal soldados y tak ri chajinel re ri Rocho Dios. Rique cuc'a'am tak chapabal, yey e c'o ri cawolol ri qui ak' y e c'o ri xa quitzuq'uem qui ak'. Wa' etakom bi cuma ri nimak e aj chacunel pa Rocho Dios y ri fariseos.

⁴ Ec'u ri Jesús ruma reta'am chi ronoje ri catajin lo puwi', xebu'c'ulu apanok y xutz'onoj chique:

—¿China ri quitzucuj? —xcha'.

⁵ Rique xquic'ul uwach:

—E Jesús ri aj Nazaret —xecha'.

Ri Jesús xubi'ij c'u chique:

—In ri'in —xcha'.

Yey ri Judas, ri cac'ayin re, c'o chiquixo'l ri cacaj caquichap bi ri Jesús. ⁶ Echiri' xubi'ij ri Jesús chique: “In ri'in”, xetzelej chiquij y xetzak pulew.

⁷ Ec'u ri Jesús xutz'onoj tanchi chique:

—¿China ri quitzucuj? —xcha'.

Y rique xquibi'ij:

—E Jesús ri aj Nazaret —xecha'.

⁸ Xubi'ij c'u ri Jesús chique:

—Ri'in nubi'im chi che alak; “In ri'in.” We in c'u ri quintzucuj alak, ya'a bi alak luwar chique wa nutijo'n chebe'ojana —xcha' chique. ⁹ E xubi'ij wa' ri Jesús cha' e cu'ana ri ubi'im chic: «Na jinta junok xsach chique ri ebuya'om ri Nukaw chwe.»[☆]

¹⁰ Ec'u ri Simón Pedro ruc'a'am jun espada. Xresaj c'u ulok y xujochij bi ruxiquin uwi'quik'ab ri raj chac ri cajawal raj chacunel pa Rocho Dios. Wa aj chac Malco rubi'.

¹¹ Ri Jesús xubi'ij c'u che ri Pedro:

—Chac'olo ra espada chupa ruc'olibal. ¿Na quinic'ow ta cami ri' pa ri c'axc'obic we e ri Nukaw intakayom lo che? —xcha'.

¹² Ec'uchiri', ri soldados y ri takanel que, junam cuc' raj judi'ab e chajinel re ri Rocho Dios, xquichap ri Jesús y xquiyutu.

Ri Jesús c'o chiquiwach raj k'atal tzij

(Mt. 26:57-58; Mr. 14:53-54; Lc. 22:54)

¹³ Xquic'am c'u bi ri Jesús chwa ri Anás, rukaw-uji' ri Caifás ri cajawal raj chacunel pa Rocho Dios chupa la' la junab. ¹⁴ Yey e Caifás ri ubi'im chique raj judi'ab: «E más utz we ta e la' xa jun chi achi cacam cuma conoje ri tinamit.»[☆]

Ri Pedro cubi'ij na reta'am ta uwach ri Jesús

(Mt. 26:69-70; Mr. 14:66-68; Lc. 22:55-57)

¹⁵ Ri Simón Pedro y jun chic tijo'n eteran bi chirij ri Jesús. Wa' wa jun chic tijo'n eta'matal uwach ruma ri cajawal raj chacunel pa Rocho Dios; ec'u rire xoc bi ruc' ri Jesús che ruwa ja re ri rocho ri aj wach. ¹⁶ No'j ri Pedro xcanaj can chwa ri puerta pa be. Ruma c'u ri', xel lo ri jun tijo'n eta'matal uwach ruma ri cajawal raj chacunel pa Rocho Dios, xch'a't ruc' rali aj chajal re ri puerta cha' cuya luwar che ri Pedro coc bi.

¹⁷ Ec'uchiri' rali xutz'onoj che ri Pedro:

—¿Na lal ta nawi jun chique rutijo'n la' la jun achi? —xcha'.

Ri Pedro xuc'ul uwach:

—Na in taj —xcha'.

¹⁸ Ruma c'u lic c'ax tew, raj chaquib y ri e chajinel e tac'al chuchi' jun ak' quinuc'um re caquimik'isaj quib. Yey ri Pedro c'o cuc' chuchi' ri ak'.

Ri Anás cuta uchi' ri Jesús

(Mt. 26:59-66; Mr. 14:55-64; Lc. 22:66-71)

¹⁹ Ri cajawal raj chacunel pa Rocho Dios* xujek utz'onoxic che ri Jesús paquiwi tak rutijo'n y puwi ruc'utunic.

²⁰ Ri Jesús xubi'ij che:

—Ri'in in tzijoninak chiwachil chiquiwach conoje ri winak, xaki in c'utuninak pa tak sinagogas y pa ri Rocho Dios pa caquimol wi quib raj judi'ab. Na jinta c'o nubi'im xa

☆ 18:9 Jn. 17:2 ☆ 18:14 Jn. 11:49-50 * 18:19 Ri Anás ic'owinak cajawal raj chacunel pa Rocho Dios; e uwari'che c'a cabi'x wa' che, tob chupa wa' wa junab e Caifás ri xc'oji'ic.

xe'lak'ay. ²¹ ¿Su'chac c'u ri' catz'onoj alak chwe puwi ri nuc'utunic? E tz'onoj alak chique ri e tayom we ri'in, ma rique queta'am sa' ri nuc'utum chiquiwach —xcha'.

²² Echiri' xubi'ij wa' ri Jesús, jun chique ri e chajinel xupach' jun k'ab chupalaj ri Jesús y xubi'ij che:

—¿Utz neba jela' cac'ulubej uwach ri cajawal raj chacunel pa Rocho Dios? —xcha'.

²³ Ri Jesús xuc'ul uwach:

—We ximbi'ij juna ch'a'tem na utz taj, bi'ij la ri' sa' ri na utz taj ximbi'ij. No'j we utz ri ximbi'ij, ¿su'chac c'u ri xinch'ay la? —xcha'.

²⁴ Yutum chi ri Jesús, ri Anás xutak bi chwa ri Caifás, ri cajawal raj chacunel pa Rocho Dios.

Ri Pedro cubi'ij tanchic na reta'am ta uwach ri Jesús

(Mt. 26:71-75; Mr. 14:69-72; Lc. 22:58-62)

²⁵ Ec'u ri Pedro tac'al chuchi' ri ak', cumik'isaj rib. Yey e c'o jujun jewa' xquibi'ij che:

—¿Na lal ta nawi jun chique rutijo'n la' la jun achi? —xecha'.

Ri Pedro xrewaj, jewa' xubi'ij:

—¡Ja'! Na in taj —xcha'.

²⁶ Chiri' c'o jun raj chac ri cajawal raj chacunel pa Rocho Dios. Rire c'o chux che ri jun xjochix ruxiquin ruma ri Pedro. Xutz'onoj c'u che ri Pedro:

—¿Na xinwil ta neba wach la chila' pa ri werta ruc' ri Jesús? —xcha'.

²⁷ Yey ri Pedro xrewaj tanchic, y ec'uchiri' xbixon lo ri teren.

Ri Jesús caya'i' chwach ri takanel Pilato

(Mt. 27:1-2; Mr. 15:1; Lc. 23:1)

²⁸ E ri' catajin usakiric echiri' xesax bi ri Jesús chwa rocho ri Caifás y xc'am bi pa ri palacio re ri Pilato, ri takanel aj Roma. Ec'u ri aj judi'ab

na xeboc ta chupa ri palacio cha' na caquich'ulaj ta quib chwach ri Dios y jec'ula' utz caquitij ri cena re Pascua.†

²⁹ E uwari'che, ri takanel Pilato xel lok cha' cach'a't cuc' y xubi'ij chique:

—¿Sa' rumac wa'chi cacoj alak? —xcha'.

³⁰ Raj judi'ab xquic'ul uwach:

—We tamaji aj mac, na cakaya ta ri pak'ab la —xecha'.

³¹ Ec'u ri Pilato xubi'ij chique:

—C'ama bi alak y k'ata alak tzij puwi' jela' pacha' ri cubi'ij ri tzijpixab e alak —xcha'.

Pero raj judi'ab xquic'ul uwach:

—Ri'oj oj aj judi'ab na junta pakak'ab cakak'at tzij re camic puwi junok‡ —xecha'.

³² Jela' e xu'ana pacha' rubi'im lo ri Jesús puwi rucamic.§

Ri Pilato cuta uchi' ri Jesús

(Mt. 27:11-14; Mr. 15:1-5)

³³ Ri Pilato xoc tanchi ubi chupa ri palacio, xusiq'uij ri Jesús y xutz'onoj che:

—¿Lal cami ri' ri rey que raj judi'ab? —xcha'.

³⁴ Ri Jesús xubi'ij che:

—¿Xa pa e la ca'an la wa tz'onobal chwe o c'o ebi'yom re che'la? —xcha'.

³⁵ Ri Pilato xuc'ul uwach:

—Na junta we ri'in che wa', ma ¿in neba cuq'uil raj judi'ab? Yey ri xeya'w e la panuk'ab e ri winak re ri tinamit la cuc' ri nimak e aj chacunel pa Rocho Dios. ¿Sa' c'u ri mac 'anom la? —xcha'.

³⁶ Ec'u ri Jesús xuc'ul uwach:

—Ri nutakanic ri'in na re ta wara che ruwachulew. Ma we ta re wara, xech'o'jin ta c'u ri' ri nutijo'n cha' na quinya' ta paquik'ab raj judi'ab. No'j ri nutakanic na re ta wara che ruwachulew —xcha'.

³⁷ Xubi'ij c'u ri Pilato che:

† **18:28** Chiquiwach raj judi'ab we e la' queboc pa rocho junok na cuq'uil ta raj judi'ab, ruc' wa' quemacun chwach ri Dios y na takal ta c'u ri' chique caqui'an ri nimak'ij Pascua. Ruma wa' na xcaj taj queboc chupa ri rocho ri takanel Pilato. ‡ **18:31** Ri tzijpixab que raj judi'ab catakan che ca'an junok pa'bj we k'atom chi tzij re camic puwi'. Pero chupa la' la k'ij, xew c'o puk'ab ri gobierno re Roma cuk'at tzij re camic puwi junok. § **18:32** Raj judi'ab na caquicamisaj ta junok chwa cruz; xew raj Roma quebanaw wa'. Yey ri Jesús ubi'im chic cacamisax chwa cruz. Jn. 3:14; 8:28; 12:32

—¿Katzij cami ri' lal rey? —xcha'.

Ri Jesús xuc'ul uwach:

—Lal cabi'n la re, ri'in in rey. Ri'in xinalax che ruwachulew yey xinc'unic re cank'alajisaj ri K'ijsak. Janipa c'u ri quitakem ri K'ijsak, e caquita ri cambi'ij ri'in —xcha'.

³⁸ Ri Pilato xubi'ij che:

—¿Sa' ri' la' la K'ijsak? —xcha'.

Echiri' u'anom chi wa tz'onobal, xel tanchi ubi ri Pilato, xch'a't tanchi cuc' raj judi'ab y xubi'ij chique:

—Ri'in na canrik ta juna umac wa'chi. ³⁹ Ralak lic xex ca'an wi alak ri coy'ej alak pa ri nimak'ij Pascua canyolopij bi chiwach alak juna achi c'o pa cárcel. ¿Ca'aj cami alak ri' e canyolopij bi ri rey que raj judi'ab? —xcha'.

⁴⁰ Ec'uchiri', conoje xquijek que-siq'uin tanchic:

—¡Mayolopij bi la ri Jesús! ¡E yolopij bi la ri Barrabás! —xecha'. Yey ri Barrabás e jun achi elek'om.

19

Cak'at tzij re camic puwi ri Jesús
(Mt. 27:15-31; Mr. 15:6-20; Lc. 23:13-25)

¹ Ec'u ri Pilato xtakan che cac'am bi ri Jesús y cajich' upa. ² Yey ri soldados xquicoj che rujolom ri Jesús jun corona quipach'um ruc' q'uix. Y xquirip jun manta morato* chirij. ³ Tec'uchiri' xekib ruc' y caquibi'ij:

—¡Nim uk'ij ri rey que raj judi'ab! —quecha'. Yey caquipach' k'ab chupalaj.

⁴ Ri Pilato xel tanchi ulok y xubi'ij chique raj judi'ab:

—Chilape alak, canwesaj lo wa'chi chiwach alak. Cheta'maj c'u alak, ri'in na jinta juna umac canriko —xcha'.

⁵ Ec'uchiri' xel lo ri Jesús, c'o ri corona re q'uix che rujolom y ripom ri manta morato chirij. Xubi'ij c'u ri Pilato chique:

—¡Ri' rachi c'o chiwach alak! —xcha'.

⁶ Echiri' ri nimak e aj chacunel pa Rocho Dios cuc' ri e chajinel re ri Rocho Dios xquil ri Jesús, xquijek que-siq'uinic, jewa' caquibi'ij:

—¡Camisax chwa cruz! ¡Camisax chwa cruz! —quecha'.

Ec'u ri Pilato xubi'ij chique:

—We e ri', c'ama bi ralak y camisaj alak chwa cruz, pero ri'in na jinta juna umac canriko —xcha'.

⁷ Raj judi'ab xquic'ul uwach:

—Ri'oj c'o jun takanic pakawi' y cubi'ij c'u ri' takal che rire camisaxic ma u'anom Uc'ajol Dios che rib —xecha'.

⁸ Echiri' ri Pilato xuta wa', xoc más xi'in ib ruc'. ⁹ Xoc c'u tanchi ubi pa ri palacio y xutz'onoj che ri Jesús:

—¿Pa lal petinak wi rilal?† —xcha'. Pero ri Jesús na xuc'ul ta uwach.

¹⁰ Ri Pilato xubi'ij c'u che:

—¿E la' na cac'ul ta la uwach wa cantz'onoj che'la? ¿Na eta'am ta cami la panuk'ab ri'in c'o wi cancamisaj la chwa cruz y panuk'ab c'o wi canyolopij bi la? —xcha'.

¹¹ Ri Jesús xuc'ul uwach:

—Pakatzij wi cambi'ij che'la, na jinta c'ana pak'ab la catakan la panuwi' we tamaji e ri Dios chila' chicaj xya'w che'la. E uwari'che, china ri xink'atitan pak'ab la, e más c'o umac ri', chiwach rilal —xcha'.

¹² Chwi c'u ri', ri Pilato lic xutzucuj su'anic cuyolopij bi ri Jesús. Pero raj judi'ab co quesiq'uin che ubi'xic:

—¡We xyolopij bi la, na lal ta chi ramigo ri' ri nimalaj takanel re Roma; ma china ri cu'an rey che rib, ri' e tzel caril wa nimalaj takanel! —xecha'.

¹³ Echiri' xuta wa' ri Pilato, xutak bi resaxic ri Jesús y xtz'uyi' pa ri luwar re k'atbal tzij “Tz'akom Abaj” quecha che, yey pa ri ch'a'tem hebreo “Gabatá” rubi'.

¹⁴ E k'ij ri' cayijbax pan janipa ri cajawax pa ri nimak'ij Pascua.

* **19:2** “Morato”: Quil “púrpura” pa vocabulario. † **19:9** Ri Pilato na cutz'onoj taj pa xalax wi ri Jesús; ri caraj careta'maj e we ri Jesús xa e jun ticawex o we ruc' ri Dios petinak wi. ‡ **19:14** “Tiq'uil k'ij”: Quil “hora” pa vocabulario.

Ec'uchiri' xu'an tiq'uul k'ij,[‡] ri Pilato xubi'ij chique raj judi'ab:

—Ri' ri rey e alak —xcha'.

¹⁵ No'j raj judi'ab co quesiq'uin che ubi'xic:

—¡Camisax chwa cruz! ¡Camisax chwa cruz! —quecha'.

Ri Pilato xubi'ij chique:

—¿Cancamisaj cami ri' chwa cruz ri rey e alak? —xcha'.

Pero ri nimak e aj chacunel re ri Rocho Dios xquic'ul uwach:

—Ri'oj na jinta juna chic karey, xew e karey ri nimalaj takanel re Roma —xecha'.

¹⁶ Ec'u ri Pilato xuya bi ri Jesús paquik'ab re cacamisax chwa cruz. Ewi xc'am bi ri Jesús.

Rucamic ri Jesús chwa ri cruz

(Mt. 27:32-50; Mr. 15:21-37; Lc. 23:26-49)

¹⁷ Ri Jesús utelem bi rucruz echiri' xc'am bi pa ri luwar cabi'x che “Luwar re Ubakil Ujolom Anima”, yey pa ri ch'a'tem hebreo, “Gólgota”.

¹⁸ Chiri' c'u ri' xya' wi ri Jesús chwa ri cruz junam cuc' queb chic achijab, jun pa tak utzal; y xc'oji' c'u Rire chiquinic'ajal.

¹⁹ Ri Pilato utakom chic catz'ibax wa' y caya' c'u lo chwi ri cruz: «JESÚS RI AJ NAZARET, RI REY QUE RAJ JUDI'AB.»

²⁰ Yey wa' tz'ibital pa ri ch'a'tem hebreo, pa ri ch'a'tem griego y pa ri ch'a'tem latín. E q'ui c'u chique raj judi'ab xcajilaj wa', ma ri luwar pa xya' wi ri Jesús chwa ri cruz xa nakaj c'o wi che ri tinamit. ²¹ Yey ri nimak e aj chacunel re ri Rocho Dios xquibi'ij che ri Pilato:

—Na ube taj xtz'ibaj la “Ri rey que raj judi'ab”. Jalc'atij la cha' jewa' cubi'ij: “Rire xubi'ij: Ri'in in rey que raj judi'ab” —xecha'.

²² Pero ri Pilato xubi'ij chique:

—Ri xintak utz'ibaxic ri'in, jela' canaj canok —xcha'.

²³ Ri soldados echiri' quiya'om chi ri Jesús chwa ri cruz, xquimol uchi' ruk'u', xquijach upa cha' cu'an cajib

rajaw. Jela' xcaj caqui'an ruc' rucoton; pero wa' xa jun upa u'anom. ²⁴ Ruma c'u wa', ri soldados jewa' xquibi'ij chiquiwach:

—Makarich'ij upa rucoton; ka'ana jun sorteo cha' jela' cakilo chinok chike cac'amaw bi re —xecha'.

Ec'u xu'ana pacha' ri tz'ibital can chupa Ruch'a'tem ri Dios:

Xquijach quib puwi ri nuk'u',

ma xqui'an sorteo ruc' *Sal. 22:18* cacha'. Yey jec'uri'la' xqui'an ri soldados.

²⁵ Chunakaj c'u ri cruz e c'o ruchu ri Jesús, ruchak' ruchu, ri María rixokil ri Cleofas y ri María ri aj Magdala.

²⁶ Echiri' ri Jesús xril pan ruchu c'o putzal ri jun utijo'n lic c'ax cuna' Rire, xubi'ij c'u pan che ruchu:

—Nuchu, chwi c'u wo'ora e alab la la' —xcha'.

²⁷ Tec'uchiri' xubi'ij che ri jun utijo'n c'o putzal ri María:

—Ec'u ri'at, chwi wo'ora e achu la' —xcha'. Chwi c'u ri', wa jun utijo'n ri Jesús xuc'am bi ri María cha' que'jekela chirocho.

²⁸ Ec'u ri Jesús reta'am ya xuq'uis u'anic ronoje ruchac; yey cha' e cu'ana janipa ri tz'ibital can chupa Ruch'a'tem ri Dios, jewa' xubi'ij:

—Catzajin nuchi'☆ —xcha'.

²⁹ Chiri' c'o jun xaro nojinak che vinagre. Yey e c'o jujun xquichuk' jun esponja chupa, xquixim c'u chutza'm jun vara re hisopo y xquiya pan chwa re' ri Jesús.

³⁰ Rire xutij ri vinagre, tec'uchiri' xubi'ij:

—Xinq'uis c'u utza'm ri nuchac —xcha'.

Ec'uchiri', xuyuxuba' rujolom y xuk'atisaj ri ranima' puk'ab ri Dios.

Jun soldado cutok' ruc'alc'a'x ri Jesús ruc' rulanza

³¹ Ec'u k'ij ri' cayijbax pan janipa ri cajawax pa ri nimak'ij Pascua. Ruma c'u la', raj judi'ab na cacaj taj cac'oji' juna caminak chwa cruz pa ri k'ij re uxlanibal, ma la' la jun k'ij lic nimalaj nimak'ij. E uwari'che xquitz'onoj che

☆ 19:28 Sal. 69:21

ri Pilato cutak uk'epic ri cakan ri e c'o chwa cruz cha' jela' quecam tan y quekasax c'u ulok.

³² Xebec c'u ri soldados y xe'quik'epa ri cakan ri e c'o chwa cruz pa tak utzal ri Jesús. Xqui'an c'u ri' che ri nabe, tec'uchiri' jela' xqui'an che ri jun chic. ³³ Pero echiri' xekib ruc' ri Jesús, xquilo caminak chic; ruma ri', na xquik'ep ta ri rakan.

³⁴ Na ruc' ta c'u ri', jun chique ri soldados xutok' ruc'alc'a'x ri Jesús ruc' rulanza y c'atetana chupa wa' xel lo quic' y ya'.

³⁵ Ri catzijon re ronoje wa' e xilow re; lic katzij c'u ri cubi'ij ma lic reta'am sa' ri xrilo. Yey cutzijoj c'u ri' cha' cacubi' c'u'x alak ruc' ri Cristo. ³⁶ Ma ronoje tak wa' xu'ano cha' e cu'ana janipa ri tz'ibital can chupa Ruch'a'tem ri Dios, ma jewa' cubi'ij: Na cak'ep tane junok che rubakil.

Nm. 9:12; Sal. 34:20

³⁷ Yey jewa' cubi'ij Ruch'a'tem ri Dios: Caquil na c'u uwach ri jun xquitok' ruc'alc'a'x. *Zac. 12:10*

Ri Jesús camukic

(Mt. 27:57-61; Mr. 15:42-47; Lc. 23:50-56)

³⁸ Q'uisbal re tak wa', ri José aj Arimatea xu'tz'onoj che ri Pilato cha' caya' che cuc'am bi rucuerpo ri Jesús. Yey ri José e jun chique rutijo'n ri Jesús tob xa xe'lak'ay, ma cuxi'ij rib chiquiwach ri rach e aj judi'ab. Ec'u ri Pilato xuya bi che, y ri José xuc'am bi rucuerpo ri Jesús.

³⁹ Ec'u ri Nicodemo, ri jun achi xe'ch'a'ta ruc' ri Jesús chak'ab,* xopon che uto'ic ri José. Ruc'a'am laj jun quintal cunabal lic qui' ruxlab, wa' mirra uyijbam ruc' áloes. ⁴⁰ Xquic'am c'u bi rucuerpo ri Jesús y xquibolk'otij pa jutak raba'j c'ul cojotal ri cunabal che, ma wa' lic xex caqui'an wi raj judi'ab che quimukic ri quecamic.

⁴¹ Xa nakaj che ri luwar pa xquicamisaj wi ri Jesús chwa ri cruz, c'o jun luwar c'o chomilaj che'

chwach. Y chiri' c'o jun mukubal c'ac' 'anom, y na jinta junok mukum chupa. ⁴² Chiri' c'u ri' xquimuk wi rucuerpo ri Jesús, ma ri mukubal xa nakaj c'o wi; yey xcaj camuki' ri cuerpo pa ri k'ij echiri' raj judi'ab caquiyijba' pan janipa ri cajawax chique pa ri nimak'ij Pascua, ma na utz taj ca'an mukunic pa ri nimak'ij.

20

Ruc'astajibal ri Jesús

(Mt. 28:1-10; Mr. 16:1-8; Lc. 24:1-12)

¹ Ri nabe k'ij che ri semana, ri María ri aj Magdala lic anim tan, c'a k'eku'm nenare', xe'ec pa mukutal wi ri Jesús. Y c'ate xrilo esam chi rabaj chuchi' ri mukubal. ² Ec'uchiri', cac'alalic xe'ec pa e c'o wi ri Simón Pedro y ri jun chic tijo'n lic c'ax cana' ruma ri Jesús, y xubi'ij c'u chique:

—Ri Kajawal xesax bi pa mukutal wi y na keta'am taj pa xya'i' wi — xcha'.

³ Xebel c'u bi ri Pedro y ri jun chic tijo'n, y xebec pa xmuki' wi ri Jesús. ⁴ Quicabichal quec'alalic xebec; pero ri jun chic tijo'n más xc'alal chwa ri Pedro y nabe xoponic. ⁵ Xyuxi' pan chupa ri mukubal y xew xril ri jutak raba'j c'ul pa xbolk'otix wi ri Jesús, pero na xoc tubi.

⁶ Tec'uchiri' xopon ri Simón Pedro, ri teran lo chirij. Ec'u rire asu xoc chupa ri mukubal y xril ri jutak raba'j c'ul c'o can chiri'. ⁷ Yey ri c'ul pa xpis wi rujolom ri Jesús, na junam ta c'o ruc' ri jutak raba'j c'ul; ma utuquel c'olic, busum canok.

⁸ Ec'uchiri', xoc bi ri jun chic tijo'n ri xopon nabe chwach ri mukubal. Xew xril c'u ri' wa', xucojo c'astajinak chubi ri Jesús chiquixo'l ri ecaminak. ⁹ Ma ri petinak lok rique c'amaja' ne quimajom usuc' Ruch'a'tem ri Dios pa cubi'ij wi: Ri Jesús lic chirajawaxic cac'astaj bi chiquixo'l ri ecaminak.*

¹⁰ Y xetzelej c'u ri queb tijo'n pa e c'o wi ri cachbi'il.

* **19:39** Jn. 3:1-2 * **20:9** Jn. 2:22; 12:16; Sal. 16:8-11; Jon. 1:17; Mt. 12:40; Hch. 2:25-28; Lc. 24:25-27,44-46; 1 Co. 15:4

Ri Jesús cuc'ut uwach chwach ri María ri aj Magdala

(Mr. 16:9-11)

¹¹ Pero ri María cok'ic tac'al can chunakaj ri mukubal. Ec'u la' cok'ic, xyuxi' apanok y xtzun pan chupa ri mukubal. ¹² Xeril c'u pan queb ángeles sak quik'u' etz'ul jun chu'jolom y jun chi rakan che ri luwar pa xya'i' wi rucuerpo ri Jesús.

¹³ Ec'u ri ángeles xquitz'onoj che ri María:

—Ixok, ¿su'chac catok'ic? —xecha'.

Ri María xuc'ul uwach:

—Ma xc'am bi ri Wajawal y na weta'am taj pa xya'i' wi —xcha'.

¹⁴ Tec'uchiri', xtzun chirij. C'ate xrilo tac'al ri Jesús chiri', pero rire na xreta'maj taj we e ri Jesús.

¹⁵ Ec'u ri Jesús xutz'onoj che ri María:

—Ixok, ¿su'chac catok'ic? ¿China ri catzucuj? —xcha'.

Ri María xuch'obo wa jun achi laj e chajinel re ri werta, y jewa' c'u xubi'ij che:

—Achi, we lal xc'amaw bi la re, bi'ij la chwe pa xe'ya'a wi la cha' qui'nc'ama' —xcha'.

¹⁶ Ec'u ri Jesús xubi'ij che:

—¡María! —xcha'.

Ri María xutzun uwach y jewa' xubi'ij che:

—¡Raboni! (Wa ch'a'tem pa hebreo que'elawi: “Lal tijonel”).

¹⁷ Ri Jesús xubi'ij che:

—Chinatzokopij, ma c'amaja' quinak'an ruc' ri Nukaw. Jat y chabi'ij chique conoje ri nu hermanos: Ri'in quinak'an pa c'o wi ri Nukaw yey Ikaw ri'ix; ri nu Dios ri'in yey i Dios ri'ix —xcha'.

¹⁸ Xe'ec c'u ri María ri aj Magdala cuc' rutijo'n ri Jesús y xu'tzijo'j chique xril uwach ri Kanimajawal. Yey xutzijo'j chique janipa ri xbi'x bi che ruma ri Jesús.

Ri Jesús cuc'ut uwach chiquiwach rutijo'n

(Mt. 28:16-20; Mr. 16:14-18; Lc. 24:36-49)

¹⁹ Che c'u ri rocbal rak'ab che ri nabe k'ij re ri semana, rutijo'n ri Jesús quimolom quib, quitz'apim quichi' ruma quixi'im quib chiquiwach ri e aj wach que raj judi'ab. Ec'uchiri', ri Jesús xakic'ate't xwinakiric y xtaq'ui' chiquixo'l rutijo'n. Xuya c'u rutzil quiwach, jewa' xubi'ij chique:

—C'ola utzil chomal iwuc' —xcha'.

²⁰ Tec'uchiri', xuc'ut ruk'ab y ruc'alc'a'x chiquiwach. Ec'u rique lic xequi'cotic echiri' xquil uwach ri Kanimajawal.

²¹ Ec'u ri Jesús xubi'ij tanchi chique:

—C'ola utzil chomal iwuc'. Jela' pacha' ri Nukaw xinutak lo ri'in, jec'uri'la' ri'in quixintak bi ri'ix —xcha'. ²² Ec'uchiri', xuxut'uj† quiwi' y xubi'ij chique:

—Chic'ulu ri Santowilaj Ruxlabixel ri Dios. ²³ We c'o junok cutzelej utzij chwach ri Dios, ya'tal pik'ab quik'alajisaj che: “Ri Dios ucuyum chi amac.” Yey we c'o junok na cutzelej ta utzij chwach ri Dios, ya'tal pik'ab quik'alajisaj che: “At tanal ruc' ramac chwach ri Dios”☆ —xcha'.

Ri Jesús cuc'ut uwach chwach ri Tomás

²⁴ Ri Tomás ri cabi'x “yo'x” che, e jun chique ri cablajuj utijo'n ri Jesús. Rire na jintaj echiri' xopon ri Jesús cuc' rique. ²⁵ Ec'u ri jujun chic tijo'n echiri' xquil uwach ri Tomás, jewa' xquibi'ij che:

—¡Ri'oj xkil uwach ri Kanimajawal! —xecha'.

Pero ri Tomás jewa' xubi'ij chique:

—Ri'in xew cancojo we nabe na canwil rutel ri clawux puk'ab y canju' ruwi nuk'ab chupa yey canju' ri nuk'ab puc'alc'a'x. No'j we na can'an ta wa', ri' na cancoj taj —xcha'.

† 20:22 Wa' e cucuxtaj chike ri xu'an ri Dios echiri' xu'an ri nabe achi. Quil Génesis 2:7. Yey echiri' ri Jesús xuxut'uj quiwi' rutijo'n, e que'elawi cu'an tanchi c'ac' che ri ticawex ruma ri Ruxlabixel ri Dios.

☆ 20:23 Mt. 16:19; 18:18

26 Ic'owinak chi c'u wajxakib k'ij, ri tijo'n quimolom tanchi quib chupa ri ja y c'o ri Tomás cuc'. Tob quitz'apim c'u quichi', ri Jesús xakic'ate't xwinakiric y xtaq'ui' chiquixo'l. Ewi xuya rutzil quiwach, jewa' xubi'ij:

—C'ola utzil chomal iwuc' —xcha'.

27 Tec'uchiri', xubi'ij che ri Tomás:

—Chawila ri nuk'ab y chaju'u ruwi ak'ab wara, yey chaju'u pe lo la'k'ab pa wa nuc'alc'a'x. Mu'an c'u ri xa queb ac'u'x wuc'; e chacojo' ri'in in c'aslic —xcha'. 28 Ec'uchiri', ri Tomás xubi'ij che ri Jesús:

—¡Lal Wajawal y Lal nu Dios! —xcha'.

29 Yey ri Jesús xubi'ij che:

—Tomás, c'a e la' xacojo ruma xawil na nuwach. Nim c'u quik'ij calaxic ri na quilom ta nuwach yey na ruc' ta c'u ri', caquicojo ri'in in c'aslic —xcha'.

Ruchac wa libro xtz'ibaxic

30 Ri Jesús xu'an uq'uiyal c'utubal re ruchuk'ab ri Dios chiquiwach rutijo'n, y wa' na ronoje taj tz'ibital chupa wa libro. 31 Pero janipa c'u wa xtz'ibaxic, e cha' cacoj alak ri Jesús e ri Cristo, Ruc'ajol ri Dios, y c'o c'u c'aslemal alak ri' ruma cacoj alak rubi'.

21

Ri Jesús cuc'ut uwach chiquiwach wukub chique rutijo'n

1 Tec'uchiri' ri Jesús xuc'ut tanchi rib chiquiwach rutijo'n chuchi' ri mar re Tiberias. Jewa' xu'ano: 2 Junam e c'o ri Simón Pedro, ri Tomás ri caquibi'ij “Yo'x” che, ri Natanael ri aj Caná re Galilea, ri queb uc'ajol ri Zebedeo y ca'ib chic chique rutijo'n ri Jesús. 3 Ec'u ri Simón Pedro xubi'ij chique:

—Quin'ec pa chapoj car —xcha'.

Rique xquibi'ij che:

—Coj'ec ri' awuc' —xecha'.

Xebec c'ut y xeboc bi chupa jun barco, pero la' la'k'ab wi na jinta c'ana car xquichapo.

4 Echiri' catajin usakiric, rutijo'n xquil jun achi tac'al chuchi' ri mar, pero na xqueta'maj taj we e ri Jesús.

5 Xubi'ij c'u ri Jesús chique:

—Ix walc'o'al, ¿na jinta car ichapom? —xcha'.

Rique xquic'ul pan uwach:

—Na jintaj —xecha'.

6 Xubi'ij c'u ri Jesús chique:

—Chiliq'uij li'atarraya puwiquik'ab ri barco y chiwilape' ma quebiwesaj lo car —xcha'.

Rique e xqui'ano yey na caquich'ij ta chi c'u lo resaxic ri' ri qui atarraya pa ri ya' ruma ruq'uiyal car e c'o chupa.

7 Ec'u ri jun tijo'n lic c'ax cana' ruma ri Jesús, xubi'ij che ri Pedro:

—¡E Kanimajawal! —xcha'.

Ri Simón Pedro xew xuto e ri Jesús, xucojola' ruk'u' resam y xuc'ak bi rib pa ri ya'. 8 Yey ri jujun chic tijo'n xec'un ruc' ri barco chuchi' ri mar, quicharem ri qui atarraya nojinak che car, ma laj xa cien metros e c'o wi che ruchi' ri ya'.

9 Echiri' xekaj lo chu'lew, c'ate xquilo nuc'utal jun ak', y puwi ri rachak'a'l c'o jun car y c'o pam chiri'.

10 Xubi'ij c'u ri Jesús chique:

—Chic'ama lo jujun chique ri car, ri c'a e la' xebichap lok —xcha'.

11 Ri Simón Pedro xoc pa ri barco y xucharej bi c'a chuchi' ri mar ri atarraya nojinak che nimak tak car, ma e ciento cincuenta y tres ri car e c'o chupa. Tob lic e q'ui ri car, na xrakaro'b ta ri atarraya.

12 Ec'uchiri', xubi'ij ri Jesús:

—Chixpetok, chixwo'kok —xcha chique.

Na jinta c'u junok chique rutijo'n xraj cutz'onoy che china Rire, ma queta'am e ri Kanimajawal.

13 Ec'uchiri', ri Jesús xuc'am ri pam y xuya chique, y jela' xu'an ruc' ri car.

14 E urox laj wa' xuc'ut uwach ri Jesús chiquiwach rutijo'n chwi lo ruc'astajibal chiquixo'l ri ecaminak.

Ri Jesús cach'a't ruc' ri Simón Pedro

15 Echiri' xquiq'uis utijic ri quiwa, ri Jesús xutz'onoj che ri Simón Pedro:

—Simón, at uc'ajol ri Jonás, ¿más nawi c'ax quinana' ri'at chwa ri c'axna'bal we caqui'an wa jujun chic? —xcha'.

Ri Pedro xuc'ul uwach:

—Wajawal, rilal eta'am la c'o rutzil nuc'u'x che'la —xcha'.

Ri Jesús xubi'ij che:

—Chebatzuku c'u ri' ri raltak co nubexex —xcha'.

16 Xutz'onoj chucalaj:

—Simón, at uc'ajol ri Jonás, ¿lic c'ax quinana' ruc' ronoje ac'u'x? —xcha'.

Ri Pedro xuc'ul uwach:

—Wajawal, rilal eta'am la c'o rutzil nuc'u'x che'la —xcha'.

Xubi'ij tanchi c'u ri Jesús che:

—Chebachajij c'u ri' ri nubexex —xcha'.

17 Xutz'onoj churox laj:

—Simón, at uc'ajol ri Jonás, ¿katzij c'o rutzil ac'u'x chwe? —xcha'.

Ri Pedro lic xuchap bis ruma e urox laj ri' xtz'onox che. Xubi'ij c'u ri':

—Wajawal, rilal eta'am la ronoje, eta'am c'u la ri'in c'o rutzil nuc'u'x che'la —xcha che.

Xubi'ij c'u ri Jesús che:

—Chebatzuku c'u ri' ri nubexex.

18 Pakatzij wi cambi'ij chawe: Echiri' at ala, ri'at atuquel caxim rapas y cate'ec pa cawaj wi cate'ec. No'j echiri' catu'ana nimalaj winak, cayac la'k'ab y jun chic caximow rapas y catuc'am bi pa na cawaj ta wi cate'ec —xcha'.

19 Ri Jesús xubi'ij wa' cha' cuk'alajisaj sa' rucamic ri Pedro ca'anic re yacbal uk'ij ri Dios. Tec'uchiri', xubi'ij che:

—¡Chat-tereja lo chwij! —xcha'.

20 Echiri' xtz'u'n ri Pedro chirij, xrilo chiquij teran lo ri jun tijo'n lic c'ax cana' ruma ri Jesús, wa' e ri xja'i' putzal ri Jesús pa ri jun wa'im echiri' xutz'onoj che: «Wajawal, ¿China ri cac'ayin e la?»[☆] 21 Ec'u ri Pedro echiri' xril ri jun chic tijo'n, xutz'onoj che ri Jesús:

—Wajawal, yey rire, ¿sa' ri cuc'ulumaj? —xcha'.

22 Ri Jesús xuc'ul uwach:

—¿Su'chac catz'onoj? We cuaj ri'in c'a c'as rire echiri' quinc'un tanchic, na junta awe che. Ri'at chat-tereja lo chwij —xcha'.

23 Ruma c'u wa xubi'ij ri Jesús, xe'ec utzijoxic chiquixo'l ri quicojom rubi' ri Cristo: «La' la jun utijo'n na cacam taj.» Pero ri Jesús na xubi'ij ta che we na cacam taj, ma xew xubi'ij wa': «¿Su'chac catz'onoj? We cuaj ri'in c'a c'as rire echiri' quinc'un tanchic, na junta awe che.»

24 Ec'u wa' wa jun tijo'n e ri cajiquiban uwach tak wa' y e xtz'iban wa'. Yey ri'oj keta'am c'ut lic katzij ronoje wa tz'ibitalic.

25 Lic c'o uq'uiyal chac xu'an ri Jesús tob na ronoje ta wa' tz'ibital can chupa wa libro. Yey we ta e la' catz'ibax ronoje tak ri xu'ano, ri'in canch'ob rakan na coc tane che ruwachulew tak ri wuj pa catz'ibax wi. Amén.

☆ 21:20 Jn. 13:25

Janipa ri xqui'an tak rutako'n ri Cristo

Ri ubi'im lo ri Jesús puwi ri Ruxlabixel ri Dios

¹ Chupa ri nabe nulibro, xintz'ibaj pan che rilal Teófilo, puwi tak ri xu'an ri Jesús y tak ri xuc'utu chwi lo ri jekebal re ruchac ² c'a chupa ri k'ij echiri' xc'ul chila' chicaj ruma ri Dios. Chwach c'u pan ri' rubenam chila' chicaj, Rire ruma ri Santowilaj Ruxlabixel ri Dios xuya can takanic chique rutako'n* ebucha'om puwi tak ri chirajawaxic caqui'ano. ³ Chwi c'u rucamic, xc'astaj lo chiquixo'l ri ecaminak y c'a xc'o'ji' cuarenta k'ij che ruwachulew. Chupa tak c'u la' la k'ij, uq'u'iyal laj e la' xuc'ut uwach chiquiwach rutako'n y xch'a't cuc' puwi ri takanic re ri Dios. Jec'ula' ri', lic xuc'utu pakatzij wi Rire c'aslic.

⁴ Echiri' ri Jesús e la' c'a c'o cuc' rutako'n, xubi'ij chique:

—Chixc'ola Jerusalem cha' quiwoy'ej rubi'tisinic ri Nukaw, ri nutzijom chi lo ri'in chiwe; wa' e ri bautismo re ri Ruxlabixel ri Dios. ⁵ Pakatzij wi ri Juan xuya ri bautismo ruc'ya'; no'j ri bautismo quic'ul ri'ix e ruc' ri Santowilaj Ruxlabixel ri Dios; yey wa' cu'ana xa chupa tak wa' wa k'ij catajin lok —xcha chique.

Ri Jesús catzelej chila' chicaj

⁶ Jun k'ij c'ut ri quimolom quib ruc' ri Jesús jewa' xquitz'onoj che:

—Kajawal, ¿chupa tak wa' wa k'ij oj c'o wi, cayac tanchi nawi la ri takanic re ri katinamit Israel jela' pacha' ri u'anom lo ojertan?† —xecha'.

⁷ Y ri Jesús xuc'ul uwach:

—Ri'ix na ya'tal ta chiwe quiweta'maj ruk'ijol y ru'orayil echiri' cu'ana tak wa' ri Nukaw, ma ronoje wa' xew puk'ab Rire c'o wi. ⁸ Pero

quic'ul c'u ichuk'ab ri'ix echiri' cakaj lo ri Santowilaj Ruxlabixel ri Dios piwi' y quixu'ana c'u ix tzijol we'in chupa wa tinamit Jerusalem, chupa ronoje ri luwar re Judea y re Samaria y c'a che ronoje luwar re ruwachulew —xcha chique.

⁹ Ec'uchiri' xuq'uis ubi'ixiquil tak wa', xc'am bi chila' chicaj; y ec'u la' caquitzutza' rutijo'n xsach bi chiquiwach chupa jun sutz'. ¹⁰ C'a caquitzutza' c'u pan chila' chicaj pa xc'am wubi ri Jesús, echiri' xewinakir queb achijab cuc' yey wa' lic sak ri quik'u'.

¹¹ Wa'chijab xech'aw c'u chique, jewa' xquibi'ij:

—Achijab ix aj Galilea, ¿su'be c'a quixtzutzu'n chicaj? Ma wa Jesús, ri xel bi chixo'l ri'ix y xc'ul chila' chicaj, Rire cac'un tanchic. Jec'ula' pacha' xiwilo xe'ec, jela' cac'un tanchic — xecha chique.

Ri Matías cacha'ic re cac'o'ji' puc'axel ri Judas aj Iscariot

¹² Ec'uchiri', ri e tako'n xebel bi chwach ri juyub Olivos y xetzelej Jerusalem. (Wa juyub xa nakaj c'o wi lo che Jerusalem, laj jun kilómetro unajtijil; jec'ula' rique na xic'ow ta uwi' ri caquibinibej che ri ya'talic e chirij ri cojobal que raj judi'ab puwi ri k'ij re uxlanibal.)‡

¹³ Echiri' xebopon Jerusalem, xebak'an chicaj pa ri cale'ja pa ejekel wi ri Pedro, ri Jacobo, ri Juan, ri Andrés, ri Felipe, ri Tomás, ri Bartolomé, ri Mateo, ri Jacobo ruc'ajol ri Alfeo; ri Simón ri cabi'x “ri Zelote” che y ri Judas ruchak' ri Jacobo. ¹⁴ E conoje rique lic xa jun quic'u'x quiya'om quib pa oración, junam cuc' jujun ixokib, ruc' ri María rucu ri Jesús yey cuc' tak ruchak' ri Jesús.

¹⁵ Chupa c'u tak la' la k'ij, ri Pedro xtaq'ui' chiquiwach ri hermanos

* **1:2** “Rutako'n”: Quil “apóstol” pa vocabulario. † **1:6** Caquitz'onoj we ri Jesús cu'ana rey re Israel ruc' jun takanic pacha' ri xqui'an ri rey David y ri rey Salomón echiri' lic yacom uk'ij ri tinamit Israel.

‡ **1:12** Chiquiwach raj judi'ab, xew ya'talic cabin junok jun kilómetro chupa ri k'ij re uxlanibal.

quimolom quib, laj e ciento veinte chi conoje, y jec'uwa' xubi'ij chique:

¹⁶ «Hermanos, lic chirajawaxic wi e cu'ana na ri tz'ibital can chupa Ruch'a'tem ri Dios puwi ri xubi'ij ri Santowilaj Ruxlabixel ruma ri David echiri' xch'a't puwi ri Judas aj Iscariot. Wa' e ri xnabey chiquiwach ri xechapaw bi ri Jesús, ¹⁷ tob rire e jun kachbi'il y xya' che xchacun junam kuc' chupa wa chac re ri Dios» xcha'.

¹⁸ (Xlok' c'u juch'akap ulew ruc' ri puak xya' che ri Judas ruma ri na jusuc' taj xu'ano echiri' xuc'ayij ri Jesús. Ec'u ri Judas xu'xuluba' lo rib chwi jun che' y echiri' xtzak lok, xrakaro'b rupa y ronoje ri rixcolob xquich ca'nic. ¹⁹ Wa' xqueta'maj conoje ri ejekel Jerusalem. E uwari'che, xquicoj “Acéldama” che wa jun luwar; wa' que'elawi “Luwar re Quic'” pa ri quich'a'tem rique.)

²⁰ Xubi'ij c'u ri Pedro:

«Jec'uwa' tz'ibital can puwi ri Judas chupa ri libro re ri Salmos:

Ri luwar pa jekel wi chu'ana jun luwar catz'intz'otic, y na jinta junok cajeki' chiri'. *Sal.*

69:25

Y jewa' cubi'ij tanchic:

Lic chirajawaxic catzucux jun chic aj chac cha' cac'oji' puc'axel *Sal.*

109:8

catcha'.

²¹ »E c'o c'u jujun achijab chikaxo'l xex ojcachbilam echiri' c'a c'o ri Jesús kuc', ²² chwi lo echiri' xuc'ul ri bautismo ruma ri Juan y c'a echiri' xel bi kuc' y xc'ul chila' chicaj ruma ri Dios. Lic chirajawaxic c'ut caka-coj junok chique wa' wa'chijab cha' junam cojtzijon puwi ruc'astajibal ri Jesús» xcha ri Pedro chique.

²³ Xequicha' c'u ca'ib achijab. Jun e ri José, ri cabi'x Barsabás che y cojom jun retzelal ubi' “Justo” quecha che. Ri jun chic, Matías rubi'. ²⁴ Y xqui'an orar, jewa' xquibi'ij: «Kajawal, Rilal eta'am la ri quic'u'x conoje ri

ticawex. C'utu c'u la chikawach chinok chique wa ca'ib achijab cha'om la ²⁵ cha' cuc'am bi wa chac y ca'an tako'n la che; jec'ula' cac'oji' puc'axel ri Judas aj Iscariot, ri xrok'otaj can ri chac xya' che y xe'ec c'u pa ri luwar takal che» xecha'.

²⁶ Ec'uchiri', xqui'an jun sorteo cha' cak'alajinic china chique wa ca'ib cacana' can puc'axel ri Judas; y wa' xtzak puwi ri Matías. Chwi c'u ri', rire xu'ana e jun cuc' ri junlajuj chic e tako'n.

2

Ruc'unibal ri Ruxlabixel ri Dios

¹ Echiri' xopon ri nimak'ij re Pentecostés* e tak rutijo'n ri Jesús quimolom quib, conoje u'anom xa jun quic'u'x. ² Xakic'ate't c'ut chila' chicaj xpe pacha' uch'awibal juna unimal tew lic cajuxuxic, yey wa' xunojisaj ronoje upa ri ja pa quimolom wi quib. ³ Ec'uchiri', xewinakir pacha' urepebal ak' y wa' xc'oji' paquiwi' chiquijujunal rique. ⁴ Yey conoje ri e c'o chiri' xquic'ul ruchuk'ab ri Santowilaj Ruxlabixel, y xquijek c'u ri' quech'a't pa jujun chic ch'a'tem junwi. Chiquijujunal quech'a't pa ri ch'a'tem xya'taj chique ruma ri Ruxlabixel.

⁵ Chiri' c'ut Jerusalem e c'o e aj judi'ab lic caquiloc'nimaj uk'ij ri Dios. Rique e petinak pa tak uq'uiyal tinamit che ruwachulew. ⁶ Echiri' xquita wa' wa' ch'awibal, xepe che rilic. Yey lic xsach quina'oj ma chiquijujunal xequito quech'a't pa tak ri quich'a'tem que rique. ⁷ Ec'u la' lic caminak canima' che, xquijek caquibi'ij chiquiwach: «¡Chilape alak! ¿Na e ta neba aj Galilea conoje wa quech'a'tic? ⁸ ¿Cha'ta c'u ri' chikajujunal quekato quech'a't pa tak ri kach'a'tem oj alaxinak wi ri'oj? ⁹ Yey lic pa uq'uiyal tinamit oj petinak wi. Chikaxo'l e c'o e aj Partia, e aj Media y e aj Elam. Yey e c'o ri ejekel Mesopotamia, Judea,

* **2:1** “Pentecostés”: Wa' que'elawi “cincuenta k'ij”. E jun nimak'ij catzak cincuenta k'ij ric'owic ri nimak'ij Pascua.

Capadocia, Ponto y Asia, ¹⁰ Frigia y Panfilia, Egipto y pa tak ri luwar re Libia chwach pana ri tinamit Cirene. Yey e c'o ri e petinak Roma; chiquixo'l wa' e c'o e aj judi'ab y e c'o ne ri na e ta aj judi'ab quitakem lo ri c'utunic que raj judi'ab. ¹¹ E c'o e aj Creta y ri e aj Arabia. Yey chikajujunal ri'oj cakato quech'a't pa kach'a'tem puwi tak ri c'utubal re runimal uchuk'ab ri Dios» quecha'.

¹² Conoje c'ut lic caminak canima' che y na caquirik ta chic sa' ri caquich'ob puwi', jec'uwa' caquibi'ij chiquiwach: «¿Sa' que'elawi wa'?» quecha'. ¹³ Yey e c'o c'u jujun chic quech'amin que y jewa' caquibi'ij: «La' quek'abaric» quecha'.

Ri nabe tzijonic xu'an ri Pedro puwi ri Jesús

¹⁴ Ec'uchiri', ri Pedro xtaq'ui'ic junam cuc' ri junlaluj chic tako'n y lic co xch'awic, jewa' xubi'ij:

«Achijab alak aj judi'ab y onoje ri alak jekel wara Jerusalem, tape alak chi utz ri cank'alajisaj che alak. ¹⁵ Ma e chiwach ralak, wa' wa'chijab quek'abaric, no'j jna e ta u'anom ri'! Ma c'a e ne belejeb ora† la' che wa anim. ¹⁶ Janipa wa cata alak y quil alak wo'ora, wa' e ri ubi'im chi can ri k'alajisanel Joel ojertan, echiri' jewa' xubi'ij:

¹⁷ «Che tak ruq'uisbal k'ij» cubi'ij ri Dios,

«cantak bi ri Wuxlabixel paquiwi conoje ri ticawex che ruwachulew puwi ri Cristo:

E tak c'u ri mi'al alc'o'al alak caquik'alajisaj ri Nutzij.

Ralabo caquilo janipa ri canc'ut chiquiwach;

yey e ri nimak winak, pa wachic' caquil wi janipa ri cank'alajisaj chiquiwach.

¹⁸ Chupa tak c'u ri' la' la k'ij, paquiwi ri e waj chac ixokib y achijab cantak bi ri Wuxlabixel cha' jela' caquik'alajisaj ri Nutzij chiquiwach ri ticawex.

† 2:15 «Belejeb ora»: Quil «hora» pa vocabulario.

¹⁹ Chwa ri caj canc'ut tak c'utubal re nuchuk'ab yey wa' na jinta ilitajinak wi

y che ruwachulew can'an c'utubal ruc' quic', ruc' ak' y ruc' mayul re sib.

²⁰ Ec'u ri k'ij cu'an k'eku'm uwach yey ri ic' cu'an cak uwach pacha' quic';

wa' e cu'ana echiri' ya copon ruk'ijol ri Kanimajawal.

Wa' wa jun k'ij lic nim y na jinta c'o cajunimax wi ruchomalil.

²¹ Y conoje c'u ri caquicoj quib chwach ri Kanimajawal re quebucolobej, ri' quecolobeta-jic”

Jl.
2:28-32

xcha'.

²² »Achijab alak aj Israel, tape alak janipa wa cambi'ij che alak wo'ora: Ri Jesús ri aj Nazaret, Rire e ri Jun takom lo chixo'l alak ruma ri Dios. Lic eta'am c'u alak ri xu'an ri Dios ruma ri Jesús chixo'l alak, wa' e uq'uiyal milagros y tak c'utubal re ri unimal uchuk'ab ri Dios. ²³ Yey ri Dios lic uch'obom chi ulok y reta'am su'chac xuya ri Jesús pak'ab alak. Ec'u ralak xchap bi alak y xtak alak ucamisaxic chwa cruz cuma winak na jinta Rutzij Upixab ri Dios cuc'.‡ ²⁴ Pero ri Dios xuc'astajisaj lok y xresaj chupa ruc'axc'olil ri camic, ma ri camic na jinta uchuk'ab puwi Rire y ruma ri', Rire na xc'o'ji' ta puk'ab ri camic.

²⁵ »Rojertan xubi'ij can ri rey David puwi ri Cristo:

Ri'in canwil ri Wajawal xaki e la' c'o chinuwach.

Ruma c'u c'o Rire pa nuwiquik'ab, na jinta c'ana cayuch'uyu'n we'in.

²⁶ E uwari'che ri wanima' lic xqui'cotic

y ruchi' nukul xbixon ruc' qui'cotemal. Ec'u ri'in, tob ne weta'am quincamic, e la' c'o chi ri nucubam pan nuc'u'x che;

²⁷ ma Rilal na quinya ta can la chiquixo'l ri ecaminak,

‡ 2:23 Wa' e ri e aj Roma.

yey na caya tane la luwar cak'ay rucuerpo ri aj chac la,
ri jun lic uya'om rib pak'ab la.

²⁸ Rilal xc'ut la chinuwach ri be re c'aslemal.

Ruma c'u xaki Lal c'o la wuc' ri'in, canojisaj la ri wanima' che qui'cotemal *Sal. 16:8-11* xcha'.

²⁹ »Hermanos, pakatzij wi lic usuc' cancuxtaj wa' che alak: Ri rey David ojertan, xcamic y xmukic, y c'a k'alaj ne chikawach ri'oj wak'ij ora pa c'o wi rumukubal. ³⁰ Yey ri rey David e jun k'alajisanel; xreta'maj c'u ri' ri Dios ruc' jun tzij xujiquiba' uwach che rire: “Chiquixo'l tak ri awalc'o'al, cayactaj lo ri Cristo cha' cu'an Rey y catz'uyi' pac'axel ri'at.”

³¹ »Yey ri rey David xch'a'tic e pacha' rilom chi ruc'astajibal ri Cristo echiri' xubi'ij: “Na cacana' ta can Rire chiquixo'l ri ecaminak y na cak'ay tane rucuerpo.”[☆] ³² Ec'u wa' wa Jesús ri xuc'astajisaj ri Dios che ri camic; yey wa' lic katzij, ma konoje ri'oj xkilo. ³³ Lic c'u xyac uk'ij echiri' xtz'uyi' puwiquik'ab ri Dios. Yey xya'taj che Rire cutak lo pakawi ri'oj ri Santowilaj Ruxlabixel, ri ubi'tisim lo ri Kakaw Dios chike ri'oj. Y ec'u ri' wa' ri quil alak y cata alak.

³⁴ »Ma na e ta ri David ri xak'an chila' chicaj, pero e rire ri xubi'ij:

Ri Dios Kajawxel xubi'ij che ri Wajawal:

“Chat-tz'ula pa nuwiquik'ab,

³⁵ y chawoye'ej na ri k'ij

echiri' quebenuya ri tzel quebilow awe

chuxe' rawakan” *Sal. 110:1*

xcha'.

³⁶ »Tape alak onoje ri alak aj Israel, ma lic chirajawaxic queta'maj c'u alak: Wa Jesús ri xcamisaj alak chwa cruz, e cha'tal lo ruma ri Dios re cu'an Kajawal y Colobenel» xcha ri Pedro chique.

³⁷ Ec'uchiri' xquita wa', lic xoc bis chiquic'u'x y jewa' xquibi'ij che ri Pedro y chique ri jujun chic e tako'n:

—Hermanos, ¿sa' c'u ri' caka'an ri'oj? —xecha'.

³⁸ Y ri Pedro xubi'ij chique:

—Tzelej tzij alak chwach ri Dios y chijujunal alak c'ulu alak pa rubi' ri Kanimajawal Jesucristo ri bautismo re cuybal mac alak y jela' cac'ul na c'u alak ri Santowilaj Uxlabixel, wa' e sipanic re ri Dios che alak. ³⁹ Ma ri Dios ubi'tisim wa' chique conoje janipa ri quebusiq'uij: che ralak, chique tak ri alc'o'al alak y chique ne conoje ri ejekel lic naj che ri tinamit re Israel —xcha ri Pedro chique.

⁴⁰ Jec'ula', xebupixabaj ruc' uq'uiyal ch'a'tem y jewa' xujiquiba' uwach chique:

—Chesaj lo ib alak chiquixo'l wa' wa winak lic na jusuc' ta ri qui'anom, cha' jela' cacolobetaj alak chwach ri k'atbal tzij cape paquiwi' —xcha chique.

⁴¹ Janipa c'u ri' ri xecojow Rutzij ri Dios ruma ri xubi'ij ri Pedro, xquic'ul ri bautismo. Yey chupa c'u la' la jun k'ij, laj e oxib mil ri xquicoj rubi' ri Cristo. ⁴² Y conoje lic junam quebin chupa ri sakil c'utunic que ri e tako'n re ri Jesús, junam quic'u'x, junam quewa' chiquiwach y junam caqui'an orar.

Ri quibinic quisilabic ri nabe ticawex xecojow rubi' ri Cristo

⁴³ Conoje c'u ri ticawex xoc xi'in ib pa canima' ruma tak ri milagros y c'utubal cu'an ri Dios cuma ri e utako'n ri Cristo. ⁴⁴ Conoje c'u ri xecojow rubi' ri Cristo, lic xu'an xa jun quic'u'x chiquiwach y rubitak que chiquijujunal xu'an re chinima ronoje. ⁴⁵ E c'o ri xquic'ayij culew y ubitak que, yey ec'u ri rajil wa', caquijach chiquiwach e chirij tak ri cajawax wi chique chiquijujunal. ⁴⁶ Ronoje k'ij caquimol quib chupa ri Rocho Dios. Yey pa tak ri cocho caquijach chiquiwach ri caquitijo, junam quewa' ruc' qui'cotemal y ruc' uch'uti'nal quic'u'x. ⁴⁷ Caquiyac c'u uk'ij ri Dios y lic chom ri

☆ 2:31 Sal. 16:10

quich'a'tibexic ca'an cuma conoje ri ticawex re ri tinamit. Yey ronoje k'ij e c'o más ticawex catajin quicolobetajic ruma ri Kanimajawal, y jela' xq'uiyar riglesia.

3

Jun achi sic cacunutajic

¹ Xu'ana c'u chupa jun k'ij, ri Pedro y ri Juan junam xebec pa ri Rocho Dios che ri urox ora* benak k'ij, ma e ora ri' re oración.

² Ronoje k'ij c'ut cac'am lo jun achi ralaxibem sic y caya' chwach ri Rocho Dios pa ri oquibal cabi'x che "Lic Chom" cha' cutz'onoj ulimoxna chique ri winak queboc bi. ³ Ec'u rachi sic, echiri' xeril ri Pedro y ri Juan e ri' queboc bi chupa ri Rocho Dios, xujek quelaj chique cha' caquiya can ulimoxna.

⁴ Ec'u ri Pedro junam ruc' ri Juan lic xquich'iquiba' ri quiwach puwi rachi, yey ri Pedro xubi'ij che:

—Chojtz'u pe la —xcha che.

⁵ Ewi ri sic xebutzu'u ma roye'em we c'o caquiya che.

⁶ Pero ri Pedro xubi'ij che:

—Na junta sakil puak wuc' y na junta ne k'ana puak wuc'; no'j c'u ri c'o wuc' canya che'la. Chupa rubi' ri Kanimajawal Jesucristo ri aj Nazaret, yactaj la y bina la —xcha che.

⁷ Ec'u ri Pedro xuchap che ruk'ab uwiq'ik'ab, xuyaco y chupa la' la jok'otaj xcowir ri rakan y rukul rakan. ⁸ Y rachi xch'oplin chicaj, xtaq'ui'ic y xujeko cabinic. Junam c'ut cuc' ri Pedro y ri Juan, xoc bi pa ri Rocho Dios, cabinic, cach'oplanic y cuyac uk'ij ri Dios.

⁹ Conoje c'u ri winak re ri tinamit xquilo rachi cabinic y lic cuyac uk'ij ri Dios. ¹⁰ Y xqueta'maj e achi catz'uyi'ic y cutz'onoj ulimoxna chwach ri Rocho Dios pa ri oquibal cabi'x che "Lic Chom". Lic c'u xcam canima' che ri x'ani' che rachi y na xquimaj ta c'ana usuc' cha'taj xcunutajic.

¹¹ Rachi xcunutajic na caresaj ta chi rib chiquij ri Pedro y ri Juan. Yey conoje ri winak caminak canima' che, xemoc ca'n pa ri luwar cabi'x che "Ruchi' Ja re Salomón".

¹² Ec'uchiri' xril wa' ri Pedro, xubi'ij chique ri tinamit:

«Achijab alak aj Israel, ¿su'chac lic caminak anima' alak che wa xil alak? ¿Yey su'chac e cojtzutza' alak ri'oj pacha' oj ri xojbinisan re wa'chi ruc' ri kachuk'ab o ruma lic oj jusuc' ri'oj chwach ri Dios? Na e ta ri'.

¹³ Ma e ri Dios que ri kamam ojer-tan, wa' e ri Abraham, ri Isaac y ri Jacob, ec'u Rire ri lic xuyac uk'ij ri Jesús ri Raj Chac Rire. No'j ralak xya alak ri Jesús puk'ab ri Pilato. Y na xew ta la', ma xc'ak bi alak uk'ij chwach ri Pilato y na xya ta alak luwar che rire cuyolopij bi ri Jesús echiri' xraj cuyolopij bi ruma na junta mac xurik che. ¹⁴ Ec'u ri' ralak na x'aj ta alak cayolopix bi wa' wa Jun lic nim uk'ij Santo y Jusuc'; ma e xtz'onoj alak cayolopix bi ri jun camisanel.* ¹⁵ Xcamisaj c'u alak ri' ri aj ya'l c'aslemal, ri Jun xc'astajisax lo chiquixo'l ri ecaminak ruma ri Dios. Puwi c'u ri' wa c'astajibal cojtzijon wi ri'oj ma lic oj xojilow re.

¹⁶ »E ruma ri cubulibal c'u'xaj ruc' ri Jesús, xcowir ri rakan wa' wa'chi quil alak y eta'am ne alak uwach. Yey ruma wa cubulibal c'u'xaj ruc' ri Jesús xcunutaj wa'chi pa sakil wi jela' pacha' catajin onoje alak che rilic.

¹⁷ »Weta'am c'ut, alak katz-kachak', ri x'an alak e ruma na xmaj ta alak usuc', y jenela' ri' xqui'an raj wach re ri tinamit alak. ¹⁸ Pero ruma ri x'an alak che ri Jesús, ri Dios xu'ana janipa rubi'im lo ojertan cuma ri k'alajisanelab echiri' xubi'ij Rucha'o'n lo Rire cutij c'ax.

¹⁹ »E uwari'che tzelej tzij alak chwach ri Dios y ya'a c'u ib alak puk'ab cha' cacuytaj ri mac alak y cha' ri Kajawal Dios cuya uxlanem y utzil chomal chupa ri anima' alak. ²⁰ Jec'ula' ri Dios cutak na lo uc' alak

* **3:1** "Ri urox ora": Quil "hora" pa vocabulario.

* **3:14** Lc. 23:17-20

ri Jesús, Rucha'o'n lo Rire, ri bi'tisim chi lo che alak ojertan. ²¹ Tob c'u wo'ora lic chirajawaxic wi ri Jesús c'o chila' chicaj, copon na ri k'ij echiri' ri Dios cu'an tanchi c'ac' che ronoje jela' pacha' ri xubi'ij lo ojertan cuma ri k'alajisanelab ri xetak lo ruma Rire.

²² »Ma ri Moisés xubi'ij chique ri kati'-kamam ojertan:

E ri Dios Kajawxel cuyac na lo chiquixo'libal ri katinamit Israel

jun K'alajisanel jela' pacha' ri'in.

Ec'u chita janipa ri cubi'ij Rire chiwe.

²³ Ec'u ri ticawex na cucoj ta utzij wa jun K'alajisanel, *Dt. 18:15, 19*

ri' quesax bi y na jinta chi re cuc' rutinamit ri Dios *Lv. 23:29*

xcha ri Moisés.

²⁴ »Conoje c'u ri k'alajisanelab quipetebem lo chwi ri Samuel, lic etzijoninak lo chwi tak wa' wa k'ij.

²⁵ Alak c'u ri cac'uluw re ri xubi'tisij ri Dios cuma ri k'alajisanelab y ruma ri tzij xu'an cuc' ri kati'-kamam ojertan, echiri' xubi'ij che ri Abraham:

Ruma c'u Jun chique rawalc'o'al,

quebenu'an bendecir conoje ruq'uuiyal quiwach tak ri ticawex che ruwachulew *Gn. 12:18*

xcha'.

²⁶ »Ec'u ri Dios, echiri' xuc'astajisaj lo ri Raj Chac chiquixo'l ri ecaminak, xutak lo nabe uc' ralak re to'bel e alak cha' jela' chijujunal alak cajalc'atitaj ri binic silabic alak che ri na utz taj» xcha ri Pedro chique.

4

Ri Pedro y ri Juan quec'am bi pa k'atbal tzij

¹ C'a quech'a't ne ri Pedro y ri Juan cuc' ri winak, echiri' xec'un lo raj chacunel re ri Rocho Dios, ri aj wach que ri e chajinel re ri Rocho Dios y jujun saduceos. ² Rique lic c'o coyowal chiquij ri Pedro y ri Juan ma quec'utun chiquiwach ri ticawex puwi ruc'astajibal lo ri Jesús

chiquixo'l ri ecaminak,* jec'uwa' caquibi'ij: «Ruc'astajibal ri Jesús e c'utubal re, chikawach apanok ri ticawex quec'astaj lo chiquixo'l ri ecaminak» quecha'.

³ Ec'u ri e aj wach re ri Rocho Dios xetakan che quechap bi ri Pedro y ri Juan. Yey ruma c'u lic benak k'ij chic, xebe'quiya'a pa cárcel cha' cata' quichi' c'a chuca'm k'ij. ⁴ Pero chique ri xetaw re ri xubi'ij ri Pedro, lic e q'ui ri xcubi' quic'u'x ruc' ri Jesús; yey we quebajilax xew ri achijab, laj e wo'ob mil xecojow re Rire.

⁵ Chuca'm k'ij c'ut xquimol quib pa ri tinamit Jerusalem raj wach que raj judi'ab cuc' ri nimak winak re ri tinamit y raj c'utunel re ri tzijpixab. ⁶ C'o chiri' ri Anás ri cajawal raj chacunel pa Rocho Dios; yey e c'o ri Caifás, ri Juan, ri Alejandro y jujun chic c'o chux chique ri cajawal raj chacunel pa Rocho Dios.† ⁷ Xequiya c'u ri Pedro y ri Juan chiquinic'ajal y xquitz'onoj chique:

—¿China xya'w pik'ab o china pubi' xi'an ri'ix wa'? —xecha chique.

⁸ Ec'u ri Pedro, ruc' ruchuk'ab ri Santowilaj Ruxlabixel ri Dios, xubi'ij chique:

—Tape alak, alak aj wach re ri tinamit y alak nimak winak re Israel, ⁹ ma e wak'ij cata' kachi' puwi ri utz x'an che wa jun achi yewa' cha' queta'maxic su'anic xcunutajic. ¹⁰ Ec'u ri' wo'ora cakak'alajisaj chiwach onoje alak y chiquiwach conoje ri tinamit Israel: Wa' wa'chi c'o chiwach alak xcunutaj chupa rubi' ri Kanimajawal Jesucristo re Nazaret, ri xcamisaj alak chwa cruz yey ri Dios xuc'astajisaj lo chiquixo'l ri ecaminak.

¹¹ »E pacha' ri cubi'ij Ruch'a'tem ri Dios:

E rabaj c'akital can cuma raj yacal ja, e abaj wa' lic xajawaxic cha' catiqui' lo ri ja *Sal. 118:22*

cacha'.

* **4:2** Ri saduceos y jujun chique raj chacunel re ri Rocho Dios, na caquicoj taj we ri ticawex quec'astaj tanchi lo chiquixo'l ri ecaminak. † **4:6** Conoje wa' e cuq'uul ri uchapom wi rib ri k'atbal tzij. Quil nota Jn. 18:19 paquiwi ri Anás y ri Caifás.

Ralak e alak pacha' wa e aj yacal ja yey ri Jesús e ri Abaj. ¹² Xew c'u ruc' ri Jesús carikitaj colobetajic, ma na jinta chi juna bi'aj che ruwachulew ya'tal lo chique ri ticawex cha' ruma ri' cojcolobetajic —xcha'.

¹³ Ec'u raj wach re ri tinamit xquilo ri Pedro y ri Juan na caquixi'ij ta c'ana quib quetzijon puwi ri Utzilaj Tzij, tob wa' wa'chijab na e ta tijotal pacha' rique yey xa ne e cuq'uul rachi-jab e aj chac re ri tinamit. Lic xcam c'u canima' ri' chique yxquimaj usuc' e janipa tak ri caqui'ano y ri quima-jom ri Pedro y ri Juan, e ruma ri xec'oji' ruc' ri Jesús, ri quitijonel. ¹⁴ Yey na utz tane c'u ri' caquibi'ij na cunutajinak ta ri sic, ma wa' wa'chi tac'al chirí' chiquiwach cuc' ri Pedro y ri Juan.

¹⁵ Ec'u ri xqui'ano e xetakan che cha' ri Pedro y ri Juan quebel bi jok'otaj pa ri luwar re ri k'atbal tzij, y xew c'u xecanaj raj k'atal tzij cha' quech'a't chiquiwach. ¹⁶ Jec'uwa' xquibi'ij chiquiwach: «¿Sa' ri caka'an chique wa'chijab? Ma ri c'utubal re cunanic 'anatal cuma rique,✱ lic k'alajininak chiquiwach conoje ri ejekel Jerusalem yey lic na utz taj cakewaj. ¹⁷ Ri ka'ana' e kaxibij quipa cha' na quetzijon ta chi c'ana chwach junok chupa rubi' wa jun achi, y jela' na que'ec ta chi utzijoxic wa'» xecha'.

¹⁸ Xequisiq'uij c'u ri Pedro y ri Juan y lic xequitak che na quetzijon taj y na quec'utun ta chi ne c'ana pa rubi' ri Jesús.

¹⁹ Pero ri Pedro y ri Juan xquic'ul uwach:

—Ch'obo pe ralak: ¿Usuc' nawi chwach ri Dios e cakacoj tzij ralak chwa ri cakacoj utzij Rire? ²⁰ Ma ri'oj, na utz taj cakok'otaj ubi'xiquil janipa ri kilom y ri katom —xecha'.

²¹ Ec'u ri e aj wach lic xquixibij quipa. Tec'uchiri', xequiyolopij bi ma na xquirik taj su'anic quequiya pa c'axc'obic ruma caquixi'ij quib chiquiwach ri winak re ri tinamit. Ma conoje lic caquiyac uk'ij ri Dios

ruma ri xquilo. ²² Yey lic k'alaj e ruc' ruchuk'ab ri Dios x'ani' wi ri c'utubal re cunanic, ma wa'chi xcunutajic, ralaxibem sic yey ic'owinak chi pa cuarenta rujunab.

Ri quicojom rubi' ri Cristo caquitz'onoj quichuk'ab che ri Dios

²³ Echiri' xeyolopix bi, ri Pedro y ri Juan xebec cuc' ri cachbi'il y xquitzijoj chique janipa ri bi'tal bi chique cuma ri nimak e aj chacunel pa Rocho Dios y ri nimak winak re ri tinamit. ²⁴ Echiri' rique xquita wa', conoje xa jun quic'u'x xquijek caqui'an orar chwach ri Dios, jewa' caquibi'ij:

«¡Lal Dios Kajawxel, Lal 'anayom la ruwa caj, ruwachulew, ri mar y ronoje ri c'o che tak wa'! ²⁵ Yey ruma ri David ri aj chac la, jewa' xbi'ij la ojertan:

¿Su'chac lic quetucuc tak ri winak yey tak ri tinamit xew caquino'jij ri na jinta uchac?

²⁶ Ma xquimol quib ri takanelab y ri e aj wach che ruwachulew, xqui'an c'u xa jun che quib y xebec chirij ri Dios Kajawxel y chirij ri Cristo, Rucha'o'n lo Rire.

Sal. 2:1-2

²⁷ Wa' lic katzij, ma chupa wa tinamit oj c'o wi, ri Herodes ruc' ri Poncio Pilato xquimol quib cuc' ri winak e aj Israel y cuc' ri na e ta aj Israel; yey junam c'u xeyactaj chirij ri Jesús, ri Santowilaj Aj Chac la, ri Jun xcha' lo la. ²⁸ Jec'ula', e xqui'ano janipa ri ch'obom lo la ojertan cha' e cu'ana na ri'.

²⁹ »Ec'u wo'ora, Kakaw, quil la ri xibibal quipa raj chaquib la qui'anom; ya'a c'u la ri chuk'ab la chique rique cha' na caquixi'ij ta c'ana quib caquitzijoj ri Ch'a'tem la. ³⁰ Ya'a ri k'ab la paquiwi' cha' chupa rubi' ri Jesús, ri Santowilaj Aj Chac la, quecunutaj ri yewa'ib y ca'ani' tak c'utubal re ri chuk'ab la» xecha'.

³¹ Echiri' xquiq'uis u'anic orar, ri luwar pa quimolom wi quib xbar-batic y conoje xquic'ul ruchuk'ab

✱ 4:16 Hch. 3:1-10

ri Santowilaj Ruxlabixel ri Dios y jec'ula' na caquixi'ij ta c'ana quib caquitzijoj Ruch'a'tem ri Dios chiquiwach conoje ri winak.

Ri quicojom rubi' ri Cristo caquito' quib ruc' rubitak que

³² Conoje c'u ruq'uiyal hermanos, ri xquicoj rubi' ri Cristo, lic u'anom xa jun canima' y xa jun quina'oj; y na jinta junok chique cu'an re che ri c'o ruc', ma rubitak que xu'an re chinima ronoje. ³³ Jec'ula' ri', ri e tako'n re ri Cristo ruc' unimal quichuk'ab quetzijon chwi ruc'astajibal ri Kanimajawal Jesús, yey ri to'bal re ri Dios c'o paquiwi conoje rique.

³⁴ Na jinta c'u junok cutij niba'il chiquixo'l, ma janipa ri c'o tak culew o c'otak ja cuc', we c'o xquic'ayij, caquic'am lo ri rajil ³⁵ y caquiya c'u paquik'ab ri e tako'n re ri Jesús cha'rique caquijach chiquiwach ri hermanos e chirij tak ri cajawax wi chique chiquijunal.

³⁶ C'o c'u jun achi José rubi', yey ri e tako'n caquibi'ij Bernabé che. (Wa' wa bi'aj que'elawi “bochi'inel”).† Rire aj Chipre y e cuq'uul ri ralc'o'al can ri Leví. ³⁷ Wa' wa'chi xuc'ayij ch'akap rulew; tec'uchiri', xuc'am lo ri rajil y xuya paquik'ab ri e tako'n.

5

Ri Dios cuk'at tzij paquiwi ri Ananías y ri Safira

¹ C'o c'u jun achi Ananías rubi', junam ruc' ri rixokil Safira xquic'ayij ch'akap ulew. ² Ec'u rachi c'o xresaj can che ri rajil rulew, yey junam ruc' ri rixokil xqui'an tzij chiquiwach cha'caqui'an rak'ubal puwi ri rajil rulew. Ec'u ri nic'aj chic che ri rajil xuc'am bi, xu'ya'a paquik'ab ri e tako'n* y xubi'ij wa' e rajil rulew.

³ Ec'u ri Pedro xubi'ij che:

—Ananías, ¿su'chac xaya luwar che ri Satanás coc pa awanima' cha' jela' ca'an rak'ubal chwach ri Santowilaj

Ruxlabixel ri Dios? Ma xabi'ij xaya ronoje ri rajil rulew, pero c'o xawesaj can che. ⁴ Echiri' c'amaja' cac'ayij rawulew, ¿na awe'at ta neba la'? Y echiri' ac'ayim chic, ¿na pak'ab ta neba c'o wi ca'an ruc' ri rajil sa' ri cawaj? ¿Su'chac c'u ri' xa'an wa'? ¡Na chiquiwach ta c'u achijab a'anom wi rak'ubal ma e chwach ri Dios! —xcha'.

⁵ Xew c'u xuta wa' wa ch'a'tem, ri Ananías xtzak pulew y asu xcamic. Ruma c'u wa', xpe jun xi'in ib paquiwi conoje ri xebeta'man re. ⁶ Xec'un c'u lo jujun alabo, xquipis ru-cuerpo, xquic'am bi y xe'quimuku'.

⁷ Laj oxib ora ric'owic wa' echiri' xoc lo ri Safira ri rixokil ri Ananías; yey rire na reta'am ta c'u ri' sa' ri xuc'ulumaj ri rachijil.

⁸ Ec'uchiri', xutz'onoj ri Pedro che: —Chabi'ij chwe: ¿E rajil wa' rulew xic'ayij? —xcha che.

Rixok xuc'ul uwach che:

—Are', e rajil la' —xcha'.

⁹ Xubi'ij c'u ri Pedro che:

—¿Su'chac xi'an tzij chiwach cha' quic'am upa ri Ruxlabixel ri Dios Kajawxel? ¡Chawila! Ralabo catajin lo coquic che ruchi' ja, e la' xetzelej lo che umukic rawachijil, yey ec'u wo'ora e catquic'am bi ri'at —xcha'.

¹⁰ Na jampatana xtzak ri Safira chwach ri Pedro y asu xcamic. Ec'uchiri' xeboc lo ralabo, xo'lquirika' caminak chic. Xquic'am c'u bi y xe'quimuku putzal ri rachijil. ¹¹ Y xoc c'u jun unimal xi'in ib cuc' conoje ri tinamit re ri Cristo y cuc' conoje ri xebeta'man re tak wa'.

Quilitaj uq'uiyal milagros y c'utubal re ruchuk'ab ri Dios

¹² Cuma c'u ri e tako'n re ri Cristo, uq'uiyal c'utubal re ruchuk'ab ri Dios y nimak tak chac catajin rilic chiquiwach tak ri ticawex. Yey tak ri quicojom rubi' ri Cristo, lic xa jun quic'u'x caquimol quib pa ri luwar cabi'x che “Ruchi' Ja re Salomón”.†

† 4:36 “Bochi'inel”: Xcoj wa bi'aj che ri Bernabé, ma rire lic to'bel che unimarisaxic quic'u'x ri hermanos. * 5:2 Xuya'o re to'bal que ri niba'ib. Hch. 4:35 † 5:12 “Ruchi' Ja re Salomón”: Jun corredor uk'ab ri tapia re ri Rocho Dios.

¹³ E tak c'u ri c'amaja' caquicoj rubi' ri Cristo, caquixi'ij quib caquijuni-maj quib cuc', tob conoje ri ticawex lic caquiyac quik'ij. ¹⁴ Y catajin c'u quiq'uiyaric ri quicojom rubi' ri Kanimajawal, wa' e uq'uiyal achijab y uq'uiyal ixokib.

¹⁵ Ruma tak c'u ri c'utubal re ruchuk'ab ri Dios caqui'an rutako'n ri Jesús, tak ri winak quequesaj tak ne lo ri e yewa'ib pa tak ri be. Equiya'om chwa ch'at y chwa pop, cha' we xic'ow ri Pedro, tob xew lu'mu'j catzak paquiwi', quecunutaj c'u ri'. ¹⁶ E q'ui ne ri e petinak pa tak ri tinamit c'o lo chunakaj Jerusalem. Equic'amom lo ri yewa'ib y ri ech'u'jerinak cuma itzelilaj uxlabil; y conoje c'ut quecunutajic.

Rutako'n ri Cristo eternabem ruc' c'axc'obic

¹⁷ Ri cajawal raj chacunel pa Rocho Dios y conoje ri e c'o ruc', wa' e ri saduceos, xujek cati'tot quic'u'x chiquij rutako'n ri Jesús ruma lic e q'ui ri winak eteran chiquij. ¹⁸ Xequichap c'u bi rutako'n ri Jesús y xebe'quiya'a pa ri cárcel re ri tinamit.

¹⁹ Xopon c'u jun ángel re ri Kanimajawal chak'ab, xu'jaka tak ri oquibal re ri cárcel y xeberesaj lok. Ec'uchiri', xubi'ij chique: ²⁰ «Jix, jixe'tac'ala pa ri Rocho Dios y chitzijoj chique ri winak re ri tinamit ronoje puwi' ri c'ac' be re c'aslemal» xcha'. ²¹ Ruma c'u ri xquita che ri ángel, anim tan xeboc pa ri Rocho Dios y xquijek quec'utunic.

Ec'u ri cajawal raj chacunel pa Rocho Dios yey ri e c'o ruc', c'amaja' caquina'bej ri' we rutako'n ri Jesús ebesam chi lo pa ri cárcel. Xquimol c'u quichi' tak ri uchapom wi rib ri k'atbal tzij, cuc' conoje ri nimak winak que raj Israel. Xequitak c'u ri e chajinel re ri Rocho Dios che quic'amic rutako'n ri Jesús pa ri cárcel. ²² Ec'uchiri' xebopon ri e chajinel pa ri cárcel, na xequirik ta chi rutako'n ri Jesús. Xetzelej c'u lok ²³ y jewa' xo'lquibi'ij: «Ri cárcel xkariko lic tz'apil chi utz, yey raj chajinel e c'o ne chwach tak ri oquibal re ri

cárcel. Pero echiri' xkajako, na jinta chi junok chique rutako'n ri Jesús chupa» xecha'.

²⁴ Echiri' xquita wa', xsach quina'oj ri cajawal raj chacunel y raj wach que ri e chajinel cuc' ri nimak e aj chacunel re ri Rocho Dios. Conoje xquijek quech'a't puwi', ma na queta'am taj sa' cuq'uisbej wi ronoje wa'.

²⁵ Ec'uchiri', xc'un lo jun y jewa' xubi'ij: «E rachijab xeya' alak pa cárcel, e c'o pa ri Rocho Dios y na cok'otam ta quec'utun chiquiwach ri tinamit» xcha'.

²⁶ Ec'u raj wach que ri e chajinel re ri Rocho Dios xe'ec junam cuc' jujun e aj chajinel y xe'quic'ama lo rutako'n ri Jesús. Yey na jinta c'o xqui'an chique ma caquixi'ij quib we caqui'an c'ax chique, laj que'an pa'bj cuma ri tinamit. ²⁷ Ec'uchiri' xequic'am lok, xequiya chiquiwach ri uchapom wi rib ri k'atbal tzij. Ec'u ri cajawal raj chacunel pa Rocho Dios xutz'onoj chique rutako'n ri Jesús:

²⁸ —¿Na xixkatak ta neba che cha' na quixc'utun ta chi chupa rubi' wa jun achi? Yey wo'ora iwuma ne ri'ix xe'ec utzijoxic wa c'utunic che ronoje Jerusalem; y na xew ta la', ma quiwaj ne quiya keklabal che ruquiq'uel la' la jun achi —xecha'.

²⁹ Ri Pedro cuc' ri jujun chic e tako'n re ri Jesús xquic'ul uwach:

—Lic chirajawaxic wi nabe na e cakacoj utzij ri Dios chwach ri caka-coj quitzij rachijab. ³⁰ Ma ri Dios que ri kati'-kamam e xc'astajisan lo ri Jesús chiquixo'l ri ecaminak. Yey e ralak ri xcamisan alak ma uma ralak xya'i' ri Jesús chwa ri cruz. ³¹ Pero ri Dios lic xuyac uk'ij ri Jesús, xuya puwiquik'ab y xu'an Kajawal y Colobenel che; cha' ruma ri Jesús, raj Israel caquitzelej quitzij chwach y caquirik na ri cuybal quimac.

³² »Ec'u ri'oj, e janipa ri xkilo, e cakatzijoj. Yey ri Santowilaj Ruxlabixel ri Dios, ri Jun ya'tal chique ri caquicoj utzij ri Dios, e cajiquiban uwach wa' —xecha'.

³³ Echiri' xquita wa' ri e aj wach, lic xpe coyowal chiquij rutako'n ri Jesús y xcaj quequicamisaj.

³⁴ Ec'uchiri', chiquixo'l ri e aj k'atal tzij xyactaj jun fariseo Gamaliel rubi', aj c'utunel re ri tzijpixab yey lic yacom uk'ij ruma ri tinamit. Rire xtakan che quebesax bi jok'otaj ri e tako'n re ri Jesús. ³⁵ Tec'uchiri', xubi'ij:

«Achijab, alak aj Israel, ch'obo na alak rakan chi utz sa' ri ca'an alak chique wa'chijab. ³⁶ Ma c'o tan k'ij xyactaj jun achi Teudas rubi', yey chiribil rib xubi'ij e jun achi lic c'o uwach. Laj e cajib ciento rachijab xeterej chirij. Pero xopon jun k'ij rire xcamisaxic. Y conoje ri xesocotaj ruma rire, xequicher bi; jec'ula', xsach uwach janipa ri xuno'jij.

³⁷ »Chwi c'u ri' wa', xyactaj jun chic chupa tak ri k'ij echiri' x'an jun ajilanic. Wa' e ri Judas aj Galilea. Yey uq'uiyal ticawex xeterej chirij. Pero xopon ruk'ijol echiri' xcamisaxic; y conoje c'u ri xesocotaj ruma rire, xequicher bi.

³⁸ »Cambij c'u wo'ora che alak: Mech'ich'a' chi alak wa'chijab; ri'ana alak e cheyolopij bi alak. Ma we xa quino'jibal achijab wa caquic'utu, ri' casach na uwach. ³⁹ No'j we wa' re ri Dios, na cach'ij ta alak usachic quiwach; y c'ate c'u cana' alak ri' cach'o'jin alak ruc' ri Dios» xcha'.

⁴⁰ Conoje xuc'ul quic'u'x ri xubi'ij ri Gamaliel. Xequisiq'uij c'u ri e tako'n re ri Jesús; tec'uchiri', xjich' quipa ruc' colob y xequitak che na quetzijon ta chi chupa rubi' ri Jesús y xequiyolopij c'u bi.

⁴¹ Xebel c'u bi ri e tako'n chiquiwach raj k'atal tzij. Lic quequic'otoc ma xya'taj chique caquitij c'ax ruma quicojom rubi' ri Jesús. ⁴² Jec'ula', ronoje k'ij na cacok'otaj taj quec'utunic y caquitzijo'j ri Utzilaj

Tzij chwi ri Jesucristo chupa ri Rocho Dios y chi' tak ja.

6

Quecha' wukub aj chac re ri Dios

¹ Chupa tak la' la k'ij lic xeq'uiyar ri cajlibal ri quicojom rubi' ri Cristo. Ec'u ri hermanos e aj judi'ab ri quech'a't pa ri ch'a'tem griego, xquijek quech'a'tiben chiquij ri hermanos e aj judi'ab ri quech'a't pa ri ch'a'tem hebreo.* Ma echiri' ca'an ri jachanic chique ri e niba'ib, ri malca'nib ri quech'a't pa ri ch'a'tem griego na quecajmax ta chi utz ruc' ri to'bal que caquic'ul ri jujun k'ij.

² Ec'u ri cablajuj tako'n xquimol quichi' conoje ri quicojom rubi' ri Cristo y xquibi'ij chique: «Na usuc' taj we ri'oj cakanaba' utzijoxic Rutzij Upixab ri Dios cha' cakaya kib che ujachic ri cajawax chique ri e niba'ib.

³ Ruma c'u la' hermanos, tzucuj alak wukub achijab chixo'l alak, chom ri quibinic quisilabic, lic quiya'om quib puk'ab ri Ruxlabixel ri Dios y lic c'o quina'oj, cha' cakaya wa chac paquik'ab. ⁴ Jec'ula' ri'oj xew cakaya kib che caka'an orar chwach ri Dios y che rutzijoxic Ruch'a'tem» xecha'.

⁵ Conoje c'u ri hermanos quimolom quib, xuc'ul quic'u'x wa xbi'x chique. Xquicha' c'u ri Esteban, jun achi lic cubul uc'u'x ruc' ri Dios yey lic c'o ri Santowilaj Ruxlabixel ri Dios ruc'. Y xequicha' ri Felipe, ri Prócoro, ri Nicanor, ri Timón, ri Parmenas y ri Nicolás, jun achi aj Antioquía xex utakem lo ri c'utunic que raj judi'ab. ⁶ Ewi xequic'am lo chiquiwach rutako'n ri Jesús. Ec'u wa tako'n xquiya ri quik'ab paquiwi' y xqui'an orar cuc'.

⁷ Jec'uri'la' ri Utzilaj Tzij re ri Kanimajawal lic xe'ec utzijoxic y lic catajin quiq'uiyaric ri cajlibal ri quicojom rubi' ri Cristo chiri' Jerusalem. E c'o

* **6:1** Pa riglesia re Jerusalem e c'o hermanos e aj judi'ab quech'a't pa hebreo y quitakem ri cojobal que can ri cati'-quimam. Yey e c'o hermanos e aj judi'ab, tob na caquirik ta hebreo ma ri quich'a'tem e griego; pero quitakem jujun che tak ri cojobal que raj griego.

ne uq'uiyal e aj chacunel pa Rocho Dios xquijek caquitakej ri Utzilaj Tziz.

Ri Esteban cac'am bi pa k'atbal tziz

⁸ Ri Esteban lic c'o ri unimal rutzil uc'u'x y ruchuk'ab ri Dios ruc'. Ruma c'u ri', cu'an nimak tak c'utubal re ruchuk'ab ri Dios chiquiwach ri winak.

⁹ Ec'uchiri', xeyactaj jujun re ri sinagoga, ri cabi'x che “Ri sinagoga que ri ebelinak lo pa ri c'ax”,† yey cuc'rique xeyactaj jujun e aj Cirene, e aj Alejandría, e aj Chipre y e aj Asia. E tak c'u ri' wa' xquijeko xa pa ch'a'tem quech'o'jin ruc' ri Esteban. ¹⁰ Yey na caquirik ta uc'ulic uwach ri cubi'ij ri Esteban ma rire cach'a't ruc' ri na'oj uya'om ri Ruxlabixel ri Dios che. ¹¹ Ec'u ri xqui'ano e xequipuakij jujun achijab cha' caquibi'ij quitom tzel cach'a't ri Esteban chirij ri Moisés y chirij ri Dios.

¹² Xa jec'ula' xequich'i' wi tak ri winak re ri tinamit, ri nimak winak e aj wach y raj c'utunel re ri tzi-jpixab. Conoje c'u ri' wa' xebec chirij ri Esteban; ruc' oyowal xquichapo, xquic'am bi y xe'quiya'a chiquiwach tak ri uchapom wi rib ri k'atbal tziz.

¹³ Xequicoj c'u achijab e aj cojol rak'ubal chirij, jewa' caquibi'ij: «Wa' wa'chi lic xaki tzel cach'a't chirij wa Santowilaj Luwar re ri Rocho Dios y chirij Rutziz Upixab ri Dios. ¹⁴ Ma katom cubi'ij, la' la Jesús ri aj Nazaret cuwulij wa luwar y cujalc'atij janipa ri c'utunic y cojobal ya'tal can chike ruma ri Moisés» xecha'.

¹⁵ Conoje c'u ri etz'ul pa ri k'atbal tziz, echiri' xquitzu' uwach ri Esteban, xquil rupalaj e pacha' upalaj juna ángel.

7

Ri e aj wach re ri tinamit caquita uchi' ri Esteban

¹ Ri cajawal raj chacunel pa Rocho Dios xutz'onoj che ri Esteban we katziz xubi'ij wa'.

² Ec'u rire xubi'ij:

«Alak achijab y alak nimak winak, chinta na pe alak. Ri Dios, ri Jun lic c'o unimal chomalil ruc', xuk'alajisaj rib chwach ri kakaw Abraham echiri' rire c'o pa ri luwar re Mesopotamia, wa' e echiri' c'amaja' que'jekela pa ri tinamit Harán. ³ Xubi'ij ri Dios che: “Chatelubi chupa ratinamit y chiquixo'l rawatz-achak'; y jat c'u chwach rulew pa canc'ut wi ri'in chawe”✧ xcha'. ⁴ Ec'uchiri', xel bi ri Abraham chwach rulew que raj Caldea y xjeki' pa ri tinamit Harán. Chwi c'u rucamic rukaw, xtak lo ruma ri Dios chupa wa luwar pa jekel wi alak wo'ora.

⁵ »Pero ri Dios na xuya tane che ri Abraham cu'an rajaw wa' wu'lew, tob tane xa pa cuya wi juna rakan. No'j xubi'tisij c'u che tob ne rire caminak chic, wa' wu'lew cu'ana na re y que ri ralc'o'al canok; yey echiri' xbi'x wa' che ri Abraham, c'amaja' ne c'o juna ralc'o'al.✧

⁶ Ec'u ri Dios xubi'ij che ri Abraham:

Tak rawalc'o'al canok quebe'jekela na pa jun ulew na culew taj.

Y chirij c'u ri ca'ani' niba'ib chique y queya'i' pa c'axlaj chac

cajib ciento junab cuma ri ticawex re ri tinamit pa quec'o'ji' wi.

⁷ Pero In quink'ataw tziz paquiwi wa tinamit, ri caquiya pa c'axlaj chac ri nutinamit.

Tec'uchiri', ri nutinamit quebel lok y quetzelej lok *Gn. 15:13-14*

y quinquilok'nimaj chupa wa luwar at c'o wi *Éx. 3:12*

xcha'.

⁸ »Ri Dios xu'an jun tziz ruc' ri Abraham, yey ri c'utubal re wa' wa tziz e ri retalil re circuncisión. E uwari'che ri Abraham xuc'oj ri retalil re circuncisión che ruc'ajol Isaac echiri' xuq'uis wajxakib k'ij ralaxic.✧ Jec'ula' xu'an ri Isaac che ruc'ajol Jacob. Y ri Jacob jela' xu'an chique

† 6:9 Ri quebopon pa wa jun sinagoga e tak raj judi'ab ebelinak lo paquik'ab ri cajaw y wo'ora quechacun pa que rique. ✧ 7:3 Gn. 12:1 ✧ 7:5 Gn. 17:8 ✧ 7:8 Gn. 21:3-4 * 7:8 Pa ri ch'a'tem hebreo cubi'ij “patriarcas”.

ri cablajuj uc'ajol, ri e kamam re ri katinamit.*

⁹ »Ec'u rique xoc retzelal c'u'x pa canima' chirij ri quichak' José. Ruma c'u ri', xquic'ayij bi cha' cac'am bi Egipto.† Pero ri Dios c'o ruc' ri José*
¹⁰ y xresaj c'u chupa ronoje tak ri c'axc'obic xic'ow wi. Xuya una'oj y xu'an che lic xuc'ul upuwach ri faraón, ri takanel re Egipto. Ma ri faraón xuya che ri José catakan puwi ri tinamit re Egipto y xuya puk'ab rire ronoje rubitak re.*

¹¹ »Xpe c'u jun unimal numic chupa tak ronoje ri luwar re Egipto y re Canaán. Ruma c'u wa' xpe unimal c'axc'obic paquiwi ri kati'-kamam ma na jinta caquitijo.*

¹² »Echiri' ri Jacob xuna'bej chila' Egipto c'o catijic, xebutak bi ruc'ajol cha' que'quilok'o trigo chila'. Wa' e ri nabe benam xqui'an ri kamam chila' Egipto.*
¹³ Ec'u che rucalaj quibenam, ri José xuk'alajisaj rib chiquiwach ri ratzixelab. Jec'ula' ri faraón xreta'maj china tak ri e ratz-uchak' ri José.*

¹⁴ »Yey ri José xutak uc'amic rukaw Jacob y conoje ri e ratz-uchak'.* Ri cajlibal rique chi conoje e setenta y cinco. ¹⁵ Jec'ula' xe'jekela ri Jacob pa ri tinamit Egipto. Chila' c'u ri' xcam wi rire y chila' xecam wi ri kamam.*
¹⁶ Xc'am c'u bi ri quibakil pa ri tinamit Siquem y xeya' pa ri mukubal ulok'om can ri Abraham ruc' uq'uiyal puak chique ri ralc'o'al can ri Hamor, chila' Siquem.*

¹⁷ »Yey ec'uchiri' catajin roponic ri k'ij echiri' ri Dios cu'ana na rubi'tisim che ri Abraham, tak ri ralc'o'al rire lic xeq'uiyar chila' Egipto. ¹⁸ Tec'uchiri', xyactaj jun chic rey chiri' Egipto; ec'u rire na xreta'maj ta uwach ri José.‡
¹⁹ Wa' wa rey xebusoc ri katinamit

ojertan. Lic xebuya ri kati'-kamam pa c'axc'obic, ma xtakan che que-camisax ri quich'uti'k e alabo cha' jela' na caq'uiyar ta quiwach ri katinamit.*

²⁰ »Chupa tak c'u ri' la' la k'ij xalax ri Moisés y e jun chomilaj ac'a chwach ri Dios. Ec'u rire oxib ic' xchajix xa xe'lak'ay pa rocho rukaw. ²¹ Pero echiri' na utz ta chi quewax pa ja, xesax bi\$ y xe'rikita' lo ruma rumi'al ri faraón; y wa'li xuq'uiyisaj y xu'an pacha' ralab che. ²² Jec'ula', ri Moisés xtijox puwi ronoje ri na'oj que ri aj Egipto, y xu'ana jun achi lic c'o uchuk'ab che janipa tak ri cubi'ij y cu'ano.

²³ »Echiri' xuq'uis cuarenta junab, xalax pa ranima' que'bina cuc' ri ratz-uchak', ri e aj Israel.*
²⁴ Y xril c'u ri' lic ca'an c'ax che jun chique ruma jun aj Egipto. Xuto' c'u uwi' ri ratz-uchak' yey xucamisaj ri aj Egipto. ²⁵ E xuch'ob rire, tak ri ratz-uchak' caquimaj usuc' e ruma rire quebersaj bi ri Dios paquik'ab raj Egipto; no'j rique na je ta la' ri xquimaj usuc'.

²⁶ »Chuca'm k'ij c'ut xebu'rika ca'ib aj Israel quech'o'jin chiquiwach y xraj quebuya putzil chomal. Xubi'ij c'u chique: “Achijab, ralak chak' ib alak. ¿Su'chac c'u ri' ca'an c'ax che ib alak chiwach alak?” xcha'.

²⁷ »Ec'uchiri', ri jun ri cu'an c'ax che ri ratz-uchak', xupakchi'ij bi ri Moisés y xubi'ij che: “¿China cojoyom e la re takanel y re aj k'atal tzij pakawi ri'oj? ²⁸ ¿Ca'aj cami la ri' quin-camisaj la ri'in jela' pacha' x'an la iwir echiri' xcamisaj la ri aj Egipto?”* xcha'.

²⁹ »Echiri' xuta wa' wa ch'a'tem, ri Moisés asu xanimaj bi, xe'jekela pa ri luwar re Madián, tob rire na aj ta chila'. Yey chila' xebalax ca'ib uc'ajol.*

† **7:9** Ri xebanaw re wa' e ri lajuj e ratzixelab ri José. Gn. 37:11,28 * **7:9** Gn. 39:2-3,21 * **7:10** Gn. 41:37-41 * **7:11** Gn. 41:54-57 * **7:12** Gn. 42:1-3 * **7:13** Gn. 45:1-16 * **7:14** Gn. 45:9-47:12 * **7:15** Gn. 49:33 * **7:16** Gn. 23:16-18; 50:13; Jos. 24:32 ‡ **7:18** Ri José caminak chic, yey wa jun chic takanel na xreta'maj ta ri to'bal xuya ri José che ri tinamit re Egipto. Éx. 1:7-9 * **7:19** Éx. 1:10-11, 22 § **7:21** Ri ralco ac'a Moisés xya' bi chupa jun chacach puwi ya'. Éx. 2:1-10 * **7:23** Éx. 2:11-12 * **7:28** Éx. 2:11-15 * **7:29** Éx. 18:3-4

³⁰ »Ic'owinak chi c'u cuarenta junab c'o chila' echiri' xwinakir jun ángel chwach chupa rurepebal ak' c'o che jumocaj xuluquej pa ri luwar catz'intz'otic, chunakaj ri juyub Sinaí. ³¹ Echiri' xril wa' ri Moisés, lic xcam ranima' che ri catajin uc'utic chwach. Yey echiri' xkib che rilic chi utz, xuta rukul ri Dios, jewa' xubi'ij che: ³² «In ri Dios que ramam ojertan, wa' e ri Abraham, ri Isaac y ri Jacob» xcha'.

»Ec'u ri Moisés xujek cabirbotic y ruma xi'in ib na xutzu' ta chi ri jumocaj xuluquej.

³³ »Ec'u ri Dios xubi'ij che: «Chajolo raxajab che rawakan ma wa luwar pa at c'o wi lic santo. ³⁴ Pakatzij wi ri'in wilom lic eya'tal pa c'axc'obic ri nutinamit e c'o Egipto, yey nutom lic quetunanic. E uwari'che in petinak re quebe'nuwesaj lok. Ec'u wo'ora chatpetok; ma catintak bi Egipto»[☆] xcha'.

³⁵ »Ec'u Moisés ri' wa', ri xc'ak bi uk'ij echiri' xbi'x che: «¿China cojoyom e la re takanel y re aj k'atal tzij pakawi ri'oj?»[☆] Na ruc' ta c'u ri', e ri Moisés ri xtak bi ruma ri Dios re cu'ana quitakanel rutinamit y re queberesaj ri tinamit paquik'ab raj Egipto. Xtak c'u che cu'an wa' ruma ri ángel, ri xwinakir chwach pa ri jumocaj xuluquej. ³⁶ E Moisés ri' wa', ri xeberesaj lo rutinamit ri Dios Egipto y lic xu'an milagros y tak c'utubal re ruchuk'ab ri Dios pa ri tinamit Egipto, chupa ri Mar Rojo y chupa ri cuarenta junab xebin pa ri luwar catz'intz'otic.[☆]

³⁷ »Ec'u Moisés ri' wa', ri xbi'n chique raj Israel:

E ri Dios Kajawxel cuyac na lo chiquixo'l ri katinamit Israel jun K'alajisanel jela' pacha' ri'in.

Ec'u chita janipa ri cubi'ij Rire chiwe
Dt. 18:15
xcha'.

³⁸ »E Moisés ri' wa', ri xc'oji' chiquiwach ri tinamit echiri' quimolom

quib pa ri luwar catz'intz'otic, y e xesan uchi' ri ángel chiquiwa ri kati-kamam echiri' xch'a't ruc' chwi ri juyub Sinaí. Yey e rire ri xc'uluw tak ri ch'a'tem re c'aslemal cha' cuk'atisaj lo chikawach ri'oj.

³⁹ »Pero ri kati-kamam na xcaj taj caquicoj utzij; ri xqui'ano e xquic'ak bi uk'ij y e xch'aw quic'u'x che ri quetzelej tanchi Egipto. ⁴⁰ Yey xquibi'ij ne che ri Aarón: «Che'ana la katiox cha' quenabej bi chikawach; ma wa Moisés, ri xesan lo ke'oj chwach rulew re Egipto, na keta'am taj sa' ri xuc'ulumaj.»[☆] ⁴¹ Ec'uchiri', xqui'an jun tiox uc'axwach toro. Xequicamisaj c'u awaj re quikasa'n chwach wa tiox y xqui'an nimak'ij chupa rubi' ri tiox, ri xa xqui'an ruc' ri quik'ab.[☆]

⁴² »Ec'u ri Dios xebuya can che ulok'nimaxic quik'ij ronoje ri c'o che ruwa caj. Xqui'an c'ut jela' pacha' ri ubi'im ri Dios chupa ri tz'ibital can cuma ri k'alajisanelab:

Ri'ix ix aj Israel, echiri' xebicamisaj chicop re kasa'n chupa ri cuarenta junab xixbin pa ri luwar catz'intz'otic, ¿xilok'nimaj neba nuk'ij ri'in ruc' wa'?

⁴³ Na xi'an taj, ma e ne xitelej ri rocho ri tiox Moloc ubi' y ri ch'umil re ri tiox iwe'ix, Renfán ubi'. Wa' e quic'axwach tak ri tiox xebi'ano re quilok'nimaj quik'ij.

Ruma c'u la' quixintak bi c'a chwach pana ri tinamit Babilonia *Am. 5:25-27*

cacha'.

⁴⁴ »Echiri' ri kati-kamam xebin pa ri luwar catz'intz'otic, c'o cuc' rique ri jun Rocho Dios xa caquiric, wa' e c'utubal re c'o ri Dios cuc'. Yey rique xqui'an wa jun Rocho Dios jela' pacha' ri xtakan ri Dios che ri Moisés, e lic pacha' ru'aniquil rilom chi rire.** ⁴⁵ Ec'u ri kati-kamam xquiya can wa Rocho Dios (ri xa

[☆] 7:34 Éx. 3:1-10 [☆] 7:35 Éx. 2:14 [☆] 7:36 Éx. 7:3; 14:21; Nm. 14:33 [☆] 7:40 Éx. 32:1, 23 [☆] 7:41

Éx. 32:4-6 ** 7:44 Chwi ri juyub Sinaí, ri Dios xuc'ut che ri Moisés su'anic ca'an ri Rocho Dios xa caquiric. Éx. 25:9,40.

caquiric) paquik'ab ri calc'o'al rique. Y wa calc'o'al xquic'am bi wa' echiri' xeboc ruc' ri Josué chupa ri ulew que ri na e ta aj Israel, ri xebesax bi ruma ri Dios cha' wa' wu'lew cacanañ can paquik'ab rutinamit Rire. Ec'u wa' wa Rocho Dios xc'o'ji' cuc' rutinamit ri Dios c'a chupa tak ri k'ij re ri rey David.

⁴⁶ »Ec'u ri David lic c'o ruto'bal ri Dios ruc'. Rire xutz'onoj c'ut caya'taj che cuyac jun c'ac' Rocho ri Dios cha' tak ri ralc'o'al can ri Jacob caquilok'nimaj uk'ij ri Dios chiri'.

⁴⁷ No'j e ri Salomón ri xyacaw wa' wa Rocho Dios; ⁴⁸ tob ri Dios Kajawxel na xew ta cajeki' pa tak ja 'anatal xa cuma ticawex, pacha' ri cubi'ij ri jun k'alajisanel:

⁴⁹ «Ruwa caj e nutz'ulibal re takanic, yey ruwachulew e utac'alibal ri wakan.

¿Sa' c'u ri' ri ja quiyac chwe?» cacha ri Kajawal.

«¿O pachawi c'owi ri luwar pa quin-uxlan wi?

⁵⁰ ¿Na e ta neba ri nuk'ab 'anayom ronoje wa' wa c'olic?» *Is. 66:1-2*

cacha'.

⁵¹ »Ec'u ralak lic na jinta c'o cata alak. Ri c'u'x alak y ri tanibal alak e pacha' que ri winak na jinta ri Dios cuc', ma na ca'aj ta alak cacoj alak utzij. Ralak alak pacha' ri chu'kaw alak ojertan, ma lic na ca'aj ta alak cata alak ri cubi'ij ri Santowilaj Ruxlabixel ri Dios che alak. ⁵² ¿China junok chique ri k'alajisanelab na xternabex ta ruc' c'ax cuma ri chu'kaw alak ojertan? Ma rique e xecamisan que ri xetzijon lo puwi ruc'utunic ri Jun lic jusuc'. Yey echiri' xc'un Rire, ralak xc'ayij alak y xcamisaj alak. ⁵³ Ralak xc'ul alak Rutzij Upixab ri Dios cuma tak ri ángeles, no'j na xtakej ta alak janipa ri cubi'ij wa Tzij Pixab» xcha ri Esteban.

Rucamic ri Esteban

⁵⁴ Echiri' xquita ri xubi'ij ri Esteban, lic xpe coyowal y xquijek cakich'ich' ruwi que' chirij rire.

⁵⁵ Pero ri Esteban lic c'o ruchuk'ab ri Santowilaj Ruxlabixel ri Dios ruc'; xtzu'n c'u pana chicaj y xril runimal uchomalil ri Dios yey xrilo ri Jesús c'o puwiquik'ab ri Dios. ⁵⁶ Xubi'ij c'u rire: «¡Ri'in canwilo jakal ruwa caj y canwil pana Ralaxel Chiquixo'l Ticawex c'o puwiquik'ab ri Dios!» xcha'.

⁵⁷ Ec'uchiri', ri winak xquijeko lic quesiq'uinic, xquitz'apij ri quixiquin y xa jumul xebec conoje chirij ri Esteban. ⁵⁸ Xquesaj c'u bi chupa ri tinamit y xquijeko caqui'an pa'baj. Y ri xquimol quib chirij, xquiya can ri quik'u' che jun ala Saulo rubi' cha' cuchajij wa' chique.

⁵⁹ Ec'uchiri' quetajin che u'anic pa'baj ri Esteban, rire xuch'a'bej ri Kanimajawal, jewa' xubi'ij: «Wajawal Jesús, c'ama la ri wanima» xcha'.

⁶⁰ Tec'uchiri', xuxucuba' rib y co xsiq'uinic: «Kajawal, cuyu la quimac che wa quetajin che u'anic» xcha'. Y ruc' wa', xcamic.

8

¹ Ri Saulo e jun chique ri xuya uch'a'tem cha' cacamisax ri Esteban.

Ri Saulo quebuternabej ruc' c'ax ri quicojom rubi' ri Cristo

Chupa c'u ri' la' la jun k'ij, lic xjeker quaternabexic ruc' c'ax janipa ri quicojom rubi' ri Cristo chila' Jerusalem. Ruma c'u ri', conoje xequich bi chupa tak ri luwar re Judea y re Samaria. Xew chi rutako'n ri Jesús xecanañ can Jerusalem.

² E c'o c'u jujun achijab lic quiya'om quib puk'ab ri Dios; rique xquimuk ri Esteban y lic xcok'eñ rucamic.

³ No'j ri Saulo ebuternabem ruc' c'ax ri quicojom rubi' ri Cristo. Xoc c'u chi' tak ja re quebu'charej lo rachijab y rixokib yey quebu'ya'a pa cárcel.

Catzijox ri Utzilaj Tzij chupa tak ri tinamit re Samaria

⁴ E tak c'u ri equichom bi caquitzijoj ri Utzilaj Tzij chupa ronoje luwar pa queboñ wi. ⁵ Ri Felipe e jun chique. Rire xopon chupa jun

tinamit re Samaria y xujek catzijon puwi ri Cristo chiquiwach ri winak. ⁶ Wa' wa winak xa jun qui'anom che utayic janipa ri cuc'ut ri Felipe, yey caquitzutza' tak ri c'utubal re ruchuk'ab ri Dios cu'an chiquiwach. ⁷ Ma lic e q'ui ri e c'o paquik'ab itzelilaj uxlabixel, yey wa' wa itzelilaj uxlabixel quesiq'uinic quebel bi chique ri winak. Y e c'o uq'uiyal jetz' y sic xecunutajic. ⁸ Ruma c'u ri' wa', tak ri winak re ri tinamit lic quequi'cotic.

Jun achi cubi'tisij puak cha' cac'o'ji' ruchuk'ab ri Dios ruc'

⁹ C'o c'u jun achi aj chiri' Simón rubi'. E ri petinak lok rire aj k'ij chupa la tinamit; lic quebusoc ri winak e aj Samaria ma cu'an che rib pacha' lic c'o uwach. ¹⁰ Conoje c'u ri winak chinima'k chich'uti'k, lic caquita ri cubi'ij ri Simón y jewa' caquibi'ij: «E unimal uchuk'ab ri Dios ri c'o ruc' wa'chi» quecha'. ¹¹ Lic caquicoj ri cubi'ij, ma lic xex wi ebusocom ruc' ri k'ijonic cu'ano. ¹² Pero echiri' xquita ri Utzilaj Tzij cutzijoj ri Felipe chwi rutakanic ri Dios y chwi ri Kanimajawal Jesucristo, xquicojo y jec'uri'la' achijab yey ixokib xquic'ul ri bautismo.

¹³ Ec'u ri' wa'chi Simón xucoj rubi' ri Cristo y xuc'ul ne ri bautismo. Xujek c'u ri' carachbilaj ri Felipe y lic cacam ranima' che tak ri c'utubal re ruchuk'ab ri Dios carilo cu'an ri Felipe.

¹⁴ Yey ri e tako'n re ri Cristo e c'o Jerusalem, echiri' xquito ri e aj Samaria xquicoj ri ubi'im lo ri Dios puwi ri Cristo, xequitak bi ri Pedro y ri Juan chila' Samaria. ¹⁵ Ec'uchiri' rique xeboponic, xquijek caqui'an orar paquiwi ri aj Samaria ri quic'ojom chi rubi' ri Cristo cha' rique caquic'ul ri Santowilaj Ruxlabixel ri Dios. ¹⁶ Ma ri Ruxlabixel ri Dios c'amaja' cakaj puwi junok chique, xew quic'ulum ri bautismo pa rubi'

ri Kanimajawal Jesucristo. ¹⁷ Yey echiri' ri Pedro y ri Juan xquiya ri quik'ab paquiwi', xquic'ul ri Santowilaj Ruxlabixel ri Dios.

¹⁸ Ec'u ri Simón xrilo su'anic ri ticawex caquic'ul ri Ruxlabixel ri Dios echiri' ri tako'n caquiya ri quik'ab paquiwi'. Xubi'tisij c'u puak chique, ¹⁹ jewa' xubi'ij:

—Ya'a alak chwe ri'in la' la jun chuk'ab, cha' jela' xa tob china puwi' canya wi ri nuk'ab, cuc'ul ri Santowilaj Ruxlabixel ri Dios —xcha'.

²⁰ Ec'uchiri', ri Pedro jewa' xubi'ij che:

—Sach na uwach rapuak junam awuc' ri'at, ma e chawach ri'at, xa ruc' puak calok' rusipanic ri Dios.*

²¹ Yey ri'at na jinta c'ana awe che wa chac caka'ano ma rawanima' na jusuc' ta chwach ri Dios. ²² E uwari'che, chatzelej atzij chwach ri Dios che wa' wa amac y chatz'onoj che Rire cucuy amac. Laj cucuy amac che la na utz taj xach'obo. ²³ Ma e canwil ri'in, lic u'anom c'ax ac'u'x chikij y lic at yutum ruma ri mac — xcha ri Pedro che.

²⁴ Ri Simón xuc'ul uwach:

—Lic ch'aw co alak panuwi' chwach ri Kanimajawal cha' na canc'ulumaj ta c'ana wa xbi'ij alak chwe —xcha'.

²⁵ Ec'uchiri' ri Pedro y ri Juan quitzijom chi tak ri xquilo y xquita che ri Jesús y quik'alajisam chi ri Utzilaj Tzij re ri Kanimajawal, xetzelej Jerusalem. Yey xalok' c'u xebic'ow chupa tak uq'uiyal aldeas que raj Samaria, xquitzijoj ri Utzilaj Tzij.

Ri Felipe y rachi aj Etiopía

²⁶ C'o jun ángel re ri Kanimajawal xch'a't ruc' ri Felipe, jewa' xubi'ij che: «Chayijba' awib y jat jewa' pa sur. Chamaja bi ri be quel Jerusalem, ri cakaj pa ri tinamit Gaza» xcha'. (Wa be quic'ow pa tak luwar catz'intz'otic.)

²⁷ Xyactaj c'u ri Felipe y xumaj bi ube yey pa ri be xu'rika bi jun achi

* **8:20** “Rusipanic ri Dios”: Ri Simón xraj culok' ruchuk'ab ri Dios cha' ruma rire cakaj ri Ruxlabixel ri Dios paquiwi ri winak. Na xumaj ta usuc' xew puk'ab ri Dios c'o wi cuya ri Ruxlabixel.

“eunuco”. Wa' wa'chi lic c'o uwach ma puk'ab rire c'o wi ronoje rubeyomal ri Candace.† Ec'u wa'chi xopon Jerusalem cha' culok'nimaj uk'ij ri Dios,²⁸ yey e ri' catzelej pa rutinamit. Tz'ul c'u chupa jun careta y carajilaj Ruch'a'tem ri Dios tz'ibital can ruma ri k'alajisanel Isaías.

²⁹ Ec'u ri Ruxlabixel ri Dios xubi'ij che ri Felipe: «Chatkib pana che la jun careta y chatbin putzal» xcha'.

³⁰ Echiri' ri Felipe xkib apanok, xuto rachi e carajilaj ri tz'ibam can ruma ri k'alajisanel Isaías y jec'uwa' xutz'onoj che:

—¿Camaj la usuc' la catajin la che rajilaxic? —xcha che.

³¹ Rachi xuc'ul uwach:

—¿Su'anic canmaj usuc' we na jinta junok cak'alajisan chwe? —xcha che. Y xelaj c'u che ri Felipe cha' cak'an pa ri careta y catz'uyi' ruc'.

³² Ec'u ri carajilaj che Ruch'a'tem ri Dios e wa':

Xc'am bi e pacha' juna bexex re camamisaxic;
e pacha' juna k'apoj bexex
na cach'aw ta q'uenok
echiri' casocax ri rismal;
jec'uri'la' rire na jinta c'ana xubi'ij.

³³ X'ani' che pacha' lic na jinta uwach; y echiri' xk'at tzij puwi', x'an ri lic na e ta usuc' che.

¿China tak c'u ri ticawex caquipetebej lo che rire?

Na e jintaj,
ma xk'at uk'ij che ruwachulew. *Is.*

53:7-8

E wa' ri catajin che rajilaxic.

³⁴ Ec'u wa'chi aj Etiopía xutz'onoj che ri Felipe:

—Ma'an co la ri' bi'ij la chwe, ¿china puwi cach'a't wi ri k'alajisanel echiri' cubi'ij wa'? ¿Chiribil rib nawi cubi'ij wi o cach'a't puwi junok chic? —xcha'.

³⁵ Ec'u ri Felipe xch'a't ruc' rachi puwi wa'. Xujek lo ruc' ri catajin che rajilaxic che Ruch'a'tem ri Dios y xutzijoj c'u che puwi ri Utzilaj Tzij re ri Jesús.

³⁶ E c'o chi be echiri' xebopon pa jun luwar pa c'o wi ya'.

Ec'u ri' rachi aj Etiopía xubi'ij che ri Felipe:

—Wara c'o ya'. ¿Utz nawi ri'in canc'ul ri bautismo? —xcha che.

³⁷ Ri Felipe xubi'ij che:

—We cacoj la rubi' ri Kanimajawal Jesucristo ruc' ronoje anima' la, lic utz ri' —xcha che.

Rachi xuc'ul uwach:

—Ri'in cancojo ri Kanimajawal Jesucristo e Ruc'ajol ri Dios —xcha'.³⁸ Y xutak c'u utac'abaxic ri' ri careta.

Ec'u ri Felipe junam ruc' rachi xekaj chupa ri ya'. Tec'uchiri', ri Felipe xuya ri bautismo che.

³⁹ Echiri' xebel lo chupa ri ya', xakic'ate't ri Ruxlabixel ri Dios Kajawxel xuc'am bi ri Felipe. Rachi aj Etiopía na xril ta chi uwach, pero lic caqui'cotic xumaj tanchi ubi rube.

⁴⁰ Ec'u ri Felipe xe'yo'k chupa jun tinamit Azoto rubi'. Echiri' xel bi chiri', xic'ow pa tak tinamit yey chujunal tinamit pa xic'ow wi, xutzijoj ri Utzilaj Tzij. Ec'u ri' xopon c'a chupa ri tinamit Cesarea.

9

Ri jalc'atajibal rubinic usilabic ri Saulo

(Hch. 22:6-16; 26:12-18)

¹ Ec'u ri Saulo na carok'otaj taj cuxibij quipa ruc' camic janipa ri quicojom rubi' ri Kanimajawal. Xe'ec c'u ruc' ri cajawal raj chacunel pa Rocho Dios ² y xutz'onoj bi uwujil cha' caya'i' puk'ab coc pa tak ri sinagogas re ri tinamit Damasco. Jec'ula', we queburik achijab o ixokib e cuq'uul ri quitakem wa c'ac' Be, c'o c'u puk'ab ri' quebuyut lok y quebuc'am lo Jerusalem.

³ Ec'u ri Saulo e ri' c'o pan chi be che u'anic wa', catajin c'u roponic chunakaj ri tinamit Damasco, echiri' xakic'ate't ruwonibal jun ak' xpe chila' chicaj, xwol ca'n puwi' y xusut rij.

⁴ Ri Saulo xtzak pulew y xuta c'u jun kulaj, jewa' cubi'ij che:

† 8:27 “Ri Candace”: Wa' e ri cabi'x chique ri reinas re ri tinamit Etiopía.

—Saulo, Saulo, ¿su'chac catch'o'jin chwij? —xcha che.

⁵ Ri Saulo xutz'onoj che:

—¿Lal china rilal, Wajawal? —xcha'.

Jec'uwa' xc'ul uwach che:

—Ri'in in Jesús, ri Jun catch'o'jin chirij. Yey ri'at, atuquel nenare' lic ca'an c'ax che awib, jela' pacha' juna boyex echiri' cuya akan che ri puya cach'ic lo che —xuchixic.

⁶ Cabirbot c'u ri Saulo y uxi'im rib, jewa' xubi'ij che:

—Wajawal, ¿sa' ri ca'aj la can'ano? —xcha'.

Ri Kanimajawal xuc'ul uwach:

—Chatyactajok y jat chupa ri tinamit, ma chiri' cabi'x wi chawe sa' ri chirajawaxic ca'ano —xcha'.

⁷ Ec'u rachijab e rachbi'il ri Saulo lic quixi'im quib xetaq'ui'ic; ma xquita ri kulaj, no'j na jinta junok xquil uwach.

⁸ Ri Saulo xyactaj chwa rulew y xujak c'u ruwach, pero na jinta chi c'o carilo ma xcanaj can potz'. Ewi xa xch'elex bi che ruk'ab cuma ri erachbilam y xc'am bi chupa ri tinamit Damasco. ⁹ Xc'o'ji' c'u chila' oxib k'ij; e la' na catzu'n taj, na xwa' taj y na jinta ne umik'ina' xutijo.

¹⁰ Chila' c'u ri' Damasco c'o jun achi Ananías rubi'; rire ucojom rubi' ri Cristo. C'o c'u jun c'utubal re ri Dios xk'alajisax chwach. Ri xrilo e ri Kanimajawal xuc'ut uwach chwach y jewa' xubi'ij che:

—¡Ananías! —xcha che.

Rire xuc'ul uwach:

—Ri' in c'olic, Wajawal —xcha'.

¹¹ Xubi'ij c'u ri Kanimajawal che:

—Chatyactajok y jat chupa ri be cabi'x “Jusuc'” che. Yey chirocho c'u ri Judas, chatz'onobej puwi jun achi aj Tarso, Saulo rubi'. Rire catajin pa oración ¹² y k'alajisam chi c'u jun c'utubal re ri Dios chwach. Chupa wa' xril jun achi Ananías rubi', e ri' coc bi y cuya ruk'ab puwi' cha' jela' catzu'n tanchic —xcha'.

¹³ Xubi'ij c'u ri Ananías che ri Kanimajawal:

—Wajawal, lic nutom ronoje ri na utz taj u'anom wa' wa'chi chique ri quicojom ri bi' la chila' Jerusalem.

¹⁴ Yey ya'tal ne lo puk'ab cuma ri nimak e aj chacunel pa Rocho Dios quebuc'am bi pa cárcel conoje ri quicojom ri bi' la —xcha'.

¹⁵ Ec'u ri Kanimajawal xubi'ij che:

—Jat chila' ruc', ma Ri'in nucha'om rire cha' cu'ana jun waj chac re que'ec che uk'alajisaxic ri nubi' chiquiwach ri winak na e ta aj judi'ab, chiquiwach ri e takanelab y chiquiwach ri e aj Israel. ¹⁶ Yey canc'ut c'u che, janipa ri c'axc'olil chirajawaxic quic'ow wi rire ruma cutzizoj ri nubi' —xuchix ri Ananías.

¹⁷ Ri Ananías xe'ec c'ut y xoc pa ri ja pa c'o wi ri Saulo. Xuya c'u ruk'ab puwi' y xubi'ij che: «Hermano Saulo, ri Kanimajawal Jesucristo, ri xuk'alajisaj rib chawach chupa ri be pa at petinak wi, inutakom lo awuc' cha' cat-tzu'n tanchic y cac'ul c'u ri Santowilaj Ruxlabixel ri Dios» xcha che.

¹⁸ Chupa c'u la' la jok'otaj, c'o ri pacha' solo't xtzak che ruwach ri Saulo y xtzu'n tanchic. Tec'uchiri', xyactajic y xuc'ul ri bautismo.

¹⁹ Ec'uchiri' xwa' ri Saulo, xc'o'ji' tanchi uchuk'ab y xc'o'ji' jujun k'ij cuc' ri quicojom rubi' ri Cristo chila' pa ri tinamit Damasco.

Ri Saulo cutzizoj ri Utzilaj Tzij pa ri tinamit Damasco

²⁰ Tec'uchiri', ri Saulo xujek catzizoj puwi ri Cristo chupa tak ri sinagogas, jewa' ri cubi'ij: «Ri Jesús e Uc'ajol ri Dios» cacha'.

²¹ Conoje ri quetaw re lic cacam canima' che y caquibi'ij: «¿Na e ta neba achi wa' ebuternabem ruc' c'ax ri quicojom rubi' ri Cristo chila' Jerusalem; yey c'uninac ne wara re quebuyut bi y quebu'ya'a paquik'ab ri nimak e aj chacunel pa Rocho Dios?» quecha'.

²² Pero ri Saulo jalan catajin unimarc ruchuk'ab puwi ri cutzizoj. Ec'u raj judi'ab ejekel chiri' Damasco xsach quina'oj che ma ri Saulo

cuk'alajisaj chiquiwach: Ri Jesús e ri Cristo, Rucha'o'n lo ri Dios.

Ri Saulo caresaj bi rib chiquiwach rajjudi'ab

²³ Ic'owinak chi c'u uq'uiyal k'ij, raj judi'ab xqui'an tzij junam chiquiwach re caquicamisaj ri Saulo. ²⁴ Pero wa' xreta'maj ri Saulo. Ec'o c'u ri quichajim chipak'ij chichak'ab tak ri oquibal re ri tinamit cha' caquichap ri Saulo y caquicamisaj.

²⁵ Ruma c'u ri', ri quicojom rubi' ri Cristo e la' chak'ab xquikasaj bi ri Saulo chwi ri tapia chupa jun nimalaj chacach.

Ri Saulo copon Jerusalem

²⁶ Echiri' xopon ri Saulo Jerusalem, lic xraj cakib cuc' ri quicojom rubi' ri Cristo. Pero conoje rique lic caquixi'ij quib che, ma na caquicoj taj we pakatzij wi ri Saulo ucojom chi rubi' ri Cristo. ²⁷ Ec'u ri Bernabé xuc'am bi y xu'ya'a chiquiwach ri e tako'n re ri Cristo. Xutzijoj c'u chique su'anic ri Saulo xril uwach ri Kanimajawal pa be y xch'a't ruc'. Yey xutzijoj chique puwi ri tzijonic xu'an ri Saulo chupa rubi' ri Jesús chila' Damasco yey ruc' unimal uchuk'ab xu'an wa'.

²⁸ Ec'u ri Saulo xcanaj cuc' chiri' Jerusalem y xerachbilaj pa tak quebec wi. ²⁹ Lic na cuxi'ij ta rib catzijon chupa rubi' ri Kanimajawal. Cach'a't c'u puwi ri Jesús cuc' raj judi'ab ri quech'a't pa ri ch'a'tem griego;* ruma c'u la', rique caquitzucuj su'anic caquicamisaj. ³⁰ Echiri' ri hermanos xqueta'maj wa', xquic'am bi ri Saulo c'a Cesarea y chiri' c'ut xquitak bi chupa ri tinamit Tarso.†

³¹ E tak c'u ri quicojom rubi' ri Cristo pa ronoje ri luwar re Judea, re Galilea y re Samaria, xecubi' chi utz ma na jinta chi ri queternabex ruc' c'ax. Rique c'o xi'in ib cuc' chwach ri Kanimajawal. Catajin c'u quiq'uiyaric yey ya'om quichuk'ab y nimarism quic'u'x ruma ri Santowilaj Ruxlabixel ri Dios.

Ri Eneas cacunutajic

³² Xalok' c'u ri Pedro catajin ric'owic pa tak riglesias, xopon cuc' ri quicojom rubi' ri Cristo pa ri tinamit Lida. ³³ Chila' c'u ri' xu'rika jun achi Eneas rubi', yey e wajxakib lo junab ri' c'o chwa uwarabal ma xu'an sic.

³⁴ Ec'u ri Pedro jewa' xubi'ij che: «Eneas, ri Kanimajawal Jesucristo catucunaj. Chatyactajok y chayijba' rawarabal» xcha che.

Chupa c'u la' la jok'otaj ri Eneas xtaq'ui'ic. ³⁵ Conoje c'u ri ejekel chupa ri tinamit Lida y pa tak ri luwar re Sarón xquilo ri Eneas cunutajinak chic; y ruma c'u wa', xquiya quib puk'ab ri Kanimajawal.

Ri c'astajibal re ri Dorcas

³⁶ Chupa ri tinamit Jope c'o jun ixok ucojom rubi' ri Cristo, Tabita rubi'. (Pa ri ch'a'tem griego “Dorcas” quecha che.) Wa' wi'xok lic uya'om rib che u'anic ri utz y lic quebuto' ri niba'ib.

³⁷ Chupa tak la' la k'ij ri Dorcas xuchap yabil y xcamic. Ec'uchiri' xch'aj rucuerpo, xk'atisax chicaj pa ri cale' ja.

³⁸ Ec'u ri hermanos e c'o Lida xquito c'o ri Pedro pa ri tinamit Jope, yey wa' xa nakaj c'o wulok. Xequitak c'u bi ca'ib achijab cha' quebe'elaj che ri Pedro, jewa' caquibi'ij: «'Ana co la ri', peta la wara kuc' yey mayin la.»

³⁹ Xyactaj c'u bi ri Pedro y xe'ec cuc'. Echiri' xoponic, xc'am bi chicaj pa ri cale' ja. E tak ri e malca'nib xquisut rij ri Pedro. Conoje wa' quebok'ic y caquic'ut tak ri c'ul y ri quik'u' xu'an ri Dorcas echiri' c'a c'o cuc'. ⁴⁰ Ec'uchiri', ri Pedro xtakan che conoje quebel bi. Xuxucuba' c'u rib y xu'an orar. Tec'uchiri', xutzu' ri caminac, y jewa' xubi'ij che: «¡Tabita,‡ chatyactajok!» xcha'. Ec'u ri' ri Dorcas xujak ruwach; y echiri' xrilo c'o ri Pedro chiri', asu xtz'uyi'ic.

⁴¹ Ec'u ri Pedro xuchap ruk'ab y xuyaco. Tec'uchiri', xebusiq'uij

* 9:29 Quil nota Hechos 6:1. † 9:30 Tarso e tinamit pa xalax wi ri Saulo. ‡ 9:40 “Tabita”: Wa' e ubi' ri Dorcas pa ri ch'a'tem hebreo. Hch. 9:36

ri quicojom rubi' ri Cristo cuc' tak ri hermanas e malca'nib, y xuya c'u chiquiwach e la' c'aslic. ⁴² Wa' xeta'max chupa ronoje ri luwar re Joje. Ruma c'u ri', lic e q'ui ri xquicoj rubi' ri Kanimajawal Jesu-cristo. ⁴³ Y ri Pedro xcanaj can uq'uoyal k'ij chupa ri tinamit Joje, chirocho jun achi Simón rubi', ri cut'is tz'u'um.

10

Ri xuk'alajisaj ri Dios che ri Cornelio

¹ Pa ri tinamit Cesarea c'o jun achi Cornelio rubi'. Rire e capitán que ri soldados e cuq'uul ri cabi'x chique "E aj Italia". ² Ri Cornelio lic jusuc' rubinic usilabic y lic c'o xi'in ib pa ranima' chwach ri Dios junam cuc' conoje ri ralc'o'al. Rire lic cuya puak re to'bal que ri niba'ib e aj judi'ab y lic cu'an orar chwach ri Dios.

³ C'o c'u jun k'ij ri', laj che ri urox ora* benak k'ij xk'alajisax jun c'utubal re ri Dios chwach. Ri xc'ut che, e jun ángel re ri Dios e ri' xoc chiri' pa c'o wi rire y jewa' xubi'ij che: —¡Cornelio! —xcha che.

⁴ Ri Cornelio lic xutz'u' ri ángel y ruc' xi'in ib xubi'ij che:

—¿Sa' ri ca'aj la, wajawal? —xcha'.

Ri ángel xuc'ul uwach:

—E tak ra oración y ri to'bal que ri niba'ib a'anom ri'at, wa' uc'ulum ri Dios pacha' jun kasa'n chwach Rire.

⁵ Ec'u ri ca'an wo'ora e chebataka bi achijab pa ri tinamit Joje re que'quisiq'uij jun achi Simón rubi', ri cabi'x Pedro che. ⁶ Wa' wa'chi jekel chuchi' ri mar pa rocho ri Simón, jun aj t'isol tz'u'um. Wa' wa Pedro cubi'ij chawe sa' ri lic chirajawaxic wi ca'ano —xcha'.

⁷ Echiri' xel bi ri ángel xch'a't ruc', ri Cornelio xebusiq'uij ca'ib raj chac y jun soldado lic c'o xi'in ib pa ranima' chwach ri Dios, wa' e jun chique ri e c'o puk'ab. ⁸ Xutzijoj na c'u chique

ronoje ri xrilo; tec'uchiri', xebutak bi pa ri tinamit Joje.

Ri xuk'alajisaj ri Dios che ri Pedro

⁹ Chuca'm k'ij c'ut echiri' e c'o pan pa be e ri' catajin coponic chunakaj ri tinamit, ri Pedro xak'an chwi ri ja cha' cu'ana orar echiri' ya catic'oj ri k'ij.† ¹⁰ Xpe c'u jun unimal numic che y lic xraj cawa'ic.

Catajin c'u uyijbaxic ruwa echiri' xakic'ate't c'o xuc'ut ri Dios chwach. ¹¹ Xril ruwa caj jakalic. C'o c'u pacha' jun nimalaj c'ul caripipic y ximital lo che ri cajib utza'm, e ri' cakasax lo che ruwachulew. ¹² Chupa wa' wa c'ul e c'o ronoje quiwachlibal awaj: wa' e ri c'o cajib cakan, ri quecharar pulew yey ri quexiq'ui'ic' che ruwa caj.‡

¹³ Yey xuta jun kulaj jewa' xubi'ij:

—Chatyactajok Pedro; chacamisaj y chatija' —xcha che.

¹⁴ Pero ri Pedro xubi'ij che:

—Na can'an ta c'ana ri', Wajawal, ma ri'in na jinta c'ana c'o nutijom e la' ch'ul o na takal taj catijic —xcha'.

¹⁵ Xch'aw tanchi c'u ri jun kulaj, jewa' xubi'ij che:

—Ri ujosk'im chi ri Dios, ri'at mabi'ij ch'ul che —xcha che ri Pedro.

¹⁶ Wa' oxlaj xu'ano; tec'uchiri', ri nimalaj c'ul xtzelej tanchi chila' chijaj. ¹⁷ Ec'u ri Pedro catajin che utz'onoxic chiribil rib sa' que'elawi ri xc'ut chwach, echiri' xec'un rachijab etakom lo ruma ri Cornelio. Rique quitz'onobem lo ri rocho ri Simón ri cut'is tz'u'um, yey wo'ora e c'o chwa ri puerta. ¹⁸ Xech'aw c'u apanok y xquitz'onoj we chiri' jekel wi ri Simón, ri cabi'x Pedro che.

¹⁹ Ec'u ri Pedro c'a catajin ne che uch'obic rakan puwi ri xc'ut chwach, echiri' ri Ruxlabixel ri Dios xubi'ij che: «Chawila', ma le' oxib achijab catquitzucuj. ²⁰ Chatyactajok, chatkajok y jat cuc'. Muxi'ij rib ac'u'x

* **10:3** "Ri urox ora": Quil "hora" pa vocabulario. † **10:9** "Catic'oj ri k'ij": Quil "hora" pa vocabulario. ‡ **10:12** Levítico 11 cubi'ij pachique rawaj utz quetijic y pachique na quetij taj. Rawaj xeril ri Pedro e cuq'uul ri na takal taj quetijic.

cate'ec cuc', ma in ri intakayom lo que» xcha che.

²¹ Xkaj c'u lo ri Pedro pa e c'o wi rachijab etakom lo ruma ri Cornelio, y xubi'ij chique:

—Ri' in c'olic, in ri quintzucuj alak. ¿Sa' ri petinak wi alak wuc'? —xcha chique.

²² Rique xquibi'ij che:

—C'o jun capitán[§] aj Roma, Cornelio rubi'. Rire e jun achi lic jusuc', c'o xi'in ib ruc' chwach ri Dios, yey chom ruch'a'tibexic ca'an cuma conoje raj judi'ab. Xbi'x c'u che rire ruma jun santowilaj ángel re ri Dios, cutak lo c'amic la re que'ec la chirocho y jec'ula' cuta ri cabi'ij la che —xecha'.

²³ Ec'u ri Pedro xebucuj bi pa ja y xuya luwar chique quecanaj can la jun ak'ab chiri'. Chuca'm k'ij c'ut xe'ec cuc', yey xecachbilaj bi jujun hermanos e aj pa ri tinamit Jope.

²⁴ Chuca'm k'ij c'ut xebopon pa ri tinamit Cesarea pa eroye'em wi ri Cornelio. Rire umolom chi quichi' ri ratz-uchak' y ri ramigos ri c'ax caquina' quib ruc'. ²⁵ Echiri' xopon ri Pedro, xel lo ri Cornelio che uc'ulic y xuxucuba' rib chwach re culok'oj uk'ij.

²⁶ Pero ri Pedro xuyaco y xubi'ij che:

—Yactaja la, ma ri'in xa in jun achi pacha' rilal —xcha'.

²⁷ Cach'a't c'u ruc' ri Cornelio, xoc bi y xebu'rika uq'uiyal ticawex quimolom quib chiri'. ²⁸ Xubi'ij c'u ri Pedro chique:

—Lic eta'am ralak, chikaxo'l ri oj aj judi'ab lic na ube taj we junok chike cunjimaj rib o cakib ruc' junok na e ta cuq'uul raj judi'ab. No'j ri Dios xuc'ut chinuwach ri'in na ube taj canch'ob rakan wa'.** ²⁹ E uwari'che, echiri' xine'siq'uiuxok, na jampatana ximpetic y na junta ne xintz'onoj we utz can'an wa'. Ec'u wo'ora cantz'onoj che alak, ¿su'chac xtak alak nuc'amic? —xcha'.

³⁰ Ri Cornelio xuc'ul uwach:

—E ucaj k'ij wa' ic'owinak je u'orayil wa', ri'in in c'o pa ayuno laj che ri urox ora^{††} benak k'ij, yey in c'o pa oración chiwocho echiri' xwinakir c'u chinuwach jun achi ucojom uk'u' lic cawolk'inic ³¹ y jewa' xubi'ij chwe: “Cornelio, ri Dios utom ra oración y c'o chuc'u'x janipa ri to'bal que ri niba'ib a'anom. ³² Chataka junok chupa ri tinamit Jope re cu'siq'uij ri Simón ri cabi'x Pedro che. Rire c'o pa rocho ri Simón, jun achi aj t'isol tz'u'um c'o rocho chuchi' ri mar. Yey echiri' cac'unic, e rire ri cach'a't awuc'” xcha'.

³³ »Jec'uri'la', xintakala' c'amic la; y lic utz ri x'an la, ma xpe la. Ec'u wo'ora, konoje oj c'o wara chwach ri Dios cha' cakata ronoje ri utakom wi lo la cha' cabi'ij la chike —xcha'.

Ri Pedro cutzizoj ri Utzilaj Tzij chirocho ri Cornelio

³⁴ Ec'uchiri', xujek cach'a't ri Pedro, jewa' xubi'ij:

«Pakatzij wi wo'ora canmaj usuc' ri Dios na cacha'w ta chiquixo'l ri ticawex. ³⁵ Ma ri cu'ano e lic cuc'ul uc'u'x echiri' ri ticawex pa tak ronoje tinamit c'o xi'in ib cuc' chwach Rire y caqui'an ri lic jusuc'. ³⁶ C'o c'u ri xuk'alajisaj ri Dios chique ri e aj Israel; wa' e ri Utzilaj Tzij, ri cuc'am lo utzil chomal ruma ri Jesucristo ri Kajawal konoje.

³⁷ »Eta'am c'u ralak sa' tak ri xu'an ri Jesús echiri' ic'owinak chi ri tzi-jonic re ri Juan chwi ri bautismo ruc' ya'. Ri tzijonic puwi ri Jesús xujek lo c'a Galilea y xe'ec utzijoxic che ronoje ri luwar re Judea. ³⁸ Xeta'maj c'u ralak sa' ri xu'an ri Dios; xuya che ri Jesús ri aj Nazaret lic cac'o'ji' ri Santowilaj Ruxlabixel y ruchuk'ab Rire ruc'. Ec'u ri Jesús xe'ec pa tak luwar re cu'an ri utz y quebucunaj conoje ri eya'om pa c'ax ruma ritzel winak. Xu'an tak c'u wa' ma ri Dios lic c'o ruc'.

[§] 10:22 “Capitán”: Wa' e aj wach que cien soldados. ** 10:28 Chiquiwach raj judi'ab, jun cuch'ulaj rib chwach ri Dios we cakib ruc' junok na utakem ta ri cojobal qui'que. †† 10:30 “Ri urox ora”: Quil “hora” pa vocabulario.

39 »Ec'u ri'oj lic keta'am wa' ma xkil ronoje ri xu'an ri Jesús pa tak ri luwar re Judea y chila' Jerusalem. E wa' Rire ri xya'i' chwa cruz y xcamisaxic. 40 Pero churox k'ij ri Dios xuc'astajisaj lo ri Jesús chiquixo'l ri ecaminak y xuya che xuc'ut uwach chikawach. 41 Na xuc'ut ta uwach chiquiwach conoje ri tinamit, ma xew chiquiwach ri ebucha'om chi lo ri Dios ojertan; wa' e ri'oj, ri xojwa' junam ruc' y xkatij kamik'ina' junam ruc' echiri' c'astajinak chi lo Rire chiquixo'l ri ecaminak.

42 »Yey xojutak c'u che utzijoxic che ri tinamit cha' cakak'alajisaj e Rire ri Aj K'atal Tzij ucojom ri Dios paquiwi ri e c'aslic y ri ecaminak. 43 Puwi ri Jesús xetzijon lo conoje ri k'alajisanelab ojertan. Rique xquibi'ij e janipa ri quecojow re Rire, caquic'ul ri cuybal quimac ruma quicojom rubi'» xcha'.

Ri na e ta aj Israel caquic'ul ri Ruxlabixel ri Dios

44 C'a cach'a't ne ri Pedro cuc' chwi tak wa' echiri' xkaj ri Santowilaj Ruxlabixel ri Dios paquiwi conoje ri quetaw re. 45 Yey e petinak ruc' ri Pedro jujun e aj judi'ab quicojom rubi' ri Cristo. Wa' lic xcam canima' che, ma ri Santowilaj Ruxlabixel ri Dios xkaj paquiwi ri na e ta aj judi'ab. 46 Quequitata' c'u ri' quech'a't pa jujun chic ch'a'tem ya'tal chique ruma ri Ruxlabixel ri Dios y lic caquiyac uk'ij ri Dios.

47 Ec'u ri Pedro xubi'ij: «¿C'o neba junok cak'aten que caquic'ul ri bautismo ruc' ya'? Ma rique xquic'ul ri Santowilaj Ruxlabixel ri Dios jela' pacha' ri'oj» xcha'.

48 Xtakan c'u che caya' ri bautismo chique pa rubi' ri Kanimajawal Jesucristo. Ec'uchiri', xebelaj che ri Pedro cha' cacana'j chi queb oxib k'ij cuc'.

11

Ri Pedro cutzijoj sa' ri xu'an ri Dios cuc' ri na e ta aj Israel

1 Ri e tako'n re ri Jesús cuc' ri hermanos e c'o Judea xquito e c'o na e ta aj judi'ab xecojow re Rutzij ri Dios puwi ri Cristo. 2 Ruma c'u ri', echiri' xtzelej ri Pedro Jerusalem, ri hermanos e aj judi'ab lic xquichap pa ch'a'oj, 3 jewa' xquibi'ij che: «¿Su'chac xatoc pa cocho ri na e ta aj judi'ab y xatwa' ne cuc'?»* xecha'.

4 Ec'u ri Pedro xujek utzijoxic chique chuchola'j su'anic xu'ana wa'. Jec'uwa' xubi'ij chique:

5 «E ri'in in c'o pa ri tinamit Jope e ri' can'an orar echiri' xakic'ate't xk'alajisax jun c'utubal re ri Dios chinuwach. Wa' pacha' jun nimalaj c'ul ximital lo che ri cajib utza'm, xkasax lo chila' chicaj c'a pa la in c'o wi ri'in. 6 Echiri' xintzu' chi utz sa' ri c'o chupa wa', xebenuwil c'u awaj c'o cajib cakan, itzel tak chicop re upa juyub, awaj quecharar pulew, yey ri quexiq'uic' che ruwa caj.

7 »Yey xinta c'u jun kulaj, jewa' xubi'ij chwe: “Chatyactajok Pedro; chacamisaj y chatija” xcha'.

8 »Ximbi'ij c'u ri'in: “Na can'an ta c'ana ri', Wajawal, ma ri'in na jinta c'ana ch'ul o na takal taj catijic oquinak pa nuchi” xinch'a'.

9 »Ec'uchiri', xch'aw tanchi lo ri jun kulaj chila' chicaj, jewa' xubi'ij chwe: “Ri ujosk'im chi ri Dios, ri'at mabi'ij ch'ul che” xcha'.

10 »Wa' oxlaj xu'ano. Tec'uchiri', ronoje xc'am tanchi ubi chicaj.

11 »Chupa c'u la' la jok'otaj xec'un oxib achijab chwa ri ja pa in c'o wi; rique e petinak Cesarea, etakom lok cha' quinqutzucuj. 12 Ec'u ri Ruxlabixel ri Dios xubi'ij chwe quin'ec cuc' y muxi'ij ne rib nuc'u'x quin'ec. Xin'ec c'u ri' cuc'; yey wa' wa wakib hermanos e aj Jope e c'o wara wuc', xojcachbilaj bi.

* 11:3 Chiquiwach raj judi'ab, jun cuch'ulaj rib chwach ri Dios we cakib ruc' junok na utakem ta ri cojobal qui'que. † 11:12 Wa'chi e Cornelio.

»Echiri' xojopon Cesarea, xojoc chirocho jun achi.† 13 Yey wa'chi xutzijoj chike su'anic xril uwach jun ángel chirocho. Wa' xo'ltac'al chwach rire y jewa' xubi'ij che: “Chebataka bi achijab pa ri tinamit Jope re que'quisiq'uij jun achi Simón rubi', ri cabi'x Pedro che. 14 Ec'u rire colu'bi'ij chawe su'anic catcolobetaj ri'at cuc' conoje ri ejekel pa wocho” xcha ri ángel che.

15 »Yey, echiri' ri'in xinjeko quinch'a't cuc' wa' wa ticawex na e ta aj judi'ab, xkaj ri Santowilaj Ruxlabixel ri Dios paquiwi' jela' pacha' xujekebej lok echiri' xkaj pakawi ri oj aj judi'ab.

16 »Ec'uchiri', xc'un chinuc'u'x rubi'im can ri Kanimajawal echiri' xubi'ij: “Pakatzij wi, ri Juan xuya ri bautismo ruc' ya', no'j ri bautismo quic'ul ri'ix e ruc' ri Santowilaj Ruxlabixel ri Dios.”*

17 »Ec'u uwari'che, we ri Dios xuya chique rique wa sipanic jela' pacha' ri xuya chike ri'oj ri cubul chi kac'u'x ruc' ri Kanimajawal Jesucristo, ¿in china ri'in cha' cank'atej ri Dios che u'aniquil wa'?» xcha ri Pedro.

18 Ec'uchiri' xquita tak wa', na jinta chi xquibi'ij chirij ri Pedro, e xquijek caquiyc uk'ij ri Dios, jewa' xquibi'ij: «¡Uya'om ne ri' ri Dios chique ri na e ta aj judi'ab caquitzelej quitzij chwach cha' jela' c'o quic'aslemal!» xecha'.

Ri jekebal re riglesia pa ri tinamit Antioquía

19 Ruc' rucamic ri Esteban, xjeker quaternabexic ruc' c'ax janipa ri quicojom rubi' ri Cristo. E tak c'u ri' wa' xequich bi y xebopon c'a chupa tak ri tinamit re Fenicia, re Chipre y ri tinamit Antioquía.‡ Yey xew xquitzijoj can ri Utzilaj Tzij re ri Jesucristo chique ri e aj judi'ab.

20 Chiquixo'l c'u wa hermanos e c'o e aj Chipre y e aj Cirene. Ec'u

rique echiri' xeboc Antioquía, xquijek caquitzijoj ri Utzilaj Tzij re ri Kanimajawal Jesucristo chique ri na e ta aj judi'ab. 21 Yey ruchuk'ab ri Kanimajawal lic c'o paquiwi rique. Lic c'u e q'ui ri ticawex xquicoj rubi' ri Cristo y xquijalc'atij ri quibinic.

22 Ri quicojom rubi' ri Cristo e c'o Jerusalem, echiri' xquita wa', xquitak bi ri Bernabé cha' que'ec c'a chila' Antioquía. 23 Echiri' xopon ri Bernabé y xril ri unimal rutzil uc'u'x ri Dios cuc' ri quicojom rubi' ri Cristo, lic xqui'cot che. Y xebupixabaj conoje cha' ruc' ronoje quic'u'x caquichuk'ubej quib chwach ri Kanimajawal.

24 Ri Bernabé e jun achi lic utz uc'u'x, ruchuk'ab ri Santowilaj Ruxlabixel ri Dios lic c'o ruc' y lic c'o cubulibal uc'u'x. Ruma c'u ruchac rire, lic e q'ui ri ticawex xquicoj rubi' ri Kanimajawal Jesucristo.

25 Tec'uchiri', ri Bernabé xe'ec pa ri tinamit Tarso re cu'tzucuj ri Saulo. Echiri' xuriko, xuc'am lo Antioquía. 26 Xec'o'ji' c'u cuc' ri tinamit re ri Cristo ronoje ri jun junab, e ri' quec'utun chiquiwach uq'uiyal winak. Chiri' c'u ri', nabe laj xbi'x “cristianos” chique ri quicojom rubi' ri Cristo.

27 Chupa tak ri' la' la k'ij e c'o jun ek'alajisay runa'oj ri Dios xebel bi Jerusalem y xebopon Antioquía. 28 C'o jun chique wa', Ágabo rubi'. Rire xyactajic y ruma ri Ruxlabixel ri Dios, xuk'alajisaj cape jun unimal numic chwi ronoje ruwachulew pa ejekel wi ri winak. (Wa' xu'ana chupa rutakanic ri Claudio.)§

29 Ruma c'u wa', ri quicojom rubi' ri Cristo e c'o Antioquía xquiyijba' chiquiwach cha' caquitak pan to'bal chique ri hermanos ejekel Judea; chiquijunal c'u ri' xquich'ob rakan janipa ri caquiya'o, wa' e chirij tak ri c'o cuc'. 30 Y jela' xqui'ano; xquitak bi ri quikasa'n paquik'ab ri Bernabé y ri Saulo cha' caquic'am bi Judea y

* 11:16 Hch. 1:5 ‡ 11:19 “Antioquía”: E jun tinamit c'o Siria. C'o jun chic tinamit “Antioquía re Pisidia”. Hch. 13:14-52 § 11:28 Ri Claudio xc'o'ji' nimalaj takanel paquiwi ri takanic re Roma chupa ri junab 41-53 D.C.

caquiya chique ri e aj wach re riglesia.

12

Cacamisax ri Jacobo y caya'i' ri Pedro pa cárcel

¹ Chupa tak c'u ri' la' la k'ij ri rey Herodes xebutak jujun soldados cha' quequichap jujun chique ri quicojom rubi' ri Cristo re queya' pa c'axc'obic.

² Yey xebutak che caquicamisaj ruc' espada ri Jacobo ri ratzixel ri Juan. Y ri soldados jela' xqui'ano.

³ Ec'uchiri' xrilo lic xuc'ul quic'u'x raj judi'ab ri x'an che ri Jacobo, xutak uchapic ri Pedro. Wa' xu'an chupa ri nimak'ij Pascua echiri' catij ri pam na junta levadura che. ⁴ Ec'uchiri' chapom chi ri Pedro, ri Herodes xutz'apij pa cárcel y xuya paquik'ab cajib mutza'j soldados re caquichajij, yey wa soldados e cajcaj chujujunal mutza'j. Ri xuch'ob ri Herodes e c'ate caresaj lo ri Pedro chiquiwach ri winak re ri tinamit echiri' ic'owinak chi ri nimak'ij Pascua.

⁵ C'o c'u ri' ri Pedro pa cárcel lic chajital chi utz. Yey ri quicojom rubi' ri Cristo na quebuxlan ta che u'anic orar chwach ri Dios puwi' rire.

Ri Pedro quesax bi pa cárcel ruma jun ángel

⁶ Chupa c'u rak'ab chwach pan ri k'ij echiri' ri rey Herodes uch'obom caresaj lo ri Pedro chiquiwach ri tinamit, ri Pedro e ri' cawar chiquixo'l ca'ib soldados, ximital ruc' ca'ib carena yukul lo chique ri soldados. Yey pa rewi raj chajal e c'o chwach ri oquibal re ri cárcel.

⁷ Xakic'ate't c'ut xwinakir jun ángel re ri Kanimajawal ruc', yey jun ak' lic xutzij upa ri cárcel. Ri ángel xuyuch'uya' ri Pedro puc'alc'a'x, xuc'osoj y jec'uwa' xubi'ij che: «Chat-wa'lijok, chawilij» xcha che. E tak c'u ri carena c'o che ruk'ab ri Pedro xtzakic.

⁸ Xubi'ij c'u ri ángel che: «Chaximila' bi racoton y raxajab» xcha che. Y rire jela' xu'ano.

Xubi'ij tanchi ri ángel che: «Chacojo bi rak'u' re pisbal awij y chat-tereja lo chwij» xcha che.

⁹ Ri Pedro xel bi teran chirij ri ángel, tob na reta'am taj we katzij ri cu'an ri ángel ruc'; ma chwach rire, laj xa wachic' la catajin che rilic. ¹⁰ Xebic'ow c'u chiquiwach ri nabe mutza'j e chajinel. Tec'uchiri', xebic'ow che ruca'm mutza'j e chajinel y xebopon c'u chwach ri oquibal 'anom ruc' ch'ich', wa' e ri quel bi pa be chupa ri tinamit. Wa' wa oquibal utuquel xjakataj chiquiwach y jela' xebel bi. Xebin c'u jubik' che ri be y xakic'ate't ri ángel xuya can ri Pedro utuquel.

¹¹ C'a ec'uchiri' ri Pedro xumaj usuc' na wachic' ta ri cu'ano. Xubi'ij c'u chiribil rib: «Wo'ora pakatzij wi, canmaj usuc' e ri Kanimajawal utakom lo ru ángel wuc'. Jela' xinresaj puk'ab ri rey Herodes y che ronoje ri cacaj caqui'an ruq'uiyal e aj judi'ab chwe» xcha'.

¹² Ec'u la' catajin wa' pujolom ri Pedro, xe'ec chirocho ri María ruchu ri Juan, ri cabi'x Marcos che. Chiri' quimolom wi quib uq'uiyal hermanos quetajin pa oración chwach ri Dios. ¹³ Echiri' ri Pedro xuch'awisaj pan ri puerta re ruwa ja, jun ali aj chac Rode rubi', xel lo che. ¹⁴ Ec'uchiri' xuto e ukul ri Pedro, ruma ruqui'cotemal na xujak ta ri puerta. Ri xu'ano e canic xoc tanchi ubi pa ja y xu'tzizoj chique c'o ri Pedro chwach ri puerta.

¹⁵ Ec'u ri e c'o pa ja xquibi'ij che:

—Ri'at xatch'u'jeric —xecha che.

Pero rali xujiquiba' uwach chique lic katzij la cubi'ij.

Yey xquibi'ij rique:

—Laj e u ángel ri c'o chirí —xecha'.

¹⁶ Ec'u ri Pedro lic chac c'o che uch'awisaxic pan ri puerta. Ec'uchiri' xquijako yey xquil ri Pedro, lic xcam canima' che; ma lic c'ayew chique caquicojo we katzij ri quetajin che rilic.

☆ 12:3 Éx. 12:1-27

¹⁷ Pero ri Pedro xu'an jun c'utubal ruc' ruk'ab cha' quetz'inca'nic. Xutz-ijoj c'u chique su'anic xesax lo ruma ri Kanimajawal chupa ri cárcel. Yey xubi'ij c'u chique:

—Tzijoj alak wa' che ri Jacobo* y chique tak ri hermanos —xcha'.

Tec'uchiri', xel bi y xe'ec pa jun chic luwar.

¹⁸ Echiri' xsakiric, xoc jun sachibal na'oj chiquixo'l ri soldados. Xquijek quetucuquic ruma na queta'am taj sa' ri xu'an ri Pedro, ma na junta chic.

¹⁹ Ec'u ri Herodes xutak utzucuxic ri Pedro. Yey ruma na xrikitaj taj, e xuta quichi' ri soldados; tec'uchiri', xutak quicamisaxic. Echiri' xu'an wa', ri Herodes xel bi Judea y xe'ec pa ri tinamit Cesarea y chiri' xcanaj wi.

Rucamic ri rey Herodes

²⁰ Ri rey Herodes lic c'o royowal chiquij ri winak e aj Tiro y e aj Sidón.† Ec'u ri' wa queb tinamit xquich'a'bej quib chiquiwach re quebe'ch'a'ta ruc' ri rey Herodes cha' caqui'an utzil chomal chiquiwach ruc'. C'o c'u jun achi Blasto rubi', wa' raj chac ri rey yey lic c'o uwach pa ri rocho ri rey. Xquicoj c'u quib chwach ri Blasto y xquipuakij che cha' rire cach'aw paquiwi' chwach ri rey cha' na junta chi ch'a'oj chiquiwach. Yjela' raj c'ay re rutinamit ri Herodes utz caquic'ayij ri cajawax chique ri e aj Tiro y aj Sidón.

²¹ Ri rey Herodes xucoj c'u jun k'ij chique re caquimol quib. La' la jun k'ij xuwik rib ruc' chomilaj c'ul q'ui rajil, xtz'uyi' pa ri k'atbal tzij y xuya c'u jujun uch'a'tem chiquiwach ri tinamit.

²² Ec'u ri winak xquijeko lic co que-siq'uinic caquibi'ij: «¡Wa' wa cakato, na ukul ta juna achi; e ukul jun tiox!» quecha'.

²³ Xa pa jok'otaj c'u ri' jun ángel re ri Kajawal xucoj lo jun yabil che ri

Herodes; ma rire xuc'ul wa yacbal uk'ij x'anic, yey wa' xew takal che ri Dios. Jec'uri'la' xtiji' cuma amolo y ruma wa' xcamic.

²⁴ No'j c'u ri Utzilaj Tzij re ri Kanimajawal lic xe'ec utzijoxic y lic catajin quiq'uiyaric ri quecojow re.

²⁵ Echiri' ri Bernabé y ri Saulo xquiq'uis ri chac ya'om chique,* xebel chiri' Jerusalem y xquic'am bi ri Juan cuc', ri cabi'x Marcos che.

13

Ri Bernabé y ri Saulo caquijek ri nabe quibenam che utzijoxic ri Utzilaj Tzij

¹ Chila' Antioquía chiquixo'libal ri quicojom rubi' ri Cristo, e c'o ek'alajisay runa'oj ri Dios y e c'utunel re Rutzij. Wa' e:

ri Bernabé,

ri Simón ri cabi'x k'ek che,

ri Lucio aj Cirene,

ri Manaén ri xq'uiyisax pa rocho ri Herodes ri rey re Galilea

y ri Saulo.

² C'o c'u jun k'ij echiri' rique quimolom quib re caquilk'nimaj uk'ij ri Kanimajawal yey e c'o pa ayuno, ri Santowilaj Ruxlabixel ri Dios xubi'ij chique:

«Chebicha'a ri Bernabé y ri Saulo chwe cha' caqui'an ri chac* nuya'om chi lo paquik'ab» xcha'.

³ Echiri' xquiq'uis ri oración y ayuno, xquiya ri quik'ab paquiwi' rique y xequitak c'u bi.

Ri Pablo y ri Bernabé quebopon pa ri isla Chipre

⁴ Ec'u ri Bernabé y ri Saulo e la' etakom bi ruma ri Santowilaj Ruxlabixel ri Dios, xebopon c'u Seleucia. Chiri' xebel bi pa barco y xebec pa ri isla Chipre.† ⁵ Echiri' xebopon Salamina, jun tinamit re Chipre, xquijek utzijoxic Rutzij ri Dios puwi

* **12:17** Wa Jacobo na e ta ri xcamisaxic (v. 2); wa' e ri jun xu'an aj wach re ri iglesia y e uchak' ri Jesús. Mt. 13:55; Jn. 7:3-5; Hch. 1:14 † **12:20** Ruma royowal, xebuk'atej tak raj c'ay e c'o chupa rutakanic cha' na quec'ayin ta chi chique ri e aj Tiro y aj Sidón. * **12:25** Hch. 11:29, 30 * **13:2** Ri chac e que'quitzijoj ri Utzilaj Tzij re ri Jesucristo pa tak ri quitinamit ri na e ta aj Israel. † **13:4** "Chipre": E utinamit ri Bernabé.

ri Kanimajawal Jesucristo pa tak sinagogas que raj judi'ab. Yey c'o ri Juan† cuc' re quito'bel.

⁶ Xebic'ow c'u chupa ronoje ri isla Chipre y xebopon c'a chupa ri tinamit Pafos. Chiri' xquirik jun achi e cuq'u'il raj judi'ab; rire aj k'ij yey e jun k'alajisanel xa casocoso'nic. Wa' wa'chi Barjesús§ rubi', yey pa ri ch'a'tem griego “Elimas” quecha che.

⁷ Wa' wa' aj k'ij c'o ruc' ri takanel Sergio Paulo, jun achi lic c'o una'oj. Ri takanel xebusi'q'uij ri Bernabé y ri Saulo, ma lic curayij cuta Rutzij ri Dios puwi ri Kanimajawal Jesucristo.

⁸ Pero rachi aj k'ij xutij ri' che quebuk'atej ri Bernabé y ri Saulo cha' ri takanel na cucuba' ta uc'u'x che ri Utzilaj Tzij re ri Jesucristo.

⁹ Ec'u ri Saulo (ri cabi'x Pablo che) ruc' ruchuk'ab ri Santowilaj Ruxlabixel ri Dios xuch'iquiba' ruwach puwi ri Elimas, ¹⁰ y jewa' xubi'ij che:

«¡Rilal lal nojinak che ronoje so-coso'nic y che ronoje itz! ¡Lal ralc'o'al ritzel winak, ri jun aj retzelal c'u'x chirij ronoje ri jusuc'! ¿Su'chac na cok'otaj ta la ri cajech'ij la ri jusuc' be re ri Kanimajawal? ¹¹ Ec'u wo'ora ruk'ab ri Kanimajawal cayactaj chi'ij la y cu'an potz' che'la; xew c'u ri Dios eta'mayom janipa k'ij na quil ta la ri k'ij'sak» xcha'.

Na jampatana c'ut ronoje xu'an k'eku'm chwach y xujek camalal pa tak utzal y chirij, cutzucuj china cac'amaw bi che ruk'ab.

¹² Ec'uchiri' ri takanel xril wa xuc'ulumaj ri Elimas, xucoj rubi' ri Kanimajawal Jesucristo, y lic caminak ranima' che ri c'utunic chwi ri Kanimajawal.

Ri Pablo y ri Bernabé quebopon Antioquía re Pisidia

¹³ Ri Pablo junam cuc' ri rachbi'il xebel bi Pafos pa barco y xebopon Perge pa ri luwar re Panfilia. Pero ri

Juan xresaj can rib chiquij y xtzelej Jerusalem.

¹⁴ Ec'u rique xebic'ow Perge y xebopon Antioquía pa ri luwar re Pisidia. Chupa c'u jun k'ij re uxlanibal xeboc pa ri sinagoga y xetz'uyi'ic. ¹⁵ Ec'uchiri' ajilam chi jujun che Rutzij Upixab ri Dios tz'ibital can ruma ri Moisés y cuma ri k'alajisanelab, raj wach re ri sinagoga xquitak lo ubi'xiquil chique:

«Alak katz-kachak', we c'o juna ch'a'tem alak re pixabanic che ri tinamit, ch'aw alak» xecha'.

¹⁶ Xtaq'ui' c'u ri Pablo y xu'an jun c'utubal ruc' ruk'ab cha' na jinta c'o cach'awic y xubi'ij:

«Alak achijab aj Israel y onoje alak ri c'o xi'in ib pa anima' alak chwach ri Dios, tape alak. ¹⁷ Ri Dios re wa tinamit Israel xebucha' ri kati'-kamam ojertan y xu'an jun nimalaj tinamit chique echiri' c'a e c'o Egipto, tob rique na e ta aj chiri'. Ruc' c'u unimal uchuk'ab ri' xeberesaj lo Egipto.

¹⁸ »Laj juna cuarenta junab c'u ri' xebucuy ri Dios rutinamit ruc' ri quimacunic pa ri luwar catz'intz'otic. ¹⁹ Tec'uchiri', xusach quiwach wukub nimak tinamit pa ri luwar re Canaán* y xuya c'u chique ri kati'-kamam quecanaj can ruc' wa ulew. ²⁰ Laj ic'owinak chi cajib ciento junab ruc' nic'aj chwi lo echiri' rutinamit ri Dios xebopon Egipto, c'a ec'uchiri' xecanaj can pa rulew ubi'tisim lo ri Dios chique.

»Ec'uchiri', ri Dios xebuya e aj k'atal tzij re quetakan paquiwi rutinamit. Jela' u'anom c'a chwa ri k'alajisanel Samuel. ²¹ Chupa c'u rutakanic ri Samuel, ri tinamit xquitz'onoj che ri Dios cuya juna quirey. Ec'u ri Dios xucoj ri Saúl paquiwi'. Ri Saúl e uc'ajol ri Cis, jun achi upetebem chique ri ralc'o'al can ri Benjamín.** Cuarenta junab c'u xtakan paquiwi'. ²² Ec'uchiri' ri Dios xresaj ri rey Saúl paquiwi', e xucoj ri

† **13:5** “Juan”: Wa' e Juan Marcos, ri ratz-uchak' ri Bernabé. Hch. 12:12,25; 13:13; 15:37-38; Col. 4:10
 § **13:6** “Barjesús” que'elawi “uc'ajol Jesús” o “uc'ajol Josué”. * **13:19** Dt. 7:1 ** **13:21** Ri Benjamín e jun chique ri cablajuj uc'ajol ri Jacob.

David re catakan puc'axel. Chwi c'u ri David lic chom xch'a't ri Dios, ma jewa' xubi'ij:

E wilom che ri David ruc'ajol ri Isaí, rire jun achi lic caqui'cot nuc'u'x ruc' ma cuya ranima' cu'ano janipa ri cantak che *1 S. 13:14* xcha'.

²³ »Ec'u chirij rubi'tisim lo chique ri e ralc'o'al can ri David, ri Dios e xuyac ri Jesús re Colobnel que raj Israel. ²⁴ Echiri' ri Jesús c'amaja' cu-jek ri chac takom lo che u'anic chiquiwach ri winak, xtzijon ri Juan puwi ri bautismo re tzelebal tzij chique conoje ri tinamit Israel. ²⁵ Ec'uchiri' ri Juan catajin che uq'uisic ruchac, xubi'ij: “Chiwach ri'ix ¿in china ri'in? Ri'in na in ta ri Colobnel oye'em alak. No'j catajin c'u lo uc'unic Jun chwij, yey ri' na takal tane chwe ri'in canquir ruxajab che ri rakan” xcha'.

²⁶ »Alak katz-kachak', alak ralc'o'al can ri Abraham y onoje alak ri c'o xi'in ib uc' alak chwach ri Dios, che c'u ralak takom wi lo ri Utzilaj Tzij re colobetajic. ²⁷ Yey ri ejekel Jerusalem cuc' ri e aj wach que, na xqueta'maj taj ri Jesús e Ucha'o'n lo ri Dios y na xquimaj tane usuc' ri tz'ibital can cuma ri k'alajisanelab puwi ri Jesús, tob wa' cacajilaj ronoje k'ij re uxlanibal. Yey echiri' rique xquitz'onoj rucamic ri Jesús, e xqui'an c'u ri tz'ibital can puwi Rire. ²⁸ Y tob na jinta c'o xquirik chirij ri Jesús re camisaxic, xquitz'onoj che ri Pilato cutak ucamisaxic. ²⁹ Echiri' xquiq'uis u'anic ruc' ri Jesús janipa ri tz'ibital can puwi Rire, xquikasaj lo chwa ri cruz y xe'quimuku'.

³⁰ »Pero ri Dios xuc'astajisaj lo ri Jesús chiquixo'l ri ecaminak. ³¹ Tec'uchiri', ri Jesús uq'uiyal k'ij xuc'ut uwach chiquiwach ri xerachbilaj chwi echiri' xebel lo Galilea y xebec ruc' c'a Jerusalem.✧ E tak c'u ri' wa' ri quetzijow re ri Jesús chiquiwach ri tinamit wo'ora.

³² »Jec'ula' ri'oj cakatzijoj che alak ri Utzilaj Tzij, ri bi'tisim lo chique

ri kati'-kamam ojertan. ³³ Yey wa bi'tisinic ya'om chi chike ri'oj ri oj calc'o'al can rique. Ma ri Dios xu'an wa' echiri' xuc'astajisaj lo ri Jesús chiquixo'l ri ecaminak, jela' pacha' ri tz'ibital chupa ruca'm Salmo: Ri'at at Nuc'ajol yey Ri'in in Akaw; wak'ij c'u ri' cank'alajisaj wa' *Sal. 2:7* cacha'.

³⁴ »Yey ri Dios ubi'im cuc'astajisaj lo ri Jesús chiquixo'l ri ecaminak cha' jela' rucuerpo na cak'ay taj, ma jewa' xubi'ij pa Ruch'a'tem puwi wa': Canc'ut na ri c'axna'bal nuc'u'x chiwach, jela' pacha' ri nubi'tisim lo che ri David. *Is. 55:3*

³⁵ E uwari'che jewa' cubi'ij pa jun chic Salmo: Rilal na caya ta la luwar che cak'ay rucuerpo ri Jun lic uya'om rib pak'ab la *Sal. 16:10* xcha'.

³⁶ »Ma pakatzij wi ri David xu'an ri xraj ri Dios ruc' echiri' c'o che ruwachulew, pero xopon ri k'ij xcamic y xmuk pa emukum wi ruchu-ukaw, y rucuerpo xk'ayic. ³⁷ No'j rucuerpo ri Jun ri xuc'astajisaj bi ri Dios, na xk'ay taj.

³⁸ »Cheta'maj c'u alak wa', alak watz-nuchak': Ruma ri xu'an ri Cristo, catzijox che alak su'anic carik alak ri cuybal mac chwach ri Dios. ³⁹ Ruma c'u ri Cristo, conoje ri cacubi' quic'u'x ruc' Rire, ca'ani' jusuc' chique. Yey wa' na carikitaj ta c'ana ruma ri catakex ri Tzij Pixab tz'ibital can ruma ri Moisés.

⁴⁰ »Chajij c'u ib alak cha' na cape ta pawil alak ri ubi'im lo ri Dios chupa ri tz'ibital can cuma ri k'alajisanelab:

⁴¹ Chiwilape', ix aj ch'aminel re ri Nutzij,

lic cacam na c'u iwanima' che y casach ne iwach ruma wa':

Ri'in can'an jun chac chupa tak wa k'ij ix c'o wi,

jun chac na quicoj taj,

tob ne c'o junok catzijow re chiwe *Hab. 1:5*

✧ 13:31 Hch. 1:3

xcha ri Dios.»
Ruc' wa' xuq'uisbej ri Pablo.

⁴² Ec'uchiri' ri Pablo y ri Bernabé xebel bi pa ri sinagoga, ri e c'o chiri' xebelaj chique cha' ri jun chic k'ij re uxlanibal quech'a't cuc' rique chwi tak wa'. ⁴³ Echiri' xebel bi conoje ri quimolom quib pa ri sinagoga, e q'ui xeterej bi chiquij ri Pablo y ri Bernabé. Chiquixo'l wa' e c'o raj judi'ab y jujun chic quitakem lo ri c'utunic que raj judi'ab (tob na e ta aj judi'ab, pero lic caquilok'oj uk'ij ri Dios). Ec'u ri Pablo y ri Bernabé lic xequipixabaj cha' quetiqui' chupa ri unimal rutzil uc'u'x ri Dios.

⁴⁴ Chupa c'u ri jun chic k'ij re uxlanibal, ya laj conoje ri winak re ri tinamit xquimol quib cha' caquita Rutzij ri Dios puwi ri Kanimajawal. ⁴⁵ Pero echiri' raj judi'ab xequil ruq'uiyal winak, xujek cati'tot quic'u'x chirij ri Pablo. Y xquijek c'u caquic'ulali'aj uwach ronoje ri cubi'ij ruc' c'axlaj ch'a'tem.

⁴⁶ Ec'uchiri', ri Pablo y ri Bernabé, ruc' unimal quichuk'ab, xquibi'ij chique:

—Pakatzij wi lic chirajawaxic nabe na catzijox che ralak ri alak aj judi'ab Rutzij ri Dios puwi ri Kanimajawal. Pero ruma c'u ri na cac'ul ta alak, jela' cak'alajinic na takal ta ri c'aslemal na jinta utakexic che alak. Ruma c'u la' que'katzijoj chique ri na e ta aj judi'ab, ⁴⁷ ma jela' ri ojutakom lo ri Dios Kajawxel che u'anic. E pacha' ri ubi'im lo Rire echiri' xubi'ij:

Ri'in atnucojom re K'ijsak chiquiwach tak ri tinamit cha' jela' cu'ana at c'amal bi re ri colobetajic

c'a pa tak ri luwar lic naj che ruwachulew *Is. 49:6*
—xecha'.

⁴⁸ Echiri' xquita wa' ri na e ta aj judi'ab, lic xequi'cot che y xquijeko caquiyac uk'ij ri Utzilaj Tzij puwi ri Kanimajawal. Jec'ula' xquicoj rubi' ri Cristo conoje ri echa'om chi ulok re cac'oji' quic'aslemal na jinta utakexic. ⁴⁹ Y xe'ec utzijoxic ri Utzilaj

Tzij puwi ri Kanimajawal chupa tak ronoje wa luwar.

⁵⁰ No'j raj judi'ab xquicoj pa qui-jolom raj wach re ri tinamit y jujun ixokib lic c'o quiwach yey quitakem ri tziypixab que raj judi'ab, cha' que-quiternabej ruc' c'axc'obic ri Pablo y ri Bernabé. Jec'ula' ri' xebequesaj bi pa wa tinamit.

⁵¹ Ec'u ri Pablo y ri Bernabé xquipupa' can rulew che ri cakan, c'utubal re ri na utz taj xqui'an ri e aj chila' y xebec c'u pa ri tinamit Iconio.

⁵² Pero ri quicojom rubi' ri Cristo chila' Antioquía lic c'o qui'cotemal cuc' yey ri Santowilaj Ruxlabixel ri Dios lic c'o cuc'.

14

Ri Pablo y ri Bernabé quebojon Iconio

¹ Chila' c'ut chupa ri tinamit Iconio, ri Pablo y ri Bernabé junam xeboc chupa ri sinagoga que raj judi'ab. Ruma c'u ri Utzilaj Tzij xquitzijoj, lic e q'ui ri e aj judi'ab y ri na e ta aj judi'ab xquicoj rubi' ri Cristo. ² No'j ri e aj judi'ab ri na caquicoj ta ri Utzilaj Tzij, xquitic oyowal pa canima' ri na e ta aj judi'ab yey xequituc wa' wa winak cha' queyactaj chiquij ri quicojom rubi' ri Cristo. ³ Na ruc' ta c'u ri', lic naj xec'oji' ri Pablo y ri Bernabé chiri' y na caquixi'ij ta c'ana quib quech'a't chiquiwach conoje. Ec'u ri Kanimajawal xujiquiba' uwach ri quich'a'tem chwi ri unimal rutzil uc'u'x, ma xuya chique caqui'an nimak tak c'utubal re ruxchuk'ab ri Dios. ⁴ Ec'u ri winak re ri tinamit quijachom quipa; jujun chique equiternabem raj judi'ab y jujun chic equiternabem ri e tako'n re ri Jesús.

⁵ Ec'u ri e aj judi'ab junam cuc' ri na e ta aj judi'ab xqui'an tzij chiquiwach cuc' ri e aj wach cha' queyactaj chiquij ri Pablo y ri Bernabé re caqui'an c'ax chique y quequi'an pa'bj. ⁶ Echiri' ri Pablo y ri Bernabé xqueta'maj wa', xebel bi chiri' y xebec pa ri luwar re Licaonia pa tak ri tinamit Listra y ri tinamit Derbe

y pa tak ri luwar chunakaj wa queb tinamit. ⁷ Y chiri' c'u ri' caquitzijoj ri Utzilaj Tzij.

Ri Pablo ca'an pa'baj pa ri tinamit Listra

⁸ Chupa wa tinamit Listra c'o jun achi siquirinak ucabichal ri rakan y na bininak ta q'uenok ma ralaxibem sic. Wa' wa'chi tz'ulic, ⁹ e ri' cutata' ri cubi'ij ri Pablo.

Ec'uchiri' ri Pablo xuch'iquiba' ruwach puwi' y xrilo c'o cubulibal uc'u'x cha' cacunutajic, ¹⁰ lic co xubi'ij che:

—¡Chatyactajok y chat-tac'ala jusuc' chwi rawakan! —xcha'.

Ec'u rachi xch'oplin chicaj y xbinic.

¹¹ Ec'u ri winak echiri' xquilo sa' ri xu'an ri Pablo, xquijek quesiq'uin pa quich'a'tem rique, wa' e ri ch'a'tem re Licaonia. Jewa' caquibi'ij: «¡Wa' e tiox qui'anom lo achijab che quib y xekaj lo wara kuc'!» quecha'.

¹² Che ri Bernabé xquibi'ij e tiox Júpiter, yey che ri Pablo xquibi'ij e tiox Mercurio* ma e rire ri más cach'awic. ¹³ Ec'u raj chacunel re ri tiox Júpiter, ri c'o rocho pa oquibal lo re ri tinamit, xebuc'am lo toro'ib y cotz'i'j yijbam re wikonic chwach tak ri oquibal re ri templo. Yey junam cuc' ruq'uiyal winak xcaj quequicamisaj rawaj re quikasa'n chiquiwach ri Bernabé y ri Pablo.

¹⁴ Echiri' xquita wa' ri queb tako'n Bernabé y Pablo, xquirich'ij ri quik'u' y xquimin quib chiquixo'l ruq'uiyal winak; quesiq'uinic jewa' caquibi'ij:

¹⁵ «¡Achijab!, ¿su'chac ca'an alak wa'? Ma ri'oj xa oj achijab junam kawach uc' alak. Wa Utzilaj Tzij cakatziyoj che alak e cha' caya can alak ri na il ta uwach y catzucuj alak ri Dios c'aslic, ri x'anaw re ruwa caj, ruwachulew, ri mar y ronoje ri c'o che tak wa'. ¹⁶ Tob rojertan ri Dios xuya luwar chique tak ri tinamit quebin chupa tak ri be cacaj rique, ¹⁷ na ruc' ta c'u ri', ri Dios na rok'otam ta

c'ana uk'alajisaxic china Rire ruma tak ri utz cu'ano. Ma cuya lo ri jab y cuya lo ruk'ijol echiri' lic c'o molonic. E Rire ri ca'anaw re lic c'o cakatijo y c'o qui'cotemal chupa ri kanima'» quecha'.

¹⁸ Ri Bernabé y ri Pablo, tob que-tajin che ubi'xiquil wa', lic c'ayew xequik'atej ruq'uiyal winak cha' na quequicamisaj ta rawaj re kasa'n chiquiwach rique.

¹⁹ Chupa c'u la' la' jok'otaj xec'un lo jujun aj judi'ab e aj pa ri tinamit Antioquía y ri tinamit Iconio. Rique xquicoj pa quijolom ruq'uiyal winak caqui'an ri Pablo pa'baj. Y ec'u xqui'ano. Tec'uchiri', xquichararej bi ri Pablo tza'm tinamit. E chiquiwach rique, caminak chic. ²⁰ Pero echiri' ri quicojom rubi' ri Cristo xquisut rij ri Pablo, rire xyactajic y xoc tanchi chupa ri tinamit. Chuca'm k'ij xel bi ruc' ri Bernabé y junam xebec pa ri tinamit Derbe.

²¹ Xquitzijoj c'u ri Utzilaj Tzij chupa wa tinamit y uq'uiyal ticawex xquicoj rubi' ri Cristo. Tec'uchiri', xetzelej tanchi lo chupa ri tinamit Listra, ri tinamit Iconio y ri tinamit Antioquía. ²² Xquinimarisaj c'u can quic'u'x ri hermanos y lic xequipixabaj cha' catiqui' chi utz ri cubulibal quic'u'x ruc' ri Jesús, jewa' caquibi'ij chique: «Lic chirajawaxic ruc' uq'uiyal c'axc'obic cojoc chupa rutakanic ri Dios» quecha'.

²³ Yey xequicoj can e aj wach chujunal tak iglesia. Xqui'an c'u orar y ayunar cuc'. Tec'uchiri', xquitz'onoj che ri Kanimajawal quebuchajij janipa ri lic cubul quic'u'x ruc' Rire.

Ri Pablo y ri Bernabé quetzelej tanchi Antioquía re Siria

²⁴ Xebic'ow c'u pa tak ri luwar re Pisidia y xebopon pa ri luwar re Panfilia. ²⁵ Xquitzijoj c'u ri Utzilaj Tzij chupa ri tinamit Perge. Tec'uchiri', xquimaj bi pa ri tinamit Atalia.

* **14:12** “Mercurio”: Chiquiwach raj Roma, Mercurio e ri tiox caresaj quichi' ri nic'aj chic tiox.

† **14:26** C'o queb Antioquía. Wa jun e Antioquía re Siria, pa xquijek wubi ri quibenam ri Pablo y ri Bernabé.

²⁶ Chiri' c'u ri' xquimaj bi pa barco y xetzelej Antioquía.† Wa' e ri tinamit pa xtz'onox wubi ruto'bal ri Dios paquiwi ri Pablo y ri Bernabé cha' caqui'an ri chac ya'om paquik'ab,* yey wa' wa chac quiq'uisom chi rique.

²⁷ Echiri' xeboponic, xequimol quichi' conoje ri quicojom rubi' ri Cristo y xquitzijoj c'u chique ronoje ri xu'an ri Dios cuc' y su'anic xuya chique ri na e ta aj judi'ab quebu'an xa jun cuc' ri quicubam quic'u'x ruc' ri Kanimajawal Jesucristo. ²⁸ Xecanaj c'u can chiri' uq'uiyal k'ij cuc' ri quicojom rubi' ri Cristo.

15

Raj wach re riglesia caquimol quib Jerusalem

¹ Chupa tak ri' la' la k'ij xebopon Antioquía jujun achijab e petinak Judea y xquijek quec'utun chiquiwach ri quicojom rubi' ri Cristo, jewa' caquibi'ij: «We na cacoj ta ri retalil re circuncisión che alak jela' pacha' rutakanic can ri Moisés, ri' na cacolobetaj ta alak» quecha'.

² Ec'u ri Pablo y ri Bernabé lic xebec chunimal puwi wa c'utunic cuc' wa'chijab. Q'uisbal re, conoje xquich'ob rakan sa' ri caqui'ano; e quetak bi ri Pablo y ri Bernabé cuc' jujun chic cha' quebec Jerusalem re quebe'ch'a't chwi wa' cuc' ri e tako'n re ri Jesús y jujun chic e aj wach re riglesia.

³ E tak c'u ri etakom bi cuma riglesia re Antioquía, xebic'ow pa tak ri tinamit re Fenicia y re Samaria, y chujujunal luwar xquitzijoj su'anic ri na e ta aj judi'ab quiya'om can ri quibinic re ojertan cha' e caquitakej ri Dios. Ruma c'u ri' wa', conoje ri hermanos xetaw re, lic xequi'cot che.

⁴ Echiri' xebopon Jerusalem, xec'ul cuma tak ri hermanos, ri e tako'n y jujun chic e aj wach re riglesia. Xquitzijoj c'u chique ronoje ri u'anom ri Dios cuc'. ⁵ Pero e c'o jujun chique

ri quicojom rubi' ri Cristo e cuq'u'il ri aj fariseos, rique xeyactajic y jewa' xquibi'ij:

—Lic chirajawaxic cacoj ri retalil re circuncisión chique tak ri na e ta aj judi'ab caquicoj rubi' ri Dios yey quetak che caqui'an janipa ri cubi'ij ri Tzij Pixab re ri Moisés —xecha'.

⁶ Xquimol c'u quib ri e tako'n y jujun chic e aj wach re riglesia cha' quech'a't chwi wa'. ⁷ Lic naj c'ut xquichapala' quib chiquiwach puwi wa'. Tec'uchiri', ri Pedro xyactajic y xubi'ij chique:

—Hermanos achijab, ralak eta'am alak jampa chi lo k'ij wa' ic'owinak chwi xinucha' lo ri Dios cha' chi nuchi' ri'in, ri na e ta aj judi'ab caquita ri Utzilaj Tzij y caquicoj c'u rubi' ri Cristo. ⁸ Ri Dios, ri reta'am sa' ri c'o chupa ri canima' ri ticawex, e xc'uluw que ri na e ta aj judi'ab quicojom rubi' ri Cristo. Yey xuc'ut wa' echiri' xuya lo ri Santowilaj Ruxlabixel chique rique jela' pacha' xu'an kuc' ri'oj. ⁹ Y junam xeril rique kuc' ri'oj, ma xujosk'ij ri canima' che ri mac ruma ri cubulibal quic'u'x.

¹⁰ »Ec'u wo'ora, ¿su'chac capetisaj alak royowal ri Dios ruma ri queya alak chuxe' uq'uiyal takanic ri na e ta aj judi'ab quicojom rubi' ri Cristo? Wa' e pacha' eka'n cacoj alak chiquikul. Yey wa eka'n, na xquich'ij tane ruc'axic ri kati'-kamam ojertan y na kach'ijom tane ruc'axic ri'oj. ¹¹ No'j c'u ri'oj e cakajiquiba' uwach wa': Xa ne ruma ri unimal rutzil uc'u'x ri Kanimajawal Jesús cojcolobetaj ri'oj* jela' pacha' rique —xcha'.

¹² Conoje c'u ri' ruq'uiyal ticawex xetz'inca'nic y xquiya quixiquin chique ri Bernabé y ri Pablo, ma caquitzijoj ri nimak tak c'utubal re chuk'ab u'anom ri Dios cuma rique chiquixo'l ri na e ta aj judi'ab.

¹³ Echiri' xquiq'uis quech'a't rique, ri Jacobo jewa' xubi'ij:

—Hermanos, chinta na pe alak:

¹⁴ Ri Simón xutzijoj puwi ri nabe laj

* 14:26 Hch. 13:1-3 * 15:11 Na junta junok curik ri colobetajic xa ruma cutakej takanic. Ef. 2:8-9

echiri' ri Dios xuk'alajisaj rib chiquiwach ri na e ta aj judi'ab† cha' chiquixo'l rique quebucha' janipa ri quebu'ana utinamit. ¹⁵ Y wa' cu'ana xaki jun ruc' ri quitz'ibam can ri k'alajisanelab puwi ri ubi'im lo ri Dios:

¹⁶ Ic'owinak c'u wa', quintzelej lok y canyac tanchi ri rocho ri rey David wuluwubinak bi,‡ canc'ojoj c'u ri tzakinak bi che y can'an c'ac' che.

¹⁷ Can'an wa' cha' ri nic'aj chic ticawex caquitzucuj ri Dios, wa' e tak ri tinamit na e ta aj judi'ab, conoje ri e nu'anom nutinamit chique ma quicojom ri nubi'.

¹⁸ E wa' ri xubi'ij ri Dios Kajawxel, yey e ri uk'alajisam chi lo ojertan. *Am. 9:11-12*

¹⁹ Ruma c'u la', chinuwach ri'in na utz taj we cakasachisaj quina'oj ri na e ta aj judi'ab quicojom rubi' ri Kanimajawal. ²⁰ Ri ka'ana' e chojtz'iban pan chique y kaya'a pan quina'oj cha' caquesaj quib che tak ri cach'ulan re junok pacha' tak ri ic'owisam chwa juna tiox, cha' na caquetz'abej ta uwa quik'ij cuc' jujun chic na quic'ulel taj, cha' na caquitij ta ti'ij que awaj xa ejitz'am y cha' na caquitij ta quic'.

²¹ Ma xex wi chwi lo ojertan, ronoje k'ij re uxlanibal pa tak sinagogas e c'o ri quebajilan re y quetzijon puwi ri Tzij Pixab tz'ibital can ruma ri Moisés —xcha ri Jacobo.

Ri carta re pixabanic chique ri na e ta aj judi'ab

²² E tak ri e tako'n y ri jujun chic e aj wach re riglesia cuc' conoje ri hermanos, xuc'ul quic'u'x ri quecha' jujun achijab chiquixo'libal re que-tak bi pa ri tinamit Antioquía ruc' ri Pablo y ri Bernabé cha' caquic'am

bi jun carta re pixabanic chique ri na e ta aj judi'ab quicojom rubi' ri Cristo. Ec'u xequicha' ri Judas ri cabi'x Barsabás che y ri Silas, ma lic chom ilitajinak ri quibinic quisilabic chiquiwach ri hermanos. ²³ Xya' c'u bi ri carta paquik'ab, jewa' cubi'ij:

E ri'oj oj tako'n re ri Cristo cuc' ri e aj wach re riglesia y conoje ri hermanos wara Jerusalem, cakaya pan rutzil wach alak hermanos, ri c'o alak chupa ri tinamit Antioquía y pa tak ri tinamit re Siria y re Cilicia. Cakatz'ibaj c'u che ralak, ri na alak ta aj judi'ab yey cojom alak rubi' ri Cristo.

²⁴ Ri'oj katom e c'o jujun ebelinak chikaxo'l ri'oj, tob na oj ta xojtakaw bi que; yey rique quetajin che ucojic ri na utz taj pa jolom alak ruc' ri quich'a'tem y jec'ula' quisachisam ri na'oj alak.§

²⁵ Ruma c'u la', xojch'a't ri'oj chikawach puwi wa', y ri xojcanaj wi e quekacha' achijab y quekatak bi uc' alak junam cuc' ri hermanos lic c'ax quekana'o, wa' e ri Bernabé y ri Pablo. ²⁶ Wa' wa'chijab quiya'om canima' tob ne quecam ruma ri caquitzijoj rubi' ri Kanimajawal Jesucristo. ²⁷ Yey quekatak bi ri Judas y ri Silas. Chiquichi' c'u rique cak'alajin wi chiwach alak ronoje wa xkatak ubi'xiquil che alak.

²⁸ Ma chwach ri Santowilaj Ruxlabixel ri Dios y chikawach ri'oj, na utz taj cakacoj juna chic eka'n pawil alak, xew c'u chirajawaxic tak wa'.** ²⁹ Matij alak ri ic'owisam chi chiquiwach ri tiox;✧ matij alak quic',✧ matij alak ti'ij que awaj xa ejitz'am;†† y metz'abej ne uwa k'ij alak cuc' jujun chic na alak

† **15:14** Ri nabe laj echiri' ri Dios xutak lo ri Ruxlabixel paquiwi ri na e ta aj Israel e pa rocho ri Cornelio. Hch. 10:24-48 ‡ **15:16** Wa' e jun c'ambal na'oj. Que'elawi ri Dios cucoj jun nimalaj takanel puc'axel ri rey David, wa' e ri Kanimajawal Jesucristo. § **15:24** E c'o jujun ebelinak bi Jerusalem, xebopon c'u pa tak riglesias que tak ri na e ta aj judi'ab yey xebequitak che ucojic ri retalil re circuncisión y che utakexic ri cojobal que raj judi'ab. ** **15:28** C'o más pixabanic takal chike konoje ri kacojom rubi' ri Cristo, pacha' mojcamisenic, mojelek'ic, maka'an rak'ubal chirij junok, kalok'oj quik'ij kachu-kakaw, c'ax chekana'a ri jujun chic. ✧ **15:29** 1 Co. 10:7, 14-18, 21 ✧ **15:29** Gn. 9:4; Lv. 17:10-16 †† **15:29** We xa jitz'am juna awaj, ri' c'a c'o quic' chupa.

ta c'ulan cuc'.^{††} We quesaj c'u ib alak che ronoje wa',^{§§} catajin alak ri' che u'anic ri jusuc'.

Chila c'u ib alak.

³⁰ Ec'u ri echa'talic xquimaj bi quibe pa ri tinamit Antioquía. Ec'uchiri' quimolom chi quichi' ri quicojom rubi' ri Cristo, xquiya ri carta chique.

³¹ Echiri' ri hermanos e c'o Antioquía xcajilaj wa carta, lic xequi'cotic ma ri tz'ibital chupa xucuba' quic'u'x. ³² Ec'u ri Judas y ri Silas, ruma e ek'alajisay runa'oj ri Dios, lic naj xech'a't cuc' ri hermanos, xequipixabaj cha' lic caquichuk'ubej quib y jela' xquinimarisaj quic'u'x. ³³ Xquic'owibej c'u jujun k'ij chiri'.

Tec'uchiri', xetak bi chi utzil chomal cuma ri hermanos chila', cha' jela' quetzelej tanchi cuc' ri etakayom lo que. ³⁴ No'j ri Silas xuch'obo utz cacana'j can chiri'. ³⁵ Ec'u ri Pablo y ri Bernabé xec'o'ji' pa ri tinamit Antioquía. Y junam cuc' uq'uiyal cachbi'il, xec'utun chwi Ruch'a'tem ri Dios y ri Utzilaj Tzij puwi ri Kanimajawal.

Rucalaj ubenam ri Pablo che utzi-joxic ri Utzilaj Tzij

³⁶ Ic'owinak chi c'u jujun k'ij, ri Pablo xubi'ij che ri Bernabé: «Chojtzelej tanchi cuc' ri quicojom rubi' ri Cristo pa tak ronoje ri tinamit pa katzijom wi ri Utzilaj Tzij re ri Kanimajawal, cha' quebe'kila' sa' ri qui'anom» xcha'.

³⁷ Yey ri Bernabé xraj cuc'am bi ri Juan cuc', wa' e ri cabi'x Marcos che. ³⁸ No'j ri Pablo na xuc'ul ta uc'u'x que'ec ri Marcos cuc', ma ri Marcos xerok'otaj can pa tak ri luwar re Panfilia y na erachbilam ta chi lo che ri chac.* ³⁹ Xebec c'u chunimal puwi wa' yey na jinta xe'ela wi ri quich'a'tem chiquiwach. Ruma c'u ri', ri Pablo y ri Bernabé xquijach bi

quib. Ri Bernabé xuc'am bi ri Marcos ruc'. Xebec c'u pa barco y xebopon pa ri isla Chipre.

⁴⁰ Yey ri Pablo xucha' bi ri Silas cha' carachbilaj bi che rubenam. Ec'u ri hermanos e c'o Antioquía xqui'an orar y xquitz'onoj bi ri unimal rutzil uc'u'x ri Dios paquiwi'; tec'uchiri', xquimaj bi quibe. ⁴¹ Xebic'ow c'u pa tak ri luwar re Siria y re Cilicia, caquinimarisaj can quic'u'x ri caquimol quib pa rubi' ri Cristo pa tak ri tinamit.

16

Ri Timoteo querachbilaj bi ri Pablo y ri Silas

¹ Tec'uchiri', xebopon ri Pablo y ri Silas pa ri tinamit Derbe y pa ri tinamit Listra. Chiri' Listra xquirik jun ala Timoteo rubi'. Rire ruc' ruchu quicojom rubi' ri Cristo. Ruchu e cuq'u'il raj judi'ab, no'j rukaw e cuq'u'il raj griego. ² Lic chom ruch'a'tibexic ri Timoteo caqui'an ri hermanos e c'o pa ri tinamit Listra y pa ri tinamit Iconio. ³ Xraj c'u ri Pablo cuc'am bi ruc'; pero nabe na, xucoj ri retalil re circuncisión che. Wa' e cuma raj judi'ab e c'o pa tak wa luwar, ma conoje queta'am rukaw ri Timoteo e cuq'u'il raj griego.

⁴ Chupa tak c'u ri tinamit pa quebic'ow wi, xquiya tak can ri pixabanic ya'tal chi cuma ri e tako'n re ri Jesús y ri jujun chic e aj wach re riglesia e c'o Jerusalem,* cha' jela' caquitijoj quib che. ⁵ Jec'uri'la' tak ri quicojom rubi' ri Cristo lic xnimar ri cubulibal quic'u'x y catajin quiq'uiyaric ri jujun k'ij.

Ri Dios cuk'alajisaj che ri Pablo que'ec Macedonia

⁶ Xebic'ow c'u pa tak ri luwar re Frigia y re Galacia, yey e ri Santowilaj Ruxlabixel ri Dios xebuk'atej caquitzijoj ri Utzilaj Tzij chiri' pa ri luwar

^{††} 15:29 Pa cocho tak ri tiox e c'o ticawex caquibi'tisij quib chique ri e aj tioxab cha' quemacun cuc', ma chiquiwach rique wa' cuc'ul quic'u'x tak ri tiox. ^{§§} 15:29 Xya' tak wa pixabanic cha' ri c'ac' hermanos na e ta aj judi'ab caquesaj quib che tak ri quilok'nimaxic ri tiox. Jec'ula' raj judi'ab junam cuc' ri na e ta aj judi'ab quec'o'ji' chi utzil chomal pa riglesia. * 15:38 Hch. 13:13 * 16:4 Hch. 15:23-29

re Asia.* ⁷ Ec'uchiri' xebopon chuchi' tak pan ri luwar re Misia, xquitij uk'ij caquimaj bi pa tak ri luwar re Bitinia, pero ri Ruxlabixel ri Dios xebuk'atej. ⁸ Jec'uri'la', jusuc' xebic'ow pa tak ri luwar re Misia y xekaj pa ri tinamit Troas.

⁹ Chak'ab c'ut xk'alajisax jun c'utubal re ri Dios chwa ri Pablo. Xrilo c'o jun achi aj Macedonia, tac'alic y quelaj c'u che: «Chic'ow la kuc' Macedonia y chojto'ola» cacha'.

¹⁰ Echiri' xril ri Pablo ri c'utubal xya' chwach, na jampatana xkayijba'† ri kabenam pa tak ri luwar re Macedonia y lic c'u xkajiquiba' uwach e ri Dios ri casiq'uin ke'oj cha' que'katzijoj ri Utzilaj Tzij chila'.

Ri Pablo copon Filipos

¹¹ Echiri' xojel pa ri tinamit Troas, pa barco xoj'ec jusuc' pa ri isla Samotracia y chuca'm k'ij c'ut xoje'ela pa ri tinamit Neápolis. ¹² Chiri' c'u xojel wi y xojopon Filipos, wa' e jun tinamit lic c'o uwach pa ri luwar re Macedonia; yey ri ejekel chupa e uq'uiyal ticawex e aj Roma. Xojc'oji' c'u jujun k'ij chupa wa tinamit.

¹³ Chupa c'u jun k'ij re uxlanibal, xojel bi tza'm ja che ri tinamit y xojopon chuchi' jun nimaya' pa caquimol tak wi quib jujun ixokib re caqui'an orar pa tak k'ij re uxlanibal. Xojtz'uyi' c'ut y xojch'a't cuc' rixokib quimolom quib chiri'.

¹⁴ Jun chique wa' wa ixokib, Lidia rubi', lic cutata' ri cubi'ij ri Pablo. Rixok aj Tiatira y aj c'ay chomilaj tak c'ul morato‡ lic q'ui rajil yey lic culok'oj uk'ij ri Dios. Ec'u ri Kanimajawal xuya che cuc'ul ri Utzilaj Tzij cutzijoj ri Pablo. ¹⁵ Tec'uchiri', xuc'ul ri bautismo junam cuc' conoje ri e c'o pa rocho, y xelaj c'u chike, jewa' cubi'ij:

—We chiwach ralak lic cubul chinu'c'u'x ri'in ruc' ri Kanimajawal, oj alak ri' chiwocho y canaj alak chila'

—cacha'. Jec'ula' xucoj pa kajolom cojcanajic.

¹⁶ Xu'ana c'u jun k'ij echiri' coj'ec pa oración, xkac'ul jun ali c'o jun uxlabixel re aj k'ij ruc'. Wa ali lic cucoj bi uq'uiyal puak chique ri rajaw pa cachacun wi ruma ri k'ijonic cu'ano. ¹⁷ Ec'u wa' wa'li xojuternabej ri Pablo y ri'oj, lic co casiq'uinic, jewa' cubi'ij:

—Wa' wa'chijab e raj chac ri Dios c'o chila' chicaj; rique e caquitzijoj che alak ri be re colobetajic —cacha'.

¹⁸ Uq'uiyal k'ij e ri' e cu'an wa'. Ec'u ri Pablo xic'ow uc'u'x che. Ewi xtzu'n pan chirij y jewa' xubi'ij che ri itzel uxlabixel c'o ruc' rali:

—Chupa rubi' ri Kanimajawal Jesucristo catintako cha' catel bi ruc' wa'li —xcha'. Y chupa la' la jok'otaj xel bi ri itzel uxlabixel che rali.

¹⁹ Ec'uchiri' xquil ri e rajaw na jinta chi ch'acanic coye'em chirij rali, xequichap ri Pablo y ri Silas y xequic'am bi pa ri luwar pa caquimol wi quib ri e aj k'atal tzij re ri tinamit. ²⁰ Xequiya c'u chiquiwach ri e aj k'atal tzij y jewa' xquibi'ij:

—Wa' wa'chijab e cuq'u'il raj judi'ab y quisachisam quina'oj ri katinamit. ²¹ Ma quetajin che uya'ic c'utunic na takal ta chike ri'oj cakac'ulu, y na utz ta nenare' cakatijoj kib che, ma ri'oj aj Roma —xecha'.

²² Ec'uchiri', xeyactaj ri tinamit chiquij; y ri e aj k'atal tzij xetakan che carakix ri quik'u' cha' cabalac'ux quipa. ²³ Tec'uchiri' lic balac'um chi quipa, xequic'am bi pa cárcel. Y ri e aj k'atal tzij xquibi'ij che raj chajal re ri cárcel lic quebuchajij cha' na quebanimaj taj.

²⁴ Ewi raj chajal re ri cárcel xew xuc'ul wa takanic, xebuc'am bi ri Pablo y ri Silas y xebuya'a lo c'a pa lic naj wi upa che ri cárcel. Yey cha' na quebel tulok, xuya ri cakan pa lak' che'. ²⁵ Pero pa tiq'u'il ak'ab c'ut,

* **16:6** Chwach apanok, ri Dios xuya luwar che ri Pablo cutic iglesias chila'. † **16:10** Wara ri Lucas, ri catz'iban wa libro, cujuk cubi'ij "ri'oj". Echiri' jela' cubi'ij, que'elawi ri Lucas rachbilam ri Pablo che ri quibenam. ‡ **16:14** "Morato": Quil "púrpura" pa vocabulario.

ri Pablo y ri Silas caqui'an orar y caquibixoj bixobal che ri Dios. Yey e tak c'u ri e c'o pa ri cárcel quequitata'.

²⁶ Xakic'ate't c'ut xpe jun nimalaj cabrakan y xujek cuyiquiya' c'a pa rakanibal ri cárcel. Na jampatana c'u ri' xejakajob ronoje tak ri oquibal re ri cárcel y xesotosob tak ri carena chique ri e c'o pa ri cárcel.

²⁷ Echiri' xc'un sak chwa raj chajal re ri cárcel, xrilo e jakal tak chi ri oquibal re ri cárcel. Xresaj c'u lo ru espada cha' cucamisaj rib; ma e chwach rire, conoje ri e c'o chi pre-soyil xebanimaj bi.

²⁸ Pero ri Pablo co xsiq'uinic, jewa' xubi'ij che:

—¡Mac'o ma'an che awibil awib, ma konoje oj c'o wara! —xcha'.

²⁹ Ec'u ri' raj chajal re ri cárcel xutz'onoj ak' y lic canic xoc bi. Cabirbotic xuxucuba' rib chiquiwach ri Pablo y ri Silas. ³⁰ Ewi xeberesela' lok y xutz'onoj chique:

—Achijab, ¿sa' ri can'ano cha' quincolobetajic? —xcha'.

³¹ Ec'u rique xquibi'ij che:

—Chacojo rubi' ri Kanimajawal Jesucristo y jela' catcolobetaj ri'at cuc' conoje ri e c'o pa wocho —xecha'.

³² Xquitzijoj c'u ri Utzilaj Tzij re ri Kanimajawal che rire y chique conoje ri e c'o pa rocho.

³³ Chupa c'u ru orayil la' la ak'ab, raj chajal re ri cárcel xebuc'am bi cha' cuch'aj uwach ri quic'ax. Tec'uchiri', xuc'ul ri bautismo rire junam cuc' conoje ri e c'o pa rocho. ³⁴ Xebuc'am c'u bi ri Pablo y ri Silas chirocho y xebutzuku. Lic xqui'cotic junam cuc' conoje ri e c'o pa rocho ruma ri xc'ubi' quic'u'x ruc' ri Dios.

³⁵ Ec'uchiri' xsakiric, ri e aj k'atal tzij xequitak bi jujun ausiliarib[§] chila' ruc' raj chajal re ri cárcel cha' que'quibi'ij wa': «Chebatzokopij bi la' achijab.»

³⁶ Ec'u raj chajal re ri cárcel xuk'atisaj wa' chwa ri Pablo, jewa' xubi'ij:

—Ri e aj k'atal tzij quitakom lo ubi'xiquil cha' catzokpix bi alak; jec'uri'la' utz quel bi alak chi utzil chomal —xcha chique.

³⁷ Pero ri Pablo xubi'ij chique ri ausiliarib:

—¡Na coj'ec taj! Ma xquibalac'uj kapa chiwachil, yey ri'oj oj aj Roma. Y xojquiya ne pa cárcel, tob e la' na jinta k'atbal tzij xqui'ano cha' cak'alajinic we c'o kamac o na jintaj. Yey c'u ri' wo'ora, xa xe'lak'ay cacaj cojquesaj bi. ¡Wa' na usuc' ta q'uenok! We e ri', e chepeta rique cha' cojquesaj bi —xcha'.

³⁸ Ec'u ri ausiliarib xe'quik'atisaj wa' chiquiwach ri e aj k'atal tzij, y rique lic xquixi'ij quib echiri' xquito e aj Roma ri Pablo y ri Silas.

³⁹ Xebopon c'u cuc' y lic xquitz'onoj chique quicuyu quimac. Tec'uchiri', xequesaj lo chupa ri cárcel y lic xebelaj chique cha' quebel bi chupa ri tinamit.

⁴⁰ Ewi ri Pablo y ri Silas xebel bi chupa ri cárcel y xquimaj bi chirocho ri Lidia. Xebe'quila c'u can ri quic-om rubi' ri Cristo, xequipixabaj y xquinimarisaj can quic'u'x. Y xebel c'u bi chiri'.

17

Ri Pablo copon Tesalónica

¹ Ri Pablo, ri Silas y ri Timoteo xebic'ow pa tak ri tinamit Anfípolis y Apolonia, y xebopon c'u pa ri tinamit Tesalónica. Chiri' c'u ri' c'o jun sinagoga que raj judi'ab. ² Ec'u ri Pablo jela' pacha' xex cu'an wi, xe'ec pa ri sinagoga; oxib semana c'ut e ri' xopon chila' chupa tak ri k'ij re uxlanibal y xch'a't cuc' puwi ri Cristo, Rucha'o'n lo ri Dios. Lic c'ut xuk'alajisaj ri tz'ibital can chupa Ruch'a'tem ri Dios ³ pa cubi'ij wi lic chirajawaxic wi ri Cristo xutij c'ax, xcamisaxic y xc'astaj lo chiquixo'l ri ecaminak. Y xubi'ij c'u chique: «Ri Jesús, wa cantzijoj che alak, wa' e ri Cristo, Rucha'o'n lo ri Dios» xcha'.

§ 16:35 “Ausiliarib”: Rique e pacha' policías wak'ij ora.

⁴ E c'o c'u jujun chique wa aj judi'ab xquicoj rubi' ri Cristo y xebu'an e cuq'uil ri Pablo y ri Silas. Jec'ula', lic e q'ui chique ri e aj Grecia ri caquilok'oj uk'ij ri Dios, xquicoj rubi' ri Cristo; yey e q'ui chique wa' e ixokib lic c'o quiwach.

⁵ Ruma wa' xoc retzelal c'u'x pa canima' raj judi'ab na quicojom ta rubi' ri Cristo. Xequirik c'u jujun achijab itzel quic'u'x xa ek'e'cotel pa tak be, y cuc' wa' xequimol uq'uiyal winak y xequich'u'jerisaj c'u ri tinamit. Xe'quimina c'u quib pa rocho ri Jasón, quequitzucuj ri Pablo y ri Silas cha' quequesaj lok y quequiya paquik'ab ri tinamit. ⁶ Pero na xequirik taj. Xequic'am c'u lo ri Jasón y jujun chique ri quicojom rubi' ri Cristo, y xe'quiya'a chiquiwach ri e aj wach re ri tinamit. Quesiq'uin c'u ri', caquibi'ij: «¡Wa' wa'chijab e quisa-chom quina'oj conoje ri ticawex che ruwachulew ruc' ri quic'utunic, yey wo'ora e c'uninak wara! ⁷ Ri Jasón ebuc'ulum chirocho. Yey rique na e ta caqui'an janipa ri takanic re ri nimalaj takanel re Roma, ma caquibi'ij c'o jun chic rey, Jesús rubi'» quecha'.

⁸ Echiri' ri winak y ri e aj wach re ri tinamit xquita wa', xquijek lic quetucuquic. ⁹ Ec'u ri Jasón y tak ri rachbi'il xquiya chique ri e aj wach jun tojonic chirajawaxic ca'anic cha' quetzokopix bi, y jec'ula' xetzokopix bi.

Ri Pablo copon Berea

¹⁰ Ewi ri hermanos na jampatana chak'ab xequitak bi ri Pablo y ri Silas pa ri tinamit Berea. Echiri' rique xeboponic, xebec pa ri sinagoga que raj judi'ab. ¹¹ Yey wa aj judi'ab e c'o Berea na tz'apil ta ri quina'oj pacha' ri e c'o pa ri sinagoga re Tesalónica, ma xquiya quixiquin che ri xtzijox chique y lic xquic'ulu. Ronoje k'ij c'ut lic caquiya quina'oj chwi Ruch'a'tem ri Dios tz'ibital canok, ma e cacaj caquimaj usuc' we katzij janipa ri tzijom chique. ¹² Lic e q'ui chique wa' xquicoj rubi' ri Cristo. Yey chique ri e

aj Grecia, e q'ui xquicoj rubi' ri Cristo, na xew ta achijab ma chiquixo'l e c'o ixokib lic c'o quiwach.

¹³ Echiri' raj judi'ab e c'o Tesalónica xqueta'maj catajin ri Pablo che utzijoxic ri Utzilaj Tzij re ri Dios pa ri tinamit Berea, xebec chila' y jela' xe'qui'ana chique ruq'uiyal winak pacha' ri qui'anom Tesalónica, xebequich'i'o cha' caquijek quetucuquic.

¹⁴ Ewi ri hermanos na jampatana xquitak bi ri Pablo cha' que'ec chuchi' ri mar y cucoj bi juna barco; yey ri Silas y ri Timoteo xecanaj chirri' Berea. ¹⁵ E c'o c'u jujun xcachbilaj bi ri Pablo y xquic'am bi chupa ri tinamit Atenas. Chila' ri Pablo xubi'ij chique ri aj Berea: «Chibi'ij chique ri Silas y ri Timoteo caquilij lok cha' caquirik quib wuc' wara.» Y echiri' xetzelej Berea, xquibi'ij wa' chique ri Silas y ri Timoteo.

Ri Pablo copon Atenas

¹⁶ Xalok' c'u ri Pablo eroye'em ri Silas y ri Timoteo pa ri tinamit Atenas, rire lic xu'an c'ax ranima' che echiri' xrilo quiya'om quib ri tinamit che quilok'nimaxic uq'uiyal tiox. ¹⁷ Ewi pa ri sinagoga xujek cach'a't cuc' ri e aj judi'ab y ri na e ta aj judi'ab, ri lic caquilok'oj uk'ij ri Dios. Yey jela' xu'an ronoje k'ij chwa ri c'aybal cuc' conoje ri caquimol quib chirri'.

¹⁸ Chiquixo'l rique e c'o jujun achijab cabi'x chique “e aj na'oj”, wa' e cuq'uil raj epicúreos y raj estóicos. Rique xquichapala' quib ruc' ri Pablo puwi ri cuc'utu. Jujun caquibi'ij: «¿Sa' ri caraj cubi'ij wa werewotel re ch'a'tem?» quecha'. Yey jujun chic caquibi'ij: «Wa' wa'chi pacha' tzijonel que jujun chic dios e aj naj» quecha'. Xquibi'ij wa' ma ri Pablo cutzijoj ri Utzilaj Tzij re ri Jesús chique y catzijon puwi ri c'astajibal.

¹⁹ Xquic'am c'u bi ri Pablo y xe'quiya'a pa ri luwar Areópago quecha che, pa caquimol wi quib rachijab lic c'o quina'oj. Y jewa' xquibi'ij che: «Ri'oj cakaj caketa'maj

sa' wa c'ac' c'utunic ca'an rilal, ²⁰ ma lic junwi ri c'utunic catzijoj la chikawach ri'oj. Cakaj c'ut cakamaj usuc' sa' que'elawi ri cac'ut la» xecha'. ²¹ Jela' xquibi'ij ma conoje raj Atenas y ri e aj naj ejekel chiri', xew benak quic'u'x che tak ri caquito y quech'a't chwi tak c'ac' na'oj catajin utayic.

²² Ewi ri Pablo, xtaq'ui' chiquixo'l pa ri Areópago y jewa' xubi'ij:

«Alak achijab aj Atenas, che ronoje ri ca'an alak, canwilo e lic benak c'u'x alak cuc' tak ri tiox alak. ²³ Ma xalok' xinmalacat pa wa tinamit alak, xinwil tak ri luwar pa quelok'nimaj tak wi ri tiox alak, yey xine'tzak ne chwi jun altar pa tz'ibital wi wa': «CHE RI DIOS NA ETA'MATAL TA UWACH.» Ec'u ri' wa jun calok'nimaj alak uk'ij tob na eta'am ta alak uwach, e wa' Rire ri cantzijoj che alak. ²⁴ Rire e Dios x'anaw ruwachulew y ronoje tak ri c'o chwach yey e Rajaw ruwa caj y ruwachulew. Na jekel ta c'u pa juna ja 'anom xa cuma achijab. ²⁵ Na cajawax ta che Rire ri oj ticawex cakato'o; ma e ne Rire ri caya'w lo chike konoje ri kac'aslem, ri kuxlab y ronoje ri cajawax chike.

²⁶ »Yey xa c'u che jun ticawex, ri Dios xuq'uiyarisaj quiwach conoje ri ticawex cha' quejeki' che ronoje ruwachulew. Yey e Rire ch'oboyom lok pa tak quebe'jekela wi chujujunal tinamit y janipa tak ri quik'ijol che ruwachulew. ²⁷ Xu'an wa' cha' caquitzucuj Rire, yey tob ne pacha' quemalal pa k'eku'm, caquirik na. Pero pakatzij wi, ri Kakaw na naj ta c'o wi chike chikajujunal. ²⁸ Ma ruma ri Dios oj c'aslic, cojsilabic y oj jekel che ruwachulew; e pacha' ri quibi'im can jujun aj tz'ibanel re ri tinamit alak: «Ri'oj oj ralc'o'al ri Dios.»

²⁹ »Ruma c'u oj ralc'o'al ri Dios, makach'ob c'u ri' we Rire junam uwach cuc' ri tiox xa e 'anom ruc' oro, ruc' plata o ruc' abaj, xa yijbitalic y no'jital cuma rachijab. ³⁰ Ojertan lo ri' jela' ri quina'oj tak ri winak puwi ri Dios, no'j ya c'u xic'ow ruk'ijol

wa'. Ma wo'ora ri Dios quebutak conoje ri ticawex che ronoje luwar cha' caquitzelej quitzij chwach. ³¹ Ma Rire uk'atom chi jun k'ij echiri' cu'an ri jusuc' k'atbal tzij paquiwi conoje ri ticawex che ruwachulew. Cu'ana c'u wa' ruma ri Jun Achi Ucha'om lok. Yey echiri' ri Dios xuc'astajisaj lo ri Jesús chiquixo'l ri ecaminak, e xujiquiba' uwach Rire e ri Jun ucha'om lok cha' cu'an wa'» xcha'.

³² Ec'uchiri' xquita puwi ri c'astajibal que ri ecaminak, jujun chique xquijek caquich'amij wa'. No'j jujun chic xquibi'ij: «Cakata tanchi la puwi wa c'utunic juna chic k'ij» xecha'.

³³ Tec'uchiri', xel bi ri Pablo chiquixo'l ri quimolom quib. ³⁴ No'j jujun c'u chique wa ticawex xebu'an e cuq'uil ruc' ri Pablo, ma xquicoj rubi' ri Cristo. Chiquixo'l wa' c'o ri Dionisio (rire e cuq'uil rachijab lic c'o quina'oj, ri caquimol quib pa ri Areópago), yey c'o jun ixok Dámaris rubi' y jujun chic.

18

Ri Pablo copon Corinto

¹ Ic'owinak chi tak wa', ri Pablo xel bi pa ri tinamit Atenas y xe'ec Corinto. ² Chila' xurik jun achi e cuq'uil raj judi'ab, Aquila rubi'. Wa' wa'chi alaxinak pa ri luwar re Ponto. Ri Aquila ruc' ri rixokil Priscila c'ac' e petinak pa ri luwar re Italia, ma ri takanel Claudio xtakan che quebel bi pa ri tinamit Roma conoje raj judi'ab. Ec'u ri' ri Pablo xe'bina cuc'. ³ Ri quichac rique e xaki junam ruc' ri curik ri Pablo, wa' e caqui'an carpas. E uwari'che xcanaj ri Pablo cuc' y junam quechacunic. ⁴ Yey ronoje k'ij re uxlanibal xtzijon pa ri sinagoga, cach'a't cuc' ri e aj judi'ab y ri na e ta aj judi'ab y cucoj ri lic usuc' pa quijolom.

⁵ Echiri' ri Silas y ri Timoteo xepe pa ri luwar re Macedonia y xebopon Corinto, ri Pablo xa jumul xuya rib che utzijoxic ri Utzilaj Tzij, cuk'alajisaj wa' chiquiwach raj

judi'ab: Ri Jesús e ri Cristo, Rucha'o'n lo ri Dios.

⁶ Pero raj judi'ab xquijek caquik'atej ri Pablo y caquibi'ij itzel tak ch'a'tem chirij. Ec'u ri Pablo xujabaja' ruk'u' chiquiwach, c'utubal re na utz ta ri caqui'ano, y jewa' xubi'ij chique: «Chi'ij c'u alak quel wi ri cacam alak pa mac; na numac ta chi ri'in che alak. Chwi c'u wo'ora qui'ntzijo ri Utzilaj Tzij chique ri na e ta aj judi'ab» xcha'.

⁷ Xel c'u bi pa ri sinagoga y xe'ec chirocho jun achi Justo rubi'. Rire lic c'o xi'in ib pa ranima' chwach ri Dios, yey ri rocho xa putzal ri sinagoga c'o wi. ⁸ Ec'u raj wach re ri sinagoga, jun achi Crispo rubi', xucoj rubi' ri Kanimajawal cuc' conoje ri e c'o pa rocho. Y lic e q'ui chique raj Corinto xquita ri Utzilaj Tzij, xquicoj rubi' ri Cristo y xquic'ul ri bautismo.

⁹ C'o c'u jun ak'ab ri Kanimajawal xuk'alajisaj jun c'utubal chwach ri Pablo, jewa' xubi'ij che: «Maxi'ij awib; e chatzijo ri Utzilaj Tzij y matanaba' ubi'xiquil. ¹⁰ Ma Ri'in in c'o awuc' y na jinta c'o ca'anaw ri na utz taj chawe; ma lic e q'ui ri e nutinamit e c'o chupa wa tinamit» xcha'.

¹¹ Ec'u ri Pablo xcanaj chiri' pa ri tinamit Corinto jun junab ruc' wakib ic'; ewi cac'utun chwi ri Utzilaj Tzij re ri Dios chiquiwach ri ticawex.

¹² Yey xu'ana chupa tak ri k'ij echiri' ri Galión catakan puwi tak ri luwar re Acaya, raj judi'ab xqui'an tzij chiquiwach cha' queyactaj chirij ri Pablo. Xquic'am c'u bi pa k'atbal tzij ¹³ y jewa' xquibi'ij:

—Wa' wa'chi catajin che ucojic pa quijolom ri ticawex cha' caquilok'oj uk'ij ri Dios ruc' junwi chi c'utunic, na e ta pacha' ri cubi'ij tak ri tziypixab ke ri'oj —xecha'.

¹⁴ Yey echiri' ri Pablo xraj cach'a'tic, ri takanel Galión jewa' xubi'ij chique:

—Alak aj judi'ab, we u'anom ri na usuc' taj o juna mac lic nim chirij

ri k'atbal tzij, ri' lic ube canto sa' ri cabi'ij alak y cank'at c'u tzij puwi'.

¹⁵ No'j we xa e petowinak chwi tak ch'a'tem, chwi tak bi'aj y chwi tak ri tziypixab e alak, yijba' c'u ri' alak chiwach ralak. Ma na cuaj taj quinu'an aj k'atal tzij ri'in puwi tak wa' — xcha'. ¹⁶ Y ruc' wa' xeberesaj lo chupa ri k'atbal tzij.

¹⁷ Ec'uchiri', conoje ri e aj Grecia xquichap ri Sóstenes,* ri aj wach re ri sinagoga. E la' chwach ri k'atbal tzij xquijek caqui'an c'ax che; pero ri takanel Galión na xoc ta c'ana il che wa'.

¹⁸ Ec'u ri Pablo lic uq'uiyal k'ij xu'an chiri' cuc' ri hermanos. Tec'uchiri' xuya can ri q'uisbal uch'a'tem chique, xoc pa barco y xe'ec pa ri luwar re Siria, junam cuc' ri Priscila y ri Aquila. Echiri' xebic'ow chupa ri tinamit Cencrea, ri Pablo xusocaj bi ruwi' ruma u'anom jun bi'tisinic che ri Dios.

¹⁹ Chwi c'u ri' xebopon pa ri tinamit Éfeso y chiri' xecanaj can ri Priscila y ri Aquila. Xoc c'u ri Pablo chupa ri sinagoga y xujek catzizon chiquiwach raj judi'ab. ²⁰ Wa' lic xebelaj che cha' cacana' can uq'uiyal k'ij chiri' cuc'; no'j rire xubi'ij na utz taj cacana' jic. ²¹ Xew c'u xuya can ri q'uisbal uch'a'tem chique, jewa' xubi'ij: «Lic chirajawaxic in c'o Jerusalem chupa wa nimak'ij catajin lok; yey quinc'un tanchi uc' alak we ri Dios cuya luwar chwe quintzelej lok» xcha'.

Xoc c'u chupa jun barco y xel bi Éfeso.

Ri Pablo catzelej Antioquía y cujek ri urox ubenam che utzijoxic ri Utzilaj Tzij

²² Echiri' xopon pa ri tinamit Cesarea, xumaj bi ube Jerusalem cha' cu'ya'a rutzil quiwach ri quicojom rubi' ri Cristo chila'. Tec'uchiri', xkaj pa ri tinamit Antioquía ²³ y xc'o'ji' ju-jun k'ij chiri'. Tec'uchiri', xel tanchi ubi y xic'ow tanchi pa tak ri luwar re Galacia y re Frigia cha' cu'nimarisaj

* **18:17** “Sóstenes”: Laj e ri xcanaj can puc'axel ri Crispo. Hch. 18:8; 1 Co. 1:1

can quic'u'x conoje ri quicojom rubi' ri Cristo.

Ri Apolos cutzijoj Ruch'a'tem ri Dios pa ri tinamit Éfeso

²⁴ Xopon c'u jun achi pa ri tinamit Éfeso, Apolos rubi'. Wa' e cuq'u'il raj judi'ab yey alaxinak pa ri tinamit Alejandría. E jun achi lic curiko catzijonic y lic c'o reta'am puwi ri tz'ibital can chupa Ruch'a'tem ri Dios. ²⁵ Wa' wa'chi tijotal lo chupa rube ri Kanimajawal. Ruma c'u lic cacha uc'u'x che tak ri cu'ano, uya'om rib che catzijonic y cac'utun chwi janipa ri reta'am chwi ri Kanimajawal, tob xew reta'am ri xuc'ut can ri Juan puwi ri bautismo. ²⁶ Ruc' c'u ronoje ruchuk'ab, ri Apolos xujek cac'utun pa ri sinagoga. Pero echiri' ri Priscila y ri Aquila xquita ruc'utunic, xquisiq'uij bi cuc' utuquel y xquik'alajisaj rusuc'liquil ri be re ri Dios che.

²⁷ Echiri' ri Apolos xraj cak'ax pan pa tak ri luwar re Acaya, ri hermanos xquinimarisaj bi uc'u'x y xquitz'ibaj bi jun carta chique rutinamit ri Dios chila' cha' caquic'ul chi utz. Ec'uchiri' xopon chila', ri Apolos lic xu'ana to'bel chique ri quicojom rubi' ri Cristo ruma ri unimal rutzil uc'u'x ri Dios. ²⁸ Ma na cuxi'ij ta c'ana rib, e la' chiwachil cuc'utu lic katzij ri cubi'ij rire y na je ta la' pacha' ri caquibi'ij raj judi'ab. E cuchapabej ri tz'ibital can pa Ruch'a'tem ri Dios re cuk'alajisaj: Ri Jesús e ri Cristo, Rucha'o'n lo ri Dios.

19

Ri Pablo cac'o'ji' oxib junab pa ri tinamit Éfeso

¹ Ec'uchiri' c'a c'o ri Apolos pa ri tinamit Corinto, ri Pablo xe'ec pa tak ri tinamit c'o lo chwi tak juyub y jela' xopon pa ri tinamit Éfeso. Chila' xebu'rika jujun chique ri quicojom rubi' ri Cristo ² y xutz'ononj c'u chique:

—¿Xc'ul alak ri Santowilaj Ruxlabixel ri Dios echiri' xcoj alak rubi' ri Cristo? —xcha chique.

Yey rique xquic'ul uwach:

—¿Sa' ri' wa'? Ma ri'oj na katom tane q'uenok we c'o Ruxlabixel ri Dios —xecha'.

³ Ec'u ri Pablo xutz'ononj chique:

—¿Sa' c'u ri bautismo xc'ul alak? — xcha'.

Rique xquic'ul uwach:

—E ri bautismo re ri Juan —xecha'.

⁴ Xubi'ij c'u ri Pablo chique:

—Ri bautismo xuya ri Juan e c'utubal re ri tzelebal tzij chwach ri Dios, yey xtzijon chiquiwach ri tinamit cha' caquicoj rubi' ri Jun catajin lo chirij rire; * wa' e ri Jesús, ri Cristo —xcha'.

⁵ Echiri' xquita wa', asu xquic'ul ri bautismo pa rubi' ri Kanimajawal Jesús. ⁶ Ec'uchiri' ri Pablo xuya ruk'ab paquiwi', ri Santowilaj Ruxlabixel ri Dios xkaj paquiwi' y xquijek c'u ri' quech'a't pa jujun chic ch'a'tem na quimajom taj y caquik'alajisaj ri tzij uya'om ri Dios chique. ⁷ Chi conoje wa' laj e juna cablajuj chi achijab.

⁸ Xoc c'u ri Pablo pa ri sinagoga, yey oxib ic' c'u ri' xutzijoj ri Utzilaj Tzij y na xuxi'ij ta c'ana rib che u'anic wa'. C'olic caquichapala' quib cuc' raj judi'ab puwi ri cuc'utu y lic xutij uk'ij cha' cucoj pa quijolom ri usuc' puwi rutakanic ri Dios.

⁹ Pero e c'o jujun chique xqui'an lic co che quib y na xcaj ta c'u xquicoj rubi' ri Cristo; xquijek c'u ri' tzel quech'a't chirij ri C'ac' Be re ri Utzilaj Tzij e la' chiquiwach ruq'uiyal winak. Ec'u ri Pablo xresaj bi rib chiquixo'l y xebuc'am bi ri quicojom rubi' ri Cristo. Chujujunal k'ij c'ut, ri Pablo catzijonic y lic cach'a't chwi tak ruc'utunic chiquiwach, pa ri luwar pa cac'utun wi jun achi Tirano rubi'. ¹⁰ Pa queb junab e ri' jela' xu'an ri Pablo, cac'utunic. Ruma c'u la', conoje ri e aj judi'ab y ri na e ta e aj

* **19:4** Mt. 3:11; Hch. 13:24-25 * **19:10** Xtic iglesias pa Colosas, Laodicea, Hierápolis (Col. 4:13) y jujun chic tinamit re Asia (Ap. 2-3).

judi'ab e c'o pa tak ri luwar re Asia, xquita ri Utzilaj Tzij re ri Kanimajawal Jesús.*

¹¹ Yey ruma c'u ri Pablo, ri Dios xu'an nimak tak milagros na junta c'ana ilitajinak wi. ¹² Xu'ana ne ri', cac'am bi su'to c'ul ic'owisam chirij ri Pablo y caya' chique ri yewa'ib, y jela' quecunutajic yey ri itzel uxlabixel quebel bi chique ticawex.

¹³ Pero e c'o jujun aj judi'ab xa ebic'owel pa tak tinamit yey e quiwach quequesaj itzel uxlabixel chique ri ticawex. Rique xquitij uk'ij caquesaj bi ritzel tak uxlabixel chique ri winak pa rubi' ri Kanimajawal Jesús, jewa' caquibi'ij: «Chupa rubi' ri Jesús ri cutzijojej ri Pablo, quintakan piwi' cha' quixel bi» quecha'.

¹⁴ Jujun chique ri caqui'an wa' e ri wukub uc'ajol jun achi Esceva rubi'. Rire e cuq'uul raj judi'ab yey e cuq'uul ri nimak e aj chacunel pa Rocho Dios.

¹⁵ C'o c'u jun k'ij, jun itzel uxlabixel xuc'ul uwach chique ri wukub uc'ajol ri Esceva: «Weta'am uwach ri Jesús y weta'am china ri Pablo; no'j ri'ix, ¿ix chinok?» xcha'.

¹⁶ Ec'u rachi, ri c'o puk'ab ri itzel uxlabixel, xuc'ak rib paquiwi' y ruc' unimal uchuk'ab xebuchapo, yey ec'u ri' rire ri xuch'ij quichuk'ab y lic xu'an c'ax chique. Jec'uri'la', rique ech'analic xebanimaj bi chupa ri ja e c'o wi. ¹⁷ Y conoje ri ejekel chupa ri tinamit Éfeso xqueta'maj wa'. Ec'u ri e aj judi'ab y ri na e ta aj judi'ab lic xquixi'ij quib che; jec'uri'la', wa' xe'elok re yacbal uk'ij rubi' ri Kanimajawal Jesús.

¹⁸ Lic c'u e q'ui ri' chique ri quicojom rubi' ri Cristo, xec'unic e la' chiwachil caquik'alajisaj tak janipa ri na utz taj qui'anom. ¹⁹ Lic c'u e q'ui chique ri ebu'anom aj itz y aj k'ij, xquic'am tak lo ri quiwuj re majbal itz y xquiporoj chiquiwach conoje. Xajilax c'u ri' janipa cu'ana ri rajil wa' y xu'ana cincuenta mil

chi sakil puak re plata. ²⁰ Jec'uri'la' xuquich wubi rib ri Utzilaj Tzij re ri Kanimajawal y xe'ec uk'alajisaxic ruc' unimal chuk'ab; yey lic catajin quiq'uiyaric ri quecojow re.

²¹ Ic'owinak chi tak wa', ri Pablo xutic pa ranima' que'ec pa ri tinamit Jerusalem echiri' ic'owinak chi pa tak ri luwar re Macedonia y re Acaya. Jewa' xubi'ij: «Echiri' inic'owinak chi chupa ri tinamit Jerusalem, lic chira jawaxic chwe quinopon pa ri tinamit Roma.» ²² Xebutak c'u bi pa tak ri luwar re Macedonia queb chique ri queto'w re, wa' e ri Timoteo y ri Erasto. Yey rire xcanaj chi can jujun k'ij pa tak ri luwar re Asia.

Quetucuc ri winak e c'o Éfeso

²³ Chupa tak c'u la' la k'ij, pa ri tinamit Éfeso xquijek quetucuc ri winak chirij ri C'ac' Be re ri Dios y na xa ta jubik' ri xqui'ano. ²⁴ Wa' e ruma jun achi Demetrio rubi', aj chacunel ruc' ch'ich' re plata. Ruc' wa' wa ch'ich' re plata cu'an raltak co ja, uc'axwach ri rocho ri quitiox Diana.† Yey chwach wa', na xa ta jubik' ri caquich'ac janipa ri quechacun ruc'.

²⁵ Ec'u wa'chi xebumol wa raj chac, cuc' jujun chic aj chaquib junam ri quichac y xubi'ij chique:

«Alak achijab, ralak eta'am alak e ruma wa jun chac lic c'o kabeyomalil.

²⁶ Pero ilom c'u alak y tom alak ri u'anom lo ri Pablo. Ri cu'ano e cucoj pa quijolom uq'uiyal ticawex na e ta dios ri xa e 'anom ruc' quik'ab ri ticawex. Yey na xew ta cuc'ut wa' pa ri katinamit Éfeso, ma ya laj cumaj ronoje pa tak ri luwar re Asia. ²⁷ Ruma c'u wa', c'o ne pa sak na calok' ta chi ri kac'ay, yey laj cu'ana ne ri' chiquiwach ri winak na junta chi uk'ij ri rocho ri nimalaj katiox Diana. Jec'ula', cujek na junta chi uwach ri katiox, ri calok'ox uk'ij pa tak ronoje ri luwar re Asia y che ronoje ruwachulew» xcha'.

† 19:24 “Diana”: E ubi' caquibi'ij ri e aj Roma che wa jun tiox, no'j ri e aj Grecia “Artemisa” quecha che.

²⁸ Echiri' xquita tak wa', lic xpe coy-
owal y xquijek quesiq'uinic: «¡Nim
uk'ij ri tiox Diana que ri aj Éfeso!»
quecha'.

²⁹ Xpe c'u jun nimalaj sachibal
na'oj chique conoje ri tinamit. Quete-
nenic xe'quiya'a quib pa ri nimalaj
estadio pa caquimol wi quib ri tina-
mit. Y xequichap c'u ri Gayo y ri
Aristarco; rique e aj pa ri luwar re
Macedonia y e rachbi'il ri Pablo.

³⁰ Xraj c'u ri Pablo coc pa ri estadio
cha' cach'a't chiquiwach ruq'uiyal
winak, no'j ri quicojom rubi' ri Cristo
xquik'atej. ³¹ Yey e c'o ne jujun
chique ri e aj k'atal tzij re pa tak ri
luwar re Asia, e ramigos ri Pablo;
rique xquitak ubi'xiquil che y lic xe-
belaj che cha' na coc tubi pa ri estadio
pa etenel wi ri winak.

³² Ec'u ri winak etenel chiri'
lic xsach quina'oj y xquijek que-
siq'uinic. Junwi tak ri caquibi'ij
y na catataj ta chi nenare' sa' tak
ri caquibi'ij. Yey lic e q'ui chique
na queta'am ta nenare' su'chac
quimolom quib.

³³ E c'o c'u jujun aj judi'ab
xquiminenej bi chiquiwach conoje,
jun achi Alejandro rubi'. Ec'uchiri',
jujun chic xe'quijec'a pan chiquixo'l
ruq'uiyal winak. Ec'u rire xu'an jun
c'utubal ruc' ruk'ab cha' caya'i' che
cuto'bej rib.

³⁴ Pero echiri' ri winak xqueta'maj
rire e cuq'uul raj judi'ab, conoje xa
jun ubi'xiquil quesiq'uinic, laj queb
ora xquich'ijo caquibi'ij: «¡Nim uk'ij ri
tiox Diana que ri aj Éfeso!» quecha'.

³⁵ Ec'u ri aj tz'ib re ri tinamit, echiri'
xuch'ij quicubaxic ruq'uiyal winak,
jewa' xubi'ij:

«Alak achijab aj Éfeso, ¿china ri
na eta'mayom ta re we ri tinamit
que ri aj Éfeso e chajal re ri ro-
cho ri nimalaj tiox Diana yey junam
ruc' ruc'axwach, ri kajinak lo chi-
caj? ³⁶ Yey che tak wa', na utz ta
c'u ri' c'o junok cubi'ij na katzij taj.
E uwari'che lic chirajawaxic cacubi'
alak. Mac'o ma'an alak pa ch'u'jilal;

nabe na ch'obo alak rakan chi utz
ri ca'an alak. ³⁷ Cambi'ij wa', ma
ec'amom lo alak wa' wa'chijab tob
rique na e tane macuninak chirij ri
templo o chirij ri katiox.

³⁸ »Yey we ri Demetrio cuc' ri
rachbi'il c'o quich'a'oj chirij junok,
ri lic ube e quiya'a wa' pa k'atbal
tzij; ma e c'o e aj k'atal tzij ya'tal
paquik'ab caquita que ri winak
caquirak'uj quib chiquiwach. ³⁹ Yey
we c'a c'o ca'aj alak catz'onoj alak
chiquij, ri lic ube e caya'i' wa' chiqui-
wach conoje ri tinamit y cayijbax
chi usuc'liquil. ⁴⁰ Ma ruma ri x'ani'
wak'ij, c'o ne pa sak catz'ak kachi'
cojch'o'jin chirij ri k'atbal tzij y na
jinta c'o quel wi we xtz'onox chike
sa' la cojtucuc wi» xcha'.

⁴¹ Xew c'u xubi'ij wa' xuq'uisbej
utza'm ri quimolom wi quib.

20

Ri Pablo quic'ow pa tak ri luwar re Macedonia y Grecia

¹ Echiri' xtani' ri quetucuc ri winak,
ri Pablo xebusiq'uij ri quicojom rubi'
ri Jesús. Xebupixabaj c'ut y xe-
bulak'apuj. Echiri' xuq'uisbej can
uch'a'tem cuc', xel bi y xe'ela pa tak ri
luwar re Macedonia. ² Xic'ow c'u pa
tak wa luwar cha' ruc' uq'uiyal pix-
abanic cunimarisaj quic'u'x ri quico-
jom rubi' ri Cristo.

Tec'uchiri', xe'ela pa tak ri luwar
re Grecia. ³ Oxib ic' xcanaj can
ri Pablo chiri'. Uch'obom chi c'ut
que'ec Siria pa barco; pero raj judi'ab
xqui'an tzij chiquiwach cha' caqui'an
c'ax che echiri' cu'cojo bi ri barco.
Ec'u ri Pablo xreta'maj ri quina'oj
na utz taj chirij; ruma c'u ri', xu-
jalc'atij ruch'obom cha' catzelej pa
tak ri luwar re Macedonia.

⁴ E c'o hermanos xcachbilaj bi c'a
pa tak ri luwar re Asia. Wa' e:
ri Sópater aj Berea,
ri Aristarco,
ri Segundo aj Tesalónica,
ri Gayo aj Derbe,
ri Timoteo,
yey ri Tíquico y ri Trófimo, ri e aj Asia.

⁵ Ec'u rique xenabej bi y xojcoy'ej chupa ri tinamit Troas.

⁶ Yey ri'oj,* echiri' ic'owinak chi ri nimak'ij echiri' catij ri pam na junta levadura che, xojel pa barco chiri' Filipos y pa wo'ob k'ij xojopon cuc' pa ri tinamit Troas. Chiri' xojcanaj can wukub k'ij.

Ri Pablo quebuch'a'bej can ri hermanos e c'o Troas

⁷ Ri nabe k'ij re ri semana xkamol kib cuc' ri quicojom rubi' ri Cristo cha' cakatij ri cena re ri Kanimajawal. Ec'u ri Pablo cac'utun chiquiwach conoje. Yey ruma chirajawaxic quel bi rire chuca'm k'ij, xnajtir che ri c'utunic cu'ano. Xtic'oj c'u ri' rak'ab y c'a cach'a'tic. ⁸ Yey pa ri kamolom wi kib e chupa ruroxle' ja chicaj y uq'uiyal ak' e tzijitalic.

⁹ C'o c'u jun ala Eutico rubi' tz'ul chupa ri ventana yey oquinak lo jun ukusil waram che ruma ri lic naj cach'a't ri Pablo. Benak c'u ri' ruwaram, xtzak lo che churox le' ja c'a pulew y caminak xe'yacok.

¹⁰ Ec'u ri Pablo xkaj lok, xjupi' puwira, xulak'apuj y jec'uwa' xubi'ij: «Maxi'ij ib alak, ma c'aslic» xcha'.

¹¹ Tec'uchiri', ri Pablo xak'an tanchic y xujach ri cena re ri Kanimajawal. Ec'uchiri' utijom chi ri cena, xujek tanchi cach'a'tic y xuq'uisbej wa' c'a pa rusakribal. Tec'uchiri', xumaj bi ube. ¹² Ec'u ri Eutico e la' c'aslic xquic'am bi chirocho; ruma c'u wa' lic xbochi'itaj quic'u'x conoje.

Ri Pablo quebuch'a'bej can ri hermanos e c'o Mileto

¹³ Ri Pablo xraj que'ec chirakan pa ri tinamit Asón. Yey ri'oj xojnabej bi pa barco cha' que'kac'ama bi ri Pablo chiri'. Jela' xka'ano ma e oj canajinak can wi ruc' rire. ¹⁴ Xkarik c'u kib ruc' rire pa ri tinamit Asón. Yey junam ruc' rire xoj'ec pa barco y xkamaj bi kabe pa ri tinamit Mitilene. ¹⁵ Xojel c'u bi chiri' pa barco y chuca'm k'ij xojic'ow chwach ri isla

Quío. Che c'u ri jun chic k'ij xojopon Samos, wa' e jun tinamit c'o chuchi' ri mar. Tec'uchiri', xojopon pa ri tinamit Trogilio y chiri' xojuxlanic. Chuca'm k'ij c'u ri' xojopon pa ri tinamit Mileto. ¹⁶ Jela' xka'ano, ma ri Pablo uch'obom chic na quic'ow ta pa ri tinamit Éfeso cha' na cabayitaj ta chila' pa tak ri luwar re Asia. Ri rilim wi e ma caraj we c'a xakare' cu'maja ri nimak'ij re Pentecostés chila' Jerusalem.

Ri Pablo quebuch'a'bej can ri hermanos e petinak Éfeso

¹⁷ Ec'uchiri' oponinak chi ri Pablo pa ri tinamit Mileto, xutak quisiq'uixic ri e aj wach re riglesia c'o Éfeso. ¹⁸ Echiri' xec'unic, ri Pablo xubi'ij chique:

«Ralak lic ilom alak sa' ri nubinic chiwach alak chwi lo ri nabe k'ij echiri' xinc'un pa tak wa luwar re Asia. ¹⁹ Xin'an ruchac ri Dios chixo'libal alak ruc' ronoje uch'uti'nal nuc'u'x y na xa ta jubik' ruwa'al nuwach elinak y pa rewi ruq'uiyal c'axc'obic nutijom ruma ri itzel quina'oj raj judi'ab chwij. ²⁰ Na ruc' ta c'u ri', na junta c'o wewam chiwach alak, ma xink'alajisaj ronoje ri c'o cutikoj che ri binic silabic alak, yey xinc'utun chiwachil y pa tak ocho alak. ²¹ Chiquiwach c'u raj judi'ab y ri na e ta aj judi'ab, xink'alajisaj lic chirajawaxic chique caquitzelej quitzij chwach ri Dios y cacubi' quic'u'x ruc' ri Kanimajawal Jesucristo.

²² »Ec'u wo'ora, ri Ruxlabixel ri Dios xucoj pa wanima' quin'ec pa ri tinamit Jerusalem tob c'amaja' weta'am sa' ri canc'ulumaj na chila'; ²³ xew weta'am ri ubi'im ri Santowilaj Ruxlabixel ri Dios chwe. Ma pa ronoje tak ri tinamit quinic'ow wi, cujiquiba' uwach chwe ri catajin lo panuwi'; wa' e ri quinc'am bi pa tak cárcel y quinya' pa uq'uiyal c'axc'obic. ²⁴ Pero ri'in na junta c'ana cubi'ij nuc'u'x che, na can'an

* **20:6** "Ri'oj": Wa' que'elawi ri Lucas, ri xtz'iban re ri libro, c'o tanchi cuc'.

tane che ri nuc'aslem pacha' lic c'o uwach chinuwach ri'in; xew cuaj canq'uis u'aniquil ruc' qui'cotemal ri nutakem pan che ri nuchac, ri xya' chwe ruma ri Kanimajawal Jesús. Wa'e ruk'alajisaxic ri Utzilaj Tzij re ri unimal rutzil uc'u'x ri Dios.

²⁵ »Ec'u wo'ora che ralak ri xta' alak chi nuchi' puwi rutakanic ri Dios, lic weta'am na jinta chi junok caril tanchi nuwach. ²⁶ Ec'u uwari'che wak'ij cambi'ij chiwach alak: Lic paw'i alak c'o wi we c'o junok che alak casachic. ²⁷ Ma na jinta c'o wewam chiwach alak; e janipa ruch'obom lo ri Dios cajawax che alak, nuk'alajisam chi chiwach alak.

²⁸ »E uwari'che, chajij ib alak y chechajij alak janipa ri eya'tal pak'ab alak ruma ri Santowilaj Ruxlabixel ri Dios. Ma alak aj c'amal wach re quebil alak ri tinamit re ri Kanimajawal, yey wa' wa tinamit e ri xebulok' Rire ruc' ruquiq'uel. ²⁹ Weta'am c'ut echiri' ri'in in benak chic, quebec lo chixo'libal alak jujun chic pacha' e utiw xew cacaj caquisach quiwach tak ri bexex. ³⁰ Yey chixo'libal ne ralak queyactaj jujun caquijal ri sakil c'utunic cha' ri quicojom rubi' ri Cristo caquesaj bi quib chupa ri K'ijsak y queterej c'u bi chiquij rique. ³¹ E uwari'che, lic c'una sak chiwach ralak. C'una chic'u'x alak: E oxib junab wa', chipak'ij chichak'ab, na in ta uxlaninak che pixabaxic chijujunal alak ruc' uwa'al nuwach.

³² »Ec'u wo'ora hermanos, cank'atisaj can alak puk'ab ri Dios cha' Rire cuchajij alak y catiqui' c'u alak chupa ri Utzilaj Tzij re ri unimal rutzil uc'u'x. Ma xew wa' c'o uchuk'ab re cuya ri q'uiyibal alak chwach ri Dios y cuya na janipa ri takal che alak, jela' pacha' ri bi'tisim chique conoje ri quiya'om quib puk'ab ri Dios.

³³ »Ri'in na nurayim ta oro o plata re junok chic yey na nurayim tane ruk'u' junok chic. ³⁴ E ne ri nu'anom, lic eta'am alak; ma e janipa

ri ajawaxinak chwe ri'in y chique ri e c'o wuc', wa' lic nuch'acom ruc' wa nuk'ab. ³⁵ Ruc' c'u ronoje ri ilom alak che ri nubinic, nuc'utum che alak ri lic chirajawaxic wi caka'ano: Cojchacunic cha' utz quekato' janipa ri c'o cajawax chique. E c'una chikac'u'x ruch'a'tem ri Kanimajawal Jesús echiri' xubi'ij: «E más nim uk'ij ralaxic ri jun casipanic, chwa ri jun xa cuc'ul ri casipax che» xcha'.

³⁶ Echiri' xubi'ij tak c'u wa' ri Pablo, xuxucuba' rib y xu'an orar cuc' conoje ri e c'o chiri' ruc'.

³⁷ Conoje c'u ri' xquijek quebok'ic, xquilak'apuj ri Pablo y xquitz'ub uchi'. ³⁸ Lic xoc unimal bis chiquic'u'x ruma xubi'ij ri Pablo na caquil ta chi uwach. Jec'ula' xcachbilaj bi y xe'quijacha can pa c'o wi ri barco.

21

Rubenam ri Pablo c'a chila' Jerusalem

¹ Tec'uchiri' xekaya can ri hermanos, xkamaj bi kabe pa barco y xoj'ec jusuc' c'a pa ri tinamit Cos. Chuca'm k'ij xojopon pa ri tinamit Rodas. Echiri' xojel bi chiri', xoj'ec pa ri tinamit Pátara. ² Chupa c'u wa tinamit Pátara xkarik jun barco que'ec Fenicia. Xojak'an c'u ri' chupa y xkamaj bi kabe chwi ri mar. ³ Ec'u la' cojbin pa ri barco, xkil can ri isla Chipre, wa' xcanaj can pa mox chike. Xkamaj c'u bi pa tak ri luwar re Siria y xojopon pa ri tinamit Tiro, ma ri barco cu'ya'a can eka'n chiri'.

⁴ Chupa c'u wa tinamit xekarik ri quicojom rubi' ri Cristo y xojcanaj wukub k'ij cuc'. Ec'u rique xquipixabaj ri Pablo cha' na que'ec ta Jerusalem, ma ri Ruxlabixel ri Dios xuk'alajisaj chique ri cuc'ulumaj ri Pablo we xopon chila'.[☆] ⁵ Na ruc' ta c'u ri', echiri' xic'ow ri wukub k'ij, xojel bi chiri'. Conoje ri e aj chiri', junam cuc' ri quixokil y ri calc'o'al, xojcachbilaj lo c'a tza'm ja che ri tinamit. Chuchi' ri mar xkaxucuba'

☆ 21:4 Hch. 20:22-23

kib y xka'an orar. ⁶ Xkalak'apuj kib chikawach. Tec'uchiri', ri'oj xojak'an chupa ri barco, yey rique xetzelej chicocho.

⁷ Xkamaj tanchi ubi kabe chwi ri mar; xojel lo pa ri tinamit Tiro y xojopon pa ri tinamit Tolemaida. Tec'uchiri', xkaya rutzil quiwach ri hermanos chiri' y xojcanaj can jun k'ij cuc'.

⁸ Chuca'm k'ij c'ut, xojel bi y xojopon pa ri tinamit Cesarea. Chila' xojoc chirocho ri Felipe, ri aj tzi-jol re ri Utzilaj Tzij, jun chique ri wukub diáconos.* Y xojcanaj c'u can ruc'. ⁹ Ec'u rire e c'o cajib umi'al c'amaja' quec'uli'ic yey rique caqui'an k'alajisanic ruma ri Dios.

¹⁰ Xojnajtir chiri' jujun k'ij. Echiri' oj c'o chiri', xc'un jun k'alajisanel re ri Dios, Ágabo rubi', petinak Judea. ¹¹ Wa' wa'chi xojo'lrlila'. Xuc'am c'u ri' rupas ri Pablo y chiribil rib xuyut ri rakan y ruk'ab; tec'uchiri', xubi'ij:

—Jewa' cubi'ij ri Santowilaj Ruxlabixel ri Dios: “Chila' Jerusalem, jewa' caqui'an raj judi'ab che rachi rajaw wa jun pas, caqui'yutu yey caquiya c'u paquik'ab ri na e ta aj judi'ab” —xcha'.

¹² Echiri' xkata wa', ri'oj y ri e aj Cesarea lic xojelaj che ri Pablo cha' na que'ec ta Jerusalem.

¹³ Pero ri Pablo xuc'ul uwach chike: —¿Su'chac cok' alak y cacoj alak unimal bis chinuc'u'x? Ma ri'in nuya'om ne wanima' na xew ta ri quinyutic, ma quin'ec tob ne quin-cam pa ri tinamit Jerusalem ruma rubi' ri Kanimajawal Jesús —xcha'.

¹⁴ Yey ruma c'u na xkach'ij ta uk'atexic cha' na que'ec taj, xkok'otaj cojch'a't ruc' puwi wa', xew c'u xkabi'ij che:

—E chu'ana na ri' janipa ri caraj ri Kanimajawal —xojcha'.

¹⁵ Ic'owinak chi wa', xkayijba' kib y xkamaj bi kabe pa ri tinamit Jerusalem. ¹⁶ Y xojcachbilaj bi jujun chique ri quicojom rubi' ri Cristo chiri' Cesarea. Cuc' rique c'o jun aj Chipre Mnasón rubi'. Rire e cuq'uul ri nabe quicojom rubi' ri Cristo. Yey ruc' ri Mnasón coje'canaj can wi chila' Jerusalem.

Ri Pablo copon Jerusalem

¹⁷ Echiri' xojopon Jerusalem, ri hermanos xojquic'ul ruc' qui'cotemal.

¹⁸ Chuca'm k'ij c'ut, ri Pablo xe'ec kuc' che rilic ri Jacobo yey conoje ri e aj wach re riglesia quimolom quib chiri'. ¹⁹ Ec'uchiri' ri Pablo uq'uisom chi uya'ic rutzil quiwach wa hermanos, xujek utzijoxic chique janipa ri u'anom ri Dios chiquixo'l ri na e ta aj judi'ab ruma ri chac catajin rire che u'anic.

²⁰ Echiri' xquita wa' ri hermanos, lic xquiyac uk'ij ri Dios. Pero xquibi'ij che ri Pablo:

«Quil la wa', hermano, janipa lo mil chi aj judi'ab quicojom chi rubi' ri Cristo wara Jerusalem; yey conoje quiya'om quib che utakexic ri Tzij Pixab tz'ibital can ruma ri Moisés. ²¹ Pero xtzijox c'u chique puwi ri c'utunic la chiquiwach conoje raj judi'ab ejekel naj chiquixo'l ri na e ta aj judi'ab. Cabi'x c'u ri' rilal quek'atej la che utakexic ri takanic re ri Moisés, ma cabi'ij la chique na caquicoj ta chi ri retalil re circuncisión chique ri calc'o'al y na caqui'an ta chi ne janipa ri quic'utum can ri kati'-kamam. ²² »¿Sa' c'u ri caka'an ri'oj che wa'? Ma la' caquimol ne quib ruq'uiyal winak chi'ij la, we xquito xc'un la.

²³ »Xew c'u 'ana la wa cakabi'ij che'la: E c'o cajib achijab chikaxo'l ri'oj, chirajawaxic chique caqui'an ri quibi'tisinic chwach ri Dios.* ²⁴ Chec'ama bi uc' la, josk'ij ib la chwach ri Dios junam cuc' rique, jela'

* **21:8** Hch. 6:3-5 * **21:23** “Ri quibi'tisinic chwach ri Dios”: Wa' e cach'a't puwi ri “voto nazareo”. Ri ca'anaw wa', cubi'tisij che ri Dios juna janipa k'ij na cutij ta uwa'al uva, na cuk'at ta ruwi' y na cakib ta ruc' juna anima'. We xuq'uisbej c'u wa', cuya chwa raltar tak rukasa'n lic q'ui rajil. Cuk'at c'u ruwi' y caya' ruwi' pa ri ak' puwi raltar, c'utubal re u'anom chi ronoje rubi'tisinic chwach ri Dios. Nm. 6:1-20

pacha' ri cubi'ij ri takanic tz'ibital can ruma ri Moisés. Tojo c'u can la ri quikasa'n† cha' utz caquisocaj ri quiwi'. Jec'ula' cak'alajin chiquiwach conoje: E janipa ri tzijom chique puwi ri c'utunic la, na e ta c'ana u'anom; y caquil ne ri lic jusuc' cabin la, ma e canimaj la ri Tzij Pixab.

25 »Chique c'u ri na e ta aj judi'ab quicojom rubi' ri Cristo, ri'oj katz'ibam chi chique na chirajawaxic taj caquitakej tak wa'; xew maqutij ri ic'owisam chi chiquiwach ri tiox, maqutij quic' y maqutij awaj xa ejitz'am, yey maquetz'abej ne uwa quik'ij cuc' jujun chic na quic'ulel taj» xecha che ri Pablo.✧

26 Ec'u ri Pablo xebuc'am bi ri cajib achijab ruc' y chuca'm k'ij xujosk'ij rib chwach ri Dios junam cuc' rique. Tec'uchiri', xoc pa ri Rocho Dios re cubi'ij jampala' caq'uis ruk'ijol ri quijosk'iquil y que'quiya'a chwa raltar ri quikasa'n chiquijujunal rique.

27 Ec'uchiri' ya caq'uis ri wukub k'ij re ri quijosk'iquil chwach ri Dios,✧ e c'o jujun aj judi'ab e aj pa tak ri luwar re Asia xquil ri Pablo c'o pa ri Rocho Dios. Xequichoc c'u ruq'uiyal winak cha' caquichap ri Pablo.

28 Quesiq'uin c'u che ubi'xiquil:

«¡Achijab alak aj Israel, chojto'olak! E achi wa' ic'owinak pa tak ronoje luwar y cac'utun chiquiwach conoje ri winak ruc' tak ch'a'tibenic chirij ri katinamit, chirij ri Tzij Pixab y chirij ri Rocho Dios. Yey na xew ta wa', ma u'anom che wa Santowilaj Luwar pacha' na junta chi uk'ij echiri' xebucoj lo jujun na e ta aj judi'ab pa ri Rocho Dios, yey wa' xeboc pa ri luwar na takal ta chique» quecha'. 29 Jela' xquibi'ij, ma ri petinak lok quilom ri Pablo pa ri tinamit achbilam ruma ri Trófimo, jun achi aj Éfeso. Ruma c'u wa', xquich'ob rakan ri Pablo ucojom lo chupa ri Rocho Dios wa jun achi na e ta cuq'uil ri e aj judi'ab.

30 Jec'uri'la' conoje ri tinamit xeyicac'anic y xquijek quetucuquic. Ri winak na jampatana xeteni' chiri' y xquichap ri Pablo. E la' quichararem xquesaj bi pa ri Rocho Dios y xquitz'apila' tak ri oquibal.

31 Ec'u ri' cacaj caquicamisaj. Xopon c'u ubi'xiquil che ri comandante‡ que ri soldados e aj Roma: «Conoje ri tinamit quetucuquic.»

32 Ec'u ri comandante xebuc'am bi ri soldados cuc' ri quicapitanes. Queban c'u ri' xebec pa e c'o wi ri winak. Echiri' tak ri winak xquil ri comandante cuc' ri soldados, xcok'otaj ri caqui'an c'ax che ri Pablo.

33 Ec'u wa comandante xew xoponic, xuchap ri Pablo y xtakan che caya'i' pa queb carena. Tec'uchiri', xutz'onoj china ri Pablo y sa' rumac u'anom.

34 Chiquixo'l c'u ri' ruq'uiyal winak na junta chi catatajic, ma jujun quesiq'uin jewa' y jujun chic quesiq'uin jela'. Na k'alaj ta chi q'uenok sa' ri caquibi'ij. Ruma c'u la', ri comandante xtakan che cac'am bi ri Pablo chila' pa ri cuartel.

35 Ec'uchiri' xebopon ri soldados ruc' ri Pablo che tak ri lepelak re ri cuartel, xajawaxic xquitelej ma ruq'uiyal winak cacaj caquichap ri Pablo re caqui'an c'ax che. 36 Ma ruq'uiyal winak re ri tinamit quetenenic, quaternabem lo ri Pablo y quesiq'uinic: «¡Camisaxok! ¡Camisaxok!» quecha'.

Ri Pablo cuto'bej rib chiquiwach tak ri winak

37 Echiri' caquicoj bi ri Pablo pa ri cuartel, rire jewa' xubi'ij che ri comandante:

—¿Caya nawi la chwe quinch'a't q'uenok uc' la? —xcha'.

Ri comandante xutz'onoj che:

—¿Carik ri'at catch'a't pa ri ch'a'tem griego? 38 ¿Na at ta neba ri jun aj Egipto, ri xujek jun ch'a'oj wa maja' naj echiri' xeberesaj bi cajib

† 21:24 Ri Pablo xutoj ri quikasa'n, ma laj rique na caquich'ij ta rajil. ✧ 21:25 Hch. 15:28-29

✧ 21:27 Nm. 6:1, 9-12; 19:12 ‡ 21:31 «Comandante»: Wa' e jun takanel que mil soldados.

mil achijab e camisanel pa tak ri luwar catz'intz'otic? —xcha che.

³⁹ Xubi'ij c'u ri Pablo:

—Na in taj. Pakatzij wi in jun achi laxic in cuq'uul ri e aj judi'ab. In alaxinak pa ri tinamit Tarso, jun tinamit lic c'o uwach re Cilicia. No'j cantz'onoj c'u co che'la, ya'a co la chwe quinch'a't chiquiwach ri tinamit —xcha'.

⁴⁰ Ec'u ri comandante xuya luwar che cach'a'tic. Xtaq'ui' c'u ri' ri Pablo che tak ri lepelak re ri cuartel y xu'an jun c'utubal ruc' ruk'ab chiquiwach ri tinamit cha' quetani'ic. Xetz'in ca'n c'u ri'. Ec'u ri Pablo xujek cach'a't pa ri ch'a'tem hebreo, jewa' xubi'ij:

22

¹ «Alak achijab y alak nimak winak, tana c'u alak wo'ora wa to'bal wib can'an chiwach alak» xcha ri Pablo.

² Echiri' ri winak xquito cach'a't chiquiwach pa ri ch'a'tem hebreo, más xetz'inca'nic.

Ec'u ri Pablo xubi'ij:

³ «Pakatzij wi ri'in in cuq'uul ri e aj judi'ab. In alaxinak pa ri tinamit Tarso, jun tinamit re ri luwar re Cilicia; no'j chupa wa tinamit Jerusalem in q'uiyinak wi. In tijotal c'u lo chwi ri Tzij Pixab ruma ri Gamaliel ruc' jun tijonic lic e chirij ri tzijpixab que can ri kati'-kamam. Lic nuya'om nuc'u'x che ulok'nimaxic ri Dios jela' pacha' onoje ralak wak'ij ora.

⁴ »Ri petinak lok ri'in xenuternabej ne ruc' camic ri etakeyom wa jun C'ac' Be re ri Jesús. Tob achijab o tob ixokib xebenuya pa carena y xebe'nuya'a pa cárcel. ⁵ Ri cajawal raj chacunel pa Rocho Dios y conoje ri nimak winak re ri tinamit lic queta'am katzij wa cambi'ij, ma rique lic xquilo sa' tak ri xin'ano. Ma chique ne rique xinc'ul wubi uwujil, tz'ibital bi chique raj wach e aj judi'ab e c'o Damasco cha' utz quebenuchap lo chi presoyil ri quicojom rubi' ri Cristo y quebenuc'am lo Jerusalem re queya'i' pa c'axc'obic.

Ri Pablo cutzijoj su'anic xjalc'atitaj rubinic usilabic
(Hch. 9:1-19; 26:12-18)

⁶ »Ec'u la' quintajin chi be y xa nakaj chic in c'o che ri tinamit Damasco, echiri' laj pa tiq'uul k'ij xakic'ate't xpe chila' chicaj ruwonibal jun ak'. Wa' xwol ca'n panuwi' y xusutij wij. ⁷ Xintzak pulew y xinta c'u jun kulaj jewa' cubi'ij chwe: “Saulo, Saulo, ¿su'chac catch'o'jin chwij?” xcha'.

⁸ »Y ri'in xinc'ul uwach: “¿China rilal, Wajawal?”

Rire xubi'ij chwe: “Ri'in in Jesús ri aj Nazaret, ri jun catch'o'jin chirij” xcha'.

⁹ »Yey ri e c'o wuc' pakatzij wi xquil ruwonibal ri ak' xwol ca'n panuwi' y xquixi'ij quib che; no'j na xquimaj ta usuc' ri kulaj cach'a't wuc'.

¹⁰ »Ec'u ri'in ximbi'ij: “¿Sa' c'u ri' can'ano, Wajawal?”

»Y ri Kajawal xubi'ij chwe: “Chatyactajok y jat pa ri tinamit Damasco, ma chiri' cabi'x wi chawe janipa ri cuaj Ri'in ca'an ri'at” xcha'.

¹¹ »Ri'in na xintzu'n ta chi c'u ri' ma ruwonibal ri ak' xwol ca'n panuwi', xuchup upa nuwach. Xa c'u xinch'elex bi che ri nuk'ab cuma ri e wachbi'il, y jela' xinopon pa ri tinamit Damasco.

¹² »Chiri' c'u ri' c'o jun achi Ananías rubi'; rire lic jusuc' rubinic che utakexic tak ri takanic re ri Tzij Pixab, yey lic chom ruch'a'tibexic caqui'an conoje raj judi'ab ejekel chiri'. ¹³ Xc'un c'u ri Ananías che wilic, xkib wuc', y jewa' xubi'ij chwe: “Hermano Saulo, chac'ulu tanchi ratzu'nibal” xcha'. Chupa c'u la' la jok'otaj, xintzu'n tanchic y xinwil uwach ri Ananías.

¹⁴ »Ec'u ri Ananías xubi'ij chwe: “Ri Dios que can ri kati'-kamam, atucha'om chic cha' caweta'maj sa' ri lic caraj Rire, cawil c'u uwach ri Jun lic jusuc' y cata chuchi' janipa ri cubi'ij chawe. ¹⁵ Ma catu'ana at k'alajisay re Rire chiquiwach conoje ri ticawex puwi tak ri awilom y atom

che. ¹⁶ Ec'u wo'ora, ¿sa' chi ri ca-woy'ej? Chatyactajok y chac'ulu ri bautismo cha' catch'ajtaj che ramac; yey cha'ana c'u wa' chupa rubi' ri Kanimajawal” xcha chwe.

Ri Pablo cutzijoj su'anic xtak bi cuc' ri na e ta aj judi'ab

¹⁷ »Xintzelej c'u lo Jerusalem. Ec'u ri' can'an orar pa ri Rocho Dios echiri' xakic'ate't xk'alajisax jun c'utubal re ri Dios chinuwach. ¹⁸ Xinwil c'u uwach ri Kanimajawal y jewa' ri xubi'ij chwe: “Chawilij, chatel bi pa wa tinamit Jerusalem ma ri tzijonic panuwi' Ri'in na caquic'ul ta ri winak wara” xcha'.

¹⁹ »Ri'in ximbi'ij c'u che: “Wajawal, rique lic queta'am janipa ri na utz taj nu'anom lo chique ri quicojom ri bi' la echiri' xin'ec pa tak sinagoga re quebenuc'am bi pa cárcel y cambalac'uj quipa. ²⁰ Yey ri'in in c'o chiri' echiri' xcamisax ri Esteban, ri jun xk'alajisan wach la chiquiwach ri winak. In ne jun chique ri xquibi'ij utz cacamisaxic; yey in ri xinchajij can ri quik'u' ri xecamisan re” xincha che ri Kanimajawal.

²¹ »Pero ri Kajawal xubi'ij chwe: “Jat, ma Ri'in lic naj catintak wubi chiquixo'l tak ri tinamit na e ta aj judi'ab”» xcha'.

²² Ec'u ri' ruq'uiyal winak, na xquiya ta chi luwar che ri Pablo cach'a'tic. Ec'uchiri', xquijek quesiq'uinic, caquibi'ij: «Chisacha uwach la' la jun achi ma na takal ta chi che cac'asi'ic» quecha'.

²³ Yey quesiq'uin c'u ri' ri winak y caquimach' tak ri quik'u' pulew y caquipuc' ulew chicaj.

Ri Pablo cucoj rib chwach ri comandante aj Roma

²⁴ Ruma c'u la', ri comandante xtakan che coquisax bi ri Pablo pa ri cuartel y cajich' upa cha' jela' queta'maxic su'chac quesiq'uin ri winak chirij.

²⁵ Echiri' ri soldados caquiximo re caquijich' upa, ri Pablo xutz'onoj che ri capitán* c'o chiri':

—¿Usuc' neba cajich' upa junok aj Roma we c'amaja' cak'at tzij puwi'? —xcha'.

²⁶ Echiri' xuta wa' ri capitán, xe'ec y xubi'ij che ri comandante:

—Ch'obo la chi utz sa' ri ca'an la, ma wa'chi aj Roma —xcha'.

²⁷ Ec'u ri comandante xkib ruc' ri Pablo y xubi'ij che:

—Chabi'ij pe chwe: ¿Katzij at aj Roma? —xcha che.

Ri Pablo xuc'ul uwach:

—Katzij, in aj Roma —xcha'.

²⁸ Ec'u ri comandante xuc'ul uwach:

—Ri'in ruc' uq'uiyal puak xya' nuwuj re xinu'an aj Roma —xcha'.

Yey ri Pablo xubi'ij:

—No'j ri'in, in aj Roma chwi walaxic lok† —xcha'.

²⁹ Na jampatana c'u ri', e janipa ri e c'o chiri' re caquijich' upa, xebel ruc'. Yey ne ri comandante echiri' xuto ri Pablo aj Roma, xpe xi'in ib ruc' ruma uya'om ri Pablo pa carena.

Ri Pablo cuto'bej rib chiquiwach raj k'atal tzij

³⁰ Ec'u ri comandante xraj careta'maj pa sakil wi sa' ri mac caquitz'ak raj judi'ab chirij ri Pablo. Ruma c'u ri', chuca'm k'ij xutak quic'amic ri nimak e aj chacunel pa Rocho Dios cuc' conoje ri uchapom wi rib ri k'atbal tzij. Xutak resaxic ri carena che ri Pablo; xuc'am c'u ulok y xuya chiquiwach.

23

¹ Ec'uchiri', ri Pablo xuch'iquiba' ruwach paquiwi tak ri uchapom wi rib ri k'atbal tzij y jewa' xubi'ij:

—Achijab alak watz-nuchak', ri petinak lok yey c'a e ne nu'anom wak'ij ora, lic cuna' nuc'u'x jusuc' ri nubinic chwach ri Dios —xcha'.

* **22:25** “Capitán”: Wa' e aj wach que cien soldados. † **22:28** “Aj Roma”: Wa' na e ta que'elawi ri Pablo xalax chupa ri tinamit Roma, ma rire xalax Tarso. Ri que'elawi e chwi ralaxic lok c'o uwuj cubi'ij rire aj Roma. Laj xya' wa wuj che, ruma rukaw o rumam xu'an juna chomilaj chac che ri tinamit.

² Ruma c'u la xubi'ij ri Pablo, ri Ananías ri cajawal raj chacunel pa Rocho Dios, xebutak ri e c'o ruc' cha' caquiraw t'o'y chwa re'.

³ Ec'u ri Pablo xubi'ij che:

—¿Chu'ana ri Dios uc' la janipa ri ca'an la chwe, rilal xa queb palaj la!* Ma lal cojotalic re cak'at la tzij panuwi' e chirij ri cubi'ij ri Tzij Pixab; no'j camacun c'u la chirij wa Tzij Pixab ruma xtakan la ca'an c'ax chwe tob na e ta cubi'ij ri' ri Tzij Pixab† — xcha'.

⁴ Ri e c'o chiri' xquibi'ij che ri Pablo:

—¿Sa'ch? ¿Cayaj cami ri' ri'at ri cajawal raj chacunel pa Rocho Dios? — xecha'.

⁵ Ri Pablo xubi'ij:

—Alak watz-nuchak', ri'in na weta'am taj we rire e cajawal raj chacunel pa Rocho Dios. We ta e la' weta'am china rire, na cambi'ij ta wa' che, ma tz'ibital can chupa Ruch'a'tem ri Dios: “Ma'an ri tzel catch'a't chirij ri takanel re ratinamit”[☆] — xcha'.

⁶ Ec'u ri Pablo reta'am nic'aj chique ri aj k'atal tzij e saduceos y nic'aj chic e fariseos. Ruma c'u la', rire lic co xch'awic, jewa' xubi'ij:

—Achijab alak watz-nuchak', ri'in in cuq'u'il ri e fariseos yey in uc'ajol jun fariseo; ec'u wo'ora cak'at tzij panuwi' xa ruma ri cubul pan nuc'u'x che ri c'astajibal que ri ecaminak — xcha'.

⁷ Echiri' xubi'ij wa' ri Pablo, ri fariseos cuc' ri saduceos xquijek caquichapala' quib chiquiwach; y jela' conoje ri quimolom quib xquijach quipa. ⁸ Ma chiquiwach ri saduceos, na jinta c'astajibal que ri ecaminak, na e jinta ne ángeles y na e jinta ne jujun chic uxlaxixel; no'j chiquiwach ri fariseos, e c'o conoje wa'. ⁹ Y xquijek lic quewokokic.

E c'o c'u jujun chique raj c'utunel re ri tziipixab e cuq'u'il ri fariseos. Rique xeyactajic y xquijek quech'o'jinic, jewa' caquibi'ij: «Na jinta mac

cakarik chirij wa jun achi. C'axtaj rire e juna tako'n petinak ruc' ri Dios o juna ángel uk'alajisam wa' che. Yey we e ri', na utz taj cojch'o'jin ri'oj chirij ri Dios» quecha'.

¹⁰ Jec'ula' ri ch'a'oj chiquiwach lic xe'ec chunimal. Ruma c'u ri', ri comandante lic xuxi'ij rib, ma xuch'ob rakan caquirakij upa ri Pablo. Ewi xtakan che quisiq'uixic jujun chic soldados cha' caquesaj bi ri Pablo chiquixo'l y caquic'am bi pa ri cuartel.

¹¹ Chuca'm ak'ab c'ut xuk'alajisaj rib ri Kanimajawal chwach ri Pablo y xubi'ij che: «Pablo, chanimarisaj ac'u'x; ma jela' pacha' xinak'alajisaj Ri'in chiquiwach ri e aj Jerusalem, jec'ula' lic chirajawaxic ca'ana pa ri tinamit Roma» xcha'.

Jujun aj judi'ab caquich'obo su'anic caquicamisaj ri Pablo

¹² Chuca'm k'ij echiri' xsakiric, e c'o jujun aj judi'ab xqui'an tzij chiquiwach cha' caquicamisaj ri Pablo. Xquibi'ij c'ut chwach ri Dios na quewa' tana y na caquitij ta ne mik'ina' we na caquicamisaj ta ri Pablo nabe. Yey xquibi'ij peta na c'ax paquiwi' we na xquich'ij ta u'anic ri tzij xqui'an chiquiwach. ¹³ Yey ri quiq'uiyal ri xquiya quib chupa wa', xic'ow che cuarenta.

¹⁴ Conoje wa' xebec cuc' ri nimak e aj chacunel pa Rocho Dios y cuc' ri nimak winak re ri tinamit, y jewa' xquibi'ij chique:

—Ri'oj xkabi'ij peta na c'ax pakawi' we na xkach'ij ta u'aniquil wa tzij xka'an chikawach. Ma chwach ri Dios xkabi'ij na jinta c'o cakatijo we na cakacamisaj ta ri Pablo nabe.

¹⁵ Ec'u wo'ora ralak junam cuc' tak ri uchapom wi rib ri k'atbal tzij, tz'onoj alak che ri comandante cuc'am lo ri Pablo chiwach alak chwe'k. 'Ana c'u alak che pacha' e ri' cata alak uchi' puwi tak ri tz'akom chirij; yey ec'u ri'oj cakoy'ej pa be re cakacamisaj — xecha'.

* **23:3** “Xa queb palaj la”: Pa ri ch'a'tem griego cubi'ij “lal uwa xan xa chunam rij”. † **23:3** Ri Tzij Pixab na cuya ta luwar caya'i' junok pa c'ax we c'amaja' cak'alajinic c'o umac. Lv. 19:15 ☆ **23:5** Éx. 22:28

¹⁶ C'o c'u jun ralab ri ranab ri Pablo yey rire xuto caquich'a'tibej puwi ri camisabal re ri Pablo caqui'an pa be. Xe'ec c'ut, xoc bi pa ri cuartel y xu'tzijos wa' che ri Pablo.

¹⁷ Ewi ri Pablo xusiq'uij jun chique ri capitanes que ri soldados y xubi'ij che:

—C'ama bi la wa jun ala chwach ri comandante, ma c'o caraj cubi'ij che, yey lic il uwach cuto —xcha'.

¹⁸ Ri capitán xuc'am c'u bi rala y xu'ya'a chwa ri comandante, y jewa' xubi'ij che:

—Ri Pablo, ri jun c'o pa cárcel, xinusiq'uij y lic xelaj che cha' canc'am lo wa jun ala chiwach la, ma c'o caraj cutzijos che'la —xcha'.

¹⁹ Ec'u ri comandante xuc'am bi rala che ruk'ab y xresaj bi rib junam ruc' rala chiquixo'l ri e c'o chiri'. Ec'uchiri', xutz'onoj che:

—¿Sa' ri cawaj catzijos chwe? —xcha'.

²⁰ Rala xubi'ij che:

—Ec'o jujun aj judi'ab qui'anom tzij chiquiwach cha' caquitz'onoj che'la cac'am bi la ri Pablo chwe'k chwach ri k'atbal tzij, ma caqui'an che pacha' e ri' cata' uchi' puwi tak ri tz'akom chirij. ²¹ Pero wa' macoj la; ma quic'ow che cuarenta ri quiq'uiyal rachijab caquewaj quib pa be. Y conoje wa' xquibi'ij peta na c'ax paquiwi' we na xquich'ij ta u'aniquil wa xquijiquiba' uwach. Ma xqui'an tzij chiquiwach na quewa' taj y na caquitij ta ne quimik'ina', we na caquicamisaj ta ri Pablo nabe. Yey wo'ora xa cacoy'ej sa' ri cabi'ij rilal che ri caquitz'onoj —xcha'.

²² Ec'u ri comandante xuq'uisbej ruch'a'tem ruc' rala, xew c'u xubi'ij bi che:

—Na junta c'o cabi'ij wi we atzijom chi wa' chwe —xcha'.

Ri Pablo catak bi chwach ri takanel Félix

²³ Tec'uchiri', wa comandante xebusiq'uij queb capitanes y xebutak che quequimol quichi' queb ciento

soldados re quebec chakan y setenta re quebec chwi cawayu'; yey queb ciento chic e c'akal lanza. Conoje tak wa' quebec c'a pa ri tinamit Cesarea pa ri belejeb ora[†] chak'ab. ²⁴ Y xtakan che caquiyijba' ucawayu' ri Pablo cha' carek'nabey bi y jec'ula' na junta c'o cuc'ulumaj chwi quik'ab cha' copon na chwach ri takanel Félix. ²⁵ Yey xutz'ibaj c'u bi jun carta cha' caquiya pan che ri takanel Félix, jewa' utz'ibaxic xu'ano:

²⁶ Ri'in in Claudio Lisias, cantak bi wa jun carta che'la, lal nimalaj takanel Félix. C'ulu rutzil wach la.

²⁷ Wa jun achi cantak bi che'la, xchap cuma raj wach e aj judi'ab y ya ne e ri' caquicamisaj. Ec'u ri'in cuc' ri nusoldados xi'nwesela' paquik'ab ma xinweta'maj rire aj Roma.

²⁸ Pero ruma c'u xuaj canweta'maj sa' ri caquitz'ak wi uchi', xinc'am bi rire pa ri k'atbal tzij que raj judi'ab. ²⁹ Xinta c'u ri', ri caquitz'ak wi uchi' xa e puwi tak ri quicojobal chwi ri tzijpixab qui'que. Ec'u ri'in na junta juna mac xinrik che re cacamisaxic o re caya' pa cárcel.

³⁰ Y ruma c'u xo'lbi'x chwe sa' ri quiyijbam raj judi'ab chirij cha' caquicamisaj, xinch'ob c'u ri' más utz we cantak bi chiwach la. Yey e janipa ri quetz'akaw uchi', xebnutak che caquik'alajisaj chiwach rilal janipa ri quitz'akom chirij.

Chila c'u co ib la.

³¹ Ec'u ri soldados xquic'am bi ri Pablo jela' pacha' ri takanic x'an bi chique, y chak'ab xquic'am bi pa ri luwar Antípatris. ³² Chuca'm k'ij c'ut, xetzelej lo pa ri cuartel ri soldados ebenak chakan; yey ri soldados ebenak chwi cawayu', xquimaj chubi quibe ruc' ri Pablo.

³³ Ec'uchiri' xebopon wa' chupa ri tinamit Cesarea, xquiya ri carta che ri takanel y xe'quiya'a c'u ri Pablo chwach. ³⁴ Ri takanel xrajilaj ri carta y xutz'onoj pa aj wi ri Pablo.

[†] 23:23 “Ri belejeb ora”: Quil “hora” pa vocabulario.

Echiri' xreta'maj aj pa ri luwar re Cilicia, ³⁵ jewa' xubi'ij che: «C'ate catinto echiri' quec'un lo ri etz'akayom achi'» xcha'.

Xtakan c'u che cha' cachajix pa ri palacio re ri Herodes.

24

Ri Pablo cuto'bej rib chwach ri takanel Félix

¹ Wo'ob k'ij c'u ric'owic wa' echiri' ri Ananías ri cajawal raj chacunel pa Rocho Dios xkaj lo pa ri tinamit Cesarea. Rire erachbilam lo jujun nimak winak re ri tinamit y jun chic achi aj esay quichi', Tértulo rubi'. Xebopon c'u ri' chwach ri takanel re caquitz'ak uchi' ri Pablo.

² Ec'uchiri' xsiq'uix ri Pablo, ri Tértulo xujeko cutz'ak uchi', jewa' cubi'ij che ri takanel Félix:

«Lal Félix ri lic c'o wach la, ri katinamit uma rilal urikom unimal utzil chomal y lic utz ri takanic la pakawi' ruma lic c'o na'oj la. ³ Wa' wa utz 'anom la chike na xa ta janipa k'ij uwach y na xa ta pa jun luwar cakil wi, ma pa tak ronoje luwar cakil wi. Ruma c'u ri' wa', lic cakatioxij che'la.

⁴ »Ec'u wa jok'otaj, cha' na cakabay ta la, 'ana co la ri' chojtana la q'uenok ruc' ri relej c'u'x la.

⁵ »Wa karikom ri'oj chirij wa jun achi e pacha' chi jun petel-laj yabil. Rire ebuch'i'om ruc' ch'a'oj conoje raj judi'ab e c'o pa tak ronoje luwar che ruwachulew. Yey e c'amayom quiwach ri jumutzaj ticawex cabi'x «nazarenos»* chique. ⁶ Y na xew ta wa', ma xutij ne uk'ij cu'an che ri Rocho Dios pacha' na jinta chi uk'ij.✱ Ruma c'u la', xkachapo y xkaj cak'at tzij puwi' e chirij ri tziipixab ke ri'oj.

⁷ »Pero ri comandante Lisias xumin rib chikaxo'l cuc' uq'uiyal soldados y xumaj pakak'ab. ⁸ Xebutak c'u ri quetz'akaw uchi' wa'chi cha' quepe na wara uc' la. We xta c'u la uchi',

c'a ec'uchiri' queta'maj la lic katzij janipa ri kabi'im ri'oj chirij» xcha'.

⁹ Yey raj judi'ab e c'o chiri' xquijiquiba' uwach che ri takanel: «Lic katzij; e u'anom janipa ri bi'tal chirij» xecha'.

¹⁰ Ec'u ri takanel xu'an jun c'utubal che ri Pablo cha' cach'a'tic, y rire xujek ubi'xiqul:

«Lic weta'am uq'uiyal chi junab lal aj k'atal tzij re wa katinamit; e uwari'che, ruc' ronoje nuc'u'x canto'bej wib chiwach la. ¹¹ We ca'aj la catz'onobej la puwi', queta'maj c'u la ri': Ri'in c'a e ne ucablajuj k'ij ri' xinopon pa ri tinamit Jerusalem cha' canlok'nimaj uk'ij ri Dios. ¹² Yey ri quetz'akaw nuchi', rique na xinquirik taj quinch'o'jin ruc' junok, na xinquirik tane e enuch'i'om ruc' ch'a'oj ruq'uiyal winak pa ri Rocho Dios, pa tak ri sinagogas o pa juna chic luwar re ri tinamit. ¹³ Jec'uri'la', rique na utz taj caquijiquiba' uwach chiwach la wo'ora janipa ri quitz'akom chwij.

¹⁴ »Pero chiwach c'u la canya wib chupa wa': Katzij, ri'in in c'o chupa ri Be re ri Cristo, yey rique caquibi'ij che wa Be, xa e jun c'utunic re socoso'nic. Pero chupa wa' wa Be, ri'in e canlok'nimaj ri Dios que ri kati'kamam re ojertan; ma nucojom janipa ri c'o chupa Rutzij Upixab ri Dios tz'ibital can ruma ri Moisés y cuma ri k'alajisanelab. ¹⁵ Y jela' pacha' rique, ri'in lic nucubam pan nuc'u'x ruc' ri Dios. Ma weta'am ri Dios quebuc'astajisaj na lo conoje ri ecaminak;† jela' cu'an chique ri e jusuc' y ri na e ta jusuc'. ¹⁶ Ruma tak c'u ri' wa', lic quinoc il ri'in che ri nubinic cha' jela' cac'oji' ri nuna'oj chi jusuc' chwach ri Dios y chiquiwach ri ticawex.

* **24:5** «Nazarenos»: Wa' e bi'aj xya' chique ri e utijo'n ri Jesús ri aj Nazaret. ✱ **24:6** Hch. 21:28

† **24:15** «Quebuc'astajisaj na lo conoje ri ecaminak»: Wa' na e ta que'elawi conoje queboc chila' chicaj ruc' ri Dios che jun chomilaj c'aslemal na jinta utakexic. E que'elawi conoje quec'astajic cha' cak'at tzij paquiwi' ruma ri Dios. Dn. 12:2; Jn. 5:28-29; Hch. 23:6; 26:6-8

17 »Yey ic'owinak chi jujun junab ri'in na in oponinak ta pa ri nutinamit;† c'a ec'u wo'ora xinoponic cha' qui'nya'a nukasa'n re to'bal que ri niba'ib* y qui'nya'a nukasa'n chwa raltar re ri Dios.

18 »Echiri' xine'quirika jujun aj judi'ab e petinak pa tak ri luwar re Asia, ri'in e ri' canq'uis ri nujosk'iquil§ pa ri Rocho Dios. Na xinqurik ta c'u chiquixo'l ruq'uiyal winak o cuc' ri quetucuc pa ch'a'oj.*

19 Ec'u wa e aj Asia, we c'o juna mac cacaj caquicoj chwij, lic e usuc' ri' e rique ri co'lquibi'ij wa' chiwach la.

20 »Yey c'u wa e c'o wara, quibi'ij rique we c'o juna mac xquirik chwij echiri' xine'ela chwach ri k'atbal tzij que raj judi'ab.

21 Ri numac ri'in chiquiwach rique, e echiri' xinc'oji' chiquixo'l, xinsiq'uin chiquiwach conoje, jewa' ximbi'ij: “Ralak cak'at alak tzij panuwi' wak'ij xa ruma nucubam pan nuc'u'x che ri c'astajibal que ri ecaminak”» xcha ri Pablo.

22 Ri takanel Félix lic utom chi puwi wa C'ac' Be re ri Jesús. E uwari'che echiri' xuta wa', xuchakij ri quimolom wi quib, jewa' xubi'ij chique: «Echiri' cac'un ri comandante Lisias, c'a ec'uchiri' canq'uis reta'maxic wa ic'amom lo chinuwach» xcha'.

23 Xtakan c'u che ri capitán que ri soldados cha' cachajix ri Pablo, yey xtakan che cha' caya' luwar chique ri rachbi'il quebo'lbina ruc' y co'lquinimaj.

24 Jujun k'ij c'ut ic'owinak, xopon tanchi ri takanel Félix ruc' ri rixokil Drusila;** wa' wi'xok e cuq'u'il raj judi'ab. Ec'u ri takanel Félix xutak usiq'uixic ri Pablo y xuta chi uchi' puwi ri cubulibal c'u'xaj ruc' ri Kanimajawal Jesucristo.

25 Pero echiri' ri Pablo xujek cach'a't chiquiwach puwi ri jusuc'

binic, puwi ri lic cuchajij rib jun chiribil rib cha' na catzak ta pa mac y puwi ri k'atbal tzij catajin lo paquiwi raj maquib chikawach apanok, ri takanel xuxi'ij rib che wa' y xubi'ij: «Wo'ora jat, c'ate na catinsiq'uij tanchic echiri' cajami' nuwach» xcha'.

26 Yey wa takanel Félix xa roye'em we ri Pablo cuya puak che cha' ruc' ri' cutzokopij bi. Ruma c'u la', uq'uiyal laj xusiq'uij y xch'a't ruc'.

27 Xic'ow c'u queb junab, yey ri takanel Félix xjal bi y xcanaj ri Porcio Festo puc'axel. Ec'u ri Félix, xa ruma caraj cacana' can utz chiquiwach raj judi'ab, xuya can ri Pablo pa cárcel.

25

Ri Pablo cutz'onoj cuto'bej rib chwach ri nimalaj takanel re Roma

1 Oxib k'ij roponic ri Festo chila' Cesarea, xel bi cha' que'ec Jerusalem.

2 Chiri' c'u ri', ri nimak e aj chacunel pa Rocho Dios cuc' ri lic c'o quiwach chique raj judi'ab, xquijek caquicoj quib ruc' elejem chwach ri Festo ruma ri quitz'akom chirij ri Pablo. 3 Xquitz'onoj c'u che ri Festo lic chu'ana co ri' chuk'atisaj lo ri Pablo chique pa ri tinamit Jerusalem, pero ri quino'jim chi rique chiquiwach e caquicamisaj ri Pablo pa be.

4 No'j ri Festo xuc'ul uwach: «Ri Pablo c'o pa cárcel pa ri tinamit Cesarea, yey pa queb oxib k'ij in c'o ne ri'in chila'. 5 Utz nenare' we e c'o jujun e aj wach che alak quebec wuc', ma we c'o juna mac chirij wa'chi, utz cabi'ij alak chila'» xcha'.

6 Laj wajxakib o lajuj k'ij c'u ri' xu'an chiquixo'l raj judi'ab; tec'uchiri', xtzelej pa ri tinamit Cesarea. Chuca'm k'ij, xtz'uyi' c'u chupa ri k'atbal tzij y xtakan che cac'am lo ri Pablo chwach.

† 24:17 “Ri nutinamit”: Ri Pablo e cuq'u'il raj judi'ab tob xalax Tarso, jun tinamit lic naj che Jerusalem; no'j rutinamit e Jerusalem, ma chila' xq'uiy wi. Hch. 22:3; 26:4 * 24:17 Hch. 20:1-6 § 24:18 “Ri nujosk'iquil”: Nm. 6:1, 9-12; 19:12 * 24:18 Hch. 24:5-6 ** 24:24 “Drusila”: Rire e umi'al Herodes Agripa I y ranab Herodes Agripa II. Ri Drusila xujach can ri nabe rachijil cha' cu'an rixokil ri Félix.

⁷ Echiri' xc'am lo ri Pablo, raj judi'ab ebelinak pa ri tinamit Jerusalem xquimoc rij, xquitz'ak c'u uchi' u'anom uq'uiyal mac lic na utz ta uwach, tob na xquirik taj su'anic caquijiquiba' uwach wa caquibi'ij chirij.

⁸ Ec'u ri Pablo xuto'bej rib chiquiwach conoje, jewa' xubi'ij:

—Ri'in na jinta c'ana in macuninak wi, ma na in ch'a'tinak ta chirij ri tzijpixab que raj judi'ab, chirij ri Rocho Dios o chirij ri nimalaj takanel re Roma —xcha'.

⁹ Pero ri Festo, xa ruma caraj cananaj can utz chiquiwach raj judi'ab, jewa' xubi'ij che ri Pablo:

—¿Cawaj cate'ec Jerusalem y chila' cak'at tzij pawil' chinuwach ruma tak wa'? —xcha'.

¹⁰ Ec'u ri Pablo xuc'ul uwach:

—Ri'in in c'o chi chwach junk'atbal tzij re ri nimalaj takanel re Roma, pa takal wi chwe cak'at tzij panuwi'. Yey rilal lic eta'am la chi utz, ri'in na jinta juna mac nu'anom chiquij raj judi'ab. ¹¹ Ma we ta c'o juna numac o we ta c'o nu'anom re takal chwe quincamisax ruma, ri' na can-jec' ta wib che quincamisaxic. No'j we na katzij ta wa quitz'akom chwij, na jinta junok ri' takal che quinuya paquik'ab raj judi'ab. Cantz'onoj c'u ri' cha' ri nimalaj takanel re Roma, e rire ri cuta nuchi'* —xcha'.

¹² Ec'u ri Festo, echiri' xuq'uis cach'a't cuc' ri e ya'l una'oj, jewa' xubi'ij che ri Pablo:

—Xatz'onoj c'ut e ri nimalaj takanel re Roma ri cataw achi' pa k'atbal tzij; jec'uri'la' chwach ri nimalaj takanel re Roma catintak wubi —xcha'.

Ri rey Agripa caraj cuta ri Pablo

¹³ Ic'owinac chi c'u jujun k'ij echiri' ri rey Agripa† ruc' rixok Berenice‡ xebopon pa ri tinamit Cesarea cha' caquiya rutzil uwach ri Festo. ¹⁴ Yey ruma lic uq'uiyal k'ij xqui'an chiri',

* **25:11** Ruma ri Pablo aj Roma, c'o puk'ab cutz'onoj cata uchi' ruma ri nimalaj takanel re Roma we chwach rire na jusuc' ta ri k'atbal tzij 'anom puwi'. † **25:13** "Agripa": Wa' e Agripa II, uc'ajol Agripa I. ‡ **25:13** "Berenice": Wa' e umi'al Agripa I y ranab Agripa II.

ri Festo xutzijoj che ri rey Agripa su'chac c'o ri Pablo pa cárcel, jec'uwa' xubi'ij che:

—Wara c'o jun achi ya'tal can pa cárcel ruma ri takanel Félix. ¹⁵ Echiri' xinopon pa ri tinamit Jerusalem, ri nimak e aj chacunel pa Rocho Dios cuc' ri nimak winak que raj judi'ab, xquicoj umac wa jun achi chinuwach y xquitz'onoj chwe asu cank'at tzij puwi'. ¹⁶ Yey chique tak c'u ri' wa', ri'in ximbi'ij: Chikaxo'l ri oj aj Roma, we c'o junok xcoji' umac, nabe na caya'i' che cuto'bej rib chiquiwach ri quecojow umac. Y we xrikitaj c'u umac, c'a ec'uchiri', cak'at tzij puwi' y caya'i' pa c'ax.

¹⁷ »E uwari'che, xew xec'un ri quicojom umac ri Pablo, ri'in na xinmayin ta ruc' wa'; ma asu chuca'm k'ij, xintz'uyi' pa ri k'atbal tzij y xintak c'u uc'amic.

¹⁸ »Xec'o'ji' c'u chiri' ri e aj tz'akal tzij chirij, pero na jinta juna umac xquicojo pacha' ri nuch'obom ri'in caquitz'ak chirij. ¹⁹ Ma ri mac xquitz'ak chirij, xa e tak puwi' ri c'utunic que ri aj judi'ab puwi' ri Dios y puwi' jun achi Jesús rubi', yey wa' caminak chi nenare', tob ri Pablo lic cujiquiba' uwach c'aslic.

²⁰ »Ec'u ri'in, ruma na canrik taj su'anic canyijba' ri c'o wi, xintz'onoj na che we caraj que'ec pa ri tinamit Jerusalem cha' chila' ca'ani' ri k'atbal tzij puwi' che ri tz'akom chirij. ²¹ Pero ri Pablo xutz'onoj cata' uchi' ruma ri nimalaj takanel Augusto. Ruma c'u la', xintakan che cachajix na pa ri cárcel wara, copon na ruk'ijol cantak bi chwa ri nimalaj takanel re Roma —xcha'.

²² Ec'uchiri', ri Agripa jewa' xubi'ij che ri Festo:

—Ri'in lic cacha nuc'u'x canto sa' ri cubi'ij wa jun achi —xcha ri Agripa.

Ewi ri Festo xubi'ij che:

—Chwe'k na, cata la —xcha che.

²³ Chuca'm k'ij c'u ri', ri Agripa y ri Berenice xeboponic. Yey sa'chi ruchomal ri coquibal xqui'ano, pacha' e nimak takanelab lic c'o quiwach. Xeboc c'u pa ri nimalaj upa ja pa caquimol wi quib, junam cuc' ri comandantes y rachijab e aj wach re ri tinamit. Ec'u ri Festo xtakan che cac'am lo ri Pablo chiquiwach.

²⁴ Ec'uchiri', ri Festo jewa' xubi'ij:

«Lal rey Agripa y onoje ri alak achi-
jab c'o alak junam wara kuc', ri' c'u ri'
wa jun achi c'o chiwach alak. Conoje
ruq'uiyal winak e aj judi'ab xquitz'ak
uchi' rire chinuwach pa ri tinamit
Jerusalem. Yey wo'ora pa wa tina-
mit Cesarea, ruc' sic' caquitz'onoj ru-
camic chwe. ²⁵ No'j ri'in na jinta
c'o canrik chirij cha' takal che ca-
camisaxic. Ec'u rire xutz'onoj cata'
uchi' ruma ri nimalaj takanel Au-
gusto; e uwari'che, nubi'im chic can-
tak bi chwach wa nimalaj takanel.

²⁶ »Yey ri'in chinuk'ab c'o wi
cantz'ibaj pan che ri nimalaj wajawal
Augusto sa' ri mac tz'akom chirij.
Pero c'amaja' cak'alajin chinuwach
sa' ri cantz'ibaj bi.

»Ec'u uwari'che canya na chiwach
ralak, pero e más chiwach rilal, lal
rey Agripa. Cuaj c'ut cata la uchi'
cha' we rilal xrik la sa' rumac, ri'in
c'o c'u cantz'ibaj puwi rire. ²⁷ Ma
chinuwach ri'in, na ube taj can-
tak bi junok c'o pa presoyil we na
cank'alajisaj tubi ri tz'akom chirij»
xcha'.

26

Ri Pablo cuto'bej rib chwach ri rey Agripa

¹ Ec'uchiri', ri Agripa xubi'ij che ri Pablo: «Wo'ora canya luwar chawe catch'awic re cato'bej awib» xcha'.

Ec'u ri Pablo xuyac ruk'ab y xujek jewa' cuto'bej rib:

² «Lal rey Agripa, ri'in lic quin-
qui'cotic ma caya'taj chwe quinc'oji'
chiwach la cha' canto'bej wib che

tak ronoje ri tz'akom chwij cuma raj judi'ab. ³ Lic c'u utz u'anom, ma rilal lic eta'am la puwi tak ronoje ri kacjobal ri oj aj judi'ab yey eta'am ne la sa' tak ri cakachapala' kib ri'oj puwi'. Ruma c'u la', cantz'onoj co che'la, chinta co la ruc' unimal c'u'xaj.

Ri Pablo cutzijoj sa' rubinic ojertan

⁴ »Conoje raj judi'ab queta'am sa' ri nubinic nusilabic chwi lo in ala, ma xinq'uiy chila' Jerusalem pa ri nutinamit Israel.* ⁵ Yey we ne rique cacaj caquik'alajisaj wa queta'am, caquibi'ij c'u ri', katzij, ri'in lic ojer-
tan lo ri' xex wi in cuq'uul ri fariseos, ri lic katakem ri c'utunic que raj judi'ab puwi ri takanic re ri Moisés.

⁶ »Yey ec'u wo'ora, ruma ri nucubam pan nuc'u'x che ri bi'tisinic xu'an ri Dios† chique ri kati'-kamam ojertan, xa ruma wa' inya'om pa k'atbal tzij. ⁷ Wa' wa bi'tisinic e koye'em ri'oj oj calc'o'al can ri cablajuj uc'ajol ri kamam Jacob ojertan, cha' e cu'ana kuc' janipa ri bi'tisim chike. Ec'u uwari'che na cakok'otaj ta ulok'nimaxic ri Dios chipak'ij chichak'ab. Cambi'ij c'u ri' che'la, lal rey Agripa: Xa ruma c'u ri nucubam pan nuc'u'x ri'in che wa' wa bi'tisinic, catz'ak nuchi' cuma raj judi'ab. ⁸ Cantz'onoj c'u che onoje ralak alak aj judi'ab: Chiwach ralak, ¿na puk'ab ta neba ri Dios c'o wi que-
buc'astajisaj lo ri ecaminak?

⁹ »E ri petinak lok, e chinuwach ri'in e lic chirajawaxic chwe ri can'an uq'uiyal na utz taj chiquij ri quicojom rubi' ri Jesús ri aj Nazaret. ¹⁰ Y jenna' xin'an pa ri tinamit Jerusalem. Lic e q'ui ri xebenuya pa cárcel ruma quicojom rubi' ri Jesús. Wa' xya' ne uwujil panuk'ab cuma ri nimak e aj chacunel pa Rocho Dios. Yey ri'in xinya ne nuch'a'tem chiquij cha' quecamisaxic. ¹¹ Y pa tak ronoje ri sinagogas uq'uiyal laj xebenuya pa c'ax re canmin quiwach chupa cha'

* **26:4** “Ri nutinamit”: Ri Pablo tob xalax Tarso, xq'uiy Jerusalem y e cuq'uul raj Israel. Hch. 22:3

† **26:6** “Ri bi'tisinic xu'an ri Dios”: Wa' e cutak lo jun Colobenel. Yey ruma wa Colobenel, cuya chique rutinamit jun chomilaj c'aslemal na jinta utakexic.

caquic'ak bi uk'ij ri Jesús. Y ruma ri lic xinch'u'jer chiquij ruc' woyowal, xebe'nutzucuj ne c'a pa tak ri tinamit lic naj.

Ri Pablo cutzijoj tanchic su'anic xjalc'atitaj rubinic usilabic
(Hch. 9:1-19; 22:6-16)

¹² »Ec'u in c'o wi ri' che wa', numajom chi c'u bi nube pa ri tinamit Damasco, wuc'am uwujil ya'tal chwe cuma ri nimak e aj chacunel pa Rocho Dios c'utubal re intakom bi cuma rique cha' quebenuya pa c'ax ri quicojom rubi' ri Cristo. ¹³ Cantzijoj c'u ri' che'la, lal nimalaj takanel, ri xinc'ulumaj: Pa tiq'u'il k'ij e ri' numajom bi ri nube, xinwil ruwonibal jun ak' xpe chila' chicaj. Yey wa' más ne cawolk'in chwa ruwonibal ri k'ij; ec'u ri' wa' xusutij wij cuc' conoje ri ebenak wuc'. ¹⁴ Xojtzak c'u konoje ri'oj pulew, yey xinta jun kulaj cach'a't wuc' pa ri ch'a'tem hebreo, jewa' cubi'ij chwe: “Saulo, Saulo, ¿su'chac catch'o'jin chwij? Atuquel ca'an c'ax che awib jela' pacha' cu'an ri boyex echiri' cuya akan che ri puya cach'ic lo che” xcha'.

¹⁵ »Ec'u ri'in ximbi'ij: “¿China rilal, Wajawal?” xincha'.

»Yey ri Kajawal xubi'ij: “Ri'in in Jesús, ri jun catch'o'jin chirij. ¹⁶ Pero wo'ora chatyactajok y chayijbila' awib re ca'an ri catintak che, ma e uchac wa' xinc'ut wib chawach. Can'an c'u waj chac chawe y catu'ana at k'alajisay re ri cat-tajin che rilic wo'ora y ri cawil chikawach apanok echiri' canc'ut tanchi wib chawach. ¹⁷ Catinchajij chiquiwach ratinamit e aj judi'ab y chiquiwach ri na e ta aj judi'ab, wa' e ri tzel catquilo. Yey catintak bi wo'ora chique ri na e ta aj judi'ab ¹⁸ cha' awuma ri'at cajakataj ri quiwach y jec'ula' na quebin ta chi chupa ri k'eku'm, ma e quebin chupa ri K'ijsak. Yey awuma ri'at caquesaj ne quib ri' puk'ab ruchuk'ab ri Satanás y caquiya quib puk'ab ri Dios. Ruma c'u ri cubulibal quic'u'x wuc', caquic'ul ri cuybal mac

y caquic'ul que janipa tak ri ubi'tisim chi lo ri Dios chique rutinamit” xcha'.

Ri Pablo cutzijoj ri chac ya'om che ruma ri Dios

¹⁹ »Jec'uri'la', lal rey Agripa, na xinu'ana ta in aj palajiy tzij chwa wa xc'ut chwe ruma ri Dios. ²⁰ Ma ri xin'ano e nabe xin'ec che utzijoxic chique ri e c'o pa ri tinamit Damasco, tec'uchiri' chique ri e c'o pa ri tinamit Jerusalem y pa ronoje tak ri luwar re Judea. Yey xin'ec ne che utzijoxic chique ri na e ta aj Israel. Chique c'u conoje ximbi'ij lic chirajawaxic wi caquitzelej quitzij chwach ri Dios, caquiya quib puk'ab y caqui'an c'u ri utz jela' pacha' ri takal chique ri quitzelem chi quitzij chwach ri Dios.

²¹ »Ruma c'u wa', raj judi'ab xine'quichapa lo pa ri Rocho Dios y xcaj ne quinquicamisaj. ²² Pero ruma nuc'ulum ruto'bal ri Dios, c'a wak'ij ora na wok'otam ta ne uk'alajisaxic ri Dios chique conoje ri ticawex, chinima'k chich'uti'k. Yey ronoje ri nubi'im puwi ri Cristo e junam ruc' ri tz'ibital can cuma ri k'alajisanelab y ruma ri Moisés puwi tak ri cu'ana na chikawach apanok. ²³ Ma rique xquibi'ij chirajawaxic ri Cristo caric'owibej na ruc'axc'olil ri camic y cu'ana ri nabe cac'astaj lo chiquixo'l ri ecaminak, cha' jela' cutzijoj ri K'ijsak chique ri katinamit y chique ri jujun chic tinamit na e ta aj judi'ab.»

Ri xquich'ob ri takanelab puwi ri Pablo

²⁴ Ec'u ri' catajin ri Pablo che ubi'xiquil wa' re to'bal rib, ri Festo lic co xch'awic y xubi'ij:

—Pablo, jat ch'u'jerinak! Lic catic'ow uwi' che rajilaxic uq'uiyal wuj, y ruma wa' xatch'u'jeric—xcha'.

²⁵ No'j ri Pablo xubi'ij:

—Na in ch'u'jerinak taj, Festo, ri lic c'o wach la. Ma wa quintajin che uk'alajisaxic lic katzij y lic usuc'. ²⁶ Ma e ne ri rey Agripa, ri in c'o chwach, rire lic reta'am puwi tak wa'. Ruma ne ri', lic quinch'a't ruc'

ronoje nuc'u'x chwach rire. Ma chinuwach ri'in, ronoje tak wa quinta-jin che ubi'xiqul, utom chi rire; ma tak wa' na xa ta xe'lak'ay u'anom. ²⁷ ¿Cacoj la rilal lal rey Agripa, janipa ri quitz'ibam can ri k'alajisanelab ojertan? ¡Ri'in weta'am cacoj la wa'! —xcha'.

²⁸ Ec'uchiri', ri rey Agripa xubi'ij che ri Pablo:

—E cami cach'ob ri'at, ¿xa jubik' chi caraj cacoj pa nujolom cha' quinu'ana in jun cuc' ri quicojom rubi' ri Cristo? —xcha'.

²⁹ Ec'u ri Pablo xubi'ij che:

—E lic cuaj ri' cu'ana wa' uc' la, xa pa jok'otaj o tob camayinic; pero ¡lic cantz'onoj che ri Dios cha' na xew ta rilal, ma e janipa wa quinquitata' wa jok'otaj, quebu'ana jela' pacha' ri'in!† Xew c'u na cuaj taj caya'i' alak pa carena pacha' wa 'anom chwe ri'in —xcha'.

³⁰ Echiri' xubi'ij wa' ri Pablo, xey-actaj ri rey Agripa, ri takanel Festo, rixok Berenice y conoje ri etz'ul chiri' cuc'. ³¹ Yey echiri' xquijach tak bi quib, chiquiwach caquibi'ij: «Wa'chi, na jinta c'o u'anom cha' takal che camisaxic o caya' pa cárcel» quecha'.

³² Ec'u ri Agripa xubi'ij che ri Festo:

—Wa'chi, utz catzokpix bi tamaji utz'onom cata' uchi' ruma ri nimalaj takanel re Roma —xcha'.

27

Ri Pablo catak bi Roma

¹ Ec'uchiri' xjiquibax uwach cojtak bi pa ri luwar re Italia pa barco, ri Pablo y jujun chic chique ri e c'o pa presoyil xeya' puk'ab jun capitán que soldados, Julio rubi'. Wa' wa'chi catakan paquiwi ri soldados “E re ri nimalaj takanel Augusto” cabi'x chique. ² Xojoc* c'u bi chupa jun barco re ri puerto Adramitio, e ri

que'ec pa tak ri tinamit e c'o chuchi' ri mar re Asia. Xkamaj c'u bi kabe chwi ri mar. Yey xe'ec kuc' ri Aristarco,✶ jun aj Tesalónica, jun tinamit pa ri luwar re Macedonia.

³ Chuca'm k'ij c'ut, xojopon pa ri tinamit Sidón. Chiri' c'u ri', ri Julio, raj wach que ri soldados, lic xuc'ut ri rutzil uc'u'x che ri Pablo, ma xuya luwar che xe'bina cuc' ri ramigos cha' caquito' lo ruc' ri cajawax che.

⁴ Xojel c'u bi pa ri tinamit Sidón. Pero na xoj'ec ta jusuc' ruma ri tew lic cajumca'nic, yey wa' chikawach petinak wi. Ec'u xkasut rij ri isla Chipre cha' cojuch'uk ri juyub che ri tew.

⁵ Xojic'ow c'u chwach tak ri tinamit re Cilicia y re Panfilia, ri e c'o chuchi' ri mar. Y xojopon c'u pa ri tinamit Mira, jun tinamit re Licia. ⁶ Chiri' c'u ri', ri capitán que ri soldados xurik jun barco re ri puerto Alejandría, e ri cumaj bi ube que'ec pa tak ri luwar re Italia. Y xojuya bi chupa.

⁷ Uq'uiyal k'ij c'ut xojbin chwi ri mar e la' xa coq'uul, y lic c'ayew xojopon chwach ri tinamit Gnido ruma ri tew cojuk'atej chikawach. Ruma wa' xkamaj bi kabe pa ri isla Creta pa na lic ta cujum wi rib ri tew chike. Xojic'ow c'u chwach ri tinamit Salmón.

⁸ Ewi xojic'ow chirij wa' wa isla xa nakaj che ruwa rakan tak'aj y jela' lic c'ayew xojopon pa jun tinamit Buenos Puertos, cabi'x che. Wa' xa chunakaj chi ri tinamit Lasea c'o wi.

⁹ Lic c'ut uq'uiyal k'ij chic kajamom che ri kabenam yey lic xibibal chi ri binem chwi ri mar, ma c'ac' ric'owic ri nimak'ij echiri' ri aj judi'ab caqui'an ayuno† yey e ne ri' cujek ri k'alaj. E uwari'che ri Pablo xebupixabaj, ¹⁰ jewa' xubi'ij chique:

«Alak achijab, ri'in canwilo wa kabenam chwi wa mar lic xibibal uwach. C'o pa sak na xa ta jubik' ri

† **26:29** “Quebu'ana jela' pacha' ri'in”: Ri que'elawi ri xubi'ij ri Pablo, e lic utz we conoje caquicoj rubi' ri Cristo y jec'ula' caquic'ul ri chomilaj c'aslemal na jinta utakexic. * **27:2** Ri xbi'n wa' wa ch'a'tem

“Xojoc” e Lucas, ri xtz'iban ri libro, ma xoc bi pa ri barco ruc' ri Pablo. Raj wach que ri soldados xuya luwar chique ri Lucas y ri Aristarco cacachbilaj bi ri Pablo pa barco. ✶ **27:2** Hch. 19:29; 20:4; Col.

4:10; Flm. 24 † **27:9** “Ri nimak'ij echiri' ri aj judi'ab caqui'an ayuno”: Wa' cu'an pa septiembre u octubre. Chwi ri mar Mediterráneo lic c'o cakjik' cujek lo octubre y cu'q'uisa c'a febrero.

cakajam canok; na xew ta cakajam can eka'n y cakajam can ri barco, ma laj ne cakajam can ri kac'aslem ri'oj» xcha chique.

¹¹ Pero ri capitán que ri soldados e lic xuta que ri c'amayom bi re ri barco y ri rajaw wa', yey na xoc ta il che ri xubi'ij ri Pablo. ¹² Ec'u ri puerto pa cataq'ui' wi ri barco na e ta jun luwar pa utz cactic'owibej wi ruk'ijol echiri' c'ax tew y c'o jab. † Ruma c'u la', lic e q'ui xquibi'ij chiquiwach quebel chiri' y caquitij uk'ij quebec pa ri tinamit Fenice cha' chila' caquic'owibej ruk'ijol echiri' c'ax tew y c'o jab. Wa jun puerto re ri isla Creta catzu'n lo puwiquik'ab y pa mox che rutzakibal k'ij.

Ri cakjik' chwi ri mar

¹³ Xpe c'u jun tew pa sur xa cawelel chic. Wa' xucoj pa quijolom e xu'ana ri quirayim, y jec'ula' utz caquimaj bi quibe. Xquimaj c'u bi quibe pa ri barco chunakaj ri tak'aj che ri isla Creta.

¹⁴ Pero na naj ta ka'anom chwi ri mar echiri' xujek jun nimalaj cakjik' "Euroclidón" cabi'x che y xujek c'u ri' e cupakej bi ri barco. ¹⁵ Ec'u ri' wa' wa cakjik' xujek cuxulc'atila' ri barco y na utz ta chic cac'am bi jusuc' chwa ruchuk'ab runimal tew. Jec'ula' xa xkaya bi kib xojc'am bi ruma runimal tew.

¹⁶ Xkasutij c'u rij jun ralco isla Clauda rubi' pa na lic ta cujum wi rib ri tew chike, yey lic xu'an c'ayew chike xkajec' pan ri ralco barco re to'bal ib, ri charem ruma ri nimalaj barco. ¹⁷ Ec'uchiri' xak'anisax wa' pa ri nimalaj barco, xcoji' ucowil ri barco ruc' laso cha' na cu'an ta uc'aj ruma ri cakjik'. Lic c'u xkaxi'ij kib ri', ma runimal tew cupakej ri barco chwach jun luwar Sirte rubi', pa na cho ta wi ri ya' y wulu'l uxe' ri sanyeb. Xesax c'u ri manta c'o puwi ri barco y xya' luwar che ri barco cac'am bi ruma runimal tew.

¹⁸ Chuca'm k'ij c'ut, lic c'a cajabajo'x ri barco ruma ruchuk'ab ri cakjik'. Ruma c'u ri' rachijab ebuc'ayom ri barco xquijek caquic'ak tak bi ri eka'n re ri barco pa ri mar. ¹⁹ Y churox k'ij xkajek utoric upa ri barco y xkac'ak bi pa ri mar tak ri xkatoro.

²⁰ Uq'uiyal k'ij c'u ri' na junta k'ij y na junta ch'umil xk'alajinic, yey ri cakjik' na xa ta jubik' ri ya' curoj chike. Ruma c'u wa' na junta chi pa sak we cojc'asi' na. ²¹ Yey na oj wo'kinak ta uq'uiyal k'ij. E uwari'che ri Pablo xtaq'ui' chiquixo'l conoje y jewa' xubi'ij:

«Alak achijab, lic utz ta e xta alak ri ximbi'ij; ma we tamaji xojel lo pa ri isla Creta, na cakac'ulumaj ta ri' wa' y na junta ne c'o cakajam ri'.

²² »No'j c'u wo'ora cannimarisaj c'u'x alak ruc' wa': Na junta junok cujam can ruc'aslem che alak, xew cakajam can ri barco. ²³ Cambi'ij wa' ma wa jun ak'ab xc'un wuc' ri ángel re ri Dios, ri Jun nuya'om wib puk'ab y ri canlok'nimaj. ²⁴ Ec'u ri ángel xubi'ij can wa' chwe: "Pablo, maxi'ij awib, ma lic chirajawaxic cate'ela chwach ri nimalaj takanel re Roma. Yey awuma ri'at, ri Dios quebucolobej che ri camic conoje ri e c'o awuc' chupa ri barco" xcha ri ángel chwe. ²⁵ Ruma c'u la', alak achijab, nimarisa' c'u'x alak. Ma ri'in cubul nuc'u'x ruc' ri Dios y lic nujuquibam e cu'ana' pacha' ri xbi'x chwe. ²⁶ No'j c'u ri barco cu'ch'iquiba' na c'u rib pa ri sanyeb chwach juna isla»* xcha ri Pablo.

²⁷ Jun ak'ab c'u ri', echiri' xkaq'uis queb semana, oj pakem bi ruma ri tew chwi ri mar Adriático. Yey pa tiq'u'il ak'ab c'ut, e rachijab ebuc'ayom ri barco xquina'bej catajin coponic chunakaj ulew. ²⁸ Xquipaj c'u ruchoyil upa ri ya' y xquina'bej treinta y seis metros chi uchoyil upa. Xojbin chi pan jubik'

† **27:12** "Ruk'ijol echiri' c'ax tew y c'o jab": Chupa ri Biblia pa caxtila cabi'x "invierno" che ruk'ijol echiri' lic c'ax tew y c'o jab. Chila' Israel y chwi ri mar Mediterráneo, wa' cajeker octubre y caq'uis abril. * **27:26** Hch. 27:44

y xquipaj tanchic. Xquina'bej c'u ri' xa veintisiete metros chi uchoyil upa. ²⁹ Lic c'u caquixi'ij quib we ri tew xuchik ri barco chwa abaj. Ewi xquic'ak bi cajib anclas pa ri mar chirij lo ri barco re caquixim ruc' cha' utz cataq'ui'ic. Xew c'u lic coye'em chic casakiric.

³⁰ Ec'u rachijab ebuc'ayom ri barco xcaj caquiya can ri barco. Xquijek c'u caquikasaj pa ri mar ri ralco barco re to'bal ib y xqui'an pacha' e ri' caquikasaj pan jujun chic anclas chwach ri barco re cataq'ui'ic.

³¹ Ec'u ri Pablo xubi'ij chique ri capitán y ri soldados:

«We wa ebuc'ayom re ri barco na quecanaj ta can chupa ri barco, na cacolobetaj ta alak» xcha'.

³² Ec'uchiri', ri soldados xquik'at pa ximital wi ri ralco barco re to'bal ib; y xquiya bi ranima' xe'ec pa ri ya' y jela' na junta junok utz canimaj bi chupa.

³³ Echiri' xujek c'ut casakiric, ri Pablo xebupixabaj conoje cha' quewa'ic, jewa' xubi'ij chique:

«E uca'm semana wa' na uxlaninak ta alak y na junta c'o tijom alak. ³⁴ E uwari'che, cantz'onoj che alak, wo'k alak cha' na cak'ob ta ri chuk'ab alak; ma na junta junok che alak cujam can tob tane xa juna uwi'» xcha'.

³⁵ C'a ec'u ri' ubi'im wa', xuc'am jun pam y xutioxij che ri Dios chiquiwach conoje; xuwech' c'u upa y xujek utijic. ³⁶ C'a ec'uchiri', conoje lic xmik' quic'u'x y xewa'ic. ³⁷ Chi konoje ri oj c'o chupa ri barco, oj queb ciento ruc' setenta y seis chi ticawex. ³⁸ Ec'uchiri' xenojic, xquik'obisaj can ri reka'n ri barco, e xquic'ak can ri trigo pa ri mar.

Cawech'taj ri barco chwi ri mar

³⁹ Ec'uchiri' pak'ij chic, ri ebuc'ayom ri barco na queta'am taj pa la catajin wi coponic. Yey xquil c'u pan chinimanaj jun uk'ab ri mar sanyeb uchi'; jec'ula' xquiyijba' chiquiwach we caquich'ij uminic

bi ri barco c'a chila'. ⁴⁰ Xquik'at c'u ri ximbal re ri anclas pa yukul wi ri barco y xquiya can ranima' wa' chupa ri mar. Jec'ula' xquiquir ri ximbal re ri queb timón re ri barco. Tec'uchiri', xquiyac ri manta cac'uluw ri tew chwach ri barco y xquijek c'u ri' quekib pan che rulew c'o chuchi' ri ya'. ⁴¹ Pero ri barco xu'ya'a rib pa cuc'ul wi rib queb utza'm ya' y xtzani' pa jun luwar pa umolom wi rib ri sanyeb chuxe' ri ya'. Rutza'm ri barco xu'ch'iquiba' rib pa ri sanyeb. Ec'u ri chirij ri barco xujek cawech'etajic ruma ruchuk'ab ri tew c'o chwi ri mar.

⁴² Ec'u ri soldados xquibi'ij chiquiwach quequicamisaj ri e c'o chi presoyil cha' na junta junok canimajic e la' pa mux. ⁴³ No'j c'u ri capitán que ri soldados, ruma caraj cucolobej ri Pablo che ri camic, xebuk'atej che wa xquino'jij. Y xtakan c'u che cha' e janipa ri caquirik mux quic'aka bi quib nabe chupa ri ya' y que'quimaja uwa ulew; ⁴⁴ yey ri nic'aj chic qui'ana bi que, quiya'a bi quib chwi tak tz'alam y chwi tak ruch'akapul ri barco. Jec'ula' xqui'ano. Ewi na junta junok xjik' pa ya'; conoje xe'quimaja uwa ulew.

28

Ri Pablo copon pa ri isla Malta

¹ Ec'uchiri' ojelinak chi lo chwa ruxibriquil ri camic chupa wa ya' y xkamaj c'u uwa ulew, c'a echiri' xketa'maj wa isla pa xojopon wi, Malta rubi'. ² Yey ri ticawex e aj chila' lic xquic'ut ri relej quic'u'x chike, ma xojquic'ul konoje. Xquinuc' c'u jun ak' ruma ri jab catajinic y ruma ri tew lic cajuch'uch'ic. ³ Ec'u ri Pablo xu'molo lo jujun uk'ab che' chaki'j y xuc'ak chupa ri ak'. Yey c'o c'u jun cumatz animajel chwach ruc'atanil ri ak'; wa' xutzuyuyej rib che ruk'ab ri Pablo.

⁴ Echiri' ri ticawex e aj chila' xquil ri cumatz tzayal che ruk'ab ri Pablo,

§ 27:29 «Anclas»: Wa' e ch'ich' xucuxub utza'm jequel che ri barco y ruc' wa' ri barco cataq'ui' pa ri ya'.

jewa' xquibi'ij chiquiwach: «Lic k'alaj wa'chi camisanel; ma tob na xjik' ta pa ya', pero ri k'atbal tzij puwi' na cuya ta che cac'asi'ic ruma ri na utz taj u'anom» xecha'.

⁵ Pero ri Pablo xa xujabij ruk'ab y ri cumatz xtzak chupa ri ak', yey ri Pablo na jinta c'o xuc'ulumaj.

⁶ Ec'u ri winak coye'em jampala' cawa'lij rucuerpo o we xakic'ate't catzak pulew y asu cacamic. Lic c'u ri' xcoy'ej wa'. Yey echiri' xquilo na jinta c'o cuc'ulumaj, xquijalc'atij ri caquich'obo y xquibi'ij ri Pablo e jun dios.

⁷ Chunakaj c'u la oj c'o wi c'o tak rulew jun achi aj wach chupa ri luwar, Publio rubi'. Rire xojuc'ulu y lic xojucajmaj chi utz oxib k'ij. ⁸ Ec'u ri' rukaw ri Publio c'o chwa uwarabal yewa'; c'o ak' chirij y quic' chupa. Ec'u ri Pablo xoc bi, xe'rila'. Xu'an orar ruc'; tec'uchiri', xuya ruk'ab puwi' y xucunaj. ⁹ Ruma c'u ri' wa', ri jujun chic yewa'ib e c'o chupa wa luwar xebopon ruc' ri Pablo y xecunutajic. ¹⁰ E tak c'u ri' wa' wa ticawex lic xojquicajmaj chi utz. Y echiri' xkamaj tanchi ubi kabe pa barco, xquiya bi janipa ri cajawax chike.

Ri Pablo copon Roma

¹¹ Oxib ic' c'u kaq'uisom chupa wa luwar. Ec'uchiri', xojoc bi chupa jun barco re ri puerto Alejandría. Wa' wa jun barco ric'owibem ruk'ijol echiri' c'ax tew y c'o jab* chirij; yey chutza'm wa' cojotal ri quic'axwach queb tiox, wa' e ri Cástor y ri Pólux.†

¹² Xojopon c'u pa ri tinamit Siracusa y xka'an oxib k'ij chirij. ¹³ Tec'uchiri', xkamaj bi kabe pa barco chunakaj ri tak'aj re ruchi' ri mar y xojopon pa ri tinamit Regio. Chuca'm k'ij c'u ri', xpe ri tew pa sur chike. Y churox k'ij c'u ri' xojbinic y xojopon pa ri tinamit Puteoli.

¹⁴ Chupa c'u ri' wa tinamit xekarik

jujun chique ri quicojom rubi' ri Cristo. Ec'u rique xebelaj chike cojcanaj wukub k'ij cuc', y e xka'ano. Tec'uchiri' xojel bi chirij, xoje'ela pa ri tinamit Roma.

¹⁵ Ec'uchiri' ri hermanos e c'o Roma xqueta'maj ri koponibal, xebel lo che kac'ulic. Jujun xojquirik pa ri luwar cabi'x che: “Foro re Apio”, y jujun chic pa ri luwar cabi'x che “Oxib Tabernas”. Echiri' ri Pablo xril ri coponibal ri hermanos, xutioxij che ri Dios y lic xnimar uc'u'x.

¹⁶ Ec'uchiri' xojopon pa ri tinamit Roma, ri capitán que ri soldados c'amayom bi que ri e c'o chi presoyil, xebuya ri presos puk'ab ri c'amal quiwach conoje ri soldados re chila'. Pero ri Pablo xya' che cac'oji' utuquel pa jun ja y xa c'u jun soldado cachajin re cha' na canimaj tubi.

Ri Pablo cutzijoj Ruch'a'tem ri Dios chila' Roma

¹⁷ Oxib k'ij c'u ic'owinak echiri' ri Pablo xutak quisiq'uixic ri aj wach que raj judi'ab. Echiri' quimolom chi c'u quichi', jewa' xubi'ij chique:

—Achijab, alak watz-nuchak', ri'in na jinta c'o nu'anom chirij ri katina-mit y na jinta ne c'o nu'anom chirij ri quicojobal can ri kati'-kamam. Na ruc' ta c'u ri', chila' Jerusalem in c'amom lo chi presoyil ma raj wach e aj judi'ab xinquiya paquik'ab raj Roma. ¹⁸ Yey rique echiri' xquita nuchi', xcaj xinqutzokopij bi, ma na xquirik ta juna mac chwij re takal chwe quincamisaxic.

¹⁹ »Pero raj judi'ab xek'aten che quintzokpiz bi. Ruma c'u wa', lic xinna'o cajawax chwe cantz'onoj cata' nuchi' ruma ri nimalaj takanel re Roma. Y na xin'an ta wa' re cancoj quimac ri nutinamit e aj judi'ab. ²⁰ Ruma tak c'u wa', xinsiq'uij alak cha' canwil wach alak y quinch'a't uc' alak, ma xew cuaj queta'maj alak wa': Ri'in in ya'tal chi presoyil

* **28:11** “Ruk'ijol echiri' c'ax tew y c'o jab”: Chupa ri Biblia pa caxtila cabi'x “invierno” che ruk'ijol echiri' lic c'ax tew y c'o jab. Chila' Israel y chwi ri mar Mediterráneo wa' cajeker octubre y caq'uis abril.

† **28:11** “Ri Cástor y ri Pólux”: Cabi'xic rique eyo'xab; wa' e quitiox raj chac quechacun pa tak barcos.

yey inyutum ruc' wa carena ruma nucubam pan nuc'u'x che ri koye'em ri oj aj Israel† —xcha chique.

²¹ Ec'uchiri', rique xquibi'ij che:

—Ri'oj na kac'ulum tane juna wuj chi'ij la petinak Judea; yey na jinta ne junok chique ri katz-kachak' c'uninak wara chikawach ri'oj re cucoj juna mac chi'ij la. ²² Pero lic c'u chirajawaxic chike ri'oj cakata na sa' ri catajin la che uc'utic; ma konoje keta'am pa ronoje luwar ri ticawex quech'a't chirij wa jun C'ac' Be — xecha'.

²³ Xquik'at c'u uk'ijol caquimol quib ruc' ri Pablo cha' caquita uchi'. Lic c'u e q'ui ri' xebopon ruc' pa ri jekel wi. Ec'u ri Pablo xuk'alajisaj rutakanic ri Dios chiquiwach; xu-jekebej lo anim y xu'q'uisa c'a benak k'ij. E lic xutij uk'ij cuc' cha' caquicoj ri Utzilaj Tzij puwi ri Jesús. Yey xujiquiba' c'u uwach rutzijonic ruc' ri Tzij Pixab re ri Moisés y ruc' tak ri quitz'ibam can ri k'alajisanelab.

²⁴ Jujun c'u chique ri ticawex xquicojo janipa ri xubi'ij ri Pablo, no'j e c'o jujun chic na xcaj taj xquicojo. ²⁵ Y ruma c'u na xu'an ta junam quic'u'x ruc' ri xuc'ut ri Pablo chiquiwach, xquijek c'u ri' quebel bi. Yey c'amaja' c'u quebec echiri' ri Pablo jewa' xubi'ij chique:

«Lic e u'anom pacha' ri xubi'ij ri Santowilaj Ruxlabixel ri Dios chique ri kati'-kamam ojertan ruma ri k'alajisanel Isaías echiri' xubi'ij:

²⁶ Jat cuc' wa tinamit y chabi'ij wa' chique:

“Ri'ix tob lic quixtanic, na jinta c'o quimaj usuc' che ri quito; y tob ne quixtzu'nic, na jinta c'o quimaj usuc' che ri quiwilo.”

²⁷ Ma wa tinamit lic u'anom co ri canima';

e pacha' lic c'ayew chique quetanic, y ri quiwach e pacha' yupulic. Jec'ula' na jinta c'o caquilo, na jinta c'o caquito y na jinta c'o caquimaj usuc';

† 28:20 “Ri koye'em ri oj aj Israel”: Ri e aj Israel koye'em cac'un lo jun Colobenel; yey ri Pablo cuk'alajisaj, wa Colobenel e ri Jesús.

yey na caquitzelej tane quitzij chin-uwach

cha' jela' utz quebenucunaj Is. 6:9-10

xcha'.

²⁸ »Cheta'maj c'u alak: Wa colobeta-jic re ri Dios que'ec utzijoxic chique ri na e ta aj judi'ab, yey rique caquita na chi utz» xcha'.

²⁹ Echiri' xuq'uis ubi'xiquil wa' ri Pablo, raj judi'ab xebec y lic caquichapala' quib ruc' oyowal chiquiwach.

³⁰ Ec'u ri Pablo xjeki' queb junab pa jun ja xa xtojon che. Y chiri' xebuc'ul wi conoje ri xebo'lbina ruc'. ³¹ Ec'u na xuxi'ij ta rib che utzijoxic puwi rutakanic ri Dios y che uc'utic puwi ri Kanimajawal Jesucristo; yey na jinta ne c'o xk'aten che.

Ri carta xutz'ibaj ri Pablo che riglesia c'o Roma

Ri Pablo cuya pan rutzil quiwach ri hermanos e c'o Roma

¹ Ri'in in Pablo, in raj chac ri Kanimajawal Jesucristo. In c'u siq'uim re quinu'an utako'n y ya'tal chwe cantzijoj ri Utzilaj Tzij re ri Dios. ² Wa' wa Utzilaj Tzij e ri ubi'tisim lo ri Dios ojertan, yey e ri tz'ibital can pa ri Santowilaj Uch'a'tem cuma ruk'alajisanelab. ³ Ri Utzilaj Tzij e ri cach'a't puwi Ruc'ajol ri Dios, ri Kanimajawal Jesucristo. Rire xalax wara che ruwachulew yey upetebem chique ri e ralco'al ri rey David. ⁴ Yey ruma ri Santowilaj Ruxlabixel ri Dios, xk'alajinic ri Kanimajawal Jesucristo e Uc'ajol ri Dios echiri' ruc' unimal chuk'ab xc'astaj lo chiquixo'l ri ecaminak. ⁵ Ruma c'u Rire, xkac'ul ri sipanic re coju'an oj utako'n cha' uq'uiyal ticawex pa tak ronoje ri tinamit che ruwachulew cacubi' quic'u'x ruc' y caquicoj utzij y jela' calok'ox uk'ij rubi'. ⁶ Yey ralak e alak cuq'u'il ri esiq'uim cha' cac'oji' alak puk'ab ri Kanimajawal Jesucristo. ⁷ Quintz'iban c'u pan che onoje alak ri jekel alak pa ri tinamit Roma, ri lic c'ax cana' alak ruma ri Dios y siq'uim alak cha' cu'an alak re ri Dios. C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

Ri Pablo caraj que'bina cuc' ri e aj Roma

⁸ Nabe na, ruma ri Kanimajawal Jesucristo, cantioxij che ri nu Dios uma onoje alak, ma che ronoje luwar che ruwachulew lic catataj puwi ri cubulibal c'u'x alak. ⁹ Ri Dios, ri canlok'nimaj ruc' ronoje nuc'u'x echiri' cantzijoj ri Utzilaj Tzij re Ruc'ajol, Rire lic reta'am xaki cancuxtaj alak chwach echiri' can'an orar. ¹⁰ Cantz'onoj c'u che

ri Dios chuya'a na chwe quine'bina uc' alak juna k'ij we e caraj ri' Rire chwe. ¹¹ Ma lic cuaj canwil wach alak cha' canto' alak che ri binic silabic alak chwach ri Dios y jela' lic catiqui' alak chi utz. ¹² Jec'ula' cakanimarisaj kac'u'x chikawach, ma ralak y ri'in junam cubul kac'u'x ruc' ri Kanimajawal.

¹³ Hermanos, lic cuaj c'ut queta'maj alak, ri'in uq'uiyal laj nuch'obom cuaj qui'nwila alak re canto' alak cha' caq'uiy alak chwach ri Dios, jela' pacha' ri nu'anom cuc' ri jujun chic na e ta aj Israel. Pero c'amaja' ya'tal chwe quinopon uc' alak. ¹⁴ Ri'in lic canna'o chinuwach c'o wi cantzijoj ri Utzilaj Tzij chique conoje; wa' e ri e tijotal pa ri ch'a'tem griego yey ri e aj naj na e tijotal taj, ri lic c'o queta'am yey ri na jinta c'o queta'am. ¹⁵ Jec'ula' lic cacha wanima' che quin'ec pa ri tinamit Roma re cantzijoj ri Utzilaj Tzij che alak.

Ruchuk'ab ri Utzilaj Tzij

¹⁶ Ri'in na quinq'uix ta che ri Utzilaj Tzij, ma ruc' wa' cak'alajin ruchuk'ab ri Dios re quebucolobej conoje ri quecojow re; nabe chique ri e aj judi'ab, tec'uchiri' chique ri na e ta aj judi'ab. ¹⁷ Ma ri Utzilaj Tzij cuk'alajisaj chikawach su'anic cojc'oji' jusuc' chwach ri Dios, yey wa' e ruma ri cubulibal kac'u'x ruc' Rire; ronoje c'u ri kac'aslemal chwach ri Dios e ruma ri cubulibal kac'u'x. Ma jewa' tz'ibital can pa Ruch'a'tem: Ri e jusuc' chwach ri Dios, c'o quic'aslemal ruma ri cubulibal quic'u'x ruc' Rire *Hab. 2:4* cacha'.

Conoje ri ticawex emacuninak chwach ri Dios

¹⁸ Lic cak'alajin c'u ri royowal ri Dios echiri' ruk'atbal tzij cape chila' chicaj paquiwi ri ticawex lic itzel quic'u'x chirij ri Dios y na jusuc' ta ri quibinic quisilabic; ma ruma ri na utz taj caqui'ano, quebu'an e latz'anel chique jujun chic cha' na

caqueta'maj ta ri K'ijsak. ¹⁹ Yey rique c'o queta'am puwi ri Dios, ma e Rire k'alajisayom wa' chique. ²⁰ Ma e janipa ri na quilitaj ta uwach che ri Dios, pacha' ruchuk'ab na jinta utakexic y runimal uwach Rire, wa' lic xk'alajin lo chwi ri jekebal re ruwachulew ruma ronoje tak ri 'anatal ruma Rire. E uwari'che na usuc' taj we c'o junok cubi'ij: «Na jinta c'o weta'am puwi ri Dios.» ²¹ Pero ri winak tob queta'am chic c'o jun Dios c'aslic, na quiya'om ta c'u ri' ri yacbal uk'ij takal che y na que-tioxin tane chwach. Jec'ula' xsach ri quina'oj ma e caquich'ob ri na jinta uchac; yey ruma wa' na caquimaj ta chi usuc' sa' ri utz y sa' ri na utz taj. ²² Tob caquibi'ij lic c'o quina'oj, pakatzij wi lic na jinta c'o queta'am. ²³ Na xquiyac ta chi uk'ij ri Dios c'aslic, ri Jun na cacam taj; ma e xquijek uyaquic quik'ij quic'axwach winak xa quecamic y quic'axwach tak awaj quexiq'uic' pa caj, tak awaj cajib cakan yey tak awaj quecharar pulew.

²⁴ Ruma c'u la', ri Dios xebuya can chupa ri ch'ulilaj mac y chupa ri quirayibal na chom taj. Jec'ula' xquijek xemacun chiquiwach, xqui'an ruc' ri quicuerpo ri lic q'uixbal uwach. ²⁵ Wa' xquic'ulumaj ma xquic'ak bi ri K'ijsak re ri Dios yey puc'axel e xquitakej ri xa rak'ubal. Ec'u xquiyac quik'ij y xquiloc'oj janipa tak ri u'anom ri Dios; yey na e ta xquiyac uk'ij ri 'anayom re janipa tak ri c'olic, ri Jun lic takal che cayac uk'ij na jinta utakexic. Amén.

²⁶ Ruma c'u la', ri Dios xerok'otaj can chupa ri quirayibal lic q'uixbal uwach. Xu'ana nenare' ri ixokib xquijalc'atij rusuc' ri quirayibal cuc' ri cachijilal y e xqui'an ri na usuc' taj, ma xquijek caquirayij quib chiquiwach e ixokib. ²⁷ Jec'ula' rachi-jab xquijalc'atij rusuc' ri quirayibal cuc' ri quixokilal; xquitzak c'u quib che u'anic ri lic q'uixbal uwach, ma xquijek caquirayij quib chiquiwach, achijab cuc' achijab. Ruma c'u ri'

e xquipetisaj lo ri royowal ri Dios paquiwi' y quic'ulum c'u ri tojbal re ri ch'ulilaj mac qui'anom.

²⁸ Rique na xcaj taj caqueta'maj uwach ri Dios. E uwari'che Rire xerok'otaj can chupa ri sachibal na'oj cha'jela' e caqui'an ronoje ri na usuc' taj. ²⁹ Jec'ula' e quiya'om quib che u'anic janipa ri na jusuc' taj: wa' e ri caquetz'abej uwa quik'ij cuc' jujun chic na quic'ulel taj, ri caqui'an ri lic itzel uwachlibal, ri e aj rayinel, ri itzel quic'u'x, ri c'ax quic'u'x chiquiwach, ri e camisanel, ri e aj ch'a'oj, ri e socoso'nel, ri caqui'an c'ax chique jujun chic, ³⁰ ri e aj molot, ri e aj nuc'ul ch'a'tem, ri itzel quic'u'x chirij ri Dios, ri e aj yajanel ruc' itzel ch'a'tem, ri caqui'an nim che quib, ri caquitac'aba' quik'ij, ri itzel uwach tak ri caquino'jij, ri na e ta cojol tzij que quichu-quikaw, ³¹ ri na cacaj taj quetanica, ri na caqui'an taj sa' ri caquibi'ij, ri na jinta c'ana rutzil c'u'xaj cuc', ri na e ta cuyul mac y ri na jinta c'ana c'axna'bal c'u'xaj cuc'. ³² Rique lic queta'am chi utz ri k'atbal tzij re ri Dios paquiwi ri e aj mac, ma Rire ubi'im lo wa': Janipa ri caquipalajij rutakanica, lic takal chique quecamic. Tob c'u e u'anom ri', rique na xew ta caqui'an ri na utz taj, ma lic ne quequi'cot che echiri' caquilo e c'o jujun chic caqui'an que cuc'.

2

Lic jusuc' ri k'atbal tzij cu'an ri Dios

¹ E uwari'che, tob at chinok, na utz taj cawesaj awib chwach ri mac echiri' ri'at cak'at tzij paquiwi jujun chic ruma ri caqui'ano. Ma ri'at cak'at tzij paquiwi' yey e ne cat-tajin che u'anic ri caqui'an rique; ruc' c'u wa' atuquel caya awib chupa ri k'atbal tzij. ² Yey keta'am c'ut lic jusuc' ri k'atbal tzij cu'an ri Dios paquiwi ri quebanaw tak ri na utz taj. ³ Ri'at, ri cak'at tzij paquiwi jujun chic ruma ri caqui'ano yey ca'an awe cuc', ¿cach'ob cami ri' ri'at ri Dios na cuk'at ta tzij paw'i'?

⁴ Na ruc' ta c'u ri', lic nim ri rutzil uc'u'x y runimal uc'u'x ri Dios pawil, ma caroy'ej cayijba' awib y na asu ta cusachisaj awach. ¿E camí cac'ak bi uk'ij ri' ri unimal rutzil uc'u'x ri Dios? ¿Na aweta'am ta neba ri'at wa unimal rutzil uc'u'x ri Dios e cac'amaw bi awe chupa ri tzelebal tzij chwach Rire? ⁵ No'j ri'at lic awiboch'im awib yey na cach'aw tane ac'u'x che catzelej atzij. Ruma c'u wa' e cat-tajin che upetisaxic ri royowal ri Dios pawil chupa ri k'ij echiri' Rire cuc'ut ri royowal y cuk'alajisaj c'u ri jusuc' k'atbal tzij cu'ano. ⁶ Ma ri Dios cuya ri rajil uc'axel chique chiquijunaj e chirij tak ri qui'anom. ⁷ Cuya c'aslemal na jinta utakexic chique ri quichuk'ubem quib che u'anic ri utz, ma cacha quic'u'x che uc'ulic ruchomalil ri Dios, ri yacbal k'ij cuya Rire y ri c'aslemal na jinta uq'uisic. ⁸ No'j ri oyowal y ri k'atbal tzij re ri Dios catzak paquiwi ri queyactaj chirij Rire, wa' e ri na cacaj ta caquicoj ri K'ijsak re ri Dios, xew e caqui'an ri na jusuc' taj chwach ri Dios. ⁹ Cape c'u c'axc'obic y bis paquiwi conoje ri ticawex caqui'an ri na utz taj, tob e aj judi'ab o na e ta aj judi'ab. ¹⁰ No'j chique conoje ri quebanaw re ri utz, ri Dios cuya quichomal, yacbal quik'ij y utzil chomal, tob e aj judi'ab o na e ta aj judi'ab. ¹¹ Ma chwach ri Dios conoje ri ticawex xaki junam quiwach.

¹² Conoje c'u ri na jinta queta'am puwi ri Tzij Pixab re ri Dios, na cak'at ta tzij paquiwi' e chirij ri cubi'ij wa Tzij Pixab. Na ruc' ta c'u ri', we quemacunic, casach na c'u quiwach. No'j c'u ri queta'am wa Tzij Pixab, we quemacunic, ri' cak'at na tzij paquiwi' e chirij ri cubi'ij wa Tzij Pixab. ¹³ Ma ri e jusuc' chwach ri Dios na e ta ri xa e tanel re Rutzij Upixab; ma e ri e 'anal re, e wa' ri ca'an jusuc' chique. ¹⁴ No'j ri na e ta aj judi'ab, tob na quitom ta ri Tzij Pixab re ri Dios, we calax pa canima' caqui'an ri cubi'ij wa Tzij Pixab, wa' e c'utubal re c'o queta'am puwi sa'

ri chirajawaxic chique. ¹⁵ K'alaj c'u ri' c'o takanic tz'ibital pa canima', ma caquina' chiquic'u'x we utz o na utz ta ri quina'oj. ¹⁶ C'o jun k'ij echiri' ri Dios cuya puk'ab ri Kanimajawal Jesucristo cuk'at tzij paquiwi conoje; c'a ec'u ri' cak'alajin na ronoje ri c'o pa canima' ri ticawex, jela' pacha' ri cubi'ij wa Utzilaj Tzij cantzijo'j ri'in.

Ri e aj Israel y ri Tzij Pixab re ri Moisés

¹⁷ Chatape c'u ri cabi'x chawe ri at cuq'u'il ri e aj judi'ab, ri'at cacuba' ac'u'x ruc' ri Tzij Pixab re ri Dios yey catac'aba' ak'ij ma ri Dios c'o awuc'. ¹⁸ Aweta'am c'u ri' sa' ri caraj ri Dios y sa' ri lic utz chwach Rire, ma Rutzij Upixab cuc'ut chawe sa' ri chirajawaxic wi ca'ano. ¹⁹ E chawach ri'at, at c'amal quiwach ri e potz' y at k'ijsak chiquiwach ri quebin pa k'eku'm. ²⁰ E chawach ri'at, at k'ilonel que ri na jinta caquiriko y at c'utunel que ri e ch'uti'k. E cach'ob ri'at c'o ronoje ya'bal na'oj y k'ijsak awuc', ma ya'tal ri Tzij Pixab pak'ab. ²¹ Jela' c'u ri' we catc'utun chique jujun chic, ¿su'be na catc'utun ta chawibil awib? Ri'at cat-tzijon puwi' na utz taj we jun cu'an elek'; ¿su'be c'u ri' ri'at ca'an elek'? ²² Yey cabi'ij na utz taj we junok camacun chirij ri c'ulaniquil; ¿su'be c'u ri' ri'at ca'an wa'? Catch'a't ne chiquij ri tiox; ¿su'be c'u ri' cacoj ak'ab che tak ri re tiox? ²³ Ri'at lic ca'an nim che awib ma c'o awuc' ri Tzij Pixab re ri Dios. ¡Yey ri'at capalajij ri Tzij Pixab re ri Dios y ruc' wa ca'ano cac'ak bi uk'ij Rire! ²⁴ E uwari'che e jela' pacha' ri tz'ibital can pa Ruch'a'tem ri Dios: Ruma ri imac ri'ix ix aj judi'ab, ri na e ta aj judi'ab lic tzel quech'a't chirij rubi' ri Dios *Ez. 36:20-22* cacha'.

²⁵ Pakatzij wi ri retalil re circuncisión c'o cutikoj wi chawe, we catakej ri Tzij Pixab. No'j we na catakej taj, ri' junam awach ruc' ri na ucojom ta ri retalil re circuncisión. ²⁶ No'j we c'o junok na ucojom ta ri retalil re circuncisión, yey we cu'an

c'u ri catakan ri Tzij Pixab che, ri e junam ruc' ucojom wa retalil, tob na ucojom taj. ²⁷ We c'o c'u junok na ucojom ta ri retalil re circuncisión, pero cu'an chi utz ronoje ri takanic re Rutzij Upixab ri Dios, ri' takal ne che rire e cak'ataw tzij pawil ri'at. Ma e ri'at, tob acojom ri retalil re circuncisión y c'o awuc' ri Tzij Pixab re ri Dios tz'ibital canok, e ne capalajij ri cubi'ij. ²⁸ Ma junok e cuq'uul raj judi'ab na ruma ta ri quilitaj che, yey ri sakil circuncisión na e tane ri retalil xa cojotal che ri rulewal. ²⁹ Ma chupa ri ranima' junok cak'alajinic we pakatzij wi e cuq'uul raj judi'ab e utinamit ri Dios. Yey ri sakil circuncisión e ri cu'an ri Dios pa ranima' junok; y wa' e ruma ri Ruxlabixel ri Dios, na e ta ruma ri takanic tz'ibital canok. Ec'u ri yacbal uk'ij junok e cuq'uul rutinamit ri Dios na e ta rachijab queya'w re, ma e ri Dios caya'w re.

3

Ri Dios lic jusuc' ri cu'ano

¹ ¿Sa' c'u ri' ri cutikoj che jun we e cuq'uul rutinamit ri Dios e aj judi'ab? ¿O sa' ri utz cuc'am lo che junok ucojom ri retalil re circuncisión? ² Lic c'o tak cutikoj wi. Ma ri Dios nabe na xuya Ruch'a'tem paquik'ab. ³ Pero ¿sa' cu'ana' we e c'o jujun chique na xcaj taj caquicoj Ruch'a'tem ri Dios? ¿Ruma nawil ri' wa' cujec' rib ri Dios che ri ubi'tisim? ⁴ ¡Pakatzij wi na e ta ri'! Ma ri Dios na aj ta rak'ul; janipa rubi'im Rire, e cu'ano, tob c'u conoje ri winak xa e aj rak'ul. Ma e pacha' ri tz'ibital can pa Ruch'a'tem ri Dios: We c'o junok cuc'ambej upa ri ch'a'tem la, cak'alajinic Rilal lic Lal jusuc' che ronoje ri cabi'ij la; jec'ula' quel pana la ruc' puwi ronoje *Sal. 51:4* xcha ri rey David che ri Dios.

⁵ C'o ri caquibi'ij: «E tak ri lic na jusuc' taj caka'ano c'o cutikoj; ma echiri' caka'an wa', más cak'alajin ri lic jusuc' cu'an ri Dios» quecha'.

(Jela' caquich'ob rakan ri ticawex re ruwachulew.) ¿Sa' c'u ri' ri cakabi'ij puwi wa'? ¿Na jusuc' ta neba ri cu'an ri Dios we cuk'at tzij pakawi'? ⁶ ¡Are', lic jusuc'! Ma we ta na jusuc' ta Rire, ¿sa' c'u u'anic ri' cuk'at tzij paquiwi conoje ri e c'o che ruwachulew? ⁷ Ma laj c'o junok cubi'ij: «We ruc' ri rak'ubal can'ano e catac'abax uk'ij ri K'ijsak re ri Dios, ¿sa' c'u ube ri' c'a cabi'xic in aj mac y cak'at tzij panuwi'?» cacha'. ⁸ ¿Utz ne ri' cakabi'ij: «Ka'ana ri na utz taj cha' wa' e cuc'am lo ri utz»? ¡Na utz ta q'uenok! Yey c'o ri caquibi'ij rak'ubal chikij, ma caquibi'ij jela' cojc'utun ri'oj. E ri quebi'n re wa', lic takal chique cak'at tzij paquiwi'.

Conoje ri ticawex emacuninak chwach ri Dios

⁹ ¿E camil que'elawi ri' ri oj aj judi'ab, lic utz ka'anom y na jinta c'ana kamac chiquiwa ri na e ta aj judi'ab? ¡Na e ta ri'! Ma e pacha' ri nuc'utum lok: Conoje, tob e aj judi'ab o na e ta aj judi'ab, junam e c'o chuxe' ri k'atbal tzij re ri Dios ruma ri quimac. ¹⁰ Ma jewa' ri tz'ibital can pa Ruch'a'tem ri Dios:

Na jinta juna ticawex jusuc' chwach ri Dios,
tob tane xa jun.

¹¹ Na jinta junok camajaw usuc' runa'oj ri Dios.

Na jinta junok catzucuw re Rire.

¹² Conoje ri winak ebelinak che rube ri Dios,

y na jinta chi c'ana quichac.

Na jinta junok ca'anaw ri utz,
tob tane xa jun. *Sal. 14:2-3*

¹³ Ri ch'a'tem quel lo pa quichi' ri winak e pacha' uchuyil ujul anima' tek'el uchi'; ma ruc' ri cak' quesocoso'nic. *Sal. 5:9*

Ri ch'a'tem quel lo pa quichi' e pacha' chi veneno re cumatz. *Sal. 140:3*

¹⁴ Yey rupa quichi' nojinak che itzel tak tzij y c'axlaj ch'a'tem. *Sal. 10:7*

15 Lic cache quic'u'x che que-
camisanic.

16 Tob pa tak quebic'ow wi,
quequicoj ri winak pa c'axc'olil y
pa bis;

17 pa tak e c'o wi rique,
na jinta c'ana utzil chomal. *Is.*
59:7-8

18 Na jinta ne c'ana xi'in ib cuc'
chwach ri Dios *Sal. 36:1*
cache'.

19 Ronoje ri cubi'ij Rutzij Upixab
ri Dios, wa' cubi'ij chique ri c'o wa
Tzij Pixab paquik'ab. Jec'ula' na
jinta junok c'o puk'ab cubi'ij: «Na
utz ta cuk'at tzij ri Dios panuwi' ma
ri'in na jinta c'ana numac.» Ma
pakatzij wi conoje ri winak e c'o che
ruwachulew, tob e aj judi'ab o na e
ta aj judi'ab, e c'o chuxe' ri k'atbal
tzij re ri Dios. 20 Y na jinta juna
ticawex cu'an jusuc' che rib chwach
ri Dios ruma ri cutakej ri takanic re ri
Tzij Pixab. Ma ri Tzij Pixab na jinta
uchuk'ab cha' cojresaj puk'ab ri mac;
xew cuc'ut chike: Ri'oj oj aj mac.

*Ri ticawex quecolobetaj ruma ri
cubulibal quic'u'x ruc' ri Dios*

21 Pero wo'ora ri Dios uk'alajisam
chikawach su'anic Rire cu'an jusuc'
chike, jela' pacha' ri cubi'ij Rutzij
Upixab ri Dios tz'ibital can ruma ri
Moisés y cuma ri k'alajisanelab. Na
coju'an ta c'u jusuc' chwach ri Dios
ruma ri katakem tak ri takanic, 22 ma
e ruma ri cubulibal kac'u'x ruc' ri
Kanimajawal Jesucristo. Ma ri Dios
cu'an jusuc' chique conoje ri cacubi'
quic'u'x ruc' ri Cristo, tob e chinok.
23 Conoje c'u ri ticawex emacuninak
y lic naj e c'o wi lo che ri unimal
uchomalil ri Dios. 24 Na ruc' ta c'u
ri', ri Dios cu'an jusuc' chique ruma
ri unimal rutzil uc'u'x y cusipaj c'u
ri colobetajic chique ruma ri xu'an ri
Kanimajawal Jesucristo echiri' xere-
saj lo puk'ab ri mac. 25 Ri Dios
xuya lo ri Cristo cha' ruma Rire ri
ticawex caquirik cuybal quimac we
xcubi' quic'u'x ruc' ruquiq'uel xtu-
ruwic. Jec'uri'la' ri Dios xuc'utu Rire
lic jusuc' y lic c'o unimal uc'u'x, ma

ojertan na asu ta xusachisaj quiwach
ri winak ruma ri quimac qui'anom
lok. 26 Yey Rire uch'obom chi lo
rakan sa' ri cu'an chupa wa' wa
k'ij oj c'o wi. Ec'u wo'ora uc'utum
chic su'anic cu'an jusuc' chique ri
ticawex; e ruma ri cubulibal quic'u'x
ruc' ri Jesús. Jela' c'u ri', xk'alajinic
ri Dios lic jusuc' y e Rire ri cu'an
jusuc' chique ri cacubi' quic'u'x ruc'
ri Cristo.

27 ¿C'o neba ka'anom ri'oj cha' ruc'
wa' utz caka'an nim che kib chwach
ri Dios? ¡Na jintaj! ¿Su'be? Ma na e ta
ruma cakatakej ri takanic ri ca'anaw
chike cojkib ruc' ri Dios; e ruma ri
cubulibal kac'u'x ruc' ri xu'an Rire.
28 Cakaq'uisbej c'u ruc' wa': Ri Dios
cu'an jusuc' che ri ticawex ruma ri
cubulibal uc'u'x ruc' Rire, na ruma ta
ri utakem tak ri takanic. 29 ¿Ri Dios
xew neba Dios que ri e aj judi'ab?
¿Na e ta neba Dios que ri na e ta aj
judi'ab? Pakatzij wi Rire e Dios que ri
e aj judi'ab y que ri na e ta aj judi'ab.
30 Ma xa jun Dios c'olic. Yey Rire
cu'an jusuc' chique ri ticawex ruma
ri cubulibal quic'u'x. Wa' e cu'an cuc'
ri quicojom ri retalil re circuncisión y
cuc' ri na quicojom taj. 31 ¿Ruma nawi
ri xcubi' kac'u'x ruc' ri Cristo, utz
cakac'ak bi uk'ij ri Tzij Pixab tz'ibital
can ruma ri Moisés y cakabi'ij wa' na
jinta chi uchac? ¡Na e ta ri'! Ma ruc' ne
ri cubulibal kac'u'x, cakamaj usuc' lic
c'o uwach ri Tzij Pixab.

4

*Ri cubulibal uc'u'x ri Abraham ruc'
ri Dios*

1 ¿Sa' c'u ri' cakabi'ij puwi ri Abra-
ham, ri nabe kamam ojertan ri oj aj
Israel? ¿Su'anic x'ani' jusuc' che rire
chwach ri Dios? 2 We ta ri Abraham
x'an jusuc' che chwach ri Dios ruma
tak ri chac xu'an xa pa ri're, takal
c'u ri' che cutac'aba' uk'ij; tob wa'
na jinta que'elawi chwach ri Dios.
3 Ma ¿sa' ri cubi'ij Ruch'a'tem ri Dios?
Jewa' cubi'ij:
Ri Abraham xucojo ri Dios e cu'ana
janipa ri xubi'tisij che

y ruma c'u ri' x'ani' jusuc' che *Gn.*
15:6
cacha'.

⁴ Echiri' juna aj chac cachacunic, caya'i' ri takal che; yey wa' na e ta jun sipanic, ma uch'acom chic.

⁵ No'j na je ta c'u la' echiri' ri Dios cu'an jusuc' che junok. Ma wa' e jun sipanic re ri Dios, na e ta tojbal re juna chac 'anatalic. Ma juna ticawex na cu'an ta jusuc' che rib ruma lic cachacunic; e ca'an jusuc' che xew ruma ri cubulibal uc'u'x ruc' ri Dios, ri ca'anaw jusuc' chique raj maquib. ⁶ Yey ri David ubi'im canok nim quik'ij calaxic ri ticawex we ri Dios cu'an jusuc' chique y wa' na e ta ruma juna chac qui'anom, ⁷ ma jewa' xubi'ij:

¡Nim quik'ij calaxic ri ticawex cuytajinak chi quimac

y sachom chi uwach ri na utz taj qui'anom!

⁸ ¡Nim c'u quik'ij calaxic ri ticawex na jinta chi ri k'atbal tzij re ri Dios paquiwi'!

Sal. 32:1-2

xcha'.

⁹ Echiri' cubi'ij «nim quik'ij calaxic», ¿xew nawi cach'a't paquiwi ri quicojom ri retalil re circuncisión? ¡Na xew taj! Ma cach'a't paquiwi ri quicojom ri retalil re circuncisión y paquiwi ri na quicojom taj.* Yey kabi'im puwi ri Abraham: X'ani' jusuc' che rire ruma ri cubulibal uc'u'x ruc' ri Dios.† ¹⁰ ¿Jampa nawi x'an jusuc' che ri Abraham? ¿C'a e nawi echiri' ucojom chi ri retalil re circuncisión? ¡Na e taj! Ma c'amaja' ne cucoj wa' echiri' ri Dios xu'an jusuc' che; tec'uchiri' xcoj ri retalil re circuncisión che. ¹¹ Wa retalil re circuncisión ucojom e c'utubal re ri cubulibal uc'u'x, ri xuc'utu echiri' c'amaja' cucoj wa'. Ruma c'u la', xe'elok e rire ri quikaw conoje ri cacubi' quic'u'x ruc' ri Dios, tob na xcoj tane wa' wa retalil re circuncisión chique. Jec'ula', ruma

ri cubulibal quic'u'x ca'an jusuc' chique chwach ri Dios. ¹² Ri quicojom ri retalil re circuncisión e ralc'o'al can ri Abraham; pero xew takal chique caquibi'ij quikaw che rire we caquic'ut ri cubulibal quic'u'x ruc' ri Dios che ri quibinic quisilabic, pacha' ri xu'an ri kamam Abraham echiri' c'amaja' ne cucoj ri retalil re circuncisión.

¹³ Ri Dios xubi'tisij che ri Abraham y chique conoje ri e ralc'o'al canok, cu'an na que rique ronoje ruwachulew. Pero wa bi'tisinic na x'an ta che ri Abraham ruma xutakej ri takanic re ri Tzij Pixab,† ma e ruma lic xcubi' uc'u'x ruc' ri Dios. Ruma c'u ri', ri Dios xu'an jusuc' che. ¹⁴ We ta e la' c'o paquik'ab tak ri winak caquic'ul rubi'tisim ri Dios ruma caqui'an ronoje ri takanic re ri Tzij Pixab, na jinta c'u cutikoj ri' ri cubulibal quic'u'x ruc' ri Dios, yey na jinta ne uchac ri' rubi'tisim ri Dios, ma na jinta junok curik u'anic ronoje ri takanic. ¹⁵ Ma ri Tzij Pixab e cuc'am lo ri k'atbal tzij paquiwi ri e aj palajiy tzij. Pero we ta e la' na jinta takanic, na jinta aj palajiy tzij ri'.

¹⁶ Ruma tak wa', ri ticawex caquic'ul rubi'tisim ri Dios xew ruma ri cubulibal quic'u'x ruc' Rire. K'alaj c'u ri', wa sipanic xa e ruma ri unimal rutzil uc'u'x Rire, cha' jela' c'o paquik'ab conoje ri ralc'o'al ri Abraham caquic'ul na ri bi'tisim chique ruma ri Dios. Yey e ralc'o'al ri Abraham na xew ta ri c'o ri Tzij Pixab re ri Moisés paquik'ab, ma e ralc'o'al conoje ri cubul quic'u'x ruc' ri Dios jela' pacha' ri xu'an ri Abraham. Ec'u rire e kakaw konoje ri'oj ¹⁷ chwach ri Dios, jela' pacha' ri tz'ibital can pa Ruch'a'tem ri Dios: «Nu'anom chawe at quikaw ticawex che uq'uiyal tinamit»‡ xcha'. Ri Dios xubi'ij wa' che ri Abraham, yey rire xucojo; ma lic xcubi' uc'u'x ruc' ri Dios, ri cuya c'aslemal chique ri

* **4:9** Ri quicojom ri retalil re circuncisión e ri e aj judi'ab, yey ri na quicojom taj; e ri na e ta aj judi'ab.

† **4:9** Gn. 15:6 ‡ **4:13** Wa Tzij Pixab tz'ibital can ruma ri Moisés c'amaja' caya'tajic echiri' c'a c'as ri Abraham. Gn. 22:17-18; Gl. 3:17 † **4:17** Gn. 17:5

ecaminak y cach'a't chwi ri c'amaja' cu'ano pacha' chi ya u'anom chic. †

18 Ec'u ri Abraham xucojo cu'ana quikaw ticawex che uq'uiyal tinamit jela' pacha' ri bi'tisinic 'anom che ruma ri Dios echiri' xubi'ij che: «Lic e q'ui quebu'ana rawalc'o'al.» ✧ Yey tob chwach ri Abraham wa' lic c'ayew, na ruc' ta c'u ri', lic xroye'ej ruc' cubulibal c'u'xaj jela' cu'ana'. 19 Y na xk'ob ta ri cubulibal uc'u'x tob reta'am ru-cuerpo e pacha' caminak chic ma ya copon pa jun ciento rujunab y reta'am ri rixokil Sara na calan taj.

20 Na ruc' ta c'u ri', na queb ta ne upa xucoj ri xubi'tisij ri Dios che, ma e lic xuchuk'ubej rib che ri cubulibal uc'u'x ruc' ri Dios. Lic c'u xuyac uk'ij ri Dios, 21 ma lic ujiquibam uc'u'x e ri Dios c'o uchuk'ab re cu'an ronoje rubi'tisim. 22 Y ruma c'u ri cubulibal uc'u'x, x'ani' jusuc' che.

23 Ec'uchiri' Ruch'a'tem ri Dios cubi'ij: «X'ani' jusuc' che ruma ri cubulibal uc'u'x,» wa' na xew ta puwi ri Abraham xtz'ibax wi; 24 ma e pakawi' ne ri'oj. Ma ri Dios cu'an jusuc' chike ri'oj ri cacubi' kac'u'x ruc' ri Jun xuc'astajisaj lo ri Jesús, ri Kanimajawal. 25 Ec'u ri Jesús xya' pa camic ruma ri kamac ri'oj y xc'astaj bi churox k'ij cha' jela' coju'ana jusuc' chwach ri Dios.

5

Ri utzil chomal cakarik ruc' ri Cristo

1 Ri Dios xu'an jusuc' chike ruma ri cubulibal kac'u'x ruc'; ec'u wo'ora oj c'o chi utzil chomal ruc' Rire ruma ri Kanimajawal Jesucristo. 2 Yey ruma ri Cristo, xya' chike cojoc chwach ri Dios ruma ri cubulibal kac'u'x y jela' cakac'ul ri unimal rutzil uc'u'x pa oj tiquil wi chi utz. Yey lic cojqui'cotic ma koye'em que'kila na runimal uchomalil ri Dios. 3 Y na xew ta wa', ma lic ne cojqui'cotic echiri' cape c'axc'obic pakawi'. Ma keta'am we xkach'ij uchuk'ab ri c'axc'obic, lic cac'o'ji' unimal kac'u'x. 4 Ruma c'u

runimal kac'u'x cojelic utz ka'anom chwach ri Dios, ma xkach'ij uchuk'ab ri c'ambal kapa. Yey we xojelic utz ka'anom chwach ri Dios, e lic cacubi' pan kac'u'x ruc' Rire. 5 Lic c'u jiquil uwach cakac'ul na ri koye'em che ri Dios, ma Rire lic uc'utum ri rutzil uc'u'x chike ruma ri Santowilaj Ruxlabixel uya'om pa kanima'.

6 Ma ri'oj na jinta c'ana kachuk'ab re cakacolobej kib; yey chupa c'u ruk'ijol ucha'om chi lo ri Dios, xc'un ri Cristo y xuya rib pa camic cha' cojcolobej ri oj aj maquib. 7 Lic c'ayew carikitaj junok cuya rib pa camic puc'axel jun chic lic jusuc' rubinic usilabic; tob ne laj c'o junok cuya ranima' cacam puc'axel junok lic utz uc'u'x. 8 No'j ri Dios uk'alajisam chi ri rutzil uc'u'x chikawach ri'oj, ma ri Cristo xcam pakac'axel echiri' c'a oj c'o ne pa mac. 9 We x'ani' c'u jusuc' chike ruma ruquiq'uel, mac'uwari' ruma Rire cojcolobetaj na chwach ri k'atbal tzij cu'an ri Dios chupa ri q'uisbal k'ij. 10 E rojertan ri'oj oj aj retzelal c'u'x chirij ri Dios; na ruc' ta c'u ri', ri Dios xojuya chi utzil chomal chwach ruma rucamic Ruc'ajol. Mac'uwari' we oj c'o chi pa utzil chomal chwach, caya'taj na c'u ri' ri kacolobetajic ruma ri Cristo, ma Rire xc'astaj lo chiquixo'l ri ecaminak yey wo'ora c'aslic. 11 Y na xew ta wa', ma lic cojqui'cot ruc' ri Dios ruma ri Kanimajawal Jesucristo, ma ruma Rire karikom utzil chomal chwach ri Dios.

Ri xuc'am lo ri Adán e camic y ri xuc'am lo ri Cristo e c'aslemal

12 Ri mac xoc lo che ruwachulew ruma ri Adán, ri nabe achi; yey ri mac e xuc'am lo ri camic. Jec'ula' xpe ri camic paquiwi conoje ri ticawex, ma conoje xemacunic. 13 Echiri' ri Dios c'amaja' ne cuya Rutzij Upixab che ri Moisés, ri mac oquinak chi che ruwachulew. Katzij, we na jinta takanic, na utz taj cabi'xic c'o junok xupalajij tzij. 14 Na ruc' ta c'u ri',

† 4:17 Ri Dios xch'a't paquiwi tak ri e ralc'o'al ri Abraham echiri' c'amaja' quebalaxic. ✧ 4:18 Gn. 15:5

chwi lo ri Adán c'a chwa ri Moisés, tak ri winak xecam ruma ri quimac, tob ri quimac na junam ta ruc' ri xu'an ri Adán echiri' xupalajij ri takanic re ri Dios. Yey ri Adán e pacha' ri Jun cac'unic, wa' e ri Jesucristo.*
 15 Pero ri xuc'am lo ri palajibal tzij re ri Adán lic junwi chwa ri sipanic xuc'am lo ri Kanimajawal Jesucristo. Ma ruma rupalajibal tzij jun chi achi, xecam conoje ri winak; yey ruma c'u ri unimal rutzil uc'u'x jun chi Achi, ri sipanic re ri unimal rutzil uc'u'x ri Dios más ne xnimar paquiwi uq'uiyal ticawex. 16 Ec'u ri xuc'am lo ri mac re ri jun achi, lic junwi chwa ri xuc'am lo ri sipanic cuya ri Dios chike. Ma ruma jun chi mac re jun chi achi, xc'un ri k'atbal tzij paquiwi conoje ri ticawex. No'j ruma ri sipanic re ri Dios, casachisax uwach ri uq'uiyal mac que ri ticawex cha' jela' utz quec'o'ji' jusuc' chwach ri Dios. 17 Xa c'u ruma rupalajibal tzij jun chi achi, conoje ri winak xecanaj can chuxe' ruchuk'ab ri camic. Yey ruma c'u jun chi Achi, wa' e ri Kanimajawal Jesucristo, janipa ri quic'ulum ri unimal rutzil uc'u'x ri Dios y ri sipanic re quebu'an jusuc' chwach, quejeki' chupa jun chomilaj c'aslemal.

18 Ec'u ri palajibal tzij re jun chi achi xuc'am lo k'atbal tzij paquiwi conoje ri ticawex, jec'uri'la' ruma ri jusuc' binic re jun chi Achi, caya'taj chique conoje ri ticawex jun chomilaj c'aslemal ruma ri ebu'anom jusuc' chwach ri Dios. 19 Yey xa ruma c'u jun chi achi xupalajij rutzij ri Dios, lic e q'ui ri xebu'an aj maquib; jec'uri'la', ruma jun chi Achi xucoj utzij ri Dios, lic e q'ui ri quebu'an jusuc' chwach.

20 Ec'u ri Dios xuya Rutzij Upixab che ri Moisés cha' jela' cak'alajin ruq'uiyal uwach ri mac. Y e xu'ano, ma ruc' wa Tzij xk'alajin ruq'uiyal quimac ri winak chwach ri Dios. Yey ec'uchiri' más xemacun ri winak, e ne más xnimar ri unimal rutzil uc'u'x ri

Dios paquiwi'. 21 E jela' pacha' ri mac c'o uchuk'ab cha' cuc'am lo camic paquiwi conoje ri winak; jec'ula' ri' ri unimal rutzil uc'u'x ri Dios c'o uchuk'ab cha' cu'an jusuc' chique ri winak chwach ri Dios, y jela' c'o quic'aslemal na junta utakexic ruma Jesucristo, ri Kanimajawal.

6

C'o kac'aslemal ruma ri Cristo

1 ¿Sa' c'u ri' ri cakabi'ij ri'oj? ¿C'a cojc'o'ji' cami ri' pa mac cha' ri Dios e lic cunimarisaj ri unimal rutzil uc'u'x pakawi' echiri' cucuy ri kamac? 2 ¡Na e ta c'ana ri! Ma e janipa ri na oj junta chi puk'ab ri mac, na ube ta q'uenok we c'a cojc'o'ji' chupa wa'. 3 ¿Na eta'am ta neba ralak e janipa ri xkac'ul ri bautismo, xoju'an xa jun ruc' ri Kanimajawal Jesucristo? Yey ruma wa', xoju'an xa jun ruc' pa rucamic. 4 Ruma c'u ri bautismo xkac'ulu, e pacha' junam ruc' ri Cristo xojcamic y xojmukic, cha' jela' cojc'astaj lo che jun c'ac' kabinic jela' pacha' ri Cristo xc'astaj lo chiquixo'l ri ecaminak ruma runimal uchuk'ab ri Kakaw Dios. 5 Ma we x'an xa jun chike ruc' ri Cristo chupa rucamic, jec'ula' ri' xa jun ka'anom ruc' chupa ruc'astajibal. 6 Lic c'ut keta'am e ri ojer kabinic kasilabic xcam ruc' ri Cristo chwa ri cruz cha' jela' casach uwach ruchuk'ab ri mac pakawi' y jec'ula' ri mac na catakan ta chi pakawi' ri'oj. 7 Ma e junok caminak chi che ri mac, ri' na junta chi uchuk'ab ri mac puwi'. 8 Ma we xojcam junam ruc' ri Cristo,* jec'ula' ri' lic cakacojo c'o kac'aslem ruc' Rire wo'ora y chikawach apanok. 9 Lic keta'am c'ut, ri Cristo ruma xc'astaj lo chiquixo'l ri ecaminak, na cacam ta chic, ma ri camic na junta chi uchuk'ab puwi Rire. 10 Ma ruc' rucamic xa jumul xusachisaj uwach ruchuk'ab ri mac; yey ruma c'u xc'astajic, e culok'nimaj ri Dios ruc' ruc'aslemal. 11 Jec'uri'la' c'ola

* 5:14 Ri Adán y ri Jesús c'o xquic'am lo che ruwachulew; ri Adán xuc'am lo camic, no'j ri Jesús xuc'am lo c'aslemal. * 6:8 E pacha' xojcam junam ruc' ri Cristo ma Rire xcam pakac'axel ri'oj.

chic'u'x ralak e pacha' alak caminak chi chwach ri mac yey alak c'aslic re calok'nimaj alak ri Dios, ma alak re ri Cristo Jesús, ri Kanimajawal. ¹² E uwari'che lic maya alak luwar catakan ri mac puwi ri cuerpo alak, ma wa' xa ic'owel. Maya ne ib alak chupa tak ri rayibal na utz ta uwach. ¹³ Maya ne ri cuerpo alak puk'ab ri mac che u'anic ri na jusuc' taj. E ya'a ib alak puk'ab ri Dios, ma alak caminak chi chwa ri mac y alak c'as che jun c'ac' binic silabic. Ya'a c'u alak ri' ri cuerpo alak puk'ab ri Dios cha' ruc' wa' ca'an alak ri lic jusuc' chwach. ¹⁴ Ma ri mac na junta chi uchuk'ab re catakan pawil' alak y na junta chi ne alak chuxe' ri k'atbal tzij re rutakanic ri Dios tz'ibital can ruma ri Moisés, ma wo'ora c'o alak puk'ab ri Dios ruma ri unimal rutzil uc'u'x Rire.

Kaya'a kib che u'anic ri lic jusuc' chwach ri Dios

¹⁵ ¿Sa' c'u ri' ri caka'ano? ¿Cojmacun camil' ma ri k'atbal tzij re rutakanic ri Dios na junta chi pakawil' yey e oj c'o puk'ab ri Dios ruma ri unimal rutzil uc'u'x Rire? ¿Na e ta c'ana ri! ¹⁶ ¿Na eta'am ta neba alak we caya ib alak puk'ab junok che u'anic janipa ri caraj rire, ri' e cu'ana patrón alak y chirajawaxic c'u ri' cacoj alak utzij? Jec'uri'la' we caya ib alak puk'ab ri mac che u'anic ri na utz taj, ri' cuc'am bi alak pa camic. No'j echiri' caya ib alak puk'ab ri Dios re cacoj alak utzij, wa' cuc'am bi alak che jun jusuc' binic silabic.

¹⁷ Lic maltiox c'u che ri Dios, ma tob ojertan xya' ib alak puk'ab ri mac che u'anic tak ri rayibal alak; no'j wo'ora ruc' ronoje c'u'x alak ya'om ib alak che u'anic tak ri sakil c'utunic xya' che alak. ¹⁸ Ruma c'u ri xel lo alak puk'ab ri mac, wo'ora e xya' ib alak che u'anic ri lic jusuc' chwach ri Dios.

¹⁹ Xinya wa c'ambal na'oj puwi ri patrón y ri aj chaquib cha' cak'alajin ri cambi'ij y na c'ayew taj camaj alak usuc'. Cambi'ij c'u che alak: Jela' pacha' rojertan xya alak ronoje ri

uchapom wi rib ri cuerpo alak che u'anic ri lic ch'ul y ri lic itzel uwach, jec'uri'la' wo'ora ya'a alak ronoje ri uchapom wi rib ri cuerpo alak che u'anic janipa ri lic chom y lic jusuc' chwach ri Dios. ²⁰ Ma rojertan echiri' c'a c'o alak puk'ab ri mac, na ya'om ta ib alak che u'anic ri lic jusuc' chwach ri Dios. ²¹ ¿Sa' ri xutikoj che alak janipa ri na utz taj x'an alak ojertan? Ma wo'ora caq'uix ne alak che tak wa' wa cuc'am bi jun pa camic. ²² Ec'u wo'ora ruma alak esam chi lo puk'ab ri mac, xu'ana c'u alak aj chaquib re ri Dios. Ri xutikoj wa' che alak e ri santowilaj binic silabic alak; yey q'uisbal c'u re, e ri c'aslemal na junta utakexic. ²³ Ma ri tojbal re ri mac e ri camic, no'j ri sipanic cuya ri Dios e ri c'aslemal na junta utakexic ruma ri Kanimajawal Jesucristo.

7

Ri catakan pakawil' na e ta chi ri mac, e ri Ruxlabixel ri Dios pa kanima'

¹ Quinch'a't uc' alak hermanos, ri c'o na'oj alak puwi takanic. Eta'am c'u alak wa': Ri takanic xew c'o uchuk'ab puwi juna ticawex echiri' wa ticawex c'a c'aslic. ² E pacha' juna ixok c'ulanic. Rire c'o chuxe' ri tzij re ri c'ulaniquil. Ruma c'u wa' c'o puk'ab ri rachijil xalok' c'a c'as ri rachijil. No'j we xcam rachi, rixok na junta chi puk'ab ri rachijil. ³ Jec'ula' ri', we rixok cuyoj rib ruc' jun chic achi yey c'a c'as ri rachijil, ri' cabi'x che e jun ixok na jusuc' ta rubinic ma camacun chirij ri tzij re ri c'ulaniquil. No'j we xcam ri rachijil, rixok quel chuxe' rutakanic wa tzij; na camacun ta c'u ri' chirij ri c'ulaniquil we cac'uli' ruc' jun chic achi.

⁴ Jec'ula' ralak alak nu hermanos, caminak chi alak chwach tak ri Tzij Pixab ruma rucamic ri Cristo. Wa' que'elawi na e ta chi ri Tzij Pixab ri catakan pawil' alak. Ruma c'u ri', utz cu'an alak re jun chic, wa' e ri Cristo, ri xc'astaj lo chiquixo'l ri ecaminak. Jec'ula' ri kabinic lic c'o cutikoj chwach ri Dios ruma oj

c'o puk'ab ri Cristo. ⁵ Ma ojertan echiri' c'a oj c'o pa mac, ri rayinic na utz ta uwach xc'oji' uchuk'ab puwi ri kacuerpo. Ma echiri' ri Tzij Pixab xuk'alajisaj chike sa' ri na utz taj, e más xkarayij caka'an ri na utz taj. Yey ri xutikoj wa' chike e xojuc'am bi pa camic. ⁶ No'j wo'ora na oj jinta chi chuxe' ri k'atbal tzij re wa tzij, ma pacha' oj chi caminak che ri c'o pakawi' ojertan. Ec'u wo'ora ri'oj cakalok'nimaj ri Dios ruc' jun c'ac' kabinic ruma ruchuk'ab ri Ruxlabixel pa kanima', yey wa' na e ta chi pacha' ri kabinic ojertan echiri' xkaj caka'an jusuc' che kib chwach ri Dios ruma ri cakatakej takanic.

Rutzij Upixab ri Dios cuk'alajisaj sa' tak ri kamac

⁷ ¿Sa' c'u ri' ri cakabi'ij? ¿E neba que'elok ri Tzij Pixab na utz taj ma cuc'am lo ri mac? ¡Na e ta c'ana ri! Ma ri'in xinweta'maj sa' ri mac ruma ri Tzij Pixab; yey we tamaji ri Tzij Pixab, na canweta'maj ta c'u ri' sa' ri mac. Ma ri'in na weta'am taj we mac ri rayinic we tamaji ri Tzij Pixab cubi'ij: «Marayij uwach ri na awe taj.»[✱] ⁸ Ruma c'u ri' ri takanic, ri mac cuc'osoj ronoje itzel rayinic chupa ri wanima'. We tamaji c'u ri takanic, ri mac na jinta uchuk'ab panuwi'. ⁹ E ri petinak lok echiri' ri'in c'amaja' canmaj usuc' ri Tzij Pixab, na jinta c'o cubisoj nuc'u'x che. Pero xopon jun k'ij echiri' xinweta'maj sa' ri takanic re ri Tzij Pixab panuwi'. C'a chiri' c'u ri' xumaj uchuk'ab ri mac panuwi'; y xinmaj c'u usuc' in caminak chwach ri Dios ruma ri numac. ¹⁰ E chinuwach ri'in, ri takanic re ri Tzij Pixab e caya'w c'aslemal; no'j ri xuya chwe ri'in, e ri camic. ¹¹ Ma ri mac e xuchapabej ri takanic y ruc' c'u wa', xinusoco y jela' xuc'am lo ri camic panuwi'. ¹² Cak'alajin c'u ri' ri Tzij Pixab re ri Dios lic santo yey tak ri takanic re ri Tzij Pixab lic santo, lic jusuc' y lic utz.

¹³ Pero ¿e nawi que'elok e ri utz xuc'am lo camic panuwi'? ¡Na e ta ri!

Ma ri mac e xuchapabej ri utz y ruc' wa' xuc'am lo camic panuwi'. Ruma c'u ri' ri takanic re ri Tzij Pixab, xa jumul cak'alajinic lic itzel uwach ri mac.

Katuquel ri'oj na cakach'ij ta uchuk'ab ri mac

¹⁴ Keta'am chi c'ut, ri Tzij Pixab petinak ruc' ri Dios. No'j ri'in xa wekam wulewal nupoklajil, yey in ya'tal c'u puk'ab ri mac. ¹⁵ Na can'an ta c'u ri' ri cuaj ri'in can'ano; ma e ri tzel canwilo, e can'an ri'. Lic na canmaj ta c'u usuc' su'be can'an wa'. ¹⁶ Yey echiri' e can'an ri na cuaj taj, canna' c'u ri' chinuc'u'x na utz ta ri quintajin che u'anic. Ruc' c'u ri' wa' canjiquiba' uwach lic utz ri takanic re ri Tzij Pixab. ¹⁷ Jela' c'u ri' e pacha' na in ta ri quin'anaw re ri na utz taj, ma e catakan ri mac pa wanima'. ¹⁸ Ri'in lic weta'am, wa in ticawex na jinta c'ana utz chwe we na jinta ri Dios wuc'. Ma tob cuaj can'an ri utz, pero nutuquel na canrik ta u'anic wa'. ¹⁹ Ma na can'an ta ri utz, ri lic cuaj can'ano; e lic can'an ri na utz taj, ri na cuaj taj can'ano. ²⁰ Jec'ula' ri', we e can'an ri na cuaj taj, ri' na in ta ri quin'anaw re, ma e ri mac catakan pa wanima' ri ca'anaw re. ²¹ Jec'ula' tob lic cuaj can'an ri utz, e ri na utz taj ri catakan panuwi'. ²² Na ruc' ta c'u ri', cuna' ri wanima' e lic chom rutakanic Rutzij Upixab ri Dios y lic quinquic'ot che wa'. ²³ Pero canna'o c'o jun chic tzij catakan chwi ri nucuerpo; wa' e ruchuk'ab ri mac. Ec'u wa' cach'o'jinic cha' na cancoj ta utzij ri cubi'ij ri nuna'oj y jec'ula' inyututal pa mac. ²⁴ ¡Lic tok'o' nuwach ri'in! ¿China qesan we ri'in puk'ab ri na utz taj c'o chwe, ri quinc'amaw bi pa camic? ²⁵ Lic cantioxij che ri Dios, ma xew Rire cato'w we'in, yey cu'an wa' ruma ri Jesucristo, ri Kanimajawal. Jec'ula' canmaj usuc' lic chirajawaxic canya wib puk'ab rutakanic Rutzij Upixab ri Dios; no'j echiri' canya wib puk'ab ri rayinic re ri nucuerpo, ri e catakan ruchuk'ab ri mac panuwi'.

✱ 7:7 Éx. 20:17

8

Ri Ruxlabixel ri Dios e cojuto' che ri kabinic kasilabic

¹ Ec'u wo'ora na jinta chi k'atbal tzij re camic paquiwi janipa ri e c'o puk'ab ri Kanimajawal Jesucristo; wa' e ri na quitakem ta chi ri rayibal re ri na utz taj, ma e quitakem sa' ri caraj ri Ruxlabixel ri Dios chique. ² Ma ri Ruxlabixel ri Dios cuya chomilaj c'aslemal ruma ri Kanimajawal Jesucristo, y e rutakanic ri Ruxlabixel ri Dios pa kanima' ri xojesan lo chupa ruchuk'ab ri mac y ri camic. ³ Yey rutakanic ri Tzij Pixab na jinta uchuk'ab re cojresaj lo puk'ab ri mac, ma ri'oj oj ticawex na jinta kacowil chwa ri mac. Ec'u ri na xuch'ij ta u'anic ri Tzij Pixab, ri Dios xu'ano echiri' xutak lo Ruc'ajol che ruwachulew tojbal re ri kamac, y xu'an ticawex che jela' pacha' ri'oj, no'j Rire na xmacun taj. Jec'ula', ruma rucamic jun ticawex, wa' e ri Jesús, ri Dios xuk'at tzij puwi ri kamac. ⁴ Xu'an c'u wa' cha' utz cojbin jusuc' chwach ri Dios jela' pacha' ri cubi'ij ri Tzij Pixab; ma ri'oj na e ta chi katakem ri rayibal re ri na utz taj, e katakem sa' ri caraj ri Ruxlabixel ri Dios chike. ⁵ Ma e tak ri quiya'om quib che tak ri rayibal re ri quti'ijil, e caquiya quina'oj puwi ri rayibal na chom taj. No'j janipa ri quiya'om quib puk'ab ri Ruxlabixel ri Dios, ri' e quiya'om quina'oj puwi janipa ri caraj ri Ruxlabixel ri Dios. ⁶ Ma we e lic cakaya kana'oj puwi tak ri rayibal re ri kati'ijil, ri' camic ri cuc'am lo chike. No'j we e lic cakaya kana'oj puwi janipa ri caraj ri Ruxlabixel ri Dios chike, ri' cuc'am lo c'aslemal y utzil chomal chike. ⁷ E janipa ri quiya'om quina'oj xew puwi tak ri rayibal re ri quti'ijil, ri' e aj retzelal c'u'x chirij ri Dios. Ma rique na cacaj taj caquiya quib che u'anic ri Tzij Pixab re ri Dios, yey na caquich'ij tane u'anic wa'. ⁸ Ec'u ri Dios lic na cuc'ul ta uc'u'x ri quibinic quisilabic janipa ri quiya'om quib chupa ri rayibal re ri na utz taj.

⁹ No'j ralak na ya'om ta chi ib alak chupa wa' wa rayibal, ma e ya'om ib alak puk'ab ri Ruxlabixel ri Dios, we pakatzij wi c'o Rire pa anima' alak. Yey we c'o c'u junok na jinta ri Ruxlabixel ri Cristo pa ranima', wa' wa ticawex na re ta ri Cristo. ¹⁰ No'j we c'o ri Cristo pa anima' alak, ri' c'o chomilaj c'aslemal alak ruma ri u'anom alak jusuc' chwach ri Dios, tob ri cuerpo alak cacam na ruma ri mac. ¹¹ We c'o c'u pa anima' alak ri Ruxlabixel ri Jun xuc'astajisaj lo ri Kanimajawal Jesucristo chiquixo'l ri ecaminak, ri' c'o jun k'ij Rire cuya jun c'ac' c'aslemal che ri cuerpo alak yey cu'an wa' ruma ri Ruxlabixel c'o pa anima' alak.

¹² Ruma c'u la', hermanos, chirajawaxic e caka'an ri utz y maka'an ri na utz taj, ma ri'oj na oj jinta chi puk'ab tak ri rayibal re ri kati'ijil.

¹³ Ma we ya'om ib alak chupa wa', ri' e cuc'am lo ri camic pawil alak. No'j we ruc' ruto'bal ri Ruxlabixel ri Dios cacamisaj alak tak ri rayibal re ri ti'ijil alak, ri' c'o c'aslemal alak chwach ri Dios. ¹⁴ Ma conoje ri cac'am quiwach ruma ri Ruxlabixel ri Dios, ri' e ralc'o'al ri Dios. ¹⁵ Yey ri Ruxlabixel ri Dios xc'ul alak, na e ta cuya tanchi alak chi xi'in ib; ma e cu'an ralc'o'al ri Dios che alak, y jela' utz cakabi'ij che ri Dios: «¡Tat, Lal Nukaw!» ¹⁶ Ec'u ri Ruxlabixel ri Dios ri cajiquiban uwach pa kanima': Ri'oj oj chi ralc'o'al ri Dios. ¹⁷ Yey ruma c'u oj ralc'o'al ri Dios, cakac'ul ri bi'tisinic u'anom ri Dios chique ri ralc'o'al, yey cakac'ul c'u wa' junam ruc' ri Cristo. Pero lic chirajawaxic wi cakatij na c'ax wo'ora pacha' ri xic'ow wi Rire, cha' jela' chikawach apanok, oj jun pa ri yacbal uk'ij Rire.

¹⁸ Yey chinuwach ri'in ri c'axc'obic cakatij ri'oj wo'ora na cu'maja ta q'uenok ruc' runimal uchomalil ri Dios, ri cak'alajin kuc' chikawach apanok. ¹⁹ Ma e janipa tak ri 'anatal ruma ri Dios lic roye'em chic jampala' cak'alajin quiwach ri e ralc'o'al ri Dios. ²⁰ Ma ri k'atbal tzij xu'an

ri Dios paquiwi ri ticawex, xtzak ne puwi tak ri 'anatal ruma ri Dios. Y ruma c'u ri', na e ta chi u'anom pacha' ri uch'obom lo ri Dios che ri jekebal lok. E tak c'u ri 'anatal ruma ri Dios na xraj taj caya'i' chuxe' wa k'atbal tzij; na ruc' ta c'u ri', e ri Dios xuya chuxe' wa'. Pero e janipa tak ri 'anatal ruma ri Dios, c'a roye'em ri k'ij echiri' ri Dios cuyijba' na ronoje wa'. ²¹ Ma copon na jun k'ij e janipa tak ri 'anatal ruma ri Dios, e la' junam cuc' ri e ralc'o'al ri Dios, quebesax na lo chupa ri c'axc'obic y puk'ab ri camic yey caya'i' c'u unimal chomalil chique.

²² Keta'am c'ut, e janipa ri 'anatal ruma ri Dios, e pacha' cajilow pa c'axc'obic, jela' pacha' cu'an juna ixok echiri' cutzir uwach ruc' uch'uti'n.* ²³ Y na xew ta c'o pa c'ax janipa ri 'anatal ruma ri Dios, ma jela' coj-jilow pa c'ax konoje ri'oj, ri ya'tal chi chike ri nabe sipanic ubi'tisim ri Dios, wa' e ri Ruxlabixel ri Dios pa kanima'. Yey lic c'a c'o ne ri koye'em. E lic cakarayij copon ri k'ij echiri' ri Dios cuk'alajisaj kawach oj ralc'o'al Rire y caresaj c'u ri kacuerpo puk'ab ri c'ax y ri camic. ²⁴ Ma echiri' xojcolobetajic, xujek cacubi' pana kac'u'x che cakac'ul na ri bi'tisim lo chike ruma ri Dios y c'a koye'em wa'. Yey we cakabi'ij c'o koye'em, e que'elawi ri' c'amaja' cakac'ul ri koye'em. Ma we jun uc'ulum chi ri roye'em, ¿su'chac c'u ri' c'a caroy'ej? ²⁵ No'j we ri'oj cakoy'ej na ri c'amaja' cakilo, lic chirajawaxic c'u ri' cakachuk'ubej kib che roy'exic wa' ruc' cubulibal kac'u'x.

²⁶ Jec'ula', ri Ruxlabixel ri Dios cojuto'o echiri' na jinta kacowil, ma ri'oj na cakarik ta utz'onoxic sa' ri cajawax che ri kac'aslem; pero Rire lic cach'aw pakawi' chwach ri Dios ruc' jilowem na carikitaj ta c'ana ubi'xiquil. ²⁷ Ec'u ri Dios, ri caril ronoje ri c'o pa kanima', Rire lic cumaj usuc' sa' ri caraj ri Ruxlabixel, ma ri Ruxlabixel cach'aw pakawi' e

chirij ri caraj ri Dios chike ri'oj ri oj re ri Dios.

Ruma ri Cristo cakach'ij uchuk'ab ronoje

²⁸ Keta'am c'ut, janipa ri c'ax quena'w re ri Dios, e tak ronoje ri quebic'ow chupa cato'bic cha' c'o cutikoj chique, wa' e chique janipa ri esiq'uim ruma ri Dios re caqui'an ri caraj Rire. ²⁹ Ma ri Dios ojertan lo ri' xuch'obo e c'o ri quebucha'o re quebu'ana pacha' Ruc'ajol, cha' e Rire ri nabe chiquixo'l ruq'uial e ralc'o'al ri Dios. ³⁰ Yey tak wa' wa c'o uch'obom lo paquiwi', xebusiq'uij c'u ri'. Ec'u wa xebusiq'uij, xu'an jusuc' chique. Yey ri xu'an jusuc' chique, e xutac'aba' uwa quik'ij.

³¹ ¿Sa' c'u ri' ri cakabi'ij che wa'? We ri Dios c'o kuc', ¿china ri c'o puk'ab cuyac rib chikij? ¡Na jinta junok! ³² Yey ri Dios na xuxu'yaj tane Ruc'ajol chike, ma xuya lok cha' co'lcam che ruwachulew kuma konoje ri oj aj mac. ¿Na cuya ta cami ri' chike junam ruc' Ruc'ajol, ronoje ri cajawax chike? ¡Cuya'o! ³³ ¿China ri c'o puk'ab cucoj quimac ri ebucha'om ri Dios? ¡Na jinta junok! Ma ri Dios e ca'anaw jusuc' chique. ³⁴ ¿China ri c'o puk'ab cuk'at tzij pakawi'? ¡Na jinta junok! Ma ri Cristo cach'aw pakawi' chwach ri Dios, yey e Rire ri xcam kuma ri'oj. Y na xew ta wa', ma xc'astaj lo chiquixo'l ri ecaminak y wo'ora tz'ul puwiquik'ab ri Dios.

³⁵ ¿C'o neba qesan ke'oj chupa ri rutzil uc'u'x ri Cristo? ¡Na jintaj! Ma tob cape c'axc'obic o paxibal c'u'x pakawi', tob cojternabex ruc' c'ax, tob na jinta kawa y na jinta kak'u', tob catewun c'ax pakawi' o cojcamisax ruc' espada, ¡na jinta c'o cojesan chupa! ³⁶ Ma jewa' ri tz'ibital can pa Ruch'a'tem ri Dios:

Uma Rilal 'anom chike xaki catewun ri camic pakawi';

'Anom chike pacha' ri ca'an che ri bexex

* 8:22 Jn. 16:21

echiri' cac'am bi pa camic *Sal.*
 44:22
 cacha'.³⁷ Na ruc' ta c'u ri', lic
 cakach'ij uchuk'ab ronoje ruma ri
 Jun lic c'ax xojuna'o.

³⁸ Ruma c'u la', ri'in lic nujiqubam
 uwach na jinta c'ana cojesan chirij ri
 rutzil uc'u'x ri Dios. Na cojresaj taj
 tob ne e ri camic o ri c'aslemal, tob
 ne e ri ángeles, ri c'o quiwach y ri c'o
 quichuk'ab. Na cojresaj taj tob ne e
 ri cojtajin che uc'ulumaxic wo'ora o
 ri cakac'ulumaj chikawach apanok,
³⁹ tob ne e ri e c'o lo c'a che ruwa caj o
 ri e c'o lo c'a chuxe' rulew. Na jinta
 c'u c'o 'anatal ruma ri Dios cojesan
 chirij ri rutzil uc'u'x, ri xkac'ul ruma
 ri Cristo Jesús, ri Kanimajawal.

9

Ri tinamit Israel cha'tal ruma ri Dios

¹ Lic katzij wa cambi'ij che alak, ma
 in re ri Cristo y na can'an ta rak'ubal.
 Lic cuna' c'u nuc'u'x katzij ri cambi'ij,
 ma e ri Santowilaj Ruxlabixel ri Dios
 cac'amaw uwach ri nuna'oj. ² Katzij
 c'ut ri'in lic quimbisonic y ri c'ax
 c'o chinuc'u'x na quic'ow taj ³ ruma
 ri qui'anom ri e aj Israel, ri katz-
 kachak' kib cuc'. Canya ne wib e
 quinc'oji' ri'in chuxe' ri k'atbal tzij
 re ri Dios y na e ta rique, tob na
 jinta chi re ri Cristo chwe, we ta ne
 ruc' wa' quecolobetaj rique. ⁴ Ma
 raj Israel e utinamit ri Dios, yey e
 rique ri xebucha' ri Dios re quebu'an
 ralc'o'al chique; xuc'ut c'u runi-
 mal uchomalil chiquiwach y xu'an
 tzij cuc'. Chique rique xya'taj wi
 Rutzij Upixab y xc'ut chique su'anic
 calok'nimax uk'ij ri Dios pa sakil wi.
 Yey tak rubi'tisinic ri Dios u'anom,
 que rique. ⁵ Rique e calc'o'al can
 ri kamam lic c'o quiwach ojertan.*
 Yey chique c'u rique upetebem wi ri
 Cristo, Rucha'o'n lo ri Dios, ri xc'un

che ruwachulew y xu'an ticawex.
 Yey Rire e Dios puwi ronoje tak ri
 c'olic. ¡Na jinta utakexic lic nim uk'ij!
 ¡Amén!

⁶ ¿Na u'anom ta neba ri Dios ri
 ubi'tisim che rutinamit Israel?† Pero
 na conoje ta ri e ralc'o'al can ri Is-
 rael‡ e sakil utinamit ri Dios. ⁷ Na
 xa ta ruma quipetebem che ri Abra-
 ham, e ralc'o'al ri Dios.§ Ma jewa'
 xubi'ij ri Dios che ri Abraham: «Xew
 che rac'ajol Isaac caquipetebej wi lo
 rawalc'o'al»* xcha'. ⁸ Na conoje ta
 c'u ri quipetebem che ri Abraham, e
 ralc'o'al ri Dios; ma xew e ralc'o'al
 ri Dios ri quebalax chirij rubi'tisinic
 Rire. ⁹ Ma ri bi'tisinic xu'an ri Dios
 che ri Abraham e wa': «Jewa' pa jun
 junab quinc'un tanchic, yey ec'u ri'
 rawixokil Sara c'o chi jun ralab»*
 xcha'.

¹⁰ Y na xew ta wa', ma echiri' ruma
 ri kamam Isaac ri Rebeca xcanaj
 yewa' ixok, xebumatzej eyo'xab.
¹¹ Yey c'amaja' ne quebalax rique
 y c'amaja' ne caqui'an ri utz o ri
 na utz taj echiri' ri Dios xucha' jun
 chique. Jec'ula' cak'alajinic e cu'ana
 na janipa ri uch'obom lo ri Dios; y
 wa' na e ta ruma ri caqui'an ri winak,
 ma puk'ab Rire c'o wi cucha'o china
 ri caraj cusi'uij. ¹² Ma ri Dios xubi'ij
 che ri Rebeca: «Ri chak'ixel e cac'oji'
 más uwach chwa ri atzixel»* xcha'.
¹³ Jec'ula' cu'ana pacha' ri tz'ibital
 can puwi ri ubi'im lo ri Dios:
 E ri chak'ixel Jacob ri c'ax xinna'o;
 no'j ri atzixel Esaú, tzel xinwilo *Mal.*
 1:2-3
 xcha'.

Puk'ab ri Dios c'o wi china ri cucha'o

¹⁴ ¿Sa' c'u ri' ri cakabi'ij ri'oj puwi
 wa'? ¿E nawi na jusuc' ta ri cu'an ri
 Dios? ¡Na e ta ri!! ¹⁵ Ma jewa' xubi'ij ri
 Dios che ri Moisés ojertan:

* 9:4 Éx. 4:22 * 9:5 Wa' e ri Abraham, ri Isaac y ri Jacob. † 9:6 Tob e q'ui ri e aj Israel na xquicoj
 taj we ri Jesús e Ucha'o'n lo ri Dios, wa' na e ta que'elawi na jinta uchac ri xubi'tisij lo ri Dios chique.
 Gn. 12:3; Gl. 3:8 ‡ 9:6 "Israel" e bi'aj xucoj ri Dios che ri Jacob. Rire e uc'ajol ri Isaac y umam ri
 Abraham. § 9:7 Na xew ta ri Isaac e uc'ajol ri Abraham, ma xec'oji' jujun chic uc'ajol. Gn. 25:1-2,12
 * 9:7 Gn. 21:12 * 9:9 Gn. 18:10 * 9:12 Gn. 25:23

We c'o junok cuaj Ri'in canto'o ruma
ri rutzil nuc'u'x,
e ri' ri canto'o.

Y we c'o junok cuaj Ri'in canc'ut ri
c'axna'bal nuc'u'x che,
che ri' rire canc'ut, wi ri
c'axna'bal nuc'u'x *Éx. 33:19*
xcha'. ¹⁶ E uwari'che echiri' c'o caraj
cuya ri Dios che juna ticawex, na e
ta ruma lic cacha uc'u'x wa ticawex
che o ruma lic cutij uk'ij cha' c'o
cuc'ulu; ma e ruma ri c'axna'bal
uc'u'x ri Dios. ¹⁷ E pacha' ri tz'ibital
can chupa Ruch'a'tem ri Dios echiri'
ri Dios xubi'ij che ri faraón: «Ri'in
xin'an takanel chawe cha' canc'ut ri
nuchuk'ab pawil' ri'at y cha' catzijox
c'u ri nubi' che ronoje ruwachulew»^{*}
xcha'. ¹⁸ K'alaj c'u ri' ri Dios ruma ri
c'axna'bal uc'u'x cuto' china ri caraj
cuto'o. Yey we Rire caraj cu'an pacha'
abaj che ri ranima' junok, jela' cu'an
che.

¹⁹ Laj c'o c'u junok jewa' cubi'ij
chwe: «We na jinta junok cach'ijow
uk'atexic janipa ri caraj ri Dios, ¿su'be
c'u ri' ri Dios cucoj quimac ri ticawex
we rique xew e caqui'an ri xebutak
Rire che?» ²⁰ Ec'u ri'in canc'ul uwach:
«Achi, ¿sa' co rawach ri'at cha' catya-
jan chirij ri Dios? Ma na utz taj we
ri xaro ulew cubi'ij che ri ca'anaw
re: ¿Su'chac jewa' x'an la chwe?»

²¹ E ri cachacun ruc' xok'o'l, ¿na jinta
neba puk'ab cu'an ruc' ri xok'o'l sa'
ri caraj cu'ano? Ma we Rire caraj
che ri xok'o'l cu'an queb xun, jun lic
xa k'alaj pa cachapabex wi y ri jun
chic xa tob pa cachapabex wi, e cu'an
ri'. ²² Jec'ula' ri' ri Dios c'o puk'ab sa'
ri caraj cu'an cuc' ri winak. ¿Sa' c'u
cakabi'ij we ri Dios xraj cuc'ut ri roy-
owal y ri unimal uchuk'ab paquiwi
raj maquib yey na ruc' ta c'u ri', e
xuc'ut ri unimal uc'u'x chique ri takal
chique catzak ri royowal paquiwi' y
casach quiwach? ²³ Y jela' xu'ano
c'utubal re ri unimal uchomalil. Ma
xuc'ut ri c'axna'bal uc'u'x chique ri
ebucha'om chi ulok re quec'o'ji' ruc'
pa ri chomilaj luwar chila' chicaj.

²⁴ Chique c'u ri xu'an wi wa', xe-
busiq'uij; y ri'oj oj jujun chique. Y wa'
na xew ta xu'an cuc' ri e aj judi'ab, ma
xu'an cuc' ri na e ta aj judi'ab. ²⁵ Ma
jewa' ri xutz'ibaj can ri k'alajisanel
Oseas puwi ri xubi'ij ri Dios:

Chique ri na e ta nutinamit ojertan,
wo'ora cambi'ij: «Ri'ix, ix nutinamit.»
Y chique ri na c'ax ta quena'ic,
wo'ora cambi'ij: «Ri'in c'ax quix-
inna'o.»^{*} *Os.*
2:1

²⁶ Y chupa c'u ri luwar pa xbi'x wi
chique:
«Ri'ix na ix ta nutinamit,»
chila' c'u ri' cabi'x na chique e
ralc'o'al ri Dios c'aslic. *Os.*
1:10

²⁷ Yey jela' ri xutz'ibaj can ri
k'alajisanel Isaías paquiwi raj Israel:
Tob ri quiq'uiyal ri tinamit Israel
quebu'ana pacha' ruq'uiyal
sanyeb c'o chuchi' ri mar,
xa e chi jumutz^{*} ri quecolobetaj
chique.

²⁸ Ma ri Dios Kajawxel cuk'at
tzij paquiwi ri ticawex che
ruwachulew e chirij janipa ri
ubi'im canok,
y cu'ana wa' ruc' usuc'liquil y na ca-
mayin ta che u'anic *Is.*
10:22-23

xcha'.
²⁹ Yey jewa' xutz'ibaj can ri
k'alajisanel Isaías ojertan:
Ri Dios Kajawxel, ri lic c'o uchuk'ab
puwi ronoje,
we tamaji xebucolobej can jumutz
chique ri katinamit
che ri camic,
ri' cakac'ulumaj pacha' ri ca'ib
tinamit Sodoma y Gomorra, ri
xsachisax quiwach^{*} *Is. 1:9*
xcha'.

*Ri Dios cu'an jusuc' chique ri na e ta
aj Israel ruma ri cubulibal quic'u'x ruc'*
³⁰ ¿Sa' c'u ri' ri cakabi'ij che ronoje
wa'? Ma ojertan lok ri na e ta aj
judi'ab na xquitzucuj taj quebu'ana
jusuc' chwach ri Dios; yey wo'ora
ri Dios xu'an jusuc' chique ruma ri

cubulibal quic'u'x ruc'. ³¹ No'j ri e aj Israel lic xquitij uk'ij quebu'an jusuc' chwach ri Dios ruma caquitakej tak ri takanic re ri Tzij Pixab; na ruc' ta c'u ri', na xebu'ana ta jusuc' chwach ri Dios. ³² ¿Su'chac jewa' xquic'ulumaj? E ruma na xcubi' ta quic'u'x ruc' ri xu'an ri Dios cha' cu'an jusuc' chique. Ma xquich'obo e quebu'an jusuc' chwach ri Dios ruma tak ri caqui'ano. Y jec'ula' e pacha' xquichik quib puwi ri jun Abaj ri lic e c'o quetzak puwi'. ³³ Ma jewa' tz'ibital can chupa Ruch'a'tem ri Dios puwi wa Abaj:

Cancoj c'u chila' Sion jun Abaj. ^{**} *Is. 28:16*

Wa' lic e c'o tak ri caquichik quib che; y lic e c'o tak ri quetzak puwi wa nimalaj Abaj. *Is. 8:14-15*

No'j janipa c'u ri cacubi' quic'u'x ruc', na queq'uixbesax taj ma caquic'ul na ri coye'em che Rire *Is. 49:23* cacha'.

10

¹ Cambi'ij che alak hermanos, pakatzij wi ri lic curayij nuc'u'x y ri lic cantz'onoj che ri Dios paquiwi ri e aj Israel e cha' rique caquirik ri colobetajic. ² Ri'in cambi'ij ri wilom chique: Rique lic caquitij uk'ij quec'o'ji' chi utz chwach ri Dios, pero wa' na caqui'an ta ruc' sakil na'oj. ³ Ma na cacaj taj caquimaj usuc' su'anic ri Dios cu'an jusuc' chique ri ticawex; ri cacaj e quebu'ana jusuc' xa pa que rique. Y na quiya'om ta c'u quib ca'an jusuc' chique jela' pacha' ri caraj ri Dios. ⁴ Yey ri Tzij Pixab catz'akat uwach ruc' ri Cristo; jec'ula' china ri cacubi' uc'u'x ruc' Rire, e ca'an jusuc' che chwach ri Dios.

⁵ E puwi ri cu'ana jusuc' ri ticawex ruma cutakej ri Tzij Pixab, jewa' xutz'ibaj ri Moisés:

China ri ca'anaw re ronoje ri cubi'ij ri Tzij Pixab,
ri' c'o uc'aslemal chwach ri Dios
ruma cu'an wa'. *Lv. 18:5*

⁶ No'j puwi ri cu'ana jusuc' ri ticawex ruma ri cubulibal c'u'xaj, jewa' cubi'ij pa Ruch'a'tem ri Dios: «Mabi'ij pa awanima': ¿China c'u ri que'ec c'a chila' chicaj* che uc'amic lo ri Cristo?» ⁷ O «¿China c'u ri cakaj c'a chupa ri siwan catz'irir upa che uc'amic lo ri Cristo chiquixo'l ri ecaminak?» ⁸ Na cajawax taj que'ec junok, ma ¿sa' ri' ri cubi'ij pa Ruch'a'tem ri Dios? Jewa' cubi'ij: Rutzij ri Dios lic xa nakaj c'o wi chawe.

C'o chupa rawanima' y quel lo pachi'. *Dt. 30:14*

Ec'u ch'a'tem wa' ri cakatzijoj ri'oj puwi ri cubulibal c'u'xaj: ⁹ We ri'at cak'alajisaj ruc' ruchi' akul: «Ri Jesús e Wajawal» y cacoj c'u chupa rawanima' Rire xc'astaj lo ruma ri Dios chiquixo'l ri ecaminak, ri' catcolobetajic. ¹⁰ Ma pa ri kanima' cakacoj wi wa' cha' coju'an jusuc' chwach ri Dios; yey ruc' c'u ruchi' kakul, cakak'alajisaj Rire e Kajawal cha' jela' cojcolobetajic. ¹¹ Ma Ruch'a'tem ri Dios jewa' cubi'ij puwi ri Cristo: China ri cacubi' uc'u'x ruc', na caq'uixbesax taj ma cuc'ul na ri roye'em che Rire *Is. 49:23*

cacha'. ¹² Echiri' cubi'ij «china», wa' que'elawi tob e aj judi'ab o na e ta aj judi'ab, ma xaki junam quiwach. Ma ri Kanimajawal e Cajawal que conoje, tob junwi tak ri quitinamit. Yey Rire cuya ri unimal rutzil uc'u'x chique conoje ri caquitz'onoj to'bal que che. ¹³ Ma Ruch'a'tem ri Dios jewa' cubi'ij: E janipa ri caquitz'onoj colobetajic chupa rubi' ri Kanimajawal, ri' quecolobetaj na *Jl. 2:32* cacha'.

¹⁴ ¿Su'anic c'u ri' caquitz'onoj colobetajic chupa rubi' ri Kanimajawal we na quicojom ta rubi' nabe? ¿Yey su'anic caquicoj rubi' we na quitom ta puwi Rire? ¿Yey su'anic caquita ri tzijonic puwi Rire we na jinta junok catz'ijow re chique? ¹⁵ ¿Yey su'anic e

** **9:33** "Abaj": Wa' que'elawi e ri Kanimajawal Jesucristo. 1 P. 2:6-8 ✧ **10:6** Dt. 30:12

c'o ri quetzijon puwi ri Kanimajawal
we na junta junok catakaw bi que
cha' caqui'an wa tzijonic? E pacha'
ri tz'ibital can chupa Ruch'a'tem ri
Dios:

¡Lic chom ri quic'unic ri caquic'am lo
ri tzijonic

re ri utzil chomal,

ri quec'un che utzijoxic ri Utzilaj Tzij!

Is. 52:7

cacha'. ¹⁶ No'j na conoje ta c'ut xeco-
jow re ri Utzilaj Tzij xtzijox chique. E
pacha' ri xubi'ij can ri Isaías:

Kajawal, ¿c'o nawi junok cojoyom re
ri katzijom chic? *Is. 53:1*

xcha'. ¹⁷ Ri cubulibal quic'u'x ri
ticawex cujeko echiri' caquita ri catz-
ijox chique; yey wa' wa caquito, e
Ruch'a'tem ri Dios puwi ri Cristo.

¹⁸ No'j cantz'onoj c'ut: ¿Na xquita ta
nawi ri Utzilaj Tzij? ¡Katzij, xquito!
Ma e pacha' ri cubi'ij Ruch'a'tem ri
Dios:

Che ronoje ruwachulew xtataj wi ri
quikul

ri xetzijon puwi ri Dios;

y ri quich'a'tem oponinak pa ronoje
luwar

che ruwachulew* *Sal. 19:4*

cacha'. ¹⁹ Cantz'onoj tanchi c'ut: ¿Raj
Israel na queta'am ta nawi wa'? ¡Que-
ta'am! Nabe na, e pacha' ri xutz'ibaj
can ri Moisés puwi ri xubi'ij lo ri Dios
chique raj Israel:

Ri'in can'an chiwe cu'an c'ax ic'u'x
chirij jun "tinamit" na tinamit
taj;

campetisaj iwoyowal chirij jun tina-
mit

na junta queta'am puwi ri

K'ijsak† *Dt. 32:21*

xcha'. ²⁰ Jec'ula', ri Isaías xuch'ij
ubi'ixiquil ri ubi'im lo ri Dios paquiwi
ri na e ta aj Israel:

Xinrikitaj c'u cuma ri na quinquitzu-
cuj taj,

yey xink'alajisaj c'u wib chiquiwach

ri na xinquitz'onobej taj *Is. 65:1*
xcha'.

²¹ No'j paquiwi raj Israel, jewa'
xubi'ij lo ri Dios:

Lic xinelay chique jun tinamit

e aj palajiy tzij y e titz'itak

cha' quetzelej tanchi lo wuc' *Is. 65:2*
xcha'.

11

Ri Dios na rok'otam ta rutinamit

¹ Ec'u wo'ora cantz'onoj: ¿E nawi
xrok'otaj can ri Dios rutinamit Is-
rael? ¡Lic k'alaj na xrok'otaj taj! Ma
ri'in in aj Israel, in ralc'o'al can ri
Abraham, in jun chique tak can ri
ralc'o'al ri Benjamín;* yey ri'in na
xinok'otax ta can ruma ri Dios. ² Ri
Dios, lic ojertan lo ri' xuch'ob rakan
cu'an utinamit chique raj Israel; y c'a
e u'anom wo'ora, na rok'otam ta can
rutinamit Israel. ¿Na eta'am ta neba
alak ri cubi'ij Ruch'a'tem ri Dios puwi
ri xubi'ij ri Elías echiri' rire xch'a't
chwach ri Dios chiquij ri e aj Israel?
Ma jewa' xubi'ij:

³ Lal Kajawal Dios, raj Israel e xe-
camisan

que ri k'alajisanelab e la

y xquiwulij tak ri altar e la.

Xew chi c'u ri'in in canajinak canok
y cacaj ne quinquicamisaj *1 R.*

19:10, 14

xcha'.

⁴ ¿Yey sa' c'u ri' ri xuc'ul uwach ri
Dios che ri Elías? Xubi'ij:

Na xew ta ri'at, ma c'a e c'o
chi can wukub mil achijab
ebenucolobem cha' quin-
quiloc'nimaj Ri'in yey rique na
exuqui'nak ta c'ana chwach ri
tiox Baal *1 R. 19:18*

xcha ri Dios che.

⁵ Jec'ula' wo'ora c'a e c'o chi can
jumutz chique raj Israel echa'tal can
ruma ri unimal rutzil uc'u'x ri Dios.

⁶ Yey we echa'tal ruma ri unimal

* **10:18** Wa jun versículo re Salmos e cach'a't chwi tak ri ch'umil, ri caquik'alajisaj ruchuk'ab y ruchomalil ri Dios y quebilitaj pa ronoje luwar che ruwachulew. Jec'ula' ri Pablo xujunimaj wa' ruc' rutzijoxic ri Utzilaj Tzij re ri Dios che ronoje ruwachulew. † **10:19** Chiquiwach ri e aj Israel, xew takal chique rique caquic'ul ri rutzil uc'u'x ri Dios. Ruma wa' xpe coyowal echiri' ri Dios xuc'ut ri rutzil uc'u'x chique tak ri tinamit che ruwachulew. * **11:1** Raj Israel e ralc'o'al can ri Abraham, yey ri Benjamín e jun chique ri e uxiquin-umam can ri Abraham.

rutzil uc'u'x ri Dios, ri' na e ta ruma juna chac qui'anom rique. Ma we ta e ri', ri unimal rutzil uc'u'x ri Dios na cajawax taj. ⁷ ¿Sa' c'u ri' ri caka-maj usuc' che wa'? Lic e q'ui chique ri tinamit Israel c'amaja' caquirik ri quetajin lo che utzucuxic, wa' e su'anic quebu'an jusuc' chwach ri Dios. No'j ri xerikow re, e ri echa'om chi lo ruma ri Dios. Ec'u ri nic'aj chic x'an pacha' abaj che ri canima'. ⁸ Ma e pacha' ri tz'ibital can pa Ruch'a'tem ri Dios:

Ri Dios xu'an chique pacha' cawar quiwach

chwach tak ri caraj Rire; *Is.*
29:10

y c'a wak'ij ora tob quetzu'nic, na caquil ta ri cuc'ut ri Dios chiquiwach;

tob quetanic, na caquita ta ri cubi'ij ri Dios chique. *Dt. 29:4*

⁹ E pacha' ri xubi'ij ri David ojertan paquiwi ri tzel xebilow re:

Ri nimak tak nimak'ij caqui'ano, chu'ana pacha' co'c y pacha' ra'al re quetzak chupa, y jela' queya' pa c'axc'obic.

¹⁰ Chu'ana c'u k'eku'm rupa ri quiwach cha' na caquil ta ri cuc'ut ri Dios chiquiwach;

Yey canaj na canok e ri' xaki c'uyuq'uic chi ri quij ruma ri queka'n lic al *Sal.*

69:22-23
xcha'.

Ri c'ambal na'oj puwi ri che' re olivo

¹¹ Cantz'onoj c'ut: ¿Ri quitzakibal raj Israel† e nawi cha' asu na quey-actaj ta chic? ¡Na e ta c'ana ri'! Ma ruma ri quitzakibal rique, e xc'un ri colobetajic chique ri na e ta aj Israel, cha' jela' raj Israel caquijek caquirayij quecolobetaj pacha' ri na e ta aj Israel. ¹² Yey we ruma c'u

ri tzakibal y ri jaljobic que raj Israel, lic chom ri xquic'ul tak ri tinamit re ruwachulew, ¡mac'uwari' e más chom ri caquic'ul tak ri tinamit echiri' conoje ri e aj Israel caquitelej tanchi quitzij chwach ri Dios!

¹³ C'o c'u ri cuaj cambi'ij che alak ri na alak ta aj Israel. Ri'in in tako'n re ri Jesús chique ri na e ta aj Israel. Ruma c'u wa', lic c'ax canna' wa chac ya'om panuk'ab. ¹⁴ Yey ri lic cuaj ri'in chique raj Israel, ri e watz-nuchak', e caquirayij pan ri c'ulum ralak y jec'ula' quecolobetaj na jujun chique. ¹⁵ Ma we ri tzakibal que raj Israel xuya luwar cha' uq'uiyal ticawex che ruwachulew xc'o'ji' utzil chomal chiquiwach ruc' ri Dios, ¿sa' c'u ri' ri cuc'am lok echiri' raj Israel quec'ul tanchi ruma ri Dios? ¡E cuc'am lo c'aslemal chique ri ecami-nak chwach ri Dios!

¹⁶ We junok cuya puk'ab ri Dios ri nabe pam quesax che ri k'or, wa' e c'utubal re ronoje ri k'or re ri Dios.✱ Yey we chom ri ratz'ayak juna che', jenela' ri' chom tak ruk'ab.‡

¹⁷ Ec'u che ri sakil che' re olivo (wa' e que'elawi rutinamit ri Dios e aj Israel) xjok'ix bi jujun uk'ab (wa' e que'elawi raj Israel na quicojom ta rubi' ri Cristo). Yey puc'axel ri xjok'ix bi, e xnac' jujun uk'ab che' re olivo xa re pa tak juyub (wa' e que'elawi ralak hermanos, ri na alak ta aj Israel). Ec'u wo'ora e pacha' cac'ul alak ri sakil uwa'al che' re olivo, ri quel lo che ri ratz'ayak. ¹⁸ Pero mach'ob ne alak we más c'o wach ralak chiquiwa ri sakil uk'ab ri che' xejok'ix bi. Ma we ca'an nim che ib alak, mic'ow chic'u'x alak na e ta ralak ri c'asbayom re ri ratz'ayak ri che', ma e ne ri ratz'ayak ri c'asbayom e alak.

¹⁹ Laj e c'o jujun chixo'libal alak jewa' caquibi'ij: «Jujun uk'ab ri che' re olivo xjok'ix bi cha' jela' e cojnac' can ri'oj paquic'axel» cacha alak.

²⁰ Katzij, pero wa' xjok'ix bi ruma na

† **11:11** Raj Israel xetzakic ma na xcubi' ta quic'u'x ruc' ri Cristo. ✱ **11:16** Nm. 15:17-21 ‡ **11:16** Wa queb c'ambal na'oj puwi ri k'or y puwi ri che' que'elawi: Ri Abraham, ri Isaac y ri Jacob echa'tal ruma ri Dios. Ruma c'u wa', ri calc'o'al can rique, e re ri Dios.

jinta cubulibal quic'u'x ruc' ri Kanimajawal. No'j c'u ralak xtiqui' can alak xa ruma ri cubulibal c'u'x alak ruc' ri Kanimajawal. E uwari'che, ma'an nim che ib alak; e c'ola xi'in ib uc' alak chwach ri Dios. ²¹ Lic chajij c'u ib alak, ma we ri Dios xujok'ij bi tak ri sakil uk'ab che' (wa' e ri e aj Israel na xcubi' ta quic'u'x ruc' ri Kanimajawal), jec'uri'la' cu'an che ralak we jela' ca'an alak pacha' ri xqui'an rique.

²² Chilape c'u alak ri': Ri utzilaj rutzil uc'u'x ri Dios yey rutewul ri royowal. Ma lic c'o utewul ri royowal Rire echiri' cayactaj chirij ri na utz taj, jela' pacha' ri xu'an cuc' ri xejaljobic. No'j ri utzilaj rutzil uc'u'x e ri cuc'ut che ralak we catiqui' alak chupa wa rutzil uc'u'x. Yey we na e ta c'u ca'an alak ri', cajok'ix ne ubi ri' ralak pacha' ri xquic'ulumajrique. ²³ Yey we ne ri e aj Israel caquitzelej quitzij y cacubi' quic'u'x ruc' ri Kanimajawal, quenac' tanchi che ri sakil che', ma ri Dios puk'ab c'o wi cu'an wa'. ²⁴ Ma ralak, ri xset lo alak che jun che' re olivo lic rewi xa re pa tak juyub, xnac' c'u alak ruma ri Dios che ri sakil che' re olivo tob wa' na che'ul ta alak. We ri Dios xurik c'u unaqu'uc alak che jun che', lic na c'ayew ta c'u ri' che Rire cunac' tanchi ri sakil uk'ab che ri che' pa petinak wi.

Ri quicolobetajic raj Israel

²⁵ Hermanos, ri Dios c'o ri uch'obom chi lo rakan paquiwi raj Israel, yey wa' na k'alajisam ta lo ojertan. Ec'u wo'ora lic cuaj ri'in queta'maj ralak wa' cha' na ca'an ta nim che ib alak. Ri quic'ulumam raj Israel, tob na conoje taj, e ri x'an pacha' abaj che ri canima', ma na cacaj ta caquicoj rubi' ri Cristo. Yey jec'ula' qui'anom c'a echiri' catz'akat na ri quiqu'uiyal ri na e ta aj Israel caquiya quib puk'ab ri Cristo. ²⁶ C'a tec'uchiri' conoje raj Israel quecolobetaj na, ma jewa' tz'ibital can pa Ruch'a'tem ri Dios:

C'a chila' Sion cape wi ri cayolopin lo que ri ticawex

y queberesaj na c'u lo ri e ralc'o'al can ri Jacob chupa ri ch'ulilaj mac. §

²⁷ Ec'u nutzij wa' can'an Ri'in cuc' echiri' concuy na ri quimac *Jer.*
31:33-34
cacha ri Dios.

²⁸ Na ruc' ta c'u ri', raj Israel xebu'ana e aj retzelal c'u'xaj chirij ri Dios ruma na xcaj taj caquicoj ri Utzilaj Tzij. Ec'u ri' wa' xuya luwar che ralak ri na alak ta aj Israel cha' utz cakib alak ruc' ri Dios. No'j ri Dios c'a c'ax quebuna' raj Israel ma xebucha' lo ri cati'-quimam ojertan. ²⁹ Ma e janipa ri sipanic y ri siq'uibal u'anom ri Dios che rutinamit, * wa' na caresaj ta chi q'uenok.

³⁰ Ralak ri na alak ta aj Israel, rojertan na xcoj ta alak utzij ri Dios. No'j wo'ora e raj Israel ri na caquicoj ta utzij; y ruma c'u wa', ya'tal che ralak cac'ul alak ri c'utubal re ri rutzil uc'u'x ri Dios. ³¹ Jec'uri'la', wo'ora rique na quicojom ta utzij ri Dios; yey ruma ri rutzil uc'u'x ri Dios che ralak, chikawach apanok ri Dios cuc'ut tanchi ri rutzil uc'u'x chique rique. ³² Ma ri Dios xuk'alajisaj conoje ri ticawex junam quiwach e aj palajiy tzij, cha' jela' cuc'ut ri rutzil uc'u'x chique conoje.

³³ ¡Janipa lo umajom rubeyomalil y runa'oj ri Dios yey tak ri reta'am Rire; ronoje wa' lic na jinta utakexic! ¡Na jinta ne c'ana junok cach'ijow umajic usuc' janipa ri uch'obom y ri u'anom Rire! ³⁴ Ma jewa' cubi'ij Ruch'a'tem ri Dios:

¿C'o nawi junok umajom usuc' ronoje runa'oj ri Dios Kajawxel?

¿C'o nawi junok xya'w una'oj Rire?
¡Na jintaj! *Is. 40:13*

cacha'. ³⁵ Yey cubi'ij:

We c'o junok casipan che ri Dios,
¿chirajawaxic nawi che ri Dios cuya lo ri rajil uc'axel che?

¡Na chirajawaxic ta che!* *Job 41:11*

36 Ma janipa tak ri c'olic, ruc' Rire petinak wi; ma ronoje 'anatal ruma Rire y e re yacbal uk'ij Rire. ;Lic takal c'u ri' che cayac uk'ij na jinta utakexic! ;Amén!

12

Ri sakil kabinic kasilabic ri cubul kac'u'x ruc' ri Cristo

¹ Hermanos, ri Dios lic uc'utum ri unimal rutzil uc'u'x che alak. Ruma c'u wa', lic cantz'onoj che alak ya'a ronoje ri cuerpo alak puk'ab ri Dios pacha' juna kasa'n c'aslic,* na jinta c'ana ch'ul che y lic cuc'ul uc'u'x Rire; ma wa' e ulok'nimaxic takalic ca'an ralak che. ² Ma'an chi e alak pacha' ri caqui'an ri winak re ruwachulew wak'ij ora. E ya'a alak luwar che ri Dios cujalc'atij ri na'oj alak y cu'an c'ac' che ronoje ri binic silabic alak. Jela' c'u ri' queta'maj alak y ca'an alak janipa ri utz caraj ri Dios che alak; wa' e ri lic cuc'ul uc'u'x Rire y e ri lic jusuc' chwach.

³ Ruma c'u ri unimal rutzil uc'u'x ri Dios, ya'tal lo chwe ri'in cambi'ij che onoje alak: Lic ma'an nim che ib alak ruc' ri uya'om ri Dios pak'ab alak. Puwi ri ya'tal che alak, mic'ow uwi' ri cach'ob alak chwa ri takal che alak; e ch'obo alak rusuc' puwi tak ri uya'om ri Dios chijujunal alak ruma ri xcubi' c'u'x alak ruc'. ⁴ Ma jela' pacha' ri kacuerpo xa jun u'anom tob lic q'ui uchapom wi rib, pero junwi tak ri quichac ronoje ri chapayom re; ⁵ jec'uri'la', ri'oj, tob lic oj q'ui, xa jun ka'anom ruc' ri Cristo, y konoje c'u ri' cojajawax tak chikawach. ⁶ Ec'u ri Dios, jalajuj tak rusipanic uya'om chike chikajujunal cha' caka'an ruchac; wa' e chirij tak ri caraj Rire chike ruma ri unimal rutzil uc'u'x. E uwari'che, ri ya'tal che cak'alajisan puwi runa'oj ri Dios, chu'ana xew e chirij ri bi'tal che ruma ri Dios. ⁷ Ri ya'tal che lic quebuto' jujun chic, e chu'ana ri'. Ri ya'tal che cac'utunic, e

chuya'a rib che ri c'utunic. ⁸ Ri ya'tal che capixabanic, e chuya'a rib che ri pixabanic. Ri ya'tal che casipanic, e chu'ana ri' ri casipan ruc' ronoje uc'u'x. Ri ya'tal che cuc'am quiwach jujun chic, e chuya'a rib che u'anic wa' chi utz. Ri ya'tal che cuc'ut ri c'axna'bal uc'u'x, e chu'ana ri' ruc' qui'cotemal.

⁹ C'ax na'a ib alak pa sakil wi, na xa ta ruc' queb palaj alak. Mac'ul che ri binic silabic alak ri na utz taj; e takej alak u'anic ri utz. ¹⁰ Chijujunal alak lic c'ax na'a ib alak pa sakil wi, ma chak' ib alak chwach ri Kakaw. Matzucuj ri yacbal k'ij ralak; e yaca alak quik'ij ri jujun chic. ¹¹ 'Ana alak ri lic alak sac'aj, ma'an alak lic alak xepu; e lok'nimaj alak ri Kanimajawal ruc' ronoje c'u'x alak. ¹² Ruc' qui'cotemal choye'ej alak janipa ri ubi'tisim ri Dios che alak. Ch'ija alak uchuk'ab ri c'axc'obic cape pawil' alak y lic mok'otaj alak u'anic orar. ¹³ Cheto'o alak ri quicojom rubi' ri Cristo ruc' tak ri cajawax chique. Tijoj ib alak che quic'ulic chi utz janipa ri quebojon chi ocho alak. ¹⁴ Tz'onoj alak ri rutzil uc'u'x ri Dios paquiwi ri quaternabem alak ruc' c'ax; matz'onoj alak ri na utz taj paquiwi', e tz'onoj alak ri utz. ¹⁵ Qui'cota alak cuc' ri e c'o pa qui'cotemal; chok'a alak cuc' ri quebok'ic. ¹⁶ Chu'ana xa jun c'u'x alak chiwach alak. Ma'an alak nim che ib alak; e 'ana alak xa jun cuc' ri na jinta quiwach. Mach'ob alak lic c'o na'oj alak chiquiwa jujun chic.

¹⁷ Matzelej alak uwach ri na utz taj cu'an junok chi'ij alak. E choca alak il che u'anic ri utz chiquiwach conoje ri ticawex. ¹⁸ 'Ana c'u alak janipa ri c'o pak'ab alak cha' cac'oji' alak chi utzil chomal cuc' conoje ri ticawex. ¹⁹ Ralak nu hermanos ri c'ax canna' alak, we c'o ca'anaw ri na utz taj chi'ij alak, matzelej alak uc'axel che. E ya'a alak puk'ab ri Dios cha' e Rire ri

* **12:1** Rojertan xya'i' chwach ri Dios kasa'n que awaj, yey wa' quecamisaxic y queporoxic. Noj wo'ora ri kasa'n cutz'onoj ri Dios e ri'oj, yey Rire na caraj ta ri camic ke'oj; ri caraj e cakaya ronoje puk'ab Rire: ri kacuerpo, ri kabinic y ri kac'aslem.

caya'w ri tojbal re, ma jewa' tz'ibital
chupa Ruch'a'tem:
Panuk'ab Ri'in c'o wi cank'at tzij
paquiwi ri quebanaw re ri na utz
taj chiwij;
In c'u ri' ri quin'anaw uc'axel chique
Dt. 32:35
cacha ri Dios Kajawxel. ²⁰Jec'uri'la', e
'ana alak pacha' ri cubi'ij Ruch'a'tem
ri Dios:
We canum ri tzel quilow e la, ya'a la
uwa.
We catzajin uchi', ya'a la umik'ina'.
Ma echiri' ca'an la wa', rire cujek
caq'uix chiwach la
yey cuna' c'u rib ri' che ri na utz taj
xu'an che'la† *Pr. 25:21-22*
cacha'. ²¹Maya alak luwar casocotaj
alak ruma ri na utz taj; e ch'ija alak
uchuk'ab ri na utz taj ruc' ri utz ca'an
alak.

13

*Ri kabinic chiquiwach takrajwach
re ri tinamit*

¹Lic chirajawaxic chique conoje ri
ticawex e caquiya quib quetak cuma
ri e aj wach re ri tinamit, ma na jinta
wa takanic paquik'ab rique we na e
ta ri Dios ya'yom re chique. Janipa c'u
ri takanelab e c'olic, e ri Dios ya'yom
ri takanic paquik'ab. ²E uwari'che
china ri na cuya ta rib chuxe' ri
takanic que ri e aj wach re ri tinamit,
ri' e cuyac rib chirij ri takanic cojo-
tal can ruma ri Dios. Yey e janipa
ri que'anaw re wa', chiquibil quib
caquitzucuj ri' ri k'atbal tzij paquiwi'.
³Ma ri quetakanic na e ta cojom re
caquicoj xi'in ib che ri cu'an ri utz;
ecojtalic re caquicoj xi'in ib che ri
cu'an ri na utz taj. We ca'aj c'u la
na caxi'ij ta ib la chiquiwach ri que-
takanic, e 'ana la ri utz y jela' cayac
ne k'ij la cuma ri quetakanic. ⁴Ma
rique ecojotal pakawi' ruma ri Dios
cha' caqui'an ri utz chike. No'j we

rilal ca'an la ri na utz taj, ri' xi'ij ib
la chiquiwach, ma ya'tal paquik'ab
rique caquiya pa c'ax ri cu'an ri na
utz taj.* Yey e uchac ri Dios ri
caqui'an rique echiri' caquiya pa c'ax
ri cu'an ri na utz taj. ⁵Ruma c'u la', lic
chirajawaxic cakaya kib cojtak cuma
ri e aj wach re ri tinamit. Caka'an
wa' na xa ta ruma ri c'o paquik'ab
rique cojquiya pa c'ax, ma e ruma
ri cakana' chikac'u'x lic chirajawaxic
caka'an ri jusuc'. ⁶Ruma ne ri' ca'an
ralak ri tojonic tz'ononm che ri tina-
mit cuma ri e aj wach, cha' rique
utz caqui'an ri chac uya'om ri Dios
paquik'ab. ⁷Ya'a c'u alak chique
chiquijunal janipa ri takal chique
caya'ic. Che ri takal che ca'an to-
jonic,† tojo alak. Che ri takal che cacoj
utzij, cojo alak utzij. Che ri takal che
cayac uk'ij, yaca alak uk'ij.

*Ri kabinic chiquiwach tak ri
ticawex*

⁸We c'o c'as la ruc' junok, manajtir
la che utojic. Yey konoje nenare'
c'o "kac'as" chikawach, wa' e ri
c'ax cakana' kib. Ec'u ri jun c'ax
cuna' ri ratz-uchak', ri' catajin che
u'anic ri catakan ri Tzij Pixab re ri
Dios che. ⁹Ma chupa ri Tzij Pixab
re ri Dios cubi'ij wa': «Matmacun
chirij ri c'ulaniquil. Matcamisanic.
Matelk'anic. Ma'an rak'ubal chirij
junok. Marayij uwach ri na awe taj.»*
Wa' wa takanic ruc' ronoje ri nic'aj
chic takanic re ri Dios, cu'ana xa
jun ruc' wa ch'a'tem: «C'ax chana'a
rawatz-achak' jela' pacha' ri c'ax
cana' awib ri'at.»* ¹⁰Ma china ri
c'o rutzil c'u'xaj ruc', na camacun
ta chirij ri ratz-uchak'. E uwari'che
echiri' cakac'ut ri rutzil c'u'xaj c'o
kuc', e cojtajin che u'anic ri catakan
Rutzij Upixab ri Dios che.

¹¹'Ana c'u alak ronoje wa' ma
eta'am alak ri k'ij oj c'o wi. We cawar

† **12:20** Q'uisbal re wa jun versículo pa ri ch'a'tem griego cubi'ij "rachak'a'l caka'wic cat'uba' chwi
ujolom". * **13:4** "Ma ya'tal paquik'ab rique caquiya pa c'ax ri cu'an ri na utz taj": Pa ri ch'a'tem
griego cubi'ij "ruma wa' rique cuc'a'am ri espada". † **13:7** "Tojonic": Pa caxtila wa' e "tributos e
impuestos". * **13:9** Éx. 20:13-17 * **13:9** Lv. 19:18; Mt. 22:39 † **13:11** We ri'oj pacha' oj warinac
chwach ri Dios, chirajawaxic cac'un sak chikawach cha' jela' caketa'maj y caka'an janipa ri caraj ri
Dios chike.

kawach, chirajawaxic chojc'astajok,† ma ruk'ijol ri kacolobetajic más xa nakaj chi c'o wi chwa echiri' xkacoj rubi' ri Cristo. ¹² E wa oj c'o wi e pacha' xulan chi rak'ab y xa nakaj chic casakir wi. Ruma c'ula' maka'an ke'oj janipa ri ca'an xa xe'lak'ay pa k'eku'm; e ka'ana janipa ri takalic ca'an pa ri K'ijsak. E lic ka'ana ke che tak ri to'bal uya'om ri Dios cha' cakach'ij uchuk'ab tak ri na utz taj.* ¹³ Chojbin c'u jusuc' jela' pacha' ri takal chique ri quebin pa ri K'ijsak. Makaya kib che tak nimak'ij na utz ta uwach. Makaya kib che k'abaric. Makach'ulaj ri kacuerpo ruc' ch'ulilaj mac. Makaya kib che ch'a'oj chikawach y mu'an c'ax kac'u'x chirij junok. ¹⁴ Ri 'ana alak e wika ib alak che ri Kanimajawal Jesucristo; wa' e que'elawi cu'an alak xa jun ruc' Rire. C'utu alak wa' ruc' ri binic silabic alak y maya c'u alak luwar catakan pawil' alak ri rayibal na utz ta uwach re ri ti'jil alak.

14

Mojch'o'jin puwi ri na il ta uwach

¹ C'ulu alak ri jun c'amaja' cumaj usuc' sa' ri caraj ri Dios chique ri cubul quic'u'x ruc' ri Cristo.* Mach'o'jin alak ruc' xa ruma na junam ta runa'oj rire ruc' ri na'oj ralak. ² Ma puwi ronoje ri ya'talic re catijic, c'o ri cuch'ob rakan utz catijil' ronoje tak wa' yey c'o ri c'amaja' cumaj usuc' ruc'utunic ri Dios; y chwa c'u rire, c'o wa'im e mac che jun we cutijo, y ruma c'u ri' xew cutij ichaj. ³ Ec'u ri' ri jun cutij ronoje, na utz taj we cuc'ak bi uk'ij ri jun xa k'alaj ri cutijo. Yey ec'u ri jun xa k'alaj ri cutijo, na utz taj we cuk'at tzij puwi ri jun cutij ronoje. Ma e ri Dios c'uluyum que wa' wa ticawex.

⁴ ¿Lal china rilal cha' cu'an lal aj k'atal tzij puwi ri raj chac jun chic? Ma e ri rajaw quilowic we utz ri cu'ano o na utz taj. Jec'ula' puk'ab ri Dios c'o wi quebuto' chiquijujunal ri raj chac cha' quetiqui' chi utz chwach yey cu'an wa' ruc' runimal uchuk'ab.

⁵ C'o ri cuch'obo c'o k'ij lic il uwach re yacbal uk'ij ri Dios chwach jujun chic k'ij; yey c'o ri junam caril ronoje ri jujun k'ij. Chiquijujunal lic chirajawaxic quetiqui' chi utz che tak ri caquich'ob rakan.† ⁶ Ec'u junok lic cu'an il uwach che juna k'ij, re yacbal uk'ij ri Kanimajawal cu'ano. Yey e junok chic na cu'an ta il uwach che wa' wa k'ij, ma chwach rire ronoje k'ij e re yacbal uk'ij ri Kanimajawal. Jec'ula', e ri jun cutij ronoje, cutijo re yacbal uk'ij ri Kanimajawal, ma cutioxij che ri Dios. Yey ri jun xa k'alaj ri cutijo, jela' cu'ano ma cuch'obo ruc' wa' cuyac uk'ij ri Kanimajawal; y cutioxij c'u ri' che ri Dios.

⁷ Ma na jinta junok chike xa pa re rire c'aslic y na jinta junok xa pa re rire cacamic. Ma ri c'aslem y ri camic puk'ab ri Dios c'o wi. ⁸ We oj c'aslic, ri kac'aslem e re yacbal uk'ij ri Dios; yey we xojcamic, wa' re yacbal uk'ij ri Dios. Jec'ula', we oj c'aslic o we xojcamic, oj chi re ri Kajawal. ⁹ Ma ruma wa' ri Cristo xcamic y xc'astaj lo chiquixo'l ri ecaminak cha' jela' cu'ana Cajawal ri ecaminak chic cuc' ri c'a e c'aslic.

¹⁰ Rilal, ri ca'an che ib la lal aj k'atal tzij puwi ri hermano la, ¿su'chac ca'an la wa'? O rilal, ri cac'ak bi la uk'ij ri hermano la, ¿su'chac ca'an la wa'? Ma konoje c'o jun k'ij coje'tac'ala na chwach ri k'atbal tzij re ri Cristo. ¹¹ Ma jewa' ri tz'ibital can chupa Ruch'a'tem ri Dios:

* **13:12** Ef. 6:11 * **14:1** Pa ri ch'a'tem griego cubi'ij "ri c'amaja' canimar ri cubulibal uc'u'x". Chupa wa capítulo 14, wa' e que'elawi ri hermanos caquich'ob rakan c'o takanic lic chirajawaxic wi conoje caquitakej, ma e chiquiwach rique ronoje wa' wa takanic ruc' ri Dios petinak wi, tob c'o jujun chic hermanos caquimaj usuc' xa cuc' rachijab petinak wi wa' wa takanic. † **14:5** C'o ri na lic ta k'alaj we utz ca'anic o na utz taj. Puwi tak wa', chirajawaxic chikajujunal cakach'ob chi utz su'be caka'an wa' o su'be na caka'an taj. Pero na ube taj we ri'in cancoj umac jun chic xa ruma na junam ta runa'oj ruc' ri we'in.

Pakatzij wi Ri'in in c'aslic, cache ri
Kajawal,
y pakatzij wi, chinuwach Ri'in
caquixucuba' na quib conoje ri
ticawex,
y ruc' ruchi' quikul conoje caquibi'ij
panuwi Ri'in,
xew Ri'in in Dios[☆] *Is. 45:23*
cache'. ¹² Jec'uri'la' copon jun k'ij
echiri' konoje coje'ela chwach ri Dios
y ec'u Rire cak'alajisan re we utz o na
utz ta ri ka'anom.

*Mu'an alak latz'anel chique jujun
chic*

¹³ E uwari'che maka'an chi oj k'atal
tzij chikibil kib; moju'an ne latz'anel
o tzakibal che juna hermano. ¹⁴ Puwi
ri ya'talic re catijic, ri'in lic weta'am
ruma ri Kanimajawal Jesús y lic nu-
jiquibam c'u uwach wa': Ronoje utz
y na ch'ul taj chwach ri Dios. No'j
we c'o junok cuch'obo c'o ri catijic
"ch'ul", ri' xew chwach rire ch'ul wi. †
¹⁵ Yey we ruma ri catij la, capaxij
la uc'u'x ri hermano la, ri' ri catajin
la che uc'utic na e ta chi ri rutzil
c'u'xaj. Ruma c'u wa', lic na ube taj
xa ruma ri catij la, c'o junok caresaj
rib chirij ri Cristo yey ruma ne rire
xcam ri Cristo. ¹⁶ Mac'o c'u ma'an
alak we ruc' wa' tzel cach'a'tibex lo ri
binic silabic alak, tob ne lic utz chi-
wach ralak. ¹⁷ Yey chupa rutakanic
ri Dios ri lic chirajawaxic wi na e ta
sa' ri wa'im cakatijo o sa' ri kaya'
cakakumu; ma e ri cojbin jusuc',
ri cojc'o'iji' chi utzil chomal y ruc'
qui'cotemal ruma ruto'bal ri Santow-
ilaj Ruxlabixel ri Dios. ¹⁸ Ma e ri jela'
caquilok'nimaj ri Cristo, ri quibinic
quisilabic cuc'ul uc'u'x ri Dios y chom
c'u quilitaj cuma ri ticawex.

¹⁹ E uwari'che, e katakej janipa ri
cojuc'am bi chi utzil chomal y cuya
kaq'uiyibal chwach ri Dios, cha' jela'
cakato' kib chikawach. ²⁰ Mawulij
c'u alak ri chac u'anom ri Dios pa
ranima' junok xa ruma ri wa'im catij
alak. Katzij, ronoje ri ya'talic re
catijic, na ch'ul taj. Pero na utz taj

we quetzak jujun pa mac xa ruma
ri cakatijo. ²¹ Más utz we na cakatij
ta ti'ij, na cakatij ta vino y mac'o ne
maka'ano, we ruma wa' juna her-
mano casach una'oj, catzak pa mac
o cak'ob ruchuk'ab chwach ri Dios.
²² We jiquibam la uwach lic utz ri
catajin la che u'anic chwach ri Dios,
ri' lic utz; pero más utz we wa' ca-
canajic xew chwach ri Dios y rilal. Lic
nim uk'ij ralaxic ri jun cuna' chuc'u'x
lic utz ri cu'an chwach ri Dios, ma
jela' na cajawax ta che cuk'at tzij
puwi' chiribil rib. ²³ No'j we junok
xa queb upa cutij ri catajin che, ri'
utuquel cuc'am lo k'atbal tzij puwi'
ma na cubul ta uc'u'x ruc' ri cu'ano.
Ma e janipa ri cu'an junok yey na
cu'an ta ruc' cubulibal uc'u'x, ri' ca-
macunic.

15

¹ Ec'u ri'oj ri jiquil kac'u'x chwach
ri Dios, lic chirajawaxic wi quekato'
ri hermanos na lic ta jiquil quic'u'x
chwach ri Dios, ri c'amaja' caquimaj
usuc' chi utz sa' ri caraj ri Dios
chique. Ma na utz taj we xew e
caka'an ri cuc'ul kac'u'x ri'oj yey
na cojoc ta c'u il che ri cajawax
chique rique. ² Chikajujunal ri'oj
e ka'ana ri cuc'ul quic'u'x ri jujun
chic hermanos we wa' e to'bal re ri
quic'aslem chwach ri Dios. ³ Ma ri
Cristo na xu'an tane ri cuc'ul uc'u'x
Rire[☆] Ri xuc'ulumaj e jela' pacha' ri
tz'ibital can chupa Ruch'a'tem ri Dios
echiri' ri Cristo jewa' xubi'ij che ri
Dios:

Ri c'axlaj ch'a'tem xel lo chiquichi' ri
winak chi'ij la, Kakaw,
panuwi' ri'in xtzak wi *Sal. 69:9*
xcha'. ⁴ Ma ronoje ri xtz'ibax
can ojertan chupa Ruch'a'tem ri
Dios, xtz'ibaxic re cojupixabaj y
cunimarisaj kac'u'x, cha' jela' ruc'
unimal kac'u'x cakoy'e'j janipa ri
bi'tisinic xu'an ri Dios chike chupa
Ruch'a'tem. ⁵ Ec'u ri Dios, ri aj
ya'l unimal c'u'xaj y ri cunimarisaj
kac'u'x, chu'ana che alak xa jun

☆ 14:11 Flp. 2:10-11 † 14:14 We c'o junok cubi'ij c'o wa'im "ch'ul", wa' e que'elawi rire cuch'ob
rakan e mac che jun we cutijo. ☆ 15:3 Lc. 22:42

c'u'x alak jela' pacha' ri xuc'ut can ri Kanimajawal Jesucristo. ⁶ Jec'ula', echiri' u'anom chi xa jun c'u'x alak, junam cayac alak uk'ij ri Dios, Rukaw ri Kanimajawal Jesucristo.

Ri Utzilaj Tzij re chinima ronoje

⁷ E uwari'che, hermanos, jela' pacha' ri Cristo xuc'ul alak, jec'ula' c'ulu ib ralak ruc' rutzil c'u'xaj chiwach alak re yacbal uk'ij ri Dios. ⁸ Cambi'ij c'u che alak, e ri Cristo Jesús xolu'ana to'bel ke ri'oj ri kacojom ri retalil re circuncisión* cha' colu'c'utu ri K'ijsak re ri Dios chikawach y ruc' wa' xujiquiba' uwach, lic e cu'ana janipa rubi'tisinic ri Dios u'anom chique ri kati'-kamam ojertan. ⁹ Xc'un nenare' cha' tak ri tinamit na e ta aj judi'ab caquiyac uk'ij ri Dios ruma ri rutzil uc'u'x chique rique, jela' pacha' tz'ibital can chupa Ruch'a'tem ri Dios:

Canyac na c'u k'ij la
y cambixoj ri bi' la

chiquixo'l tak ri tinamit na e ta aj
judi'ab. *2 S. 22:50; Sal. 18:49*

¹⁰ Y je tanchi wa' xubi'ij:

Ralak ri na alak ta aj judi'ab,
lic qui'cota alak junam cuc' rutinamit
ri Dios. *Dt. 32:43*

¹¹ Y jumul chic xubi'ij:

Onoje alak che ruq'uuiyal quiwach tak
ri ticawex
che ruwachulew,
bixoj alak rubi' ri Dios,
yey lic yacbej alak uk'ij Rire. *Sal.*
117:1

¹² Yey jenewa' xubi'ij ri k'alajisanel
Isaías:

Cayactaj na lo ri Jun ralc'o'al can ri
Isaí,†
ri cac'un lok re catakan paquiwi
ruq'uuiyal quiwach
tak ri ticawex che ruwachulew.
Yey rique cacubi' quic'u'x ruc' Rire *Is.*
11:10
xcha'.

¹³ Ri Dios, ri cuya chike cacubi' pan
kac'u'x ruc' Rire, chunojisaj ri anima'
alak che ronoje qui'cotemal y utzil

chomal ruma cubul c'u'x alak ruc'
Rire, cha' jela' lic canimar c'u'x alak
che ri oye'em alak ruma ruchuk'ab ri
Santowilaj Ruxlabixel ri Dios.

Ri Pablo ya'tal che cutzijoj ri Utzilaj Tzij chiquixo'l ri na e ta aj Israel

¹⁴ Alak nu hermanos, ri'in lic weta'am chi utz e lic c'o rutzil c'u'x y na'oj alak y ruma c'u wa' utz capixabaj ib alak chiwach alak. ¹⁵ Na ruc' ta c'u ri', na canxi'ij ta wib quintz'iban pan che alak, ma c'o ri cuaj cancuxtaj che alak. Can'an c'u wa' ruma ri unimal rutzil uc'u'x ri Dios ya'tal chwe ¹⁶ cha' ri'in quinu'ana raj chac ri Kanimajawal Jesucristo chiquixo'l ruq'uuiyal quiwach tak ri ticawex che ruwachulew. Ec'u ri nuchac e cantzijoj ri Utzilaj Tzij re ri Dios chique rique, cha' jela' quebenuya chwach ri Dios pacha' e jun kasa'n lic cuc'ul uc'u'x, 'anom chi chom che ruma ri Santowilaj Ruxlabixel.

¹⁷ Ec'u lic quinquic'ot che ri nuchac can'an chwach ri Dios ruma ruto'bal ri Kanimajawal Jesucristo. ¹⁸ Ma na quinch'a't tane puwi ri can'an ri'in, xew e quinch'a't chwi ri u'anom ri Cristo wuma ri'in; ma ruma ri nutzijom y nu'anom chiquiwach ruq'uuiyal quiwach tak ri ticawex, rique quebu'ana e aj cojol tzij chwach ri Dios. ¹⁹ Yey ruc' nimak tak c'utubal y ruc' nimak tak chac xintzijoj ri Utzilaj Tzij re ri Cristo; y ri nu'anom e ruma ruchuk'ab ri Ruxlabixel ri Dios. Xinjek c'u lo wa' Jerusalem, xinic'ow lo pa tak jujun chic tinamit y xinopon c'a Ilírico. Jec'ula' wuma ri'in xe'ec utzijoxic ri Utzilaj Tzij che ronoje tak wa' wa luwar. ²⁰ Ec'u lic xinya wib che utzijoxic ri Utzilaj Tzij pa tak luwar pa na tzijom ta rubi' ri Cristo, cha' jela' na xi'ntica tubi ri nuchac puwi uchac junok chic, ²¹ jela' pacha' ri tz'ibital can chupa Ruch'a'tem ri Dios:

Ec'u ri ticawex na jinta c'o xtzijox
chique puwi Rire,

* **15:8** "Ri kacojom ri retalil re circuncisión": Wa' e raj judi'ab yey rique e ralc'o'al can ri Israel.

† **15:12** Ri Isaí e ukaw ri rey David, yey ri Jesús e ralc'o'al can ri rey David. 1 S. 16:1; Mt. 1:6

caqueta'maj na china Rire;
yey ri na quitom ta c'ana puwi Rire,
caquimaj na usuc' ri catzijox chique
Is. 52:15
cacha'.

Ri Pablo caraj que'ec Roma

²² E uwari'che, uq'uiyal laj xuaj
qui'nwila alak, pero wa nuchac
inuk'atem; ²³ no'j wo'ora xinq'uis
u'anic wa' chupa tak wa luwar.
Yey uq'uiyal tan junab lic nurayim
qui'nwila alak; ²⁴ ruma c'u ri', lic
nuch'obom chic, echiri' canmaj bi
nube quin'ec España, quinic'ow uc'
alak y jela' ajilam k'ij quinc'oji'
pa qui'cotemal uc' alak. Ec'uchiri'
wilom chi wach alak, utz quinto'
bi alak che ri nubenam c'a España.
²⁵ Pero wo'ora quin'ec Jerusalem
re qui'njacha jun kasa'n to'bal que
ri hermanos e c'o chila'; ²⁶ ma ri
hermanos e aj Macedonia, junam
cuc' ri hermanos e aj Acaya, xquimol
wa kasa'n que tak ri hermanos e
niba'ib e c'o Jerusalem. ²⁷ Ri na e
ta aj judi'ab lic pa canima' xalax wi
xqui'an wa'. Yey c'o ne quic'as caraj
utzelexic cuc' ri hermanos e aj judi'ab
e c'o chila', ma rique e xetzijon ri
Utzilaj Tzij re ri Dios chiquiwach.
Ruma c'u la' lic ube quequito' ruc'
tak ri cajawax chique. ²⁸ We xinutzin
can ruc' wa' y nuya'om chi can wa
kasa'n paquik'ab ri hermanos e c'o
Jerusalem, c'a ec'uchiri' canmaj bi
nube quin'ec España y quinic'ow c'u
uc' alak. ²⁹ Weta'am c'u chi utz, we
xinopon uc' alak, na xa ta jubik' ri
canc'ul ri'in junam uc' alak che ri
rutzil uc'u'x ri Cristo pakawi'.

³⁰ Hermanos, ri Ruxlabixel ri Dios
uya'om ri rutzil uc'u'x chike cha'
c'ax cakana' kib. Cantz'onoj c'u che
alak chupa rubi' ri Kanimajawal Je-
sucristo quinto' alak, e 'ana alak orar
panuwi' chwach ri Dios. ³¹ 'Ana
c'u alak orar cha' na quintzak ta
paquik'ab ri winak e c'o Judea, ri eya-
catajinak chirij ri K'ijsak; y 'ana alak
orar cha' ri hermanos e c'o Jerusalem
caquic'ul chi utz wa kasa'n. ³² 'Ana
co alak orar panuwi' cha' e chirij ri

caraj ri Dios quinopon na uc' alak, y
jec'ula' ruc' qui'cotemal quine'uxlan
chila' uc' alak. ³³ Ec'u ri Dios, ri aj
ya'l utzil chomal, c'ola uc' onoje alak.
Amén.

16

*Ri Pablo cuya pan rutzil quiwach ri
hermanos e c'o Roma*

¹ Cantz'ibaj pan che alak puwi ri
ka hermana Febe, ri e cuq'u'il raj
chaquib e to'bel pa riglesia c'o Cen-
crea; rire uch'obom copon uc' alak.
² Cantz'onoj co che alak, c'ulu alak chi
utz wa hermana pa rubi' ri Kanimaj-
awal Jesucristo jela' pacha' ri takalic
ca'an chiquixo'l ri quicojom rubi' ri
Cristo. To'o co alak ruc' tak janipa
ri cajawax che, ma rire lic e q'ui ri
ebuto'om y lic ne inuto'om ri'in.

³ Ya'a alak rutzil quiwach ri Priscila
y ri Aquila, ri e wachbi'il pa ruchac
ri Kanimajawal Jesucristo. ⁴ Yey
xtewun ne ri camic paquiwi rique
ruma xinquito'o. E uwari'che, na
xew ta ri'in quintioxin pan chique,
ma quetioxin pan conoje riglesias
que ri na e ta aj Israel.

⁵ Ya'a alak rutzil quiwach conoje ri
hermanos ri caquimol quib pa cocho
ri Aquila y ri Priscila.

Ya'a alak rutzil uwach ri Epeneto,
ri lic c'ax canna'o, ma e rire ri nabe
xucox rubi' ri Cristo wara Acaya.

⁶ Ya'a alak rutzil uwach ri María, ri
lic chacuninak chixo'libal alak.

⁷ Ya'a alak rutzil quiwach ri An-
drónico y ri Junias; ri e watz-nuchak'
yey xec'oji' junam wuc' pa cárcel.
Rique lic calok'ox quik'ij chikaxo'l ri
oj utako'n ri Jesús, yey rique xquicoj
rubi' ri Cristo nabe chinuwach ri'in.

⁸ Ya'a alak rutzil uwach ri Amplias,
jun hermano lic c'ax canna' chupa
rubi' ri Kanimajawal.

⁹ Ya'a alak rutzil uwach ri Urbano;
ri e jun kachbi'il pa ruchac ri Cristo.

Ya'a alak rutzil uwach ri Estaquis,
jun hermano lic c'ax canna' ri'in.

¹⁰ Ya'a alak rutzil uwach ri Apeles,
ri lic uc'utum ri cubulibal uc'u'x ruc'
ri Cristo.

Ya'a alak rutzil quiwach conoje ri e c'o pa rocho ri Aristóbulo.

¹¹ Ya'a alak rutzil uwach ri watz-nuchak' Herodión.

Ya'a alak rutzil quiwach conoje ri e c'o pa rocho ri Narciso, ri quicojom rubi' ri Kanimajawal.

¹² Ya'a alak rutzil uwach ri Trifena y ri Trifosa; rique lic quiya'om quib pa ruchac ri Kanimajawal.

Ya'a alak rutzil uwach ri Pérsida, ri lic c'ax cana'ic yey lic chacuninac pa ruchac ri Kanimajawal.

¹³ Ya'a alak rutzil uwach ri Rufo; wa' e jun hermano lic chom rubinic usilabic chwach ri Kanimajawal. Yey ya'a alak rutzil uwach ruchu, ma rire u'anom pacha' nuchu ri'in.

¹⁴ Ya'a alak rutzil quiwach ri Asíncrito, ri Flegonte, ri Hermas, ri Patrobas, ri Hermes y ri jujun chic hermanos e c'o cuc' rique.

¹⁵ Ya'a alak rutzil quiwach ri Filólogo y ri Julia, ri Nereo ruc' ri ranab yey ri Olimpas cuc' conoje rutinamit ri Dios e c'o cuc' rique.

¹⁶ Ya'a rutzil wach alak chiwach alak ruc' jun sakil tz'ubuj chi'aj chwach ri Dios.*

Conoje ri hermanos wara re pa tak riglesias re ri Cristo caquiya pan rutzil wach alak.

¹⁷ Lic c'u cantz'onoj che alak hermanos, e lic cachajij ib alak chiquiwach ri caquijach upa riglesia y caquicoj tzakibal chirij ri sakil c'utunic cha' e c'o jujun chic na caquicoj ta ri c'ulum chi ralak. Chiquij c'u wa', chesaj ib alak; ¹⁸ ma na e ta quitakem ri Cristo, e lic quitakem ri quirayibal rique. Ri quich'a'tem lic chacojo' y lic chom catatajic, pero ruc' wa' quequisoc ri ticawex na jinta co quina'oj.

¹⁹ Lic c'ut eta'matal chi cuma conoje e lic takem alak ri sakil c'utunic, y lic quinquic'ot che alak ruma wa'. Yey ri cuaj che alak e lic c'ola na'oj alak che u'anic ri utz, na che ta u'anic ri na utz taj. ²⁰ Ec'u ri Dios, ri aj ya'l utzil chomal, na

camayin ta che cuyik'ilibej uwi' ri Satanás chuxe' ri akan alak; ma e cuya che alak ri cach'ij alak uchuk'ab ri Satanás. C'ulu c'u alak ri unimal rutzil uc'u'x ri Kanimajawal Jesucristo.

²¹ Cuya pan rutzil wach alak ri Timoteo, ri wachbi'il pa ruchac ri Cristo. Jenela' caquiya pan rutzil wach alak ri e watz-nuchak' Lucio, ri Jasón y ri Sosípater.

²² Yey ri'in in Tercio, ri quintajin che utz'ibaxic wa' wa carta e chirij ri cubi'ij ri Pablo che alak, canya pan rutzil wach alak pa rubi' ri Kanimajawal.

²³ Ri Gayo cuya pan rutzil wach alak; rire inuc'ulum pa rocho y uya'om chique conoje ri hermanos ri e aj wara caquimol quib pa rocho. Jenela' cuya pan rutzil wach alak ri Erasto, ri aj c'olol puak re wa tinamit; jenela' ri hermano Cuarto cuya pan rutzil wach alak.

²⁴ Ri unimal rutzil uc'u'x ri Kanimajawal Jesucristo c'ola uc' onoje alak. Amén.

Ri Pablo cuyac uk'ij ri Dios

²⁵ Kayaca c'u uk'ij ri Dios, ri c'o puk'ab cutiquiba' alak chi utz chupa ri Utzilaj Tzij re ri Kanimajawal Jesucristo, ri nutzijom lok. Wa' e puwi ri na uk'alajisam ta lo ri Dios ojertan, ²⁶ yey ec'u wo'ora xk'alajisax chikawach. Jec'ula' cak'alajin chi utz ri tz'ibital can puwi ri K'ijsak chupa Ruch'a'tem ri Dios cuma ri k'alajisanelab. Ri Dios, ri na jinta utakexic ruc'aslemal, e xtakan che catzijox ri K'ijsak puwi ri Cristo chique conoje ruq'uiyal quiwach tak ri ticawex e c'o che ruwachulew. Xu'an c'u wa' cha' rique caqueta'maj wa K'ijsak, caquicoj utzij Rire y cacubi' quic'u'x ruc'. ²⁷ Xa jun ri Dios c'olic y xew Rire lic c'o una'oj. Che c'u Rire takal wi cakayac uk'ij na jinta utakexic ruma ri xu'an ri Kanimajawal Jesucristo. Amén.

* **16:16** Ri Pablo jewa' xubi'ij ma rique e caqui'an wa' chiquiwach echiri' caquiya rutzil quiwach.

Ri nabe carta xutz'ibaj ri Pablo che riglesia c'o Corinto

Ri Pablo cuya pan rutzil quiwach ri hermanos e c'o pa ri tinamit Corinto

¹ Ri'in in Pablo, insiq'uim ruma ri Dios re quinu'an utako'n ri Kanimajawal Jesucristo, ruma e lic caraj ri' ri Dios chwe. Ri'in junam ruc' ri hermano Sóstenes cakaya pan rutzil wach alak, ² ri alak utinamit ri Dios c'o chila' Corinto. Alak cha'tal ruma ri Dios cha' cac'oji' alak puk'ab ri Kanimajawal Jesucristo; alak c'u siq'uim che jun binic silabic lic chom chwach ri Dios, ma e caraj ri' chike junam cuc' conoje ri caquiloc'nimaj rubi' ri Kanimajawal Jesucristo, tob pa tak chawi e c'o wi. Ma Rire e Kanimajawal ke ri'oj y que rique. ³ C'ulu alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

Ri Pablo catioxin chwach ri Dios

⁴ Ri'in xaki quintioxin che ri Dios uma ralak, ma ruma ri Kanimajawal Jesucristo, ri Dios uya'om lo ri unimal rutzil uc'u'x che alak. ⁵ Yey na xa ta jubik' ri c'ulum alak ruma c'o alak puk'ab ri Cristo; ya'tal c'u ch'a'tem alak y na'oj alak che utzijoxic ri na'oj re ri Dios. ⁶ Xjiquibax c'u uwach ri Utzilaj Tzij puwi ri Cristo ruma ri u'anom ri Dios uc' alak. ⁷ Jec'ula' ronoje ri cajawax che rutinamit ri Dios, ya'tal chi che alak; xew chi c'u lic oye'em alak ruc'unibal ri Kanimajawal Jesucristo. ⁸ Ec'u ri' ri Dios catiquiban e alak chi utz wo'ora y c'a pa ri q'uisbal k'ij, cha' jela' na jinta chi c'ana mac carikitaj che alak chwach ri Dios chupa ruk'ijol ruc'unibal ri Kanimajawal Jesucristo. ⁹ Ri Dios lic jusuc', ma ronoje ri cubi'tisij e cu'ano y e Rire siq'uiyom e alak cha' cu'an alak xa jun ruc' Ruc'ajol, wa' e ri Kanimajawal Jesucristo.

Ri Pablo quebupixabaj ri her- manos ruma quijachom quipa

¹⁰ Campixabaj c'u alak hermanos chupa rubi' ri Kanimajawal Jesucristo: C'ola alak chi utzil chomal y majach pa alak. E ri lic ube e chu'ana xa jun na'oj alak y xa jun c'u'x alak.

¹¹ Cambi'ij wa' che alak hermanos ma xinweta'maj e c'o ri xaki quech'o'jin chixo'libal alak; xinta wa' chiquichi' jujun chique ri e c'o pa rocho ri Cloé. ¹² Nutom e c'o jujun che alak caquibi'ij: «In re ri Pablo.» E c'o jujun chic caquibi'ij: «In re ri Apolos,» jujun chic: «In re ri Pedro» y e c'o ne jujun chic caquibi'ij: «Ri'in in re ri Cristo.» ¹³ ¿Jachom neba upa ri Cristo? ¿E neba ri'in in Pablo ri xcam chwa cruz uma ralak? ¿O pa rubi' neba ri Pablo xc'ul wi alak ri bautismo? Na e taj. ¹⁴ Lic cantioxij che ri Dios ma ri'in xew xinya ri bautismo chique jujun che alak, wa' e ri Crispo y ri Gayo. ¹⁵ Jec'ula' na jinta junok che alak utz cubi'ij: “Ri'in xinc'ul ri bautismo pa rubi' ri Pablo.” ¹⁶ Yey xinya ne bautismo chique ri e c'o chirocho ri Estéfanos. Na cac'un ta chi chinuc'u'x we c'o junok chic. ¹⁷ Cambi'ij c'u wa' ma ri nuchac xuya ri Cristo na e ta ri canya bautismo, e ri cantzijo y ri Utzilaj Tzij. Y rutzijoxic can'ano na e ta ruc' nimak tak ch'a'tem y unimal na'oj xa re ruwachulew. Ma na cuaj taj we ri winak e caquiyac nuk'ij ri'in yey na queboc ta c'u il ri' che ri Utzilaj Tzij puwi ri Cristo y ri xu'an Rire chwa ri cruz.

Ruchuk'ab y runa'oj ri Dios cak'alajin ruma ri Cristo

¹⁸ Rutzijoxic rucamic ri Cristo chwa ri cruz e jun sachibal na'oj chiquiwach ri quesachic. No'j c'u chikawach ri cojcolobetajic, ruc' rucamic Rire e cak'alajin ruchuk'ab ri Dios. ¹⁹ Ma jewa' cubi'ij ri Dios chupa Ruch'a'tem:

Ri'in cansach uwach ri quina'oj ri ticawex caquich'obo lic c'o queta'am,

y canc'utu na jinta que'elawi ri quina'oj ri caquich'obo lic c'o quina'oj *Is. 29:14* cache'.

²⁰ Ri caquibi'ij lic c'o queta'am, ¿sa' cutikoj ri quina'oj? Raj c'utunel re ri tzijpixab, ¿sa' cutikoj ronoje ri quimajom? Yey ri lic caquich'a'tibej uq'uiyal tak na'oj re wak'ij ora, ¿sa' cutikoj ronoje ri caquibi'ij? Na jinta cutikoj, ma ri Dios uk'alajisam chic na jinta que'elawi ri quina'oj ri ticawex re ruwachulew.

²¹ Ri Dios ruma ri unimal una'oj na xuya ta luwar chique ri ticawex caqueta'maj uwach Rire xa ruma ri quina'oj rique. Ri xuc'ul uc'u'x Rire e quebucolobej ri cacubi' quic'u'x ruc' ruma rutzijoxic ri Utzilaj Tzij, tob wa' e jun sachibal na'oj chiquiwach tak ri winak. ²² Ma raj judi'ab caquitz'onoj c'utubal re ruchuk'ab ri Dios, yey raj Grecia e lic que'ec quic'u'x che umajic unimal tak na'oj. ²³ No'j ri'oj e cakatziyoj rucamic ri Cristo chwa ri cruz. Yey wa' e tza-kibal chique raj judi'ab,* y e jun sachibal na'oj chique ri na e ta aj judi'ab.† ²⁴ No'j c'u ri ebusiq'uim ri Dios, tob e aj judi'ab o na e ta aj judi'ab, rique caquimaj usuc' e ruma ri Cristo cak'alajin ruchuk'ab y runimal una'oj ri Dios. ²⁵ Tob e c'o ticawex caquich'obo ri Dios pacha' na jinta una'oj o na jinta uchuk'ab; na ruc' ta c'u ri', ri quina'oj y ri quichuk'ab rique, na cajunimax ta q'uenok ruc' runa'oj y ruchuk'ab ri Dios.

²⁶ Lic c'u ch'obo pe rakan alak hermanos puwi sa' ri wach alak echiri' xsiq'uix alak ruma ri Dios; ma chiquiwach ri winak, na e ta q'ui ri lic c'o quina'oj chixo'l alak, yey na e ta q'ui ri lic c'o quichuk'ab y ri lic c'o quiwach chixo'l alak. ²⁷ Ma ri Dios ebucha'om ri cabi'x chique na jinta co quina'oj, cha' e cuya quiq'uix ri caqui'an che quib lic c'o quina'oj. Ebucha'om ri lic na jinta co quichuk'ab cha' e cuya quiq'uix

ri e takanelab c'o quichuk'ab. ²⁸ Yey ebucha'om ri cabi'x chique lic na jinta co quichac, ri lic c'akom bi quik'ij cuma ri winak y ri na jinta c'ana quiwach cha' e cusach uwach ri quichuk'ab ri lic c'o quiwach. ²⁹ Ri Dios u'anom wa' cha' na jinta junok cu'an nim che rib chwach Rire. ³⁰ Yey ruma c'u Rire c'o alak puk'ab ri Kanimajawal Jesucristo, ri cak'alajisan ri K'ijsak re ri Dios chike. Ruma c'u ri Kanimajawal, 'anom jusuc' chike chwach ri Dios, oj ya'tal chupa ri santowilaj binic, y oj esam chi puk'ab ritzel. ³¹ E uwari'che e pacha' ri tz'ibital can chupa Ruch'a'tem ri Dios:

China ri caraj cuyac uk'ij,
e chuk'alajisaj ri' janipa ri u'anom ri
Kanimajawal Dios che rubinic
usilabic. *Jer. 9:23-24*

2

¹ Hermanos, ri'in echiri' xinopon uc' alak cha' cantziyoj ri Utzilaj Tzij re ri Dios, na xintziyoj ta wa' ruc' nimak tak ch'a'tem y unimal na'oj xa re ruwachulew. ² Ri xinch'obo e xew cantakej utzijoxic ri Kanimajawal Jesucristo y rucamic Rire chwa ri cruz. ³ Y echiri' xinc'oji' uc' alak, xinna'o na jinta nuchuk'ab chiwibil wib, yey xinjek ne quinbirbot ruma ri nuxi'in ib ma xinna'o na canrik ta u'anic janipa ri caraj ri Dios chwe. ⁴ Ec'u rutzijoxic xin'ano na e ta ruc' unimal na'oj xa re ruwachulew y chomilaj tak ch'a'tem casocoso'nic, ma e ruc' ri Ruxlabixel ri Dios y ruchuk'ab Rire ⁵ cha' na cacubi' ta c'u'x alak ruc' ri Cristo xa ruma unimal na'oj re ruwachulew, ma e ruma ruchuk'ab ri Dios.

Ri Ruxlabixel ri Dios cuk'alajisaj Runa'oj ri Dios chike

⁶ No'j echiri' oj c'o chiquixo'l ri lic quijquibam quic'u'x ruc' ri Dios, ri cakatziyoj caka'an ruc' unimal na'oj. Na e ta ruc' unimal na'oj xa re ruwachulew, na e tane ruc' na'oj que ri nimak tak takanelab che

* **1:23** E chiquiwach raj judi'ab, Rutako'n lo ri Dios na cacamisax taj. † **1:23** Hch. 17:32

ruwachulew, ri xa casach quiwach.
 7 Ma ri cakak'alajisaj e ri unimal
 na'oj re ri Dios, yey wa' na eta'matal
 ta rojertan.* Echiri' c'amaja' ne
 ca'an ruwachulew, Rire uch'obom
 chi ulok cuya wa na'oj chike re yacbal
 kak'ij. 8 Wa' wa na'oj re ri Dios na
 xquimaj ta usuc' ri nimak takanelab
 re ruwachulew. Ma ta e la' xquimaj
 usuc', na caquiya tane ri' chwa ri
 cruz ri Kajawal, ri lic nim uk'ij. 9 E
 jela' pacha' ri tz'ibital can chupa
 Ruch'a'tem ri Dios:

E tak ri winak na caquimaj ta usuc'
 ronoje ri utz ujiquibam uwach ri
 Dios
 chique ri lic c'ax quena'w re Rire.

E tak wa' wa utz lic na jinta junok
 iliyom re,
 na jinta junok tayom re
 y na jinta ne junok no'jiyom wa'
Is. 64:4

cacha'. 10 Yey ri Dios uk'alajisam chi
 wa' chike ri'oj ruma ri Ruxlabixel.
 Ma ri Ruxlabixel Rire ronoje reta'am,
 cumaj ne usuc' ri sakil una'oj ri Dios.
 11 Chiquixo'l tak ri winak, ¿c'o nawi
 junok reta'am sa' ri cuch'ob juna chic
 ticawex? Na jintaj. Ma xew wa
 ticawex reta'am sa' ri c'o pa ran-
 ima'. Jec'ula' na jinta junok reta'am
 runa'oj ri Dios, ma xew ri Ruxlabixel
 ri Dios eta'mayom re wa'. 12 Yey
 wo'ora, ri kana'oj ri'oj na junam ta
 ruc' ri quina'oj ri na queta'am ta
 uwach ri Dios. Ma ri'oj e kac'ulum
 ri Ruxlabixel ri Dios cha' caketa'maj
 ronoje ri chomilaj sipanic uya'om
 Rire chike. 13 Yey wa' wa cakat-
 z-ijoj, na e ta ruc' ch'a'tem kama-
 jom chiquij ri ticawex, ma e ruc' ri
 uc'utum ri Ruxlabixel ri Dios chike.
 Y jec'ula' e cakak'alajisaj runa'oj ri
 Dios ruc' ch'a'tem re ri Ruxlabixel ri
 Dios. 14 Ec'u rachi na jinta ri Dios
 pa ranima', na cuc'ul ta uc'u'x ri
 cubi'ij ri Ruxlabixel ri Dios che, ma
 chwach rire wa' xa sachibal na'oj;
 yey na cumaj ta usuc', ma wa' xew
 camajtaj usuc' we cak'alajisax ruma
 ri Ruxlabixel ri Dios. 15 No'j we ri

Ruxlabixel ri Dios catakan pa ran-
 ima' junok, ri' cumaj usuc' sa' ri utz
 chwach ri Dios, y na cak'at ta c'u tzij
 puwi'. 16 Ruch'a'tem ri Dios jenewa'
 cubi'ij:

¿C'o nawi junok majayom usuc'
 ronoje runa'oj ri Dios Ka-
 jawxel?

¿C'o nawi junok caya'w una'oj Rire?
 ¡Na jintaj! *Is. 40:13*

cacha'. Pero chike ri'oj ya'tal runa'oj
 ri Cristo.

3

Konoje kachbi'il kib chupa ruchac ri Dios

1 Hermanos, echiri' xinc'o'ji' uc'
 alak, na xinch'a't ta uc' alak jela'
 pacha' quinch'a't cuc' ticawex
 catakan ri Ruxlabixel ri Dios pa
 canima'; ma e xinch'a't uc' alak jela'
 pacha' quinch'a't cuc' ticawex c'a
 caquitakej tak ri rayibal re ri quiti'jil,
 ri c'amaja' c'o quiq'uiyibal chwach
 ri Cristo. 2 Jela' pacha' ca'an che
 juna ralco ac'a, na caya' ta wa che
 ma xew cutij utz'um; jec'ula' xin'an
 ri'in, xinya c'utunic lic na c'ayew
 taj che alak, ma c'amaja' carik alak
 uc'ulic ri c'utunic takal chique ri c'o
 chi quiq'uiyibal chwach ri Dios. Yey
 c'amaja' ne carik alak umajic usuc'
 wa', 3 ma c'a takem alak tak ri rayibal
 re ri ti'jil alak. Ma chixo'l alak e
 c'o ri c'ax quic'u'x chiquij jujun chic
 y e c'o ri e aj ch'a'oj. ¿Na junam
 ta neba ri binic silabic alak ruc' ri
 quibinic tak ri winak na queta'am
 ta uwach ri Kakaw y e caquitakej ri
 xa re ruwachulew? 4 Ma chixo'l alak
 e c'o ri caquibi'ij: «In re ri Pablo» yey
 jujun chic caquibi'ij: «In re ri Apolos.»

5 Cantz'onoj c'u che alak: ¿Sa'
 ruwach ri Pablo? ¿Y sa' ruwach ri
 Apolos? Ri'oj oj nimanal chwach ri
 Dios yey ruma ri chac xka'an uc' alak,
 xcoj alak rubi' ri Cristo. Ri'in y ri
 Apolos xa e xka'an ri chac uya'om ri
 Kanimajawal chike. 6 E ri'in xintzijoj
 ri Utzilaj Tzij che alak pacha' cu'an
 juna awanel; y ri Apolos xuto' alak

* 2:7 Col. 2:2-3

cha' catiqui' alak chi utz chwach ri Dios pacha' cu'an juna aj tico'n echiri' cu'an ja'anic. Pero ri q'uiyibal alak, e ri Dios xya'wic. ⁷ ¿China c'u ri' ri más c'o uwach? ¿E nawi ri xticow re? ¿E nawi ri xja'an re? Na e taj, ma e ri Dios, ri caq'uiyisan re. ⁸ Ri caticow re y ri caja'an re, xa jun quiwach; yey chiquijujunal caquic'ul ri rajil uc'axel e chirij ri chac xqui'ano. ⁹ Ec'u ri' ri'oj xa oj umocom ri Dios yey ralak e pacha' alak rulew cachacux uwach ruma ri Dios.

Jenela' ralak e pacha' alak juna ja catajin ri Dios che uyaquic. ¹⁰ Yey Rire e xya'w panuk'ab xinjek ruchac chixo'libal alak. E pacha' juna aj yacal ja, nabe cutz'ak ruparakan ri ja; tec'uchiri' jun chic aj chac culem ri xan puwi'. Jec'ula' ri'in nabe xintic riglesia; tec'uchiri' c'o jun chic xuto' alak cha' caq'uiy alak chwach ri Dios. Ri chirajawaxic wi e chiquijujunal raj chac caquilo su'anic quechacunic cha' quel chi utz ri chac. ¹¹ Ma na utz ta q'uenok we c'o junok cucoj jun chic uparakan ri ja junwi chwa ri cojotal chic; yey ruparakan ri ja cojotal chic, e ri Kanimajawal Jesucristo.

¹² Puwi ruparakan juna ja c'o ri cuchapabej oro, plata o chomilaj abaj; y c'o ri cuchapabej tz'alam, xlab o q'uim. ¹³ Che tak wa' wa cachapabexic c'o ri cacowin chupa ri ak' y c'o ri na cacowin taj; jec'ula' ri chac u'anom junok publi' ri Cristo, ma pa ri k'ij re ri k'atbal tzij, ri Dios cuk'alajisaj we utz ri chac u'anom o na utz taj. ¹⁴ We ri chac u'anom c'o ucowil, cuc'ul c'u ri' ri rajil uc'axel cuya ri Dios; ¹⁵ no'j we na jinta ucowil, ri' na jinta rajil uc'axel cuc'ulu. Casach c'u uwach ri' ruchac, tob rire c'a cacolobetajic, e pacha' junok cucolobej rib echiri' cac'at ri rocho.

¹⁶ ¿Na eta'am ta neba ralak, alak rocho ri Dios yey e ri Ruxlabixel ri Dios ri jekel uc' alak? ¹⁷ E uwari'che

we c'o junok cusach uwach ri rocho ri Dios,* ri Dios cusach uwach ri ca'anaw wa'. Ma ri rocho ri Dios e santo; yey wa' e ralak. ¹⁸ Mac'o musoc rib chiribil rib. Ma we c'o junok cuch'obo lic reta'am chi ronoje che ruwachulew, chirajawaxic ri' chu'ana che rib pacha' junok na jinta c'ana reta'am, cha' e careta'maj runa'oj ri Dios. Jec'ula' cu'ana lic c'o una'oj pakatzij wi. ¹⁹ Ma runimal na'oj re ruwachulew na jinta c'ana uwach chwach ri Dios. E pacha' ri tz'ibital can chupa Ruch'a'tem ri Dios:

E tak ri c'o quina'oj re socoso'nic, ri Dios cu'an chique quetzak chupa ri quino'jibal. *Job 5:13*

²⁰ Yey je tanchi wa' tz'ibital canok:

Ri Dios reta'am na jinta uchac ri quina'oj ri caquich'obo lic queta'am chi ronoje *Sal. 94:11* cacha'. ²¹ E uwari'che lic na utz ta q'uenok we c'o junok cu'an nim che rib xa ruma e utakem juna achi. Ma e ri Dios ya'yom ronoje che alak. ²² Uya'om che alak re to'bel e alak, ri Apolos y ri Pedro yey inuya'om ne ri'in. Uya'om ne che alak ruwachulew, ri c'aslemal, ri camic, janipa ri catajin wak'ij ora y ri catajin lok. Ronoje c'u ri' ri ya'tal che alak, ruc' ri Dios petinak wi. ²³ Ec'u ralak, alak re ri Cristo; yey ri Cristo, re ri Dios.

4

Mojoc il che ri caquich'ob ri winak chikij

¹ Lic chirajawaxic wi conoje ri ticawex caqueta'maj e ri'oj xa oj to'bel pa ruchac ri Cristo, y ya'tal c'u chike cakac'ut sa' ri caraj cuk'alajisaj ri Dios chique ri ticawex. ² Jela' pacha' lic chirajawaxic che juna aj chac lic cuchapabej chi utz ri ya'om puk'ab ruma ri rajaw; jec'ula' ri' chirajawaxic caka'an ri'oj ruc' ri ya'tal pakak'ab ruma ri Kajawal. ³ Ec'u ri'in na quinoc ta il che tak ri

* **3:17** "Cusach uwach ri rocho ri Dios": Wa' e que'elawi echiri' junok cusach uwach ruchac ri Dios chiquixo'l rutinamit.

cabi'ij alak che ri chac nu'anom, we utz o na utz taj. Na quinoc tane il che tak ri caquibi'ij ri ticawex che wa'. Yey na ube tane chwe ri'in cambi'ij we utz ri chac nu'anom. ⁴ Ma canna' chinuc'u'x e quintajin che u'anic ri caraj ri Kanimajawal; na ruc' ta c'u ri', xew che Rire takal wi cubi'ij we utz o na utz ta ri chac nu'anom. ⁵ E uwari'che mak'at tzij alak paquiwi ri raj chac ri Dios, we c'o cutikoj o na jinta cutikoj ri chac qui'anom; e choye'ej alak ruc'unibal ri Kanimajawal Jesucristo, ma echiri' cac'un Rire, cuk'alajisaj ronoje ri c'amaja' queta'maxic. C'a ec'uchiri' cak'alajinic sa' ri c'o pa canima' ri ticawex. Y chiquijujunal c'ut caquic'ul che ri Dios ri yacbal quik'ij e chirij ri qui'anom.

⁶ Hermanos, ruc' ri c'ambal na'oj nuya'om lo chwi ri Apolos y panuwi ri'in, xuaj campixabaj alak cha' camaj alak uyaquic quik'ij ri ticawex xew e chirij ri tz'ibital can chupa Rutzij Upixab ri Dios puwi ri ya'tal che alak ca'an alak. Ma we jela' ca'an alak, na jinta c'o ri cu'an nim che rib ruma utakem junok yey e cuc'ak bi quik'ij ri nic'aj chic. ⁷ We c'o junok u'anom nim che rib chixo'libal alak, cantz'onoj che: «¿Su'chac cach'ob la e lic c'o wach la chiquiwa ri nic'aj chic? ¿C'o nawi majom la xa tuquel la? Jintaj, ma janipa ri c'o uc' la y ri majom la, e ri Dios ya'yom che'la. Y we xa ya'tal che'la, ¿su'chac c'u ri' catac'aba' k'ij la?»

⁸ Ralak cana' alak pacha' na jinta chi c'o cajawax che alak. E cana' ralak alak chi beyom y alak chi nimak takanelab; yey na cajawax ta chi ne ri to'bal ke'oj che alak. Lic chom c'ut we ta pa sakil wi 'anom chi takanelab che alak ruma ri Dios cha' junam cojtakan uc' alak.

⁹ No'j chinuwach ri'in, ri oj utako'n ri Jesús na jinta co kawach. Ma ri Dios oj ucojom oj q'uisbal chique ri ticawex. E pacha' oj c'o chuxe' k'atbal tzij re camic y cojc'am bi

re cojcamisaxic, yey conoje xa cojquitzutza' chic, tob ticawex, tob ne ángeles. ¹⁰ E ri'oj ruma katakem ri Cristo cabi'x chike sachinak kana'oj; no'j ralak cach'ob alak rakan lic c'o na'oj alak chiquiwa ri jujun chic quicojom rubi' ri Cristo. E ri'oj e pacha' lic na jinta kachuk'ab, no'j ralak lic c'o chuk'ab alak. E ralak lic yacom k'ij alak, no'j ri'oj lic c'akom bi kak'ij. ¹¹ Ec'u la' lic katijom lo numic y tzajin chi', lic ne na jinta kak'u'. Cojch'ayic y na jinta kocho pa cojc'o'ji' wi. ¹² Lic ne cojcosic ma cojchacun ruc' ri kak'ab. ^{*} E tak ri winak cojquiyajo, no'j ri'oj cakatz'onoj ri utz paquiwi'. Echiri' cojternabex ruc' c'axc'obic, ri'oj lic cakacuyu. ¹³ Echiri' tzel cojquich'a'tibej, cakac'ul uwach ruc' chomilaj ch'a'tem. C'a chupa ne wak'ij ora e pacha' chi oj ak'es na jinta uchac che ruwachulew ma lic c'akom bi kak'ij cuma ri winak.

¹⁴ Cantz'ibaj c'u ronoje wa' na e ta re canya q'uix alak; xa e re campixabaj alak ma pacha' alak walc'o'al lic c'ax canna' alak. ¹⁵ Ma tob lic e q'ui ri quec'utun chiwach alak chwi ri Cristo, na ruc' ta c'u ri', ri kaw alak na e ta q'ui, xew ri'in, ma in ri nabe xintzijo'j ri Utzilaj Tzij che alak yey ruma c'u la', xcoj alak rubi' ri Cristo y xu'ana alak ralc'o'al ri Dios. ¹⁶ Ruma c'u wa', cambi'ij che alak: 'Ana e alak ri nu'anom ri'in ruc' ri nubinic nusilabic chwach ri Dios. ¹⁷ E uwari'che nutakom bi uc' alak ri Timoteo, ri lic c'ax canna'o ma e pacha' nuc'ajol chupa rubi' ri Cristo. Rire lic cu'an chi utz ri takom che ruma ri Kanimajawal. Echiri' copon uc' alak, cu'tzijo'j tanchi che alak ri nubinic nusilabic ri'in ruc' ri Cristo, ma jela' nuc'utum pa tak chawi in ic'owinak wi y pa tak riglesias.

¹⁸ E c'o jujun chixo'libal alak lic qui'anom nim che quib, ma e chiquiwa rique na quinopon ta chi ri'in uc' alak. ¹⁹ Pero na quinmayin ta che quinopon uc' alak we e caraj

^{*} 4:6 1 Co. 3:19-23 ^{*} 4:12 Hch. 18:3

ri' ri Dios. Yey echiri' quinoponic, quebe'nuwila na c'u ri qui'anom nim che quib, we pakatzij wi caquirik u'anic janipa ri quibi'im. ²⁰ Ma na xa ta ruc' ch'a'tem cak'alajin wi we junok pakatzij wi c'o chupa rutakanic ri Dios, ma e cak'alajin ruc' ruchuk'ab ri Dios che rubinic usilabic. ²¹ Cantz'onoj c'ut: ¿Sa' ri más utz? ¿Quinopon uc' alak cha' qui'n'ana juna k'ilonic lic c'ax o e canc'ut ri rutzil nuc'u'x y ri ch'u'ch'uj nuc'u'x chiwach alak? Pak'ab alak c'o wi.

5

Ri Pablo cuch'a'bej quipa riglesia ruma ri mac re jun hermano

¹ Eta'matal chi c'ut c'o jun chixo'libal alak xu'an rixokil che ruca'm uchu. Yey wa catajin che u'anic lic na e ta q'uenok, ma wa' na quilital tane chiquixo'libal ri na queta'am ta uwach ri Dios. ² Y na ruc' ta c'u ri!, ¡ralak lic 'anom nim che ib alak! ¿Su'be na xbisoj ta alak wa' wa mac? Ma ri xraj e ta xesaj bi alak chiquixo'libal rutinamit ri Dios ri ca'anaw wa'.

³ Ri'in nuk'atom chi tzij puwi ri x'anaw re wa' wa mac. Y tob ne na in jinta uc' alak chiwachil, e cuna' nuc'u'x ri'in pacha' in c'o uc' alak. ⁴ Cambi'ij c'u che alak, molo ib alak chupa rubi' ri Cristo ruc' ruchuk'ab Rire; yey mic'ow chic'u'x alak, ri'in e pacha' in c'o chixo'libal alak tob na in jintaj. ⁵ Ec'u ri ca'an alak e caya alak wa aj mac puk'ab ri Satanás* cha' jela' casach uwach ri rayibal re ruti'jil y jela' cacolobetaj chupa ruk'ijol ruc'unibal ri Kanimajawal.

⁶ Lic na utz taj catac'aba' k'ij alak ma c'o mac chixo'libal alak. ¿Na eta'am ta neba alak e jubik' levadura cusipowirisaj upa ronoje ri k'or? Wa' e que'elok, we c'o mac chixo'l alak yey we na quesax taj, ri jujun chic quepachab ruc'. ⁷ Ri pam re ri nimak'ij Pascua, wa' 'anom ruc' c'ac' k'or na jinta levadura che; jec'uri'la'

ralak, chesaj ib alak chupa ri na utz taj re ri k'e'l binic silabic alak cha' cu'an alak jun sakil tinamit re ri Dios. Yey ralak alak chi sakil utinamit ri Dios, ma ri Cristo ya xcam pakac'axel ri'oj jela' pacha' ri bexex re Pascua, ri xcamisaxic echiri' ri Dios xebucolobej rutinamit Israel.* ⁸ Ec'u wo'ora ruma ri xu'an ri Cristo, ka'ana jun sakil nimak'ij chwach ri Dios ruc' ri kabinic kasilabic, cha' jela' oj pacha' ri pam re Pascua na jinta levadura che, ruma kaya'om can ri na utz taj, wa' e ri ch'ulilaj mac xojc'oji' wi ojertan, y pa sakil wi chojc'ola chupa ri K'ijesak.

⁹ Chupa ri jun nucarta nutakom bi, ximbi'ij pan che alak machbilaj alak ri caquetz'abej uwa quik'ij cuc' jujun chic na quic'ulel taj. ¹⁰ Wa ximbi'ij na e ta que'elok xa jumul quesaj ib alak cuc' conoje raj maquib, ri na quicojom ta rubi' ri Cristo. Wa' e ri caquiyoj quib cuc' jujun chic, ri lic e rayinel, ri e elek'omab y ri e aj tioxab. Ma we c'o junok caraj caresaj rib chiquixo'l conoje raj maquib, ¿su'anic c'u ri' cac'oji' wara che ruwachulew? ¹¹ Ruc' ri xintz'ibaj xuaj ximbi'ij y e cambi'ij wo'ora: Machbilaj alak junok cubi'ij ralc'o'al ri Dios yey caretz'abej uwa uk'ij ruc' jun chic na uc'ulel taj, o junok aj rayinel, aj tiox, aj ch'aminel, k'aba'rel o elek'om. Cuc' wa' wa ticawex jela' quibinic quisilabic, tob ne xa wa'im ma'an alak cuc'. ¹² Ma pak'ab ralak c'o wi cak'at alak tzij paquiwi ri hermanos re ri iglesia alak. Pero ¿c'o nawi panuk'ab ri'in o pak'ab ralak ri cak'at tzij paquiwi ri na quicojom ta rubi' ri Cristo? Na jintaj, ¹³ ma e ri Dios ri cak'ataw tzij paquiwi rique. Ec'u la' la jun aj mac c'o piglesia, chesaj bi chixo'libal alak.

6

Chirajawaxic e ralak ri cayijban alak ri ch'a'oj chixo'libal alak

* **5:5** “Caya alak wa aj mac puk'ab ri Satanás”: Ri xraj ri Pablo e ri xmacunic cuna' chuc'u'x ri mac xu'ano, cac'un c'u sak chwach y cutzelej utzij. 1 Jn. 5:19 ✧ **5:7** Éx. 12; 1 P. 1:18-19

¹ Hermanos, echiri' c'o junok che alak cucoj umac juna chic hermano, ¿su'be cu'ya'a wa' chwa juna aj k'atal tzij na bare ta cuq'u'il rutinamit ri Dios? Ma ri lic ube e cayijba' alak wa' chiquiwach rutinamit ri Dios. ² ¿Na eta'am ta neba alak copon jun k'ij rutinamit ri Dios caquik'at ne tzij paquiwi ri e c'o che ruwachulew? We copon c'u wa' wa k'ij echiri' cak'at alak tzij paquiwi ri e c'o che ruwachulew, ¿na jinta cami pak'ab alak ri' cak'at alak tzij puwi ri lic na il ta uwach c'o wo'ora? ³ ¿Na eta'am ta neba alak copon jun k'ij echiri' ri oj ralc'o'al ri Dios cakak'at ne tzij paquiwi ri ángeles na e ta jusuc'? We ec'u ri', lic takal che alak carik alak uyijbaxic wo'ora ri ch'a'oj cawinakir chixo'libal alak wara che ruwachulew. ⁴ We c'o c'u ch'a'oj chiwach alak puwi ri xa re ruwachulew, ¿su'be que'ec alak chiquiwach e aj k'atal tzij na jinta c'ana que che rutinamit ri Cristo? ⁵ Cambi'ij c'u wa' cha' caq'uix c'ana alak che. Hermanos, ¿na jinta cami junok che alak c'o una'oj cha' cuyijba' ri ch'a'oj cawinakir chixo'libal alak? ⁶ ¿Utz neba la' we c'o ch'a'oj chiquixo'l ri hermanos yey caquic'am c'u bi wa' chwa juna aj k'atal tzij na reta'am ta uwach ri Dios? ¡Na utz taj!

⁷ C'o ch'a'oj chiwach ralak y wa' e c'utubal re lic na utz ta 'anom alak. Ma ri lic ube e cacuy alak ri na usuc' taj ca'an chi'ij alak tob ne ca'an elek' che alak ruc' socoso'nic. ⁸ No'j ralak e ca'an alak ri na ube taj y ca'an ne alak elek' ruc' socoso'nic, ¡yey wa' chique ri jujun chic hermanos ca'an wi' alak! ⁹ ¿Na eta'am ta neba alak hermanos, e ri na jusuc' ta ri quibinic quisilabic na jinta que cuc' ri queboc chupa rutakanic ri Dios? Lic masocotaj alak; ma e janipa ri caquetz'abej uwa quik'ij cuc' jujun chic na quic'ulel taj, ri e aj tioxab, ri quemacun chirij ri c'ulaniquil, rachijab caqui'an che quib pacha' e ixokib, rachijab caqui'an quic'ulel chique cach achijab, ¹⁰ ri elek'omab,

ri lic que'ec quic'u'x ruc' ri puak, ri caquiya quib che k'abarc, ri e ch'aminel, ri c'o caquimaj chique jujun chic ruc' socoso'nic; conoje tak c'u wa' na jinta que cuc' ri queboc chupa rutakanic ri Dios. ¹¹ E c'o c'u jujun che alak rojertan e c'o chupa tak wa' wa mac. No'j wo'ora ch'ajtal chi alak che ri mac, ya'tal chi alak puk'ab ri Dios cha' cabin alak jusuc' chwach, yey u'anom c'u che alak na jinta chi mac alak chwach ri Dios. Y ronoje wa' e ruma cojom alak rubi' ri Kanimajawal Jesucristo y ruma ri u'anom ri Ruxlabixel ri ka Dios pa anima' alak.

Kayaca uk'ij ri Dios ruc' ri kacuerpo

¹² E c'o ri quebi'n re: «Panuk'ab c'o wi can'an sa' ri cuaj can'ano» quecha'. Katzij, pero na ronoje ta c'ut takal chwe can'ano. «Panuk'ab c'o wi can'an sa' ri cuaj can'ano» quecha'. Na ruc' ta c'u ri', na canya ta luwar che ri rayinic re ri nucuerpo catakan panuwi'. ¹³ E c'o jujun chic caquibi'ij: «Ri cakatijo e uwach re ri kapa yey ri kapa e uwach cuc'ul ri cakatijo» quecha'. No'j c'o jun k'ij echiri' ucabichal wa' casach uwach ruma ri Dios. Ec'u ri kacuerpo na re ta caketz'abej uwa uk'ij ruc' ch'ulilaj mac, ma ri kacuerpo e re ri Kanimajawal y puk'ab ri Kanimajawal c'o wi. ¹⁴ Chwach c'u ri' ri Dios, lic c'o uwach ri kacuerpo. Ma jela' pacha' xu'an ri Dios che ri Kanimajawal echiri' xuc'astajisaj lo chiquixo'l ri ecaminak ruc' ruchuk'ab, jec'ula' cu'an chike ri'oj chikawach apanok. ¹⁵ ¿Na eta'am ta cami alak ri', ri cuerpo alak xa jun u'anom ruc' rucuerpo ri Kanimajawal Jesucristo? ¿Utz nawi we ri'in in re ri Cristo yey canwesaj bi wib puk'ab Rire y canyoj c'u wib ruc' juna ixok xaki camacun cuc' achijab? ¡Lic na utz ta ri'! ¹⁶ ¿O na eta'am ta cami alak echiri' juna achi cuyoj rib ruc' juna ixok xaki camacun cuc' achijab, wa' cu'ana xa jun ruc'? Ma jewa' tz'ibital can chupa ri Tzij Pixab

re ri Dios: Rachi y rixok echiri' caqui-junimaj quib, «quicabichal quebu'ana xa e jun chwach ri Dios»[☆] cacha'.¹⁷ Jec'ula' we c'o juna ticawex cuya rib puk'ab ri Kanimajawal, cu'an xa jun uc'u'x ruc'.

¹⁸ Cambi'ij c'u wa' che alak: Lic chajij ib alak cha' na catzak ta alak pa ri mac cu'an jun echiri' caretz'abej uwa uk'ij ruc' jun chic na uc'ulel taj. Ma ri jujun chic mac na caretzelaj ta ri cuerpo pacha' wa jun mac, yey we jun cu'an wa', ri' chirij rucuerpo camacun wi.¹⁹ ¿Na eta'am ta neba alak, ri cuerpo alak e rocho ri Ruxlabixel ri Dios? Ma ri Dios uya'om ri Santowilaj Ruxlabixel che alak cha' cajeki' pa anima' alak. Y ruma c'u la', na alak ta chi rajaw ri c'aslemal alak.²⁰ Alak chi re ri Dios, ma Rire xulok' alak ruc' rucamic ri Kanimajawal.[☆] Ec'u uwari'che, yaca alak uk'ij ri Dios ruc' ri cuerpo alak y ruc' ronoje anima' alak, ma ucabichal wa', re ri Dios.

7

Pixabanic puwi ri c'ulaniquil

¹ Ec'u wo'ora canc'ul pana uwach tak ri tz'onobal x'an lo alak chwi ri c'ulaniquil pa ri carta xtak lo alak chwe. We juna achi cac'oji' utuquel y na junta ixok ruc', utz ri cu'ano.² Pero ruma c'u ri tzakibal pa mac re rurayibal ri cuerpo, más utz c'u ri' we rachi c'o rixokil y rixok c'o rachijil.³ Chirajawaxic c'ut e rachi chu'ana janipa ri takal che cu'an ruc' ri rixokil ruma e c'ulanic; jec'ula' rixok chu'ana janipa ri takal che cu'an ruc' ri rachijil.⁴ Rixok na e ta rajaw rucuerpo ma rucuerpo puk'ab ri rachijil c'o wi; jec'ula' rachi na e ta rajaw rucuerpo ma wa' puk'ab ri rixokil c'o wi.⁵ Maxu'yaj c'u ib alak ri' chiwach alak ruc' ri rayibal alak, xew we ch'a'tibem chi alak cha' na cajunimaj ta ib alak queb oxib k'ij ruma caya ib alak pa oración. Ec'uchiri' caqui' ruk'ijol ri oración, junimaj tanchi ib alak. Ma we lic naj na cajunimaj ta ib alak, laj cac'am pa alak

ruma ri Satanás y na cach'ij ta c'u alak uchuk'ab.⁶ Cambi'ij c'u wa' xa pacha' nupixabanic ri'in che alak; na e ta jun takanic.⁷ Ec'u ri canch'ob rakan ri'in e lic utz ri' we ta conoje rachijab quec'oji'ic jela' pacha' nu'anom ri'in. Na ruc' ta c'u ri', puk'ab ri Dios c'o wi sa' rusipanic cuya chiquijujunal. Ma chique jujun uya'om cachbi'il, yey chique jujun chic uya'om quec'oji' quituquel.

⁸ Cuaj cambi'ij chique ri achijab na e ta c'ulanic y rixokib e malca'nib, e lic utz we rique quecanajic e la' quituquel pacha' ri nu'anom ri'in.⁹ No'j we rique na caquich'ij taj e c'o quituquel, más utz we quec'uli'ic, ma na utz taj we e caquiya quina'oj puwi ri quirayibal y jec'ula' caqui'uis quib.

¹⁰ Chique c'u ri e c'ulanic, cambi'ij wa': Na utz taj we rixok kujach can ri rachijil. Y wa jun takanic na xa ta nuch'a'tem ri'in, wa' re ri Kanimajawal.¹¹ Pero we rixok kujach can ri rachijil, na utz taj we cac'uli' ruc' jun chic. Ri chu'ana' e canaja na can utuquel o tzeleja tanchi ruc' ri rachijil y c'ola chi utzil chomal. Yey jela' rachi, e mujach can ri rixokil.

¹² Chique ri nic'aj chic cambi'ij, tob wa' xa in quimbi'n re, na e ta utakanic ri Kanimajawal: We juna hermano c'o rixokil na ucojom ta rubi' ri Cristo, yey wa' wi'xok caraj cac'oji' ruc', na utz ta c'u ri' we ri hermano kujach canok.¹³ Yey jela' ruc' ri hermana c'o rachijil na ucojom ta rubi' ri Cristo, we wa' wa'chi caraj cac'oji' ruc', na utz ta c'u ri' we ri hermana kujach canok.¹⁴ Ma we e la' juna ixok ucojom rubi' ri Cristo yey ec'u ri rachijil c'amaja' cucojo, ruk'ab ri Dios cac'oji' puwi wa'chi ruma ri rixokil. Ma we na e ta u'anom ri', ruk'ab ri Dios na cac'oji' ta paquiwi ri ralc'o'al. Pero na e ta u'anom, ma ruk'ab ri Dios c'o paquiwi'.

¹⁵ Yey we e la' juna achi o juna ixok na ucojom ta rubi' ri Cristo y caraj kujach can ri rachbi'il ucojom rubi' ri

☆ 6:16 Gn. 2:24 ☆ 6:20 Ef. 1:7

Cristo, quijacha na c'u quib. Ma che ri ucojom rubi' ri Cristo, na mac taj we na e ta rire xtzucun ri jachanic. Ma ri Dios ojusi'q'uim re cojc'o'ji' chi utzil chomal. ¹⁶ C'ola c'u utzil chomal ri' chixo'libal alak, ma c'axtaj uma rilal hermana, cacolobetaj ri achijil la; o c'axtaj uma rilal hermano, cacolobetaj ri ixokil la.

¹⁷ E chirij tak c'u ri qui'anom echiri' xsiq'uix ruma ri Kanimajawal, chiquijujunal utz checanajok jela' pacha' ri ebuya'om wi ri Dios. Y wa' wa nubi'im che ralak, e takanic can'an chique conoje ri caquimol quib pubi' ri Cristo. ¹⁸ We c'o c'u juna achi c'o chi ri retalil re circuncisión che echiri' xsiq'uix ruma ri Kanimajawal, utz jela' cacana'j canok. O we c'o juna achi na jinta ri retalil re circuncisión che echiri' xsiq'uix ruma ri Kanimajawal, na chirajawaxic taj cacoj che. ¹⁹ Ma ri chirajawaxic wi na e ta we jun ucojom ri retalil re circuncisión o we na ucojom taj, ma ri lic chirajawaxic wi che jun e cu'an ronoje rutakanic ri Dios.

²⁰ Ec'u chirij ri c'o wi jun echiri' xsiq'uix ruma ri Dios, utz we jela' cacana'j canok. ²¹ We lal c'o la puk'ab ri ajaw la echiri' xsiq'uix la ruma ri Dios, mubisoj c'u'x la; yey we caya'taj che la quel la puk'ab ri ajaw la, lic utz ri'. ²² Ma e junok c'o puk'ab rajaw echiri' xsiq'uix ruma ri Kanimajawal, ri' quesax lo puk'ab ritzel ruma ri Kanimajawal. Yey e junok na jinta puk'ab rajaw echiri' xsiq'uix ruma ri Dios, wo'ora puk'ab ri Cristo c'o wi. ²³ Ec'u ralak alak re ri Dios, ma Rire ulok'om chi alak ruc' rucamic ri Cristo. E uwari'che, maya ib alak paquik'ab ri ticawex xa ruma e lic catakej alak ri quina'oj. ²⁴ Hermanos, ec'u chirij ri c'o wi jun echiri' xsiq'uix ruma ri Dios, lic utz we jela' cacana'j can chwach ri Dios.

²⁵ Chique c'u ri na e ta c'ulanic, na jinta takanic uya'om ri Kanimajawal

chwe puwi wa', pero canya c'u ri nupixabanic ri'in chwi wa'. Y canch'ob c'ut utz cacubi' c'u'x alak wuc' puwi ri cambi'ij, ma ya'tal chwe ri'in ruto'bal ri Kanimajawal. ²⁶ Chinuwach ri'in, ruma ri c'axc'obic oj c'o wi wo'ora, e utz we junok cacana'j canok jela' pacha' ri u'anom. ²⁷ Pero we c'o chi awixokil, majach canok. No'j we na jinta awixokil, mu'an e ubis ac'u'x catzucuj awixokil. ²⁸ Pero we catc'uli'ic, utz; ma na mac taj we jun cac'uli'ic. Jenela' juna ali we cac'uli'ic, na mac taj. Pero e ri quec'uli'ic cape uc'ayewal che ri quic'aslem. Ec'u wa ya'l c'ayew na cuaj ta che alak.

²⁹ Hermanos, ri cuaj c'ut cambi'ij che alak e wa': E tak ri k'ij c'o chikawach na naj ta chic. E uwari'che e rachi c'o rixokil, mu'an ri xew lic e c'o una'oj puwi ri rixokil.* ³⁰ Jec'ula' janipa ri quebok'ic, maquiya quib xew che ri quibis. Janipa ri quequi'cotic, maquiya quib che ri qui'cotemal. Janipa ri caqui'an lok'oj, me'ec quic'u'x ruc' rubitak que. ³¹ Yey janipa ri caqui'cot quic'u'x ruc' tak ri c'o che ruwachulew, me'ec quic'u'x puwi wa'. Ma ronoje ri quilital che ruwachulew, xa quic'owic.

³² Ri cuaj ri'in che alak e ri na jinta ubis c'u'x alak. Ri hermano na c'ulan taj, ruma na jinta ya'l c'ayew che, puk'ab c'owi lic cuya rib che ri chac re ri Kanimajawal y cutakej janipa ri caraj Rire. ³³ No'j ri hermano c'ulanic e cutakej su'anic quebuchajij rufamilia wara che ruwachulew y cutakej sa' ri caraj ri rixokil. ³⁴ Jec'ula' na xa ta jun uwach ruchac, ma cu'an ri cajawax pa ruchac ri Dios y cu'an ri cajawax chique rufamilia. Y jenela' cuc' ri hermanas. Ma ri hermana na jinta rachijil, na jinta ya'l c'ayew che lic cutakej sa' ri caraj ri Kanimajawal, ma utz c'u ri' cuya rib puk'ab ri Dios ruc' rucuerpo y ronoje ranima'.

* **7:29** Pa ri ch'a'tem griego cubi'ij: "Janipa ri c'o quixokil e qui'ana pacha' ri na jinta quixokil". Wa' na e ta que'elawi utz we junok na coc ta il che ri rixokil. Ri que'elawi e chirajawaxic también cakilij ruchac ri Kakaw.

No'j ri hermana c'ulanic e cutakej su'anic quebuchajij rufamilia wara che ruwachulew y cutakej sa' ri caraj ri rachijil. ³⁵ Ec'u wa' wa ximbi'ij che alak re to'bal e alak, na re ta cancoj k'atbal chiwach alak; ma e cha' cac'oji' alak pa sakil wi y jec'ula' na jinta ya'l c'ayew re caya ib alak che ruchac ri Kanimajawal.

³⁶ Laj c'o junok c'o umi'al† na jinta rachijil y cuch'ob c'u rakan: «Laj na usuc' taj we na canya ta luwar che ri numi'al cac'uli'ic, ma c'o chi rujunab.» We rachi cuch'ob c'u rakan takal che rumi'al cac'uli'ic, e chu'ana ri', ma na mac taj. ³⁷ No'j we c'o juna achi lic cuna' chuc'u'x utz cac'oji' rumi'al utuquel, puk'ab rire c'o wi we cuc'uluba' rumi'al o na cuc'uluba' taj. Utz we na cuc'uluba' taj, pero xew we lic ujiquibam uwach ri cu'ano y na jinta junok xminow uwach chupa. ³⁸ E junok cuc'uluba' rumi'al, utz ri cu'ano; yey ri na cuc'uluba' taj, más ne utz ri cu'ano.

³⁹ Juna ixok c'ulanic na jinta puk'ab cac'uli' ruc' jun chic we c'a c'as ri rachijil. No'j we ri rachijil xamic, puk'ab c'o wi cac'uli' china ruc' caraj wi rire, xew tane we ruc' junok uya'om rib puk'ab ri Kanimajawal. ⁴⁰ Pero c'u chinuwach ri'in e más c'o qui'cotemal che rixok malca'n we na cac'uli' ta tanchic, yey ri'in canch'obo wa cambi'ij e ruma ri Ruxlabixel ri Dios c'o wuc'.

8

Ri wa'im ic'owisam chiquiwach ri tiox

¹ Wo'ora cuaj quinch'a't puwi' we utz o na utz taj catij ri ic'owisam chiquiwach ri tiox. K'alaj c'ut chikajujunal ri'oj c'o chi kana'oj chwi wa'. Pero e c'o jujun caquich'obo quimajom chi usuc' ronoje; y ruma la', caqui'an nim che quib. No'j we

† **7:36** Pa ri ch'a'tem griego cubi'ij "k'apoj ali", pero na k'alaj taj we ri versículos 36-38 e cach'a't puwi juna achi ruc' ri umi'al o juna ala ruc' ri ali ujiquibam chic cac'uli' ruc'. * **8:2** Ri kamajom usuc' na tz'akat taj we na jinta ri rutzil uc'u'x ri Dios kuc'. † **8:5** "Cajawal": E c'o ri caquich'obo c'o rajawal ri ya', c'o rajawal ri juyub o c'o rajawal ri tico'n; yey chiquiwach rique, wa' wa rajawal na winak taj, e jun uxlabixel c'o pa tew.

pakatzij wi c'o rutzil c'u'xaj pa kanima', lic cakato' c'u kib ri' cha' c'o kaq'uiyibal chwach ri Dios. ² We c'o c'u junok cuch'obo lic c'o reta'am, ri' c'amaja' cumaj usuc' ronoje ri lic chirajawaxic wi careta'maj.* ³ No'j ri pakatzij wi c'ax cana'w re ri Dios, ri' ralc'o'al ri Dios yey eta'matal c'u uwach ruma ri Dios.

⁴ Chwi tak c'u ri wa'im ic'owisam chiquiwach ri tiox, ri'oj keta'am na jinta juna tiox che ruwachulew c'o uc'aslem, ma xa jun ri Dios c'olic, na jinta jun chic. ⁵ Tob c'o ri caquibi'ij e c'o tak dios che ruwa caj y che ruwachulew; yey chiquiwach c'u ri quecojow wa', lic e q'ui ri quidios y ri cajawal;† ⁶ no'j ri'oj keta'am xa jun ri Dios c'olic, e ri Kakaw, ri 'anayom re ronoje ri c'olic. Yey ri'oj oj c'o puk'ab Rire. Y xa jun ri Kanimajawal, e Jesucristo. Ruma Rire 'anom ronoje ri c'olic y ruma ne Rire oj c'as ri'oj.

⁷ Na conoje ta c'ut caquimaj usuc' puwi wa jun Dios c'aslic; ma e c'o hermanos ojertan xequitakej tak tiox, yey c'a c'o pa quijolom wa' e c'aslic. Ec'u wo'ora we rique caquitij ri ic'owisam chwach juna tiox, e caquina' rique mac ri caqui'ano. E caquich'ob wa' ruma na jinta ucowil ri quina'oj. ⁸ Rique na caquimaj ta usuc' wa': Na ruma ta ri cakatijo cojilitaj chi utz ruma ri Dios. Na ruma ta ri cakatijo o ri na cakatij taj c'o kawach o na jinta kawach chwach ri Dios.

⁹ Pak'ab alak c'o wi sa' ri ca'an alak. Na ruc' ta c'u ri', chajij ib alak che ri ca'an alak, tob eta'am alak na mac taj. Ma na utz taj we xa uma ralak quetzak pa mac ri na jinta ucowil ri quina'oj. ¹⁰ Ma c'axtaj c'o juna hermano na jinta ucowil runa'oj y caril c'u la tz'ulla chwa ri mexa pa cac'ayix wi ri wa'im ic'owisam chwach juna tiox. Rilal eta'am la na mac ta wa',

no'j ri jun chic na cumaj ta usuc' wa' yey xa ruma xril la catij rilal wa', cu'an c'u re pacha' ri ca'an rilal y cutijo. ¹¹ Tob rilal c'o na'oj la chwi wa', pero ruma ri ca'an la, ri hermano na jinta ucowil runa'oj, caresaj rib chirij ri Cristo. ¡Wa' lic na ube taj, ma ruma ne rire xcam ri Cristo! ¹² Jec'ula' we casachisaj alak quina'oj ri na e tiquil ta chi utz, ri' camacun alak chiquij rique y ruc' c'u wa', e camacun alak chirij ri Cristo. ¹³ E uwari'che we ri cantij ri'in cu'ana tzakibal che juna hermano, xa jumul ri' na cantij ta chi ti'o'n cha' jela' na catzak ta ri jun hermano wuma ri'in.

9

Ri takal che juna tako'n re ri Jesús

¹ Ri'in ¿na in ta neba jun chique rutako'n* ri Jesús yey c'o c'u panuk'ab can'an ri takal che cu'an juna tako'n? In utako'n ma xinwil uwach ri Jesús ri Kanimajawal, yey ralak alak c'utubal re ri nuchac ma wuma ri'in xc'oji' alak puk'ab Rire. ² Laj chiquiwach jujun chic ri'in na in ta jun tako'n re ri Jesús; no'j ralak lic eta'am alak in utako'n Rire, ma wuma ri'in xc'oji' alak puk'ab Rire yey wa' e c'utubal re pakatzij wi ri'in in tako'n re ri Kanimajawal. ³ Chique c'u ri caquitz'ak nuchi', e cambi'ij wa' re to'bal wib: ⁴ Ri oj utako'n ri Kanimajawal, ¿na takal ta neba chike caya' ri kawa y ri kaya'? ⁵ ¿Yey na takal ta neba che juna tako'n c'o rixokil ucojom rubi' ri Cristo yey carachbilaj echiri' cu'ana ruchac ri Kakaw? Takalic, ma jela' qui'anom ri Cefas† cuc' ri jujun chic tako'n yey tak ruchak' ri Kanimajawal. Takal c'u wa' chike ma oj tako'n jela' pacha' rique. ⁶ Ri nic'aj chic tako'n e c'o pa ruchac ri Kakaw, quetojic y na quechacun ta pa juna chic chac. ¿Na takal ta neba wa' che

ri Bernabé y chwe ri'in? ¿O xew cami ri' ri'oj na takal ta wa' chike?

⁷ Ma ¿c'o neba juna soldado catak che culok' ruc' rumeyo ri cajawax che? Na jintaj, ma ronoje wa' caya' che. Jec'ula' juna aj tico'n, ¿na takal ta neba che cutij re ri uva xutico? Y juna aj chajal chicop, ¿na takal ta neba che cutij re ri leche cuyitz'o? ⁸ Y wa cambi'ij, ¿xa nawi na'oj re ticawex? Na e taj, ma jela' tz'ibital can pa Rutzij Upixab ri Dios. ⁹ Ma chupa ri takanic tz'ibital can ruma ri Moisés, jewa' cubi'ij: «Macoj bozal che ri boyex echiri' cukil uwi ri trigo, ma takal che catzukic.»* ¿Xubi'ij neba wa' ri Dios xew ruma c'ax quebuna' ri boyexab? ¹⁰ ¿Na pakawi' ta neba ri'oj cubi'ij wi wa'? Katzij, e pakawi' ri'oj xtz'ibax wi. Ma jela' pacha' rabixom takal che c'o roye'em che ruchac cu'ano; yey ri aj chac c'o pa kiloj trigo c'o roye'em chwa ri cu'ano; ¹¹ jec'ula' ruma ri'oj xkatic chixo'libal alak Rutzij Upixab ri Dios, ¿na takal ta cami ri' chike ri'oj cakac'ul che alak ri cajawax chike wara che ruwachulew? ¹² Ma e c'o jujun tojom alak ri quichac piglesia. We takal c'u ri' chique rique quetoj alak, más lic takal chike ri'oj, ma oj xojticow riglesia alak. Na ruc' ta c'u ri', ri'oj na jinta c'o katz'onon che alak, tob takal chike. Ri ka'anom e cojchacun pa ke wi y lic kach'ijom lo ronoje cha' na cakacoj ta k'atbal che rutzijoxic ri Utzilaj Tzij re ri Cristo.† ¹³ Yey ralak eta'am alak raj chaquib pa Rocho Dios takal chique quewa' chirij ri kasa'n ya'om puk'ab ri Dios; yey ri queniman chwa raltar, takal chique c'o caquic'ul che ri que'yo'k chiri'.* ¹⁴ Yey ri takanic uya'om can ri Kanimajawal paquiwi ri caquitzijoj ri Utzilaj Tzij, e wa': E lic takal chique caquic'asba' quib e chirij ruchac ri Cristo caqui'ano.* ¹⁵ Na ruc' ta c'u ri',

* **9:1** “Tako'n”: Pa ri ch'a'tem griego y pa caxtila wa' e “apóstol”. Cabi'x “tako'n” chique ri cablajuj utijo'n ri Jesús, ri xetak ruma Rire cha' caquitzijoj ri Utzilaj Tzij y caquitic iglesias. Yey ri Pablo xtak lo ruma ri Jesús cha' cutzijoj ri Utzilaj Tzij y cutic iglesias. † **9:5** “Cefas”: E jun chic ubi' ri Pedro. * **9:9** Dt. 25:4 † **9:12** Ri Pablo na xraj taj cu'an alc'ayew chique ri e aj Corinto, yey na xraj taj c'o junok cuch'obo rire cutzijoj ri Utzilaj Tzij xa ruma cach'acan chirij. * **9:13** Lv. 7:6-9, 31-34; Dt. 18:1 * **9:14** Mt. 10:10; Lc. 10:7

ri'in na jinta c'o nutz'onom che alak tob takal wa' chwe. Y na e tane uwach wa' quintz'iban pana che alak cha' quintoj alak. Ma chinuwach ri'in, más utz we quincamic chwa que-sax chwe ri sakil qui'cotemal canna'o echiri' cantz'ijoj ri Utzilaj Tzij y na jinta wajil cantz'onoj.

¹⁶ Ri'in na canyac ta nuk'ij ruma cantz'ijoj ri Utzilaj Tzij. Xew weta'am chirajawaxic can'an wa' wa chac ma e ri Cristo intakayom che. ¡Lic tok'o' c'u nuwach we na can'an taj! ¹⁷ We ta in xinchaw wa chac, laj woye'em c'u ri' ri tojbal we'in. No'j ruma e ri Nukaw intakayom che u'anic wa', na jinta panuk'ab canjec' wib che. ¹⁸ ¿Sa' c'u ri canch'ac che ri chac can'ano? E ri unimal qui'cotemal canna'o echiri' cantz'ijoj ri Utzilaj Tzij y na cantz'onoj ta wajil tob takal wa' chwe.

¹⁹ Ri'in na in jinta puk'ab juna patrón; na ruc' ta c'u ri', nuya'om wib che quinu'ana nimanel que conoje cha' jela' e q'ui ri caquicoj rubi' ri Cristo. ²⁰ Echiri' in c'o chiquixo'l ri watz-nuchak' e aj judi'ab, can'an che wib jela' pacha' rique cha' caquicoj rubi' ri Cristo. Éc'uchiri' in c'o chiquixo'l rique, cantakej ri quitakanic, tob weta'am na in jinta chuxe' wa'. Nu'anom c'u wa' cha' rique caquicoj rubi' ri Cristo. ²¹ Jec'ula' echiri' in c'o chiquixo'libal ri na quitakem ta ri takanic tz'ibital can ruma ri Moisés, can'an che wib pacha' in jun chique, tob in c'o chuxe' rutakanic ri Dios y rutakanic ri Kanimajawal. Nu'anom c'u wa' cha' rique caquicoj rubi' ri Cristo. ²² Jec'ula' echiri' in c'o chiquixo'libal ri hermanos na jinta ucowil ri quina'oj, c'o ri na can'an ta ri'in xa ruma e mac chiquiwach rique, tob ri'in weta'am na mac taj, pero rique c'amaja' caquimaj usuc' wa'. Jela' can'ano cha' rique caquijiquiba' quib chi utz puk'ab ri Dios. Ruc' c'u ronoje ri can'an chiquiwach conoje ri ticawex, cantzucuj sa' ri lic

quebuto'o cha' jela' e c'o jujun chique quecolobetajic. ²³ Ruc' ronoje c'u ri can'ano, cank'alajisaj ri Utzilaj Tzij cha' junam cakac'ul ri utz ruc'a'am lo wa Utzilaj Tzij.

Kachuk'ubej kib cha' cakac'ul ronoje ri caraj cuya ri Dios chike

²⁴ Eta'am alak pa juna etz'anem re c'alalem, conoje ri quec'alalic lic caquitij uk'ij caquich'ac ri premio, tob queta'am xa jun ri cac'uluw ri premio. Jec'ula' chuk'ubej ib alak cha' cac'ul alak ri premio cuya ri Dios che alak. ²⁵ E junok lic cutijoj rib che juna etz'anem, lic cuch'ij uchuk'ab ronoje xa ruma jun premio xa casach uwach. No'j ri'oj cakachuk'ubej kib che uc'ulic jun premio na casach ta c'ana uwach. ²⁶ Éc'u ri'in lic weta'am sa' ruchac ri nuc'aslem. Na can'an ta c'u pacha' junok xa cajumumic pero na reta'am taj pa caraj copon wi o pacha' junok cach'o'jin pa t'o'y§ pero xa pa tew cach'ayanic. ²⁷ Ma ri'in quintakan puwi ri nucuerpo tob cantij c'ax ruma. Jec'ula' na canya ta c'ana luwar che tak ri rayibal re ri nuti'jil catakan panuwi'. Ma ri'in xink'alajisaj ri chomilaj be re ri K'ijisak chiquiwach uq'uiyal ticawex; lic tok'o' c'u nuwach ri' we e la' na canch'ac ta ri premio cuya ri Dios.

10

Ri k'atbal tzij xu'an ri Dios puwi rutinamit ojertan

¹ Hermanos, mic'ow chic'u'x alak ri xquic'ulumaj ri kati'-kamam e aj Israel ojertan. Echiri' rique xebin chupa ri luwar catz'intz'otic, ri Dios xutak lo jun sutz'§ paquiwi' y echiri' xebopon chuchi' ri mar, xebuto'o cha' conoje xquik'axuj ri mar. ² Conoje c'u rique junam ruc' ri Moisés e pacha' xquic'ul ri bautismo echiri' xebic'ow chupa ri mar ruc' ri sutz' paquiwi' y ri ya' pa tak quitzal. ³ Yey conoje rique xquitij ri maná petinak chicaj,§ ri xutak lo ri Dios

§ 9:26 “Cach'o'jin pa t'o'y”: Wa' cach'a't puwi jun “boxeador”. § 10:1 Éx. 13:21 § 10:1 Éx. 14:22

§ 10:3 Éx. 16:4, 35 * 10:4 “Pec”: Pa caxtila wa' cabi'x “peña” che.

chique. ⁴ Jec'ula' conoje xquitij ri ya' xel lo chupa jun pec.* Wa ya' e ri xuya lo ri Dios, y wa pec que'elawi e ri Cristo,† ri xerachbilaj rutinamit che ri quibenam. ⁵ Tob ri Dios lic xebuchajij, na ruc' ta c'u ri', lic e q'ui chique xquipetisaj ri royowal ri Dios paquiwi'. Ruma c'u la', xecam can pa ri luwar catz'intz'otic.✧

⁶ Ronoje ri xquic'ulumaj rutinamit ri Dios ojertan e c'utubal chikawach ri'oj wo'ora cha' na que'ec ta kac'u'x ruc' ri na utz taj pacha' ri xqui'an rique. ⁷ Ma'an c'u ralak alak aj tioxab pacha' xqui'an jujun chique rique ojertan. Ma jela' tz'ibital can chupa Rutzij Upixab ri Dios: «Rutinamit ri Dios xetz'uyi'ic, xewa'ic y xek'abarc. Tec'uchiri' xeyactajic y xquiya quib chupa ri na utz taj.»‡ ⁸ Maka'an ne ke'oj pacha' xqui'an jujun chique rique echiri' xquetz'abej uwa quik'ij cuc' jujun chic na quic'ulel taj, yey ruma la' xecamisax xa pa jun k'ij laj veintitres mil chi achijab.§ ⁹ Makac'am upa ri Dios Kajawxel pacha' xqui'an jujun chique rutinamit echiri' xquipetisaj royowal ri Dios ruma xeyajan chirij. Yey ruma c'u ri' xecamic ma xeti'taj cuma cumatz.✧ ¹⁰ Mayajan c'u alak chirij ri Dios pacha' xqui'an jujun yey ruma c'u ri', ri Dios xutak lo jun aj 'Anal Camic paquiwi'.✧ ¹¹ Ronoje c'u ri xquic'ulumaj rutinamit ri Dios ojertan e c'utubal chikawach ri'oj wo'ora cha' na caka'an ta ke'oj pacha' ri xqui'an rique. Ronoje c'u wa' tz'ibital canok re pixabanic chike ri'oj, ri oj c'o che tak ri q'uisbal k'ij re ruwachulew. ¹² E uwari'che, we c'o junok cuch'obo catiqui' jusuc', e lic chuchajij c'u rib ri' cha' na catzak taj. ¹³ We cac'am pa alak, mabi'ij alak:

«Xew ri'in quinic'owiben wa'», ma konoje ri oj ticawex cojic'ow chupa wa'. Na ruc' ta c'u ri', cubul kac'u'x ruc' ri Dios, ma Rire na cojrok'otaj ta q'uenok y na cuya ta luwar cape juna c'ambal kapa we na ya'tal ta chike cakach'ij ruc' ruchuk'ab Rire. ¹⁴ Ruma c'u ronoje wa nubi'im lok, campixabaj alak hermanos, ri lic c'ax canna' alak: Lic chajij ib alak cha' na catzak ta alak chupa ri quilok'nimaxic uk'ij tak ri tiox.

¹⁵ Weta'am lic c'o na'oj alak cha' camaj alak usuc' ri cambi'ij. Ch'obo pe c'u alak chi utz puwi wa cambi'ij we katzij. ¹⁶ Echiri' cakachap ri c'olibal c'o vino chupa, cuxtabal re ruquiq'uel ri Cristo xturuw kuma ri'oj, cojtioxin chwach ri Dios. Echiri' cakatij c'u wa', ¿na e ta neba coju'an xa jun ruc' Rire? Jec'ula' echiri' cakatij ri pam cuxtabal re rucuerpo xya' pa camic, ¿na e ta neba coju'an xa jun ruc' Rire? ¹⁷ Wa' wa pam xa jun, tob cawech'ic y cajach chike. Jec'ula' ri'oj, tob oj q'ui, xa jun kawach ma konoje junam cakatij wa pam.

¹⁸ Chilape alak ri caqui'an ri e aj Israel. Echiri' caquitij rawaj ecamisam chwach raltar re ri Dios Kajawxel, ruc' wa' ebare jun caquicuxtaj ri Dios. ¹⁹ ¿Sa' c'u ri cambi'ij puwi tak ri ic'owisam chwach juna tiox? ¿E nawi cambi'ij c'o uwach ri tiox o e c'o uwach rawaj ecamisam chwach? ¿Na e taj! ²⁰ Ri cambi'ij e wa': Echiri' ri na queta'am ta uwach ri Dios quekasan ruc' awaj chwach juna tiox, na e ta chwach ri Dios quekasan wi, ma e chiquiwach tak ri itzel uxlabixel. E uwari'che lic na cuaj taj ca'an e alak cuc' ri caquilok'nimaj tak ri itzel uxlabixel. ²¹ Yey na ube ta q'uenok catij alak ri vino re yacbal uk'ij ri Kanimajawal yey

† **10:4** Che wa jun pec xel lo ri ya' lic chirajawaxic chique ri e aj Israel. (Éx. 17:6) Jec'ula' che ri Cristo, petinak wi lo ri lic chirajawaxic che ri kac'aslemal chwach ri Dios. ✧ **10:5** Nm. 14:22-23, 35; 16:31-32; 21:6; 26:65 ‡ **10:7** Exqui'an wa' echiri' xqui'an nimak'ij chwach ri tiox, ri xquitak ri Aarón che u'anic.

Éx. 32:6,8 § **10:8** Wa' xu'ano echiri' rachijab aj Israel xesiq'uix cuma rixokib na e ta aj Israel cha' caqui'an nimak'ij chwach ri quitiox. Xquiyoj c'u quib ri' rachijab cuc' rixokib e aj tioxab y ruma wa' xpe royowal ri Dios cuc'. Ec'u ri xu'an ri Dios e xtakan che quecamisax wa' wa'chijab. Nm. 25:1-5,9 ✧ **10:9** Nm. 21:4-6 ✧ **10:10** Nm. 16:41-49

catij alak ri vino re yacbal quik'ij ri itzel uxlabil. Jec'ula' na ube ta nenare' we ralak catij alak ri wa'im chwi rumexa ri Kanimajawal yey catij ne alak ri wa'im chwi ri mexa que ri itzel uxlabil. ²² Ma ¿ca'aj cami alak e capetisaj alak roy-owal** ri Dios ruma x'an e alak cuc' ri caquilok'nimaj tiox? ¿Cach'ij neba alak ruchuk'ab Rire?

Ka'ana ronoje reyacbal uk'ij ri Dios

²³ E c'o ri quebi'n re: «Panuk'ab c'o wi can'an sa' ri cuaj can'ano» quecha'. Katzij, pero na ronoje taj takal chwe can'ano. «Panuk'ab c'o wi can'an sa' ri cuaj can'ano» quecha'. Pero na ronoje taj cuya nuq'uiyibal chwach ri Dios. ²⁴ Na utz ta c'u ri' we junok e xew cutzucuj ri utz chiribil rib, ma ri lic chirajawaxic wi e cutzucuj ri utz chique ri nic'aj chic. ²⁵ Ronoje c'u ri cac'ayix pa carnes, utz catij alak; xew matz'onobej alak y mac'o mach'ob ne alak che we ic'owinak chwa juna tiox o na ic'owinak taj. ²⁶ Ma jewa' tz'ibital can pa Rutzij Upixab ri Dios: Ronoje ruwachulew ruc' ronoje tak ri c'o chwach, re ri Dios Kajawxel *Sal. 24:1* cache'.

²⁷ Yey we c'o junok na ucojom ta rubi' ri Cristo cusiq'uij alak pa juna wa'im y ca'aj alak que'ec alak, utz ri'. Ronoje c'u ri cuya chwach alak, utz catij alak, xew c'u matz'onobej alak y mac'o ne mach'ob alak pa petinak wi. ²⁸ No'j we e la' c'o junok cubi'ij che alak: «Wa' ic'owisam chwach tiox,» ri' matij alak ruma ri cuch'ob ri jun xbi'n re wa', tob eta'am chi alak na mac taj catijic. Ma ronoje ruwachulew ruc' ronoje ri c'o chwach, re ri Dios Kajawxel. ²⁹ We na catij ta c'u alak wa', e ruma ri cuch'ob ri jun chic hermano, ma chwach rire e mac, tob chwach ralak na mac taj. ¿Utz c'u nawi we

junok chic cak'ataw tzij panuwi' ri'in echiri' can'an ri lic cuna' nuc'u'x utz can'ano? ³⁰ Yey we cantioxij che ri Kakaw janipa ri caya' chwe pa wa'im, ¿su'be c'u ri' quinch'a'tibexic?

³¹ Ruc' c'u ri wa'im y ri mik'ina' catij alak o tob sa' ri ca'an alak, ri lic chirajawaxic wi e 'ana alak ronoje re yacbal uk'ij ri Dios. ³² Ma'an ralak alak latz'anel chique ri jujun chic, tob e aj judi'ab o na e ta aj judi'ab; ma'an ne alak wa' chique ri quicojom rubi' ri Cristo. ³³ Ri'in ruc' ronoje ri can'ano, e can'an ri utz chique conoje. Na cantzucuj ta c'u ri utz xew chiwibil wib ri'in, ma e cantzucuj ri utz que conoje cha' jela' caquirik ri chomilaj c'aslemal re ri Dios.

11

¹ 'Ana che ri binic alak pacha' ri nubinic ri'in, jela' pacha' ri'in e can'an che ri nubinic pacha' rubinic ri Cristo.

Pixabanic chique riglesia echiri' caquimol quib

² Quinqui'cot uc' alak ma na mesc'utam ta alak ri nupixabanic y takem lo alak ri c'utunic nuk'alajisam chwach alak. ³ Pero c'o ri cuaj queta'maj alak: Ri Dios e ujolom pa chapatal wi ri Cristo. Jec'ula', ri Cristo e ujolom pa chapatal wi rachi yey rachi e ujolom pa chapatal wi rixok. ⁴ We juna achi uch'ukum c'u rujolom echiri' cu'an orar o cu'an k'alajisanic, ruc' wa' cuc'utu na jinta xi'in ib ruc' chwach ri Cristo, ri Jun e ujolom pa chapatal wi. ⁵ No'j we juna ixok na uch'ukum ta rujolom echiri' cu'an orar o cu'an k'alajisanic, ri' q'uixbal che ri jun e ujolom pa chapatal wi, ma e junam ri' pacha' k'atom ronoje ruwi'. ⁶ Ma we juna ixok na cuch'uk ta rujolom, ri' asu chuk'ata ronoje ruwi'. Pero we q'uixbal che rixok ca'an lic ch'uti'n

** **10:22** Pa ri ch'a'tem griego cubi'ij "achixomanic". E pacha' juna achi o juna ixok lic na cuc'ul ta c'ana uc'u'x echiri' ruc'ulel que'ec uc'u'x ruc' junok chic. Jec'ula' ri Dios lic cape royowal we ri'oj oj re Rire yey cakayac uk'ij juna tiox. [☆] **10:28** Sal. 24:1 ^{*} **11:6** Rojertan jun che tak ri k'atbal tzij puwi juna ixok cu'an ri na utz taj, e cak'at ronoje ruwi', c'utubal re rumac.

che ruwi' o cak'at ronoje ruwi',* más ne utz c'u ri' e chuch'uku rujolom.

⁷No'j rachi na takal ta che cuch'uk rujolom, ma rire e cuc'utubej uwach ri Dios y ruma rachi cak'alajin runimal uchomalil ri Dios. Yey rixok e uchomalil rachi.† ⁸Ma ri nabe achi na petinak ta che ri nabe ixok; e ri nabe ixok che ri nabe achi petinak wi.‡ ⁹Yey ri Dios na xu'an ta rachi re rachbi'il rixok ma e xu'an rixok re rachbi'il rachi.§ ¹⁰E uwari'che takal che rixok cuch'uk rujolom, ma wa' e c'utubal re uya'om rib pa takanic, jela' c'u ri' cak'alajinic lic utz u'anom chiquiwach conoje ri ticawex y chiquiwach ne ri ángeles. ¹¹Na ruc' ta c'u ri', janipa ri kacojom rubi' ri Kanimajawal lic keta'am, rachi y rixok quicabichal c'o quiwach chwach ri Dios y lic quebajawaxic. ¹²Ma che ri nabe achi petinak wi ri nabe ixok yey cuma rixokib quebalax rachijab. Pero ronoje ri c'olic, petinak ruc' ri Dios.

¹³Ch'obo pe alak rakan puwi wa': ¿Utz nawi we juna ixok na uch'ukum ta rujolom echiri' cu'an orar chwach ri Dios? ¹⁴Lic rewi na takal ta chique rachijab lic canima'kir ri quiwi'. ¹⁵No'j rixokib takal chique lic nima'k ri quiwi', ma e quichomalil ri' ya'tal ruma ri Dios re ch'ukubal ri quijolom. ¹⁶Ruc' c'u ronoje wa xinch'a'tibej, we c'o junok caraj cach'o'jin puwi', xew cambi'ij che: Ri nic'aj chic iglesias re ri Dios na junwi ta ri quina'oj puwi wa' chwa ri canc'ut ri'in.

Pixabanic puwi ri cena re cuxtabal rucamic ri Kanimajawal Jesucristo

¹⁷Ruc' wa pixabanic canjek bi utz'ibaxic che alak wo'ora, na quinqui'cot ta ruc' ri 'anom alak. Ma echiri' camol ib alak, na utz ta ri quilij taj chixo'libal alak, ma xa e ca'an c'ax chi'ibil ib alak. ¹⁸Nabe na cambi'ij che alak, nutom na junam ta c'u'x

alak echiri' camol ib alak publi' ri Cristo. Yey cancojo laj katzij, ¹⁹ma e c'o jujun caquich'obo más c'o quiwach chiquiwa jujun chic. Yey quilij taj na c'u wa' cha' jela' cak'alajinic china tak ri lic utz qui'anom chwach ri Dios, ma ri' na je ta la' caqui'ano. ²⁰Ec'uchiri' camol ib alak, na e ta re catij alak ri sakil cena re ri Kanimajawal. ²¹Ma ri ca'an alake chujujunal cutijila' nabe ruwa'im, tob e c'o c'u jujun quecanaj can ruc' numic yey e c'o ne ri quek'abaric. ²²¿Sa' c'u ri' wa'? ¿Na jinta neba ocho alak pa cawa' wi alak? ¿Su'chac c'u ri' echiri' camol ib alak publi' ri Cristo, cac'ak bi alak quik'ij rutinamit ri Dios; ma e caya alak quiq'uix ri na jinta c'o cuc'? ¿Sa' c'u ri' cambi'ij che alak? ¿Canyac cami k'ij alak ri' ruma ri ca'an alak? ¡Na canyac ta k'ij alak!

²³Ri nuc'ulum ri'in puwi ri sakil wa'im e ri nuc'utum chi che alak, yey wa' e junam ruc' ri ubi'im can ri Kanimajawal Jesucristo. Ma la' la'k'ab echiri' ri Jesús xc'ayixic, xuc'am ri pam, ²⁴xutioxij che ri Dios y xuwech'o, jec'uwa' xubi'ij: «Chic'ama' y chitija', ma e nucuero pa' ri caya' pa camic iwuma ri'ix. Ec'uchiri' qui'an tak wa' chikawach apanok, chi'ana' re cuxtabal we ri'in» xcha ri Jesús.☆ ²⁵Jec'ula' xu'an che ri c'olibal c'o vino chupa. Q'uisbal re ri cena, xuc'am ri c'olibal c'o vino chupa y jec'uwa' xubi'ij: «Wa ri ri' e ri c'ac' tzij☆ cajiquibax uwach ruc' ri nuquiq'uel. Janipa laj quitij ri vino re wa cena, chi'ana' cuxtabal we ri'in» xcha ri Jesús.☆ ²⁶Janipa c'u laj camol ib alak cha' catij alak wa pam y cakum alak wa vino, e catajin alak ri' che utzijoxic rucamic ri Kanimajawal c'a echiri' cac'un tanchi Rire.

²⁷E uwari'che china ri cutij wa pam y cukum wa vino re ri Kanimajawal yey na ruc' ta xi'in ib cutijo, ri' c'o ri

† 11:7 We juna ixok utz u'anom y lic cach'a'tibex chi utz, wa' yachal uk'ij ri rachijil. ‡ 11:8 Ri Dios xu'an ri nabe achi ruc' ulew; no'j rixok x'an ruc' jun ubakil ri nabe achi. Gn. 2:21-23 § 11:9 Wa' e ri Adán y ri Eva. Gn. 2:18 ☆ 11:24 Mt. 26:26; Mr. 14:22; Lc. 22:19 ☆ 11:25 Jer. 31:31-34 ☆ 11:25 Mt. 26:27-28; Mr. 14:23-24; Lc. 22:20

k'atbal tzij re ri Dios puwi' ma e camacun chirij ri Kanimajawal echiri' cuc'ak bi uk'ij rucuerpo y ruqui'uel. ²⁸ Ruma c'u ri', china ri caraj cutij wa pam y cukum wa vino, nabe na lic chuna'a rib sa' ru'anom. ²⁹ Ma china ri cutij wa pam y cukum wa vino re ri Kanimajawal yey na cuch'ob tana chi utz we wa' e que'elawi rucuerpo ri Kanimajawal; ri' chiribil rib cuc'am lo ri k'atbal tzij re ri Dios puwi'. ³⁰ Ruma e c'o jujun jela' qui'anom, e q'ui ri e yewa'ib y ri na jinta quichuk'ab chixo'libal alak, yey e c'o ne ri ecaminak chic. ³¹ No'j we ta nabe na cakana' kib ri'oj chikibil kib, ri' na cajawax ta chic cuk'at tzij ri Dios pakawi' ma kayijbam chi kib chwach. ³² No'j we na caka'an ta wa', ri Dios cuk'at tzij pakawi' wo'ora re cojuk'ilo cha' chikawach apanok na cuk'at ta tzij pakawi' junam cuc' ri e aj mac. ³³ E uwari'che nu hermanos, echiri' camol ib alak che utijic ri cena re ri Kanimajawal, choye'ej na ib alak cha' junam catij alak wa'. ³⁴ Yey we c'o junok che alak lic canumic, wo'ka lo chirocho cha' na capetisaj ta alak ri k'atbal tzij re ri Dios paw'i alak ruma ri ca'an alak echiri' camol ib alak. C'a c'o cuaj canyijba' chiwach alak, pero c'ate cojch'a't puwi' echiri' quinopon uc' alak.

12

Ri cuya ri Ruxlabixel ri Dios chike re'anabal ruchac

¹ Hermanos, ri'in lic cuaj queta'maj alak chi utz puwi' tak ri sipanic uya'om ri Ruxlabixel ri Dios chike cha' ruc' wa' caka'an ruchac ri Kakaw. ² Ma eta'am alak rojertan echiri' c'amaja' c'o alak pa ri K'ijesak, xsocotaj alak y xya c'u ib alak che quilok'nimaxic tiox tob wa' na quech'aw taj. ³ Pero wo'ora lic cuaj queta'maj alak wa': We c'o junok tzel cach'a't chirij ri Jesús, ri' lic k'alaj na e ta ruma ri Ruxlabixel ri Dios cubi'ij wa'. No'j we c'o junok cutzijoj: «Ri Jesús e Kanimajawal,» ri' e ruma ri Santowilaj Ruxlabixel cubi'ij wa', ma

xew ri Ruxlabixel ri Dios cak'alajisan re wa' che junok.

⁴ Tape alak, q'ui tak uwach ri sipanic ya'tal chike cha' caka'an ruchac ri Dios; pero xa Jun ri caya'w re, wa' e ri Ruxlabixel ri Dios. ⁵ Lic q'ui tak uwach ri chac; pero xa Jun c'u ri rajaw, wa' e ri Kanimajawal Jesucristo. ⁶ Yey ru'anic wa' wa chac q'ui tak uwach; pero xa Jun ri caya'w chike caka'an wa', xew ri Dios.

⁷ Ri Dios uya'om chikajujunal ri'oj c'utubal re ri Ruxlabixel Rire chupa ri kabinic kasilabic, wa' e re to'bal que rutinamit ri Dios.

⁸ Ma e c'o jujun ya'tal chique ruma ri Ruxlabixel ri Dios quech'a't ruc' sakil na'oj.

Jec'ula' ruma ri Ruxlabixel ri Dios, ya'tal chique jujun chic caquitzijoj sa' ri uk'alajisam ri Dios chique.

⁹ E c'o c'u jujun chic ya'tal chique ruma ri Ruxlabixel ri Dios lic caquicojo ri Dios c'o uchuk'ab re cu'an ronoje tob lic c'ayew.

E c'o jujun chic ya'tal chique ruma ri Ruxlabixel ri Dios caqui'an orar paquiwi ri yewa'ib yey wa' quecunutajic.

¹⁰ Jec'ula' e c'o jujun chic ya'tal chique caqui'an milagros ruc' ruchuk'ab ri Kakaw,

y e c'o jujun chic ya'tal chique caquik'alajisaj runa'oj ri Dios.

E c'o jujun chic ya'tal chique caqueta'maj we juna tzij petinak ruc' ri Ruxlabixel ri Dios.

Jec'ula' e c'o jujun chic ya'tal chique quech'a't pa jujun chic ch'a'tem na quimajom taj;

yey e c'o c'u jujun chic ya'tal chique caquik'alajisaj ri xbi'x ruma junok tob na caquirik ta wa' wa ch'a'tem.

¹¹ Pero ronoje wa' ya'tal chike, e ruma ri Ruxlabixel ri Dios, ri ca'anaw re ronoje. Yey e Rire cajachaw chikajujunal sa' ri caraj cuya chike.

¹² E pacha' juna ticawex, tob q'ui uwach ri chapayom re rucuerpo, wa' xa jun u'anom. Jec'ula' u'anom ri

Cristo kuc' konoje ri'oj. ¹³ Ma ri Ruxlabixel ri Dios xu'an xa jun chike echiri' xkac'ul ri bautismo pa rubi' ri Cristo. Konoje c'u ri' xa jun kawach, tob e c'o jujun chike e aj judi'ab y jujun chic na e ta aj judi'ab, tob ne jujun chic e aj chaquib elok'otal ruma cajaw yey jujun chic quechacun pa que rique; pero konoje junam kac'ulum ri Uxlabixel re ri Dios.

¹⁴ E juna cuerpo na xa ta jun uwach ri chapayom re, ma lic q'ui uwach. ¹⁵ Ma we ta cach'aw ri akanaj y cubi'ij c'u ri': «Ri'in na in ta re ri cuerpo ma na in ta k'abaj.» Tob ne jela' ri' cubi'ij, lic rewi che ri cuerpo c'o wi. ¹⁶ Jec'ula' we ta ri xiquinaj cubi'ij: «Ri'in na in ta re ri cuerpo ma na in ta wachaj.» Tob ne jela' ri' cubi'ij, lic rewi che ri cuerpo c'o wi.

¹⁷ We ta ronoje ri kacuerpo xa jun chi wachaj u'anom, ¿sa' c'u u'anic ri' cojtanic? Yey we ta ronoje ri kacuerpo xa jun chi xiquinaj u'anom, ¿sa' c'u u'anic ri' cojuxlabic? ¹⁸ Pero ri Dios uya'om can sa' tak ri cajawax che ri kacuerpo e chirij ri xraj Rire. ¹⁹ Ma we ta xa jun uwach ronoje ri chapayom re ri kacuerpo, lic na e ta c'ana ri'. ²⁰ Lic q'ui uwach c'u ri' ri chapayom re ri kacuerpo, yey wa' xa jun u'anom.

²¹ E uwari'che ri wachaj na utz taj we cubi'ij che ri k'abaj: «Ri'at na catajawax ta chwe.» Jec'ula' na utz ta nenare' we ri jolomaj cubi'ij che rakanaj: «Ri'at na catajawax ta chwe.» ²² Yey e janipa ri pacha' na jinta ucowil che ri kacuerpo, e ne lic quebajawax ri' chike. ²³ Jec'ula' e janipa ri pacha' lic na il ta uwach che ri kacuerpo, e ne ri lic cakach'uk chi utz; yey e janipa ri na utz taj quilitajic, e ne lic cojoc il ri' che uch'ukic. ²⁴ No'j tak ri utz quilitaj chike, na jinta uchac cakach'uku. Ec'u ri Dios xyijban chi utz ri kacuerpo cha' ri na il ta uwach chike, cojoc más il che. ²⁵ Ri Dios xu'an wa' cha' janipa ri c'o che ri kacuerpo cujunimaj rib; jec'uri'la' janipa ri c'o che ri kacuerpo junam caquichajij quib. ²⁶ Ruma c'u

la' we c'o juna c'ax che ri kacuerpo, ri' ronoje ri kacuerpo cuna' uc'axc'olil. Jenela' we c'o ri lic cojoc il che, ri' ronoje ri kacuerpo caqui'cotic.

²⁷ Ralak e alak rucuerpo ri Cristo y chijujunal alak c'o jun chac takal che alak ca'an alak. ²⁸ Ruma c'u la' ri Dios ebucojom e raj chac piglesia: nabe, e ri e tako'n re ri Jesús, uca'm, e ri quek'alajisan re runa'oj ri Dios, urox, e ri e c'utunel re tak ruc'utunic ri Dios, yey e c'o ri caqui'an milagros ruc' ruchuk'ab ri Dios, ri quecunan ruc' ruchuk'ab ri Dios, ri quiya'om quib che quequito' jujun chic, ri ya'tal chique caquichap utza'm ri chac piglesia

y ri ya'tal chique quech'a't pa jujun chic ch'a'tem na quimajom taj.

²⁹ Junwi tak ri chac. Ma ¿konoje neba oj tako'n? ¿Konoje neba oj k'alajisanel re runa'oj ri Dios? ¿Konoje neba oj c'utunel? ¿Konoje neba oj 'anal milagros? ³⁰ ¿Konoje neba ya'tal chike oj cunanel? ¿Konoje neba cojch'a't pa jujun chic ch'a'tem ya'tal ruma ri Ruxlabixel ri Dios? ¿Konoje neba oj k'alajisanel re ri xbi'x ruma junok pa jun chic ch'a'tem ya'tal ruma ri Ruxlabixel ri Dios? Na konoje taj. ³¹ Rayij c'u alak urikic ri chac lic chirajawaxic che riglesia. Yey ri'in canc'ut chi jun be che alak, ri más chirajawaxic wi chwa ronoje wa', e ri rutzil c'u'xaj.

13

Ri lic chirajawaxic wi e ri rutzil c'u'xaj

¹ We ta e la' ri'in canrik quinch'a't pa uq'uiyal ch'a'tem que ri ticawex y canrik ne ri quich'a'tem ri ángeles yey na jinta ri rutzil uc'u'x ri Dios pa wanima', ri' xa in pacha' ri ch'ich' cayojoyotic o ri ch'ich' catzinowic.

² We ta e la' ya'tal chwe cank'alajisaj runa'oj ri Dios chiquiwach ri ticawex y canmaj usuc' ronoje ri ewatal chiquiwach jujun

chic y canmaj usuc' ronoje na'oj, y we ta lic c'o cubulibal nuc'u'x ruc' ri Dios cha' utz ruc' wa' canjalc'atij ne quiluwar ri nimak tak juyub, yey na jinta ri rutzil uc'u'x ri Dios pa wanima', ri' na jinta c'ana nuchac chwach ri Dios.

³ We ta e la' canjach chique ri niba'ib ronoje ri bitak we y tob ne canya wib re quimporoxic xa re tac'abal nuk'ij, yey na jinta ri rutzil uc'u'x ri Dios pa wanima', ri' na jinta c'ana cutikoj chwe.

⁴ We junok c'o ri rutzil uc'u'x ri Dios pa ranima',
ri' c'o unimal uc'u'x cuc' ri ticawex,
lic utz uc'u'x,
na c'ax ta uc'u'x chirij junok,
na cutac'aba' ta uk'ij
y na cu'an ta nim che rib.

⁵ We junok c'o ri rutzil uc'u'x ri Dios pa ranima',
ri' na cu'an ta ri na takal ta che.
Na xew ta coc il che ri cajawax che rire,
ma e ne coc il che ri cajawax chique ri jujun chic.
Na xa ta ruc' jutz'it cape royowal y na cuc'ol ta oyowal pa ranima'.

⁶ We junok c'o ri rutzil uc'u'x ri Dios pa ranima',
ri' cubisoj ri na jusuc' taj ca'anic yey lic caqui'cot che ri jusuc' ca'anic.

⁷ We junok c'o ri rutzil uc'u'x ri Dios pa ranima',
ri' cuyul re ronoje,
lic cubul uc'u'x ruc' ri Dios y cuc' ri jujun chic,
xaki e roye'em ri utz
y cuch'ij uchuk'ab janipa ri cape puwi'.

⁸ Ri rutzil c'u'xaj re ri Dios na casach ta c'ana uwach. Pero copon ri k'ij echiri' na caya' ta chi che junok cuk'alajisaj runa'oj ri Dios, na caya' ta chi ne che junok cach'a't pa jujun chic ch'a'tem na umajom taj y na caya' ta chi ne che junok cutzijo ri uk'alajisam ri Dios che; ma ronoje wa' xa caq'uisic.

⁹ Wo'ora na keta'am ta ronoje y na cakarik ta uk'alajisaxic ronoje runa'oj ri Dios. ¹⁰ Pero copon na c'u ri k'ij echiri' ronoje catz'akat uwach; ec'u ri' ri na tz'akat taj, xa caq'uisic. ¹¹ Ma ri'in echiri' in c'o'm, ronoje ri cambi'ij, ri canch'obo y ri canmaj usuc' e re juna c'o'm. No'j echiri' xinnimanic, xinya can ri can'an chi nuch'uti'nal.

¹² Wo'ora e pacha' cojtzu'n pa juna espejo sutz' uwach; no'j copon na ri k'ij cakil uwach ri Dios, c'a ec'uchiri' cak'alajin chikawach ri cakilo. Wo'ora na cak'alajin ta ronoje chinuwach; no'j c'o c'u jun k'ij echiri' cak'alajin ronoje chinuwach, jela' pacha' ri Dios lic reta'am ronoje ri c'o pa wanima'.

¹³ Wo'ora chirajawaxic cac'o'ji' cubulibal kac'u'x ruc' ri Dios tob c'amaja' cakil uwach, cakoy'ej rubi'tisim can ri Dios chike y cac'o'ji' ri rutzil uc'u'x ri Dios pa kanima'. Chique c'u wa oxib, ri más cajawax chike e ri rutzil c'u'xaj.

14

Ri quech'a't pa jujun chic ch'a'tem na quimajom taj

¹ Choca c'u alak il che cac'o'ji' ri rutzil c'u'xaj pa anima' alak, yey rayij alak urikic janipa ri uya'om ri Ruxlabixel ri Dios chike re 'anabal ruchac. Y che tak wa' wa ya'tal chike, ri lic cajawaxic e ri k'alajisanic re runa'oj ri Dios. ² Ma e ri jun ya'tal che ruma ri Ruxlabixel ri Dios cach'a't pa juna chic ch'a'tem na umajom taj y na camajtaj ta usuc', e ruc' ri Dios cach'a't wi, na e ta cuc' ri ticawex. Ma na jinta junok camajaw usuc' ri cubi'ij, ma wa' ewatal chiquiwach ri ticawex. ³ No'j ri jun cuk'alajisaj runa'oj ri Dios, cubi'ij wa' chique ri ticawex re quiq'uiyibal chwach ri Dios, re pixabanic y re cunimarisaj quic'u'x.

⁴ Ri jun ya'tal che cach'a't pa juna ch'a'tem na umajom taj, cu'an wa' re to'bal chiribil rib. No'j c'u ri jun ya'tal che cuk'alajisaj runa'oj ri Dios, ri' e

quebuto' conoje ri quetaw re y jela' queq'uiy ri tinamit re ri Cristo.

⁵ Chinuwach ri'in utz we ta caya'i' che onoje alak ri cach'a't alak pa jujun chic ch'a'tem na majom ta alak, pero ri lic utz e we ta caya'i' che alak cak'alajisaj alak runa'oj ri Dios pa ri ch'a'tem alak. Ma wa' más c'o cutikoj che riglesia chwa ri xa c'o cabi'x pa juna chic ch'a'tem na camajtaj ta usuc'. Yey wa' xew c'o cutikoj che riglesia we c'o junok cuk'alajisaj sa' que'elawi ri xbi'xic, y cubi'ij c'u wa' pa quich'a'tem ri quetaw re.

⁶ Ma we e la' quinopon uc' alak hermanos y xew quinch'a't chiwach alak pa juna ch'a'tem na camaj ta alak usuc', ¿sa' cutikoj ri' che alak? Na jintaj. No'j we pa ri ch'a'tem alak cantzijoj ruc'utum ri Dios chwe, cantzijoj ri weta'am puwi ri K'ijisak, cantzijoj ruk'alajisam ri Dios chwe o juna c'utunic, ronoje tak c'u ri' wa' lic c'o cutikoj che alak.

⁷ Ri jujun chic ch'a'tem na camajtaj ta usuc' canjunimaj ruc' jun su' o jun arpa; ma we na k'alaj ta uch'awisaxic ca'anic, na camajtaj ta usuc' ri cach'awisaxic. ⁸ Y jela' ri trompeta cach'awisaxic cha' ri soldados caquiyijba' quib re quebec pa ch'a'oj. Pero we na k'alaj ta uch'awisaxic ca'anic, ri soldados na quebec ta il che. ⁹ Jec'ula' ralak, we ri ch'a'tem quel lo pachi' alak na k'alaj taj, ¿su'anic c'u ri' camajtaj usuc' ri cabi'ij alak? Ma ri' xa e pacha' casach ri ch'a'tem alak pa ri tew.

¹⁰ Katzij wi uq'uiyal ch'a'tem c'o che ruwachulew y chujujunal lic c'o tak ube chiquiwach ri quech'a'tiben re. ¹¹ Yey we ri'in na weta'am taj sa' que'elawi ruch'a'tem junok, ri' pacha' in juna aj naj chwach ri cach'a'tic yey rire e juna aj naj chinuwach ri'in.

¹² Ec'u ralak, ruma ri lic carayij alak ri cuya ri Dios re 'anabal ruchac, e lic tzucuj alak u'anic ri lic quebuto' riglesia cha' quetiqui' jusuc' chwach

ri Dios. ¹³ Ruma c'u la' we c'o junok ya'tal che ruma ri Ruxlabixel ri Dios cach'a't pa juna ch'a'tem na majom taj, chutz'onoj c'u ri' che ri Dios cha' caya'taj che cuk'alajisaj wa' pa quich'a'tem ri quetaw re. ¹⁴ Ma we e la' ri'in can'an orar pa juna ch'a'tem na canmaj ta usuc', e ri wanima' ri cach'a't ruc' ri Dios, pero ri nuna'oj na jinta c'o caresaj che.

¹⁵ ¿Sa' c'u ri' ri can'ano? C'o jutak laj can'an orar y cambixoj rubi' ri Dios pa juna ch'a'tem na canmaj ta usuc' tob xew ri wanima' cach'a't ruc' Rire, pero también ruc' ri nuna'oj can'an orar y cambixoj rubi' ri Dios pa ri ch'a'tem canmaj usuc'. ¹⁶ Ma we rilal cayac la uk'ij ri Dios pa juna chic ch'a'tem na camajtaj ta usuc' yey wa' uya'om ri Ruxlabixel ri Dios che'la, y ri quetaw re na caquirik ta c'u ri ch'a'tem ya'tal che'la, ¿sa' c'u u'anic ri' caquibi'ij rique «Amén» che ri tioxibal x'an la we na xquimaj ta usuc' ri xbi'ij la? ¹⁷ Y tob lic chom ri tioxibal ca'an rilal, wa' na jinta cutikoj che ri quibinic quisilabic ri quetaw re.

¹⁸ Cantioxij che ri Dios ma ri'in más ya'tal chwe chiwach ralak quinch'a't pa jujun chic ch'a'tem na numajom taj. ¹⁹ Na ruc' ta c'u ri', echiri' quimolom quib ri tinamit re ri Cristo, más cuaj cambi'ij tob queb oxib ch'a'tem lic camajtaj usuc' cha' jela' c'o caquimaj ri jujun chic che, chwa ri canwererej lajaj mil chi ch'a'tem pa juna ch'a'tem na k'alaj taj.

²⁰ Hermanos, ri na'oj alak chu'ana pacha' ri quina'oj ri e nima'k chic. Ma'an e alak pacha' alak ac'alab puwi ri cach'ob alak, tob utz we e ca'an alak pacha' ac'alab chwach ri mac, ma rac'alab c'amaja' caqueta'maj wa'. ²¹ Ma chupa Rutzij Upixab ri Dios tz'ibital canok:

Pa tak ch'a'tem junwi y cuma tak ticawex e aj naj

quinch'a't cuc' wa tinamit.*

Yey tob c'u jewa' can'ano,

* **14:21** Ri Dios xebutak e aj naj cha' quetakan paquiwu rutinamit yey wa e aj naj xech'a't cuc' pa jun ch'a'tem na caquimaj ta usuc' rique. ✨ **14:21** Dt. 28:47-49

na caquicoj ta nutzij[☆]
28:11-12
cacha ri Dios Kajawxel.

²² Echiri' junok cach'a't pa juna ch'a'tem na camajtaj ta usuc', wa' e jun c'utubal chique ri na quicojom ta rubi' ri Cristo; no'j na je ta la' cuc' ri quicojom chi rubi'. Ec'u ri k'alajisanic re runa'oj ri Dios, na e ta que ri na quicojom ta rubi' ri Cristo, ma e que ri quicojom chi rubi'.

²³ Ma we e la' quimolom quib ri tinamit re ri Cristo y conoje c'ut quech'a't pa tak ch'a'tem na camajtaj ta usuc', yey coc c'u bi junok c'amaja' cumaj usuc' sa' wa' o junok c'amaja' cucoj rubi' ri Cristo, ¿sa' c'u ri cuch'ob che wa'? ¿Na cubi'ij ta nawi ch'u'jerinak alak? ²⁴ No'j we coc bi junok c'amaja' cucoj rubi' ri Cristo o c'amaja' cumaj usuc' sa' wa' yey cuto catajin alak che ubi'xiquil sa' ri uk'alajisam ri Dios che alak; ruc' c'u ronoje ri' ri cabi'ij alak, cuna' rib rire aj mac chwach ri Dios. ²⁵ Cak'alajin c'u ri' sa' ri c'o pa ranima' y jela' cakaj umejelem, culok'nimaj uk'ij ri Dios y cubi'ij pakatzij wi c'o ri Dios chixo'libal alak.

Echiri' cakamol kib, ka'ana ronoje chucholaj

²⁶ ¿Sa' c'u ri' rusuc' ca'an alak hermanos echiri' camol ib alak? Utz we e c'o ri caquibixoj rubi' ri Dios, e c'o ri caquiya c'utunic, e c'o ri quek'alajisan juna tzij re ri Dios. Utz we e c'o ri quech'a't pa juna chic ch'a'tem na quimajom taj yey e c'o ri quek'alajisan re wa ch'a'tem. 'Ana c'u alak ronoje wa' re uq'uiyibal ri quibinic quisilabic rutinamit ri Dios.

²⁷ Y echiri' molom ib alak, utz we xa e ca'ib o e oxibok quech'a't pa ch'a'tem na camajtaj ta usuc'; y qui'ana c'u wa' pa jujun, na xa ta jumul. Yey cajawaxic c'o junok cak'alajisan re wa'. ²⁸ Pero we chiquixo'l ri hermanos quimolom

Is. quib chiri' na jinta junok carikow uk'alajisaxic ri caquibi'ij, mech'aw c'u ri'; xew chech'a'ta ruc' ri Dios pa canima'. ²⁹ Jec'ula', utz we xa e ca'ib o e oxibok caquitzijoj sa' ri uk'alajisam ri Dios chique. Yey ri quetaw re lic quich'obo chi utz, we wa' e utzij ri Dios che rutinamit.

³⁰ We c'o junok catzijonic yey c'o cuk'alajisaj ri Dios che junok chic tz'ulic, ri catzijonic e chutanaba' ri cubi'ij; tec'uchiri', ri jun chic utz cujek ubi'xiquil ri tzij xuk'alajisaj ri Dios che. ³¹ Ma e tak ri ya'tal juna tzij re ri Dios chique, utz we chiquijujunal caquik'alajisaj wa', pero qui'ana c'u wa' pa jujun, na xa ta jumul, cha' jela' conoje c'o caquimaj che y quepixabax ruma.

³² E junok ya'tal che cuk'alajisaj juna tzij re ri Dios, c'o puk'ab ruchapabexic wa'.[†] ³³ Ma ri Dios e Dios re utzil chomal, na re ta sachibal na'oj.

Ec'u takej alak ri caqui'an tak rutinamit ri Dios echiri' caquimol quib. ³⁴ Rixokib mech'a'tic echiri' camol ib alak pa rubi' ri Cristo. Ma ri takal chique rique e caquicoj tzij jela' pacha' ri cubi'ij Rutzij Upixab ri Dios. ³⁵ Rixokib we c'o cacaj caqueta'maj, quitz'onoj c'u ri' chique ri cachijil chicocho, ma na ube taj quech'a't piglesia.[‡]

³⁶ C'una chic'u'x alak, na uc' ta alak petinak wi ri Tzij Pixab re ri Dios y na xew ta uc' ralak oponinak wi.

³⁷ We c'o c'u junok che alak cuch'obo curik uk'alajisaxic Rutzij ri Dios o lic cumaj usuc' runa'oj ri Dios, ri' chirajawaxic careta'maj wa': Ri cantz'ibaj che alak, ronoje e Utzij Upixab lo ri Kanimajawal. ³⁸ Pero we c'o junok na caraj ta cucoj wa nubi'im lok, ruc' c'u rire c'o wi. ³⁹ E uwari'che hermanos, ya'a ib alak che uk'alajisaxic ri tzij ya'om che alak ruma ri Dios. Yey mek'atej alak ri quech'a't pa jujun chic ch'a'tem ya'tal chique ruma

[†] 14:32 Ri que'elawi e chirajawaxic cuch'ob rakan chi utz jampala' y su'anic cuk'alajisaj ri tzij uya'om ri Dios che. [‡] 14:35 Wa' na e ta que'elawi rixok na utz taj cach'a't q'uenok piglesia. Ma ri Pablo cubi'ij utz we rixok cu'an k'alajisanic o cu'an orar echiri' quimolom quib rutinamit ri Dios. 1 Co. 11:5

ri Ruxlabixel ri Dios. ⁴⁰ Xew c'u lic 'ana alak ronoje chi utz y chuchola'j e chirij ri takalic ca'anic.

15

Ri c'astajibal re ri Kanimajawal Jesucristo

¹ Ec'u wo'ora, hermanos, cuaj can-cuxtaj che alak wa Utzilaj Tzij nutz-ijom chi che alak; e ri xcoj alak y chupa ne wa' tiquil wi alak. ² Ruma c'u wa Utzilaj Tzij, carik alak ri chomilaj c'aslemal petinak ruc' ri Dios we lic tiquil alak chupa wa nutz-ijom che alak. No'j we na tiquil ta alak chupa, na jinta c'u xutikoj ri' xcoj alak rubi' ri Cristo. ³ Ma ri nuc'utunic che alak e ri xc'ut chwe ri'in, yey ruc'u'xibal ri c'utunic e wa': Ri Cristo xcam ruma ri kamac jela' pacha' ri tz'ibital can chupa Ruch'a'tem ri Dios. ⁴ Yey Rire xmukic pero churox k'ij xc'astaj lo chiquixo'l ri ecaminak, jela' pacha' ri tz'ibital can chupa Ruch'a'tem ri Dios. ⁵

Ri Jesús xuc'ut uwach chwach ri Cefas;* tec'uchiri', chiquiwach ri cablajuj utako'n. ⁶ Tec'uchiri' xuc'ut uwach chiquiwach uq'uiyal hermanos echiri' quimolom quib, yey ri cajlibal wa' quic'ow ne uwi' che ri wo'ob ciento. Y chique wa' e q'ui ri c'a e c'aslic, tob e c'o jujun chique ya xecamic. ⁷ Yey xuc'ut uwach chwach ri Jacobo; tec'uchiri' xuc'ut tanchi uwach chiquiwach conoje rutako'n. ⁸ Q'uisbal chi c'u re, xuc'ut uwach chinuwach ri'in, tob pacha' in juna ralco ne' xalaxic na chupa ta ruk'ijol. ⁹

Xuc'ut c'u uwach chinuwach ri'in, tob ne lic na jinta co nuwach chiquiwach ri nic'aj chic utako'n ri Cristo, ma ri'in lic xebenuternabej ruc' c'axc'obic rutinamit ri Dios, ri quicojom rubi' ri Cristo. E uwari'che na takal tane cabi'x chwe in utako'n. ¹⁰ Pero ruma ri unimal rutzil uc'u'x ri Dios wuc', ya'tal chwe in jun chique rutako'n ri Jesús. Yey wa unimal rutzil uc'u'x lic c'o xutikoj ma ya'tal

chwe más quinchacun chiquiwach ri jujun chic utako'n; tob wa' na in tane in 'anayom re, ma e 'anayom re ri rutzil uc'u'x ri Dios wuc'. ¹¹ Tob china c'u ri ca'anaw ri chac, we e ri'in o e rique, pero xa jun rutzijoxic caka'ano; yey e ne wa' ri cojom ralak.

Ri c'astajibal que ri ecaminak

¹² We cakatzijoj c'u ruc'astajibal ri Cristo chiquixo'l ri ecaminak, ¿su'chac c'u ri' c'a e c'o jujun che alak caquibi'ij na jinta c'astajibal chique ri ecaminak? ¹³ Ma we ta e la' na jinta c'astajibal chique ri ecaminak, e que'elawi ri' na xc'astaj ta ri Cristo. ¹⁴ Yey we ri Cristo na xc'astaj taj, na jinta cutikoj ri' ri cakatzijoj y na jinta ne cutikoj ri' ri cubulibal c'u'x alak ruc' Rire. ¹⁵ Yey we na jinta junok cac'astaj lo chiquixo'l ri ecaminak, ri' coju'an xa oj aj rak'ul chirij ri Dios ma xkabi'ij Rire xuc'astajisaj lo ri Cristo. ¹⁶ Ma we ta e la' na quec'astaj ta ri ecaminak, na xc'astaj tane ri' ri Cristo. ¹⁷ Yey we ri Cristo na xc'astaj taj, na jinta cutikoj ri' ri cubulibal c'u'x alak ruc' y c'a sachinak ne alak ri' pa mac. ¹⁸ Yey we ta e ri', ri xecamic quicojom bi rubi' ri Cristo, xa jumul ri' xsach quiwach. ¹⁹ Ec'u ri'oj, ri kacojom rubi' ri Cristo, we ta xew wara che ruwachulew c'o koye'em che Rire, ri' chique conoje ri ticawex che ruwachulew e ri'oj ri más bisobal uwach ri kac'ulumam.

²⁰ Pero na e ta c'u ri', ma ri Cristo pakatzij wi xc'astajic. Yey e Rire ri nabe xc'astaj lo chiquixo'l ri ecaminak, y wa' e c'utubal re c'o c'astajibal chique ri ecaminak. ²¹ Ma jela' pacha' ri camic xoc cuc' conoje ri ticawex ruma jun chi achi, wa' e ri nabe ticawex; jec'uri'la' ri c'astajibal que ri ecaminak e ruma jun chi Achi, wa' e ri Cristo. ²² Konoje c'u ri' ri oj ticawex xa cojcamic ma junam kawach ruc' ri Adán, ma oj aj mac jela' pacha' rire; yey konoje c'u ri oj re ri Cristo, cakarik jun chomilaj c'aslemal na

☆ 15:3 Is. 53:5-12 ☆ 15:4 Sal. 16:8-10 * 15:5 “Cefas”: E jun chic ubi' ri Pedro. ☆ 15:5 Mt. 28:16-17; Mr. 16:14; Lc. 24:36; Jn. 20:19 † 15:8 Ri Pablo na xucoj ta rubi' ri Cristo junam cuc' ri nabe e tako'n. Hch. 9:3-6; 1 Co. 9:1

jinta utakexic. ²³ Pero ri c'astajibal ke ri'oj, e cu'ana na chupa ruk'ijol. Ma ri nabe xc'astajic e ri Cristo, yey we xc'un tanchi Rire, c'a tec'uchiri' cojc'astaj janipa ri oj re Rire.

²⁴ Ruc' c'u ruc'unic ri Cristo, cac'un ri q'uisbal k'ij. Yey cu'ana wa' echiri' ri Cristo cusachisaj quiwach conoje ri quech'o'jin chirij; wa' e ri e takanelab, ri c'o quiwach y ri c'o quichuk'ab. Y cuya na c'u ronoje ri' ri takanic puk'ab ri Kakaw Dios. ²⁵ Ma lic chirajawaxic ri Cristo catakan na puwi ronoje, quebuya na c'u chuxe' ri rakan conoje ri quech'o'jin chirij. ²⁶ Y q'uisbal c'u re, e casachisax uwach ri camic. †
²⁷ Ri Dios uya'om chi ronoje puk'ab Ruc'ajol, ma tz'ibital canok: «Ronoje tak c'u ri' ri c'olic, xya la puk'ab»* cacha'. Pero echiri' cubi'ij «ronoje», wa' na e ta que'elawi ri Dios uya'om rib puk'ab Ruc'ajol, ma e ne ri Dios xya'w ronoje puk'ab Ruc'ajol. ²⁸ Y echiri' ronoje c'o chi chuxe' ri rakan Ruc'ajol ri Dios, Rire cuya tanchi na ronoje puk'ab Rukaw, ri xya'w re ronoje che; y jela' ri Dios cac'oji' puwi ronoje ri c'olic.

²⁹ Yey we na jinta c'astajibal que ri ecaminak, ¿su'chac c'u ri' e c'o jujun chixo'l alak caquic'ul ri bautismo pa quibi' ri ecaminak chic? ¿Sa' cutikoj ri' chique caqui'an wa'? ³⁰ Yey we na jinta c'astajibal chike, ¿sa' ne cutikoj ri' xaki catewun ri camic pakawi' ri'oj ruma cakatzijoj ri Utzilaj Tzij? ³¹ Pakatzij wi hermanos, lic quin-qui'cot uma ralak, ma wuma ri'in cojom alak rubi' ri Kanimajawal Jesucristo. Ruma c'u la' na quinoc ta il che ri camic catewun panuwi' ronoje k'ij. ³² Chila' Éfeso lic xinch'o'jin cuc' "itzel tak awaj". § We ta na jinta nuc'aslemal chila' chicaj, ¿sa' c'u cutikoj ri' canc'ulumaj tak wa' che ruwachulew? We ta na quec'astaj ta ri ecaminak, c'o cutikoj ne ri' ri tzij

cabi'xic:

Chojwo'kok, chojk'abarok

ma xa cojcamic

Is. 22:13

cacha'.

³³ Masocotaj c'u alak ri' ruc' wa'; ma e pacha' ri jun tzij jewa' cubi'ij: «We juna achi jusuc' ubinic usilabic querachbilaj ri na jusuc' ta quina'oj y na chom ta quech'awic, ri' cayojtaj ri sakil ubinic usilabic»* cacha'. ³⁴ Lic c'u chirajawaxic cac'un sak chiwach ralak y mamacun chi alak. Y cha' caq'uix c'ana alak che, cambi'ij wa' che alak: C'a e c'o ne jujun che alak na queta'am ta uwach ri Dios.

Su'anic quec'astaj ri ecaminak

³⁵ Laj ne c'o junok cu'an wa tz'onobal: «¿Su'anic quec'astaj ri ecaminak? ¿Sa' ri quicuerpo we xec'astajic?» cacha'. ³⁶ Ri catz'onow re wa', lic k'alaj na cumaj ta usuc' puwi ri c'astajibal. Ma ri c'astajibal e pacha' juna ija'. Echiri' catiquic, nabe na cachakijic; c'a tec'uchiri' catuxic. ³⁷ Yey ri catiquic, tob ija' re trigo o juna chic tico'n, na junam ta chi catzu'nic echiri' quel lok, ma rija' lic junwi catzu'n chwa rutux. ³⁸ Ri Dios cu'an che ri tico'n cabojanic jela' pacha' ri caraj Rire, y chujujunal uwach tak rija' cu'an che jela' pacha' ri takal che.

³⁹ Qui tak quiwach ri e c'o che ruwachulew. Jela' pacha' ri tico'n junwi, jec'ula' tak ri c'o quitijil, na junam ta quiwach. Ma junwi ri quitijil ri ticawex y junwi ri quitijil ri chicop; jec'ula' junwi ri quitijil ri car yey junwi ri quitijil rawaj quexiq'uiq'uic.

⁴⁰ C'o c'u e 'anatalic e quiwach e c'o chicaj, yey c'o e 'anatalic e quiwach e c'o che ruwachulew. Ma junwi ri quichomalil ri e c'o chicaj chwa ri quichomalil ri e c'o che ruwachulew.

⁴¹ Tak ri e c'o chicaj, conoje quewonic, pero na junam ta ri quiwonibal. Ma

† **15:26** "Ri camic": Pa ri ch'a'tem griego cubi'ij ri camic e jun "aj retzelal c'u'x". Cubi'ij wa' ma lic xibibal uwach yey na jinta c'o cajawan re. * **15:27** Sal. 8:6 § **15:32** "Itzel tak awaj": Laj e tak ri winak itzel quic'u'x xeyacataj chirij ri Pablo. * **15:33** Pr. 13:10; 28:7

ruwonibal ri k'ij junwi chwa ruwonibal ri ic' y ri ch'umil. Yey chiquijujunal ch'umil junwi tak ne ri quichomalil.

⁴² Ri cuc'ut wa jun c'ambal na'oj puwi rija' e wa': Ri kacuerpo che ruwachulew junwi chwa ri caya' chike chikawach apanok. Echiri' cojcamic, ri kacuerpo camukic y cak'ayic. Yey echiri' cojc'astajic, lic junwi ri kacuerpo, ma wa' na cacam ta chic. ⁴³ Ri kacuerpo echiri' camukic, na jinta c'ana uwach. No'j we xc'astaj lo che ri camic, cu'ana lic c'o uwach. Jec'ula' echiri' camuk ri kacuerpo, na jinta c'ana uchuk'ab; no'j we xc'astaj lok, cu'ana lic c'o uchuk'ab. ⁴⁴ Ri kacuerpo echiri' camukic, xa re ruwachulew; no'j echiri' cac'astaj lo che ri camic, cu'ana jun cuerpo lic rewi re ri c'aslemal chila' chicaj. Ma jela' pacha' wa kacuerpo lic rewi re ri kac'aslem wara che ruwachulew, jec'ula' cajawax jun kacuerpo lic rewi re ri kac'aslemal chila' chicaj.

⁴⁵ Ma tz'ibital can chupa Ruch'a'tem ri Dios: "Echiri' x'an ri nabe achi Adán, xya' uc'aslem."* No'j ri "uca'm Adán" (wa' e ri Cristo) e aj ya'l ri chomilaj c'aslemal na jinta utakexic. ⁴⁶ Ri kacuerpo xya' nabe, xa e re ruwachulew. Chikawach c'u apanok caya' jun cuerpo chike lic rewi re ri kac'aslemal chila' chicaj. ⁴⁷ Ri nabe achi e re ruwachulew, ma x'ani' ruc'ulew. Pero ruca'm achi, wa' e ri Kanimajawal Jesucristo, e re chicaj ma chila' petinak wi. ⁴⁸ Wo'ora ri kacuerpo e pacha' rucuerpo ri nabe achi, xa re ulew; no'j echiri' cojc'astaj lo chupa ri camic, ri cuerpo caya' chike e pacha' ri cuerpo c'astajinak re ri Jun xpe chila' chicaj. ⁴⁹ Y tob wo'ora ri kacuerpo xa e pacha' re ri jun achi 'anom ruc'ulew, copon na c'u ri k'ij ri kacuerpo cu'ana jela' pacha' re ri Jun xpe chila' chicaj.

⁵⁰ Cambi'ij c'u che alak hermanos, ri'oj na utz taj cojoc pa rutakanic ri Dios chila' chicaj ruc' wa cuerpo re

ruwachulew, ri xa cacamic; ma wa' na takal ta che ri kac'aslemal na jinta utakexic.

⁵¹ Tape alak, ma cank'alajisaj chiwach alak ri na eta'matal ta lo ojer-tan. Ri oj re ri Cristo, na konoje taj cojcamic, pero konoje cajalc'atix uwach ri kacuerpo echiri' ri Cristo cac'un tanchic. ⁵² Wa' xa pa jok'otaj cu'ano, e pacha' echiri' junok cuyupij ruwach. Echiri' catataj c'u ri q'uisbal uch'awibal ri trompeta, xakic'ate't quec'astajisax lo ri ecaminak ruc' jun cuerpo na cacam ta chic; yey janipa c'u ri oj c'aslic, cajalc'atix uwach ri kacuerpo. ⁵³ Ma ri kacuerpo wo'ora xa cacamic. Lic chirajawaxic c'ut cajal uwach ruc' jun na cacam ta chic. ⁵⁴ Ec'uchiri' caya' ri kacuerpo na cacam ta chic, c'a e ri' cu'ana na ri tz'ibital can pa Ruch'a'tem ri Dios:

Xsach c'u uwach ri camic,
ma ri c'aslemal xuch'ij uchuk'ab.
Is. 25:8

⁵⁵ Yey cubi'ij che ri camic:

¿Pa c'o wi ri' rachuk'ab wo'ora?
¡Na jinta chic!

Ma na jinta chi achuk'ab pakawi' re
ca'an c'ax chike,

xatu'an jela' pacha' ri akaj echiri' na
jinta chi uxul re cati'o'nic *Os.*
13:14
cacha'.

⁵⁶ Ma e ri mac cuya lo uchuk'ab ri camic cha' cu'an c'ax chike. Yey e ruma ri mac caka'ano, cak'alajinic takal chike cak'at tzij pakawi' ruma xkapalajij Rutzij Upixab ri Dios. ⁵⁷ Pero xa maltiox c'u che ri Dios, ma Rire cuya chike cakach'ij uchuk'ab ri mac ruma ri Kanimajawal Jesucristo. ⁵⁸ E uwari'che alak nu hermanos, ri lic c'ax canna' alak, lic tiquila alak jusuc' y maya c'u alak luwar che ritzel cuch'ij chuk'ab alak. E lic ya'a ib alak che u'anic ruchac ri Kanimajawal, ma eta'am chi alak lic c'o cutikoj ronoje ri chac ca'an alak pa rubi'.

* 15:45 Gn. 2:7

16

Ri kasa'n catak bi chique rutinamit ri Dios

¹ Chwi c'u ri kasa'n catajin alak che umolic re to'bal que ri hermanos,* cambi'ij c'u che alak: Jela' 'ana alak che pacha' rumolic ximbi'ij chique riglesias e c'o Galacia. ² Ronoje tak nabe k'ij che ri semana, chijujunal alak quesaj alak ri kasa'n alak e chirij ri cach'ac alak y cac'ol c'u alak ri'. 'Ana alak wa' cha' we xinopon ri'in, na junta chi kasa'n camol alak, ma c'olotal chic. ³ Y we xinopon c'ut, quebenutak bi Jerusalem ri hermanos cacha'i' uma ralak che ujachic ri kasa'n y canya bi jun carta chique puwi wa'. ⁴ Y we cajawaxic quin'ec ri'in cuc', junam ne ri' coj'ec.

Ri benam caraj cu'an ri Pablo

⁵ Quinopon na uc' alak, pero nabe na quinic'ow pa tak riglesias e c'o Macedonia; tec'uchiri' quinopon chila' Corinto. ⁶ Yey laj ne quincanaj can uc' alak y quinnajtir chiri' ma canwoy'ej na quic'ow ruk'ijol echiri' c'ax tew y c'o jab, y jela' utz quinto' bi alak echiri' canmaj tanchi ubi nube. ⁷ Ma ri'in na cuaj taj quinic'ow uc' alak xa pa c'alalem; cuaj quinc'oji' uq'uial k'ij uc' alak, we e caraj ri' ri Kanimajawal. ⁸ Pero c'amaja' quin'ec ma cuaj quinc'oji' na wara Éfeso pa ri nimak'ij re Pentecostés. ⁹ Na cuaj ta c'u quinel bi wara wo'ora, ma ri chac ya'om chinuwach lic nim y lic utz elinak, yey ruma ne wa' lic e q'ui ri eyactajinak chwij.

Q'uisbal Pixabanic che riglesia c'o Corinto

¹⁰ We xopon ri Timoteo uc' alak, c'ulu alak chi utz cha' cac'oji' uc' alak chi utzil chomal; ma rire jela' pacha' ri'in, junam cojchacun pa ruchac ri Kanimajawal. ¹¹ E uwari'che, na utz taj we c'o junok che alak cuc'ak bi uk'ij rire; e to'ok alak che rupetic cha'

cumaj tanchi lo ube chi utzil chomal, ma ri'in woye'em catzelej lo wuc' junam cuc' ri jujun chic hermanos.

¹² Chwi c'u ri hermano Apolos, ri'in lic xinelay che cha' querachbilaj bi ri hermanos quebec chila' uc' alak, pero na xraj ta q'uenok xe'ec wo'ora. C'o juna k'ij la' echiri' caya'taj che copon uc' alak.

¹³ Lic chajij ri binic silabic alak, tiquila alak chi utz chupa ri cubulibal c'u'x alak ruc' ri Dios, lic chuk'ubej ib alak chwach ri Dios y moc c'u xi'in ib uc' alak. ¹⁴ Janipa ri ca'an alak, 'ana alak ronoje ruc' rutzil c'u'xaj.

¹⁵ Hermanos, eta'am chi alak ri hermano Estéfanos cuc' rufamilia e rique ri nabe xquicoj rubi' ri Cristo chixo'libal alak chila' Acaya,† yey rique lic quiya'om quib che quito'ic tak ri hermanos. ¹⁶ Ec'u cuaj ri'in e catakej alak janipa ri caquibi'ij che alak; jec'ula' ri' 'ana alak chique conoje ri e jela' pacha' rique, ma rique e to'bel y lic quiya'om quib pa ruchac ri Dios.

¹⁷ Lic xinquic'ot ruc' ri quic'unic ri Estéfanos, ri Fortunato y ri Acaico, ma rique e petinak Corinto pac'axel ralak; ec'u canna' ri'in e pacha' xc'un ralak wuc'. ¹⁸ Ma rique lic xquini-marisaj nuc'u'x ri'in y jenela' xqui'an che ralak. Takal c'u ri' cayac quik'ij conoje ri caqui'an jela' pacha' rique.

¹⁹ Ri hermanos e c'o pa tak riglesias re Asia caquiya pan rutzil wach alak. Ri hermano Aquila y ri hermana Priscila cuc' conoje ri caquimol quib chicocho, lic caquiya pan rutzil wach alak pa rubi' ri Kanimajawal Jesucristo. ²⁰ Yey conoje ri hermanos wara caquiya pan rutzil wach alak. Ya'a c'u rutzil wach alak chiwach alak ruc' jun sakil tz'ubuj chi'aj‡ chwach ri Dios.

²¹ Wo'ora e ri'in in Pablo, in ri quintz'iban re wa rutzil wach alak ruc' ri nuk'ab.

* **16:1** Wa kasa'n e to'bal que ri hermanos e c'o pa c'ax chila' Jerusalem. Ro. 15:26; 2 Co. 8-9 † **16:15** Corinto e jun tinamit c'o pa ri luwar re Acaya. ‡ **16:20** "Jun sakil tz'ubuj chi'aj": Ri Pablo jewa' xubi'ij ma rique e caqui'an wa' chiquiwach echiri' caquiya rutzil quiwach.

²² ¡Ya cac'un lo ri Kanimajawal Jesucristo! Janipa c'u ri na c'ax ta caquina' Rire, c'o chi ri k'atbal tzij re ri Dios paquiwi'. ²³ C'ulu alak ri unimal rutzil uc'u'x ri Kanimajawal Jesucristo. ²⁴ Lic c'ax canna' onoje alak pa rubi' Rire. Amén.

Ruca'm carta xutz'ibaj ri Pablo che riglesia c'o Corinto

*Ri Pablo cuya pan rutzil quiwach ri
hermanos e c'o pa ri tinamit Corinto*

¹ Ri'in in Pablo in tako'n re ri Kanimajawal Jesucristo ma e ri Dios ya'yom wa chac chwe. Ri'in junam ruc' ri hermano Timoteo cakaya pan rutzil wach alak, ri alak utinamit ri Dios re riglesia c'o Corinto, y chique conoje ri hermanos ejekel chupa ronoje tak ri luwar re Acaya.*
² C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

Ri bochibal kac'u'x cuya ri Dios

³ ¡Lic nim uk'ij ri Dios, Rukaw ri Kanimajawal Jesucristo! Ma e Rire ri lic cuc'ut ri c'axna'bal uc'u'x chike y ruc' Rire cape wi ri bochibal kac'u'x. ⁴ Rire e cabochi'in kac'u'x chwach ronoje c'axc'obic, cha' jela' ri'oj utz cakabochi'ij quic'u'x ri e c'o chupa ronoje c'axc'obic. Cakaya c'u ri bochibal c'u'xaj jela' pacha' ri uya'om ri Dios chike ri'oj. ⁵ Ma echiri' canimar ri c'axc'obic pakawi' ruma oj re ri Cristo, e lic canimar ri bochibal c'u'xaj cuya ri Cristo chike. ⁶ Echiri' ri'oj cakatij c'ax yey ri Dios cubochi'ij kac'u'x, wa' cuc'am lo bochibal c'u'xaj y colobetajic re ri Dios che ralak. Jec'ula' ri c'ax katijom y ri bochibal c'u'xaj kac'ulum ri'oj, lic c'o cutikoj che alak cha' jela' cach'ij alak uchuk'ab ri c'axc'obic pacha' ri kic'owibem ri'oj. ⁷ Lic kajiquibam c'u uwach ri cubulibal kac'u'x uc' alak. Ma keta'am alak jun kuc' ri'oj chupa ri c'axc'obic, jec'ula' alak jun kuc' ri'oj che uc'ulic ri bochibal c'u'xaj cuya lo ri Dios.

⁸ Cakaj c'ut, hermanos, queta'maj alak janipa chi c'axc'obic xkic'owibej chila' Asia. Ruma wa unimal c'axc'obic xpe pakawi', xkana'o na

jinta chi kachuk'ab che uch'ijic wa' y xkach'ob nenare' na jinta chi pa sak cojc'asi'ic. ⁹ E xkana' ri'oj e pacha' k'atom chi tzij re camic pakawi'. Pero c'o xutikoj chike ri xkic'owibej, ma ruc' wa' xkamajo na jinta uchac ri cacubi' kac'u'x chikibil kib; xew e cubul kac'u'x ruc' ri Dios, ri quebuc'astajisaj lo ri ecaminak. ¹⁰ Ri Dios e xojesan chwa wa camic yey c'a catajin ne che kato'ic. Cubul c'u kac'u'x ruc', ma keta'am ruc' ruto'bal Rire cojel pan chi utz wo'ora y chikawach apanok. ¹¹ Y ralak cojto' ne alak echiri' ca'an alak orar pakawi' chwach ri Dios. Jec'ula' we e q'ui ri xebanaw re wa', e q'ui ri' ri quetioxin chwach ri Dios ruma ri cu'an Rire kuma ri'oj.

*Ri Pablo cuk'alajisaj su'be na
xic'ow ta Corinto*

¹² C'o ri cuya qui'cotemal chike; wa' e ri kabinic kasilabic kac'utum chwach ralak y chiquiwach conoje ri winak, ma cakana' chikac'u'x lic sakil y jusuc' ri kabinic jela' pacha' ri caraj ri Dios. Yey wa ka'anom na e ta ruma unimal na'oj re ruwachulew; e ruma ruto'bal ri Dios kuc'. ¹³ Janipa ri cajilaj alak che ri kacartas, lic e kana'oj ri' che alak cha' jela' camaj alak usuc'. ¹⁴ Wo'ora majom alak usuc' jubik' puwi ri ka'anom; koye'em c'u ri k'ij echiri' camaj alak usuc' ronoje, cha' jela' pa ruc'unibal ri Kanimajawal Jesucristo lic caqui'cot alak chike ri'oj, jela' pacha' ri'oj cojqui'cot che ralak.

¹⁵ Ruc' c'u wa cubulibal nuc'u'x uc' alak, xuaj quinic'ow nabe uc' alak cha' jela' calaj cac'ul alak ri relej nuc'u'x, ¹⁶ ma xinch'obo quinic'ow uc' alak echiri' quin'ec Macedonia y quinic'ow tanchic echiri' canmaj bi nube Judea y jela' quinto' bi alak che ri nubenam. ¹⁷ Jela' ri xinch'obo can'ano, tob na e ta xu'ana'. Ruma c'u la', laj chiwach ralak na xinch'ob ta chi utz sa' ri can'ano. ¿Xa nawi pa we ri'in canch'ob rakan ri can'ano? ¿O xa nawi queb uwa ri nuch'a'tem, pacha' junok cubi'ij: «Lic jiquil uwach

* **1:1** Corinto e jun tinamit c'o pa ri luwar re Acaya.

quin'ec,» tob reta'am chiribil rib na que'ec taj? ¹⁸ No'j ri'in na je ta la' can'ano. Ma ruma lic jusuc' ri Dios kuc', na utz ta c'u ri' we ri kach'a'tem queb uwach que'elawi chiwach alak. ¹⁹ Jec'ula' ri Kanimajawal Jesucristo, Ruc'ajol ri Dios, ri xojtzijon puwi' che alak junam cuc' ri Silvano y ri Timoteo, ruch'a'tem Rire na queb ta uwach que'elawi; ma ronoje ri cubi'ij lic katzij. ²⁰ Yey ruma Rire e cu'ana janipa tak rubi'tisinic ri Dios kuc'. E uwari'che cakayac uk'ij ri Dios, cakabi'ij «Are!» y «Amén» che ronoje ri ubi'im lo chike. ²¹ Yey e ri Dios ri cujiquiba' kac'u'x chi utz ruc' ri Cristo junam uc' alak y xojucha'o cha' coju'an re Rire. ²² Ec'u Rire uya'om ri Ruxlabixel pa kanima', c'utubal re oj c'o chi puk'ab yey cu'ana na c'u ronoje ri ubi'tisim lo chike.

²³ Lic caril ri Dios ri c'o pa wanima' y reta'am c'ut su'be na xinic'ow ta chila' Corinto pacha' ri xinch'obo. E ma na xuaj taj coc bis chic'u'x alak ruma canch'a'bej pa alak.† ²⁴ Na e ta c'u coje'takana pawil' alak chwi ri cojom alak; ma ruma ri cubulibal c'u'x alak, tiquil alak chi utz. Ri caka'ano e cojchacun uc' alak cha' cac'o'ji' ri qui'cotemal pa anima' alak.

2

¹ Ruma c'u la', xinch'obo na quino-pon ta tanchi uc' alak, ma na xuaj taj canya alak pa bis. ² Ma we ri'in canya alak pa bis, ¿china chi c'u ri' caya'w qui'cotemal chwe ri'in? Na junta c'u nuqui'cotemal ri' we nuya'om alak pa bis. ³ Ruma c'u ri' xintz'iban pan che alak,* cha' we xinopon uc' alak, na quinya ta alak pa bis, ma qui'cotemal ri canwoy'ej che alak. Lic c'ut cubul nuc'u'x uc' onoje alak, ma weta'am e janipa ri cuya qui'cotem chwe ri'in, cuya qui'cotem

che ralak. ⁴ Na xa ta jubik' ri c'ax y ri paxibal c'u'x xinic'ow wi echiri' ruc' ok'ej xintz'iban pan che alak. Na xin'an ta c'u wa' cha' canya alak pa bis, ma e xin'ano cha' queta'maj alak lic nim ri rutzil nuc'u'x che alak.

Cuyu alak umac ri jun xutzelej utzij

⁵ Xintz'iban c'u pan puwi ri jun xinuya ri'in pa bis ruma rumac u'anom. Y na xew ta ri'in, ma laj ne uya'om onoje ralak pa bis. (Cambi'ij “Laj” cha' na lic ta c'ax catataj wa nuch'a'tem.) ⁶ Cu'an na c'u la' janipa ri x'an alak che wa jun ticawex echiri' xk'at alak tzij puwi', ma ruc' wa' xutzelej utzij. ⁷ Ec'u ri takal che ca'an alak wo'ora e cuyu alak umac y bochi'ij alak uc'u'x cha' jela' na casach ta ruma runimal ubis. ⁸ Cantz'onoj c'u co che alak c'utu tanchi alak ri rutzil c'u'x alak che. ⁹ Ri xuaj ri'in ruc' wa carta e canwilo we coc alak il che ronoje ri nupixabanic. ¹⁰ We ralak cacuy alak umac junok, jela' ri'in cancuy umac. We c'o c'u cajawax wi cacuy umac, ri'in nucuyum chi umac uma ralak y chupa rubi' ri Cristo. ¹¹ Can'an c'u wa' cha' ri Satanás na cumaj ta uchuk'ab pakawi', ma lic keta'am chi runo'jibal chikij.

Ri Pablo xraj cuto sa' u'anom riglesia c'o Corinto

¹² Echiri' xinopon chupa ri tinamit Troas che utzijoxic ri Utzilaj Tzij re ri Cristo, lic chom ri jekebal re ri nuchac xuya ri Kanimajawal chwe; ¹³ na ruc' ta c'u ri', na xcubi' ta ri wanima', ma na xinrik ta ri hermano Tito chila'. Ruma c'u ri', xebenuya can ri hermanos e c'o Troas y ximpe Macedonia cha' co'lnutzucuj.†

Ri chomilaj chac uya'om ri Dios chike

¹⁴ ¡Xa maltiox c'u che ri Dios! Ma cojel pan chi utz chwa ronoje

† **1:23** Ri Pablo xuto c'o jun hermano chila' Corinto xmacunic y ri nic'aj hermanos na xeboc ta il che wa mac. Quil 1 Corintios 5:1. E uwari'che na xraj taj copon cuc' we c'amaja' caquiyijba' wa'. Ec'u ri xu'ano, e xtz'iban pan chique cha' caquiyijba' wa' y jela' rire utz copon cuc' ruc' utzil chomal. * **2:3** Quil nota 2 Corintios 1:23. † **2:13** Ri Pablo lic roye'em quirason ri hermanos e c'o Corinto, ma caraj careta'maj we xutzir ri problema e c'o wi. Quil 2 Corintios 7:5-16.

ruma ri Cristo, yey ya'tal chike cakak'alajisaj ruc'u'x Rire. Ma kuma ri'oj que'ec utzijoxic ri Cristo che ronoje luwar, e pacha' cunabal qui' ruxlab camuyuyic. ¹⁵ Oj c'u pacha' cunabal lic qui' ruxlab camuyuyic copon chwach ri Dios, ma kuma ri'oj cak'alajin ruc'u'x ri Cristo chiquiwach ri quecolobetajic y chiquiwach ri catajin quisachic. ¹⁶ Ec'u rutzijoxic caka'ano e pacha' utewul camic chiquiwach ri na cacaj ta caquito, ma cuc'am lo camic paquiwi'. No'j chiquiwach ri quec'uluw re, e pacha' cunabal qui' ruxlab, ma cuc'am lo chomilaj c'aslemal chique. Chwach c'u wa' wa nimalaj chac re ri Dios, ¿china cach'ijow u'anic?*

¹⁷ Ri'oj na caka'an ta pacha' ri caqui'an jujun, ma e q'ui ri quijalc'atim Ruch'a'tem ri Dios, xa qui'anom ch'acabal puak che rutzijoxic; no'j ri caka'an ri'oj chwach ri Dios y pa rubi' ri Cristo, e cakatzijoj pa sakil wi ri Tzij uya'om ri Dios chike.

3

¹ Echiri' quinch'a't chwi ri chac uya'om ri Dios chike, na e ta re cantac'aba' kak'ij. Ma ¿cajawax nawi canya juna carta chiwach alak, c'utubal re ri chac ka'anom? ¿Cajawax nawi cantz'onoj che alak catz'ibaj alak juna carta cubi'ij we utz ri chac ka'anom? Laj c'o jujun cajawax wa' chique, pero ri'oj na cajawax ta chike; ² ma e ralak ri alak kacarta, alak c'utubal re ri kachac ka'anom. Lic tz'ibital c'u pa kanima' janipa ri u'anom ri Dios uc' alak kuma ri'oj, yey wa chac lic cak'alajin chiquiwach conoje ri ticawex ruma ri c'ac' binic silabic alak. ³ Lic c'ut k'alaj e alak c'utubal re ri kachac ka'anom, e pacha' alak jun carta tz'ibital ruma ri Cristo. Yey wa' wa carta na ruc' ta tinta tz'ibital wi, e ruma ri Ruxlabixel ri Dios c'aslic; y na chwa ta ne jutak pera'j abaj xtz'ibax wi pacha'

u'anom ojertan,* ma tz'ibital chupa ri canima' ri ticawex.

⁴ Ruma c'u ri u'anom ri Cristo kuc', cakajiquiba' uwach ri cakabi'ij puwi ri kachac yey ri Dios reta'am lic katzij wa'. ⁵ We ta e la' xa katuquel, na cakach'ij ta u'anic wa chac, ma keta'am xew ruc' ri Dios petinak wi ri kana'oj y kachuk'ab che u'anic ruchac Rire. ⁶ Ec'u ri Dios mismo ri xya'w wa chac chike, uya'om kana'oj y kachuk'ab re cakak'alajisaj chi utz ri c'ac' tzij cu'an Rire cuc' ri ticawex. Yey na cu'an ta wa' ruma katakem takanic, ma e ruma ri cu'an ri Ruxlabixel ri Dios pa kanima'. Ma ri takanic cuc'am lo k'atbal tzij re camic pakawi', no'j ri cuya ri Ruxlabixel ri Dios chike e c'aslemal.*

Ri c'ac' tzij

⁷ Ri takanic tz'ibital can chwa abaj cuc'am lo camic, pero lic c'o uchomalil. Ma lic xwon rupalaj ri Moisés echiri' xuc'ul wa takanic, c'utubal re ruchomalil Rutzij ri Dios. Yey ri e aj Israel na utz ta xquitzu' uwach ri Moisés ruma wa' wa wonibal,* yey wa' xa xic'owic. ⁸ We c'o c'u uchomalil ri takanic xuya lo ri Dios ojertan, jjanipa c'u lo ri' ruchomalil ruchac ri Ruxlabixel ri Dios cu'an kuc'! ⁹ We c'o c'u uchomalil wa takanic, ri xuk'alajisaj ri k'atbal tzij re ri Dios paquiwi ri ticawex ruma ri quimac, jjanipa c'u lo ri' ruchomalil ri jun chic tzij, ri cuc'ut chike su'anic coju'an jusuc' chwach ri Dios! ¹⁰ Ri takanic xuya ri Dios ojertan c'o uchomalil, pero ruchomalil wa' na cajunimax ta c'ana ruc' ri c'ac' tzij. ¹¹ Rupalaj ri Moisés xwon xa pa jok'otaj ruma ruchomalil ri Tzij xuya ri Dios che; pero ¡más c'o uchomalil ri' ri c'ac' tzij, ma wa' na casach taj!

¹² Ruma lic cubul kac'u'x che wa na casach taj, ri'oj lic cakak'alajisaj chi utz ri c'ac' tzij y na jinta cakewaj che. ¹³ Na e ta pacha' rojertan echiri' ri Dios xuya ri takanic che ri Moisés, ma rire xuch'uk rupalaj ruma lic xwonic, cha' ri e aj Israel na caquitzutza' ta

ruwonibal, ri xa quic'owic.✧ 14 Ec'u rique na xcaj ta caquimaj usuc' Rutzij ri Dios y c'a e ne wak'ij ora echiri' cacajilaj wa Tzij Pixab xuya ri Dios ojertan, na caquimaj ta usuc'; e pacha' ch'ukutal ri quiwach. Yey wa' wa ch'ukuyum ri quiwach, xew ri Cristo quesán re chique. 15 C'a wak'ij ora nenare' echiri' cacajilaj wa Tzij Pixab tz'ibital can ruma ri Moisés, e pacha' ch'ukutal ri quiwach y ruma la' na cak'alajin ta ri K'ijsak chiquiwach.* 16 No'j echiri' junok cutzelej utzij chwach ri Kanimajawal, quesax na c'u ri' ri ch'ukuyum ruwach. 17 Ri Kanimajawal e junam ruc' ri Ruxlabixel ri Dios;† y china ri c'o ri Ruxlabixel ri Kanimajawal pa ranima', na jinta chi chuxe' rutakanic junok chic. 18 Konoje ri'oj na ch'ukutal ta chi ri kawach. E uwari'che, cakil chi utz ruchomalil ri Kanimajawal y cojwolk'in che uk'alajisaxic wa' ruc' ri kabinic kasilabic. Ma jalan catajin kajalc'atixic cha' jela' coju'ana pacha' ri Kanimajawal. Yey ri Ruxlabixel Rire e ri ca'anaw re wa' kuc'.

4

Ri Pablo cuk'alajisaj ri chomilaj K'ijsak re ri Dios

1 Ruma c'u wa' na capax ta kac'u'x che u'anic wa chac, ma wa' ya'tal chike ruma ri rutzil uc'u'x ri Dios. 2 Ri'oj na jinta c'o caka'an xa xe'lak'ay y q'uixbal uwach, na quekasoc tane ri ticawex yey na cakacoj tane uwi' ri cubi'ij Rutzij ri Dios. Ma e cakac'ut pa sakil wi ri K'ijsak cha' jela' conoje ri queta'w re, caqueta'maj lic jusuc' ri caka'ano. 3 Yey we c'o caquich'obo na k'alaj ta ri Utzilaj Tzij, wa' e chique ri catajin usachic quiwach. 4 Rique na caquicoj ta ri Utzilaj Tzij ma sachisam ri quina'oj ruma ri jun catakan che ruwachulew; wa' e ritzel

winak, ri xu'an pacha' potz' chique cha' na caquil ta ri chomilaj K'ijsak re ri Cristo, ri cuc'utubej uwach ri Dios. 5 Na e ta c'u cakatziyoj kib ri'oj; ri cakatziyoj e ri Jesucristo e Takanel paquiwi conoje yey ri'oj xa oj nimanal e alak, ma e caraj ri' ri Jesús chike.✧ 6 Ma ri Dios ri xtakan che xwon ri k'ijsak chupa ri k'eku'm,✧ e Rire ri xwon chupa ri kanima' cha' ruc' la' caketa'maj runimal uchomalil Rire, ri cak'alajin ruma ri Cristo.*

Mapax kac'u'x tob cojic'ow pa c'axc'obic

7 Ri K'ijsak re ri Dios e jun nimalaj beyomalil, yey uk'alajisam wa' chike tob ri'oj xa oj ulew poklaj. Jela' xu'ano cha' cak'alajin wa': Ri unimal chuk'ab c'o kuc', na ke ta ri'oj, ma ruc' ri Dios cape wi. 8 Tob cape c'u uq'uiyal uwach c'axc'obic pakawi', cojel na chupa. Tob c'o ubis kac'u'x, na capax ta kac'u'x che. 9 Tob cojternabex ruc' c'ax, ri Dios na oj rok'otam taj. Tob ne cojmach'ax pulew, na caquisach ta kawach. 10 Pa tak coj'ec wi, ri kacuerpo xaki chwach ri camic c'o wi, jela' pacha' ri xuc'ulumaj ri Jesús; yey cojic'ow chupa wa' cha' ruc' ri kabinic kasilabic cak'alajin ruc'aslemal ri Jesús.† 11 Wa oj c'o wara che ruwachulew, xaki catewun ri camic pakawi' ruma oj aj chac re ri Jesús; yey cojic'ow chupa wa' cha' quilitaj ruc'aslemal ri Jesús che ri kacuerpo, tob ri kacuerpo na jinta ucowil ma xa cacamic. 12 Jela' c'u ri' ri camic c'o pakawi' ri'oj; yey ruma wa', ralak rikom alak ri chomilaj c'aslemal re ri Dios.

13 Ec'u Rutzij Upixab ri Dios cubi'ij: Xcubi' nuc'u'x ruc' ri Dios, e uwari'che xink'alajisaj Rutzij Rire.

Sal. 116:10

Jec'ula' ri'oj cubul kac'u'x ruc' ri Dios; e uwari'che cakatziyoj rubi'. 14 Keta'am c'ut e ri xc'astajisan lo

* 3:15 Wa' e que'elawi na caquimaj ta usuc' ri K'ijsak. † 3:17 Ri Kanimajawal y ri Ruxlabixel ri Dios junam quic'u'x y junam quina'oj. ✧ 4:5 Lc. 22:27 ✧ 4:6 Gn. 1:2-3 * 4:6 "Cak'alajin ruma ri Cristo": Pa ri ch'a'tem griego cubi'ij "che rupalaj ri Jesús". Mt. 17:2; Jn. 8:12 † 4:10 Echiri' cakach'ij uchuk'ab tak ri c'axc'obic, cak'alajinic e ruma ruchuk'ab y ruto'bal ri Jesús kuc'.

re ri Kanimajawal Jesús chiquixo'l ri ecaminak, jela' cu'an chike ri'oj; cojuc'astajisaj y junam uc' alak cojuc'am bi ruc' Rire. ¹⁵ Ronoje c'u wa kic'owibem e uma ralak, cha' jela' caq'uiyar quiwach ri quec'uluw re ri unimal rutzil uc'u'x ri Dios. Yey wa' e re yacbal uk'ij ri Dios, ma jela' lic e q'ui ri caquitioxij ri unimal rutzil uc'u'x ri Dios paquiwi'.

¹⁶ E uwari'che na capax ta kac'u'x, tob ne wa kacuerpo catajin uri'jobic; no'j ruc'u'xibal ri kac'aslemal na je ta la' u'anom, ma jalan cac'o'ji' ne más kachuk'ab ri jujun k'ij. ¹⁷ Janipa tak wa c'ax cakatij che ruwachulew xa quic'owic, yey wa' lic c'o cutikoj che ri kabinic kasilabic y che ri chomilaj kac'aslemal chila' chicaj, ri na jinta utakexic y na jinta c'ana cajunimax wi. ¹⁸ Ec'u ri'oj na cakaya ta kac'u'x che ri quilitaj wara che ruwachulew, e cakaya kac'u'x che ri na quilitaj taj; ma ronoje ri quilitaj uwach xa caq'uisic, no'j ri na quilitaj ta uwach na jinta utakexic rucowil.

5

Ri kocho c'o chila' chicaj

¹ Keta'am c'ut ri kacuerpo wara che ruwachulew e jela' pacha' juna rancho na jinta ucowil oj jekel chupa. Yey echiri' casach uwach ri kacuerpo, caya'taj jun kocho chila' chicaj na jinta utakexic rucowil, ma na uk'ab ta achi 'anayom re, e ri Dios 'anayom re. ² Y ruma la' coj-jilow wo'ora, ma lic cakaj chic cojk'ax chupa ri kocho chila' chicaj. ³ Ma echiri' cojk'ax chupa wa', lic cojch'ukutaj chi utz.* ⁴ Ruma c'u la', ri oj jekel chupa ri "karancho" wara che ruwachulew, coj-jilowic y cabison kac'u'x; ma na cakaj taj cakaya can ri kacuerpo e la' xa jela'; ri cakaj e cakac'ul ri kacuerpo chila' chicaj y jela' cajalc'atix uwach ri na cacowin taj ruc' ri na cacam taj. ⁵ Yey wa' e uch'obom chi lo ri Dios chike; y e Rire ya'yom ri Ruxlabixel chike, c'utubal re cuya

na janipa ri ubi'tisim. ⁶ Ruma c'u la', lic cubul kac'u'x, tob keta'am echiri' c'a oj jekel pa ri kacuerpo wara che ruwachulew, wa' e que'elawi c'amaja' coje'jekela pa ri kocho chila' chicaj ruc' ri Kanimajawal Jesucristo. ⁷ Ronoje c'u ri caka'ano e ruma ri cubulibal kac'u'x ruc' Rire, na e ta ruma ri cakil ruc' ri kawach. ⁸ Lic cubul c'u kac'u'x ruc' Rire. Yey e ne lic cakaj chic cakaya can wa kacuerpo cha' jela' coje'jekela chila' ruc' ri Kanimajawal.

Chikawach apanok cak'alajin janipa ri ka'anom

⁹ Ruma c'u la', e cakaya kib che u'anic janipa ri caraj ri Kanimajawal, cha' jela' caqui'cot Rire kuc' tob c'a oj c'o wara che ruwachulew o echiri' oj c'o chi ruc' chila' chicaj. ¹⁰ Ma copon na ri k'ij echiri' konoje coje'tac'ala chwach ri k'atbal tzij re ri Cristo, pa cak'alajin wi we ri ka'anom wara che ruwachulew c'o uchac o na jinta uchac, y caya'taj c'u chike chikajujunal ri tojbal re ri ka'anom.

Ri Pablo quebupixabaj ri ticawex cha' quec'o'ji' chi utzil chomal chwach ri Dios

¹¹ Lic keta'am c'ut, chirajawaxic c'o kaxi'in ib chwach ri Kajawal; ruma c'u ri', quekapixabaj tak ri ticawex cha' caquiya quib puk'ab ri Dios. Chwach ri Dios lic k'alaj sa' ri c'o pa kanima'; ec'u cakaj ri'oj e cak'alajin wa' chiwach ralak. ¹² Na cakabi'ij ta wa' che alak re yacbal kak'ij. Ma e cakaj cakato' alak che reta'maxic sa' ri caka'ano cha' jela' lic caqui'cot alak chike. Jec'ula' c'o cac'ulubej wi alak uwach chique ri xew quebec il che tak ri quilitajic pero na quebec ta il che ri c'o pa ranima' junok. ¹³ Ma we pacha' chi oj ch'u'jerinak, wa' e ruma lic kaya'om kib che ruchac ri Dios. Yey we lic cakach'ob chi utz sa' ri caka'ano, wa' e to'bal e alak. ¹⁴ Ri rutzil uc'u'x ri Cristo catakan pa kanima' ma lic keta'am echiri' xcam Rire paquic'axel conoje, e que'elok

* **5:3** "Cojch'ukutaj chi utz": Pa ri ch'a'tem griego cubi'ij "na oj ta ch'analic".

xecam conoje ruc'. ¹⁵ Xcam c'u ri Cristo paquic'axel conoje ri ticawex cha' e janipa ri e c'as ruma rucamic Rire na caqui'an ta chi sa' ri cacaj rique, ma e caqui'an janipa ri caraj ri Jun ri paquic'axel rique xcamic y xc'astaj lo chiquixo'l ri ecaminak.

¹⁶ Wo'ora ri cakach'ob puwi junok, na e ta ruma ri cakil che, pacha' ri caqui'an ri ticawex re ruwachulew. Tob ne ojertan jela' xkach'ob lo ri'oj puwi ri Cristo, pero wo'ora na caka'an ta chi wa' ma xketa'maj uwach chi utz. ¹⁷ Jec'ula' we junok uya'om rib puk'ab ri Cristo, e jun c'ac' ticawex. Junwi caril ronoje, ma ri re ojertan xcanaj canok y ronoje u'anom c'ac' ruc'. ¹⁸ Ronoje wa' ruc' ri Dios petinak wi, ma xojuya chi utzil chomal chwach Rire ruma ri xu'an ri Cristo y xuya c'u chike quekato' ri ticawex cha' quec'oji' chi utzil chomal chwach. ¹⁹ Wa' e que'elawi ruma rucamic ri Cristo, ri Dios cuya chique ri ticawex quec'oji' chi utzil chomal chwach Rire ma cucuy ri quimac. Y xuya c'u chike ri'oj rubi'xiquil chiquiwach ri ticawex wa' tzij re ri utzil chomal. ²⁰ E uwari'che oj takom lo ruma ri Cristo. Ma kuma ri'oj ri Dios lic quelaj chique ri ticawex cha' quekib ruc'. Cojelaj c'u pa rubi' ri Cristo, jewa' cakabi'ij: «Yijba' ib alak chwach ri Dios cha' cac'oji' alak chi utzil chomal chwach.» ²¹ Tob ri Cristo na jinta c'ana mac xu'ano, na ruc' ta c'u ri', kuma ri'oj ri Dios xu'an che xrekaj ronoje ri kamac cha' jela' coju'an jusuc' chwach ri Dios ruma xa oj jun ruc' Rire.

6

¹ E uwari'che ri'oj, ri oj aj chac re ri Dios, lic cakapixabaj alak: Ma'an alak ri pacha' na il ta uwach ri unimal rutzil uc'u'x ri Dios uc'utum chiwach alak. ² Ma jewa' ubi'im can ri Dios pa Ruch'a'tem:

Chupa ruk'ijol echiri' xajawax to'bal awe, xatinto'o;

Chupa ri k'ij re colobetajic, xatin-colobej *Is.*

49:8

cacha ri Dios.

Cambi'ij c'u che alak: E uk'ijol wa' echiri' ri Dios cubi'tisij ruto'bal; wo'ora e k'ij re colobetajic chique ri ticawex.

Ri kabinic kasilabic ri oj aj chac re ri Dios

³ Cakachajij c'u kib chi utz che ri caka'ano cha' na oj ta latz'anel chique jujun chic y jela' na jinta junok cac'akaw bi uk'ij ruchac ri Dios caka'ano. ⁴ Ruc' ronoje ri caka'ano e cakac'utu oj aj chac re ri Dios. Cakacuy c'u ronoje ruc' unimal kac'u'x, tob oj c'o pa c'ax, pa niba'il o pa bis; ⁵ tob cabalac'ux kapa o cojc'am bi pa cárcel, tob caquiyac quib ruq'uiyal winak chikij; tob cakatij c'axlaj chac, cakacuy waram o cakatij numic.

⁶ Yey cakac'utu oj aj chac re ri Dios ma chom ri kabinic, c'o runa'oj ri Dios kuc', c'o unimal kac'u'x y c'axna'bal kac'u'x, c'o ri Santow-ilaj Ruxlabixel ri Dios kuc' y c'ax quekana' conoje ruc' ronoje kac'u'x.

⁷ Cak'alajinic oj aj chac re ri Dios ma cakatizoj ri sakil c'utunic, c'o ruchuk'ab ri Dios kuc' y caka'an ri lic usuc' y jec'ula' cakach'ij quichuk'ab conoje ri queyactaj chikij.✧

⁸ Kac'ulum yacbal kak'ij y c'akibal bi kak'ij; e c'o ri chom quech'a't chikij y e c'o ri tzel quech'a't chikij. Cabi'x chike oj aj rak'ul, tob na jinta rak'ubal caka'ano. ⁹ Tob e q'ui queta'am oj aj chac re ri Dios; na ruc' ta c'u ri', e c'o jujun caqui'an pacha' na queta'am ta wa'. Xtewun ne ri camic pakawi'; na ruc' ta c'u ri', c'a oj c'aslic. Tob lic xojya' pa c'ax, pero na oj caminak taj. ¹⁰ C'o k'ij oj ya'om pa bis; na ruc' ta c'u ri', xaki cojqul'otic. Na oj ta beyom; na ruc' ta c'u ri', kaya'om rubeyomalil ri Dios chique uq'uiyal ticawex. Wara che ruwachulew na jinta c'o kuc'; na ruc' ta c'u ri', e ri Dios uya'om ronoje ri cajawax chike.

✧ 6:7 Ef. 6:16-17

¹¹ Alak ka hermanos aj Corinto, ronoje xkak'alajisaj lo chiwach alak, na jinta c'ana xkewaj chiwach alak. Lic kac'utum che alak ri c'axna'bal kac'u'x c'o pa kanima'. ¹² Eta'am alak ri'oj lic kac'utum ri rutzil kac'u'x che alak, no'j ralak na je ta la' ca'an alak chike ri'oj. ¹³ Ec'u wo'ora quinch'a't uc' alak pacha' alak walc'o'al: Jela' pacha' ri'oj lic kac'utum ri rutzil kac'u'x che ralak, jec'ula' 'ana alak chike ri'oj.

*Ka'ana chom che ri kabinic kasil-
abic ma oj rocho ri Dios*

¹⁴ Hermanos, mac'ulaj ib alak cuc' ri na quicojom ta rubi' ri Cristo, ma ri jusuc' na cuc'ulaj ta rib ruc' ri na jusuc' taj y ri k'ijsak na cuc'ulaj ta rib ruc' ri k'eku'm. ¹⁵ ¿Yey ri Cristo ruc' ri Belial* c'o nawi utzil chiquiwach? ¿O sa' ri utz curik junok ucojom rubi' ri Cristo che junok na ucojom taj? ¹⁶ Ri rocho ri Dios na cuc'ulaj ta rib ruc' tak ri tiox. Jec'uri'la' ralak na jinta chi e alak cuc' ri tiox, ma ralak alak rocho ri Dios c'aslic. E pacha' rubi'im Rire: Quinjeki' cuc' y chiquixo'libal rique quimbin wi.

In c'u Ri'in qui Dios y rique e nutina-
mit* *Lv. 26:12; Ez.
37:27*

xcha'.

¹⁷ E uwari'che ri Dios jewa' cubi'ij pa Ruch'a'tem: Chixel chiquixo'libal ri e aj mac y chiwesaj iwib cuc'.

Mich'ulaj iwib ruc' ri na chom taj chiwach ri Dios, y jela' Ri'in quixinc'ul chi utz. *Is. 52:11; Ez. 20:41*

¹⁸ Quinu'an c'u Ikaw ri', yey ri'ix quixu'an ix walc'o'al *2 S. 7:14*

cache ri Kajawxel, ri c'o ronoje unimal chuk'ab puk'ab.

7

¹ E uwari'che, hermanos, ruma tak wa bi'tisinic u'anom lo ri Dios chike, kajosk'ij kib che tak ri mac retzelam ri kacuerpo y ri kanima'. Ruc' jun

xi'in ib chwach ri Dios kachuk'ubej kib che uchomaxic ri kabinic kasil-
abic chwach ri Dios.

*Ri Pablo caqui'cot ruma ri xuta che
riglesia c'o Corinto*

² Chojc'ola co chic'u'x alak; ma ri'oj na jinta junok ka'anom ri na usuc'taj che, na jinta junok tzakinak pa mac kuma ri'oj yey na jinta junok kasocoso'm. ³ Ec'uchiri' cambi'ij wa', na e ta re canya q'uix alak; ma pacha' ri nubi'im lo che alak, lic c'o alak pa kanima'. Tob c'u oj c'as ri' o tob ne oj caminak chic, xa jun kac'u'x uc' alak.

⁴ Lic cank'alajisaj ri c'o pa wanima' chiwach alak, ma lic cubul nuc'u'x uc' alak. Lic quinqu'cot che alak. E ne ralak ri xnimarisan nuc'u'x y wo'ora nojinak ri wanima' che qui'cotemal tob oj c'o pa tak c'axc'obic.

⁵ Chwi xojc'un Macedonia, pakatzij wi na oj uxlaninak taj. Ma tob xa pa tak xpe wi ri c'ax pakawi', xpe tak ch'a'oj chikij y lic xoc xi'in ib pa kanima'. ⁶ Pero ri Dios, ri bochi'inel que ri paxinak quic'u'x, e xbochi'in kac'u'x ruma ruc'unic ri hermano Tito kuc'.

⁷ Na xew ta c'u ruma ruc'unibal xojqui'cotic; e lic xojqui'cotic ma xkato rire lic xqui'cot ri ranima' uma ralak. Ma xubi'ij chike e lic ca'aj alak quil alak nuwach, lic cabison alak ruma inya'om alak pa bis y lic ca'aj ne alak cac'ut alak ri rutzil c'u'x alak chwe. Ruma tak c'u wa', ri'in más xinqui'cotic, ⁸ tob ne xubisoj nuc'u'x echiri' xintak bi ri nabe nucarta che alak, ma wa' xucoj alak pa bis queb oxib k'ij. Pero na jinta chi cubi'ij nuc'u'x che, ma weta'am ri carta lic c'o xutikoj che alak.

⁹ Ec'u wo'ora lic quinqu'cotic, na ruma ta ri xbison alak che ri nucarta, ma e ruma ri bis alak xuto' alak cha' catzelej tzij alak, yey wa bis e xraj ri ri Dios che alak. Jec'ula' na jinta juna c'ax xka'an ri'oj che alak. ¹⁰ Ri bis petinak ruc' ri Dios e cu'an chike coc chikac'u'x ri kamac, cha' jela' cuc'am lo tzelebal tzij y colobetajic chike y

* **6:15** "Belial": Wa' e jun ubi' ritzel winak. ✧ **6:16** 1 Co. 3:16; 6:19

¡wa' na cuya ta bis che junok! No'j ri bis re ruwachulew xa cuc'am lo camic. ¹¹ ¡Chilape c'u alak ronoje ri utz xuc'am lo ri bis alak chwach ri Dios! Ma lic xoc alak il che wa' y x'aj c'u cak'alajisaj alak wa' chwe. Ec'u lic xpe oyowal alak che wa jun mac y lic x'aj c'u quil alak nuwach. Ruc' ronoje c'u'x alak y ruc' xi'in ib, xya ib alak che u'anic ri utz chwach ri Dios. Ruc' c'u tak ri x'an alak, wo'ora cak'alajinic utz 'anom ralak. ¹² E uwari'che, echiri' xintz'ibaj bi ri carta che alak, xin'ano na xew ta ruma ri jun x'anaw re ri na usuc' taj y na xew tane ruma ri jun x'an ri na usuc' taj che, ma xin'ano e cha' cac'ut alak chwach ri Dios: Pakatzij wi lic coc alak il chike.

¹³ Ruma c'u xoc alak il che ri kacarta, lic xnimar kac'u'x. Yey uwi' chi ri kaqui'cotemal ri'oj, e ruqui'cotemal ri Tito, ma lic xni-marisaj lo alak uc'u'x. ¹⁴ Ri'in nuyacom chi k'ij alak chwach ri Tito y na quinq'uix ta che ri nubi'im. Ma ronoje ri cakabi'ij che alak lic katzij; jec'ula' ri', janipa ri kabi'im chi che ri Tito pawil' ralak, lic e xe'rila che alak. ¹⁵ Ec'u ri c'axna'bal uc'u'x ri Tito che alak más canimaric echiri' cac'un chuc'u'x ruc' xi'in ib pa anima' alak xc'ul alak y xya ib alak che u'anic janipa ri xubi'ij che alak. ¹⁶ Lic quinqui'cotic ma che ronoje lic cubul nuc'u'x uc' alak.

8

Ri kasa'n caya'i' chique rutinamit ri Dios e c'o Jerusalem

¹ Hermanos, cakaj queta'maj alak ri unimal rutzil uc'u'x ri Dios xquic'ut rutinamit ri Cristo e c'o pa tak ri luwar re Macedonia. ² Tob rique na xa ta jubik' ri c'ax quic'owibem, ri qui'cotemal c'o cuc' na jinta utakexic. Y tob lic e niba'ib, xic'ow ne uwi' ri xquiya che quito'ic ri cachbi'il. ³ Ri'in cambi'ij ri xinwilo: Ri xquiya'o lic pa canima' xalax wi. Na xew ta xquiya e chirij ri c'o cuc', ma xquiya ne uwi'. ⁴ Lic c'u xebelaj che cakaya

luwar chique ebare jun quequito' pan rutinamit ri Dios ruc' wa kasa'n camolic. ⁵ Janipa c'u ri koye'em ri'oj chique na xew ta chi xqui'an ri', ma nabe ne xquiya quib puk'ab ri Dios, c'a tec'uchiri' xquiya ri canima' chike ri'oj cha' jela' caqui'an janipa ri rajawal uc'u'x ri Dios. ⁶ Ruma c'u la' hermanos, xkabi'ij che ri Tito chuq'uisa na utza'm wa chac xujek uc' ralak puwi rumolic ri kasa'n, ma wa' e c'utubal re ri relej c'u'x alak.

⁷ E lic utz ri 'anom ralak che ronoje tak wa': lic c'o cubulibal c'u'x alak ruc' ri Dios, lic carik alak utzijoxic Ruch'a'tem ri Dios, ya'tal runa'oj ri Dios che alak, alak sac'aj che u'anic ruchac ri Dios yey lic ne c'ax cojna' alak; jec'uri'la', 'ana alak chi utz wa jun chac re quito'ic ri nic'aj chic ka hermanos. ⁸ Ruc' wa' na quintajin ta che uya'ic jun takanic che alak. Ma xew xintzijo che alak ri quisac'ajil ri jujun chic che quito'ic ri cachbi'il, cha' jela' cac'ut alak pakatzij wi c'ax quena' alak ri jujun chic hermanos. ⁹ Ma lic eta'am chi alak ri unimal rutzil uc'u'x ri Kanimajawal Jesucristo. Rire lic beyom; na ruc' ta c'u ri', ruma ri rutzil uc'u'x che alak, xu'an niba' che rib cha' ruc' runiba'il e xuya rubeyomalil ri Dios che ralak.

¹⁰ Chwi c'u wa kasa'n camolic, canya na'oj alak puwi ri takal che ca'an alak; ma junabir xjek lo alak umolic wa' yey x'an alak ruc' ronoje c'u'x alak. ¹¹ Ec'u wo'ora q'uisa pan alak utza'm wa' ruc' ronoje c'u'x alak, jela' pacha' ri xjekebej lo alak u'anic. Ya'a c'u alak janipa ri cach'ij alak uya'ic. ¹² Ma e junok lic caraj cakasanic, ri Dios cuc'ul chi utz ri kasa'n cuya'o e chirij ri c'o ruc'; ma ri Dios na cutz'onoj ta che jun ri na jinta ruc'. ¹³ Na cambi'ij ta wa' cha' cacana' can alak pa niba'il ruma ri queto' alak jujun chic. Ma e ri caraj e chikajujunal c'o kuc' janipa ri cawax chike. ¹⁴ Wo'ora pak'ab alak c'o wi queto' alak ri e c'o pa c'ax. Takal c'u che alak cajach alak upa

✧ 8:2 1 Co. 16:1-4

ri c'o uc' alak cha' jela' catz'akatisaj alak ri cajawax chique rique. We xopon c'u juna k'ij echiri' ralak c'o alak pa c'ax, ec'uchiri' takal chique rique caquito' ralak. We conoje jela' caqui'ano, caya'taj c'u chique chiquijunal janipa ri cajawaxic. ¹⁵ E jela' pacha' ri tz'ibital can pa Ruch'a'tem ri Dios:

E ri lic q'ui xumolo,
 na jinta ukax xcanaj can ruc'
 ma xujach chique ri jujun chic;
 yey e ri na q'ui ta xumolo,
 xakare' xu'ana pan ruc'
 ma ri cajawax che xya'taj ruma
 jun chic *Éx. 16:18*
 cacha'.

Ri etakom bi che umolic ri kasa'n

¹⁶ Xa maltiox c'u che ri Dios ma ucojom pa ranima' ri Tito cuto' alak jela' pacha' can'an ri'in. ¹⁷ Ma xew ximbi'ij che que'rila alak, na jampatana ruc' qui'cotemal xunimaj ma lic cacha uc'u'x che que'rila wach alak. ¹⁸ Junam c'ut ruc' ri Tito cakatak bi jun chic hermano cha' carachbilaj bi. Wa' e jun lic chom ruch'a'tibexic ca'an pa tak riglesias ruma ri utzilaj chac u'anom che utzijoxic ri Utzilaj Tzij. ¹⁹ Na xew tane wa', ma wa jun hermano cha'om cuma riglesias re cojrachbilaj pa tak ri coj'ec wi che umolic y che ujachic wa' wa kasa'n. Wa' wa chac oj c'o wi e re yacbal uk'ij ri Kanimajawal Jesucristo y e c'utubal re ri relej kac'u'x. ²⁰ Ecojom kachbi'il cha' na jinta c'o quech'a't chikij che uchapabexic wu'q'uiyal kasa'n c'o pakak'ab. ²¹ Ri cakaj ri'oj e caka'an ronoje chi utz chwach ri Kanimajawal Jesucristo y chiquiwach ri ticawex. ²² E uwari'che junam cuc' ri quebec, cakatak bi jun chic hermano. Wa' na xa ta julaj uc'utum lic cacha uc'u'x che uq'uiyal chac. Yey wo'ora más ne cacha uc'u'x che wa benam ma lic cubul uc'u'x uc' alak. ²³ Ri Tito e wachbi'il ri'in, junam oj to'bel e alak. Yey ri hermanos erachbilam bi, echa'om lo cuma ri tinamit re

ri Cristo, ma ruc' ri quibinic quisi-labic quiyacom uk'ij ri Cristo. ²⁴ E uwari'che chec'ulu alak chi utz cha' jela' cac'ut alak ri rutzil c'u'x alak y jec'ula' cak'alajin chiquiwach riglesias su'be lic cojq'ic'ot che alak.

9

Ri Dios caraj quekato' ri niba'ib ruc'ronoje kac'u'x

¹ Puwi c'u wa kasa'n re to'bal que rutinamit ri Dios, na cajawax ta chic cantz'ibaj pan che alak, ² ma weta'am chi ri relej c'u'x alak re cato'b alak. E uwari'che nuyacom k'ij alak chiquiwach ri e aj Macedonia. Ri'in nubi'im, ri alak aj Acaya* c'o chi kasa'n molom lo alak jun-abir. Yey ruma wa 'anom ralak, e q'ui chique ri e aj Macedonia xquijek caqui'an que ruc'ronoje quic'u'x. ³ E uwari'che ebenutakom bi wa hermanos uc' alak cha' caquito' alak che uq'uisic umolic ri kasa'n. Ma we yijbam chi alak ri kasa'n jela' pacha' ri nubi'im lok, cak'alajin c'u ri' lic katzij ri xkabi'ij echiri' xkayac k'ij alak. ⁴ Ma c'axtaj quincachbilaj bi jujun aj Macedonia yey we xojopon c'u uc' alak, que'karika' c'amaja' yijbam alak ri kasa'n. We e xu'ana ri', q'uixbal c'u chike ri'oj y che ralak, ma lic xcubi' kac'u'x uc' alak yey na x'an ta c'u alak ri kabi'im lok. ⁵ Ruma c'u wa', xinch'obo quebenutak bi uc' alak wa hermanos cha' quenabej bi chikawach ri'oj y caquito' alak che umolic ri kasa'n bi'tisim chi alak. Jec'ula' we xojopon ri'oj, yijbam chi alak wa'. Cak'alajin c'u ri' xkasan alak ruc'ronoje c'u'x alak y na e ta ruma xtak alak che.

⁶ Cancuxtaj c'u wa' che alak: China ri na q'ui ta ri cutico, ri' na q'ui ta ri cumolo. Yey china ri lic q'ui ri cutico, ri' lic q'ui ri cumolo. ⁷ E uwari'che, chijujunal alak chuya'a rukasa'n e chirij janipa ri xalax lo pa ranima', na ruc' ta bis y na ruma ta minom alak chupa. Ma ri Dios lic cuc'ul uc'u'x ri cuya rukasa'n ruc' qui'cotemal. ⁸ Yey

* **9:2** Corinto e jun tinamit c'o pa ri luwar re Acaya.

lic c'o puk'ab ri Dios cuto' alak cha' caq'uiyar janipa ri c'o uc' alak y jela' c'o ronoje ri cajawax che alak y na xew ta ri', ma cuya ne uwi' cha' jela' cato'b alak che u'anic chomilaj tak chac. ⁹ E pacha' ri tz'ibital can chupa Rutzij Upixab ri Dios:

Xujach ri c'o ruc' re quebuto' ri niba'ib;

janipa c'u ri utz u'anom

na casach ta uwach *Sal. 112:9*
cacha'.

¹⁰ Ri Dios e caya'w re rija' che rawanel yey e caya'w re ri wa che ri cawa'ic. Ec'u ri' Rire cuya na janipa ri cajawax che alak y cuya ne uwi', cha' ruc' wa' ca'an alak ri utz y jec'ula' lic c'o cutikoj ri utzilaj chac ca'an alak. ¹¹ Jela' c'u ri', cac'oji' uq'uiyal uwach beyomalil uc' alak cha' ruc' wa' cato'b alak ruc' ronoje c'u'x alak. Y ec'uchiri' ri'oj caka'am bi wa kasa'n chique ri e c'o pa c'axc'obic, rique caquitioxij che ri Dios. ¹² Ec'u wa' wa to'bal na xew ta cutz'akatisaj ri cajawax chique, ma e cucoj pa canima' rique ri lic quetioxin chwach ri Dios ¹³ y jela' ri quec'uluw re wa kasa'n lic caquiyac uk'ij ri Dios. Ma wa' e c'utubal re pakatzij wi xcoj alak ri Utzilaj Tzij re ri Cristo y cabin alak chupa wa', yey e c'utubal re ri relej c'u'x alak chique rique y chique conoje rutinamit ri Dios. ¹⁴ Jec'ula' rique c'utubal re ri rutzil quic'u'x che alak, caqui'an orar pawl' alak ruma ri unimal rutzil uc'u'x ri Dios quilom che alak. ¹⁵ ¡Xa maltiox c'u che ri Dios ruma ri nimalaj sipanic uya'om chike, ma wa' lic na jinta c'o wi!

10

Ri Pablo cuto'bej rib chiquiwach ri caquic'ak bi uk'ij

¹ Ri'in in Pablo cuaj cancoj wib chiwach alak chupa rubi' ri Cristo, ri na cu'an ta nim che rib y lic utz uc'u'x. Ma e c'o jujun chixo'libal alak quech'a't chwij, caquibi'ij echiri' in c'o uc' alak, pacha' canxi'ij wib canch'a'bej pa alak; yey echiri' in

c'o naj y quintz'iban c'u pan uc' alak, na canxi'ij ta c'ana wib can'an wa', quecha'. ² Cantz'onoj c'u che alak choca alak il che wa cantz'ibaj pan che alak, cha' we xinopon uc' alak na cajawax ta chic canch'a'bej quipa jujun che alak. No'j we cajawaxic, can'an na c'u ri' wa' chique ri caquibi'ij xa pa ke ri'oj cojtakanic.

³ Katzij, ri'oj xa oj ticawex, pero na caka'an ta ke'oj pacha' ri caqui'an ri winak re ruwachulew. ⁴ Ma echiri' cojch'o'jin chirij ri na utz taj, na caka'an ta ruc' kachuk'ab o kana'oj ri'oj, ma e caka'an ruc' ruchuk'ab y ruto'bal ri Dios cha' jela' cakasach uwach ronoje ri cayactaj chirij ri Dios; ⁵ wa' e ri itzel tak na'oj y tac'abal k'ij, ri quebuk'atej ri ticawex cha' na caqueta'maj ta uwach ri Dios. Cakaya c'u ronoje tak no'jibal puk'ab ri Cristo cha' cu'an pacha' runa'oj Rire. ⁶ Echiri' cakilo lic cacoj alak utzij ri Cristo, c'a tec'uchiri' cakak'at tzij paquiwi ri e aj palajiy tzij.

⁷ Ralak xew catakej alak ri quilitaj uwach. We c'o c'u junok ujiquibam uwach chiribil rib lic c'o puk'ab ri Cristo, e chuch'obo chi utz wa': Na xew ta rire c'o puk'ab ri Cristo, ma jenela' ri'oj. ⁸ Y na xew ta ri', ma na quinq'uix tane che tob canjiquiba' uwach ri takanic caka'an pawl' alak, ma wa' e ri Kajawal ya'yom pakak'ab. Y wa' na re ta sachibal wach alak, ma re q'uiyibal alak chwach ri Dios.

⁹ Na cuaj taj cach'ob alak rakan e canxibij pa alak ruc' ri cantz'ibaj pan che alak. ¹⁰ Ma c'o quebi'n re: «Ri Pablo chupa tak rucartas lic c'ax ri cubi'ij, pacha' lic c'o uchuk'ab; no'j echiri' c'o chikawach, cuxi'ij rib y na il tane uwach ruch'a'tem» quecha'.

¹¹ Ec'u ri quebi'n re wa' chirajawaxic caqueta'maj na je ta la' u'anom, ma e janipa ri cakatz'ibaj pan che alak, junam ubi'xiquil caka'ano echiri' oj c'o chiwach alak.

¹² Ri'oj na cakach'ob tane cakajuni-maj kib cuc' ri jujun xa caquitac'aba' quik'ij chiquibil quib. Ma rique xa caquijunimaj quib cuc' ri cachbi'il.

Ri quebanaw re wa', na jusuc' ta ri quina'oj. ¹³ No'j ri'oj na cakatac'aba' tane kak'ij ruma juna chac na ka'anom taj, ma e caka'an ri uya'om ri Dios pakak'ab. Yey e Rire ri xuya chike xojopon c'a chila' uc' alak ruc' ri Utzilaj Tzij. ¹⁴ We tamaji e ri Dios ya'yom chike cojopon uc' alak, ri' xa pa ke ri'oj caka'an ri chac uc' alak. Pero na e ta ri'. Lic c'u takal chike cakapixabaj pan alak wo'ora, ma ri'oj oj ri nabe xojopon uc' alak ruc' ri Utzilaj Tzij re ri Cristo. ¹⁵ Na cakatac'aba' tane kak'ij xa pa ke ri'oj ruc' ruchac jun chic. Ri koye'em e jalan canimar ri cubulibal c'u'x alak, jec'ula' canimar ri kachac chixo'libal alak e chirij ri uya'om ri Dios pakak'ab. ¹⁶ Tec'uchiri' we xutzin ri kachac chixo'libal alak, utz c'u ri' cojel bi y coj'ec pa c'amaja' catzijox wi ri Utzilaj Tzij re ri Cristo, y jela' na que'kamina ta kib pa ri chac re jun chic, cha' na cakatac'aba' ta kak'ij ruc' ri chac na ka'anom ta ri'oj. ¹⁷ China c'u ri caraj cuyac uk'ij, e chuk'alajisaj ri' janipa ri u'anom ri Dios Kajawxel che rubinic usilabic *Jer.* **9:23-24**

¹⁸ Ma we jun cutac'aba' uk'ij xa chiribil rib, ri' na jinta uchac ri cu'ano; no'j we e ri Dios cayacaw uk'ij, e k'alaj ri' utz ri chac u'anom.

11

Ri caqui'an tako'n chiquibil quib

¹ Chincuyu c'ana alak we quinch'a't q'uenok pacha' junok ch'u'jerinak. ² Can'an c'u wa' ma lic c'ax canna' alak, yey wa c'axna'bal nuc'u'x che alak e ri Dios cojoyom pa wanima'. Ma ri'in nuya'om alak puk'ab ri Cristo y xew puk'ab Rire cuaj c'o alak. E pacha' juna achi echiri' cuya rumi'al puk'ab juna ala pa c'ulaniquil. Ri caraj rachi e cuya puk'ab rala jun sakil k'apoj ali. Jec'ula' ri cuaj ri'in che ralak e na jinta c'ana ch'ul che alak chwach ri Cristo. ³ Lic cubisoy nuc'u'x ma c'axtaj cac'ulumaj e alak jela' pacha'

ri xuc'ulumaj ri Eva ojertan echiri' xsocotaj ruma ri tzel uno'jibal ri cumatz. Ma c'axtaj cajalc'ataj ri na'oj alak, quesaj c'u ib alak puk'ab ri Cristo y na catakej ta chi alak ruc' ronoje c'u'x alak. ⁴ Cambi'ij wa' ma echiri' copon junok uc' alak, tob junwi ri tzijonic cu'an puwi ri Jesús chwach ri tzijonic ka'anom ri'oj che alak, jlic cac'ul c'u alak ri'! Y cac'ul ne alak ri petinak ruc' juna chic uxlabixel, tob na e ta ri Ruxlabixel ri Dios c'ulum chi alak. Cac'ul ne alak jun chic tzij, tob junwi chwach ri Utzilaj Tzij cojom chi alak.

⁵ C'o ri caquibi'ij e nimak tak tako'n yey caquitac'aba' quik'ij. ¿C'o neba más quiwach rique chinuwa ri'in? Canch'ob ri'in, na jintaj. ⁶ Ma tob na quinch'a't ta ri'in ruc' nimak tak ch'a'tem pacha' ri caqui'an rique, pero ri'in más c'o weta'am chiquiwa rique; y wa' nuc'utum chiwach alak ruc' ronoje ri nu'anom chixo'libal alak.

⁷ Laj c'o ri caquich'ob rakan na jinta nuwach; ma echiri' xintzijo ri Utzilaj Tzij re ri Dios che alak, na xintz'onoj tane c'ana rajil ri nuchac. ¿C'o neba numac ri' chiwach alak ruma wa'? Ma we xin'an ch'uti'n che wib, e cha' canimarisax k'ij ralak chwach ri Dios. ⁸ Echiri' ri'in xinc'oji' uc' alak, e jujun chic iglesias ri xquitak lo puak chwe. Ec'u xinc'am puak chique rique cha' utz xink'alajisaj ri Utzilaj Tzij chiwach ralak. ⁹ Ma echiri' in c'o uc' alak yey c'o c'u xajawax chwe, na jinta xintz'onoj che ralak. Ri xeto'w we e ri hermanos e petinak Macedonia. Na jinta c'u xinc'am che ralak ma na xuaj taj xinya alc'ayew che alak y na cuaj tane can'an wa' chikawach apanok. ¹⁰ Yey pakatzij wi ri K'ijsak re ri Cristo pa wanima' c'o wi; ruma c'u ri' canjiquiba' uwach wa': E na jinta junok chila' Acaya quesán re ri qui'cotemal canna'o ruma na canya ta alc'ayew che alak. ¹¹ Chiwach ralak, ¿sa' nawi ube na cantz'onoj ta wajil che alak? ¿Ruma nawi na c'ax ta

canna' alak? Na e ta ri', ma ri Dios lic reta'am sa' ri c'o pa wanima'.

¹² Ec'u ri na cantz'onoj ta wajil che alak, na canwok'otaj ta u'anic cha' jela' cak'alajinic na junam ta cojchacun ri'oj pacha' ri jujun chic, ri caqui-junimaj ri quichac ruc' ri kachac ri'oj xa re yacbal quik'ij. ¹³ Rique xa e socoso'nel, na e ta sakil tako'n ma qui'anom che quib pacha' e tako'n re ri Cristo. ¹⁴ Macam c'u anima' alak che wa'; ma jenela' cu'an ri Satanás, cu'an che rib pacha' e jun ángel re K'ijsak. ¹⁵ E uwari'che macam anima' alak che we ri e aj chac re ri itzel winak caqui'an che quib pacha' e 'anal re ri jusuc'. Pero copon c'u ri k'ij echiri' caquic'ul na ri tojbal re ri na utz taj qui'anom.

¹⁶ Jumul chic cambi'ij: Mach'ob alak we ri'in xinch'u'jeric. Yey we c'o junok che alak jela' cuch'obo, chuya'a luwar chwe cantac'aba' c'ana nuk'ij pacha' junok ch'u'jerinak. ¹⁷ Ri cakatac'aba' kak'ij na e ta uc'utu'n ri Kanimajawal chike; pero cantac'aba' c'ana nuk'ij pacha' junok na jusuc' ta runa'oj. ¹⁸ Lic e q'ui ri caquitac'aba' quik'ij ruma ri caqui'an che ruwachulew, yey wo'ora can'an c'ana we ri'in. ¹⁹ Ralak lic c'o na'oj alak; na ruc' ta c'u ri', lic quec'ul alak ri sachinak quina'oj. ²⁰ E cuyum c'u alak ri'rique tob lic quetakan pawil alak, caquichap ri e alak y caquiq'uis ne rubitak e alak, yey lic caqui'an nim che quib chiwach alak. ¡Cuyum ne alak tob caquipach' k'ab chipalaj alak! Ronoje wa' cuyum alak y na jinta cabi'ij alak che. ²¹ Laj q'uixbal c'u chwe ri'in ma na xinch'ij ta u'anic pacha' ri caqui'an rique.

Pero we rique na queq'uix ta che caquitac'aba' quik'ij, jec'ula' ri' can'an ri'in, tob ruc' wa' pacha' in ch'u'jerinak. ²² Rique caquitac'aba' quik'ij ma e aj hebreo; jela' ri'in, in aj hebreo yey canrik ri ch'a'tem hebreo. Rique caqui'an nim che quib ma e cuq'uul ri tinamit re Israel,

jela' ri'in in cuq'uul ri tinamit re Israel. Rique caquiyac quik'ij ma e ralc'o'al can ri Abraham; jela' ri'in, in ralc'o'al can ri Abraham. ²³ Rique caquibi'ij e aj chac re ri Cristo, jela' ri'in pakatzij wi in aj chac re ri Cristo yey más nim ri chac nu'anom ri'in chiquiwa rique. Tob quinch'a't pacha' in ch'u'jerinak, cambi'ij c'u wa': Ri'in más in chacuninak y más nutijom c'ax chiquiwach rique. Ma uq'uiyal laj balac'um nupa, uq'uiyal laj inya'om pa cárcel, uq'uiyal laj xtewun ri camic panuwi'. ²⁴ Raj judi'ab wo'ob laj xquijich' nupa pa treinta y nueve asial. ²⁵ Yey oxib laj in 'anom pa barijon, julaj in 'anom pa'abaj. ²⁶ Oxlaj ya laj in jik'inak pa ya' ruma xmukutaj ri barco in c'o chupa, yey xinch'ij ne jun ak'ab ruc' jun k'ij in c'o chwi ri mar. ²⁷ Uq'uiyal laj nu'anom unimal be. Ya laj in jik'inak pa tak nimaya'. Ya laj in caminak paquik'ab elek'omab y paquik'ab ri na e ta cuq'uul ri nutinamit. Ya laj incamisam cuma ne ri watz-nuchak'. Ya laj incamisam pa tak tinamit, pa tak luwar catz'intz'otic y chwi ri mar. Ya laj ne incamisam cuma ri caquibi'ij cubul quic'u'x ruc' ri Cristo, tob wa' na katzij taj. ²⁸ Nutijom c'axlaj chac y cosic. Uq'uiyal laj nucuyum waram, numic y tzajin chi'. Ruma tak ri lic c'o can'ano, uq'uiyal laj na utz ta chi ne xinwa'ic. Nutijom c'axc'olil tew y xincanajic na jinta chi ne nuk'u'. ²⁹ Y xaki uwi chi wa', ri jujun k'ij lic sa'chi rubis nuc'u'x cuma tak riglesias; e canna' ri'in wa' e pacha' jun eka'n c'o panuwi'. ³⁰ We c'o junok c'o pa c'ax y na jinta uchuk'ab, e canna' ri'in pacha' in ri inc'ulumayom re wa'. We c'o junok cumin junok chic pa ri mac, wa' cuya woyowal.

³¹ We chirajawaxic c'ut canyac nuk'ij, ri tac'abal nuk'ij can'ano e cantzijo tak ri cuk'alajisaj, ri'in na jinta nuchuk'ab. ³² Ec'u ri Dios, Rukaw ri Kanimajawal Jesucristo ri na jinta utakexic nim

uk'ij, e eta'mayom re na rak'ubal ta wa cambi'ij. ³² Tape c'u alak ri xinc'ulumaj Damasco: Ri aj wach c'o chwach ri rey Aretas xtakan che quicojic e aj chajal re ri tinamit cha' quinquichapo. ³³ Yey ruma c'u ri' xinkasax lo chupa jun nimalaj chacach, ximom lo ruc' lazo chwi jun nimalaj tapia c'o ventana che.

12

Tob ri Pablo lic utijom c'ax, ruchuk'ab ri Dios c'o ruc' rire

¹ Tob na jinta cutikoj che junok cu'an nim che rib, na ruc' ta c'u ri' cantzijoj sa' ruc'utum y ruk'alajisam ri Kajawal chinuwach. ² Lic weta'am c'u uwach jun achi uya'om rib puk'ab ri Cristo. Ec'u cajlajuj junab wa' ric'owic echiri' rire xc'am bi c'a chila' chicaj. Na weta'am ta c'ut we xc'am bi ruc' rucuerpo o xa e ri ranima' xe'ec, xew ri Dios eta'mayom re. ³ Xew c'u weta'am xc'am bi, tob pacha' ri nubi'im chic, na weta'am taj we xc'am bi ruc' rucuerpo o xa e ri ranima' xe'ec, xew ri Dios eta'mayom re. ⁴ Ri weta'am, e xc'am bi chupa ri chomilaj luwar chila' chicaj. Chila' c'u ri' xuta chomilaj tak tzij yey wa' na ya'tal tane c'ana che junok cutzijoj. ⁵ Cambi'ij c'u ri', utz canyac uk'ij ri xilow re y ri xtaw re wa'. Pero we canyac nuk'ij ri'in, na e ta cantzijoj ri k'alajisam chwe, ma xew cantzijoj ri c'akibal bi nuk'ij. ⁶ Ma we ta cuaj canyac nuk'ij ruma ruk'alajisam ri Dios chwe, ri' na rak'ubal ta ri cambi'ij, ma lic e ube ri'. Pero na can'an taj, ma na cuaj taj c'o junok cucoj uwi ri ilitajinak y ri tatajinak chwe.

⁷ Yey cha' na canyac ta c'u nuk'ij ruma na jinta c'ana c'o wi ri k'alajisam chwe, xya'taj c'u che ri Satanás cucoj jun c'ax che ri nucuerpo pacha' juna q'uix xaki cuch'iquich'a' chwe. ⁸ Ruma c'u ri', oxlaj xinelay che ri Kajawal cha' caresaj wa' chwe. ⁹ No'j Rire jewa' xubi'ij chwe: «Ri unimal rutzil nuc'u'x c'o awuc', e wa' ri lic cajawax chawe. Ma ri

nuchuk'ab más cak'alajin cuc' ri na jinta quichuk'ab» xcha'. E uwari'che ri'in lic quinquic'ot che echiri' na jinta nuchuk'ab, ma jela' e cac'o'ji' ruchuk'ab ri Cristo wuc'. ¹⁰ Ruma c'u la', ruc' qui'cotemal canch'ij tak ri c'ax cape panuwi' ruma in re ri Cristo, tob na jinta nuchuk'ab, tob e c'o ri tzel quech'a't lo chwij, tob nucuyum niba'il, tob inya'om pa c'ax y pa bis; ma echiri' canna'o na jinta nuchuk'ab, e más canna' ruchuk'ab ri Cristo c'o wuc'.

¹¹ Xa uma c'u ralak xintac'aba' nuk'ij pacha' cu'an junok na jusuc' ta runa'oj, pero e ralak xinminow alak chupa. Ec'u ri lic usuc' e ralak ri cayacaw alak nuk'ij. Ma tob na jinta nuwach ri'in, pero wa' wa' nimak e tako'n ri xa caqui'an nim che quib, rique na jinta más quiwach chinuwa ri'in. ¹² Echiri' xinchacun chixo'libal alak, xk'alajin chiwach alak in utako'n ri Cristo. Ma echiri' xinc'o'ji' uc' alak, na xincos ta che uc'utic chiwach alak tak ri c'utubal re ruchuk'ab ri Dios ruc' nimak tak milagros. ¹³ ¿Sa' nawi ri xinjaljob wi chiwach alak? ¿Na xin'an ta neba che alak pacha' ri xin'an chique ri nic'aj chic iglesias? Laj e ri xinjaljob wi ma na xinya ta alc'ayew che alak ruma na xintz'onoj ta wajil che alak. We e numac wa', cuyu alak numac.

Ri Pablo cuyijba' pan ri urox roponibal Corinto

¹⁴ Tape alak: Ri'in nuyijbam chi wib cha' quinopon uc' alak churox laj. Y we xinoponic, na canya ta alc'ayew che alak, ma na jinta c'o cantz'onoj che alak. Ec'u ri cuaj che alak na e ta ri c'o uc' alak, ma e ri cac'ut alak ri rutzil c'u'x alak chwe. Xew c'u lic cuaj canto' alak pacha' cu'an juna achi cuc' ri ralc'o'al. Ma chique ri quichu-quikaw takal wi caquitzucuj ri cajawax chique ri ch'uti'k; na e ta ri ch'uti'k ri takal chique caquitzucuj ri cajawax chique ri quichu-quikaw. ¹⁵ Ec'u ri'in ruc' ronoje nuc'u'x na xew ta canq'uis ronoje ri c'o wuc', ma canya ne wib che to'ic alak ruc' ri c'aslemal

alak chwach ri Dios. Pero e canwil ri'in, echiri' más canc'ut ri c'axna'bal nuc'u'x che alak, e más cak'ob ri c'axna'bal c'u'x ralak chwe ri'in.

¹⁶ Eta'am c'u alak na xinya ta alc'ayew che alak. Na ruc' ta c'u ri', e c'o ri caquibi'ij xinwesaj ne puak che alak xa xe'lak'ay. ¹⁷ ¿Su'chac cach'ob alak wa'? ¿C'o neba juna socoso'nel nutakom bi uc' alak? ¹⁸ Ri'in xintz'onoj che ri Tito que'rila alak y xintak bi ri jun hermano ruc'. ¿Xu'an neba elek' ri Tito che alak? Rire junam wuc' ri'in xa jun kac'u'x che ri caka'ano.

¹⁹ Hermanos, laj cach'ob alak e ronoje wa nubi'im lok xa re to'bal kib, pero na e ta ri'. Ma pakatzij wi chwach ri Dios y chupa rubi' ri Cristo kabi'im lo wa' re to'bal e alak, ri lic c'ax cakana' alak. ²⁰ Cubisoy nuc'u'x ma c'axtaj we xinopon uc' alak, na utz ta 'anom alak y jela' c'u ri' na cuc'ul ta nuc'u'x ri qui'nrika'. Yey we e ri', laj na cuc'ul ta c'u'x alak ri woponibal ma ri' yaj ri qui'n'ana'. Cubisoy c'u nuc'u'x ma c'axtaj c'o ch'a'oj chixo'libal alak, c'o ri c'ax quic'u'x chiquij jujun chic, c'o oyowal chwach alak, jachom pa alak, c'o ri caquich'amij quib, c'o ri e aj molot, c'o ri caqui'an nim che quib yey e c'o ri e sok'osak e quiwach e tzucul ch'a'oj. ²¹ Cubisoy c'u nuc'u'x ma c'axtaj we xinopon tanchi uc' alak, laj qui'nrika' e q'ui che alak c'a e c'o pa mac y na quitzelem ta quitzij chwach ri Dios; ma caqui'an tak ri ch'ulilaj mac, caquetz'abej uwa quik'ij cuc' jujun chic na quic'ulel taj y quiya'om quib che u'anic ronoje tak ri rayibal re ri q'uiti'jil. We xi'nrika c'u ri' wa', lic quinq'uix chwach ri Dios uma ralak y quebenuwok'ej c'u ri' ri quebanaw re wa'.

13

¹ Rutzij Upixab ri Dios jewa' cubi'ij: «We e c'o queb oxib caquijiquiba' uwach rumac junok ma xquilo

echiri' camacunic, cak'at c'u tzij ri' puwi raj mac.»^{*} E urox laj wa' quinopon uc' alak, ² yey c'o cuaj cambi'ij che onoje alak y chique ri na cok'otam ta can ri quimac. Wa' e ri nubi'im chi can che alak echiri' xinopon chucalaj uc' alak y wo'ora cambi'ij tanchic tob na in jinta uc' alak: We xinopon tanchic, na qui'nto'o ta wi' alak. ³ Canc'ut c'u ri' chiwach alak ri catz'onoj alak, wa' e ri c'utubal re we pakatzij wi ri nutzij ri'in e utzij ri Cristo. Ma Rire na cuxi'ij ta rib yey lic c'o uchuk'ab re cusuc'upij ri binic silabic alak. ⁴ Pakatzij wi ri Cristo echiri' xcamisax chwa cruz e pacha' na jinta uchuk'ab, pero wo'ora Rire c'aslic ruma ruchuk'ab ri Dios. Jec'uri'la' we ri'oj xa jun ka'anom ruc' ri Cristo, e pacha' na jinta kachuk'ab ruma ri c'ax cakatijo, no'j cojc'asi' ruma ruchuk'ab ri Dios c'o kuc' yey cakac'ut na c'u ri' wa chuk'ab echiri' cojopon uc' alak. ⁵ Ch'obo alak rakan we pakatzij wi c'o c'utubal re ri cubulibal c'u'x alak ruc' ri Kanimajawal Jesucristo y c'o c'u alak puk'ab Rire. ¿Na eta'am ta neba alak Rire c'o pa anima' alak? ¿O c'axtaj na jinta ne c'ana c'utubal re wa' chupa ri binic silabic alak? ⁶ Ec'u cuaj ri'in queta'maj alak wa': Che ri kabinic kasilabic cak'alajinic c'o ri Cristo pa kanima' y Rire caqui'cot ruc' ri ka'anom. ⁷ Cakatz'onoj c'u che ri Dios cha' ralak na catzak ta c'ana alak chupa ri na utz taj. Na cakatz'onoj ta wa' re yacbal kak'ij ri'oj, ma xew cakaj ca'an alak ri utz, tob e c'o ri caquic'ak bi kak'ij ri'oj.* ⁸ Ma ri'oj na jinta pakak'ab cakac'ak bi quik'ij ri quebin chupa ri K'ijsak. Ri caka'ano e cojchacun ne ruma ri K'ijsak cha' conoje quebin chupa. ⁹ E uwari'che lic cojq'ui'cot che we cac'oji' chuk'ab ralak che u'anic ri utz, tob quilitalaj c'ut pacha' e na jinta chi kachuk'ab ri'oj. Cakatz'onoj c'u che ri Dios cha' e

^{*} **13:1** Dt. 19:15 ^{*} **13:7** "Tob e c'o ri caquic'ak bi kak'ij ri'oj": We ri aj Corinto caquiyijba' quib, na cajawax ta chic cak'at tzij paquiwil'. We jec'ula' ri' xu'ano, laj e c'o jujun caquibi'ij na jinta uchuk'ab ri Pablo ma na xuk'at ta tzij paquiwil' jela' pacha' ri ubi'im lok.

cuchomaj chi utz ri binic silabic alak.
¹⁰ Ruma c'u wa', quintz'iban apanok xalok' c'amaja' quinopon uc' alak, cha' we xinoponic, na cajawax ta chi c'ax quinch'aw paw'i alak. Ma ri chac uya'om ri Dios chwe e re q'uiyibal alak, na re ta sachibal wach alak.

Q'uisbal uch'a'tem ri Pablo che riglesia c'o Corinto

¹¹ Q'uisbal c'u re hermanos, cambi'ij wa' che alak: C'ola qui'cotemal pa anima' alak, suc'upij ri binic silabic alak chwach ri Dios, nimarisaj c'u'x alak chiwach alak, chu'ana xa jun c'u'x alak y c'ola alak chi utzil chomal. Y ec'u ri Dios, ri aj ya'l utzil chomal y rutzil c'u'xaj, cac'oji' uc' alak. ¹² Ya'a rutzil wach alak chiwach alak ruc' jun sakil tz'ubuj chi'aj chwach ri Dios.† ¹³ Conoje ri hermanos wara caquiya pan rutzil wach alak. ¹⁴ C'ulu c'u onoje alak ri unimal rutzil uc'u'x ri Kanimajawal Jesucristo y ri rutzil uc'u'x ri Dios, yey chu'ana xa jun c'u'x alak ruma ri Santowilaj Ruxlabixel. Amén.

† **13:12** Ri Pablo jewa' xubi'ij ma rique e caqui'an wa' chiquiwach echiri' caquiya rutzil quiwach.

Ri carta xutz'ibaj ri Pablo che riglesia c'o Galacia

Ri Pablo cuya pan rutzil quiwach ri hermanos e c'o Galacia

¹ Ri'in in Pablo, in utako'n ri Dios. Na e ta c'u juna ticawex takayom lo we, na e ta juna achi cojoyom we; ma e ri Kanimajawal Jesucristo y e ri Kakaw Dios, ri Jun xuc'astajisaj lo Ruc'ajol chiquixo'l ri ecaminak. ² Junam c'u cuc' conoje ri hermanos e c'o wara wuc', cantz'ibaj pan wa carta chique riglesias e c'o che ri luwar re Galacia. ³ C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo, ⁴ ri xuya rib pa camic ruma ri kamac. Xu'an wa' ma e xraj ri' ri Kakaw Dios che cha' jela' cojresaj lo che ronoje ri na utz taj caqui'an ri winak chupa tak wa k'ij oj c'o wi. ⁵ Kayaca c'u uk'ij ri Kakaw Dios wak'ij ora y chikawach apanok na jinta chi utakexic. Amén.

Xa jun ri Utzilaj Tzij re ri Dios

⁶ E ri'in lic cacam wanima' che ma na jampatana xya can alak ri Dios, ri xusiq'uij alak ruma ri unimal rutzil uc'u'x ri Cristo, yey ec'u wo'ora e takem alak jun c'utunic junwi chwa ri Utzilaj Tzij re ri Cristo. ⁷ Wa' na e ta que'elawi c'o juna chic Utzilaj Tzij puwi ri Cristo. Pero e c'o jujun xa caquisachisaj na'oj alak y e cacaj caqui'alcatij ri Utzilaj Tzij re ri Cristo. ⁸ Tob ne junok chike ri'oj o juna ángel re chila' chicaj cutzizoj juna chic c'utunic che alak junwi chwa ri Utzilaj Tzij katzijom chi ri'oj che alak, peta c'u ri' ri k'atbal tzij re ri Dios puwi'. ⁹ Jela' pacha' ri nubi'im lok, cambi'ij tanchi wo'ora: We c'o junok cutzizoj juna chic c'utunic junwi chwa ri Utzilaj Tzij tom chi alak, peta c'u ri' ri k'atbal tzij re ri Dios puwi'.

¹⁰ ¿E neba cantzucuj ri'in ri yacbal nuk'ij chiquiwach ri ticawex o e cuaj can'an janipa ri caraj ri Dios? ¿E neba cuaj ri'in quinel chi utz chiquiwach ri ticawex? We ta ri'in xa e cantzucuj ri cayac nuk'ij cuma ri ticawex, ri' na in ta sakil aj chac re ri Cristo.

Ri Utzilaj Tzij xtzijox ruma ri Pablo

¹¹ Cheta'maj c'u alak hermanos: Ri Utzilaj Tzij cantzizoj ri'in na xa ta uch'a'tem juna achi, ¹² na e ta juna achi xya'w chwe y na che tane juna achi xinmaj wi wa'; ma e ri Kanimajawal Jesucristo xk'alajisan chwe.

¹³ Tom chi c'u alak puwi ri nubinic nusilabic ojertan echiri' nutakem tak ri cojobal que raj judi'ab; ruc' c'ax xebenuternabej rutinamit ri Dios ri quicojom rubi' ri Cristo y lic xintij uk'ij cansach quiwach conoje.

¹⁴ Chiquixo'l ri wachbi'il junam oj q'uiyinak lok, in ri lic xinya wib che utakexic tak ri cojobal que can ri kati'-kamam ri oj aj judi'ab. ¹⁵ Na ruc' ta c'u ri', ri Dios xinucha' lo ri'in echiri' c'amaja' ne quinalaxic, xinusiq'uij ruma ri unimal rutzil uc'u'x ¹⁶ y xuk'alajisaj uwach Ruc'ajol chwe cha' e cantzizoj ri Utzilaj Tzij chique ri na e ta aj Israel. Yey puwi wa' na xintz'onoj tane nuna'oj che juna ticawex.

¹⁷ Na xin'ec tane Jerusalem re quebe'nuwila ri ebu'anom tako'n nabe chinuwa ri'in. Ri xin'ano, e xin'ec Arabia y c'a tec'uchiri' xintzelej tanchi Damasco. ¹⁸ Xic'ow na c'u oxib junab echiri' xintzelej Jerusalem re canweta'maj uwach ri Pedro y xinc'o'ji' chila' ruc' wo'lajuj k'ij. ¹⁹ Yey na xinwil ta quiwach ri jujun chic e tako'n; xew xinwil uwach ri Jacobo, ruchak' ri Kanimajawal. ²⁰ Chwach c'u ri Dios cambi'ij che alak: Wa cantz'ibaj pan che alak lic katzij, na rak'ubal taj. ²¹ Tec'uchiri' xin'ec tanchi che tak ri luwar re Siria y re Cilicia. ²² Chupa tak la' la k'ij, ri hermanos re riglesias e c'o Judea c'amaja' ne caqueta'maj nuwach ri'in, ²³ xew quitom cabi'xic: «E rachi xojuternabej ruc' c'ax ruma kacojom

rubi' ri Kanimajawal, wo'ora catajin che utzijoxic ri Utzilaj Tzij, yey e ne rire ri lic xraj cusachisaj uwach wa'.»
 24 Wuma c'u ri'in ri hermanos e aj Judea lic xquiyac uk'ij ri Dios.

2

Ri e aj wach re riglesia caquita puwi ri chac cu'an ri Pablo chiquixo'l ri na e taj aj judi'ab

1 Xic'ow na c'u cajlajuj junab echiri' xin'ec tanchi Jerusalem ruc' ri Bernabé, yey xinc'am bi ri Tito kuc'.
 2 Xin'ec c'ut, ma ri Dios xuk'alajisaj chwe chirajawaxic quinopon chila'. Xkamol c'u kib xew cuc' ri e aj wach re riglesia y xink'alajisaj chiquiwach ri Utzilaj Tzij cantzijoj chique ri na e ta aj judi'ab. E xin'an wa' cha' janipa ri nu'anom chic y tak ri quintajin che u'anic na casach ta uwach.
 3 Wachbi'il c'u ri Tito yey rire na e ta cuq'uil ri e aj judi'ab; na ruc' ta c'u ri', ri e aj wach re riglesia na xquitak tane che rire cucoj ri retalil re circuncisión.

4 Xkamol c'u kib cuc' wa e aj wach, ma e c'o jujun na e ta sakil hermanos xquimin quib chikaxo'libal ri'oj cha' e caquic'ac'alej ri kabinic kasilabic ri oj re ri Cristo, ri Jun xojresaj lo chuxe' ri takanic que raj judi'ab. Xqui'an wa' xa re cacaj cojc'oji' paquik'ab rique.
 5 Pero ri'oj na xkatakej ta c'ana ri caquibi'ij cha' jela' na cajalc'ataj ta ri K'ijsak re ri Utzilaj Tzij cojom chi alak.

6 E tak c'u raj wach re riglesia ri lic c'o quiwach, tob na junta c'o cu'an chwe ri'in we ri petinak lok c'o quiwach o na jintaj ma chwach ri Dios xa jun kawach; rique na junta juna c'ac' tzij xquicoj puwi ri nuc'utunic ri'in.
 7 Y na xew ta wa', ma xquimaj usuc' e ri Dios xya'w panuk'ab ri'in rutzijoxic ri Utzilaj Tzij chique ri na e ta aj judi'ab, jela' pacha' xya'i' che ri Pedro rutzijoxic wa' chique ri e aj

judi'ab.* 8 Ma ri Dios, ri xutak bi ri Pedro re cu'ana utako'n chiquixo'l ri e aj judi'ab, e xtakaw bi we'in re quinu'ana utako'n chiquixo'l ri na e ta aj judi'ab. 9 Ec'u ri Jacobo, ri Pedro y ri Juan, ri lic c'o quiwach pa riglesia, xquimaj usuc' e ri Dios ya'yom wa jun chac chwe. Xquiya c'u ri' ri quik'ab chwe ri'in y che ri Bernabé, c'utubal re oj chi cachbi'il rique. Y xuc'ul quic'u'x cojchacun ri'in y ri Bernabé chiquixo'l ri na e ta aj judi'ab, yey rique e quechacun chiquixo'l ri e aj judi'ab. 10 Xew c'u lic xquitz'onoj chike na quekamesc'utaj ta ri e niba'ib y wa' lic e cacha nuc'u'x che u'anic.

Ri Pablo cuch'a'bej upa ri Pedro

11 Na ruc' ta c'u ri', echiri' ri Pedro xc'un pa ri tinamit Antioquía, ri'in e la' chiwachil lic co xinch'a'bej upa ruma ri na usuc' taj catajin che u'anic. 12 Ma ri Pedro xaki cawa' cuc' ri hermanos na e ta aj judi'ab, no'j echiri' xec'un jujun e petinak Jerusalem pa riglesia pa c'o wi ri Jacobo, xresaj rib chiquij ri na e ta aj judi'ab y na xwa' ta chi cuc', ma cuxi'ij rib chiquiwach ri lic queboc il che ri retalil re circuncisión.† 13 Ec'u ri hermanos e aj judi'ab xqui'an que ruc' ri Pedro, yey ri Bernabé xpacha'b ne cuc' wa' wa xa queb quipalaj. 14 Echiri' ri'in xinwilo na e ta caqui'an jela' pacha' ri cubi'ij ri sakil c'utunic re ri Utzilaj Tzij, jewa' ximbi'ij che ri Pedro chiquiwach conoje ri quimolom quib: «Rilal, lal cuq'uil raj judi'ab yey ca'an e la pacha' ri caqui'an ri hermanos na e ta aj judi'ab y na catakej ta chi la jujun che ri takanic que raj judi'ab. ¿Sa' c'u uchac ri' cabi'ij rilal chique ri na e ta aj judi'ab chirajawaxic caquitakej wa takanic que ri e aj judi'ab?»

Cojcolobetajic ruma ri cubulibal kac'u'x ruc' ri Cristo

* 2:7 "Ri e aj judi'ab": Pa ri ch'a'tem griego cubi'ij "ri e re ri circuncisión". † 2:12 "Ri lic queboc il che ri retalil re circuncisión": Wa' e jujun aj judi'ab quicojom chi rubi' ri Cristo pero caquibi'ij chirajawaxic chique ri na e ta aj judi'ab caquicoj ri retalil re circuncisión cha' quecolobetajic.

¹⁵ Ri oj aj judi'ab, chwi kalaxic lok, na oj ta aj palajiy tzij pacha' ri jujun chic tinamit na jinta Rutzij Upixab ri Dios cuc'. ¹⁶ Na ruc' ta c'u ri', keta'am na jinta junok cu'an jusuc' che rib ruma cutakej ri takanic que raj judi'ab; ma ri lic chirajawaxic wi e ri cubulibal c'u'xaj ruc' ri Kanimajawal Jesucristo. E uwari'che ri'oj xkacoj rubi' cha' jela' Rire cu'an jusuc' chike xew ruma ri cubulibal kac'u'x ruc' y na ruma ta ri cakatakej juna tzij pixab. Ma na jinta junok cu'an jusuc' che rib ruma cutakej ri takanic que raj judi'ab. ¹⁷ Ec'u ri'oj lic cakaj coju'an jusuc' chwach ri Dios xew ruma ri cubulibal kac'u'x ruc' ri Cristo; yey we chiquiwach c'u jujun chic, oj aj mac ruma na cakatakej ta chi ri quitakanic rique, ¿e nawi que'elok coju'ana aj mac ruma ri cubulibal kac'u'x ruc' ri Cristo? ¡Na e ta ri'! ¹⁸ Ma we canc'osoj tanchi lo uwach ri nuc'akom chubi, ri' e que'elok in jun aj palajiy tzij. ¹⁹ Ri'in xinya wib che u'anic ronoje ri takanic que raj judi'ab cha' jela' can'an jusuc' che wib, pero xinmaj usuc' na ruma ta wa' cu'an jusuc' junok chwach ri Dios; ec'u wo'ora nuya'om wib che ulok'nimaxic ri Dios ruc' ronoje ri nuc'aslem.

²⁰ Jec'ula', ri nuc'aslemal na we'in ta chic, ma e re ri Kanimajawal Jesucristo. E pacha' xincam chwa ri cruz junam ruc' ri Cristo. Wo'ora che ri nuc'aslem, ronoje ri can'ano e ruma ri cubulibal nuc'u'x ruc' Ruc'ajol ri Dios, ri lic c'ax xinuna'o y xuya rib pamic wuma ri'in. ²¹ Na cuaj ta c'ut canc'ak bi uk'ij ri unimal rutzil uc'u'x ri Dios; ma we ta c'o junok curiko cu'an jusuc' che rib chwach ri Dios ruma utakem ri tzij pixab, ri' na jinta cutikoj rucamic ri Cristo.

3

Cakac'ul ri Ruxlabixel ri Dios ruma xkacoj ri Utzilaj Tzij

¹ ¡Tok'o' wach alak aj Galacia! Lic co 'anom che ri c'u'x alak. ¿China

xsocoso'n e alak cha' na cacoj ta chi alak ri K'ijsak? Ma lic xk'alajisax chiwach alak sa' que'elawi rucamic ri Kanimajawal Jesucristo chwa ri cruz. ² Bi'ij alak wa' chwe: ¿Xc'ul alak ri Ruxlabixel ri Dios ruma xtakej alak ri takanic que raj judi'ab o ruma xta alak ri Utzilaj Tzij y xcubi' c'u'x alak che? ³ ¿Su'chac lic 'anom co che ri c'u'x alak? Ma ri binic silabic alak chwach ri Dios xjek lo alak ruma ruchuk'ab ri Ruxlabixel ri Dios, yey wo'ora ¿ca'aj cami alak ri' caq'uisbej alak wa' xa ruc' ri chuk'ab ralak? ⁴ ¿Na jinta cami utikom ri' che alak janipa tak ri c'ulum alak ruma ri Ruxlabixel ri Dios? Na cancoj ta c'ana ri'in we wa' na jinta utikom che alak. ⁵ Ma echiri' ri Dios cuya ri Ruxlabixel che alak y ruc' ruchuk'ab cu'an nimak tak milagros chixo'l alak, ¿su'anic cu'ano? ¿E nawi ruma takem alak ri takanic que raj judi'ab o e ruma xta alak ri Utzilaj Tzij y xcubi' c'u'x alak che?

Ri cubulibal uc'u'x ri Abraham ruc' ri Dios

⁶ Ri Abraham xcubi' uc'u'x ruc' ri Dios* y ruma c'u ri' x'ani' jusuc' che. ⁷ E uwari'che, chirajawaxic queta'maj alak wa': E janipa ri lic cubul quic'u'x ruc' ri Dios, ri' e ralc'o'al can ri Abraham. ⁸ Ruch'a'tem ri Dios xex chi ubi'im wi lo paquiwi ri na e ta aj Israel, we rique cacubi' quic'u'x ruc' ri Dios, quebu'an jusuc'. Ma jewa' ri utzilaj tzij xbi'x lo ojertan che ri Abraham: Awuma ri'at, ri Dios quebu'an bendecir conoje tak ri tinamit che ruwachulew. *Gn. 12:3*

⁹ Jec'uri'la', conoje ri cacubi' quic'u'x ruc' ri Dios caquic'ul na ri utz cape ruc' Rire, jela' pacha' ri xuc'ul ri Abraham ruma xcubi' uc'u'x ruc'.

¹⁰ Conoje ri quicubam quic'u'x quecolobetaj xa ruma caquitakej u'anic ri tzij pixab, ri' e c'o chi chuxe' ri k'atbal tzij re ri Dios, ma jewa' tz'ibitalic:

China c'u ri na cu'an ta janipa ri takanic

* **3:6** Ri Abraham xucojo ri Dios e cu'ana janipa ri xubi'tisij che. Gn. 15:6

tz'ibital can chupa ri Tzij Pixab,
ri' c'o chi chuxe' ri k'atbal tzij re ri
Dios *Dt. 27:26*
cacha'. ¹¹ Cak'alajin c'u ri', na jinta
junok cu'an jusuc' che rib chwach ri
Dios ruma cutakej ri Tzij Pixab, ma
jewa' tz'ibitalic:

Ri e jusuc' chwach ri Dios,
c'o quic'aslemal ruma ri cubulibal
quic'u'x ruc' Rire *Hab. 2:4*
cacha'.

¹² E junok cuch'ob rakan cacolo-
betaj ruma cutakej ronoje ri Tzij
Pixab, ri' na cubul ta uc'u'x cacolo-
betaj ruma ri cubulibal uc'u'x ruc' ri
Cristo. Yeyjenewa' cubi'ij Ruch'a'tem
ri Dios:

China ri ca'anaw re ronoje ri cubi'ij ri
Tzij Pixab,†
ri' c'o uc'aslemal chwach ri Dios
ruma cu'an wa' *Lv. 18:5*
cacha'.

¹³ Ri Cristo xojresaj chuxe' ri
k'atbal tzij c'o pakawi' ruma xkapala-
jij Rutzij Upixab ri Dios; xu'an c'u
wa' echiri' xuya rib pakac'axel ri oj
aj mac, ma jewa' ri tz'ibital can pa
Ruch'a'tem ri Dios:

Chwach ri Dios, itzel uwach junok
catzayabax chwa juna che'.‡
Dt. 21:23

¹⁴ E xu'an wa' ri Kanimajawal Jesu-
cristo cha' ri rutzil uc'u'x ri Dios, ri
xbi'tisix che ri Abraham, caya'taj na
paquiwi ri na e ta aj Israel ruma ri
Cristo; y jec'ula' ruma ri cubulibal
kac'u'x, konoje cakac'ul ri Ruxlabixel
ri Dios bi'tisim chi ulok.

¹⁵ Hermanos, ri u'anom ri Dios can-
junimaj ruc' ri caqui'an ri ticawex
cha' camaj alak usuc': Echiri' queb
achijab caqui'an juna tzij chiqui-
wach y caquijiquiba' uwach, lic na
utz ta c'u ri' we jun chique cutzelej
uch'a'tem che ri ubi'im chic o cucoj
uwi' ri quijiquibam chic. ¹⁶ Ec'u ri
Dios xuya rubi'tisinic che ri Abraham
y che can ri Jun ralc'o'al. Rutzij
Upixab ri Dios na jetawa' cubi'ij
«chique can rawalc'o'al», pacha' e

uq'uiyal ticawex, ma jewa' cubi'ij
«che can ri Jun awalc'o'al»; wa'
que'elawi e ri Cristo.✱ ¹⁷ Wa quintajin
che ubi'xic e wa': Ri Dios xu'an
jun tzij ruc' ri Abraham. Xic'ow
na c'u cuatrocientos treinta junab
c'a echiri' ri Moisés xutz'ibaj can ri
takanic re ri Tzij Pixab. Ec'u wa
takanic na utz taj cuyoj wa nabe tzij
y na cuyoj tane ri xubi'tisij lo ri Dios.
¹⁸ Ma we ta cakac'ul rubi'tisim ri Dios
ruma cakatakej ri Tzij Pixab, ri' na e
ta ruma ri bi'tisinic xu'an ri Dios; no'j
ri xusipaj ri Dios che ri Abraham e
ruma ri bi'tisinic u'anom chi che.

*Ruchac ri Tzij Pixab tz'ibital can
ruma ri Moisés*

¹⁹ ¿Sa' c'u ruchac ri' ri Tzij Pixab
tz'ibital can ruma ri Moisés? E cha'
cuk'alajisaj chique ri ticawex sa' tak
ri quimac chwach ri Dios. Y jela'
u'anom lok c'a che ruc'unibal ri Jun
Alc'o'al bi'tisim lok, wa' e ri Cristo;
ma che Rire x'an wi wa' wa bi'tisinic.
Ri Tzij Pixab xtzijox cuma ri ángeles
che ri Moisés cha' rire cuk'atisaj
chiquiwach ri tinamit; ²⁰ no'j ri Dios
echiri' xu'an rubi'tisinic che ri Abra-
ham, na jinta junok xk'atitan ri tzij
chiquiwach, ma e Rire xuk'atisaj
rutzij che ri Abraham y na xajawax
ta c'u junok chic. ²¹ E uwari'che,
echiri' ri Dios xuya Rutzij Upixab
che ri Moisés, ¿e nawi xujalc'atij ri
bi'tisinic u'anom chi che ri Abraham?
Na e taj. Ma we ta e ri', e ri Tzij
Pixab caya'w ri kac'aslemal chwach
ri Dios, y coju'an c'u jusuc' ri' ruma
ri cakatakej ri tz'ibital canok. No'j
na e ta u'anom ri'. ²² Ma chupa ri
Tzij Pixab tz'ibital canok, cak'alajinic
konoje ri oj ticawex oj c'o puk'ab
ri mac; e uwari'che lic cajawax ri
bi'tisinic u'anom lo ri Dios chique ri
cacubi' quic'u'x ruc' ri Kanimajawal
Jesucristo.

²³ Echiri' c'amaja' cac'un ri Jun
cacubi' kac'u'x ruc', e ri Tzij Pixab
xojuchajij y xuc'am lo kawach cha'
cacubi' kac'u'x ruc' ri Cristo echiri'

† **3:12** Xew ri Kanimajawal Jesucristo xch'ijow u'aniquil ronoje Rutzij Upixab ri Dios. ‡ **3:13** Wa' e x'an ojertan echiri' cak'at tzij puwi juna aj mac, cacamisaxic y catzayabax chwa juna che'. ✱ **3:16** Gn. 12:7

copon ruk'ijol cak'alajisax ri Utzilaj Tzij chikawach. ²⁴ Ec'u que'elawi, ri Tzij Pixab tz'ibital can ruma ri Moisés xojuchajij y xuc'ut chike ri cajawaxic cakamajo, pacha' chi oj ac'alab; xuk'alajisaj c'u pan ruc'unibal ri Cristo cha' ruma ri cubulibal kac'u'x ruc' Rire, ri Dios cu'an jusuc' chike. ²⁵ Ec'u wo'ora cubul chi kac'u'x ruc' ri Cristo, jec'ula' na oj jinta chi chuxe' ri Tzij Pixab ri xuc'am lo kawach ojertan. ²⁶ Ma onoje ralak alak chi ralc'o'al ri Dios ruma ri cubulibal c'u'x alak ruc' ri Kanimajawal Jesucristo. ²⁷ Onoje c'u ralak ri xc'ul alak ri bautismo chupa rubi' ri Jesús, wo'ora alak chi re ri Cristo y cac'ut c'u alak wa' ruc' ri binic silabic alak. ²⁸ Xa jun 'anom alak chwach ri Dios, tob jujun che alak e cuq'u'il raj judi'ab o na e ta cuq'u'il, tob ne jujun che alak e aj chaquib elok'otalic[§] yey jujun chic quechacun pa que rique, tob achi o ixok; ma onoje ralak, xa jun 'anom alak ruma alak c'o puk'ab ri Kanimajawal Jesucristo. ²⁹ Yey we alak re ri Cristo, ri' alak ralc'o'al ri Abraham yey cac'ul c'u alak ri sipanic ubi'tisim lo ri Dios.

4

¹ Cambi'ij c'u wa' che alak: Echiri' c'a ch'uti'n ruc'ajol juna beyom, e junam ruc' pacha' juna aj chac pa ja. Tob ne e rire ri rajaw ronoje ri beyomalil, pero wa' c'amaja' cac'o'ji' puk'ab ² ma c'a c'o paquik'ab ri e chajal re y ri caquichacuj rubitak re, copon na ruk'ijol bi'tal can ruma rukaw echiri' quel chuxe' ri takanic que rique. ³ Jec'ula' kac'ulumam ri'oj ojertan, e pacha' oj ac'alab c'a oj c'o puk'ab ri takanic cojotal che ruwachulew. ⁴ No'j echiri' xopon ruk'ijol cha'tal chi lo ruma ri Dios, Rire xutak lo Ruc'ajol, ri xalax ruma jun ixok y xalax chuxe' ri takanic re ri Tzij Pixab tz'ibital can ruma

ri Moisés. ⁵ Rire xc'unic cha' coju-colobej ri oj c'o chuxe' wa takanic, y jec'ula' coju'ana oj ralc'o'al ri Dios. ⁶ E uwari'che, ruma oj chi ralc'o'al ri Dios, Rire xutak lo ri Ruxlabixel Ruc'ajol chupa ri kanima'; y ruma c'u ri Ruxlabixel, utz cakabi'ij che ri Dios: «¡Tat, Lal Nukaw!» cojcha'. ⁷ E uwari'che na lal ta chi pacha' jun aj chac c'o puk'ab juna patrón, ma wo'ora lal ralc'o'al ri Dios. Y ruma lal ralc'o'al, Rire cuya na che'la janipa ri ubi'tisim chique ri ralc'o'al.

Pixabanic chique ri quetzelej tanchi chuxe' ri takanic na re ta ri Dios

⁸ Pakatzij wi, rojertan echiri' na eta'am ta alak uwach ri Dios, ralak e quelok'nimaj alak tak ri tiox, ri lic quewi na e ta dios. ⁹ Ec'u wo'ora eta'am chi alak uwach ri Dios, o ri más jusuc' ubi'xiquil e “ralak eta'matal chi wach alak ruma ri Dios”. ¿Sa' c'u ube ri' caya tanchi ib alak chuxe' tak ri takanic na il ta uwach y na jinta uchac? ¹⁰ Ma lic calok'nimaj alak tak ri nimak'ij re ri jujun k'ij, ri jujun ic', ri jujun junab yey ruk'ijol ri jachbal upa tak ri junab. ¹¹ Lic cubisoj nuc'u'x ma c'axtaj ri chac nu'anom chixo'l alak na jinta cutikoj.

¹² Hermanos, lic cantz'onoj che alak 'ana e alak jela' pacha' ri nu'anom ri'in, ma ri'in jela' xin'ano pacha' ralak.* Yey echiri' xinc'o'ji' uc' alak na jinta juna c'ax x'an alak chwe. ¹³ Ma eta'am chi alak, echiri' xintzijoj ri Utzilaj Tzij che alak ri nabe laj, xincanaj can uc' alak ruma jun yabil in c'o wi. ¹⁴ Yey na tzel ta xinil alak, na xc'ak tane bi alak nuk'ij tob e la' c'o wa yabil chwe. Ma ri x'an alak e xinc'ul alak, x'an alak chwe pacha' in jun ángel re ri Dios, pacha' chi e xc'ul alak ri Kanimajawal Jesucristo. ¹⁵ ¿Pa c'u xcanaj can wi ri' ri qui'cotemal c'o uc' alak echiri' xinopon chila'? Ma ri

§ 3:28 “E aj chaquib elok'otalic”: Quil “esclavo” pa vocabulario. * 4:12 Ri Pablo echiri' xucoj rubi' ri Cristo, na xutakej ta chi ri cojobal que raj judi'ab. Yey echiri' rire xopon cuc' ri e c'o Galacia, rique na caquitakej ta ri cojobal que raj judi'ab, ma na e ta aj judi'ab. Pero xebopon jujun c'utunel e petinak Judea y xquic'ut chique chirajawaxic caquicoj ri cojobal que raj judi'ab; y jec'ula' ri e c'o Galacia xquijek caquitakej wa'.

xinwil che alak e caya ne anima' alak quesaj ri wach ralak cha' caya alak chwe ri'in. ¹⁶ ¿Ruma camí ximbi'ij ri lic katzij che alak, e tzel quinil wi alak ri' wo'ora?

¹⁷ Tak la' la ticawex lic chacojo' lic c'ax caquina' alak tob na e ta caquitzucuj ri utz che alak, ma ri cacaj rique e na cojtakej ta chi alak cha' xew e quetakej alak rique.

¹⁸ Pakatzij wi lic utz we ralak que-takej alak jujun chic, xew tane we rique e caquitzucuj ri lic utz che ralak. Jec'ula' cuaj ca'an ralak wuc' ri'in y na xew ta echiri' in c'o uc' alak.

¹⁹ Ralak pacha' alak walc'o'al, ri'in cantij tanchi c'ax uma ralak jela' pacha' juna ixok echiri' cutzir uwach. Y cantij c'u wa c'ax c'a echiri' ri binic silabic alak cu'ana pacha' ri re ri Cristo. ²⁰ Lic ne cuaj ta e la' in c'o chila' uc' alak wo'ora yey na lic ta c'ax quinch'aw pawí' alak, ma lic uchapom wanima' ri 'anom alak.

Ri c'ambal na'oj chwi rixok Agar y rixok Sara

²¹ Ralak ri ca'aj alak cac'oji' alak chuxe' ri takanic que raj judi'ab, cantz'onoj che alak: ¿Na tom ta neba alak ri ubi'im can ri Moisés chupa ri Tzij Pixab? ²² Ma tz'ibital canok ri Abraham xec'oji' ca'ib uc'ajol. Jun chique xalax ruc' rixok aj chac pa ja; ri jun chic uc'ajol xalax ruc' ri rixokil.* ²³ E ruc'ajol xalax ruc' rixok aj chac pa ja, xalaxic xa ruma quino'jibal rique; no'j ruc'ajol xalax ruc' ri rixokil, e ubi'tisim ri' ri Dios che ri Abraham. ²⁴ Ec'u wa' e jun c'ambal na'oj. Ri queb ixokib e que'elawi queb tzij; jun e ri petinak che ri juyub Sinaí pa xuya wi ri Dios ri takanic re ri Tzij Pixab. Wa' wi'xok e Agar, yey ri e ralc'o'al rire e ri caquiya quib chuxe' ri takanic que raj judi'ab. ²⁵ Ec'u ri Agar e cajunimax ruc' ri juyub Sinaí c'o chila' pa ri luwar re Arabia; yey wak'ij ora wa' e ri e aj Jerusalem, ma wa' wa tinamit e c'o

chuxe' tak ri takanic que raj judi'ab.

²⁶ No'j ri "Jerusalem" re chila' chicaj elinak chi chuxe' ri takanic que raj judi'ab yey ri'oj oj ralc'o'al wa' wa tinamit. ²⁷ Ma jewa' tz'ibital can pa Ruch'a'tem ri Dios:

¡Chatqui'cot ri'at ixok ri na catalan taj, ri na jinta awalc'o'al!

¡Chatsiq'uin ruma raqui'cotemal, ri'at ri na at ic'owinak ta pa ri c'ax re juna ixok echiri' cutzir uwach!

Ma ri e ralc'o'al rixok xok'otax canok, más queq'uiyar chiquiwach ri e ralc'o'al rixok c'o rachijil *Is.*

54:1

cacha'.

²⁸ Hermanos, ri'oj oj jela' pacha' ri Isaac, ma oj sakil ralc'o'al ri Dios ruma ri bi'tisinic xu'an Rire. ²⁹ Yey pacha' ri xu'an rojertan, ri xalax xa ruma rurayibal rachi e xuternabej ruc' c'ax ri xalax e chirij ri xraj ri Ruxlabixel ri Dios; jec'ula' u'anom wo'ora. ³⁰ Pero ¿sa' ri cubi'ij Ruch'a'tem ri Dios tz'ibital canok? Jewa' cubi'ij:

E chesaj bi la rixok aj chac pa ja junam ruc' ri ralab. Ma che ri ralab wi'xok na caya'i' ta ri takal che cuc'ul ri ralab ri rixokil ri rajaw ja *Gn. 21:10* cacha'. ³¹ E uwari'che hermanos, ri'oj na oj ta ralc'o'al rixok aj chac pa ja, ma oj ralc'o'al ri rixokil ri rajaw ja.

5

Ri Cristo ojresam chi chuxe' ri takanic que raj judi'ab

¹ E chuk'ubej ib alak che ri colobetajic xya'i' chike ruma ri Cristo echiri' xojresaj lo chuxe' ri takanic que raj judi'ab; maya tanchi c'u ib alak chuxe' ruc'ayewal wa' wa takanic.

² Chinta na pe alak. Ri'in Pablo, cambi'ij che alak: We caya ib alak che ucojic ri retalil re circuncisión cha' cac'oji' alak jusuc' chwach ri Dios, ri' na jinta uchac ri Cristo che alak.

³ Cuaj cambi'ij tanchi wa': We juna

* **4:22** Gn. 16:15; 21:1-3 * **5:3** Wa' e cach'a't paquiwi ri na e ta aj judi'ab, ri xquicoj ri retalil re circuncisión ma e xquich'obo ruc' wa' caquirik ri colobetajic.

achi cucoj ri retalil re circuncisión,* ri' chirajawaxic che e cu'an ronoje ri takanic que raj judi'ab. ⁴ Ec'u ralak, ri cach'ob alak e cu'an alak jusuc' chwach ri Dios ruma ri catakej alak wa takanic, ri' che ri Cristo xesaj wi ib alak y e xya can alak ri unimal rutzil uc'u'x ri Dios. ⁵ No'j ri'oj, ruma ri Ruxlabixel ri Dios pa kanima', koye'em ri k'ij echiri' ri Dios cojuc'ulu ma oj chi jusuc' chwach ruma ri cubulibal kac'u'x ruc' ri Cristo. ⁶ Yey we oj re ri Kanimajawal Jesucristo, na jinta chi que'elawi we caca-coj ri retalil re circuncisión o we na cakacoj taj. Ma ri lic chirajawaxic e ri cubulibal kac'u'x ruc' ri Cristo, yey wa' e cakac'ut ruma ri rutzil kac'u'x.

⁷ Ri binic silabic alak ruc' ri Cristo xjek lo alak chi utz. ¿China xk'aten e alak cha' na cabin ta chi alak chupa ri K'ijsak? ⁸ Ri Dios, ri xusiq'uij alak, na e ta xuc'ut wa' che alak. ⁹ Masach chic'u'x alak wa': «Echiri' que'ec jubik' levadura chupa ri k'or re pam, wa' cusipowirisaj upa ronoje.» Wa' e que'elok: E junok na sakil ta runa'oj, cusachisaj ri quina'oj ri jujun chic. ¹⁰ Ruma c'u kaya'om kib ralak y ri'in puk'ab ri Cristo, e lic cubul nuc'u'x na jinta juna chic na'oj alak puwi wa' chwa ri canch'ob ri'in. Yey we c'o junok cusachisaj na'oj alak, c'o chi ri' ri k'atbal tzij re ri Dios puwi', xa tob chinok.

¹¹ Ec'u ri'in hermanos, we ta e la' cambi'ij chirajawaxic cacoj ri retalil re circuncisión che junok cha' cacolobetajic, ri' raj judi'ab na quech'o'jin ta chi wuc' y na tzel tane caquita ri tzijonic can'an puwi rucamic ri Kanimajawal Jesucristo chwa ri cruz. No'j na je ta la' u'anom. ¹² Ec'u chique ri caquisachisaj na'oj alak, jta ne asu quik'ata bi ri culewal!

¹³ Ma ralak hermanos, xsiq'uij alak cha' na cac'oji' ta alak chuxe' ri takanic que raj judi'ab; xew c'u matz'ila' ri binic silabic alak ruc'

tak ri rayibal re ri ti'jil alak. E nimaj ib alak chiwach alak ruc' rutzil c'u'xaj. ¹⁴ Ma ronoje ri takanic re ri Moisés catz'akat uwach ruc' wa ch'a'tem: «C'ax chana'a rawatzachak' jela' pacha' ri c'ax cana' awib ri'at»[☆] cacha'. ¹⁵ No'j we ralak capurij ib alak y catij ne ib alak chiwach alak, chajij c'u ib alak ri' ma c'axtaj asu casach ne wach alak chiwach alak.

Tak ri rayibal na utz ta uwach que ri ticawex

¹⁶ Cambi'ij c'u wa' che alak: E takej alak janipa ri caraj ri Ruxlabixel ri Dios che alak cha' jela' na caya ta ib alak che tak ri rayibal re ri ti'jil alak. ¹⁷ Ma e rurayibal ri ti'jil alak na cuc'ulaj ta rib ruc' ri caraj ri Ruxlabixel ri Dios, yey e ri Ruxlabixel ri Dios na cuc'ulaj ta rib ruc' rurayibal ri ti'jil alak. Quicabichal c'u ri' quech'o'jin chiquiwach; ruma c'u la', ri ti'jil alak cuk'atej ri utz ca'aj alak ca'an alak. ¹⁸ No'j we e ri Ruxlabixel ri Dios ri cac'amaw wach alak, ri' na jinta alak chuxe' ri takanic re ri Tzij Pixab.†

¹⁹ Lic cak'alajin uwach tak ri na utz taj caqui'an ri winak ri caquitakej tak ri rayibal re ri quti'jil. Rique e quemacun chirij ri c'ulaniquil, caquetz'abej uwa quik'ij cuc' jujun chic na quic'ulel taj, caqui'an ri ch'ulilaj mac y caquimaj uwach tak ri rayibal re ri quti'jil, ²⁰ caquilok'nimaj uk'ij tiox, caqui'an itz, tzel quequil jujun chic, e aj ch'a'oj, c'ax quic'u'x chiquij jujun chic; e aj oyowal, e aj chapanel che ch'a'oj, e aj jachal quipa jujun chic, e aj c'utunel re tak na'oj na utz taj‡ ²¹ tzel caquil jun chic ruma caquirayij ri c'o ruc', e camisanel, e k'aba'relab, caquimol quib re caqui'an ch'ulilaj mac y caqui'an jujun chic mac pacha' tak wa'. Cambi'ij c'u jumul chic che alak: Conoje wa' na jinta que cuc' ri ya'tal chique queboc pa rutakanic ri Dios.

☆ 5:14 Lv. 19:18 † 5:18 Wa' na e ta que'elawi utz cojmacunic. E que'elawi ri Ruxlabixel ri Dios cojuto'o cha' caka'an ronoje ri caraj ri Dios. Ro. 6:15 ‡ 5:20 “E aj c'utunel re tak na'oj na utz taj”: Pa ri ch'a'tem griego wa' también que'elawi “ri xew caquimol quib cuc' ri junam quina'oj cuc' rique”.

Ri quibinic quisilabic ri quitakem janipa ri caraj ri Ruxlabixel ri Dios

²² No'j rujik'obalil ri Ruxlabixel ri Dios ruc' junok e wa': pa ranima' c'o rutzil c'u'xaj, c'o qui'cotemal y c'o utzil chomal; c'o unimal uc'u'x, utz uc'u'x, c'o relej uc'u'x; ri jujun chic cacubi' quic'u'x ruc', ma janipa ri cubi'ij, e cu'ana'; ²³ na cu'an ta nim che rib y cuch'ij uchuk'ab tak ri rayibal re ruti'jil. We jec'uri'la' u'anom junok, na cajawax tane ri' c'o junok capixaban re cha' cu'an ri utz. ²⁴ Janipa ri e re ri Kanimajawal Jesucristo, na caquitakej ta chi§ ri rayibal re ri quiti'jil. ²⁵ We ri Ruxlabixel ri Dios uya'om ri c'ac' kac'aslemal, kaya'a c'u ri kabinic kasilabic puk'ab Rire. ²⁶ Makatzucuj ri yachal kak'ij, makapetisaj koyowal chikawach y matzel mekil jujun chic ruma cakarayij ri c'o cuc'.

6

Kato'o kib chikawach

¹ Hermanos, we xna'bej alak c'o junok tzakinak pa mac, e ralak ri c'amom wach alak ruma ri Ruxlabixel ri Dios, to'o alak cha' cayactajic. Yey chajij ib alak ma c'axtaj catzak ralak chupa wa' wa xu'an rire. ² To'o ib alak chiwach alak we c'o junok che alak c'o pa c'axc'obic, ma jec'uri'la' catajin alak che u'anic ri tzij xuc'ut can ri Cristo. ³ Ma we c'o junok cuch'obo lic c'o uwach ruma ri cu'ano yey na e ta c'u u'anom, ri' utuquel cusoc rib. ⁴ E uwari'che chirajawaxic wi chikajujunal cakach'ob chi utz puwi ri ka'anom. Y we utz ri ka'anom chwach ri Dios, chojqui'cot c'u ri', pero maka'an c'u nim che kib xa ruma ka'anom más chiquiwa ri jujun chic. ⁵ Ma ri chirajawaxic wi e chikajujunal cakac'am bi ri c'o chikakul caka'ano.

⁶ We c'o junok cuc'ut Rutzij Upixab ri Dios che alak, chirajawaxic wi cato' alak rire ruc' ri bitak e alak.

⁷ Masocosa' ib alak: Na jinta junok casocow re ri Dios. E chirij ri cutic junok, e jela' ri cumolo. ⁸ Ma we junok e cuya rib che tak ri rayibal re ruti'jil, ri' e cuc'am lo ri camic puwi'. No'j we junok e cuya rib che u'anic ri caraj ri Ruxlabixel ri Dios, ri' che ri Ruxlabixel cuc'ul ri c'aslemal na jinta utakexic. ⁹ Mojcos che u'anic ri utz y makok'otaj ne u'anic wa', ma copon na ruk'ijol que'kila uwach rujik'obalil ri ka'anom. ¹⁰ E uwari'che, we c'o pakak'ab caka'an ri utz, e ka'ana c'u ri' wa' chique conoje, y más e ka'ana ri' chique conoje ri quicojom rubi' ri Cristo.

Quisbal uch'a'tem ri Pablo che riglesia c'o Galacia

¹¹ Chilape alak, ruc' nimak tak letras quintz'iban pan che alak. ¹² Ri jujun caquibi'ij che alak e lic chirajawaxic wi cacoj alak ri retalil re circuncisión, caqui'an wa' xa e cha' na caquijal ta uchi' chiquiwach jujun chic y cha' na cape ta c'ax paquiwi' ruma caquitzijoj rucamic ri Cristo chwa ri cruz. ¹³ Ma ri jujun caquimin alak chupa che ucojic ri retalil re circuncisión, rique na caqui'an tane ronoje ri Tzij Pixab; xew cacaj caquitac'aba' quik'ij ruma xcoj alak quitzij. ¹⁴ No'j ri'in na cuaj ta c'ana cantac'aba' nuk'ij, xew lic canyac uk'ij ri Kanimajawal Jesucristo ruma ri xu'an Rire chwa ri cruz. Ruma c'u ri', na cacha ta chi nuc'u'x che tak ri xa re ruwachulew; ronoje wa' e pacha' caminak chi chinuwach ri'in; yey ri'in e pacha' in chi caminak chwach tak ri xa re ruwachulew. ¹⁵ Ma we oj re ri Kanimajawal Jesucristo, na jinta chi que'elawi we cakacoj ri retalil re circuncisión o we na cakacoj taj; ma ri lic caraj Rire, e cu'an c'ac' ri kabinic kasilabic. ¹⁶ Onoje c'u ralak ri takem alak wa' wa c'utunic puwi ri c'ac' kabinic, c'ulu alak ri utzil chomal y ri rutzil uc'u'x ri Dios, junam cuc'

§ 5:24 “Na caquitakej ta chi”: Pa ri ch'a'tem griego cubi'ij “quicamisam chwa cruz”.

rutinamit Israel, ri pakatzij wi e re Rire.

¹⁷ Chwi c'u wo'ora, na cuaj taj c'o juna latz'anel chwe puwi ri nuc'utunic, ma che ri nucuerpo k'alaj tak ri c'utubal re ri c'axc'obic xinic'ow wi ruma in jun aj chac re ri Kanimajawal Jesucristo.

¹⁸ Hermanos, c'ola c'u pa anima' alak ri unimal rutzil uc'u'x ri Kanimajawal Jesucristo. Amén.

Ri carta xutz'ibaj ri Pablo che riglesia c'o Éfeso

Ri Pablo cuya pan rutzil quiwach ri hermanos e c'o Éfeso

¹ Ri'in in Pablo in tako'n re ri Kanimajawal Jesucristo; e ri Dios intakayom re, ma e xraj ri' chwe. Cantz'ibaj pan wa carta che alak ri c'o alak pa ri tinamit Éfeso,[☆] ri c'o alak puk'ab ri Cristo y tiquil alak chi utz chupa rubi'. ² C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

Ronoje tak ri utz uch'obom lo ri Dios e cuya chike ruma ri Cristo

³ ¡Lic nim uk'ij ri Dios, Rukaw ri Kanimajawal Jesucristo! Ruma oj chi re ri Cristo, ri Dios uya'om lo chike ronoje tak ri to'bal petinak chila' chicaj. ⁴ Ma ri Dios c'amaja' ne cu'an ruwachulew echiri' xojucha' lok cha' cojuya puk'ab ri Cristo, y jela' coju'an jusuc' y na jinta chi ne c'ana kamac chwach. ⁵ Ruma c'u rutzil uc'u'x ri Dios, lic ojertan xujiquiba' lo uwach cha' cu'an ral'c'o'al chike ruma ri Kanimajawal Jesucristo. Yey lic pa ranima' xalax wi cu'an wa'. ⁶ Cakayac c'u uk'ij ri Dios ruma ri unimal rutzil uc'u'x pakawi', ri xuya chike ruma Ruc'ajol, ri lic c'ax cuna' Rire. ⁷ Ruc' c'u ri' ri Cristo c'o kacolobetajic y c'o cuybal kamac ruma ruquiq'uel xtu-ruwic, yey karikom wa' ruma ri unimal rutzil uc'u'x ri Dios. ⁸ Na jinta c'u utakexic wa rutzil uc'u'x uya'om lo pakawi'. Yey xuya ne chi sak ri kana'oj ⁹ cha' caketa'maj sa' runa'oj Rire, ri na uya'om ta che reta'maxic ojertan. Ma uch'obom chi lo ojertan chiribil rib sa' ri caraj cu'an ruma ri Cristo ¹⁰ echiri' copon na ruk'ijol cuc'am lo ronoje tak ri c'olic, wa' e tak ri e c'o chila' chicaj y ri e c'o che

ruwachulew, yey cuya na ronoje wa' puk'ab ri Cristo cha' catakan puwi'.

¹¹ Ruma c'u oj re ri Cristo, cakac'ul na rubi'tisim lo ri Dios chike, ma xojucha' lo ojertan cha' caka'an janipa ri uch'obom chi lo Rire. Yey Rire lic e cu'ana ronoje ri caraj cu'ano jela' pacha' ri uch'obom chi ulok. ¹² Xojucha' c'u ri' re yacbal uk'ij Rire cha' quilitaj ruchomalil kuma ri'oj, ri nabe xcubi' kac'u'x ruc' ri Cristo. ¹³ Ec'uchiri' ralak xta alak rutzijoxic ri K'ijsak, ri Utzilaj Tzij puwi su'anic cacolobetaj alak; xcubi' c'u'x alak ruc' ri Cristo y xc'ul c'u alak ri bi'tisim canok: Wa' e ri Santowilaj Ruxlabixel ri Dios pa anima' alak, c'utubal re, alak chi re ri Dios. ¹⁴ Yey ri Ruxlabixel ri Dios pa kanima' e cajiquiban uwach chike, chikawach apanok cakac'ul na rutz'akatibal janipa ri ubi'tisim can ri Dios chike cha' jela' cakayac uk'ij ri Dios ruma ri unimal uchomalil.

Ri Pablo cu'an orar paquiwi ri hermanos

¹⁵ Ruma c'u nutom lic cubul c'u'x alak ruc' ri Kanimajawal Jesucristo y lic c'utum ri rutzil c'u'x alak chique conoje ri quicojom rubi', ¹⁶ na quinxlan ta che quintioxin chwach ri Dios uma ralak echiri' can'an orar. ¹⁷ Can'an orar chwach ri Kakaw ri lic nim uk'ij, ri Dios re ri Kanimajawal Jesucristo. Cantz'onoj c'u che chuya'a lo na'oj alak ruma ri Ruxlabixel y chuk'alajisaj c'u chwach alak runa'oj Rire cha' jela' queta'maj alak uwach chi utz. ¹⁸ Yey cantz'onoj che ri Dios cuya chi sak ri na'oj alak cha' jela' queta'maj alak chi utz sa' tak ri oye'em alak, ma alak siq'uim ruma ri Dios. Cheta'maj c'u alak sa' ri chomilaj beyomalil ubi'tisim chique conoje ri e re Rire. ¹⁹ Cuaj c'ut lic queta'maj alak runimal uchuk'ab ri Dios, ma wa' na jinta cajunumitaj wi. Y wa uchuk'ab c'o chi kuc', ma ruc' wa' ri Dios cachacun chikaxo'l ri'oj ri lic cubul kac'u'x ruc'. ²⁰ Wa' wa uchuk'ab e xuc'utu echiri' xuc'astajisaj lo ri

[☆] 1:1 Hch. 18:19-21; 19:1

Cristo chiquixo'l tak ri ecaminak y xutz'uyuba' puwiquik'ab chila' chicaj. ²¹ Jela' ri Dios xuya puk'ab ri Cristo catakan paquiwi conoje ri e takanelab, ri lic c'o quiwach, ri c'o quichuk'ab y ri lic yacom quik'ij. Ma rubi' ri Cristo e más nim uk'ij chwach ronoje tak bi'aj, ma na jinta jun chic más c'o uwach chwa Rire; y wa' na xew ta wo'ora ma jela' chikawach apanok. ²² Ec'u ri Dios xuya ronoje xe'rakan uk'ab ri Cristo y xucho cha' cu'an unimal ujolom riglesia ²³ y riglesia e ucuero Rire. Jec'ula' ri Cristo ruc' riglesia junam catz'akat quiwach, y e ri Cristo ri catz'akatisan re janipa tak ri c'olic.

2

Ri Dios cuya c'ac' c'aslemal chike

¹ Ri Dios uya'om c'ac' c'aslemal che alak, tob ojertan caminak alak chwach ri Dios ruma xmacun alak y xpalajij alak Rutzij. ² Ma rojertan ri binic silabic alak e junam ruc' ri quibinic tak ri winak re ruwachulew. E xnimaj alak janipa rutakanic ri jun catakan xa pa tew, wa' e ri itzel uxlabixel, ri catakan wak'ij ora cuc' tak ri winak caquipalajij Rutzij ri Dios. ³ Konoje ri'oj ojertan xka'an ke'oj cuc' rique, ma e xkatakej janipa tak ri rayibal re ri kati'jil y tak ri na utz taj cac'un pa kajolom. Lic kalaxibem chi lo wa' oj aj maquib. Ruma c'u la', lic takal chike we ta xpe ri royowal ri Dios pakawi' jela' pacha' ri cu'an cuc' conoje ri e aj maquib. ⁴ Pero ri Dios ruma lic c'o unimal rutzil uc'u'x, xoj-juch' ca'n che y c'ax xojuna'o. ⁵ Ma echiri' c'a oj caminak chwach Rire ruma ri kamac, xuya c'ac' c'aslemal chike junam ruc' ri Cristo. Ruma c'u ri unimal rutzil uc'u'x ri Dios c'o kacolobetajic. ⁶ Y junam ruc' ri Kanimajawal Jesucristo xojuc'astajisaj lok y xuya chike cojtakan ruc' Rire chila' chicaj. ⁷ Ri

Dios xu'an wa' chike cha' chikawach apanok lic cak'alajin ri unimal rutzil uc'u'x na jinta utakexic, ri xuya lo ruc' relej uc'u'x pakawi' ruma ri Kanimajawal Jesucristo. ⁸ Ma ruma c'u ri unimal rutzil uc'u'x ri Dios c'o colobetajic alak yey wa' e ruma xcubi' c'u'x alak ruc' ri Cristo. Y ri colobetajic, na alak ta xch'acow re, ma e jun sipanic re ri Dios che alak. ⁹ Ri colobetajic na carikitaj ta c'u ri' ruma ri utz ca'an alak, cha' jela' na jinta junok cutac'aba' uk'ij. ¹⁰ Ma e ri Dios xu'an c'ac' chike ruma ri Kanimajawal Jesucristo cha' caka'an ri utz chwach jela' pacha' ri uch'obom chi lo ojertan.

Konoje ri kacojom rubi' ri Cristo, xa jun ka'anom chwach ri Dios

¹¹ Echiri' xalax alak, na alak ta cuq'u'il ri e aj judi'ab. Y rique xquibi'ij c'u che alak: «Lic na junam ta iwach kuc' ri'oj, ma ri'oj cojotal ri retalil re circuncisión chike, c'utubal re oj utinamit ri Dios; no'j ri'ix na jinta wa' chiwe» quecha'. Yey wa' cojotal che ri cuerpo xa cuma ticawex. ¹² Ec'u rojertan na jinta ri Cristo pa anima' alak, na alak ta ne cuq'u'il raj Israel ri ya'tal chique e utinamit ri Dios, y na jinta ne oye'em alak che ri bi'tisinic u'anom ri Dios* echiri' xu'an tzij cuc' rutinamit; lic c'u xa tuquel alak ri' che ruwachulew ma na jinta ri Dios uc' alak.

¹³ No'j wo'ora c'o chi alak puk'ab ri Kanimajawal Jesucristo; yey na naj ta chi c'o wi alak che ri Dios, ma ruma ruquiq'uel ri Cristo, ya'tal che alak copon alak chwach ri Dios.✧ ¹⁴ Ec'u ri' ri Cristo xojya'w chi utzil chomal chikawach ri oj aj judi'ab uc' ralak ri na alak ta aj judi'ab; xu'an c'u xa jun chike y xresaj ri k'atbal cajachaw kapa. ¹⁵ Ri Cristo echiri' xuya rib pa camic, e xusach uwach ri retzelal c'u'x c'o chikawach ruma ri tzij pixab quitakem raj judi'ab.† Jec'uri'la', che

* **2:12** “Ri bi'tisinic u'anom ri Dios”: Gn. 9:9; 15:18; Éx. 19:1-8; 2 S. 7:11-16,26 ✧ **2:13** Heb. 4:16

† **2:15** Ri tzij pixab que raj judi'ab xujach quipa wa queb tinamit, ma raj judi'ab e lic quitakem wa tzij pixab, no'j ri na e ta aj judi'ab na queboc ta il che. Ruma c'u la' lic tzel caquil quib.

wa queb tinamit xu'an xa jun tinamit, jun c'ac' tinamit u'anom xa jun ruc' Rire. Xutic c'u ri utzil chomal chikaxo'l. ¹⁶ Ma ruc' rucamic chwa ri cruz, xebuya wa queb tinamit chi utzil chomal chwach; xu'an c'u xa jun chique cha' na tzel ta chi caquil quib. ¹⁷ Xc'un c'u ri Cristo y xutzijoj chique conoje su'anic quec'o'ji' chi utzil chomal ruc' ri Dios. Xutzijoj c'u wa Utzilaj Tzij che ralak echiri' c'a naj c'o wi alak che ri Dios y chique rutinamit Israel ri xa nakaj e c'o wi che. ¹⁸ Ruma c'u ri xu'an ri Cristo, konoje tob oj aj judi'ab o na oj ta aj judi'ab ya'tal chike cojopon chwach ri Kakaw Dios ruma ri Ruxlabixel Rire c'o kuc'. ¹⁹ Jec'uri'la', wo'ora na alak ta chi pacha' ri xa e ic'owel o ri e jekel pa juna luwar na quitinamit taj; ma alak chi cuq'u'il rutinamit ri Dios, alak chi ralc'o'al ri Dios, junam cuc' conoje ri e re Rire.

Riglesia e pacha' juna ja pa jekel wi ri Dios

²⁰ E ralak pacha' alak juna ja catajin ri Dios che uyaquic. Alak pacha' xan catajin utz'akic chwi ri cowilaj uparakan ri ja, yey wa' e ri quic'utum can ri e tako'n y ri k'alajisanelab re ri Dios. Ec'u ruc'u'xibal lo ruparakan ri ja[†] e ri Kanimajawal Jesucristo. ²¹ Lic c'u ri' cuchap bi rib chi utz ri ja ma ronoje ri cojotal che, tz'akom bi chi utz chwi ri ratz'ayak, cha' jela' cu'ana jun santowilaj rocho ri Dios, ma tiquil chi utz ruc' ri Kanimajawal. ²² Ruma c'u ri Dios, alak junam cuc' raj judi'ab ri quicojom rubi' ri Cristo; u'anom che alak, alak rocho ri Dios, ma Rire jekel uc' alak ruma ri Ruxlabixel uya'om che alak.

3

Ruchac ri Pablo cuc' tak ri na e ta aj judi'ab

¹ Ri'in in Pablo, in c'o pa cárcel ruma xintzijoj rubi' ri Kanimajawal Jesucristo che ralak ri na alak ta aj judi'ab. ² Lic tom chi c'u alak ri chac

uya'om ri Dios chwe: Wa' e ri cantzijoj che alak ri unimal rutzil uc'u'x ri Dios. ³ Ma ri Dios xuc'ut chinuwach ri na eta'matal ta ojertan, yey puwi wa' nutz'ibam chi pan jubik' che alak. ⁴ We xajilaj alak wa nutz'ibam, camaj alak usuc' sa' ri xk'alajisax chwe puwi ri Cristo. ⁵ Ojertan wa' na k'alajisam ta chiquiwach ri ticawex; no'j wo'ora ruma ri Ruxlabixel ri Dios xk'alajisax chiquiwach ri e tako'n y ri k'alajisanelab echa'tal ruma ri Dios. ⁶ Ruc'u'xibal ri k'alajisam chic e wa': Ri bi'tisim lo ruma ri Dios na xew ta que raj judi'ab, ma que ne ri na e ta aj judi'ab; u'anom c'u xa jun chique y junam coye'em janipa rubi'tisim lo ri Dios chique ri caquicoj ri Utzilaj Tzij re ri Kanimajawal Jesucristo. ⁷ Ruma c'u ri unimal rutzil uc'u'x ri Dios wuc' ri'in, xya'taj chwe xinu'an raj chac ri Cristo re cantzijoj ri Utzilaj Tzij. Y xew c'u ruma ruchuk'ab ri Dios, quel pan chi utz ri chac chwi nuk'ab.

⁸ Ri'in tob lic na jinta co nuwach chiquiwa conoje ri echa'tal ruma ri Dios; na ruc' ta c'u ri', xya'taj chwe rutzijoxic ri Utzilaj Tzij chique ri na e ta aj judi'ab. Cantzijoj c'u chique sa' tak ri chomilaj beyomalil re ri Cristo, ri na jinta ne junok cach'ijow uch'obic ruchomalil tak wa'. ⁹ Y ya'om chwe cank'alajisaj chiquiwach conoje ri ticawex sa' ri uch'obom lo ri Dios, ri x'anaw re ronoje ri c'olic. Cank'alajisaj c'u ri na eta'matal ta lo rojertan, ri c'a e wo'ora quel lo chi sak. ¹⁰ Ma ri caraj ri Dios wo'ora e cha' ruma riglesia quilitaj chi utz ruq'uiyal tak uwach una'oj Rire chiquiwach tak ri c'o quiwach y ri c'o quichuk'ab, wa' e ri quetakan xa pa tew. ¹¹ E janipa c'u ri uch'obom lo ri Dios echiri' c'amaja' ne cu'an ruwachulew, e u'anom ri' ruma ri Jesucristo, ri Kanimajawal. ¹² Ruma c'u ri Cristo xya'taj chike cojopon chwach ri Dios; lic c'u jiquil uwach, ri Dios cojuc'ul chi utz ruma ri cubulibal kac'u'x ruc' ri Cristo.

[†] 2:20 "Ruc'u'xibal lo ruparakan ri ja": Wa' pa caxtila cabi'x "piedra maestra" che. E nabe abaj cacoj pasquin che ri ja cayaquic.

¹³ E uwari'che cambi'ij che alak, mapax c'u'x alak ruma wa c'axc'obic in c'o wi, e ne qui'cota alak ma uma ralak na jinta cubi'ij nuc'u'x quinic'ow chupa wa'.

Chojtiquila chi utz chupa ri unimal rutzil uc'u'x ri Dios

¹⁴ Ruma tak c'u wa', canxuc wib chwach Rukaw ri Kanimajawal Jesucristo, ¹⁵ ma che ri Kakaw e petinak wi conoje tak ri familia e c'o chila' chicaj cuc' ri e c'o che ruwachulew. ¹⁶ Cantz'onoj che ri Kakaw cha' e chirij tak ri chomilaj ubeyomalil, cuya lo unimal chuk'ab pa ri anima' alak y jec'ula' cachuk'ubej ib alak ruma ri Ruxlabixel Rire. ¹⁷ Cantz'onoj che ri Dios cha' cajeki' ri Cristo pa anima' alak ruma ri cubulibal c'u'x alak y catiqui' c'u alak chi utz chupa ri rutzil uc'u'x pacha' juna che' lic najbenak wi ri ratz'ayak. ¹⁸ Chuya'a c'u che alak junam cuc' conoje ri e re Rire, ri queta'maj alak chi utz ri rutzil uc'u'x ri Cristo cha' jela' camaj alak usuc' janipa runimal uwach, runajtijil rakan, ruchoyil upa y runajtijil uwi' ri rutzil uc'u'x. ¹⁹ Cheta'maj c'u alak ri unimal rutzil uc'u'x ri Cristo, tob na jinta junok lic cumaj usuc' ronoje wa'. 'Ana c'u e alak che janipa ri utz c'o ruc' Rire cha' cak'alajin tak wa' che ri binic silabic alak. ²⁰ Ruma ruchuk'ab ri Dios kuc', Rire cuya más uwi' ronoje ri cakatz'onoj che o ri cakach'obo cu'ano. ²¹ ¡Cheta'maxok nim uk'ij ri Dios ruma ri cu'an ruc' ru iglesia ruma ri Kanimajawal Jesucristo! Calok'nimax c'u uk'ij wak'ij ora y chikawach apanok na jinta chi utakexic. Amén.

4

Xa jun ka'anom chwach ri Cristo tob junwi tak ri kachac

¹ Ri'in in c'o pa cárcel xa ruma ruchac ri Cristo; lic cantz'onoj c'u che alak bina alak jusuc' jela' pacha' ri takal che alak ma alak siq'uim ruma ri Dios. ² Ma'an c'u nim che ib alak; e chu'ana ri lic utz c'u'x alak chiwach

alak. Cuyu c'u ib alak chiwach alak ruc' unimal c'u'xaj ruma ri c'ax cana' ib alak. ³ Ri Ruxlabixel ri Dios xu'an xa jun che alak y xucoj utzil chomal chiwach alak; maya c'u alak luwar cajach pa alak. ⁴ Chwach ri Dios xa oj jun ma oj ucuero ri Cristo, xa jun ri Ruxlabixel ri Dios kac'ulum y xa jun oj u'anom che roy'exic ri utz xubi'tisij ri Dios chike echiri' xojusiq'uij. ⁵ Xa jun ri Kanimajawal, na jinta jun chic; xa jun ri Utzilaj Tzij kacojom y xa jun ri bautismo kac'ulum. ⁶ Xa jun ri Dios c'olic; Rire e Kakaw ri c'o pakawi' konoje ri'oj, cu'an ruchac kuma konoje ri'oj y c'o pa kanima' konoje ri'oj. ⁷ Yey chikajujunal c'o ri usipam ri Cristo chike e chirij ri relej uc'u'x Rire. ⁸ E pacha' ri tz'ibital can chupa Ruch'a'tem ri Dios pa cubi'ij wi:

Echiri' xe'ec chila' chicaj,
xebuc'am bi ri xec'o'ji' puk'ab

yey xuya chomilaj tak sipanic
chique ri ticawex. *Sal. 68:18*

⁹ Echiri' cubi'ij «xe'ec chila' chicaj», wa' que'elawi xtzelej chila' chicaj, ma nabe xpe chila' y xc'un wara che ruwachulew. ¹⁰ Ec'u ri Cristo, ri xc'unic, e Rire mismo ri xtzelej chila' chicaj cha' jela' catakan paquiwi conoje y jela' ronoje tak ri c'olic cac'o'ji' puk'ab Rire.

¹¹ Yey e ri Cristo ri cojoyom tak que raj chaquib chiquiwach rutinamit. E c'o jujun xu'an chique e utako'n; jujun chic xu'an chique ek'alajisay runa'oj ri Dios. Jujun chic xu'an chique e aj tzijol re ri Utzilaj Tzij. Jujun chic xu'an chique e aj chajal rutinamit ri Dios y chique jujun chic xu'an chique e c'utunel re Rutzij ri Dios. ¹² E tak wa e aj chac ecojom re quequitijoj rutinamit ri Dios cha' caqui'an ruchac Rire y jec'ula' ri quicojom rubi' ri Cristo queq'uiy chi utz. ¹³ Ma ri caraj ri Kakaw chike e coju'an xa jun ruma ri cubulibal kac'u'x ruc' Ruc'ajol y ruma ri caketa'maj uwach chi utz. Ec'u ri kabinic chwach ri Dios lic cacowiric, cu'ana jela' pacha' ri chomilaj ubinic

ri Cristo. ¹⁴ Jec'ula' na caka'an ta chi ke'oj cuc' ri na jinta quiq'uiyibal chwach ri Dios, ri xa caquetz'abej quina'oj puwi ri quicojom yey quetzak paquik'ab ri e aj socoso'nel, ri caquic'ut tak ri na e taj y ruc' itzel tak na'oj quequic'am bi pa sachibal ri na e tiquil ta chi utz. ¹⁵ Pero ri chirajawaxic wi chike e cojtiqui' chi utz chupa ri K'ijsak y cakatzijoj c'u wa' ruc' rutzil kac'u'x. Jec'ula' cojq'uiy pa sakil wi cha' ruc' ronoje ri caka'ano coju'ana pacha' ri Jun Aj C'amal Kawach, wa' e ri Cristo.

¹⁶ Ec'u ri Cristo caya'w ri kaq'uiyibal echiri' chikajujunal caka'an ri chac uya'om Rire pakak'ab y cakato' kib ruc' rutzil kac'u'x. Ma oj u'anom xa jun ruc' Rire; e pacha' ri kacuerpo, lic q'ui tak ri chapayom re, pero wa' xa jun u'anom.

Kaya'a can ri kabinic kasilabic re ojer

¹⁷ Campixabaj c'u alak chupa rubi' ri Kanimajawal: Ma'an chi e alak pacha' ri caqui'an ri na queta'am ta uwach ri Dios, ma ri quina'oj rique c'o puwi ri xa na jinta uchac. ¹⁸ Rique e c'o pa k'eku'm ma na cacaj ta caquimaj usuc' ri K'ijsak. Ruma c'u lic qui'anom co che ri canima', na jinta c'o queta'am puwi ri Dios y lic naj e c'o wi che ri chomilaj c'aslemal cuya Rire. ¹⁹ Wa' wa winak kabi que che caqui'an ri q'uixbal uwach; xquiya c'u quib che tak ri rayibal re ri quti'jil y jela' quiya'om quib che u'anic tak ri ch'ulilaj mac.

²⁰ No'j ralak na je ta la' ri c'utunic xmaj alak puwi ri Cristo, ²¹ we pakatzij wi e xta alak rutzij y xmaj alak usuc' ri K'ijsak xuc'ut Rire. ²² Ma'an chi alak pacha' ri x'an alak echiri' c'amaja' caya ib alak puk'ab ri Cristo. Ya'a c'u can ri ojer binic silabic alak pa xsocotaj wi alak ruma tak ri rayinic xa re sachibal e alak. ²³ Chirajawaxic c'ut c'o jun jalc'atajibal che ri na'oj alak. ²⁴ Ya'a c'u ib alak chupa ri c'ac' c'aslemal uya'om ri Dios che alak cha' jela'

cabin alak chupa ri K'ijsak ruc' jun binic lic jusuc' y lic chom.

²⁵ Ma'an chi alak rak'ubal, xew ch'a'tibej alak ri lic katzij chiwach alak, ma konoje ri oj re ri Cristo, xa jun ka'anom.

²⁶ We cape oyowal alak, mama-cun alak ruc' wa'; ri 'ana alak e chesaj chic'u'x alak ri oyowal xalok' c'amaja' ne catzak bi ri k'ij. ²⁷ Maya c'u alak luwar che ritzel winak cusoc alak.

²⁸ We c'o junok chixo'libal alak cu'an elek', mu'an chic. Ri chu'ana' e chacunok cha' jela' cuch'ac ri cawax che y quebuto' ne tak ri e c'o pa c'axc'obic.

²⁹ Mabi'ij ne alak juna itzel ch'a'tem; e ch'a'tibej alak ri chomilaj tak ch'a'tem, to'bal re ri quibinic quisilabic ri quetaw re.

³⁰ Ruc' c'u ri' ri ca'an alak, maya alak pa bis ri Santowilaj Ruxlabixel ri Dios. Ma ri Ruxlabixel pa anima' alak e c'utubal re, alak chi re ri Dios y e jiquibal uwach ri colobetajic cac'ul alak chupa ruk'ijol ruc'unibal ri Cristo.

³¹ Chesaj alak ronoje ri oyowal c'o pa anima' alak. Ma'an alak ri alak c'a'n. Masiq'uin alak ruc' oyowal. Mach'a't alak chirij junok. Chesaj c'u ib alak che ronoje ri na utz taj. ³² Ri 'ana alak e c'utu alak ri rutzil c'u'xaj chiwach alak, c'ax na'a ib alak. Cuyu mac alak chiwach alak jela' pacha' xu'an ri Dios echiri' xucuy mac alak ruma ri Cristo.

5

Chojbina jusuc' jela' pacha' ri takal chike ri oj ralc'o'al ri Dios

¹ Ruma c'u alak ralc'o'al ri Dios y Rire c'ax cuna' alak, lic chirajawaxic 'ana alak jela' pacha' cu'an Rire. ² Ronoje c'u ri ca'an alak, 'ana alak ruc' rutzil c'u'xaj, jela' pacha' ri rutzil uc'u'x ri Cristo uc'utum chikawach. Ma Rire lic c'ax xojuna'o y xuya rib pa camic pakac'axel re tojbal ri kamac. Ri xu'ano e pacha' jun kasa'n lic qui' ruxlab chwach ri Dios.

³ Ralak ri alak chi re ri Dios, lic na ube ta q'uenok we chixo'libal alak c'a c'o ri caretz'abej uwa uk'ij ruc' junok na uc'ulel taj o cu'an tak ch'ulilaj mac o na caqui'cot ta ruc' tak ri c'o ruc' ma xaki curayij más. ⁴ Mach'a'tibej ne alak ch'a'tem q'uixbal uwach, ch'a'tem na jinta cutikoj, ch'a'tem na chom ta q'uenok tob ne tze'bal uwach. Ma ronoje wa' lic na takal ta che ralak. Ri 'ana alak e tioxin alak chwach ri Dios ruc' ri ch'a'tem alak. ⁵ Ma lic eta'am chi alak wa': Ri caretz'abej uwa uk'ij ruc' junok na uc'ulel taj, ri cu'an tak ch'ulilal mac, ri na caqui'cot ta ruc' tak ri c'o ruc' ma xaki curayij más, ri ca'anaw wa' e pacha' juna aj tiox ma e cu'an "udios" che janipa ri curayij; conoje c'u ri caqui'an tak wa', na caquic'ul ta ri bi'tisim lo chique ri quiya'om quib puk'ab ri Cristo y e c'o chupa rutakanic ri Dios. ⁶ Masocotaj alak cuma ri caquimin alak chupa ri mac ruc' ch'a'tem lic chacojo' katzij pero xa rak'ubal. Ma ri k'atbal tzij re ri Dios cape paquiwi ri e aj palajiy tzij, wa' e ri caqui'an tak wa' wa mac.

⁷ Ma'an c'u e alak cuc' tak wa winak caqui'an ri na utz taj. ⁸ Ma ralak ojertan sachinak alak chupa ri k'eku'm, no'j wo'ora c'o chi alak pa ri K'ijsak ruma ri Cristo. Bina c'u alak pa ri K'ijsak jela' pacha' ri takal che alak. ⁹ Ma e junok c'o pa ri K'ijsak, ri' che rubinic usilabic quil-itaj wi ri relej uc'u'x, lic jusuc' ri cu'ano y lic katzij ronoje ri cubi'ij. ¹⁰ E lic ch'obo alak sa' ri cuc'ul uc'u'x ri Kakaw y e 'ana c'u alak ri'. ¹¹ Ma'an e alak pacha' ri caqui'an ri e c'o pa k'eku'm, ma ri caqui'an rique na jinta c'ana uchac. Ri 'ana alak e k'alajisaj alak chique ri na utz taj caqui'ano cha' na caqui'an ta chic, ¹² tob ne lic q'uixbal ubi'xiquil ri caqui'an rique xa xe'lak'ay. ¹³ Yey echiri' quel chi sak ri ca'anic, cak'alajin c'u ri' we utz o na utz taj, ma ronoje quil-itaj chi utz ruma ri K'ijsak. ¹⁴ E pacha' ri cabi'xic: E ri'at ri catwaric, ꞑc'una c'u sak

chawach!

Chatwa'lij lo chiquixo'l ri ecaminak pa mac,

y ri Cristo catuya pa ri K'ijsak.✧

¹⁵ Lic chajij c'u ib alak che ri binic silabic alak. Ma'an e alak pacha' ri caqui'an ri na jinta quina'oj; e lic ch'obo alak ruc' sakil na'oj sa' tak ri ca'an alak. ¹⁶ Lic ya'a ib alak che u'anic tak ri utz, ma wak'ij ora lic catajin uq'uiyarc ri mac che ruwachulew. ¹⁷ Ma'an c'u alak ri na cach'ob ta alak chi utz ri ca'an alak; e lic c'ola na'oj alak puwi sa' ri caraj ri Kanimajawal che alak. ¹⁸ Maya ib alak che k'abarc, ma wa' xa cuyojij rubinic junok. E ya'a ib alak puk'ab ri Ruxlabixel ri Dios cha' e Rire catakan pa anima' alak. ¹⁹ Ma we c'o ri Ruxlabixel ri Dios kuc', jewa' caka'ano: Cakanimarisaj kac'u'x chikawach ruc' tak salmos, ruc' tak bix tz'ibital canok y ruc' c'ac' bixobal ya'om chike ruma ri Ruxlabixel ri Dios. Cakayac c'u uk'ij ri Kakaw ruc' bix calax lo pa kanima'. ²⁰ Yey xaki cojtioxin chwach ri Kakaw Dios ruma ronoje, y caka'an c'u wa' chupa rubi' ri Kanimajawal Jesucristo.

Pixabanic chique ri e c'ulanic

²¹ Nimaj ib alak chiwach alak ruc' xi'in ib chwa ri Cristo, ma e caraj ri' Rire chike. ²² E uwari'che, rixok c'ulanic takal che cutakej ri rachijil jela' pacha' ri lic takal che cutakej ri Cristo. ²³ Ma rachi e c'amal uwach ri rixokil jela' pacha' ri Cristo e c'amal uwach riglesia y na xew tane c'amal uwach ma e Colobenel re. Jec'ula' ri Cristo e ujolom riglesia yey riglesia e ucuero Rire. ²⁴ Jec'ula' pacha' riglesia c'o puk'ab ri Cristo, jela' chu'ana rixok ruc' ri rachijil; che ronoje tak ri cu'ano, e lic chutakej ri rachijil.

²⁵ Ec'u rachi c'ulanic takal che c'ax cuna' ri rixokil jela' pacha' ri Cristo lic c'ax xojuna' ri oj u iglesia y xuya rib pa camic pakac'axel. ²⁶ Xu'an c'u wa' cha' e cu'an chom y jusuc' che ri kabinic. Xresaj c'u ri

✧ 5:14 Is. 60:1-2

kamac ruma Ruch'a'tem; ri xu'ano e pacha' ca'an che ri ch'ul echiri' cach'aj ruc' ya'. ²⁷ Xu'an c'u wa' cha' echiri' ri'oj oj u iglesia cojopon chwach, oj jun chomilaj iglesia lic jusuc' y na jinta c'ana mac carikitaj che. ²⁸ Jec'ula' lic chirajawaxic che rachi e cuc'ut ri rutzil uc'u'x che ri rixokil. Jela' pacha' junok lic cuchajij rucuerpo, jec'uri'la' takal che rachi cuchajij ri rixokil. Ma we juna achi c'ax cuna' ri rixokil, e que'elawi c'ax cuna' rib, ma rachi ruc' rixok, xa jun qui'anom. ²⁹ Na jinta junok tzel caril rucuerpo; ri cu'ano e cawa' chi utz y lic cuchajij chi utz. Jela' ri cu'an ri Cristo che riglesia, lic cuchajij chi utz. ³⁰ Cu'an wa' chike ma ri'oj oj u cuerpo. ³¹ Jec'uwa' ri cubi'ij Ruch'a'tem ri Dios:
Ruma c'u ri', rachi echiri' cac'uli'ic, caresaj rib chiquij ruchu-ukaw cha' cajeki' ruc' ri rixokil y quicabichal c'u ri' quebu'ana xa e jun chwach ri Dios *Gn. 2:24* cacha'. ³² Lic naj cumaj wa' wa' c'utubal k'alajisam chike; pero cambi'ij c'u ri'in, wa' e jun c'ambal na'oj puwi ri Cristo ruc' riglesia. ³³ Yey e ne jun pixabanic che onoje alak ri alak c'ulanic. Rachi lic c'ax chuna'a ri rixokil jela' pacha' c'ax cuna' rib rire, yey ec'u rixok e lic chutakej ri rachijil.

6

Pixabanic chique alc'o'al y chique quichu-quikaw

¹ Ix alc'o'al, ruma ix c'o puk'ab ri Kakaw, lic chicojo quitzij richu-ikaw ma lic e usuc' ri'. ² Chupa Rutzij Upixab ri Dios ri nabe tzij cu'an bi'tisinic chique ri que'anaw re, e wa':
Chalok'oj quik'ij rachu-akaw,
³ cha' jela' xaki catel pan chi utz che ronoje
y canajtir rac'aslem wara che ruwachulew. *Éx. 20:12*

⁴ Ec'u ralak ri c'o alc'o'al alak, mapetisaj alak coyowal ri alc'o'al alak; ri 'ana alak e cheq'uiyisaj alak ruc' sakil k'ilonic y chepixabaj alak cha' quebin chupa ri K'ijsak re ri Kanimajawal.

Pixabanic chique ri e mocom y chique ri e patrón

⁵ Yey ralak ri alak mocom, e lic cojo alak quitzij ri patrón alak wara che ruwachulew. Chacuna c'u alak chi utz ruc' jun sakil xi'in ib pa anima' alak y ruc' ronoje c'u'x alak pacha' e canimaj alak ri Cristo ruc' ri chac alak. ⁶ Na utz ta c'u ri' we juna mocom xew cachacun chi utz echiri' catzutz'u'x ruma rupatrón cha' jela' catac'abax uk'ij. Ri 'ana alak e c'utu alak pakatzij wi alak aj chac re ri Cristo. Chacuna c'u alak ri' ruc' ronoje c'u'x alak cha' jela' ca'an alak janipa ri caraj ri Dios. ⁷ Ma ralak na xa ta alak umocom juna achi; e uwari'che, 'ana alak pacha' e ri Kanimajawal Jesucristo ri canimaj alak ruc' ri chac alak. Chacuna c'u alak ri' ruc' ronoje c'u'x alak. ⁸ Eta'am c'u alak c'o rajil uc'axel ri utz caka'ano y wa' e ri Cristo caya'w chikajujunal, tob cachacun jun ruc' juna patrón o xa pa re jun cachacun wi.

⁹ Ec'u ralak ri alak patrón, 'ana alak ri utz chique tak ri mocom alak ma e caraj ri' ri Dios che alak. Maxibij ne alak quipa ruc' c'ax. C'una chic'u'x alak, e ralak alak jela' pacha' rique, ma junam cuc' rique c'o alak puk'ab ri Kanimajawal c'o chila' chicaj. Yey chwach Rire xa jun kawach konoje. ^{*}

Kachapabej ri to'bal ke uya'om ri Dios

¹⁰ Q'uisbal c'u re, cambi'ij che alak hermanos, chuk'ubej ib alak chwach ri Kanimajawal Jesucristo ruc' runimal uchuk'ab Rire. ¹¹ 'Ana c'u e alak che ronoje tak ri to'bal cuya ri Dios* che alak cha' jela' cach'ij alak uchuk'ab tak ri socoso'nic re ritzel winak. ¹² Ma ri'oj oj c'o pa

^{*} 5:30 Gn. 2:23 ^{*} 6:9 Ro. 2:11 ^{*} 6:11 "Ri to'bal cuya ri Dios": Pa caxtila wa' cabi'x "la Armadura de Dios" che. Wa' e jun c'ambal na'oj puwi ri to'bal cuya ri Dios chike. Wa' e pacha' tak ri chapabal re juna soldado.

ch'a'oj. Pero wa ch'a'oj na e ta cuc' ticawex quekam culewal quipoklajil, e cuc' tak itzelilaj uxlabixel e c'o xa pa tew, ri lic c'o quichuk'ab re que-takan paquiwi tak ri e c'o pa k'eku'm wara che ruwachulew. Cuc' tak rique ri kach'a'oj. ¹³ Ruma c'u wa', lic chirajawaxic che alak chuc'a'aj alak ronoje tak ri to'bal ke cuya ri Dios, cha' jela' cach'ij alak uchuk'ab tak ri na utz taj cape paw'i alak. Y jec'ula', we xq'uis wa' wa ch'a'oj chi'ij alak, c'a tiquil alak jusuc'.

¹⁴ E uwari'che lic chuk'ubej ib alak chupa ri K'ijsak jela' pacha' juna aj chac cucoj rupas cha' cuxim rupa chi utz. C'ola alak jusuc' y lic chajij alak ri binic silabic alak jela' pacha' juna soldado ch'ukutal ruwa uc'u'x ruc' jun ch'ich'. ¹⁵ Xaki yijba' ib alak che utzijoxic ri Utzilaj Tzij re ri utzil chomal jela' pacha' juna soldado xaki ucojom ruxajab re cuto'bej ri rakan che tak ri quic'ow wi. ¹⁶ Y chwi ronoje tak wa', tiquila chi utz ri cubulibal c'u'x alak ruc' ri Dios, ma wa' che ralak e pacha' ri juperaj ch'ich' ruc'a'am juna soldado puk'ab re cuchup ri ak' c'o chutza'm ri flechas cac'ak lo che. Jec'ula' ri cubulibal c'u'x ralak e to'bal e alak cha' cach'ij alak uchuk'ab tak ri c'akanic cu'an lo ritzel winak che alak. ¹⁷ Tiquila alak chi utz chupa ri colobetajic ya'tal che alak jela' pacha' juna soldado cucoj rucasco re ch'ukubal rujolom. Y chapabej alak chi utz Ruch'a'tem ri Dios, ma wa' e pacha' juna espada ya'tal che alak ruma ri Ruxlabixel ri Dios cha' cach'o'jin alak chirij ritzel winak. ¹⁸ 'Ana c'u alak orar chipak'ij chichak'ab. Lic tz'onoj alak che ri Dios e chirij janipa ri cubi'ij ri Ruxlabixel che alak. Macos ne alak che u'anic orar; e xaki 'ana alak orar paquiwi conoje rutinamit ri Dios. ¹⁹ Cantz'onoj co che alak 'ana alak orar panuwi ri'in cha' ri Dios cuya nuch'a'tem y jec'ula' na canxi'ij ta c'ana wib cantzijoj ri Utzilaj Tzij uk'alajisam ri Dios chikawach. ²⁰ Ma intakom lo ruma ri Dios, in k'alajisay

re ri Utzilaj Tzij y ruma ne wa' in c'o pa presoyil wo'ora. E uwari'che tz'onoj alak che ri Dios cha' na canxi'ij ta c'ana wib che uk'alajisaxic puwi Rire, ma e takal ri' chwe.

Ri Tíquico cuc'am bi urason ri Pablo

²¹ Ronoje tak ri nuc'ulumam y ri quintajin che u'anic, cu'tzijoj pan ri Tíquico che alak. Rire e jun utzilaj aj chac re ri Kanimajawal Jesucristo y na lok' ta c'ax cana'w re. ²² E uwari'che nutakom bi chila' uc' alak cha' queta'maj alak sa' ri ka'anom ri'oj y jec'ula' cu'nimarisaj pan c'u'x alak.

Ri Pablo cutz'onoj utzil chomal puwi riglesia c'o Éfeso

²³ C'ulu alak ri utzil chomal, ri rutzil c'u'xaj y ri cubulibal c'u'xaj, ri petinak ruc' ri Kakaw Dios y ruc' ri Kanimajawal Jesucristo. ²⁴ C'ulu c'u alak ri unimal rutzil uc'u'x ri Kanimajawal Jesucristo, onoje alak ri lic c'ax cana' alak Rire ruc' rutzil c'u'xaj na junta uq'uisic. Amén.

Ri carta xutz'ibaj ri Pablo che riglesia c'o Filipos

Ri Pablo cuya pan rutzil quiwach ri hermanos e c'o Filipos

¹ Ri'in in Pablo y ri Timoteo, ri oj aj chac re ri Kanimajawal Jesucristo, cakatak bi wa carta che alak ri c'o alak chupa ri tinamit Filipos. Cakatz'ibaj c'u pan che alak, ri alak aj c'amal wach y alak aj chaquib e to'bel piglesia, junam uc' onoje alak, ri cojom alak rubi' ri Kanimajawal Jesucristo. ² C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

Tioxibal chwach ri Dios cuma ri hermanos e c'o Filipos

³ Echiri' cac'un alak chinuc'u'x, lic quintioxin che ri Dios uma ralak. ⁴ Yey echiri' can'an orar, xaki cantz'onoj che ri Dios pawil onoje alak. Ruc' c'u qui'cotemal ⁵ can'an wa', ma lic junam chacuninak alak wuc' che utzijoxic ri Utzilaj Tzij e chwi lo ri nabe k'ij echiri' xya ib alak puk'ab ri Cristo y c'a e catajin alak che u'anic wak'ij ora. ⁶ E ri Dios xjekow re ri utzilaj chac pa anima' alak, yey lic cubul nuc'u'x che wa': Ri Dios catajin che to'ic alak cha' cabin alak jusuc' chwach, yey Rire cutz'akatisaj ri chac uc' alak c'a pa ri k'ij echiri' cac'un tanchi ri Kanimajawal Jesucristo. ⁷ Lic ube c'ut canch'ob wa' pawil onoje alak, ma xaki c'o alak pa wanima'. Yey ralak lic into'om alak ruc' ri chac uya'om ri Dios chwe ruma runimal rutzil uc'u'x. Into'om ne alak tob in c'o pa cárcel o echiri' cank'alajisaj ri Utzilaj Tzij chiquiwach ri e aj k'atal tzij y canjiquiba' c'u uwach lic katzij ri cank'alajisaj. ⁸ Ri Dios reta'am, pakatzij wi ri'in lic c'ax canna' onoje alak. Yey wa canna' pa ri wanima'

che alak, e ri Kanimajawal Jesucristo ya'yom chwe.

⁹ Cantz'onoj c'u che ri Dios pawil alak cha' canimar más ri rutzil c'u'x alak y ri na'oj alak ¹⁰ cha' jela' queta'maj alak sa' ri lic takal che ri binic silabic alak. Bina c'u alak jusuc' cha' echiri' cac'un tanchi ri Cristo na jinta mac carikitaj che alak. ¹¹ Ruma c'u ri Kanimajawal Jesucristo quilitalaj ri jusuc' binic silabic alak, yey echiri' quilitalaj wa' cuma ri ticawex, rique caquiyac uk'ij ri Dios y caquibixoj rubi'.

Ri c'ax xic'ow wi ri Pablo lic c'o xutikoj

¹² Hermanos, lic cuaj queta'maj alak wa': Ronoje tak ri c'ax wic'owibem lic c'o xutikoj ma ruc' wa' xe'ec utzijoxic ri Utzilaj Tzij chiquiwach ri ticawex. ¹³ Utz ne xu'ano, ma wo'ora ri soldados re ri nimalaj aj k'atal tzij junam cuc' ri jujun chic e c'o wara, conoje xqueta'maj in c'o pa cárcel ruma cantzijoj rubi' ri Cristo. ¹⁴ Y na xew ta wa', ma ruma ri u'anom ri Dios wuc' wara pa cárcel, e q'ui ri hermanos lic xquijiquiba' quic'u'x ruc' ri Kanimajawal yey más ne xmik' quic'u'x che utzijoxic ri Utzilaj Tzij re ri Dios y na caquixi'ij ta c'ana quib caqui'an wa'. ¹⁵ Caqui'an c'u ri' wa' ruc' ronoje quic'u'x, no'j e c'o jujun chic caquitzijoj rubi' ri Cristo xew cha' caqui'an nim che quib chinuwach ri'in ruma c'ax quic'u'x chwij. ¹⁶ Yey quetzijon puwi ri Cristo na ruc' ta rutzil quic'u'x, xa e re yacbal quik'ij. Ma chiquiwach rique ruc' ri caqui'ano, caquiya más bis chwe puwi ri c'ax in c'o wi pa wa cárcel. ¹⁷ Pero ri jujun chic quetzijon ruma ri rutzil quic'u'x chwe, ma queta'am ri'in in cojom ruma ri Dios re cank'alajisaj ri Utzilaj Tzij. ¹⁸ ¿Sa' c'u ri cambi'ij che wa'? Chinuwach ri'in, ri lic chirajawaxic wi e catzijox ri Utzilaj Tzij, tob ri quetzijon re caqui'an ruc' sakil rutzil c'u'xaj o xa pa que rique. Ec'u ri lic xaki cuya

qui'cotemal chwe e ri catzijox rubi' ri Cristo.

Ri Pablo na cuxi'ij ta rib chwach ri camic

¹⁹Na quic'ow ta c'u ri nuqui'cotemal, ma weta'am quinel pan chupa ronoje ri quintajin che ric'owibexic ruma ri oraciones e alak panuwi' y ruma ruto'bal ri Ruxlabixel ri Kanimajawal Jesucristo wuc'. ²⁰Ma ri lic canrayij y nucubam pan nuc'u'x che, e wa': Che ronoje ri can'an chwach ri Dios na junta c'ana cuya q'uix chwe. E lic cubul nuc'u'x che, jela' pacha' ri u'anom lok, e janipa ri can'ano cuc'am lo yacbal uk'ij ri Cristo, tob quinc'asi'ic o quincamic. ²¹Ma ri nuc'aslem ri'in e re yacbal uk'ij ri Cristo; yey we xincamic, más ne lic c'o cutikoj chwe. ²²Pero we ri nuc'aslem c'a catob che ruchac ri Kakaw, na canrik ta c'u ri' pachique ri más utz. ²³Lic c'ayew c'u chwe rucha'ic ri más utz. E ri'in cuaj quincamic cha' quine'c'ola ruc' ri Cristo, ma e wa' ri más utz chinuwach ri'in. ²⁴Pero che ralak e más c'o cutikoj we c'a in c'o che ruwachulew. ²⁵Nujiquibam c'u uwach wa', ri'in weta'am c'amaja' quincamic yey quinc'o'ji' na uc' alak cha' canto' alak che unimarisaxic ri cubulibal c'u'x alak y ri qui'cotemal alak ruc' ri Cristo. ²⁶Jec'ula' lic caqui'cot alak y catioxin alak che ri Kanimajawal Jesucristo ruma in c'o tanchi uc' alak.

Ri binic silabic takal chique ri quicojom ri Utzilaj Tzij

²⁷Chajij c'u ib alak cha' ri binic silabic alak e pacha' ri takal chique ri quicojom ri Utzilaj Tzij re ri Cristo. Jec'ula', tob na in junta ri'in chixo'l alak o tob ne quinopon uc' alak, ri lic cuaj canto e lic chuk'ubem ib alak y xa jun c'u'x alak chwach ri Dios, yey lic junam caya ib alak che uk'alajisaxic ri Utzilaj Tzij cojom alak. ²⁸Maxi'ij ne c'ana ib alak chiquiwach ri quech'o'jin chi'ij alak, ma wa' e jun c'utubal chique e ri Dios cusach na quiwach rique; pero che ralak e jun c'utubal xaki utz quel pan

alak ruc', ma e ri Dios cacoloben e alak. ²⁹Ma ya'tal che ralak ri cacoj alak utzij ri Cristo, y na xew ta la', ma ya'tal ne ri catij alak c'ax ruma alak re Rire. ³⁰Junam c'u ri kic'owibem, ma ilom alak ri c'ax wic'owibem ri'in pa ruchac ri Kakaw, y wo'ora xta alak c'a e ne c'axc'obic in c'o wi.

2

Ri Dios xuyac uk'ij ri Jesús ma Rire xu'an ch'uti'n che rib

¹Ruma c'u c'o alak puk'ab ri Cristo, lic nimirinak chi c'u'x alak y bochi'im chi c'u'x alak ruc' ri rutzil uc'u'x Rire. Ec'u ri Ruxlabixel ri Dios c'o uc' alak y u'anom chi xa jun che alak, yey c'ulum chi c'u alak ri relej uc'u'x y ri c'axna'bal uc'u'x ri Cristo. ²E uwari'che tz'akatisaj co alak uwach ri nuqui'cotemal ruc' wa': Chu'ana xa jun c'u'x alak, xa jun ri rutzil c'u'x alak y xa jun ri na'oj alak chiwach alak. ³Mac'o ma'an alak xew re cac'o'ji' más wach alak chiquiwa ri jujun chic o re yacbal k'ij alak. Ri lic usuc' e 'ana alak ch'uti'n che ib alak ruc' ri ca'an alak y yaca alak quik'ij ri jujun chic. ⁴Na utz ta c'u ri' we c'o junok e xew cutzucuj ri utz chiribil rib, ma ri lic chirajawaxic wi e cutzucuj ri utz chique ri nic'aj chic.

⁵E chu'ana ri c'u'x alak jela' pacha' ruc'u'x ri Kanimajawal Jesucristo.

⁶Rire na xu'an ta nim che rib; tob ne lic junam uwach ruc' ri Dios, na xuch'o'jij ta ri takal che.

⁷Tob lic c'o uwach, xuya can ranima' ri takal che;

xu'an pacha' aj chac che rib cha' quebuto' tak ri ticawex.

Xu'an c'u ticawex.

⁸Echiri' junam chi uwach cuc' ri ticawex,

xu'an ch'uti'n che rib.

Lic c'ut xucoj utzij ri Dios, ma xuya rib pa camic.

Yey wa camic lic q'uixbal uwach, ma xcamisax chwa cruz pacha' junok lic aj mac.

⁹Ruma c'u wa xu'an ri Jesús,

ri Dios e más xuyac uk'ij Rire chiquiwa conoje ri lic c'o quiwach.

Xuya c'u che ri Jesús cakabi'ij “Kanimajawal” che, ma rubi' Rire e más c'o uwach chwa ronoje tak ri bi'aj.

¹⁰ Chwach c'u ri Kanimajawal Jesucristo caquixucuba' quib conoje ri e c'o chila' chicaj, ri e c'o che ruwachulew y ri e c'o chuxe' ulew.

¹¹ Y conoje c'ut caquibi'ij “ri Jesucristo e Rajawal ronoje ri c'olic”, y caquibi'ij c'u wa' re yacbal uk'ij ri Kakaw Dios.

Kak'alajisaj ri K'ijsak ruc' ri kabinic kasilabic

¹² Ec'u ralak, ri lic c'ax canna' alak, chwi petinak lok, lic takem alak ri c'utunic re ri Utzilaj Tzij; 'ana c'u alak wa' na xew ta echiri' in c'o uc' alak, ma e más chirajawaxic catakej alak wa' wo'ora echiri' na in jinta uc' alak. Ruc' c'u xi'in ib alak chwach ri Dios, e lic k'alajisaj alak ri colobetajic alak ruc' ri binic silabic alak. ¹³ Ma e ri Dios cuya che alak cacha c'u'x alak che u'anic ri utz chwach y e Rire ri cato'w e alak che u'anic ri caraj Rire.

¹⁴ Janipa ri ca'an alak, ma'an alak ruc' yaj o ruc' ch'a'oj ¹⁵ cha' jela' lic jusuc' ri binic silabic alak chwach ri Dios y jec'ula' na jinta c'o catz'akaw chi' alak y cak'alajin c'u ri' alak sakil ralc'o'al ri Dios, ma lic alak junwi chiquixo'l tak ri winak na e ta jusuc' yey itzel quic'u'x. Jec'ula' ri', cu'an alak pacha' tak ri ch'umil lic quewon pa ri k'eku'malil re ruwachulew ¹⁶ echiri' cak'alajisaj alak ri K'ijsak cuya c'aslemal. Jec'ula' echiri' cac'un tanchi ri Cristo, ri'in canna' jun qui'cotemal na jinta c'o wi, ma lic c'o xutikoj ri nubinic y ri nuchac uc' alak. ¹⁷ Ec'u ri'in na cambisoy taj tob ne quincamisaxic y caturuw c'u ri nuquic' pacha' juna kasa'n chwach ri Dios, ma wa' e cutz'akatisaj ri kasa'n re ri binic silabic alak ya'om chi alak

puk'ab ri Dios ruma ri cubulibal c'u'x alak ruc'. Lic c'ut quinquic'ot uma onoje alak ma lic ya'om ib alak che ulok'nimaxic ri Kanimajawal. ¹⁸ Y jec'ula' cuaj caqui'cot onoje ralak wuc'.

Ri coponibal queb raj chac ri Dios chila' Filipos

¹⁹ We e caraj ri' ri Kanimajawal Jesucristo, cantak bi tan ri Timoteo re que'vila alak y jec'ula' ri wanima' caqui'cotic echiri' rire cuc'am lo rason alak. ²⁰ Na jinta chi c'u junok lic junam ruc'u'x wuc' pacha' ri Timoteo, ma rire lic uya'om uc'u'x che alak. ²¹ Ma e tak ri ticawex xew caquitzucuj ri cacaj rique y na e ta queboc il che ri caraj ri Kanimajawal Jesucristo. ²² Ilom chi c'u alak ri utzilaj chac u'anom ri Timoteo, ma lic inuto'om che utzijoxic ri Utzilaj Tzij. Rire u'anom pacha' nuc'ajol ma chacuninac wuc' jela' pacha' cu'an juna ala ruc' rukaw. ²³ Ec'u uwari'che lic cuaj cantak bi ri Timoteo uc' alak, we xk'alajin na sa' ri ca'an chwe wara, we quinel bi o quincanaj pa cárcel. ²⁴ Yey cubul ne nuc'u'x qui'nwila tan wach alak, we e caraj ri' ri Kanimajawal.

²⁵ Canch'ob c'ut lic chirajawaxic cantak tanchi ubi uc' alak ri hermano Epafrodito, ri xtak lo alak wuc' re quinuto' che tak ri cajawax chwe. Rire junam chacuninac wuc' y junam katijom c'ax pa ruchac ri Dios. ²⁶ Rire lic caraj chic caril wach onoje alak, ma xreta'maj tom chi alak echiri' lic xuchap yabil. Lic c'u cubisoy wa', ma laj paxinak c'u'x alak che ri xuc'ulumaj. ²⁷ Pakatzij wi rire xuchap yabil, xa jubik' chi xraj laj xcamic, pero ruma c'u ri c'axna'bal uc'u'x ri Dios na xoponta chupa ri camic. Jec'ula' ri Dios xuto'o yey lic xinuto' ne ri'in, ma we ta e la' xcam na, ri' lic curik rib ri nubis. ²⁸ Ruma c'u wa' lic cuaj cantak bi tan ri Epafrodito uc' alak cha' jela' caqui'cot alak che echiri' quil tanchi alak uwach. Y ruma c'u wa' qui'cotemal alak, capactaj ri

nubis ri'in che alak. ²⁹ We xopon tanchi rire uc' alak, c'ulu alak ruc' qui'cotemal chupa rubi' ri Cristo. Lic tac'aba' alak uk'ij, ma e takal ri' chique conoje ri e jela' pacha' rire. ³⁰ Ma rire laj xamic ruma ri cachacun chupa ruchac ri Cristo; xuya c'uranima' cuc'ulumaj wa' cha' quinto' ri'in wara. Y jec'ula', rire lic xolu'ana pac'axel ralak janipa ri cajawax chwe ri'in.

3

Ri lic chirajawaxic wi e cacubi' kac'u'x ruc' ri Cristo

¹ Ec'u wo'ora hermanos, chwi ronoje tak ri cac'ulumaj alak, lic qui'cota alak ruc' ri Kanimajawal. Ri'in na quincos ta che ubi'xiquil tanchic janipa ri nutz'ibam chi pan che alak, ma wa' lic chirajawaxic che alak.

² Cambi'ij c'u ri': Lic chajij ib alak chiquiwach ri winak itzel quic'u'x, ri lic na e ta sakil aj chaquib, ri xa pa que rique caquibi'ij chirajawaxic chique conoje rachijab cak'at ri culewal cha' cacoj ri retalil re circuncisión chique.* Ma chiquiwach rique, xew ri quicojom wa' takal chique e utinamit ri Dios. ³ Pero pakatzij wi rutinamit ri Dios e ri'oj,† ma ri'oj cakalok'nimaj uk'ij ri Dios pa sakil wi ruma ri Ruxlabixel Rire. Ri kaqui'cotemal e ruma ri u'anom ri Kanimajawal Jesucristo kuc' yey cubul kac'u'x ruc' Rire, na ruc' ta ri ka'anom ri'oj y na ruc' ta ri retalil cacoj che ri kacuerdo.

⁴ We ta e la' cuaj canyac nuk'ij ruma tak wa', takal ri' chwe, ma na jinta junok chique ri e aj judi'ab u'anom más chinuwa ri'in. ⁵ Ma xcoj ri retalil re circuncisión chwe echiri' xinq'uis

wajxakib k'ij walaxic. Yey in cuq'u'il ri e aj Israel ma nupetebem lo chique ri e ralc'o'al can ri Benjamín, ruc'ajol ri Israel. Ri'in, in jela' pacha' ri nuchu-nukaw, lic in aj hebreo chivalaxic.‡ Yey ruma in jun chique ri fariseos, lic xinoc il che tak ri takanic que raj judi'ab. ⁶ Ruma c'u xinya nuc'u'x che wa', lic xinwesaj k'ij che usachic quiwach ri quicojom rubi' ri Cristo. Lic xintakej ri takanic que raj judi'ab y chwa c'u ri' wa', na jinta junok catz'akaw nuchi'.

⁷ Echiri' c'amaja' cancoj rubi' ri Cristo, xinch'obo e ronoje tak wa' e re yacbal nuk'ij chwach ri Dios; no'j wo'ora canmaj usuc' na e ta u'anom ri', ma na ruma ta wa' xinweta'maj uwach ri Cristo. ⁸ Y na xew tane la', ma chinuwach ri'in, ronoje ri can'ano o ronoje ri c'o wuc', na jinta c'ana uwach chwa ri reta'maxic uwach ri Cristo Jesús, ri Wajawal, ma Rire na jinta c'ana cajunimax wi. Ruma c'u ri Jesús, xinya can ranima' ronoje; e tak ri c'o wuc' xa e chi pacha' rak'es chinuwach ri'in, ma e lic nuya'om wib che reta'maxic uwach ri Cristo ⁹ y jec'ula' in u'anom xa jun ruc' Rire. Y na e ta c'u can'an jusuc' che wib ruma ri lic nutakem ri takanic re ri Moisés; ma xew ri Dios ca'anaw jusuc' chwe, yey wa' e ruma ri cubulibal nuc'u'x ruc' ri Cristo. ¹⁰ Ec'u ri lic cuaj ri'in e canweta'maj más uwach ri Cristo. Yey cuaj cac'oji' ruchuk'ab Rire wuc', jela' pacha' ri xuc'utu echiri' xuch'ij uchuk'ab ri camic y xc'astaj lo chiquixo'l ri ecaminak. Yey na jinta c'o cubi'ij nuc'u'x che tob ne cantij c'ax y quincamisaxic jela' pacha' x'an che Rire echiri' xuya rib pa camic. ¹¹ Ronoje c'u ri can'ano e ruma lic

* **3:2** “Circuncisión”: Ri caqui'an raj judi'ab echiri' juna ralco ala cuq'uis wajxakib k'ij ralaxic, e cak'at rutz'u'malil ruwi ri rulewal, c'utubal re e jun chique rutinamit ri Dios. Yey jujun chique raj judi'ab quicojom rubi' ri Cristo caquibi'ij chirajawaxic cacoj wa retalil re circuncisión chique ri creyentes na e ta aj Israel, tob e nima'k chic. Pero ri Pablo cubi'ij na chirajawaxic ta wa'. † **3:3** “Rutinamit ri Dios e ri'oj”: Pa ri ch'a'tem griego cubi'ij “ri'oj re ri circuncisión”. ‡ **3:5** Ri Pablo e cuq'u'il ri e aj judi'ab caquirik ri ch'a'tem hebreo y xq'uiy cuc' ri lic quitakem ri cojobal que can ri cati'-quimam. No'j e c'o jujun chic e aj judi'ab na caquirik ta ri ch'a'tem hebreo, ma ri quich'a'tem e ri griego, yey quitakem jujun che tak ri cojobal que raj griego.

cacha nuc'u'x che caya'taj chwe ri c'aslemal na jinta utakexic echiri' ri Dios quinuc'astajisaj lo chiquixo'l ri ecaminak.

Kaya'a kib che u'anic janipa ri caraj ri Dios chike

¹² Na e ta c'u cambi'ij ri' nurikom chi ronoje wa' y na jinta chi c'ana cajawax che ri nubinic nusilabic chwach ri Dios. Na e ta ri'. Ma e pacha' c'a quintajin pan chi be yey e lic cantij uk'ij quinopon che ronoje ri xraj ri Kanimajawal Jesucristo chwe echiri' xinusiq'uij. ¹³ Hermanos, ri'in na cambi'ij taj we nuch'ijom chi u'anic ronoje ri caraj ri Dios chwe. Ec'u ri can'ano e canya ronoje nuchuk'ab cha' e quinel pan ruc' ri c'a c'o chinuwach y na e ta chi canch'ob rakan puwi ri ic'owinac chic. ¹⁴ Jec'uri'la' lic jusuc' quin'ec c'a pa cu'q'uisa wi ri nube k'atital chinuwach, cha' jela' canc'ul ri chomilaj sipanic, ri ubi'tisim ri Dios chike ri ojusiq'uim cha' coje'c'ola ruc' chila' chicaj ruma oj re ri Jesucristo.

¹⁵ Konoje c'u ri lic oj tiquil chi utz chupa ri K'ijisak, e lic ube ri' we jela' ri kana'oj. Yey we c'o junok chixo'libal alak junwi ri cuch'obo, e ri Dios cak'alajisan che we utz o na utz ta ri cuch'obo. ¹⁶ Pero ri lic chirajawaxic chike e caka'an ronoje ri uc'utum chi ri Dios chikawach.

¹⁷ Hermanos, 'ana che ri binic alak pacha' ri nubinic ri'in. Yey e chetakej alak ri caqui'an jela' pacha' ri kac'utum ri'oj. ¹⁸ Ma e q'ui ri na caqui'an ta wa'. Uq'uiyal laj in ch'a'tinak chi uc' alak paquiwi rique, y ruc' ok'e'j cambi'ij tanchic: Lic k'alaj ruma ri quibinic quisilabic, rique e aj retzelal c'u'x chirij ri Utzilaj Tzij puwi rucamic ri Cristo chwa ri cruz. ¹⁹ Copon na c'u ri k'ij echiri' casach na quiwach, ma ri quidios rique e tak ri rayibal re ri quiti'jil. § Caqui'an ne nim che quib ruma tak ri caqui'ano tob wa' lic q'uixbal uwach, yey lic caquiya

quina'oj che tak ri xa re ruwachulew. ²⁰ No'j c'u ri katinamit ri'oj e ri c'o chila' chicaj, pa koye'em wi cape ri Kacolobenel, ri Kanimajawal Jesucristo. ²¹ Y echiri' cac'un Rire, cujalc'atij na kawach ri'oj. Jec'uri'la' ri kacuerpo, tob na jinta uk'ij wo'ora, cu'ana jela' pacha' runimal uchomalil rucuerpo Rire echiri' xc'astaj lo chiquixo'l ri ecaminak. Jela' cu'ana Rire ruc' ri chuk'ab ya'tal che cha' cuch'ij uchuk'ab ronoje tak ri c'olic.

4

¹ Ec'u uwari'che hermanos, lic jiquiba' c'u'x alak chirij ri Kanimajawal. Ri'in lic c'ax canna' alak y lic cuaj canwil tanchi wach alak, ma ralak e alak nuqui'cotemal y alak ri tojbal re ri nuchac. Lic c'o alak pa wanima'.

Chirajawaxic cakayijba' chikawach tak ri ch'a'oj c'o chikaxo'l

² Lic c'u cantz'onoj co chique ri hermana Evodia y ri hermana Síntique chu'ana xa jun quic'u'x chiquiwach, jela' pacha' ri takal chique ri e ralco'al ri Kakaw. ³ Ec'u ri'at, ri at sakil wachbi'il chupa ruchac ri Kakaw, cantz'onoj co chawe: Lic chebato'o wa' wi'xokib cha' quec'oji' chi utzil chomal chiquiwach. Ma rique lic xquiya quib pa c'ax junam wuc' ri'in che utzijoxic ri Utzilaj Tzij; lic xinquito'o, junam ruc' ri Clemente y ri jujun chic wachbi'il, ri c'o chi ri quibi' chupa ri libro pa tz'ibital wi china tak ri c'o quic'aslemal ruc' ri Dios.

Q'uisbal pixabanic puwi ri utzil chomal cuya ri Dios

⁴ Hermanos, lic xaki qui'cota alak ruc' ri Kanimajawal. Cambi'ij julaj chic: ¡Lic qui'cota alak! ⁵ C'utu alak ri relej c'u'x alak chique conoje ri ticawex cha' jela' rique caquil wa' che ralak. Ri Kanimajawal xa nakaj chi c'o lo wi. ⁶ Lic mac'o mutok' c'u'x alak; ri 'ana alak e lic ch'a'ta alak ruc' ri Dios puwi ronoje. Tz'onoj c'u alak

§ 3:19 “Ri rayibal re ri quiti'jil”: Pa ri ch'a'tem griego cubi'ij “ri quidios rique e ri quipa”.

che Rire janipa tak ri cajawax che alak yey mic'ow chic'u'x alak catioxij alak che ri Dios ronoje ri uya'om che alak. ⁷ We ca'an c'u alak tak wa', ri Dios cuya ri utzil uchomalil pa anima' alak cha' na capax ta c'u'x alak y na casach ta na'oj alak ruma cubul c'u'x alak ruc' ri Kanimajawal Jesucristo. Ec'u wa' wa utzil chomal na caquimaj ta usuc' ri ticawex.

⁸ Q'uisbal c'u re, canya wa pixabanic che alak hermanos: Lic ya'a ib alak che uch'obic puwi tak wa': ri lic katzij, ri lic c'o uk'ij, ri lic jusuc', ri na jinta c'ana ch'ul che, ri lic c'o uchomalil, ri lic utz chiquiwach conoje ri ticawex; janipa tak c'u ri utz y ri takal che cayac uk'ij, puwi tak wa' c'ola wi ri na'oj alak. ⁹ Ec'u 'ana alak janipa ri nuc'utum chiwach alak, wa' e ri majom alak, ri tom alak y ri ilom alak chwe. Jec'ula', ri Dios, ri aj ya'l utzil chomalil, cac'oji' uc' alak.

Ri Pablo catioxin che riglesia c'o Filipos

¹⁰ Lic quinquicotic y quintioxin che ri Kakaw ma xc'ut alak jumul chic ri rutzil c'u'x alak ruc' ri kasa'n xtak lo alak chwe. Weta'am xaki in c'o chic'u'x alak, pero c'a e tanchi wa' xrik alak su'anic quinto' alak. ¹¹ Cambi'ij c'u wa' na e ta ruma lic c'o cajawax chwe, na e ta ri'. Ma ri'in lic uc'amom chi rib chwe quinquicotic tob sa' ri in c'o wi. ¹² Quinquicotic tob na jinta wuc' ri cajawax chwe o echiri' quic'ow ne uwi' tak ri c'o wuc'. Lic numajom ri quinquicotic chupa ronoje tak ri quinic'ow wi, tob curik rib sa' ri cantijo o cantij numeric, tob c'o ronoje ri cajawax chwe o tob na jintaj. ¹³ Quinel c'u pan chi utz che ronoje ri quinic'ow chupa, ma e ri Cristo caya'w nuchuk'ab. ¹⁴ Na ruc' ta c'u ri', lic utz ri x'an alak, ma ri to'bal e alak lic xurik uchac chwe pa ri c'axc'obic in c'o wi.

¹⁵ Eta'am chi alak, ri nabe laj xinopon pa ri luwar re Macedonia cha' cantzijo ri Utzilaj Tzij, na jinta juna chic iglesia xto'w we ruc' kasa'n, xew ralak. Ma echiri' xinil bi Macedonia,

ralak xya bi alak kasa'n chwe, to'bal we che ri chac can'ano. ¹⁶ Y na xew ta wa'. Ma echiri' c'a in c'o Macedonia pa ri tinamit Tesalónica, na xa ta julaj xinto' alak ruc' ri cajawax chwe. ¹⁷ Na cambi'ij ta wa' cha' caya alak más kasa'n chwe, ma ri lic cuaj ri'in e lic caquiyar uwach ri cac'ul alak che ri Dios ruma tak ri utzilaj chac ca'an alak chwach. ¹⁸ Ma ri sipanic xtak lo alak chwe ruc' ri Epafrodito e pacha' jun kasa'n lic qui' ruxlab chwach ri Dios, yey ri Dios lic caqui'cot che wa'. Ruc' c'u ri nuc'ulum che alak, c'o chi ri cajawax chwe y quic'ow ne uwi'. ¹⁹ Ec'u ri nu Dios e caya'w na ronoje tak ri cajawax che alak, ma sa'chi ri chomilaj beyomalil c'o ruc' Rire; yey cuya c'u wa' chike ri oj re ri Cristo Jesús. ²⁰ Kayaca c'u uk'ij ri Kakaw Dios wak'ij ora y chikawach apanok na jinta chi utakexic. Amén.

Q'uisbal uch'a'tem ri Pablo che riglesia c'o Filipos

²¹ Ya'a pan alak rutzil quiwach conoje ri quicojom rubi' ri Cristo Jesús e c'o chila' Filipos. Caquiya pan rutzil wach alak ri hermanos e c'o wuc' ²² junam cuc' conoje ri hermanos e c'o wara Roma. Yey ri hermanos quechacun pa ri palacio re ri nimalaj takanel re Roma, rique lic caquiya pan rutzil wach alak. ²³ C'ola c'u pa anima' onoje alak ri unimal rutzil uc'u'x ri Kanimajawal Jesucristo. Amén.

Ri carta xutz'ibaj ri Pablo che riglesia c'o Colosas

Ri Pablo cuya pan rutzil quiwach ri hermanos e c'o Colosas

¹ Ri'in in Pablo in tako'n re ri Kanimajawal Jesucristo; e ri Dios in-takayom re ma e xraj ri' chwe. Junam ruc' ri hermano Timoteo, ² cakatak bi wa carta che alak ri c'o alak pa ri tinamit Colosas, ri c'o alak puk'ab ri Cristo y tiquil alak chi utz chupa rubi'. C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

Ri Pablo cu'an orar paquiwi ri hermanos e c'o Colosas

³ Echiri' caka'an orar pawil' alak, xaki cojtioxin c'u chwach ri Dios, Rukaw ri Kanimajawal Jesucristo. ⁴ Ma ri'oj katom puwi ri cubulibal c'u'x alak ruc' ri Kanimajawal Jesucristo y puwi ri rutzil c'u'x alak cuc' conoje ri quicojom rubi'. ⁵ Jec'ula' 'anom alak ma ralak e cubam pan c'u'x alak che uc'ulic ri uc'olom ri Dios che alak chila' chicaj; yey wa' eta'am alak ruma ri sakil Utzilaj Tzij tom chi alak. ⁶ Ec'u wa' wa Utzilaj Tzij xtzijox che alak, e catajin utzijoxic che ronoje ruwachulew. Yey q'uiyarinak quiwach ri quecojow re y lic c'o cutikoj che ri quibinic quisilabic tak ri ticawex. Y jela' u'anom chixo'libal ralak chwi lo echiri' xta alak puwi ri unimal rutzil uc'u'x ri Dios y xc'ul alak wa' pakatzij wi. ⁷ Jela' rutzijoxic xu'an ri Epafra che alak. Rire e jun kachbi'il na lok' ta c'ax cana'w re yey e jun utzilaj aj chac re ri Cristo c'o chiwach alak. ⁸ Rire utzijom chike puwi ri rutzil c'u'x alak, ri uya'om ri Ruxlabixel ri Dios pa anima' alak.

⁹ Ec'u uwari'che, chwi lo echiri' xkata wa', e la' na oj uxlaninak ta che caka'an orar pawil' alak cha' ri Dios cuk'alajisaj che alak janipa ri caraj Rire ca'an alak y cha' camaj alak

usuc' ronoje tak ri sakil na'oj petinak ruc' ri Ruxlabixel. ¹⁰ Y jec'ula' cabin alak jusuc' pacha' ri takal chique ri e ralc'o'al ri Dios y ca'an c'u alak janipa ri caraj ri Dios cha' c'o cutikoj ri utzilaj chac ca'an alak y jela' cac'oji' más na'oj alak che reta'maxic uwach ri Dios. ¹¹ Cakatz'onoj c'u che ri Dios chuya'a chuk'ab alak e chirij runimal uchuk'ab Rire cha' cach'ij alak uchuk'ab ri quic'owibej alak ruc' unimal c'u'xaj y cha' ruc' unimal qui'cotemal ¹² catioxin c'u alak chwach ri Kakaw, ma e Rire x'anaw chike ri'oj utz cakac'ul janipa rubi'tisim chique rutinamit e c'o pa ri K'ijsak. ¹³ Ri Dios xojresaj chupa ruchuk'ab ri k'eku'malil y xojuk'atisaj chupa rutakanic Ruc'ajol, ri lic c'ax cuna'o. ¹⁴ Ruc' c'u ri' ri Cristo c'o kacolobetajic y c'o cuybal kamac ruma ruquiq'uel xturuwic.

Ruma ri Cristo cojc'oji' chi utzil chomal chwach ri Dios

¹⁵ Tob na jinta junok iliyom uwach ri Dios, pero ri Cristo e cac'utuben uwach. Yey ri Cristo xex chi c'o wi echiri' xwinakir ronoje ri c'o che ruwachulew. ¹⁶ Ruma c'u ri Cristo, ri Dios xu'an ronoje tak ri c'olic: tak ri e c'o chila' chicaj y ri e c'o che ruwachulew, tak ri quilitalaj uwach y ri na quilitalaj ta uwach; ri e takanelab y ri e aj k'atal tzij, tob ne ri ángeles, ri c'o quiwach y ri c'o quichuk'ab. Ronoje tak c'u ri' ri c'olic, x'an ruma ri Cristo yey e re yacbal uk'ij Rire.

¹⁷ Ri Cristo xex chi c'o wi chwa ronoje tak ri c'olic y Rire e chapayom re ronoje tak wa'. ¹⁸ Ri Cristo e ujolom riglesia. E Rire ri nabe che ronoje tak ri c'olic y ri nabe xc'astaj lo chiquixo'l ri ecaminak, cha' e Rire ri lic c'o uwach chwa tak ronoje ri c'olic. ¹⁹ Ma lic e xuc'ul uc'u'x ri' ri Dios ri cac'oji' ronoje ruc'u'xibal Rire ruc' ri Cristo. ²⁰ Ruma c'u ri Cristo, ri Dios xu'ano cha' ronoje tak ri c'olic cac'oji' tanchi puk'ab Rire, wa' e tak ri c'o che ruwachulew y tak ri c'o chila' chicaj, y jec'ula' conoje quec'oji' chi utzil chomal chwach

Rire ruma ruquiq'uel ri Cristo xtu-ruw chwa ri cruz.

²¹ Ec'u ralak rojertan na alak ta utinamit ri Dios y alak ne aj retzelal c'u'x chirij ri Dios ruma na chom ta ri na'oj alak y ruma tak ri na utz taj x'an alak. No'j wo'ora ri Dios uya'om alak chi utzil chomal chwach Rire. ²² Xu'an c'u wa' ruma rucamic ri Cristo cha' jela' cu'ana alak jusuc', na jinta c'ana mac alak y na jinta catz'akaw chi' alak chwach Rire. ²³ Ruma wa' lic chirajawaxic wi cachuk'ubej ib alak y catiqui' alak chi utz chupa ri cubulibal c'u'x alak ruc' ri Dios. Yey mok'otaj c'u alak roy'exic ri cubam pan c'u'x alak che, wa' e janipa ri bi'tisim chupa ri Utzilaj Tzij tom chi alak. Wa' wa Utzilaj Tzij e ri catajin utzijoxic pa tak ronoje luwar che ruwachulew. Yey ri'in Pablo, ya'tal chwe cantzijojej wa'.

Ruchac ri Pablo pa tak ri tinamit che ruwachulew

²⁴ Ec'u ri'in wo'ora lic quinquic'ot che tak ri c'axc'obic cantijo we ruc' wa' canto' alak. Jec'ula' e cantz'akatisaj chwi ri nucuero janipa ri c'axc'olil ya'tal chwe ruma in re ri Cristo, yey wa canc'ulumaj e to'bal che riglesia, rucuero Rire. ²⁵ Xinu'an jun aj chac re Rire cha' canto' riglesia, ma e ri Dios uya'om chwe cantzijojej pa tz'akat wi ri Utzilaj Tzij chiwach ralak ri na alak ta aj judi'ab. ²⁶ Lic ojertan lo ri' na k'alajisam ta wa' chiquiwach ri ticawex, no'j c'u wo'ora ri Dios e xuk'alajisaj wa' chique ri e re Rire. ²⁷ Chique c'u rique, ri Dios lic xraj cuk'alajisaj ri unimal chomalil uch'obom lok cuya chique tak ri tinamit na e ta aj judi'ab; wa' e ri cajeki' ri Cristo pa anima' ralak, y ruma c'u ri' lic cubam c'u'x alak che uc'ulic ri chomilaj c'aslemal chila' chicaj.

²⁸ Ec'u ri'oj e cakatzijojej rubi' ri Cristo pa tak coj'ec wi. Quebekapix-abaj conoje ri ticawex y cojc'utun chiquiwach ruc' sakil na'oj, cha' quebekaya ri e re ri Cristo chwach ri

Dios ruc' jun jusuc' quibinic quisilabic. ²⁹ Lic c'u cantij uk'ij che u'anic wa' ruc' ronoje nuc'u'x, yey ronoje ri can'ano e ruma runimal uchuk'ab ri Cristo c'o wuc'.

2

¹ Cuaj c'ut queta'maj alak, e ri'in lic canya wib che to'ic alak, junam cuc' ri e c'o Laodicea y ri jujun chic c'amaja' caqueta'maj nuwach ri'in, ² cha' canimarisax quic'u'x conoje ri quicojom rubi' ri Cristo, cu'ana xa jun ri rutzil quic'u'x chiquiwach y que'quimaja usuc' chi utz ronoje ri sakil na'oj k'alajisam chi lo ruma ri Kakaw Dios y ruma ri Cristo. ³ Ma ruc' ri Cristo c'o wi ronoje ruc'u'xibal ri na'oj y ri cajawax umajic.

⁴ Cambi'ij c'u wa' che alak cha' na jinta junok cach'acach'o'n e alak ruc' ch'a'tem lic chacojo' catatajic yey na katzij taj. ⁵ Ma tob ri'in na in jinta uc' alak chiwachil, pero pa wanima' e canna' ri'in pacha' in c'o uc' alak. Lic quinquic'otic ma canwilo junam cachacun alak yey lic tiquil alak chi utz che ri cubulibal c'u'x alak ruc' ri Cristo.

⁶ Ralak xcoj alak rubi' ri Kanimajawal Jesucristo y xya ib alak puk'ab; ec'u uwari'che bina alak jela' pacha' ri takal che junok ucojom rubi' Rire. ⁷ Tiquiba' c'u ib alak chi utz ruc' ri Cristo y jiquiba' ri cubulibal c'u'x alak ruc' Rire cha' jela' c'o q'uiyibal alak chwach Rire; e 'ana alak jela' pacha' ri xc'ut che alak yey xaki tioxin alak chwach ri Dios.

Ri c'ac' binic takal chique ri e re ri Cristo

⁸ Lic chajij c'u ib alak cha' na casocotaj ta alak ruc' tak na'oj na jinta uchac, ri xa no'jibal que ri ticawex re ruwachulew y na e ta c'u chirij runa'oj ri Cristo. ⁹ Ma ronoje ruc'u'xibal ri Dios c'o ruc' ri Cristo, y wa' lic xk'alajin che rubinic usilabic echiri' xu'an ticawex che ruwachulew. ¹⁰ Ruma c'u wa', ya'tal che alak ronoje ri cajawax che ri binic silabic alak ma c'o alak puk'ab ri Cristo, ri catakan paquiwi conoje

ri c'o quiwach y ri c'o quichuk'ab.
11 Ruma c'u c'o alak puk'ab ri Cristo, c'o chi ri retalil re circuncisión che ri anima' alak, tob wa' wa circuncisión na e ta ri cacoj xa ruma juna achi; ma ri que'elawi e ri Cristo xresaj alak puk'ab tak ri rayibal re ri ti'jil alak.
12 Ec'uchiri' xc'ul alak ri bautismo, e pacha' xmuk alak junam ruc' ri Kanimajawal Jesucristo yey xc'astaj lo alak junam ruc' Rire; ma xcoj alak ri Dios ruc' ruchuk'ab xuc'astajisaj lo ri Cristo chiquixo'l ri ecaminak. **13** Ma ralak rojertan caminak alak pa mac yey na cojotal tane ri retalil re circuncisión che alak.* No'j c'u wo'ora ri Dios xuya c'ac' c'aslemal alak junam ruc' ri Cristo y xucuy ronoje ri mac alak; **14** xresaj c'u ri k'atbal tzij uk'atom chi pakawi' ruma ri kamac† y xusach uwach wa' ruma rucamic ri Cristo chwa ri cruz. **15** Ruma c'u rucamic ri Cristo, ri Dios xuch'ij quichuk'ab tak ri itzel uxlabixel lic c'o quiwach y c'o quichuk'ab, xuc'ak bi quik'ij y xuk'alajisaj c'ut Rire e más c'o uchuk'ab chiquiwa rique.

Katzucuj tak ri c'o chila' chicaj

16 E uwari'che mac'o mach'a'tiben e alak xa ruma ri catij alak o ri cakum alak, o ruma ri ca'an alak chupa tak nimak'ij, chupa ri jekebal re tak ri ic' o tak ri k'ij re uxlanibal. **17** Ma ronoje ne wa' xa e ilibal pan re ri catajin lok; no'j ri Jun cuc'utubej uwach pa sakil wi, e ri Cristo.‡ **18** Chajij ib alak ma c'axtaj ruma junok na cac'ul ta alak ri caraj cuya ri Dios che alak chila' chicaj. Ma'an c'u e alak cuc' ri caquilok'nimaj quik'ij tak ri ángeles. Ma ri quebanaw wa' e lic que'ec quina'oj puwi ri na caquimaj ta usuc'. Lic chacojo' qui'anom ch'uti'n che quib, pero caqui'an c'u nim che quib ruma no'jibal xa e rique eno'jiyom re. **19** Rique na cacaj ta c'u caquitakej ri

Cristo. Rire e ujolom riglesia y riglesia e ucuerpo. Ri Cristo e 'anayom xa jun chique conoje ri e c'o puk'ab jela' pacha' tak ri ubakil juna cuerpo uchapom rib ruc' tak rigonsiyil y riboch'il. Yey e ri Cristo ri cuya che ru iglesia ronoje ri cajawax che cha' utz caq'uiy ruc' ri q'uiyibal cuya ri Dios.

20 Ma we ralak xcam alak ruc' ri Cristo,✧ wa' que'elawi na jinta chi alak chuxe' ri takanic xa no'jital che ruwachulew. Cantz'onoj c'u che alak: ¿Cha'taj c'a cabin alak pacha' quebin ri e re ruwachulew y caya c'u ib alak puk'ab ri takanic jewa' cubi'ij: **21** «Machapabej ne wa', matij nenare' y machap ne q'uenok»? **22** Ronoje wa' wa takanic xa quino'jibal achijab y e puwi tak ri na cacowin taj, ri xa caq'uisic. **23** Wa' wa c'utunic lic chacojo' e sakil na'oj. Yey ri caquitakej tak wa c'utunic e pacha' lic caquilok'nimaj uk'ij ri Dios ruc' wa', pero ri caqui'ano xa cuc' rique cano'jitaj wi. Caqui'an pacha' ch'uti'n che quib ma caquiya pa c'axc'obic ri quicuerpos; pero ronoje tak wa' na jinta cutikoj re cuk'atej tak ri rayibal re ri q'uiti'jil ri ticawex.

3

1 We c'astajinak chi alak junam ruc' ri Cristo, e tzucuj alak janipa ri cape chila' chicaj pa tz'ul wi ri Cristo puwiquik'ab ri Dios. **2** E lic takej alak janipa ri re chila' chicaj y matakej c'u alak tak ri xa re ruwachulew. **3** Ma e ralak caminak chi alak chwa tak ri xa re ruwachulew; ec'u wo'ora ri c'aslemal alak puk'ab ri Cristo c'o wi yey Rire ruc' ri Dios c'o wi. **4** E ri Cristo ri uya'om c'aslemal alak. Yey echiri' Rire cac'un tanchic, junam ruc' Rire cak'alajisax wach alak pa ri unimal uchomalil.

Ri binic re ojer y ri c'ac' binic

5 E uwari'che, e chesaj bi chupa ri anima' alak ri na utz ta uwach

* **2:13** Ri e c'o Colosas na cojotal ta ri retalil re circuncisión chique ruma na e ta aj judi'ab. † **2:14** Pa ri ch'a'tem griego cubi'ij: "Ri Dios xusach uwach ri wuj pa tz'ibital wi sa' tak ri kamac". ‡ **2:17** Ri Tzij Pixab xuya ri Dios chique rutinamit echiri' c'amaja' calax ri Cristo, e cuc'utubej pan ruc'unic Rire. ✧ **2:20** Col. 2:12; Ro. 6:6-11; Gl. 2:19

re ruwachulew: metz'abej uwa k'ij alak cuc' jujun chic na c'ulel ta alak, ma'an alak tak ch'ulilaj mac, maya ib alak che rayibal na chom ta uwach, marayij ne alak ca'an alak ri na utz taj. Qui'cota alak ruc' ronoje ri c'o uc' alak y marayij ne alak más; ma we c'o ri más c'ax cana' alak chwa ri Dios, e pacha' ca'an alak dios che wa'. ⁶ Ma ri Dios cutak lo c'axc'obic paquiwi ri caqui'an tak wa' ruma na caquicoj ta utzij. ⁷ Yey jenela' x'an ralak ojertan echiri' c'a c'o alak pa mac. ⁸ Ec'u wo'ora hermanos e ya'a can alak ronoje tak wa': ri ca'an alak oyowal, ri alak c'a'n, ri ca'an alak ri na utz taj che jun chic, ri cach'a't alak chirij junok, ri cabi'ij alak ch'a'tem na chom ta uwach. ⁹ Ma'an alak rak'ubal chiwach alak, ma esam chi ib alak che ri ojer binic silabic alak y che ronoje ri na utz taj rekelem tak wa'. ¹⁰ E jalc'atajinak chi c'u alak che jun c'ac' binic silabic, ma jalan catajin jalc'atixic alak cha' jela' cu'ana alak pacha' ri Jun ri xuya c'ac' c'aslemal alak. Jec'uri'la' queta'maj alak uwach ri Dios pa sakil wi. ¹¹ Che wa jun c'ac' binic silabic na il ta chi uwach we junok e cuq'uul raj judi'ab o e cuq'uul ri na e ta aj judi'ab, we ucojom ri retalil re circuncisión o na ucojom taj, we aj naj o na jinta c'ana reta'am, we c'o puk'ab juna rajaw* o na jinta rajaw; ma xew ri Cristo cu'an xa jun chike konoje y puk'ab Rire oj c'o wi konoje.

¹² Ralak alak cha'tal chi ruma ri Dios y alak chi re Rire, yey lic c'ax cana' alak ruma Rire. Ruc' c'u ri binic silabic alak, lic c'utu alak wa': C'ola c'axna'bal c'u'xaj uc' alak che quito'ic jujun chic, c'utu alak ri relej c'u'x alak, ma'an nim chibil ib alak, chu'ana ri lic utz c'u'x alak chiwach alak y c'ola unimal c'u'x alak. ¹³ Lic cuyu ib alak chiwach alak. We c'o junok xu'an ri na utz taj che alak, cuyu alak umac. Jela' pacha' xu'an ri Cristo echiri' xucuy mac ralak, jec'ula' ri' 'ana ralak. ¹⁴ Yey chwi c'u

ronoje tak wa', ri más chirajawaxic e lic c'ax cana' ib alak chiwach alak, ma e wa' ri cu'an xa jun che alak pa sakil wi. ¹⁵ Ec'u ri utzil chomal re ri Dios takana pa anima' alak, ma ruma wa' xusiq'uij alak ri Dios cha' cu'an alak xa jun. Yey lic tioxin alak chwach ri Dios.

¹⁶ Ruch'a'tem ri Cristo chunojisaj ronoje ri c'aslemal alak. C'utu c'u alak wa' wa ch'a'tem chibil ib alak y pixabaj ib alak ruc' sakil na'oj. Ruc' ronoje c'u'x alak tioxin alak chwach ri Dios y bixoj alak rubi' ruc' salmos, ruc' tak bix tz'ibital canok y ruc' bixobal ya'om che alak ruma ri Ruxlabixel. ¹⁷ Yey ronoje ri ca'an alak y ronoje ri cabi'ij alak, 'ana alak chupa rubi' ri Kanimajawal Jesucristo y tioxin alak chwach ri Kakaw Dios ruma Rire.

Ri kabinic kasilabic chiquiwach ri ticawex

¹⁸ E rilal ixok, ri c'ulan la, lic nimaj la ri achijil la, ma e takal ri' chique ri quicojom rubi' ri Kakaw.

¹⁹ Yey rilal achi, ri c'ulan la, lic c'ax na'a la ri ixokil la. Mac'ache'at la chwa ujolom.

²⁰ Ec'u ri'ix ix alc'o'al, lic chicojo quitzij richu-ikaw che ronoje, ma wa' e cuc'ul uc'u'x ri Kanimajawal Jesucristo.

²¹ Yey ralak ri c'o alc'o'al alak, mapetisaj alak coyowal ri alc'o'al alak, cha' jela' na capax ta quic'u'x.

²² Ec'u rilal lal mocom, lic cojo la utzij ri patrón la che ronoje. Chacuna la ruc' xi'in ib chwach ri Dios y ruc' ronoje c'u'x la, na xew ta echiri' catzutz'u'x la ruma ri patrón pacha' ri caqui'an ri xa caquitzucuj ri yacbal quik'ij. ²³ Ronoje c'u ri ca'an la, 'ana la ruc' ronoje c'u'x la, ma e ri Kanimajawal ri canimaj la y na e ta ri ticawex. ²⁴ Ma eta'am chi la c'o rajil uc'axel cuya ri Dios che'la e chirij ri 'anom la, ma ri canimaj la e ri Cristo ri Kajawal. ²⁵ No'j c'u ri ca'anaw ri na utz taj, ri' e cuc'ul ri tojbal re ri na utz

* **3:11** "C'o puk'ab juna rajaw": Quil "esclavo" pa vocabulario.

taj u'anom, ma ri Dios cuya chiqui-
jujunal sa' ri takal chique e chirij ri
qui'anom.

4

¹ Yey ralak ri alak patrón, 'ana alak
ri lic ube y ri lic usuc' chique ri e mo-
com alak; mic'ow chic'u'x alak, ralak
c'o jun "Patrón" alak chila' chicaj, wa'
e ri Dios.

² Onoje c'u alak lic macos alak che
u'anic orar ruc' tioxinic chwach ri
Dios. ³ 'Ana alak orar pakawi ri'oj
cha' ri Kajawal cuya na chike cakatz-
ijoj ri Utzilaj Tzij y cakak'alajisaj c'u
ri na k'alajisam ta lo ojertan chwi ri
Cristo, ma ruma ne la' in c'o pa cárcel.

⁴ Lic 'ana alak orar panuwi' ri'in
cha' lic c'o nuna'oj che uk'alajisaxic
Ruch'a'tem ri Cristo.

⁵ Bina alak ruc' sakil na'oj chiqui-
wach ri na e ta ralc'o'al ri Dios,
xaki matz'ila' c'u alak ri jujun k'ij
quic'owic. ⁶ Echiri' cach'a't alak ruc'
junok chic, 'ana alak wa' ruc' chomi-
laj ch'a'tem y sakil na'oj. Yey chira-
jawaxic c'ut queta'maj alak su'anic
cac'ul alak uwach chique ri caqui'an
tz'onobal che alak.

Ri Tíquico cuc'am bi urason ri Pablo

⁷ Echiri' ri hermano Tíquico ri na
lok' ta c'ax cana'w re copon uc' alak,
cubi'ij c'u che alak sa' ri nu'anom
ri'in wara. Rire e jun utzilaj aj chac
re ri Kakaw y lic chacuninak wuc'
ri'in. ⁸ Ruma c'u wa' cantak bi uc' alak
cha' cutzijoj che alak sa' ri ka'anom
ri'oj wara y jela' cunimarisaj c'u'x
alak. ⁹ Ri carachbilaj bi ri Tíquico e ri
Onésimo, jun utzilaj hermano na lok'
ta c'ax cana'w re, yey rire aj chila' pa
ri tinamit alak. Ec'u rique caquitzijoj
che alak ronoje sa' tak ri kic'owibem
wara.

Q'uisbal uch'a'tem ri Pablo che riglesia c'o Colosas

¹⁰ Ri Aristarco, wachbi'il wara pa
cárcel, cuya pan rutzil wach alak;
cuya pan rutzil wach alak ri Mar-
cos, ri ricak' ri Bernabé. Bi'tal chi
che alak sa' ri takal che ri Marcos
we quic'ow rire uc' alak; c'ulu c'u
alak chi utz. ¹¹ Cuya pan rutzil

wach alak ri Jesús, ri cabi'x Justo
che. Xew c'u wa oxib hermanos aj
judi'ab e chacuninak wuc' wo'ora pa
rutakanic ri Dios y lic quibochi'im
nuc'u'x. ¹² Cuya pan rutzil wach
alak ri Epafras, rire aj chila' pa ri
tinamit alak y e jun aj chac re ri
Cristo. Rire lic uya'om rib che u'anic
orar pawil alak cha' lic cachuk'ubej ib
alak ruc' ri jusuc' binic silabic alak y
jec'ula' caya ib alak che u'anic ronoje
ri rajawal uc'u'x ri Dios. ¹³ Ma e
ri'in wilom ri Epafras lic cu'an orar
pawil alak y paquiwi' ri e c'o pa ri
tinamit Laodicea y ri e c'o Hierápolis.
¹⁴ Cuya pan rutzil wach alak ri Lucas,
ri jun doctor na lok' ta c'ax cana'w re;
jenela' ri Demas cuya pan rutzil wach
alak.

¹⁵ Ya'a alak rutzil quiwach conoje
ri hermanos e c'o Laodicea. Ya'a alak
rutzil uwach ri Ninfas junam cuc' ri
hermanos caquimol quib chirocho.

¹⁶ Echiri' ajilam chi wa' wa carta chi-
wach ralak, taka bi alak wa' chique
ri hermanos re ri iglesia c'o Laodicea
cha' cajilax chiquiwach; y jec'ula'
ralak cajilaj alak ri carta nutakom bi
Laodicea. ¹⁷ Jewa' bi'ij alak che ri
Arquipo: «Lic choc la il che u'anic chi
utz ruchac ri Dios ya'tal pak'ab la.»

¹⁸ Ri'in Pablo, ruc' wa nuk'ab
xintz'ibaj wa rutzil wach alak. Lic
mic'ow chic'u'x alak ca'an alak orar
panuwi' ma in c'o pa cárcel. C'ulu c'u
alak ri unimal rutzil uc'u'x ri Dios.
Amén.

Ri nabe carta xutz'ibaj ri Pablo che riglesia c'o Tesalónica

*Ri Pablo cuya pan rutzil quiwach ri
hermanos e c'o Tesalónica*

¹ Ri'in Pablo cuc' ri wachbi'il Silvano y Timoteo cakatak bi wa carta che alak, ri alak re riglesia c'o Tesalónica, alak re ri Kakaw Dios y re ri Kanimajawal Jesucristo. C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

*Ri Pablo catioxin chwach ri Dios
ruma riglesia c'o Tesalónica*

² Lic xaki cojtioxin chwach ri Dios uma onoje alak echiri' caka'an orar pawil alak. ³ Xaki e c'o alak chikac'u'x chwach ri Kakaw Dios ruma ri catajin alak che uc'utic ruc' ri cubulibal c'u'x alak y ri rutzil c'u'x alak, yey ruma na ok'otam ta c'ana alak ri cubul pan c'u'x alak che ruc'unibal ri Kanimajawal Jesucristo.

⁴ Hermanos, ri lic c'ax cana' alak ruma ri Dios, ri'oj keta'am ralak alak cha'tal ruma Rire. ⁵ Ma echiri' xkatzijoj ri Utzilaj Tzij che alak, na xkatzijoj ta xa ruc' kach'a'tem ri'oj, ma e xkatzijoj ruc' ruchuk'ab ri Santowilaj Ruxlabixel ri Dios; yey ec'u ri' Rire xujiquiba' uwach lic katzij ri xkatzijoj. Ralak eta'am alak chi utz sa' ri kabinic kasilabic echiri' xojopon chixo'l alak, ma ronoje ri xka'ano, xka'ano re to'bal e alak.

⁶ Ec'u ralak e lic xc'am alak re ri kabinic kasilabic ri'oj y rubinic usilabic ri Kanimajawal. Yey tob ne xc'ul alak ri Utzilaj Tzij chupa unimal c'axc'obic, chupa ri anima' alak c'o ri qui'cotemal cuya ri Santowilaj Ruxlabixel ri Dios. ⁷ Wa' wa x'an alak e jun c'utubal chiquiwach conoje ri hermanos quicojom rubi' ri Cristo, ri e c'o chupa tak ri luwar re Macedonia y re Acaya. ⁸ Ruma c'u ri x'an alak xe'ec utzijoxic Ruch'a'tem ri Kakaw

pa tak ronoje luwar, na xew ta Macedonia y Acaya. Ma pa uc'uiyal luwar catataj wi ri cubulibal c'u'x alak ruc' ri Dios, y jec'ula' na cajawax ta chi cakatzijoj chiquiwach ri jujun chic ri xu'an ri Dios uc' alak. ⁹ Ma e ne rique caquitzijoj ri utzilaj kac'ulic x'an ralak yey su'anic xok'otaj can alak ri quilok'nimaxic tak ri tiox cha' e calok'nimaj alak ri Jun pakatzij wi e Dios c'aslic. ¹⁰ Yey caquitzijoj e oye'em alak ri Jun cape chila' chicaj, wa' e ri Jesús Ruc'ajol ri Dios, ri xc'astaj lo chiquixo'l ri ecaminak. Yey Rire cojucolobej che ri k'atbal tzij re ri Dios catajin lok.

2

*Ruchac ri Pablo chupa ri tinamit
Tesalónica*

¹ Hermanos, eta'am alak lic c'o xutikoj janipa k'ij xojc'oji' chila' uc' alak. ² Yey eta'am ne alak ri xkic'owibej echiri' c'amaja' cojopon uc' alak; lic xc'ak bi kak'ij ruc' c'axlaj ch'a'tem y lic x'an c'ax chike chupa ri tinamit Filipos.✧ Ec'uchiri' xojopon uc' alak, ri Dios lic xuya kachuk'ab che utzijoxic ri Utzilaj Tzij chixo'l alak, tob e c'o ri lic xcaj cojquik'atej. ³ Ec'u ri tzijonic xka'an chiwach alak na xka'an ta ruc' sachibal na'oj, na xka'an ta ruc' rayibal na ube taj yey na xka'an tane re cakasoc alak. ⁴ Ma ri tzijonic xka'ano e chirij ri caraj ri Dios, ri xcha'w ke'oj y xuya pakak'ab rutzijoxic ri Utzilaj Tzij. Na e ta c'u caka'an janipa ri cacaj rachijab, ma e caka'an janipa ri caraj ri Dios, ri carilo we utz o na utz taj sa' ri c'o chupa ri kanima'.

⁵ Eta'am alak hermanos, ri'oj na xkayac ta k'ij alak xa ruma c'o cakaj che alak y na junta xka'ano xa re cakesaj puak che alak. Ri Dios reta'am lic katzij wa cakabi'ij. ⁶ Yey na e ta cakatzucuj cayac kak'ij uma ralak o cuma jujun chic. Tob ne pakak'ab c'o wi cojtakan pawil alak ruma oj utako'n ri Cristo, pero na xka'an ta wa'. ⁷ Ri xka'an uc' alak e pacha' cu'an juna ixok cuc' ri ralc'o'al

✧ 2:2 Hch. 16:19-24

echiri' quebuq'uiyisaj y quebuchajij ruc' ch'u'ch'uj uc'u'x. ⁸ Ruma c'u ri c'axna'bal kac'u'x che alak, na xew ta lic xkaj cakatzijoj ri Utzilaj Tzij re ri Dios che alak, ma lic ne xkaya kanima' che to'ic alak, tob ne ruc' wa' cojcamic, ma lic c'ax cakana' alak.

⁹ Hermanos, cac'un chic'u'x alak ri kachac y ri kacosic xkic'owibej chila' uc' alak; ma ri'oj xojchacun chipak'ij chichak'ab cha' jela' na xka'an ta oj eka'n chukul junok che alak* echiri' xkatzijoj ri Utzilaj Tzij re ri Dios chixo'l alak. ¹⁰ Ilom c'u ralak y rilom ne ri Dios sa' ri kabinic kasilabic chixo'l alak ri cojom alak rubi' ri Cristo. Ma ri kabinic lic chom, lic jusuc' y na jinta c'o cach'a'tiben re.

¹¹ Lic eta'am c'u alak, ri xka'ano e pacha' cu'an juna achi cuc' ri ralc'o'al. Ma xkapixabaj alak, xkan-imarisa' c'u'x alak chijujunal alak ¹² y lic xkatz'onoj che alak cha' cabin alak jusuc' jela' pacha' ri lic takal che alak ri alak re ri Dios, ri cusiq'uij alak cha' cac'oji' alak chupa ri chomilaj utakanic.

¹³ E uwari'che, ri'oj xaki cojtioxin chwach ri Dios, ma echiri' xkatzijoj ri Utzilaj Tzij re ri Dios che alak, na xc'ul ta alak wa' xa pacha' uch'a'tem ticawex; ma xmaj alak usuc' pakatzij wi wa' e Uch'a'tem ri Dios yey wa' e ri cujalc'atij ri binic silabic alak, ri cojom alak rubi' ri Cristo.

¹⁴ Ralak hermanos, xtij alak c'ax paquik'ab ri e re ri tinamit alak, jela' pacha' ri xquic'ulumaj rutinamit ri Dios, ri quicojom rubi' ri Kanimajawal Jesucristo pa tak ri luwar re Judea, ma rique xeternabex ruc' c'ax cuma ri cach e aj judi'ab. ¹⁵ Yey wa' wa aj judi'ab e xecamisan re ri Kanimajawal Jesucristo y e xecamisan que ri k'alajisanelab xetak lo cuc', yey xojquesaj lo ri'oj chupa tak ri quitinamit. Rique na caqui'an ta ri cuc'ul uc'u'x ri Dios y na caquiya tane luwar chique jujun chic caqui'an ri

utz chwach ri Dios. ¹⁶ Ma echiri' cakatzijoj ri Utzilaj Tzij chiquiwach ri na e ta aj judi'ab cha' quecolobetajic, rique caquitij uk'ij cojquik'atej. Ruc' wa' lic catajin uq'uiyaric ri quimac y jec'ula' ri' ri nimalaj k'atbal tzij re ri Dios c'o chi paquiwi'.

Ri Pablo caraj copon tanchi cuc' ri hermanos e c'o Tesalónica

¹⁷ Ec'u ri'oj hermanos, tob naj oj c'o wi che alak yey c'o tan k'ij na kilom ta wach alak; na ruc' ta c'u ri' xaki c'o alak pa kanima' y lic curayij pan kac'u'x que'kila tanchi wach alak. ¹⁸ Lic c'u xkarayij coje'bina uc' alak. Ri'in, in Pablo, na xa ta julaj lic xintij uk'ij qui'nwila alak, pero e ri Satanás xucoj k'atbal chikawach.

¹⁹ ¿China ri cuya qui'cotemal chike ri'oj? E ralak, ma lic cubul pan kac'u'x uc' alak yey e ralak ri tojbal re ri kachac. Yey echiri' cac'un lo ri Kanimajawal Jesucristo, lic cojqui'cot c'u ri' ma lic c'o xutikoj ri chac ka'anom uc' alak. ²⁰ Uma c'u ri' ralak, ri'oj cakana'o lic c'o xe'ela wi ri chac ka'anom y lic cojqui'cot che.

3

¹ Ruma c'u lic cakaj chic cakata rason alak,* xkach'ob c'u ri' cojcanaj can katuquel ri'oj chupa ri tinamit Atenas ² y xkatak c'u bi ri ka hermano Timoteo, ri raj chac ri Dios y to'bel ke che utzijoxic ri Utzilaj Tzij re ri Cristo, cha' rire cu'nimarisa' c'u'x alak y cu'pixabaj alak cha' na casach ta ri cubulibal c'u'x alak, ³ y jela' na jinta junok che alak coc chuc'u'x wa' wa c'axc'obic c'o wi alak. Ma eta'am alak lic rewi cojic'ow chupa tak wa'. ⁴ Ma echiri' c'a oj c'o chila' uc' alak, xkabi'ij che alak cape c'axc'obic pakawi'; yey lic eta'am chi c'u alak e xu'ana wa'. ⁵ Ruma c'u lic xuaj canta rason alak, xintak bi ri Timoteo uc' alak cha' careta'maj sa' u'anom ri cubulibal c'u'x alak; ma uxi'im rib nuc'u'x c'axtaj ritzel winak xusoc

* **2:9** Ri Pablo cuc' ri rachbi'il caqui'an carpa y ruc' wa' caquich'ac quirajil. Hch. 18:3 * **3:1** Echiri' ri Pablo xumaj rason lic eternabem ruc' c'axc'obic ri hermanos e c'o Tesalónica, rire lic xraj que'ec che quito'ic, pero c'o xk'aten re cha' na que'ec taj. 1 Ts. 2:14,17-18

alak cha' caya can alak ri Cristo y jec'ula' ri' na jinta xutikoj ri kachac uc' alak.

⁶ Pero echiri' xtzelej lo ri Timoteo che rilic alak, xuya chomilaj rason chike puwi ri cubulibal c'u'x alak y ri rutzil c'u'x alak. Yey xubi'ij chike lic oj c'o chic'u'x alak y lic ca'aj alak quil alak kawach, jela' pacha' ri'oj lic cakaj cakil wach ralak. ⁷ E uwari'che hermanos, chupa ronoje ri cojtajin che ric'owibexic y ri c'axc'obic oj c'o wi, xcubi' ri kanima' ruma ri xkata puwi ri cubulibal c'u'x alak. ⁸ Echiri' xkato lic tiquil alak chi utz chwach ri Kakaw, wa' xunimarisaj kac'u'x. ⁹ Ruma c'u ri', na cakarik taj su'anic cakatioxij che ri Dios ri unimal qui'cotemal cakana' uma ralak. ¹⁰ Ma chipak'ij chichak'ab na cojuxlan ta che utz'onoxic che ri Dios cuya chike que'kila wach alak, y jec'ula' cakato' alak cha' catz'akat uwach ri cubulibal c'u'x alak ruc' ri Cristo. ¹¹ Ec'u ri Kakaw Dios y ri Kanimajawal Jesucristo chuya'a chike cojopon uc' alak. ¹² Ri Kanimajawal chunimarisaj ri rutzil c'u'x alak cha' lic c'ax cana' ib alak chiwach alak y c'ax quena' alak conoje ri ticawex, jela' pacha' caka'an ri'oj che alak. ¹³ Yey chujiquiba' c'u'x alak y chuto'o alak cha' ri binic silabic alak cu'an lic jusuc' y na jinta c'ana mac carikitaj che alak chwach ri Kakaw Dios echiri' cac'un tanchi ri Kanimajawal Jesucristo cuc' conoje ri santowilaj utinamit.

4

Ri sakil binic silabic caraj ri Dios chike

¹ Wo'ora hermanos, lic cakatz'onoj che alak y cakapixabaj alak chupa rubi' ri Kanimajawal Jesucristo: Bina alak jela' pacha' ri lic takal che ri binic silabic alak e chirij ri xmaj alak chike, ma e wa' ri lic cuc'ul uc'u'x ri Dios; ec'u lic xaki tijoj ib alak ri' che wa'. ² Lic eta'am chi alak sa' tak ri pixabanic xkaya chiwach alak pa

rubi' ri Kanimajawal Jesucristo, ³ ma ri rajawal uc'u'x ri Dios e ri santowilaj binic silabic alak. Metz'abey c'u uwa k'ij alak ruc' junok na c'ulel ta alak. ⁴ Chijujunal alak c'ola alak pa sakil wi ruc' ri ixokil* alak y jec'ula' lok'oj alak uk'ij. ⁵ Maya c'u ib alak che rayibal na chom ta uwach pacha' ri caqui'an ri winak na queta'am ta uwach ri Dios. ⁶ Mu'ana ri c'o junok che alak cu'an ri na utz taj o cuscocosa' juna ratz-uchak' puwi tak wa', ma ri Kanimajawal cuk'at tzij puwi ri ca'anaw wa', jela' pacha' ri kabi'im y kak'alajisam chi che alak. ⁷ Ma ri Dios na xojusiq'uij taj re cakach'ulaj ri kabinic, e xojusiq'uij re cojc'oji' che jun santowilaj binic. ⁸ China c'u ri cac'akaw bi uk'ij wa pixabanic, na e ta cuc'ak bi uk'ij juna achi, e cuc'ak bi uk'ij ri Dios, ma wa pixabanic petinak ruc' Rire, ri uya'om ri Santowilaj Ruxlabixel chike.

⁹ Chwi c'u ri rutzil c'u'xaj chiwach alak, na chirajawaxic taj c'o cantz'ibaj pana che alak puwi wa', ma ri Dios uc'utum che alak chirajawaxic c'ax cana' ib alak chiwach alak, ¹⁰ y jela' catajin alak che u'anic cuc' conoje ri hermanos e c'o chila' pa ronoje tak ri luwar re Macedonia. Lic c'u cantz'onoj che alak hermanos, e xaki tijoj ib alak che wa'. ¹¹ Yey choc alak il che ri cac'oji' utzil chomal chiwach alak; mamin ib alak chupa tak ri na e ta alak. Yey chacuna c'u alak ruc' ri k'ab alak jela' pacha' ri pixabanic ka'anom can che alak, ¹² cha' jela' na coy'ej ta alak chique jujun chic janipa ri cajawax che alak y jec'ula' chom quilitaj ri binic silabic alak chiquiwach ri c'amaja' caquicoj rubi' ri Cristo.

Ruc'unibal ri Kanimajawal Jesucristo

¹³ Hermanos, e cakaj ri'oj lic camaj alak usuc' chi utz paquiwi ri ka hermanos ecaminak chic, cha' na cabison ta alak jela' pacha' caqui'an ri ticawex na cubul ta pan quic'u'x

* **4:4** "Ixokil": Pa ri ch'a'tem griego cubi'ij "c'olibal" o "chapabal". Yey chupa wa' wa versículo que'elawi "esposa" o "cuerpo".

che rilic tanchi quiwach ri ecaminak chic. ¹⁴ Ma we cakacojo ri Kanimajawal Jesucristo xcamic yey xc'astaj lo chiquixo'l ri ecaminak; jela' c'u ri' cakacojo, ri Dios quebuc'am lo ruc' ri Kanimajawal Jesucristo janipa ri xecamic quicojom bi rubi' Rire.

¹⁵ Wa cakabi'ij che alak wo'ora e chirij ri xuc'ut can ri Kanimajawal: E ri'oj janipa ri c'a oj c'aslic echiri' cac'un tanchi ri Kanimajawal, na cojnabej tubi chiquiwach ri ka hermanos, ri xecam nabe chikawa ri'oj. ¹⁶ Ma echiri' ri Kanimajawal cape chila' chicaj, catataj jun cowilaj kulaj re takanic, ri kulaj re jun ángel lic c'o uwach y ruch'awibal ri trompeta re ri Dios. Ec'uchiri', ri hermanos ecaminak chic, quec'astaj lo nabe. ¹⁷ Tec'uchiri' ri'oj, ri c'a oj c'as wara che ruwachulew, coje'am bi junam cuc' rique pa sutz' re que'kac'ulu ri Kanimajawal punic'ajal caj. Y coje'c'ola c'u ruc' ri Kanimajawal na jinta chi utakexic. ¹⁸ E uwari'che, nimarisaj c'u'x alak chiwach alak ruc' wa ximbi'ij lok.

5

¹ Hermanos, na chirajawaxic taj cantz'ibaj pan ri'in che alak puwi ruk'ijol cu'ana ronoje wa'. ² Ma ralak lic eta'am alak chi utz, ruc'unibal ri Kanimajawal jela' cu'ana' pacha' ri oquibal re juna elek'om pa juna ja chak'ab, ma ri elek'om na cubi'ij ta apanok jampala' coponic. ³ Echiri' ri winak caqui'ij: «Wo'ora lic c'o utzil chomal ma na jinta chi ch'a'oj y na jinta chi c'o cakac'ulumaj,» xakic'ate't c'u ri' cape ri c'axc'obic paquiwi' jela' pacha' ri c'ax cujek che juna ixok echiri' calax uch'uti'n. Yey tak wa' wa winak na jinta c'o qesan que chwach ri c'axc'obic cape paquiwi'.

⁴ No'j ralak hermanos, na jinta chi alak pa k'eku'malil, ma eta'am chi alak puwi ri catajin lok; ruma ri' echiri' ri Kanimajawal cac'un tanchic, na cacam ta anima' alak che ma oye'em chi alak ruc'unibal. Na

cac'ulumaj ta c'u alak ri' pacha' ri cuc'ulumaj junok echiri' xakic'ate't cocjuna elek'om pa rocho. ⁵ Ma onoje ralak cabin alak chupa ri K'ijsak y alak re ri pak'ij. Ralak y ri'oj na oj ta re ri chak'ab, ma na oj jinta chi pa ri k'eku'malil. ⁶ Ruma c'u ri', mawar kawach pacha' ri caqui'an ri jujun chic; ri ka'ana' e kachajij ri kabinic kasilabic y lic kach'obo chi utz sa' ri caka'ano. ⁷ Ma e ri quewaric, chak'ab quewaric; yey e ri quek'abaric, chak'ab quek'abaric.

⁸ No'j ri'oj, ri oj c'o chupa ri K'ijsak, lic kachajij kib. Ruc' ri cubulibal kac'u'x y ri rutzil kac'u'x ka'ana jela' pacha' ri cu'an juna soldado ruc' ri ch'ich' ch'ukubal ruwa uc'u'x. Yey kacuba' pan kac'u'x che uc'ulic ri colobetajic koye'em che ri Kakaw jela' pacha' ri cu'an juna soldado ruc' ri casco ch'ukubal re rujolom. ⁹ Ma ri Dios na xojucha' taj cha' e cakac'ul ruk'atbal tzij pakawi'; ma e xojucha'o re cakac'ul ri colobetajic ruma ri Kanimajawal Jesucristo, ¹⁰ ri xcam kuma ri'oj cha' tob we oj c'aslic o we oj caminak chic echiri' cac'un Rire, coj-jeki' c'u ri' junam ruc'. ¹¹ Ruma c'u ri', bochi'ij c'u'x alak y nimarisaj c'u'x alak chiwach alak, jela' pacha' ri catajin alak che u'anic.

Quisbal pixabanic re ri Pablo che riglesia c'o Tesalónica

¹² Hermanos, cakatz'onoj che alak cojo alak quitzij ri e c'amal wach alak chupa rubi' ri Kanimajawal, y 'ana c'u alak janipa ri takal chique ri quechacun chixo'libal alak y quequipixabaj alak. ¹³ Lok'oj alak quik'ij y c'ax chena'a alak ruma ri chac caqui'ano. C'ola alak chi utzil chomal chiwach alak.

¹⁴ Cakatz'onoj che alak hermanos, chepixabaj alak ri na jinta c'o cacaj caqui'ano. Nimarisaj alak quic'u'x ri na jinta ucowil quic'u'x. Cheto'o alak ri na jinta quichuk'ab chwach ri Dios. C'ola unimal c'u'x alak cuc' conoje ri e c'o uc' alak.

¹⁵ We c'o junok u'anom ri na utz taj che alak, ma'an alak uc'axel che. E

tijoj ib alak che u'anic ri utz chiwach alak y chiquiwach conoje.

¹⁶ E lic xaki qui'cota alak.

¹⁷ Chipak'ij chichak'ab 'ana alak orar.

¹⁸ Tioxin c'u alak che ri Dios chupa tak ronoje ri quic'owibej alak, ma e caraj ri' ri Dios che onoje alak ri cojom alak rubi' ri Kanimajawal Jesucristo.

¹⁹ Mak'atej alak janipa ri caraj

cu'an ri Ruxlabixel ri Dios uc' alak.

²⁰ Mac'ak c'u bi alak uk'ij tak ri k'alajisanic cu'an junok ruma ri Ruxlabixel ri Dios; ²¹ lic ch'obo alak rakan we wa' ruc' ri Dios petinak wi. E lic takej alak janipa ri utz ²² yey jec'a c'u ib alak che ronoje ri na utz taj.

²³ Ec'u ri Dios ri aj ya'l utzil chomal, lic chuchomaj ri binic silabic alak cha' ronoje ri c'aslemal alak ruc' ri c'u'x alak y ri cuerpo alak chajital chi utz che ronoje ri na utz taj, cha' jela' na jinta c'ana mac alak echiri' cac'un tanchi ri Kanimajawal Jesucristo. ²⁴ E ri Dios siq'uiyom e alak che jun santowilaj binic silabic; yey Rire lic jusuc', ma cuya na ronoje ri to'bal ubi'tisim che alak cha' cabin alak jusuc'.

²⁵ Hermanos, 'ana alak orar pakawi ri'oj.

²⁶ Ya'a alak rutzil wach alak chiwach onoje alak ruc' jun sakil tz'ubuj chi'aj chwach ri Dios.*

²⁷ Chupa rubi' ri Kanimajawal cambi'ij che alak: Chajilaj alak wa' wa carta chiquiwach conoje ri hermanos.

²⁸ C'ulu c'u alak ri unimal rutzil uc'u'x ri Kanimajawal Jesucristo. Amén.

* **5:26** Ri Pablo jewa' xubi'ij ma rique e caqui'an wa' chiquiwach echiri' caquiya rutzil quiwach.

Ruca'm carta xutz'ibaj ri Pablo che riglesia c'o Tesalónica

*Ri Pablo cuya pan rutzil quiwach ri
hermanos e c'o Tesalónica*

¹ Ri'in Pablo cuc' ri wachbi'il Silvano y Timoteo cakatak bi wa carta che alak, ri alak re riglesia c'o Tesalónica, alak re ri Kakaw Dios y re ri Kanimajawal Jesucristo. ² C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

*Ri k'atbal tzij paquiwi raj maquib
echiri' cac'un tanchi ri Cristo*

³ Hermanos, xaki cojtioxin chwach ri Dios uma ralak; lic e takal ri' caka'ano ma lic catajin unimaric ri cubulibal c'u'x alak ruc' ri Cristo yey catajin unimaric ri rutzil c'u'x alak, ri cac'ut alak chiwach onoje alak. ⁴ Ruma c'u ri', ri'oj lic cakatac'aba' k'ij alak echiri' cojch'a't pawil' alak chiquiwach tak riglesias re ri Dios. Lic e cakatzijoj ri unimal c'u'x alak y ri cubulibal c'u'x alak; ma tob alak ternabem ruc' c'ax y quic'ow alak pa c'axc'obic, wa' lic cuyum alak.

⁵ Ri k'atbal tzij cu'an ri Dios lic jusuc', yey cak'alajin wa' ma chwach Rire lic takal che alak coc na alak chupa rutakanic, y ruma ne ri' catij alak c'ax wo'ora. ⁶ Yey lic ube c'ut, ri Dios cu'an uc'axel chique ri eya'yom e alak pa c'ax. ⁷ No'j c'u ralak ri catajin ic'owic alak chupa ri c'ax, cuya na che alak ri uxlanem junam kuc' ri'oj echiri' cak'alajin uwach ri Kanimajawal Jesucristo. Echiri' Rire cac'un chila' chicaj chupa urepebal ak' cuc' ru ángeles lic c'o quichuk'ab, ⁸ quebo'lu'ya'a c'u pa c'ax ri na xcaj ta caqueta'maj uwach ri Dios y na xquitakej tane ri Utzilaj Tzij re ri Kanimajawal Jesucristo. ⁹ E tak c'u wa' wa winak caquic'ul ri k'atbal tzij re ri c'axc'obic na junta utakexic; xa jumul

c'ut quebesax bi chwach ri Kanima-jawal y chwach ruchomal ruchuk'ab ¹⁰ echiri' cac'un Rire chupa la' la jun k'ij re cayac uk'ij cuma rutinamit. Conoje c'u ri' ri xecojow rubi' lic caquilok'nimaj uk'ij ruma ri u'anom Rire cuc'. Yey ralak, alak jun che wa utinamit ruma xcoj alak ri xkatzijoj che alak.

¹¹ E uwari'che lic xaki caka'an orar pawil' alak. Cakatz'onoj c'u che ri Dios e cato'w e alak cha' ri binic silabic alak cu'ana pacha' ri takal chique ri esiq'uim ruma Rire. Y cakatz'onoj c'u che cuto' alak che u'anic tak ri utzilaj chac caraj Rire che alak, yey ca'an c'u alak wa' ruc' cubulibal c'u'xaj y ruc' ruchuk'ab Rire. ¹² Jec'ula' e cayac uk'ij ri Kanimajawal Jesucristo ruma ri ca'an alak, yey catac'abax k'ij ralak ruma alak re Rire. Ca'an c'u wa' ruma ri unimal rutzil c'u'xaj re ri ka Dios y re ri Kanimajawal Jesucristo.

2

*Ri itzelilaj achi cayactaj chirij ri
Cristo*

¹ Chwi c'u ruc'unibal ri Kanima-jawal Jesucristo echiri' cakamol kib ruc' Rire,✧ lic cakatz'onoj che alak hermanos, ² chajij ib alak cha' na casach ta ri na'oj alak puwi wa'. Maxi'ij c'u ib alak we c'o junok cubi'ij: «E uk'ijol wa' ruc'unibal ri Kanimajawal,» tob ne cubi'ij k'alajisam wa' che ruma ri Ruxlabixel ri Dios o xtzijox che o xtz'ibax pa carta lic e pacha' kuma ri'oj tz'ibitalic. ³ Maya c'u ib alak casocotaj alak, ma nabe na cac'un ri k'ij echiri' uq'uiyal winak caquic'ak bi uk'ij ri Dios y cuk'alajisaj c'u rib ri jun itzelilaj achi, ri c'o chi ri k'atbal tzij re ri Dios puwi' re casachisax uwach. ⁴ Ec'u wa' wa'chi cayactaj chirij ri Dios y chirij ronoje tak ri calok'nimax uk'ij cuma ri winak, wa' e tak ri qui'anom tiox che. Rire que'tz'ula ne chupa ri Rocho Dios, cu'an che rib pacha' e Dios y cuc'ambej ne uwach ri Dios. ⁵ ¿Na cac'un ta neba chic'u'x alak, echiri' c'a in c'o uc'

✧ 2:1 1 Ts. 4:17

alak, ximbi'ij wa' che alak? ⁶ Eta'am chi c'u alak sa' ri k'atabeyom re ri c'utubal uwach rire wak'ij ora cha' e cuc'utubej uwach c'a echiri' copon na ruk'ijol uch'obom chi lo ri Dios. ⁷ Ritzel winak catajin chi che ucojic pa quijolom ri winak queyactaj chirij ri Dios tob rique na caquina'bej taj we e rire ca'anaw wa'. Wo'ora c'a c'o ri k'atabeyom re, pero echiri' quesax ri k'atabeyom re, ⁸ c'a ec'uchiri' cuc'utubej uwach ri jun itzelilaj achi. Yey echiri' cac'un tanchi ri Kanimajawal ruc' unimal uchuk'ab, Rire ruc' ri ch'a'tem* quel lo puchi' cucamisaj y cusach c'u uwach wa jun itzelilaj achi.

⁹ Echiri' cac'un wa' wa jun itzelilaj achi, cu'an nimak tak c'utubal y milagros ruc' ri unimal chuk'ab ya'tal che ruma ri Satanás. Ronoje c'u ri' wa', cu'an ruc' socoso'nic, ma e pacha' cu'an wa' ruc' ruchuk'ab ri Dios. ¹⁰ Yey cu'an uq'uiyal uwach tak mac cha' quebusoc ri ticawex, ri xa quesachic ruma na xcaj taj caquic'ul ri K'ijsak cha' quecolobetajic. ¹¹ Ruma c'u wa', ri Dios cuya luwar quesocotaj ruma ruchuk'ab ritzel; ec'u rique e caquicoj ri xa rak'ubal. ¹² Jec'ula' quec'oji' chuxe' ri k'atbal tzij conoje ri na xquicoj ta ri K'ijsak, ma e lic xe'ec quic'u'x ruc' ri na jusuc' taj.

Pixabanic chique ri quecolobetajic

¹³ Ec'u ri'oj, hermanos, chirajawaxic xaki cojtioxin chwach ri Dios uma ralak ri lic c'ax cana' alak ruma ri Kanimajawal, ma ri Dios ucha'om chi lo alak chwi rujekebal ruwachulew cha' cac'ul alak ri colobetajic. Yey wa' e ruma xcoj alak ri K'ijsak y ruma ri cu'an ri Ruxlabixel ri Dios, ri cu'an chom che ri binic silabic alak. ¹⁴ Ruma c'u wa', ri Dios xusiq'uij alak ruma ri Utzilaj Tzij xkatzijoj che alak, cha' jela' cac'ul alak ri yacbal k'ij alak ruma alak re ri Jun lic c'o yacbal uk'ij, wa' e ri Kanimajawal Jesucristo. ¹⁵ E uwari'che hermanos, lic chuk'ubej ib alak y lic takej alak ri c'utunic

kac'utum chiwach alak y ri katz'ibam pana che alak.

¹⁶ Caka'an c'u orar paw'i' alak chwach ri Kanimajawal Jesucristo y chwach ri Kakaw Dios, ri c'ax xna'w ke y xaki cunimarisaj kac'u'x yey cuya chike cacubi' pana kac'u'x che ri koye'em ruma ri unimal rutzil uc'u'x. ¹⁷ Cakatz'onoj c'u che ri Dios chunimarisaj c'u'x alak y chujiquiba' c'u'x alak che ubi'xiquil y che u'anic ri lic utz.

3

¹ Q'uisbal c'u re, hermanos, 'ana alak orar chwach ri Dios pakawi ri'oj cha' lic que'ec tan rutzijoxic ri Utzilaj Tzij re ri Kanimajawal che ronoje luwar y cha' cac'ul wa' chi utz cuma ri quetaw re jela' pacha' x'an ralak. ² 'Ana alak orar chwach ri Dios pakawi ri'oj cha' na cojtzak ta paquik'ab ri winak lic itzel quic'u'x y na junta quisuc', ma na conoje taj cacaj caquicuba' quic'u'x ruc' ri Jesús. ³ Na ruc' ta c'u ri', ri Kanimajawal lic jusuc' ma e cu'an na pacha' ri ubi'im, ma Rire cujiquiba' c'u'x alak y cuchajij c'u alak chwach ritzel winak. ⁴ Cubul c'u kac'u'x che wa': Ruc' ruto'bal ri Kanimajawal, ralak catajin alak che u'anic ri xkatak alak che y jela' ca'an c'u alak chikawach apanok. ⁵ Ec'u ri Kanimajawal Jesucristo cato'w e alak cha' ri rutzil c'u'x alak cu'ana jela' pacha' ri rutzil uc'u'x ri Dios y cha' cach'ij alak uchuk'ab tak ri c'axc'obic ruc' unimal c'u'xaj jela' pacha' xu'an ri Cristo.

Chirajawaxic wi cojchacunic

⁶ Hermanos, chupa rubi' ri Kanimajawal Jesucristo cakatak alak che cha' quesaj ib alak chiquij tak ri hermanos lic e xepu'ab, ri na caquitakej ta ri c'utunic xmaj can alak chikij. ⁷ Lic eta'am c'u alak sa' ri lic chirajawaxic cac'am alak re che ri kabinic kasilabic ri'oj, ma echiri' xojc'oji' uc' alak, lic xojchacunic. ⁸ Na xkatz'onoj taj xa casipax ri kawa, ma ronoje ri xya' chike, xkatojo. Ri xka'ano e lic

* **2:8** "Ruc' ri ch'a'tem": Pa ri ch'a'tem griego cubi'ij "ruc' ri xut'ubal".

xojchacun chipak'ij chichak'ab cha' jela' na coju'an ta oj eka'n chukul junok che alak. ⁹ Wa xka'ano na e ta que'elawi na takal ta chike cojto' alak; ri xka'an wi e cha' camaj e alak chikij. ¹⁰ Ma echiri' c'a oj c'o ne chila' uc' alak, xkatak alak che wa': «We c'o junok na caraj taj cachacunic, na takal ta che catzukic.» ¹¹ Yey wo'ora katom, e c'o jujun chixo'l alak na quechacun tane q'uenok; ri caqui'ano e caquimin quib che tak ri na junta que che. ¹² E tak c'u wa' wa ticawex quekatak che y quekapixabaj pa rubi' ri Kanimajawal Jesucristo: Chechacunok re ch'acabal re ri quiwa* y chec'ola jusuc'.

¹³ Yey ec'u ralak hermanos, macos alak che u'anic ri utz. ¹⁴ We c'o junok na cutakej ta wa cakatz'ibaj pana che alak, k'alajisaj alak chinok y majunimaj ib alak ruc', cha' jela' caq'uix che ri cu'ano y cutzelej utzij. ¹⁵ Pero ma'an alak che tzel quil alak; ri 'ana alak e pixabaj alak ma rire e jun ka hermano.

Q'uisbal uch'a'tem ri Pablo che riglesia c'o Tesalónica

¹⁶ Ec'u ri Kanimajawal, ri aj ya'l utzil chomal, xaki chuya'a pawil alak ri utzil chomal chupa tak ri quic'ow wi alak. C'ola ri Kanimajawal uc' onoje alak.

¹⁷ Ri'in in Pablo, ruc' ri nuk'ab cantz'ibaj wa rutzil wach alak. Jela' can'an che tak ri nucarta, c'utubal re in ri quintz'iban re.

¹⁸ C'ulu c'u alak ri unimal rutzil uc'u'x ri Kanimajawal Jesucristo. Amén.

* **3:12** “Quiwa”: Wa' e que'elawi e ronoje ri cajawax chique.

Ri nabe carta xutz'ibaj ri Pablo che ri Timoteo

Ri Pablo cuya pan rutzil uwach ri Timoteo

¹ Ri'in in Pablo, in tako'n re ri Kanimajawal Jesucristo, intakom lo ruma ri Dios Kacolobenel y ruma ri Kanimajawal Jesucristo, ri kacubam pana kac'u'x ruc'. ² Cantz'ibaj pan wa' wa carta chawe ri'at Timoteo, ri pakatzij wi at nuc'ajol chupa rubi' ri Cristo ma wuma ri'in xacoj rubi' Rire. Chac'ulu c'u ri unimal rutzil c'u'xaj, ri relej c'u'xaj y ri utzil chomal re ri Kakaw Dios y re ri Kanimajawal Jesucristo.

Pixabanic puwi tak ri c'utunic na ube taj

³ C'una chac'u'x ri ximbi'ij can chawe echiri' e ri' quin'ec Macedonia: E catcanaj can chupa ri tinamit Éfeso ma chiri' e c'o jujun ticawex lic junwi ri caquic'utu chwa ri cakac'ut ri'oj. Ximbi'ij c'u can chawe quebatak che na caqui'an ta chi wa'. ⁴ Yey ximbi'ij can chawe cabi'ij chique ri hermanos maquiya ne quina'oj puwi tak ojer tzijobal na petinak ta ruc' ri Dios y tak ri caquibololej quibi' cati-quimam re ojertan, ma tak la' cuc'am lo sachibal na'oj y na cato'b ta che ri caraj cu'an ri Dios kuc', yey wa' cu'ana xew ruma ri cubulibal kac'u'x ruc' Rire.

⁵ Ruc'u'xibal ri cojutak ri Dios che e wa': Lic c'ax cakana' kib chikawach. ✱ Yey cha' caka'an wa' chirajawaxic lic calax pa kanima' caka'an ri utz, cakamaj usuc' sa' ri utz yey e caka'ano, y pakatzij wi cacubi' kac'u'x ruc' Rire.

⁶ No'j e c'o jujun quiya'om can ri caraj ri Dios; xquijalc'atij c'u ri quina'oj y wo'ora xew quech'a't chwi ri na jinta uchac. ⁷ Rique cacaj caqui'an e aj c'utunel che quib chwi Rutzij Upixab ri Dios, tob na caquimaj tane usuc' ri caquibi'ij y

na caquimaj tane usuc' ri c'utunic lic caquijiquiba' uwach.

⁸ Pero ri'oj lic keta'am lic c'o cutikoj Rutzij Upixab ri Dios we jusuc' cakachapabej. ⁹ Keta'am c'ut ri Tzij Pixab na xya'i' taj re cuk'at tzij paquiwi ri jusuc' quibinic quisilabic; ma xya'ic re cuk'at tzij paquiwi ri e aj palajiy tzij y ri na e ta cojol tzij, ri na jinta xi'in ib cuc' chwach ri Dios y ri e aj maquib, ri na quebec ta il che caquilok'nimaj uk'ij ri Dios y ri caquic'ak bi uk'ij ri Dios; ri e camisay quichu-quikaw cuc' ri e camisanel, ¹⁰ ri caquetz'abej uwa quik'ij cuc' jujun chic na quic'ulel taj, rachijab caqui'an quic'ulel chique cach achijab, ri quequichap winak y na quequitzokopij ta ulok we na caya'i' ta puak chique, raj rak'ul, ri c'o caquijiquiba' uwach chupa rubi' ri Dios yey xa rak'ubal ri caqui'ano, cuc' tak c'u conoje ri caquipalajij ri sakil c'utunic re ri Dios. ¹¹ E c'utunic wa' c'o chupa ri chomilaj Utzilaj Tzij re ri Dios. Yey ri Dios, ri lic nim uk'ij, e xya'w wa' panuk'ab ri'in cha' cantzijo.

Ri Pablo cutioxij ri rutzil uc'u'x ri Dios

¹² Ri'in cantioxij che ri Kanimajawal Jesucristo ma uya'om nuchuk'ab cha' can'an ruchac y ma xcubi' uc'u'x wuc' echiri' xuya wa jun chac chwe, ¹³ tob rojertan ri'in lic xinmacun chirij ri Kanimajawal Jesucristo ma xebenuternabej ri quicojom rubi' y lic xebenuya pa tak c'axc'obic. Na ruc' ta c'u ri', ri Dios xjuch' ca'n uc'u'x chwe; ma echiri' xin'an wa', c'amaja' cacubi' nuc'u'x ruc' ri Cristo y na xinmaj ta c'u usuc' we ri can'ano na utz taj. ¹⁴ Yey ri Kanimajawal lic xuc'ut ri unimal rutzil uc'u'x chwe y xuya chwe cacubi' nuc'u'x ruc' y xuya chwe canc'ut ri rutzil uc'u'x Rire; y wa' xew ri Kanimajawal Jesucristo caya'w re.

¹⁵ Ec'u wa cambi'ij lic katzij y lic takal che caquicoj conoje ri ticawex:

✱ 1:5 Ro. 13:8-10; Gl. 5:14

Ri Kanimajawal Jesucristo xc'un che ruwachulew cha' quebolu'colobej conoje raj maquib. Ec'u ri'in in jun chique wa'; yey chinuwach ri'in, in ne ri más c'o numac chiquiwa rique. ¹⁶ Ec'u ri Kanimajawal Jesucristo xuc'ut ri c'axna'bal uc'u'x chwe ri'in ma xucuy numac tob lic in aj mac. Jela' xu'ano cha' cak'alajin ri rutzil uc'u'x chique conoje ri quecojow rubi'. Ma ri xu'an wuc'ri'in e c'utubal re ri cu'an cuc'ri cacubi' quic'u'x ruc' Rire, cucuy c'u quimac y cuya quic'aslemal na jinta utakexic.

¹⁷ Ruma c'u wa', kalok'nimaj uk'ij ri Dios wak'ij ora y chikawach apanok. Ma ri Dios Kajawxel

na jinta utakexic rutakanic,
na jinta utakexic ruc'aslemal,
na quilijaj ta uwach,
xew Rire e Dios
y reta'am ronoje.

Lic c'o yacbal uk'ij y unimal uchomalil.

¹⁸ Wo'ora Timoteo, canya wa takanic chawe ri'at at nuc'ajol chupa rubi' ri Cristo: Chachuk'ubej awib chupa ri chac ya'om pak'ab e chirij ri xk'alajisax paw'i ri'at chwi rachac chwach ri Dios. ¹⁹ Chatiquiba' c'u ri cubulibal ac'u'x ruc'ri Cristo y chamaja usuc' sa'ri utz y e cha'ana ri'. Ma e c'o jujun na xqui'an ta wa', y ruma c'u ri' xsach ri cubulibal quic'u'x ruc'ri Cristo y na caquicoj ta chi ne ri K'ijsak. ²⁰ Jenewa' xqui'an ri Himeneo y ri Alejandro. Ruma c'u ri', xebenuya puk'ab ri Satanás cha' caquitij c'ax y jela' caquimaj usuc' na utz taj quech'a't chirij ri K'ijsak re ri Dios.

2

Pixabanic chwi ri oración

¹ Cantz'onoj c'u chawe chabi'ij wa' che rutinamit ri Dios: Lic chirajawaxic wi caka'an orar chwach ri Dios. Echiri' cojch'a't ruc', e chojelaj chwach Rire paquiwi conoje ri ticawex cha' cuya chique ri lic cajawax che ri quibinic quisilabic, yey katioxij ronoje che. ² Ka'ana

orar paquiwi tak ri e takanelab y paquiwi conoje tak ri e aj wach che ruwachulew cha' jela' utz coj-jeki' chi utzil chomal y cojbin jusuc' ruc' jun sakil binic silabic chwach ri Dios. ³ Lic c'u ka'ana orar ma wa' e lic utz y e cuc'ul uc'u'x ri Dios Kacolobenel, ⁴ ma ri caraj Rire e quecolobetaj conoje ri ticawex y caqueta'maj chi utz ri K'ijsak. ⁵ Ma xa jun ri Dios c'olic yey xa jun ri c'o puk'ab cach'aw pakawi' chwach ri Dios; wa' e ri Kanimajawal Jesucristo, Ralaxel Chiquixo'l Ticawex. ⁶ Rire xuya rib pa camic kuma ri'oj oj ticawex cha' cutoj ri kamac y cojresaj puk'ab Ritzel; yey wa' xk'alajisax pa ruk'ijol uch'obom chi lo ri Dios. ⁷ E ruma wa', ri'in in cha'tal lo ruma ri Dios re cantzijoj ri Utzilaj Tzij y quinu'an c'u in tako'n yey in c'utunel chiquiwach ri na e ta aj Israel cha' jela' cacubi' quic'u'x rique ruc'ri Cristo y caquicoj ri K'ijsak. Lic katzij wa cambi'ij che alak, ma in re ri Cristo y na can'an ta rak'ubal.

⁸ Ri cuaj ri'in e conoje tak rachijab, tob pa e c'o wi, xaki qui'ana orar chwach ri Dios. Yey echiri' caquiyac c'u ri quik'ab re caqui'an orar, ri lic chirajawaxic wi e jusuc'ri quibinic quisilabic, na jinta oyowal pa canima' y na quech'o'jin ta chiquiwach.

Pixabanic chwi ri sakil quibinic rixokib

⁹ Ri nupixabanic chique tak rixokib e quiwika quib chi usuc'liquil. Maquic'ut c'u ri quicuerpo yey maquiwik quib xa re yacbal quik'ij. Ma ¿sa'ri cu'an chom che rixok? ¿E nawi ri wikital ruc' oro y ruc' perlas? ¿E nawi uchomalil la' ri quiwikibal? Na e taj, ¹⁰ ma ri quichomalil e ri chomilaj chac caqui'an chwach ri Dios, jela' pacha' ri takal chique rixokib caquilok'nimaj uk'ij Rire.

¹¹ Echiri' cac'ut Rutzij Upixab ri Dios chiquiwach rixokib, lic chirajawaxic rique xew caquito y maquic'ul uwach. ¹² Ri'in na canya ta luwar chique rixokib quebu'an

✧ 1:18 1 Ti. 4:14

e aj c'utunel chiquiwach rachijab o quetakan paquiwi'; ma ri lic ube e xa caquito. ¹³ Ma ri Dios nabe e xu'an ri Adán, tec'uchiri' xu'an ri Eva. ¹⁴ Yey na e ta ri Adán ri xsocotaj nabe ruma ritzel, e ri Eva; y echiri' xsocotajic, e xupalajij rutzij ri Dios. ¹⁵ Na ruc' ta c'u ri', ri Dios quebucolobej rixokib y cuya calc'o'al cha' quequiq'uiyisaj. Quecolobetaj c'u ri' we quetiqui' chi utz ruc' ri cubulibal quic'u'x, ri rutzil quic'u'x y ri santowilaj quibinic.

3

Pixabanic puwi ri quibinic quisilabic raj c'amal quiwach rutinamit ri Dios

¹ Lic usuc' wa cambi'ij: We c'o junok lic caraj cu'an aj c'amal quiwach rutinamit ri Dios, ri' lic chomilaj chac ri curayij. ² Pero lic chirajawaxic che juna aj c'amal quiwach rutinamit ri Dios e jusuc' rubinic usilabic cha' na jinta c'o cach'a'tiben re. E c'ola jusuc' ruc' ri rixokil, lic chuch'obo chi utz ri cu'ano, chuchajij rib chiribil rib cha' na catzak ta pa mac y chom quilataj rubinic cuma ri jujun chic. Xaki chebuc'ulu chi utz tak ri quebopon chirocho, y c'ola una'oj che uc'utic Rutzij Upixab ri Dios. ³ Lic chirajawaxic che na k'aba'rel taj, na aj ch'a'oj taj, na rayinel ta re puak cach'ac ruc' socoso'nic, na que'ec ta uc'u'x ruc' ri puak; ma ri chirajawaxic wi e lic utz uc'u'x y ch'u'ch'uj uc'u'x. ⁴ Chu'ana ri sakil takanic pa rocho; chuc'utu c'u chique ri ralc'o'al cha' quebu'an e cojol tzij y jec'ula' quec'oji' chi jusuc'. ⁵ Ma e ri na curik ta cu'an sakil takanic pa rocho, ¿su'anic c'u ri' quebuchajij chi utz rutinamit ri Dios?

⁶ Na utz taj we c'o junok c'ac' ucojom ri Utzilaj Tzij yey cacojic aj wach chupa riglesia, ma c'axtaj cu'an nim che rib y cak'at c'u tzij puwi' jela' pacha' ri xuc'ulumaj ritzel winak ruma xu'an nim che rib. ⁷ Ri lic chirajawaxic wi e chom rubinic usilabic chiquiwach tak ri na quicojom

ta rubi' ri Kanimajawal Jesucristo, cha' na jinta junok cac'akaw bi uk'ij y na catzak ta chupa juna pajtajibal re ritzel winak.

Pixabanic puwi ri quibinic quisilabic raj chaquib e to'bel piglesia

⁸ Jec'ula' raj chaquib e to'bel piglesia lic chirajawaxic chique e jusuc' ri quibinic quisilabic, na xa ta queb quipalaj, na e ta k'aba'relab, na e ta rayinel re puak cach'ac ruc' socoso'nic. ⁹ Chirajawaxic caquitakej ri sakil c'utunic uk'alajisam ri Dios yey caquina' pa canima' utz qui'anom chwach Rire. ¹⁰ Nabe na chirajawaxic cac'am quipa cha' cak'alajinic we lic jusuc' ri quibinic quisilabic; tec'uchiri' utz quebu'an aj chaquib e to'bel piglesia.

¹¹ Jec'ula', chirajawaxic chique rixokib e jusuc' ri quibinic quisilabic, na e ta aj molot, lic caquich'ob chi utz ri caqui'ano y caqui'an chi utz ronoje ri takal chique.

¹² Ec'u rachi aj chac to'bel piglesia, lic chirajawaxic c'ola jusuc' ruc' ri rixokil y chu'ana sakil takanic paquiwi tak ri ralc'o'al y paquiwi conoje tak ri e c'o pa ri rocho. ¹³ We cu'an c'u chi utz ruchac, catac'abax uk'ij chiquiwach ri ticawex y canimar uc'u'x che uk'alajisaxic ri cubulibal uc'u'x ruc' ri Kanimajawal Jesucristo.

Ruc'u'xibal ri Utzilaj Tzij puwi ri Kanimajawal Jesucristo

¹⁴ Ri'in lic nucubam pan nuc'u'x qui'nwila tan awach Timoteo, pero cantz'ibaj na pan wa' chawe ¹⁵ cha' we xinmayin che awilic, chaweta'maj sa' ri sakil binic silabic chirajawaxic chique ri e re ri Dios; ma rique e utinamit ri Dios c'aslic yey rutinamit e chapayom re y e catiquiban re ri K'ijisak. ¹⁶ Pakatzij wi lic nim uk'ij ri K'ijisak re ri Dios k'alajisam chikawach:

E ri Kanimajawal Jesucristo xu'an
ticawex
echiri' xc'un che ruwachulew.

☆ 3:6 Is. 14:12-14

Ronoje ri xu'ano y ri xubi'ij e lic jusuc'
y ri Ruxlabixel ri Dios e
xk'alajisan re wa'.[☆]

Xilitaj cuma ri ángeles.

Xtzijox rubi' chique ruq'uiyal qui-
wach tak ri ticawex che
ruwachulew

y e q'ui ri xquicoj rubi'.

Yey xc'ul tanchi chila' chicaj ruc'
yacbal uk'ij.

4

Takri caquesaj quib chirij ri K'ijsak

¹ Ri Ruxlabixel ri Dios uk'alajisam
chi utz copon na ruk'ijol echiri' e c'o
jujun ticawex caquiya can ri K'ijsak
re ri Dios cha' caquitakej c'utunic
petinak cuc' tak ri itzel uxlabixel e
socoson'nel. ² Rique e quequitakej ri
winak xa queb quipalaj y e aj rak'ul,
ri lic u'anom chi ach'i'y ri quina'oj.
³ Wa' e ri quequitak tak ri winak cha'
na quec'uli' taj y cha' na caquitij ta
jujun wa'im tob wa' e ri Dios xu'ano
re catijic; ec'u ri'oj, ri keta'am y ka-
cojom ri K'ijsak, utz cakac'ul wa' ruc'
tioxibal. ⁴ Ma ronoje ri 'anatal ruma
ri Dios, lic chom; na utz ta c'u ri'
we cakac'ak bi uk'ij ri cuya ri Dios
chike. Ri ka'ana' e kac'ulu ruc' tiox-
ibal. ⁵ Ma Ruch'a'tem ri Dios cubi'ij
ronoje ri cuya Rire chike lic chom;[☆]
yey echiri' cakatioxij wa' chwach ri
Dios, coju'an xa oj jun ruc' Rire che
ubi'xiqul: Ronoje lic chom.

Jun utzilaj aj chac re ri Kanima- jawal Jesucristo

⁶ We ri'at cac'ut chique rutinamit
ri Dios wa cantz'ibaj pan chawe, ri'
catu'ana jun utzilaj aj chac re ri Kan-
imajawal Jesucristo; ma wa Utzilaj
Tzij acojom y ri sakil c'utunic atakem
e caya'w achuk'ab chwach ri Dios.
⁷ Matoc c'u il che tak ri ojer tzijobal
na ruc' ta ri Dios petinak wi, ma
wa' xa no'jibal que winak.[☆] E chati-
joj awib che jun sakil binic silabic
chwach ri Dios. ⁸ Ma we cakatij
uk'ij cac'oji' uchuk'ab ri kacuerdo,

utz c'u ri'; pero wa' xa jok'otaj co-
juto'o. No'j we e cakaya kib che
jun sakil binic silabic chwach ri Dios,
wa' lic utz che ronoje, ma c'o cu-
tikoj che ri kac'aslemal wak'ij ora y
chikawach apanok. ⁹ Wa cambi'ij lic
katzij y lic takal che caquicoj conoje
ri ticawex. ¹⁰ Ruma c'u wa' cojcha-
cunic y cakatij tak c'axc'obic, ma
cubul pan kac'u'x ruc' ri Dios c'aslic,
ri cacoloben que tak ri ticawex che
ruwachulew; y pakatzij wi, e que-
bucolobej conoje ri cacubi' quic'u'x
ruc' ri Cristo. ¹¹ Janipa c'u ri nubi'im
chawe, e chac'utu ri' chiquiwach ri
quicojom rubi' ri Cristo y chabi'ij
chique e lic caquitakej wa'.

¹² Maya luwar che junok cuc'ak
bi ak'ij ruma c'a at ala. E chac'utu
ri lic ube chiquiwach ri quicojom
rubi' ri Cristo, yey cha'ana wa' ruc'
rach'a'tem, ruc' rabinic asilabic, ruc'
ri rutzil ac'u'x, ruc' ri cubulibal
ac'u'x y ruc' ri sakil ana'oj. ¹³ Xalok'
c'u c'amaja' quinoponic, e chaya'a
awib che rajilaxic Ruch'a'tem ri Dios
y che u'anic pixabanic y c'utunic
chiquiwach riglesia. ¹⁴ Mawok'otaj
uya'ic ri ya'tal chawe ruma ri Dios,
ri xk'alajisax paw'i ri'at echiri' ri e
aj wach re riglesia xquiya ri quik'ab
paw'i. ¹⁵ Chaya'a c'u awib che tak
wa': Cha'ana janipa ri amajom
chic cha' jela' conoje caquilo jalan
utz ri chac cat-tajin che u'anic.
¹⁶ Lic chachajij awib che rabinic
asilabic y che uc'utic ri sakil c'utunic.
Chachuk'ubej awib che u'anic tak
wa', ma jela' ri'at y ri quetaw awe
quixcolobetaj che ri k'atbal tzij re ri
Dios.

5

Ru'anic ca'an pixabanic chiqui- wach rutinamit ri Dios

¹ Echiri' ca'an pixabanic, mayaj
juna achi nimalaj winak chic; ri
cha'ana e chapixabaj pacha' chi
akaw; yey chebapixabaj ralabo
pacha' chi e awatz o e achak' ² y

rixokib e nimak winak pacha' chi e achu. Yey ruc' sakil ana'oj chebapix-abaj ralito pacha' chi e awanab.

Ru'anic queto' rixokib e malca'nib

³ Tak rixokib e malca'nib, ri pakatzij wi na jinta cato'w que, chirajawaxic wi queto' ruma rutinamit ri Dios. ⁴ No'j we c'o juna ixok malca'n yey e c'o ralc'o'al o e c'o tak umam, ri' e rique ri lic chirajawaxic quequichajij chi utz ri quifamilia y quequito' ri quichu malca'nib o ri cati' malca'nib, ma wa' e pacha' rajil uc'axel chique ri xeq'uiyisan que, yey wa' e lic utz y e cuc'ul uc'u'x ri Dios. ⁵ No'j chirajawaxic c'ut e riglesia cato'w que rixokib e malca'nib, ri pakatzij wi na jinta chi quifamilia y na jinta c'u junok cato'w que, yey wa' e tak ri lic quicubam pan quic'u'x ruc' ri Dios y lic quiya'om quib che u'anic orar chipak'ij chichak'ab. ⁶ No'j e juna ixok malca'n we xew e que'ec uc'u'x che u'anic ri caraj rire, ri' pacha' caminak chi chwach ri Dios tob ne c'aslic, y na takal ta c'u ri' che cato'ic. ⁷ E chebataka c'u riglesia che u'anic tak wa cambi'ij chawe cha' chom quilital ri quibinic quisilabic chiquiwach ri jujun chic. ⁸ Lic c'u chirajawaxic ri' che junok quebuto' tak ri ratz-uchak' e c'o chux che, y más ne chirajawaxic cu'an wa' chique rufamilia.* Ma e junok na cu'an ta wa', ri' na takal ta che cubi'ij e cuq'u'il ri e re ri Cristo, yey más ne c'o umac ri' chiquiwa ri na quicojom ta rubi' ri Cristo, ma e ne rique quequichajij ri quifamilias.

⁹ Chupa ri wuj pa tz'ibital wi tak ri bi'aj que rixokib e malca'nib queto'ic, xew catz'ibax rubi' rixok uq'uisom chi sesenta junab, we jusuc' xc'o'ji' ruc' ri rachijil, ¹⁰ we chom ruch'a'tibexic ca'an chwi tak ri chac u'anom, wa' e ebuq'uiyisam chi utz ri ralc'o'al, ebuc'ulum chi utz ri hermanos quebopon chirocho y

uch'ajom ne ri cakan,* ebuto'om tak ri e c'o pa c'axc'obic y lic c'u u'anom utzilaj tak chac.

¹¹ No'j tak ri malca'nib c'a e c'ac'al, matz'ibax ri quibi' ma c'axtaj ruma ri quirayibal xew caquitzucuj quec'uli' tanchic y caquesaj c'u quib chirij ri Cristo. ¹² Jec'ula' e caquekelej ri k'atbal tzij paquiwi' ruma na xqui'an taj janipa ri quibi'im caqui'ano.† ¹³ Quebu'an c'u e xepu'ab y xaki quek'e'cot chi'tak ja. Yey na xew ta quebu'an e xepu'ab, ma quebu'an ne e aj molot, xaki caquimin quib che ri na jinta que che y e xaki caquitzijoj ri na takal ta chique caquibi'ij. ¹⁴ E uwari'che ri'in cambi'ij chique ri e malca'nib c'a e c'ac'al, chec'uli'ok, chequiq'uiyisaj ri calc'o'al y e quila' c'ut janipa ri chirajawaxic ca'an pa cocho cha' jela' ri tzel quebilow re ri Cristo na jinta c'o caquich'a'tibej chiquij rutinamit Rire. ¹⁵ Ma e c'o ne jujun chique wa' wa malca'nib na quitakem ta chi ri Cristo, ma e quitakem ri Satanás.

¹⁶ We c'o junok ucojom rubi' ri Cristo yey e c'o ixokib malca'nib chique rufamilia, ri' chirajawaxic che chebuto'o' cha' na cuya ta alc'ayew che riglesia, y jec'ula' riglesia xew quebuto' ri malca'nib pakatzij wi na jinta cato'w que.

Pixabanic paquiwi ri e aj wach re riglesia

¹⁷ Chique conoje ri e aj wach re riglesia, ri quic'amom uwach chi utz rutinamit ri Dios, chirajawaxic ca'an cuc' janipa ri takal chique ruma ri chac caqui'ano; y e ne más chirajawaxic ca'an wa' cuc' ri ya'tal paquik'ab quetzijonic y quec'utunic. ¹⁸ Ma jewa' tz'ibital can chupa Rutzij Upixab ri Dios: «Macoj bozal che ri boyex echiri' cukil uwi ri trigo, ma takal che catzukic.»* Y cubi'ij: «E

* **5:8** Éx. 20:12 * **5:10** "Uch'ajom ne ri cakan": Ojertan caqui'an wa' ruma rulew coc che ri cakan pa be. † **5:12** "Janipa ri quibi'im caqui'ano": Ri malca'nib xeto' ruma riglesia, xqui'an jun tzij na quec'uli' taj y caquiya c'u quib chupa ruchac ri Dios piglesia. * **5:18** Dt. 25:4 * **5:18** Jer. 22:13; Lc. 10:7; 1 Co. 9:14

junok cachacunic, lic takal che catojic.»[☆]

19 Echiri' c'o junok cutz'ak uchi' juna aj wach re riglesia; macoj ne wa' we na e jinta ca'ibok o oxibok caquijiquiba' uwach rumac. 20 We c'o juna aj wach re riglesia na caraj taj carok'otaj can rumac, chach'a'bej upa chiquiwach conoje cha' jela' coc xi'in ib cuc' riglesia. 21 Chwach c'u ri Dios y chwach ri Kanimajawal Jesucristo y chiquiwach ri ángeles re ri Dios ri echa'talic re caquilok'nimaj Rire, cambi'ij c'u chawe cha'ana tak wa' chi jusuc' cuc' conoje tob e chinok y na xa ta catcha'wic. 22 Ma'an tan aj wach re riglesia che junok[†] we c'amaja' awilom chi utz ri jusuc' ubinic,[☆] ma amac c'u ri' ri'at we rire cu'an ri na utz taj chupa ri chac re ri Dios. Lic chachajij c'u awib ri'at chwach ronoje ri na utz taj.

23 Ruma c'u lic cuya c'ax pamaj chawe, matij xew jorona', utz we e cach'urij c'ana vino ruc' ri jorona' catijo.

24 Lic chirajawaxic caweta'maj chi utz rubinic usilabic china ri cacojo re aj wach re riglesia. Ma e c'o jujun achijab lic k'alaj ri quimac tob c'amaja' ne cak'at tzij paquiwi'; pero e c'o jujun chic c'unaj cak'alajin ri quimac. 25 Jec'uri'la', e c'o ri lic cak'alajin ri chomilaj chac caqui'ano; pero e c'o jujun chic caqui'an chomilaj tak chac, yey wa' camayin reta'maxic. Na ruc' ta c'u ri', copon ri k'ij quel lo chi sak.

6

Pixabanic chique raj chac e c'o paquik'ab quipatrón

1 Conoje raj chac e c'o puk'ab juna patrón* e lic quilok'oj uk'ij ri quipatrón che ronoje ri caqui'ano, cha' jela' na jinta junok tzel cach'a't chirij rubi' ri Dios y chirij ri sakil c'utunic. 2 Yey we juna aj chac c'o upatrón ucojom

chi rubi' ri Cristo, much'obo: «Na chirajawaxic taj can'an ri caraj ri nupatrón ma junam kawach kachak' kib chwach ri Dios.» Na ube taj cuch'ob rakan wa'; ri lic usuc' e chu'ana más chi utz ruchac ma ri cunimaj e jun ucojom rubi' ri Cristo y takal c'u ri che c'ax cana'ic. Wa' e c'utunic y pixabanic cha'ana ri'at chique ri e aj chac.

Tak ri que'ec quic'u'x ruc' ri beyomal xa re ruwachulew

3 We c'o junok junwi ri cuc'utu y na junam ta runa'oj ruc' ri sakil c'utunic re ri Kanimajawal Jesucristo y ruc' ri sakil binic chwach ri Dios, 4 ri' na jinta reta'am tob cuch'obo lic c'o una'oj. E ne lic que'ec una'oj chwi tak ch'a'tem na jinta uchac, xa re sachibal na'oj. Y tak wa' cuc'am lo retzelal c'u'x, ch'a'oj, c'axlaj ch'a'tem chiquij jujun chic y na'oj na ube taj chiquij jujun chic. 5 Ruma c'u wa', e tak ri winak sachinak quina'oj y na jinta ri K'ijisak cuc', xaki caquitzucuj ch'a'oj chiquiwach. Rique caquich'obo, ri c'aslemal chwach ri Dios e re cu'an beyomab chique. Ma'an c'u awe'at cuc'.

6 Pakatzij wi lic c'o cutikoj ri kac'aslemal chwach ri Dios, pero xew we cojqui'cot ruc' ri c'o kuc'. 7 Ma na jinta kuc'a'am lok echiri' cojalax wara che ruwachulew y pakatzij wi na jinta cakac'am bi echiri' cojcamic. 8 E uwari'che we c'o kawa y c'o kak'u', e chojqui'cota ruc' wa'. 9 No'j tak ri lic caquirayij quebu'an e beyomab, ri' lic na c'ayew ta chique quetzak puk'ab ritzel y quechapataj ruma uq'uiyal rayinic na jinta uchac. Yey wa' xew cuc'am lo uq'uiyal c'axc'obic paquiwi rique wo'ora y chikawach apanok. 10 Ma ri rayinic re ri puak e cuc'am lo uq'uiyal tak mac. E c'o ne jujun lic e benak quic'u'x ruc' ri puak y ruma wa' quiya'om can ri cubulibal quic'u'x ruc' ri Cristo, y

[†] 5:22 Pa ri ch'a'tem griego cubi'ij: "Maya tan rak'ab puwi junok". 1 Ti. 4:14 [☆] 5:22 1 Ti. 3:6, 10

* 6:1 "Raj chac e c'o puk'ab juna patrón": Quil "esclavo" pa vocabulario.

jec'ula' quituquel quiya'om quib pa c'axc'obic.

Pixabanic che ri Timoteo

¹¹ No'j ri'at Timoteo, at jun raj chac ri Dios, chatanimaja c'u chwach ronoje tak ri na utz taj. E chatiyoj awib che u'anic ri jusuc' y ri utz chwach ri Dios, cubula ac'u'x ruc', chac'utu ri rutzil c'u'xaj, c'ola unimal c'u'xaj awuc' y cha'ana ch'uti'n che awib. ¹² Chachuk'ubej awib chi utz chupa ri Utzilaj Tzij acojom y e chatoc il che ri c'aslemal na jinta utakexic, ma ruma wa' xatusiq'uij ri Dios y ruma wa' chiquiwach uq'uiyal ticawex xak'alajisaj ri cubulibal ac'u'x ruc' ri Cristo. ¹³ Chupa c'u rubi' ri Dios, ri aj ya'l c'aslemal che ronoje tak ri c'olic, y chupa rubi' ri Kanimajawal Jesucristo, ri na xuxi'ij ta rib che uk'alajisaxic ri K'ijsak echiri' c'o chwach ri aj k'atal tzij Poncio Pilato,✧ catintak che wa': ¹⁴ Cha'ana c'u chi jusuc' janipa ri catutak ri Dios che cha' na jinta c'ana mac carikitaj chawe echiri' cac'un tanchi lo ri Kanimajawal Jesucristo.

¹⁵ Cac'un c'u ri Jesús chupa ri k'ij cha'tal chi lo ruma ri Dios. Lic nim uk'ij ri Dios Kajawxel, ri c'o ronoje takanic puk'ab, ri Takanel paquiwi conoje ri takanelab, ri Cajawal que conoje ri e aj wach.

¹⁶ Xew Rire na jinta jekebal re y na jinta q'uisbal re, ma ruc'aslemal na jinta utakexic. Rire jekel pa K'ijsak y ruma ruwonibal na jinta junok cakib ruc'. Na jinta juna ticawex iliyom uwach y na jinta junok cach'ijow rilic uwach. Xew c'u che Rire lic takalic cayac uk'ij y xew puk'ab Rire c'o wi cu'an takanic na jinta utakexic. ¡Amén!

¹⁷ Chabi'ij c'u chique conoje tak ri beyomab che ruwachulew maqui'an nim che quib, macubi' quic'u'x ruc' ri quibeyomal ma wa' xa caq'uisic; e cubula quic'u'x ruc' ri Dios c'aslic,

ri caya'w re ronoje ri cajawax chike cha' cojq'ui'cot ruc'. ¹⁸ Chebataka che qui'ana ri utz cha' jela' cac'o'ji' quibeyomalil chwach ri Dios. Qui'ana c'u uq'uiyal chomilaj tak chac, chesipanok y chequito'o ri na jinta c'o cuc'. ¹⁹ Jec'ula' ri' e quetajin che uc'olic chila' chicaj ri beyomalil na caq'uis taj, yey lic jiquil uwach caquic'ul wa' chikawach apanok y caquirik quic'aslemal na jinta utakexic.

Q'uisbal uch'a'tem ri Pablo che ri Timoteo

²⁰ Timoteo, chachajij chi utz janipa ri ya'tal pak'ab; maya axiquin che tak ch'a'tem na jinta c'o cutikoj che rabinic asilabic chwach ri Dios y maya axiquin che c'utunic cabi'x che lic cuya na'oj tob na e ta c'u ri'. ²¹ Ma e c'o jujun ruma quicojom tak wa', e xquiya can ri be re ri K'ijsak.

Chic'ulu iwonoje ri'ix ri unimal rutzil uc'u'x ri Dios. Amén.

✧ 6:13 Jn. 18:37; 19:10-11

Ruca'm carta xutz'ibaj ri Pablo che ri Timoteo

Ri Pablo cuya pan rutzil uwach ri Timoteo

¹ Ri'in in Pablo, in tako'n re ri Kanimajawal Jesucristo ma e xraj ri' ri Dios chwe cantzijos ri c'aslemal bi'tisim chique ri caquiya quib puk'ab ri Kanimajawal Jesucristo. ² Cantz'ibaj pan wa' wa carta chawe ri'at Timoteo. Ri'in lic c'ax catinna'o ma at pacha' nuc'ajol chupa rubi' ri Cristo. Chac'ulu c'u ri unimal rutzil c'u'xaj, ri relej c'u'xaj y ri utzil chomal re ri Kakaw Dios y re ri Kanimajawal Jesucristo.

Ri Pablo cupixabaj ri Timoteo che utzijoxic ri Utzilaj Tzij

³ Lic quintioxin chwach ri Dios, ri canlok'nimaj jela' pacha' xqui'an lo ri wati'-numam ojertan yey lic cuna' nuc'u'x utz nu'anom chwach Rire. Yey echiri' can'an orar chipak'ij chichak'ab xaki catc'un chinuc'u'x. ⁴ E cac'un chinuc'u'x rok'ej xa'ano echiri' xatcanaj canok y lic cuaj c'ut canwil awach cha' jela' caqui'cot ri wanima'. ⁵ Yey cac'un chinuc'u'x ri sakil cubulibal ac'u'x ruc' ri Kanimajawal Jesucristo; ma wa' nabe xc'oji' ruc' rawati' Loida y rachu Eunice, y wo'ora lic k'alaj e ne c'o awuc' ri'at.

⁶ E uwari'che lic catimpixabaj puwi ri uya'om ri Dios chawe, ^{*} wa' e ri xac'ulu echiri' xinya ri nuk'ab pawil cha' catu'an at aj chac re ri Dios. Lic c'u chachuk'ubej awib che u'anic wa' ruc' ronoje ac'u'x. ⁷ Ma ri Dios na uya'om ta ri Ruxlabixel chike cha' coju'an oj turun; e uya'om chike cha' cac'oji' kachuk'ab, rutzil kac'u'x y sakil kana'oj. ⁸ E uwari'che, matq'uiux che utzijoxic ri Utzilaj Tzij re ri Kanimajawal Jesucristo y matq'uiux ne chwe ri'in ma in c'o pa cárcel ruma cantzijos ri Utzilaj Tzij. Ec'u ri'at, e chacuyu tak ri c'axc'obic

cape pakawi' ruma rutzijoxic wa', chach'ija c'u ronoje ruc' ruchuk'ab ri Dios.

⁹ E ri Dios xcoloben ke'oj y xojusiq'uij cha' cojc'oji' jusuc' chwach; yey wa' na e ta ruma ri ka'anom ri'oj, ma e ruma lic e xraj ri' Rire chike. Echiri' c'amaja' ne cu'an ruwachulew, uch'obom chic cuya ri unimal rutzil uc'u'x chike ruma ri Kanimajawal Jesucristo. ¹⁰ Y wo'ora uc'utum chi ri rutzil uc'u'x chike ma xutak lo ri Kanimajawal Jesucristo re cojucolobej. Rire xuch'ij uchuk'ab ri camic y jec'ula' xuk'alajisaj c'o c'aslemal na jinta utakexic chique ri quicojom ri Utzilaj Tzij.

¹¹ Yey ri'in in cha'tal lo ruma ri Dios re cantzijos wa Utzilaj Tzij y re quinu'an in tako'n y c'utunel chiquiwach ri uq'uiyal quiwach tak ri ticawex. ¹² E uwari'che ri'in cantij ronoje tak wa c'axc'obic in c'o wi y na quinq'uiux ta c'u che, ma lic weta'am china ruc' cubul wi nuc'u'x, yey lic jiquil nuc'u'x che e Rire lic c'o uchuk'ab che uchajixic ri uya'om panuk'ab c'a che ruc'unibal ri Cristo.

¹³ E lic chac'utu chiquiwach ri ticawex ri sakil c'utunic atom ri'at chwe; cha'ana wa' ruc' ri cubulibal c'u'xaj y ri rutzil c'u'xaj arikom ruc' ri Kanimajawal Jesucristo. ¹⁴ Ruc' ruto'bal ri Santowilaj Ruxlabixel ri Dios c'o pa kanima', lic chachajij chi utz ri ya'tal chawe ruma ri Dios.

¹⁵ Ri'at lic aweta'am, e q'ui ri kachbi'il e aj Asia xincok'otaj canok, y chiquixo'l rique c'o ri Figelo y ri Hermógenes. ¹⁶ No'j ri Onesíforo na xinrok'otaj taj. Chuc'utu c'u ri Kanimajawal Jesucristo ri rutzil uc'u'x che rire y chique tak ri e c'o pa rocho, ma rire uq'uiyal laj xubochi'ij nuc'u'x y na xq'uiux ta chwe tob in c'o pa carena chupa ri cárcel. ¹⁷ Y echiri' xc'un wara Roma, lic xoc il che nutzucuxic pa in c'o wi y xinuriko. ¹⁸ Yey aweta'am ne ri'at, rire lic xojuto'o echiri' oj c'o chupa ri tinamit Éfeso. E uwari'che cantz'onoj che ri

^{*} 1:6 1 Co. 12:4-11

Kanimajawal chuya'a ri rajil uc'axel che ri Onesíforo chupa ri q'uisbal k'ij.

2

Ri Pablo cupixabaj ri Timoteo cha' cuchuk'ubej rib chwach tak ri c'axc'obic

¹ Timoteo, ri at pacha' nuc'ajol chupa rubi' ri Cristo. Cambi'ij c'u chawe lic chachuk'ubej awib che u'anic ronoje ri ya'om chawe ruma ri unimal rutzil uc'u'x ri Kanimajawal Jesucristo. ² Janipa c'u ratom chwe chwi ri c'utunic nu'anom chiquiwach ruq'uoyal winak, e chak'atisaj ri' paquik'ab rachijab cubul ac'u'x cuc' ruma caquirik uc'utic wa' chiquiwach ri jujun chic.

³ Ec'u ri'at, chacuyu ronoje ri c'axc'obic cape pawil pacha' cu'an juna sakil soldado re ri Kanimajawal Jesucristo. ⁴ Ma juna sakil soldado na carok'otaj ta can ri takom che cha' e que'ec che u'anic ri caraj rire; ri cu'ano e xew lic coc il che ri chac ya'tal puk'ab ruma rutakanel. ⁵ Jec'ula', junok cac'alalic* na cuch'ac ta ri' ri premio we na cac'alal ta e chirij rusuc' pacha' ri cutz'onoj wa etz'anem. ⁶ Jec'uri'la', juna aj chac xew cu'an molonic we nabe na cuchacuj rulew. ⁷ Timoteo, lic chach'obo rakan wa cambi'ij chawe; we ca'an wa', ri Kanimajawal cuya ana'oj cha' camaj usuc' ronoje.

⁸ E c'una chac'u'x ronoje ri xric'owibej ri Kanimajawal Jesucristo, ri xupetebej lo che ri rey David y ri xc'astaj lo chiquixo'l tak ri ecaminak jela' pacha' ri cubi'ij ri Utzilaj Tzij cantzijos ri'in. ⁹ Yey e ruma cantzijos wa Utzilaj Tzij, in c'o pa c'axc'obic yey inya'om pa cárcel pacha' in jun achi lic in aj palajiy tzij. Tob c'u ri'in inya'om pa carena, ri Utzilaj Tzij re ri Dios na yututal taj, ma xaki que'ec utzijoxic.

¹⁰ Canch'ij c'u uchuk'ab ronoje ri c'axc'obic cape panuwi' xa ruma c'ax quebenuna' tak ri ebucha'om ri Dios, cha' rique caquirik ri colobetajic na jinta utakexic, ri caya'i' chique ri cacubi' quic'u'x ruc' ri Kanimajawal Jesucristo.

¹¹ Wa' wa ch'a'tem lic katzij:

We xojcam ruc' ri Cristo,†
cojc'asi' na ri' ruc' Rire.

¹² We cakach'ij uchuk'ab ri c'axc'obic ruma Rire,
chikawach apanok cojtakan ruc'
Rire chila' chicaj.

No'j we ri'oj cakabi'ij na oj ta re Rire,
jela' cu'an Rire kuc' chikawach
apanok,
cubi'ij c'u ri' na reta'am ta
kawach.

¹³ We ri'oj na cacubi' ta kac'u'x ruc';
na ruc' ta c'u ri', Rire lic e cu'an
janipa ri ubi'im canok,
ma Rire na cu'an ta c'ana
rak'ubal.

Ri jusuc' quibinic quisilabic ri quicojom rubi' ri Cristo

¹⁴ Chacuxtaj wa' chique ri e raj chac ri Dios y lic chebapixabaj pa rubi' Rire, cha' mech'o'jin chwi tak ch'a'tem na jinta utz cuc'am lok, ma xew cuc'am lo sachibal na'oj chique ri quetaw re. ¹⁵ Ri'at lic chachuk'ubej awib cha' lic jusuc' rabinic asilabic chwach ri Dios y jela' at jun aj chac na jinta c'o catq'uix che, e xaki catzijos chi jusuc' ri Tzij re ri K'ijsak. ¹⁶ Ma'an awe'at cuc' ri quech'a't chwi tak ri na re ta ri Dios y na jinta uchac. Ma ri que'anaw re wa', e quetajin che resaxic quib chirij ri Dios. ¹⁷ Yey ri quich'a'tem cusachisaj ri quina'oj tak ri quetaw re, e pacha' juna yabil cak'ayisanic. Y e xqui'an wa' ri Hime-neo y ri Fileto. ¹⁸ Rique xquiya can ri K'ijsak ma caquibi'ij ri c'astajibal que ri e re ri Cristo, ya xu'ano.‡ Ruma c'u ri caquic'ut rique, e c'o jujun catajin

* **2:5** Ri ch'a'tem pa ri ch'a'tem griego e “atleta” o “deportista”. Ri quec'alalic, ri caqui'an quib pa t'o'y, ri quebetz'an pa pelot o ri caquiunimaj quichuk'ab chiquiwach, rique e “atleta”. † **2:11** Wa' e que'elawi: We xkaya can ri ojer kabinic kasilabic, e pacha' oj caminak chi che ri mac. ‡ **2:18** Rique caquibi'ij, tob ri Dios cuya jun c'ac' c'aslemal chike wo'ora, na cuya ta jun c'ac' cuerpo chike chikawach apanok.

usachic quina'oj puwi ri K'ijsak. ¹⁹ Na ruc' ta c'u ri', rutinamit ri Dios lic tiquil chi utz pa ri K'ijsak, ma rique e pacha' juna cowilaj utiquibal juna ja pa tz'ibital wi: «Ri Dios lic reta'am china ri e re Rire»^{*} y «Conoje c'u ri caquibi'ij e re ri Cristo, chirajawaxic caquesaj quib che tak ri na jusuc' taj.»

²⁰ Chupa juna nimalaj ja c'o tak ri chapabal re oro y re plata, ri lic xa k'alaj pa cachapabex wi; yey c'o ne tak chapabal re che' y ulew na lic ta chom, ri xa tob pa cachapabex wi.

²¹ Jec'uri'la' e junok caresaj rib che tak ri mac, chom ruchapabexic ca'an ruma ri Dios, chom u'anom rubinic usilabic y lic c'o uchac che ri Kanimajawal, ma curik u'anic uq'uiyal chomilaj chac.

²² Timoteo, chatanimaj c'u chwach ronoje tak ri rayibal re tzakibal que ralabo. Yey junam cuc' conoje ri caquilok'nimaj rubi' ri Kanimajawal Jesucristo ruc' ronoje quic'u'x, e chatijoj awib che u'anic ri lic jusuc' chwach ri Dios, cubula ac'u'x ruc', chac'utu ri rutzil c'u'xaj y chatc'ola chi utzil chomal cuc' conoje. ²³ Maya axiquin chique ri caquichapala' quib pa ch'a'tem na jinta uchac, ma aweta'am chic la' xa cuc'am lo ch'a'oj.

²⁴ Ma e juna aj chac re ri Kanimajawal Jesucristo chirajawaxic che na aj ta ch'a'oj, xaki utz uc'u'x cuc' conoje, lic cac'utun chi utz y lic nim uc'u'x cuc' conoje. ²⁵ Ruc' chomilaj ch'a'tem quebuk'il tak ri caquiyac quib chirij ri K'ijsak; ma c'axtaj ruc' wa', ri Dios cuya chique caquitzelej quitzij chwach y caqueta'maj ri K'ijsak, ²⁶ y jec'ula' quebel puk'ab ritzel winak y na caqui'an ta chic sa' ri caraj rire.

3

Ri quibinic quisilabic ri winak chupa tak ri q'uisbal k'ij

¹ Lic chirajawaxic caweta'maj wa': Chupa tak ri q'uisbal k'ij lic c'ayew chi ri jekelem che ruwachulew ruma

ri quibinic quisilabic tak ri winak. ² Ma e c'o ri xew caquitakej ri cacaj rique, e c'o ri lic e rayinel re puak, e c'o ri lic caquitac'aba' quik'ij, e c'o ri caquic'ak bi quik'ij ri catz-quichak', e c'o ri tzel quech'a't chiquij jujun chic, e c'o ri na caquicoj ta quitzij quichu-quikaw, e c'o ri na jinta caquitioxij, e c'o ri na caquixi'ij ta quib chwach ri Dios. ³ E c'o ri na jinta c'ana rutzil c'u'xaj cuc', e c'o ri na jinta c'ana c'axna'bal quic'u'x, e c'o ri e aj molot, e c'o ri na caquich'ij ta uk'atexic ri quirayibal, e c'o ri lic e titz'itak, e c'o ri tzel caquil ri utz. ⁴ E c'o ri e c'ayinel re catz-quichak', e c'o ri na caquich'ob tana rakan ri caqui'ano, e c'o ri lic caqui'an nim che quib, e c'o ri xew caquitzucuj rukusil ruwachulew y na e ta caquitzucuj ri Dios. ⁵ E c'o ri caqui'an pacha' lic utz qui'anom chwach ri Dios pero na quiya'om ta luwar che ri Dios cujalc'atij ri quibinic quisilabic ruc' ruchuk'ab Rire. Ma'an awe cuc' ri caqui'an tak wa'. ⁶ Cuc'uil rique e c'o ri queboc pa tak ja y quequisoc rixokib lic c'o quimac ruma e quitakem tak ri quirayibal. ⁷ Tob xaki caquita tak c'utunic, na ruc' ta c'u ri', na caquimaj ta c'ana usuc' ri K'ijsak. ⁸ Ec'u wa' wa'chijab e pacha' ri aj k'ijab Janes y Jambres, ri xeyacataj chirij ri Moisés ojertan,^{*} ma rique eyacatajinak chirij ri K'ijsak y sachinak ri quina'oj yey na quec'ul ta ruma ri Dios ma rique na jinta c'ana cubulibal quic'u'x ruc' Rire. ⁹ Na quebel ta c'u pan ruc' ri caqui'ano jela' pacha' ri xquic'ulumaj ri xeyactaj chirij ri Moisés, ma cak'alajin chiquiwach conoje, na jinta sakil na'oj cuc' rique.

Q'uisbal pixabanic che ri Timoteo

¹⁰ No'j ri'at e atakem ri sakil nuc'utunic, ri jusuc' nubinic nusilabic, ri cuaj can'an ruc' ri nuc'aslem, ri cubulibal nuc'u'x, runimal nuc'u'x, ri rutzil nuc'u'x y ri nuchuk'ab che uch'ijic ronoje. ¹¹ Aweta'am

^{*} 2:19 Nm. 16:5 ^{*} 3:8 Éx. 7:11

c'u ri' lic 'anom c'ax chwe y lic nutijom c'axc'obic jela' pacha' ri xinwic'owibej chupa tak ri tinamit Antioquía, Iconio y Listra. Uq'uiyal tak c'axc'obic xpe panuwi', pero ri Kanimajawal Jesucristo xinucolobej che ronoje wa'. ¹² Y jela' conoje ri cacaj quebin jusuc' chupa ri be re ri Kanimajawal Jesucristo, caquitij na c'ax cuma jujun chic. ¹³ Ec'u ri winak itzel quic'u'x y ri e socoso'nel, lic caq'uiyar uwach ri quimac. Que-socoso'nic y caquisoc quib chiquibil quib.

¹⁴ No'j c'u ri'at e lic chachuk'ubej awib che ri sakil c'utunic amajom y pa ri ajiquibam wi awib. Ma aweta'am chi utz china tak ri xec'utuw wa' chawe. ¹⁵ Ma chach'uti'nal xaweta'maj lo ri Santowilaj Uch'a'tem ri Dios tz'ibital canok, yey e wa' ri cuya ana'oj cha' cac'ul ri colobetajic ruma ri cubulibal ac'u'x ruc' ri Kanimajawal Jesucristo. ¹⁶ Ronoje Rutzij Upixab ri Dios tz'ibital canok e ri Dios bi'yom re; wa' e lic c'o uchac re c'utunic, re pixabanic, re cuyijba' ri na utz ta u'anom y re k'ilonic cha' cojbin jusuc' chwach ri Dios; ¹⁷ y jec'ula' conoje ri caquinimaj ri Dios e tijotal chi utz che u'anic ronoje utzilaj chac, ma ya'tal chi chique janipa ri cajawaxic cha' caqui'an wa'.

4

¹ Timoteo, canya can wa pixabanic chawe chwach ri Dios y chwach ri Kanimajawal Jesucristo, ri cac'un tanchi wara che ruwachulew re co'ltakana paquiwi conoje y re colu'k'ata tzij paquiwi tak ri ticawex, ri e c'aslic y ri ecaminak. ² Chaya'a awib che utzijoxic Ruch'a'tem ri Dios. Chatoc il che utzijoxic wa' chupa ruk'ijol o tob ne na chupa ta ruk'ijol. Chak'alajisaj tak ri na utz taj, chach'a'bej quipa tak ri caqui'an ri na utz taj, chebapixabaj ruc' sakil c'utunic cha' caquitzelej quitzij. Cha'ana c'u wa' ruc' unimal

ac'u'x. ³ Ma copon ri k'ij echiri' tak ri winak na cacaj taj caquita ri sakil c'utunic. Yey ruma tak ri quirayibal quequitzucuj china quec'utuw chique sa' ri cacaj caquito. ⁴ Rique na cacaj taj caquita ri K'ijsak y e caquiternabej tak tzijobal xa no'jital cuma winak. ⁵ No'j ri'at Timoteo, e lic c'ola ana'oj puwi tak ri ca'ano. Chacuyu ronoje tak ri c'axc'obic cape pawí. E chaya'a awib che utzijoxic ri Utzilaj Tzij re colobetajic. Cha'ana c'u chi utz ronoje ri chac ya'tal pak'ab.

⁶ Cambi'ij c'u wa' chawe ma ri'in na naj ta chi in c'aslic, ri nubenam chila' chicaj xa nakaj chi c'o wi. ⁷ Xinch'ij uchuk'ab ronoje ri c'axc'obic xinic'ow wi, xinopon c'u che ri q'uisbal re ri nuchac uya'om ri Dios, lic nutzijom chi jusuc' ri Utzilaj Tzij re ri Cristo. ⁸ Ec'u wo'ora xew chi woye'em ri corona caya' chwe ruma ximbin jusuc' chwach ri Dios. Y ri caya'w wa' chwe e ri Kanimajawal Jesucristo, ri Aj K'atal Tzij lic jusuc'. Y wa' na xew ta chwe ri'in cuya'o, ma cuya chique conoje ri coye'em ruc'unibal ruc' ronoje canima'.

Ri Pablo caraj caril uwach ri Timoteo

⁹ Matmayinic, e chatpeta tan che wilic. ¹⁰ Ma ri Demas xinrok'otaj canok ruma lic xe'ec uc'u'x chwi tak rukusil ruwachulew y xe'ec Tesalónica. Y ri Crescente benak Galacia yey ri Tito benak Dalmacia. ¹¹ Xew c'u ri Lucas inrachbilam wara. Echiri' catpetic, chac'ama lo ri Marcos* awuc' ma rire lic to'bel we chupa ruchac ri Dios. ¹² Ec'u ri Tíquico xintak bi Éfeso. ¹³ Echiri' catpetic, chac'ama lo ri pisbal wij nuya'om can chirocho ri Carpo chupa ri tinamit Troas y chac'ama tak lo ri jubotaj wuj;* yey ri lic cajawax chwe e ri jutak botaj tz'u'um tz'ibital uwach. ¹⁴ Rachi Alejandro ri aj ch'ayal ch'ich' lic u'anom tak ri na utz taj chwe. Ec'u ri Dios catojow re che sa' tak ri u'anom. ¹⁵ Lic chachajij c'u awib ri'at

* 4:11 Hch. 15:37-39 * 4:13 "Jubotaj wuj": Quil "rollo" pa vocabulario.

chwach rire ma lic uyacom rib chirij ri Utzilaj Tzij cakatzijoj.

¹⁶ Ri nabe laj echiri' xinto'bej wib pa k'atbal tzij, na jinta junok xto'w we ma conoje xincok'otaj canok; na ruc' ta c'u ri', ri'in na cuaj taj e ri Dios cuk'at tzij paquiwi' ruma wa'. ¹⁷ No'j ri Kanimajawal xc'o'ji' wuc', xinuto'o y xuya nuchuk'ab cha' wuma ri'in xel utzijoxic ri Utzilaj Tzij y xquita c'u wa' ri ticawex re uq'uiyal tinamit. Jec'ula' xincolobex ri'in chwa ri camic, e pacha' junok xesax puchi' juna coj. ¹⁸ Yey e ri Kanimajawal quincoloben chwach tak ri na utz taj y quinuchajij c'ut cha' quinopon na ruc' chila' chicaj pa catakan wi. Xew c'u che Rire takal wi lic cayac uk'ij na jinta utakexic. Amén.

Quisbal uch'a'tem ri Pablo che ri Timoteo

¹⁹ Chaya'a rutzil quiwach ri Priscila[☆] y ri Aquila[†] junam cuc' conoje ri e c'o pa rocho ri Onesíforo. ²⁰ Ri Erasto xcanaj can pa ri tinamit Corinto y ri Trófimo xinya can pa ri tinamit Mileto ma lic yewa'. ²¹ Matmayinic, e chatpeta tan echiri' c'amaja' cujek ruk'ijol echiri' c'ax tew y c'o jab. Caquiya pan rutzil awach ri Eubulo, ri Pudente, ri Lino, ri Claudia cuc' conoje ri hermanos e c'o wara. ²² C'ola c'u ri Kanimajawal Jesucristo awuc'. Ri unimal rutzil uc'u'x Rire c'ola piwi' iwonoje ri'ix. Amén.

[☆] 4:19 Hch. 18:1-3 [†] 4:19 Ri Aquila e rachijil rixok Priscila.

Ri carta xutz'ibaj ri Pablo che ri Tito

Ri Pablo cuya pan rutzil uwach ri Tito

¹ Ri'in in Pablo, in aj chac re ri Dios yey in tako'n re ri Kanimajawal Jesucristo. Ri chac uya'om chwe e quebenuto' ri ebucha'om Rire cha' cacubi' quic'u'x ruc', caqueta'maj chi utz ri K'ijisak y quebin jusuc' chwach ² cha' jela' caquicuba' quic'u'x che uc'ulic ri quic'aslemal na jinta utakexic. Ma ri Dios xubi'tisij lo wa c'aslemal echiri' c'amaja' cajeker lo ruwachulew, y Rire na cu'an ta rak'ubal. ³ Yey echiri' xopon ruk'ijol re cak'alajisax ri Utzilaj Tzij, ri Dios Kacolobenel xuya panuk'ab cantzijos wa' chiquiwach ri ticawex.

⁴ Cantz'ibaj c'u pan wa' wa carta chawe ri'at Tito, ri pakatzij wi at pacha' nuc'ajol chupa rubi' ri Cristo, ma junam ri cubulibal kac'u'x ruc' Rire. Chac'ulu c'u ri unimal rutzil c'u'xaj, ri c'axna'bal c'u'xaj y ri utzil chomal re ri Kakaw Dios y re ri Kanimajawal Jesucristo Kacolobenel.

Ruchac ri Tito chupa ri isla Creta

⁵ Ri'in xatinya can chila' chupa ri isla Creta cha' cayijba' tak ri chakal can u'anic y quebacoj c'u e aj wach pa riglesia chujujunal tinamit, jela' pacha' ri ximbi'ij can chawe.

Ri binic silabic takal chique ri e aj wach y ri e aj c'amal quiwach rutinamit ri Dios

⁶ E juna aj wach re riglesia lic chirajawaxic jusuc' rubinic usilabic cha' na jinta cach'a'tiben re. C'ola jusuc' ruc' ri rixokil yey ri ralc'o'al chirajawaxic quicojom rubi' ri Cristo, e cojol tzij y na catataj ta c'u chique e aj mac o e titz'itak.

⁷ Ec'u ri' ri ya'tal che cu'ana aj c'amal quiwach rutinamit ri Dios,

lic chirajawaxic e jusuc' rubinic usilabic cha' na jinta cach'a'tiben re, mu'an nim chiribil rib, na ch'i'ch'oj ta uc'u'x, na k'aba'rel taj, na aj ch'a'oj taj, na rayinel taj re puak cach'ac ruc' socoso'nic. ⁸ Yey chebuc'ulu chi utz tak ri quebopon chirocho, chuya'a uc'u'x che u'anic ri utz, lic chuch'obo chi utz ri cu'ano, chu'ana ri lic jusuc', lic chuya'a rib puk'ab ri Dios y lic churika uchajixic rib chwach ronoje ri na utz taj. ⁹ E chutakej ri sakil Utzilaj Tzij re ri Dios c'utum chwach* cha' jela' curik capixaban ruc' chomilaj c'utunic y cucoj wa' pa quijolom ri ticawex, ri caquibi'ij na katzij ta wa c'utunic.

Tak ri caqui'an c'utunic na sakil taj

¹⁰ Ma lic e q'ui ri e titz'itak, caquic'ut ri na jinta uchac y e socoso'nel. Y chique tak wa' e c'o ri lic queboc il che ri retalil re circuncisión.

¹¹ Maya c'u luwar chique wa' wa winak quec'utunic, ma caquisachisaj quina'oj uq'uiyal familias ruc' ri quic'utunic. Rique xew cacaj quebeyomar ruc' ri c'utunic caqui'ano yey wa' lic q'uixbal uwach.

¹² Ojertan c'o jun k'alajisanel aj Creta, jewa' xubi'ij chwi rutinamit rire: "Ri e aj Creta lic xex wi e aj rak'ul, pacha' e itzel chicop, lic e japjatel y lic e xepu'ab"* xcha'.

¹³ Yey ri xubi'ij wa' wa'chi lic katzij; e uwari'che chirajawaxic lic chach'a'bej quipa cha' quetiqui' chupa ri sakil c'utunic, ¹⁴ y jec'ula' na queboc ta il che tak ri tzijonic xa quimololem raj judi'ab y na queboc tane il che ri takanic que ri winak quiya'om can ri K'ijisak.

¹⁵ E junok sakil runa'oj, ronoje ri chom chwach ri Dios, ri' e lic chom chwach rire. No'j ri sachinak runa'oj, ri na cucoj ta ri K'ijisak, ri' ronoje lic ch'ul chwach ma ch'ul runa'oj y ri ranima'; y jec'ula' na cuna'bej taj sa' ri chom y sa' ri na chom taj. ¹⁶ Tob cubi'ij reta'am uwach ri Dios; pero

* **1:9** 2 Ts. 2:15 * **1:12** Ri xtz'iban re wa' e jun achi Epiménides rubi', yey rire lic c'o uwach rojertan.

ruc' ri cu'ano, cak'alajinic na reta'am ta uwach. Ma xaki itzel uc'u'x, aj palajiy tzij y na jinta c'ana utz cu'an chwach ri Dios.

2

Ri sakil c'utunic

¹ No'j ri'at Tito, lic chirajawaxic e ronoje ri cac'utu xaki junam ruc' ri sakil c'utunic re ri Dios. ² Chebapixabaj rachijab e nimak winak chic cha' caquich'ob chi utz janipa ri caqui'ano, caquichajij chi utz ri quibinic quisilabic chiquiwach ri jujun chic, caquichajij quib cha' na quetzak ta pa mac, yey e sakil ri cubulibal quic'u'x, ri rutzil quic'u'x y ri unimal quic'u'x.

³ Yey chabi'ij chique rixokib e nimak winak chic: C'ola xi'in ib cuc' chwach ri Dios chwi ri quibinic quisilabic, mebu'an e aj molot, maquiya quib che k'abaric, e chek'ilon chwi ri utz. ⁴ Quic'utu c'u chique ri e c'ac'al ixokib cha' c'ax quequina' ri cachijil y ri calc'o'al, ⁵ caquichajij quib cha' na quetzak ta pa mac y jela' chom ri quibinic quisilabic, quechacun chi utz pa ja, caquic'ut ri rutzil quic'u'x y caquitakej ri cachijil. Caqui'an c'u ronoje wa' cha' jela' na jinta junok tzel cach'a't chirij Rutzij Upixab ri Dios.

⁶ Chabi'ij c'u chique ralabo caquichajij quib cha' na quetzak ta pa mac. ⁷ Yey ri'at Tito, e chac'utu ri utz chiquiwach ruc' ri sakil abinic asilabic chwi ronoje ri ca'ano. Chatc'utun chi jusuc' ruc' sakil na'oj ⁸ y ruc' utzilaj ch'a'tem cha' jela' we c'o junok cach'a't chawij, utuquel cuya uq'uix ma na jinta mac carikitaj chawij.

⁹ Yey chebapixabaj raj chaquib cha' caquinimaj quitzij ri cajaw, caqui'an chi utz ronoje cha' ri cajaw quequi'cot cuc' y na quec'ulila'n taj. ¹⁰ Maqui'an ne qui'que che rubitak re ri cajaw; e qui'ana ronoje chi jusuc' cha' jela' cak'alajinic lic chom ri c'utunic re ri Dios Kacolobenel.

¹¹ Ma ri Dios uk'alajisam chi ri unimal rutzil uc'u'x cha' conoje ri ticawex quecolobetajic. ¹² Ec'u ri' ri unimal rutzil uc'u'x ri Dios c'utuyum chike sa' u'anic cakaya can ronoje mac y ronoje ri rayibal na utz ta uwach, yey e c'utuyum chike chirajawaxic cakach'ob chi utz ri caka'ano cha' wak'ij ora cojbin jusuc' ruc' jun sakil binic silabic chwach ri Dios. ¹³ Lic chirajawaxic caka'an wa' y cakacuba' pana kac'u'x che ri chomilaj k'ij re qui'cotemal echiri' cac'un tanchi ri Dios Kajawxel, ri Kacolobenel Jesucristo. ¹⁴ Rire xuya rib pa camic kuma ri'oj, xojulok'o cha' cojresaj che ronoje ri na utz taj, cuchomaj ri kabinic kasilabic y jela' coju'an oj utinamit lic kaya'om kib che u'anic chomilaj tak chac.

¹⁵ E chac'utu' janipa tak wa ximbi'ij chawe; chatpixaban chi utz y chach'a'bej quipa tak ri caqui'an ri na utz taj. Cha'ana c'u wa' ma pak'ab ri'at ya'tal wi ca'ano; maya c'u luwar che junok cuc'ak bi ak'ij.

3

Ruma ri unimal rutzil uc'u'x ri Dios coju'an jusuc' chwach

¹ Chacuxtaj chique conoje ri quicojom rubi' ri Kanimajawal Jesucristo, lic chirajawaxic e caquinimaj y caquitakej ri caquibi'ij ri e takanelab y ri e aj k'atal tzij re ri tinamit yey caquiya quib che u'anic janipa tak ri utz. ² Chabi'ij chique mech'a't chirij junok, mech'o'jinic; quic'utu ri rutzil quic'u'x y qui'ana ch'uti'n che quib chiquiwach conoje tak ri ticawex.

³ Ma e ri'oj rojertan echiri' c'amaja' ne cakacoj rubi' ri Cristo, na jinta kana'oj, oj titz'itak, oj sachinak, kaya'om kib puk'ab ronoje ri rayinic y rukusil ruwachulew, lic c'o retzelal kac'u'x, lic tzel cojilic y tzel cakil kib chikawach. ⁴ Na ruc' ta c'u ri', ri Dios Kacolobenel xuc'ut ri relej uc'u'x y ri rutzil uc'u'x chique conoje ri ticawex che ruwachulew. ⁵ Xojucolobej c'u ri', na ruma ta juna chac lic utz ka'anom, ma e ruma ri c'axna'bal

uc'u'x chike. Xojuch'aj c'u che ri kamac cha' cuya jun c'ac' c'aslemal chike y xuya ri Santowilaj Ruxlabixel pa kanima' cha' cujalc'atij ri kabinic kasilabic. ⁶ Ruma ri Kacolobenel Jesucristo, ri Dios xuya ri Ruxlabixel chike yey ;lic nim ruto'bal Rire kuc'!

⁷ U'anom c'u jusuc' chike ruma ri unimal rutzil uc'u'x cha' cakac'ul na ri koye'em, wa' e ri kac'aslemal na jinta utakexic.

⁸ Wa' wa cambi'ij pan chawe lic katzij yey lic cuaj catoc il che uc'utic wa' chique conoje ri quicojom rubi' ri Dios cha' caquitijoj quib che u'anic ri utz. Ma tak wa' wa c'utunic lic are' y lic c'o cutikoj chique conoje ri ticawex che ruwachulew. ⁹ Ma'an c'u awe'at cuc' tak ri caquichapala' quib ruc' tak ch'a'tem na jinta uchac, ri caquichololej quibi' ri cati'-quimam re ojertan y ri quech'o'jin puwi ri tzi-jpixab que ri aj judi'ab. Ma ronoje tak wa' na jinta que'elawi y na jinta cutikoj. ¹⁰ We c'o c'u junok cujach quipa tak rutinamit ri Dios, chach'a'bej upa julajok o calajok. No'j we lic na cucoj ta c'u tzij, mawachbilaj chic. ¹¹ Aweta'am e junok cujach upa rutinamit ri Dios, yojtajinak runa'oj y mac ri cu'ano. Yey ruma c'u rumac, utuquel utzucum k'atbal tzij chirij.

Q'uisbal uch'a'tem ri Pablo che ri Tito

¹² Echiri' cantak ri Artemas o ri Tíquico awuc',* chawilij catpetic cha' co'lkarika kib wara Nicópolis, ma nuch'obom chic quinc'oji' wara chupa ruk'ijol echiri' lic c'ax tew y c'o jab.

¹³ Cambi'ij chawe lic chato'o ri Zenas, ri aj c'utunel re ri tzi-jpixab yey chato'o ri Apolos. Chaya'a c'u chique ronoje tak ri cajawax che ri quibenam cha' caquimaj bi quibe. ¹⁴ Lic chirajawaxic c'u chique conoje ri e kuq'uil ri'oj, ri quicojom rubi' ri Cristo, caquimaj u'anic ri utz y quequito' c'u tak ri c'o cajawax chique

* **3:12** Ri Pablo cutak bi jun chique wa queb hermanos cha' cac'oji' puc'axel ri Tito che ri chac pa tak riglesias chila' Creta.

cha' jela' c'o cutikoj ri quibinic quisi-labic. ¹⁵ Conoje tak ri e c'o wara wuc', caquiya pan rutzil awach. Y ri'at chaya'a rutzil quiwach ri quicojom rubi' ri Dios, ri c'ax cojquna'o. Chic'ulu c'u iwonoje ri'ix ri unimal rutzil uc'u'x ri Dios. Amén.

Ri carta xutz'ibaj ri Pablo che ri Filemón

Ri Pablo cuya pan rutzil uwach ri Filemón

¹Ri'in in Pablo, in c'o pa cárcel ruma quintzizon puwi ri Kanimajawal Jesucristo. Junam ruc' ri hermano Timoteo cakatak bi wa carta che'la Filemón, ri na lok' ta c'ax cana'w e la yey lal kachbi'il chupa ruchac ri Dios. ²Cakaya pan rutzil quiwach ri hermana Apia y ri hermano Arquipo, ri kachbi'il lic uya'om rib che u'anic ruchac ri Dios,* yey cakaya pan rutzil quiwach ri hermanos caquimol quib pa ocho la. ³C'ulu c'u alak ri unimal rutzil c'u'xaj y ri utzil chomal re ri Kakaw Dios y re ri Kanimajawal Jesucristo.

Ri rutzil uc'u'x y ri cubulibal uc'u'x ri Filemón

⁴Echiri' can'an orar, xaki cac'un la chi nuc'u'x y quintioxin c'u che ri Nukaw Dios uma rilal. ⁵Ma nutom lic c'ax cana' la ri Kanimajawal Jesucristo y lic cubul c'u'x la ruc' yey cac'ut la ri rutzil c'u'x la chique conoje ri quicojom rubi'. ⁶Ec'u ri cuaj ri'in e queta'maj la ronoje ri utz ya'tal pakak'ab caka'ano ruma xa oj jun ruc' ri Cristo, cha' jela' ri cubulibal c'u'x la ruc' Rire c'o cutikoj chique jujun chic. ⁷Hermano, ri'oj lic cojqui'cotic y lic nimirinak kac'u'x ruma ri rutzil c'u'xaj c'utum la chique ri quicojom rubi' ri Cristo, ma ruc' wa' cowirinak quic'u'x rique.

Ri Pablo cach'aw puwi ri Onésimo

⁸E uwari'che, c'o cuaj cantz'onoj co che'la. Tob ri Cristo uya'om panuk'ab ri'in cantak la che u'anic ri lic ube, na can'an ta wa'; ⁹ec'u ri can'ano e quinelaj co che'la ruma ri rutzil c'u'x la wuc'. Ri'in in Pablo, in chi nimalaj winak, yey wo'ora in c'o pa

cárcel ruma quintzizon puwi ri Cristo; ¹⁰quinch'aw co chiwach la puwi ri Onésimo.† Rire wo'ora e nuc'ajol chupa rubi' ri Cristo, ma wuma ri'in, rire xucoj rubi' ri Cristo wara pa wa cárcel.

¹¹E ri petinak lok, ri Onésimo e jun aj chac la na xu'an ta utzilaj to'bel che'la, no'j wo'ora e jun utzilaj to'bel che rilal y jenela' chwe ri'in. ¹²Rire lic uc'u'x wanima'; na ruc' ta c'u ri', cantak tanchi ubi che'la, ¹³tob lic cuaj ri'in cac'oji' wuc' pac'axel rilal cha' quinuto'o janipa chi k'ij in c'o pa cárcel ruma cantzijoj ri Utzilaj Tzij. ¹⁴Pero na junta c'o xuaj xin'an xa chirij wi' la. We ca'an la wa cantz'onoj che'la, na cuaj taj ca'an la wa' ruma cantak la che, ma e ri cuaj ri'in e ca'an la wa' ruma lic calax pa anima' la.

¹⁵Laj c'o ne xutikoj ri xric'owibej ri Onésimo, ma tob rire xel uc' la jujun k'ij, ec'u ri' wo'ora na xa ta chi ajilam k'ij cac'oji' uc' la ¹⁶re to'bel e la, yey rire e jun hermano na lok' ta c'ax cana'w re. Ri'in lic c'ax cana'o yey wo'ora más ne c'ax cana' rilal, ma e to'bel e la, yey rilal ruc' rire chak' ib alak chupa rubi' ri Kanimajawal.

¹⁷E uwari'che, we cuna' c'u'x la junam kachbi'il kib chupa ruchac ri Kanimajawal Jesucristo, c'ulu c'u la ri Onésimo pacha' e ri'in ri quinc'ulla. ¹⁸We rire c'o u'anom che'la o we c'o uc'as uc' la, cojo la wa c'as pa nubi' ri'in y jela' cantoj che'la.

¹⁹Ri'in in Pablo, in quintz'iban re wa' ruc' ri nuk'ab: In quitojow re ruc'as. Na cajawax tane c'ut cancutaj ri c'as rilal wuc' ri'in, ma wuma ri'in xrik la ri c'aslemal chwach ri Dios, tob wa' na cantz'onoj taj catoj la chwe. ²⁰Hermano, ruma c'ax cana' la ri Kanimajawal; 'ana co la wa cantz'onoj che'la. Nimirisaj c'u la ri nuc'u'x ruc' wa ca'an la che ri Onésimo. ²¹Quintz'iban pan uc' la ruc' cubulibal nuc'u'x, ma weta'am

* **1:2** “Ri kachbi'il lic uya'om rib che u'anic ruchac ri Dios”: Pa ri ch'a'tem griego cubi'ij “ri kachbi'il pa ch'a'oj”. † **1:10** Ri Filemón xulok' ri Onésimo re u “esclavo”. Na ruc' ta c'u ri', ri Onésimo xanimaj bi. Rojertan we juna esclavo cu'an wa', puk'ab ri rajaw c'o wi cuya pa c'ax o cucamisaj. Quil “esclavo” pa vocabulario.

quic'ow ne uwi' ri ca'an la chwa wa cantz'onoj che'la. ²² Yijba' c'u pan la juna luwar pa quinc'oji' wi, ma cubul nuc'u'x quinopon tanchi uc' la, we ri Dios cuya luwar quinel bi pa wa cárcel pacha' ri tz'onon alak panuwi' chwach Rire.

Q'uisbal uch'a'tem ri Pablo che ri Filemón

²³ Ri Epafra, ri wachbi'il wara pa oj tz'apil wi ruma oj re ri Kanimajawal Jesucristo, cuya pan rutzil wach la. ²⁴ Jenela', caquiya pan rutzil wach la ri Marcos, ri Aristarco, ri Demas y ri Lucas, ri e wachbi'il chupa ruchac ri Kakaw. ²⁵ C'ola c'u pa anima' alak ri unimal rutzil uc'u'x ri Kanimajawal Jesucristo. Amén.

Ri xtz'ibax chique ri e aj hebreo

Ri Dios xuk'alajisaj rib ruma Ruc'ajol

¹ Rojertan ri Dios uq'uiyal laj xuk'alajisaj Rutzij chique ri kati-kamam cuma ri k'alajisanelab, yey ri k'alajisanelab uq'uiyal uwach ri k'alajisanelab xqui'an chiquiwach ri tinamit.* ² Chupa c'u wa q'uisbal k'ij oj c'o wi, ri Dios xuk'alajisaj rib ruma Ruc'ajol. Yey ruma Ruc'ajol xu'an ronoje tak ri c'olic, puk'ab Ruc'ajol uya'om wi ronoje ³ y che Ruc'ajol quilatay wi runimal uwach uk'ij ri Dios. Jec'uri'la', ruc'u'x ri Dios e junam ruc' ruc'u'x Ruc'ajol, ri Jun chapayom re ronoje tak ri c'olic ruc' ruchuk'ab Ruch'a'tem. Ec'uchiri' uch'ajom chi ri kamac, xe'tz'ula puwiquik'ab ri Dios chila' chicaj.

Ruc'ajol ri Dios más c'o uwach chiquiwa ri ángeles

⁴ Ruc'ajol ri Dios más c'o uwach chiquiwa ri ángeles, ma che Rire xya'i' wi jun bi'aj más c'o uwach chwa ri bi'aj que ri ángeles. ⁵ Yey ri Dios na xubi'ij ta c'ana wa' che juna ángel: Ri'at at Nuc'ajol yey Ri'in in Akaw; wak'ij c'u ri' cank'alajisaj wa'. *Sal.*

2:7

Yey na jewa' tane xubi'ij puwi juna ángel:

Ri'in quinu'an in Ukaw Rire yey Rire cu'an Nuc'ajol Ri'in. *2 S.*

7:14; 1 Cr. 17:13

⁶ Yey ri Dios echiri' xutak lo Ruc'ajol che ruwachulew, jewa' xubi'ij: «Conoje ri ángeles re ri Dios quilok'nimaj uk'ij Rire» xcha'.

⁷ Pakatzij wi ri Dios jewa' cubi'ij paquiwi ri ángeles:

Rire cu'an chique ru ángeles e aj chaquib re Rire,

e pacha' tew cawelelic y pacha' ure-pebal ak' *Sal.*

104:4

cache'.

⁸ No'j c'u chwi Ruc'ajol jewa' cubi'ij:

Rilal, Lal Dios yey ri takanic la na jinta utakexic

y ri k'atbal tzij e la, lic jusuc'.

⁹ E lic cuc'ul c'u'x la ri lic jusuc' yey lic tzel quil la ri mac.

E uwari'che ri Dios, ri Dios e la, xucha' lo la

y xuya unimal qui'cotemal che'la;

ec'u más nim ri qui'cotemal xya' che'la

chwa ri qui'cotemal xya' chique ri jujun chic *Sal. 45:6-7*

cache'.

¹⁰ Yey je tanchi wa' cubi'ij:

Rilal, Lal Kajawal,

che ri jekebal lok Lal xyijban re ruwachulew;

y Lal'anayom re ruwa caj ruc' ri k'ab la.

¹¹ Ronoje wa', xa caq'uisic,

no'j Rilal na jinta uq'uisic ri c'aslemal la.

Ri caj y ruwachulew xa cajaric jela' pacha' cu'an ri kak'u'.

¹² Yey Rilal cajalc'atij la ri caj y ruwachulew,

jela' pacha' cu'an junok echiri' cujal ruk'u':

caresaj ruk'u' k'e'l, cubusu y cucoj ri c'asak.

No'j Rilal na cajalc'atitaj ta wach la y na jinta utakexic ri k'ij la *Sal.*

102:25-27

cache'.

¹³ Ec'u ri Dios na xubi'ij ta c'ana wa' che juna ángel:

Chat-tz'ula pa nuwiquik'ab,

y chawoye'ej na ri k'ij

echiri' quebenuya ri tzel que-bilow awe

chuxe' rawakan. *Sal. 110:1*

¹⁴ ¿Sa' c'u ri' ri quiwach tak ri ángeles? E aj chaquib caquilok'nimaj ri Dios yey etakom lo che quito'ic ri quec'uluw ri colobetajic re ri Dios.

* **1:1** Ri k'alajisanelab xquiya Rutzij ri Dios ruma ri tzijonic xqui'ano, ruma ri xquit'ibaj canok y ruma tak ri xqui'ano.

2

Chojoca il cheri uk'alajisam ri Dios chike

¹ Ri Jesús e más c'o uwach chiquiwa ri ángeles; ruma c'u ri', lic chira-jawaxic e más cojoc il che utakexic ri Utzilaj Tzij katom chwi Rire, cha' jela' na cakesaj ta kib chirij ri K'ijsak. ² Ma lic jiquil uwach Rutzij ri Dios, ri xtzijox ojertan cuma ri ángeles; conoje c'u ri xemacun chirij y xquipalajij wa' wa Tzij, lic takal chique janipa ri k'atbal tzij xquic'ulu. ³ We ec'u xquic'ulumaj wa' rique, ¿su'anic c'u ri' cojcolobetaj ri'oj we na cojoc ta il che wa unimal colobetajic? Ma nabe na e ri Kanimajawal Jesucristo ri xtzi-jon puwi wa colobetajic; tec'uchiri' ri xetaw re, lic xquijiquiba' can uwach wa' chike ri'oj. ⁴ Ec'u ri Dios lic ujiquibam can uwach wa' ruc' nimak tak c'utubal re ruchuk'ab, ruc' uq'uiyal uwach milagros y ruc' tak ri to'bal ya'tal chikajujunal ruma ri Ruxlabixel ri Dios, yey puk'ab c'u ri Dios c'o wi china chique cuya tak wi wa'.^{*}

Ri Jesús xu'an ticawex cha' cojucolobej

⁵ Puwi c'u wa cojtajin che ubi'xiqul, ri Dios uch'obom chic na cuya ta paquik'ab ri ángeles quetakan chwi ri c'ac' uwachulew chikawach apanok. ⁶ C'o c'u jun jewa' xubi'ij chupa Ruch'a'tem ri Dios:

¿Sa' ruwach rachi cha' Rilal cacuxtaj la?

¿Sa' ruwach ri ralc'o'al ri ticawex cha' lic coc la il chique?

⁷ X'an la che rachi xa jubik' chi xraj cajunimax uwach cuc' ri ángeles.

Lic xyac la uk'ij,
xya la che lic c'o uwach

y xya la puk'ab catakan
puwi janipa ri x'an la che ruwachulew.

⁸ E tak c'u ri' ri c'olic,
xya la ronoje puk'ab *Sal. 8:4-6*
xcha'.

Ronoje c'u ri c'olic cac'o'iji' puk'ab, ma e xraj ri' ri Dios; na jinta ne

c'o xuya can ri Dios we na caya'i' ta puk'ab. Na ruc' ta c'u ri', cakilo c'amaja' ne cac'o'iji' ronoje puk'ab. ⁹ Yey echiri' ri Jesús xu'an ticawex, e xkaj uwach uk'ij chiquiwa ri ángeles. Ec'u ri Dios ruma ri unimal rutzil uc'u'x, xuya luwar che ri Jesús xic'ow chupa ri camic paquic'axel conoje ri ticawex. Ruma c'u wa c'axc'obic xric'owibej, wo'ora más c'o uwach y más yacom uk'ij. ¹⁰ Ri Dios e 'anayom re y e chapayom re ronoje ri c'olic. Yey lic xajawax c'u ri c'axc'olil xric'owibej ri Jesús, ri caya'w re ri colobetajic, ma ruma wa' ri Dios xutz'akatisaj uwach ruchac ri Jesús cha' jela' quebuc'am bi uq'uiyal ralc'o'al ri Dios chila' chicaj. ¹¹ Ri Dios e Ukaw ri Kanimajawal Jesucristo, ri caya'w ri santowilaj binic; yey e mismo Kakaw ri'oj, ri oj c'o chi che ri santowilaj binic. Ruma c'u la', ri Jesús na caq'uix taj cubi'ij chike ri'oj, oj uchak' Rire. ¹² Ma jewa' cubi'ij chupa Ruch'a'tem ri Dios:

Cantzijoj ri bi' la chiquiwach ri e watz-nuchak',

Cambixoj ri bi' la chiquixo'l ri tinamit la

echiri' quimolom quib. *Sal. 22:22*

¹³ Je tanchi wa' cubi'ij:

Ri'in lic cancuba' nuc'u'x ruc' ri Dios. *Is. 8:17*

Yey je tanchi wa' cubi'ij:

Ri'in in c'o cuc' ri e ralc'o'al ri Dios, ri ebuya'om Rire chwe *Is. 8:18* cacha'.

¹⁴ Konoje ri oj ticawex kekam kulewal kapoklajil. Ec'u ri Jesús xu'an ticawex pacha' ri'oj, cha' jela' quic'ow chupa ri camic pakac'axel ri'oj y ruc' wa' e xuch'ij uchuk'ab ri jun xc'o'iji' uchuk'ab re cacamisanic, wa' e ritzel winak. ¹⁵ Xc'un c'u ri Cristo cha' queberesaj lo conoje ri chwi calaxic loka c'o puk'ab ri xi'in ib ruma ri camic. ¹⁶ Ma pakatzij wi Rire na xc'un ta che quito'ic ri ángeles, ma e xc'un che kato'ic ri oj ralc'o'al can ri Abraham. ¹⁷ Jec'ula' lic xajawaxic ri Jesús xu'ana junam uwach kuc'

^{*} 2:4 Ro. 12:4-11

ri'oj, ri kachak' kib ruc' Rire, cha' jela' e cu'ana Kajawal, ri cu'an jusuc' ruchac chwach ri Dios, yey ruc' c'axna'bal uc'u'x cach'aw pakawi' y ruma c'u Rire, ri Dios cucuy ri kamac konoje ri oj utinamit.* 18 Ruma c'u xic'ow Rire pa c'ax y xc'am upa, jec'ula' wo'ora lic c'o uchuk'ab re cojuto'o echiri' cac'am kapa ri'oj.

3

Ri Jesús más c'o uwach chwa ri Moisés

1 E uwari'che hermanos, cambi'ij che alak, ri ya'om chi ib alak puk'ab ri Dios yey cha'tal lo alak ruma Rire cha' que'c'ola alak ruc' Rire chila' chicaj: Lic ch'obo c'u alak puwi ri Cristo Jesús, ri Tako'n re ri Dios y ri Kajawal cach'aw pakawi' chwach ri Dios. 2 Ma ri Jesús lic jusuc' ri xu'an chwach ri Dios, ri xtakaw lo re che wa chac, jela' pacha' ri Moisés lic jusuc' xuc'am quiwach rutinamit ri Dios.* 3 No'j ri Jesús e más c'o yacbal uk'ij chwa ri Moisés, jela' pacha' ri cayacaw juna ja e más c'o yacbal uk'ij chwa ri ja cuyaco. 4 Ma ronoje ja 'anatal ruma juna achi, pero ri 'anayom re ronoje ri c'olic e ri Dios. 5 Ri Moisés e jun aj chac lic jusuc' ma xuc'am quiwach chi utz rutinamit ri Dios yey xutz-ijoj puwi ri cuk'alajisaj na ri Dios chikawach apanok. 6 No'j ri Cristo na xa ta e jun raj chac ri Dios, ma e Uc'ajol y ruma wa' catakan puwi ri Rocho Dios. Yey ri Rocho Dios e ri'oj oj utinamit, we e la' lic tiquil chi utz ri cubulibal kac'u'x ruc' y ruc' qui'cotemal koye'em ri cuya ri Dios chike chikawach apanok.

Ri uxlanem caya'taj che rutinamit ri Dios

* 2:17 Pa ri ch'a'tem griego cubi'ij ri Jesús e ri ka "Sumo Sacerdote". Rojertan wa' e ri cajawal raj chacunel pa Rocho Dios, ri cach'aw paquiwi ri tinamit y cuya chwach ri Dios ri kasa'n re awaj ecamisam re cuybal quimac. * 3:2 "Xuc'am quiwach rutinamit ri Dios": Pa ri ch'a'tem griego cubi'ij "puwi ri Rocho Dios". Pa ri ch'a'tem griego ri ch'a'tem "rocho" na xew ta e que'elawi "ri ja", ma también que'elawi ri ejekel chupa. † 3:11 "Ri uxlanem canya Ri'in": Wa' e que'elawi, ri e aj Israel ri xebe'jekela pa ri luwar ubi'tisim ri Dios chique, e xebuxlan che tak ri c'axc'obic xquic'owibej Egipto y che tak ri luwar catz'intz'otic pa xebin wi cuarenta junab y che ri ch'a'oj xqui'ano pa tak xebic'ow wi.

7 E uwari'che, ri Santowilaj Ruxlabixel ri Dios cubi'ij che alak:

We quita ri'ix wak'ij ora
janipa ri cubi'ij ri Dios chiwe,
8 mi'an co che ri iwanima'
jela' pacha' ri xqui'an ri tinamit
ojertan
echiri' xqui'an quititz'itiquil
y xquic'am upa ri Dios chupa ri
luwar catz'intz'otic.

9 Ruma wa' ri Dios xubi'ij chique:
Chila' c'u ri', riwati'-imam xquitij wi
nuk'ij

y xquic'am nupa,
tob ne pa cuarenta junab xquil
ronoje
ri c'utubal re ri nuchuk'ab xin'an
Ri'in chiquiwach.

10 Ruma c'u ri xqui'ano, lic xpe woy-
owal chiquij
y jewa' ximbi'ij:

"Rique xaki na tiquil ta chi utz ri
canima'
y na xcaj taj caqueta'maj ri
nube."

11 E uwari'che, ruma woyowal lic
xinjiquiba' uwach:

"Rique na quebec ta c'ana pa ri
uxlanem canya Ri'in."† Sal.
95:7-11

12 Tape c'u alak hermanos, lic chajij
ib alak cha' na jinta junok che alak
cu'an itzel uc'u'x y na cucoj ta chi
utzij ri Dios y jec'ula' caresaj rib chirij
ri Dios c'aslic. 13 E ri 'ana alak e lic
pixabaj ib alak chiwach alak ronoje
k'ij, xalok' c'a c'o pak'ab alak ca'an
alak wa', cha' na jinta junok che alak
cu'an co che ri ranima' ruma ri so-
coso'nic re ri mac. 14 Ma ri'oj 'anom
xa jun chike ruc' ri Cristo we e la'
e tiquil chi utz ri cubulibal kac'u'x
ruc' Rire; ec'u pacha' xkajekebej lok
echiri' xkacoj rubi', jec'ula' chira-
jawaxic cakaq'uisbej wi. 15 Ruma c'u
wa', ri Dios cuya wa pixabanic:

We quita ri'ix wak'ij ora
 janipa ri cubi'ij ri Dios chiwe,
 mi'an co che ri iwanima'
 jela' pacha' ri xqui'an ri tinamit
 ojertan
 echiri' xqui'an quititz'itiquil *Sal.*
95:7-8
 cache'.

¹⁶ ¿China c'u ri xetaw re rukul ri Dios yey tec'uchiri' xquipetisaj roy-owal ruc' ri quititz'itiquil? ¿Na e ta neba conoje ri xeberesaj lo ri Moisés chila' Egipto? ¹⁷ ¿Yey china cuc' xpe wi royowal ri Dios la' la cuarenta junab? ¿Na e ta neba cuc' ri xemacun chirij? Yey ruma wa' xecamic y ri quicuerpos xemuk can chupa ri luwar catz'intz'otic. ¹⁸ ¿China c'u chique xujiquiba' wi uwach ri Dios na queboc ta pa ri uxlanem cuya Rire? ¿Na e ta neba chique ri xquipalajij Rutzij Rire? ¹⁹ Lic k'alaj c'u ri', na xya' ta chique rique queboc pa ri uxlanem cuya ri Dios ruma na jinta cubulibal quic'u'x ruc' Rire.

4

Ri uxlanem cuya ri Dios chike

¹ C'a wak'ij ora, ri Dios cubi'tisij ri uxlanem cuya Rire. Ruma ri', lic chajij ib alak ma c'axtaj c'o junok che alak na copon ta che wa uxlanem. ² Ma ri'oj lic katom ri Utzilaj Tzij puwi ri uxlanem cuya ri Dios. Jenela' rutinamit ri Dios ojertan xquita puwi ri uxlanem ubi'tisim ri Dios chique; pero na jinta xutikoj ri xquito, ma na xquic'ul ta wa' ruc' cubulibal c'u'xaj. ³ No'j we ri'oj kacojom ri Utzilaj Tzij, cojoc c'u ri' pa ri uxlanem cuya ri Dios. Ma jewa' xubi'ij Rire pa Ruch'a'tem:
 E uwari'che, ruma woyowal lic xin-
 jiquiba' uwach wa':
 “Rique na queboc ta c'ana pa ri
 uxlanem canya Ri'in”* *Sal.*
95:10-11
 xcha'. Yey chwi lo echiri' ri Dios xu'an
 ruwachulew, xuq'uis u'anic ruchac.

⁴ Ma chupa Ruch'a'tem ri Dios jewa' tz'ibital can chwi ruwuk k'ij:

Chupa ruwuk k'ij ri Dios xuxlan che
 ri chac xu'ano. *Gn. 2:2*

⁵ Cambi'ij tanchi c'u ri cubi'ij ri Dios pa Ruch'a'tem puwi wa uxlanem: «Rique na queboc ta c'ana pa ri uxlanem canya Ri'in» cache'. ⁶ Ma e tak ri nabe xquita ri Utzilaj Tzij puwi ri uxlanem ubi'tisim ri Dios chique, na xeboc ta pa ri luwar re uxlanem ruma xquipalajij utzij Rire. Yey e c'o ne ri c'amaja' queboc pa ri uxlanem cuya ri Dios. ⁷ E uwari'che, ri Dios uk'atom uk'ijol echiri' cubi'tisij tanchi wa uxlanem chique ri ticawex, yey wa' e “wak'ij ora”. Ma uq'uiyal junab ic'owinak chic echiri' ri rey David jewa' xutz'ibaj can pa Ruch'a'tem ri Dios:

We quita ri'ix wak'ij ora
 janipa ri cubi'ij ri Dios chiwe,
 mi'an co che ri iwanima' *Sal. 95:7-8*
 xcha'. ⁸ We ta e la' ri Josué asu xuya ri uxlanem chique ri tinamit,† ri Dios na uk'atom ta chi juna chic k'ij ri' re uxlanem chikawach apanok. ⁹ No'j ruma wa', keta'am c'a c'o jun uxlanem chique rutinamit ri Dios. ¹⁰ Ma china ri coc pa ri uxlanem cuya ri Dios, cuxlan ri' che ruchac, jela' pacha' xuxlan ri Dios che ri chac xu'ano.

¹¹ Kachuk'ubej c'u kib cha' cojoc pa ri uxlanem cuya ri Dios, cha' jela' na jinta junok chike cu'ana aj palajiy tzij y cuc'ulumaj c'ut jela' pacha' ri xquic'ulumaj ri na xquicoj ta utzij ri Dios ojertan. ¹² Ma Ruch'a'tem ri Dios lic c'aslic y lic c'o uchuk'ab. E ne pacha' más c'o re' chwa juna espada ca'ib uwi re', ri copon c'a che tak rigonsiyil y coc c'a pa c'o wi tak ri sulus chupa ri bak. Jec'ula' Ruch'a'tem ri Dios copon ne c'a chupa ruc'u'x y ri ranima' juna ticawex, yey cuk'alajisaj c'u runa'oj ri ticawex y tak ri rayibal c'o chupa ri ranima'. ¹³ Ronoje tak ri 'anatal ruma

* **4:3** Ri na queboc ta pa ri uxlanem cuya ri Dios e tak ri na caquicoj ta utzij Rire. † **4:8** Ri Josué xuc'am quiwach rutinamit ri Dios echiri' xeboc chupa ri luwar ubi'tisim ri Dios chique. Dt. 31:7; Jos. 22:4

ri Dios, chwach Rire c'o wi. Ruma c'u ri', Rire caril ronoje y na junta c'o ewatal chwach. Yey copon ne ri k'ij echiri' cojopon chwach Rire cha' cuk'at tzij pakawi' ruma ri ka'anom.

Ri Jesús e Kajawal cach'aw pakawi' chwach ri Dios

¹⁴ Ruma c'u la' e kachuk'ubej kib che ri xkajiquiba' uwach echiri' xkacoj rubi' ri Cristo y makesaj kib che wa'. Ma ri Jesús, Ruc'ajol ri Dios, e Kajawal; yey Rire oquinak chila' chicaj y cach'aw pakawi' chwach ri Dios. ¹⁵ Yey ri Kajawal, ri cach'aw pakawi' chwach ri Dios, lic c'o c'axna'bal uc'u'x chike, ma Rire lic cumaj usuc' ronoje ri cactic'owibej ri'oj oj ticawex ruma lic c'ayew chike cakach'ij uchuk'ab ri mac. Ma Rire echiri' xu'an ticawex, lic xc'am upa che ronoje jela' pacha' ca'an chike ri'oj, no'j Rire xuch'ij uchuk'ab wa' y na xmacun ta q'uenok. ¹⁶ E uwari'che, muxi'ij rib kac'u'x cojkib chwach ri Dios, ri c'o unimal rutzil c'u'xaj ruc', cha' caka'ul cuybal kamac y cakarik to'bal ke echiri' cajawax chike.

5

¹ Ri cajawal raj chacunel pa Rocho Dios cha'tal chiquixo'l rachijab. Rire cojotalic re cach'aw paquiwi ri ticawex chwach ri Dios y re cuya chwach ri Dios ri kasa'n y rawaj ecamisam paquic'axel ri ticawex ruma ri quimac. ² Ec'u rire, utz cuc'ut ri c'axna'bal uc'u'x chique ri quetzak pa mac tob na u'aniquil taj quemacunic, ma rire na cuch'ij tane u'anic janipa ri cubi'ij Rutzij ri Dios. ³ Ruma c'u wa', chirajawaxic che rire cuya chwach ri Dios rawaj ecamisam ruma rumac rire y na xew ta ruma ri quimac ri tinamit. ⁴ Na junta c'u junok cu'an che rib cajawal que raj chacunel pa Rocho Dios we na cojotal ta ruma ri Dios, jela' pacha' ri xu'an ruc' ri Aarón. ⁵ Jec'ula' ri Cristo na xutac'aba' ta uwach uk'ij chiribil

rib y na xa ta pa re xu'an Kajawal cach'aw pakawi' chwach ri Dios, ma e ri Dios jewa' xubi'ij che:

Ri'at at Nuc'ajol yey Ri'in in Akaw; wak'ij c'u ri' cank'alajisaj wa'. *Sal. 2:7*

⁶ Yey je tanchi wa' xubi'ij:

Ri'at na junta utakexic catc'o'ji'ic at waj chac,

ri catch'aw paquiwi ri ticawex chin-uwach Ri'in

jela' pacha' ri Melquisedec *Sal. 110:4*

xcha'.

⁷ Ri Cristo echiri' xjeki' wara che ruwachulew lic xu'an orar, ruc' ok'ej y ruc' sic' lic xelaj chwach ri Dios, ⁸ ri c'o puk'ab cucolobej chwa ri camic; y ri Dios lic xuta re ruma ri lic uya'om rib puk'ab. ⁸ Ec'u ri Cristo, tob e Uc'ajol ri Dios, xumaj ucojic utzij ri Dios ruma ri c'axc'obic xric'owibej. ⁹ Ruma c'u xutz'akatisaj uwach ronoje ri xraj ri Dios che, xu'ana aj ya'l colobetajic na junta utakexic chique janipa ri quecojow utzij Rire. ¹⁰ Ec'u ri Dios xcojow re cha' cu'an Kajawal cach'aw pakawi' jela' pacha' ri Melquisedec.

Pixabanic chwi ri kaq'uiyibal chwach ri Dios

¹¹ Lic c'o cuaj cambi'ij puwi wa', pero lic c'ayew uk'alajisaxic che alak ma c'ayew che alak camaj alak usuc'.

¹² Lic c'o tan k'ij lo ri' xtzijox ri Utzilaj Tzij che alak; ec'u ri lic ube e tane e la' alak chi aj c'utunel re wa'. Na ruc' ta c'u ri', lic ne cajawaxic cac'ut tanchi che alak ronoje ri nabe xmaj lo alak puwi ri Utzilaj Tzij re ri Dios. E pacha' cajawax tanchi che alak catij alak tz'um ma c'amaja' camaj alak utijic ri cowilaj wa'im. ¹³ Ma e junok c'amaja' umajom usuc' ri cubi'ij Rutzij Upixab ri Dios puwi sa' ri usuc' y sa' ri na usuc' taj, ri' e pacha' juna ne' c'a cutij utz'um. ¹⁴ Ri cowilaj wa'im xew takal chique ri e nima'k chic; jec'ula' c'o c'utunic chupa Rutzij Upixab ri Dios xew quemajaw usuc' ri queta'am sa'

ri utz y sa' ri na utz taj chwach ri Dios yey lic quitakem c'u u'anic ri utz.

6

¹ E uwari'che chojq'uiy chwach ri Dios, na xew ta que'ec kana'oj chwi lo ri nabe c'utunic puwi ri Cristo; wa' e c'utunic puwi ri rok'otaxic tak can ri na jinta cutikoj ma xew cuc'am lo camic, c'utunic puwi ri cubulibal c'u'xaj chwach ri Dios, ² c'utunic puwi ri bautismo, c'utunic puwi tak ri cac'ul che ri Dios echiri' raj wach re riglesia caquiya ri quik'ab puwi junok,* c'utunic puwi ri c'astajibal que ri ecaminak y c'utunic puwi ri k'atbal tzij cu'an ri Dios paquiwi ri ticawex pa ri q'uisbal k'ij yey ri cubi'ij Rire na jinta utakexic e cu'ano.* ³ Cojq'uiy c'u ri' xew we ri Dios cuya kaq'uiyibal.

⁴ Ma we e c'o ri xquicoj ri K'ijsak julajok, lic xequi'cot ruc' ri sipanic re chila' chicaj, e jun cuc' ri xquic'ul ri Santowilaj Ruxlabixel ri Dios, ⁵ lic xuc'ul quic'u'x ri Utzilaj Tzij re ri Dios y xquina' ne ruchuk'ab ri Dios ri lic cak'alajisax pa sakil wi chikawach apanok; ⁶ yey we rique caquesaj quib chirij ri Cristo, ri' na caya'taj ta chi chique caquitzelej quitzij y quetzelej tanchi pa ri K'ijsak. Ma e pacha' que-tajin tanchi che ucamisaxic Ruc'ajol ri Dios chwa ri cruz y caqui'q'uixbesaj Rire chiwachil ruma ri caqui'ano.

⁷ Ma ri c'o quiq'uiyibal chwach ri Dios e jela' pacha' rulew echiri' cutz'ubaj chi utz ri jab catzakic. We xel c'u lo ri' ri tico'n, ri rutzil uc'u'x ri Dios cac'o'ji' puwi wu'lew, ma xuya ri cajawax chique ri xeticow re. ⁸ No'j we chwa rulew xew quel lo q'uiy y tzacam, ri' na jinta c'ana uchac chwach ri Dios. Ruma c'u ri', cak'at tzij puwi' y chikawach apanok caprox uwach.

Lic jiquil uwach rubi'tisim ri Dios chike

⁹ Hermanos ri lic c'ax canna' alak, tob c'u jewa' ubi'xiquil can'an che alak, nujiqubam nuc'u'x na esam ta ib alak chirij ri Cristo y c'o alak pa ri be re colobetajic. ¹⁰ Ri Dios lic jusuc' ma na cumesc'utaj ta ri chomilaj chac 'anom alak pa rubi' y ri rutzil c'u'xaj c'utum alak chique ri quicojom rubi', ma lic xenimaj alak y c'a catajin ne alak che u'anic wa' wo'ora. ¹¹ Yey ri cakaj ri'oj e chijujunal alak chuk'ubej ib alak che u'anic ri utz wo'ora y c'a echiri' copon na ruk'ijol cac'ul alak janipa ri oye'em alak che ri Dios. ¹² Mu'an ne alak xepu, e 'ana alak ri utz jela' pacha' ri caqui'an janipa ri lic cubul quic'u'x ruc' ri Dios y na capax ta quic'u'x che ri c'axc'obic yey ruma c'u wa' caquic'ul ri ubi'tisim lo ri Dios chique.

¹³ Ma echiri' ri Dios xu'an rubi'tisinic che ri Abraham, xujiquiba' uwach wa' chupa rubi' Rire ma na jinta chi junok más c'o uwach chwa Rire. ¹⁴ Jewa' xubi'ij che: Pakatzij wi lic catin'an bendecir y canq'uiyarisaj quiwach rawalc'o'al *Gn. 22:16-17* xcha'.

¹⁵ Ri Abraham lic naj xroye'ej wa' ruc' unimal uc'u'x y jec'ula' xuc'ul rubi'tisim ri Dios che.

¹⁶ Pakatzij wi ri ticawex echiri' c'o caquijiquiba' uwach, caqui'an publi' junok más c'o uwach chiquiwa rique; y jec'ula' ri' caq'uis ronoje ch'a'oj puwi ri xquijiquiba' uwach. ¹⁷ Jec'ula', ri Dios lic xraj xuk'alajisaj pa sakil wi na cujalc'atij ta ri xubi'ij can chique ri caquic'ul rubi'tisim; e uwari'che lic xujiquiba' uwach Ruch'a'tem. ¹⁸ Ruc' c'u wa bi'tisinic xujiquiba' uwach, lic k'alaj na cajalc'atix ta rubi'tisim ri Dios, ma Rire na cu'an ta rak'ubal. E uwari'che ri'oj ri karikom ruto'bal ri Dios, lic nimirinak kac'u'x caka'an ke che ri bi'tisim can chike. ¹⁹ Ruma c'u cubul pan kac'u'x che wa bi'tisim canok, oj tiquil chi utz y jiquil uwach ri

* **6:2** Hch. 8:17; 19:6 * **6:2** Copon ri k'ij echiri' ri Dios cubi'ij china chique caya'i' wi ri c'aslemal na jinta utakexic y china tak ri queya' pa ri camic na jinta utakexic. Ap. 20:11-15

kanima',† ma lic cubul kac'u'x ruc' ri Jun oquinak c'a chila' chicaj chirij ri telón chupa ri Luwar lic Santo.✠
 20 Wa' e ri Jesús, ri xoc chila' kuma ri'oj; y jec'ula' xujak pan ri kabe cha' cojopon ruc' ri Dios. Jec'ula', ri Jesús xu'ana Kajawal na jinta utakexic cach'aw pakawi' chwach ri Dios; xu'ana c'u ri' pacha' ri Melquisedec.✠

7

Ri Jesús y ri Melquisedec

1 Wa' wa Melquisedec e rey re ri tinamit Salem y aj chacunel chwach ri Dios Kajawxel echiri' ri Abraham tzelejinak lo pa ri ch'a'oj pa xuch'ij wi quichuk'ab jujun reyes. Ec'u ri Melquisedec xu'c'ulu pan ri Abraham y xutz'onoj ri rutzil uc'u'x ri Dios puwi'. 2 Tec'uchiri' ri Abraham xresaj rudiezmo che ri xu'ch'aca lo pa ch'a'oj y xuya che ri Melquisedec. Ri bi'aj Melquisedec que'elawi: “Rey Jusuc” yey ri jun chic ubi' e “Rey re Salem”, wa' que'elawi: “Rey re Utzil Chomal”.✠ 3 Na jinta xeta'max paquiwi ruchu-ukaw o paquiwi ri ratz-uchak' ri Melquisedec; y na jinta ne xeta'max puwi ri jekebal re o ri q'uisbal re ruc'aslem. Na jinta c'u utakexic rire e aj chacunel chwach ri Dios jela' pacha' Ruc'ajol ri Dios.

4 Ch'obo pe alak puwi runimal uwach ri Melquisedec, ma ri kamam Abraham xresaj ne rudiezmo che ri xu'ch'aca lo pa ch'a'oj y xuya che. 5 Pakatzij wi, ri e aj chacunel pa Rocho Dios quebel lo chiquixo'l ri e ralc'o'al can ri Leví. Ec'u ri takanic utz'ibam can ri Moisés cubi'ij xew rique c'o paquik'ab caquic'ul chique ri tinamit ri diezmo che ronoje ri c'o cuc', tob ri quekasanic e ralc'o'al can ri Abraham jela' pacha' ri quec'uluw re wa'. 6 No'j ri Melquisedec tob

na e ta cuq'u'il ri ralc'o'al can ri Leví, xuc'am rudiezmo ri Abraham, y xutz'onoj ri rutzil uc'u'x ri Dios puwi ri Abraham, ri jun x'an ri bi'tisinic che ruma ri Dios. 7 C'o c'u más uwach ri Melquisedec chwa ri Abraham ma konoje keta'am we c'o junok cutz'onoj ri rutzil uc'u'x ri Dios puwi jun chic, ri' más c'o uwach chwa ri cac'uluw re wa'. 8 Ri ralc'o'al ri Leví, ri quec'uluw re ri diezmo pa ri Rocho Dios, rique e ticawex xa quecamic; no'j ri Melquisedec cabi'x che pacha' e jun c'a c'aslic. 9 Pa ri takanic re ri Moisés, e ri ralc'o'al can ri Leví ri takal chique quec'uluw re ri diezmo. Na ruc' ta c'u ri', echiri' ri Abraham xuya rudiezmo che ri Melquisedec, e pacha' e ri Leví xuya rudiezmo che; 10 ma tob ri Leví c'amaja' ne calaxic, e junam ruc' c'o chi ruc' rumam Abraham echiri' xe'c'ul pan ruma ri Melquisedec. 11 Chique ri e ralc'o'al ri Leví xya' wi ri quebu'an e aj chacunel pa Rocho Dios.* We ta e la' casuc'upitaj ri ticawex cuma rique, ¿sa' c'u cutikoj ri' cayactaj jun chic aj chacunel chwach ri Dios pacha' ri Melquisedec, yey na e ta pacha' ri Aarón,† ri jun ralc'o'al can ri Leví? 12 Ma we ta c'o junok cac'o'ji' aj chacunel pa Rocho Dios yey na e ta cuq'u'il ri e ralc'o'al can ri Leví, ri' lic chirajawaxic wi cajalc'atix ri takanic tz'ibital can ruma ri Moisés puwi china ri takal che cu'an aj chacunel pa Rocho Dios. 13 Ec'u ri Kanimajawal, ri Jun cach'a't Ruch'a'tem ri Dios puwi',✠ Rire na e ta cuq'u'il ri e ralc'o'al can ri Leví pa quipetebem wi ri queniman chwach ri altar re ri Dios. Ma Rire e cuq'u'il ri ralc'o'al can ri Judá, yey na jinta junok chique rique xu'an aj chacunel pa Rocho Dios. 14 Ma lic k'alaj ri Kanima-

† **6:19** Pa ri ch'a'tem griego cubi'ij e ri cubul pan kac'u'x che e jun “ancla”. Wa' e jun nimalaj ch'ich' pacha' ansuelo tzayal che ri barco. Echiri' catz'ir chupa ri ya', camukutaj pa ri sanyeb re cutac'aba' ri barco. ✠ **6:19** Heb. 9:3-12 ✠ **6:20** Sal. 110:4 ✠ **7:2** Gn. 14:17-20 * **7:11** Ri quichac raj chacunel pa Rocho Dios e caquic'ut ri Tzij Pixab re ri Dios chiquiwach ri tinamit, quech'aw chwach ri Dios paquiwi ri tinamit, quequicamisaj rawaj chwi raltar y caquic'ul tak ri kasa'n. † **7:11** Ri Aarón e nabe cajawal raj chacunel pa Rocho Dios echiri' ri Dios xuya Rutzij Upixab che ri Moisés. ✠ **7:13** Heb. 7:17

jawal e jun chique ri e ralc'o'al can ri Judá y paquiwi rique na junta ne xuch'a'tibej can ri Moisés puwi ri chac pa Rocho Dios. ¹⁵ Y wa' más cak'alajinic we cakamaj usuc', ri Jun xcojic re cach'aw paquiwi ri ticawex, e pacha' ri Melquisedec. ¹⁶ Ma ri Jesús na xu'an ta aj chacunel pa Rocho Dios jela' pacha' ri cubi'ij ri takanic re ri Tzij Pixab; ma chupa wa' cak'alajin wi xew ri e ralc'o'al can ri Leví quecojic e aj chacunel pa Rocho Dios, no'j Rire xcojic ruma ruchuk'ab ruc'aslemal na junta casachaw uwach. ¹⁷ Ma jewa' cubi'ij ri Dios chwi Rire:

Ri'at na junta utakexic catc'oji'ic at waj chac,

ri catch'aw paquiwi ri ticawex chinuwach Ri'in

jela' pacha' ri Melquisedec* *Sal. 110:4*
cacha'.

¹⁸ Ec'u ri takanic paquiwi raj chacunel pa Rocho Dios na junta chi cutikoj, ma wa' na junta ucowil y na junta uchuk'ab re quebucolobej ri ticawex. ¹⁹ Ma na junta junok cu'ana jusuc' ruma ri takanic. Yey wo'ora c'o ri más cubul pan kac'u'x che, y ruma c'u ri wa', utz cojkib ruc' ri Dios.

²⁰ Echiri' ri Dios xuya che ri Jesús cach'aw paquiwi ri ticawex chwach Rire, e lic xujiquiba' uwach ri xu'ano.

²¹ Ma ri jujun chic aj chacunel pa Rocho Dios xa e cojotalic y na junta c'o xjiquibax uwach chique. No'j chwi ri Jesús lic c'o jiquibam uwach, ma chupa Ruch'a'tem ri Dios, jewa' cubi'ij:

Ri Dios lic xujiquiba' uwach ri xubi'ij, y na cujec' ta c'ana rib che wa' wa xubi'ij:

“Ri'at na junta utakexic catc'oji'ic at waj chac,

ri catch'aw paquiwi ri ticawex chinuwach Ri'in

jela' pacha' ri Melquisedec.”*
Sal. 110:4

²² E uwari'che, ri Kanimajawal Jesucristo e xjiquiban uwach jun Tzij más c'o uwach chwa ri nabe.

²³ E tak ri jujun chic e aj chacunel pa Rocho Dios na quecowin taj, ma xa quecamic yey paquic'axel rique quecanaj can jujun chic. Ruma la' lic xebu'ana e q'ui. ²⁴ No'j ri Jesús ruma na junta utakexic ruc'aslemal, na junta c'u utakexic ri chac cu'ano re cach'aw pakawi' chwach ri Dios. ²⁵ Ruma c'u wa' na junta utakexic ri colobetajic cuya ri Jesús chique ri quekib ruc' ri Dios ruma Rire. Yey ruma na junta utakexic ruc'aslemal, c'o puk'ab xaki cach'aw lo paquiwi' chwach ri Dios.

²⁶ E Rire ri Kajawal lic cajawax chike cach'aw pakawi' chwach ri Dios, ma xuc'ut jun binic lic jusuc', na junta c'ana rak'ubal xu'ano, na junta c'ana umac, na xu'an tane re cuc' raj maquib y wo'ora yactal uk'ij chila' chicaj chwi ronoje tak ri u'anom ri Dios. ²⁷ Na cajawax ta c'u che Rire cu'an pacha' ri xqui'an ri jujun chic cajawal raj chacunel pa Rocho Dios. Ma rique ri jujun k'ij, nabe na caquiya puwi raltar ri awaj ecamisam ruma ri quimac rique, y c'a tec'uchiri', caquiya ri awaj ecamisam ruma ri quimac ri tinamit. No'j ri Jesús xa julaj xuya rib pa c'axc'obic cuma conoje ri winak.

²⁸ Ec'u ri takanic re ojertan catakan che cacoj cajawal raj chacunel pa Rocho Dios. Yey tak wa cajawal xa e achijab y ruma ri' na caquich'ij ta u'anic ronoje Rutzij Upixab ri Dios. No'j wo'ora ri Dios xujiquiba' uwach, Ruc'ajol e Kajawal cach'aw lo pakawi' yey na junta c'u utakexic xew Rire cu'an chi jusuc' y tz'akat janipa ri uya'om ri Dios puk'ab.

8

Ri c'ac' tzij

¹ Ec'u ruc'u'xibal wa cojtajin che ubi'xiquil e wa': C'o ri Jun cach'aw pakawi' chwach ri Dios, wa' e ri Kajawal, ri xtz'uyi' pa ri luwar lic c'o

uwach puwiquik'ab ri Dios, ri Nimalaj Takanel chila' chicaj. ² Cach'aw c'u pakawi' chupa ri sakil Rocho Dios chila' chicaj; yey wa' e ri Dios Kajawxel x'anaw re, na juna achi taj.

³ Conoje c'u ri cajawal raj chacunel pa Rocho Dios xecojic cha' caquiya chwach raltar ri kasa'n y rawaj quecamisaxic. Jec'ula' chirajawaxic c'o cuya ri Kajawal chwach ri Dios. ⁴ We ta c'a c'o ri Jesús che ruwachulew, ri' na aj ta chacunel pa Rocho Dios, ma wara c'a e c'o aj chacunel caquik'atisaj ri kasa'n chwach ri Dios pacha' ri cubi'ij ri takanic tz'ibital can ruma ri Moisés. ⁵ Yey ri chac caqui'an rique, xa e uc'axwach y c'utubal re ri ca'an chila' chicaj. Ma echiri' xtak che ri Moisés cuyac ri Rocho Dios xa caquiric, jewa' xubi'ij ri Dios che:

Chawilape', ri wocho cayaco, e cha'ana ronoje che
jela' pacha' ri xinc'ut chawach chwa
wa juyub *Éx. 25:40*
xcha'.

⁶ No'j wo'ora ruchac ri Kajawal más utz chwa ri quichac raj chacunel pa Rocho Dios, ma ruma Rire ri Dios xu'an jun c'ac' tzij kuc' ri'oj. Yey chupa wa tzij c'o bi'tisinic más chom chwa ri re ojertan. ⁷ We ta ec'u la' lic tz'akat xel ri nabe tzij,* ri' pakatzij wi na cajawax tane juna c'ac' tzij. ⁸ Ma ri Dios xuya wa pixabanic chique rutinamit, jewa' xubi'ij:

¡Chitape'! cacha ri Dios Kajawxel.
Copon na ri k'ij echiri' Ri'in can'an jun c'ac' tzij
cuc' ri tinamit e aj Israel y cuc' ri tinamit e aj Judá.†

⁹ Yey wa' na je ta la' pacha' ri tzij xin'an cuc' ri quichu-quikaw ojertan
echiri' nuchapom che ri quik'ab, xebenuwesaj lo Egipto.
Pero rique na xquitakej ta ri tzij xin'an cuc';

ruma c'u ri', xebenuya canok, cacha ri Dios Kajawxel.

¹⁰ Q'uisbal c'u re tak la' la k'ij, e tzij wa' can'an cuc' ri tinamit Israel, cubi'ij ri Dios Kajawxel: Cancoj ri nutzijpixab pa quijolom y cantz'ibaj pa canima'.

Ec'u Ri'in quinu'an in qui Dios y rique quebu'an e nutinamit.

¹¹ Yey na cajawax ta nenare' c'o junok quebupixabaj
ri rachbi'il y ri ratz-uchak', jewa' cubi'ij chique: “Chaweta'maj uwach ri Dios Kajawxel.”

Ma chupa la' la k'ij conoje queta'am nuwach Ri'in,
chinima'k chich'uti'k.

¹² Cancuy c'u quimac
y na cac'un ta chi ne c'ana chinuc'u'x ri na utz taj xqui'ano *Jer. 31:31-34*

xcha'. ¹³ Echiri' cabi'x “c'ac' tzij”, e que'elawi c'o jun k'ij ri nabe xa quic'owic, ma janipa tak ri cu'an k'e'l y na junta chi uchac, ri' catajin usachic uwach.

9

Ri Rocho Dios che ruwachulew y ri c'o chila' chicaj

¹ Chupa c'u ri nabe tzij c'o takanic puwi' su'anic calok'nimax uk'ij ri Dios pa jun luwar santo wara che ruwachulew. ² Xyac c'u jun nimalaj carpa “Tabernáculo”[✳] quecha che. Wa' queb upa u'anom. Ri nabe upa ja cabi'x “Luwar Santo” che. Chiri' c'o wi ri tzuc'ulibal ak' y c'o ri mexa pa caya' wi ri pam ya'tal chwach ri Dios. ³ Chirij c'u jun telón c'o ruca'm upa ja cabi'x “Luwar lic Santo” che. ⁴ Chiri' c'u ri' c'o jun altar re oro pa caporox wi incienso[✳] y c'o ri caxa re ri tzij u'anom ri Dios cuc' rutinamit yey wa caxa ch'ukum rij ruc' oro. Chupa c'u ri caxa c'o jun xaro re oro c'o maná chupa, c'o ri bara re ri Aarón, wa' e ri bara xtuxic y c'o ri jutak pera'j abaj pa xtz'ibax wi ri takanic

* **8:7** Wa nabe tzij e ri xu'an ri Dios cuc' rutinamit Israel chwa ri juyub Sinaí. † **8:8** Chwi lo ri takanic re ri Salomón, xquijach quib rutinamit ri Dios. Xebu'an queb; jun cabi'x “Israel” che y ri jun chic, “Judá”. ✳ **9:2** Éx. 26:1-30 ✳ **9:4** Éx. 30:1-6 ✳ **9:4** Dt. 10:1-5

re ri tzij u'anom ri Dios cuc' rutina-mit.✧ 5 Puwi c'u ri caxa c'o queb quic'axwach querubines lic quewon ruc' ruchomalil ri Dios; yey ruc' ri quixic' quich'ukum uwi' ri luwar re cuybal mac.* Pero wo'ora na cojch'a't ta chi más puwi wa'.

6 Jec'uri'la' u'anom ronoje wa'. Chupa c'u ri nabe upa ja re ri Rocho Dios queboc raj chacunel cha' caquilok'nimaj uk'ij ri Dios. 7 No'j chupa c'u ruca'm upa ja, xew coc bi ri cajawal raj chacunel pa Rocho Dios, yey wa' xa julaj cu'an pa ri junab. Echiri' coc bi, ruc'a'am bi quiquiq'uel awaj re cu'ya'a puc'axel rumac rire y puc'axel tak ri mac na u'aniquil taj caqui'an ri tinamit. 8 Ruc' c'u wa' ri Santowilaj Ruxlabixel ri Dios e cuc'ut chike: Xalok' c'a c'o wa nabe upa ja, e que'elok na utz taj chique ri ticawex queboc chupa ri Luwar lic Santo,† ma c'amaja' cak'alajinic su'anic utz queboc chwach ri Dios. 9 Ronoje wa' e jun c'utubal chike ri'oj wak'ij ora, ri kasa'n y rawaj ecamisam chwa raltar na cu'an ta jusuc' che ri quibinic quisilabic ri quelok'niman ri Dios ruc' wa'; ma tob caqui'an ri', c'a caquina' chiquic'u'x c'o quimac. 10 Ma wa takanic puwi sa' ri catijic y ri cakumic y puwi sa' ri ca'anic re josk'iquil, xew xurik uchac xalok' c'amaja' copon ruk'ijol echiri' ronoje wa' cajalc'atix ruma ri Dios ruc' ri más utz.

Ruquiq'uel ri Cristo caresaj ri mac

11 Ruc' ri Cristo cape wi ronoje ri utz cakac'ul ri'oj, ma wo'ora e Rire ri Kajawal cach'aw pakawi' pa ri Rocho Dios chila' chicaj. Yey wa' wa Rocho Dios más nim y más tz'akat chwa ri xu'an ri Moisés chupa

ri luwar catz'intz'otic, ma na achi-jab ta ri xeyacaw re y na re tane wara che ruwachulew. 12 Ri Cristo xa jumul xoc chupa ri Luwar lic Santo cha' cuya colobetajic na jinta utakexic chike. Xu'an c'u wa' na ruma ta quiquiq'uel caprux mama'ib o toro'ib, ma e ruma ruquiq'uel Rire.

13 Ri nabe tzij cubi'ij we juna ticawex xuch'ulaj rib ruma ri xuchapo,‡ cajawax rujosk'iquil; camac'amo'x c'u puwi rire quiquiq'uel toro'ib y caprux mama'ib ecamisam✧ y chaaj re juna baquilo xporox chwi raltar,✧ cha' cu'an tanchi chom y jec'ula' utz coc pa ri Rocho Dios.

14 We cu'an c'u ri' wa' ruquiq'uel juna awaj, jmac'uware' ruquiq'uel ri Cristo! Ma ruma ri Ruxlabixel ri Dios na jinta utakexic, ri Cristo, ri na jinta c'ana umac, xuya rib pa camic chwach ri Dios cha' jela' cujosk'ij ri kanima' che ri mac, ri cuc'am lo k'atbal tzij re camic pakawi'. Jec'ula' ruma ri Cristo cakana' chikac'u'x na jinta chi kamac y utz c'u ri' cakalok'nimaj ri Dios c'aslic.

15 Ruma c'u ri' la', ri Cristo e cac'amaw kawach chwach ri Dios chupa ri c'ac' tzij. Yey ruma rucamic, c'o cuybal mac chique ri xemacun chuxe' ri nabe tzij,§ cha' jela' conoje ri ebusiq'uim ri Dios caquic'ul na ri ubi'tisim Rire chique yey wa' na jinta utakexic. 16 Wa jun c'ac' tzij e pacha' juna tzij cutz'ibaj junok cha' cubi'ij china tak quecanaj can ruc' rubitak re we xcamic. Yey cha' utz ca'an ri tz'ibital canok, lic chirajawaxic wi nabe na cak'alajisaxic we caminak chi ri xtz'iban re ri wuj. 17 Ec'u wa tzij cajiqui' uwach xew we xcam ri xtz'iban re, yey we ri xtz'iban re c'a c'aslic, ri' c'amaja' utz cajiqui'

* 9:5 Puwi wa caxa camac'amo'x ri quic' re awaj ecamisam echiri' catz'onox cuybal quimac tak ri ticawex chwach ri Dios. Lv. 16:14 † 9:8 Raj chacunel pa Rocho Dios xquiporaj incienso y xquiya kasa'n chupa ri nabe upa ja re ri Rocho Dios, pero na utz ta queboc chupa ruca'm upa ja, wa' e ri Luwar lic Santo. Ma xew takal che ri cajawal raj chacunel coc chupa yey xa julaj cu'an wa' pa ri junab. No'j wo'ora ri Cristo e ri Kajawal cach'aw pakawi' chwach ri Dios chila' chicaj, y ruma c'u Rire utz cojoc chwach ri Dios. Heb. 10:19-20 ‡ 9:13 Pa ri Tzij Pixab re ojertan cubi'ij cu'an ch'ul juna ticawex we cuchap juna anima' o cataq'ui' puwi juna mukubal. Nm. 19:16 ✧ 9:13 Lv. 15:31; 16:15-16 ✧ 9:13 Nm. 19 § 9:15 Ri nabe tzij e ri xu'an ri Dios cuc' rutinamit Israel chwa ri juyub Sinaí.

uwach wa'. ¹⁸ Jenela' ri nabe tzij xjiqui' lo uwach ruc' quiquiq'uel awaj ecamisam. ¹⁹ Ma ri Moisés nabe na xubi'ij ronoje ri takanic re ri Tzij Pixab chique conoje ri tinamit; tec'uchiri' xuc'am lana cak y ruc' jun uk'ab che' re hisopo, xuchuk' chupa ri quiquiq'uel toro'ib y caprux mama'ib ecamisam yey wa' cojotal ya' chwach. Tec'uchiri' xumac'ama' puwi ri libro re ri Tzij Pixab y paquiwi conoje ri ticawex. ²⁰ Tec'uchiri' xubi'ij chique: «E quic' wa' cujiquiba' uwach ri tzij u'anom lo ri Dios iwuc'»^{*} xcha'. ²¹ Yey pacha' c'u ri xu'an che ri libro, jec'ula' xumac'ama' quiquiq'uel awaj chupa ri Rocho Dios y puwi ronoje ri cachapabexic re calok'nimax ri Dios.^{*} ²² Ma chupa ri tziypixab tz'ibital canok, cubi'ij lic q'ui tak ri josk'inic ca'an ruc' ri quiquiq'uel rawaj, yey na jinta c'u cuybal mac we na caturuw tana ri quiquiq'uel rawaj ecamisam.^{*}

²³ Xajawax c'ut jela' ri josk'inic x'an che tak ri cachapabexic re calok'nimax ri Dios, ri xa e uc'axwach tak ri c'o chila' chicaj. Yey ri josk'inic re chila' chicaj más ne lic utz chwa ri ca'an xa ruc' ri quiquiq'uel rawaj ecamisam chwach raltar wara che ruwachulew. ²⁴ Ma ri Rocho Dios pa xoc wi ri Cristo na e ta ri 'anom cuma ticawex, ma ri re ruwachulew xa e uc'axwach ri sakil Rocho Dios c'o chila' chicaj; ec'u Rire xoc chila' cha' cach'aw pakawi' chwach ri Dios.

²⁵ Ri Cristo xa julaj xuya rib pa camic y xopon c'u chila' chicaj chwach ri Dios. No'j ri cajawal raj chacunel pa Rocho Dios ronoje junab coc chupa ri Luwar lic Santo re cu'ya'a chwach ri Dios ri quic' na ri're taj. ²⁶ We ta chirajawaxic wa' che ri Cristo, uq'uiyal laj tane ri' uya'om rib Rire pa camic chwi lo ri jekebal re ruwachulew; no'j wo'ora chupa wa q'uisbal k'ij xa julaj xuya rib pa camic cha' xa jumul caresaj ri mac. ²⁷ Lic c'u

jiquibam chi uwach conoje ri ticawex xa julaj quecamic, tec'uchiri' cape ri k'atbal tzij paquiwi'. ²⁸ Jec'ula' ri', ri Cristo xa julaj xuya rib pa camic cha' jela' caresaj ri quimac uq'uiyal ticawex. No'j echiri' cac'un tanchic, na re ta chi co'lcam ruma ri mac que ri winak, ma e re quebucolobej conoje ri coye'em Rire.

10

Ri quic' que rawaj na caresaj ta ri mac

¹ Ri takanic xuya ri Dios che ri Moisés na e ta ri sakil beyomalil caya'i' chikawach apanok, ma xa e uc'axwach. Yey wa takanic na jinta uchuk'ab re cu'an chom che ri canima' ri ticawex, ri caquicoj quib chwach ri Dios cuma rawaj ecamisam chwa raltar chujujunal junab. ² Ma we ta wa takanic asu cuchomaj ri canima' ri quelok'niman ri Dios, ri' na caquiya ta chi chwach ri Dios rawaj ecamisam, ma caquina' c'u ri' chiquic'u'x na jinta chi quimac. ³ No'j na je ta la' u'anom, ma echiri' ri ticawex chujujunal junab caquiya chwach ri Dios rawaj ecamisam, wa' e cucuxtaj chique c'o quimac chwach ri Dios. ⁴ Ma ri quiquiq'uel toro'ib y caprux mama'ib na jinta uchuk'ab re caresaj ri mac.

⁵ E uwari'che ri Cristo echiri' ya cape che ruwachulew, jewa' xubi'ij che ri Dios:

Ri lic ca'aj la na e ta rawaj ecamisam chwa raltar ruc' tak ri kasa'n; e uwari'che xch'ob la caya la ri nu-cuerpo cha' e canya wa' chi-wach la.

⁶ Yey na xuc'ul ta c'u'x la ri kasa'n re awaj eporom chwi raltar y ri ecamisam re cuybal mac.

⁷ Ruma c'u wa' ximbi'ij: Lal Dios, ri' in c'o Ri'in re co'lnu'ana janipa ri rajawal c'u'x la, jela' pacha' ri tz'ibital panuwi' Ri'in pa ri Ch'a'tem la *Sal. 40:6-8*

xcha'. ⁸ Nabe cubi'ij: «Ri Dios na xcha ta uc'u'x che tak rawaj ecamisam chwa raltar y tak ri kasa'n y rawaj eporom chwi raltar y tak rawaj ecamisam re cuybal mac.» Ec'u tak wa' na xuc'ul ta uc'u'x tob e ne Rire xtakan che u'anic wa'. ⁹ Tec'uchiri' xubi'ij: «Ri' in c'o Ri'in re co'lnu'ana janipa ri rajawal uc'u'x ri Dios.» Ri que'elawi e quel ri ca'an ojertan re quecamisax awaj chwach ri Dios y puc'axel wa' e catiqui' can ri xu'an ri Cristo. ¹⁰ Jec'ula' ri Kanimajawal Jesucristo e xu'an ri rajawal uc'u'x ri Dios echiri' xu'an jusuc' chike ruma xuya rucuerpo pa camic; yey wa' xa julaj xu'ano ma na cajawax taj cu'an tanchic.

¹¹ Pakatzij wi juna aj chacunel pa Rocho Dios ronoje k'ij xaki e cu'an ruchac y quebucamisaj c'u rawaj chwa raltar, tob wa' na caresaj ta c'ana ri mac. ¹² No'j ri Cristo xa julaj xuya rib pa camic ruma ri mac; tec'uchiri' xe'tz'ula puwiquik'ab ri Dios. ¹³ Y chwi c'u lo ri' la', e roye'em queya' na xe'rakan Rire ri tzel quebilow re. ¹⁴ Ruma c'u xa julaj xuya rib pa camic, xa jumul xu'an jusuc' chique ri quiya'om quib puk'ab ri Dios. ¹⁵ Yey ri Santowilaj Ruxlabixel ri Dios cujiquiba' uwach wa' chike, ma nabe na cubi'ij:

¹⁶ E tzij wa' can'an cuc' ri nutinamit chupa tak la' la k'ij:

Cancoj ri nutziypixab pa canima'
y cantz'ibaj pa quijolom, cacha ri
Dios Kajawxel. *Jer. 31:33*

¹⁷ Tec'uchiri' cubi'ij:

Y na cac'un ta chi c'ana chinuc'u'x ri
quimac

y ri na utz taj xqui'ano *Jer. 31:34*
cacha'. ¹⁸ Jec'uri'la', we ri mac cuyta-
jinak chic, ri' na cajawax ta chic ca-
camisax awaj chwa raltar re caresaj
ri mac.

*Lic chirajawaxic wi cakachuk'ubej
kib chwach ri Dios*

* **10:20** Mt. 27:51; Mr. 15:38; Heb. 6:19; 9:3-12
puwi ri Rocho Dios". Pa ri ch'a'tem griego ri ch'a'tem "rocho" na xew ta e que'elawi "ri ja", ma también
que'elawi ri ejekel chupa. Heb. 3:6 † **10:22** Wa' e que'elawi echiri' xkac'ul ri bautismo, xkaya can
ri k'e'l kabinic. Ef. 5:26; 1 P. 3:21

¹⁹ E uwari'che hermanos, wo'ora ya'tal chike cojoc chupa ri Luwar lic Santo ruma ruquiq'uel ri Kanimajawal Jesucristo. ²⁰ Ruma c'u ri Cristo, ya'tal jun c'ac' c'aslemal chike y c'o koquibal chwach ri Dios, yey wa' c'ac' oquibal e ri Cristo. Echiri' Rire xu'an ticawex y xcam chwa ri cruz, e xresaj ri k'atibal, ri na xuya ta luwar cojopon chwach ri Dios. E pacha' ri telón c'o pa Rocho Dios, ri na cuya ta luwar chique ri ticawex queboc pa ri Luwar lic Santo. Yey wa' xrich'robic echiri' xcam ri Cristo.*

²¹ Ec'u wo'ora c'o ri Kajawal lic nim uk'ij, ri cach'aw pakawi' chwach ri Dios yey catakan pakawi' ri oj utinamit ri Dios.* ²² E uwari'che chojkib chwach ri Dios ruc' ronoje kanima' y ruc' ri cubulibal kac'u'x tiquil chi utz, ma cuna' kac'u'x na jinta chi kamac ruma josk'ital ri kanima' che ri na utz taj, jela' pacha' ri kacuerpo echiri' ch'ajtal chi ruc' chomilaj ya'.† ²³ E kajiquibam uwach cakac'ul janipa rubi'tisim ri Dios; lic chojtiquila c'u jusuc' che ri cubulibal kac'u'x puwi ri koye'em che ri Dios, ma Rire na cujalc'atij ta rubi'tisinic u'anom chike. ²⁴ Katzucuj c'ut su'anic cakato' kib chikibil kib cha' jela' canimar ri rutzil kac'u'x y ri utzilaj chac caka'ano. ²⁵ Maka'an ke'oj pacha' ri caqui'an jujun, ri cok'otam caquimol quib kuc' re cakalok'nimaj uk'ij ri Dios y re cakanimarisaj kac'u'x chikawach; ri ka'ana' e más kapixabaj kib chikawach wo'ora, ma keta'am ruc'unibal ri Kanimajawal Jesucristo lic xa nakaj chi c'o lo wi.

Makesaj kib chirij ri Cristo

²⁶ We e la' lic xkamaj usuc' ri K'ijsak puwi ri Cristo, yey na ruc' ta c'u ri', lic u'aniquil wi cojmacun chirij Rire, makach'ob c'u ri', c'a c'o caya'i' chwach ri Dios re caresaj ri kamac. ²⁷ Ma we e caka'an wa', ri' catewun chi ne pakawi' runimal

* **10:21** Pa ri ch'a'tem griego cubi'ij "catakan
ri ch'a'tem griego ri ch'a'tem "rocho" na xew ta e que'elawi "ri ja", ma también

k'atbal tzij xibibal uwach y ri ak' cajinowic pa queya' wi conoje ri tzel caquil ri Dios. ²⁸ Echiri' c'o junok cupalajij ri Tzij Pixab re ri Moisés, yey we e c'o c'u ca'ib oxibok xebilow re, ri' asu cacamisaxic.✧ ²⁹ Jec'ula', we c'o junok cuc'ak bi uk'ij Ruc'ajol ri Dios, cu'an pacha' na jinta uchac che ruquiq'uel ri Kanimajawal Jesucristo y tzel cach'a't ne chirij ri Ruxlabixel ri Dios ¿na cuc'ul ta neba unimal c'axc'obic ruma cu'an wa'? Ma ruquiq'uel ri Kanimajawal e cujiquiba' ri tzij u'anom ri Dios kuc' y cu'an jusuc' chike; yey ri Ruxlabixel ri Dios e caya'w ri unimal rutzil uc'u'x ri Dios chike. ³⁰ Ma ri'oj keta'am china ri xubi'ij wa':

Panuk'ab Ri'in c'o wi cank'at tzij paquiwi ri quebanaw re ri na utz taj;

In c'u ri' ri quin'anaw uc'axel chique *Dt. 32:35*

xcha ri Dios Kajawxel. Yey jewa' tanchi cubi'ij:

E ri Dios cak'ataw tzij puwi rutinamit *Dt. 32:36; Sal. 135:14*

cacha'. ³¹ ¡Lic c'u xibibal uwach che junok we ruma cupetisaj royowal ri Dios c'aslic, catzak puk'ab Rire!

³² C'una c'u chic'u'x alak, echiri' c'ac' xc'ul alak ri K'ijsak, lic xcuy alak ruc' unimal c'u'xaj ri c'axc'obic xic'owibej alak ruma cojom alak rubi' ri Cristo. ³³ Jutak laj c'u ri', c'o ri xquich'amij alak y lic xqui'an c'ax che alak chiquiwach ri winak; jutak laj chic e ne ralak xya' ib alak che quito'ic ri quebic'ow chupa wa' wa c'axc'obic. ³⁴ Lic c'u xjuch' ca'n c'u'x alak chique ri e c'o pa cárcel. Yey echiri' xmaj ne ri bitak e alak, ruc' qui'cotemal xch'ij alak wa'. Ronoje tak wa' xcuy alak ma eta'am alak chila' chicaj c'o wi ri bi'tisim che alak y wa' e ne más utz chwa ri xa re ruwachulew, ma e tak ri c'o chila' chicaj lic cacowinic.

³⁵ E uwari'che lic maya can alak ri cubulibal c'u'x alak ruc' ri Dios, ma

la' la cubulibal c'u'xaj cuc'am lo unimal rajil uc'axel che alak. ³⁶ Lic c'u chirajawaxic cach'ij alak ri c'axc'obic cape paw'i alak ruc' unimal c'u'xaj, cha' echiri' 'anom chi alak janipa ri rajawal uc'u'x ri Dios, cac'ul na alak rubi'tisim lo Rire che alak. ³⁷ Ma Ruch'a'tem ri Dios jewa' cubi'ij:

Xa jubik' chi caraj, yey ri Jun cac'unic, cac'un na y na camayin taj.

³⁸ China c'u ri lic jusuc' chinuwach, ri' c'o uc'aslemal ruma ri cubulibal uc'u'x wuc'.

Yey we xresaj rib che ri cubulibal uc'u'x wuc';

Ri'in na quinquic'ot ta chi ruc' *Hab. 2:3-4*

cacha'. ³⁹ Konoje c'u ri'oj, na oj ta cuq'u'il ri caquesaj quib chirij ri Cristo y xa casach quiwach, ma e oj cuq'u'il ri caquic'ul ri c'aslemal na jinta utakexic ruma cubul quic'u'x ruc' Rire.

11

Ri cubulibal c'u'xaj ruc' ri Dios

¹ Ec'u ri cubulibal c'u'xaj ruc' ri Dios que'elok e lic cakajiquiba' uwach cakac'ul ri koye'em che Rire. Ruma ri cubulibal kac'u'x, kacojom lic c'olic janipa ri cuk'alajisaj ri Dios chike, tob wa' na quilitaj taj.

² Lic chom ri xtataj puwi ri quibinic quisilabic ri kati'-kamam ojer-tan ruma ri cubulibal quic'u'x ruc' ri Dios.

³ Ruma ri cubulibal kac'u'x, keta'am ri Dios xch'awic y ruc' c'u ruch'a'tem xu'an ronoje ri c'olic,✧ ma ronoje ri cakil wo'ora upetebem lo che ri na quilitaj ta uwach.

⁴ Ri Abel, ruma ri cubulibal uc'u'x, xuya chwach ri Dios jun kasa'n más utz chwa rukasa'n ri Caín. Ruma la', ri Dios jusuc' xril rubinic usilabic y xuc'ul c'u rukasa'n. Tob c'u caminak chi ri Abel, c'a cach'a't ne wo'ora kuc' ruma ri cubulibal uc'u'x.✧

⁵ Ri Enoc, ruma ri cubulibal uc'u'x ruc' ri Dios, xc'am bi chuc'asliquil chila' chicaj y na xric'owibej ta ri camic. Ec'u rucuerpo na xrikítaj taj,

ma e ri Dios xuc'am bi. Yey ri Enoc echiri' c'a c'o ne che ruwachulew, lic chom xilitaj rubinic usilabic chwach ri Dios.✠ ⁶ No'j e junok na jinta cubulibal uc'u'x ruc' ri Dios, ri' na cuc'ul ta c'ana uc'u'x ri Dios janipa ri cu'an chwach. Ma e junok caraj cakib ruc' ri Dios, lic chirajawaxic cucojo ri Dios c'olic y cucojo Rire cuya rajil uc'axel chique ri quetzucuw re.

⁷ Ri Noé, ruma ri cubulibal uc'u'x ruc' ri Dios, xucojo echiri' xbi'x che ruma ri Dios sa' tak ri catajin lok, tob ne wa' c'amaja' cu'ana'. Xutakej c'u ri xubi'ij ri Dios che y xu'an ri nimalaj barco re quebucolobej rufamilia chupa. Yey ruma wa cubulibal c'u'xaj xuc'utu, xk'alajin c'u ri quimac ri na quicojom ta utzij ri Dios y xpe c'u k'atbal tzij paquiwi'. Ec'u ri' ri Noé ruma xcubi' uc'u'x ruc' ri Dios, e xuc'ul ri utz cuya ri Dios chique ri e jusuc' chwach ruma ri cubulibal quic'u'x ruc'.

⁸ Ri Abraham, ruma ri cubulibal uc'u'x, echiri' xsiq'uix ruma ri Dios, xucoj tzij y xe'ec chupa ri luwar ubi'tisim ri Dios che. Xel c'u bi pa rutinamit, tob na reta'am taj pa que'ec wi. ⁹ Ruma ri cubulibal uc'u'x ruc' ri Dios, ri Abraham xe'jekela pa ri luwar ubi'tisim ri Dios che, tob rire na aj ta chila'. Na xc'o'ji' ta chupa juna ja; xa xjeki' xe' tak carpa, y jela' xqui'an ri Isaac y ri Jacob, ma e ne jun rique xquic'ul ri ubi'tisim lo ri Dios chique. ¹⁰ Ec'u ri Abraham roye'em ri jun tinamit tz'akom lo chi utz, yey wa tinamit e ri Dios xch'obow re y xyacaw re.

¹¹ Rixok Sara, ruma ri cubulibal uc'u'x ruc' ri Dios, tob lic nimalaj winak chic y na utz tane calanic, xya'taj che xalax jun ralab ma xucojo ri Dios lic e cu'ana na janipa rubi'tisim che. ¹² Jec'ula' ri Abraham, tob ne xa nakaj chi c'o wi lo rucamic, xalax ruc'ajol. Yey tak ri ralc'o'al rire lic xeq'uiyar quiwach, xebu'ana lic e q'ui pacha' ri quiq'uiyal ri ch'umil e

c'o che ruwa caj y pacha' ri sanyeb c'o chuchi' ri mar, ri na utz taj cajilaxic.

¹³ Conoje wa' xecamic echiri' c'amaja' caquic'ul janipa rubi'tisim lo ri Dios chique. Ruma c'u lic xcubi' quic'u'x ruc' ri Dios, e pacha' xquil pan wa' y lic xequi'cot ruc' tak ri xquil apanok. Y ruc' wa', xquik'alajisaj rique na e ta aj wara che ruwachulew, xa ebic'owel. ¹⁴ Yey ri caquik'alajisaj wa', caquic'utu que-tajin che utzucuxic jun quitinamit pa quejeki' wi. ¹⁵ We ta e la' c'a caquich'ob rakan puwi ri tinamit pa xebel lo wi, ri' lic paquik'ab c'o wi quetzelej tanchi chila'. ¹⁶ No'j rique e xcaj jun quitinamit lic junwi, wa' e ri jun chomilaj tinamit chila' chicaj. E uwari'che, ri Dios na caq'uix ta che cabi'x che e Dios que rique, ma uyijbam chi jun quitinamit lic chom chila' chicaj.

¹⁷ Ec'u ri Abraham, ruma ri cubulibal uc'u'x ruc' ri Dios, echiri' xc'am upa, xuc'am bi ruc'ajol Isaac re cucamisaj chwi raltar, tob xew ne uc'ajol ri' yey puwi rire u'anom ri bi'tisinic ri Dios echiri' jewa' xubi'ij canok: ¹⁸ «Xew che rac'ajol Isaac caquipetebej wi lo rawalc'o'al»✠ xcha'. ¹⁹ Xuya c'u ranima' ruc'ajol ma lic reta'am ri Dios c'o uchuk'ab re cuc'astajisaj lo ri Isaac chiquixo'l ri ecaminak, y echiri' ri Dios xuya tanchi che, e pacha' xuc'ul tanchi ruc'ajol chiquixo'l ri ecaminak.

²⁰ Ri Isaac, ruma ri cubulibal uc'u'x ruc' ri Dios, echiri' xebu'an bendecir ri Jacob y ri Esaú, xujiquiba' uwach chom tak sipanic cuya ri Dios chique chwach apanok.✠ ²¹ Jec'ula', ri Jacob ruma ri cubulibal uc'u'x ruc' ri Dios, echiri' xa nakaj chi c'o wi rucamic, xebu'an can bendecir ri queb uc'ajol ri José, xutz'onoj chom tak sipanic re ri Dios paquiwi' chiquijujunal y lic xulok'nimaj uk'ij ri Dios e ri' yuxul chwi ruch'ami'y.✠

²² Ri José, ruma ri cubulibal uc'u'x ruc' ri Dios, echiri' xa nakaj chi c'o wi

rucamic, xuk'alajisaj c'o jun k'ij raj Israel quebel bi chupa ri tinamit Egipto cha' quetzelej tanchi pa ri luwar ubi'tisim ri Dios chique. Y xtakan c'u canok sa' ca'an che rubakil echiri' quebel bi, ma xraj camuki' rubakil chila'.[✧]

²³ Ruchu-ukaw ri Moisés, ruma ri cubulibal quic'u'x ruc' ri Dios, xquewaj ri Moisés oxib ic', ma xquilo lic chomilaj ac'a. Na xquixi'ij ta c'u quib che ri takanic re ri rey echiri' xutak quicamisaxic conoje ri raltak co alabo e aj Israel.[✧]

²⁴ Ri Moisés, ruma ri cubulibal uc'u'x ruc' ri Dios, echiri' xnimaric na xraj ta chic cabi'x che e ralab rumi'al ri faraón, ri rey re Egipto. ²⁵ Xucha' c'u ri cutij c'ax junam cuc' rutinamit ri Dios* chwa ri cac'o'ji' chupa rukusil ri mac, ma wa' xa quic'owic. ²⁶ Ec'u ri beyomalil más c'o uwach chwach rire e ri cach'amixic pacha' x'an che ri Cristo, na e ta tak ri beyomalil re Egipto; ma runa'oj e c'o pan puwi ri rajil uc'axel cuya ri Dios che chwach apanok. ²⁷ Ruma c'u ri cubulibal uc'u'x ruc' ri Dios, xel bi Egipto y na xuxi'ij ta c'ana rib chwa ri royowal ri rey. Ec'u ri xu'ano e lic xuchuk'ubej rib che ri cu'ano, ma e pacha' lic cutzutza' chi pan uwach ri Dios, tob Rire na quilitaj ta uwach. ²⁸ Ruma c'u ri cubulibal uc'u'x ruc' ri Dios, e xu'an ri xtak che; xuyijba' ri nimak'ij Pascua y xtakan che casok' uquiq'uel bexex che tak ruchi' ja cha' echiri' quic'ow ru ángel ri Dios, na cucamisaj ta can ri nabe calc'o'al ri e aj Israel.[✧]

²⁹ Ri tinamit Israel, ruma ri cubulibal quic'u'x ruc' ri Dios, xebic'ow chupa ri mar Rojo echiri' wa' xjakataj upa y e la' pa chaki'j ulew xebic'owic. No'j echiri' raj Egipto xquijek quebic'ow chupa ri mar, ri ya' xuc'ul tanchi rib y jela' xejik' can chupa.[✧]

³⁰ Raj Israel, ruma ri cubulibal

quic'u'x ruc' ri Dios, xebin chirij ri tinamit Jericó wukub k'ij, y tec'uchiri' xwuluwub lo ri tapia re ri tinamit.[✧]

³¹ Ri Rahab e jun ixok retz'abem uwa uk'ij cuc' achijab; na ruc' ta c'u ri', ruma xcubi' uc'u'x ruc' ri Dios, na xcam ta cuc' ri e aj palajiy tzij e aj Jericó, ma rire xebuc'ul chi utzil chomal ri e c'ac'alanel e aj Israel y xebuto'o.[✧]

³² ¿Sa' chi más cambi'ij? Ma na cu'an ta wa jun k'ij quinch'a't chwi ri cubulibal quic'u'x ri Gedeón, ri Barác, ri Sansón, ri Jefté, ri David, ri Samuel y ri k'alajisanelab. ³³ Ruma ri cubulibal quic'u'x ruc' ri Dios, e c'o ri xquich'ij uchuk'ab uq'uiyal tinamit, xetakan c'u paquiwi' chi jusuc' y lic xquirik ri to'bal re ri Dios bi'tisim lo chique. E c'o ne ri xquitz'apij ruwaque' ri coj cha' na quetij ta cuma. ³⁴ E c'o ne ri xec'ak chupa ri ak' y na xec'at taj. E c'o ri xecolobetaj chwach ri camic ruc' espada. E c'o ri xya'i' quichuk'ab echiri' na junta quichuk'ab, lic xnimar ri quichuk'ab pa ch'a'oj y ruma c'u ri', ri soldados e aj naj xebanimaj bi. ³⁵ E c'o ne ixokib xquic'ul ri calc'o'al e c'astajinak tanchi lo chiquixo'l ri ecaminak.

No'j e c'o jujun chic ticawex, ruma ri na xcaj taj cacok'otaj ri Dios, e xquicha' ri na xetzokpix ta chubi y ruc' c'u unimal c'axc'olil xecamic, ma e xquicha' ri jun chomilaj c'astajibal re c'aslemal na junta utakexic. ³⁶ E c'o jujun chic lic xech'amixic, xjich' quipa, xeya'i' pa carena y xeya' pa cárcel. ³⁷ E c'o ri lic xc'am tak quipa, e c'o ri xecamisax ruc' abaj, e c'o ri xk'ati' quipa ruc' sierra, e c'o ri xecamisax ruc' espada. E c'o ri lic xesutinic quicojom quic'u' xa re utz'u'mal bexex o caprux, x'an niba' chique, lic xpaxir c'u quic'u'x y lic x'an c'ax

✧ **11:22** Gn. 50:24-25; Éx. 13:19 ✧ **11:23** Éx. 1:22-2:2 * **11:25** Rumi'al ri rey re Egipto xuq'uiyisaj ri Moisés y xu'an ralab che. Ruma c'u wa' lic c'o uwach ri Moisés, pero echiri' xnimaric xuya can wa' cha' e cu'an jun cuc' rutinamit ri Dios, tob rique na junta quiwach ma xa e aj chac paquik'ab ri tinamit Egipto. Éx. 2:10-12 ✧ **11:28** Éx. 12:21-30 ✧ **11:29** Éx. 14:21-15:21 ✧ **11:30** Jos. 6:12-21 ✧ **11:31** Jos. 2:1-21; 6:22-25

chique. ³⁸ Rique xebin pa tak luwar catz'intz'otic, xebin pa tak juyub, xejeki' che ruwachulew xe' tak pec y pa tak jul. E tak c'u wa' wa winak re ruwachulew na takal tane chique quec'o'ji' wa nimak e aj chac re ri Dios chiquixo'libal.

³⁹ Tob conoje wa' lic xquic'ut ri cubulibal quic'u'x ruc' ri Dios, na jinta c'u junok chique xuc'ul wara che ruwachulew ronoje rubi'tisim lo ri Dios chique. ⁴⁰ Ma ojertan ri Dios uch'obom chi lo ri más chom† cu'ana' cha' cutz'akatisaj lo ri caraj cu'an kuc' ri'oj junam cuc' rique.

12

Ri k'ilonic re ri Dios chique ri e ralc'o'al

¹ Conoje c'u ri' wa' wa ticawex lic xquic'ut ri cubulibal quic'u'x. Lic chirajawaxic c'u ri' chike ri'oj jela' caka'ano. Ma wa oj c'o wi e pacha' jun c'alalem yey e ri'oj ri cojc'alalic. Ec'u rique cojquitzutza' lok, coye'em cojopon pa ri q'uisbal re ri c'alalem oj c'o wi. Ec'u ri' ri'oj kaya'a can ronoje ri na utz taj calatz'an ke, kaya'a can ronoje ri mac ojura'lim y mojos c'u ri' che ri be c'o chikawach. ² Junok cac'alalic e lic cutzutza' pan ri q'uisbal re pa caraj copon wi. Jec'ula' ri'oj e kaya'a pan ri kawach puwi ri Jesús, ma ruc' Rire cape wi ri cubulibal kac'u'x y e Rire ri catz'akatisan uwach wa'. Xuya c'u ranima' xcam chwa ri cruz tob wa' lic q'uixbal uwach; e xutij ri c'ax ma reta'am we xric'owibej wa', unimal qui'cotemal ri cuc'ulu. Ec'u ri' wo'ora tz'ul puwi quik'ab rutz'ulibal ri Dios.

³ E lic c'ola na'oj alak puwi ri xu'an ri Jesús; ma tob na takal ta che Rire, lic xutij c'ax paquik'ab raj maquib. Macos c'u ralak y mapax ne c'u'x alak chwa ri c'axc'obic. ⁴ Ma ralak c'amaja' ne copon alak c'a chwa ri camic* ruma cach'o'jin alak chirij

ri mac. ⁵ Mic'ow c'u chic'u'x alak ri pixabanic re ri Dios, ri cubi'ij pa Ruch'a'tem che alak, ri alak ralc'o'al Rire:

At walc'o'al, mac'ak bi uk'ij ri k'ilonic re ri Dios,
mapax ne ac'u'x che echiri'
cuch'a'bej apa.

⁶ Ma ri Dios Kajawxel lic quebuk'il janipa ri c'ax quebuna'o y e pacha' kujich' quipa janipa ri u'anom ralc'o'al chique
Pr. 3:11-12
cacha'.

⁷ Lic c'u cuyu alak ri k'ilonic, ma jela' cak'alajinic alak ralc'o'al ri Dios. ¿Na eta'am ta neba alak e rachi c'o ralc'o'al lic chirajawaxic che quebuk'il wa'? ⁸ Jec'uri'la', ri Dios quebuk'il conoje ri e ralc'o'al. No'j we ta ri Dios na cuk'il ta alak, ri' cu'ana pacha' na alak ta sakil ralc'o'al, pacha' na k'alaj taj china ri kaw alak. ⁹ Echiri' oj ac'alab, e ri kachu-kakaw che ruwachulew lic xojquik'ilo y xkanimaj quitzij. ¿Su'chac c'u ri' na cakaya ta kib puk'ab ri Kakaw c'o chila' chicaj cha' jela' cac'o'ji' kac'aslemal chwach Rire? ¹⁰ Ma ri kachu-kakaw xa ajilam junab cojquik'ilo, yey ri caqui'an kuc' xa e chirij ri quina'oj rique. No'j ri Kakaw Dios lic cojupixabaj puwi ri cajawax chike cha' ri kac'aslemal cu'ana jela' pacha' ri chomilaj uc'aslemal Rire. ¹¹ Pakatzij wi na jinta juna k'ilonic lic cuc'ul kac'u'x echiri' oj c'o chupa, ma wa' cu'an c'ax chike. Pero we xkac'ul ri k'ilonic, lic c'o cutikoj chike, ma cusuc'upij ri kabinic kasilabic cha' cojc'o'ji' chi utzil chomal.

¹² Ruma c'u la' lic chuk'ubej ib alak cha' jela' cac'o'ji' uchuk'ab ri k'ab alak cosinak y cacowir ri ch'ec alak siquirinak. ¹³ E c'ama bi alak ri be jusuc' cha' cu'an alak c'amal quiwach ri na e ta tiquil chi utz y jela' rique na quetzak ta chic y na

† **11:40** "Ri más chom": Wa' e que'elawi ri colobetajic cuya ri Cristo. * **12:4** Cubi'ij wa' ma copon ne ri k'ij catewun ri camic paquiwi ri hermanos ruma na caquesaj ta quib che ri cubulibal quic'u'x ruc' ri Cristo. † **12:13** Pa ri ch'a'tem griego cubi'ij "cha' jec'ula' ri jetz' cacunutaj ri rakan y na cujalcatz'ij ta chic".

quebel ta che ri be jusuc'.† 14 Lic chira jawaxic c'ola alak chi utzil chomal cuc' conoje y tijoj ib alak che ri santowilaj binic chwach ri Dios, ma na jinta junok que'ri la uwach ri Dios we na e ta cu'an ri'. 15 Lic chajij ib alak cha' na jinta junok che alak cujam bi ri unimal rutzil uc'u'x ri Dios ruma catiqui' oyowal pa ranima', yey jec'ula' ri' cu'an latz'anel che ri q'uiyibal alak y laj ne querezela jujun chic. 16 Muc'ulumaj e junok che alak caretz'abej uwa uk'ij ruc' junok chic na uc'ulel taj; mac'ak ne bi alak uk'ij janipa ri cuya ri Dios che alak pacha' ri xu'an ri Esaú echiri' xa ruma jun wa'im, xuc'ayij ri takal che rire ruma atzixel.✧ 17 Eta'am chi c'u alak ri', ri Esaú tob lic xurayij chic cuc'ul janipa ri takal che rire ruma atzixel, na xya' ta chi che; tob ne lic xrok'ej, na xurik ta chi ujalcatixic wa'.✧

Ri juyub Sinaí y ri juyub Sion

18 Ec'u ralak na oponinak tane alak chwach jun juyub quilatj wara che ruwachulew pacha' ri juyub† xquil raj Israel ojertan, wa' e ri xjumuw ak' chwach, pa xu'an wi k'eku'm y xu'an cakjik'. 19 Na tom tane alak ruch'awibal ri trompeta y rukul ri Dios jela' pacha' ri xquita raj Israel. Ec'u tak ri xetaw re wa', lic xquitz'onoj cha' na e ta chi ri Dios cach'a't cuc'.✧ 20 Ma rique xquixi'ij quib echiri' xya' wa jun takanic chique: «China ri capaki' lo chwa wa juyub, tob ne juna awaj, ri' cacamisax pa' baj o ruc' lanza»✧ xcha'. 21 Lic xibibal c'u uwach ri' ri xilitajic, ma jenewa' xubi'ij ri Moisés: «Lic quimbirbotic ruma nuxi'im wib»✧ xcha'.

22 No'j wo'ora alak oponinak chwach ri juyub Sion pa ri tinamit re ri Dios c'aslic, ri tinamit Jerusalem chila' chicaj, pa quimolom wi quib uq'uiyal ángeles re caquilok'nimaj uk'ij ri Dios ruc' qui'cotemal. 23 Alak chi bare jun cuc' ri e ralc'o'al ri Dios,§ ri quebopon chila' chicaj ruc' Rire.** Alak oponinak chi chwach ri Dios pa e c'o wi tak ri e jusuc', ri eboquinak chi chila' chicaj, ri 'anom chi chom che ri quic'aslemal ruma ri Dios, ri Aj K'atal Tzij que conoje. 24 Yey alak oponinak chi chwach ri Jesús, ri xtiquiban ri c'ac' tzij xu'an ri Dios kuc'; ri Jesús xu'an wa' ruma ruquiq'uel xturuwic, y wa' más c'o cutikoj chwa ruquiq'uel ri Abel.††

25 E uwari'che lic mac'ak bi alak uk'ij ri Dios, ri capixaban e alak. Ma we na xecolobetaj ta ri xquic'ak bi uk'ij ri Dios ojertan echiri' Rire xuch'a'bej quipa ruma ri Moisés wara che ruwachulew, mac'uwarí' ri'oj na cojcolobetaj taj we e cakac'ak bi uk'ij ri Jun cuch'a'bej lo kapa chila' chicaj.

26 Ma ojertan echiri' xch'aw lo Rire, lic xbarbat rulew, yey wo'ora jewa' ujiquibam uwach:

Jumul chi c'ut can'an wa',

pero na xew ta chi c'u ruwachulew
cambarbatisaj,

ma canyiquiya' ne ruwa caj *Hag. 2:6* cacha'. 27 Echiri' cubi'ij: «Jumul chi c'ut can'an wa',» e que'elawi ronoje ri u'anom ri Dios, ri utz casilabisaxic, wa' cajalc'atix bi; xew c'u catiqui' can ri na utz taj casilabisaxic. 28 Jec'ula', ri'oj cakac'ul jun luwar pa caya'i' wi chike cojtakanic y wa' lic tiquil chi utz y na casach ta uwach. Ruma c'u wa' chojtioxin chwach ri Dios, kakasaj c'u kamejelem chwach y kalok'nimaj

✧ 12:16 Gn. 25:29-34 ✧ 12:17 Gn. 27:30-40 † 12:18 Wa' e ri juyub Sinaí pa xuya wi ri Dios Rutzij Upixab chique raj Israel. Éx. 19:16-19; 20:18-19 ✧ 12:19 Éx. 20:18-21; Dt. 5:22-27 ✧ 12:20 Éx. 19:12-13 ✧ 12:21 Dt. 9:19 § 12:23 Pa ri ch'a'tem griego cubi'ij "ri atzixelab". Chiquixo'l raj judi'ab, ri atzixel lic c'o uwach y lic c'o cuc'ul che rukaw. Jec'ula' conoje ri e re ri Cristo, lic c'o quiwach chwach ri Kakaw Dios y lic c'o caquic'ul che Rire. ** 12:23 Pa ri ch'a'tem griego cubi'ij "ri tz'ibital chi quibi' chila' chicaj". Ap. 21:27 †† 12:24 Ruquiq'uel ri Abel xa xuc'am lo k'atbal tzij puwi ri jun xcamisan re; no'j ruquiq'uel ri Jesús xuc'am lo colobetajic y cuybal mac chike konoje. Gn. 4:10 ✧ 12:29 Dt. 4:24

ruc' xi'in ib. ²⁹ Ma jela' pacha' ri ak' cuporoj ronoje, jec'ula' cu'an ri ka Dios echiri' cusach uwach ronoje ri na utz taj.*

13

Pixabanic chique rutinamit ri Dios

¹ Mok'otaj alak ri c'ax cana' ib alak chiwach alak, ma ralak chak' ib alak chupa rubi' ri Cristo. ² Mic'ow chic'u'x alak ri quec'ul alak chi utz janipa ri quebopon chi ocho alak, ma e c'o ri xebanaw wa' y na xquina'bej taj e ángeles ri xequic'ulu. ³ Memesc'utaj alak ri e c'o pa cárcel, e 'ana alak pacha' c'o alak cuc' pa ri cárcel; yey memesc'utaj ne alak ri e c'o pa c'ax, e 'ana alak pacha' catij alak c'ax junam cuc' rique.

⁴ Lic chu'ana nim uk'ij ri c'ulaniquil chiwach onoje alak y mach'ulaj ne c'ana alak ri tzij 'anom alak chiwach alak; ma conoje ri caquetz'abej uwa quik'ij cuc' jujun chic na quic'ulel taj y conoje ri quemacun chirij ri c'ulaniquil, wa' cak'at tzij paquiwi' ruma ri Dios.

⁵ Me'ec c'u'x alak chwi ri puak. E qui'cota alak ruc' ri c'o uc' alak, ma jewa' ubi'im ri Dios:

Na catinya ta can q'uenok

y na canwok'otaj ta ato'ic *Dt. 31:6, 8;*

Jos. 1:5

xcha'. ⁶ E uwari'che lic cakajiquiba' uwach ri tz'ibital can pa Ruch'a'tem ri Dios:

Ri Nukaw Dios, e Rire ri cato'w we'in; na canxi'ij tane c'ana wib che ri na utz taj

cu'an juna ticawex chwe *Sal.*

118:6

cojcha'.

⁷ Chec'una chic'u'x alak ri e aj c'amal wach e alak, ri xetzijon Ruch'a'tem ri Dios che alak. Ch'obo alak rakan janipa ri utz xuc'am lo ri quibinic quisilabic y e c'ama alak re ri cubulibal quic'u'x ruc' ri Cristo.

⁸ Ri Kanimajawal Jesucristo na calc'atitaj taj; Rire jela' pacha' rojertan, jela' wo'ora y chikawach apanok. ⁹ Matakej c'u alak juna c'utunic junwi y na usuc' taj. Ma e c'o ri lic queboc il che tak ri takanic puwi sa' ri catijic, yey wa' na junta c'ana cutikoj che ri quibinic quisilabic chwach ri Dios. Ec'u ri lic cuya kachuk'ab ri'oj e ri catiqui' ri kanima' chupa ri unimal rutzil uc'u'x ri Dios.

¹⁰ Ri oj re ri Cristo, c'o ri altar ke'oj (wa' e rucamic ri Cristo chwa ri cruz). Ec'u ri quelok'niman pa ri Rocho Dios ruc' awaj ecamisam, na caya'taj ta chique caquic'ul janipa ri ya'tal chike ri'oj ruma rucamic ri Cristo.* ¹¹ Ri cu'an ri cajawal raj chacunel pa Rocho Dios e cucoj bi chupa ri Luwar lic Santo ri quiquiq'uel rawaj ecamisam ruma ri mac que ri tinamit, yey ec'u ri quitijil quesax bi chupa ri tinamit re caporoxic. ¹² Jec'ula' ri Jesús xesax bi chupa ri tinamit echiri' xcamisaxic cha' ruc' ruquiq'uel cujosk'ij ri canima' ri ticawex. ¹³ Jo' c'u ri' ruc' ri Jesús, e pacha' junam ruc' Rire chojelubi chupa ri tinamit y kac'ulu ke'oj ri c'akbal bi kak'ij jela' pacha' x'an che Rire. ¹⁴ Ma wara che ruwachulew na junta juna tinamit lic cacowinic pa utz coj-jeki' wi; ruma c'u ri', e koye'em ri jun katinamit na casach ta uwach.

¹⁵ Ruma c'u la', xaki e kaya'a chwach ri Dios ri kakasa'n re yacbal uk'ij ruma ri Kanimajawal Jesucristo. Kayaca c'u uk'ij rubi' Rire, e kabi'ij Rire e Kanimajawal. ¹⁶ Lic mic'ow chic'u'x alak xaki e 'ana alak ri utz y to'o ib alak chiwach alak. Ma wa' e jun kasa'n lic cuc'ul uc'u'x ri Dios.

¹⁷ Lic cojo alak quitzij ri e aj c'amal wach e alak y ya'a ib alak chitakic cuma, ma chwiquik'ab rique ya'tal wi ruchajixic ri c'aslemal alak chwach ri Dios. Yey rique caquik'alajisaj chwach ri Dios su'anic xqui'an tak ri quichac uc' alak. Lic chirajawaxic c'u ri' caya ib alak chitakic cuma cha' jela' rique utz

* **13:10** Pa ri ch'a'tem griego cubi'ij "na caya'taj ta chique caquitij re ri altar ke'oj".

caqui'an ri quichac ruc' qui'cotemal y na ruc' ta bis ruma ri cu'an alak alc'ayew chique; ma we e ri', na jinta cutikoj ri quichac uc' alak.

¹⁸ Lic 'ana c'u alak orar pakawi'. Ri'oj lic cakana' chikac'u'x utz ri ka'anom, y ruc' c'u ri kabinic kasilabic cakaj caka'an chi utz ronoje. ¹⁹ Yey cantz'onoj co che alak, e 'ana alak orar panuwi' cha' caya'taj tanchi chwe ri'in quinopon tan uc' alak.

Q'uisbal ch'a'tem chique tak riglesias

²⁰ Ri Dios, ri aj ya'l utzil chomal, xuc'astajisaj lo ri Kanimajawal Jesucristo chiquixo'l ri ecaminak. Y ri Cristo e ri Nimalaj Aj Chajinel que rutinamit ri Dios; yey ruc' ruquiq'uel Rire, xujiquiba' uwach ri c'ac' tzij na jinta utakexic. ²¹ Cantz'onoj c'u ri' che ri Dios, chuto'o alak cha' ca'an alak ri utz y jela' ca'an c'u alak janipa ri caraj Rire. Chu'ana c'u Rire uc' alak ruma ri Kanimajawal Jesucristo janipa ri rajawal uc'u'x Rire. Che Rire takal wi ri yacbal uk'ij wak'ij ora y na jinta chi utakexic chikawach apanok. Amén.

²² Yey cantz'onoj che alak hermanos, lic ya'a ib alak che umajic usuc' wa' wa queb oxib pixabanic xintz'ibaj pan che alak y c'ulu alak chi utz.

²³ Cuaj queta'maj alak e ri ka hermano Timoteo elinak chi lo pa cárcel, yey we xc'un tan lok, canc'am bi wuc' echiri' qui'nwila alak.

²⁴ Ya'a alak rutzil quiwach conoje ri e aj c'amal wach e alak cuc' conoje rutinamit ri Dios. Ri e aj Italia caquiya pan rutzil wach alak. ²⁵ C'ulu c'u onoje alak ri unimal rutzil uc'u'x ri Dios. Amén.

Ri carta xutz'ibaj ri Santiago

Ri Santiago cuya pan rutzil quiwach rutinamit ri Dios

¹ Ri'in in Santiago, in aj chac re ri Dios y re ri Kanimajawal Jesucristo. Canya pan rutzil wach ralak alak ri cablajuj tinamit re Israel, ri alak quichom bi che ronoje ruwachulew.

Kach'ija uchuk'ab ri c'axc'obic

² Alak nu hermanos, lic qui'cota alak echiri' quic'ow alak chupa tak uq'uoyal uwach c'axc'obic. ³ Ma eta'am chi alak we cach'ij alak ri c'ambal upa ri cubulibal c'u'x alak ruc' ri Dios, wa' cuc'am lo unimal c'u'xaj che alak. ⁴ Lic c'ola c'u unimal c'u'x alak pa sakil wi cha' jela' cac'ojil alak jusuc' y cacowir alak chi utz, jec'uri'la' na jinta chi c'o cajawax che ri binic silabic alak chwach ri Dios.

⁵ We c'o c'u junok che alak cajawax sakil una'oj, chutz'onox che ri Dios y wa' caya'taj lo che, ma ri Dios na cuxu'yaj ta ri catz'onox che y na cuc'ak tane bi quik'ij ri ticawex c'o caquitz'onox che. ⁶ Yey we junok c'o caraj cutz'onox che ri Dios, lic chirajawaxic che, cacubi' uc'u'x ruc' ri Dios y na queb ta upa ri cubulibal uc'u'x. Ma e ri xa queb upa ri cubulibal uc'u'x, ri' na tiquil ta chi utz; e pacha' ri urepebal uwi ri mar xa cac'am bi jewa' y jeri' ruma ri tew. ⁷ Ec'u junok jewa' u'anom, much'obo we c'o cuc'ul che ri Kajawal. ⁸ Ma ri ticawex xa queb upa che ri cuch'obo, ri' na jinta ucowil che tak ri cu'ano.

⁹ E juna hermano lic na il ta co uwach, lic qui'cota che ri yachal uk'ij cuya ri Dios. ¹⁰ Yey ri hermano beyom lic qui'cota che we cac'ak bi uk'ij ruma u'anom ch'uti'n che rib chwach ri Dios. Ma ruc'aslem che ruwachulew xa e pacha' rucotz'i'jal rak'es, na cacowin taj. ¹¹ Ma echiri' quel lo ri k'ij yey ruc'atanil caka'wic,

rak'es cachakijic y rucotz'i'jal capukic y casach uwach ruchomalil. Jec'uri'la' cuc'ulumaj ri beyom, ma tob lic cachacunic, echiri' cacamic, ronoje rubeyomalil cacana'j canok.

¹² Nim uk'ij ralaxic ri ticawex cuch'ij uchuk'ab ri c'ambal upa, ma echiri' uch'ijom chi uchuk'ab wa', cuc'ul ri sipanic re ri c'aslemal ubi'tisim lo ri Dios chique ri c'ax quena'w re Rire.

Kach'ija uchuk'ab ri mac

¹³ Echiri' c'o junok cuna'o c'o caminow uwach pa mac, mubi'ij e ri Dios ri ca'anaw wa' che. Ma ri Dios na cacha ta c'ana uc'u'x che ri mac yey na cumin tane junok chupa. ¹⁴ Ma echiri' c'o junok cuna'o c'o caminow uwach pa mac, ri' e rurayibal ri cac'amaw bi re chupa. ¹⁵ Ec'u tak rurayibal cuc'am bi pa mac, yey wa' wa mac cuc'am lo camic. ¹⁶ Alak nu hermanos ri lic c'ax canna' alak, cambi'ij c'u che alak: Masocotaj c'ana alak. ¹⁷ Ma ronoje chomilaj sipanic y ri utz caya'taj chike, ruc' ri Dios petinak wi. Rire e 'anayom re tak ri cawon che ruwa caj. Yey tak wa' xa cajalc'atitaj uwach, no'j ri Dios na cajalc'atitaj ta uwach y ri k'ijsak re Rire na coc ta k'eku'm chwach. ¹⁸ Lic ruc' c'u Rire xalax wi cuya c'ac' kac'aslemal ruma ri K'ijsak re Ruch'a'tem, cha' jela' e coju'ana ri nabe ralc'o'al oj ya'tal puk'ab ri Cristo.

Ka'ana janipa ri cubi'ij Ruch'a'tem ri Dios

¹⁹ Alak nu hermanos ri c'ax canna' alak, mic'ow chic'u'x alak wa': Lic chirajawaxic che alak caya xiquin alak che ri caquibi'ij ri jujun chic, no'j lic ch'obo na alak rakan chi utz sa' ri cabi'ij alak, yey mu'an ne ri lic xa ch'itil alak che ri oyowal. ²⁰ Ma e junok aj oyowal na cu'an ta ri jusuc' chwach ri Dios. ²¹ Ruma c'u la', ya'a can alak ronoje ri na chom ta uwach y ronoje ruq'uoyal mac. E lic c'ulu alak ruc' uch'uti'nal c'u'x alak Ruch'a'tem ri Dios tiquil chi chupa ri anima' alak, ma wa' cucolobej alak.

22 E lic 'ana alak janipa ri cubi'ij Ruch'a'tem ri Dios y na xew ta alak tanel re; ma we xa alak tanel re, casoc ib alak we cach'ob alak ruma wa' cacolobetaj alak. 23 Ma e junok xa tanel re Ruch'a'tem ri Dios y na cu'an ta janipa ri cubi'ij, e pacha' junok caril rupalaj chupa juna spej. 24 Yey echiri' xril bi rupalaj, que'ec y xa pa jok'otaj cumesc'utaj sa' ri catzu'nic. 25 No'j ri lic uya'om rib che utakexic ri sakil Utzij Upixab ri Dios, ri cojresaj puk'ab ri mac, yey xaki e cu'an wa' y na casach ta chuc'u'x ri cubi'ij ri Tzij Pixab ma e 'anal re janipa ri cubi'ij wa', ri Dios cuto' che janipa ri cu'ano.

26 We c'o junok cuch'obo pa sakil wi e culok'nimaj uk'ij ri Dios, pero na cuk'atej ta ri rak' che molot y c'axlaj ch'a'tem, ri' utuquel cusoc rib yey ronoje ri cu'ano re culok'nimaj ri Dios, na junta uchac. 27 Ma ri sakil ulok'nimaxic uk'ij ri Kakaw Dios e ri quekato' ri niba'ib y ri malca'nib chupa tak ri c'ax e c'o wi, yey e ri cakachajij kib cha' na cojtzak ta chupa ri ch'ulilaj mac re ruwachulew.

2

Maka'an ri xa cojcha'w chiquixo'l ri ticawex

1 Alak nu hermanos, ri cojom alak rubi' ri Kanimajawal Jesucristo, ri Jun lic nim uk'ij, lic na takal ta che alak xa cacha'w alak chiquixo'l ri ticawex. 2 Ma we e la' molom ib alak chupa rubi' ri Cristo y coc bi junok chixo'l alak ucojom mapak'ab re oro y ucojom chomilaj uk'u' y coc c'u bi juna niba' ucojom uk'u' k'e'l c'ojtalic, 3 yey we ralak e lic coc alak il che uc'ulic chi utz ri ucojom chomilaj uk'u' y cabi'ij alak che: «Choca la, tz'ula la wara»; no'j che ri niba' cabi'ij alak: «Chat-tac'ala ri'at chiri' o chat-tz'ula pulew»; 4 ¿na ruc' ta neba wa' cacha'w alak chiwach alak y cu'ana c'u alak aj k'atal tzij ruc' na'oj na jusuc' taj?

5 Hermanos ri lic c'ax canna' alak, ta c'u alak wa': E ri niba'ib che ruwachulew ri echa'om lo ruma ri Dios cha' quebeyomar che ri cubulibal quic'u'x y cha' quec'o'ji' puk'ab Rire ma e ubi'tisim wa' chique ri c'ax quena'w re Rire. 6 Pero ralak e c'akom bi alak quik'ij ri niba'ib. ¿Na e ta neba ri beyomab ri caqui'an c'ax che alak ma na caqui'an ta ri usuc' che alak? ¿Yey na e ta neba rique ri caquic'am bi alak pa k'atbal tzij? 7 ¿Na quech'a'tiben ta neba rique chirij ri chomilaj ubi' ri Kanimajawal, ri xcuxtaw pawi' alak?*

8 Lic utz we pakatzij wi ca'an alak ruc'u'xibal ri takanic tz'ibital can chupa Rutzij Upixab ri Dios, ri cubi'ij: «C'ax chana'a rawatz-achak' jela' pacha' ri c'ax cana' awib ri'at.»*

9 No'j we xa cacha'w alak chiquixo'l ri ticawex, camacun alak yey ri Tzij Pixab re ri Dios cuk'at tzij pawi' alak ruma alak aj palajiy tzij. 10 Ma we c'o junok cunimaj ronoje ri Tzij Pixab yey cajaljob c'u puwi xa juna tzij re ri Dios, ri' camacun chirij ronoje Rutzij Upixab ri Dios, ma wa' xa jun u'anom. 11 Ma ri Dios e xbi'n re wa': «Matmacun chirij ri c'ulaniquil»* y je tanchi wa' xubi'ij: «Matcamisanic.»* Jec'ula', we junok na camacun ta chirij ri c'ulaniquil pero camisanel, ri' cape ri k'atbal tzij puwi' ruma xupalajij Rutzij Upixab ri Dios.

12 Mic'ow c'u chic'u'x alak, copon na ri k'ij cak'at tzij pawi' alak e chirij Rutzij Upixab ri Dios, ri quesaw ke'oj puk'ab ri mac. Ruma c'u ri', chajij ib alak che ronoje ri cabi'ij alak y ca'an alak. 13 Ma e junok na cuc'ut ta ri relej uc'u'x chique ri jujun chic, jec'ula' cu'an ri Dios che rire, na cuc'ut ta ri relej uc'u'x che echiri' cuk'at tzij puwi';* no'j ri jun cuc'ut ri relej uc'u'x chique ri jujun chic, ri' quel pan chi utz che ronoje chupa ruk'ijol ri k'atbal tzij.

Ri cubulibal kac'u'x ruc' ri Dios

* 2:7 "Ri xcuxtaw pawi' alak": Wa' e que'elawi rique xquic'ul ri bautismo pa rubi' ri Kanimajawal Jesucristo. ✧ 2:8 Lv. 19:18 ✧ 2:11 Éx. 20:14 ✧ 2:11 Éx. 20:13 ✧ 2:13 Mt. 6:14-15; 18:23-35

cak'alajin uwach ruc' ri caka'ano

14 Alak nu hermanos, ¿sa' cutikoj che junok we cubi'ij lic c'o cubulibal uc'u'x yey na jinta c'utubal re wa'? ¿Curik nawi ri colobetajic xew ruma cubi'ij c'o cubulibal uc'u'x? 15 Ma we e la' c'o juna hermano achi o ixok na jinta uk'u' re ujalbal yey c'ayew che curik ri cutij ri jujun k'ij, 16 yey we c'o c'u junok che alak jewa' cubi'ij che: «Chawanibej co chi utzil chomal, chapisa awib chi utz y chatwo'k chi utz» cacha', pero na cuya ta c'u bi che janipa ri cajawax che, ¿sa' c'u cutikoj ri' ri xubi'ij bi che? 17 Jec'uri'la' ri cubulibal c'u'xaj, we na jinta c'utubal re, na jinta cutikoj.†

18 Laj c'o junok jewa' cubi'ij: «Rilal c'o cubulibal c'u'x la ruc' ri Dios; ec'u ri'in e canc'ut ri utz can'ano. ¿Carik nawi la cak'alajisaj la chinuwach ri'in ri cubulibal c'u'x la we na jinta c'utubal re? ¡Na carik ta la! No'j ri'in utz cank'alajisaj ri cubulibal nuc'u'x chiwach la ruc' tak ri can'ano.» 19 Rilal lic cacoj la xa jun ri Dios c'olic, yey wa' lic katzij. Pero wa' na e ta que'elok c'o cubulibal c'u'x la ruc' ri Dios, ma e tak ne ri itzel uxlalixel caquicojo xa jun ri Dios c'olic y ruc' xi'in ib quebirbot chwach. 20 Masach na'oj la puwi'; cheta'maj la na jinta uchac ri cubulibal c'u'xaj we na jinta c'utubal re wa'. 21 ¿Sa' ri x'anaw jusuc' che ri kamam Abraham? ¿Na e ta neba ri cubulibal uc'u'x xuc'utu echiri' xucoj utzij ri Dios y xuya c'u ruc'ajol Isaac chwi ri altar? 22 Ruma c'u wa', quil alak wa': Ri cubulibal uc'u'x ri Abraham e xk'alajinic echiri' xucoj utzij ri Dios. Jec'ula', ri cubulibal uc'u'x xtz'akat uwach ruc' tak ri xu'ano. 23 Yey Ruch'a'tem ri Dios cuk'alajisaj wa' echiri' cubi'ij: «Ri Abraham lic xcubi' uc'u'x ruc' ri Dios y ruma c'u ri', x'ani' jusuc' che.»* Y xbi'x c'u che: «Rire e ramigo ri Dios.»*

24 Lic c'u quil alak ri': Ri ticawex

na cu'an ta jusuc' xew ruma cubi'ij c'o cubulibal uc'u'x ruc' ri Dios, ma ri lic chirajawaxic e cuc'ut wa' ruc' ri cu'ano. 25 Ma ri Rahab, ri jun ixok na chom ta rubinic usilabic, x'an jusuc' che chwach ri Dios ruma xebuc'ul chirocho ri e c'ac'alanel e aj Israel etakom bi chupa la' la tinamit y ruma xebuto'o cha' quebec pa jun chic be.‡

26 Jun c'ambal na'oj puwi ri ximbi'ij e wa': E junok we na cuxlab ta chic, ri' caminak chic; jec'ula' ri' ri cubulibal c'u'xaj, we na jinta c'utubal re, e pacha' caminak chic.

3*Lic kachajij kib che tak ri cakabi'ij*

1 Alak nu hermanos, mu'ana ri lic e q'ui che alak quebu'an e aj c'utunel, ma ri cojc'utunic, keta'am wa' e jun nimalaj chac ya'om chikakul. Ruma c'u wa', we caka'an ri na utz taj, más c'ax ri k'atbal tzij re ri Dios cape pakawi' chwa ri k'atbal tzij cape paquiwi ri na e ta aj c'utunel. 2 Na jinta junok lic jusuc', ma konoje ri oj ticawex lic q'ui uwach ri cojmacun wi. No'j we c'o junok na camacun ta c'ana ruc' tak ri cubi'ij, ri' e jun ticawex lic jusuc' yey ri' cuch'ij ne uchuk'ab tak ri rayibal re ronoje ru-cuerpo.

3 E ri'oj cakacoj preno pa quichi' ri cawayu' cha' caqui'an ri cakaj ri'oj y jec'ula' tob lic c'o quichuk'ab, quekac'am bi pa cakaj wi ri'oj. 4 Ch'obo pe alak puwi tak ri barcos. Tob lic e nima'k y e jeq'uetal ruma unimal tew, na ruc' ta c'u ri', e c'amom bi xa ruc' jun ralco timón; y ruc' wa', ri chapayom re cuc'am bi pa ri caraj wi rire. 5 Jec'uri'la' ri kak', tob lic xa ch'uti'n, na ruc' ta c'u ri', na xa ta jubik' ri na utz taj cu'ano echiri' cakatac'aba' kak'ij. ¡Chilape c'u alak runimal c'ache'laj* caporotaj xa ruma juna upuc' ak'!

† 2:17 “Na jinta cutikoj”: Pa ri ch'a'tem griego cubi'ij “caminak”. * 2:23 Gn. 15:6 * 2:23 Is. 41:8; 2 Cr. 20:7 ‡ 2:25 Ri Rahab xeburewaj ri e c'ac'alanel e aj Israel ruma xcubi' uc'u'x ruc' ri Dios re Israel. Jos. 2:1-21 * 3:5 “C'ache'laj”: Wa' pa caxtila “bosque” quecha che.

⁶ Jec'ula' ri kak' e pacha' ri ak'. Ma che ronoje ri c'o che ri kacuerpo, ri kak' tob lic xa ch'uti'n, na ruc' ta c'u ri', cuc'am lo uq'uiyal mac y jela' cuyoj ri kabinic y ri kac'aslem. Y wa' wa kak' e pacha' tzijital chi ruma ri ak' re xibalba', ma chila' cape wi ri na utz taj cakabi'ij.

⁷ E ri oj ticawex ya'tal chike cojtakan paquiwi ruq'uiyal uwach awaj, wa' e tak ri e c'o che ruwachulew, ri quexiq'ui' che ruwa caj, ri quecharar chu'lew y ri e c'o pa ri mar. Ronoje c'u ruq'uiyal uwach awaj ch'ijital quichuk'ab cuma ri ticawex. ⁸ No'j c'u ri kak' na cakach'ij ta c'ana uchuk'ab, ma na cuya ta rib cak'obisax ruchuk'ab; e pacha' rupuchi' juna cumatz nojinak che veneno cacamisanic. ⁹ Ruc' ri kak' cakayac uk'ij ri Kakaw Dios yey ruc' wa' tzel cojch'aw chiquij ri ticawex, ri ebu'anom ri Dios re caquic'utubej uwach Rire. ¹⁰ Xa c'u che jun uchi' kulaj quel lo chomilaj ch'a'tem y itzelilaj ch'a'tem. Alak nu hermanos, wa' na usuc' taj ca'anic. ¹¹ Ma ¿c'o neba juna ac'al quel lo ya' qui' y ya' c'a chupa? ¹² Alak nu hermanos, ¿c'o neba juna che' re higo echiri' cawachinic quel lo aceitunas che? ¿O c'o neba juwi' uva echiri' cawachinic quel lo higo che? Jec'ula' ri', chupa juna ac'al re ya' tza, na quel ta lo ya' qui'.

Ri sakil na'oj cape ruc' ri Dios

¹³ We c'o junok chixo'l alak lic c'o una'oj y lic cumaj usuc' ronoje, e chuk'alajisaj c'u ri' ri sakil una'oj ruc' jun binic silabic lic jusuc' y mu'an ne nim che rib. ¹⁴ Pero we c'ax c'u'x alak chibil ib alak y c'o retzelal c'u'x chiwach alak, matac'aba' c'u k'ij alak ri' y mabi'ij ne alak lic c'o runa'oj ri Dios uc' alak, ma xa rak'ubal. ¹⁵ Yey wa' na e ta ri sakil na'oj petinak ruc' ri Dios, ma xa e re ruwachulew, xa que ticawex y re Ritzel. ¹⁶ Ma we c'o c'axc'olil c'u'xaj y retzelal c'u'xaj chiwach alak, wa'

cuc'am lo ch'a'oj y ronoje tak ri na utz taj ca'anic. ¹⁷ No'j c'u ri sakil na'oj petinak ruc' ri Dios, nabe na cak'alajisax ruc' jun chomilaj binic silabic; ec'u junok c'o wa sakil na'oj ruc', na aj ta ch'a'oj, utz uc'u'x y na cu'an ta utitz'itiquil; lic cuc'ut ri c'axna'bal uc'u'x y cu'an utzilaj tak chac; na cacha'w ta chiquixo'l ri winak y na xa ta queb upalaj. ¹⁸ Yey ri caquitzucuj ri utzil chomal y caquitic wa' chiquiwach, ri' quec'oji' chí usuc'liquil cuc' ri ticawex jela' pacha' ri caraj ri Dios.

4

Me'ec kac'u'x ruc' ri xa re ruwachulew

¹ ¿Pa tak cape wi ri ch'a'oj y ri oy-owal chiwach alak? Wa' pa anima' alak cape wi, ma ri rayibal e alak e pacha' c'o pa ch'a'oj ruc' ri caraj ri Dios che alak. ² Lic c'o carayij alak yey wa' na caya'taj ta che alak. Caq'uis c'u ib alak che retzelal c'u'xaj; ruma c'u ri' catij alak uk'ij che uc'ulic ri ca'aj alak, cach'o'jin alak y ca'an ne alak camic y ch'a'oj. Pero na cac'ul ta alak ri ca'aj alak ma na catz'onoj ta alak wa' che ri Dios. ³ Yey ri catz'onoj alak, na cac'ul ta alak ma na utz ta utz'onoxic ca'an alak. Ma ri catz'onoj alak xa e re catz'ila' alak che ri rayibal alak.

⁴ Ralak ri na jusuc' ta ri anima' alak chwach ri Dios, ¿na eta'am ta cami alak we jun cujunimaj rib ruc' tak ri rayinic xa re ruwachulew, e junam ruc' cach'o'jin chirij ri Dios? China c'u ri que'ec uc'u'x ruc' ri rayinic xa re ruwachulew, ri' e cu'ana aj retzelal c'u'x chirij ri Dios. ⁵ Laj cach'ob c'u alak rakan na il ta uwach Ruch'a'tem ri Dios pa cubi'ij wi: «Ri Ruxlabixel uya'om ri Dios pa kanima' lic c'ax cojuna'o y lic na cuc'ul ta uc'u'x we lic e que'ec kac'u'x ruc' tak ri xa re ruwachulew»[☆] cacha'. ⁶ Pero ri Dios lic nim ri unimal rutzil uc'u'x cuya chike. Ruma la' jewa' tz'ibital pa Ruch'a'tem:

☆ 4:5 Éx. 20:4-5; Dt. 4:24; Zac. 8:2

Ri Dios uyacom rib chiquij
 janipa ri caquitac'aba' quik'ij;
 no'j uya'om ri unimal rutzil uc'u'x
 chique
 janipa ri caqui'an ch'uti'n che
 quib *Pr. 3:34*
 cacha'.

⁷ E uwari'che, ya'a ib alak puk'ab
 ri Dios; ch'ija alak uchuk'ab ritzel
 winak yjec'ula' rire canimaj chiwach
 alak. ⁸ Lic kib alak ruc' ri Dios y jela'
 Rire cakib uc' ralak. Ralak ri c'o alak
 pa mac, chomaj alak ri binic silabic
 alak. Ec'u ralak ri xa queb c'u'x alak,
 ri ca'aj alak c'ax cana' alak ri Dios
 yey lic que'ec c'u'x alak ruc' ri mac
 re ruwachulew, lic chomaj ri anima'
 alak che wa'. ⁹ Chubisoj c'u'x alak ri
 'anom alak, c'ax chuna'a c'u'x alak y
 chok' alak ruma wa'. Ec'u ri' ri tze'
 alak chu'ana ok'e'j y ri qui'cotemal
 alak chu'ana bis. ¹⁰ 'Ana c'u alak
 ch'uti'n che ib alak chwach ri Dios;
 yey we ca'an c'u alak wa', Rire cuyac
 k'ij alak.

Makach'a'tibej kib chikawach

¹¹ Hermanos, mach'a'tibej ib alak
 chiwach alak. Ma e ri cach'a't chirij ri
 ratz-uchak' y cuk'at tzij puwi' xa pa re
 rire, ri' e junam ruc' e cach'a't chirij ri
 Tzij Pixab y cuk'at tzij puwi' wa'. Yey
 we ca'an la wa', ri' e que'elok na lal
 ta 'anal re ri Tzij Pixab; ec'u ca'an che
 ib la lal aj k'atal tzij puwi'. ¹² Ma xa
 Jun ri ya'yom lo re ri Tzij Pixab y xew
 Rire c'o puk'ab cojucolobej o cusach
 kawach. No'j rilal ¿sa' ri wach la cha'
 xa pa e la cak'at la tzij puwi' jun chic'?

Na keta'am taj sa' ri cakac'ulumaj chwe'k

¹³ Wo'ora tape alak, ri jewa' cabi'ij
 alak: «Wak'ij o chwe'k coj'ec pa jun
 tinamit y cojc'o'ji' chila' jun junab;
 caka'an c'u kac'ay y cakach'ac kara-
 jil» cacha alak. ¹⁴ Yey na eta'am tane
 c'ana alak sa' ri cac'ulumaj alak ri
 chwe'k. Ma ¿sa' ri unimal uwach ri
 c'aslemal alak? Pakatzij wi, xa pacha'
 sutz', ma xa pa jok'otaj cawinakiric
 y tec'uchiri' casachic. ¹⁵ Yey ri chi-
 rajawaxic wi e cabi'ij alak wa': «We
 ri Kakaw caraj, cojc'asi'ic y caka'an

wa'riri' o caka'an lele'» cacha alak.
¹⁶ No'j ri ca'an ralak, e lic ca'an alak
 nim che ib alak echiri' catac'aba' k'ij
 alak. Yey lic na usuc' taj we junok
 cutac'aba' uk'ij. ¹⁷ E junok reta'am
 sa' ri utz chirajawaxic ca'anic yey na
 cu'an taj, ri' camacunic.

5

Pixabanic chique ri beyomab

¹ Ec'u wo'ora, ralak ri alak bey-
 omab, tanape alak: Chok' alak y
 juyuy alak ruma ri c'axc'obic cape
 paw'i' alak. ² Ma ri beyomalil alak
 xa cak'ayic y ri chomilaj k'u' alak
 xa capoq'uiric. ³ Ri oro y ri plata
 c'olom alak cu'an mojos, yey wa' e
 c'utubal re na utz ta 'anom alak, ma
 e benak c'u'x alak ruc' ri beyomalil
 re ruwachulew. Ruma c'u ri', wa'
 e cu'ana pacha' ri ak' asu cuporoj
 ri ti'jil alak echiri' ri Dios cuk'at tzij
 paw'i' alak, ma ralak molom alak
 uchi' uq'uiyal beyomalil chupa wa'
 wa q'uisbal k'ij oj c'o wi.

⁴ Ec'u raj chac xechacun chwa tak
 rulew alak, na tz'akat ta ri cajil xya
 alak. Ri cajil wa aj chac na tojom
 ta alak e pacha' catunan chi'ij alak.
 Yey ri tunanic que wa aj chac xtataj
 ruma ri Dios Kajawxel ri c'o unimal
 uchuk'ab.

⁵ Ralak ya'om ib alak chupa ronoje
 rukusil ruwachulew y ya'om ib alak
 che u'anic tak ri rayibal alak. Ri
 'anom alak e pacha' ri ca'an che
 juna chicop lic catzuk chi utz re
 cati'o'jrisaxic ma ya copon ri k'ij ca-
 camisaxic.

⁶ E ralak k'atom alak tzij paquiwi ri
 na emacuninak ta chi'ij alak yey e ne
 ralak camisayom alak que. Yey rique
 na caquich'ij taj caquito'bej quib chi-
 wach alak.

Runimal c'u'xaj chupa ri c'axc'obic

⁷ Pero ralak hermanos, ruc' uni-
 mal c'u'xaj choye'ej alak ruc'unibal
 ri Kanimajawal Jesucristo. Ch'obo
 pe alak, juna awanel caroy'e'j na ri
 chomilaj uwach rutico'n y ruc' uni-
 mal uc'u'x caroy'e'j na ruk'ijol ri nabe

jab y ri q'uisbal jab.* ⁸ Jec'ula' 'ana ralak, choye'ej alak ri Kanimajawal ruc' unimal c'u'xaj yey jiquiba' c'u'x alak ruc' Rire, ma ruc'unibal xa nakaj chi c'o wulok.

⁹ Hermanos, mach'a'tibej ib alak chiwach alak cha' jela' na cak'at ta tzij pawil alak. Cheta'maj c'u alak wa': Ri Dios, ri Aj K'atal Tzij, xa ri' chi c'o wulok. ¹⁰ Alak nu hermanos, e c'ama na'oj alak che ri xqui'an ri k'alajisanelab ri xech'a't chupa rubi' ri Dios Kajawxel, ma rique ruc' unimal quic'u'x xquich'ij uchuk'ab ri c'axc'olil. ¹¹ Yey ri'oj keta'am lic nim quik'ij calaxic ri caquich'ij uchuk'ab ri c'axc'obic. Tom chi alak puwi runimal uc'u'x ri Job y eta'am alak ri utz xuc'am lo ri Dios che rire pa ri q'uisbal re ri xuc'ulumaj. Ma ri Dios lic cuc'ut ri rutzil uc'u'x y ri c'axna'bal uc'u'x.

¹² Puwi c'u ronoje ri ca'an alak nu hermanos, mac'o majiquiba' alak uwach pubi' ri caj o pubi' ruwachulew o pubi' juna chic. Ri 'ana alak e wa': We katzij, xew bi'ij alak: «Katzij»; no'j we na katzij taj, xew bi'ij alak: «Na katzij taj» cha' jela' na cape ta ri k'atbal tzij re ri Dios pawil alak.

Ri oración

¹³ ¿C'o junok paxinak uc'u'x chixo'libal alak? Chutz'onoj uto'bal che ri Dios. ¿C'o junok caqui'cotic? Chubixoj rubi' ri Dios. ¹⁴ ¿C'o juna yewa' chixo'libal alak? Chebusiq'uij ri e aj wach re riglesia cha' caqui'an orar puwi', caquicoj c'u aceite puwi' chupa rubi' ri Kanimajawal. ¹⁵ Ec'u ri oración ca'an ruc' cubulibal c'u'xaj chwach ri Dios, e cacoloben ri yewa' che ri yabil y ri Dios e cayacaw re. Yey we macuninak ri yewa', cacuytaj c'u umac ri'. ¹⁶ Tzelej tzij alak chiwach alak y 'ana alak orar pawil alak chiwach alak cha' jela' cacunutaj alak. Ma lic c'o uchuk'ab ri sakil

oración cu'an junok jusuc' rubinic usilabic.

¹⁷ Ri k'alajisanel Elías junam uwach kuc' ri'oj ma xa ticawex. Na ruc' ta c'u ri', xutz'onoj che ri Dios ruc' ronoje uc'u'x cha' na cu'an ta chi jab y na xu'an ta chi jab che ruwachulew oxib junab ruc' nic'aj. ¹⁸ Jec'uri'la', xu'an tanchi orar cha' catzak ri jab; y xtzak c'u ri jab y ri tico'n che ruwachulew xuya tanchi uwach.

¹⁹ Hermanos, we c'o junok chixo'libal alak uya'om can ri K'ijsak, yey c'o c'u junok catzelen lo re, ²⁰ cheta'maj c'u alak ri': E ri quesán lo wa aj mac chupa ri na utz taj cu'ano, ri' e cucolobej jun ticawex cha' na casach ta uwach y cha' cacuytaj ruq'uiyal umac.

* **5:7** “Ruk'ijol ri nabe jab y ri q'uisbal jab”: Ri nabe jab e ri catzak pa octubre echiri' catic ri trigo. Ri q'uisbal jab e ri catzak pa abril echiri' c'amaja' camol ri trigo. Ucabichal wa' lic cajawax che ri tico'n.

Ri nabe carta xutz'ibaj ri Pedro

Ri Pedro cuya pan rutzil quiwach ri echa'tal ruma ri Dios

¹ Ri'in in Pedro, in tako'n re ri Kanimajawal Jesucristo. Quintz'iban pan che alak, ri naj c'o wi alak che ri katinamit, ri jekel alak pa tak ri luwar re Ponto, re Galacia, re Capadocia, re Asia y re Bitinia. ² Ralak cha'tal lo alak ruma ri Kakaw Dios, ma jela' uch'obom chi lo Rire ojertan. Ec'u wo'ora, ruma ri Ruxlabixel ri Dios, ya'tal che alak cac'oji' alak che jun santowilaj binic cha' cacoj alak utzij ri Dios y cach'ajtaj ri mac alak ruc' ruquiq'uel ri Kanimajawal Jesucristo. E lic q'uiyar na c'u pawil alak ri unimal rutzil c'u'xaj y ri utzil chomal re ri Dios.

Cubulpan kac'u'x che uc'ulic janipa ri cuya ri Dios chike

³ Lic nim uk'ij ri Dios, Rukaw ri Kanimajawal Jesucristo, ma ruma ri unimal rutzil uc'u'x xuya jun c'ac' kabinic kasilabic. Yey ruma ruc'astajibal lo ri Kanimajawal Jesucristo chiquixo'l ri ecaminak, lic cubul pan kac'u'x che uc'ulic ri c'aslemal ubi'tisim chike. ⁴ Yey wa koye'em na casach ta uwach, na cach'ulax ta uwach ruc' ri mac y na cachup tane c'ana ruchomal. Jiquibam c'u uwach ri' caya'taj wa' che alak chila' chicaj. ⁵ Ruma c'u ri cubulibal c'u'x alak ruc' ri Dios, Rire cuchajij alak ruc' ruchuk'ab cha' jela' cac'ul alak ri colobetajic bi'tisim chi che alak yey wa' cak'alajin na chupa tak ri q'uisbal k'ij.

⁶ Ruma c'u ri', caqui'cot alak wo'ora, tob copon jujun k'ij chirajawaxic quic'ow na alak pa tak uq'uiyal c'axc'olil ⁷ cha' cac'am pa alak puwi ri cubulibal c'u'x alak ruc' ri Dios jela' pacha' ca'an che ri oro echiri' quic'owisax pa ak', ilibal re we sakil oro. Yey ri cubulibal c'u'x ralak ruc' ri Dios más c'o uwach chwa ri

oro, ma ri oro xa caq'uisic. We xch'ij c'u alak wa c'axc'obic quic'owibej alak, ri' re yacbal k'ij ralak y re yacbal uk'ij ri Dios. Ma echiri' ri Kanimajawal Jesucristo cuk'alajisaj uwach chikawach apanok, cutac'aba' k'ij ralak ruma ri cubulibal c'u'x alak ruc' ri Dios. ⁸ Ralak c'ax cana' alak ri Jesús tob na ilom ta alak uwach Rire, yey cubul c'u'x alak ruc' tob na quil ta alak uwach wo'ora. Y caqui'cot alak ruc' unimal qui'cotemal, yey wa' na carikitaj tane ubi'xiqul. ⁹ Caqui'cot c'u alak, ma cac'ul na alak ri colobetajic oye'em alak ruc' cubulibal c'u'xaj.

¹⁰ Ri k'alajisanelab re ojertan xek'alajisan lo puwi ri unimal rutzil uc'u'x ri Dios, ri caya'i' che ralak. Rique lic xquiya quina'oj puwi wa colobetajic y lic xquitij uk'ij umajic usuc' wa'. ¹¹ Ma c'o ri xuk'alajisaj ri Ruxlabixel ri Cristo chique puwi tak ri c'axc'obic cutij Rucha'o'n lo ri Dios y ri yacbal uk'ij ca'anic echiri' ic'owinak chi chupa wa'. Ec'u rique xquich'ob rakan china puwi' xbi'x wa' y jampala' cu'ana'. ¹² Yey ri Dios xuk'alajisaj chique wa' wa k'alajisanelab na caquil ta wa' chupa tak ri k'ij e c'o wi rique, ma wa' e cu'ana chupa tak wa k'ij oj c'o wi ri'oj. Yey wa' e ri xya' che alak cuma ri quitzijom ri Utzilaj Tzij ruc' ruchuk'ab ri Santowilaj Ruxlabixel ri Dios, ri xtak lo chila' chicaj. Yey ri ángeles lic cacaj ne caquimaj usuc' tak wa'.

Ri Dios cojusiq'uij che jun santowilaj binic

¹³ E uwari'che suc'upij alak ri na'oj alak, lic ch'obo na alak rakan sa' tak ri ca'an alak. E choye'ej alak ri unimal rutzil uc'u'x ri Dios, ri caya' na che alak echiri' cak'alajisax uwach ri Kanimajawal Jesucristo. ¹⁴ Ralak alak chi ralc'o'al ri Dios, ruma c'u ri' cojo alak utzij Rire. Maya c'u ib alak che ri rayinic c'o wi alak ojertan echiri' c'amaja' queta'maj alak uwach ri Dios. ¹⁵ Ma jela' pacha' ri Jun siq'uiyom e alak lic na jinta

c'ana mac ruc', jec'ula' 'ana alak che ri binic silabic ralak. ¹⁶ Ma jewa' tz'ibital can pa Ruch'a'tem ri Dios:

Chi'ana jusuc' che ri ibinic isilabic, ma Ri'in na jinta c'ana mac wuc'. *Lv. 19:2*

¹⁷ Yey we cabi'ij alak «Kakaw» che ri Jun na cacha'w ta chiquixo'l ri ticawex echiri' cu'an k'atbal tzij paquiwi conoje ruma tak ri qui'anom, ri' lic chirajawaxic che alak cabin alak ruc' xi'in ib chwach Rire ronoje k'ij che ri c'aslemal alak. ¹⁸ Ma lic eta'am alak, ri Dios xresaj lo alak che ri binic silabic alak na chom taj, ri xc'ut can che alak cuma ri chu'kaw alak ojertan. Yey rutojic xu'an ri Dios re caresaj lo alak puk'ab ri mac, na e ta ruc' oro o ruc' plata, ma wa' xa casach uwach; ¹⁹ rutojic xu'ano e ruc' ri lok'laj uqui'uel ri Cristo, ri xya'i' pa camic pacha' juna k'apoj bexex lic chom y na yewa' ta uwach caya'i' chwach ri Dios. ²⁰ Yey ri Cristo cha'om chi lo ojertan chwi lo echiri' c'amaja' ne ca'an ruwachulew; pero c'a ec'u wo'ora chupa wa q'uisbal k'ij oj c'o wi, ri Dios xuc'utubej uwach ruma ri rutzil uc'u'x che alak. ²¹ Ruma c'u ri Kanimajawal Jesucristo, xcubi' c'u'x alak ruc' ri Dios, ma e Rire ri xuc'astajisaj lo ri Cristo chiquixo'l ri ecaminak y lic xuyac uk'ij. Ruma c'u ri', cubul c'u'x alak ruc' ri Dios y oye'em alak che Rire janipa ri ubi'tisim che alak.

²² Ruma xcoj alak ri K'ijsak, wo'ora xu'an chom ri c'aslemal alak cha' pakatzij wi c'ax cana' ib alak ri chak' ib alak chupa rubi' ri Cristo. E uwari'che lic c'ax na'a ib alak chwach alak ruc' ronoje chuk'ab alak y ruc' ronoje c'u'x alak. ²³ Ma ralak alak alaxinak tanchic y wa' na e ta cuma ri chu'kaw alak ri xa e ticawex, ma e ruma Ruch'a'tem ri Dios, ri lic c'aslic y na casach ta c'ana uwach. ²⁴ Ma jewa' tz'ibital can pa Ruch'a'tem ri Dios:

Conoje ri ticawex e jela' pacha' rak'es

yey ri yacbal quik'ij e pacha' rucotz'i'jal rak'es;

ma rak'es xa cachup uwach y rucotz'i'jal xa cachakijic y capukic.

Jec'ula' ri' ri ticawex xa quecamic y ri yacbal quik'ij xa casach uwach,

²⁵ no'j Ruch'a'tem ri Dios na casach ta c'ana uwach *Is. 40:6-8*

cacha'. Yey wa ch'a'tem e ri Utzilaj Tzij tzijotal chi lo che alak.

2

¹ E uwari'che ya'a can alak ronoje ri na utz taj: ri socoso'nic, ri xa queb palaj alak chwach alak, ri cu'an c'ax c'u'x alak chiquij jujun chic y ri canuc' alak ch'a'tem chiquij jujun chic. ² Jela' pacha' juna ne' c'ac' alaxinak lic e caraj rutz'um rucu;

jec'uri'la' ralak, e lic rayij alak ri sakil Uch'a'tem ri Dios, cha' ruma wa', ri Dios cuya ri q'uiyibal alak y cucolobej c'u alak chwach ronoje ri na utz taj.

³ E 'ana c'u alak wa' ma na'om chi alak ri rutzil uc'u'x ri Kanimajawal pa anima' alak.

Ri jun abaj c'aslic

⁴ Kib c'u alak ri' ruc' ri Kanimajawal Jesucristo. Rire e pacha' jun abaj c'akital can cuma ri winak, ma chiquiwach rique na jinta uchac; no'j chwach ri Dios e jun chomilaj abaj c'aslic* y cha'talic, pa catiqui' wi lo ri ja cayaquic.

Yey juna abaj na jinta uc'aslemal, no'j Rire c'aslic. ⁵ Jec'uri'la' ralak alak pacha' abaj c'aslic tz'akom bi che ri ja catajin ri Dios che uyaquic re cajeki' chupa.

Rojertan raj chacunel xeniman pa Rocho Dios, ec'u wo'ora ri Dios uya'om che ralak caniman alak chwach Rire y ruma c'u ri Kanimajawal Jesucristo ca'an alak ri cuc'ul uc'u'x Rire. ⁶ E uwari'che jewa' tz'ibital can pa Ruch'a'tem ri Dios:

Cancoj c'u chila' Sion
ri jun chomilaj abaj cha'talic,
cha' puwi wa' catiqui' ri ja canyaco.

Is. 28:16

China c'u ri cacubi' uc'u'x ruc',

* **2:4** "Abaj c'aslic": Ri Cristo c'aslic y cuya c'aslemal chike.

ri' na caq'uixbesax taj
ma cuc'ul na ri roye'em che Rire

Is. 49:23

cacha'.⁷ Che ralak ri cojom alak rubi',
Rire lic c'o uwach; no'j chique ri na
quecojow ta re, e cu'ana pacha' ri
tz'ibital can pa Ruch'a'tem ri Dios:
E rabaj c'akital can cuma raj yacal ja,
e abaj ri' wa' xajawaxic cha' catiqui'
lo ri ja.* *Sal. 118:22*

⁸ Yey cubi'ij:

Rire e ri jun abaj cojotal chiquiwach
ri ticawex,
yey lic e c'o ri caquichik quib che,
y lic ec'o ri quetzak puwi' *Is. 8:14*
cacha'. Jec'ula' xquic'ulumaj rique,
ma e pacha' "caquichik quib" chwi
Ruch'a'tem ri Dios echiri' na caquicoj
taj.

⁹ No'j ec'u ralak alak cha'tal lo
ruma ri Dios, alak aj chacunel
chwach ri Nimalaj Takanel Dios,
alak jun tinamit ya'om ib alak che
ulok'nimaxic ri Dios* y lok'otal alak
ruma ri Dios re cu'ana alak utinamit*
cha' catzijo'j alak chique ri ticawex
janipa tak ri u'anom ri Dios, ri xresaj
lo alak chupa ri k'eku'm y xuya alak
chupa ri chomilaj K'ijsak. ¹⁰ Ralak
ojertan na alak ta utinamit ri Dios,
no'j wo'ora alak chi utinamit Rire.
Ma ojertan na xeta'maj ta alak puwi
ri relej uc'u'x ri Dios; no'j wo'ora ri
Dios uc'utum chi wa' che ralak.

*Ri jusuc' binic silabic chwach ri
Dios y chiquiwach ri winak*

¹¹ Hermanos ri lic c'ax canna' alak,
c'una chic'u'x alak, ralak na alak ta re
ruwachulew, ma alak xa ic'owel. E
uwari'che campixabaj alak, maya ib
alak che tak ri rayibal re ri ti'jil alak
ma wa' cach'o'jin pa anima' alak cha'
cuyo'j ri c'aslemal alak. ¹² Ri 'ana alak
e c'utu alak jun binic silabic lic jusuc'
chiquiwach ri winak na queta'am
ta uwach ri Dios. Jec'ula' echiri'
cac'un tanchi ri Kanimajawal, rique
caquiyac uk'ij ri Dios ruma quilom ri
chomilaj chac 'anom alak, tob wo'ora
quech'a't chi'ij alak. ¹³ Ruma c'u
ri Kanimajawal, lic cojo alak quitzij

conoje ri ya'tal paquik'ab quetakan
che ruwachulew, e pacha' ri nimalaj
takanel c'o paquiwi' uq'uiyal tinamit
¹⁴ y tak ri e aj wach ecojotal ruma ri
nimalaj takanel re quequiya pa c'ax
ri caqui'an ri na utz taj y re caquiyac
quik'ij ri caqui'an ri utz. ¹⁵ Ma ri
lic caraj ri Dios che alak e ca'an
alak ri utz cha' e cak'atej alak tak ri
ch'a'tibenic ca'an chi'ij alak cuma ri
ticawex na jinta quina'oj. ¹⁶ Pak'ab
alak c'o wi sa' ri ca'an alak; yey wa'
na e ta re ca'an alak ri na utz taj, ma
e re cu'ana alak aj chaquib re ri Dios
y jec'ula' e ca'an alak ri caraj Rire.
¹⁷ 'Ana alak chique conoje ri ticawex
janipa ri takal chique; mac'ak bi alak
uk'ij junok. C'ax chena'a alak ri her-
manos. C'ola xi'in ib pa anima' alak
chwach ri Dios. Lok'nimaj alak ri rey.

¹⁸ Ralak alak aj chaquib, cojo alak
quitzij ri patrón alak y ya'a ib alak
chitakic cuma rique. Wa' na xew ta
ca'an alak cuc' ri lic utz quic'u'x ma
jenela' 'ana alak cuc' ri lic na jinta
cacuyuw que. ¹⁹ Ma e lic utz ri' we
junok ruma cuna' chuc'u'x e cu'an ri
caraj ri Dios che, cuya ranima' cuch'ij
tak ri c'axc'obic cape puwi' tob wa' na
takal ta che. ¡Yey ri Dios cuyac uk'ij ri
ca'anaw wa'! ²⁰ No'j we e la' lic chirij
mac alak xch'ay can alak yey lic xcuy
alak wa', ¿sa' c'u ri' ri yacbal k'ij alak?
¡Na jintaj! No'j we cacuy c'u alak ri
c'ax ca'an che alak ruma ri utz catajin
alak che u'anic, ri' lic c'o yacbal k'ij
alak chwach ri Dios. ²¹ E ne ruma
wa' xusiq'uij alak ri Dios, ma ri Cristo
xutij c'ax kuma ri'oj; yey tak ri xu'ano
e c'utubal chike ri'oj cha' cojbin jela'
pacha' xbin Rire. ²² Ma jewa' tz'ibital
can puwi ri Cristo pa Ruch'a'tem ri
Dios:

Rire na xmacun taj,

y na jinta ne c'ana socoso'nic xel
puchi' *Is. 53:9*

cacha'. ²³ Echiri' ri winak lic xquic'ak
bi uk'ij ruc' itzelilaj ch'a'tem, Rire
na xuc'ul ta uwach ruc' itzelilaj
ch'a'tem. Yey echiri' quiya'om pa

c'axc'olil, Rire na xubi'ij taj cu'an uc'axel chique ri caqui'an c'ax che; ri xu'ano, e xuya ronoje puk'ab ri Dios, ri cu'an k'atbal tzij chi jusuc'.²⁴ Ec'u ri Cristo xuc'am bi ri kamac che rucuerpo echiri' xcam chwa ri cruz. Xu'an c'u wa' cha' jela' cakaya can ri mac y e cakaya kib che ri jusuc' binic silabic.† Ma jewa' tz'ibital can pa Ruch'a'tem ri Dios: Ruma c'u ri c'ax xutij Rire, xixcunutaj ri'ix *Is. 53:5* cacha'.²⁵ Rojertan, alak pacha' bexex e sachinak; no'j wo'ora xtzelej lo alak ruc' ri Cristo, ri Aj C'amal Kawach y ri Chajinel re ri kac'aslemal chwach ri Dios.

3

Pixabanic chique ri e c'ulanic

¹ Ec'u rilal ixok, e takej la ri achijil la. 'Ana c'u la wa' ma we rire na ucojom ta Ruch'a'tem ri Dios, tob na jinta cabi'ij la che chwi wa', c'o pa sak cucojo ruma ri binic silabic rilal.² ma carilo lic ube ri ca'an la y lic lal nimay tzij. ³ Ruchomalil juna ixok na e ta ruma ri wikital che rucuerpo; e uwari'che na utz ta c'u ri' we quic'ow uwi' che uyijbaxic ruwi', o quic'ow uwi' ruc' ri uwaaj y usansilo re oro o ri c'ul lic q'ui rajil cucojo. ⁴ Ma ruchomalil rixok e ri c'o chupa ri ranima'; wa' e ri lic utz uc'u'x y na aj ta tzucul ch'a'oj. Yey wa' wa uchomalil na casach ta c'ana uwach y lic c'o uk'ij chwach ri Dios. ⁵ Rojertan jela' xqui'an rixokib e jusuc', ri lic xcubi' quic'u'x ruc' ri Dios. Ma ri quichomalil rique xilitaj che ri quibinic quisilabic ruma xequitakej ri cachijil. ⁶ Jela' xu'an ri Sara, e lic xucoj utzij ri Abraham y ruch'a'bexic xu'ano e "lal wajawal". Ec'u ralak cu'ana alak ralc'o'al ri Sara we ca'an alak ri utz y na jinta c'o cuxi'ij rib c'u'x alak che.

⁷ Ec'u rilal achi, jekela la ruc' ri ixokil la ruc' sakil na'oj. 'Ana la che janipa ri takal che rire. C'una c'u chic'u'x la e rire lic na jinta co

ucowil yey junam uwach uc' la, ma junam cac'ul alak ri unimal rutzil uc'u'x ri Dios che ri c'aslemal alak. We ca'an c'u la wa', echiri' ca'an la orar, na jinta calatz'an re ri ch'a'tem la chwach ri Dios.

Pixabanic puwi ri kabinic kasilabic

⁸ Q'uisbal c'u re wa', e chu'ana xa jun c'u'x alak, c'ola c'axna'bal c'u'xaj uc' alak, lic c'ax na'a ib alak chwach alak ma chak' ib alak chwach ri Kakaw, c'utu c'u alak ri rutzil c'u'x alak y 'ana alak ch'uti'n che ib alak. ⁹ Matzelej alak uwach ri na utz taj ca'an che alak. We c'o junok cubi'ij itzelilaj ch'a'tem che alak, matzelej alak uwach ruc' itzelilaj ch'a'tem; ri 'ana alak e tz'onoj alak ri utz puwi ri ca'anaw re wa'. Yey we ca'an alak wa', ri Dios cuya na ri utz pawil alak, ma ruma wa' xusiq'uij alak. ¹⁰ Ma jewa' tz'ibital can pa Ruch'a'tem ri Dios:

China ri c'ax cuna' ruc'aslem
y caraj caric'owibej ri jujun k'ij
ruc' qui'cotem,
e chuk'atej c'u ri' ri rak' che ubi'xiquil
ri na chom taj
y mu'an chi ri quel lo rak'ubal
puchi'.

¹¹ Resaj c'u rib ri' che u'anic ri na utz taj,
yey e chu'ana ri utz.

Chutzucuj cac'oji' chi utzil chomal
cuc' conoje y
e chuya'a rib che u'anic wa'.

¹² Ma ri Kanimajawal c'o ruwach paquiwi
ri jusuc' quibinic quisilabic re quebuchajij,

yey lic cuya uxiquin chique
echiri' quech'a't ruc' pa oración.

No'j na chom ta queril
janipa ri caqui'an ri na utz taj *Sal.*

34:12-16

cacha'.
¹³ ¿China c'u ri ca'anaw ri na utz taj che alak we e lic ya'om ib alak che u'anic ri utz?✧ ¹⁴ Pero we catij alak c'ax ruma ca'an alak ri lic jusuc', ri' lic nim k'ij alaxic alak. E uwari'che,

† **2:24** Pa ri ch'a'tem griego cubi'ij "cha' oj caminak chi chwa ri mac yey oj c'as che ri jusuc' binic silabic". ✧ **3:13** Ro. 8:31

maxi'ij ib alak che ri xibibal pa alak ca'anic yey masach c'u'x alak che wa'.
 15 Ri 'ana alak e lok'oj alak uk'ij ri Cristo chupa ri anima' alak, ma Rire e Kajawal. Xaki yijba' ib alak che uc'ulic uwach tak ri tz'onobal ca'an che alak puwi ri cubul pan c'u'x alak che; yey 'ana alak wa' ruc' uch'uti'nal c'u'x alak y xi'in ib alak chwach ri Dios. 16 Bina alak chi jusuc' cha' jela' cuna' c'u'x alak na jinta mac 'anom alak. 'Ana c'u alak wa' cha' e janipa ri quech'a't chirij ri chomilaj binic alak ruc' ri Cristo, caya'taj quiquix ruma ri rak'ubal caqui'an chi'ij alak. 17 Ma we e caraj ri' ri Dios catij alak c'ax ruma ca'an alak ri utz, wa' e más utz chwa ri catij alak c'ax ruma ca'an alak ri na utz taj. 18 C'una chic'u'x alak, ri Cristo lic xutij c'ax echiri' xa jumul xcam ruma ri kamac. Tob Rire na jinta umac, xcam kuma ri'oj oj aj maquib cha' jela' cojuc'am bi ruc' ri Dios. Echiri' ri Cristo xcamisax cuma ri winak, pakatzij wi xcam rucuerpo; pero Rire xc'astajic, ma na xcam ta ri ranima'. 19 Jec'ula' xe'ec pa ec'owi ri ecaminak, wa' e ri tz'apim quichi', y xu'tzijoq chique janipa ri xu'ano. 20 Yey xtataj wa' cuma ri na xquicoj ta utzij ri Dios ojertan chupa ruk'ijol ri Noé. Ma ri Dios ruc' unimal uc'u'x xeroy'ej caquitzelej quitzij chupa tak la' la k'ij echiri' ri Noé catajin che u'anic ri nimalaj barco. Yey chupa c'u ri barco xa e ajilam ri xeboc bi, ma e wajxakib ri xecolobetaj che runimal jab. 21 Y wa' e pacha' ri bautismo cakac'ul ri'oj wak'ij ora re colobetajic. Wa bautismo na re ta caresaj ri ch'ul c'o che ri kacuerpo, ma e re caresaj ri mac c'o pa kanima' y ruma c'u wa' cakajiquiba' chwach ri Dios cojc'oji' chi jusuc'. Yey keta'am lic jiquibam uwach ri kacolobetajic ruma ruc'astajibal ri Kanimajawal Jesucristo, 22 ri xe'ec chila' chicaj y tz'ul puwiquik'ab ri Dios. Conoje c'u ri ángeles, cuc' tak ri c'o quiwach y ri c'o quichuk'ab e c'o chuxe' rutakanic

Rire.

4

Chojchacuna chi utz ruc' tak ri uya'om ri Dios pakak'ab

1 Ri Cristo lic xuya ranima' cutij c'ax kuma ri'oj. Jec'ula' ri', lic chirajawaxic che alak caya anima' alak catij alak c'ax ruma Rire. Ma e janipa ri caquiya canima' caqui'an ri utz tob cape c'ax paquiwi', k'alaj c'u ri' na e jinta chi puk'ab ri mac. 2 Ruma c'u la', janipa chi k'ij e c'o che ruwachulew, na caqui'an ta chi janipa ri rayibal que ri winak, ma e caqui'an janipa ri caraj ri Dios. 3 Ri u'anom lok e x'an lo alak pacha' ri caqui'an ri winak na queta'am ta uwach ri Dios. Ma xya ib alak che u'anic tak ri rayibal re ri ti'jil alak, yey xya ib alak pa k'abaric y xmol ib alak che u'anic ch'ulilaj mac; xya ib alak che ri lic na chom ta uwach yey lic itzel tak uwach ri x'an alak echiri' xlok'nimaj alak tak ri tiox.* 4 E tak c'u ri xcachbilaj alak che u'anic wa' wu'q'uiyal uwach mac, xcam canima' che echiri' xesaj ib alak che tak wa'; yey ruma ri' lic c'ax quech'a't chi'ij alak. 5 Pero copon c'u ri k'ij echiri' conoje rique caquiya na quib chupa ri quimac chwach ri Jun cuk'at tzij paquiwi ri e c'aslic y ri ecaminak. 6 Ruma ne c'u la', xtzijox ri Utzilaj Tzij chique ri ecaminak chupa ri quimac cha' cac'oji' quic'aslemal na jinta utakexic chwach ri Dios, tob chiquiwach tak ri winak, na utz ta ri xqui'an rique ruma xquicoj rubi' ri Cristo.

7 Lic xa nakaj chi c'o wi lo ruk'ijol echiri' caq'uis ri na utz ta uwach y calc'atisax c'u ronoje ri c'olic. Ruma c'u ri', lic c'ola na'oj alak puwi' sa' tak ri ca'an alak y xaki e ya'a ib alak pa oración chwach ri Dios. 8 Yey ri más chirajawaxic wi e ruc' ronoje c'u'x alak c'ax cana' ib alak chiwach alak, ma we lic c'o rutzil c'u'xaj uc' alak, ri' cacuy alak tak ruq'uiyal mac que ri nic'aj chic. 9 Chec'ulu

* 4:3 Rojertan e c'o winak caquicamisaj ri calc'o'al re kasa'n chwach tak ri quitiox.

alak chi utz ri quebopon chi ocho alak y mawunwut ne alak che u'anic wa'. ¹⁰ Ec'u chirij ri uya'om ri Dios pak'ab alak, cheto'o alak ri jujun chic, cha' jela' cu'an alak sakil aj chaquib re ri Dios y cachacun alak chi utz ruc' ruq'uiyal uwach to'bal uya'om ri Dios che alak. ¹¹ We c'o junok cac'utun chiquiwach ri hermanos, e chuc'utu puwi ri cubi'ij Ruch'a'tem ri Dios y na xa ta pa re cach'a'tic. We c'o junok caraj quebuto' ri ticawex, chu'ana wa' ruc' ri chuk'ab ya'tal che ruma ri Dios. Ronoje c'u ri ca'an alak, 'ana alak re yacbal uk'ij ri Dios ruma ri Kanimajawal Jesucristo, ri lic takal che c'o yacbal uk'ij y catakan c'u paquiwi conoje wak'ij ora y chikawach apanok na jinta utakexic. Amén.

Chojqui'cotok we cakatij c'ax ruma oj re ri Cristo

¹² Hermanos, macan anima' alak che tak runimal c'axc'obic cape pawil alak re cuc'am pa alak, ma konoje cojic'ow chupa wa'. ¹³ Ri 'ana alak e qui'cota alak, ma alak bare jun che tak ri c'axc'obic xic'ow wi ri Cristo, cha' echiri' cuk'alajisaj runimal uchomalil, ralak lic caqui'cot alak che. ¹⁴ We e c'o tzel quech'a't chi'ij alak ruma cojom alak rubi' ri Cristo, ri' lic nim k'ij alaxic alak ma ri chomilaj Ruxlabixel ri Dios c'o uc' alak. Katzij wi, e c'o ri tzel quech'a't chirij Rire, no'j ralak lic cayac alak uk'ij Rire. ¹⁵ We c'o junok che alak cutij c'ax, lic q'uixbal uwach we wa' e ruma camisanel o elek'om o ruma u'anom ri na utz taj che junok o ruma uminom rib chupa ri na jinta re che. ¹⁶ No'j we c'o junok cutij c'ax ruma ucojom rubi' ri Cristo, maq'uix c'u ri' che; ri chu'ana' e chuyaca uk'ij ri Dios ruma wa'. ¹⁷ Ma e k'ij wa' cajeker bi ri k'atbal tzij paquiwi ri e ralc'o'al ri Dios. Yey we nabe c'ut cajeker kuc' ri'oj, ¿sa' nawi que'quiq'uisa wi ri' ri na quicojom ta ri Utzilaj Tzij re ri Dios? ¹⁸ Ma jewa' cubi'ij pa Ruch'a'tem ri Dios:

We ri e jusuc' chwach ri Dios ruc' ne uc'ayewal quecolobetajic, ¿sa' c'u caquic'ulumaj ri' ri e aj mac, ri caqui'an quititz'itiquil che ri Dios?*

¹⁹ E uwari'che, e tak ri e c'o pa c'ax ruma caqui'an janipa ri caraj ri Dios, e qui'ana ri' ri lic usuc' y quiya'a c'u ri quic'aslemal puk'ab ri Dios, ri x'anaw re ronoje y lic e cu'an janipa rubi'tisim.

5

Pixabanic chique ri e aj wach re riglesia

¹ Wo'ora cuaj quebenupixabaj ri e aj wach re riglesia. Ri'in in jun cuq'uul rique, yey in jun xinwil ri c'axc'olil xic'ow wi ri Kanimajawal Jesucristo. Yey in bare jun c'o we che ri chomilaj yacbal uk'ij ri Cristo, ri cak'alajisax na uwach chikawach apanok. ² Cantz'onoy co che alak: Chechajij alak chi utz rutinamit ri Dios, ri eya'om chwi k'ab alak. Chechajij c'u alak chi utz ruc' ronoje c'u'x alak y na xa ta ruma camin alak chupa o xa ruma rayibal puak, ma ri caraj e lic cacha c'u'x alak che u'anic wa'. ³ Ma'an ne alak ri xew catakan alak paquiwi'; ri 'ana alak e c'utu alak ri chomilaj binic silabic alak chiquiwach rique. ⁴ We ec'u ca'an alak wa', echiri' cac'un ri Kanimajawal Jesucristo, ri Chajinel c'o paquiwi conoje ri e aj chajal rutinamit ri Dios, Rire cuya chijujunal alak jun corona na casach ta c'ana uwach, c'utubal re runimal uwach Rire.

Pixabanic chique rutinamit ri Dios

⁵ Ec'u ri'ix ix alabo, chicojo quitzij ri e aj wach re riglesia. Yey chirajawaxic che onoje alak ca'an alak ch'uti'n che ib alak chiwach alak, ma jewa' tz'ibital can chupa Ruch'a'tem ri Dios:

Ri Dios uyacom rib chiquij
janipa ri caquitac'aba' quik'ij;
no'j uya'om ri unimal rutzil uc'u'x
chique

* 4:18 Pr. 11:31

janipa ri caqui'an ch'uti'n che quib *Pr: 3:34* cacha'. ⁶ 'Ana ch'uti'n che ib alak y ya'a c'u ib alak puk'ab ri Dios, ri c'o unimal uchuk'ab; jec'ula' Rire lic cuyac k'ij ralak echiri' copon na ruk'ijol. ⁷ Ronoje rubis c'u'x alak ya'a alak chwach ri Dios, ma Rire lic coc il che chajixic alak.

⁸ Lic c'ola na'oj alak puwi sa' tak ri ca'an alak y mawar wach alak. Ma ritzel winak, ri aj retzelal c'u'x chi'ij alak, e cutzucuj su'anic catzak alak puk'ab jela' pacha' juna coj lic cusut quij ri ticawex re cutzucuj china ri cubik' bi. ⁹ Lic ch'ija alak uchuk'ab ritzel y lic chuk'ubej ib alak che ri cubulibal c'u'x alak ruc' ri Cristo. Yey mic'ow chic'u'x alak na xew ta ralak quic'owibej alak c'axc'obic, ma jenela' ri ka hermanos e c'o che ronoje ruwachulew caquic'owibej c'axc'obic.

¹⁰ Ri Dios xojusiq'uij cha' cojc'oji' ruc' ri Kanimajawal Jesucristo chupa ri chomilaj utakanic na jinta utakexic. Ruma c'u wa', echiri' ic'owinak chi alak jujun k'ij chupa wa c'ax; ri Dios, ri lic cojuto' che ronoje ruma ri unimal rutzil uc'u'x, e cuyac tanchi alak, cucowirisaj alak, cuya chuk'ab alak y cutiquiba' alak chi utz. ¹¹ Che c'u ri Dios takal wi cayac uk'ij wak'ij ora y chikawach apanok, ma ruchuk'ab na jinta utakexic. Amén.

Q'uisbal ch'a'tem re ri Pedro chique tak riglesias

¹² Xintz'iban c'u pan che alak; yey ri hermano Silvano, ri lic cubul nuc'u'x ruc', e cac'amaw bi wa' wa carta che alak. Ximpixabaj c'u alak y xink'alajisaj chiwach alak ri sakil unimal rutzil uc'u'x ri Dios; tiquila c'u alak chi utz chupa wa'.

¹³ Rutinamit ri Dios, ri e c'o pa ri tinamit re Babilonia, ri echa'tal ruma ri Dios junam uc' ralak, rique junam ruc' ri Marcos, ri pacha' nuc'ajol chupa rubi' ri Cristo, caquiya pan rutzil wach alak. ¹⁴ Ya'a alak rutzil

wach alak chiwach alak ruc' jun sakil tz'ubuj chi'aj,* c'utubal re c'ax cana' ib alak. C'ola utzil chomal chixo'l alak, ri c'o alak puk'ab ri Kanimajawal Jesucristo. Amén.

* **5:14** Ri Pedro jewa' xubi'ij ma rique e caqui'an wa' chiquiwach echiri' caquiya rutzil quiwach.

Ruca'm carta xutz'ibaj ri Pedro

Ri Pedro cuya pan rutzil quiwach ri quicojom rubi' ri Cristo

¹ Ri'in, Simón Pedro, in jun aj chac y tako'n re ri Kanimajawal Jesucristo. Cantz'ibaj pan wa carta che alak, janipa ri ya'tal che alak cacubi' c'u'x alak ruc' ri Cristo jela' pacha' ka'anom ri'oj. Wa' wa chomilaj cubulibal c'u'xaj xya' chike konoje ruma ri ka Dios y Colobenel Jesucristo, ma Rire lic jusuc' ri cu'an kuc'. ² E lic q'uiyar na paw'i alak ri unimal rutzil c'u'xaj y ri utzil chomal re ri Dios, yey wa' cac'ul alak ruma eta'am alak uwach ri Dios y ri Kanimajawal Jesucristo.

Ri caraj ri Dios che ri kabinic kasilabic

³ Ri Dios ruc' ri unimal uchuk'ab, uya'om chike ronoje tak ri cajawax che ri kac'aslemal y ri kabinic kasilabic chwach Rire. Yey cu'an wa' ruma ri xuya chike caketa'maj uwach Rire, ri xojusiq'uij ruc' ri unimal uchomalil y ri unimal uwach uk'ij. ⁴ Jec'uri'la', ri Dios uya'om nima'k y chom tak bi'tisinic chike cha' ruma wa' coju'ana pacha' Rire, ma elinak lo alak puk'ab ri rayibal na chom ta uwach, ri caquitakej ri winak re ruwachulew.

⁵ Ruma c'u' xcubi' c'u'x alak ruc' ri Cristo, chirajawaxic c'u' ri cachuk'ubej ib alak cha' ri binic silabic alak cu'an lic jusuc'. Y na xew ta wa', ma lic ne chirajawaxic queta'maj alak sa' ri caraj ri Dios che alak. ⁶ We eta'am chi c'u' alak sa' ri caraj ri Dios che alak, e 'ana alak ri'. Yey chajij ib alak chi utz cha' na catzak ta alak pa mac, y jec'uri'la' cac'oji' unimal c'u'x alak. Yey ruc' c'u' ri unimal c'u'x alak, e c'utu alak pa sakil wi ya'om ib alak che jun sakil binic silabic chwach ri Dios. ⁷ Y ruma c'u' lic ya'om ib alak che jun sakil binic silabic chwach ri Dios, c'ax na'a

ib alak chiwach alak. Yey na xew ta wa', ma lic ya'a ib alak che uc'utic ri rutzil c'u'x alak chique conoje.

⁸ Ma we c'o c'u' tak wa' uc' alak y ya'om ib alak che u'anic tak wa', ri' na coc ta xepuyil uc' alak yey cak'alajin c'u' ri' lic c'o cutikoj ri xeta'maj alak uwach ri Kanimajawal Jesucristo. ⁹ No'j e junok na jinta tak wa' ruc', ri' e pacha' xew caril ri c'o chwach; e junam ruc' pacha' juna potz', ma xic'ow ne chuc'u'x e rojertan lic aj mac yey e ri Dios xcuyuw umac. ¹⁰ E uwari'che hermanos, cambi'ij wa' che alak: E ri Dios xcha'w e alak yey e Rire siq'uiyom e alak. Ruma c'u' ri', chuk'ubej ib alak che uc'utic pa ri binic silabic alak, pakatzij wi siq'uim alak yey cha'tal alak ruma ri Dios. We ca'an alak wa', ri' na catzak ta chi alak pa mac. ¹¹ Jela' c'u' ri' lic cac'ul alak chi utz pa ri takanic na jinta utakexic re ri Kanimajawal y Kacolobenel Jesucristo.

¹² Ruma c'u' ri', na canwok'otaj ta ucuxtaxic wa' che alak, tob ne eta'am chi alak wa' K'ijsak y jiquibam chi c'u'x alak che. ¹³ Ma chinuwach ri'in, xalok' c'a in c'aslic, lic usuc' cancoj pa jolom alak tak wa' pixabanic. ¹⁴ Ma weta'am ri nucamic xa nakaj chi c'o lo wi, yey wa' e ri Kanimajawal Jesucristo uk'alajisam lo chwe. ¹⁵ E uwari'che lic inoquinak il che ucuxtaxic wa' che alak, cha' echiri' na in jinta chi uc' alak, xaki cac'un chic'u'x alak ronoje wa'.

Ri xebilow runimal uwach uk'ij ri Kanimajawal Jesucristo

¹⁶ Ma ri c'utunic xka'an chiwach alak chwi ruchuk'ab y ruc'unibal ri Kanimajawal Jesucristo, na e ta ruc' nuc'um ch'a'tem no'jital cuma ticawex; ma lic ruc' ri kawach xkil runimal uwach uk'ij Rire. ¹⁷ Ma ri'oj xkilo echiri' xk'alajisax runimal uchomalil y lic xyac uk'ij ruma ri Kakaw Dios. Xkata ne rukul ri Dios xch'aw chupa ri chomilaj k'ijsak c'o pakawi', jewa' xubi'ij: «E Nuc'ajol wa', ri lic c'ax canna'o y lic quinqui'cot che» xcha'. ¹⁸ Xkata c'u

wa kulaj petinak chila' chicaj echiri' oj c'o ruc' Rire chwa ri santowilaj juyub.✧ 19 Wa xkilo e cujiquiba' uwach ri tzij tz'ibital can cuma ri k'alajisanelab chupa Ruch'a'tem ri Dios. Y lic utz ri ca'an alak we coc alak il che wa', ma e pacha' juna ak' cawon pa k'eku'm c'a pa ri sakribal echiri' quel lo ri nimalaj ch'umil re ri sakribal.✧ Wa' e que'elawi ruc'unibal ri Cristo, ri cutzij upa ri anima' alak. 20 Lic c'ut chirajawaxic nabe na camaj alak usuc' wa': Ri tz'ibital can chupa Ruch'a'tem ri Dios, na utz taj cak'alajisaxic xa ruc' una'oj juna achi. 21 Ma ri k'alajisam can chupa Ruch'a'tem ri Dios, na petinak ta ruma quino'jibal ticawex, e petinak ruma ri Santowilaj Ruxlabixel ri Dios. Ma tak ri santowilaj achijab re ri Dios xech'a'tic e chirij janipa ri xuk'alajisaj ri Ruxlabixel ri Dios chique.

2

E c'o aj c'utunel xa e socoso'nel (Jud. 3-13)

1 Chiquixo'l ri tinamit e aj Israel xec'oji' k'alajisanelab xa e socoso'nel; jec'ula' chixo'libal ralak quec'oji' e aj c'utunel xa e socoso'nel. Wa' xa xe'lak'ay caquicoj pa quijolom ri hermanos c'utunic na usuc' taj, xa re yojobal ri quibinic quisilabic. Yey e cu'ana ne ri caquibi'ij na caquicoj ta chi rubi' ri Kanimajawal, ri xcam cuma rique re quebucolobej. Y ruma c'u wa na utz taj caqui'ano, e cape tan ri k'atbal tzij paquiwi'. 2 Yey lic e q'ui ri caquitakej ri quibinic wa aj c'utunel, ri quiya'om quib che u'anic tak ri quirayibal q'uixbal uwach. Ruma c'u ri' wa', tak ri winak caquijek quech'a't chirij ri be re ri K'ijesak. 3 Wa aj c'utunel e que'ec quic'u'x ruc' ri puak; caquesaj c'u uq'uiyal puak che alak ruc' socoso'nic. Ruma c'u tak wa caqui'ano, ri k'atbal tzij xex chi catewun paquiwi', yey ri sachibal quiwach xa nakaj chi c'o wulok.

4 Ri Dios na xucuy tane quimac ri ángeles xemacunic, ma xebuc'ak bi pa xibalba', xebutz'apij pa utum k'eku'm cha' quec'oji' na chila' c'a echiri' ca'an ri k'atbal tzij paquiwi'.✧

5 Yey na xucuy tane quimac ri winak ojertan echiri' xutak lo runimal jab paquiwi'. Xew xebucolobej wajxakib ticawex; jun chique e ri Noé, ri xtzijon chwi ri jusuc' binic chwach ri Dios.✧ 6 Jenela' xuk'at tzij paquiwi ri queb tinamit Sodoma y Gomorra echiri' xusach quiwach ruc' ak', xu'an chaaj chique. Xu'an c'u wa' c'utubal re sa' ri caquic'ulumaj ri e aj maquib. 7 Pero xucolobej ri Lot, jun achi lic jusuc' rubinic usilabic, ri lic oquinak chuc'u'x ri itzel quibinic quisilabic tak ri winak pa jekel wi.✧

8 Yey ruma c'u jusuc' rubinic rire, ronoje k'ij lic cubisoj uc'u'x ri na ube taj cuto y caril chique wa' wa winak.

9 Ruc' tak wa', cakilo ri Dios lic reta'am su'anic quebucolobej janipa ri quiya'om quib puk'ab echiri' cac'am quipa; yey ec'u janipa ri na e ta jusuc', ri' e c'o chi chuxe' ri k'atbal tzij re ri Dios, y wa' cape na paquiwi' echiri' copon ruk'ijol.

10 Yey wa k'atbal tzij e lic takal chique ri quitakem tak ri rayibal re ri quti'jil, ri benak quic'u'x che u'anic ri ch'ulilaj mac, ri na caquiya ta quib catakan junok paquiwi', ri na queq'uix ta che u'anic janipa ri cacaj rique, ri e tiz'titak, ri na caquixi'ij tane quib quech'a't ruc' itzel ch'a'tem chiquij tak ri c'o quiwach y c'o quichuk'ab paquiwi'.

11 Yey ne ri ángeles, tob lic c'o quichuk'ab y lic c'o quiwach ya'talic, na caquic'ak tane bi quik'ij ri jujun chic c'o quiwach echiri' caquicoj quimac chwach ri Kanimajawal. 12 No'j wa' wa aj c'utunel e socoso'nel, e caquich'a'tibej ri na caquimaj tane usuc'. Ruma c'u ri', ca'an chique pacha' ca'an chique ri awaj na jinta quina'oj, ri quebalaxic xa re quechapic y re quecamisaxic.

✧ 1:18 Mt. 17:1-8; Mr. 9:7; Lc. 9:35 ✧ 1:19 Ap. 22:16 ✧ 2:4 Jud. 6 ✧ 2:5 Gn. 6:9-10; 7:7 ✧ 2:7 Gn. 19:29

¹³ Ca'an c'u c'ax chique, uc'axel ri c'ax qui'anom rique chique jujun chic. Rique lic benak quic'u'x che u'anic ri quirayibal lic q'uixbal uwach yey caqui'an ne wa' tob pak'ij. Echiri' rique caquimol quib uc' alak re quewa' uc' alak, e jela' pacha' ri ch'ul cuch'ulaj juna c'ul, ma lic q'uixbal uwach ri caqui'an chixo'l alak.

¹⁴ Wa' wa'chijab echiri' caquil juna ixok, xew caquich'ob ri quemacun ruc', na quic'ow ta quic'u'x che quemacunic, quequimin pa mac ri na jinta quicowil chwach ri Dios y quiya'om quic'u'x che urayixic ronoje ri caquilo. Ec'u ri Dios uk'atom chi tzij paquiwi rique ¹⁵ ma xquiya can ri sakil be y xquimaj bi jun be lic na e taj. Qui'anom c'u que pacha' ri xu'an ri Balaam,* ruc'ajol ri Beor. Wa' e lic xcha ranima' che uch'aquic puak ruma ri na jusuc' taj xu'ano. ¹⁶ Ruma c'u ri mac catajin che u'anic, xch'a'bex upa, yey ri xch'a'ben upa je jun awaj aj eka'n! Tob rawaj na quech'aw taj, wa jun buru ruc' uch'awibal achi xch'aw che y jela' xuk'atej ruch'u'jilal ri jun aj k'ij.*

¹⁷ Wa' wa' aj c'utunel pacha' e ac'al na jinta chi ya' chupa, pacha' e sutz' xa quec'am bi ruma runimal tew. Chique c'u conoje ri' wa', yijbital chi ri lic k'eku'malil ak'ab cha' na jinta utakexic quebe'c'ola chupa. ¹⁸ Ruc' ri quich'a'tem lic caqui'an nim che quib tob na jinta ne que'elawi ri caquibi'ij. Yey rique caquibi'ij utz we e caqui'an sa' ri curayij ri quti'jil y caquiya c'u quib che u'anic wa'. Jec'ula' e quequimin tanchi pa mac ri c'ac' ne ebelinak lo chiquixo'l tak ri caqui'an ri na utz taj. ¹⁹ Caquibi'ij e puk'ab jun c'o wi cu'an sa' ri caraj cu'ano; yey rique puk'ab ne ri mac e c'o wi. Ma echiri' junok na cuch'ij ta uchuk'ab jun chic, ri' e cac'oji' puk'ab ri casocow re; jec'ula' cuc'ulumaj ri jun na cuch'ij ta uchuk'ab ri mac. ²⁰ Ec'u ri ebelinak chi lo chupa ri

ch'ulilaj mac re ruwachulew ruma xqueta'maj uwach ri Kanimajawal y Kacolobenel Jesucristo, we quetzelej tanchi chupa wa mac y quesocotaj ruma, ri' más c'ax ri caquiq'uisbej wi chwa echiri' c'amaja' caqueta'maj uwach ri Kanimajawal. ²¹ Más utz c'u ri' chique tamaji xqueta'maj ri be re ri jusuc' binic chwa ri caquesaj quib che ri Santowilaj Tzij Pixab re ri Dios, ri xya'taj chique. ²² Ec'u ri qui'anom rique, pakatzij wi e pacha' ri jun tzij jewa' cubi'ij:

Ri tz'i' catzelej tanchi

che utijic ri uxabem chi ulok,*

yey ri ak atinism chic,

cubalcatila' tanchi rib chupa ri xok'o'l

cacha'.

3

Ruc'unibal ri Kanimajawal Jesucristo

¹ Hermanos, e uca'm carta wa' cantz'ibaj pana che alak. Yey chupa ucabichal carta lic e canc'osoj uwach ri sakil na'oj alak ruc' pixabanic, cha' ri na'oj alak cac'oji' chi jusuc'.

² C'una c'u chic'u'x alak ri xquibi'ij lo rojertan ri k'alajisanelab re ri Dios, yey ri cubi'ij ri takanic re ri Kanimajawal y Kacolobenel, ri xc'ut che alak cuma tak rutako'n ri Dios. ³ Lic chirajawaxic nabe na queta'maj alak wa': Chupa tak ruq'uisbal k'ij queyactaj lo winak e ch'aminel, ri caquitakej ri quirayibal na chom ta uwach. ⁴ Caquibi'ij c'u che alak: «¿Sa' xu'an ri' ri bi'tisinic 'anom can puwi rutzelejic lo ri Cristo? Ma ya ne xecam ri kachu-kakaw, ri nabe xecojow rubi' ri Cristo; y ronoje junam u'anom chwi lo rujekebal ruwachulew, na jinta c'o jalc'atajinak che» quecha'.

⁵ Jec'uwa' caquibi'ij ma na cacaj taj caquimaj usuc' e rojertan e ri Dios ruc' Ruch'a'tem xu'an ruwacaj y xu'an ruwachulew, yey wa' xuwinakirisaj lo pa ri ya' y xutiquiba' chuxo'libal wa'.* ⁶ Yey ruma c'u ri

ya' re ri nimalaj jab xutak lo ri Dios, xsach quiwach tak ri winak re ojer-tan y xjalc'atix uwach ruwachulew. ⁷ Ec'u ruwa caj y ruwachulew e c'o wo'ora, e chajital chi ruma ri tzij ubi'im ri Dios c'a echiri' queya' pa ak' chupa ruk'ijol ri k'atbal tzij, echiri' casachisax quiwach ri ticawex lic e aj maquib.

⁸ Pero ralak hermanos, masach chic'u'x alak wa': Chwach ri Kakaw e ri jun k'ij e junam ruc' pacha' chi juna mil junab; yey e ri jun mil junab e junam ruc' pacha' chi juna k'ij. ⁹ Ri Kanimajawal na camayin ta che u'anic janipa rubi'tisim lok, jela' pacha' ri caquibi'ij jujun. Ma Rire lic c'o unimal uc'u'x kuc', y na caraj ta c'u casach uwach junok. Ri caraj Rire e conoje ri ticawex caquitzelej quitzij chwach.

¹⁰ Ec'u ruk'ijol ruc'unibal ri Kanimajawal cac'un lok pacha' ri oquibal re juna elek'om pa juna ja chak'ab, ma ri elek'om na cubi'ij ta apanok jampala' coponic. Chupa c'u wa' wa k'ij casach uwach ruwa caj ruc' jun nimalaj ch'awibal cajininic y ronoje tak ri c'o chwach casach quiwach ruma ri ak'. Yey ruwachulew y ronoje tak ri e c'o chwach queporo-tajic. ¹¹ We ronoje c'u ri' wa' jela' rusachic uwach ca'anic, ¿su'chac c'u ri' na cabin ta alak jusuc' ruc' jun sakil binic silabic chwach ri Dios? ¹² Ruc' c'u ronoje c'u'x alak, lic choc alak il che roy'exic ruc'unibal ruk'ijol ri Dios. Ma chupa wa' wa k'ij ruwa caj cumaj ak' y casach uwach, y ronoje tak c'u ri' ri c'o che ruwa caj cac'atic y cajak'ur ruma ruc'atibal ri ak'. ¹³ No'j ri'oj koye'em jun c'ac' uwa caj y jun c'ac' uwachulew jela' pacha' rubi'tisim ri Dios. Yey chiri', conoje xew e caqui'an ri lic jusuc'.

¹⁴ E uwari'che ralak hermanos, ruma oye'em alak tak wa', e chu'ana ubis c'u'x alak ri carikitaj alak ruma ri Dios chi utzil chomal ruc' jun binic alak lic jusuc', cha' na jinta mac alak y na jinta junok catz'akaw mac chi'ij alak. ¹⁵ Lic maja c'u

alak usuc' wa': Runimal uc'u'x ri Kanimajawal kuc' e re cojcolobetajic jela' pacha' rutz'ibam ri ka hermano Pablo che alak, yey ri xutz'ibaj rire e chirij ri na'oj ya'tal che ruma ri Dios. ¹⁶ Ri Pablo lic xch'a't chwi tak wa'. Chupa tak rucartas c'o ri lic c'ayew umajic usuc'. Yey e tak c'u ri na jinta quimajom puwi wa' y na jinta ucowil ri cubulibal quic'u'x, na jusuc' ta chi ubi'xiquil caqui'an puwi tak rutz'ibam ri Pablo yey jenela' caqui'an ruc' ri nic'aj chic Utzij Upixab ri Dios; y ruc' wa' e caquitzucuj ri k'atbal tzij re ri Dios paquiwi'.

¹⁷ E uwari'che ralak hermanos, ruma eta'am chi alak chi utz sa' ri catajin lok, lic chajij c'u ib alak cha' na cajeq'uetaj tubi alak ruma ri socoso'nic que ri lic na quebin ta jusuc' y cha' na caya ta can alak ri Utzilaj Tzij cojom chi alak. ¹⁸ Ri 'ana alak e q'uiya alak chupa ri unimal rutzil uc'u'x ri Dios y che ri reta'maxic uwach chi utz ri Kanimajawal y Kacolobenel Jesucristo. Che c'u Rire takal wi ri yacbal k'ij na jinta utakexic wo'ora y chikawach apanok. Amén.

Ri nabe carta xutz'ibaj ri Juan

Ri Tzij re c'aslemal

¹ Cakatz'ibaj pan wa carta che alak chwi ri Jun xex chi c'o lo wi echiri' c'amaja' ne ca'an ruwachulew, puwi sa' tak ri xubi'ij yey puwi ri kilom ruc' ri kawach. Ma pakatzij wi xkil uwach y xkachap ne ruc' ri kak'ab. Cojtz'iban c'u ri' puwi ri Jun pakatzij wi e ri Tzij, [☆] ri cuya c'aslemal. ² Wa Jun cuya c'aslemal xc'un che ruwachulew yey ri'oj xkil uwach. E uwari'che cakabi'ij sa' ri kilom y cakak'alajisaj c'u che alak puwi wa Jun na jinta utakexic ruc'aslemal. Rire xex chi c'o lo wi ruc' ri Kakaw Dios yey xuk'alajisaj c'u rib chikawach ri'oj. ³ Janipa c'u ri kilom y ri katom, e cakak'alajisaj pan che alak; ma e cakaj cu'an alak xa jun kuc' ri'oj jela' pacha' ri'oj pakatzij wi xa jun ka'anom ruc' ri Kakaw Dios y ruc' Ruc'ajol, wa' e ri Kanimajawal Jesucristo. ⁴ Cakatz'ibaj pan wa carta che alak cha' junam caqui'cot alak kuc'.

Ri lic chirajawaxic wi e cojbin chupa ri K'ijsak

⁵ Ec'u wa tzij katom che ri Kanimajawal Jesucristo e cakak'alajisaj che alak: Ri Dios e K'ijsak yey ruc' Rire na jinta c'ana k'eku'malil. ⁶ We cakabi'ij xa jun ka'anom ruc' ri Dios yey cojbin chupa ri k'eku'malil, ri' cojelic xa oj aj rak'ul y na cojbin ta c'u chupa ri K'ijsak. ⁷ No'j we cojbin chupa ri K'ijsak jela' pacha' ri Dios c'o pa ri K'ijsak, ri' xa jun ka'anom chikawach. Yey ronoje ri kamac cach'ajtaj* c'u ri' ruma ruquiq'uel ri Kanimajawal Jesucristo, Ruc'ajol ri Dios. ⁸ Pero we cakabi'ij na jinta kamac, ri' xa e cakasoc kib chikibil kib y na katzij ta ri cakabi'ij. ⁹ No'j

we cakak'alajisaj ri kamac chwach ri Dios, Rire cucuy kamac y cojuch'aj che ronoje ri na utz taj c'o pa kanima', ma Rire lic jusuc' y ujiquibam uwach cu'an wa' yey Rire na cu'an ta rak'ubal. ¹⁰ We cakabi'ij na oj ta macuninak, ri' e pacha' caka'an aj rak'ul che ri Dios, ma cakabi'ij na katzij ta ri ubi'im can Rire. [☆]

2

Ri Kanimajawal Jesucristo cach'aw pakawi' chwach ri Dios

¹ Ralak alak walc'o'al chupa rubi' ri Dios, cantz'ibaj c'u pan wa' che alak cha' na camacun ta alak. Yey we c'o junok che alak camacunic, cheta'maj alak c'o Jun cach'aw pakawi' chwach ri Kakaw, wa' e ri Kanimajawal Jesucristo, yey Rire lic jusuc'. ² E Rire ri xuya rib xcam pakac'axel re tojbal ri kamac. Y na xew ta re tojbal ri kamac ri'oj, ma re tojbal ri quimac conoje ri e c'o che ruwachulew.

³ We caka'an ri takanic cuya ri Dios chike, cak'alajin c'u ri' pakatzij wi keta'am uwach Rire. ⁴ We c'o cabi'n re: «Ri'in weta'am uwach ri Dios» yey na cu'an ta janipa ri takanic cuya ri Dios che, ri' xa aj rak'ul y na jinta ri K'ijsak ruc'. ⁵ No'j ri cutakej ri cubi'ij ri Dios, ri' cak'alajinic pakatzij wi lic c'ax cuna' ri Dios. We jec'ula' caka'an ri'oj, k'alaj c'u ri' pakatzij wi xa jun ka'anom ruc' Rire. ⁶ We c'o junok cubi'ij xa jun u'anom ruc' ri Dios, chirajawaxic c'u ri' chu'ana che rubinic jela' pacha' rubinic ri Kanimajawal Jesucristo.

Ri takanic puwi ri sakil rutzil c'u'xaj

⁷ Hermanos, na cantz'ibaj ta jun c'ac' tziipixab* che alak, ma e cantz'ibaj chwi ri xex chi c'o uc' alak chwi ri petinak lok. Wa ojer tziipixab e ri xex chi tom wi lo alak. ⁸ Na ruc' ta c'u ri', e pacha' c'ac' wa cantz'ibaj che alak, ma wa' lic xk'alajin che rubinic

[☆] **1:1** Jn. 1:1 ^{*} **1:7** Echiri' cubi'ij cach'ajtaj ronoje ri kamac, wa' e que'elawi, ri Dios cucuy ri kamac y na cape ta chi c'u ruk'atbal tzij pakawi'. [☆] **1:10** Pr. 20:9; Ec. 7:20 ^{*} **2:7** Wa tziipixab e ri c'ax cakana' kib chikawach ruc' ri sakil rutzil c'u'xaj xuc'ut ri Jesús. Jn. 13:34

ri Jesús yey cak'alajin c'u che ri binic silabic ralak, ma ri k'eku'malil catajin upacatajic y ri sakil K'ijsak cawon chic.

⁹ We c'o junok cubi'ij c'o chupa ri K'ijsak yey tzel caril ri ratz-uchak', ri' c'a c'o pa k'eku'malil. ¹⁰ No'j we junok c'ax cuna' ri ratz-uchak', ri' c'o chupa ri K'ijsak y na jinta c'o caminow re pa mac. ¹¹ Pero ri tzel caril ri ratz-uchak', ri' c'a c'o pa k'eku'malil y cabin c'u chupa wa'. Ruma la', na reta'am taj pachawi que'ec wi, ma ruma c'o chupa ri k'eku'malil e junam ruc' pacha' potz'.

¹² Cantz'ibaj pan wa' che alak, ralak walc'o'al chupa rubi' ri Dios, ma cuytajinak chi mac alak ruma ri xu'an ri Kanimajawal Jesucristo.

¹³ Cantz'ibaj pan wa' che alak ri c'o alc'o'al alak, ma xeta'maj alak uwach ri Kanimajawal, ri xex chi c'o lo wi echiri' c'amaja' ne ca'ani' ruwachulew. Cantz'ibaj pan wa' chiwe ri ix alabo-alito, ma ich'ijom chi uchuk'ab ritzel winak.

Cantz'ibaj pan wa' che alak, ralak walc'o'al chupa rubi' ri Dios; ma xeta'maj alak uwach ri Kakaw.

¹⁴ Xintz'iban c'u pan che alak ri c'o alc'o'al alak, ma eta'am chi alak uwach ri Kanimajawal, ri xex chi c'o lo wi echiri' c'amaja' ne ca'ani' ruwachulew. Xintz'iban pan chiwe ri ix alabo-alito, ma lic c'o ruchuk'ab ri Dios iwuc' y Ruch'a'tem ri Dios lic tiquil chupa ri iwanima' yey lic ich'ijom chi uchuk'ab ritzel winak.

¹⁵ Me'ec c'u'x alak ruc' ri c'o che ruwachulew ruc' tak ri xa re ruwachulew. Ma we c'o junok e que'ec uc'u'x ruc' tak wa', ri' na c'ax ta cuna' ri Kakaw. ¹⁶ Ma e ronoje ri na utz taj c'o che ruwachulew, na ruc' ta ri Dios petinak wi, xa e re ruwachulew. Yey wa' e tak ri rayinic

re ri kati'jil, ri rayinic re caka'an ke'oj che janipa ri cakilo y ri rayinic re yachal kak'ij. ¹⁷ Ec'u ruwachulew xa caq'uisic junam ruc' ronoje ri rayinic na utz taj c'o chwach; no'j c'u ri ca'anaw janipa ri caraj ri Dios, ri' na jinta utakexic ruc'aslemal.

Kachajij kib chiquiwach ri e aj so-coso'nel

¹⁸ Alak walc'o'al chupa rubi' ri Dios, oj c'o chi che ruq'uisbal k'ij. Keta'am chi wa', ma tom chi alak e cac'un lo ri jun cayactaj chirij ri Cristo, ri cabi'x "anticristo"☆ che. Yey wo'ora lic e q'ui chi ri eyactajinak chirij ri Cristo. ¹⁹ Rique tob xquimol quib junam kuc' ri'oj, na junam ta quic'u'x kuc' ri'oj. Ma we ta e ri', xecanaj ta can kuc'. Pero xebel c'u bi chikaxo'l ri'oj, y ruc' wa' cak'alajinic na jinta junok chique rique e kuq'uil ri'oj.

²⁰ Ec'u ralak na alak ta jela' pacha' rique, ma ya'tal che ralak ri Ruxlabixel ri Jun lic nim uk'ij Santo y ruma c'u wa' onoje alak eta'am alak ri K'ijsak. ²¹ Cantz'ibaj pan wa' che alak, na e ta ruma na eta'am ta alak ri K'ijsak re ri Dios, ma e ruma ne ri eta'am alak wa' yey eta'am chi c'u alak na jinta juna rak'ubal no'jital lo che ri K'ijsak.

²² ¿China tak ri lic e aj rak'ul? E tak ri caquibi'ij: «Ri Jesús na e ta Rucha'o'n lo ri Dios.» Ec'u tak ri caquibi'ij wa', na xew ta eyactajinak chirij Ruc'ajol ri Dios, ma jenela' eyactajinak chirij ri Kakaw Dios. ²³ E junok cubi'ij: «Ri Jesús na e ta Uc'ajol ri Dios,» ri' na jinta ri Kakaw Dios ruc'. No'j ri cuk'alajisaj: «Ri Jesús e Uc'ajol ri Dios,» ri' c'o ri Kakaw Dios ruc'.

²⁴ Ec'u ri xex chi tom wi lo alak puwi ri Cristo, e tiquila ri' chupa ri anima' alak. Yey we e u'anom ri', c'o chi alak puk'ab ri Kakaw Dios y puk'ab Ruc'ajol. ²⁵ Ec'u bi'tisinic wa' u'anom can ri Kanimajawal Jesucristo: E ri cuya ri c'aslemal na jinta utakexic chike.

☆ 2:18 2 Ts. 2:3-4

²⁶ Cantz'ibaj c'u pan wa' che alak, ma e c'o ri cacaj caquisoc alak. ²⁷ No'j ralak c'o chi pa anima' alak ri Uxlabixel ya'tal che alak ruma ri Kanimajawal Jesucristo. E uwari'che na cajawax taj cac'un lo junok ruc' c'utunic lic junwi chwa ri k'alajisam chi che alak, ma ri Ruxlabixel ri Dios e cac'utuw che alak ronoje ri K'ijesak re ri Dios. Y janipa ri cuc'ut Rire, lic katzij, na rak'ubal taj. Ruma c'u ri', tiquila alak chi utz chupa ri majom alak che ri Ruxlabixel ri Dios. ²⁸ Ec'u wo'ora, ri alak walc'o'al chupa rubi' ri Dios, mesaj ib alak puk'ab ri Kanimajawal Jesucristo, cha' ruc' cubulibal kac'u'x cakoy'ej Rire y na cojq'uix ta chwach Rire echiri' cak'alajin uwach pa ruc'unibal. ²⁹ Ralak eta'am chi alak wa': Rire lic jusuc'. Cheta'maj c'u alak ri': E janipa ri caqui'an ri lic jusuc', ebalaxinak chi chupa rubi' Rire.

3

Oj ralc'o'al ri Dios

¹ Ch'obo pe alak puwi ri sakil rutzil uc'u'x ri Kakaw Dios, ma lic c'ax cojuna'o y uya'om ri cabi'x chike oj ralc'o'al Rire. E uwari'che ri winak e c'o che ruwachulew, ri c'amaja' caquicoj rubi' ri Jesús, na queta'am taj oj china ri'oj chwach ri Dios, ma rique na queta'am ta uwach Rire. ² Hermanos, wo'ora oj chi ralc'o'al ri Dios, tob c'amaja' cak'alajinic sa' ri coju'ana chikawach apanok. Pero keta'am c'ut echiri' cak'alajin uwach ri Kanimajawal Jesucristo, coju'ana jela' pacha' Rire, ma cakilo y caketa'maj c'u uwach chi utz. ³ Janipa ri cubul pan quic'u'x che wa', caquichomaj ri quibinic quisilabic chiquibil quib cha' cu'ana jela' pacha' ruchomal rubinic ri Kanimajawal. ⁴ Janipa c'u ri quemacunic e caquipalajij Rutzij Upixab ri Dios, ma ri mac e rupalajixic Rutzij Upixab ri Dios. ⁵ Eta'am chi c'u alak, ri Kanimajawal Jesucristo xc'unic re cojresaj puk'ab ri mac yey Rire na

jinta c'ana umac. ⁶ Janipa c'u ri qui'anom xa jun ruc' ri Kanimajawal Jesucristo, ri' na caquiya ta chi quib che u'anic ri mac. Yey janipa ri quiya'om quib che u'anic ri mac, ri' na caquimaj ta usuc' china ri Cristo y na queta'am tane uwach. ⁷ Alak walc'o'al chupa rubi' ri Dios, mac'o masocow e alak. Ma e junok catajin che u'anic ri utz, ri' jusuc' rubinic usilabic jela' pacha' rubinic ri Kanimajawal Jesucristo lic jusuc'. ⁸ E junok c'a c'o pa mac, ri' re ritzel winak, ma ritzel winak lic rewi aj mac chwi xjeki' lo ruwachulew. Ruma ne c'u wa' xc'un Ruc'ajol ri Dios cha' colu'sacha uwach janipa ri u'anom ritzel winak.

⁹ Yey ri u'anom chi ralc'o'al ri Dios, na cuya ta rib che u'anic ri mac, ma ri Dios uya'om chi jun c'ac' c'aslemal che. Ruma c'u ri', na utz taj c'a cac'ojl' pa ri mac, ma u'anom chi ralc'o'al ri Dios. ¹⁰ Ruc' c'u ri' wa', cak'alajinic china tak ri e ralc'o'al ri Dios yey cak'alajinic e china tak ri e ralc'o'al ritzel winak. Ma e junok na cu'an ta ri jusuc' yey na c'ax tane cuna' ri ratz-uchak', ri' na ralc'o'al ta ri Dios.

C'ax kana'a kib chinima konoje

¹¹ E tzij wa' xex chi tom wi lo alak: C'ax kana'a kib chinima konoje.✧

¹² Maka'an ke'oj pacha' ri xu'an ri Caín, ma rire e re ritzel winak y ruma ri' xucamisaj ruchak'. ¿Su'be xucamisaj? Ma e tak ri xu'an ri Abel lic jusuc' chwach ri Dios; no'j e tak ri xu'an rire na chom ta uwach.

¹³ Alak nu hermanos, macam anima' alak che we ri na queta'am ta uwach ri Dios tzel caquil alak. ¹⁴ Ri'oj keta'am ojelinak chi lo chupa ri be re ri camic yey wo'ora oj c'o chi chupa ri be re ri c'aslemal, ma c'ax quekana' ri ka hermanos. No'j e junok na c'ax ta cuna' ru hermano, ri' c'a c'o chupa ri be re ri camic. ¹⁵ Ec'u junok tzel caril ru hermano, ri' camisanel chwach ri Dios; yey eta'am alak, e juna camisanel na takal ta che caya'i' uc'aslemal na jinta utakexic.

16 Ri'oj kamajom usuc' sa' ri sakil rutzil c'u'xaj, ma ri Jesús xuc'ut wa' chike echiri' xuya rib pa camic kuma ri'oj. Jec'uri'la', ri'oj chirajawaxic wi cakaya kanima' che quito'ic ri ka hermanos tob ne ruma wa' cojcamisaxic. 17 Yey we c'o junok lic c'o ubitak re y carilo c'o cajawax che ri ratz-uchak', pero na cajuch' ca'n ta pa ranima', ¿c'o neba rutzil uc'u'x ri Dios ri' pa ranima'? Na jintaj. 18 Alak walc'o'al chupa rubi' ri Dios, na xa ta cakabi'ij ruc' uwa ke' c'ax cakana' kib, ma ri lic chirajawaxic wi e cak'alajin ri rutzil kac'u'x ruc' tak ri utz caka'ano.

19 We ec'u caka'an wa', cak'alajinic oj re ri K'ijsak yey cakana' c'u ri' lic utz ka'anom chwach ri Dios. 20 Tob c'u cakana' chikac'u'x c'o ri na utz taj ka'anom, na ruc' ta c'u ri', ri cubi'ij ri Dios e más c'o uwach chwa ri cubi'ij ri kanima', ma ri Dios lic reta'am ronoje. 21 Hermanos, we cakana' chikac'u'x na oj jinta pa mac, c'o ucowil kac'u'x ri' chwach ri Dios. 22 Yey we c'o cakat'onoj che, Rire cuya na chike, ma e cojtajin che u'aniquil ri cubi'ij Rutzij Upixab y e caka'an ri cuc'ul uc'u'x Rire. 23 Ec'u utakanic wa' chike: Kacojo rubi' ri Jesucristo, Ruc'ajol ri Dios, yey c'ax kana'a kib chikawach jela' pacha' ri xojutak Rire che u'anic. 24 E junok catajin che u'anic ri cubi'ij Rutzij Upixab ri Dios, ri' puk'ab ri Dios c'owi y ri Dios jekel pa ranima'. Ruma c'u ri Ruxlabixel uya'om ri Dios chike, lic keta'am Rire jekel pa kanima'.

4

Ru'anic caketa'maj we juna c'utunic petinak ruc' ri Dios

1 Hermanos, lic e q'ui ri k'alajisanelab ruma xa e socoso'nel ebenak pa tak ri tinamit che ruwachulew re caqui'an c'utunic. E uwari'che macoj alak ruch'a'tem junok xew ruma cubi'ij c'o uk'alajisam lo ri Ruxlabixel ri Dios che. Ri 'ana alak e lic ch'obo alak we wa cubi'ij pakatzij wi re ri Dios. 2 ¿Su'anic caketa'maj we ruc'utunic junok petinak ruc' ri Ruxlabixel

ri Dios? Petinak ruc' ri Dios we e cujiquiba' wa': «Ri Jesucristo e Rucha'o'n lo ri Dios yey xu'an achi echiri' xc'un che ruwachulew.» 3 No'j we junwi ri cubi'ij, k'alaj c'u ri' ruc'utunic na ruc' ta ri Dios petinak wi, ma e petinak ruc' ri jun cabi'x “anticristo” che; wa' e ri tom chi alak cac'unic yey wo'ora cachacun chi ne che ruwachulew.

4 Alak walc'o'al chupa rubi' ri Dios, ralak alak re ri Dios y ch'ijom chi alak quichuk'ab wa' wa k'alajisanelab xa e socoso'nel; ma ri Uxlabixel c'o uc' ralak más c'o uchuk'ab chwa ri jun c'o che ruwachulew. 5 Ma rique xa e re ruwachulew, e uwari'che xa re ruwachulew ri caquic'utu; yey tak c'u ri winak re ruwachulew e lic caquitakej ri quic'utunic rique. 6 Pero ri'oj oj re ri Dios, yey ri queta'am uwach ri Dios e caquitakej ri kac'utunic ri'oj, no'j tak ri na e ta re ri Dios na caquitakej ta ri kac'utunic ri'oj. Jela' c'u ri' caketa'maj we juna c'utunic petinak ruc' ri Uxlabixel re ri K'ijsak o petinak ruc' ri jun xa socoso'nel.

Ri Dios e aj rutzil c'u'xaj

7 Hermanos, lic chirajawaxic wi c'ax kana'a kib chikawach, ma ri rutzil c'u'xaj ruc' ri Dios cape wi. E junok c'o rutzil c'u'xaj ruc', ri' alaxinak pa rubi' ri Dios yey reta'am uwach ri Dios; 8 no'j e junok na jinta rutzil c'u'xaj ruc', ri' na reta'am ta uwach ri Dios, ma ri Dios e aj rutzil c'u'xaj. 9 Ri rutzil uc'u'x ri Dios xk'alajinic echiri' xutak lo che ruwachulew ri lic xew Uc'ajol ri', cha' ruma Rire cac'oji' kac'aslemal. 10 Ri sakil rutzil c'u'xaj cak'alajinic na ruma ta e ri'oj ri c'ax xojna'w re ri Dios, ma e Rire ri c'ax xna'w ke ri'oj nabe y xutak lo Ruc'ajol cha' colu'ya'a rib pakac'axel re tojbal ri kamac.

11 Hermanos, ri Dios xu'an wa', c'utubal re ri rutzil uc'u'x chike; ruma c'u ri' chirajawaxic ri'oj c'ax kana'a kib chikawach. 12 Na jinta junok iliyom uwach ri Dios; pero we c'ax cakana' kib chikawach, ri'

cak'alajinic jekel ri Dios pa kanima' y pa sakil wi c'o ri rutzil uc'u'x Rire pa kanima'. ¹³ Caketa'maj c'u ri', oj c'o puk'ab ri Dios yey Rire jekel pa kanima', ma Rire uya'om ri Ruxlabixel chike.

¹⁴ Yey ri'oj* kilom y cakak'alajisaj ri xu'an ri Kakaw: Rire xutak lo Ruc'ajol re quebucolebej conoje ri ticawex. ¹⁵ E junok cuk'alajisaj: «Ri Jesús e Uc'ajol ri Dios», ri' jekel ri Dios pa ranima' yey rire c'o puk'ab ri Dios. ¹⁶ Ri'oj keta'am y kacojom ri Dios lic c'ax cojuna'o. Ri Dios e aj rutzil c'u'xaj; ec'u junok c'o ri rutzil c'u'xaj pa ranima', ri' c'o puk'ab ri Dios yey ri Dios jekel pa ranima' rire. ¹⁷ We ri rutzil uc'u'x ri Dios pa sakil wi c'o pa kanima', ri' lic cubul kac'u'x y na cakaxi'ij ta kib chwa ruk'ijol ri k'atbal tzij, ma jela' pacha' rubinic ri Jesús, jec'ula' cojbin ri'oj wara che ruwachulew. ¹⁸ We ri rutzil uc'u'x ri Dios c'o pa kanima', na jinta cakaxi'ij kib che, ma ri sakil rutzil uc'u'x ri Dios caresaj ri xi'in ib chike. Pero we junok cuxi'ij rib, e ruma cuna'o cape k'atbal tzij puwi'. E uwari'che we junok c'a cuxi'ij rib, ri' c'amaja' cumaj usuc' pa sakil wi ri rutzil uc'u'x ri Dios.

¹⁹ Ri'oj c'ax cakana' ri Dios ma e Rire c'ax xna'w ke ri'oj nabe. ²⁰ We c'o junok cubi'ij: «Ri'in c'ax canna' ri Dios,» yey tzel caril ri ratz-uchak', ri' xa aj rak'ul. Ma e junok na c'ax ta cuna' ri ratz-uchak' ri caril uwach, ¿su'anic c'u ri' c'ax cuna' ri Dios ri na rilom ta uwach? ²¹ E ri Dios ya'yom wa' wa takanic chike: «E junok c'ax cuna' ri Dios, lic chirajawaxic c'ax chebuna'a ri ratz-uchak'.»*

5

Cakach'ij uchuk'ab ri na utz taj ruma ri cubulibal kac'u'x ruc' ri Jesús

* **4:14** “Ri'oj”: Wa' e ri Juan cuc' ri jujun chic xqueta'maj uwach ri Jesús echiri' Rire xc'o'ji' wara che ruwachulew. ✧ **4:21** Mt. 22:37-39; Mr. 12:29-31 ✧ **5:6** Mt. 3:16 * **5:7** Pa ri versículo 7 y jekebal re ri versículo 8, c'o jujun manuscritos caquibi'ij: «E oxib c'u ri e c'o chila' chicaj quek'alajisan puwi ri lic katziy: Ri Kakaw Dios, ri Tzij y ri Ruxlabixel ri Dios. Coxchal c'u ri' wa' xa jun qui'anom. Yey e oxib ri quek'alajisan puwi ri lic katziy wara che ruwachulew.»

¹ E junok cucojo ri Jesús e Ucha'o'n lo ri Dios, ri' alaxinak chi chupa rubi' ri Dios. Yey we c'ax cakana' ri Dios, ri' c'ax quekana' ri e ralc'o'al Rire. ² Chwi c'u ri' wa' caketa'maj c'ax quekana' ri e ralc'o'al ri Dios, we c'ax cakana' ri Dios y cojtajin che u'anic ri cubi'ij Rutzij Upixab. ³ Ma ri c'utubal re ri rutzil kac'u'x che ri Dios, e ri caka'an janipa ri cubi'ij Rutzij Upixab yey wa' na c'ayew taj ca'anic. ⁴ Ma konoje ri oj alaxinak chi chupa rubi' ri Dios, cakach'ij uchuk'ab ri na utz taj c'o che ruwachulew, yey caka'an wa' ruma ri cubulibal kac'u'x ruc' Rire. ⁵ ¿China c'u ri cach'ijow uchuk'ab ri na utz taj c'o che ruwachulew? E junok cucojo ri Jesús e Uc'ajol ri Dios.

Ri uk'alajisam ri Dios puwi Ruc'ajol

⁶ Ri Kanimajawal Jesucristo xc'un che ruwachulew y xk'alajin c'ut china Rire echiri' xuc'ul ri ya' re bautismo* y echiri' xturuw ruqui'uel; na xew ta c'u ruma ri bautismo ruc' ya' ma ruc' ne ruqui'uel xturuwic. Ec'u ri Ruxlabixel ri Dios xk'alajisan re wa'; yey ronoje ri cubi'ij Rire, lic katziy. ⁷ E oxib c'u ri quek'alajisan puwi ri lic katziy:* ⁸ ri Ruxlabixel ri Dios, ri bautismo re ri Jesús ruc' ya' y ruqui'uel ri Jesús xturuw chwa ri cruz; yey uroxchal wa' junam ri caquik'alajisaj.

⁹ Ri'oj cakac'ul ri caquik'alajisaj ri ticawex, pero janipa ri cubi'ij ri Dios más c'o uwach chwa ri caquibi'ij ri ticawex; ruma c'u ri' lic chirajawaxic cakac'ul janipa ri cuk'alajisaj Rire puwi Ruc'ajol. ¹⁰ E junok cubul uc'u'x ruc' Ruc'ajol ri Dios, ri' ucojom janipa ri uk'alajisam ri Dios puwi Ruc'ajol. No'j ri na cucoj ta ri cubi'ij ri Dios, e pacha' cu'an aj rak'ul che ri Dios,

ma na cucoj ta ri uk'alajisam ri Dios puwi Ruc'ajol. ¹¹ Y ri k'alajisam e wa': Ri Dios uya'om kac'aslemal na jinta utakexic, yey wa' wa c'aslemal xew carikitaj ruma Ruc'ajol. ¹² E junok uc'ulum Ruc'ajol ri Dios pa ranima', ri' ya'tal chi wa' wa c'aslemal che; no'j e junok na uc'ulum ta Ruc'ajol ri Dios pa ranima', ri' na ya'tal ta wa' wa c'aslemal che. ¹³ Cantz'ibaj pan wa' che alak ri cojom alak rubi' Ruc'ajol ri Dios, cha' queta'maj alak c'o c'aslemal alak na jinta utakexic.

Ruc'ajol Jesucristo. Xew Rire pakatzij wi e Dios y e Rire ri cuya ri c'aslemal na jinta utakexic. ²¹ Alak walc'o'al chupa rubi' ri Dios, malok'nimaj alak tak ri tiox. Amén.

Q'uisbal uch'a'tem ri Juan chique ri hermanos

¹⁴ Cubul kac'u'x ruc' ri Dios ma keta'am we ri cakatz'onoj che e chirij janipa ri caraj Rire, cojuta c'u ri'. ¹⁵ Yey we keta'am Rire cojuto, keta'am c'u ri' cuya chike sa' ri katz'onom che.

¹⁶ We c'o junok caril juna hermano catzak pa mac, yey we wa' wa mac na cuc'am tubi pa ri camic chwach ri Dios,✧ chu'ana c'u orar ri' cha' wa hermano cutzelej utzij chwach ri Dios y jec'ula' ri Dios cuya uc'aslemal. Wa' e we ri mac na cuc'am tubi pa ri camic chwach ri Dios. Pero c'o mac cuc'am bi jun pa ri camic chwach ri Dios;† chwi c'u ri' wa' na cambi'ij taj we c'a ca'an orar puwi ri ca'anaw re. ¹⁷ Ronoje ri na jusuc' taj ca'anic e mac chwach ri Dios, pero c'o mac na cuc'am tubi jun pa ri camic na jinta utakexic.

¹⁸ Keta'am c'ut, e janipa ri ebalaxinak chupa rubi' ri Dios, na caquitijoj ta chi quib che u'anic ri mac; ma Ruc'ajol ri Dios e cachajin que cha' na quetzak ta puk'ab ritzel winak. ¹⁹ Lic c'u keta'am oj re ri Dios, y keta'am tak ri winak re ruwachulew puk'ab ritzel winak e c'o wi. ²⁰ Y keta'am c'ut, Ruc'ajol ri Dios xc'un che ruwachulew, yey uya'om kana'oj cha' caketa'maj uwach ri Jun pakatzij wi e Dios. Y oj c'o c'u puk'ab ri pakatzij wi e Dios, ma oj c'o puk'ab

✧ 5:16 1 Jn. 2:22; 4:3; Mt. 12:31-32; Heb. 6:4-6 † 5:16 “Mac cuc'am bi jun pa ri camic chwach ri Dios”: Wa' e que'elawi, ri mac más nim e we jun na caraj taj cucoj rubi' ri Cristo, ma ri ca'anaw re wa' na jinta uc'aslemal chwach ri Dios.

Ruca'm carta xutz'ibaj ri Juan

Ri Juan cuya pan rutzil quiwach riglesia

¹ Ri'in in nimalaj winak, in aj wach re riglesia; cantz'ibaj pan wa carta che alak, ri alak cha'tal ruma ri Dios, ri camol ib alak pa rubi' ri Kanimajawal Jesucristo.* Pakatzij wi lic c'ax canna' alak, y na xew ta ri'in ma conoje ri quicojom ri K'ijsak re ri Dios c'ax caquina' alak. ² C'ax cakana' alak ruma ri K'ijsak kacojom junam uc' alak y wa' na junta utakexic c'o kuc' konoje ri'oj.

³ C'ola c'u uc' alak y kuc' ri'oj ri unimal rutzil c'u'xaj ruc' ri c'utubal re ri rutzil c'u'xaj y ri utzil chomal re ri Kakaw Dios y re ri Kanimajawal Jesucristo, Ruc'ajol ri Kakaw. Cakac'ul c'u ronoje wa' ruma e kacojom ri K'ijsak yey ruma kac'utum ri rutzil uc'u'x ri Dios chique ri ticawex.

Rutakanic ri Dios puwi ri rutzil c'u'xaj

⁴ Lic xinqui'cotic ma xebenurik jujun che alak quebin chi utz chupa ri K'ijsak jela' pacha' ri takanic xkac'ul che ri Kakaw. ⁵ Ec'u wo'ora hermanos ri alak utinamit ri Dios,† cantz'onoj che alak lic c'ax kana'a kib chikawach. Wa can'ano na e ta pacha' cantz'ibaj pan jun c'ac' tziipixab che alak, ma wa' e ri xex chi tom wi lo alak. ⁶ Ec'u ri rutzil kac'u'x cak'alajinic echiri' cojbin jela' pacha' ri cojutak ri Dios che u'anic pa Rutzij Upixab. Ec'u ri cojutak che e wa': Katijoj kib che uc'utic ri rutzil c'u'xaj. Yey wa' xex chi tom wi lo alak.

Mojsocotaj cuma ri e aj socoso'nel

⁷ Lic e q'ui ri e aj socoso'nel ebena pa tak tinamit che ruwachulew,

rique caquibi'ij: «Na katzij taj ri Kanimajawal Jesucristo e Rucha'o'n lo ri Dios yey xu'an achi echiri' xc'un che ruwachulew» quecha'. Janipa ri jewa' caquibi'ij, e socoso'nel y eyac-tajinak chirij ri Cristo. ⁸ Chajij c'u ib alak cha' na casocotaj ta alak cuma rique; e masach alak uwach ri rajil uc'axel ri chac ca'an alak, cha' jela' tz'akat uwach ri cac'ul alak. ⁹ E junok cuya can rube ri Dios y na catiqui' ta chupa ri c'utunic re ri Cristo, ri' na junta ri Dios ruc'. No'j ri catiqui' chupa ri c'utunic re ri Cristo, ri' c'o ri Kakaw Dios y c'o Ruc'ajol ri Dios ruc'. ¹⁰ We c'o junok copon uc' alak yey ri cuc'utu na e ta ri sakil c'utunic puwi ri Cristo, mac'ul alak pa ocho alak y mabi'ij ne alak che: «¡Utzilaj c'unem!» ¹¹ Ma e ri cabi'n che: «¡Utzilaj c'unem!» ri' e jun ruc' che u'aniquil ri quichac na chom ta uwach.

Q'uisbaluch'a'tem ri Juan che riglesia

¹² Lic q'ui tak ri cuaj cantzijoj che alak, pero wa' na cuaj taj cantz'ibaj che alak, ma ri cuaj ri'in e quinopon uc' alak y jec'ula' cojch'a't chikawach cha' junam cojqui'cotic.

¹³ Ri hermanos quimolom quib wara,‡ ri echa'tal ruma ri Dios, caquiya pan rutzil wach alak. Amén.

* **1:1** Pa ri ch'a'tem griego cubi'ij “che rixok cha'talic y chique ri ralc'o'al”. E c'o ri caquich'obo “rixok” e que'elawi riglesia y “ri ralc'o'al” e ri hermanos re riglesia. † **1:5** “Utinamit ri Dios”: Pa ri ch'a'tem griego cubi'ij “ixok”. ‡ **1:13** Pa ri ch'a'tem griego cubi'ij “ri ralc'o'al ri atzixel la”. Wa' e que'elawi riglesia pa c'o wi ri Juan.

Rurox carta xutz'ibaj ri Juan

Ri Juan cuya pan rutzil uwach ri hermano Gayo

¹ Ri'in in nimalaj winak, in aj wach re riglesia; cantz'ibaj pan wa carta che'la, hermano Gayo, ma lic pakatzij wi c'ax canna' la. ² Lal nu hermano, ri'in cantz'onoj che ri Dios cha' ronoje quel chi utz chwi k'ab la yey cha' lic e xaki utz wach la jela' pacha' ri binic silabic la lic utz chwach ri Dios. ³ Ri'in lic xinquic'otic echiri' xec'un jujun hermanos y xquitzijoj chwe puwi ri jusuc' binic silabic la, ma e lic takem la ri K'ijsak re ri Dios. ⁴ Na junta cuya más qui'cotemal chwe chwa ri canweta'maj ri e walc'o'al chupa rubi' ri Dios e lic quitakem ri K'ijsak.

Pixabanic puwi ri quito'ic ri e aj chac re ri Dios

⁵ Lal nu hermano, lic utz ri catajin la che u'anic echiri' queto' la ri hermanos, yey lic ewi ri ca'an la chique ri quepe naj. ⁶ Ec'u rique lic quik'alajisam chiquiwach ri tinamit re ri Cristo janipa ri rutzil c'u'x la chique. Yey lic utz we queto' bi la cha' quebec chi che ri chac re ri Dios e c'o wi. Lic e takal wa' chique rique ⁷ ma e petinak chupa rubi' ri Kanima-jawal ruma c'ax caquina' Rire, y na junta to'bal que caquic'am chique ri winak na queta'am ta uwach ri Dios. ⁸ Ec'u ri'oj, lic chirajawaxic cakaya kib che quito'ic wa' wa ka hermanos cha' jela' cojto'b cuc' che utzijoxic ri K'ijsak.

Ri na utz taj cu'an ri Diótrfes

⁹ Ri'in xintz'ibaj pan chique ri tinamit re ri Cristo puwi wa to'bal takal chique ri e aj chac re ri Dios, pero ri Diótrfes na cuc'ul ta ri pixabanic cakaya ri'oj, ma ri caraj e lic xew rire catakan paquiwi conoje. ¹⁰ E uwari'che we xinopon chila', canch'a'bej upa ruma tak ri

rak'ubal uyacom chikij. Yey na xew ta wa', ma na caraj taj quebuc'ul ri hermanos quepe naj y quebuk'atej ne ri hermanos cacaj quequic'ulu. Ec'u ri quec'uluw que queberesaj bi chiquixo'l ri tinamit re ri Cristo.

Ri utz cu'an ri hermano Demetrio

¹¹ Lal nu hermano, ma'an e la ri na utz taj; e 'ana la ri utz. Ma e junok cu'an ri utz, ri' re ri Dios; no'j e junok cu'an ri na utz taj, ri' na reta'am ta uwach ri Dios. ¹² Conoje chom quech'a't puwi ri hermano Demetrio y lic katzij ri caquibi'ij ma wa' lic cak'alajin che rubinic usilabic. Jenela' ri'oj, chom ruch'a'tibexic caka'ano yey eta'am alak lic katzij ri cakabi'ij.

Q'uisbal uch'a'tem ri Juan che ri Gayo

¹³ Lic q'ui tak ri cuaj cantzijoj che'la, pero wa' na cuaj taj cantz'ibaj che'la ¹⁴ ma ri cuaj ri'in e quino-pon tan uc' la y jec'ula' cojch'a't chikawach.

¹⁵ C'ola c'u rutzil chomal uc' la. Janipa ri hermanos queta'am wach la caquiya pan rutzil wach la. Cantz'onoj che'la, ya'a la rutzil quiwach chiquijunal janipa ri queta'am kawach chila'.

Ri carta xutz'ibaj ri Judas

Ri Judas cuya pan rutzil quiwach ri hermanos

¹ Ri'in in Judas, in aj chac re ri Kanimajawal Jesucristo yey in uchak' ri Jacobo. Cantz'ibaj pan wa' wa carta chique ri esiq'uim ruma ri Kakaw Dios, ri e c'o chupa ri rutzil uc'u'x Rire y echajital ruma ri Kanimajawal Jesucristo. ² Ec'u ri Dios chunimarisaj na paw'i alak ri c'axna'bal uc'u'x junam ruc' ri utzil uchomal y ri rutzil uc'u'x.

Ri eyactajinak chirij ri K'ijsak re ri Dios (2 P. 2:1-17)

³ Alak nu hermanos, lic nurayim quintz'iban pan che alak chwi ri colobetajic ya'tal chike ri'oj chinima konoje; pero wo'ora cuna' nuc'u'x lic chirajawaxic campixabaj alak cha' cachuk'ubej ib alak chupa ri K'ijsak re ri Dios y na caya ta c'u alak luwar ri' che junok cuyoj ri sakil c'utunic ya'tal xa jumul che rutinamit ri Dios. ⁴ Ma e c'o jujun achijab eboquinak chixo'l alak, xa quewam ri itzel na'oj c'o cuc'. Yey ojertan ri' tz'ibital chi lo chupa Ruch'a'tem ri Dios, rique eya'tal chi chuxe' ri k'atbal tzij re ri Dios. Ec'u wa' wa'chijab itzel quiwachlibal, caquetz'abej uwach ri unimal rutzil uc'u'x ri Dios ruc' ri quibinic quisilabic na chom taj. Yey caquibi'ij na katzij taj xew ri Kanimajawal Jesucristo e Kajawal y takal c'u che catakan pakawi'.

⁵ Lic cuaj cancuxtaj che alak ri eta'am chi ralak: Ri Dios Kajawxel xebucolobej rutinamit echiri' xeberesaj lo chupa ri tinamit Egipto; na ruc' ta c'u ri', chiquixo'l ri xebucolobej e c'o ri xusach quiwach ruma na xquicoj ta utzij.

⁶ Yey e c'o ángeles na xecubi' ta ruc' ri takanic xuya ri Dios paquik'ab, ma xcaj cac'o'ji' más quiwach. Ruma c'u ri', xquesaj quib puk'ab ri Kakaw y jec'ula' xquiya can ri sakil quic'olibal chila' chicaj. Yey ruma c'u wa', ri Dios ebuc'olom pa utum k'eku'm, copon na runimal uk'ijol echiri' cuk'at tzij paquiwi'; y eya'tal c'u ri' pa carena, na jinta quitzokpitajic bi.

⁷ Jec'ula' ri tinamit Sodoma y Gomorra junam cuc' tak ri tinamit e c'o lo chiquinakaj, xquic'am lo k'atbal tzij paquiwi' ruma xquiya quib chupa ri ch'ulilaj mac, ri lic na ube taj.* Wa queb tinamit e c'utubal re ri k'atbal tzij, ma e xquic'ul ri c'axc'obic re ri ak' na cachup ta chic.

⁸ Yey ri achijab eboquinak chixo'l alak, tob lic quitom chi puwi ri k'atbal tzij re ri Dios paquiwi raj maquib ojertan, na ruc' ta c'u ri', quetajin che u'anic ri na utz taj yey caquibi'ij, pa wachic' ri Dios uk'alajisam chique utz ri caqui'ano. Caquetzelaj ruc' mac ri quicuerpo, na cacaj taj c'o junok catakan paquiwi' tob ne e ri Dios y tzel quech'a't chiquij tak ri lic c'o quiwach chila' chicaj. ⁹ No'j ri Arcángel Miguel, tob ne lic c'o uwach, na jinta juna ch'a'tem re k'atbal tzij xubi'ij che ritzel winak echiri' cach'o'jin ruc' puwi rucuerpo ri Moisés. Na xu'an ta c'u aj k'atal tzij che rib ma xew jewa' xubi'ij che: «E ri Dios Kajawxel cak'aten e la»^{*} xcha' ¹⁰ No'j wa' wa'chijab queyok'on ne chirij ronoje tak ri na queta'am taj; yey xa pa que wi caqui'an ri quirayibal jela' pacha' caqui'an rawaj na caquich'ob ta ri caqui'ano. Ruma c'u wa', quituquel caquic'am lo k'atbal tzij paquiwi'.

¹¹ ¡Lic tok'o' c'u quiwach rique! Ma e caqui'an pacha' ri xu'an ri Caín. Yey qui'anom ri na utz taj ruma ri quirayibal che ri beyomalil, jela' pacha' xu'an ri Balaam. Yey quecam ne c'u

* **1:7** Rachijab e aj Sodoma y e aj Gomorra xcaj quequichap ri queb ángeles re quemacun cuc'. Gn. 19:1-24 ✨ **1:9** Dt. 34:5-6 † **1:11** “Caín”: Gn. 4:3-8; “Balaam”: Nm. 22; “Coré”: Nm. 16

ri' ruma ri quititz'itiquil jela' pacha' ri xuc'ulumaj ri Coré.†

12 Wa' wa'chijab eboquinak chixo'l alak lic e aj ya'l q'uix che alak chupa tak ri chomilaj nimak'ij pa camol wi ib alak re cac'ut ri c'axna'bal c'u'xaj chiwach alak. Ma na jinta xi'in ib cuc' chwach ri Dios y na queq'uix tane che ri caqui'ano, ma xew e que-boc il chiquibil quib.‡ Rique e jela' pacha' sutz' cac'am lo ruma ri tew; xa quic'owic y na jinta jab ruc'a'am lok. Yey e pacha' tak ri che' na caquiya ta quijik'obalil chupa ruk'ijol; lic echakijinak y ruma c'u ri' c'otom c'u bi ri catz'ayak. 13 Wa' wa'chijab e jela' pacha' ri mar echiri' lic c'o royowal, capuluwan uwi' y curojij lo ri ch'ul c'o chupa.☆ Jec'ula', wa' wa'chijab e caquic'ut tak ri q'uixbal uwach caqui'ano. Yey e jela' pacha' tak ch'umil quisachom ri quibe,§ ma caqui'an che quib e aj c'amal wach que rutinamit ri Dios, tob ne e rique ri e sachinak. Ruma c'u ri caqui'ano, ri Dios uk'atom chi tzij paquiwi' cha' na jinta utakexic quebe'c'ola pa utum k'eku'm.

14 Paquiwi wa' wa'chijab xch'a't ri Enoc, ri uwuk lema'j chwi ri Adán ri nabe ticawex.** Ruma c'u ri', ri Ruxlabixel ri Dios jewa' xubi'ij: «¡Chiwilape! Xinwilo echiri' xpe ri Dios Kajawxel cuc' uq'uiyal santowilaj ángeles. 15 Xc'unic re colu'k'ata tzij paquiwi conoje ri winak yey quebuya pa c'axc'obic raj maquib e titz'itak ruma ronoje tak ri mac qui'anom y ruma ronoje tak ri c'axlaj ch'a'tem quibi'im chirij ri Dios.» 16 Wa' wa'chijab e c'o chixo'l alak lic quewunwutic y queyajan che ronoje. Xew cacaj caqui'an tak ri quirayibal y xew caquiyac quik'ij tak ri winak

cha' jela' c'o caquesaj chique.

Q'uisbal pixabanic cuya ri Judas

17 Pero ralak hermanos, c'una chic'u'x alak ri quibi'im can ri e utako'n ri Kanimajawal Jesucristo. 18 Rique xquibi'ij che alak: «Chupa tak ruq'uisbal k'ij queyactaj lo winak e ch'aminel, e caquitakej ri quirayibal na chom ta uwach.»☆ 19 Wa' wa' winak caquicoj retzelal c'u'x chiquixo'l ri quicojom rubi' ri Dios re caquijach quipa. Ri quina'oj rique xa e re ruwachulew ma na jinta ri Ruxlabixel ri Dios cuc'.

20 No'j ralak hermanos, lic jiquiba' c'u'x alak che ri sakil c'utunic c'ulum alak y ch'a'ta alak ruc' ri Dios ruma ri Santowilaj Ruxlabixel. 21 C'ola c'u alak chupa ri rutzil uc'u'x ri Dios. Choye'ej c'u alak ruk'ijol echiri' ri Kanimajawal Jesucristo cuya che alak ri c'aslemal na jinta utakexic, c'utubal re ri c'axna'bal uc'u'x che alak. 22 Cheto'o c'u alak ri xa queb quipa quicojom ri K'ijsak cha' rique caquijiquiba' quic'u'x chupa wa'. 23 Yey chique jujun chic, cheto'o alak cha' quecolobetaj che ri ak' re ri xibalba', jela' pacha' cajeq'uix pana junok e ri' catzak pa ak'. C'utu alak ri relej c'u'x alak chique ri lic e aj mac. Pero e lic chajij ib ralak cha' na ca'an ta e alak ri mac caqui'an rique; e 'ana alak pacha' ri cu'an junok echiri' na caraj taj cuchap juna c'ul lic ch'ul.

Ri Judas cuyac uk'ij ri Kakaw Dios

24 Ri Dios lic c'o puk'ab cuto' alak cha' na catzak ta alak pa mac, cha' jela' na jinta mac alak. Ruma c'u ri', lic caqui'cot alak echiri' ri Dios cuya alak chwach Rire pa c'o wi ri unimal uchomalil chila' chicao. 25 Xa

† **1:12** Rique lic e quebec il che janipa ri caquitijo, tob ne e c'o jujun chic na quetzuk taj y quecanaj can ruc' numic. E pacha' e aj chajal bexex na quequichajij ta chi utz ri awaj. Ez. 34:2 ☆ **1:13** Is. 57:20 § **1:13** Ri ch'umil ecojotal chwa ruwa caj re caquic'am quiwach ri ticawex cha' caqueta'maj ri ora y caqueta'maj pa quebec wi. No'j c'o jujun ch'umil xa ebic'owel che ruwa caj, wa' pa caxtila cabi'x "estrellas fugaces" chique. ** **1:14** "Ri Enoc, ri uwuk lema'j chwi ri Adán": Ri Adán e ri nabe lema'j, ri Set ruc'ajol ri Adán e uca'm, ri Enós umam ri Adán e urox, ri Cainán e ucaj, ri Mahalaleel e uro', ri Jéred e uwakak y ri Enoc e uwuk lema'j. Gn. 5:1-24 ☆ **1:18** 2 Ti. 3:1-5; 2 P. 3:3

jun ri Dios Kacolobenel yey Rire co-
jucolobej ruma ri Kanimajawal Jesu-
cristo. Nimarisax c'u uk'ij ri Dios
wak'ij ora y chikawach apanok, ma
Rire sa'chi ruchomalil y ruchuk'ab,
yey ronoje takanic puk'ab c'o wi.
Amén.

Ri xuk'alajisaj ri Dios che ri Juan

Ri Juan cutz'ibaj tak ri xuc'ut ri ángel chwach

¹ E k'alajisanic wa' xuya ri Dios che ri Kanimajawal Jesucristo cha' Rire cuc'ut chique ri raj chaquib sa' tak ri catajin lok. Ruk'alajisaxic xu'an ri Jesús e xutak lo ru ángel cha' colu'bi'ij wa' che ri raj chac Juan. ² Ec'u ri Juan xuk'alajisaj can ri tzij re ri Dios, ri k'alajisanic re ri Kanimajawal Jesucristo ruc' tak ri xc'ut chwach rire. ³ Nim uk'ij ralaxic ri cajilan wa ch'a'tem re wa k'alajisanic yey nim quik'ij calaxic conoje ri quetaw re wa' yey caquitakej ronoje tak ri tz'ibital chupa, ma xa nakaj chi c'o wi lo ruk'ijol echiri' cu'ana tak wa'.

Ri Juan cuya pan rutzil quiwach ri wukub iglesias

⁴ Ri'in in Juan quintz'iban pan chique ri wukub iglesias e c'o chupa tak ri tinamit re Asia.

C'ulu alak ri unimal rutzil c'u'xaj y ri utzil chomal, ri cape ruc' ri Jun c'o wak'ij ora, ri xex chi c'o lo wi y ri c'o chikawach apanok, ri cape ruc' ri wukub uwach Uxlabixel c'o chwach rutz'ulibal pa catakan wi, ⁵ yey ri cape ruc' ri Kanimajawal Jesucristo, ri cuk'alajisaj chi utz ri K'ijesak. Rire e ri nabe xc'astaj lo chiquixo'l ri ecaminak y e ri c'o paquiwi conoje ri e takanelab che ruwachulew. Rire lic c'ax xojuna'o y xojuch'aj che tak ri kamac ruc' ruquiq'uel xturuw chwa ri cruz. ⁶ Xu'an c'u xa jun tinamit chike y xu'an chike oj takanel y oj chacunel chwach ri Dios, Rukaw Rire. Ec'u Rire lic takal che cayac uk'ij wak'ij ora y chikawach apanok ma lic sa'chi ruchomal y ruchuk'ab. ⁷ Tape alak, ri Kanimajawal Jesucristo pa sutz' cac'un wi. Conoje c'u

ri' caquilo, caquil ne ri xecamisan re. Y conoje ruq'uiyal quiwach tak ri ticawex che ruwachulew lic quebok'ic ruma ruc'unibal.* Pakatzij wi jela' cu'ano.

⁸ «Ri'in in ri jekebal re yey in ri q'uisbal re, jela' pacha' ri ca'ib letra A y Z»* cacha ri Kanimajawal, ri Jun c'o wak'ij ora, ri xex chi c'o lo wi y ri c'o chikawach apanok yey ri c'o ronoje unimal chuk'ab puk'ab.

Rixc'ut cheri Juan pari isla Patmos

⁹ Ri'in in Juan in bare jun uc' alak hermanos, junam oj c'o chupa rutakanic ri Kanimajawal Jesucristo y junam cakach'ij uchuk'ab tak ri c'axc'obic ruc' unimal kac'u'x. E ri'in xine'yo'k pa ri isla Patmos ruma xintzijo'j ri Tzij re ri Dios y ri K'ijesak re ri Kanimajawal Jesucristo. ¹⁰ Pa c'u jun k'ij domingo† in c'o puk'ab ri Ruxlabixel ri Dios echiri' xinto xch'aw lo Jun chwij, wa' lic co cach'awic pacha' uch'awibal trompeta. ¹¹ Jewa' xubi'ij:

«Ri'in in ri jekebal re yey in ri q'uisbal re, jela' pacha' ri ca'ib letra A y Z. Chatz'ibaj c'u chupa juna libro ronoje tak ri cawilo y chataka bi chique ri wukub iglesias e c'o chupa tak ri tinamit re Asia: ri c'o Éfeso, ri c'o Esmirna, ri c'o Pérgamo, ri c'o Tiatira, ri c'o Sardis, ri c'o Filadelfia y ri c'o Laodicea» xcha'.

¹² Xintzu'n c'u pan chwij cha' canwilo china ri cach'a't lo wuc'; y echiri' xintzu'n apanok, xinwil pan wukub utzuc'ulibal ak' re oro. ¹³ Chiquinic'ajal c'u ri wukub utzuc'ulibal ak' re oro, xinwil pan Jun lic e catzu'n Ralaxel Chiquixo'l Ticawex. Ucojom jun uk'u' copon c'a chukul rakan y cojotal jun pas re oro chwa uc'u'x. ¹⁴ Rujolom y ruw' lic sak jela' pacha' ri mit sak y pacha' ri nieve;‡ y ucabichal ruwach pacha' ak' careprotic. ¹⁵ Ri rakan cawolk'inic pacha' ri ch'ich' bronce

☆ 1:7 Mt. 24:30 * 1:8 “A y Z”: Quil “Alfa y Omega” pa vocabulario. † 1:10 Pa ri ch'a'tem griego cubi'ij “ri k'ij re ri Kanimajawal Jesucristo”. ‡ 1:14 Ri nieve jela' rusakil pacha' catzu'n ri sakbach.

echiri' quesax lo pa ri orna; rukul catatajic jela' pacha' utza'm ya' e ri' xc'unic. ¹⁶ Puwiquik'ab e c'o wukub ch'umil; puchi' quel lo jun espada lic t'isi's utza'm y ca'ib ruwi re'.§ Rupalaj jela' pacha' ri k'ij echiri' lic careprotic. ¹⁷ Ec'uchiri' xintzu' uwach, xintzak xe'rakan uk'ab y xincanaj canok pacha' in caminak chic. Ec'u Rire xuya ruwiquik'ab panuwi' y jewa' xubi'ij chwe:

«Maxi'ij awib, ma Ri'in in ri nabe yey in ri q'uisbal re. ¹⁸ In ri xex in c'o wi, In ri xincamic, pero wo'ora na jinta chi utakexic ri nuc'aslemal. Panuk'ab Ri'in c'o wi ri camic y panuk'ab c'o wi quebenuc'astajisaj lo ri ecaminak.**

¹⁹ »Chatz'ibaj janipa ri xc'ut chawach, ruc' tak ri cat-tajin che rilic y ri catajin lo chikawach apanok. ²⁰ Ri que'elawi ri wukub ch'umil awilom pa nuwiquik'ab y tak ri wukub utzuc'ulibal ak' re oro e wa': Ri wukub ch'umil e ri wukub ángeles e chajinel que ri wukub iglesias; yey ri wukub utzuc'ulibal ak' re oro e ri wukub iglesias.

2

Ri xtz'ibax pan che riglesia c'o Éfeso

¹ »Chatz'ibaj pan wa' che ri aj c'amal wach* re riglesia c'o Éfeso:

E ri Jun c'o wukub ch'umil puwiquik'ab, ri cabin chiquinic'ajal ri wukub utzuc'ulibal ak' re oro, jewa' cubi'ij chiwe:

² Ri'in lic weta'am ronoje ri qui'ano, ri c'ayewlaj chac i'anom y runimal ic'u'x chwach tak ri c'ax. Weta'am na quebic'ul ta iwuc' ri winak itzel quic'u'x. Ma lic ic'amom quipa ri caquibi'ij e tako'n re ri Cristo tob na e taj; yey xk'alajin c'u ri' xa e aj rak'ubal.

³ Lic itijom c'u ri c'ax y na quixcos

ta c'ana che ri nuchac. Iya'om ic'u'x che utzijoxic ri nubi' y na paxinak ta ic'u'x che. ⁴ Pero Ri'in c'o tak ri na cuc'ul ta nuc'u'x che ri qui'ano: E ri rutzil ic'u'x wuc' na e ta chi pacha' ri xijekebej lok. ⁵ E uwari'che c'una chic'u'x pachawi ix jaljobinak wi. Chitzelej c'u itzij chwach ri Dios y chi'ana tanchi ri chac jela' pacha' ri xi'an lo che ri jekebal lok. Ma we na quitzelej ta itzij, Ri'in quinc'un lo iwuc' y canwesaj c'u puluwar ri tzuc'ulibal ak' re oro iwe'ix. ⁶ No'j c'u ri utz c'a quixtajin che u'anic, e ri tzel quiwil tak ri na utz taj caqui'an ri nicolaítas,† ma jenela' Ri'in lic tzel canwil tak ri caqui'ano. ⁷ China c'u ri c'o utanibal, e chuta ri cubi'ij ri Ruxlabixel ri Dios chique tak riglesias. China c'u ri cach'ijow uchuk'ab tak ri na utz taj, canya che cutij re rujik'obalil ri che' re c'aslemal, ri c'o chunic'ajal ri werta re ri Dios, cache'.

Ri xtz'ibax pan che riglesia c'o Esmirna

⁸ »Chatz'ibaj pan wa' che ri aj c'amal wach re riglesia c'o Esmirna:

E ri Jun cabi'n re: “Ri'in in ri nabe yey in ri q'uisbal re, ri xcamic y xc'astaj tanchic”, jewa' cubi'ij chiwe:

⁹ Ri'in lic weta'am ronoje ri qui'ano, ri c'axc'obic ix c'o wi y ri niba'il quiwic'owibej, tob pakatzij wi ri'ix lic c'o ibeyomal chwach ri Dios. Lic weta'am ronoje ri tzel itzijobexic caqui'an jujun e aj judi'ab, ri caquibi'ij e utinamit ri Dios tob na e ta cuq'u'il, ma e cuq'u'il ri e c'o puk'ab ri Satanás.

¹⁰ Mixi'ij c'u iwib che ronoje tak ri quiwic'owibej. Chitape': Cac'am ipa, ma ritzel winak quebuya jujun chiwe pa cárcel y quixc'o'ji' pa

§ **1:16** Wa espada e que'elawi Ruch'a'tem ri Cristo yey wa' lic c'o uchuk'ab ma ronoje ri cubi'ij e cu'ana'. Heb. 4:12 ** **1:18** Pa ri ch'a'tem griego cubi'ij “Panuk'ab c'o wi ri lawe re ri camic y re ri luwar pa quec'o'ji' wi ri ecaminak.” * **2:1** “Aj c'amal wach”: Pa ri ch'a'tem griego cubi'ij “ángel”. Pa capítulo 2 y 3, wa' que'elawi jun ángel re ri Dios o jun ticawex cuk'alajisaj Ruch'a'tem ri Dios chique jujun chic. † **2:6** “Nicolaitas”: Wa' e tak utijon jun achi Nicolás rubi'. Ruc'utunic rire xa socoso'nic.

c'axc'obic lajuj k'ij. Chitiquiba' c'u ri cubulibal ic'u'x, tob quix-camisaxic; ma Ri'in canya jun corona chiwe, wa' e ri c'aslemal na junta utakexic. ¹¹ China c'u ri c'o utanibal, e chuta ri cubi'ij ri Ruxlabixel ri Dios chique tak riglesias. China c'u ri cach'ijow uchuk'ab tak ri na utz taj, ri' na quic'ow ta chupa ruca'm camic, cache'.

Ri xtz'ibax pan che riglesia c'o Pérgamo

¹² »Chatz'ibaj pan wa' che ri aj c'amal wach re riglesia c'o Pérgamo:

E ri Jun ruc'a'am ri espada lic t'isi' utza'm yey ca'ib ruwi re', jewa' cubi'ij chiwe:

¹³ Ri'in lic weta'am ronoje ri qui'ano; yey weta'am e pa ri tinamit pa ix c'o wi, catakan ri Satanás. Na ruc' ta c'u ri', c'a icojom ri nubi' y na iwesam ta iwib chwij ma lic cubul ic'u'x wuc', tob ne echiri' chupa la' la tinamit xcamisax ri Antipas, ri lic jusuc' tzijonel we. ¹⁴ Pero Ri'in c'o tak ri na cuc'ul ta nuc'u'x che ri qui'ano: E ri ebic'ulum chiri' ri quitakem ruc'utunic ri jun aj k'ij re ojer-tan Balaam rubi'. Ma ri Balaam xuc'ut che ri Balac su'anic cucoj tzakibal pa quibe raj Israel cha' caquitij ri ic'owisam chi chiquiwach ri tiox y caquetz'abej uwa quik'ij cuc' jujun chic na quic'ulel taj. ¹⁵ Yey ri'ix ebic'ulum chiri' ri quitakem ri quic'utunic ri nicolaítas, wa' wa c'utunic lic tzel canwil Ri'in. ¹⁶ E uwari'che chitzelej itzij chwach ri Dios; ma we na qui'an taj, Ri'in quinopon tan iwuc' y quinch'o'jin c'u ri' cuc' ri nicolaítas ruc' ri nu espada quel lo pa nuchi'.[‡] ¹⁷ China c'u ri c'o utanibal, e chuta ri cubi'ij ri Ruxlabixel ri Dios chique tak riglesias. China c'u ri cach'ijow uchuk'ab tak ri na utz

taj, Ri'in canya che cutij re ri wa'im ewatalic, wa' e ri maná[✧] y canya c'u jun ralco abaj lic sak che y chwach ri ralco abaj tz'ibital jun c'ac' bi'aj na junta junok eta'mayom re, xew queta'man ri cac'uluw re, cache'.

Ri xtz'ibax pan che riglesia c'o Tiatira

¹⁸ »Chatz'ibaj pan wa' che ri aj c'amal wach re riglesia c'o Tiatira:

Ruc'ajol ri Dios, ri Jun c'o tak uwach pacha' ak' careprotic y ri rakan lic cawolk'inic pacha' ri ch'ich' bronce echiri' quesax lo pa ri orna, jewa' cubi'ij chiwe:

¹⁹ Ri'in lic weta'am ronoje ri qui'ano. Weta'am ri rutzil ic'u'x, ri cubulibal ic'u'x, ri nimanic qui'ano y runimal ic'u'x. Yey lic weta'am e tak ri chac quixtajin che u'anic wak'ij ora, más q'ui chwach tak ri i'anom lo nabe. ²⁰ Pero Ri'in c'o tak ri na cuc'ul ta nuc'u'x che ri qui'ano: E ri ic'ulum chixo'libal ri'ix ri jun ixok Jezabel rubi'.[§] Wa' wi'xok u'anom k'alajisanel che rib; pero ruc' tak ruc'utunic, e quebusoc ri waj chaquib cha' caquetz'abej uwa quik'ij cuc' jujun chic na quic'ulel taj y caquitij ri ic'owisam chi chiquiwach ri tiox.

²¹ Ec'u Ri'in lic naj woye'em cha' cutzelej utzij chinuwach, pero na caraj taj carok'otaj can ri na utz taj, wa' e ri macunic cuc' rachijab. ²² Chitape': Ri'in canya wi'xok pa yabil cha' catzak chwa uwara-bal, yjec'ula' quebenuya pa unimal c'axc'obic conoje ri quemacun ruc' we e la' na caquitelej ta quitzij che tak ri na utz taj qui'anom ruc'.

²³ Quebenucamisaj na conoje ri ralco'al wi'xok, cha' jela' conoje riglesia caqueta'maj e Ri'in canwilo sa' ri c'o chupa ri quina'oj ri winak y ri c'o chupa ri canima', we utz o na utz taj. E Ri'in canya chijujunal ri'ix ri takal chiwe e chirij tak

✧ 2:11 Ap. 20:6, 14; 21:8 ✧ 2:14 Nm. 25:1-3; 31:16 † 2:16 Wa espada que'elawi e Ruch'a'tem ri Cristo yey wa' lic c'o uchuk'ab ma ronoje ri cubi'ij e cu'ana'. Heb. 4:12 ✧ 2:17 Éx. 16:31-33 § 2:20 Pa wa iglesia xc'oji' jun ixok aj wach yey rire xebumin jujun chupa ri na utz taj pacha' xu'an ri reina Jezabel re ojer-tan. 1 R. 16:31; 2 R. 9:22,30

ri i'anom. ²⁴ No'j cambi'ij c'u chiwe ri'ix ri nic'aj chic re riglesia c'o Tiatira, ri na itakem ta wa c'utunic* yey na iya'om tane iwib che u'anic ri caquibi'ij rique “e xew que ri lic c'o quimajom puwi ri ewatalic chiquiwach ri jujun chic” yey wa' ruc' ri Satanás petinak wi, cambi'ij c'u chiwe: Na jinta jun chic eka'n canya chikul. ²⁵ Xew e lic miwesaj iwib che ronoje ri uya'om ri Dios chiwe c'a echiri' quinopon tanchi iwuc'. ²⁶ Ma e chique ri quech'ijow uchuk'ab ronoje tak ri na utz taj y caqui'an wo'ora sa' ri cuaj Ri'in y jela' quetajin che u'anic c'a echiri' quinopon tanchi iwuc', ri' canya paquik'ab quetakan paquiwi tak ri tinamit che ruwachulew, ²⁷ jela' pacha' ri uya'om ri Nukaw chwe Ri'in. Y jec'ula' quetakan paquiwi tak ri tinamit ruc' jun vara ch'ich' paquik'ab y caqui'an c'u chique pacha' echiri' ca'an uc'aj che juna xun re ulew. ²⁸ Jec'ula' chique ri quetakanic, can'an chique quewonic pacha' ruchomal ri nimalaj ch'umil re ri sakribal. ²⁹ China c'u ri c'o utanibal, e chuta ri cubi'ij ri Ruxlabixel ri Dios chique tak riglesias, cache'.

3

Ri xtz'ibax pan che riglesia c'o Sardis

¹ »Chatz'ibaj pan wa' che ri aj c'amal wach re riglesia c'o Sardis:

Ri Jun c'o ri wukub uwach Uxlabixel re ri Dios ruc' y c'o ri wukub ch'umil ruc', jewa' cubi'ij chiwe:

Ri'in lic weta'am ronoje ri qui'ano. Cabi'x ne chiwe “ix c'aslic”, pero na katzij taj ma ri'ix ix caminak chwach ri Dios. ² Cambi'ij c'u chiwe: Chixc'astajok y lic chitija chi uk'ij quiyac iwib che tak ri utz c'a quixtajin che u'anic, ma tak wa' catajin usachic uwach. Ec'u Ri'in wilom ri i'anom, yey wa' na e ta ri caraj ri Dios chiwe. ³ C'una c'u

chic'u'x sa' tak ri imajom y sa' tak ri itom chwi ri c'utunic ic'ulum. E chitakej tak wa' y chitzelej itzij chwach ri Dios; ma we quixwaric, Ri'in xakic'ate't quinopon iwuc' jela' pacha' ri roponibal relek'om, ma na iweta'am ta c'u ri' ri ora echiri' quinoponic. ⁴ Pero e c'o jujun ticawex iwuc' chiri' Sardis lic jusuc' ri quibinic quisilabic chwach ri Dios, wa' na quich'ulam ta quib ruc' ri mac. Yey chikawach apanok rique junam quebin wuc' ruc' quik'u' sak, ma e takal ri' chique. ⁵ China c'u ri cach'ijow uchuk'ab tak ri na utz taj, cawik ruc' uk'u' sak y na canyoj ta rubi' chupa ri libro re c'aslemal na jinta utakexic. Yey cank'alajisaj c'u rubi' chwach ri Nukaw y chiquiwach ri ángeles e c'o ruc'. ⁶ China c'u ri c'o utanibal, e chuta ri cubi'ij ri Ruxlabixel ri Dios chique tak riglesias, cache'.

Ri xtz'ibax pan che riglesia c'o Filadelfia

⁷ »Chatz'ibaj pan wa' che ri aj c'amal wach re riglesia c'o Filadelfia:

E cubi'ij wa' ri Jun lic nim uk'ij Santo, ri xew cubi'ij ri lic usuc'. Puk'ab Rire c'o wi ri lawe re ri rey David. Ec'u Rire, we c'o xujako, na jinta chi junok carikow utz'apixic; yey we c'o xutz'apij, na jinta chi junok carikow ujakic. Jec'uwa' cubi'ij Rire chiwe:

⁸ Ri'in lic weta'am ronoje ri qui'ano. Chitape': Ri'in nuya'om chiwach ri'ix jun puerta jakalic y wa' wa' puerta na jinta junok carikow utz'apixic; ma tob na lic ta c'o ichuk'ab, e lic itakem ri Nutzij y na quixq'uix tane che ri nubi' chiquiwach ri winak. ⁹ Chitape': Ri e c'o puk'ab ri Satanás (wa' caquibi'ij “oj utinamit ri Dios ma oj aj judi'ab” quecha', pero caqui'an rak'ubal ma na e ta cuq'uil rutinamit ri Dios), Ri'in can'an c'u chique rique e co'lquixucu quib chiwach ri'ix y caqueta'maj c'u ri'

* 2:24 Ap. 2:20

Ri'in lic c'ax quixinna'o. ¹⁰ Ri'ix ich'ijom uchuk'ab tak ri c'axc'obic ruc' unimal ic'u'x pacha' ri ximbi'ij chiwe; ruma c'u ri', quixinchajij che tak ri c'axc'obic catajin lo puwi ronoje ruwachulew, wa' e re c'ambal quipa conoje ri ticawex. ¹¹ Chitape': Ri'in quinopon tan iwuc'; lic c'u miwesaj iwib che ronoje ri uya'om ri Dios chiwe, cha' jela' na junta junok camajaw ri corona* cuya ri Dios chiwe. ¹² China c'u ri cach'ijow uchuk'ab tak ri na utz taj, Ri'in can'an che cu'an pacha' bastión re ucowil ri Rocho ri nu Dios y na quel ta chi c'ana chiri'. Cantz'ibaj c'u che rire rubi' ri nu Dios y rubi' rutinamit ri nu Dios, wa' e ri c'ac' Jerusalem cape chila' chicaj ruc' ri nu Dios. Yey cantz'ibaj ne ri c'ac' nubi' che. ¹³ China c'u ri c'o utanibal, e chuta ri cubi'ij ri Ruxlabixel ri Dios chique tak riglesias, cacha'.

Ri xtz'ibax pan che riglesia c'o Laodicea

¹⁴ »Chatz'ibaj pan wa' che ri aj c'amal wach re riglesia c'o Laodicea: Ri Jun Lic Are', ri pakatzij wi cuk'alajisaj chi utz ri K'ijesak, ri xjekow lo ronoje ri xu'an ri Dios, jewa' cubi'ij chiwe:

¹⁵ Ri'in lic weta'am ronoje ri qui'ano. Ri'ix na ix tane joron y na ix tane c'atan. ¡Lic utz we ta ix joron o we ta ix c'atan! ¹⁶ Pero ruma c'u xa ix sakmik'in ma na ix tane joron y na ix tane c'atan, quixinxabej na lo pa nuchi'. ¹⁷ Ma ri'ix quibi'ij: «Lic oj beyom, ronoje ri cajawax chike c'o chi kuc' y na junta niba'il cakatijo»; no'j lic tok'o' ne iwach ma na quina'bej ta c'u ri' chwach ri Dios na junta c'ana iwach, lic ix niba', ix potz' yey ix ch'analic. ¹⁸ E uwari'che canya wa pixabanic chiwe: Chilok'o chwe Ri'in ri oro lic chom, porotal chi utz pa ak', cha' jela' pakatzij wi quixu'an beyom. Chilok'o chwe

Ri'in rik'u' sak re quicojo cha' jela' quich'uk riq'uix ruma ix ch'analic y chilok'o chwe Ri'in ri cunabal re quicunaj riwach cha' jela' pakatzij wi quixtzu'nic. ¹⁹ Ri'in canch'a'bej quipa y quebenuk'il conoje ri c'ax quebenuna'o; e uwari'che chitzelej c'u itzij chwach ri Dios ruc' ronoje ic'u'x. ²⁰ Chitape': Ri'in in c'o pan chwach ri puerta y quinch'aw c'u apanok; we c'o junok cuta ri nukul y cujak lo ri puerta, Ri'in quinoc bi y quinwa' ruc', y rire cawa' wuc' Ri'in. ²¹ China c'u ri cach'ijow uchuk'ab tak ri na utz taj, canya che catz'uyi' wuc' chupa ri nutz'ulibal pa quintakan wi, jela' pacha' Ri'in nuch'ijom uchuk'ab ronoje ri na utz taj yey in tz'ul chi ruc' ri Nukaw chupa rutz'ulibal. ²² China c'u ri c'o utanibal, e chuta ri cubi'ij ri Ruxlabixel ri Dios chique tak riglesias, cacha'.»

4

Ri yacbal uk'ij ri Dios chila' chicaj

¹ Q'uisbal c'u re tak wa', xintzu'n chicaj y xinwil jun puerta jakatal che ruwa caj. Y ri Jun, ri cach'aw pacha' uch'awibal trompeta, xch'a't tanchi wuc', jewa' xubi'ij: «Chatak'ana lo wara y Ri'in canc'ut chawe sa' tak ri catajin lok we xic'ow tak wa' wa xbi'x chawe» xcha'. ² Xakic'ate't, ri'in xinc'oji' puk'ab ri Ruxlabixel ri Dios. Xinwil c'u jun tz'ulibal re takanic chila' chicaj y c'o Jun tz'ul chupa. ³ Ri Jun tz'ul chupa jela' catzu'nic pacha' ri chomilaj abaj jaspe rubi' y pacha' ri chomilaj cak abaj cornalina rubi'. Ri tz'ulibal sututal rij ruc' jun arco iris lic cawonic jela' pacha' ri chomilaj abaj esmeralda rubi'. ⁴ Yey wa tz'ulibal sutum rij ruc' veinticuatro tz'ulibal chic. Y xinwil veinticuatro nimak winak etz'ul pa ri veinticuatro tz'ulibal, quicojom quik'u' lic sak y c'o corona re oro che ri quijolom. ⁵ Chupa c'u ri tz'ulibal quebel lo uyoc'bal uxe' caj

* **3:11** «Corona»: Wa' que'elawi e ri rajil uc'axel cuya ri Dios chila' chicaj chique ri xqui'an ri utz.

y catataj uch'awibal jab caraklajic y cajininic. Chwach c'u ri tz'ulibal, lic cawolol wukub candil, wa' e ri wukub uwach Uxlabixel re ri Dios. ⁶ Chwach ri tz'ulibal cayenen jun ya' jela' pacha' ri mar y cajuljut upa pacha' chi vidrio. Y ri tz'ulibal sutum rij cuma cajib c'o quic'aslemal pacha' e ángeles yey jela' quetzun pacha' awaj y c'o uq'uiyal quiwach chiquij y chiquiwach. ⁷ Ri nabe jela' catzu'nic pacha' juna coj, ruca'm jela' catzu'nic pacha' juna mek', rupalaj rurox jela' catzu'nic pacha' upalaj winak y rucaj jela' catzu'nic pacha' juna águila caxiq'uiq'uic. ⁸ Chiquijujunal wa cajib c'o wakitak quixic'. Y lic c'o uq'uiyal quiwach che ronoje ri quij y ruxe' ri quixic'. Yey na quecos ta c'u che ubi'xiquil chipak'ij chichak'ab:

«¡Lic Santo, Santo, Santo ri Dios Kajawxel,

ri c'o ronoje unimal chuk'ab puk'ab,

ri xex chi c'o lo wi, ri c'o wak'ij ora y ri c'o chikawach apanok!» quecha'.

⁹ Ec'u ri cajib caquiyac uk'ij ri Dios, caquibixoj rubi' y caquiya quikasa'n re tioxibal che ri Jun tz'ul pa ri tz'ulibal re takanic, ri na jinta utakexic ruc'aslemal. ¹⁰ Ec'uchiri' rique caqui'an wa', ri veinticuatro nimak winak caquixucuba' quib chwach ri Jun tz'ul pa ri tz'ulibal y caquilok'nimaj uk'ij ri na jinta utakexic ruc'aslemal yey caquesaj ri quicorona re oro che ri quijolom y caquiya chwach ri tz'ulibal y jewa' caquibi'ij:

¹¹ «Dios Kajawxel, xew Rilal takal che'la

cac'ul la ri yacbal k'ij

ruma lic sa'chi ri chomal la y ri chuk'ab la;

ma Lal x'anaw la re ronoje ri c'olic

y lic e rajawal c'u'x la ri quec'o'ji' tak wa'

yey ruma ne la' xe'an tak la» quecha'.

* **5:1** “Jubotaj wuj”: Quil “rollo” pa vocabulario.

5

Ri jubotaj wuj nac'om ruc' wukub sellos

¹ Xinwil jubotaj wuj* c'o puk'ab uwiquik'ab ri Jun tz'ul chupa ri tz'ulibal re takanic. Ec'u wa jubotaj wuj c'o tz'ibital chupa y chirij, yey nac'om ruc' wukub sellos. ² Xinwil c'u jun ángel lic c'o uchuk'ab xsiq'uin che ubi'xiquil: «¿China ri ya'tal che cuquir uwach ri jubotaj wuj y culoch'ij ri sellos c'o che?» xcha'. ³ Yey na jinta ne junok chila' chicaj o che ruwachulew o chuxe' ulew ya'tal che culoch'ij ri sellos nac'om che ri jubotaj wuj re carajilaj uwach o tob ne xa re carilo. ⁴ Ec'u ri'in lic quinok'ic, ma na jinta junok rikom ya'tal che cuquir uwach ri jubotaj wuj re carajilaj uwach o tob ne xa re carilo. ⁵ C'o c'u jun chique ri veinticuatro nimak winak, jewa' xubi'ij chwe:

—Matok' chic, ma e ri Jun Coj re ri tinamit Judá, ri ralc'o'al can ri rey David, ri uch'ijom uchuk'ab ronoje ri na utz taj, ya'tal c'u puk'ab Rire culoch'ij ri sellos y cuquir uwach ri jubotaj wuj —xcha'.

⁶ Tec'uchiri' xinwilo, chwach ri tz'ulibal re takanic y chiquixo'libal ri cajib c'o quic'aslemal pacha' e ángeles* y ri nimak winak, chacal jun K'apoj Bexex pacha' lic 'anom c'ax che. Wukub ri ruc'a' y wukub ruwach, wa' que'elawi e ri wukub uwach Uxlabixel re ri Dios takom lo che ronoje ruwachulew. ⁷ Ri K'apoj Bexex xkibic y xuc'am ri jubotaj wuj c'o puk'ab uwiquik'ab ri Jun tz'ul pa ri tz'ulibal. ⁸ Echiri' c'o chi ri jubotaj wuj puk'ab, ri cajib c'o quic'aslemal pacha' e ángeles y ri veinticuatro nimak winak xquixuc quib xe'rakan uk'ab ri K'apoj Bexex. Conoje cuc'a'am qui arpa y quicopa re oro nojinak che incienso. Wa incienso que'elawi e tak ri oración caqui'an rutinamit ri Dios. ⁹ Y caquibixoj wa jun c'ac' bix:

* **5:6** Ap. 4:6-8

«Xew Rilal takal che'la cac'am la ri
jubotaj wuj
y caloch'ij la tak ri sellos nac'al
che,
ma xya ib la pa camic y jec'ula' xelok'
la ruc' ri quiq'uel la
conoje ruq'uiyal quiwach tak ri
ticawex
che ronoje ruq'uiyal uwach
ch'a'temal
y conoje tak ri tinamit cha'
quebu'ana re ri Dios.

¹⁰ X'an c'u la xa jun tinamit chique
y x'an la chique e chacunel
chwach ri Dios
y quetakan c'u che ruwachulew»
quecha'.

¹¹ Tec'uchiri' xebenuwil uq'uiyal
ángeles quisutum rij ri tz'ulibal re
takanic yey quisutum quij ri cajib
c'o quic'aslemal pacha' e ángeles y
ri nimak winak. Ri quiq'uiyal wa
ángeles na cach'ijitaj ta cajilaxic ma
lic e uq'uiyal millones. Yey xinto ¹² lic
co quesiq'uin che ubi'xiq'uil:

«Ri jun K'apoj Bexex lic 'anom c'ax
che,
xew che Rire takal wi cac'oji' ronoje
takanic
y beyomal puk'ab,
xew ruc' Rire c'o sakil na'oj y unimal
chuk'ab,
xew che Rire takal wi caxuc ib
chwach y cayac uk'ij
ruma ri unimal uchomalil»
quecha'.

¹³ Jec'ula' xebenuta conoje tak ri e
'anatal ruma ri Dios: ri e c'o chila'
chicaj, ri e c'o che ruwachulew, ri e
c'o chuxe' ulew y ri e c'o chupa ri mar,
jewa' caquibi'ij:

«Che ri Jun tz'ul pa ri tz'ulibal y che ri
K'apoj Bexex,
takal ri yacbal quik'ij y ri caxuc ib
chiquiwach
yey takalic cabi'xic c'o quichomalil y
quichuk'ab
na jinta utakexic» quecha'.

¹⁴ Ri cajib c'o quic'aslemal
caquic'ul pan uwach: «¡Amén!»
quecha'. Y ri veinticuatro nimak
winak xquixucuba' quib, xquikasaj

c'u quimejelem c'a chu'lew y
xquilok'nimaj uk'ij ri Jun na jinta
utakexic ruc'aslemal.

6

Ri nabe sello

¹ Xinwilo echiri' ri K'apoj Bexex
xuloch'ij ri nabe sello y xinta ukul
jun chique ri cajib c'o quic'aslemal
pacha' e ángeles.* Rire xch'aw pacha'
uch'awibal jab, jewa' xubi'ij: «¡Sa'a!»
xcha'. ² Xinwil c'u jun cawayu' sak
rij. Yey ri cojoyom re ruc'a'am jun
arco puk'ab y xya' c'u jun corona
che. Tec'uchiri' xel bi ruc' unimal
uchuk'ab cha' rire cu'ch'ija uchuk'ab
ronoje.

Ruca'm sello

³ Ec'uchiri' ri K'apoj Bexex
xuloch'ij ruca'm sello, xinta
ukul ruca'm chique ri cajib c'o
quic'aslemal pacha' e ángeles, jewa'
xubi'ij: «¡Sa'a!» xcha'. ⁴ Xel chi c'u
lo jun chic cawayu', wa' cak rij. Yey
ri cojoyom re xya' puk'ab caresaj ri
utzil chomal che ruwachulew y cu'an
chique ri winak caquicamisaj quib
chiquiwach. Yey xya' jun nimalaj
espada che.

Rurox sello

⁵ Ec'uchiri' ri K'apoj Bexex xu-
loch'ij rurox sello, xinta ukul rurox
chique ri cajib c'o quic'aslemal
pacha' e ángeles, jewa' xubi'ij: «¡Sa'a!»
xcha'. Xinwil c'u jun cawayu' k'ek rij,
yey ri cojoyom re utzayem jun lipro*
puk'ab. ⁶ Tec'uchiri' xinta jun kulaj
xch'aw lo chiquixo'libal wa cajib c'o
quic'aslemal pacha' e ángeles, jewa'
xubi'ij: «Che ri ca'ib libra trigo utz
cacoj rajil jun k'ij chac re jun mocom;
yey che ri wakib libra cebada, utz
cacoj rajil jun k'ij chac re jun mocom.
No'j ruwa'al ri uva y raceite, mac'o
ma'an che» xcha'.

Rucaj sello

⁷ Ec'uchiri' ri K'apoj Bexex xu-
loch'ij rucaj sello, xinta rukul ru-
caj chique ri cajib c'o quic'aslemal
pacha' e ángeles, jewa' xubi'ij: «¡Sa'a!»

* 6:1 Ap. 4:6-8

* 6:5 "Lipro": Pa caxtila wa' cabi'x "balanza" che.

xcha'. ⁸ Xinwil c'u jun cawayu' sakt'u'r rij. Ri cojoyom re, "Camic" rubi', yey c'o jun teran chirij, wa' e ri rajaw ri Hades, ri luwar que ri ecaminak. Y xya' uchuk'ab ri Camic cha' quebucamisaj jun ucaj parte chique ri winak che ruwachulew ruc' espada, ruc' numic, ruc' tak yabil y cuma itzel chicop e c'o che ruwachulew.

Ruro' sello

⁹ Ec'uchiri' ri K'apoj Bexex xuloch'ij ruro' sello, xinwil chuxe' raltar janipa ri xecamisax ruma xquitzijoj ri Tzij re ri Dios y na xquewaj ta ri cubulibal quic'u'x ruc' ri Dios. ¹⁰ Rique lic co que-siq'uinic, jewa' caquibi'ij: «Lal Dios Kajawxel, Rilal lic Lal jusuc' y janipa ri bi'im la, lic e cu'ana'. ¿Jampala' cak'at la tzij paquiwi ri ticawex e c'o che ruwachulew y ca'an c'u la uc'axel chique ri xecamisan ke?» quecha'. ¹¹ Y xya' c'u quik'u' lic sak y xbi'x chique cacoy'ej na q'uenok, ma c'amaja' catz'akat ri cajlibal ri cachbi'il quecamisaxic jela' pacha' x'an chique rique.

Ruwakak sello

¹² Ec'uchiri' ri K'apoj Bexex xuloch'ij ruwakak sello, xinwilo xakic'ate't xpe jun nimalaj cabrakan. Ri k'ij lic xu'an k'ek uwach jela' pacha' juna c'ul k'ek catzu'nic.† Y ri ic' lic xu'an cak uwach jela' pacha' catzu'n ri quic'. ¹³ Y tak ri ch'umil e c'o che ruwa caj xetzak lo chwa ruwachulew, jela' xu'ano pacha' ri cu'an juna che' re higo c'o uwach echiri' cac'un juna nimalaj tew y cujabaja' lo ronoje ruwach c'a rax. ¹⁴ Ruwa caj xmalca'nic jela' pacha' cu'an ri wuj echiri' cabotic. Yey ronoje juyub ruc' ronoje isla xjalc'atix quiluwar. ¹⁵ Ec'u tak raj takanel che ruwachulew, ri lic c'o quiwach, ri beyomab, ri e

takanelab paquiwi soldados, ri lic c'o quichuk'ab, ri elok'otal ruma cajaw yey ri na e junta puk'ab juna cajaw, conoje c'ut xe'quewaj quib pa nimak takjul y chuxe' nimak tak abaj c'o che ruwa tak juyub, ¹⁶ jewa' caquibi'ij chique tak ri juyub y chique ri nimak tak abaj: «Chich'uku lo kawil y chojiwewaj chwach ri Jun tz'ul pa ri tz'ulibal re takanic y chwach ri royowal ri K'apoj Bexex. ¹⁷ Ma xopon ri unimal k'ij re ri k'atbal tzij. ¿Yey china c'u ri cuch'ijo cataq'ui' chiquiwach rique?» quecha'.

7

Ri ciento cuarenta y cuatro mil ticawex cacoj ri retalil re ri Dios chique

¹ Ic'owinak chi c'u wa', xebenuwil cajib ángeles e tac'al lo chwi tak rucajchal rajlibal ruwachulew.* Wa' e ri quequik'atibej tak ri cajib utza'm tew che ruwachulew cha' ri tew na cu'an ta c'ax che ruwachulew, che ri mar y che tak ri che'. ² Xinwil c'u jun chic ángel xel lo pa relebal lo ri k'ij; rire ruc'a'am ri sello re ri Dios c'aslic. Ewi lic co xsiq'uin chique ri cajib ángeles, ri xya'taj chique caqui'an c'ax che ruwachulew y che ri mar. ³ Jewa' xubi'ij chique: «Nabe na cakacoj ri retalil† che rucurusil ri quipalaj ri e aj chac re ri Kakaw Dios, tec'uchiri' utz qui'an c'ax che ruwachulew, che ri mar y che tak ri che'» xcha'. ⁴ Y xinta ri cajlibal ri cojotal wa retalil chique: wa' e ciento cuarenta y cuatro mil. Rique echa'tal chiquixo'libal conoje ri tinamit que raj Israel.

⁵ Tak ri cojotal wa retalil chique, e wa':
cablajuj mil chique ri ralc'o'al can ri Judá,
cablajuj mil chique ri ralc'o'al can ri Rubén,
cablajuj mil chique ri ralc'o'al can ri Gad,

† **6:12** Wa' e pacha' ri c'ul caquicoj ri ticawex ojertan echiri' cacam juna catz-quichak' yey wa' lic tzac'an upa. * **7:1** "Rucajchal rajlibal ruwachulew": Wa' que'elawi pa norte, pa sur, pa relebal k'ij y putzakibal k'ij. † **7:3** Wa retalil cacojic e c'utubal re, rique e c'o puk'ab ri Dios; yey ruma c'u wa', ri c'ax cape chwi ruwachulew na junta c'o cu'an chique rique.

6 cablajuj mil chique ri ralc'o'al can ri
 Aser,
 cablajuj mil chique ri ralc'o'al can ri
 Neftalí,
 cablajuj mil chique ri ralc'o'al can ri
 Manasés,
 7 cablajuj mil chique ri ralc'o'al can ri
 Simeón,
 cablajuj mil chique ri ralc'o'al can ri
 Leví,
 cablajuj mil chique ri ralc'o'al can ri
 Isacar,
 8 cablajuj mil chique ri ralc'o'al can ri
 Zabulón,
 cablajuj mil chique ri ralc'o'al can ri
 Benjamín,
 y cablajuj mil chique ri ralc'o'al can ri
 José.‡

*Ri k'alajisanic paquiwi takrina eta
 aj Israel*

9 Ic'owinak chi c'u wa', xebenuwil
 uq'uiyal winak yey na jinta junok
 cach'ijow rajilaxic ri cajlibal. Rique
 e petinak chupa ronoje tak ri tina-
 mit, chique conoje ruq'uiyal quiwach
 tak ri ticawex che ronoje ruq'uiyal
 uwach ch'a'temal. Rique e tac'al
 chwach ri Jun tz'ul pa ri tz'ulibal re
 takanic y chwach ri K'apoj Bexex.
 Yey conoje e wikital ruc' quik'u' sak
 y cuc'a'am uk'ab palma paquik'ab.
 10 Y conoje lic co quesiq'uín che
 ubi'xiq'uil:

«Ri kacolobetajic petinak ruc' ri ka
 Dios
 ri tz'ul pa ri tz'ulibal, y ruc' ri K'apoj
 Bexex»

quecha'. 11 Yey conoje ri ángeles
 e tac'alic, quisutum rij ri tz'ulibal
 re takanic yey quisutum quij ri
 veinticuatro nimak winak y ri cajib
 c'o quic'aslemal pacha' e ángeles.*
 Xquixucuba' c'u quib, xquikasaj
 quimejelem c'a chu'lew chwach ri
 tz'ulibal y xquilok'nimaj uk'ij ri Dios.

12 Jewa' caquibi'ij:

«¡Amén! ¡Amén!
 Xew che ri ka Dios takalic cabi'xic lic
 nim uk'ij,
 ca'an tioxinic che y caxuc ib chwach

yey takal che cabi'xic c'o unimal
 uchomalil,
 sakil una'oj y unimal uchuk'ab.
 Yey wa' na jinta chi utakexic takal che
 Rire.

¡Amén!» quecha'.

13 Tec'uchiri', xch'aw jun chique ri
 veinticuatro nimak winak, jewa'
 xubi'ij chwe:

—Tak wa quicojom quik'u' sak, ¿e
 china rique y pa e petinak wi? —
 xcha'.

14 Ximbi'ij c'u ri'in che:

—Wajawal, lal eta'mayom la re —
 xincha'.

Ec'u rire xubi'ij chwe:

—Conoje wa' e ri quich'ijom
 uchuk'ab ri unimal c'axc'obic yey
 quijosk'im ri quik'u' y qui'anom c'u
 sak che ruc' ruquiq'uel ri K'apoj
 Bexex. 15 Ruma c'u la' e c'o chwach
 ri tz'ulibal pa catakan wi ri Dios
 y caquilok'nimaj c'u Rire chipak'ij
 chichak'ab chupa ri Rocho. Ec'u ri
 Jun tz'ul chupa ri tz'ulibal cajeki'
 cuc', e pacha' cuch'uk quiwi' re
 quebuchajij. 16 Jec'ula' na caquitij ta
 chi numic y tzajin chi', na caquina'
 ta chi ne ruc'atanil ri k'ij y ri buc;
 17 ma ri K'apoj Bexex ri c'o chwach
 ri tz'ulibal, e cachajin que y cuc'am
 bi quiwach pa tak ac'al pa calax wi lo
 ya' re c'aslemal. Yey e ri Dios cusu'
 na ronoje ruwa'al quiwach rique —
 xcha'.

8

Ruwuk sello

1 Echiri' ri K'apoj Bexex xuloch'ij
 ruwuk sello nac'al che ri jubotaj
 wuj, laj juna mey ora lic xtz'intz'ot
 chila' chicaj, na jinta chi c'o xtata-
 jic. 2 Tec'uchiri', xebenuwil ri wukub
 ángeles e tac'al chwach ri Dios y
 xya' c'u jun trompeta chiquijujunal.
 3 Xc'un chi lo jun chic ángel y xtaq'ui'
 chwach raltar. Wa' ruc'a'am jun
 rachpom re oro. Y xya' c'u uq'uiyal
 incienso che re cu'an bi xa jun ruc'
 tak ri qui oraciones conoje rutinamit
 ri Dios yey wa' e kasa'n chwi raltar re

‡ 7:8 Tak wa bi'aj e que ri cablajuj uc'ajol can ri Jacob, ri cabi'x Israel che. * 7:11 Ap. 4:6-8

oro c'o chwach ri tz'ulibal re takanic.
⁴ Lic cabukbut c'u ri sib xel chupa ri rachpom c'o puk'ab ri ángel y xopon c'a chwach ri Dios junam ruc' tak ri qui oraciones rutinamit ri Dios.
⁵ Ec'u ri ángel xuc'am ri rachpom y xunojisaj che ri rachk'a'l c'o chwa raltar. Tec'uchiri' xupuq'uij lo che ruwachulew. Ewi xtataj uch'awibal jab caraklajic y cajininic, y xyoc' ca'n ruxe' caj; yey xpe jun nimalaj cabrakan.

Ri wukub ángeles y ri wukub trompetas

⁶ Ri wukub ángeles, ri cuc'a'am ri wukub trompetas, xquiyijba' quib che uch'awisaxic tak wa'.

Cach'awisax ri nabe trompeta

⁷ Ri nabe ángel xuch'awisaj rutrompeta, y xpe c'u sakbach rachbi'il ak' ruc' quic' chwi ruwachulew. Y ruma wa' xc'at rurox parte che ruwachulew, xc'at rurox parte che ronoje tak ri che', ri tico'n y rak'es.

Cach'awisax ruca'm trompeta

⁸ Ruca'm ángel xuch'awisaj rutrompeta, y c'o xtzak chwi ri mar pacha' juna juyub cajumuw ak' che. Y ruma wa' rurox parte che ri mar xu'an quic' uwach. ⁹ Y xecam c'u rurox parte chique rawaj e c'o chupa ri mar yey rurox parte chique tak ri barcos e c'o chwi ri mar, xsach quiwach.

Cach'awisax rurox trompeta

¹⁰ Rurox ángel xuch'awisaj rutrompeta, y jun nimalaj ch'umil cajumuw ak' che xtzak lo chicaj puwi rurox parte che tak ri rakana' y tak rac'al pa calax wi lo ya'. ¹¹ Rubi' wa' wa jun ch'umil e "C'a". Ewi rurox parte che tak ri nimaya' lic xu'an c'a; y uq'uiyal winak xecam ruma ruc'ayul ri ya'.

Cach'awisax rucaj trompeta

¹² Rucaj ángel xuch'awisaj rutrompeta y lic x'an c'ax che rurox parte che ri k'ij, che ri ic' y chique ri ch'umil.

Xk'ob c'u tak ruwonibal wa', jela' xujek camoymot uwach ri sak pak'ij y xu'an más k'eku'm rak'ab.

¹³ Tec'uchiri' xinwil jun águila* caxiq'uic' chicaj y xinto jewa' casiq'uin che ubi'xiqul: «¡Tok'o' quiwach! ¡Tok'o' quiwach! ¡Tok'o' quiwach conoje ri ejekel che ruwachulew ruma ri caquic'ulumaj echiri' ri oxib ángeles caquich'awisaj ri jujun chic trompetas! ¡Ma ya e cu'ana wa'!» cacha'.

9

Cach'awisax ruro' trompeta

¹ Ruro' ángel xuch'awisaj rutrompeta, y xinwil c'u jun ch'umil xtzak lo chicaj y xe'tzak che ruwachulew. Xya' c'u che ri ch'umil ri lawe re ri siwan na jinta utakexic ruchoyil upa. ² Y ri ch'umil xujak uchi' wa siwan, y cabukbut ri sib xel lo chupa wa' pacha' usibol juna nimalaj orna. Ruma c'u ri' lic xu'an k'eku'm che ruwa ri k'ij y che ruwa caj. ³ Chupa ri sib xebel lo uq'uiyal sac' y xquiquich bi quib che ruwachulew. Xya' c'u paquik'ab ri sac' queti'o'nic pacha' sina'j. ⁴ Xetak c'u che na caqui'an ta c'ax che tak rak'es, che tak ri che', che tak ronoje ri tico'n che ruwachulew; ma xew caqui'an c'ax chique ri winak na jinta ri retalil ri Dios che rucurusil ri quipalaj. ⁵ Na xya' ta c'u chique quequicamisaj ri winak; xew lic quequiya pa c'axc'obic wo'ob ic', ma lic quequiti'o yey ri quitibal e jela' pacha' ruc'axc'ol ruti'bal sina'j. ⁶ Y chupa tak c'u ri' wa' wa k'ij tak ri winak caquitzucuj quicamic, pero na caquirik taj; ma tob lic cacaj quecamic, ri camic e pacha' canimaj chiquiwach.

⁷ Tak ri sac' jela' quetzu'nic pacha' ri cawayu' ewiktalic echiri' quebec pa ch'a'oj. Che ri quijolom quicojom pacha' coronas re oro; tak ri quipalaj jela' catzu'nic pacha' quipalaj winak. ⁸ Yey ri quiwi' e pacha' quiwi' ixokib, y ri que' e pacha' ri que' tak ri coj.

* **8:13** Jujun versión caquibi'ij "ángel". Ri águila e más nim chwa ri xic.

⁹ Ruwa quic'u'x ch'ukutal ruc' ch'ich'. Echiri' quexiq'uiq'uic, ruch'awibal ri quixic' e pacha' uch'awibal uq'uiyal careta jec'om cuma cawayu' echiri' quebec pa ch'a'oj. ¹⁰ E jela' pacha' ri sina'j, c'o quixul che ri quije'. Ya'om c'u quichuk'ab che ri quije' cha' caqui'an c'ax chique ri winak wo'ob ic'. ¹¹ Yey ri cajawal catakan paquiwi' e ri jun ángel rajaw ri siwan na jinta utakexic ruchoyil upa. Rubi' pa ri ch'a'tem hebreo e “Abadón”, yey pa ri ch'a'tem griego “Apolión”.* ¹² Jewa' xq'uis wi ri nabe c'axc'obic. Chita na pe', ma cape chi ca'ib c'axc'obic.

Cach'awisax ruwakak trompeta

¹³ Ruwak ángel xuch'awisaj rutrompeta. Tec'uchiri' xinta jun kulaj xel lo chuxo'libal ri cajib utza'm raltar† re oro, ri c'o chwach ri Dios. ¹⁴ Wa kulaj jewa' xubi'ij che ruwakak ángel, ri ruc'a'am rutrompeta: «Chebaquira ri cajib ángeles e yututal chuchi' ri nimaya' Eufrates» xcha'. ¹⁵ Xequir c'u ri cajib ángeles, ri e yijbital chic re quequicamisaj rurox parte chique ri winak e c'o che ruwachulew echiri' copon ri ora, ri k'ij, ri ic' y ri junab cha'om chi ruma ri Dios. ¹⁶ Ri'in xinta c'u ri cajlibal ri soldados e c'o chwi cawayu' re quebec pa ch'a'oj, e ca'ib ciento millones chi conoje.‡

¹⁷ Y xc'ut chinuwach ruma ri Dios, tak ri cawayu' cuc' ri e c'o puwi', jewa' quetzu'nic: Quicojom ch'ukubal uwa quic'u'x, wa' catzu'n cak pacha' ak', azul pacha' rabaj zafiro rubi' y k'an pacha' rabaj azufre rubi'. Y ri quijolom ri cawayu' e pacha' ri quijolom ri coj yey pa quichi' quel lo ak', sib y azufre.§ ¹⁸ Xecam c'u rurox parte chique ri winak e c'o che ruwachulew ruma ri oxib c'axc'obic xel lo pa quichi' ri cawayu'; wa' e ri ak', ri sib y ri azufre. ¹⁹ Ri quichuk'ab ri cawayu' pa quichi' y che ri quije'

c'o wi. Ri quije' jela' pacha' ri cumatz, ma c'o quijolom yey ruc' wa' caqui'an c'ax chique ri winak.

²⁰ Yey e tak ri winak na xecam ta che wa oxib c'axc'obic, na xquitzelej tane quitzij che ri na utz taj qui'anom. Na xcok'otaj tane ulok'nimaxic quik'ij ritzel tak uxlabixel y na xcok'otaj tane ulok'nimaxic quik'ij tak ri tiox 'anatal cuma rique ruc' oro, ruc' plata, ruc' bronce, ruc' abaj y ruc' che'; yey wa' na quetzu'n taj, na quetan taj y na quebin taj. ²¹ Na xquitzelej tane quitzij che tak ri camic qui'anom, che tak ri itz qui'anom, che tak ri caquetz'abej uwa quik'ij cuc' jujun chic na quic'ulel taj y che tak relek' qui'anom.

10

Ri ángel c'o ralco jubotaj wuj puk'ab

¹ Tec'uchiri', xinwilo echiri' jun chic ángel lic c'o uchuk'ab xkaj lo chila' chicaj yey sututal rij ruc' sutz' y chwi rujolom c'o lo jun arco iris. Ec'u rupalaj lic cawonic jela' pacha' ri k'ij yey tak ri rakan lic cawonic pacha' jutak repaj ak'. ² Puk'ab c'o ralco jubotaj wuj* y wa' jakatal uwach. Xutac'aba' c'u ri rakan uwiquik'ab chwi ri mar y ri rakan mox xutac'aba' chwi ruwachulew. ³ Lic co xsiq'uinic pacha' ri rok'ej juna coj. Yey echiri' xsiq'uinic, xtataj wukub kulaj pacha' uch'awibal jab, lic cajininic xe'ec. ⁴ Echiri' xjinin ri wukub uch'awibal jab, ri'in e ri' cantz'ibaj ri xinto; pero xinta Jun xch'aw lo chila' chicaj, jewa' xubi'ij chwe: «Ri'at xa chac'olo pawanima' tak ri xquibi'ij wa wukub uch'awibal jab y matz'ibaj» xcha'.

⁵ Yey ri ángel tac'al ruc' jun rakan chwi ri mar y jun chwi ruwachulew, xuyac ruk'ab chicaj ⁶ y xujiquba' c'u uwach publi' ri Jun ri na jinta

* **9:11** Wa queb'ib'aj e que'elawi “ri q'uisol uwach ronoje”. † **9:13** “Utza'm raltar”: Wa' jela' catzu'n pacha' ruc'a' chicop. ‡ **9:16** Ri cajib ángeles e quetakaw wa soldados cha' caqui'an wa camic. § **9:17** “Azufre”: Wa' echiri' caporoxic, lic chu ri ruxlab y quebuya pa yabil o pa camic ri ticawex quesikow re. * **10:2** “Jubotaj wuj”: Quil “rollo” pa vocabulario.

utakexic ruc'aslemal, ri 'anayom re ruwa caj ruc' ronoje tak ri c'o chwach, ruwachulew ruc' ronoje tak ri c'o chwach y ri mar ruc' ronoje tak ri c'o chupa, jewa' xubi'ij: «Ri Dios na camayin ta chi che u'anic ri uch'obom lok. ⁷ Ma chupa c'u ri' ri k'ij echiri' ruwuk ángel cujek uch'awisaxic rutrompeta, ri Dios e cu'ana ri uch'obom lok y jela' cak'alajin ronoje rubi'im lo chique ri raj chac e k'alajisanelab» xcha'.

Ri Juan cutij ri ralco jubotaj wuj

⁸ Ec'u ri Jun ch'a'tinak lo wuc' chila' chicaj, je tanchi wa' xubi'ij chwe: «Jat, ja'c'ama ri ralco jubotaj wuj quirom uwach yey c'o puk'ab ri ángel, ri tac'al ruc' jun rakan chwi ri mar y jun chwi ruwachulew» xcha'.

⁹ Xin'ec c'u ri'in ruc' ri ángel y xintz'onoj che cuya ri ralco jubotaj wuj chwe. Ec'u rire xubi'ij chwe: «Ji', chac'ama' y chatija bi. Ec'uchiri' c'o chi pachi' lic qui' cana'o pacha' ruwa'al cab, pero echiri' atijom chubi lic cu'an c'a chupa rapa» xcha chwe.

¹⁰ Ri'in xinc'am c'u ri ralco jubotaj wuj c'o puk'ab ri ángel y xintij bi. Ec'uchiri' c'o chi pa nuchi', lic qui' jela' pacha' ruwa'al cab; pero echiri' nutijom chubi, lic xu'ana c'a chupa ri nupa.

¹¹ Y ri Jun xch'aw lo chwe chila' chicaj, jewa' xubi'ij chwe: «Lic chirajawaxic ca'an tanchi k'alajisanic puwi ri caquic'ulumaj ruq'uiyal tak tinamit, ruq'uiyal quiwach tak ri ticawex che ruq'uiyal uwach ch'a'temal y ruq'uiyal aj takanelab e c'o che ruwachulew» xcha chwe.

11

Ri Rocho Dios capajic

¹ Ec'uchiri', xya' jun tani panuk'ab jela' pacha' juna vara re pajbal y jec'uwa' xbi'x chwe: «Chatyactajok, chapaja ri Rocho Dios, chapaja raltar y chebawajilaj janipa ri caquilok'nimaj uk'ij ri Dios chiri'.

² No'j ruwa ja c'o chwach ri Rocho Dios chaya'a canok; mapajo, ma la' ya'tal chi chique ri winak na e ta aj Israel; yey rique caqui'an que che ri tinamit Jerusalem re caquic'ak bi uk'ij, ma quetakan na puwi' oxib junab ruc' nic'aj» xcha'.

Ri ca'ib k'alajisanelab caquik'alajisaj Rutzij ri Dios

³ Ri'in quebenutak bi ca'ib nuk'alajisanelab quicojom quik'u' lic tzac'an upa* cha' caquitzijoj ri Nutzij oxib junab ruc' nic'aj.† ⁴ Wa' wa ca'ib k'alajisanelab e ri ca'ib che' re olivo y e ri ca'ib utzuc'ulibal ak' e c'o chwach ri Dios Kajawxel, ri catakan chwi ruwachulew. ⁵ We c'o junok caraj cu'an c'ax chique, quel lo ak' pa quichi' rique y ruc' wa' quequicamisaj tak ri tzel quebilow que. Jec'ula' quecam ri cacaj caqui'an c'ax chique. ⁶ Wa ca'ib k'alajisanelab ya'tal chique caquik'atej ri jab cha' na cu'an ta lo pa ruk'ijol echiri' quetajin che u'anic k'alajisanic; y ya'tal chique caqui'an quic' che tak ri ya' y caqui'an c'ax che ruwachulew ruc' uq'uiyal c'axc'obic janipa laj cacaj rique.

⁷ Echiri' quiq'uisom chi utzijoxic Rutzij ri Dios, ri jun nimalaj itzel chicop, ri quel lo chupa ri siwan na jinta utakexic ruchoyil upa, cach'o'jin c'u cuc', cuch'ij quichuk'ab y quebucamisaj. ⁸ Ec'u ri quicuerpos cateli' can pa caquimol wi quib ri winak che ri nimalaj tinamit pa xcamisax wi ri Kanimajawal Jesucristo chwa cruz. Yey che wa tinamit cabi'x “Sodoma” y “Egipto” ruma tak ri mac ca'an chila'.

⁹ Y ri ticawex e petinak chupa tak ri tinamit, chique ruq'uiyal quiwach tak ri ticawex che ruq'uiyal uwach ch'a'temal, oxib k'ij ruc' nic'aj caquil ri quicuerpo telanic y na caquiya tane luwar cha' quemukic. ¹⁰ Y conoje ri winak e c'o che ruwachulew lic quequi'cot c'u ri' ruma ri quicamic

* **11:3** Ri quik'u' quicojom ri ca'ib k'alajisanelab e pacha' ri caquicoj ri ticawex ojertan echiri' cacam juna catz-quichak'. † **11:3** Pa ri ch'a'tem griego cubi'ij “mil doscientos sesenta k'ij”.

wa ca'ib k'alajisanelab. Caqui'an c'u nimak'ij y caquitak tak sipanic chiquiwach, ma xecam wa ca'ib k'alajisanelab re ri Dios, ri xequiya pa c'axc'obic ri winak che ruwachulew.

¹¹ Ec'uchiri' ic'owinak chi oxib k'ij ruc' nic'aj, ri Dios xuya chique wa ca'ib k'alajisanelab quebuxlabic y cac'o'ji' tanchi quic'aslem. Xeyactaj c'u ri' y xetaq'ui'ic. Y conoje ri xebilow que, xoc unimal xi'in ib cuc'.

¹² Ec'u ri ca'ib k'alajisanelab xquita Jun lic co xch'aw lo chila' chicaj, jewa' xubi'ij chique: «Chixak'ana lo wara» xcha'. Ec'u rique xebel bi chicaj chupa jun sutz' y xebilitaj cuma ri tzel xebilow que.

¹³ Chupa c'u la' la jok'otaj xpe jun nimalaj cabrakan y lajuy parte che ri tinamit xwuluwubic; y ruma wa' e wukub mil ri winak xecamic. Ec'u ri na xecam taj, xoc jun xi'in ib cuc' y xquiyac uk'ij ri Dios c'o chila' chicaj.

¹⁴ Jewa' xq'uis wi ruca'm c'axc'obic, pero rurox c'axc'obic catajin lok.

Cach'awisax ruwuk trompeta

¹⁵ Ruwuk ángel xuch'awisaj rutrompeta, y xetataj cowilaj tak kulaj quech'aw lo chila' chicaj, jewa' caquibi'ij:
«Conoje tak ri tinamit che ruwachulew c'o chi puk'ab ri Dios Kajawxel y puk'ab Rucha'o'n lo Rire; yey wa takanic na jinta chi utakexic» quecha'.

¹⁶ Ec'u ri veinticuatro nimak winak etz'ul pa ri quitz'ulibal chwach ri Dios, xquixucuba' quib, xquikasaj quimejelem c'a chu'lew y xquilok'nimaj uk'ij ri Dios. ¹⁷ Jewa' caquibi'ij:

«Cakatioxij che'la, ma Lal Dios Kajawxel
c'o ronoje unimal chuk'ab pak'ab la,
Lal ri Dios c'o wak'ij ora, ri xex chi
c'o lo wi, y ri c'o chikawach
apanok;

ma c'utum la ri chuk'ab la
y jekom chi ri takanic la pakawi ri'oj.

¹⁸ E tak c'u ri tinamit che ruwachulew lic xpe coyowal chi'ij la.

No'j wo'ora xopon ruk'ijol ri oyowal la,

ri k'ij re cak'at la tzij paquiwi tak ri ecaminak.

Caya c'u la ri rajil uc'axel chique ri k'alajisanelab e aj chac la cuc' ri jujun chic e c'o pak'ab la, ri lic caquilok'nimaj uk'ij ri bi' la, tob lic c'o quiwach o na jinta quiwach;

yey casach c'u la quiwach ri' ri que-sachaw quiwach

tak ri winak wara che ruwachulew» quecha'.

¹⁹ Ec'u ri Rocho Dios chila' chicaj, xtek'ebaxic; y xilitaj pan chupa, ri caxa re ri tzij u'anom ri Dios cuc' rutinamit. Ec'uchiri', xyoc' ca'n ruxe' caj, xetataj uch'awibal jab caraklajic y cajininic; yey xpe jun cabrakan, y xu'an nimak tak sakbach.

12

Rixok y ri dragón

¹ Xwinakir c'u che ruwa caj jun nimalaj c'utubal: C'o jun ixok upisom rib chupa ri k'ij, wa' u'anom pacha' uk'u' che. Ec'u ri ic' chuxe' ri rakan c'o wi, y c'o jun corona che rujolom yey wa corona c'o cablajuj ch'umil che. ² Rire yewa' ixok y lic casiq'uinic ma e ri' cutzir uwach yey ruma wa' lic c'o pa c'ax.

³ Xwinakir c'u jun chic c'utubal che ruwa caj: Wa' e jun nimalaj dragón cak rij, c'o wukub ujolom y lajuy ruc'a'. Chujujunal rujolom cojom jun diadema che. ⁴ Ruc' ruje' xebujocoquej bi ri urox parte chique tak ri ch'umil e c'o che ruwa caj y xebuc'ak bi che ruwachulew. Ec'u ri dragón xtaq'ui' chwach rixok echiri' ya e ri' cutzir uwach cha' cutij bi ri ralco ralab maji chic echiri' calaxic.

⁵ Xutzir c'u uwach rixok y xalax jun ralco ralab. Y ruchac wa' wa ralab e catakan ruc' jun vara ch'ich' paquiwi conoje tak ri tinamit e c'o che ruwachulew. Ec'u ri ralco ralab rixok xc'am bi chicaj ruc' ri Dios pa c'o wi rutz'ulibal re takanic. ⁶ Ec'u rixok xanimaj bi, xe'ec pa jun luwar catz'intz'otic pa yijbam wi ruluwar

ruma ri Dios, cha' chiri' catzuk wi oxib junab ruc' nic'aj.*

⁷ Tec'uchiri', xjeker jun nimalaj ch'a'oj chila' chicaj: Ri Miguel cuc' ri ángeles e c'o puk'ab xech'o'jin ruc' ri dragón. Y jec'ula' ri dragón cuc' ri ángeles e c'o puk'ab xech'o'jin ruc' ri Miguel. ⁸ Pero ri dragón cuc' tak ru ángeles na xquich'ij ta quichuk'ab ri Miguel cuc' ri ángeles e c'o ruc'. Y na xya' ta chi c'u chique quec'oji' chila' chicaj. ⁹ Xc'ak bi ri nimalaj dragón, wa' e ri cumatz re ojertan,* ritzel winak Satanás rubi', ri catajin che quisocoso'xic conoje tak ri winak che ruwachulew. Xc'ak c'u bi che ruwachulew junam cuc' ru ángeles.

¹⁰ Tec'uchiri' xinta jun kulaj lic co xch'aw chila' chicaj, jewa' cubi'ij:

«Wo'ora ri Dios ebucolobem chi rutinamit yey ri jekebal re rutakanic xu'an ruc' unimal uchuk'ab y uya'om chi ri takanic puk'ab Rucha'o'n lo Rire. Ma c'akom chubi ri jun cutz'ak quichi' ri ka hermanos chipak'ij chichak'ab chwach ri Dios. ¹¹ E tak ri ka hermanos xquich'ij uchuk'ab ri dragón ruma ruquiq'uel ri K'apoj Bexex y ruc' ri Utzilaj Tzij xquitzijoj rique, yey na xquixi'ij tane quib chwach tak ri caquic'ulumaj tob ne xecamisaxic. ¹² E uwari'che chixqui'cota ri'ix, ri ix jekel wara chicaj. Pero lic tok'o' c'u quiwach tak ri e c'o che ruwachulew y ri e c'o chupa ri mar; ma ritzel winak kajinak piwi ri'ix y lic sa'ch ri royowal, ma reta'am xa ajilam chi ri k'ij ya'tal che» cacha'.

Ritzel winaky ri tinamit Israel

¹³ Echiri' ri dragón xrilo esam chi lo chicaj, lic xuternabej rixok, ruchu ri ralco ala. ¹⁴ Pero che rixok xya' ca'ib nimak tak uxic' pacha' uxic' águila, cha' jela' caxiq'uiq'ui'c animaj bi chwach ri cumatz* pa ri luwar catz'intz'otic, pa ri luwar yijbam chi che, pa catzuk wi oxib junab ruc' nic'aj. ¹⁵ Ec'u ri cumatz xuxabej lo ya'

puchi' chirij rixok, wa' e pacha' juna nimaya' re cucharej bi. ¹⁶ Pero rulew xuto' rixok, ma xjakatajic y xutz'ub bi ri nimaya' uxabem lo ri cumatz puchi'. ¹⁷⁻¹⁸ Ruma c'u la', ri cumatz lic xpe royowal chirij rixok y xu'ana ch'a'oj cuc' tak ri ralco'al can rixok, wa' e tak ri caquitakej Rutzij Upixab ri Dios y caquitzijoj ri Utzilaj Tzij re ri Kanimajawal Jesucristo.

13

Ritzel chicop quel lo chupa ri mar

¹ Ri'in xintaq'ui' chwi ri sanyeb chuchi' ri mar y xinwilo echiri' chupa ri mar xel lo jun nimalaj itzel chicop wukub rujolom y lajuy ri ruc'a'. Chujunal rujolom cojom jun diadema che y chujunal ri wukub ujolom tz'ibital jun bi'aj re c'akibal bi uk'ij ri Dios. ² Wa nimalaj itzel chicop jela' catzu'nic pacha' juna balam, yey tak ri rakan e pacha' rakan oso y ruwa re' e pacha' uwa re' coj. Ec'u ri dragón* xuya uchuk'ab ri nimalaj itzel chicop, xuya rutz'ulibal re takanic che y lic xuya uwach. ³ Xinwil c'ut, lic 'anom c'ax che jun chique tak rujolom ri nimalaj itzel chicop, yey lic cajec'ow ruc'. Pero wa' wa c'ax xcunutajic y ruma c'u ri' conoje ri winak che ruwachulew lic xcam canima' che y e xquitakej ri nimalaj itzel chicop. ⁴ Lic xquiloc'nimaj c'u uk'ij ri dragón ri xya'w uchuk'ab ri nimalaj itzel chicop. Y jenela' xquiloc'nimaj uk'ij ri nimalaj itzel chicop, jewa' caquibi'ij: «¿China chi junok jewa' pacha' wa jun nimalaj itzel chicop? ¿C'o nawi junok cach'ijow uchuk'ab? ¡Na jintaj!» quecha'.

⁵ Xya'taj che ri nimalaj itzel chicop cutac'aba' uk'ij y lic tzel cach'a't chirij ri Dios. Y xya' c'u uchuk'ab re catakan che ruwachulew oxib junab ruc' nic'aj.* ⁶ Xujek c'u lic tzel cach'a't chirij ri Dios, chirij rubi' ri Dios, chirij ri Rocho Dios y chiquij tak ri e c'o chila' chicaj. ⁷ Y xya' c'u puk'ab

* **12:6** Pa ri ch'a'tem griego cubi'ij "mil doscientos sesenta k'ij". ✧ **12:9** Gn. 3:1 ✧ **12:14** Ap. 12:9

✧ **13:2** Ap. 12:3 * **13:5** Pa ri ch'a'tem griego cubi'ij "cuarenta y dos ic".

cach'o'jin chiquij rutinamit ri Dios y cuch'ij quichuk'ab. Jenela' xya' puk'ab catakan paquiwi conoje tak ri tinamit, conoje ruq'uiyal quiwach tak ri ticawex che ronoje ruq'uiyal uwach ch'a'temal. ⁸ Xquilok'nimaj c'u uk'ij ri nimalaj itzel chicop conoje ri winak che ruwachulew, ri na jinta quibi' chupa ri libro re c'aslemal re ri K'apoj Bexex, ri Jun chwi lo ri jekebal re ruwachulew cha'om chi lok re camamisaxic.*

⁹ China c'u ri c'o utanibal che utayic, ¡chuta c'u ri'!

¹⁰ China ri ya'tal che cac'am bi chi presoyil,
ri' cac'am na ubi;
y china ri ya'tal che cacam ruc' espada,
ri' ruc' espada cacamisaxic.

E uwari'che chirajawaxic wi rutinamit ri Dios caquichuk'ubej quib chwach ri c'axc'obic y caquitiquiba' ri cubulibal quic'u'x ruc' ri Dios.

Ritzel chicop quel lo chupa ri juyub tak'aj

¹¹ Tec'uchiri', xinwilo echiri' jun chic nimalaj itzel chicop xel lo chupa ri juyub tak'aj, c'o c'u ca'ib ruc'a' pacha' ruc'a' juna k'apoj bexex pero cach'a't pacha' juna dragón.

¹² Yey wa uca'm nimalaj itzel chicop xya' puk'ab catakan pacha' ri nabe nimalaj itzel chicop y cu'an c'u rutakanic chwach. Xebutak c'u conoje ri winak che ruwachulew cha' lic caquilok'nimaj uk'ij ri nabe nimalaj itzel chicop, ri xcunutaj che ri jun c'ax xjec'ow ruc'. ¹³ Lic cu'an nimak tak c'utubal chiquiwach ri winak, ma cu'ano catzak ne lo ak' chwi ruwachulew. ¹⁴ Quebusoc c'u conoje ri winak ruc' tak ri c'utubal ya'tal che cu'an chwach ri nabe nimalaj itzel chicop. Y quebutak ri winak cha' caqui'an jun uc'axwach ri nabe nimalaj itzel chicop, ri lic x'an c'ax che ruc' espada yey na xcam taj. ¹⁵ Y xya'taj c'u che cuya uc'aslem ruc'axwach ri nabe nimalaj itzel chicop, cha' jela' utz cach'awic y

cutak quicamisaxic conoje ri winak na caquilok'nimaj ta uk'ij. ¹⁶ Yey wa uca'm nimalaj itzel chicop xtakan che cacoj jun retalil chique conoje ri winak, wa' e tak ri lic c'o quiwach y ri na jinta quiwach, ri beyomab y ri e niba'ib, ri elok'otal ruma cajaw y ri na e jinta puk'ab juna cajaw; chique c'u conoje xcoj wa jun retalil che ri quik'ab uwiq'ab o che rucurusil ri quipalaj. ¹⁷ Jec'ula', na jinta junok ya'tal che calok'owic o cac'ayinic we na cojom ta che rire ri jun retalil, wa' e rubi' ri nimalaj itzel chicop o ri rajlibal rubi'. ¹⁸ Wa' lic caraj na'oj cha' camajtaj usuc'. China c'u ri lic cumaj usuc', e churajilaj ri rajlibal ri nimalaj itzel chicop, ma ri rajlibal e re jun ticawex; yey ri rajlibal e wa': 666.

14

Ri ciento cuarenta y cuatro mil ticawex caquibixoj jun c'ac' bix

¹ Tec'uchiri', xinwil ri K'apoj Bexex tac'al chwi ri juyub Sion y ruc' Rire e c'o ciento cuarenta y cuatro mil ticawex, yey che rucurusil ri quipalaj tz'ibital rubi' Rire y rubi' Rukaw.

² Y xinta jun ch'awibal re chila' chicaj catatajic pacha' utza'm ya' echiri' cac'unic y uch'awibal unimal jab; y ri ch'awibal xinto e pacha' uq'uiyal ticawex e ri' caquich'awisaj ri qui arpas. ³ Y caquibixoj jun c'ac' bix chwach ri Jun tz'ul chupa ri tz'ulibal re takanic, chiquiwach ri cajib c'o quic'aslemal pacha' e ángeles* y chiquiwach ri nimak winak.* Yey ri emajayom re wa bix xew e ri ciento cuarenta y cuatro mil xecolobetaj chiquixo'l ri winak che ruwachulew, ma xew chique rique ya'tal wi caquimaj wa jun bix. ⁴ E tak achijab wa' na xquimin ta quib cuc' ixokib. Rique e queterej chirij ri K'apoj Bexex tob pachawi que'ec wi. Wa' e ri xecolobetaj chiquixo'l ri winak che ruwachulew re quebu'an pacha' ri nabe kasa'n chwach ri Dios

y chwach ri K'apoj Bexex. ⁵ Yey na jinta c'ana rak'ubal xtataj chiquichi' ma lic chom ri quibinic quisilabic chwach ri Dios.

Ri caquitzijoj roxib ángeles

⁶ Tec'uchiri', xinwil jun chic ángel caxiq'ui' chicaj. Rire uc'amom lo ri Utzilaj Tzij na jinta utakexic cha' cutzijoj wa' chique conoje ri winak e c'o che ruwachulew, chique conoje tak ri tinamit y conoje ruq'uiyal quiwach tak ri ticawex che ronoje ruq'uiyal uwach ch'a'temal. ⁷ Ri ángel jewa' casiq'uin che ubi'xiq'uil: «Chixi'ij iwib chwach ri Dios y chilok'nimaj uk'ij ma xopon ru orayil ri k'atbal tzij cu'ano; chiyaca c'u uk'ij ri x'anaw re ruwa caj, ruwachulew, ri mar y tak rac'al pa calax wi lo ri ya'» cache'.

⁸ Tec'uchiri', xc'un ruca'm ángel jewa' cubi'ij: «¡E la' xtzakic! E la' xtzak ri nimalaj tinamit Babilonia, ri xebuk'abarisaj conoje tak ri tinamit y xebumin pa mac cha' ruc' ri quirayibal caquetz'abej quik'ij cuc' jujun chic na quic'ulel taj» cache'.

⁹ Tec'uchiri', xc'un rurox ángel y casiq'uin che ubi'xic: «We c'o junok culok'nimaj uk'ij ri nimalaj itzel chicop y ri jun uc'axwach u'anom yey cuc'ul ri retalil che rucurusil rupalaj o che ruk'ab, ¹⁰ ri' cutij na ri c'axc'obic cape ruma ri royowal ri Dios; y cac'ak c'u bi pa ri ak' cajinow ruc' azufre.* Yey ca'an wa' che chiquiwach tak ri santowilaj ángeles y chwach ri K'apoj Bexex. ¹¹ Rusibol wa c'axc'obic cabuklanic quel chicaj y na jinta chi q'uisbal re. Ec'u ri caquilok'nimaj uk'ij ri nimalaj itzel chicop ruc' ri jun uc'axwach u'anom yey caquic'ul ri retalil rubi', chique c'u rique na jinta c'ana uxlanem chipak'ij chichak'ab» cache'. ¹² E uwari'che chirajawaxic che rutinamit ri Dios, wa' e ri quitakem Rutzij Upixab ri

Dios y lic cubul quic'u'x ruc' ri Kanimajawal Jesucristo, caquichuk'ubej quib chwach tak ri c'axc'obic.

¹³ Ec'uchiri', xinta jun kulaj xch'aw lo chila' chicaj, jewa' cubi'ij lo chwe: «Chatz'ibaj: Chwi c'u wo'ora, lic nim quik'ij calaxic ri quecam chupa rubi' ri Kanimajawal Jesucristo» cache'.

«Katzij,» cache' ri Ruxlabixel ri Dios, «ma rique quebuxlan che tak ri quichac, yey ronoje ri utzilaj chac qui'anom na casach ta uwach ma caquic'ul rajil uc'axel chila' chicaj» cache'.

Ri k'atbal tzij cape che ruwachulew

¹⁴ Tec'uchiri', xinwil jun sutz' lic sak y chwi c'u ri' wa' c'o Jun tz'ulic, quilatjic e Ralaxel Chiquixo'l Ticawex.* Che c'u rujolom c'o jun corona re oro y puk'ab ruc'a'am jun jos† lic c'o re'. ¹⁵ Chupa c'u ri Rocho Dios xel lo jun chic ángel, jewa' ri casiq'uin pan che ubi'xiq'uil che ri Jun tz'ul chwi ri sutz': «Cojo la ri jos che tak ri tico'n c'o che ruwachulew ma ya xri'job ruwach; 'ana c'u la ri molonic ma ruk'ijol wa' ya xoponic» cache'. ¹⁶ Ec'u ri Jun tz'ul chwi ri sutz' xucoj rujos che tak ri tico'n c'o che ruwachulew y jela' xu'an ri molonic.

¹⁷ Chupa c'u ri Rocho Dios chila' chicaj xel lo jun chic ángel ruc'a'am jun jos lic c'o re'. ¹⁸ Xel c'u lo jun chic ángel chwa raltar; rire ya'tal puk'ab catakan puwi ri ak'.‡ Lic co c'u xsiq'uin pan che ri jun c'o ri jos lic c'o re' puk'ab, jewa' cubi'ij pan che: «Chachapa rajos lic c'o re' y chak'ata ri jutak chuya'j uvas che tak ri tico'n re uvas c'o che ruwachulew, ma lic k'an chic» cache'. ¹⁹ Ri ángel xuchap rujos y xuk'at ri jutak chuya'j uvas che tak ri rakan uvas c'o che ruwachulew yey xumol uchi' pa capuch' wi; wa' que'elok e pa cuk'at wi tzij ri Dios paquiwi ri ticawex. ²⁰ Xpuch'i' c'u ri uva chupa ri puch'ubal c'o lo naj che ri tinamit yey chupa wa' xel lo quic'.

* **14:10** “Azufre”: Wa' echiri' caporoxic, lic chu ri ruxlab y quebuya pa yabil o pa camic ri ticawex quesikow re. ✨ **14:14** Dn. 7:13 † **14:14** “Jos”: Wa' que'elok “hoz” pa caxtila. ‡ **14:18** Wa jun ángel laj e ri cuchajj ri ak' chwi raltar o e ángel ya'tal puk'ab cuya pa c'ax ruwachulew ruc' ak'. Ap. 16:8

Ri quic' xel che, xu'an pacha' ya' cayenenic. Runajtijil rakan ri quic' xumaj trescientos kilómetros yey ru-choyil upa e jun metro ruc' nic'aj. §

15

Ri ángeles caquic'am lo wukub c'axc'obic

¹ Xinwil jun chic nimalaj c'utubal chila' chicaj yey wa' lic na jinta c'ana c'o wi: E wukub ángeles caquic'am lo ri wukub q'uisbal c'axc'obic; yey ruc' wa' caq'uis wi ri royowal ri Dios.

² Tec'uchiri', xinwil jun mar catzu'n pacha' vidrio yey cawon ak' chupa. Conoje ri na xesocotaj ta ruma ri nimalaj itzel chicop, na xexuqu' tane chwach ri jun uc'axwach y na xquiya tane luwar cacoj chique ri retalil re ri rajlibal rubi' ri nimalaj itzel chicop, conoje rique e tac'al chwi ri mar catzu'n pacha' vidrio y cuc'a'am ri qui arpa ya'tal chique ruma ri Dios. ³ E caquibixoj c'u ri bix re ri Moisés* ri raj chac ri Dios y caquibixoj ri bix re ri K'apoj Bexex, jewa' caquibi'ij:

Lal Dios Kajawxel, ri c'o ronoje unimal chuk'ab pak'ab la.

Lic nima'k y lic chomilaj tak ri chac 'anom la,

lic jusuc' y lic usuc' ronoje ri ca'an la, Lal ri Takanel paquiwi tak ri tinamit.

⁴ ¿C'o nawi junok na cuxi'ij ta rib chwach la, Lal Kajawal?

¿Y c'o nawi junok na cuyac ta uk'ij ri bi' la?

Ma xew Rilal lic Lal santo.

E uwari'che conoje tak ri tinamit che ruwachulew

quec'unic y co'lquiloc'nimaj k'ij la, ma k'alajisam la ri jusuc' k'atbal tzij la paquiwi'

quecha'.

⁵ Tec'uchiri', xinwilo echiri' xtek'ebax ri Rocho Dios chila' chicaj pa c'o wi ri caxa re ri tzij u'anom ri Dios cuc' rutinamit.* ⁶ Chupa c'u ri Rocho Dios xebel lo wukub ángeles, ri

ya'tal chique quequiya pa c'axc'obic tak ri winak che ruwachulew. Quicojom c'u quik'u' 'anatal ruc' c'ul lino yey wa' lic sak y lic cawonic, yey chwa quic'u'x cojotal jun pas re oro. ⁷ Jun c'u chique ri cajib c'o quic'aslemal pacha' e ángeles* xuya chique ri wukub ángeles jujun copas re oro nojinak che ri royowal ri Dios, ri na jinta utakexic ruc'aslemal. ⁸ Ec'u ri Rocho Dios xnoj che sib ruma runimal uchomalil y ruchuk'ab ri Dios. Nabe na c'ut quic'ow wa wukub c'axc'obic quic'amom lo ri wukub ángeles, c'a ec'uchiri' utz coc junok pa ri Rocho Dios.

16

Ri wukub copas re c'axc'obic

¹ Chupa ri Rocho Dios chila' chicaj xinta jun lic co cach'awic, jewa' cubi'ij pan chique ri wukub ángeles: «Jix y ji'k'eja che ruwachulew ri royowal ri Dios, ri c'o chupa ri wukub copas» cacha'.

Ri nabe copa

² Xe'ec c'u ri nabe ángel y xu'k'eja chwi ruwachulew ri c'o chupa rucopa, y ruma wa' xwinakir jun c'axlaj yabil re ch'a'c chiquij tak ri winak y xujek c'u ri' cak'olol quij conoje, wa' e ri xec'uluw ri retalil ri nimalaj itzel chicop y xquilok'nimaj uk'ij ri jun uc'axwach 'anom.

Ruca'm copa

³ Ruca'm ángel xu'k'eja chwi ri mar ri c'o chupa rucopa, y ruma wa' xu'an quic' uwach ri mar pacha' ruquiq'uel juna ticawex camisam; y xecam c'u conoje tak rawaj e c'o chupa ri mar.

Rurox copa

⁴ Rurox ángel xu'k'eja ri c'o chupa rucopa chwi tak ri nimaya' y chwi tak rac'al pa calax wi tak lo ri ya'; y ruma wa' ronoje ri ya' xu'an quic' uwach. ⁵ Tec'uchiri' xinta ri ángel ri ya'tal tak ri ya' puk'ab, jewa' cubi'ij:

§ 14:20 “Jun metro ruc' nic'aj”: Pa ri ch'a'tem griego cubi'ij: “Ri quic' xopon ne c'a xe' que' tak ri cawayu', c'a pa cac'oji' wi ri preno chique”. * 15:3 Éx. 15:1 * 15:5 Ap. 11:19 * 15:7 Ap. 4:6-8

«Lal Dios Kajawxel ri c'o wak'ij ora y ri xex chi c'o lo wi, xew Rilal lic Lal Santo, ma lic Lal jusuc' che ri k'atbal tzij 'anom la ⁶ paquiwi ri xecamisan que ri tinamit la y tak ri k'alajisanelab e la. Xqui'an c'u chique xturuw ri quiquiq'uel. E uwari'che lic Lal jusuc' ma x'an la chique wa e camisanel caquikum quic'. ¡Ec'u lic takal wa' chique!» cacha'.

⁷ Ewi xinta jun chic xch'aw lo chwa raltar, jewa' cubi'ij:

«Pakatzij wi, lal Dios Kajawxel, Rilal c'o ronoje unimal chuk'ab pak'ab la, ma ri k'atbal tzij ca'an la lic e usuc' y lic jusuc'» cacha'.

Rucaj copa

⁸ Rucaj ángel xu'k'eja chwi ri k'ij ri c'o chupa rucopa, jela' c'u ri' xya'taj che ri k'ij quebuc'atisaj conoje ri winak ruc' ruc'atibal. ⁹ Y lic xec'at c'u ri winak ruma ruc'atibal ri k'ij. Ruma c'u wa', xeyajan ruc' itzel tak ch'a'tem chirij ri Dios, ri c'o puk'ab cutak lo wa c'axc'obic paquiwi'. Yey na xquitzelej tane quitzij, ma e na xcaj taj caquiyac uk'ij ri Dios.

Ruro' copa

¹⁰ Ruro' ángel xu'k'eja ri c'o chupa rucopa chwi ri tz'ulibal pa catakan wi ri nimalaj itzel chicop, y ruma wa' xu'an k'eku'm upa tak ri tinamit c'o puk'ab ri nimalaj itzel chicop. Conoje tak c'u ri winak lic caquicach'aca' upa ri cak' ruma ri c'ax. ¹¹ Lic c'ut tzel xech'a't chirij ri Dios c'o chila' chicaj ruma tak ri c'axc'obic y tak ri ch'a'c chiquij; y na xquitzelej ta quitzij chwach ri Dios che tak ri na utz taj qui'anom.

Ruwakak copa

¹² Ruwakak ángel xu'k'eja pa ri nima' maya' Eufrates ri c'o chupa rucopa; y ruma wa', xchakij ri ya' pa ri nimalaj rakana', cha' jela' utz quebic'ow lo ri takanelab e petinak pa relebal lo ri k'ij. ¹³ Y xinwil c'u oxib itzelilaj

uxlabixel jela' quetzu'nic pacha' tutz'; jun quel lo puchi' ri dragón, jun chic quel lo puchi' ri nimalaj itzel chicop y jun chic quel lo puchi' ri jun k'alajisanel socoso'nel. ¹⁴ Wa' e itzel uxlabixel caqui'an tak c'utubal y quebec cuc' conoje ri takanelab che ronoje ruwachulew cha' caquimol quichi' re caqui'an ch'a'oj chupa ri unimal k'ij re ruk'atbal tzij ri Dios, ri c'o ronoje unimal chuk'ab puk'ab.

¹⁵ Jewa' cubi'ij ri Kanimajawal:

«Chitape', Ri'in quinopon iwuc' jela' pacha' ri oquibal re juna elek'om pa juna ja, ma ri elek'om na cubi'ij ta apanok jampala' coponic.* Lic c'u nim uk'ij ralaxic china ri na cawar taj yey ucojom chi ruk'u' cha' we xinc'unic, na cuya ta uq'uix» xcha'.

¹⁶ Y xquimol c'u quichi' ri takanelab chupa ri jun luwar rubi' pa ri ch'a'tem hebreo “Armagedón”.*

Ruwuk copa

¹⁷ Ruwuk ángel xu'k'eja pa ri tew ri c'o chupa rucopa; y lic co xch'aw lo jun kulaj pa ri tz'ulibal re takanic c'o chupa ri Rocho Dios chila' chicaj, jewa' cubi'ij:

—Xq'uis c'u wa k'atbal tzij† — cacha'. ¹⁸ Tec'uchiri' lic xyoc' ca'n ruxe' caj, xetataj uch'awibal jab caraklajic y cajininic; yey xpe jun nimalaj cabrakan che ruwachulew, wa' e cabrakan más nim u'anom chwi lo ri quic'oji'ic ri ticawex che ruwachulew. ¹⁹ Ruma c'u wa', ri nimalaj tinamit xjakataj upa, oxib xu'ano; y conoje tak ri jujun chic tinamit e c'o che ruwachulew xewuluwubic. Ec'u ri Dios na xic'ow ta chuc'u'x tak ri mac u'anom ri nimalaj tinamit Babilonia; xuya c'u pa c'axc'obic ruma ri unimal royowal Rire chirij. ²⁰ Yey ruma c'u wa cabrakan conoje tak ri islas y tak ri juyub xesachic.

²¹ Y xtzak lo chicaj nimak tak sakbach paquiwi ri ticawex. Ri ra'lal wa' laj jun quintal chujujunal. Ruma c'u

* **16:15** Mt. 24:43 * **16:16** “Armagedón”: Wa' que'elawi “juyub re Meguido”. † **16:17** Ruc' ri wukub copas re c'axc'obic, xq'uis ri royowal ri Dios. Ap. 15:1

ri c'axc'obic re ri nimak tak sakbach, ri winak lic tzel xech'a't chirij ri Dios, ma ri c'axc'obic xu'ano lic xibibal uwach.

17

Ri k'atbal tzij puwi rixok na chom ta ubinic

¹ Xc'un c'u jun chique tak ri wukub ángeles, ri c'o ri wukub copas re c'axc'obic paquik'ab. Xch'a't c'u wuc', jewa' xubi'ij chwe: «Sa'a wara y canc'ut chawach ri k'atbal tzij ca'an puwi ri jun ixok na chom ta ubinic, ri tz'ul chwi tak ri ya'. ² Ruc' wa' wi'xok emacuninak tak wi ri takanelab che ruwachulew y conoje ri winak ejekel che ruwachulew, ma ek'abarinak ruma ri vino xuya rixok chique»^{*} xcha'.

³ Tec'uchiri', chupa ri xc'ut chinuwach ruma ri Ruxlabixel ri Dios, ri ángel xinuc'am bi chupa jun luwar catz'intz'otic y chila' xinwil jun ixok tz'ul chwi jun nimalaj itzel chicop cak rij, yey wa' tz'ibital uq'uiyal bi'aj chirij re c'akibal bi uk'ij ri Dios. Wa' c'o wukub ujolom y lajuj ruc'a'. ⁴ Rixok uwikom rib ruc' c'ul morato* uwach y cak uwach; yey wikital ruc' oro, ruc' chomilaj tak abaj y ruc' perlas. Ruc'a'am jun copa re oro puk'ab nojinak che tak ri lic q'uixbal uwach y che ruch'ulil ri mac cu'an cuc' tak rachijab. ⁵ C'o c'u jun bi'aj tz'ibital che rucurusil rupalaj yey lic c'ayew umajic usuc'; e bi'aj wa':

Ri nimalaj tinamit Babilonia
e quichu rixokib lic ch'ul quibinic
quisilabic,
y ruc' rire petinak wi ronoje ri
lic q'uixbal uwach ca'an che
ruwachulew.

⁶ Tec'uchiri' xinwil rixok lic cak'abar ruc' ri quiquiq'uel rutinamit ri Dios y ri xecamisax ruma ri xquitzijoj ri Utzilaj Tzij re ri Jesús. Ec'u ri'in lic xcam wanima' che ri xinwilo.

⁷ Xubi'ij c'u ri ángel chwe:
«¿Su'be lic cacam awanima'
che? Ri'in cank'alajisaj chawe sa'
que'elawi rixok y ri nimalaj itzel

chicop c'amayom lo re, ri c'o wukub ujolom y lajuj ruc'a'. ⁸ Ritzel chicop xawilo e ri jun xc'o'ji' lo ojertan yey ec'u wo'ora na jinta chic. Pero ya copon ri k'ij quel na lo chupa ri siwan na jinta utakexic uchoyil upa, y q'uisbal c'u re, que'ec chi tojbal mac. Conoje c'u ri winak ejekel che ruwachulew, ri na tz'ibital ta ri quibi' chupa ri libro re c'aslemal chwi lo ri jekebal re ruwachulew, cacam canima' che echiri' caquil ri nimalaj itzel chicop re ojertan. Tob c'u ri' wo'ora na jinta chic, pero cawinakir tanchi ulok.

⁹ »Cajawax na'oj cha' jun cumaj usuc' wa': Ri wukub ujolom ri nimalaj itzel chicop e que'elawi wukub chi juyub y puwi tak wa' tz'ul wi rixok; ¹⁰ yey e que'elawi wukub chi takanelab. Y wo'ob chique wa' ebic'owinak chic; jun catakan wo'ora y ri jun chic c'amaja' cujek rutakanic ma c'amaja' cac'unic. Y we xc'unic, lic chirajawaxic wi na naj ta rutakanic cu'ano. ¹¹ Jun chique ri wukub takanel e ri nimalaj itzel chicop, ri jun xc'o'ji' ojertan y wo'ora na jinta chic, yey catakan tanchic y cu'ana ruwajxak takanel. Yey q'uisbal c'u re, que'ec chi tojbal mac.

¹² »Ec'u ri lajuj ruc'a' xawilo, e que'elawi lajuj chi takanelab c'amaja' caquijek ri quitakanic; yey caya' na paquik'ab quetakan junam ruc' ri nimalaj itzel chicop, pero xa jun ora uwach ri quitakanic. ¹³ Wa lajuj takanelab junam tzij qui'anom chiquiwach puwi ri quitakanic cha' caquiya na c'u ri quichuk'ab y ri quitakanic puk'ab ri nimalaj itzel chicop. ¹⁴ Rique quech'o'jin ruc' ri K'apoj Bexex, pero Rire cuch'ij quichuk'ab, ma e Cajawal conoje ri c'o quiwach y e Takanel paquiwi conoje ri e takanelab. Yey tak ri e c'o ruc' ri K'apoj Bexex, e ri esiq'uim y echa'om ruma ri Dios y na quesam ta quib puk'ab Rire» xcha'.

¹⁵ Je tanchi wa' xubi'ij chwe: «Ri

^{*} 17:2 Jer. 51:7 ^{*} 17:4 "Morato": Quil "púrpura" pa vocabulario. ^{*} 17:15 Ap. 17:1

ya' xawilo pa tz'ul wi rixok na chom ta ubinic,✱ que'elawi e tak ri ticawex che tak ri tinamit, che ruq'uiyal quiwach tak ri ticawex che ruq'uiyal uwach ch'a'temal. ¹⁶ Ri lajuj ruc'a' ri nimalaj itzel chicop xawilo, wa' tzel caquil rixok na chom ta rubinic; cacok'otaj c'u can utuquel y caquich'anaba' canok, caquitij ruti'jil y tec'uchiri' caquiporoj pa ak'. ¹⁷ Ma e ri Dios cacojow pa ri canima' cha' caqui'an ri caraj Rire, wa' e caqui'an tzij chiquiwach cha' chupa la' la k'ij ec'owi caquiya ri quitakanic puk'ab ri nimalaj itzel chicop c'a che ruk'ijol echiri' cu'ana na ronoje ri ubi'im can ri Dios. ¹⁸ Rixok xawilo e que'elawi ri nimalaj tinamit catakan paquiwi conoje ri takanelab che ruwachulew» xcha'.

18

Rutzakibal ri tinamit Babilonia

¹ Q'uisbal c'u re wa', xinwil chi jun chic ángel xkaj lo chicaj ruc' unimal uchuk'ab; y ruchomalil ruwonibal xutzij uwi ruwachulew. ² Lic co xsiq'uin che ubi'xiqul:

«¡E la' xtzakic! ¡Xtzak na ri nimalaj tinamit Babilonia! Y wo'ora u'anom quiluwar itzelilaj uxlabixel, quijul ch'ulilaj uxlabixel y quisoc ch'ulilaj tz'iquin ki'tzel quetzu'nic. ³ Ma conoje tak ri jujun chic tinamit che ruwachulew ek'abarinak ruma wa tinamit, ri xebumin chupa uq'uiyal mac ruc' rayibal. Conoje c'u ri takanelab che ruwachulew emacuninac ruc'; y conoje tak raj c'ay che ruwachulew ebeyomarinak ma ri tinamit Babilonia ruma ri unimal urayibal lic c'o xulok' chique» xcha'.

⁴ Tec'uchiri' xinta jun chic kulaj xch'aw lo chicaj, jewa' cubi'ij:

«Chixelubi chupa ri tinamit Babilonia, ri'ix ix nutinamit, cha' na qui'an ta iwe'ix cuc' rique y jela' na catzak ta piwi ri'ix ri c'axc'obic cape puwi rire. ⁵ Ma na xa ta jubik' rumac, e tak wa' xaki ule'om chi rib elinak bi c'a chicaj. Yey ri na utz taj u'anom, lic

c'o chuc'u'x ri Dios. ⁶ Chitzelej uc'axel che e chirij tak ri na utz taj u'anom chique ri jujun chic; chicalajij ri c'ax puwi' ruma rumac u'anom;✱ chupa c'u ri copa pa xuyijba' wi ri ya' lic c'a chique jujun chic, ri'ix chicalajij ruc'ayul wa' y chiya'a che. ⁷ Rire lic xu'an nim che rib y lic xuya rib che tak rurayibal; ec'u wo'ora lic chiya'a pa c'ax y pa ok'ej; ma jewa' ri cubi'ij pa ranima': "Ri'in in tz'ulic pacha' in juna reina, yey na in ta malca'n y na cantij tane c'ana ok'ej" cacha'. ⁸ Ruma c'u ri', xa pa jun k'ij cape ri c'axc'obic puwi': wa' e camic, ok'ej y numic; yey ruc' ne ak' caporoxic, ma ri Dios Kajawxel, ri cuk'at tzij puwi', lic c'o uchuk'ab» cacha'.

⁹ Tak ri takanelab che ruwachulew emacuninac ruc' rixok, yey junam ruc' rire quiya'om quib che rukusil ruwachulew y jec'ula' quitz'ilo'm ri quibinic ruc'. Ec'u rique quebok'ic y quetunan puwi rixok echiri' caquil rusibol rire cac'atic. ¹⁰ Lic chinimanaj quec'o'ji' pan che utzutzuxic rixok ruma ruxibriquil ri c'axc'obic c'o wi y jewa' caquibi'ij:

«¡Tok'o' awach! ¡Tok'o' awach at nimalaj tinamit Babilonia, ri lic c'o achuk'ab, ma xa pa jok'otaj xc'un ri k'atbal tzij pawil!» quecha'.

¹¹ Conoje tak raj c'ay che ruwachulew quebok' na y lic caquibisoj ri nimalaj tinamit ma na jinta chi c'o calok'ow re ruq'uiyal quic'ay. ¹² Wa' e oro, plata, chomilaj tak abaj y perlas; chom tak c'ul lino, chom tak c'ul morato,* chom tak c'ul xela† y chom tak c'ul cak; uq'uiyal uwach che' qui' ruxlab; tak ri 'anatal ruc' marfil, ruc' chom tak che', ruc' bronce, ruc' ch'ich' y ruc' abaj mármol; ¹³ yey quic'ay re incienso y cunabal qui' ruxlab, pacha' canela, mirra y olíbano; vino, aceite, harina y trigo; quic'ay que awaj quebekanic, que bexex, que cawayu' y re careta; yey quic'ay ne ticawex e aj chac.

✱ **18:6** Jer. 50:29 * **18:12** "Morato": Quil "púrpura" pa vocabulario. † **18:12** "Xela": Pa caxtila "seda" rubi'.

¹⁴ Jec'uwa' caquibi'ij che ri tinamit: «Ronoje tak ri xarayij uwach na jinta chi awuc'; ronoje tak ri beyomalil lic xe'ec ac'u'x ruc', xsach uwach y na carik ta chi q'uenok» quecha'.

¹⁵ Ec'u ri e aj c'ay re tak wa', ri lic ebeyomarinak ruma wa tinamit, lic chinimanaj quec'o'ji' pan che utzutz'u'xic wa tinamit ruma ruxibriquil ri c'axc'obic petinak puwi'. Ewi lic cacok'ej lok, ¹⁶ jewa' caquibi'ij:

«¡Tok'o' uwach! ¡Tok'o' uwach ri nimalaj tinamit, ri pacha' juna ixok uwikom rib ruc' chomilaj uk'u' 'anatal ruc' lino, ruc' c'ul morato y cak; wikital ruc' oro, ruc' chomilaj tak abaj y perlas! ¹⁷ Ma xa pa jok'otaj xsach uwach ruq'uiyal ubeyomalil» quecha'.

Conoje c'u ri e c'amal uwach barcos, ri quebin pa barcos, ri quechacun pa barcos y tak ri quec'ayin ruc' barcos, chinimanaj quec'o'ji' wi lo che. ¹⁸ Ec'uchiri' caquil rusibol wa tinamit cac'atic, lic co quesiq'uin che ubi'xic: «¿C'o nawi juna chic tinamit cajunimax ruc' wa nimalaj tinamit? ¡Na jintaj!» quecha'.

¹⁹ Y ri winak caquipuc' ulew chwi quijolom ruma quibis, quebok'ic y co quesiq'uinic, jewa' caquibi'ij:

«¡Tok'o' uwach! ¡Tok'o' uwach ri nimalaj tinamit! Ma conoje ri c'o barcos cuc' lic xebeyomar ruc' wa tinamit; yey xa c'u pa jok'otaj xsach uwach ronoje. ²⁰ Ri'ix ri ix jekel chila' chicaj, chixqui'cota ruma ri xuc'ulumaj wa tinamit. Chixqui'cot iwonoje ri'ix ri iya'om iwib puk'ab ri Dios, ri ix utako'n y ri ix k'alajisanelab, ma Rire e xk'ataw tzij puwi wa nimalaj tinamit ruma ri xu'an chiwe» quecha'.

²¹ Tec'uchiri', jun ángel lic c'o uchuk'ab xuyac jun nimalaj abaj, runimal wa' e pacha' juna nimalaj ca', y xuc'ak bi chupa ri mar, jewa' cubi'ij:

«Jela' ruwulixic bi ri nimalaj tinamit Babilonia y na quilital ta chi uwach.

²² »Awuc' ri'at Babilonia, na catataj ta chi uch'awibal arpa, uch'awibal que aj música, uch'awibal su' yey uch'awibal trompeta; na quebilitaj ta chi ne aj chac y na catataj ta chi ne uch'awibal ri ca' cakilowic. ²³ Na jinta chi ne c'ana ak' cawonic, na catataj ta chi ne c'ana nimak'ij re c'ulaniquil. Ma e tak raj c'ay xec'o'ji' awuc', e más nim ri quitakanic che ruwachulew. Ruma tak ri itz xa'ano, xesocotaj conoje tak ri tinamit che ruwachulew. ²⁴ Yey ri winak re wa tinamit xequicamisaj tak ri k'alajisanelab re ri Dios y rutinamit ri Dios, y xequicamisaj ne uq'uiyal ticawex che tak ronoje ri tinamit re ruwachulew» cacha'.

19

Ri e c'o chila' chicaj caquiyac uk'ij ri Dios

¹ Q'uisbal re wa' xinta uq'uiyal winak chila' chicaj jewa' caquibi'ij:

«¡Aleluya!
¡Ri Dios Kajawxel takal che cayac uk'ij ruma ri colobetajic uya'om chike y ruma runimal uchomalil y ruchuk'ab!

² Rire pakatzij wi lic usuc' y lic jusuc' ri k'atbal tzij cu'ano. Ma xuk'at tzij puwi ri jun ixok lic na chom ta rubinic, ri xebumin ri ticawex re ruwachulew cha' quemacun ruc'.

Ec'u ri Dios xu'an uc'axel che ruma xebucamisaj ri e aj chac re ri Dios» quecha'.

³ Je tanchi wa' xquibi'ij:

«¡Aleluya!
Na jinta utakexic cabuklan chicaj rusibol ri ak' pa xc'ak wubi rixok» xecha'.

⁴ Ec'uchiri', ri veinticuatro nimak winak cuc' ri cajib c'o quic'aslemal pacha' e ángeles,^{*} xquikasaj quimejelem c'a chu'lew y xquilok'nimaj uk'ij ri Dios ri tz'ul pa ri tz'ulibal re takanic, jewa' caquibi'ij:

«¡Amén! ¡Aleluya!» quecha'.

⁵ Chupa c'u ri tz'ulibal xtataj jun kulaj, jewa' cubi'ij:

* 19:4 Ap. 4:6-8

«Chiyaca uk'ij ri ka Dios, iwonoje ri quixchacun chupa ruchac, iwonoje ri c'o xi'in ib iwuc' chwach, chinima'k chich'uti'k» cacha'.

⁶ Tec'uchiri', xinta pacha' quikul uq'uiyal winak jela' pacha' ruch'awibal utza'm ya' echiri' cac'unic y pacha' uch'awibal unimal jab, jewa' caquibi'ij:

«¡Aleluya!

Ma e catakan ri Dios Kajawxel, ri c'o ronoje unimal chuk'ab puk'ab.

⁷ Chojqui'cotok, lic chojqui'cotok y kayaca uk'ij Rire, ma xopon ruk'ijol ri c'ulaniquil re ri K'apoj Bexex

y ri rixokil lic uwikom chi rib.

⁸ Ma che rire ya'tal wi cuwik rib ruc' chomilaj uk'u' 'anatal ruc' c'ul lino

lic cawolk'inic» quecha'.

Wa' wa' c'ul lino e c'utubal re ri jusuc' quibinic quisilabic rutinamit ri Dios.

Ri nimak'ij re ruc'ulaniquil ri K'apoj Bexex

⁹ Ec'u ri ángel jewa' xubi'ij chwe: «Chatz'ibaj wa': Lic nim quik'ij calaxic conoje ri esiq'uim pa ri wa'im re ruc'ulaniquil ri K'apoj Bexex» xcha'.

Yey jewa' tanchi xubi'ij chwe: «Wa ch'a'tem e re ri Dios y lic katzij» xcha'.

¹⁰ Ec'u ri'in xinxucuba' wib xe'rakan uk'ab ri ángel re canlok'nimaj uk'ij. Pero rire jewa' xubi'ij chwe: «Chata pe', lic ma'an la', ma ri'in xa in jun aj chac re ri Dios jela' pacha' ri'at y jela' pacha' ri hermanos, ri quitakem ri K'ijsak uk'alajisam ri Kanimajawal Jesucristo. Xew chayaca uk'ij ri Dios, ma ri K'ijsak re ri Kanimajawal Jesucristo e uc'u'xibal ri sakil k'alajisanic» xcha chwe.

Ruc'unibal ri Kanimajawal Jesucristo

¹¹ Tec'uchiri', xinwil ruwa caj jakalic y xinwil c'u jun cawayu' sak rij. Yey ri cojoyom re jewa' rubi': «Jusuc' y Usuc'», ma chi usuc'liquil

cuk'at tzij y cu'an ch'a'oj. ¹² Tak ruwach lic quewonic pacha' ak' careprotic y chwi rujolom cojom uq'uiyal diademas; yey c'o jun bi'aj tz'ibital che y na jinta junok camajaw usuc', xew Rire cumaj usuc'. ¹³ Yey ruk'u' bala'l pa quic' y rubi' Rire e: «Ri Tzij re ri Dios.» ¹⁴ Tak ri ejércitos re chila' chicaj eteran chirij, e c'o lo chwi cawayu' sak quij. Quicojom quik'u' 'anatal ruc' c'ul lino lic sak y lic chom. ¹⁵ Puchi' ri Jun ucojom lo ri cawayu' sak rij, quel lo jun espada lic t'isi's utza'm cha' ruc' wa' cu'an c'ax chique tak ri tinamit. Rire catakan paquiwi' ruc' jun vara ch'ich' yey cu'an chique pacha' junok cuyik'iya' upa ri uva cha' quel ruwa'al. Ruc' c'u wa' cak'alajin wi runimal royowal ri Dios, ri c'o ronoje unimal chuk'ab puk'ab. ¹⁶ Che c'u ruk'u' chwi ra' jewa' tz'ibitalic:

«TAKANEL PAQUIWI RI TAKANELAB Y AJ WACH PAQUIWI TAK RI C'O QUIWACH.»

¹⁷ Tec'uchiri', xinwil jun ángel tac'al chwach ri k'ij, jewa' ri casiq'uin che ubi'xic chique conoje rawaj quexiq'uic' lic chicaj, ri etijol que ri ecaminak chic: «Chixpetok, chimolo iwib che ri nimalaj wa'im cuya ri Dios ¹⁸ cha' quixwa' ruc' ri quti'jil ri e takanelab, ri e aj wach que soldados y tak ri lic c'o quichuk'ab; ri quti'jil tak ri cawayu' y ri ecojoyom que; yey ri quti'jil ri elok'otal ruma cajaw y ri na e jinta puk'ab juna cajaw, ri c'o quiwach y ri na jinta quiwach» cacha'.

¹⁹ Xinwil c'u ri jun nimalaj itzel chicop* yey ri e takanelab che ruwachulew cuc' ri qui ejércitos, quimolom quib re quech'o'jin ruc' ri Jun ucojom lo rucawayu' y cuc' ru ejércitos eteran chirij. ²⁰ Xchap c'u ri nimalaj itzel chicop, junam ruc' ri jun k'alajisanel socoso'nel, ri u'anom uq'uiyal c'utubal chwach ri nimalaj itzel chicop yey ruc' wa' ebusocom lo conoje tak ri quic'ulum ri retalil ri nimalaj itzel chicop y xquilok'nimaj

* **19:19** Wa' e cach'a'tibex Ap. 13:1-18

uk'ij ri jun uc'axwach. Quicabichal c'u ri', e la' chiquic'asliquil xec'ak bi chupa jun luwar cayenen che ak' y cajinow ruc' azufre. ²¹ Ec'u ri nic'aj chic xecamisax ruc' ri espada quel lo puchi' ri Jun ucojom lo ri cawayu' sak rij; yey e tak c'u rawaj quexiq'uic' lic chicaj, ri etijol que ri ecaminak chic, lic xewa' chi utz ruc' ri quiti'jil.

20

Ri mil junab

¹ Tec'uchiri', xinwilo echiri' jun ángel xkaj lo chila' chicaj, yey wa' ruc'a'am lo ri lawe re ri siwan na jinta utakexic uchoyil upa y ruc'a'am lo jun nimalaj carena puk'ab. ² Wa jun ángel xuch'ij uchuk'ab ri dragón, wa' e ri cumatz re ojertan,✧ ritzel winak Satanás rubi'. Xuyut c'u ri' cha' caya'i' pa carena mil junab, ³ xuc'ak bi chupa wa siwan, xutz'apij uchi' y xucoj c'u rusello chwi ri tz'apibal cha' ritzel winak na quebusoc ta chi tak ri tinamit c'a echiri' cuq'uis na ri mil junab ximitalic. Q'uisbal c'u re wa', cayolopix chi jujun k'ij.

Ri nabe c'astajibal

⁴ Tec'uchiri', xinwil uq'uiyal tz'ulibal re takanic yey wa etz'ul chupa ya'tal paquik'ab quetakanic. Y xebenuwil conoje ri ticawex xc'atzix quijolom ruma xquitzijoj ri Utzilaj Tzij re ri Kanimajawal Jesucristo y Rutzij ri Dios; wa' e tak ri na xquixucuba' ta quib chwach ri nimalaj itzel chicop y chwach ri jun uc'axwach y na xquic'ul ta ri retalil ri nimalaj itzel chicop che rucurusil ri quipalaj o che ri quik'ab. Rique xec'astajic y junam ruc' ri Cristo xetakan mil junab. ⁵ E nabe c'astajibal wa'. No'j ri nic'aj chic ecaminak c'ate quec'astajic echiri' ic'owinak chi ri mil junab. ⁶ Lic nim quik'ij calaxic ri quec'astaj lo che wa nabe c'astajibal, ma rique e utinamit ri Dios. Ec'u ruca'm camic na jinta chi uchuk'ab paquiwi', yey quebu'ana c'u e aj chacunel chwach ri Dios y

chwach ri Cristo y junam ruc' Rire quetakan mil junab.

Ritzel winak cayolopixic

⁷ Echiri' ic'owinak chi ri mil junab, ri Satanás cayolopix lo pa ri luwar pa tz'apil wi. ⁸ Y quel bi che quiso-coso'xic tak ri tinamit e c'o che ronoje ruwachulew, jenela' cu'an chique ri Gog y ri Magog,✧ cha' cumol quichi' re pa ch'a'oj. Ri cajlibal tak wa' e pacha' ruq'uiyal ri sanyeb c'o chuchi' ri mar. ⁹ Y xepe c'u che ronoje ruwachulew y xquisut rij ri tinamit lic c'ax cuna' ri Dios, wa' e luwar pa quimolom wi quib ri lic quiya'om quib puk'ab Rire. Pero ri Dios xutak lo ak' chicaj paquiwi ri eyactajinak chirij rutinamit, y xebuporoj c'u conoje.

Cak'at tzij puwi ritzel winak

¹⁰ Ec'u ritzel winak, ri xebusoc tak ri tinamit, xc'ak bi chupa ri jun luwar cayenen che ak' y cajinow ruc' azufre, chiri' pa e c'o wi ri nimalaj itzel chicop y ri jun k'alajisanel socoso'nel; y chipak'ij chichak'ab quec'oji' pa c'ax na jinta chi utakexic.

¹¹ Tec'uchiri', xinwil jun nimalaj tz'ulibal lic sak y xinwil ri Jun tz'ul chupa. Yey ec'u la' chwach Rire, e ruwachulew y ruwa caj xemalca'nic y na xilitaj ta chi quiwach. ¹² Y xinwil quiwach ri ecaminak chinima'k chich'uti'k e tac'al chwach ri Dios. Tec'uchiri' xjakataj upa tak ri libros yey xjakataj upa jun chic libro, wa' e ri libro re c'aslemal. Chupa tak wa libros tz'ibital wi tak ri qui'anom ri ecaminak, y ec'u chirij tak wa' xk'at tzij paquiwi'. ¹³ Ri mar xebutzelej lo ri ecaminak e c'o chupa; ri rajaw ri camic y ri rajaw ri Hades✧ xequitzelej lo ri ecaminak e c'o cuc'; y xk'at c'u tzij paquiwi' chiquijunal e chirij tak ri qui'anom. ¹⁴ Ec'u ri rajaw ri camic y ri rajaw ri Hades xec'ak bi chupa ri jun luwar cayenen che ak'. Wa' e ri uca'm camic. ¹⁵ Chupa c'u wa' wa jun luwar xec'ak bi ri na tz'ibital ta quibi' chupa ri libro re c'aslemal.

21

Ri c'ac' uwa cajy ri c'ac' uwachulew

¹ Tec'uchiri' xinwil jun c'ac' uwa caj y jun c'ac' uwachulew, ma ri nabe uwa caj y ri nabe uwachulew xemalca'nic, yey ri mar na jinta chic. ² Ri'in in Juan xinwil ri santowilaj tinamit, ri c'ac' Jerusalem, e ri' xkaj lo chila' chicaj petinak ruc' ri Dios, yey lic wikital chi utz pacha' juna ali lic uwikom rib echiri' cu'culu rala cac'uli' ruc'. ³ Y xinta c'u jun kulaj xel lo pa ri tz'ulibal re takanic, lic co xch'awic, jewa' cubi'ij:

«¡Chatape! Ri Dios cac'oji' chiquixo'libal ri ticawex y cajeki' cuc'; ma rique e utinamit, y Rire e Dios que rique. ⁴ Ec'u ri Dios cusu' ruwa'al quiwach conoje rique. Chwi c'u wo'ora na jinta chi camic, na jinta chi ok'eij, na jinta chi quejuyuyic y na jinta chi c'axc'obic; ma ronoje tak ri c'o lo ojertan, ya xic'owic» cacha'.

⁵ Ec'uchiri', ri Jun tz'ul pa ri tz'ulibal re takanic, jewa' xubi'ij:

«Chatape: Ri'in can'an c'ac' che ronoje tak ri c'olic» xcha'.

Yey xubi'ij chwe:

«Chatz'ibaj tak wa', ma wa ch'a'tem lic are' y lic katzij» xcha'.

⁶ Je tanchi wa' xubi'ij chwe:

«Ec'u wa' xutzir ronoje. Ri'in in ri jekebal re yey in ri q'uisbal re, jela' pacha' ri ca'ib letra A y Z.* Chique c'u conoje ri catzajin quichi', cansipaj ri ya' calax lo che ri ac'al re c'aslemal.

⁷ China c'u ri cach'ijow uchuk'ab tak ri na utz taj, cuc'ul ronoje tak wa', yey in c'u u Dios ri', y rire cu'ana walc'o'al. ⁸ No'j ri e turun,† y tak ri xquijolij ri cubulibal quic'u'x wuc', ri caqui'an ri lic q'uixbal uwach y ri e camisanel, ri caquetz'abej uwa quik'ij cuc' jujun chic na quic'ulel taj y ri e aj itz, ri e aj tioxab y conoje ri caqui'an rak'ubal, conoje c'u rique queya' pa ri jun luwar cayenen che

ak' y cajinow ruc' azufre. Ec'u uca'm camic wa'» xcha'.

Ri c'ac' Jerusalem

⁹ Tec'uchiri', xkib lo wuc' jun chique ri wukub ángeles, ri xya'taj ri wukub copas chique, ri nojinak che ri wukub q'uisbal c'axc'obic.✱ Xch'a't c'u wuc', jewa' xubi'ij: «Sa'a na wara, ma canc'ut rali chawe ri cac'uli' ruc' ri K'apoj Bexex» xcha'. ¹⁰ Ec'u la' chupa ri xc'ut chinuwach ruma ri Ruxlabixel ri Dios, ri ángel xinuc'am bi chwi jun nimalaj juyub lic naj uwi' y xuc'ut chwe ri nimalaj santowilaj tinamit Jerusalem, e ri' catajin lo ukajic chila' chicaj petinak ruc' ri Dios. ¹¹ Wa' lic cawon che runimal uchomalil ri Dios; ruwonibal e pacha' juna chomilaj abaj pacha' ri jaspe, lic cajuljut upa pacha' chi vidrio. ¹² Sututal c'u rij ruc' jun nimalaj tapia lic naj uwi'; c'o cablajuj oquibal che y chujujunal oquibal c'o jun ángel aj chajal re, yey che tak ri oquibal tz'ibital jun bi'aj que ri cablajuj tinamit re Israel. ¹³ Yey e tak ri oquibal che ri tapia oxib c'o pa relebal k'ij, oxib c'o pa norte, oxib c'o pa sur y oxib c'o putzakibal k'ij. ¹⁴ Ri nimalaj tapia re ri tinamit tz'akom lo cablajuj nimak tak abaj pa rakanibal; yey chujujunal ri nimak abaj, tz'ibital rubi' jun chique ri cablajuj tako'n re ri K'apoj Bexex.

¹⁵ Ri ángel cach'a't wuc' ruc'a'am jun vara re pajabal 'anom ruc' oro cha' cupaj ri tinamit, tak ri oquibal y ri tapia. ¹⁶ Ri tinamit cuadrado u'anom; ri rakan junam ruc' ruwach. Ec'u ri ángel xupaj ri tinamit ruc' ri vara c'o puk'ab. Y xe'elok ca'ib mil ruc' ca'ib ciento kilómetros runajtijil ri rakan, jela' runajtijil uwi', y jela' runimal uwach. ¹⁷ Tec'uchiri', xupaj runajtijil ri rakan ri tapia; sesenta y cinco metros‡ c'o che. Ri pajabal

* **21:6** “A y Z”: Quil “Alfa y Omega” pa vocabulario. † **21:8** “Turun”: Wa' e ri caquixi'ij quib y queq'uix che utzijoxic Ruch'a'tem ri Dios. ✱ **21:9** Ap. 15:1; 16 ‡ **21:17** Pa versículo 16 ri ch'a'tem griego cubi'ij “doce mil estadios” (wa' que'elok 12 x 1,000 = 12,000). Yey pa ri versículo 17 cubi'ij “ciento cuarenta y cuatro codos” (wa' que'elok 12 x 12 = 144). Ojertan “12” que'elawi “tz'akat uwach”.

xuchapabej wa ángel e junam ruc' ri caquichapabej ri ticawex.

¹⁸ Ri tapia e 'anom ruc' abaj jaspe; no'j ri tinamit e 'anom ruc' sakil oro, cawon upa jela' pacha' chi vidrio. ¹⁹ Tak ri pa rakanibal ri tapia re ri tinamit wikital ruc' ronoje chomilaj tak abaj. Ri nabe, ruc' abaj jaspe; ruca'm, ruc' zafiro; rurox, ruc' ágata; rucaj, ruc' esmeralda; ²⁰ ruro', ruc' ónice; ruwakak, ruc' cornalina; ruwuk, ruc' crisólito; ruwajxak, ruc' berilo; rubelej, ruc' topacio; rula-juj, ruc' crisopraso; ri junlajuj, ruc' jacinto y rucablajuj, ruc' amatista. ²¹ Tak ri cablajuj oquibal e cablajuj perlas; chujujunal oquibal e jun nimalaj perla. Y ri nimabe c'o chunic'ajal ri tinamit 'anom ruc' sakil oro, lic cajuljut upa pacha' chi vidrio.

²² Yey chupa c'u wa tinamit na xinwil ta juna templo pa calok'nimax wi ri Dios; wa' na cajawax ta chic, ma chila' pa ronoje luwar c'o ri Dios Kajawxel, ri c'o ronoje unimal chuk'ab puk'ab, y c'o ri K'apoj Bexex. ²³ Che wa tinamit na cajawax tane uwonibal ri k'ij y ri ic', ma runimal uchomalil ri Dios cutzij upa yey ri K'apoj Bexex e uwonibal ri'. ²⁴ Ec'u ri jujun chic tinamit quebin chwa ri k'ijsak re wa jun tinamit; yey ri e takanelab che ruwachulew caquic'am lo chupa wa tinamit ri chomilaj quibeyomalil re yacbal uk'ij ri Dios.* ²⁵ Tak ri oquibal re wa tinamit na catz'api' ta chi q'uenok, ma chiri' na jinta chi ak'ab. ²⁶ Ri chomilaj beyomalil que tak ri tinamit e cac'am lo che wa tinamit re yacbal uk'ij. ²⁷ Chupa c'u wa' wa tinamit na jinta c'ana ch'ul coc lok, na coc ta ulok ri cu'an ri lic q'uixbal uwach y ri cu'an rak'ubal; ma xew quebec lo ri tz'ibital quibi' chupa ri libro re c'aslemal re ri K'apoj Bexex.

22

Ri ya' re c'aslemal

☆ **21:24** Is. 60:3, 5 * **22:2** C'o ri caquich'ob rakan ri nimaya' quic'ow chunic'ajal ri nimabe y ri che' c'o chunic'ajal ri nimaya', yey ri ratz'ayak y ruk'ab cumaj ucabichal uchi' ri nimaya'. Gn. 2:9; Ez. 47:7-12; Ap. 2:7 ☆ **22:3** Gn. 3:17-19

¹ Tec'uchiri', ri ángel xuc'ut chinuwach jun nimaya' ruc' ya' re c'aslemal, wa' lic cajuljut upa jela' pacha' chi vidrio, yey quel lo pa c'o wi ri tz'ulibal re takanic re ri Dios y re ri K'apoj Bexex. ² Punic'ajal ri nimabe re ri tinamit y che ucabichal uchi' ri nimaya', c'o ri che' cuya c'aslemal.* Wa che' cuya cablajuj uwach chupa ri junab, yey chujujunal ic' cawachinic. Ec'u ruxak e re cunabal que tak ri tinamit che ruwachulew. ³ Chiri' na jinta chi ri na utz ta uwach xuc'am lo ri mac.* Ec'u ri tz'ulibal re ri Dios y re ri K'apoj Bexex cac'o'ji' chiri' yey conoje ri e nimanel re ri Dios caquilok'nimaj uk'ij Rire. ⁴ Caquil c'u uwach ri Dios pa sakil wi y rubi' Rire cac'o'ji' che rucurusil ri quipalaj. ⁵ Chiri' c'u ri' na jinta chi ak'ab; ri quejeki' chiri' na cajawax ta chi ne uwonibal ak' re lámpara chique y na cajawax tane utzu'nibal ri k'ij, ma ri Dios Kajawxel e k'ijsak chique. Yey ri quitakanic rique na jinta chi utakexic.

Ruc'unibal ri Cristo

⁶ Jewa' xubi'ij c'u ri ángel chwe:

«E tak wa' wa ch'a'tem lic are' y lic katzij. Y ri Dios Kajawxel, ri caya'w quich'a'tem ri quetzijon re Rutzij, utakom lo ru ángel cha' cuk'alajisaj chique ri e aj chac re Rire janipa tak ri catajin lok» xcha'.

⁷ Ec'u ri Kanimajawal jewa' cubi'ij:

«¡Chitape! ¡Na naj ta chi ri woponic iwuc'! Lic nim uk'ij ralaxic ri cutakej tak wa' k'alajisanic tz'ibital chupa wa libro» cacha'.

⁸ Ri'in in Juan, in ri xintaw re yey in ri xinilow re ronoje tak wa'. Echiri' nutom y wilom chi tak ronoje wa', xuaj canlok'nimaj uk'ij ri ángel, ri xbi'n re y xc'utuw re chwe ronoje tak wa'; xinxucuba' c'u wib xe'rakan uk'ab, ⁹ pero rire jewa' xubi'ij chwe:

«Lic ma'an la', maxucuba' awib chinuwach. Ma ri'in xa in jun aj chac re ri Dios jela' pacha' ri'at y tak

rawach e k'alajisanelab, junam cuc' ri caquicoj utzij tak wa tz'ibital can chupa wa libro. E chalok'nimaj uk'ij ri Dios» xcha'.

¹⁰ Je tanchi wa' xubi'ij ri ángel chwe:

«Mawewaj tak ri k'alajisanic tz'ibital chupa wa libro, ma xa nakaj chi c'o wi lo ruk'ijol cha' cu'ana tak wa'.

¹¹ China c'u ri cu'an ri na jusuc' taj, we na caraj taj carok'otaj u'anic, ruc' c'u rire c'o wi. China ri uch'ulam rubinic, we na caraj taj carok'otaj wa', ruc' c'u rire c'o wi. Yey ec'u ri cu'an ri lic jusuc', e chutakej u'anic ri lic jusuc' y china ri uya'om rib che jun santowilaj binic, e chuchuk'ubej rib che wa'» xcha ri ángel.

¹² Ec'u ri Kanimajawal jewa' cubi'ij:

«¡Chitape! Na naj ta chi ri woponibal iwuc' y canc'am c'u bi ri rajil uc'axel, ri canya chique ri ticawex chiquijujunal e chirij tak ri qui'anom. ¹³ Ri'in in ri jekebal re yey in ri q'uisbal re jela' pacha' ri ca'ib letra A y Z.† ¹⁴ Lic nim quik'ij calaxic ri caqui'an jusuc' che ri quibinic quisilabic,‡ ma jela' lic takal chique caquitij que ruwach ri che' re c'aslemal y queboc bi che tak ri oquibal re wa tinamit. ¹⁵ No'j e tak ri winak ki'tzel quibinic quisilabic: ri e aj itz, ri caquetz'abej uwa quik'ij cuc' jujun chic na quic'ulel taj, ri e camisanel, ri e aj tioxab cuc' conoje ri lic que'ec quic'u'x che u'anic rak'ubal, ri' na canya ta chique queboc bi chupa wa tinamit.

¹⁶ Ri'in in Jesús nutakom bi ri nu ángel cha' cutzijoj ronoje tak wa' pa tak riglesias. Ri David cuc' tak can ri ralc'o'al e pacha' jun che'; ec'u Ri'in in ri in ratz'ayak y in ri utux wa' wa che',§ yey in pacha' ri jun ch'umil cawon pa sakribal»✧ cacha ri Jesús.

¹⁷ Ri Ruxlabixel ri Dios y ri rixokil ri K'apoj Bexex, jewa' caquibi'ij:

«Peta la» quecha'.

Y china ri cataw re, chubi'ij:

«Peta la.»

China c'u ri catzajin uchi' y caraj capetic, petok y chutija re ri ya' re c'aslemal, yey wa' xa casipax che.

¹⁸ Ri'in in Juan cank'alajisaj c'u wa' chiquiwach conoje ri quetaw re ri k'alajisanic re wa libro: We c'o junok cucoj uwi' ronoje tak wa', ri Dios cutak lo puwi' janipa ri c'axc'obic tz'ibital chupa wa libro. ¹⁹ We c'o c'u junok c'o caresaj che ri k'alajisanic re wa libro, ri Dios na cuya ta chi che cutij ruwach ri che' ri cuya c'aslemal, na cuya tane che coc bi chupa ri santowilaj tinamit re ri Dios, yey na jinta chi c'ana re che janipa ri utz tz'ibital can chupa wa libro.

²⁰ Ec'u ri cajiquiban uwach tak wa', jewa' cubi'ij:

«Pakatzij wi na naj ta chi ri woponibal iwuc'» cacha ri Jesús.

¡Amén! E chu'ana ri', peta la, Kanimajawal Jesucristo.

²¹ C'ulu c'u onoje alak ri' ri unimal rutzil uc'u'x ri Dios. Amén.

† **22:13** “A y Z”: Quil “Alfa y Omega” pa vocabulario. ‡ **22:14** Pa ri ch'a'tem griego cubi'ij “ri caquich'aj ri quik'u”. § **22:16** Ri Jesús e ri “ratz'ayak” ri David ma xex chi c'o lo wi chwach ri David yey e Rire ri xya'w ri na'oj y ri takanic che. Ri Jesús e “rutux ri che' quel lo che ri David” ma e ralc'o'al can ri rey David. Is. 11:1,10; Ro. 1:3 ✧ **22:16** Nm. 24:17; Ap. 2:28

Vocabulario Bíblico

Abba: Tat

E jun ch'a'tem arameo. (Mr. 14:36; Ro. 8:15; Gl. 4:6)

Abismo: Siwan na jinta utakexic ruchoyil upa

Pa ri Nuevo Testamento, wa' na e ta juna siwan quilital che ruwachulew; e ri luwar pa cac'ak wubi ri Satanás cuc' conoje ritzel uxlabixel cha' na quebel ta chulok. (Lc. 8:31; Ap. 9:1; 20:1)

Abominación: Ri lic ch'ul y lic q'uixbal uwach, ri lic tzel quilitalj ruma ri Dios

Wa' e rilic na usuc' taj caqui'an ri ticawex. (Mr. 13:14; Lc. 16:15; Ap. 17:4)

Adoración a Dios: Ulok'nimaxic uk'ij ri Dios (Mt. 4:10; 1 Co. 14:25; Ap. 4:10)

Adulterio: Macunic chirij ri c'ulaniquil

1) Ri cu'an junok c'ulanic echiri' cuyoj rib ruc' jun chic na uc'ulel taj (Mt. 5:27-28; Mr. 10:11-12; Ro. 7:3)

2) Ri cu'an junok uya'om rib puk'ab ri Dios echiri' c'o ri más que'ec uc'u'x chirij y más c'ax cuna' wa' chwa ri Dios. E ri ca'anaw wa', na jusuc' ta ri ranima' chwach ri Dios. (Mt. 12:39; Mr. 8:38)

Águila: (Junam rubi'xic pa kach'a'tem)

Wa' e jun awaj caxiq'uic' lic chicalj jela' pacha' juna xic. (Ap. 4:7; 8:13; 12:14)

Alfa y Omega: Ri jekebal re y ri q'uisbal re

“Alfa” e ri nabe letra re ri alfabeto griego y “omega” e ri q'uisbal re. Ri Cristo xubi'ij: «Ri'in in ri jekebal re yey in ri q'uisbal re, jela' pacha' ri ca'ib letra A y Z.» (Ap. 1:8; 21:6; 22:13)

Alma: Ruc'aslemal juna ticawex, ruc'u'x, ri ranima'

E ru “espíritu” juna ticawex, ri na cacam taj tob cacam rucuerpo. (Mt. 11:29; Mr. 8:36; 1 Ts. 5:23)

Altar: (Junam rubi'xic pa kach'a'tem)

E ri luwar pa caquiya wi ri ticawex ri quikasa'n chwach ri Dios o chwach juna tiox. (Mt. 5:23-24; Hch. 17:23; Heb. 13:10)

Amar: C'ax cuna' junok (Jn. 3:16; Jn. 13:35)

Amén: (Junam rubi'xic pa kach'a'tem)

Ch'a'tem hebreo, que'elawi “lic katzij” o “lic are” o “e chu'ana ri”. (Mt. 6:13; Ro. 1:25; 1 Co. 14:16)

Amor: Rutzil c'u'xaj

E ri cakac'utu echiri' c'ax cakana' ri Dios y c'ax cakana' kib chikawach ri'oj. (1 Co. 13:4-7)

Animar: Unimarisaxic uc'u'x junok

E ri caka'ano echiri' caketa'maj c'o junok pa bis o pa c'ax. (Mt. 9:22; 14:27; Hch. 27:22)

Anticristo: Ri cayacataj chirij ri Cristo (1 Jn. 2:18, 22; 2 Jn. 7)

Aposento alto: Ri cale' ja, ruroxle' ja (Mr. 14:14-15; Hch. 20:8)

Apóstol: Tako'n

Ri cablajuj utijo'n ri Jesús xebu'an e “utako'n”, ma xetak bi ruma Rire cha' que'quitziyoj ri Utzilaj Tzij. Yey ri Pablo e jun chique rutako'n. (Lc. 6:13; Hch. 5:12)

Atrio: Uwa ja (Mr. 15:16)

¡Ay de ellos!: ¡Tok'o' quiwach!

Pa Ruch'a'tem ri Dios, e cabi'x wa' chique ri ticawex c'o chi ri k'atbal tzij re ri Dios paquiwi'. (Mr. 14:21; Lc. 11:42-47; Ap. 8:13)

Bautismo: (Junam rubi'xic pa kach'a'tem)

E ri cu'an junok echiri' cuk'alajisaj ri Kanimajawal Jesucristo e Ucolobenel. Camuk pa ya' o cak'ej ya' chwi ujolom.

1) **Bautizar:** Cuya ri bautismo (Mt. 3:6, 13; Lc. 20:4)

2) **Bautizarse:** Cuc'ul ri bautismo (Mr. 16:16; Hch. 16:15; Heb. 10:22)

Beelzebú: Cajawal ritzel uxlabixel o aj wach que ritzel uxlabixel (Mt. 10:25; Mr. 3:22; 2 Co. 6:15)

Bendito: Lic nim uk'ij (Lc. 13:35; 2 Co. 1:3)

Bienaventurado: Lic nim uk'ij ralaxic

E cabi'x wa' che ri ticawex cuc'ul ri bendición re ri Dios. (Mt. 5:3-11; 25:34; Lc. 1:42)

Blasfemar: Ri tzel ch'a'tibenic chirij ri Dios (Mt. 12:31; Jn. 10:33; Ap. 13:6)

Bondad: Relej c'u'xaj

Jun cuc'ut ri relej uc'u'x echiri' cu'an ri utz che jun chic. (Gl. 5:22; Ef. 2:7; Tit. 3:4)

Carne:

1) Tak ri rayibal re ri ti'jil

E tak ri na utz taj calax lo pa kanima'. (Gl. 5:16-17)

2) Ticawex

Pa jujun versículos e cach'a't paquiwi ri ticawex. (Hch. 2:17)

3) Ti'o'n o ti'ij

E ri ti'o'n re catijic. (1 Co. 8:13)

César, emperador: Nimalaj takanel re Roma

Ri nimalaj takanel re Roma xtakan paquiwi conoje ri jujun chic takanelab. "César" na bi'aj taj; ma e ubi' ruwach ri nimalaj takanel, yey chiquijujunal rique c'o quibi', pacha' Julio, Augusto, Nerón. (Mt. 22:17; Lc. 20:22; Hch. 25:25)

Cielo:

1) Ruwa caj

E pa e c'o wi ri ch'umil, ri k'ij y ri ic'. (Mt. 16:3; Heb. 1:10)

2) Chila' chicaj

E ri luwar lic chom pa jekel wi ri Dios, tob Rire pa ronoje luwar c'o wi. (Mt. 3:2; 2 Co. 12:4; Ap. 4:2)

Cilicio: C'ul c'ax rij y tzac'an upa

E c'ul caquicoj ri ticawex ojertan c'utubal re ri unimal quibis ruma ri quimac o ruma cacam juna catz-quichak'. (Mt. 11:21; Ap. 6:12; 11:3)

Circuncisión: Ri retalil re circuncisión

1) Ri caqui'an raj judi'ab echiri' juna ralco ala cuq'uis wajxakib k'ij ralaxic, e cak'at rutz'u'malil ruwi ri rulewal, c'utubal re e jun chique rutinamit ri Dios. (Gn. 17:9-14; Lc. 2:21; Hch. 7:8)

2) "Los de la circuncisión" que'elawi ri e aj judi'ab. "Los que no son de la circuncisión" que'elawi ri na e ta aj judi'ab. (Ro. 3:30)

3) E c'o jujun aj judi'ab quicojom chi rubi' ri Cristo yey caquibi'ij ri na e ta aj judi'ab chirajawaxic chique caquicoj ri retalil re circuncisión cha' quecolobetajic. (Gl. 2:12)

Cobrador de impuestos: Aj tz'onol puak re tojonic

Raj tz'onol puak lic tzel quebil cuma ri cach aj Israel ma quechacun ruc' ri gobierno romano, ri catakan paquiwi raj Israel. Cabi'x chique e rayinel y elek'omab ma caquitz'onoj uwi ri tojonic ca'anic y ruc' wa' caqui'an c'ax che ri tinamit. (Mt. 9:11; Lc. 3:12-13; 19:2)

Compasión: C'axna'bal c'u'xaj

1) **Mostrar compasión:** Cuc'ut ri c'axna'bal uc'u'x (Ro. 9:15; Heb. 4:15; 1 P. 3:8)

2) **Sentir compasión:** Cajuch' ca'n pa ranima', cajuch' ca'n uc'u'x che junok (Mt. 9:36; Mr. 8:2; 1 Jn. 3:17)

Comunión, compañerismo, unánime: Junam kac'u'x, coju'an xa oj jun

E ri cakariko echiri' cakamol kib cha' ruc' rutzil c'u'xaj junam cojwa'ic, junam cakalok'nimaj uk'ij ri Dios o cakanimarisaj kac'u'x chikawach. (Hch. 2:1, 42; 1 Co. 1:9)

Conciencia: Cuna' chuc'u'x we utz u'anom chwach ri Dios o na utz ta u'anom

Conciencia buena: Cuna' chuc'u'x jusuc' rubinic usilabic chwach ri Dios, cumaj usuc' sa' ri utz yey e cu'ano (Hch. 23:1; Ro. 9:1)

Concilio: Conoje ri uchapom wi rib ri k'atbal tzij

Wa' e 70 achijab e aj judi'ab; chiquixo'l c'o ri cajawal raj chacunel pa Rocho Dios, e c'o ri nimak e aj chacunel pa Rocho Dios yey jujun nimak winak re ri tinamit. Paquik'ab c'u'rique c'o wi ri k'atbal tzij ca'an paquiwi ri tinamit Israel.

(Mt. 26:59; Mr. 15:43; Hch. 22:30)

Concupiscencia: Rayibal na chom ta uwach (Ro. 1:24; Stg. 1:14; 2 P. 3:3)

Consolador: To'bel re cubochi'ij kac'u'x, To'bel re cunimarisaj kac'u'x

Wa' e ri Ruxlabixel ri Dios. (Jn. 14:16, 26; 15:26; 16:7)

Contaminar:

1) Ri cuyojo o cuch'ulaj rubinic usilabic ri ticawex (Mt. 15:20; Stg. 3:6)

2) Ri wa'im cuch'ulaj ri ticawex

Chiquiwach raj judi'ab ojer-tan, c'o ri cutij junok o cuchapo, yey wa' cu'an che junok na utz taj coc pa ri Rocho Dios chila' Jerusalem we na xujosk'ij ta rib nabe. (Hch. 15:20)

Copa: (Junam rubi'xic pa kach'a'tem)

1) C'olibal re tijbal vino (Mt. 26:27; Mr. 14:23; Lc. 22:17; 1 Co. 11:25)

2) C'axc'obic

E c'ambal na'oj puwi tak ri c'axc'olil. (Mt. 26:39; Mr. 14:36; Ap. 16:1)

Cordero: K'apoj bexex

Chupa ri Nuevo Testamento cac'ambex uwach ri Jesús ruc' jun k'apoj bexex caya'i' re kasa'n chwach ri Dios. (Jn. 1:29; 1 P. 1:19; Ap. 5:6)

Cordón: (Junam rubi'xic pa kach'a'tem)

Che ruchi' ri quik'u' rachijab e aj judi'ab, carabab jujun cordón sak pach'um, wa' c'o jujic chij azul chupa. Ri Dios xtakan che caqui'an wa', cuxtabal re chique caquicoj utzij Rire. (Nm. 15:38-39; Mt. 23:5)

Cristo: (Junam rubi'xic pa kach'a'tem)

Ri ch'a'tem "Cristo" pa griego junam que'elawi ruc' ri ch'a'tem "Mesías" pa hebreo. Ucabichal wa ch'a'tem que'elawi "Rucha'o'n ri Dios ubi'tisim lok", wa' e ri Colobenel bi'isitim lo ruma ri Dios. (Mt. 16:16; Jn. 20:31; Hch. 17:3)

Cuerdo: Ri cuch'ob chi utz sa' ri cu'ano (2 Co. 5:13)

Demonio: Itzel uxlabixel (Mt. 7:22; Mr. 1:34; Lc. 8:2)

Denario: (Junam rubi'xic pa kach'a'tem)

E jun meyo re Roma, rajil jun k'ij chac. Oxib ciento e cuch'ac jun aj chac pa jun junab. (Mt. 20:9; Lc. 10:35)

Descendiente: Ralc'o'al canok

Raj judi'ab lic caquibi'ij wa' echiri' quech'a't puwi ri familia quipetebem lo wi, pacha' "ri e ralc'o'al can ri Abraham" ma rique quipetebem lo che ri Abraham. (Jn. 8:37; Ro. 9:7-8; 2 Co. 11:22)

Deseo de la carne: Ri rayibal na utz ta uwach re ri kati'jil (Ro. 13:14; Gl. 5:16; 1 Jn. 2:16)

Día del Señor:

1) Ruk'ijol ruc'unibal ri Kanima-jawal (1 Co. 5:5; 2 Ts. 2:2; 2 P. 3:10)

2) Ri domingo

Ri k'ij echiri' xc'astaj ri Kanimajawal Jesucristo chiquixo'l ri ecaminak. (Ap. 1:10)

Día de reposo: K'ij re uxlanibal

Echiri' cubi'ij "k'ij re uxlanibal" chupa Ruch'a'tem ri Dios, wa' e que'elawi ri k'ij echiri' raj judi'ab na quechacun taj. Wa' e ruwuk k'ij re ri semana, cajeker viernes pa roquibal ak'ab y caq'uis sábado pa tzakibal k'ij. (Mt. 12:1; 28:1; Mr. 2:27; Jn. 9:14)

Diablo: Ritzel winak

Rubi' ritzel winak e "Satanás". (Lc. 4:2; Hch. 13:10; 1 P. 5:8)

Diaconisas: Aj chaquib e to'bel piglesia

E cabi'x chique rixokib queto'b piglesia. (Ro. 16:1)

Diáconos: Aj chaquib e to'bel piglesia

E cabi'x chique rachijab queto'b piglesia. (Flp. 1:1; 1 Ti. 3:8, 12)

Diezmo: (Junam rubi'xic pa kach'a'tem)

We junok cuch'ac lajuj quetzales yey caresaj jun re cuya che ri Dios, ri cuya'o e "rudiezmo". (Lc. 18:12; Heb. 7:2)

Discípulo: Tijo'n

E jun lic cutakej ri c'utunic re rutijonel. (Mt. 10:1; Lc. 6:13; Hch. 24:5)

Doctrina: C'utunic (Mt. 7:28; Jn. 7:16; Tit. 2:1)

Don del Espíritu Santo: Ri sipanic re ri Santowilaj Ruxlabixel ri Dios

Ri Dios cuya ri Santowilaj Ruxlabixel chique ri e re ri Cristo. (Hch. 2:38; 10:45)

Dones espirituales: Tak ri sipanic uya'om ri Ruxlabixel ri Dios

Chique conoje ri e re ri Cristo, ri Ruxlabixel ri Dios cuya quichuk'ab y quina'oj che u'aniquil tak ruchac. Jun che tak wa' e ri caya'taj chique jujun caquik'alajisaj runa'oj ri Dios. (1 Co. 12:1; 14:1, 12)

Dracma: Sakil puak

E jun meyo, rajil jun k'ij chac. (Lc. 15:8; 19:13)

Dragón: (Junam rubi'xic pa kach'a'tem)

1) E jun nimalaj itzel chicop (Ap. 12:3; 13:2)

2) Ruch'a'tem ri Dios echiri' cach'a't puwi ri Satanás, c'o jutak laj cubi'ij “dragón” o “cumatz” che. (Ap. 12:9; 20:2)

Esclavo:

1) Jun aj chac lok'otal ruma ri rajaw E junok cac'oji' puk'ab ri rajaw cha' cachacun ronoje k'ij ruc' y na jinta uk'ijol ruc'olem ruc'. Ri “esclavo” xew catzuk ruma ri rajaw pero na cach'acan taj. (1 Co. 12:13; Flm. 10; Ap. 6:15)

2) Junok c'o puk'ab ri mac

Ruch'a'tem ri Dios cubi'ij we junok c'o puk'ab ri mac, e ri mac ri catakan puwi'. Yey xew ri Jesús c'o uchuk'ab re caresaj junok puk'ab ri mac. (Jn. 8:34; Ro. 6:16, 20)

Escriba: Raj c'utunel re ri tzi-jpixab

Raj c'utunel re ri tzi-jpixab e lic quitakem ri Tzij Pixab re ri Moisés y quec'utun puwi wa' chiquiwach ri winak. Pero lic eq'ui chique wa' e más quitakem tak na'oj xa que achijab y c'utunic que can

quichu-quikaw re ojertan, chwa ri caquitakej Rutzij Upixab ri Dios. Pa caxtila cabi'x chique “escribas”, “intérpretes de la ley” y “doctores de la ley”. (Mt. 2:4; Mr. 11:18; Jn. 8:3)

Escritura: Ruch'a'tem ri Dios tz'ibital canok, Rutzij Upixab ri Dios (Mr. 15:28; Lc. 4:21; Jn. 19:36; Ro. 10:11; 2 Ti. 3:16; 2 P. 1:21)

Espiritual: E c'amom uwach ruma ri Ruxlabixel ri Dios Uya'om rib puk'ab ri Dios (1 Co. 2:14-15; Gl. 5:25-26; 6:1)

Espíritu de Dios: Ruxlabixel ri Dios (Lc. 4:18; Jn. 3:8; Ro. 8:1)

Espíritu Santo: Santowilaj Ruxlabixel ri Dios (Mt. 1:18; Lc. 1:15; 3:22; Hch. 2:4)

Espíritus:

1) **Espíritus malos:** Itzel uxlabixel (Lc. 7:21; Hch. 19:12, 15)

2) **Espíritus inmundos:** Itzelilaj uxlabixel (Mt. 12:43; Mr. 1:26; Lc. 6:18)

Eunuco: (Junam rubi'xic pa kach'a'tem)

Ojertan que'an “castrar” jujun achijab cha' quechacun pa palacio o pa rocho juna beyom. Jujun ca'an chique e chajinel que ixokib y alito o ca'an chique e c'utunel. Yey e c'o jujun lic c'o quiwach. (Mt. 19:12; Hch. 8:27)

Evangelio: Utzilaj Tzij

Ruc'u'xibal ri Utzilaj Tzij e wa': C'o cuybal mac y colobetajic ruma ri xu'an ri Kanimajawal Jesucristo. (Mr. 1:1; Lc. 9:6; Hch. 8:4.)

Evangelista: Aj tzijol re ri Utzilaj Tzij (Hch. 21:8; Ef. 4:11; 2 Ti. 4:5)

Expiación: Resaxic umac junok ruma rucamic juna awaj o juna ticawex

Ri Dios caresaj ri k'atbal tzij c'o puwi junok ruma rucamic ri Jesús. (Heb. 2:17; 10:6)

Faraón: (Junam rubi'xic pa kach'a'tem)

Wa' que'elawi “rey”; na e ta bi'aj. Conoje ri reyes re Egipto, cabi'x “faraón” chique. (Hch. 7:10, 13; Ro. 9:17)

Fariseos: (Junam rubi'xic pa kach'a'tem)

Wa' e jun grupo achijab e aj judi'ab. Rique caquibi'ij lic caquilok'nimaj ri Dios ma caqui'an ronoje ri takanic tz'ibital can ruma ri Moisés; y na xew ta wa' ma quicojom ne más uwi'. E uwari'che lic qui'anom nim che quib y caquich'ob rakan xew rique lic e jusuc' chwach ri Dios. (Mt. 3:7; Lc. 18:11; Hch. 26:5)

Fe:

1) **Cubulibal c'u'xaj**

Ri'oj cubul kac'u'x ruc' ri Dios ma Rire c'ax cojuna'o, cojuchajij y cu'an ronoje ri ubi'tisim lok. (Mt. 8:10; Mr. 5:34; Heb. 11)

2) **Ri sakil c'utunic puwi ri Kanimajawal Jesucristo (1 Ti. 3:9)**

Filacteria: (Junam rubi'xic pa kach'a'tem)

Ri "filacteria" e jurabaj tz'u'um ruc' jutak bik' Uch'a'tem ri Dios tz'ibital chwach. C'o achijab e aj judi'ab caquixim wa' chucurusil ri quipalaj y che ri quik'ab. Ri Dios xtakan che caqui'an wa', cuxtabal re chique caquicoj utzij Rire. (Dt. 6:8; Mt. 23:5)

Fornicación: Ri caretz'abej uwa uk'ij ruc' jun chic na uc'ulel taj; ri cuya rib chupa tak rayibal na chom ta uwach (Mr. 7:21; 1 Co. 5:9; 6:13)

Gentiles:

Ri na e ta aj judi'ab

E ri ticawex na e ta ralc'o'al can ri Jacob. (Hch. 9:15; 1 Co. 1:23; Ef. 3:8)

Gloria: Unimal uchomalil

Cakayac uk'ij ri Dios ruma tak ri c'utubal re runimal uchomalil. (Mt. 24:30; Hch. 7:55; 1 Ti. 1:17)

Gracia: Unimal rutzil c'u'xaj

1) **La gracia de Dios:** Unimal rutzil uc'u'x ri Dios (Jn. 1:17; Hch. 15:11; Ef. 2:8)

2) **Encontrar gracia ante los ojos de otro:**

Wa' e echiri' ri u'anom junok lic utz quilital ruma jun chic. (Lc. 2:52)

Griego: Ri ch'a'tem griego

Wa' e quich'a'tem ri e aj Grecia. Yey lic e q'ui queta'am wa' wa ch'a'tem ojertan, na xew ta ri e aj Grecia. Lic e q'ui e tijotal pa wa ch'a'tem yey e q'ui ri xquitz'ibaj libros pa ri ch'a'tem griego. (Lc. 23:38; Hch. 6:1; Ro. 1:14)

Griegos:

1) **Ri e aj Grecia**

Wa' e ri xebalax Grecia. (Hch. 18:17; 1 Co. 1:22)

2) **Ri e aj griego na e ta aj judi'ab**

Wa' e ri na e ta aj judi'ab pero ri quich'a'tem e griego y quitakem ri cojobal que raj Grecia tob na e jekel ta Grecia. Uq'uizalaj echiri' cubi'ij "judíos y griegos" pa caxtila, wa' e que'elawi ri e aj judi'ab y ri na e ta aj judi'ab. Quil "gentiles" pa vocabulario. (Hch. 16:1, 3)

3) **Ri e aj judi'ab quech'a't pa ri ch'a'tem griego**

Wa' e ticawex e aj judi'ab ma ri cati'-quimam e aj judi'ab. Rique caquitakej jujun che tak ri cojobal que ri cati'-quimam, pero quitakem jujun che tak ri cojobal que ri e aj griego yey ri quich'a'tem e griego. Jujun chique tak wa' e cuq'uil ri quicojom rubi' ri Cristo. (Hch. 6:1)

Hades: Xibalba' re tijbal c'ax; luwar pa quec'o'ji' wi ri e caminak (Mt. 11:23; Lc. 10:15)

Hijo del Hombre: Ralaxel Chiquixo'l Ticawex

E caquibi'ij wa' ri David cuc' tak ri k'alajisanelab ojertan echiri' quech'a't puwi Rucha'o'n lo ri Dios cac'unic. Wa' e ri Kanimajawal Jesucristo. Yey ri Jesucristo xubi'ij Rire e Ucha'o'n lo ri Dios y e Alaxel Chiquixo'l Ticawex. (Mt. 8:20; Mr. 2:28; Hch. 7:56)

Hipócrita: Ticawex xa queb upalaj

E ri ticawex lic chacojo ri cubi'ij yey na e ta u'anom. (Mt. 6:2; Lc. 11:44; 12:56)

Hora: Ora

Chupa ri Biblia, ri rajlibal ri ora re jun k'ij cujeko echiri' quel lo ri k'ij; no'j chikawach ri'oj cujek tiq'uil ak'ab. E uwari'che, echiri' pa ri ch'a'tem griego cubi'ij “la hora tercera del día”, wa' pa kach'a'tem e “ri ubelej ora anim”. Quil ri cuadro chuxe'.

Griego —	Pa kach'a'tem
la hora tercera —	ri ubelej ora
la hora sexta —	tiq'uil k'ij
la hora séptima —	ri nabe ora
la hora novena —	ri urox ora
la hora décima —	ri ucaj ora
la hora undécima —	ri uro' ora

Idolatría: Ulok'nimaxic tiox

Echiri' junok c'o ri uya'om puc'axel ri Dios (pacha' tiox, puak, yacbal uk'ij o juna ticawex) yey más c'ax cuna' wa' chwa ri Dios, e cu'an pacha' “dios” che wa'. (Hch. 17:16; 1 Co. 10:14; Col. 3:5)

Idolo:

1) Tiox

E tak ri quidios ri ticawex, wa' na e ta ri Dios Kajawxel. (Hch. 7:41; 1 Co. 12:2)

2) Rajaw juna luwar

Wa' na winak taj, ma e jun uxlabixel c'o pa tew. (1 Co. 8:5)

Iglesia: Riglesia, ri tinamit re ri Cristo, ri quicojom rubi' ri Cristo Ri quimolom quib pa rubi' ri Cristo pa juna luwar. (Hch. 2:47; 9:31; Gl. 1:13)

Incienso: (Junam rubi'xic pa kach'a'tem)

E k'ol esam che jujun che'. Ri k'ol caporoxic cha' cabukix sib lic c'o ruxlab. Ri incienso lic q'ui uwach; jun che wa' e ri pom. Rojertan chupa ri Rocho Dios caporox incienso chwa ri altar re ri Dios. Wa incienso yijbital ruc' k'ol na xa ta jun uwach y lic qui' ruxlab. Pa Éxodo 30:34-35 cubi'ij su'anic cayijibaxic. Yey wa' xew chwach ri Dios caya'i' wi; ruma c'u la' e jun incienso caporoxic lic santo chwach ri Dios. Pa Jeremías 44:21-23 cubi'ij ri Dios xusach quiwach

jujun tinamit ruma xquiporoj incienso chiquiwach ri tiox. (Mt. 2:11; Lc. 1:9; Ap. 8:3)

Infierno: Xibalba' re tijbal c'ax (Mt. 5:29; Mr. 9:43-47; Lc. 12:5; 2 P. 2:4)

Inmundicia: Ri ch'ulilaj mac

E ri cu'an junok echiri' cuya rib che u'anic tak ri rayibal re ruti'jil, pacha' ri caretz'abej uwa uk'ij xa tob na ruc'. (Ro. 1:24; 2 Co. 12:21; 1 Ts. 4:7)

Insensato: Ticawex na jinta una'oj, ri na cuch'ob ta chi utz ri cu'ano (Mt. 7:26; 25:2-3, 8; Ef. 5:17)

Intercesor: Ri jun cach'aw puwi junok chwach jun chic (Ro. 8:26; Flp. 1:9; Heb. 7:25)

Invierno: Pa k'alaj

Chupa ri Biblia pa caxtila cabi'x “invierno” che ruk'ijol echiri' lic c'ax tew y c'o jab. Chila' Israel wa' cajejer octubre y caq'uis abril. (Mt. 24:20)

Juan el Bautista: Ri Juan aj ya'l bautismo (Mt. 3:1; Mr. 6:14; Hch. 1:5)

Juicio: K'atbal tzij (Lc. 10:14; Jn. 16:8; Ap. 15:4)

Juramento: Ch'a'tem cajiquibax uwach (Mt. 5:33-37; Hch. 2:30; Heb. 6:16)

Justicia: Ri lic usuc' chwach ri Dios, ri jusuc' binic silabic (Mt. 3:15; 5:10; Hch. 10:35; Ro. 10:5-6)

Justificar: Ri Dios cu'an jusuc' che junok (Ro. 4:25; 5:18; 1 Co. 1:30; 2 Co. 3:9)

Lascivia: Ri cuya rib chupa ri rayibal re ri ti'jil (Mr. 7:22; Ro. 1:27; Ef. 4:19)

Lepra: (Junam rubi'xic pa kach'a'tem)

E jun yabil cuk'ayisaj ruti'jil junok yey wa' lic cak'axic. Ruma c'u ri' e janipa ri cac'o'ji' lepra chique, na utz ta chic quec'o'ji' cuc' ri utz quiwach. E uwari'che quebe'c'ola lo naj che ri tinamit. (Mt. 8:1-3; Mr. 1:40; Lc. 5:12-13)

Levitas: (Junam rubi'xic pa kach'a'tem)

Wa' e ralc'o'al can ri Leví. Xya' chique rique quebu'an e aj chac chupa ri

- Rocho Dios. (Nm. 4; Lc. 10:32; Jn. 1:19; Hch. 4:36)
- Ley:** Tzippixab, takanic (Mt. 19:18; 22:38; Lc. 2:27; Heb. 10:16)
- Ley de Moisés:** Tzij Pixab re ri Dios tz'ibital can ruma ri Moisés (Jn. 1:17; Ro. 2:23; 2 Co. 3:15)
- Los cuatro puntos cardinales:** Rucajchal rajlibal ruwachulew
- Wa' que'elawi pa norte, pa sur, pa relebal k'ij y putzakibal k'ij. (Mt. 24:31; Mr. 13:27; Ap. 7:1)
- Lugar Santísimo:** Luwar lic Santo
- E ruca'm upa ja re ri Rocho Dios. Chiri' c'o ri caxa re ri tzij u'anom ri Dios cuc' rutinamit, yey wa caxa ch'ukum rij ruc' oro. Xew takal che ri cajawal raj chacunel pa Rocho Dios coc chupa xa julaj che ri junab re cutz'onoj che ri Dios cucuy quimac ri tinamit Israel. (Mt. 27:51; Heb. 9:3, 8; 13:11)
- Lugar santo:** Luwar Santo
- E ri nabe upa ja re ri Rocho Dios pa c'o wi tak ri chapabal re yacbal uk'ij ri Dios. Chiri' c'o wi ri tzuc'ulibal ak' c'o wukub uk'ab, ri mexa pa caya' wi ri pam ya'tal chwach ri Dios y ri altar re oro pa caporox wi incienso. Xew tak raj chacunel re ri Rocho Dios takal chique queboc chupa wa luwar. (Mt. 24:15; Mr. 15:38; Lc. 1:9)
- Maná:** (Junam rubi'xic pa kach'a'tem)
- E ri xuya ri Dios chique ri tinamit Israel re caquitij chupa ri luwar catz'intz'otic. (Jn. 6:31; Heb. 9:4; Ap. 2:17)
- Mandamiento:** Tzippixab, takanic (Mt. 19:18; 22:38; Lc. 2:27; Heb. 10:16)
- Mansedumbre:** Ch'u'ch'uj c'u'xaj
- Juna ticawex ch'u'ch'uj uc'u'x na cu'an ta nim che rib. (1 Co. 4:21; 1 Ti. 6:11; Tit. 3:2)
- (El) Mediador entre Dios y los hombres:** Ri Jun c'o puk'ab cach'aw pakawi' chwach ri Dios, ri Jun cac'amaw kawach chwach ri Dios (1 Ti. 2:5; Heb. 9:15)
- Mente:** Una'oj junok
- También que'elawi "idea", "inteligencia" y "pensamiento". (Mt. 22:37; 1 Co. 2:16; Ap. 2:23)
- Mesías:** (Junam rubi'xic pa kach'a'tem)
- E que'elawi ri Cristo, Rucha'o'n lo ri Dios. "Mesías" e ch'a'tem pa Hebreo y "Cristo" e ch'a'tem pa griego. (Jn. 1:41)
- Mirra:** (Junam rubi'xic pa kach'a'tem)
- Cunabal qui' ruxlab y lic q'ui rajil. (Mt. 2:11; Jn. 19:39; Ap. 18:13)
- Misericordia** C'utubal re ri rutzil c'u'xaj, c'utubal re ri c'axna'bal c'u'xaj
- Ri Dios cuc'ut ri rutzil uc'u'x chike echiri' cucuy ri kamac. (Mt. 5:7; Ro. 11:30; 2 Jn. 3)
- Nacer de nuevo:** Calax tanchic
- E ri c'ac' c'aslemal cuya ri Dios che junok echiri' cuya rib puk'ab ri Cristo. (Jn. 3:7; 1 P. 1:3)
- Naciones:** Ruq'uiyal quiwach tak ri ticawex e c'o che ruwachulew
- Pa caxtila también caquibi'ij "étnias" che wa'. (Mt. 24:14; Hch. 3:25; Ap. 1:7)
- Nardo:** (Junam rubi'xic pa kach'a'tem)
- E jun cotz'i'ij ca'an perfume che. (Mr. 14:3; Jn. 12:3)
- Obispo:** Aj c'amal quiwach rutinamit ri Dios (Hch. 20:28; Flp. 1:1; 1 Ti. 3:2; 1 P. 2:25)
- Odre:** Surun
- E jun uc'olibal vino 'anom ruc' tz'u'um re caprux o re bexex. (Mt. 9:17; Mr. 2:22; Lc. 5:37)
- Ósculo Santo:** Jun sakil tz'ubuj chi'aj caquiya ri hermanos chiquiwach chwach ri Dios (Ro. 16:16; 1 Co. 16:20; 2 Co. 13:12)
- Pacto:** Ri tzij cu'an junok ruc' jun chic (Lc. 1:72; Hch. 3:25; Ro. 11:27)
- Paganos:** Ri na queta'am ta uwach ri Dios (Mt. 6:7; 1 Co. 5:1; Ef. 4:17)
- Parábola:** C'ambal na'oj (Mt. 13:3; Mr. 4:2; Lc. 18:1)
- Paraíso:** Chomilaj luwar, werta re ri Dios (Lc. 23:43; 2 Co. 12:4; Ap. 2:7)
- Pascua:** (Junam rubi'xic pa kach'a'tem)
- Ronoje junab ri aj judi'ab caqui'an jun nimalaj nimak'ij Pascua rubi'.

E jun nimak'ij cuxtabal re ri xu'an ri Dios che rutinamit Israel echiri' xeberesaj lo Egipto, pa lic x'an wi c'ax chique. Quil Éxodo 12:1-28; 23:14-19; 34:18-26; Deuteronomio 16:1-17. Chupa ri nabe Pascua ri ángel re ri Dios xic'ow chiquixo'l raj Egipto y xebucamisaj ri atzixelab chique ri e alabo. No'j raj Israel xecolobetaj che wa' ma rique xquisok' quic' re bexex che ruchi' ri puerta re ri cocho jela' pacha' ri xtakan ri Dios che. Wak'ij ora ri'oj cakacuxtaj ri nimak'ij Pascua pa tak lok'laj k'ij, cuxtabal re ri kacolobetajic ruma ruquiq'uel ri Cristo. Ri nimak'ij Pascua na e ta uk'ijol ri ralaxibal ri Jesús. (Mt. 26:2; Lc. 2:41; Hch. 12:3)

Pastor:**1) Aj chajal bexex**

Ruchac juna aj chajal bexex e quebutzuku y quebucunaj rawaj yey quebuchajij chiquiwach ritzel chicop. (Lc. 2:8; Jud. 12)

2) Aj chajal rutinamit ri Dios

Ruchac juna aj chajal rutinamit ri Dios e quebuchajij ri quicojom rubi' ri Cristo cha' c'o quiq'uiyibal chwach ri Dios. Cuc'ut Ruch'a'tem ri Dios chique, quebupixabaj y cunimarisaj quic'u'x. (Ef. 4:11; 1 P. 5:4)

Patriarcas: Ri quimam ri tinamit Israel

Wa' e ri cablajuj uc'ajol Jacob. (Hch. 7:8)

Paz: Utzil chomal (Mr. 5:34; Lc. 2:14; 12:51; Gl. 5:22)**Pentecostés: Nimak'ij re Pentecostés**

E jun nimak'ij catzak cincuenta k'ij ric'owic ri nimak'ij re Pascua. Chupa c'u wa nimak'ij xkaj lo ri Ruxlabixel ri Dios paquiwi rutijo'n ri Jesús jela' pacha' rubi'tisim Rire chique. (Hch. 2:1; 20:16; 1 Co. 16:8)

Perla: (Junam rubi'xic pa kach'a'tem)

E jun chomilaj abaj lic c'o rajil. Wa' quesax che jun awaj re mar ostra rubi'. (Mt. 7:6; 13:44-46; 1 Ti. 2:9; Ap. 17:4)

Persecución: Uternabexic junok**ruc' c'axc'obic**

Ri e nabe xquicoj rubi' ri Cristo xeya' pa c'ax ruma ri cubulibal quic'u'x ruc' Rire. (Mt. 5:10; Hch. 8:1; Ro. 8:35)

Perseverar: Cuchuk'ubej rib che u'anic tak ri cu'ano c'a pa q'uisbal re

Jewa' cu'ano tob wa' c'ayew o caric'owibej c'ax ruma. (Mt. 24:13; Ro. 2:7; Col. 4:2)

Piedad: Jun sakil binic silabic chwach ri Dios

Junok "piadoso" e ri uya'om rib che jun sakil binic silabic chwach ri Dios (1 Ti. 4:7-8; Tit. 2:12; 2 P. 3:11)

Principales Sacerdotes: Ri nimak e aj chacunel pa Rocho Dios

E c'o 24 grupos e aj chacunel pa ri Rocho Dios y chiquijujunal wa' c'o jun aj wach, yey wa e aj wach cabi'x "nimak e aj chacunel pa Rocho Dios" chique. (Mt. 2:4; Lc. 23:4; Hch. 25:2)

Profecía: Uk'alajisaxic runa'oj ri Dios, ri k'alajisanic puwi ri catajin lok (1 Co. 13:2; 1 Ts. 5:20; 2 P. 1:21)**Profeta: K'alajisanel re ri Dios**

E ri cuk'alajisaj runa'oj ri Dios y Rutzij ri Dios. (Mt. 2:17; Mr. 11:32; Jn. 7:40)

Prosélito al judaísmo: E junok xcoj pujolom cu'an cuq'uil raj judi'ab

E ri lic culok'nimaj uk'ij ri Dios y utakem ri c'utunic que raj judi'ab, tob ruchu-ukaw na e ta cuq'uil raj judi'ab. (Hch. 2:10; 6:5; 13:43)

Prueba: C'ambal upa junok (Lc. 8:13; Ro. 5:4; Stg. 1:3)**Publicano o cobrador de impuestos: Aj tz'onol puak re tojonic**

Raj tz'onol puak lic tzel quebil cuma ri cach aj Israel ma quechacun ruc' ri gobierno romano, ri catakan paquiwi raj Israel. Cabi'x chique e rayinel y elek'omab ma caquitz'onoj uwi ri tojonic ca'anic y ruc' wa' caqui'an c'ax che ri tinamit. (Mr. 2:14-15; Lc. 3:12-13; 19:2)

Púrpura: Morato

Ojertan xew ri lic c'o quiwach pacha' ri reyes o ri beyomab caquicoj c'ul morato, ma wa' lic q'ui rajil. (Mr. 15:17; Lc. 16:19; Hch. 16:14; Ap. 18:12)

Querubines: (Junam rubi'xic pa kach'a'tem)

E pacha' e ángeles. Ri Dios xebucoj jujun querubines re caquichajij ri werta re Edén echiri' xeberesaj bi ri Adán y ri Eva. Quil Génesis 3:24. También ri Dios xtakan che cacoj quic'axwach queb querubines puwi ri caxa re ri tzij u'anom ri Dios cuc' rutinamit. Quil Éxodo 25:18-20. (Ez. 10; Is. 37:16; Heb. 9:5)

Rabí: Lal tijonel

E jun tijonel lic uya'om rib che umajic Ruch'a'tem ri Dios y cuk'alajisaj tak ri umajom chiquiwach ri winak. Tak rutijo'n caquibi'ij "lal tijonel" che. (Mt. 23:8; Jn. 1:49; 4:31)

Reconciliación: Ri caqui'an utzil chomal chiquiwach

Echiri' ri Adán y ri Eva xemacunic, e xquijam ri utzil chomal ruc' ri Dios. Pero ruma ri Kanimajawal Jesucristo, tak ri ticawex utz caquirik tanchi utzil chomal ruc' ri Dios. (Ro. 5:11; 2 Co. 5:18)

Redención: Lok'obal re ri xujamo, colobetajic

1) E echiri' junok c'o tojbal cuya puc'axel ri ujamom, wa' cu'an tanchi re.

2) Tak ri ticawex xec'oji' puk'ab ritzel winak echiri' ri Adán y Eva xemacunic, pero ri Kanimajawal Jesucristo xuya rib pa camic cha' ruma ruquiq'uel cojulok'o y jela' cojresaj puk'ab ritzel winak y coju'an oj re Rire. (Lc. 2:38; Ro. 3:24; Heb. 9:12)

Reino de Dios: Rutakanic ri Dios

E pa catakan wi Rire. Chila' chicaj ronoje puk'ab ri Dios c'o wi. Yey wara che ruwachulew rutakanic e ri cu'an pa canima' janipa ri quiya'om quib puk'ab. (Mt. 6:33; Mr. 4:26; Hch. 8:12)

Reino de los cielos: Rutakanic ri Dios petinak chila' chicaj (Mt.

3:2; 13:24; 19:23)

Regeneración: Ri cu'an tanchi c'ac'

1) E ri ca'an c'ac' che tak ri c'olic (Mt. 19:28; Tit. 3:5)

2) E ri calax tanchi ri ticawex che jun c'ac' c'aslemal (Ef. 4:22-24; Col. 3:8-10, 12)

Resurrección: C'astajibal que ri ecaminak, c'astajibal chiquixo'l ri ecaminak (Mt. 22:31; Hch. 17:32; 1 Co. 15:13)

Rollo, libro: Jubotaj wuj

Ojertan junwi ri libro; e jubotaj wuj 'anom ruc' tz'u'um o ruc' jun tico'n "papiro" rubi'. (Lc. 4:20; Heb. 10:7; Ap. 6:14)

Sacerdote: Ri aj chacunel pa Rocho Dios

Ri chac caqui'an raj chacunel pa Rocho Dios e wa': Quech'aw paquiwi ri tinamit chwach ri Dios ruc' oración, quebixonon, caquic'ul ri kasa'n y caquik'atisaj ri sacrificios que ri tinamit chwach ri Dios. Conoje raj chacunel pa Rocho Dios quipetebem chique ri e ralc'o'al ri Aarón, ri nabe aj chacunel xucha' ri Dios. Quil Levítico 8:1-9, 12-14. Tak ruc'ajol juna aj chacunel pa Rocho Dios quebu'ana e aj chacunel pacha' ri quikaw. (Mt. 8:4; Lc. 10:31; Heb. 7:5)

Sacrificio: Kasa'n re awaj ecamisam chwa juna altar

Ojertan quecamisax awaj paquic'axel ri winak ruma ri quimac. Yey wo'ora na cajawax ta chi ca'an wa', ma ri Kanimajawal Jesucristo xcam paquic'axel ri ticawex, tojbal re ri quimac. (Mt. 9:13; Ro. 12:1; Heb. 9:26)

Saduceos: (Junam rubi'xic pa kach'a'tem)

E jun grupo aj judi'ab lic c'o quiwach. E q'ui chique raj chacunel pa ri Rocho Dios e saduceos. Rique na caquitakej ta ruq'uial takanic que ri fariseos yey na caquicoj taj we e c'o ángeles o we c'o c'astajibal chique ri ecaminak. (Mt. 22:23; Mr. 12:18; Hch. 5:17; 23:8)

Samaria: (Junam rubi'xic pa kach'a'tem)

E jun tinamit c'o chuxo'libal tak ri luwar re Galilea y Judea. Ri aj Samaria e calc'o'al can ticawex e aj naj xec'o'ji' chila' ojertan. Rique na quebopon ta Jerusalem che uyaquic uk'ij ri Dios yey lic tzel quebil cuma ri aj judi'ab. Quil 1 Reyes 12; 16:24; 2 Reyes 17:24-41; Juan 4. (Lc. 10:33; Jn. 4:7; Hch. 8:14)

Santo:

Xew ri Dios lic nim uk'ij santo, ma Rire na junta c'ana umac. (Lc. 1:49; 1 P. 1:15-16)

Santos: Conoje ri lic quiya'om quib puk'ab ri Cristo, ri hermanos quicojom rubi' ri Cristo (2 Co. 13:13; Heb. 3:1)

Santidad: Jusuc' binic silabic chwach ri Dios (Lc. 1:75; 2 Co. 7:1; 1 P. 1:16)

Satanás: (Junam rubi'xic pa kach'a'tem)

E ubi' ritzel winak, ri cajawal ritzel uxlaxel. "Satanás" que'elawi "tz'akal tzij". (Mt. 4:10; Lc. 10:18; 2 Co. 11:14)

Sinagoga: (Junam rubi'xic pa kach'a'tem)

E jun luwar pa caquimol wi quib raj judi'ab cha' caquita Rutzij Upixab ri Dios y caqui'an orar. Pa tak ri tinamit c'o sinagogas, no'j ri Rocho Dios xew ri jun c'o Jerusalem y xew chila' quecamisax awaj chwach raltar re ri Dios. (Mt. 4:23; Lc. 4:33; Hch. 13:42)

Sion: (Junam rubi'xic pa kach'a'tem)

E jun juyub c'o Israel; puwi wa' c'o wi ri tinamit Jerusalem. Yey c'olic que'elawi e ri luwar pa c'o wi ri Dios chila' chicaj. (Mt. 21:5; Heb. 12:22; 1 P. 2:6)

Sobrio: Ri cuch'ob na chi utz sa' tak ri cu'ano (1 Ts. 5:6; 2 Ti. 4:5; 1 P. 5:8)

Sorteo: (Junam rubi'xic pa kach'a'tem)

Ri caqui'an ojertan e pa jun c'olibal caya' raltak co abaj o raltak co che' tz'ibital jun bi'aj chwach. Yey e ri cach'opilin lok echiri' cay-iquiyo'xic, e ri' ri ucha'om lo ri Dios. (Lc. 1:9; Hch. 1:26)

Sumo Sacerdote: Cajawal raj chacunel pa Rocho Dios (Mt. 26:3; Mr. 14:60; Hch. 4:6)

Tabernáculo: Rocho Dios xa caquiric E nabe Rocho Dios xyac cuma ri tinamit Israel. Echiri' xebin rique pa ri luwar catz'intz'otic, caquitor wa', caquic'am bi y caquiyac tanchi pa quec'o'ji' wi. (Hch. 7:44; Heb. 8:5)

Temor: Xi'in ib

Tener miedo:

Lic cuxi'ij rib. (Mt. 2:22)

Temor respetuoso a Dios:

C'o xi'in ib ruc' chwach ri Dios. (Hch. 10:2)

Templo: Rocho Dios

Ri Rocho Dios xyaqui' ruma ri Salomón chupa ri tinamit Jerusalem, e xujal bi ri "tabernáculo" xcuc'a'aj ri tinamit Israel echiri' xebin chupa ri luwar catz'intz'otic. Ri Rocho Dios xc'o'ji' Jerusalem e jun sitio sutum rij ruc' tapia re nima'k tak abaj. Chila' xebopon ri ticawex re que'quiloc'oj uk'ij ri Dios y re que'quiya'a ri quikasa'n chwach ri Dios. Xew chila' tak raj chacunel pa Rocho Dios xequicamisaj rawaj chwa raltar re ri Dios. Chunic'ajal ri sitio c'o jun chomilaj ja queb upa. Ri nabe e ri Luwar Santo y ruca'm e ri Luwar lic Santo. Chupa ri nabe upa ja xew xeboc tak raj chacunel re ri Rocho Dios. Chupa ri Luwar lic Santo xew xoc ri cajawal raj chacunel re ri Rocho Dios. Ri Rocho Dios xyac ruma ri Salomón, xwulix ruma ri rey Nabucodonosor, yey xyaqui' tanchic ruma ri Zorobabel chupa ruk'ijol ri Esdras. Chwach pan ri ralaxibal ri Jesús, ri Herodes xujek uyijbaxic ri Rocho Dios, yey wa' xwulix cuma ri soldados aj Roma chupa ri junab 70 D.C. cuarenta junab chwi rucamic ri Jesús. (Mt. 24:1; Mr. 12:35; Hch. 2:46)

Tentación: Ri camin uwach junok pa mac, c'ambal upa junok

E ritzel winak o tak ri rayibal re ri kati'jil ri cojumin chupa ri mac. (Mt. 26:41; 1 Co. 10:13; Stg. 1:12)

Títulos de Cristo:

El Buen Pastor: Ri Utzilaj Chajinel que bexex (Jn. 10:11)

El Cordero de Dios: Ri K'apoj Bexex (Jn. 1:29; Ap. 5:6)

El Pan de vida: Ri Pam cuya c'aslemal (Jn. 6:48)

El Camino: Ri Be (Jn. 14:6)

La Verdad: Ri K'ijsak (Jn. 14:6)

La Vida: Ri C'aslemal (Jn. 14:6)

Títulos de Dios:

El Altísimo: Ri catakan chwi ronoje (Lc. 1:32; 6:35)

El Dios Padre: Ri Kakaw Dios (Ef. 6:23; Flp. 2:11; Tit. 1:4)

El Señor Dios: Ri Dios Kajawxel (Lc. 1:32; Ap. 4:8)

El Todopoderoso: Ri c'o ronoje unimal chuk'ab puk'ab (2 Co. 6:18; Ap. 4:8; 11:17)

Tribulación: C'axc'obic (Mt. 24:9; Ro. 5:3; Flp. 4:14)

Tribunal: Luwar pa cak'at wi tzij paquiwi ri ticawex (Jn. 19:13; Hch. 18:12; 2 Co. 5:10)

Ungido de Dios: Rucha'o'n lo ri Dios (Lc. 2:26; Hch. 4:27)

Ungir:

1) Cuk'ej che o cusok' che o cucoj che Ca'an wa' re cunabal. (Stg. 5:14)

2) Cucoj puwi'

Ca'an wa' ruc' aceite echiri' junok cacojic re rey o cacojic re cajawal raj chacunel pa Rocho Dios.

3) Ri ca'anic echiri' cayijbax juna

cuerpo re camukic (Mr. 14:3-8; Jn. 12:3-7; 19:40)

Verano: Pa sak'ij

Chupa ri Biblia pa caxtila cabi'x “verano” che ruk'ijol echiri' lic cabucbutic y na jinta jab. Chila' Israel wa' cajeker mayo y caq'uis c'a septiembre. (Mt. 24:32; Mc. 13:28; Lc. 21:30)

Verdad: Ri K'ijsak re ri Dios, ri sakil c'utunic, ri katzij, ri are' (Mr. 12:32; Jn. 1:14; Ef. 4:25)

Vida eterna: C'aslemal na jinta utakexic (Mt. 19:16; Jn. 3:36; 6:68; 1 Jn. 2:25)

Virgen:

1) Junok na c'uli'nak taj y na uminom ta rib ruc' junok (1 Co. 7:25; Ap. 14:4)

2) K'apoj ali o ala (Mt. 1:23; 25:7; 2 Co. 11:2)

Voluntad de Dios: Ri rajawal uc'u'x ri Dios

E janipa ri caraj ri Dios. (Mt. 6:10; 26:42; Hch. 21:14; Ro. 12:2)

Zelote o Cananista: (Junam rubi'xic pa kach'a'tem)

Ri ch'a'tem “zelote” pa griego junam que'elawi ruc' ri ch'a'tem “cananista” pa arameo. Wa' e jun cuq'u'il ri lic cacaj quel lo ri tinamit Israel puk'ab ri takanic re Roma. (Mt. 10:4; Mr. 3:18; Lc. 6:15; Hch. 1:13)